


Bro Nkifrarhu Mrokfot



The New Testament in the Alamblak language of Papua New
Guinea

Bro Nkifrarhu Mrokfot

The New Testament in the Alambalak language of Papua New Guinea
Nupela Testamen long tokples Alambalak long Niugini

copyright © 2003, 2004 Wycliffe Bible Translators, Inc.

Language: Alambalak

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents.
For other uses, please contact the respective copyright owners.

2004-01-01

PDF generated using Haiola and XeLaTeX on 4 Mar 2019 from source files dated 20 Jan 2018
c8dcc3d0-081d-5a1e-a2e7-a7564390e5d0

Contents

FRT	1
Matyu	3
Mak	61
Luk	96
Jon	157
Aposer	200
Rom	251
1 Korin	278
2 Korin	308
Galesia	327
Efesus	337
Filipai	347
Kolosi	354
1 Tesalonaika	361
2 Tesalonaika	367
1 Timoti	371
2 Timoti	379
Taitus	385
Filemon	389
Hibru	391
Jems	416
1 Pita	424
2 Pita	433
1 Jon	438
2 Jon	446
3 Jon	447
Jut	449
Revelesen	452
.	482

Bro Nkifrarhu Mrokfot
 The New Testament in the Alamblak language of Papua New
 Guinea
 Nupela Testamen long tokples Alamblak long Niugini

Bro Nkifrarhu Mrokfot

The New Testament in the Alamblak language of East Sepik Province, Papua New
 Guinea
 [amp]

Translation: © 2003, 2004 Wycliffe Bible Translators, Inc.

Print Editions 2003, 2004, by Bible League International

Web version
 2012, Wycliffe Inc.
<http://www.Wycliffe.org>

<http://pngscriptures.org>

<http://www.ScriptureEarth.org>

This translation is made available to you under the terms of the Creative Commons license (Attribution-Noncommercial-No Derivative Works).

<http://creativecommons.org/licenses/by-nc-nd/3.0>

Your are free to share — to copy, distribute and transmit the text under the following conditions:

- Attribution. You must attribute the work to *Wycliffe Bible Translators* (but not in any way that suggests that they endorse you or your use of the work).
- Noncommercial. You may not use this work for commercial purposes.
- No Derivative Works. You may not alter, transform, or build upon this work.
- In addition, you have permission to port the text to different file formats, as long as you don't change any of the text or punctuation of the Bible.

Notice — For any reuse or distribution, you must make clear to others the license terms of this work.

Tok Orait

Dispela Buk Baibel i kam wantaim tok orait na lo bilong Creative Commons Attribution-Noncommercial-No Derivative Works license. Em i tok olsem yu ken givim kopi long narepela manmeri. Yu ken wokim kopi na givim long husat i laikim. Tasol, yu mas tok klia dispela samting i kam long <http://tokplesbaibel.org>. Yu no ken kisim mani na salim dispela. Yu mas givim natting. Na tu, yu no ken senisim Tok.

Ol piksa i kam wantim ol Baibel na narapela buk i stap long dispela sait i gat tok orait long usim wantaim dispela samting tasol. Sapos yu laik narapela tok orait, yu mas askim husat i papa bilong copyright long dispela ol piksa.

Sapos yu laik stremi samting i no orait long dispela tok orait, stremi tok, salim Buk Baibel, o tainim Tok bilong God long nupela tok ples, yu ken askim mipela.

Olgeta tok orait na lo long tok ples English i stap long <http://creativecommons.org/licenses/by-nc-nd/3.0/legalcode>.

Sapos yu gat askim long dispela, plis askim mipela.
Bukm yorhwa tkitm
Bukt[tab]Kropenyufat[tab]Pes

Matyur
dwandfamo gutnius mrokfot
Barkof kfo nuhas mrokfot

Ndart Matyur wandfamo gutnius mrokfom yorhwa gonborngt. Gutnius mrokfom yorhwa gonborngm, 4-pela gonborngm gutnius mrokfom korhm. Ndar gonborngm Jisasr ndar bbinyssoft nia tohmo yuharoh kfo tndh mrokfom korhm. Ndar Matyur wandfamo gutnius gonborngtn nyungako myorhekwt. Ndar barkof gonborngt yorhwa mrokfom Jisasr Mariat hiyaumo yuhat yo Jisasr nohmo yuhati ee ror tfit sinyahato hefenr muhmo yuhathu kfo nuhas mrokfom korhmt ndar Matyu gonborngt.

Bingot Bro Nkifrarhu profetm kfomo mrokfom nkifram yakitohmoa gonborngtn hta bugamomm. Kfo hna memoum, “Kto Isrerroh Bro Nkifrapno yiyuk yihiotat wom yimar nieruharn tfit yak htakhirahrm.” Nd rom kfo htamo mrokfot nhai furarmomt. Yafothett rhumott. Nd rom kfo memo yimar nierahr, to Jisas Kraisr niamor. Nd Jisas Kraisr niahato ror hingrnamo hingrnefm ndar Matyu gonborngtn hti hik bugarahnm. Nd Bro Nkifrarhu profetm kfo pthamo mrokfom, yafothet bugam rhumom. Wahtitwanm nd mrokfom korhm Matyu 1.22-23, yo 2.4-6 yo 2.14-15 yo 2.23 yo 4.13-16 yo 8.16-17 yo 12.15-21 yo 13.34-35 yo 21.2-5 yo 21.16 yo 26.24 yo 26.31 yo 26.54 yo 27.6-10.

Yo wom mrokfot Matyur dkfomot, Bro Nkifrarhu kingdomkot kfo pthamor. Bro Nkifrar kangr, “Ndar bbinysof thof bugam atohukatohkahann tuhan yindar bugam nanrpayanhdukefrpar hikrahm.” Ndnett Jisas Kraisr fak marnyamort yimaro Bro Nkifrapno yiyuk yihiotat.

Matyu gonborngt yorhwa mrokfom, Jisasr pthamoam, nmbuha nmbuha rhu hanitm. Barkof mrokfo nmbuhat htirahnt sapta 5 pthaknimortn sapta 7 mphtha tmbhomort (5-7). Nd saptaroh mrokfom Jisasr yura wom kminysoft tohhato dkfo pthamo mrokfom korhm. Bok met yindarim yi wany yakitohmotm yirmoh mrokfom hemorm. Yo wom mrokfo nmbuhat sapta 10 korht. Nd saptakfote, disaiper yak hta hanyhato rom hingrnayuk hingrnefm, rom yakyuk krhopam, o rom finji finji tohkfot, ndm kfo ptha nuhasmorm.

Yo wom mrokfo nmbuhat sapta 13 korht. Nd saptakfot kfo nhombra mrokforpam korhmt. Bro Nkifrarhu kingdomkot Jisasr kfo pthamohat, mimn, wit yukhamn, yispamn, kipr bebtn, nd ndmn kfo nhomboram. Yo wom mrokfo nmbuhat sapta 18 korht. Nd saptakfot Jisasrhu tu disaiper mif rhunefthu mrokfom tu Jisasr kfomorm. Wuroh mrokfo nmbuhat sapta 24-25 korhm. Nd saptafhu mrokfom wuroh yihar rhuruha nefm Jisasr kfo pthamor.

Ndar buk Matyukfot wandfayuk yimaru yufat nhai htarmomt. Be kfo kangmt “Matyur Wandfayuk Gutnius Mrokfom”. Ka nd sapta 9.9-13 kfo pthamo takis yakmoa yima Matyur dukahato, ror kfo memom, rorn wandfamort. Ndt be wom yimaro dukefet. Tu nd Matyu gonborngt wandfa mifyuk yimaru yufat nhai frhikakrmomt.

Jisasr niamo yuhat

(*Sapta 1.1-4.16*)

Jisas Kraisrhu frikef yuhathu nkifraroh yufam
(Luk 3.23-38)

¹ Ndarm Jisas Kraisrhu nkifraroh yufayem. Jisasr Defit frikef yuhat niamor, tfit Defitrn Abrahamrhu frika yuhat niamor.*

² Abrahamrn nasakmorr Aisakr. Tfit Aisakr nasakmorr Jekofr. Jekofr nasakmorm Judari rorhu wom nmemrom. ³ Jadar nasakmorf Peres Serarof. Rofhu mmemt Tamat.

* ^{1:1:} Bingot Bro Nkifrar wom bro mrokfot Abrahamrpno fak dbkafmor. Tfit kto wom bro mrokfot fak dbkafmor Defitrpno.

Tfit Peresrn nasakmorr Hesronr. Yo Hesronrn nasakmorr Ramr. ⁴ Yo Ramrn nasakmorr Aminadafr. Aminadafrn nasakmorr Nasonr. Yo Nasonrn nasakmorr Salmonr. ⁵ Salmonr nasakmorr Boasr. Rorhu mmemt Rahaft. Boasrn nasakmorr Obetr. Rorhu mmemt Rutt. Tfit Obetrn nasakmorr Jesir. ⁶ Jesirn nasakmorr King Defitr.

Yo Defitrn nasakmorr Solomonr. Solomonrhu mmemtn Uriarhu mett rhumot. ⁷ Solomonr nasakmorr Rehoboamr. Rehoboamrn nasakmorr Abiyar. Yo Abiyarn nasakmorr Asar. ⁸ Asarn nasakmorr Jehosafatr. Tfit Jehosafatr nasakmorr Jehoramr. Jehoramrn nasakmorr Usiar. ⁹ Usiar nasakmorr Jotamr. Jotamr nasakmorr Ahasr. Yo Ahasrn nasakmorr Hesekiar. ¹⁰ Hesekiar nasakmorr Manaser. Yo Manaser nasakmorr Emonr. Emonrn nasakmorr Josair. ¹¹ Josair nasakmorr Jehoiakinri rorhu nmemrom. Nd yihar Isrerm Babilonko kalabus yi tohmom.

¹² Isrerm Babilonko kalabus bi htanyetmn Jehoiakinr nasakmorr Sealtierr. Yo Sealtierrn nasakmorr Serubaberr. ¹³ Serubaberrn nasakmorr Abiutr. Abiutrn nasakmorr Eliakimr. Eliakimrn nasakmorr Asorr. ¹⁴ Asorrn nasakmorr Sadokr. Yo Sadokrn nasakmorr Akimr. Akimrn nasakmorr Eliutr. ¹⁵ Eliutrn nasakmorr Eleasarr. Eleasarrn nasakmorr Matanr. Matanrn nasakmorr Jekofr. ¹⁶ Jekofr nasakmorr Josefr.

Josefr tohhato Mariat fakmor. Mariat rotn hiyaumotr Jisasr. Jisasr tor nd yimam yutiwa Kraiser. Tor nd yimar Bro Nkifrar bi kfo htamor turhu met yindariroh minrfa htiyakyukr.

¹⁷ Nd na kfo hawihne nkifraroh yufam Abrahamrpno ritohakmom bi 14-pela nkifram tohmom Defitrpno mthomna tmbhomohat. Tfit Defitrpno thomnakni Babilonko kalabus yinyeftpno mthomna tmbhomohat, tfit wom 14-pela nkifram tohmom. Tfit ndha thomnakni nd hbhakyuk Kraisrpno mthomna tmbhomohat wom 14-pela nkifram tohmom.

*Jisasr nurmo yuhathu kfo nuhas mrokfot
(Luk 2,1-7)*

¹⁸ Jisarsru niayuk yuhathu kfo nuhas mrokfot inji korht. Rorhu mmem Mariat, bi kfo nanf hanymomt Josefrpno. Be yuhre nakfo nanf hanyetfn tfit htimomt Mariat yon fanett rhumot. Nd yon fant Bro Nkifrarhu Yafothat kfomott Mariat yon fanett rhumot.

¹⁹ Mariathu kfo nanf yima Josefr dborior yimarn, nd Mariat yon fanet rhumohat ror nhai marimor, “Rikfo akforuhant.” Nhai. Rorhu dukeft duka memor, “Rikfo akfo yiruhant yak yimtnaruhant. Be nann nhowi fnahhato frtrohruhant.” ²⁰ Josefahu yima yuhur inji rhu hanyetrn Bro Nkifrarhu mounmotr twenano niahato kfo memor, “Josef, Defitru tangishofe, mirahn Mariathu yakneft wom bok dukefm ayaka. Wawanyn, nd Mariathu yon fant Bro Nkifrarhu Yafothat kfomott yon fanett korht. ²¹ Nd rot hiyauruha yonrhu yufat wayutatwanr Jisasr. Rorn nrfa rafakrahram tuhan yindarirm Bro Nkifrar finji naneft. Ndnettn nd Jisas yufat wahmbritwanr.”

²² Nd nefm namohat bi Bror profetmpno kfo htamo mrokfo yuhatn inji rhu hikmom. Profetr inji kfo memor,

²³ “Wom mett tafi ram duhatt yon fanett rhuruhatn wom yon yindarir hiyaurahtn yufat yutarahmr Emanuerr.” *Ais 7,14*

Nd yufathu yimbu yuhat inji, “Bro Nkifrar nompno tohwor.”

²⁴ Be Josef sinyamohat nd Brorhu mounmotr kfoyuk mrokfo yuhatn yak hikhato Mariat fakmiyakmort. ²⁵ To nhai rpat rpa rika bukt hwe inji narmof. Be inji nndo tohhany tohhany Mariat hiyaumotr yon yindarir. Yonr nurnimotr Josef yufat futamor Jisasr.

¹ Mariat Jisasr hiyaumohat Judia distrikkorhof taun Betlehemtn hiyaumotr, nd yihar Herotr king tohmor. Jisasr bi nurniyetrn gunym hti hik bohikmoa yimam* marr yuwa muhwako toh tanyhato Jerusalemr mfnahhato ² mtiwon hambro memom, “Nd nurmo nfri yonr, Judaroh kingr, fitha inji yorhwar? Nom marr yuwa muhwako tohrohat nd rorhu gunyr hti tanyhato nienom, famunom, ‘Htiruhanomrn bangu miyuknahato kfo yindhorrahnomr.’” ³ King Herotri Jerusalemthu met yindari bugam nd mrokfot wanymohat rroh yima yuhum nhai rhu marnyarmomm. Be mrokfo kfo duham rhumom.

⁴ Be Herotr naku nhafohmorm prisroh bro yimami boririfhuthu tisam. Nia rifiny bugamotm ttiwon memorm, “Nd yimare, Bro Nkifrar kfo hta memo, rorn yiruharn nd turhu met yindarim minrfa htiyakrahrm, tone fitoh kmitn nia minurruhar?” ⁵ Tfit rom kfo memomr, “Judiakorhof taun Betlehemtn. Profetr wandfamo mrokfot inji kfomot:

⁶ ‘Judako yorhwa kmi Betleheme,

ni nhai be Judako yorhwa yufet yufet kmiroh mongpako rhutakahn. Nhai mif.

Ni yufet kmiye. Ninhu yonrn nanhu tha kmi Isrerm tohukatohrahram.’” *Mai 5.2*

⁷ Be Herotr nd mrokfot wanyhato gunym hti hik bohiket yimam nhofijo kfakmormn ttiwon hik bohikhato memorm, “Nikone fitoh yiharn nd gunyr mfnahmor?” ⁸ Rom yihato kfo hik bohik nuhas marnyamotmr be kfo memorm, “Betlehemko waikahkomm frhik hanykahkomm bi mhtitawokomr, wania wakfo nuhaskahtkma na yihato bangu myuknahato kfo yindhorruhanr.”

⁹ Be rom nd kingr kfoyuk mrokfot wany sanyhato yimom. Yihato buha yihotohatn nd rom barkof marr yuwa muhwako htimo gunyr htiyaknimomr. Be nd gunyr tohakmotr rom be nd gunyr fau hik hanymom. Yi yihato tu nd yonr rhumo kunyshu mingiahuspno mhir nniotamor. ¹⁰ Rom nd gunyr htihato yima yuhum masat masat yindhormomm.

¹¹ Be rom kunys rim fnahnimohat rim htimomf Maria nmehf rpat rhu hasetfn. Nd yonr rim htimomrn bangu yuknahato kfo yindhormomr. Kfo yindhornihato nd rom hanymo gorm yo hta yifetyuk sanda mkum yo dboriorh mtha yarfonet mrpam hemomr. ¹² Be tfit yifungnano hweneftpno twenano Bro Nkifrar kfo memorm, “Mirahko Herotrhu kmifa yuhat tfit anjunom. Wom yuhat wahta hhriftwako.” Be rom yimohat manoh yuhat yimomn turoh kmiko yimom.

Josef riphar Ijifko yimo yuhat

¹³ Nd marr yuwa muhkorhof yimam bi yiyetmn tfit Brorhu mounmotr niamorn Josefr twenano kfo ptha hany memor, “Yo ni met nmehf wayaknikahnfn Ijifko wakrmenyitwako. Niko Ijift yi toh thombat nanhu tngtn watoh garitwa. Na bi kfiwa ee tfit wanietwako. Herotr kangr, ‘Yihato yonr was hehur thuruhanr.’” ¹⁴ Be Josefr wasinyamorn yon tuhan nmehf yaknihato yifungnano fakrmenimom Ijifikorn. ¹⁵ Josefrom Ijift tohetmn Herotrhu noh mrokfot wanyakmomt. Nd neft rhu hikmot profetmpno Bror pthamo yuhatn. Kfo memor, “Nanhу yonr Ijift tohetrn tfit kfafrhotanr Ijift htanyhato nierahr.”

Hos 11.1

Herotr kfomotr bok yon yindarim tadborhamo yuhat

¹⁶ Herotr garithato memor, “Nane ndu yimame yuwi kfo ngeh tanymoma.” Be ndnatn rorhu yima yuhur namburhato wom yimam kfo tkrurafmotrm yimom taun Betlehemtn. Yihato tauntpno rhu hanyuk kmim yi habrihato tafi hus gunyjim duhat yon yindariyennm tadborha bugamomm. Herotr nd gunym hti hiket yimam ttiwon memohat, “Nikone fitoh yiharn nd gunyr mfnahmor,” to ror be yuwi ttiwon rhtimorm. Memor, “Awany hik marnyakahann bt nd yihar nur hanyuk yon yindariyennm tadborharuhanm.” ¹⁷ Nd neft namohat bi Bro Nkifrar profet Jeremiarhu tngtn kfo htamo yuhatn be inji rhu hik twanhomot. Memor,

* ^{2:1:} Bingot gunym hti hikmoa yimam tohmom. Nd gunym hti hikmoa yimam htimoum, wom bro gunyr dbha ksut mfnahr, kfo memoum, nd neft rhurahr. Wom gunyr hti tawomr fitohko mfnahr, kfo memoum, nd neft rhurahr. O wom gunyjimr hti tawomr, yak hofhahato wom tkitt hirwor, kfo memoum, nd neft rhurahr. Nd gunym hti hikmoa yimam inji gunym hti hikhato rom bi dukefmpno rhumoum.

¹⁸ “Bro nur kimrm korhmm Ramakor.

Resert tuthu yonm noh wita nmbuhatpno nurwot.

Rot nhai wofnkaht womm yihato rothu yima yuhur yak marnya bomarnyanef.” *Jer 31.15*

Josef riphar Ijift htanymo yuhat

¹⁹ Herotr nohmotr tfit Brorhu mounmotr Ijifko yimorn twenano Josefr kfo hany memor, ²⁰ “Wasinyakahnn yon tuhan nmehf yaknihato tfit wanjuko kantri Isrerkorn. Nda yonr waskfot kfomo yimam bi nohmom.” ²¹ Be Josefr sinyahato yon tuhan nmehf yaknihato tfit yimom kantri Isrerkorn.

²² To tfit wom mrokfot wanymor. Arkelausrn yifem Herotrhu tkitthu yakhato Judiaroh king toh mrokfot, ndt wanyhato duka yanho hanymor ndkor yinyeft. To nhai, Bro Nkifrar twenano yimorn kfomotrr Josefr distrik Galilikor yimom. ²³ Yimomn wom taunt kutewumt Nasaret, ndha mtohmom. Nd neft namohat to bi profetm pthamo mrokfo yuhatn inji rhu hikmot. Memom, “Yutarahmr Nasaret thofenr.”

3

Jon Baftaisr kfo nuhasmo mrokfot

(Mak 1.2-8; Luk 3.1-18; Jon 1.19-28)

¹ Nd yiham Jon Baftaisr Judiathu nungur tik furat toh habrihato met yindarim kfo memourm, ² “Hefenrhu kingdomfot bi brbohwot. Ndnett tamoh tamoh nefenm mong troh bugakfot.” ³ Nd yima Jonr niahato Bro Nkifrarhu mrokfothu kfo pthaneft to bi Aisaiarn bi kfongotmort rorhu nia mrokfot. Aisaiar kfo memour, “Wom yimar nungur tik furatn tohhato kfo mirahrko,

‘Bro Nungothethru niayuk yuhat wayak marnyak hanyhekomr.’” *Ais 40.3*

⁴ Nd yihart Jonr kamer tmb hingrnayet hmbreshat hmbremour yo yemro thaye nyuh dbkafmour yo rit papkumi winepam, ndm yehato tohmour. ⁵⁻⁶ Jerusalem thofm yo Judiakorhofm yo brbo tek Jodent toh habrimoam, nd nd yimam Jonrpno yihato nd rroh fasoh fasoh nefm kfo nriyafnimoamm tek Jodentn baftaisimmourm.

⁷ Bok Farisimi Sadyusim niamoum baftaisneft Jonrpno. Jonr inji htihato kfo memourm, “Arom nandomrhu yon kunyso, Bro Nkifrar yimam yak tutfa thombat, finji yak hhrifniruhako? ⁸ Nikmoh nefm, tohefm amfrfnah marnyakahtm riruh aruhyukm htiruhamn duka mirahm, ndm bi mong trohmomm fasoh fasoh nefm. Bi mar nukat tohwom. ⁹ To mirahko, ‘Ka nom Abrahamrhu yon kunysn ka yak trohnirahrnom.’ Nhai. Ndt rot niko mirahko bro yima yuhum ahtanomt. Wawanyko. Na kfiwanko, Bro Nkifrar akfor, nda tahim yak krekufrfotrm, Abrahamrhu yonm rhurfom. ¹⁰ Hudarim bi mispimn bi frhamsisetm korhm. Fitoh mim nhai hifa yukha hir marnyakahm, nd hudariye yohakhany yohakhany, kahrpatn dbuhaf hanyrahm.*

¹¹ Na bupaye baftaisimwohat niko hatohyuk fasoh fasoh nefm bi mfafhonimokomm, ndnetann baftaisimwanko. Nanhu mongko nia hnewa yimarn, tu bro bbukeft hatohwor. Na nhai ror kanjo bbukeft hatohkaha. Na nhai rorhu senderm yakitohak hekphot.† Rorn tu Bro Nkifrarhu Yafothati kahtpno baftaisimrahrko. ¹² Ror wit yukharoh tawokakhato wutuyakyuk safort kakitohwor. Wutuyakhato yeyukrpam tuha misuhruham, yak rmonruharm wit kunysn htarahrm. Nd krtikt nndo misuhukt yak rmonruhartn tu tiha yiha nanyjar hatohma kahtn kandhirahrt.”‡

Jonr Jisasr baftaisimmo yuhat

(Mak 1.9-11; Luk 3.21-22)

* ^{3:10:} Nd kfo nhombra mrokfot Bro Nkifrar nda bbinysothu fasoh yimam yak thuruha nmbuhathu kfo nhombra kfoyet. † ^{3:11:} Wom yimar hatohyuk senderroh ki jbcafuk mtinf yak nyusak thumoahat, tu yufapa duha yima furapam kanjo womr hatohyuk senderm kak thumoumm. ‡ ^{3:12:} Nd kfo nhombra mrokfot hifa yimami fasoh yimaro kfo nhombra mrokfoyet.

¹³ Be tor nd yiharn Jisasr Galilit htanyhato tek Jodenkor yimor. Memor, “Jon Baftaisrpno aikahann rorhu tire baftaisafrahra.” ¹⁴ Be wom Jonr inji htiyakhato memor, “Akfo rafoyanr.” Ndnetrn kfo memor, “Ni tamohmpno nanopno nie? Na ninnpno yirfota ninn baftaisafrfona.” ¹⁵ Tfit Jisasr kfo wok memor, “Inji akfo wokwohna. Na nd kfiwa mrokfo yuhatn wayak hikn. Inji narahno be nd Bro Nkifrar duka htayuk dukef yuhatn mikmbrerahno.” Be ndnatn Jonr fak hikmor Jisasr kfoyuk mrokfotn.

¹⁶ Jisasr baftaisneftpno wuyak muhakmorn tfit mfrsohneftpno yura mountko hti-mortko rim rhu mrhumot. Yiro moun rifhu yuhatn wuhtiyakmort Bro Nkifrarhu Yafothat ganyom mmkrks kanjo yak nhombranhato fawihnamot. Be nd ganyom mmkrks yawihnehato be yimarn mifakmort. ¹⁷ Tfit yura mountko wom tngt wanymort. “Asor tu nanhu marbit yorhwa yonr yo na tu hifa hti yindhorwa yonr.”

4

*Satanr Jisasr kfo nhebehmo yuhat
(Mak 1.12-13; Luk 4.1-13)*

¹ Be Jisasr ndhart htanymort. Bi Bro Nkifrarhu Yafothat thu nhombrayetrn, to be nd Yafothatn yak hatoh hanymottr, yimor nungur tik furatn. Bro Nkifrar duka memor, “Jisasr nd tkitt tohhato tndhr yihato rorhu yima yuhur tadborhawonrahrr.” ² 40 yiham toh furamor. Nhai nuwa yarmor. Tu wuroh yiharn bi yatinoh namborhohetrn, ³ nd yima yuhum tadborhiwa tndhr mfnahhato kfo memor, “Ni Bro Nkifrarhu yonn rhu thombat, ndar tahim wakfokahtnm, bretpam kekutrahm.” ⁴ Tfit Jisasr kfo wok memor, “Bro Nkifrarhu gonborngt kfo kangt,
‘Nhai wom yimar bretparpat yehato tohwonkahr. Nhai.
Bro Nkifrar kfoyuk mrokfo bugam yehato tohwor.’”

Lo 8.3

⁵ Inji nna pthanihato tfit nd tndhr yaknimorr, hanymorr Jerusalemko yorhwa temperrhu mingiahurhu bikatitn. Yura mhatohmorrn, kfo memor, ⁶ “Ni Bro Nkifrarhu yonn rhu thombat, watuhatoknikahnn, bbinysoft wamitohwonn. Bro gonborngt kfo kangt,

‘Bro Nkifrarhu mounmotm kforuhatrm,
wuyakito hak hanyrahmn.

Rroh tirmn mirhuniruhann,
nhai tahimpno mitawokruhatnm ninhu wuram.’”

Sng 91.11-12

⁷ Jisasr tfit kfo wok memor, “Bro gonborngt kfo kangt,
‘Mirahn Bror ninhu Bro Nkifrar frnhombrakahann
afu htiruha finji hingrnaruhar.’”

Lo 6.16

⁸ Inji kfomotrr, tfit yaknimorr hamuhmorr yura kminysofmn. Yura mhatohhato fak nuhasmorr ndar bbinysoftu bro yufa nanyjaret kmi kmim. ⁹ Kfo memor, “Kanga akfoyann, nanhu yufat kfo nakuhato kfo tatorahn, be ninn nda bbinysof bugat hiruha.”

¹⁰ Jisasr sinyahato kfo wok memor, “Wuri wai! Bro gonborngt kfo kangt,
‘Bro Nkifrarparhu yufat kfo nakuhato kfo bruttnakfot.
Rorpar kfo bruttnahato hikkfot.’”

Lo 6.13

¹¹ Be nd tndhr htanymorr Jisasr. Tndhr htanymohat Jisasr bi yati noh namborhoh bugamor. Tfit mounmotm yihato romn toh dbu hmbreyaknimotmr bmteft tfit fakmor.

*Jisasr Galliko rihingrnakmo yuhat
(Mak 1.14-15; Luk 4.14-15)*

¹² Jonrhu kalabus hta mrokfot Jisasr wanyhato be tfit Galliko yimor. ¹³ Taun Nasaret htanyhato taun Kaperneamt yi mtohmor. Kaperneamt korht Galili bari thmbtn, Sebulun Naftaliroh frikef yuhafhu bbinysoftn. ¹⁴ Nd neft Jisasr namohat, bi Bro Nkifrar profet Aisaiarhu tngt kfo htamo yuhatn fak hikmort. ¹⁵ Aisaiar kfo memor,

“Met yindarim Sebulunrhu tkitm tohyukm
yo Naftalirhu tkitm tohyukm,
marombko yita yuhatn yorhwa tkitm

yo tek Joden mkuko yorhwa tkitm,
ndm Galili distrikkorhofem.
Nd distriktyima tangirohet.

¹⁶ Nd met yindarim, be tu bro kspt yiro tohwam,
be htirahmt bro nukeft.
Nd met yindarim yifungt rhu hasoyukm nukeft yakrahtm.” Ais 9.1-2

Bro Nkifrarhu kingdomkfot Jisasr kfo ptha nuhasmo yuhati tuhan yindariroh dbohnefm yak thumo yuhat
(*Sapta 4.17-9.34*)

Jisasr yakmo barkofhusfhus hingrnahnho yimam
(Mak 1.16-20; Luk 5.1-11)

¹⁷ Nd yiharn Jisasr turhu mrokfot rikfo pthakmort. Kfo memour, “Hefenrhu kingdomkfot bi brbohwot. Ndnettn tamoh tamoh nefenm mong troh bugakfot.”

¹⁸ Jisasr Galili bari thmbt yau hanyhato Saimon Andru najohf rugit yak yif hasetfn htimorf. Saimonr kto Pita yufat futamomr. Rof nd hingrneft hingrnahato maru kakmouf. ¹⁹ Jisasr rof htihato kfo memorf, “Nann wania wahikfn. Nann wahikkahtfn yimaroh yakneft yak nuhasruhanfn.” ²⁰ Be rof inji wanyhato nd rugi wuskar myak htanihato mhikakni twanhomofr.

²¹ Saimon Andru najohf yaknihato yimom. Yau hanyhato tfit buha Sebedirhu yon Jems Jon najohf mhtimorf. Rom tum nitohfit turoh mmbrt tohhato rugim fak nahu dbofta hasomom. Nd Sebedirhu yonf mhtihato kfo naku kangrf, “Wania wahikfna.” ²² Be nd yon najohf inji wanymohat be mhikakni twanhomofr. Yifem Sebedir, ror htanymofr mmbrtn.

Jisasr bok yimam yak marnyamo yuhat
(Luk 6.17-19)

²³ Jisasr distrik Galilit frhtfas bugamort. Turoh rhu rifinyuk rmonm yihato met yindarim mrokfom hemourm. Hefenrhu kingdomkfothu mrokfomn kfo nuhas bonuhas-mourm. Yo met yindarim hatohyuk wonk wonk dbohnefm fak thu bugamorm. ²⁴ Rorhu ndkorhof yi nmbuhat Siria profinshu met yindarim wanyhato hne hna bugamomm womhtet womhtet dbohnefmpno kkor hasetm yo kmi yarh fknayetm yo yimam noh mumeft yakhato tir wuram mengongaknihato bruktpno bruktpno tohakniyetm yo tir noh wura nohemt, ndhtet ndhtet dbohnetm hne hna bugamotmm Jisasr fak marnya hanymorm. ²⁵ Nhai be kuken yima rifhur Jisasr hikrmomr. Kmim sinya buga hanymom. Galilikorhofm, distrik Dekapoliskorhofm, Jerusalem, Judia yo tek Joden mkuko tohyukm sinya bugahato hik hanymomr.

5

Jisasr yura kminyosfkor mtohhato mrokfom hemo yuhat

¹ Jisasr yonmari yima rifhur htiyakhato yura kminyosfko muhmor. Ndha mrhu hasetrn turhu disaiperm mrifiny hmbremomr.

Yimaroh yindhore nmbuham
(Luk 6.20-23)

² Jisasr turhu disaiperm yak nhafohmormn kfo memorm, ³ “Fitoh yimam duka kangm, ‘Nom ndhtet ufaso ruhet yimaponom, Bro Nkifrar hti duka twanhohahrnom,’ ndhtet duket yimam ayindhorthwam. Bro Nkifrarhu kingdomkfot tohrahm.

⁴ Fitoh yimaroh yima yuhum nur dungunangu hasiwum, ayindhorthwam. Bro Nkifrar yak marnyarahrm rroh yima yuhum.

⁵ Fitoh yimaroh rhuneft dboorioh yima yuhumpno rhuhato ptha marnya bo-marnyewum, ayindhorthwam. Tkit tkit romn Bro Nkifrar hirahr.

⁶ Fitoh yimam, be nd dboriorh nefroh hikneft rroh dukefm korhm, ayindhortwam. Tor Bro Nkifrar, rorn yak hta bohtarahrm.

⁷ Fitoh yimam wom yimam hti yuhuwafwomm, ayindhortwam. Tawo Bro Nkifrar hti yuhuwafrahrm.

⁸ Fitoh yimam, rroh yima yuhum wutham ruhetm, ayindhortwam. Bro Nkifrar htirahmr.

⁹ Wom yimam nnayurwatom o tamoh nefm niwatm, niko womko hifa yima yuhum hanyhato nd rroh nefm kfo marnya bomarnyahato tamoh tamoh nefm kak no-hahukkomm, niko ndhtet yimako yindhorkfot. Bro Nkifrarhu yonko rhurahko.

¹⁰ Fitoh yimam, toh marnyahato dboriorh nefm hikwatm, wom yimam be krhopam he furewumm, nd yimam ayindhortwam. Bro Nkifrarhu kingdomkphot tohrahm.

¹¹ Na hikwatko, yimam htihato kfo yukioh boyukiohhato krhopam kahukwomko, yindhorkfot. ¹² Nikmoh yufathu wuskam tamoh tamohm bi hefenr rhu garitmko. Nd nefm niko yekwam, bi nikmoh nyungako toh hnamo profetm to inji nahnamoumm."

Niko youipayeko yo nukefthu yak nukayukeko

(Mak 9.50; Luk 14.34-35)

¹³ Jisasm tfit wompam kfo memor, "Nikom nda bbinyssoftu youipayeko. To nd you gb ye juha youpam finji naruhann tfit you gb yeruham? Ndhtet youpam bi be, bi fasohem. Be inji bbinyssoft truf thuhato yimamn yihom yahotni myahotnineftpno bbpa furam rhunifikfot.

¹⁴ Niko bbinyssoftu nukefthu hayukeko. To wahtiko. Wom taunt ndu yura kmi bikatit urhuyukt nhai yimam hti hambrokfot. ¹⁵ To womt wawanyko. Nhai wom yimam lamt hta funakhato tfit rikat o bro baket yakhato lamthu funeft hta tasifikahmt. Nhai. Lamt hta funak thombat yura hegirwatmt nd kunys rhuyuk yimam nukeft kekwotm. ¹⁶ Ndnatn inji nd niko yakitohyuk kshr yak nuka marnyakfot. Yimam nd niko nayuk nefm htiruhann Bro Yifemrko kfo yindhorrahmr."

Bro Nkifrarhu thfa mntwathu boririfhut

¹⁷ Tfit Jisasm kfo memorm, "Niko na mirahko ka Bro Nkifrarhu boririfhuti profetm ptha htayuk mrokforoh yak thuneftn niamoya. Nhai. Nanpno nd rom bi pthayuk mrokfefm mfrfnahne hneruhattm htirahkomm. ¹⁸ Na kfo mifwanko, mirahko nd boririfhuthu hik yuharoh wom kfo nuhas mrokfefenm o thfa mntwathu kfo tebos o kfo kars nmbuhann ka bi riyak htafrahm. Nhai. Afo nd boririfhut kfoyuk mrokfom afo mfrfnah bugarahm. Bi mfrfnah buganime, ee mounti bbinyssoft mibatiniruhatt, boririfhut riyak htafraht.

¹⁹ Ndnettnd boririfhut yorhwa tefi tefi kfo nuhas mrokfom, kfo tebos mrokfom, kfo kars mrokfom fitoh yimar riyak htahato wommpno mrhuhato kfo famurm, 'Ndhtet tefi tefi yirmoh nmbuhenn hik bugak duha,' yimar inji nayukr, hefenrhu kingdomkphot nia thombat, rorhu yufat nhai mfro mfrfnahruhatt. To fitoh yimar nd boririfhuthu mrokfom hikhato wommpno kfo nuhas bonuhasworm, ndhtet yimar hefenrhu kingdomkphot nia thombat, rorhu yufat mfro mfrfnahraht. ²⁰ Na kfo mifwanko, nikmoh toh nmbuhann nhai Bro Nkifrarhu dukef yuhat hikrfoko, yo nikmoh dboriorh nefm nhai be tu mfrfnah marnyakahm, bi ndu boririfhuthu tisami Farisim namoa kanjo inji nahikwoko. Be nhai hefenrhu kingdomkphot yiruhatrko. Tu be nhai mif."

Jisasm kfomo mrokforoh nakfo gihu yuhat

(Luk 12.57-59)

²¹ Jisasm kfo memorm, "Nikmoh nkifram kfo hawihnamo yirmoht bi wany hnamokomt. Inji kfomot, 'Mirahn wanambur sinyahato yima awas furaya. Yima was furarahn kot tohrahrt.' ²² To nann wom kfot kfiwanko, wom yimar turhu yimatrpno nna huttf, nd yimar kot tohrahrt. Ufaso faso kfo rindho borindherr womr, be nd yimar bro kaunser yimampno kot tohkfot. Yo wom yimar tonehato womr kfo famurr, 'Ar mmo dangnhar,' inji kfoyuk yimar kaht riyahr.

²³⁻²⁴ Ndnettyn yemrom yaknihato kangn, Bro Nkifrar atarioh mthayanr, nd yemro tarioh mthayuk tkittn wom dukefr niern, nd dukefr kfo famurn, ‘Ni nd yimar inji inji namonr.’ Nd dukefr niern, to be nd tarioh yemrom afo miyak htanyhato afo nd yimarpno yihato mrokfom nakfo gbhu nakfo dbruf nuhasnihato ee tfit yihato Bro Nkifrar tarioh mthakfot.

²⁵ Womr kangr, ‘Akotimann,’ mrokfot yudbat yak nohkfot. Awi kanga hatohrahn, nd yimar jasru tirt htaruhatrн tfit rorn polisroh tirm htarahrn. Tfite polism kalabus htarahmn. ²⁶ Kalabus yinyeft to be kalabus tohruhann bi nd kotkfot kfoyuk maruhat bi wikenent ee btn fnahnerahn.”

Ijoh tonayet yimaroh mrokfot

²⁷ Jisasr tfit wom mrokfot kfomor. Kfo memor, “Bro Nkifrarhu nkifra yirmoht inji kfomot, ‘Yimam mirahm womroh metm arim fnahnom.’ ²⁸ To nann wom kfot kfiwanko, wom yimar wom mett hti yuhurhato be yima yuhurpar sinyerr, to be bi yima yuhurn nd mett ners.

²⁹ Tirmifkorhof nyngarn wom nefm htihato fasoh nefm nenm, be nd nyngar yak rurhakhato be rpa nyngarpapno rhu marnyakfot. Hus nyngar bugaf rpat rhuneft, wom nyngarn fasoh nefm hanyruhatrn rorn yak hatohaforuhatrн hel riyahn. ³⁰ Tir miftn fasoh fasoh nefm newut, nd tirt tmbho thuhato be rpa tirrpaptno rhu marnyakfot. Hus tir bugaf rpat rhuneft, wom tirtn fasoh nefm naruhatt rotn yak hatohaforuhattn hel riyahn.”

Metroh yak thuneft

(Matyu 19.9; Mak 10.11-12; Luk 16.18)

³¹ Jisasr tfit wom mrokfot kfomor. Kfo memor, “Bro Nkifrarhu nkifra yirmoht inji kfomot, ‘Wom yimar kangr, rorhu mett ayak tuhafoyt, afo tuhan yak tuhafoyk gontwat yakhato nd gontwat hingrnanihato ee mett yak tuhafokfot.’ ³² To tfit nann wom kfot kfiwanko, wom yimar turhu mett, ijoh yuhat yi juha, be yak tuhafo furahato mett toh fura hasohato tfit wom yimar yakneft, nd rot yakyuk barkof yindarirn fasoh nmbuhat rihiyafmort. Rorn yak thu furafmotrt rot toh fura hasohato tfit nfri yimar yakneft, nd nfri yindarir ijoh yuhatuher. Yo nd mett, ror yakyukt, ijoh yuhathu metet.”

Tamoh tamohmpno Bro Nkifrarhu yufatpno bmbri myutak duha

³³ Tfit Jisasr wom mrokfot kfo memor, “Nikmoh nkifram kfo hawihnamo yirmoht bi wany hnamokomt. Kfo hna memoum, ‘Bi wom mrokfot Bro Nkifrarhu yufat futent, mirahn tfit mrokfot akfo kekutant. Bro Nkifrar kukatoh hasiwur. Tu bi kfoyuk mrokfo yuhatn hikkfot.’ ³⁴ To tfit nann wom kfot kfiwanko, mirahko tamohmpno Bro Nkifrarhu yufat auyutanomtko. Tu be nhai mif. Mirahko hefenr auyutakahnomn wom mrokfot ayak dbkafnomt. Hefenr ndr ror Bro Nkifrarhu tohukatohyuk tkitet. ³⁵ Yo mirahko bbinyssoft ayutakahnomn wom mrokfot ayak dbkafnomt. Bbinyssoft rot Bro Nkifrarhu wuraf wayahotwa tkitet. Yo mirahko Jerusalemr yutahato wom mrokfot ayak dbkafnomt. Jerusalemr tu bro Kingrhu tauner. ³⁶ Yo mirahko tukmoh mfham yutahato wom mrokfot ayak dbkafnomt. Nhai nd mfhathu tmars wom tamohm wunahato tmars ganyomtahato tfit wom yiha tfit krtatakfot. ³⁷ Tamoh mrokfom kforahko, bi kfo yakio mrokfot kfiko to be injirpa, o bi kfo rafo mrokfot kfiko to be injirpa. Ndwom ndwom mrokfom pthiwam, ndm tndh Satanr mhfnahnewurm.”

Mirahko tawo tawo annayurnom

(Luk 6.29-30)

³⁸ Jisasr wom mrokfot kfo memorm, “Bro Nkifrarhu nkifra yirmoht inji kfomot, ‘Womr nyngar frdbfern, tawo rorhu nyngar frdbfakfot. Bsor frwokrn, tawo bsor frwokkfot.’

³⁹ To tfit nann wom kfot kfiwanko, mirahko tawo tawo annayurnom. Yimar wom tamoh nefm nerko, mirahko tawo finji ananomr. Wom yimar tonehato yengongfako ftatrn, tfit kekuthato mano korhof yengongfat yak htahekfot. ⁴⁰ O wom yimar ni womnhu siothat htihato kangr kothato ayakant, to be siothat yakhato rpat wom sakethatpno

htahutahato hekfot. ⁴¹ Wom yimar kfo tkrurworn rorhu kpchu rpa kilomita hanyheneft, tfit ninn hus kilomita hanyhekphot. ⁴² Yo wom yimar niahato kfo ttiwonworn tamohroh hanyeft, yakhato wahiyafofphot. O wom yimar niahato kfo ttiwonworn tamohroh be yifrar yakitohtaneft, mirahn awany marsisayanr.”

*Ninhu yahr kmi thofr yak marnya bomarnyakfot
(Luk 6.27-28; 6.32-36)*

⁴³ Jisasr tfit wom mrokfot kfo memor, “Bro Nkifrarhu nkifra yirmoht inji kfomot, ‘Tukmoh yimatm yak marnyakfot. Niko yak bebwa yimamn yak bebfot.’ ⁴⁴ To tfit nann wom kfot kfiwanko, yimam faso faso kak beb bobebwomko, tfit nikomn nd yimam yak marnya bomarnyahato Bro Nkifrapno wakfo bruttnatwakomm. ⁴⁵ Inji narahko, hefenr yorhwa Yifemrhu yonko rhurahko. Nd Yifemrhu marrpar kekworm fasoh net yimami dborioh nayet yimam. Yo ror yahuka buriohrpar wihhato kekworm dborioh yimami fasoh net yimam. ⁴⁶ Nd nikomnayak marnyewa yimarpampno hifa hifa nayak marnyarahko, to mirahko ka Bro Nkifrar htihato ttharahrnom. Nhai. To nd gafmanrhu takis marut yekwa yimam, rom ndhtet yima yak marnyanefrom kakitohwomt. ⁴⁷ Tukmoh najomromrpam o nmemromrpampno nakfo yongm boyongm marnyarahko, to mirahko ka Bro Nkifrar htihato tu yindhorrahernom. Nhai. Nd nakfo yongmnefm rom to nd Bro Nkifrar hik duha yimam newumm. ⁴⁸ Nikmoh toh nmbuham, tu Bro Yifemrko tohwa kanjo be yak teh marnyahato toh marnya bomarnyakfot.”

6

Wom yimaroh tamohroh hanyeft

¹ Jisasr wom mrokfot kfo memor, “Niko wadukaf hanyswako. Mirahko tamoh tamoh dborioh nmbuham be yima nyngahato anakahtnom yimam afo ahtimnom. Inji narahko, to mirahko ka hefenr yorhwa Bro Nkifrar inji htihato ka tawo tamohm hirahrnom. Nhai.

²⁻³ Ni womn kagn wuskapa duha yimam tamohm ahiyanm, mirahn fumrr yakitohyuk yimar tohakhato fumrr nriyaf hanyhato yimam tamohm ahi hanyanm. Be yau tebfi hanyhato nhofijo rihti ahtihato wahtanyhekphot. Yimaroh nyngahato womm tamohm hanyeft, ndt be yuwi kagn, womm inji htihato kfo mirahm, ‘Ndr tu yima hayet yimayer.’ Na kfiwanko, bi ndar yima mif thetmn bi inji kfo yindhorwomn to mirahn ka Bro Nkifrar tfit kfo yindhorrahra. Nhai. ⁴ Nd ni nayuk nefm be inji yimam hti duha. Hingrna kafrohfot. Bro Nkifrapar htirahr. Rorpar htihato rorn tawo ttharahrn.”

*Kfo bruttnanef yuhathu mrokfot
(Luk 11.2-4)*

⁵ Jisasr wom mrokfot kfo memor, “Kangko, Bro Nkifrar akfo bruttnanome, mirahko nd mikfo nhehta mkfo nhehtayet yimam niwa yuhat ahiknom. Rom inji newum. Kfo bruttnanef rroh yima yuhum be myindhornitmm Judaroh rhu rifinyuk rmonm o yihota nadbgm tohhato kfo bruttnanef. Kangm, ‘Tafont tohhato kfo bruttnakahtnom yimam htirahmnom.’ Na kfiwanko, inji niwa yimam to bi yimamn htihato kfo yindhorwom. Bro Nkifrar nhai tfit kfo yindhor inji naruhatr. ⁶ Kangko, Bro Nkifrapno akfo bruttnanome, tukmoh kunyko yihato rumko fknenehato rumthu yifhatikt frkihnihato nikmoh Bro Yifemrko kfo bruttnakfot. Bro Yifemrpar htirahr. Ndnettn tamoh nefm yiro kamonghato nayukm rorn htihato ttha hanyrahrko.

⁷ Yo kfo bruttnanef be mirahko Bro Nkifrar hik duha yimam kanjo akfo bruttna yukenom. Rom inji kfo bruttna yuke thombat duka kangm, ‘Kfo bruttna yukeahntnom nmoh nkifram wanyrahmnom.’ ⁸ Niko mirahko rom niwa yuhatn ahiknom. Tamohm yibonhato be yima yuhurpar duka htaneft, Bro Nkifrar bi htitworm.

⁹ Kfo bruttnanef inji kfo bruttnakfot:
‘O hefenr tohwa nmoh Bro Yifeme,
ninhu hnaru yufat nhai yuta rrha borrhakfot.

- ¹⁰ Nom kangnom, ninhu kingdomkfst aniehnat.
 Nom ninhu duka yima yuhur ahiktwanom, hefenr tohwam hikwa kanjo.
- ¹¹ Hrek yiha yeyuk yeshrim wahanynom.
- ¹² Nom nayuk fasoh fasoh nefenm wayafhonm,
 nom womroh nefm yafuhiwa kanjo.
- ¹³ Tndh Satanr nia toh nhehaknewurnom, mirahn ahti marsisayanm. Nhai.
 Waminrfa htityaktwannom.'
- ¹⁴ Wawanyko. Womm wom fasoh fasoh netmko, rom nayuk nefm duka mu-mafahukomm, tawo nikmoh Bro Yifemr, hefenr tohwar, mumafhirahrko niko nayuk tamoh tamoh nefenm. ¹⁵ Nhai duka mumafherfokomm rom nayuk nefm, to tawo niko nayuk tamoh tamoh nefenm nhai duka mumafohiruhatrko nikmoh Bro Yifemr."

Yeshri kurhato kfo bruttnaneft

¹⁶ Jisasr kfo memor, "Nuwa kurhato rhurahko, mirahko mikfo nhehta mkfo nhehtayuk yimam niwa kanjo tafontn nyingatikm wuyak kihhato arhunom. Yuwi inji anakahtnom hti nhta mirahmnom, 'Nuwa kurhato yorhwamn nyingatikm wuyekwomm.' Inji na duha. Na kfo mifwanko, niko hingrna kafrohyuk hingrnefm tafontn htahato yimam htihato ptha srhhirahmko, to be. Bro Nkifrar nhai tfit ttharuhatrko. ¹⁷ Nuwa kurhato rhurahkome, nikmoh nyingatikm yuk marnya yo tmarim komim marnyahato rhukfot. ¹⁸ Nyingatikm yifatoh marnyarahmko, yimam nhai hti nhtaruhatmko. Nikmoh Bro Yifemr, rorrpar niko hingrna kafrohyuk hingrnefm htirahr. Rorn ttha hanyrahram niko hingrna kafrohwa hingrnefm."

Hefenr wuss wuhta hanyakfot

(Luk 12.33-34)

¹⁹ Jisasr wom mrokfot kfo memor, "Niko mirahko ndar bbinyssoftn niko wuss tamoht yak yakhato masat aharhunom. Ndard bbinyssoftn wuss tamoht masat harhuneft, dmthu ruheht korht. Womm binef wingrt kawutm. Yo rikoh yimaroht korht. ²⁰ Be ndnettn ndar bbinyssoftu wuskar tamohr masat harhu duha. Yura hefenrpar wuthu tibmon bugakfot. Hefenko nhai dmt kabofringkahtm. Nhai binef wingrt yekahtm. Yo nhai rikoh yimam yak tmbranihato yakkahmm. ²¹ Nikmoh yima yuhum be nd wuskam yorhwa kmitn yirahm."

Nyingaf thatipthu kshef

(Luk 11.34-36)

²² Jisasr kfo memor, "Nyingaf thatipthu kshef. Ninhu nyingaf dboriohf rhuneft thatipt yak nukaf hanyrafft. ²³ Nyinga bebetn rhurahn, yak tato botatohato hingrna fura bofurarahm tamoh tamoh nefm. Nd nukeft ni yakitohyukt bi nohraht, be bro yifungt tohrahnn."

Nhai hus tohak yimafhu slef yima tohkfst

(Luk 16.13)

²⁴ Jisasr kfo memor, "Nhai wom yimar hus tohak yimafhu slef yimar tohkfst. Ka womr yindhorfforr, womr hhrekrforr. Womrhu mrokfom wany yakiorforn womrhu mrokfom nhai wany yakiorfotrm. Niko nhai rpatn Bro Nkifrarhu dukefti maru dukeft rpat yikitohkfst."

Rhu duka rhu kinyaki duha

(Luk 12.22-31)

²⁵ "Ndnatn kfo kanganko, mirahko tukmoh rhu toh nmbuhat htihato duka kinyaki bokinyakihato akfo amanyom, 'Nome, tamohm yehato rhuruhanom, o tamohm hmbre wondhruhanom?' Nikmoh dukefm tukmoh toh nmbuham dukewukome, to mirahko be yeshrirpam adukanom. Yo thatipt dukewuko, mirahko hmbresharpam adukanom. Nhai. ²⁶ Nungam htitwokomm. Rom nhai wom yewuri fant nuhtakahm. Rom nhai wom wuss wushato yeshrt o tamoht yak tibmonkahm. Rom be inji rhu furewatm tu hefenr

tohwa Bro Yifemrn kahukrm yesht. Niko finji dukewako? Ka be nd nunga furenrpam hti dukewur? Nhai yimako tur yak yeny nhombrayukko dukakahrko? ²⁷ Yimar be turhu rhu marnya nmbuhatn duka hasonefte ka nd dukeftn nd yimarhu bbinysfthu tohyuk yiham tfit yak nhirta hanyrfomt? Nhai ndar bbinysfthu wom yimar noheft yironak hanyhato afo kfo marifort, ‘Awi ar noheft. Na wofnkaha bmbri nohneft. Na kanga afo atoh buhtaka. Tafi ndar bbinysfthu toh buhtarroya.’

²⁸ Mirahko tukmoh toh nmbuhat htihato akfo amanyom, ‘Nome tamoh hmbresham hmbriruhanom?’ Htitwoko yifako sinyewa plauam nhai tumn hmbreyuk hmbresham hingrnakahmm. ²⁹ To na, na kfiwanko, bingot Solomonr tu dborioh dborioh wondht wondhmuom. To rorhu wondht nhai be mfro yifa tohrmot. Plauam tot tu wondht harhuwomt. ³⁰ Wur rhu htfaswa kipr furat, yihof yimam pukakhato kaht kandhi thuruhat, ndhtet kipr furat to Bro Nkifrar kfiwatr tfa htahato fnhu nmboretwot. Ndnett yimako, Bro Nkifrarhu dukefr rim tohni buga duha yitako, to mirahko duka kinyakinom. Bro Nkifrar hirahrko wondhyuk wuskam. ³¹ Ndnatn mirahko tukmoh toh nmbuhat htihato akfo amanyom, ‘Nome tamohm yehato tohruhanom? Hmbreshame tamoh hmbresham hmbriruhanom?’ ³² Nd yeshri hmbresha dukefrn rhu hasoneft, ndt Bro Nkifrar hik duha yimaroh dukefer. Niko be ndhtet dukefrn rhu haso duha. Nikmoh Bro Yifemrko bi htitwor niko nd ndm yibonwohat. ³³ Tamoh tamohm kangko ayaknom, afo Bro Nkifrarhu kingdomkoti ror tohwa toheft toh hikkfot, ee kto nd niko dukayuk tamoh tamoh dukefm hirahrko. ³⁴ Ndnett niko mirahko yihofrhof yeuk yeshrim o tamohm dukahato aduka kinyaki hasonom. Yihofrhof krhopam, rom yihofrhofem. Mirahko yihofrhof krhopam tfit ayakkahnom hrefrhof krhopampno ahtanomm.”

7

*Mirahko womroh tohefm o nefm htihato akfo nhta ayak nhtanomm**(Luk 6.37-38; 6.41-42)*

¹ Jisasr kfo memor, “Mirahn womroh nefm htihato ayak nhtakahann akfo ameya, ‘Nd nd yimam ndhtet ndhtet yimayem.’ Bro Nkifrar inji yak nhtarahrn, yima inji nayetn. ² Womroh nefm o tohefm htihato kfo nhtarahnm o yak nhtarahnm, tawo Bro Nkifrar kfo nhtarahrn o yak nhtarahrn. Womm finji finji kahuknm, tawo inji hirahmn. Womm he hmarsirahnm, tawo Bro Nkifrarko he hmarsirahrn. ³ Tamohmpno womroh nyingam rhuyuk krpum yamuka, ayak thuhiyanm? Ka nhai hti dukakahnt tunhu nyingatikt hta rafiwa dohta mkut? ⁴ Nd dohta mkut ninhu nyingatikt yuhre yak thu duha, to tfit tamohmpno yamuka, ‘Yinowe, kanga ninhu nyingar yorhwa krpur ayak thuhannr.’ ⁵ Be tunhu nefm kak wuna bowunewun. Afo tunhu dohta mkut riyak htafhato ee btn rhuhato ninhu yinowemrhu nyingar rhuyuk krpur hti marnyahato yak thurahnr. ⁶ Mirahn bi Bro Nkifrarhu yufatpno htafet shrm yakhato tfit yaumn wahiyafoya. Wahiyafrahnm, to kanga kekuthato tfit wasrahmn. Yo mirahn dborioh dborioh tngany mohm yakhato fohtn wahiyafoya. Wahiyafrahnm, to kanga tfit wuraye yahot tmbho botmbhorahmm.”

*Bro Nkifrapno kfo bruttna ttiwonkphot**(Luk 11.9-13)*

⁷ Jisasr kfo memor, “Bro Nkifrapno kfo bruttnahato kfo ttiwonrahko, hirahrko. Yak hambr hanyrahko, mhtirahko. Mkrohnarahko, yifhatikt tfanyrahrt. ⁸ Froh froh yimam yihato mkfo bruttna kfo ttiwonrah, ee hirahrm. Yimam yak hambrorah, ee mhtirah. Yo yimam mkrohnarah, ee kekuthato htiruharmn yifhatikt yak tfanyakrah.

⁹ Wom yonr nuwat tndaurfohat, ka yifemr tahis yakhato tahis wathu nhehaforf? Nhai inji narfotr. ¹⁰ O yonr yirar tndaurfohat, ka yifemr nandomt yakhato nandomtn wathu nhehaforf? Nhai inji narfotr. ¹¹ Niko, fasoh fasoh net yimako, yinem yonm tamohm kfo tndauhft yakhato kahukwokomm. Nd yuhatn to nikmoh tu Bro

Yifemrko he mifahrko niko tamohm dukahato kfo bruttnanef. ¹² Kangko, womm ayak marnyamnome, barkofpam afo niko sinyahato womm yak marnyakfot. Ndhtet neft Mosesrhu boririfhut yo profetroh mrokfom kak hikwot.”

Habhi yihota yuhatn riwitakfot

(Luk 13.24)

¹³ Jisasr wom mrokfot kfo memor, “Habhi yihotar yiyet yihotarhu riwita yuhat habhiyet. Nd yuhatn riwitakfot. Helko yiyet yihotarhu riwita yuhat bro mifet. Hmbrohnat yorhwatt, bok yimam be nd yuhatn tone dukekwom. ¹⁴ Mtoh nkifraniyuk kmit yiyet yihotathu riwita yuhat habhitn hti mumiwumt. Rpa rpa yimarpam htitamtn nd yuhat riwitewum.”

Yo! Giaman profetm hti dukak hanykfot

(Luk 6.43-44; 13.25-27)

¹⁵ Jisasr tfit wom mrofot kfo memor, “Yo! Niko giaman profetm hti dukak hanykfot. Nd giaman profetm yimampno yihato yima yuhum mtadborha nhehwomm. Rom pthayuk tok profet mrokfom mirahko ka kto tfit yafothetm korhm. Nhai. Be niko mfrnhehwom. Rom niewohat briahako sifsifroh that kasinyewum. Yiro yima rifhum yifako tohwa yauroh nefm tohwomm. ¹⁶ Wom yimar kangn, ahtianr ndr tamohtet yimayer, htikfot rorhu nayuk nefmn. Wain yukham nhai hig toftn hirkahtm yimam yakkahmm. Nhai. Yo fik yukham nhaf, nhai mitaku tamentn hirkahtm yakkahmm. Nhai. ¹⁷ Nd yuhatn htirahn, dborioh nnariyet nnar siham nhai nnarikahm. Fasoh nnariyet nnar siham rroh yukham nnariwom. ¹⁸ Dborioh nnar siham nhai fasoh nnariyet nnariham hirkahm. Yo fasoh nnariyet nnar siham nhai ye marnyet nnariham hirkahm. ¹⁹ Fasoh nnariyet nnariham hiret nnari siham yoh thuhato kaht kandhi thuwomm. ²⁰ Ndnettnd giaman profetroh nefm, nd nnar siham ye nhombra ttiwonwa kanjo rroh nefmn yak nhombra hti nhombrakfot.

²¹ To mirahko duka amanyom, ka met yindarim nanhu yufat yutahato kfo yamukam, ‘Bro Nungothet Jisase, Bro Nungothet Jisase,’ ka inji naku kfet yimann yirahm hefenru kingdomkfot. Nhai. Fitoh metm o yindarim nanhu Yifemrhu dukefrko hikmr, tom nd yimarpamn yi torahm. ²² Bro kotkfot yakitohruha yihart bok yimam kot tohhato kfo mirahma, ‘Bro Nungothet Jisase, Bro Nungothet Jisase, nom ninhu yufat kfo yutahato Bro Nkifrarhu mrokfom ptha nuhasmounom. Yo kmi yarh fknayet yimam ninhu yufat yuta nawohhato kmi yarhm fnahnimoum. Yo mirakerkfom hingrnamoahat to be ninhu yufat yuta nawohhato bok mirakerkfom hingrnamoounomm.’ ²³ Nd yiha inji kfoyuk yimam kfo miruhanm, ‘Na nhai tawisaf-wonkahanko. Wur fasoh fasoh nefm yakitohet yimako, wuri waiko.’ ”

Hushtet tkif hingrnayuk kunyf

(Luk 6.47-49)

²⁴ Jisasr wom mrokfot kfo memor, “Ndar na kfo pthiwa mrokfom, yimam wany yakiohato yak hikwam, tu dborioh duka tungunet yimam kuny rahu pokm simene simenim dbkaf hmbrita kanjo inji kitt rom mrokfom wany yakiohato hikwa nmbuhat.

²⁵ Kto buriohr wih wiinhato hnutn nd kunyr hnu hmbrenihato kto tfit wifort tonehato nd kunyr mnhombraneft nhai nd kunyr wohsiskfot. Bi rahu pokm bro bro tahimpno simenim hmbriyetm, to finji kunyrhu wohsiskfot. Ndnettnd ndar na kfo pthiwa mrokfom, yimam wany yakiohato yak hikwam, tu dborioh duka tungunetem. ²⁶ Yimam na kfo pthiwa mrokfom nhai wany yakiohato hik duha yitam, ndm mumetm kanjo kuny singoneft be inji yura nungurn singiwumm. ²⁷ Kto buriohr wih wiinhato hnutn hnu hmbrenihato kto tfit wifort tonehato nd kunyr mnhombraneft nhai nd kunyr toh bmtakfot. Nndo fnykt teh tour fnah yohnitt. Nhai be tu yifo suht suhkahr.”

²⁸ Jisasr nd mrokfom kfo ptha buganihato nd rifinyuk yimam nd ror pthayuk mrokfom wanyhato yak nhtamohat be tuha mrokfo ptha duha rhumom. ²⁹ Mrokfom kfo ptha nuhas bonuhasmohat, nhai be Judaroh boririfhuthu tisam kfo ptha nuhaswa kanjo kfo

ptha nuhasrmorm. Nhai. Mrokfom kfo ptha nuhasmohat bro duka tungunet yimam kanjo kfo ptha hik bohikmorm. Ndnett yimam rorhu mrokfom wanymohat nhai marimom, "Kfo ptha inji narahnom." Nhai. Be tuha mrokfo ptha duha rhumom.

8

*Jisasr lepra dbohneft yaket yimar yak marnyamo yuhat
(Mak 1.40-44; Luk 5.12-14)*

¹ Jisasr yura kminysoft wuhtanyhato yawihnamohat, yonmari yima rifhur fak hik hawihnamomr. ² Wom lepra dbohneft yaket yimar Jisasrpno bangu mtabokmehato kfo naku memor, "Broye, ndar na hatohwa dbohneft yak thurahnt, to be thu troh tanyrahta." ³ Jisasr inji wanyhato nd leprayet yimarn tirt rihtahato kfo memor, "Uwa, na yibonwa." Inji kfoni hanyhato nd dbohneft kfo memor, "Wathu trohnr." Inji kfomotr, nd dbohneft yudbat thu trohmotr. ⁴ Thu troh tanymottr Jisasr kfo memor, "Ni nda dbohneft thu troh tanyhat, mirahn tfit womm akfo nuhasanm. Mosesrhu boririfhut yak hikkfot. Yimam lepra dbohneft yaketm marnyanimoahat inji namoum. Nd hun gifam prisrpno myak nuhasnimoamn, tariorh mthamoum. Nd tariorh mtha yiharn prism ndt htihato kfo memor, 'Nd yimarhu dbohneft bi thu troh tanymotr.' Ni nd yuhat yak hikkfot."

*Soldiaroh keptenrhu hingrna yimarhu dbohneft Jisasr yak marnyamo yuhat
(Luk 7.1-10)*

⁵ Jisasr taun Kaperneamt yimor. Nd taunt tohetrn Romroh 100 soldiaroh keptenr yihato Jisasrpno be nnuhato mkfo memor, ⁶ "Nungothet Jisase, nanhu hingrna yimar dbohna bebhato kunys hwitr. Bi minysaf hmbreyetrn nhai sinyahato rhukfot. Thatipt ke shuwotr. Ndnatn be hwe hasiwur." ⁷ Inji kfo pthamotr Jisasr kfo memor, "Nhai mrokfom. Yirhoyann dbohneft yak thuhiruhanr." ⁸ Nd soldiaroh keptenr tfit kfo memor, "Bro yimaye, mirahn nanhu kunys anea. Na nhai dborioh yimayann nanhu kunys nieruha. Be inji nndo tohhato be wakfokahtn, nanhu hingrna yimar marnyanirahr. ⁹ Na to wom bro tohak ofisar tohekwar na rorhu yinhitn watohwa. Tfit nann wom tohak yimaya tohwa. Nann kakitohwanm tfit wom ami rifhur. Nd ami rifhur nann yakitohhato wom soldiar kfo kanga, nd soldiar anjur, nd soldiar kitr. Kfo kanga, nd soldiar aniar, nd soldiar niewur. Nanhu hingrna yimar kfiwanr, tamohroh hingrnaneft, nd hingrneft hingrnewurt." ¹⁰ Jisasr nd yimarhu mrokfefm wanyhato tuha mrokfo duhatr rhumor. Tfit kekutnihato nd ror hik hanymo yimam kfo memor, "Barenko, nd yimar nndo wom kmi thofer. Nd mrokfot kfiwatr, nanhu yima yuhur duka kanga, Isrerkort nhai wom yimar htikahanr o wanykahanr kfo mekahra, 'Be inji nndo tohhato wakfokahtn dbohnet yimar marnyanirahr.' Nhai. Nhai ndhtet duket yimar htikaha.

¹¹ Kfiwanko, boknambok kantriloh yimam mano mano sinyarahm. Marr yuwa muhwa kantriloh yimam sinyarahm, yo marr yohnita kantriloh yimam sinyarahm. Sinyaruhamn, Abraham, Aisak, Jekofrompno rpat rhu yerahmt nd hefenrhu kingdomkfot htaruha yemro burwat. ¹² To nd barkof Bro Nkifrar bi kfo hta memo, 'Ndar yimann nanhu kingdomkfot rhurahm,' to nd bi kfo htayuk yimamn tfit toh kekuthato yak thu wurasohrahr. Nhai rorhu yufat rhuruhatm. Yak tuhafruhatr bro kspitat tohrahm. Bro kspitat tohhato tau nknekrahm."

¹³ Be nd 100 soldiaroh tohak keptenr, Jisasr kfo memor, "Wanju kunyko. Wanjukahnn htirahnr ninhu hingrna yimarhu dbohneft ninhu dukef yuhat rhu hikraht." Be nd hingrna yimarhu dbohneft, be yudbat teh tmbhakmot.

*Jisasr Pitarhu matohemt yak marnyamo yuhat
(Mak 1.29-31; Luk 4.38-39)*

¹⁴ Be tfit yihato Pitarhu kunysn mfnahmor. Mfnahhato fknenimor. Fknenihato rim htimort Pitarhu matohemt kkah dbohnett hwemot. ¹⁵ Be rotpno yihom rhuhato tirt

fakitohmort. Be inji yakitohmotrt nd dbohneft thu troh tanymott. Be nd mett yudbat marnyani hanyhato sinyamotn yeshrim hta mskahemotm.

Jisasr bok met yindarim yak marnyamo yuhat
(Mak 1.32-34; Luk 4.40-41)

¹⁶ Krifta hanymot, bok yimam hany hanymomm kmi yarh fknayet yimam. Hne hnamoatmm Jisasr mrokfot tumourt nd metm o yindarim hatohmoa kmi yarhm fnahni hanymoum. Yo nd dbohna mifetm, rom nhaf yak marnyaf hanymoatrm marnyani hanymoum. ¹⁷ Jisasr nd namo neft, to profet Aisaiar kfongotmo mrokfotn ror namo neft fak hikmot. Bingot profet Aisaiar kfo memor,

“Turn nmoh dbohnefm yak thumormn nndo tumorm.”

Ais 53.4

Jisasru hik yuhat
(Luk 9.57-60)

¹⁸ Jisasr yonmari yima rishur toh dbu hmbremoatmr kekutnihato turhu disaiperm kfo memorm, “Tek bari mkuko ainyom.” ¹⁹ Nd yima rifinyrn tohmor nkifra boririfhuthu tisar. Yauyaknihato Jisasr rim kfo memor, “Tisa, ni kmi kmi yi htfa thombat na hikhne hakuruuhann.” ²⁰ Jisasr kfo memor, “Kmbru fkohm, rom hwe skitetem, rom bbmuhamn tohwom. Nungam, rom miyuhtamn o wusmn hwitm. Nikmoh Bro Najomrpar be tu nhai ror wom hwe rhu mskayuk tkitt.” ²¹ Tfifit wom disaiperr sinyahato kfo memor, “Bro Nungothete, nanhu yifemr yinohtr, afo rorhu yopt yiruha.” ²² Inji kfomotr, Jisasr kfo memor, “Noheh yimam, rom tum anayop hanym. Ni wania wahikna.”

Jisasr kfohato wifort minoh hmbremo yuhat
(Mak 4.36-41; Luk 8.22-25)

²³ Jisasr bot mikmbremor. Turhu disaiperm htiyaf hanyhato rom rpat mikmbremom. ²⁴ Mikmbrehato rihir hanymom. Buha bari dany yuhatn rim hir hanyhato Jisasr hwemor. Hweyetrn, bro wifort sinyamot. Wifort sinyahato tek barit fifrtuhato yonmari burifhum sinyamom. Burifhum sinyahato rom yimo bot burifhut bi tas finjaknimott. ²⁵ Be yudbat Jisasr frthamomr. Frtha hanyhato kfo hany memomr, “Broye, nome href finji newanom? Nom href yohnitnom!” ²⁶ Jisasr sinyahato kfo memorm, “Niko ndar wiforti burifhut kakrmitko? To nikmoh dukefme fitha yitam? Ka nhai mikahko, ‘Tor ror rpat nienom, nhai yakrmiruhatnom?’ Nikmoh dukefm ka nhai be mfro nann niakahmko?” Be inji kfoni hanyhato nd wiforti burifhut sinya hasomof, ror mrokfot tumort be wufakmof. Wifort tone tmbhomot, tekt be minoh hmbremot. ²⁷ Nd bot rhuyukm inji htihato tuha mrokfo duhatm rhumom. Memom, “Ndarr tamohtet yimarn wiforti burifhut wany yakiohato minoh hmbrif?”

Hus yimafhu kmi yarhm, Jisasr yak thumo yuhat
(Mak 5.1-17; Luk 8.26-37)

²⁸ Jisasr Galili mkuko yi tohwa Gadararoh bbinysok rim dbkafmor. Ndharn kmi yarh fknayet hus yimaf yihato Jisasr mfnahmofr. Nd hus yimaf be yima gum htamoat tahi bakuny mkumn toh htfasmouf. Kmi yarhm tuhagrhamoatmf mfro namburmoatf yimam nhai nd yimaf tohmoa yihota yuhat yirmoam. ²⁹ Nd yimaf hatohwa kmi yarhm Jisasr mhtihato kfo tau naku memom, “Bro Nkifrarhu Yone, nome finji newannom? Nmoh huhra krt kanjo frhabtothato krhopa yak yihar tor yuhre riyorhwor. Bi frohm memomn, ‘Asha wanietwa?’” ³⁰ Fohm rom wuri kkof ke wussohmou. ³¹ Nd yimaf hatohwa kmi yarhm Jisasr kfo naku ttiwon memomr, “Jisase, ni kangn ayak tuhafoyanm, wayak hatohafokahtnnom ndar yimaf htany thombat ndur tohwa foh rifhumn tfit fknihato tohrahnom.”

³² Jisasr nd kmi yarhm kfo memorm, “Wafnahniko.” Be inji kfo tkrurmotrm, rom nd hus yimaf thu troh tanyhato tfit foahmn fknenimom. Be foahmn fknenihato thu hafunanimotmm, nd foahm kmi kihahir yuhat mitarhotnihato tek baritn mitayif wurasoh bugamom.

³³ Nd fohm hatohmao yimam inji htihato fakrmemom. Yakrmenihato taunko yimom. Yihato taunthu yimam kfo nuhas bugamomm rom htimo nefm. Yo nd kmi yarh fknayet yimarhu mrokfom kfo hik bugamofm. ³⁴ Be nd taunthu yimam Jisasrpno yihato kfo tkrurmomr nd taunthu htanyhato tfit womha yinyeft.

9

Jisasr tir wura minysafet yimar yak marnyamo yuhat
(Mak 2.1-12; Luk 5.17-26)

¹ Be Jisasr bot mikmbrenihato tek barit tfit hir hayuknihato yimor Kaperneamko. Tot tur tohmoa taunt. ² Yo wom yimam wom tir wura nohet yimar kroketr hnamomr. Jisasr nd yimar hnayuk yimaroh yima yuhum htimorm. Rroh dukefm Jisasrpar yimom nd yimarhu minysafeftu marnyanineft. Rroh yima yuhum inji htihato nd minysafet yimar kfo memor, “Ar yone, mirahn adukaya. Ninhu fasoh fasoh nefm bi fak tuhahuyann.”

³ Nkifra borirfhuthu tisam Jisasr kfomo mrokfot wanyhato tum rinahti nahtihato nakfo ptha memom, “Nd yimare, kangr Bro Nkifrarhu tkitt ayaka.”

⁴ Nd yimaroh yima yuhum inji dukamohat Jisasr bi htimorm. Htihato kfo memorm, “Tamohmpno nd fasoh dukefm yekwako? ⁵ Kangko finji akfoyane? Kangko akfo amiyar, ‘Ninhu fasoh fasoh nefm bi fak tuhahuyann?’ O kangko akfo amiya, ‘Wasinya wayauyakni?’ ⁶ Na, Bro Najoma, yimaroh fasoh fasoh nefroh yak thu yafothat Bro Nkifrar bi hemora. Afo asomif wom neft yak nuhasrhotanko, duka mirahko nd yimar bro yufeter.” Inji kfonu hanyhato nd tir wura minysafetr kfo memor, “Na kfiwann, wasinyakahnn krokt wayaknikahnt tunhu kunyko wain.” ⁷ Be nd yimar wasinyahato kunyko yimor. ⁸ Tuhan yindarim inji htihato yakrme yima yuhum niahato Bro Nkifrar kfo yindhormomr yimam ndhtet hingrna yafotham yahuka nmbuhat.

Jisasr Matyur naku yakmo yuhat
(Mak 2.13-17; Luk 5.27-32)

⁹ Jisasr yau hanyhato Matyur takis marut tuyuk kunyent rhu hasetrn yihom htimorr. Yihom htihato kfo memor, “Wania wahikna.” Be Matyur sinyahato fak hikakni twanhomorr.

¹⁰ Jisasri turhu disaiperl yihato Matyurhu kunysn nuwa famom. Nd Matyurhu kunys nuwa yamohat wom bok takis marut yakyuk yimam yo wom fasoh nefm nayet yimam yihato rpat nuwa famom. ¹¹ Farisim inji htihato rorhu disaipermpno yihato kfo memomm, “Tamohmpno nd takis yekwa yimami nd ufasoh nefm nayet yimam rpat rhuhato nuwa ye mskewar?”

¹² Jisasr wanyhato kfo memorm, “Yima furam nhai be yi furakahm hunkotharpno. Nhai. Dbohnet yimarpam kitwom hunkotharpno. ¹³ Afo tfit Bro Nkifrarhu rfa borngt afo wamhti dukaktwako. Bro Nkifrarhu rfa borngt kfo yamuka, ‘Na nhai hti wofnkahanko nd niko tarior mtha fura bofirewohat. Yima yuhuwafwa nmbuhatn hti wofnwanko.’

Hos 6.6

Nd mrokfot finji kfiwat? Na nhai dborioh yimaroh dukeftn niarmoya. Nhai. Na fasoh fasoh nefm nayet yimaroh dukeftn niamoya. Memoya, fasoh fasoh nefm nayet yimampno yirhoyann, kforhotanm, nd rroh fasoh nefm thu trohrahmm.”

Nuwa kurhato kfo bruttna yuhat
(Mak 2.18-22; Luk 5.33-39)

¹⁴ Nd yiha Jon Baftaisru uhik ahik htfasyuk yimam Jisasrpno yihato mkfo memomr, “Nom Farisim nuwa kurhato rhu hakutahat, to tamohmpno ninhu disaiperl nhai inji na hakukahm?”

¹⁵ Jisasr kfo memorm, “Wom yimar wom mett yakrahr, rorhu yimatm nhai bi hanurkahmr ror afo rompno yuhre rhu mska inji na thombat. Nhai. Kto yak hambrafruhamr, ee bt rorhu yimatm nuwa kurhato rhurahm.”

¹⁶ Nhai yimam bingotrhof hmbresham muhetm rhuneft tfit nfri rmontha nmbrm yakhato nahukahmm. Yatk hmbreshathu muht tfit nfri rmonthaye nahuneft nfri rmontha nmbrtn teh hma bugarfott yatk hmbreshat. ¹⁷ Yo nhai yimam nfri wain bupam yakhato yatk meme tha kpmn tas hmbrikahmm. Nfri wain bupam yakhato yatk meme tha kpmn tas hmbreneft nd nfri wain bupam rikur prhoruhamn nd yatk meme tha kpt frtfohhato wain bupam mitoh bugarahm. Ndnett nfr wain bupam tu nfr meme tha kpe tas hmbrihato be nhai kpm yoh tfoh inji nakfot.”

*Jisasr wom ofisarhu yonti yo dbottet mett yak marnyamo yuhat
(Mak 5.22-43; Luk 8.41-56)*

¹⁸ Jisasr yuhre Jonrhu disaipermpno ptha hanyetrn, wom ofisar yauyak-nimorn Jisasrpno mtabokmehato kfo memor, “Nanh yont asomif bi fnoht. To ninn wai tir wahtakahtnt yafothat tfit mthu nawohrahtt.” ¹⁹ Be Jisasr sinyamorn nd ofisar mhikaknimorr. Yo rorhu disaipermpn rpat hik hanymomr.

²⁰ Jisasrom yihotat yau hanyetmn wom mett Jisasrhu mongko yauyak-nimotn ror hmbremo sakethathu psifm tire mtayoutimotm. Nd mett dbotteft 12-pela gunyjimm hatohmoutt. ²¹ Rot nd hmbreshathu psifko tire wutayoutimohat, rothu dukeft duka memot, “Be tirrpaye rorhu hmbreshat wutayoutiruhant, nd na hatoh hnewa dbotteft teh tmbhakraht.” ²² Rot inji dukahato mtayoutimohat, Jisasr kekutnihato wahtimort. Wahtihato kfo memor, “Ar yone, ninhu dukeft duka famu, ‘Be tirrpaye rorhu hmbreshat mtayouti thoft, nd dbotteft teh tmbhakraht.’ Ni nd dukeftpno tayoutiwontna ninhu dbotteft teh tmbhekwot.” Be inji kfomotrt, nd dbotteft yudbat teh tmbhakmot.

²³ Be Jisasr yimorn nd ofisarhu kunys mfnahmorm. Mfnahhato mhtiyaknitworm yimam nur windohmpno mayi nmbuham mayi hanyhato ptha hofhta inji namoum. Jisasr inji mwanyhato ²⁴ memor, “Niko wafnahniko. Ndar yont nhai nohrfot, tot be hwitt!” Inji kfomotr memom ka be kfo ddiwur. Ndnatn rom tfit haninemomr. ²⁵ Nd nur kunys rhuyuk yimam yak tuhafhato fnah buganimotm, Jisasr nd yon gus rhumo tkitt rim tohhato tirt wafakmort, be nd yont tfit mfenywomot. ²⁶ Nd ofisarhu yont kasinyamo yuhathu mrokfot nhai wom warhu hasormot. Nd distrikt nd mrokfot thu yufur buganimott.

Jisasr yak marnyamo hus nyanga kunyjet yimafhu mrokfoti tng mmkrhu mrokfot

²⁷ Jisasr ndhar htanyhato tfit yimor. Yau hanyetrn hus nyanga kunyjetf yau hikakni-hato naku kangfr, “Defit frikefthu yon Jisase, wayuhuwafnno.”* ²⁸ Jisasr kunys rim fnahniyetrn nd nyanga kunyjet yima husf yau hikaknihato rim htimoer. Rim htihato ttiwon memor, “Nifnuh dukefm finji dukewafn? Ka duka kangfn, ‘Rorpno yihato rorhu tire kaktitrno nmoh nyangam kukatohwononm.’ Ka inji dukewufn?” Nd yimaf kfo memofr, “Uwa, Broye, no inji dukewuno.” ²⁹ Be nd yimafhu nyangam tir htahato kfo memor, “To be nifnuh dukef yuhath nifnuh nyangam frdborhewum.” ³⁰ Be nyangam tfit myoh dborhahato fukatohmofm. Jisasr kfo hta mrokfom kfo memor, “Nifn ndar nyangam tfit yukatohwa yuhath mirahfn wom yimampno aptha nuhas mif mifnonm.” ³¹ To nhai, nd yimaf yimohat, nhai hikrmofnd mrokfot. Tfit yimofn kfo ntramotf distrik bugathu tuhant yindars wany bugamomt.

³² Nd yimaf fnahni hanyetfn wom tng mmk yimar, kmi yarh fknayetr, hnamomr. ³³ Jisasrpno hnamotmr fak thumorr kmi yarhr. Yak thumotrr pthamor. Tuhan yindars bok dukefm yakhato kfo memom, “Bingot nmoh kantri Isrert nhai ndhtet nefm rhurmotm htirmomm.” ³⁴ Tfit Farisim sinyahato kfo memom, “Nd ror kmi yarhm yak thuwohat, nndo tndhrhu bbukeftpno kak thuworm.”

*Jisasr turhu hingrna yimam hingrnefm hemo yuhat
(Sapta 9.35-10.42)*

* 9:27: Judam rom bi mrokfot wanyngotmomt. Nd mrokfot kfo memor, “Judaroh yakyuk yimar, Defit frikef yuhath nierahr.” Nd mrokfot bi wanyngotetmn ndnett nfr inji kfomom.

Jisasr bok yimam htihato yuhuwafmo yuhat

³⁵ Jisasr kmi kmi, taun taun yi htfashato turoh rifinyuk rmonmn yi rhunhohato mrokfom hemorm. Hefenrhu kingdomkfothu mrokfomn kfo nuhasmourem, yo tuhan yindarim tamohet tamohet dbohnefm rrroh thatipm rhumoam, kak marnyamourem. ³⁶ Nd rifinymo tuhan yindarim htimorm tohukatoh duha sifsifm kanjo. Rroh rhu nmbuhat be tu ufasoh rhu beb mifmom. Htihato yuhuwafmorm. ³⁷ Ndnatn turhu disaiperm kfo memorm, “Mswirthu yewurit bi kak yibonwot. To tmift nhai bok yimam nd yewuriroh yakyukm. ³⁸ Ndnatn tu mswir tikatrpnwo wakfo bruttnakahtko yimam tkruraforuhatrml yihato yewurit yak wurrahmt.”

10

Jisasr yakmo barkof 12-pela aposerm

(Mak 3.13-19; Luk 6.12-16)

¹ Jisasr turhu disaiperm kfakhato niamotm, hemorm dbohnet yimami kmi yarh fknayet yimaroh yak marnyayuk yafothar.

² Jisasr yakmo barkof 12-pela aposerroh yufam inji: barkof yimarhu yufat Saimonr (wom yufat Pitar), yo rorhu nmem Andrur. Yo Sebedirhu yon najohf Jemsri nmem Jonr.

³ Yo Filifr, yo Bartolomyur, yo Tomasr, yo takis marut yak htfasmoa yima Matyur. Yo Alfiusrhu yon Jemsr, yo Tadiusr. ⁴ Yo Selot patikfot tohmoa yima Saimonr, ee wurohr Judas Iskariotr, Jisasr hndhnamo yimar.

Jisasr 12-pela aposerroh hingrna yuham kfo hta bohta nuhasmo yuhat

(Mak 6.7-13; Luk 9.1-5)

⁵ Jisasr turhu 12-pela aposerm hingrnafm kfo tkrurafmohat, kfo tebos botebos nuhasmorm. Asom ror hemo kfo tebos mrokfom: Kfo memorm, “Niko hingrnafat yakinatihat, mirahko yima tangimpno ainyo yo mirahko Samariaroh taunm ainyom. Nhai. ⁶ Isrerroh sifsifmpno waiswako. Rroh sifsifm bi frfnah wurasohmom. Rom duka duka waiswako. ⁷ Waikahkomm wakfo wamitwakomm, ‘Hefenrhu kingdomkfat bi brbohwot.’ ⁸ Waikah-komm dbohnet yimam wayak marnyatwakomm, noheh yimam wakasinyatwakomm, lepra dbohnefetm wayak wus bowustwakomm, kmi yarhm hatohet yimam kmi yarhm wayak thutwakomm. Nd yima yak marnyayuk yafothar be he furiwanko, ndnatn niko yimam tamoh nefm finji naneft mirahko tfit maruha ayaknomm.

⁹ Mirahko gor silva kapa marut ahiyau hiyaunom. ¹⁰ Yo mirahko gegb yohm afotaknom o wom hmbre wuskenm be ayakito furakninomm o su wuram ayakito hakninomm o kio musm. Nhai. Nd niko yiyuk kmiroh yimann niko tamoh tamohm hti dukakfot.

¹¹ Wom kmit o taun kitwoko, afo ttiwon hikkfot. Fitoh yimar kak miyekworko, nd yimarpno toh tanyhato yikfot. ¹² Fitoh kunys kitko, rim tohhato nd kuny shofm kfo yindhor mekfot, ‘Bro Nkifrar ayak marnya bomarnyatwarko.’ ¹³ Nd rim kfo yindhorakniyuk mrokfot nd kuny shofm wanyhato yindhorhato kak miyekwomko, nd niko rim kfo yindhorakni mrokfot hingrnaruhatn nd kunyshu yimam Bro Nkifrar yak marnyarahrm. Nhai yak miyakkahmko, kfo tany mekfot, ‘Bro Nkifraye, mirahn nd kuny shofm ayak marnyanm.’ ¹⁴ O wom kmit o taunt yihato nhai kunym yakmiyahato niko hanyuk mrokfom nhai yindhorkahm wanyneft, nd kmit htanykfat fus wuram tuha nd kmitn frdbofta tanyhato htanykfat.* ¹⁵ Na kfo mifwanko, Bro Nkifrar kfomo kotkfot rhuruha yihart, nd taunt mirahko ka tu kuken krhopam yakrahm. Sodom Gomoraf yakruha krhopam be inji yakrahf. To rom be tu bro krhopa mifm yakrahm.”

Nhai rpahtet krhopam nieruhatm

(Mak 13.9-13; Luk 21.12-17)

¹⁶ Jisasr kfo memorm, “Wawanyko, niko bi sisifm kanjo bi yifako tohwa namburet yauroh rifiny buhar kitwoko. Ndnett niko dukefmpno waiswako. Nandomm kanjo

* 10:14: Disaiperm inji naruhatm, kmi thofm ndt htiruhann, mirahm, ‘O nom yak miyak duha yitanomm inji nem.’

duka hik marnya bomarnyahato tamoh tamoh nefm nakfot. Yo nunga mahum kanjo kmi thofmpno brbo yihato nayak marnyahato tamoh tamoh nefm nakfot. ¹⁷ Niko tuko duka marnyaf hanykfot. Turoh kaunsermpno mkotimhato tu Judaroh rhu rifinyuk rmonmn hanyhato wife thu smbho bosmbhorahmko. ¹⁸ Nanhu mrokforoh yimaroh ptha nuhas hanyeftn yakruhamko gafmanmi kingroh tirmn htarahmko. Nd yuhatn nanhu mrokfot nd kot swirtn ptharuhatkmt nd bro yimami yo yima tangim wanyrahmt. ¹⁹⁻²⁰ Bi kot hanitmko, mirahko duka yakrmihato akfo amanyom, ‘Amai, nome finji ptharuhanom?’ Mirahko inji aduka yanhanom. Kot swirt, Bro Yifemrhu Yafothatn mrokfo rfhur hi hanyruhatrko, mrokfom be tumn mfrfnah hanyrahm.

²¹ Najohfi yagnm tum nahndhna-rahm. Womr sinyahato womr hndhnaruhatrr wasrahmr. Nitohfim nhaf to inji. Yifemr sinyahato yinemr hndhnaruhatrr wasrahmr. Yinemrom nhai yifammampno nayak marnya-ruhatm. Yinemrom sinyahato yifammam hndhnaruhatmm wasrahmm. ²² Yimako na hikrahko, riruh aruhyukm nhai hifa nyingar hta hakuruhatmko. Be hti sr thurahmko. Fitoh yimar inji htihato nhai riyo brurhakhato myafhonirfora, nd yimar Bro Nkifrar yakrahrr. ²³ Wom taunt yihato nanhu mrokfom kfo ptha hanyhato nd taunthu yimam faso kak bebwomko, yakrman-yihato wom nndoh tauntn yikfot. Na kfiwanko, mirahko ka bi Isrerthu taunm mrokfot yak buganiyetmn nikmoh Bro Najemr ka nierahr. Nhai.

²⁴ Wom yonr, wandfa kunys yuhre tohetr, ror tisimyuk tisarhu yinhit tohwor. Yo wom hingrna yimar turhu tohak yimarhu yinhit tohwor. ²⁵ Nd skurr tohet yonr kangr tukanhu tisar kanjo atoha, to nhai mrokfom. Yo hingrna yimar kangr tukanhu tohak yimar kanjo tohak yimaya atoha, to nhai mrokfom. Na nikmoh tohak yimaya Belsebur yufat hmbremoma. Kfo memom, ‘Belseburer.’ To niko to ndhtet yarhroh yufa bebm hmbrirahmko.”†

Bro Nkifrarpas duka yanholfot

(Luk 12.2-7)

²⁶ “Yimam faso faso kak bebwomko, mirahko ayakrmanyom. Arihat kon kafroh hasiwa nefm kto Bro Nkifrar tafont htaruhattrm yimam htirahmm. ²⁷ Nd na nikompno rhuhato nikomrpakompno kfo nuhaswa mrokfom mirahko turpakomn awany hmbritanomm. Yima yima wakfo nuhas buga hanyswakomm. Wakfo nuhas bugakahtkomm wany bugarahm. ²⁸ Mirahko ndar yima mif thetm ayanhonomm. Rom thatiprpat waswatmt nohwot. Yafothathu wasneft rom nhai waskfot. To rom finji yafothat waskfot? Tu duka yanho yimam, Bro Nkifrarpas duka yanholfot. Ror yafothati thatipt rpat hus bugaf yekwarf kahtn tutrf.

²⁹ Niko htitwokomm ndar nunga pirayenm yafuna htfaswam. Niko kangko ka Bro Nkifrar ka nhai htihato yikitohkahrm? Nhai. Nd nunga pirayenm rorhu tirtn korhm. Rorhu tirmn rhuyuk nungenm nhai nohkfot. Niko yimako to inji nd nungenm kanjo rorhu tirmn korhwoko. ³⁰ Yo womt, nikmoh tmariroh tmarifem Bro Nkifrar bi htitahato thomna buga htatewurm. ³¹ Ndnett niko be yakrme furawahko. Bro Nkifrar htihato kakitohworko nd nunga pirayenm yikitohwa kanjo.”

Nom, bi Jisasr hiket yimanom, nom kfo pthahato yimam bi wanykfot

(Luk 12.8-9)

³² Jisasr kfo memor, “Fitoh yimar na hikhato womm kfo nuhas kangrm, ‘Na Jisasr hiket yimaya,’ na kfiwanko, inji kfo nriyafet yimar kto nanhu Yifemrpn kfo miruha, ‘Nd yimar na hikwa yimayer.’ ³³ To fitoh yimar wommpno rhuhato na mong trohrahra, tawo na hefenr yorhwa Yifemrhu nyingahato mong trohruhanr.

Yimam Jisasr hikneft duka marnyahato hikkfot

(Luk 12.51-53; 14.26-27)

† 10:25: Yarhroh bro tohak yarhr futamoumr Belsebur. Nmoh akort kutewunomr Tndhr. Tndher nd Belseburr.

³⁴ Na niamohat mirahko duka amanyom ka bi gburgh hnamorr. Nhai. Na nhai gburghn hnarmoya. Nann yahrt hnamoya. ³⁵ Na ndar bbinysoft niahato yimam hikwotma, arihat htirahko, yinemr sinyahato yifemr yiho hathurahrr. Yo yinemt sinyahato mmemt yiho hathurahtt. Yimborem tuhant sinyahato yimborem yiho hathurahtt. ³⁶ Tum yima riphatehfim tum yiho nahathurahm.

³⁷ Yimar turhu yifammafn bro dukefr yihato tfit na be inji psirnano kakitohwora, nd yimar nhai nanhu yimatr tohruhatr. Yo fitoh yimar turhu yinemri yinemtn rorhu bro dukefr yorhwarn na be psirnano kakitohwora, nd yimar nhai nanhu yimatr tohruhatr.

³⁸ Yo yimar nhai rorhu bgre mis titahato yau hik hnekahra, nd yimar nhai nanhu yimatr tohruhatr. ³⁹ Fitoh yimar ndar bbinysoftthu toh marnya nmbuharpat dukahato ndrpatt fakitothr, kto nd toh marnya nmbuhuat tfit hti hambrafrahrt. To fitoh yimar na dukahato ndar bbinysoftthu toh marnya nmbuhuat nhai dukarfot, nd yimar arihat yo kto niayuk yiham, rorhu toheft be toh marnya hany swanho hanyrahr.

*Kristenm yak marnyet yimar
(Mak 9.41)*

⁴⁰ Niko nanhu disaiperko, frohr kunyko tamoh nakuyekworko, nd yimar nann nakuyekwor. Yo frohr na kunyko nakuyekwora, nd yimar na kfo tkrurafyuk Bro Yifemrn nakuyekwor. ⁴¹ Wom yimar wom profetr htihato kfo kangr, ‘Nd yimar profet hingneft tohwa yimayer. Kunyko nakuya-kruhanr.’ Inji dukahato nakuyekrr, nd yimar Bro Nkifrar profetm ttha hany shombat, rom yakyuk tamohm ror rpat yakrahmm. Yo wom yimar wom Bro Nkifrar hiket yimar htihato kangr, ‘Nd yimar Bro Nkifrar hikwor. Kunyko nakuyakruhanr.’ Inji dukahato nakuyekrr, nd yimar Bro Nkifrar rorhu hiket yimam ttha hany shombat, rom yakyuk tamohm ror rpat yakrahmm. ⁴² Yo na kfo mifwanko, fitoh yimar ndar nanhu yufapa duha disaiperm htihato kfo famur, ‘Ndm Jisasrhu disaiper yimayem.’ Inji htihato be gonng bupa furam hiyefirm, nd yimar tawo Bro Nkifrar ttharahrr.”

Nd yima Jisasr, tamohtet yimayer?

11

(Sapta 11.1-16.20)

*Jonrhu disaiperm kfo tkrurafhato Jisasrpno yimo yuhat
(Luk 7.18-35)*

¹ Jisasr turhu 12-pela disaiperm mrokfom he buganihato nd tkitt tfit htanyhato yimor. Nd Galili rhuyuk taunm yi htfashato Bro Nkifrarhu mrokfot kfo nuhas bonuhasmorm.

² Kraisr hingrnamoa hingrnephro mrokfom Jon Baftaisr kalabus tohetrn wanyakmor. Wanyakhato tu Jonrhu wom disaiperm kfo tkrur memorm, ³ “Brorpno waiko. Waikahkomn wattiwon wamitwako, ‘Ka nd Bro Nkifrar kfo memo, “Wom yimar nierahr.” Ka mif ninn kfomor o ka womr nierahr?”” Be nd ttiwon nmbuhuat yaknihato Jisasr mkfo ttiwonmomr.

⁴ Jisasr wanyhato kfo memorm, “Waikahkomn, Jonr wakfo nuhas bugatwakomr nd niko wanuka mrokfom yo htita nefm. ⁵ Nyinga kunyjetm tfit yukatohwa yuhat yo wura minysafetm marnyanita yuhat yo lepra yaketm marnyanita yuhat yo yimbhindang kihmniyetm marnyanita yuhat yo noheh yimam tfit sinyewa yuhat yo nd knbokrh rirhutayuk yimenm Bro Nkifrarhu gutnius mrokfot wanuka yuhat. Nd ndm wakfo nuhas bonuhastwakomr. ⁶ Yo wakfo wamitwakomr, yimam na niwa nefm htihato rpa dukefrpar rhuhato duka kangm, ‘Nd ror niwa nefm tu yafothet nefm newur.’ Ndhtet dukefm duket yimam Bro Nkifrar toh hongmb hmbreahrm.”

⁷ Be nd yimam yimom. Yimotm, rroh mongkorn Jonrhu mrokfom yakhato kfo pthamorm. Kfo memorm, “Niko nungur tik furat yihato Jonr htihohate tamoh dukefm memoko, ai ahtinomr? Ka memoko, nd wifort yihomakni myaknita yuworthur, ai ahtinom? ⁸ O be nd bro marufa kfet hifa hifa wondh wuska hmbreyet yimar memoko, ai ahtinom? Nd hifa hifa wondh wuska hmbreyet yimar, kingroh kuny kmifam tohwa

yimayer.⁹ To nikome to tamohroh htit yimoko? Profetrhu htit yimoko? Akfoyanko, ror hingrnewa profet hingrneft nndo kitt. ¹⁰ To nd Bro Nkifrarhu rfa borngt kfiwut, ‘Ninhu yi mrokfeftu kfo nuhas hanyuk yimar bi kfo tkruraf hanyrhotanr bi rorn tohak hanyhato mrokfot bi kfo hanyrahrt.

Rorn bi tohak hanyhato yihotar bi yau mngon hanyrahrr.’ Mal 3.1
Nd mrokfot kfomo yimar, to Jonr. ¹¹ Ndnett na kfiwanko, Jon Baftaisrhu yufat be tu broye. Nhai wom yima mif thetr Jonrhu yufat kanjo ndar bbinysoft tohrmor. To tfit kfiwanko, fitoh yimarn tu hefenrhu kingdomfot ftohr, tor nd yimarn tu bro yufa mift yakrahr.

¹²⁻¹³ Jon Baftaisr tafi mfnah duha, Mosesri profetm hefenrhu kingdo-mkfothu mrokfot ptha nuhas hnamomm. Ptha nuhas hnamomn Jon Baftaisr mfnahmor. Jon Baftaisr mfnahhato yihotar fau mngon hanymorr. Tfit nd yiharn namburet yimam rim toh rafakmomt hefenrhu kingdomfothu nia yuhat. ¹⁴ Nd nkifra mrokfot bi nkifra profetm kfo memo Iraijar tfit nierahr, nd mrokfot to Jonrn kfomot. Jonrn bi nia twanhomor. To kangko, nd mrokfot awany yakionomt, nhai mrokfom. ¹⁵ Yimbhindangeteko, ndar na kfiwa mrokfot wanykfot.

¹⁶ Ar yiharhof yimam niwa nefme tamohm akfo nhombrayanm? Akfoya yon mumenm niwa nefm newum. Maket swirlm o wumt swim yonm htitwokomm. Wom yonm mano rirhuhato womm rikfiwumm, ¹⁷ ‘Nom tuhan yindariroh niyak tatrut yiha wumtwa musikkfot wumtnomt, niko nhai grharfoko. Nur windohm mayi nmbuhampno rpatt windohnomm, niko nhai nurrfoko.’ Inji yon mumenm kanjo nnakfo nnakfiwum.

¹⁸ Jon Baftaisr nia tohmohat, nhai nuwa yehato kfo bruttnarmoar. Nuwa kurhato Bro Nkifrapar kfo bruttnamour. Yo nhai spaket drinkfot yarmoar. Yimam inji htihato kfo memoum, ‘Kmi yarhm fknayetru nuwa kurhato kfo bruttnewur.’ Inji kfomomr. ¹⁹ Tfit ar yihat na nikmoh tu Bro Najema niamohat, bupa nuwa yewota, tfit yimam ndt htihato tfit kfo kangm, ‘Wahtiko nd yimar nuwa yemungrofoter yo spaket drinkfot masat hmbritarian spakwor. Yo takis yekwa yimami fasoh nefm niwa yimampno nabnot habriwur.’ Inji inji kfiwuma. Bro Nkifrarhu duka tungunefrn tamoh tamoh nefm mhfnahnewatrm, nd tkittn yimam htihato kfo kangm yafotheter nd rorhu dukefr.’

Bro Nkifrar yak hik duha kmim

(Luk 10.13-15)

²⁰ Boknambok taunm Jisasr bok mirakerkfom fak nuhas hnamourm. Rom inji htimoahat nhai yima yuhum yak kekutrmoom. Ndnatn nd taunroh yimam Jisasr kfo huttmorm. ²¹ Kfo memor, “O ar Korasin thofenko, finji rhu bebhirkhokma? Yo niko Betsaida thofenko, niko inji buga. Finji rhu bebhirkhokma? Bro yuhuwaf nmbuhat korhtko. Bi wom yimar Tairti Saidont aikahrn mirakerkfot ahingrnart, na nikompno mirakerkfot hingrnamo kanjo, na kanga ka Tair thofmi Saidon thofm tum nayuk fasoh fasoh nefm hti bebhato bi bek tham tabhutanihato yuhun brasingm rhuhato yima yuhum bi yak kekutrmomm. ²² Ndnatn na kfiwanko, kto bro kotkfot tohruba yihart, Tair thofmi Saidon thofmne bro yuhuwafeft htarahrt. Nikome be inji. ²³ Yo niko Kaperneam thofko, kangko, ‘Ka yura mount muhrahnom?’ Nhai. Niko nndo helko riyahkonwe. Wom yimar na nikompno mirakerkfot hingrnamo kanjo Sodomt mirakerkfot ahingrnart, na kanga ka Sodomt nhai batirfott. Nhai. Rhurfot. ²⁴ Ndnatn na kfiwanko, kto bro kotkfot tohruba yihart, Sodomt tu bro yuhuwafeft htarahrt. Nikome be inji.”

Krhopam hta kanhitiwa yimako, nanpno wahnekahtkomm yak thuhiruhanko

(Luk 10.21-22)

²⁵ Jisasr inji pthanihato Bro Nkifrapno kfo bruttna memor, “Dajaye, ni nda mounti bbinysoft buriwa Nkifraye. Ni tu hifa dborioh nefm namo. Ni namo nefm hifa nhai nd bro duka tungunet yimampno narmotnm htirmomm. Nhai. Yon mumenmpno namotnm romn htimomm ni namo nefm. Ndnatn na kfo yindhorwann. ²⁶ To Bro Nkifraye, nd nefm ni inji namohat ni tunhu duka yima yuhur inji namo.” ²⁷ “Nantu Yifemr bi nanhu

tirmn tamoh tamohm bi hta bugamorm. To nhai wom yimar nd Bro Yifemrhu Yonr hti mikahr, ‘Arr ka Bro Yifemrhu Yoner.’ Nhai. Tu Bro Yifemrpar tawisafworr. Yo nhai wom yimar nd Yonrhu Yifemr hti mikahr, ‘Ndr ka rorhu Yifemer.’ Nhai. Tu Yinem yonrpar turhu Yifemr tawisafworr. Yo fitoh yimam bi tu Yinemrn bi kfo nuhas famurm, ‘Ndr nanhu Yifemer,’ tom nd yimarpam tawisafwomr nd Yonrhu Yifemr.

²⁸ Niko yimako bro krhopam tita hasohato bi minysaf bugiwako, nanopno wania bugakahkomm rhu witarahko. ²⁹ Na wayakko. Na yakkahkomm nann nikmoh doh mfhar atohhiyanko. Nann doh mfhar tohhato yak nuhasaf hanyruhank. Nann htiyaf hanykfot. Tamoh tamoh nefm na noh hmbre yima yuhurpno niwanm. Nanpno yihato nann doh mfhar tohruhanr, niko nhai wom tamoh dukefm yakruhatko. Nhai. ³⁰ Na doh mfhar tohneft dohr be yi furarahr. Nhai wom tamohmpno mrhutaruhatr.”

12

Rhu krna Sabat yiharhu mrokfot

(Mak 2.23-28; Luk 6.1-5)

¹ Wom yiha, Judam rhu krnamoa bro Sabat yihar, Jisasr wit swirlm htamo yuhamn fau hanymor. Rorhu disaiperm yatinoh hanyhato nd wit swirlroh wit dmm yak tmbhakni hanymoamm fi hanymoumm. ² Farisim inji htihato Jisasr kfo memomr, “Tamohmpno inji nem? Bro Nkifrarhu thfa mntwat inji kfiwit, rhu krna Sabat yiha nhai ndpa ndpam tmbhakkfot.”* ³ Jisasr inji wanyhato kfo memorm, “Nikone Defitri wom yimam yatinoh rhu hasohato nkifra temperr rim htayet nuwa rikat rim yakhato yamo nmbuhathu tndhte, ka htikomt o nhai? ⁴ Defitri to Bro Nkifrarhu temperr fknenihato nuwa rikat bi Bro Nkifrarhu yufatpno rim htayukt rimakmortn, briahako turhu yaunho habriyuk yimampno rim htahato famomt. Nuwa rikat bi Nkifrarhu yufatpno rim htayukt nhai be wom yima furam ye wonakrmomt. Tu prisrpam fiyakmomt. ⁵ Yo niko ka htikomt prism Sabat yiha boririfhut hikhato Bro Nkifrarhu temperr yihato tu prisroh hingrnefm hingrniwa yuhat? Nd Sabat yiha nd prism yi hingrnawohat, to finji niwam? Mrokfetm rhuwom? Nhai. ⁶ Na kfiwanko, nd niko kfiwa Bro Nkifrarhu temperrhu nkifra hingrneft ndt be yura kak wunanimoumt. To kfiwanko, tor wom yimar, tu Bro Nkifrarhu temperrhu hingrneft yakitohwa yimar, tor tukompno brbo tohwor. ⁷ Bro Nkifrarhu rfa borngt wom mrokfot korht. Nd mrokfot kfo kangt, ‘Na nhai hti wofnkahank nd niko taroh mtha fura bofurewohat. Yima yuhuwafwa nmbuhathn hti wofnwanko.’ Nd mrokfothu yimbu yuhat ayakkomt, to nhai fasoh nefm naduhat yimampno ndhtet mrokfom turmotkomm. ⁸ Wawanyko, na nikmoh Bro Najemann nd rhu krna yihar kakitohwanr. Nd yihar kanga finji anaya, nhai tfit wom yima furar kfo htakfot.” Ndnatn nd Jisasrom namo neft nhai fasoh neft narmom.

Rhu krna yiha Jisasr yak marnyamo tir behohet yimar

(Mak 3.1-6; Luk 6.6-11)

⁹ Jisasr nd kmit htanyhato tfit Judam rhu rifinyhato kfo bruttnamoa rmontn fknenimor. ¹⁰ To nd kunysn wom tir gram tip behohet yimar rhumor. Ndhtet dbohnet yimam Jisasr fak marnyamourm. Ndnett noms yimam rhuhat memom, “Afo was tiwonrahnomr. Sabat yiha yak marnyarahrr o nhai.” Nd dukeftpno kfo ttiwon memomr, “Ka Sabat yiha yimam yak marnyanefte ka hifan o nhai?” ¹¹ Jisasr inji wanyhato kfo memorm, “Ni wom yima sifsifetn ninhu wom sifsifr nd rhu krna Sabat yiha muht yohnerfihat, ka be afo hti marsisa htarfonr? Nhai. Miyakrfonr. ¹² Yimar tamoh foh yaurn be nytingarpaye hti marsisa hasokfot, yimayer. Nhai wom kfo rafo mrokfot rhukaht yimam Sabat yiha yak marnyanefte.” ¹³ Inji kfonihato nd tir gram tip behohet yimar kfo memor, “Tir gram tipt wathu susnart.” Thu susnamotrt marnyanimotr.

* 12:2: Judaroh nkifra boririfhut, bi nkifram myakitoh fnahmot, kfo memoum, bro rhu krna Sabat yiha nhai wom tamoh hingrnefem hingrnakfot. Kfo memoum, nd yihar nhai wom tamoh yeshrim yakkfot. Nhai. Nkifra gonborngt htikfot Kisim Bek 34.21. Farisim memom, nd thfa mntwat kfoyuk mrokfotn hanyjbornamom.

¹⁴ Be nd kunys rhuyuk Farisim inji wahti tanymohat nhai wom warhurmom. Be fnahni twanhomom. Fnahnihato Jisasrhu wasyuk mrokfot rim haruhaknimom.

Jisasr tu Bro Nkifrarhu hingrna yima mifer

¹⁵ Jisasrhu was mrokfot Farisim yiro yiro kfo habofknetamohat Jisasr bi htimorm. Jisasr inji htihato nd kmit htanyhato yimor. Ror yimohat bok met yindarim ror yimo yuhat hikaknimomr. Nd yimam dbohnet bugamn rroh dbohnefm fak thu bugamorm.

¹⁶ Dbohnefm yak thu buganimormn kfo memorm, “Na dbohnefm yak thuhat, mirahko wommpno akfo srhnom.” ¹⁷ Nd mrokfeft Jisasr kfomohat Bro Nkifrar profet Aisaiarpno kfomo mrokfotn rhu hikmot. Kfo memor,

¹⁸ “Ndarr nanhu hingrna yimayer. Na tuka kfo htamoyanr.

Rorn hti yindhorhato nanhu yima yuhur rorpno korhr.

Nanhu Yafothar thu nawohruhattr,

kmi kmim tohwa yima tangim kfo nuhas hany mirahrm, ‘Bro Nkifrar bi kak yibonworko.’

¹⁹ Ror nia thoft nhai yimampno nakfo hamuhruhatr,
nhai thfa yaginyaruhatr.

Nhai kmimn o yiho tamn yihom het grhak mhet grhakruhatr.

²⁰ Yimam be suhr suhr yitam nhai be nyngarpaye yukatoh hasoruhatr. Nhai.
Rorn yak kasinyaruharmn tpi hirahrm.

²¹ Yima tangiroh dukefm rorrpar yihato
orrpar yukatoh gari haso hakurahm rroh rhu nmbuhathu yak marnyaneft.” *Ais 42.1-4*

Kfo memom, Jisasr fasoh tndhrhu bbukeftpno hingrnewur

(Mak 3.20-30; Luk 11.14-23; 12.10)

²² Nd yiha wom yarhr fknayet yimar Jisasrpnno hnamomr. Nd yimar tngt foukihmotr yo nyngam kunyjmomr. Jisasrpnno hnamotmr, Jisasr yak marnyamotrr nd yimar tfit fukatohmor yo pthamor. ²³ Yimam inji htihato tuha mrokfo duhatm rhumom. Tum nattiwon nattiwonmoum, “Ndar yimare kane, nd Defit frikefthu Yoner?”[†] ²⁴ Farisim inji wanyhato kfo memom, “Nd yimar yarhroh bro tohak Belseburrhu bbukeftpno kak thuworm kmi yarhm.”

²⁵ Jisasr bi htimorm rom inji dukamohat. Htihato kfo memorm, “Rpa kantrikfot tohyuk yimam buha nayak mkuhato rim toh mtohhato nnaknineft, be nd kantrikfot yohniraht. Nhai wom yimam tohruhatmt. Yo rpa taunt o rpa kunys tohyuk yimam nhaf inji. Tum nayak mkuhato nnayurneft, be nhai wom yimar tohruhatr. Be tum naye dborha nohhato yima duha tkitm rhurahm.” ²⁶ Tndh yarh Satanr, nhaf to inji buga. Nd tndh yarhr sinyahato wom yarhm yak thuneft, be nhai wom yarhm tohruhatm. ²⁷ Nikmoh wom yimam Bro Nkifrarhu yufatpno kmi yarhm yak thu thoft, nhai kfo mekahkomm, ‘Tndhrhu yufatpno kmi yarhm kak thuwomm.’ Nhai. To tamohmpno na Bro Nkifrarhu yufatpno kmi yarhm yak thuwohat, kfo yamukako, ‘Tndhrhu yufatpno kmi yarhm kak thuworm?’ Nikmoh yimatm kfo mirahmk, ‘Kfo furewuko.’ ²⁸ Htikfot. Bro Nkifrarhu bbukeftpno kmi yarhm kak thuwanm, waduka wamitwako, Bro Nkifrarhu kingdomfot bi asot nompno.

²⁹ Nhai wom yimar wom nanyjar nngrajohet yimarhu kunys fknenihato yimar rhu hany rorhu kunys rhuyuk wuskam myaknihekfot. Afo nd kuni sikatr tir wuram kisahato ee btn rorhu kunyshu rhuyuk wuskam yaknikfot.

³⁰ Yimar be buha tohhato nanhu tamoh nefm be nyngarpaye kukatohworm, nd yimar nhai nann tohnho yibonkahr. Womrn tohnho yibonwor. Yimar nhai nann hingrnanhokahr yimaroh yakhato Bro Nkifrarpnno hanyneft, tor nd yimarn mis yakhato tabohikworm.

[†] 12:23: Judam rom bi mrokfot wanyngotmomt. Nd mrokfot kfo memot, “Judaroh yakyuk yimar, Defit frikef yuhatn nierahr.” Nd mrokfot bi wanyngotetmn ndnettn inji kfomom.

³¹ Kfo mifwanko. Bro Nkifrar duka mmorahrm yimam nayuk fasoh fasoh nefm yo tamoh mrokfo bebm tnge pthayukm. To fitoh yimar na Bro Nkifrarhu Yafothathu bbukeftpno hingrneta kfo famur, ‘Fasoh tndhrhu bbukeftpno hingrnewur,’ nd yimar nhai tfit kfo gbhuruhatrt, be Bro Nkifrar nhai duka mmoruhatrnd yimar kfoyuk tngt. Nhai. ³² Fitoh yimar na Bro Najema hingrnayuk hingrneft htihato kangr, ‘Nd yimar nhai fipet hingrneft hingrnakahr,’ inji kfoyuk yimar Bro Nkifrapno tfit kfo gbhukfot. Ndnatn nhai be kfongt duka hanyruhatrt ror pthayuk tngt. Nhai. Duka mmorahrt. To fitoh yimar na Bro Nkifrarhu Yafothathu bbukeftpno hingrneta kfo famur, ‘Fasoh tndhrhu bbukeftpno hingrnewur,’ nd yimar nhai tfit kfo gbuhruhatrt, be Bro Nkifrar nhai duka mmoruhatrnd yimar kfoyuk tngt. Duka hatohrahrt.”

Miyuk tihathu mrokfot

(Luk 6.43-45)

³³ “Hifa sinya warho marnyet mis hifa yukham hirwomt. Fasoh sinya warho marnya duha mis fasoh yukha behohm hirwomt. Yimam yukhamn hti nhtewum. Yukham hifayem, kangm ee nd mis tu hifa dborioh miyet. Yukham fasohem, kangm o nd mis fasoh nnariyet miyet. ³⁴ Arom ruhetmo, yima yuhur rhuyuk tamoh tamoh mrokfo rifhur tfit tngtn ptha nriyafwotm. Ndnett niko, fasoh yima yuhetko, nhai tu hifa dborioh mrokfom mfrfnahkahmko. ³⁵ Yimar, tu hifa dborioh yima rifuhetr, tu hifa mrokfo rifhur, tu hifa dborioh nefm mfrfnahnewumr. Fasoh yima yuhetr fasoh fasoh nefm mfrfnahnewumr.

³⁶ To kfiwanko, nd bro kotkfot yakitohruha yiha, nd yiha nd yimam tubatu fura bofuriwa mrokfom kfo ptha hik bugarahmm. ³⁷ Tuko bi kfoyuk mrokfom Bro Nkifrar tfit yakruharn yak nhta hti kotha inji naruharn, kfo mirahr, ‘Ni kfomo mrokfot krhonitatt, ni mrokfete. Ni womn kfoyuk mrokfot nhai krhonikaht. Ndnett ni nhai mrokfo duhate.’”

Womm memom, “Jisasr mirakerkfot ahingrnakahrt ahtinomt.”

(Mak 8.11-12; Luk 11.29-32)

³⁸ Boririfhu mrokfothu wom tisam yo Farisim yihato Jisasrpno mkfo memom, “Jisase, wom bro mirakerkfot wanakahtn nom htiruhanomn mirahnom, ‘Awi tu yafotheter.’”

³⁹ Jisasr inji wanyhato kfo memor, “Ar yihofrhof fasoh net yimam Bro Nkifrar yafhohato to be kfo kangm, ‘Mirakerkfot htihato ee bt kfo mirahnom tu Bro Nkifrarhu bbukeftpno hingrnewur.’ Inji kfiwotma to na finji kanjohot mirakerkfot hingrnarhota ndtn htiruham? Kangm, ‘Mirakerkfot ahtinom,’ profet Jonar hingrnamo mirakerkfopat hingrnarhota ndt htirahm. ⁴⁰ Jonar husfirpa marmi husfirpa yifungm bro kmi tndh yiarahu yatin rhumor. Bro Najomr to inji narahr. Ndar bbinysothu rifhutn yohniruharn, husfirpa marmi husfirpa yifungm tohraphr. ⁴¹ Bro Nkifrar kot yakitohruha yiha Ninifa thofmn mtohruhamn kfo nriyahirahtm niko ariharhof yimako niwa nefm. Rom bi fasoh nefm mong trohmomm Jonar Ninifat yihato Bro Nkifrarhu mrokfot kfo pthamo yiha. To kfiwanko, tor wom yimar, tu bro mrokfo ptha rifhur harhuwa yimar, tor tukompono brbo tohwar. ⁴² Kto kot tohruha yiharn sautko tohyuk kwint sinyaruhatn tfit rotn tohhato ariharhof yimaro fasoh nefm kfo nriyahirahtm. Nd kwint tu bbinysothu wuroh krayeft tohhato wanymot Solomonrhu hifa hifa riduka aduka yima yuhum. Wanyhato memot, ‘Afo yirhoyann htiruha rorhu duka yima yuhur.’ To kfiwanko, Solomonrhu riduka aduka yima yuhur nhai be mfro rim dukata mdukatarmor. To tor wom yimar asor brbo tohwar. Rorhu dukefrn tu bro mifer. Riduka adukefr tu bro mifer.”

Kmi yarhr wom yimarn hatohmo yuhat

(Luk 11.24-26)

⁴³ “Kmi yarhr wom yimarn hatoh haso kto wom yiha yak tuhafo thombat afo nd yarhr kitwor bupa duha tkittn. Yihato rhuyuk nfri tkitt hambro htfaswor. Frhambro hany frhambro hany nhai wom tkitt yakrfor, ⁴⁴ tfit kfo kangr, ‘Nhai nanhu tohyuk tkitm. Tfite tuka toh tanymo yimarn yiruha.’ Yitarn mhtitworr nd yimarhu yima yuhur yak marnya

bomarnyahato Bro Nkifrarhu Yafothat rhu duha brioh wutharn, ⁴⁵ to be tfit yitarn wom 7-pelakfot miyekworm. Nd 7-pelakfot tu bro bro nefm hatonitm. Rompno mnathu hmbrenihato nd yimar rompno fkniitm. Rompno fknihato be nd yimar nhai ror tohmoa kanjo be wumtnano yikahr. Nhai. Tu nefm newur. Ndar yihofrhof fasoh net yimam, to be inji tu nefm na hakurahm.”

Jisasru tu mmem nmemrom
(Mak 3.31-35; Luk 8.19-21)

⁴⁶ Jisasr yuhre ptha hanyetrn turhu mmemti nmem najohfit yi mfnahmom. Mf-nahhato memom, “Jisasrpno naptharahnom.” Jisasr ror yiro kunys ruhetrn briahako tohmom. ⁴⁷ Wom yimar fknenihato Jisasr kfo memor, “Ninhu mmemti nmem najohfit tom niem wom mrokfomn.” ⁴⁸ Jisasr wanyhato kfo memorm, “Frohmn nanhu mmemroyem? Frohmn nanhu mmemroyem?” ⁴⁹ Jisasr turhu disaiperi riyak nuhas hanyhato kfo memor, “Asom, ar yimamn tom nanhu mmemt yo nmemrom. ⁵⁰ Yimam hefenr rhuwa nanhu Yifemrhu dukefr dukahato yak hikwam, tom nanhu mmemrom, mndaremrom, nmemrom.”

13

Yewuri tpim dborhiwa tkitm
(Mak 4.1-9; Luk 8.4-8)

¹ Nd yiharn Jisasr kunys htanyhato tek bari thmbt mirhumor. ² Tek bari thmbt miruhetrn bok met yindars rifinyaknimom. Rifinyakni rifinyaknimotm Jisasr inji hti batihato sinyanimorn tek barit hiryuk mmbrtm mirhumor. Rom met yindars bari thmbt ritohmom. ³ Bok mrokfom mmbrt rirhuhato rikfohemooahat, mrokfom be yura fafunamourm. Womt kfo memorm, “Wom yimar mswirt hingrnahato wit tpim yaknihato thu brur htasmorm.”

⁴ Yihota tafont misuhuyukm nungam yihato tout buganimomm. ⁵ Wom tpim misuh hanymoum tahi siket tkitmn. Bbpam be htifapamn nd yewuri tpim yudbat dborhahato sinyamom. ⁶ Tfit marr tahato tahi sikthu kkah nadbofnefrpno nd yewuri fanroh nembfam fftahato nohmom. ⁷ Womm hig suhmpno misuh hanyukm rpat hig tofmpno sinyahato kihawot hmbriyafmom. ⁸ Nd tu hifa dborioh bbinysoft misuh hanyukm, romn tu hifa sinya marnyamomn yukha hir trukmom, wom dmm 100 hirmoum, wom dmm 60 hirmoum, wom dmm 30 hirmoum. ⁹ Yimar yimbhindangett, ndar na kfiwa mrokfot wanykfot.”

Jisasr kfomo kfo nhombra mrokforoh yimbu yuham
(Mak 4.10-12; Luk 8.9-10)

¹⁰ Turhu disaiperi niahato ttiwon memomr, “Tamohmpno ni mrokfom yimam yahukohat be yura yafuni-wanm?” ¹¹ Jisasr kfo memorm, “Wanukko, yafuna mrokforoh yakyuk dukefr bi nikomn hemor. Hefenrhu kingdomkfothu kafrohet mrokfom be kfo nhombra kanjo ptharahm o mrokfom be yura yafunarahm, nikomn dukefm bi yakrahkomm. Nikomn dukefm bi hemor. Womm nhai. ¹² Frohr nda yura yafunewa kafrohet mrokfom wanyhato yima yuhum fekr, nd yimar Bro Nkifrar tfit wom dukefm hirahrr. Frohr nd yura yafunayuk mrokfom nhai wom dukefenr yakrfor, nd yimarhu duka yima yuhur yak thurahrr. ¹³ Nd yimam rom nyingam kukatohwomm, to nhai tamohm htikahm. Yo yimbhindangetem, to mrokfom nhai wany hik marnyakahm. Nhai. Ndnetann kanga mrokfom tamoh tamohmn akfo nhombrakahta yima yuhum nhai yakruhatm. ¹⁴ Nd yimam dukefm yak duha yita nmbuhat to be Aisaiar kfomo mrokfo yuhatn kak hikwom. Aisaiar kfo memor,

‘Mrokfom, wanyrahko, wanyrahko, wanyrahko, to nhai wom dukefm yakruhatko.

Nyingam yukatoh hakurahko, to nhai wom tamohm htiruhatko.

¹⁵ To tamohmpno kfo pthayuk mrokfom nhai wanyhato wom dukefm yakruhatko?

Yo yukatohyuk nyingam nhai htiruhatko wom tamohm?

Ndt nhai be sfno. Yimaroh yima yuhum nhai wom dborioh dukef duhatem. Wanyuk yimbhindangm bi be, bi kihmnimomm, yo yukatohyuk nyingam bi kunyj kihmomm. Nyingam akunyj duha yimm awi htifom, yo yimbhindangm akihmni duha yimm awi wanyrfomn yima yuhum yakhato tfit nanopno niarfotm, yak marnyarfoyanm.’
Ais 6.9-10

¹⁶ To niko wayindhortwako. Nikmoh nyingam htitwomm tamoh tamohm, yo yimbhindangm mrokfom wanukmm. ¹⁷ Na kfo mifwanko, bingot boknambok profetmi Bro Nkifrar hiket yimam nd niko htita shrm memooum, ‘Ahtinom,’ to nhai. Nhai nd shrm htirmoamm. Yo nd niko arihat wanuka mrokfeft memooum, ‘Awanynom’, to nhai. Nhai nd mrokfot wanyrmoamt.”

*Yewuri tpiroh kfo nhombra mrokfothu yimbu yuhat
(Mak 4.13-20; Luk 8.11-15)*

¹⁸ Jisasr kfo memorm, “Nd yewuri tpiroh kfo nhombra mrokfothu yimbu yuhat inji korht. ¹⁹ Nd yewuri tpim yihota yau yuhatn misuhwam, ndm kfo nhombramoya yimam hefenru kingdomkfothu mrokfot wanyhato yima yuhum yak duha yihato tfit Tndhr niahato nd rroh yima yuhumn Bro Nkifrar htayuk mrokfot yak thuwa yuhat. ²⁰ Yo nd tahi sikroh yewuri tpim misuhhato dborha dimanditam, ndm kfo nhombramoya yimar afo barkopam hifa yindhor nmbuhatpno yudbat Bro Nkifrarhu mrokfot mhik tefi yaknihato ²¹ tfit tamoh krhopam kekwomr, to be tfit wuyekwor. Wuyakhato bmbri kafho thuwort Bro Nkifrarhu mrokfot. ²² Yo nd yewuri tpim hig suhmn misuhwam, ndm kfomot, yimar afo Bro Nkifrarhu mrokfot kekwort. Mrokfot yekwartn, tfit turhu toh nmbuhat, yo maru dukefrn, nd nd dukefm rim suhnitr, bibe. Nd mrokfot yiro mifrfnahnitt. Nhai sinyahato yukha hirkah. ²³ Nd yewuri tpim tu dborioh bbinysoft sinyahato hirwam, ndt kfomot yimam mrokfot wanyhato wanyduka tungunewamn, wom dmm hirwom 100, wom dmm hirwom 60, wom dmm hirwom 30.”

Mswirthu kipr bebthu kfo nhombra mrokfot

²⁴ Jisasr tfit wom kfo nhombra mrokfot kfo memorm, “Hefenru kingdomkfothu kangme yimar mswirt dborioh wit yukt frtrufmor. ²⁵ Tfit yifungnano kmi thofm hwyetmn nd yimarhu yahr kmim yauyaknihato fasoh kipr bebroh tfam frtruf wuna fnahmomm nd dborioh witroh tpim frtrufmo tkitt. ²⁶ Wit gadent warho bugani ka yukha hirruha asha hti hanymomm nd fasoh fasoh kipr bebt rpat sinyamom. ²⁷ Be nd mswir tikatrhu hingrna yimam inji htihato mswir tikatrpn yihato kfo memomr, ‘Bro yimaye, nom memonom, ka witroh tpirpam frtrufmo. Tone nd nd kipr bebt rpat sinyewate fitoh yuhat niamot?’

²⁸ Kfo memorm, ‘Yahr kmim ndhtet neft namom. Romn nd fasoh kipr bebthu tpim tfit frtruf wunamomm.’ Tfit nd hingrna yimam kfo ttiwon memomr, ‘Ni finji dukewa? Nd kipr bebt ka dbifr thurfonomt?’ ²⁹ Kfo memorm, ‘Woye, nheno! Mirahko ka kiprrpam dbifrwonom. Yewuri fanm bi hir yibon hanyetm rpat dbifr thurahkomm. ³⁰ Be inji rpat afo asinya hanym. Bi nd witroh yak yihayere, ee btn nd witroh yakyuk yimam kforhotanm kiprt dbundoruhamtn marrpno kaunyohato tfit manyruhammn manyet manyetmn hanyhato hta funarahmm. Kto nd witrpat yakhato htarahmt yesht htewa kunysn.’”

*Mastet tpirhu kfo nhombra mrokfot
(Mak 4.30-32; Luk 13.18-19)*

³¹ Jisasr tfit wom kfo nhombra mrokfot kfo memorm, “Hefenru kingdomkfothu kangme tefi mastet tpiyenrn yimar yaknihato turhu mswirt nuherr. ³² Mastet tpiyenr kangme sayor tpiyener. Nd mastet tpiyenr frdborhahato yonmari bufum korhm. Kto nungam tkit tkiroht ndha niahato wuswomt.”

*Yisparoh kfo nhombra mrokfot
(Luk 13.20-21)*

³³ Tfit wom kfo nhombra mrokfot kfo memorm, “Hefenrhu kingdomkote kangme mettn bretpa hingrnayuk plauapami yispam rpat yaktk botk hmbrihato, kto tfit nd bretpat kur fannahato bropat rhuraht.”

*Jisasr kfo pthamoia mrokfom kfo nhombra mrokfompno mrokfom kfo pthamourm
(Mak 4.33-34)*

³⁴ Jisasrh u mrokfom kfo pthamoam nhai be kfo ptha mifrmarm. Nhai. Be kfo nhombramourm. ³⁵ Ror inji be kfo nhombra kanjo mrokfom kfo pthamoahat, to bingot profetr kfomo mrokfo yuhat hik twanhomot. Profetr bingot kfo memor, “Mrokfot kfo ptha thombat, be inji yura yafuna hakuruhanm mrokfom. Nd kfo yafuna mrokfom yimam nhai wany hnarmoam.”

Kipr bebt kfo nhombramo mrokfothu yimbu yuhat

³⁶ Jisasr met yindarim htanymormn kunys fknenimor. Turhu disaiperm yihato ttiwonmomr, “Mswirt sinyayuk kipr bebthu mrokfo yimbu yuhate finji yorhwat? Afo wakfo hikkahtnt awanynom.”

³⁷ Jisasr kfo memorm, “Hifa wit yukham frtrufwa yimar, ndr, Bro Nkifrarhu Yoner.

³⁸ Mswirt, nda bbinysofet. Hifa wit yukham, ndm, Bro Nkifrarhu kingdomkot tohwa met yindariyem. Kipr bebt, ndm, Tndhrhu met yindariyem. ³⁹ Nd kipr bebt yak trufwa yimar, ndr Tndher. Yewurit yak wuriruha yihar, ndr ndar bbinyssoft bnkaruha yihayer. Mswirthu hingrna yimam, ndm, mounmotem. ⁴⁰ Yimam fasoh kipr bebt yak nhafohhato kaht kandhi thuwa kanjo, inji narahm nda bbinysothu wuroh kur tupoh yihar. ⁴¹ Bro Nkifrar kfo tkurruruhatr turhu mounmotm, romn yihato yak thurahmm nd fasoh fasoh nefm nayet yimam, yo yimam yak kasuhwa fasoh fasoh nefm. Nhai Bro Nkifrarhu kingdomkot tohruhatm. ⁴² Yakruhumm kaht turahmm. Kaht tohhato tau nknekrahm. ⁴³ Nd yihart, dborior yimam Bro Yifemrhu kingdomkot tohhat rroh funeft hatoh thombat mirahm nndo marr tewur. Yimbhindangeteko, ndar na kfiwa mrokfot wanykfot.”

Bbinyssoft tou yop kafrohmo maru kpthu kfo nhombra mrokfot

⁴⁴ Jisasr wompam kfo memor, “Hefenrhu kingdomkot kangme maru kptn wom yimar mswirtou yop kafrohmort. Kto wom yimar mswirt hingrna hanyhato tou yifikasak-mort. Rorn nd maru kpt htihato tfit yak wuna marnyahato tou turna marnyamort yimor. Nd maru kpthu dukefrpno ruhetrn rorhu tamoh tamoh yakmortn yimampno maruhampno yak tuknahato nd wuskaroh marut yakyukt nd maru kpt rhuyuk bbinyssoft wiknamor. Be nd bbinyssoft wiknamohat nd maru kpt nd bbinyssoft ruhettn be ror fakmort.”

Dborioh wunifroh kfo nhombra mrokfot

⁴⁵ Jisasr tfit wom kfot kfo memor, “Hefenrhu kingdomkot kangme wunif wiknayuk yimar yi htfaswarn dborioh dborioh wunifm hambro htfaswor. ⁴⁶ Nd wunif wiknayuk yimar dborioh wunifr mhtineft, be mhti tanyhato nd wunifrhu dukefrn tfit yihato rorhu wuss tamoh maruhampno yak tuknahato nd wuskaroh marut yakyukt hanitartn nd dborioh wunifr wiknewurr.”

Rugithu kfo nhombra mrokfot

⁴⁷ Jisasr wom kfo nhombra mrokfot kfomor. “Hefenrhu kingdomkot kangme rugitn yimam tekt yak yiftm womhtet womhtet yirat mnaimt. ⁴⁸ Rugit bi furkihte, gmnt teh hawitewumt. Gmnt teh hawitahato kak dbothewumm. Dborioh dboriohrpam yakhato rikamn kmbritmm. Nd fasoh fasoh tubatutmt. ⁴⁹ Nd bbinysothu wuroh yihar to be inji rhuraht. Mounmotm yawihneruhann nd fasoh fasoh nefm nayet yimam yak thurahmm. Dborioh dborioh nefm nayet yimarpam rhurahm. ⁵⁰ Nd fasoh fasoh nefm nayet yimam yakruhumm kahtn turahmm. Kaht tohhato tau nknekrahm.”

⁵¹ Jisasr disaiperm kfo ttiwon memorm, “Nd kfo nhombriwa mrokforoh yimbu yuhame kekwokomm?” Kfo memomr, “Uwa, kekwonomm.” ⁵² To be Jisasr tfit kfo

memorm, “To be ndnettbn boririfhut yakinohwa tisar, ror bi hefenrhu kingdomkfothu kfo nuhas mrokfot bi wany hikhato bi yaketrn, kangme wom bro kunyrhu kuny sikater. Bi wom bro kunyrhu kuny sikatr turhu kunyrhu rumr rhuyuk dborior dborior wuskar kak hfhan bugewurr. Yatket nfriyet kak hfhan bugewurr.”

*Nasaret thofm Jisasr mong trohmo yuhat
(Mak 6.1-6; Luk 4.16-30)*

⁵³ Jisasr nd kfo nhombra mrokfom kfo nhombra tanyhato nd kmit htanyhato ⁵⁴ yimor turhu kmitn. Turhu kmitn mfnahhato Judaroh rhu rifinyuk rmontn fknemor. Fknenihato Bro Nkifrarhu mrokfefm kfo nuhas bonuhasmorm. Nd kunys rhuyuk met yindarim rorhu mrokfefm wanyhato tuha mrokfo duhatm rhumom. Wanyhato kfo memom, “Nd yimare ndhtet dukefme fitha yakmorm? Yo nd ror hingrnewa mirakerkfome tamohtet tongr thu kihwatrr mirakerkfom hingrnarmot. ⁵⁵ Nd yimar to wom kamdarhu yoner. Mariat tot rorhu mmemt. Jemsr, Josef, Saimonr, Judasr, tom rorhu nmemrom. Asha frohm rorhu mmom? ⁵⁶ Rorhu mndaremrom to asom asha nompno tohwom. To nd yimare fitha nd bbukeft yakhato ndhtet nefm niwarm?” ⁵⁷ Ndhtet dukefmpno nhai marimom, “Jisasr rihtirahnomr.” Nhai. Mong troh bugamomr. Jisasr inji htihato kfo memorm, “Bro Nkifrarhu profetrhu yufat bi kmi kmim rhu htfaswot. Turhu kmiti turhu kuny shofm, rompno nhai yufapa duhater.” ⁵⁸ Turhu kmit nhai wany yakiormomm rorhu mrokfom. Ndnetrn nhai bok mirakerkfom turhu kmit hingrnarmot htirmomm.

14

*Jon Baftaisrhu noh yuhat
(Mak 6.14-19; Luk 3.19-20; 9.7-9)*

¹ Nd yihart Galilikorhof gafanar, rorhu yufat Herotr, wanymor Jisasr namoa nefm.*
² Wanyhato rorhu hingrnayuk yimam kfo memorm, “Ndr Jon Baftais mifer. Na wasmohat, to bi tor, bi tfit sinyamor. Nd mirakerkfothu hingrnayuk bbukeft rorn sinyanihato hnamort.”

³⁻⁴ To bingot Herotr wom nmem Filifrhu tuhan Herodias yak hutfamohat, Jonrn kfo memorm, “Ndhtet neft nhai tu dborior neft narmo. Nkifra thfa mntwat kfo kangt, ‘Mirahn womrhu mett ayak hutfayanr.’” Inji kfomotrr, wom yimam kfo tkrurafmotrm Jon Baftaisr fakmomr. Yakhato kalabus htamomr. ⁵ Bi nd yiha Herotr bi memor Jonr bi awasanr. Kmi thofmn mfakrmiyakmor. Kmi thofm Jonr htimoumr profetr kanjo, ndnettbn mfakrmiyakmorm.

⁶ Herotrhu bet dekfotn bro yemro burwat htamort. Htamatrt Herodiashu yon mett fnahnihato grhamot. Herotr rothu grheft htihato hti yindhormort. ⁷ Hti yindhorphato kfo memort, “Na kfo mif mifwann, ni tamohm kfo ttiwonrahna na be he mifruhann.” ⁸ Be mmemt kfo kangtt, “Jon Baftaisrhu mfhathu yakneft wakfotwa.” Be inji wanyhato yimotn Herotrpno rim kfo memot, “Na kanga asomif Jon Baftaisrhu mfhath watmb-haknekahnt plettn wakmbrehiyafona.” ⁹⁻¹⁰ Be Herotr inji wanyhato be tuha mrokfo duhatr rhumor. Bi bro mrokfot kfo memort, “Tamoh tamohm ttiwonwona na nhai kfo wokrhotann hanyeft. Be he mif mifruhann.” Bi inji kfetrn to be rot Jonrhu mfhathu tmbhakhato hiyafeft kfomohat, nhai tfit wom kfo wokrmort. Ror nd yontpno napthamohat nd rhuyuk bro yimam bi wanymomr ror nd pthamohat. To be ndnetrn yimar kfo tkrur twanhomorr kalabus yihato soldiaroh yi mkfohato Jonrhu mfhathu tmbhaknaneft. ¹¹ Mfhath tmbhohato plettn kmbriyaknehato nd met tmahtn mhemom. Nd met tmaht nd yima mfhath yaknihato mmemtn rim hemot. ¹² Tu Jonrhu disaiperm kalabus yimomn rorhu tfmbt rimakmomtn hany fopmomt. Yop tanyhato Jisasr yi mkfo nuhasmomr.

* 14:1: Nda veskfot kfiwa yima Herotr, ndr Herot Antipaser. Rorn tohmour Galilikorhof gafanar. Jisasr nurmo yiha tohmo king Herotrhu yoner ndar Herot Antipasr. Htkfot Matyu 2.

*Jisasr 5,000 yimam yeshri hemo yuhat
(Mak 6.31-44; Luk 9.10-17; Jon 6.1-13)*

¹³ Jisasr Jon Baftaisrhu mfhā tmbho yuhat wanyhato be mmbrt yaknimorn wom turpat tkittn yimor. Turpatm turhu disaiperrpampno yimom. To nhai. Met yindarim rorhu yi nmbuhat wanymomn turoh taunm htanyhato fau hambro hik hanymomr. ¹⁴ Jisasrom mtadbkafmomn nd yonmari yima rifhur mhtihato yuhuwafrmorm. Mhti yuhuwafhato rroh dbohnefm fak thuhemorm.

¹⁵ Jisasrhu disaiperl marr htiyaf hanyhato Jisasr kfo memomr, “Marr bi yohnitr, ndart yima toh duha wom tkit furayet. Ndār rifinywa yimam wakfo tkrurafkahtnm anatubatunikahmn tumn yeshrim awikna htfaskahmn aye bmtam.” ¹⁶ Jisasr tfit kfo memorm, “Tamohmpno kfo tkruraforuhanomm? To nikomn yeshri wahekomm.” ¹⁷ Tfīt kfo memomr, “Nom tirfa bret nuwami hus yiraf, injirpa harhuwonom.” ¹⁸ Kfo memorm, “Wahnakomm nd bretpami yiraf.”

¹⁹ Jisasr nd rifinymo tuhant yindars kfo memorm, “Ndha kipr suhtn warhu hanyko.” Jisasr nd tirfa bret nuwami hus yiraf yakkorn, yura mountko yukatohhato kfo bruttnamor. Kfo bruttnanihatō turhu disaiperl yak tifak hany hiyaf hanyhato kfo memorm, “Wahe nhombra htfas hanykomm.” ²⁰ Nd he hanymo yeshtnd yonmari yima rifhur yi hanysi yi hanysi nhai ye bugarmomm. Be nd yesmbhomo yeshtnd tfit fak nhafohmomt. Yak nhafohhato hmbremohat, 12-pela kpm hmbremom. ²¹ Nd bret nuwa yamo yimam, 5,000 yimam famomm. Nd thomnafat yindarirparohet. Metmi yonm nhai thomnarmomm.

*Jisasr yura tek yuhat yau hanymo yuhat
(Mak 6.45-52; Jon 6.16-21)*

²² Be Jisasr yudbat turhu disaiperl kfo tkrur memorm, “Niko bi mmbrt wayaknikahkmn tek bari mkuko wahir hayukni hanyko. Na afo met yindarim yak kafho tanyruha.” ²³ Met yindarim yak kafho bugamormn, bi yi bugeme ee turpar kminysoft muhmor kfo bruttnaneft. Marr yohnimohat ror turpar yura kminysoft wutohmor. ²⁴ Nd mmbrt yiyukm bi wuringot rim hiretmn, wifortpno bro sikfot sinyahato sikfot yakmott mmbrt memom nndo forpukhat tohwot. ²⁵ Tu wuroh ksutn Jisasr yimor. Yura tektn fau hanymor. ²⁶ Nd mmbrt rhuyuk yimam htiyakmomr yura tekt yau hnamotr tuha yafotha duhatm rhumom. Memom, ka tek yarhr niewur. Yakrmiyakhato tuha fengr fengrt tohmot. ²⁷ Jisasr htihato kfo memorm, “Watoh bmtako. Naya. Ayakrmiwahko.”

²⁸ Pitar Jisasrhu tngt wany nhtahato kfo memor, “Bro Nungothete, ni mifn rhu thombat, wakfokahtna na tekt yau hnehato ninpno nieruha.” ²⁹ Jisasr kfo memor, “Wania.” Pitar sinyahato tekt mitohnihato memor, “Tek yuhat yau hanyhato Jisasrpno ka yiruha.” ³⁰ To nhai, rorhu nyngam bro wifort hti yakrmihato bi yohni hany sitamor. Ndnetrn naku tti memor, “Bro Nungothete, wayakna.”

³¹ Yudbat Jisasr tir tuhato fakmorr. Jisasr kfo memor, “Na kfo yamuhat wania, kane fak sminena? Kane nhai duka marifo, ‘Ror kfitr kita, tekt yau hanitohat nhai yohnitwota.’” ³² Be inji kfonihato mmbrt mikmbremof. Mmbrt mikmbremof nd wifort tone tmbhomot. ³³ Yimam nd bot rhuyukm Jisasrpno rim tabokme rmonhato kfo memomr, “Ni tu Bro Nkifrarhu Yone.”

*Jisasr Genesarethu bok dbohnet yimam yak marnyamo yuhat
(Mak 6.53-56)*

³⁴ Tek barit hir hayuknimomn Genesaret mkuko rim dbkafmom. ³⁵ Nd Genesarethu yimam Jisasr nhai hti mmormomr. Htihato memom, to tawom Jisaser. Htihato mrokfot yudbat frhtfasmott nd brbo rhuyuk kmim. Jisasrhu yi mrokfot brborhof kmim wanyhato nd dbohnet dbohnet yimam hany bugamomm. ³⁶ Yihato dbohnetm kfo ttiwonmomr ror hmbreyuk hmbreshathu psifkorn be tayouti hanyhato dbohnefroh thu troh tany hanynfeft. Be nd yuhat dbohnet yimam hikhato dbohnefm thu troh tany hanymomm.

15

*Nkifra boririfhu yirmoht
(Mak 7.1-13)*

¹ Wom Farisimi boririfhuthu tisam Jerusalemt htanyhato yimom Jisasrpno. Yihato kfo memomr, ² “Tamohmpno ninhu disaiperm nhai hik duha yikahmt nmoh nkifram hayuk boririfhut? Nuwa ye shombat nhai tirm kifsafhato nuwa yekahm.”

³ Jisasr wanyaf hanyhato kfo memorm, “To tamohmpno tukmoh nkifram kfo yirmoh nuhasmo yirmoht hikwakomn Bro Nkifrar kfoyuk boririfhut nhai hik duha yikahkomt?

⁴ Bro Nkifrar kfo memor, ‘Ni yifammafh yinhitn rhuhato rofhu mrokfomn hikkfot,’ yo ‘Yimar turhu yifammaf kfo twewurf, nd yimar was hehur thukfot.’ ⁵ Tfit nikomn kfo kangko, ‘Wom yimar turhu yifammafpno wuskam kfo nuhastahihato tfit yifammaf kfo famurf, “Nifn kfo nuhasheyuk wuskam bi Bro Nkifrar htahemoya,”’ ⁶ to be nd yimar mirahr tfit yifammaf adukakahann ayak marnyayanf.’ Tukmoh nkifram kfo htanihemo mrokfom yak hikwakomn Bro Nkifrarhu boririfhut nhai yak hik marnyakahkomt. Faso tfit kfo kekutwokomt.

⁷ Niko mikfo nhehta mkfo nhehtayet yimayeko! Bingot profet Aisaiar to nikmoh nef mifmn kfomor, ror dkfo memohat,

⁸ ‘Nd yimam be yura tngrpaye kfo yuta yindhorwoma.

Yiro yima yuhum nhai nanhu dukefmpno rhukahm.

Nndo wom dukefmpno korhm.

⁹ Be nd yima mifm bingot htamo boririfhut kfo nuhas htfaswamn kfo kangm, “Bro Nkifrarhu boririfuhet.”

Ndnett rom lotuta lotuyeft yafotha duhatet.’”

Ais 29.13

*Yimaroh yima yuhum faso yak bebwu shrm
(Mak 7.14-23)*

¹⁰ Tfit Jisasr nd met yindarim nakuyakhato kfo memorm, “Nanhu mrokfefm wawany hik marnyatwa-komm. ¹¹ Tamoh tamoh mur yemrom o hnaru yemrom tng yuhat yiyafoyukm, nhai ndmn Bro Nkifrar htihato kfo mikahr, ‘Ni bi fasoh yimaye.’ Nhai. Nd yiro yima yuhurio sinyahato newa fasoh nefm, ndmn Bro Nkifrar htihato kfo kangr, ‘Ni bi fasoh yimaye.’”

¹² Kto disaiperm yihato Jisasr kfo memomr, “Farisim ni kfoyuk mrokfot wanyhato yima yuhum yikwohate wanukwonm?”

¹³ Tfit Jisasrn kfo memor, “Nanhu Yifemr, hefenr tohwar, mswirthu yewurit turhu tire nuhta duhatt, be yuht yimbonetm teh dbifrak hanyrahrm. ¹⁴ Mirahko to niko Farisiroh mrofkom wanyhato bok dukefm ayaknom. Nd yimam tum nydinga kunyjmnn kangm womm ayak hta bohtanom. Nydinga kunyjf nhai tuf nydinga kunyjf yihotat nayak nuhaskfot. Mirahf ka tu yihotat nayak nuhaswono rpat dmehetf muht yohnirahf.”

¹⁵ Pitar kfo memor, “Tfit afo nd ni kfi mrokfothu yimbu yuhat wakfo hikkahtnt awanynom.” ¹⁶ Jisasr kfo memor, “Nikome ka yuhre mmoyeko? ¹⁷ Wawanyko! Nd yiyafoyuk yeshrt nhai yima yuhurn yikahm. Nhai. Nd yiyeifiwa yeshrim nyungram yuhat yitamn ript yihom yorhwom. Ript yihom rhuhato kto tfit rikunys kitm. ¹⁸ Nd yiro yima yuhurio sinyahato newa fasoh nefm, ndmn Bro Nkifrar htihato kfo kangr, ‘Fasoh yimayer.’ ¹⁹ Nd na kfiwa yima yuhur sinyewa fasoh nefm, ndm inji korhm: nd fasoh fasoh dukefr, yimar nambur sinyahato womr was furaneft, womrhu mettpno rim fnahneft, yaum kanjo met yindarim niwa nefm, rikohneft, wom mrokfom be turoh yima yuhurn wakfo fura bofurakneft, womm faso faso harhu htfasneft. ²⁰ Tom nd nd nefmn yiro yima yuhurnio sinyewamn Bro Nkifrar htihato kfo kangr, ‘Fasoh yimayer.’ Nd nuwa yenyihato tir kifsa duha rhuneft nhai Bro Nkifrar htihato kfo mikahr, ‘Fasoh yimayer.’”

*Jisasr Kenan efkott yak marnyamo yuhat
(Mak 7.24-30)*

²¹ Be Jisasr nd kmit htanyhato tfit kmi Tair yo Saidon inji yimor. ²² Nd ror yimoko wom Kenan ekfott yihato kfo naku memot, “Bro Nungothete, Defit frikefthu yone! Wayuhuafna. Fasoh yafotha bebm nanhu yont dbohneft kahukmt.” ²³ Jisasr be wanymortn nhai wom mrokfom kfo ptharmort. Tfit turhu disaiperm yihato kfo memomr, “Nd mett be mfro naku hik hnewutnom. Wakfafkahtnt wuri ais.”

²⁴ Jisasr kfo memorm, “Bro Nkifrar na kfo tkrurafmohat, Isrerrparoh dukeftn kfo tkrurafmora. Rom bi sifsifm kanjo frfnah wurasohmom. Rroh yak nhafot niamoya.”

²⁵ Jisasr kfo pthamo mrokfot rot wanymott. To nhai. Rot mfrfnahnehato Jisasrhu nyingatikko bangum myuknamotmn nyingatikt bbinarysoft yohnehato kfo memotr, “Bro Nungothete, wahti dukana.” ²⁶ Jisasr kfo memort, “Yonroh hayuk yeshrt nhai bi yakhato yaumn afo wahta hekahmn.”* ²⁷ Tfitn nd mettn kfo memot, “Bro yimaye, ndt rot hifat kfiwun. To nhai. Nd yauyenn, tebor yinhit toh hanyukm, rom to nd yonm ye bruraf hanitam ke tuthatak hanitm.” ²⁸ Nd mett kfoyuk mrokfot kfo yakio memort, “Bar mete, na hingrnewa hingrneft, ni nhai hus dukeffpno rhuhato na niahato kfo ttiwonkahna. Ninhu dukeft nann bro dukeft htewun. Ndnett ninhu yon metthu dbohneft bi be.” Be nd yiha rothu yon metthu dbohneft teh tmbhakmot.

Bok dbohnet yimam Jisasr yak marnyamo yuhat

²⁹ Be Jisasr ndhar htanymortn Galili thmb yuhat yimor. Yihato wom kmi yorg muhhato mrhumor. ³⁰ Kmi yorg muh mruhetrn yima rifhur yi rifiny hmbremomr. Dbohnet dbohnet yimam hany hanymom. Womm rikiyem, womm nyinga kunyjetm, tir wura bebetm, womm tng mmkm, ndhtet ndhtet dohnefetm yo womhtet womhtet dbohnefetm rpdt hanymomm. Hanymomm Jisasrhu wurampno rim hta rmonmomm. Jisasr htihato fak marnya hanymorm. ³¹ Nd tng mmkm tfit pthamom, yo tir wura bebetm marnyamom, yo rikiyem tfit faumom, yo nyinga kunyjetm tfit fukatohmom. Nd rifinyuk yimam inji htihato tuha yafotha duhatm rhumom. Yafotha duhatm rhuhato Isrerroh Nkifrar kfo grhamomr.

Jisasr 4,000 yimam yeshri hemo yuhat (Mak 8.1-10)

³² Jisasr turhu disaiperm nakuyakhato kfo kangrm, “Nda yima rifhur yuhuafwanm. Bi husfirpa marm nanopno tohromn bi yeshriyen duhatem. Nhai wofnkaha be yeshriyen yi tany duha sfno yatinohnt turoh kmiko yinyeft. Yatinoh hanyruhamn buha yihotann mnoh minysafnirahm.” ³³ Tfit turhu disaiperm kfo memomr, “Ndashart nom yima toh duha tkitt tohwonom. To href fitha bok bretpam yekwanomn ndar yonmari yima rifhur yahukanomm?” ³⁴ Jisasr tfit ttiwon memorm, “Nikome finji finji bretpam harhuwako?” Kfo memomr, “7-pela bretpami rpen rpen yirenm.”

³⁵ Be nd yima rifhur Jisasr kfomotrm tuha bbinarysoftn sibosi rmonmom. ³⁶ Jisasr nd 7-pela bretpami rpen rpen yirenm yakkorm Bro Nkifranko kfo bruttnanihato bretpam fak tif botifmorm yo yirenm fak mku bomkumorm. Tfit turhu disaiperm hemotr romn yaknihato nd met yindars hi hanymomm. ³⁷ Nd yima rifhur fe furkih bugamom. Nd rom yesmbhoyuk yeshrim Jisasrhu disaiperm tfit yak nhafohhato hmbremohat 7-pela kpm hmbremom. ³⁸ Nd yeshrim yamo yimaroh thomnafat, 4,000. Ndt yindarirparoh thomnafayet, metmi yonm nhai thomnarmomm. ³⁹ Jisasr nd yima rifhur kfo tkrurafhato yimotm, ror mmbrtm mikmbrenihato Magadan distrikko yimor.

16

Jisasrhu mirakerkfst memom ahtinom (Mak 8.11-13; Luk 12.54-56)

* ^{15:26:} Nd kfo nhombra mrokfothu yimbu yuhat inji: Yonm kfo nhombramor tu Isrermn. Yaum ndm wom yima tangi furam kfomor. Yeshrim, ndm gutnius mrokfot kfomor. Nd mett kfo ttiwonmohat nhai be kfo yiritikfot kformort. Nhai. Jisasrhu dukeft duka memor, “Nhai tu Isrerm hayuk gutniuskfot bi wom yima tangikomm bi yakkfot. Nhai. Afo tu Isrermn tohakhato ee btn niko womko.”

¹ Farisimi Sadyusim yihato Jisasrpno yuwi mkfo memomr, “Jisase, mirakerkfol wahingrnakahtnt afo ahtinom. Nom htiruhanomn mirahnom, tu Bro Nkifrarhu bbukeftpno hingrnewur.” ² Jisasr kfo memorm, “Krif yiham marr miwondh marnyanitr, kfo kangko, yin yifungr tohwor. ³ Dbha yiham mkinykr fnahwot, kfo kangko, hrek toh nyukuhwot. Yihathu rhu yuharpat hti nhtewakomn kfiwuko, to na ndar yiham tohhato niwa nefm nhai htihato yak nhtakahkomm.” ⁴ Ariharhof yimam, be tu fasohem, nhai Bro Nkifrarhu yima yuhurn rhukahm. Rroh dukefm be kangm, nd Bro Nkifrar kfo tkrurafoyuk yimar mirakerkfol hingrnakahtn ndt htihato duka mirahnom, tor nd yimar. To nhai wom mirakerkfol htiruhatm. Nhai. Jonarpno rhumo kanjohot neft hti nhtarahm.” Be inji kfo tanyhato htanymorm.

Farisimi Sadyusiroh yisparoh kfo nhombra mrokfot
(Mak 8.14-21)

⁵ Jisasri disaiperm tek barit hir hayuknihato mkuko rim dbkafmom. To rom yimohat, disaiperm nhaf nhai dukarmom bretparoh hanyneft. ⁶ Yimomn Jisasr kfo memorm, “Niko Farisimi Sadyusiroh yispam hti marnyaf hanykfot.” ⁷ Tfit tum rinakfo nakfo memom, “Ka nom bretpam yakna duha yitnom, ndnetrn nd mrokfot kfiwurnom.” ⁸ Jisasr bi wanymorm rom inji kfomoahat. Wanyaf hanyhato kfo memorm, “Barenko, tamohmpno kfo yamukako nhai bretpa duhatenom. Nane kak sminewukma tefi yeshriyenroh yak yurhtahato nd yimam hanyeft? ⁹ Niko na hingrnewa hingrneft ka nhai tafi htikahkomt? Ka nhai htirmoko 5-pela bretparpam yak yurhtahato 5,000 yimampno yak nhtahato hemohat? Yo tfit yesmbhehm thomnayet kpmn niko hmbremohat? ¹⁰ Yo womt ka nhai dukakahkomt 7-pela bretparpam yak yurhtahato 4,000 yimampno yak nhtahato hemohat? Yo nd yesmbhehm thomnet kpmn hmbremohat, nd ndm ka nhai htirmokomm? ¹¹ Famuko ka tu bret mifm kfiwurnome? Nhai bret mifmn kforfoyaniko. Farisimi Sadyusiroh yisparoh kfo duka mrokfotn kfiyanko. Famuya yo hti marnyaf hanykfot rroh yispam.”

¹² Bi inji kfiwurme, ee dukefm yakhato kfo memom, “Nhai tu bretpa hingrnayuk yispa mifmn kforfornom. Farisimi Sadyusim hatone htfaswa mrokfothu kfo duka mrokfotn kfo famurnom, ‘Yo! Niko, tom ndhtet ndhtet yimam niewum niko dukefmpno rhukfot.’”

Pitar Jisasr kfo nriyafmo yuhat
(Mak 8.27-30; Luk 9.18-21)

¹³ Jisasr Sisaria Filipaiko yihato ndharn disaiperm kfo ttiwon memorm, “Kmi thofm na Bro Najomanhu mrokfot wanukohat, kangm frohane?” ¹⁴ Kfo memomr, “Womm kangm Jon Baftaise. Womm kangm Iraijay. Womm kangm Jeremaiaye o nkifra thof profete.”

¹⁵ Inji kfomotm, tfit ttiwon memorm, “To niko tuko finji dukewokma?”

¹⁶ Saimon Pitar kfo memor, “Ni, bbinysof thofroh minrfa htiyakyuk yima Kraise. Ni, tu toh nkifraniruha Nkifrarhu Yone.”

¹⁷ Jisasr kfo memor, “Jonrhu yon Saimone, wayindhortwa. Nd mrokfot ni kfit, nhai ndar bbinysofthu wom yimar kfo merforn inji wakfotwa. Nhai. Nanhu Yifemr, hefenr tohwar, rorn dukefm yahutrn inji kfi. ¹⁸ Pita, kfiwann, ni tahiye. Nd tahisn nanhu sioskfot kasinyaruhat. Nd tahisn sioskfot hatohruhatt, noheft nhai niahato yak kasuhruhatt. ¹⁹ Hefenrhu kingdomfothu kijibont hiruhann ninn yakitohrahnt. Nd bbinysofthu tamoh tamoh nefm ni kfo raforahnm, tawo hefenrko Bro Nkifrar nd nefm kfo raforahrm. Nd bbinysofthu tamoh tamoh nefm ni kfo yakiorahnm, tawo hefenrko Bro Nkifrar nd nefm kfo yakiorahrm.” ²⁰ Be Jisasr inji pthahato kfo memorm, “Yo! Mirahko mif mif womm akfo amanyomm, ‘Rorn Bro Nkifrar kfo tkrurafmor nmoh minrfa htiyakyuk yima Kraisr.’”

* 16:3: Nd ves 2 kfoti ves 3 kfot yorhwa Jisasr kfovuk mrokfom, nhai tu Matyurn wandfarmorm, wommn rihtakmomm. † 16:18: Grik mrokfot nd Pita yufathu yimbu yuhat, “tahis.”

Jisasr wuroh noh yibonneftpno turhu disaiperm dkfohem wuroh mrokfom

(Sapta 16.21-20.34)

Jisasr turhu nohhato sinya yuhat kfo nuhasmorm

(Mak 8.31-9.1; Luk 9.22-27)

²¹ Nd yiha Jisasr disaiperm rikfo nuhasak memorm, “Nanhu nmbuhat akfo nuhasanko. Nanhu mrokfot inji korhwot. Na Jerusalemko yi shoft, na Judaroh bro yimamn, prisroh bro yimamn, boririfhuthu tisamn, nd nd yimaroh tirmn hirruha. Nohrhoyann tfit husfirpehyuk marrn tfit sinyaruha. Na nhai tfit finji kfo finji kforhota. Na be yi nohnefrpat.”

²² Pitar inji wanyhato Jisasr yaknihato nndo rim hatohhato kfo hutt memor, “Bro Nungothete, nhai mif. Na nhai wofnkaha ndhtet mrokfom wanyneft.” ²³ Tfit Jisasr kekutnihato kfo memor, “Satane, wuri wain. Ni nanhu yihotat toh rafiwun. Ni nhai Bro Nkifrarhu yima yuhur hikkahn. Nndo yima mifroh dukefm hikwo.”

²⁴ Be inji kfonihato kfo memor, “Wom yimar kangr, na ahik hneya, mirahr tur amdukak hanya. Nd dukefr mong trohhato rorhu bgre mis titahato na hikkfot. ²⁵ Yimar turhu toh marnya nmbuharpat mdukak hanitr, nd toh nmbuhat ror mdukak hanitat nhai tfit wom htiruhatr. Yimar na dukahato nhai turhu toh marnya nmbuharpat dukarfort, kto tfit htirahrt rorhu toh marnya nmbuhat. ²⁶ Wom yimar ndar bbinysoftu tamoh tamohrpar yakhato kto toh nkifrayuk toh nmbuhat nhai dukarfort, to nd ariha yekwa marut, wuskat, tamoh tamoht kto to finji hifa toh nkifra nmbuhat hiruhamr? Hifa toh nkifra nmbuhat kangr tfit ayakant, to tfit fitoh yuhatn yakruhart? ²⁷ Bro Najomr, turhu Yifemrhu bro bbukeftpno yawihnerahr turhu mounmotmpno. Nd yiha met yindarim turoh tohefm, o nefm, o hingrnefm, nd ndm htiyak hanyhato ttha hanyrahrm. ²⁸ Na kfo mifwanko, ndasha tohwa womm tafi afo noh duhatmn Bro Najomr king kanjo nia thoft htiyakrahmr.”

17

Jisashu thatipt fnhumo yuhat

(Mak 9.2-13; Luk 9.28-36)

¹ Kto 6-pela yiham yinyimotm Jisasr Pitari Jemsre yo Jemsrhu nmem Jonr, nd husfirpa yimam yaknihato turpatm muhmom tu mfro wayakmo kminysoftn. ² Turpatm rhu hasohato asha htiyaf hanymomr fnhuyaknimor. Nyingatikt funamohat memom nndoh marrhu nukeftn kambohritnewut, yo yimar hmbremo hmbresham rpat fnhu bugaknihato memom nndo bruwohmr katiwur. ³ Ee tfit htimomf Moses Iraijsarof Jisaspno mtohhato pthaknimohat. ⁴ Pitar inji htihato Jisasr kfo memor, “Bro yimaye, nmoh asha tohneft hifa. Finji dukiwa? Ka husfirpa kunyenm yimanom nhombrahato singoruha. Ninhu womt, Mosesrhu womt yo Iraijsarhu womt.”

⁵ Pitar inji ptha hanymor wom gribfat yawihnehato kasi hmbremotm. Nd gribfat fnhu bugamot. Yiro nd gribfatn wom tngt niamot. Nd tngt kfo memot, “Ndarr nanhu Yoner. Be tu marbitn htewanr. Hifa hti yindhorwanr. Ror pthayuk mrokfom wany yakiokfot.”

⁶ Disaiperm Bro Nkifrarhu tngt wanyhato tuha mfham danyr frtnehomm. Yimam wutthakhato tuha suhhato nyingatikm bbinysoftko yohnemomm. ⁷ Jisasr rompno brbo iyaknihato kfo memor, “Wasinyako. Ayakrmiwahko.” ⁸ Nyingatikm kekuthato yura wufukatohmom. Nhai wom frohm htirmom. Nhai. Jisaspars htimom.

⁹ Be nd kminysofr wuhtanyhato tfit mibrnyimom. Buha yihotatn kfo memor, “Niko nd yura kminysoft htitawoneft bi mirahko womm akfo nuhasnom. Kto na Bro Najoma bi nohnihato tfit sinyeya, ee btn wakfo nuhastwakomm.”

¹⁰ Tfit disaiperm kfo ttiwon memomr, “Tamohmpno nkifra boririfhuthu tisam kfo yamukam, ‘Afo Iraijsar bi nia gungonrahr. Tfit kto Bro Nkifrar kfo tkrurafrahr nmoh minrfa htiyakyuk yima Kraisr.’”

¹¹ Jisasr wanyhato kfo memorm, “Ndt tu kfo mif kfoyet. To nkifra kfot kfo memot, afo Iraijar bi nieruharn rorn nd tamoh tamohm bi yak hta bohtarahrm. ¹² To tfit kfiwanko, Iraijar to bi niamor. Yimam nhai hti nhtarmomr. Bi niamotr yimam turoh dukefm hikhato faso faso fak bebmomr. Bro Najomr to inji narahmr.” ¹³ Jisasr inji kfomotr, disaiper yima yuhum yakhato kfo memom, “Jon Baftaisrn kfiwur.”

*Jisasr yak marnyamo kmi yarhr hatohet yonr
(Mak 9.14-29; Luk 9.37-42)*

¹⁴ Jisasri nd husfirpa disaiper tfit yimomn nd rom kmi tpit wahtanymo yimampno minahtimom. Ndharn wom yimar yihato Jisasrpno bangum rim yu knahato ¹⁵ kfo memor, “Bro Nungothete, nanhu yonr wayuhu-wafhina. Fasoh noh mmrifefte yekwattr faso korhr. Wom yiham noh mmrifak-hato kahmn kitr tekmpno brbo toh hasonefm tekem kitr. ¹⁶ Ninhu disai-permpno kfo famuya, ‘Wayak thukomr yarhr.’ To nhai, fak thu titawomr.”

¹⁷ Jisasr nd mrokfot wanyhato kfo memorm, “Arom Bro Nkifrarhu dukefm rhu duha met yindariyenko, nikmoh dukefmi nikmoh nefm nhai be tu yi marnyakahm. Finji tfit nikompno tohrhoya? Finji tfit nikmoh krhopam titahirhoyanko? Wahnakomr nd yonr.”

¹⁸ Jisasr kfo namburhato kfo hutt hikafmotrr nd yarhr htanymorr nd yonr. Be nd yonrhu noh mmrifefte htanymotr.

¹⁹ Kto disaiper turpam Jisasrpno mnahtihato kfo ttiwon memomr, “Tamohmpno nd yarhr to nom yak thu duha yirfonomr?”

²⁰⁻²¹ Jisasr kfo memorm, “Nd yonr hatohyuk yarhr yak thukfot kfihat, nikmoh dukefm aduka mif mif ameko, ‘Bro Nkifrar kak thu mifworr nda yonr hatohwa yarhr.’ Dukefm inji yi mifhato akfoko, nd yarhr yak thurfokomr. Na kfo mifwanko, ndhtet dukefm be tu tefi dukefenr sayor tpiyenr kanjo rhuhato kfo mirahn, ‘Ndar kminysofe wasinyani nnndo warim tohn.’ Htirahn nd kminysofr nnndo rim tohrahr. Nhai wom tamohm duka nhiruhatn finjina finjina nefm.”*

*Jisasr tfit wompam kfo pthamort turhu nohhato sinya nmbuhat
(Mak 9.30-32; Luk 9.43-45)*

²² Be nd kmit htanyhato Galiliko yimom. Nd kmit mfnahhato turhu disaiper kfo memorm, “Ndar bbinysothu yimam Bro Najomr yak hndhnarahmr yimampno. Hndhnaru-hatmr ²³ yimam wasrahmr. Nohruharn husfirpehyuk marrn tfit sinyarah.” Disaiper inji wanyhato yima yuhum fo dbhurmomm.

Jisasr Bro Nkifrarhu temperrhu takis maruha hemo yuhat

²⁴ Jisasri disaiper bi Kaperneamt yihom fnahetmn, Bro Nkifrarhu temperrhu takis marut yak hnayuk yimam niamomn, Pitar mkfo ttiwon memomr, “Nikmoh tisare temperr hta hakuta takis maruhame hta hakutr?” ²⁵ Pitar kfo memor, “Uwa, hta hakutr.” Pitar inji kfo tanyhato kuny yuhat rim fknenimor. Pitar tafi wom mrokfot kfo duha be tu Jisasrn sinyahato kfo ttiwon memor, “Saimon, ni finji dukewa? Ndar bbinysothu kingm nd takis marut yak htfas thofte froh frohmpno yekwamt? Turoh kantri thofmpno o wom kantri thofmpno?” ²⁶ Pitar kfo memor, “Wom kantri thofmpno takis marut kekwom.” Jisasr tfit kfo memor. “Wom nndoh kantrikfot niayuk yimampno takis marut yekwamn, ndnett nhai turoh kantrithu yimam takis marut hekfot. ²⁷ Bariko wanjukahnn wathuthu htfasn. Barkof yirar furyakyukr, tngt wayak bhnakahnr, htirahnt maruhat tngt yiro rhuraht. Nd tngt rhuyuk maruhat, ninhu takis wiknayuki nanhu takis wiknayukt rhuraht. Wayaknikahnt ndtn nnoh yufat wahtatwa. Nd yimam htiruhann rroh yima yuhum nhai faso yak bebruhatmno.”

* 17:20-21: Wom safemanm duka memom, tot wom mrokfo nmbuhat ndar veskfothut. Nd mrokfo nmbuhat inji kfiwut, “Kfo bruttnarahn yo yeshrim yafhohato kfo bruttnarahn, nd yuhatn yak thurahnm ndhtet yarhm. Nhai wom fitoh yuham.”

18

*Hefenrhu kingdomkfothu bro yufa yakyuk yimar
(Mak 9.33-37; Luk 9.46-48)*

¹ Nd yiha disaiperm yihato kfo ttiwon memomr, “Hefenrhu kingdomk fot mfrpskena thombate, froh mifrn bro yufat yakhato mtohakruhart nd hefenrhu kingdomk fot?”

² Jisasr wom habhi yonenr kfakkato rroh buha rim tohmotr, ³ kfo memorm, “Na kfo mifwanko, nikmoh nefm, tohefm tfit ndar yon kukenenrhu dukefmi tohefm yakhato rhukfot. Inji tohrahko, hefenrhu kingdomk fot fknirahko. ⁴ Yimar turhu toh nmbuham o dukefm tfit yohnihato nda yonenr kanjo rhurahr, nd yimar hefenrhu kingdomk fot ror bro yufat yakhato tohrahhr.

⁵ Fitoh yimar na hikhato na hikwa wom met yindarim yakhato kak marnyewurm, nda yonenr yakhato yak marnyiwa kanjo, nd yimar nann yakhato kak marnyewur.”

*Yimam yak kasuhwa fasoh nefm
(Mak 9.42-48; Luk 17.1-2)*

⁶ “Wom yimar ndar na hikwa yonenm frnhehektrm fasoh nefm fsuhm, nd frnhehakyuk yimar bro tahis yakhato mohtpitn tmbrekhato tek dany yuhat yafhohato miptkokfot. Tohruharn fasoh yihotat hanyrahrm.

⁷ Yima yuhum sinyarahmko fasoh nefroh naneft. Be wom yimarn niahato mkfo kangrn, ‘Ndur yuhat warine o ndur shrt warimakn.’ Nd yak tkruryuk yimar dukaf hanykfot. Bro Nkifrar be yak tutfarahrr. ⁸ Tirt fasoh nefm hanittn, nd tirt tmbho thukfot. Rpa tirrpatpno rhuhato toh marnyarahnt ninhu toh nmbuhat. Hus tir bugaf rpat rhurahf, rofn yakruhafn kaht turahfn. Nd kaht nhai wom yiha minoh hmbreni hanykaht. Yo wurat inji newut, nhaf puk thuhato rpa wurarpatpno rhuhato toh marnyarahnt. Hus wura bugaf rhurahf, rofn kaht hanyrahf. Nd kaht nhai wom yiha minoh hmbreni hanykaht. ⁹ Yo nyngarn fasoh nefm hanitrn fasoh nefm ne, nd nyngar yak rurha thuhato be rpa nyngarparpno rhuhato ninhu toheft toh marnyani-rahnt. Hus nyngi bugaf rpat rhuneft wom nyngarn fasoh nefm hanyruhatrn rorn hel rhuyuk kaht hanyrahrn.

¹⁰⁻¹¹ Niko dukefmpno rhukfot. Mirahko ka nd yonm ka be yima fura-yeme. Nhai.* Yura hefenrko rroh mounmotm brbo Bro Nkifrapno yorhwamn kfo nuhaswomr yimam tamoh fasoh nefm finjina finjina thombat.”

*Yimar hambrakmo sifsifruh kfo nhombra mrokfot
(Luk 15.3-7)*

¹² “Wom 100 sifsifet yimar wan handretyukr hti hambrorfohat ka nhai nd wan handretyukr yak hambrorfotrr? Na kanga ka nhai mumafrfotrr. Ndwom 99 kforpat kipr yeuyk tkitt afo yak htanyrformn afo nd wan handretyukr afo yau hambro htfasrforr.

¹³ Na kfo mifwanko. Ndwom frfnahni duha 99 kfothu yindhoreft rot be inji yindhornirfort. To nd wan handretyukr hambro hanyhato tfit yakrfohat, rorhu yindhoreft mirahko ka be tu kukent rhurfot. Be tu mfro yima yuhur yindhoreft mifrforr. ¹⁴ To inji kanjo nikmoh Yifemr, hefenr tohwar, nhai wofnkahr ndar yonm rpat rhuhato tfit womr frfnahnineft.”

Wom yimar fasoh nefm nern, to finji tfit yakruhanr?

¹⁵ “Ninhu wom Kristen yimatr wom fasoh neft nern, nd fasoh neft nayuk yimarpno yikfot. Yihato nifn turpatfn rhuhato kfo nuhas nriyafhekfot ror nayuk neft. Kfo nuhas nriyafhe-ruhatnr nd ror nayuk nefm yafhorahrm. Yafhoruharm tfit nayak marnyahato rpat toh marnyarahfn. ¹⁶ Turpatfn rhuhato ror nayuk nefm kfo nriyaftnm, tfit kfo namhir, to be tfit yihato nd yimar nayuk nefm htiyet yimar o yimaf yakhato rompno yihato kfo nuhas hik bohikhkafot ror nayuk nefm. ¹⁷ Nd yimampno yihato nhai afo tfit

* 18:10-11: Nd ves 6 kfoti ves 14 kfot yorhwa yon mrokfot, Matyu 10.42 kfwiwa kanjo inji kfiwit, “ndar nanhu yufapa duha disaiperm.” Nd mrokfot ka Jisasr nhai yonrpam kformor. Turhu wom disaiperm dukahato nd mrokfot inji rpat kfomort.

kfo namhitr, tfit sioshu tuhan yindarspno nd mrokfot htakfot. Wuroht sioshu tuhan yindarimpno nhombrati be tu kfo namhi mifwor, to be nd yimar yak thuhato mong trohkfot. Rorhu neft bi nhai wom Kristenroh neft hikkahr, bi kspitat tohyuk yimaroh nefti takis marut yak htfaswa yimaroh neft hikwor.

¹⁸ Na tu kfo mifwanko, ndar bbinysoftu tamoh tamoh nefm niko kfo raforahkomm, tawo hefenrko Bro Nkifrar nd nefm kfo raforahrm. Ndar bbinysoftu tamoh tamoh nefm niko kfo yakiorahkomm, tawo hefenrko Bro Nkifrar nd nefm kfo yakiorahrm.

¹⁹ Tfit womt kfiwanko. Nifn hus yimafn, ndar bbinysoft tohhato wom tamoh dukefr rpa yima yuhur rhuhato kfo bruttnarahfn, htirahfn, nanhu Yifemr hefenn yorhwar htiruharn nifnhu kfo bruttnayuk mrokfo yuhatn hikrahr. ²⁰ Mrokfot bi ruhetet. Husf o husfirpa yimam rpat rhu rifinyhato tamoh dukefm kfo bruttnarahma, na toya brbo rhuhato wany yikitohruhanm.”

Hingrna yimar nhai yafhormorm womr nayuk nefm

²¹ To nd yiha Pitar niahato Jisasm mttiwon memor, “Bro Nungothete, ninhu wom disaiperr nanopno wom fasoh fasoh nefm nahna nahnewura, ka 7-pela yiharpam yafho-hiruhann ror nayuk nefm?”

²² Tfit Jisasm kfo memor, “Nhai kfo mekoha 7-pela yiharpam. Nhai. Kfo kanga 77 yiham womr nayuk nefm yafhohekfot.

²³ Wawayko. Hefenru king-domfote kangme wom kingrn kangr turhu ofisam yak hanyuk marufam, ndmn ofisampno kingr rhuhato nayak marnya inji newum. ²⁴ Nd hingrneftn bi ruhetrn, 10 milion kina yak dinaumo wom ofisar hanymomr. ²⁵ Nd yimar nhai wom marufam nd ror yak dinaumo rrfathu htayuk marufam. Kingr be inji htithato kfomorm rorhu hingrna yimam nd yimari rorhu yon tuhanm, yo wuska kunyr, nd ndm yakhato wom yimampno yak htahato nd yimami wuskaroh marut tfit yakhato nd ror yak dinaumo marufaroh rrfathu htakfot. ²⁶ Nd kingr inji kfomotr nd ofisar wanyhato kingrhu wurampno brbo tabokmemor. Tabokmehato kingr mkfo memor, ‘Wayuhuwafna. Afo yiham wahikahtna nd dinaukfot yak marnyaruhant.’ ²⁷ Nd kingr yuhuwafhato kfo memor, ‘Nhai mrokfom. Yuhuwafwann. Yuhuwafhato nd ni yakmo marufam mirahn tfit wom adukayanm. Na nhai wom dukarhotanm. Ni be wai warhu mmotwa.’

²⁸ Be inji kfafmotrr nd ofisar fnahnimor. Fnahnihato rim htimor rorpno rpat hingrnamoa wom ofisar. Rim yikitohhato thu yebitt boyebitthato kfo memor, ‘Nanhu 10 kinakfot ni yak dinaumot asomif wayakkahnt wahina.’

²⁹ Be nd marufa yimar inji wanyhato womrhu wurampno tabokmehato mkfo nur memor, ‘Wayuhuwafna. Afo yiham wahikahtna nd 10 kinakfot tfit hambrakhato hiruhann.’ ³⁰ To nhai. Womr inji mkfakmohat, womr nhai yuhuwafhato kfo marimorr, ‘Nhai mrokfom. Kto bi hambreknt nd marufat ee btn wahitwona.’ Be yakmorrr kalabus htamorr. Memor, ‘Kalabus toh gnngiruharn hirahra nd 10 kinakfot.’

³¹ Nd ofisar namo neft wom rpat hingrnayukm inji htihato memom, ‘Ndt nhai dborioh neft nakahr.’ Be rom tfit kingrpno yihato kfo nuhasmomr nd ofisar namo neft.

³² Kingr nd yimar tfit nakuyakhato kfo memor, ‘Ni be tu fasoh ofisaye. Garkopam niamo maruharoh mrokfotpno mkfo nurmotna yuhuwafhato nhai dukarmoyant nanhu yonmar maruhat ni yak dinaumot. ³³ Na hifa yuhuwaf marnyamoyann. To tamohmpno niko tuko rpat hingrnawako ninpno yak dinaumohat nhai tfit yuhuwafrmonr?’ ³⁴ Kingr namburhato tawo nd yimar yakmorrr tfit kalabus htamorr. Memor, ‘Kalabus toh gnngiruharn tawo nanhu marufat tfit hirahra.’”

³⁵ Jisasm nd kingri rorhu ofisampno namo neft kfonihato kfo memor, “To be rom namo kanjo, wom Kristen yimar o mett ni womnpno nayuk nefm nhai yafhorfonm, tawo nanhu Yifemr hefenn tohwarko rpahtet neft narahrn.”

19

*Tuhan yak tuhafo nmbuhathu mrokfot Jisasr kfo pthamor
(Mak 10.1-12; Luk 16.18)*

¹ Jisasr nd mrokfom kfonihato nd distrik Galilit htanymortn tfit tek Jodent hayukni-mort. Hayuknihato tfit distrik Judiat yimor. ² Ndko yimohat nhaf yonmari yima rifhur hikmotmr, ndharn rroh dbohnefet yimam fak marnya hanyhemorm.

³ Ndko tohetrn ndkorhof Farisim yuwi yihato ttiwon rhti memomr, “Nmoh boririfhut finji kfiwat, yimar be turhu duka fijo metthu yak tuhafoneft? Hifan o nhai?”

⁴ Jisasr kfo memor, “Niko Bro Nkifrarhu rfa borngt kfiwa mrokfom ka nhai htikahkomm? Nd mrokfot inji kfiwut, ‘Bingot Bro Nkifrar ndar bbinysoft hingrnahato yimam hingrnamohat mete yindariye hingrnamor.’ ⁵ Yo wom mrokfot inji kfiwut, ‘Ndnett yindarir turhu yifammam htanyhato turhu yak tuhantpno frtkafhato be rpa raftn dbkaf hmbriff.’ ⁶ Bi rpa raftn tou dbkaf hmbrihato tohkfot. Ndnett Bro Nkifrarn yak nmbtekyukm nhai tfit yima mifmn yak tndohkfot.”

⁷ Farisim wanyhato kfo memomr, “To tamohmpno Mosesrhu boririfhut kfo memot, ‘Afo tuhan yak tuhafoyuk kfo yakio gontwat wandfanihato ee mett yak tuhafokfot?’”

⁸ Jisasr kfo memorm, “Nd niko wanukwa boririfhut mirahko ka bingot nda bbinysoft trhanimohat ka nd boririfhut ka bi inji rhumot. Nhai. Tukmoh Bro Nkifrarhu mrokfo wany juha nmbuhathn Mosesr nd boririfhut htamort. ⁹ Na kfiwanko, wom yimar turhu yak tuhant nhai rine wunerfott be fak thu furefirtn tfit wom nfri mett fekr, nd nfri mett nhai turhu tuhan mift rhukaht. Be inji ijom metet.”

¹⁰ Disaiperl nd mrokfot inji wanyhato Jisasr kfo memomr, “To ni kangn, mirahr wom yimar turhu yak tuhant be yak thu furayant. To be ndhtet neft ka nom hhrekwonem tuhan yakneft.”

¹¹ Tfit Jisasr kfo memor, “Hifa kfiwuko. To mirahko ka yima bugam tuhan yak duha toh furarahm. Nhai. Wom womrpam Bro Nkifrar yak htetm, ndmn tuhan yak duha rhurahm. ¹² Wawanyko. Nhai rpahtet ruhet yimam rhukahm. Womm frfuha yaktetem be inji sfno tuhan yak duha toh firewum. Womm bi mmemroh yatim rhuhato frfuha duhatm korhm. Womm hefenrhu kingdomfothu kasinya yuhat dukahato nhai tuhan yakkahm. To nd tuhan yak duha mrokfot yimam kangm yakhato ahiknomt, yakhato hikkfot.”

*Jisasr yonroh mrokfot kfo pthamo yuhat
(Mak 10.13-16; Luk 18.15-17)*

¹³ Nd yiha wom yimam Jisasrpno yonemn hnehato memom, “Jisasr tir htahato kfo bruttnarahrm.” Disaiperl inji htihato tfit kfo huttaknimomm nd yon hnayuk yimam.

¹⁴ Jisasr inji htihato kfo memorm, “Yonemn wahti marsisafokahtkomm nanpno aniam. Mirahko akfo rafonomm. Yimam yon mumenm kanjo yorhwam hefenrhu kingdomfot rhurahm.” ¹⁵ Inji kfonihato nd yonemn yak nhafomormn tir htahato kfo bruttnamorm. Inji na tanyhato ndhart htanymortn yimor.

*Wuska kunyet yima damiagr Jisasrpno yihato napthamo yuhat
(Mak 10.17-31; Luk 18.18-30)*

¹⁶ Wom yimar Jisasrpno yau yaknihato mkfo ttiwon memor, “Tisa, nane fitohtet fitohtet dborioh nefm narhoyann Bro Nkifrapnro toh nkifranirhoya?”

¹⁷ Jisasr wanyhato kfo memor, “Tamohmpno tfit nann nd dborioh nefroh na yuham kfo ttiwonwa? Bro Nkifrappar dborioher. Tu kangn Bro Nkifrapnro amtoh nkifraniya, rorhu boririfhu mrokfom hikkfot.”

¹⁸ Yimar kfo memor, “To fitoh fitoh boririfhu mrokforoh hikkfot ni kfiwa?” Jisasr kfo memor, “Mirahn wanambur sinyahato yima awas furaya, mirahn ramet tuhantpno arim fnaha, mirahn arikoha, mirahn wom yimar wom mrokfom akfo wokanr, ¹⁹ yifammaroh mrokfom wany yakiohato rroh yinhitn rhukfot, tunn yak marnyewa kanjo inji womm yak marnyakfot.”

²⁰ Jisasr inji kfonimotr tfit nd damiag yimar sinyahato kfo memor, “Jisase, nd ni kfiwa boririfhu mrokfo bugam na hik bugewanm. To tamohm kangn wahikn?”

²¹ Jisasr kfo memor, “Kangn dborioh yimaya aruhane, inji nakfot: Nd ni harhuwa wuss yak htatahato wommn wiknakfot. Nd wusspno yakyuk marut yakhato tfit nd wuskapa duha yimamn nd marut hekfot. Inji narahn, hefenrko mfro wuss harhu-rahn. Inji nanihato tfit na nia hikkfot.” ²² Nd yima damiagr wuss mfro haruhetrn nd mrokfot wanymohat yima yuhur nhai marnyahato yirmor.

²³ Jisasr kekutnihato turhu disaiperm yukatohhato kfo memor, “Wahtiko, yimam wuss mfro haruhetm be tu mduka nhiyekwom hefenrhu kingdomkfothu fkneneft. ²⁴ Tfit mfkewa. Womhtet mong wakuyet fohr kutewumr kamerr. Nd kamerr fknanyirfort nahuyuk nirthu muht. To yimar wuss mfro haruhetr, Bro Nkifrarhu kingdomkfothu fkneneft mduka nhiyakrfor.”

²⁵ Tfit tu Jisasrhu disaiperm inji wanymohat tfit mifoh rihanimom. Miyoh rihanihato kfo memom, “Barenko, nom kangnom ka ndhtet maru kunyet yimamn hifa rhu nmbuhat miyakrahm. To nhai. Ndhtet yimam mthu nhyakrahm Bro Nkifrarhu kingdomkfothu fkneneft. To nome ndhtet yima furapanom, to nome finji Bro Nkifrarpno yihato mtob nkifraniruhanom?”

²⁶ Jisasr yukatohmormn kfo memorm, “Niko yimakomn tamoh tamoh nefroh finjina finjinaneft mduka nhyekwoko. Tu Bro Nkifrar nhai duka nhyakkfot wom tamoh nefroh finji naneft.”

²⁷ Pitarn sinyahato kfo memor, “Wahti. Nom ninhu hikneftn nmoh tamoh tamohm mong trohhato ni mhikaknamonom. To Bro Nkifrar tamohm hiruharnom?”

²⁸ Jisasr sinyahato kfo memorm, “Na kfo mifwanko, tfit nfri bbinysoft mfrfnahnehato Bro Najomr king yufat yaknihato kingrhu gajis yakhato rhu thombat, nd yiha niko nanhu disaiperko 12-pela gajim rhuhato Isrerroh 12-pela frikeft yakinohrahkomt. ²⁹ Yimam nann dukahato rroh kunym, yon tuhanm, yifa mndarm, mswirm htanym, tfit Bro Nkifrar wom 100 kfot thu hutahi hanyhato Bro Nkifrarpno toh nkifranirahm. ³⁰ Arihart nyingako tohekwa yimam, kto tfit mongko yihom fnahnirahm. Nd mongko tohyukmn tfit nyingako mfnahnirahm.”

20

Wain swirt hingrnayuk yimaroh kfo nhombra mrokfot

¹ Mongko tohyuk yimam mfrfnahnehato tfit nyingako mtob yuhathu mrokfo yuhat tfit Jisasrn wain swirt hingrnayuk yimamn kfo nhombramort. Kfo memor, “Hefenrhu kingdomkfot inji korht. Wom yiha wain swiret yimar dbha ksut yimorn yimam fak habrimor wain swirthu hingrnayukm. Yimam yak habrimorn, ² kfo memorm, ‘Rpa rpa yiham wan kina wan kina wikna hanyruhank.’ Nd yimam kfo fakiomomt nd marufat. Be inji nnakfonihato nd barkof yakmo yimam yimom wain swirthu hingrnat. ³ Yo tfit 9 kilok dbha nd bro yimar mhtimorm wom yimam rifinyuk maket tkittn toh fura hasomom. ⁴ Mtihato kfo memorm, ‘Nantu wain swirt wai wahingrnakahtko tukanhu hti fijo wiknuhank.’ ⁵ Be nd yimam inji kfomotrm yimom wain swirthu hingrnat. Kto tfit dany marrn womm yakhato hingrneft fak htamorm. Yo tfit 3 kilok tfit womm yakhato hingrneft fak htamorm.

⁶ Yo tfit tu wuroh 5 kilok krif marrn yimorn wom yimam rifinyuk maket tkittn toh hasetmn mtihato kfo memorm, ‘Nikome ndar yonmari marre be inji hingrna duha rhu furewukomr?’ ⁷ Nd yimam tfit kfo memomr, ‘To frohmh hingrnem harifotmnom hingrnarfonom?’ Inji kfomotm kfo memorm, ‘To ndhtet neft nanhu wain swirt wai wahingrnako.’

⁸ Bi tu wuroh krif miftn wain swir tikatr kfomorr hingrnefroh tohukatohr. Kfo memorm, ‘Hingrna yimam wanakuyakkahn rom hingrnahat maruham wahiyaf hanywanm. Maruham hiruhanme wuroh nia hingrnayuk yimamn wariehe gungonaktwa. Hihany hihany, ee nd barkof mringrnaknayukm wurohm wahitwanm.’ ⁹ Nd yimam tu wuroh

krif 5 kilok nia hingrnakniyukm niamotm tohukatohr wan kina wan kina hiyaf hany-morm. ¹⁰ Nd bi barkof mhingrnakniyuk yimam rom yimom. Rom yimomn memom, ‘Ka nomn bro marufam yakrahnom,’ to nhai. Rom to be inji buga wan kina wan kina fak hanymom. ¹¹ Be nd rom yakyuk maruham htihato wain swir tikatr kfo hutt memomr, ¹² ‘Nd yimam tu wuroh niahato wan auakforpat hingrnayukm tfit nom yakyuk marufat kanjo fekm. Nom famunom ka nom bi dbha ksut ritohakhato yonmari marr hatoh krifafyuknomn yura yakruhanomn rom yiro wayakrahm.’ ¹³ Wain swir tikatr nd hutt mrokfot wanyhato rroh wom hingrna yimar kfo memor, ‘Bare, na nhai kfo nheh marifoya be wan kinakforpat yakrahn. Nd niko yakhani wan kinakfot to bi tukomm kfo fakiomokomt nd wan kinakfothu yakneft. Na nd kfo yakio mrokfot hikhato inji wikniyanko. ¹⁴ Nhai tfit finji kforuhatn. Ninhu marufam wayaknikahnmn wanju. Nd na niko yahu maruham na tukanhu htihato yak nhta nmbuhatn inji fahuyanko.

¹⁵ Na nhai tukanhu maruhampno wom yimar kfo htakfot. Na kanga finji finji anayanm, to ni womn tamohmpno tfit kfo yuhuwehwa?’ ”

¹⁶ Jisasr kfo memor, “To inji rhuraht. Yimam mongko tohyukm tfit mfnahnirahm. Yimam nyingako tohyukm tfit mongko yirom fnahnirahm.”

Husfirpehyuk mrokfot Jisasr kfo memor, “Nohaforhoyann tfit sinyaruha.”

(Mak 10.32-34; Luk 18.31-33)

¹⁷ Jerusalemko yinyeftpno buha yihotatn Jisasr turhu disaiperm yakhato turpathato kfo memor, ¹⁸ “Wawanyko, nom Jerusalemko yitohat, na Bro Najoma hrek kita prisroh bro yimami nkifra boririfhuthu tisaroh tirmn. Kmim rompno nakfo habofkniruhamn, ¹⁹ yima tangimpno htarhotma, rom sinyahato kfo hutatpno kfo hutatpno yenyohrahma. Tfit wife wife yenyoh gurahma. Wife yenyoh guhato tfit yura bgre misn kihegirrhotma nohrhuha. Nohrhoyann tfit husfirpehyuk marrpno tfit sinyaruha.”

Jems Jonrof memof, bro yimano arhuno

(Mak 10.35-45)

²⁰ Sebedirhu mett yon husf yaknihato Jisasrpno mtabokmehato kfo memor, “Tisa, nanhu mrokfot kforfohat, wanyrfont?” ²¹ Jisasr sinyahato kfo memor, “To wakfo ptha.” Kfo memor, “Na kanga, ni kingn toh thoft nanhu yon husfn mano mano arhutwaf. Womr wayak htatwanr tirmifkor yo womrne kindonko. Rofn ninpno mano mano rhuhato bro yufat yakhato nihu hingrneft yakinohnhorahfn.”

²² Jisasr sinyahato kfo memor, “Nifn nhai duka hik marnyahato ttiwonkahfna. Nd na yeroha krhoparoh kaft ka yenyho twanho mifrahfna?” Kfo memofr, “Uwa, no yenyhorahnnon.” ²³ Jisasr kfo memor, “Na yeroha krhoparoh kaft rot nifn yerahfnt. Tmift nann nifnhu rhuyuk tkitroh yak htaneftn, na nhai bi nanhu fijo kfo mekfot ni ndko rhurahn. Yo ni ndko. Nhai. Tu Bro Nkifrarhu duka fijo fak hta nhombra htatamorm tkitm. Kto turhu hti fijo tkitm yak hta nhombra hi hanyrahram.”

²⁴ Jon Jems najohf inji ttiwonmotfr tfit wom 10-pela disaiperm kfo hutt memomf, “Tamohmpno ndhtet ttiwon nmbuhat ttiwonwafnr?” ²⁵ Jisasr rpat naku nhafoh bugamormn kfo memor, “Niko bi htiheteko, kingm yima tangim yakinohwohat. Yimam be nd tohak yimarhu yinhibitn tohwom. Nhai womr finji tfit kfo pthakfot. Yimam be rorhu tngrrpat hikkfot. ²⁶ Niko mirahko nd neft ahiknom. Yimar kangr, tohukatohr atoha, nd yimar afo nikmoh hingrnano yimar tohkfot. ²⁷ O kangr, tohak yimaya atoha, afo toh tarlo yimar tohkfot. ²⁸ To Bro Najomr niamohat, nhai turhu rhu nmbuhat dukahato ndar bbinysoft niarmort. Nhai. Nikmoh rhu beb nmbuhat duka tanyhato niamort ndar bbinysoft. Rorn ndar bbinysof thofroh fasoh fasoh nefm suh nanyorrahram.”

Jisasr nyinga kunyjf yak marnyamo yuhat

(Mak 10.46-52; Luk 18.35-43)

²⁹ Jisasri turhu disaiperm kmi Jerikot htanyhato yimohat, yonmari yima rifhur hik hanymomm. ³⁰ Buha yihotatn hus nyinga kunyjf yihota thmbko rhu hasohato wanyak hanymof Jisasr yimohat. Wanyak hanyhato kfo nakuyafmof, “Woi! Bro Nungothete,

Defit frikefthu Yone, wayuhuwafnno.” ³¹ Inji kfo nakumotf wom yimam kfo thfamomf. Rof nhai wany yakiformof. Tfit wompam masat kfo nakuyafo memof, “Woi! Bro Nungothete, Defit frikefthu Yone, wayuhuwafnno.”

³² Be Jisasr nd yimafhu naku tngt wanyhato be mtohmor. Mtohhato kfo memorf, “Bar yimafn, tamohm nakutafna?” ³³ Nd nyina kunyif kfo memof, “Broye, kangno nyinjam wayak marnyakahtnm ayukatohno.” ³⁴ Inji kfomotf Jisasr yuhuwahfato nyinjamn tirm htamotrf nyinjam be wuthamomf. Nyinjam wuthanimotmf be tfit Jisasr mhikakni twanhomof.

Jisasr Jerusalemt mfnahhato tuhan yindarim kfo nuhas bonuhasmo yuhat

21

(Sapta 21-25)

*Jisasr king kanjo Jerusalemr yimo yuhat
(Mak 11.1-11; Luk 19.28-40; Jon 12.12-19)*

¹ Jisasri turhu disaiper yimomn brbo Jerusalemt pno yorhwa Olifet kmi yihofr yorhwa kmi Betfaget mfnahmom. Ndha mhtahato hus disaiper kfo tkrur memorf,

² “Watohak hanyakahfnn ndar rihtita kmit mfnahrahfn yudbat htirahfnt wom donkit natifett rhuraht rpat yon donkirpno. Nd donkif wayak nyusakaknetwafn. ³ Yekwatfnf yimam kfo ttiwonwomfn, wakfo wamitwafnm, ‘Bro Nungothetr hingrnefetrn kfefitrno be yifrar kakni yahukanonr tfit yudbat yarim htanyrahf.’”

⁴ Ndhtet tng mrokfom inji rhumohat, to be bingot profetr kfomo tng yuhatn nd mrokfom rhu hik mifmom. ⁵ Bro Nkifrar kfo memorr Aisaiar,

“Taun Saion wakfo wamitwant,

‘Wahtiyakko, nikmoh kingr bi ndr bi niewar.

Yufapa duha yima furam kanjo yura donkir rhuhato niewur.

Yuhre warho hanyet donkirk rhu hnehato niewur.”

Ais 62.11, Sek 9.9

⁶ Be nd hus disaiper yimofn hingrna hikmof Jisasr kfomo yuhatn. ⁷ Nd donki husf nyusaknihato hanyhemofr. Rim htahato tufhu rmoutham yakkofmn yima rhuyuk tkitt rmouthaye yak hta marnyahato Jisasr mrhuhato yimor. ⁸ Ror yimohat yonmar yima rifhur ror htiyak hanyhato turoh rmoutham yakkomm, rorhu yiyuk yuhatn hta nyingtakmomm. Womm miyuhtam yak wokakhato ror yiyuk yihotatn htakmomm. ⁹ Jisasrhu nyinjako tohakmo yimam yo mongko tohyuk yimam, romn kfo naku ptha hany memoum, “Wayindhorakkorm Defit frikefthu Yonr. Bro Nkifrar ayak marnyatwarr Brorhu yufatpno niayuk yimar. Bro Nkifrarhu yufat yura yura kfo yindhor boyindhorkfot.”

¹⁰ Jisasr kmi Jerusalemt yimohat, kmi thofm tfit tum nattiwon hany memom, “Ndar yimar nieware froher?” ¹¹ Nd Jisasrpno yau hanyo yimamn kfo nuhas memomm, “Ndarr Jisaser. Galiliko yorhwa taun Nasaretkorhof profetr niewur.”

*Bro Nkifrarhu temperr maket htamo krim Jisasr yihato yak thumo yuhat
(Mak 11.15-19; Luk 19.45-48; Jon 2.13-22)*

¹² Jisasr Jerusalemt rim fnahnihato rim htimorm Bro Nkifrarhu temperr maket htamoum yimam. Rim htihato maket htamo yimami yeshrim wiknamoa yimam hik tubatumorm. Hik tubatumormn maruha niak tuknamoa teborm yo nunga ganyom mmkrm htamo gajim nembos tubatu hikafmorm.* ¹³ Yak thunihato kfo memorf, “Bro Nkifrarhu rfa borngt kfo kangt, ‘Nanhu temperr nanhu kfo bruttnayuk kunys rhuraht.’ Tfit nikomn kangko rikoh yimarooh yi kafrohyuk tkitt arhut.”

* 21:12: Bro Nkifrarhu temperr htamo ofakfot yimam wiknamoahat nhai gafmanru maruhaye wiknarmoamm temperr htayuk tamoh tamoh yeshrim o tamohm. Tu temperrhu maruham yak tuknamoamn tu temperrhu maruhaye wiknamoumm yeshrim o tamohm. Ndnett yimam temperrhu yeshrim wiknamoahat afo maruham yak tuknahato ee yeshrim tu temperrhu maruhaye wiknamoumm.

¹⁴ Jisasr yiro temperr tohetrn nyinga kunyjetm yo wura bebet yimam yimom. Yimotm Jisasr fak marnyamorm. ¹⁵ Jisasr nd mirakerkfot hingrnamohat yo yonkmim yiro rmon kmifar tohhato kfo yindhor grha memohat, “Defit frikefthu Yonr wakfo hagrifikomr.” Nd kfo yindhor mrokfom prisroh bro yimami boririfhuthu tisam htihato wanymohat rroh yima yuhum nhai marnyarmomm. ¹⁶ Yima yuhum faso rikihato Jisasr kfo ttiwon memomr, “Nd yonkmim kfo yindhor grhahato kfiwa mrokfom ni wanuknm?” Jisasr kfo memor, “Uwa, rom wanukanm. Tone, ka nhai wom mrokfot htikahkomt? Rfa borngt kfo kangt, ‘Ninhu yufathu yuta hagrhaneft yonmpno bi inji rinakmotn tu be ninhu yufatn yonm kfo yuta grha hanitm.’” ¹⁷ Be tfit nd taunt htanyhato tfit kmi Betanit yihato nd yifungr ndha toh nfhamor.

Jisasr kfohato fik tihat nohhato twam yurfmoyuhat
(Mak 11.12-14; 11.20-24)

¹⁸ Dbha ksut Jisasr memor, tfit taun Jerusalemko aiya, buha myatinohmor. ¹⁹ Yihota yifembtn tohmot fik tihat. Nd fik tihat nhai yukha hirrmoat. Be twa bomrpam rhumomt. Be inji htihato nd fik tihat kfo memor, “Ni ndar fik tihaye, mirahn tfit yukha hir mifa. Be tu nhai mif.” Be nd fik tihat inji kfomotrt, be yudbat nohhato twam furfmomt.

²⁰ Turhu disaiperm inji htihato be tuha mrokfo duhatm rhuhato kfo memor, “Bar yimako, finji netrt nd mis yudbat nohakni twanhit?”

²¹ Tfit Jisasrn sinyahato kfo memor, “Na kfo mifwanko, nikmoh yima yuhum be tu rpa yima yuhur rhuhato kfo mirahko, ‘Nom asomif kfiwohat Bro Nkifrar wanukwarn asomif nd mis nohwot.’ Inji dukahato kforahko, to inji htirahko na asomif fik tihat ne kanjo. To mirahko ka be ndrpatn. Nhai. Nd kminysoft kfo mirahkomt, ‘Asomif nom kfiwunom marombtn wamitoh witani,’ to be htirahkomt nd kminysoft marombt mitoh witaniraht niko kforuha kanjo. ²² Nikmoh yima yuhum rpa dukefrpar rhuhato tamohm kfo bruttna kfo mirahko, ‘Nom asomif kfiwohat Bro Nkifrar wanukwarn nd nom kfo bruttnewa shrm htitnomm.’ Inji dukahato kfo bruttnarahko, to be hti mifrahko.”

Jisasr bro yufat yakmo yuhat kfo ttiwonmomr
(Mak 11.27-33; Luk 20.1-8)

²³ Jisasr Bro Nkifrarhu rmon kmifarn fknenimorn met yindarim kfo ptha nuhasmorm. Kfo nuhas hanyetrn prisroh bro yimam yo Judaroh bro yimam yimom kfo ttiwon memomr, “Frohmn ndhtet bbuka rifhur hemomn? Frohmn bbuka rifhur hehato kfo memomn inji wanatwa?” ²⁴⁻²⁵ Tfit Jisasr sinyahato kfo memor, “Na to tawo tfit ttiwonwanko. Tone Jonr yimam baftaisimmoahate tu Bro Nkifrar kfomotrr ndhtet hingrneft hingrnamourt o be yima mifm kfomotmr yimam baftaisimmourm? Nd ttiwon nmbuhat kanga wakfo nuhaskahtkma tawo kfo nuhasruhanko na hingrnewa hingrneftu bbukeft yakmo yuhat.”

Rom inji wanyhato tfit tum nnakfo memor, “Nom sinyahato kfo mirahnomr, ‘Bro Nkifrar kfomotrr hingrnamour,’ to tfit mirahr, ‘To tamohmpno wany yakio duha yirmokomr?’ ²⁶ Jonr pthamo mrokfom profetm kanjo pthamoatrm yimam wany-moumm, tfit nom kfo mirahnom, ‘Yimaroh kfotpno kfo pthamour,’ to be yimam sinyahato tat nohrahnom.” ²⁷ Be myak nhtaktiyaktihato be kfo memomr, “Nom nhai tawisafkahnom.” Rom inji kfomotm tfit Jisasr kfo memor, “Na to inji. Na nhai kfo nuhaswotanko na hingrnewa hingrneftu bbukeft yakmo yuhat.”

Wom yimarhu yon husfhu kfo nhombra mrokfot

²⁸ Jisasr tfit nd prisroh bro yimami Judaroh bro yimam kfo ttiwon memor, “Tone finji dukewako? Wom yimar hus yonetn tohmor. Wom yiha turhu nkati yonrpno yihato kfo memor, ‘Hrek waikahnn wain mswirt wahingrnatwa.’” ²⁹ Tfit yinemr afo kfo kur nheh memor, ‘Na wofnkaha.’ Yinemr afo inji kfo kur tefinimorn tfit kto sinyanihato yimor.

³⁰ Bro yonr kfo ttiwontinihato tfit yimor habhirpno. Yihato rpahtet mrokfot kfomorr. Kfomotrr yinemr kfo fakio nheh memor, ‘Uwa, yiruha.’ yakio nhehafhato nhai yirmor.”

³¹ Jisasr inji kfohato ttiwon memorm, “Nd hus yonfe frohrn yifemrhu mrokfot wany yakiomort?” Rom kfo memom, “Nkatirn yifemrhu mrokfot wany yakiomort.”

Rom inji kfomotmr tfit Jisasr kfo memorm, “Na kfo mifwanko, takis marut yekwa yimami yo ijom tonita metm, romn tohekwopt Bro Nkifrarhu kingdomkphot. ³² Ndt to nhai be sfno. Nikmoh yihar Jonr tohhato dborior yihotar fak nuhas hnamorko. To nikomn nhai wany yakiohato yak hikrmokomt. Takis maruha yakyuk yimami ijom tonayet metm, romn wany yakiohato hikmومت. To niko tfit inji htifaf hanymohat, to nhai nikmoh fasoh fasoh nefm mong trohhato Jonrhu mrokfom hikrmokomm.”

Wain swirt tohukatohmo yima bebroh kfo nhombra mrokfot
(Mak 12.1-12; Luk 20.9-19)

³³ Jisasr tfit wom kfo nhombra mrokfot yakhato kfo memorm, “Wawanyko. Wom yimar wain swirt htamor. Wain tofm nuhtanihato gnat gna habrimort. Gnanihato muhr toumorr wain yukharoh yahot kembiftyukr. Ndt inji hingrnanihato tfit nd wain swirthu rhu yukatohyuk kumba kunyr hingrnammor. Be inji hingrna tanymortn wom yimam yakhato nd mswirthu tohukatohhato yukharoh nayak nhta yuham nayak dbkafhato ror be wom kmimn toh habrimor. ³⁴ Kto nd wain swirt yukha hirmott yukha yak yiharn nd tu wain swir tikatr turhu hingrna yimam kfo tkrurafmorm, nd wain swirt yakitoh hasoyuk yimampno. Kfo tkruraf memorm, ‘Waikahkomn nanhu yufathu htahayuk yukham wamiyahikhma.’ ³⁵ Be nd yimam yimohat be mifahotakmom. Nd mswirt tohukatoh hasoyuk yimam sinyamomn womr tabotmomr, womr tabotmotmr nohmomr, womrne tahiya tahiye febhohmomr. ³⁶ Yo tfit kto wom yiha tfit wom yimam kfo tkrurafmor. Nd yiharne tu bokm. Yimom, nhaf be mifahotakmom rpahtet neft namomm.

³⁷ Wuroh turhu garbn yon mifr. Duka memor, ‘Tukanhu garbn yon mifr yiruhatre wany yakiorahmr.’ ³⁸ Be nd yonr tkrurafmotrr yimor. Yimorn wain swirt tohyuk yimam htiyahkato tum rinnakfo nakfo memom, ‘Ndarr turhu yonr nier. Yifemr nohnineft to nd yonrn tkitt yakhato ndar wain swirt rorn yakrahrt. Finji dukewako? Awaskahnomr be nd wain swirt be nmoht rhuraht.’ ³⁹ Be mrokfot yak dbkafnihato turhu wain swirt toh hasetrn toh rafaknihato fakmomr. Yakhato tirtir yaknimomr nndo rim htahato wasmomr.’ ⁴⁰ Jisasr inji kfo pthanihato kfo memorm, “Niko to finji dukewako? To nd wain swir tikatr nia thofte, to finji naruharm?”

⁴¹ Kfo memomr, “Nd yima bebm faso tabot nohrahrm. Tabot nohhato nd wain swirt yakruhartn tfit womm hehato romn yakitohruhamtn wain yukha yak yihar yakruhammn nd wain yukham yak nhtaruhammn turhum hirahmr.”

⁴² Jisasr wanyhato kfo memorm, “Wom mrokfot Bro Nkifrarhu rfa borngt yorhwat htitwokomt? Nd mrokfot kfo kangt,

‘Nd rahur, kamda yimam hti kurhato yak thumor,

be bi tfit nd rahurn bi dany rahur tohwor.

Tu Brorn inji hingrna hta bohtamotrt

nom be inji htihato mrokfo duha korhwonom.’

Sng 118.22, 23

⁴³ Ndnett kfo dukiwanko. Bro Nkifrarhu kingdomkphot niko yakitohwat, yak tuhakruhartn tfit frohm nd kingdomkphotu nefm mhfnahnewum, rom tfit wahirahr.

⁴⁴ Yimam nd dany rahurpno rim frrbigneft o rahus suhnehato frkarnyanef to be nhai wom rhukfot o nfrikfot.”[†]

⁴⁵ Nd nd mrokfom pthamotrm nd prisroh bro yimam yo nd Farisim Jisasrpno toh pthamoam, wanyhato kfo memom, “Nd kfo nhombra kfot nomn niewut.” ⁴⁶ Ndnetmn nambur sinyahato memom, “Ka bi kak twanhiwunomr.” To nhai, kmi thofm mhti fakrmiyakmom. Kmi thofm Jisasr kfo pthamoa mrokfom profetm kfo pthamoa kanjo pthamoatrm rom wany yindhorhato hikmomm. Nd rorhu mrokfom hiket yimam

[†] 21:44: Nd ves 44 kfot, ndar gonborngt yorhwa mrokfom hti duka tungunet yimam kfo memom nd sentenskfot nhai tu Matyurn htarmort. Wommn nd sentenskfot rihtakmomt.

ruhetmn prisroh bro yimaroh namburpam yo Farisroh namburpam romn mhti yakr-miyakhato nhai tafont htarmoamm. Duka memoum, “Finji rinakrahnom, rom sin-yaruhamn tabot nohrahmnom.”

22

*Yima sawohf nayak tatrutwa yiha htewa yemro burwathu kfo nhombramo mrokfot
(Luk 14.16-24)*

¹ Jisasr tfit wom kfo nhombra mrokfot yakhato kfo memorm, ² “Hefenrhu kingdomkfol kangme wom kingrhu yonr tuhan yekwarn yifem kingr bro yemro burwat htewartn kmi kmi nakutrm. ³ Nd yemro burwat yak htatahato bi kfo duka mrokfot bi yak hanyetm, mrokfot frhtfasmot yimaroh yakyukt. Tu kingr kfo tkurmotrm turhu hingrna yimam yimom yimaroh yak htfass. To nhai, yimam nhai sinyarmom. ⁴ Yo tfit wom hingrna yimam yakhato kfo tkur memorm, ‘Na mrokfo hta htfasmo yimam wayak htfaskomm. Wakfo wamitwakomm, na bi yemro burwat htatahato bi kfo nakuta. Nanhu bulmakau yiramm warhet warhet yemrot bi washato nde yemro burwat htiwant. Aniekahmn arhu ayamt.’

⁵ Kingrhu hingrna yimam yi kfomomm, nd yimam nhai wanyrmomm. Rom mrokfom wany sany hanyhato rpen rpen natubatumom. Womr ror turhu mswir yuhatn myak tehnihanswa, womr ror turhu hingrnefmn waiswa. ⁶ To tfit wommn nd kingrhu hingrna yimam yak tkaftamomm tat beb bobebmotmm nohmom. ⁷ Kingr inji wany namburhato turhu soldiam kfo tkurmotrm rom yihato nd yimam was witahato rroh kmit tandhi wusmomt.

⁸ Be kingr turhu hingrna yimam kfo memorm, ‘Yemro burwat bi htayett korhwot. Tmift nd kfo hanyuk yimamn nhai tu dborior yimamn niakahmn yekahmt. ⁹ Ndnett wai htfastwakomm yihota nadbgm. Yihota nadbgm tohhato yimam htiyekwoko, wakfakne hnetwkomm ndar yemro burwathu yanyeft.’ ¹⁰ Be inji kfafmotrm yimom. Yi htfashato nd yihotam toh hasoyukm yak bugahato hanymomm. Dborior yimam, fasoh yimam fak fura bofurani bugamomm. Nd yemro burwat htayuk kunyr be tng mnderpat tohmor.

¹¹ Tuhant yindars rhu hasetmn kingr rroh htit yimor. Yimorn wom yimar htimorr nhai tu nd tuhan yak yiharhu wondhyuk wondh tham hmbrermor. ¹² Kingr inji htihato kfo ttiwon memor, ‘Barene, tamohmpno nhai tu dborior hmbresham hmbrenehato niarfo?’ Be nd yimar tuha mrokfo duhattr tohmor. ¹³ Be kingr toh kekutnihato turhu hingrna yimam kfo memorm, ‘Nd yimar wayak tumakkahkomr briahako watuhafokomr. Briyahako kspitat tohrahr. Nd kspitat tohwa yimam tau nknekwom.’”

¹⁴ Nd kfo nhombra mrokfothu yimbu yuhat Jisasr kfo ptha memor, “Bok yimampno nakukfot kitt, to tfit rpen rpenrpam kekwor.”

*Sisarhu maruha he yuhat
(Mak 12.13-17; Luk 20.20-26)*

¹⁵⁻¹⁶ Be nd Jisasr kfoyuk mrokfot Farisim wanymohat yima yuhum nhai marnyarmomm. Be yihato tfit tu Farisiroh disaipermi Herotrhu politiker patikfot tohyuk yimam mkfo tkurraf memomm, “Nikomn waikahkomn rorhu mrokfo ptha swirmn rhunhohato yuwi ttiwon rhtikfot. Finji finji kfiwur, nd tkittn yakhato kotimrahnomr bro yimampno.” Be inji kfafmotmm yimom. Yihato yuwi kfo memomr, “Tisaye, ni pthewa mrokfom nom hifa wanuknomm. Mrokfom hifa hifa kfo hik bohik marnyewanmn Bro Nkifrar hikwa nefm kfo hik nuhas marnyewunm tuhan yindarim. Mrokfom kfo pthiwohat nhai hti mekahn ndr yufet yimayer o ndr yufa duha yimayer. Nhai. Mrokfom kfo pthaneft be kfo pthewunm. Nhai yimar o yufam htihato kfo pthakahnm.” ¹⁷ Inji kfonihato wom ttiwon nmbuhat yuwi ttiwon rhtimomr, “To ni finji dukewa? Nome ka Sisarhu takis htahenefte ka htarfome nhai?”

¹⁸ Jisasr rom yuwi inji ttiwon rhtimohat bi htimorm rroh fasoh yima yuhum. Htihato kfo memorm, “Niko mikfo nhehta mkfo nhehtayet yimayeko! Tamohmpno inji

ttiwon rhtitakma? ¹⁹ Wom takis wiknayuk tahifat wayak nuhaskoma.” Yakhato fak nuhasmomr. ²⁰ Nd tahifat yakhato kfo memorm, “To nda tahifat yorhwa nyngatikte frohroh nyngatikti yufat yorhwat?” ²¹ Kfo memomr, “Sisarhu nyngatikt korhwott.” Tfit kfo memorm, “Sisarhu nyngatikt korhwott to be tfit Sisarn hekfot. Bro Nkifrarhum nhaf inji. Tu Bro Nkifrarn hekfot.”

²² Inji kfo wokfmotrm be mrokfo duhatm yimom.

*Sadyusim Jisasr ttiwonmomr yimaroh nohhato sinya yuhat
(Mak 12.18-27; Luk 20.27-40)*

²³ Farisim yimotm tfit Sadyusim yimom. Nd Sadyusiroh dukeft duka memoum, “Noh hanita yimam nhai tfit sinyaruhatm.” Rroh dukeft inji rhumout. Nd duketpno Sadyusim Jisasrpno yihato mkfo memomr, ²⁴ “Tisaye, Mosesrhu boririfhut kfo kangt, wom yimar tuhan yakhato nhai wom yonm kasinya htanirfor, nd rorhu tuhan dhirt tfit wom nmemrn najom dhirt yakhato rorpno yonm nasakhato tfit najomrhu tkitm romn tohkfot. ²⁵ Wom yima najohfitpno to inji rhumot. Nd yima najohfit 7-pelakfot tohmom. Barkof bro najomr tuhan fakmor. Ror tuhan yakmohat nhai yonm nasak htanihato nohrmor. Be nohmotr tuhan dhirt tohmott tfit rorhu wayakrn fakmort tuhan dhirt. ²⁶ Rorpno nhaf nhai wom yonm nasak htanihato nohrmor. Tfit rorhu mongko nuryukrn tfit fakmort nd tuhan dhirt. Ror yakhato be rpahtet neft. Be inji nahany nahansyn 7-pela yima najohfit rhunhombra bugamotm. ²⁷ Wuroh 7-yukrpnone nohmot. ²⁸ Nd 7-pela yima najohfit rpa metrpatt rim rhuta mrhutamotm. Kto nd najohfit sinya thoft nd mette fitoh yimarpno tohruhat?” Inji ttiwon rhtimomr.

²⁹ Jisasr wanyhato kfo memorm, “Bro Nkifrarhu mrokfom yo rorhu bbukeftpno nd noheh yimam sinya thoft ka mumiwuko. ³⁰ Wawanyko, nd bi noh hanita yimam kto tfit sinya thoft nhai tfit tuhan yakruhatm. Nhai. Be inji sfno hefenrhu mounmotm kanjo tohrahm.

³¹ Nd yimaroh nohhato sinya yuhat Mosesrhu tndht duka hanykfot. Wom yiha Bro Nkifrar yihato Mosesr kfo memor,

³² ‘Nane Abraham, Aisak, Jekofroh Nkifraya.’ *Kis 3.6*
Bro Nkifrar yima nfri yafothet yimaroh Nkifrayer. Nhai noheh yimaroh Nkifrar rhukahr.” ³³ Yimam nd ror pthayuk mrokfom wanyhato mrokfo duhatm rhumom.

*Nyingako mtohekwa tu bro boririfhut
(Mak 12.28-31; Luk 10.25-28)*

³⁴ Sadyusim kfoyuk tngm Jisasr kfo wokmohat Farisim wanymom. Farisim wanyhato yimom Jisasrpno. ³⁵ Farisim yimomn rroh womr, nkifra boririfhuthu tisar, rorn Jisasr yuwi ttiwon rhti memor, ³⁶ “Tisa, ndar nom wanuka boririfhum, fitoh boririfhutn tu nyngako mtohak mifwat?”

³⁷ Jisasr wanyhato kfo memor,
“‘Bror ninhu Nkifrayer, ndnatn ninhu yuhuwaf marbi bugam,
ninhu yafothat, yo ninhu yima yuhu bugam
be rorparr htakfot.’” *Lo 6.5*

³⁸ Nd boririfhutn tu bro mifet. Rotn mtohak mifwot. ³⁹ Yo tfit rotpro myak tkafekwat inji kfiwut:

‘Tunn yak marnyewa kanjo inji womm yak marnyakfot.’ *Wkp 19.18*
⁴⁰ Nd hus boririfhu nmbuhafn tof tu mnako yorhwa boririfhuf. Mosesrhu boririfhuti profetroh mrokfom, nd hus boririfhufn mttaf tanymom.”

*Frohr miyak htiyakruharnom?
(Mak 12.35-37; Luk 20.41-44)*

⁴¹ Farisim yuhre rifiny hasetmn Jisasr yihato kfo ttiwon memorm, ⁴² “Niko finji dukewakomr nd yimaroh minrfa htiyakyuk yima Kraisr? Fitoh frikef yuhathu yimayer?” Kfo memomr, “Defitrhu frikef yuhathu yimayer.”

⁴³ Tfit kfo memorm, “Niko tu kfo mif kfot kfo thoft, to tamohmpno bingot Defitr tohmohat Bro Nkifrarhu Yafothat yihato Defitr yima yuhu hemotrr nd yima Kraisr Defitr futa memor, ‘Bro Nungothetr?’ Defitr kfo memor,

⁴⁴ ‘Bro Yawer kfo memor nantu Bro Nungothetr,

“Nantu bro bbukeft yorhwa tirmifko wamrhun.

Wamrhukahnt nd ni namburwa yahr kmim

afu ninhu tirtu htahato ninhu mofsinhitn yak htaruhanm.”’

Sng 110.1

⁴⁵ To nd yima Kraisr bi Defitr kfo yuta hna memoa, ‘Nantu Bro Nungothetr,’ to tfit Defitrhu frikef yuhat nieraht?”

⁴⁶ Be inji yak nnariyafomotrm nhai tfit marimom, “Tfit wom kfo ttiwon mrokfot kfo ttiwonrahnomr Jisasr.”

23

Farisimi nkifra boririfhuthu tisaroh fasoh nmbuham

(Mak 12.38-39; Luk 11.43; 11.46; 20.45-46)

¹ Farisimpno nd kfo ttiwon nmbuhat kfo ttiwonnimormn tfit kekutnimorn turhu disaipermi tuhan yindarim mrokfom hi hanyhato kfo memorm, ² “Boririfhuthu tisami Farisim rom hifa boririfhu mrokfom kfo nuhaswomko Mosesr namoa kanjo. ³ Ndnettnd rom kfo nuhasyuk boririfhu mrokfom nikowanyhato hikkfot. Tmift, rom niwa nefmn nikohthi hik duha. Rom inji newum: Yimaroh mrokfo hanyeft, rom mrokfom kahukmm. To tfit tum nd mrokforoh hikneftn nhai hikkahmm. Ndnettnd rom nayuk nefm nikohik duha. ⁴ Rom yimam boririfhu mrokfom kfo nuhaswohat, nhai be Bro Nkifrarhu boririfhurpat kfokahmm. Tfit romn turoh fijo wom wom kfo yirmoh mrokfom yakhato tfit hta hutewumm. Btn yimam hikneft htanhithm hik buganeft. Inji htitahat nhai hti yuhuwaf mikahm. ‘Be kfongot rimak myakhato htewatnom yimam htanhitwom hikneft. Womm ayak thunomm.’ Nhai. Nhai inji nakahm. ⁵ Rom niwa nefm kangm yimako htiruhakomn kfo yindhorrakomm. Kfo bruttna yiham htirahkomm nhai Baiber fesm ruhet tefi kpenm mfhatn kiskaf hmbreruhatm. Nhai. Tu yuke yuke mtin tfuhet saketham hmbrirahm. Kangm yimako htiruhakomn kfo yindhorrakomm.* ⁶ Fitoh rhu rifinyhato kfo bruttnayuk rmonm rom nhai mongkorn o kimbko rim rhukfot. Tu be nhai mif. Rom tu be nyngako mruhakkfot. Bro yemro ye burwa tkitm nhaf inji. Rom inji yimaroh nyngako mruhakkfot. ⁷ Yo tamoh maket swirl rom yau hanyneft kangm, ‘Yimam be tisa yufatpno ayuta hambonna yindhor amemnom, “Hifa dbha Rabai.”†

⁸ Nhai yimam nikomn kfo yuta mekfote, ‘Rabai.’ Niko najohfi yagnr tohwoko. Tor womr, rorrpar nmoh Tisayer. ⁹ Ndhar bbinyssoft, nikohai wom yimar yuta mekfot, ‘Yifemr.’ Tor womr, rorrpar nikmoh Yifemer. Tor yura hefenrn tohwor. ¹⁰ Yo nikohai yimam nikohik yuta mekfote, ‘Tohak Yimam.’ Nhai. Nhai nikomn inji yutakfot. Nikmohr rpa tohak yimayer. Rorn Bro Nkifrar kfo htamorr ndar bbinysof thofroh minrfa htihakneft. ¹¹ Kangn, ‘Bro yimaya atoha,’ afu yimaroh hingrna yima furar kanjo rhukfot. ¹² Yimar kangr, ‘Tamoh nefm nann bmbri nyngako mtohnihato nann tamoh tamoh nefm atohakkahtanm yimam kfo yindhorrahma,’ nd yimar kto Bro Nkifrar yak dburakruharr yiro wahtarahrr. Yimar turhu yufat yiro wahtahato yimam nhai kmi kmim yindhorkahmr, nd yimar Bro Nkifrar tfit yura wuhtarahrr.”

* 23:5: Nd tefi kpenm Judam hingrnahato nyimbikko htamoam yo womm kindon tirko htamoam, ndm Baiber fesm wandfa wandfamoamm nd tefi kpenmn hmbreroammn, kfo bruttna yiham ndm htanimoamm yimoum kfo bruttna swirl. Yindarirpam ndhtet kpenm hatohmoum. Ndhtet kpenroh mrokfot htikfot Kisim Bek 13.9 yo 13.16 yo Lo 6.8 ee 11.18. Yo Judam buk Namba 15.37-41 yorhwa mrokfom hikhato rroh kkopen mtin tfuhet saketham hmbrremoum.

† 23:7: Nd Rabai yufathu yimbu yuhat, Tisa.

*Jisasr Farisimi boririfhuthu tisam kfo hutmo yuhat
(Mak 12.40; Luk 11.39-52; 20.47)*

¹³⁻¹⁴ “Niko boririfhuthu tisako yo niko Farisiko, niko mikfo nhehta mkfo nhehtayet yimayeko! Wadukaf hanyswako! To nikomn hefenrhu kingdomfothu rim fkneni yuhat toh rafiwukomt. To tuko nhai rim fnahnikahko, tfit wommn kangm arim fnahninom tfit kiyak rafiwukomm. Ndnett Bro Nkifrar be yak bebrahrko.”‡

¹⁵ Niko boririfhuthu tisako yo niko Farisiko, niko mikfo nhehta mkfo nhehtayet yimayeko! Wadukaf hanyswako! Niko inji newuko. Niko tukmoh hingneftu yaunhoyuk disaiperm kangko ayaknom, yonmari tkit tkitm frnahik bugewukomm, yo marombt frhtfas bugewukomm. To nd yimar yakneft to tfit niko hel yuhat tohhato niwa fasoh fasoh nefmn tfit kak nuhaswokomr. Yak nuhaswatkomr rorn be tu mfro mfro fasoh nefm kitr.

¹⁶ Nyinga kunyjko kangko tfit womm yihotat ayak nuhasnomm, niko duka marnyaf hanykfot! Womm kfo kangkomm, ‘Fitoh yimar Bro Nkifrarhu temperr myutak hanyhato wom mrokfom fak dbkafrm, to nhai hik duha yirform ror kfoyuk mrokfom, ndt nhai mrokfo duhatet. To nd temperr rim htayuk gorkfotn myutak hanyhato wom mrokfom fak dbkafrm, nd mrokfomn ror hikkfot. Bro Nkifrar kukatoh hasiwur.’¹⁷ Ar mmo hari kpt! Nd niko kfia tngt be tu nyinga kunyjkomn kfo ptha mumiwuko. Tamohntu yafothetet, gorkfotn o nd gorkfot yorhwa temperr? Nd temperr Bro Nkifraruh. Ndnettnd temperr rim htayuk gorkfot rpat tu Bro Nkifraruh. ¹⁸ Yo kfo kangko, ‘Altar§ myutak hanyhato wom mrokfom fak dbkafrm, to nhai hik duha yirform ror kfoyuk mrokfom, ndt nhai mrokfo duhatet. Nd yura altarn htayuk yemromn myutak hanyhato wom mrokfom fak dbkafrm, nd mrokfomn ror hikkfot. Bro Nkifrar kukatoh hasiwur.’¹⁹ Niko be tu nyinga kunyjeko! Tamohntu yafothetet, nd yemrot o nd yemrot htewa altar? Nd altar Bro Nkifraruh. Ndnettnd altarn htayuk yemrot rpat tu Bro Nkifraruh. ²⁰ Na kfo mifwanko, yimar altar myutak hanyhato wom mrokfot fak dbkafrt, to nd altar rhuyuk shrkarpano bi rpat mrokfot fak dbkafrt. ²¹ Yo Bro Nkifrarhu temperr bi yutahato wom mrokfot fak dbkafrt, to nd temperr thu nawohwa Nkifrapno bi mrokfot kak dbkafwort. ²² Yo yimar mrokfom kfo ptha hanyhato hefenr yutahato wom mrokfot fak dbkafrt, nd mrokfot to bi kak dbkafwort. To nd ror yutewa hefenr to fitharet? Ndr to bi Bro Nkifrar yorhwa gajir bi kutewur. Ndnett hefenr yutahato mrokfot yak dbkafwohat Bro Nkifrapno rpat yutahato mrokfot kak dbkafwort.

²³ Niko boririfhuthu tisako yo niko Farisiko, niko mikfo nhehta mkfo nhehtayet yimayeko! Wadukaf hanyswako! Tamoh tamoh wuritwenm, youpenm, wajipenm yakneft nhai Bro Nkifrar yak brur wunanikahkomr. Nhais. Bro Nkifrar hifa kesmbho wunewukomr. Ndm rom tu hifa dborioh nefm newuko. To tfit tu boririfhut kfia tu bro mrokfothu hik yuhat tfit kak frikatitkomt. Niko yimaroh mrokfom rhuhato yakitoh hanyeft, nhai wany hik bohik marnyahato yak hta bohta marnya hikkahkomm. Yo womm nhai yuhuafkahkomm. Yo nhai Bro Nkifrarhu dukefrn rhu marnyakahko. Ndm hikhato yakitoh marnyahato tfit wom wom kfo yirmoh mrokfoyenm rpat hikkfot.²⁴ Niko be tu nyinga kunyj mifkomn kangko, ‘Womm yihotat ayak nuhasnomm.’ Niko inji newa yuhat kangko womroh yemro bruyoh roht mitayifwa krkonenrpamn ahtihanyom, to tukmoh yemro roht mitayifyuk yonmari kamerr nhai htikahkomr.

²⁵ Niko boririfhuthu tisako yo niko Farisiko, niko mikfo nhehta mkfo nhehtayet yimayeko! Wadukaf hanyswako! Kaf pletm briahako kifsewa kanjo inji briahakorrpa kifsewuko. Nikmoh yima rifhumio rikohefti fasoh fasoh nefm furkihwomko. Tukmoh

‡ 23:13-14: Wom yimam wom mrokfot hti nhta yak nhtamomtn duka memom tot wom mrokfo nmbuhat korhwot. Ndnett romn htamomt ves 14-kfot yorhwa wom mrokfo nmbuhat. Nd mrokfo nmbuhat rom rihtakmot inji kfifut: Niko boririfhuthu tisako yo niko Farisiko, niko mikfo nhehta mkfo nhehtayet yimayeko! Wadukaf hanyswako! To nikomn met dhirpampno yitakomn yuwi mkfo nheh bonhehaknihato wuskenm myak rhoptaknitwokomm. Yo Bro Nkifrarhu kfo bruttnaneft rikfo bruttna thoft nhai yudbat kfo bruttna tmbhonikahko. Yuwi kangko, “Akfo bruttna yukeahnom yimam inji htiruhannom mirahm, ‘Hifa yimayem.’” Ndnett niko duka marnyaf hanykfot. Kto Bro Nkifrar kotkfot yakitoh thoft niko be tu bro krhopam yakrahko. Htikfot Mak 12.40. § 23:18: yemro tariorh mthayuk tkitt

toh nmbuharpat dukahato bi marut wuss tamoh tamoht yak yakhato bi tohwokomt.
²⁶ Arom nyinga kunyjet Farisi kpt, afo kaf pletroh yirokko kifsanihato ee briahakort htirahnt fnhuraht rpatn.

²⁷ Niko boririfhuthu tisako yo niko Farisiko, niko mikfo nhehta mkfo nhehtayet yimayeko! Wadukaf hanyswako! Niko yima yopm kanjo yura briahakorrpa ganyom penpaye yimam penimwa kanjo inji briahakorrpa penimwoko, tfit yiro yoptwe yima gur kfe bdgnihato yima tpi trukti yima gu burioht furkihwot. ²⁸ Niko to inji korhko. Ptha wiwayau marnyewatko yimam hti kangm ka hifa dborior yimayem, yiro yima rifhumio yimaroh kfo nheh bonhehneft furkihwotko yo fasoh fasoh nefm furkihwomko.

²⁹ Niko boririfhuthu tisako yo niko Farisiko, niko mikfo nhehta mkfo nhehtayet yimayeko! Wadukaf hanyswako! Bingot noh hanymo profetroh yopm yo Brorhu dukefm yaktohmoa dborior yimaroh yopm, ndm niko yak marnya bomarnyahato wondh marnya bomarnyewukomm. ³⁰ Yo kfo kangko, ‘Nom nd nkifram tohmo yiham bi atohnom, nhai rom namo kanjo profetm wasrmonomm.’ ³¹ To niko inji kfivohat to bi tukomn tafon htewuko. To nikmohmn ndhtet neft namomt. To niko froheko? To rom frohem? ³² To nhai mrokfom. Kangko nfripa tokrpa ayanom, nhai mrokfom. Nkifram yohmo nakur tfit nikomn wayak truftwakomr. ³³ Niko nandomrhu nandom yoneko. Niko finji yamukako tfit ayakrmayom, bi kah thmbt bi tohetko?

³⁴ Ndnettn kfivanko, profetm, yo dborior dukefet yimam, yo tisam kfo tkuraforhotanm nierahm nikompno. Nieruhatm womm wasrahkomm, yo womm yura bgre mimn kim hegirrahkomm, yo womm nikmoh rhu rifinyuk rmonmn wife yenyo guhato hik tubatuyafrahkomm. ³⁵ Ndnatn niko nd profetm was hnamo yuhatr krhopam yak hanyrahko. Bingot nikmoh nkifram was hnamo profetm, barkofr dborior yima Aberr wasmom. Ror wasnihato ee wom womt be yimaroh tirmn hirmom. Wurohenr Berekiarhu yon Sekaraiar yiro temperrn tarior mthamoa tkitt toh hasetrn rim wasakmomr. ³⁶ Na kfo mifwanko, niko bi tukmoh nkiframn katirnamomko. Nhai toh marnyaruhatk. Rroh krhopam tfit nikomn yak hanyrahkomm.”

Jisasr Jerusalemt hanurmo yuhat

(Luk 13.34-35; 19.41-44)

³⁷ Jisasr tfit kfo memor, “O Jerusalem! Jerusalem! Kfo tkrurafoyuk profetm ninn was hakutwanm, yo womm tahiye tahiye yebhoh noh hakutwanm. Bok yiham memoa nanhu mofsinhitn ahta akafrohneyann mmem kris yonm yak kafrohwa kanjo, to nhai. Nhai kfo yakormona. ³⁸ Be wahti hanyswa, ninhu temperr nhai yima duhatr rhurahr. ³⁹ Ariham nhai wom tfit htirhotna. Bi tunn kfo kangn, ‘O Bro Nkifraye, Brorhu yufatpno niayuk yimar wayak marnya bomarnyatwanr.’ Bi tunn inji kfivune ee tfit htiyakrahna.”

24

Bro Nkifrarhu temperrhu yoh nasoh yuhat Jisasr kfomor

(Mak 13.1-2; Luk 21.5-6)

¹ Jisasr Bro Nkifrarhu rmon kmifar htanyhato yuhre wufau hanymor, asha disaiperm. Jisasr mhtihato rmon kmifar tohyuk kunyroh ruheft hti natthato kfo pthamoumr. ² Jisasr wanyhato kfo memorm, “Na kfo mifwanko, ndar niko htita kunym nhai inji rhuruhatm. Yimam niahato kafring witarahmm.”

Bok krhopam nieruha yuham Jisasr kfo pthamor

(Mak 13.3-13; Luk 21.7-19)

³ Jisasr yura Olifet kmit muhhato mrhumor. Ndha rhu hasetrn turhu disaiperm niahato turpam ttiwon memomr, “Nd rmon kmifarhu kunyroh kafring yuhate fitoh yihar rhuruhatt htiruhanomt? Ninhu nia yihar yo ndar bbinysofthu bati yihar finji finji htihato yak dukaruhamnom nd yiharhu brboh yihar?”

⁴⁻⁵ Jisasr kfo memorm, “You niko! Wanyrahko yimam yi htfasruhamn bok yimam kfo nheh bonheh htfasrahmm. Nanh yufat yutahato kfo mirahmm, ‘Na bi asoya niko

gari hasomo minrfa htiyakyuk yima Kraisa.' Niko inji wanukko, mirahko yudbat wany yakiohato amhikaknynom.

⁶ Nna yureft mano mano wanyrahkomt yo fitha fitha rhuyuk nna yurefthu mrokfom wanyakrahkomt. Inji wanuknom, bi mirahko bok dukefm ayaknom. Ndhtet nefm rom nierahm. To mirahko ka bi nd nefmpno bi brbohwor yihar. Nhai. ⁷ Htirahko yo wanyrahko wom kantrikfot sinyaruuhattu wom kantrikfotpno nnarahf. Wom kingr sinyaruuharn wom kingrpno nnarahf. Wom kmim yatinoh wormr tohrahrm. Wom kmim bro Nunes toniraht. ⁸ Nd nefm yironarahkomm yon fanet mett barkof riyak yironekwa kanjo.

⁹ Nd yiha htirahko, wom yimam hti namburruhamn yakrahmko. Yakhato was hakurahmko. Niko nanhu mrokfot hiketko be tu hti dbnot thu hakurahmko. ¹⁰ Nd yiha bok yimam Bro Nkifrarhu yihotat myafphonirahmt. Myafphonihato tum nahndhna nahndhnahato nahti dbnot nahti dbnotrahm. ¹¹ Yo nd yiha nhaf bok profet giamann mfnahhato bok yimam frnheh bonhehrahmm. ¹² Fasoh fasoh nefrpamn kmi kmim brotaniruhutm yima nayak marnyaneft nhai wom rhuruhatt. ¹³ Fitoh yimar toh bmtahany toh bmtahany bbinysofthu batu yihar mfnahr, nd yimar Bro Nkifrar yakrahrr. ¹⁴ Kingdomfothu gutnius mrokfot bi ndar bbinysofthu kmi kmim bi frhtfas bugetm ee btn bbinysofthu batu yihar nierahr."

*Tu bro krhopam nieruharoh mrokfot
(Mak 13.14-23; Luk 21.20-24)*

¹⁵ Jisasr kfo memorm, "Wahtitwako, profet Danierr kfomo yak batiyuk shr bebr htirahkomr Bro Nkifrarhu temperrn mtohrahr." (Yimar Danierr kfoyuk mrokfom htiyukr hti hik marnya hanyhato mrokfo yimbu yuham yakkfot.) ¹⁶ "Nd yiha Judia distriktpno brbo toh hanyuk yimam yura kminysofko yakrmanyikfot. ¹⁷ Yimar bi kunyshu wom yura ken tirkro wurhu miska hasir, mirahr tfit yiro mmem kunyko ayohnikahann wuskam amiyaka. ¹⁸ Yimar bi mswirko yirn ndko tohvor, mirahr tfit kmiko aikahann turhu yuke hmbreshat afo tfit ai ayaka. ¹⁹ Metm yon fanetm yo tefi yon hamboriyetm finji yakrmiruham nd bro krhopam yakakna thombat? Romn tu bro yuhuwaeft korht. ²⁰ Bro Nkifrar kfo bruttnahato mirahr nd bro krhopam bro gonnng wormrn o Sabat yiharn arhukahtm yimam nd yiharn ayakrmem. ²¹ Nd neft nia thombat mirahko ka tefi tefi kurhefm rhurahm. Ndar bbinysoft trhanimohat nhai ndhtet krhopam rhurmom. Yo ndar toh hniwa yiham nhai ndhtet kurhefm htikahnom. Yo kto nhai ndhtet kurhefm wompam rhuruhatm. Be tu bro bro krhopam tohrahm. ²² Nd kurheft rhuhany Bro Nkifrar nhai bmbri yak nohrfort, be yima bugam nd kurheft batirahm. To nhaft Bro Nkifrar tfit dukarahrt tur bi kfo htayuk yimam. Romn dukahato nd krhoparoh tohyuk yiham tfit yak kkopenrahrm.

²³ Nd yiha wom yimam kfo mirahmko, 'Barenko, nd Bro Nkifrar kfo htamo minrfa htiyakyuk yima Kraisr bi asor, asha.' Womm kfo mirahm, 'Usor, usha.' Inji wanyrahko, mirahko awany yakionomm. ²⁴ Womrne inji narahr. Mirakerkfot hingrnaruuharn kfo mirahr, 'Na asoya niko toh gari hasiwa minrfa htiyakyuk yima Kraisa,' o kfo mirahr, 'Na profeta.' Inji kfohato wonk wonk mirakerkfot hingrnarahm. Yuwi mirahm, 'Tu Bro Nkifrar kfo htayuk met yindarim frnhehkhato ahikmnom.'

²⁵ Wawanyko, kfo duka mrokfom bi kfo duka htiwanko. ²⁶ Ndnett yimam kfo kangmko, 'Wusor bi wesan tik furatn'. Wany yakiohato yi juha. O kfo kangmko, 'Asor ndar kunysn.' Wany yakio duha. ²⁷ Htitwokomr toh fnhur yohni thombat. Fnhu trfefm yambohritna thombat nhai rpa tkitt htikahmr. Kmi kmim hti bugewumr. Bro Najomr nia thombat to inji kanjo wur fitoh ritoh atoh kmi kmim htiyakrahmr.

²⁸ Foh gum kfe bdgwa tkitmn kungorohm yi rifinywom."

*Bro Najomrhu yawihna yihar
(Mak 13.24-27; Luk 21.25-28)*

²⁹ “Nd bro kurheft rhuniruhatt ee htirahko marr rim noh kfirahr, nhai wom taruhatr. Yamt nhaf inji. Rothu nukeft rim fnahniraht, nhai wom taruhatt. Gunym rom nhai mount rhuruhatm. Rom be wuyohninehato misuhrahm. Mount thu habokknamo yifonm mirahm nndo ginunes kekwotm. ³⁰ Ndtpno ee btn Bro Najomr htiyakrahmr gribpamn hawihnerahmr. Kmi kmim htiyakhato yonmari nurm nurrahm. Ror yawihna thombat turhu bbuka rifhur yo ror hatoh hneruha nukeft mirahm nndo marrn yifa toh hnewur. Inji htiyakrahmr. ³¹ Ror yawihna thombat fumrr tohrahr. Nd fumrr mounmotroh kasinyayukr tohrahr. Nd fumrrpno mounmotm sinyaniruhamn Bro Nkifrar htayuk yimam yak nhafoh htfasrahmm.”

Kutr hti hikkfot

(Mak 13.28-31; Luk 21.29-33)

³² Jisas kfo memorm, “Kutr htitwonomr, huktewur kfo kangnom yinr tohrahr. ³³ To be inji hti nhtakrahkomr Bro Najomrhu nia yihar. Bi nd nd nefm htitwoko, wakfo wamitwako, Bro Najomrhu nia yihar bi brbohwor. Yifhatikt bi tohwor. ³⁴ To nd nefm rhu thoft to mirahko arihat tohwa yimam bi nohetmn nd neft rhuraht. Nhai. Arihat tohwa yimam yuhre tohetmn nd neft htirahmt. ³⁵ Nd neft rhuneft htirahko mounti bbinysoft mibatinirahf. Nanhu mrokforpat nhai mibatiniruhatt.”

Nd nefroh rhuyuk yihar nhai wom yimar tawisafkahr

(Mak 13.32-37; Luk 17.26-30; 17.34-36)

³⁶ Jisasr kfo memorm, “Nd na kfiwa nefroh rhuyuk yihar nhai wom yimar tawisafkahr. Mounmotmi Bro Najomr rom nhaf nhai tawisafkahm. Tu Bro Yifemrpar tawisafwort. ³⁷ Noarhu tndht wanukwokomt. Nd yiharhof yimam namo kanjo Bro Najomr yawihna thombat inji na mmo bammo hasorahm yimam. ³⁸⁻³⁹ Noarhu yiha to inji namom yimam. Rom to be nuwa ye mmo bammohaso, yo tuhan yak, nd nefrpam be na hasomomn, nhai wom tamoh dukefm rhurmomm. Be inji foh nungam kanjo mmo hasetmn Noa riphartift fknemom. Bi yiro sift tohetmn bro hnuntn niamot. Nd hnuntpno nd wom womt hnuntn fak batit witamotm. Bro Najomr yawihna thombat to inji fasoh fasoh nefmpno na mmo bammo hasetmn nierahr. ⁴⁰ Hus yimaf mswirt toh hasorahf, Bro Nkifrar womr yakruharn womr rhurahr. ⁴¹ Hus metf bretpa hingrnayuk plauapam hingrna hasorahf, Bro Nkifrar womt yakruharn womt rhuraht. ⁴² Ndnett niko yimbhindangm be tohetoh hasokfot. Nhai tawisafruhatko Brorhu nia yihar. ⁴³ Wawanywako! Wom kunys rikoh yimam kangm ania arikohnomt, bi nd tu kuny sikatr bi fekrt nd rikoh yimaro nia mrokfot, be nhai ror mhwe gushunikfot. Rorhu yimbhindangm be tohetoh hasorahm. ⁴⁴ Ndnett nikmoh yimbhindangm be tohetoh hasokfot. Bro Najomr rhu mmo hasetkmn be yak fohtasakrahkomr.”

Fasoh nayet hingrna yimarhu kfo nhombra mrokfot

(Luk 12.42-46)

⁴⁵ “Fitoh yimar hingrna marnyewur, tor nd yimarn turhu tu bro tohukatohr wom tkitm yinyeft, kak htewurr wom hingrna yimaroh tohukatohneft yo kfo nuhasworr hingrna yimaroh yeshr heyuk yiharoh yeshr hanyeft. ⁴⁶ Nd tu bro tohukatohr kfoyuk hingrneft hingrna hik marnya hasirt, nd yimar yindhorkfot. ⁴⁷ Na kfo mifwanko, bro tohukatohr nd yimarn htarahrr rorhu tamoh tamohroh tohukatohyuk yimar. ⁴⁸ To nd yimar hingrnahany hingrna hanyhato bi bok yiham toh garitihato nd kfo hta tanyuk hingrneft faso faso rihihgrna behohaknihato, ⁴⁹ nd hingrna yimam faso faso ritat bebakhato ror be nuwa bupa ye mmoyet yimarpampno toh hasir, ⁵⁰ inji na mmo hasetrn, nd tohukatohr nia mihti thoft, ⁵¹ be nhai wom tohruhatrt nd hingrneft. Be tmbo tekrruharr rpapa rpapa htarahrr. Rpapa rpapa htahato tu rpahtet mikfo nhehta mkfo nhehtayet yimampno htarahrr. Ndha tohhato tau nknekrahr.”

¹ Jisasr tfit kfo memorm, “Hefenrhu kingdomkfat, akfo nhombranomt wom 10-pela met tmahmpno. Wom yima sawohfhu nayak yihar nd 10-pela met tmahm lamm yaknimomn yimom metthu kunys. Memom, ‘Yindarir yifung niahato kangr mett amiyak htiyakane rpat yirahnom.’ Ndnetmn lamm yaknihato yimom. ² Nd 10-pela met tmahm yimohat inji namom, 5-pela metm dborior dukef duhatm yimom. Wom 5-pelakfotn dborior dukefetm yimom. ³ Nd duka tunga duhat met tmahm yimohat tu lamroh rhuyuk kerosinpam hmbre furkihhato yimom. Nhai wom kerosinpam be yikitoh furakrmomm. ⁴ Nd wom dborior dukefet 5-pelakfot inji namom, tu lamroh rhuyuk kerosinpam hmbre furkihmommn tfit wompam be botormn hmbre yaknihato fakitoh furakmomm. ⁵ Rom metthu kunys yi ruh gariti garitihato nyingam krkotakmotmm hwemom.

⁶ Bi yifung danysn wom yimarhu naku tngt wanymomt. Nd yimar naku memor, ‘Wasinyako. Niko gari hasoyuk yimar tor bi niewur. Wasinyakahkomn watoh htiyaktwakomr.’ ⁷ Nd 10-pela met tmahm rpat sinya bugahato lamm fak nmbritafmom. ⁸ Yo nd duka tunguna duha met tmahm wasinyahato fak nmbritmomm rroh lamm. To nhai. Rroh lamm bi yifungr toh nfhetmn sfnoh kerosinpa duhatmn nukefm bi yohni hanymom. Inji htihato wom dborior dukefet metmpno yihato kfo ttiwon memomm, ‘Nome wom kerosinpenme bahukkmnom? Nmoh lamme bi minoh witanitm.’ ⁹ Nd duka tungunayet metm kfo wok memomm, ‘Nome finji kanjohtet kerosinpamn btn niyahukanom? Nhai bro kerosinpam bt nayahukanom. Niko tuko wawiknak htfasko.’ ¹⁰ Be inji kfafmotmm, nd dborior dukef duhat 5-pela met tmahm yimom kerosinpa wikna htfass. Ndko yiyetmn nd rom gari hasoyuk yimar mfnahmor. Mfnahmotr nd ror gari hasomo metm be nd rofhu marit patikfot rhuyuk kunyr rpat yihato fknemom. Fkne bugamotm kuny kiyakt frkihmomt.

¹¹ Kto nd kerosinpa hambro htfasyuk metm mfnahmom. Mfnahhato kfo nakuyakni memom, ‘Bro yimaye, bro yimaye, yifhatikt waffanyaknnom.’ ¹² Tfit ror kfo wok memomm, ‘Na kfo mifwanko, na nhai tawisafruhatkomb Bro Najomrhu nia yihari yo auakfot.’

*Hingra yimam maruha yakmo yuhathu kfo nhombra mrokfot
(Luk 19.11-27)*

¹⁴ Jisasr tfit wom kfo nhombra mrokfot kfo memor, “Hefenrhu kingdomkfat mirahme wom bisnis hingrnayuk yimarn wom kmiroh yinyeftpno rorhu marut turhu hingra yimampno htanyhemotrm romn nd maruham yakhato wom hingrnefm htamomm.

¹⁵ Womr htanyhemorr 5,000 kinakfot, womr 2,000 kinakfot, womr 1,000 kinakfot. Maruham yimaro tirm htany hanymohat, yimaro hingra dukefm htiyak hanyhato maruham hi hanymorm. Ror maruham htanyhahato yimor. ¹⁶ Nd maruha yikitohyuk yimam maruham yakmomm wom hingrnefm htamomm. Nd 5,000 kinakfot yikitohyuk yimar, rorhu 5,000 kinakfot wom hingrneft htamohat tfit wom 5,000 kinakfot fakmor.

¹⁷ Nd 2,000 kinakfot yikitohmo yimar nhaf inji. Rorhu wom hingrneft htamohat, nhaf wom 2,000 kinakfot fakmor. ¹⁸ Nd 1,000 kinakfot yakmo yimarme nhai wom hingrneft htarmorm nd ror yakmo 1,000 kinakfot. Nd 1,000 kinakfot yakmohat, be yakmorn bbinyssoft tou yop kafrohmort.

¹⁹ Be nd maruha tikatr toh htfasmorn tfit niamor. Niahato nd maruha htanymo yimampno rhuhato kfo nuhas bonuhasmomr maruham hingrnamo yuham. ²⁰ Nd 5,000 kinakfot yikitohyuk yimar kfo memor, ‘Bro yimaye, ni htanymo 5,000 kinakfot wom hingrnefm hingrnamo, tfit wom 5,000 kinakfot fakhemoyann. Asom nd maruham.’

²¹ Bro yimar inji htihato kfo yindhor memor, ‘O, ni tu hifa hingra marnyet dborior yimaye. Tamoh tefi marufenm ninhu tire yikitohhato hingrnanef marufat hifa buriwut. Ndnettn nanhu tamohm ninn yikitoh hakurahnm. Wania. Na rhuruha yindhor nmbuhat ni warhunhotwona.’

²² Yo tfit nd 2,000 kinakfot yikitohet yimar yimor. Ror nhaf yihato rim kfo memor, ‘O Bro yimaye, nd ni hemo 2,000 kinakfot wom hingrnefm hingrnamohat, tfit wom

2,000 kinakfot fakhemoyann. Asom nd marufam.' ²³ Bro yimar inji htihato kfo yindhor memor, 'O, ni tu hifa hingrna marnyet dborioh yimaye. Tamoh tefi marufenm ninhu tire yakitohhato hingrnaneft marufat hifa buriwut. Ndnettn nanhu tamohm ninn yakitoh hakurahnm. Wania. Na rhuruha yindhor nmbuhat ni warhunhotwona.'

²⁴ Yo tfit nd 1,000 kinakfot yakyukr yimor. Ror yihato rim kfo memor, 'Bro yimaye, htimoya ni yima kfo huttete. Womm nuhtayuk mswir yeshrim ninn yihato kekwonm. Yo womm nuhtayuk yewurim ninn yihato fotwonm. ²⁵ Ndnetann na nd yakrme nmbuhatpno nd ni htanyheyuk 1,000 kinakfot be yakmoyantn bbinysoftn tou kafrohtahemoyann. Asot nd 1,000 kinakfot.' ²⁶ Nd rorhu bro yimar sinyahato kfo memor, 'Ni tu fasohtet hhreket hingrna yimaye. Na niwa nmbuham ni bi tunn bi inji htimohat, ²⁷ to tamohmpno na nd htanyheyuk maruhat benktn hta duha yirmotnt, benkt rhuhato wom nfri maruham benktn tfit hta hutarmotmt yakrmoyant? ²⁸ Na kfiwa nd 1,000 kinakfot wayakkahkomt tfit wariheko nd 10,000 kinakfot yikitohwa yimarn. ²⁹ Mrokfot inji korht. Yimar tamohm kakitohworm, nd yimar tfit womm hta hutahiruhanr. Yimar nhai wom tamohm yikitohkahr, nd ror yikitohyuk tefi shrenm, to be tfit yak hutfak twanhoruhanr. ³⁰ Nd hingrna yima bebr wayakkahkomr wari tuhafokomr yiro kspita yuhatn. Nd tkittn tohruharn tau nknekrahr.'"

Wuroh kotkfot

³¹ Jisasr tfit wompam kfo memor, "Bro Najomr king kanjo turhu mounmotmpno tfit nia thombat, bro bbukayet kingm yorhwa gajirn mirhurahr. ³² Mirhuruhatr kmi kmiroh yimat rorhu nyungako yi rifiny bugaraht. Mrifiny bugaruhatm yak nhtarahrm sifsifroh tohukatohr sifsifmi memem yak nhtewa kanjo. ³³ Sifsifm tirmifko htarahrm yo memem kindonko htarahrm. ³⁴ Yak nhtanihato nd tirmifko tohyuk tuhan yindarim kfo mirahrm, 'Niko nhai mrokfom, nanhu Yifemrko bi fak marnya bomarnya htamort nikmoh rhu nmbuhat. Be wania furako. Waniakahkomn Yifemr kfo htayuk kingdomkfot nikomm tohrahkomt. Ndar bbinysoft trhamo yiha bi nikmoh yufampno kfo htamort. ³⁵ Nhai be sfno kfo hta nuhas furakahanko. Na yatinohmohat yeshrim hemokma. Nyungram knamohat bupam hemokma. Yo nikmoh kmit niamohat nikmoh kunym fakmokma. ³⁶ Hmbresha duhata rhumohat niko hti dukahato hemokma. Dbohneft yakmohat niko hti dukamokma. Kalabus tohmoht niahato fau hafotmokma.'

³⁷ To tfit Bro Nkifrarhu mrokfot wany yaktihato yak hiket tuhan yindarim kfo mirahmr, 'Bro nungothete, fitoh yiha yatinohmotn yeshrim hemonomn? O nyungram knamotn bupam hemonomn? ³⁸ Yo to ni fitoh yiha nmoh kmit niamotn nmoh kunym fakmonomn? O hmbresha duhatn rhumotn hemonomn? ³⁹ Fitoh yiha kalabus tohmotn fau hafotmonomn o dbohnamotn rhu yukatohmonomn?'

⁴⁰ Tfit kingr kfo mirahrm, 'Na kfo mifwanko, tamoh tamoh dborioh nefm nd yufapa duha yimampno nahnamoam, ndm nanpno nahnamokomm. Nd yufapa duha yimam nanhu nmemen mifm kanjo tohmoum. Ndnettn rompno nahnamoa nefm to nann fak nuhas hnamoko.'

⁴¹ Tirmifko tohyukm inji kfoniruharmn, yo tfit kekutnihato kindonko tohyuk tuhan yindarim kfo mirahrm, 'Niko Bro Nkifrarhu namburpam hajohwa yimako niko wafnah-niko. Bro Nkifrarhu namburpam bi niko hajohwom. Ndnatn ndar tkitt wahtanykahkomt wafnahniko. Ahtiwhahanko. Wafnahnikahkomn Bro Nkifrar kfo htamo kahtn waiko. Nd kaht Satanri rorhu hingrneft hingrnayuk mounmotroh yufampno kfo htamo kahtn waiko. Nd kaht nhai wom yiha minoh hmbreni hanykaht. Be inji kur hasiwut. ⁴² Ndt nhai be sfno inji kfokaha. Na yatinohmohat nhai nuwa yeshrim harimokma. Na nyungram knamohat nhai bupam harimokma. ⁴³ Na nikmoh kmit niamohat, nhai nikmoh kunym yakmiyakrmokma. Yo wuskapa duhata rhumohat nhai marimoko, hti dukahato rmontha wuskam ahenomr. O dbohnefeta o kalabus tohmoht nhai marimoko, ayau hafotnomr.'

⁴⁴ Rom tfit kfo wok mirahmr, 'Bro nungothete, nd ni kfi mrokfom fitha rhu yatinohmon o nyungram knamotn nhai hti dukarmonomn? O nmoh kmit niamotn

hti marsisamonomn, o wuska duha rhumotn nhai rmontha wuskam harimonomn, o dbohnayetn o kalabus tohmotn nhai yau hafotrmonomn?"

⁴⁵ Ror tfit kfo mirahrm, 'Kfo mifwanko, nd yufapa duha yimampno nhai wom dborioh nmbuham yak nuhasrmokomm, to nhai romrpamn nd beb nmbuhat yak nuhasrmoko, nann fak nuhasmoko.' ⁴⁶ Nd net yimam be bro krhopa yakyuk tkit bebt yirahm. Nd krhopa yakyuk tkitt rom yi shombat, nhai tfit fnahniruhatm, be nd tkittn toh nkifranirahm. Nd tuhan yindarim Bro Nkifrarhu mrokfom wany yakiowetm, romn tu dborioh rhu nmbuhat yakhato be nd dborioh rhu nmbuhat toh nkifranirahm."

Jisasr krhopam yakhato nohmor. Minohafhato tfit sinyamor.

26

(*Sapta 26-28*)

Jisasrhu was yuhathu mrokfot

(*Mak 14.1-2; Luk 22.1-2; Jon 11.45-53*)

¹ Jisasr nd mrokfom kfo ptha nuhas bonuhasnimormn tfit kekutnihato turhu disaiperm kfo memorm, ² "Yuwonano Pasofa burwat riruhakrahnomt. Nd yiharn Bro Najomr hndhna nhehakhato yakruhamrn yura bgre misn kihegirrahmr."

³ Nd yiha prisroh bro yimam, yo Judaroh bro yimam prisroh bro tohak yima Kaiafasrhu kmifarpar yi rifiny bugamom. ⁴ Yi rifinhyato Jisasrhu hndhna nhehakhato was yuhathu mrokfot nafak dbkafmomt. ⁵ Ptha hanyhato kfo memom, "Nd bro Pasofa burwa yihar mirahnom awasnomr, to be you muht kanjo watanhehakrahnom. Bi kmi kmi nia rifinyetmn to be romn wahiyafrahnom."

Betani efkott Jisasrhu mfhat mfor mtha yahrnyayet welpaye yuk wunamo yuhat

(*Mak 14.3-9; Jon 12.1-8*)

⁶ Jisasr Jerusalemt toh tanyhato Betaniko yimor. Yihato Saimonrhu kunys yi tohmor. Saimonr bingot lepra dbohneft yakmotrn to bi frtrufnimot. ⁷ Nd Saimonrhu kunysn nuwa ye hasetrn Betani efkott tu dborioh mtha yahrnyet wel botort hanymot. Yimotn nd bro maruhaye wiknamo welpaye Jisasrhu mfhat fuk wunamotr. ⁸ Nd Betani efkott Jisasr inji namottr, disaiperm htihato tum nakfo nakfo memom, "Nd mett tamohmpno welpam be wurasoh furetm? ⁹ Nd wel botort yimam bro maruhaye wiknarfotmt nd maruham yakhato tfit maruha duha yimamn nd marufam yirfom."

¹⁰ Jisasr bi wanymorm rom inji kfo pthamoahat. Inji wanyhato kfo memorm, "Inji akfowahkomt. Rot tu dborioh neft nita. ¹¹ Nd wuska duha yimam, rom yiha yiha nikompro toh hasiwum. Na, na nhai wom tohnho-rhotank. ¹² Nd mett ka tamohr bi kfo memort, 'Welpam bi wayuk wunafokahtnr yopt yirahr.' ¹³ Na kfo mifwanko gutnius mrokfot kfo ptha habrineft, ndar mett nefineft nhaf kmi kmi kfo ptha duka htfasrahmt."

Judas kfo fakiomor, Jisasrhu hndhna yuhat

(*Mak 14.10-11; Luk 22.3-6*)

¹⁴ Nd yiha 12-pela disaiperroh wom disaiperr kutewumr Judas Iskeriotr frtrohormorm wom disaiperm. Frtroh tanyhato yimor prisroh bro yimampno. ¹⁵ Yihato kfo ttiwon memorm, "Na yihato Jisasr mhndhnakhe thombat na finji ttharhokma?" Inji kfo ttiwonmotr 30 mani silvakfot hemomr. ¹⁶ Judasr marufat myaknihato be yimor Jisasrhu hndhnakt. Yihato yima yuhur fak nhtamourr Jisasrhu hndhna yuham.

Disaipermpno Jisasr nuwa yamo yuhat

(*Mak 14.12-21; Luk 22.7-14; 22.21-23; Jon 13.21-30*)

¹⁷ Yispa hta duha bretpam yeyuk yiharoh barkof yiharn disaipermpno Jisasr kfo ttiwon memomr, "Nd Pasofa burwat rhu thombat, nome yeshrim fitha hta mskaruhatnom ni rhuhato ye jukaruhant?" ¹⁸ Inji kfo ttiwonmotm, Jisasr kfo memorm, "Nd taunt tohwa yimarpno waikahkomn wakfo wamitwakomr, 'Tisare kfo famure, "Na nhai wom rhurhota. Yihar brbohwatr, kanga nani nanhu disaipermpno ninhu kunysn rhuhato

Pasofakfot ayanomt.” ’ Inji wakfotwakomr.” ¹⁹ Be disaiperm Jisasr kfomo yuhatn fak hikmomn Pasofakfot ror kfomo tkittn hta mskamomt.

²⁰ Yifungnano Jisasr turhu 12-pela disaipermpno rhuhato nd Pasofakfot rpat rhuhato rpat famomt. ²¹ Ye hanyhato Jisasr kfo memorm, “Na kfo mifwanko, niko ndar disaiperkmoh womrn hndhnarahra.” ²² Be inji kfomotr disaiperroh yima yuhum foh tmbhonimomm. Rpa rpa sinyahato kfo ttiwon memoumr, “Ni kfihat frohmn inji naruhamn? Ka nann?” Tfit womr sinyahato kfo memor, “Ka nann?” Womr, “Ka nann?” Womr, “Ka nann?” ²³ Jisasr kfo memorm, “Tor nikmoh womr. Yimar na yawo rohnges tir htanuhir, rorn hndhnarahra. ²⁴ Bro Najomr kangr anoha, ndt mrokfo duhatet. Rorhu noh nmbuhathu mrokfot bi nkiframpno kfo tndh hnettn nhai finji kforuhatt. Tmift nd Bro Najomrhu yak hndhnayuk yimarne kanga fitoh yuhat yiruhar? Mmemt hiyau duha rhurmotr.” ²⁵ Nd Jisasr hndhnayuk yima Judasr sinyahato kfo memor, “Tisa ka nann kfiwun?” Tfit Jisasr rirhuhato kfo memor, “To bi tunn kfo nriyafwo.”

*Jisasr disaiperm bretpa, wain bupa hemo yuhat
(Mak 14.22-26; Luk 22.15-20; 1 Korin 11.23-25)*

²⁶ Nuwa ye hasohato Jisasr bretpat yaktmorn Bro Nkifrar wukfo yindhornimorrn yak tif nhombrahato disaiperm he nhombrahi hanymorm. Kfo memorm, “Nd bretpam wayak wayakomm. Ndm nanhu nmpayem.” ²⁷ Wain bu kaft yaktmorn nhaf Bro Nkifrapno kfo yindhornihato kfo memor, “Niko bugako nda wain bu kaft wayak wayakomt. ²⁸ Ndm nanhu kkupayem. Yimaroh fasoh fasoh nefroh yak thuyuk nfri yihotar bi tfit yimayanhu kkupaye kak dbkafwanr. ²⁹ Na bi kfo mifwanko, na nhai tfit wom wain bupam yerhota. Tukanhu Yifemrhu kingdomforpatn tohhato ee btn nfri wain bupam nikompno yerahnom.” ³⁰ Be wuroht, windoh windoh trufnihato be tfit Olifet kmi yorgko yimom.

*Pitar mong trohruha nmbuhat Jisasr kfo pthamor
(Mak 14.27-31; Luk 22.31-34; Jon 13.36-38)*

³¹ Olifet yorgr mfnahhato disaiperm Jisasr kfo memorm, “Bro Nkifrarhu rfa borngt kfo kangt,

‘Tohukatohr wasaknirhotanr sifsifm natubaturahm.’ Sek 13.7
Nd mrokfot bi ruhettn niko bugako hrek yifungr na finji naknewuma, kakrme trohwokma. ³² Tfit sinyaruha. Sinyahato na bi Galiliko tohak hanyruha.” ³³ Pitar wasinya-hato kfo memor, “Ndar wommn wakfo. Romn buha msuhtahato mhik htafrahm. Na nhai mhik htafrhotann.” ³⁴ Tfit Jisasr kfo memor, “Na kfo mifwann, hrek yifungnano krirhu naku tngt tafi wany juha, husfirpa kfo namhit kfo namhi kangnm, ‘Na nhai tawisafkahanc Jisasr.’” ³⁵ Pitar sinyahato kfo memor, “Be tu nhai mif. Na kanga, ninpno anoha, to nhai tfit kafrohrhotant ninhu yufat.” Pitar kfomo yuharpat wom wom disaiperm rpa yuharpat kfo ptha hikmom.

*Jisasr Getsemanit kfo bruttnamo yuhat
(Mak 14.32-42; Luk 22.39-46)*

³⁶ Jisasri disaiperm afo Olifet kmit tohetmn yimom wom tkitt kutewumt Getsemani. Ndha Getsemanit mfnahhato Jisasr kfo memorm, “Asha afo warhu hasoko. Na afo Bro Nkifrar rim kfo bruttnefiwa.” ³⁷ Pitari Sebedirhu hus yonf yaknimorn yimom. Nd yiharn Jisasrhu yima yuhur nhai rimarnyakrmorr. Yima yuhur be nur dungunangu yima yuhurpno rhumour. ³⁸ Be yima yuhur yak nhombratihato kfo memor, “Yima yuhur be nd nur dungunangu yima yuhur mtakihwotra kanga be amyakniya. Asha warhu hasoko. Mirahko ahwanyom.” ³⁹ Ror wunye kkofmorn msuhhato nyigatikt bbinysoftn yohnihato kfo bruttana memor, “O Dajaye, ndar bbinysoftu yimaroh fasoh nefm na be hta krhorhotma nann nohruhanm. Bi brbohwatt kanga akfoyann. Nd krho mis na yakruhat kagn ayak tuhant, be hifa, na yindhorwa. E nhai, kagn ayakrt, be nhai mrokfom, yakruhant. Na be ninn yukatohruha. Kangn, finji anaya, nhai mrokfom.”

⁴⁰ Inji kfo bruttna tanymorn tfit yimor nd husfirpa yimam rhu hasomo tkittn. Yihato yihom htimorm hwi hasetmn. Rim tohhato kfo memor Pitar, “Niko tamohmpno hwitako? Nhai rpa auakfot afo ruhakkfot? ⁴¹ Niko sinya rhuhato kfo bruttna hasokfot. Tamoh tamoh nefm nianeft, fitoh yuhatn tohruhakomm yahot-ruhakomm? Yima yuhur sinyarahr finji na finji naneft, to thatipt, fitha bbukeft yakruhat?”

⁴² Be inji yihom kfo tanymorn tfit wom yis yimorn tur kfo bruttnamo mrokfom wompam kfo bruttnamor. Kfo bruttna memor, “O Dajaye, nd krho mis na yakruhat kangn ayakrt, be nhai mrokfom, ayaktwoyant. Na be ninn yukatohruha. Kangn, finji anaya, nhai mrokfom.” ⁴³ Tfit wompam nhaf niahato yihom htimorm nyina krkotakhato hwe hasetmn. ⁴⁴ Be inji yihom hti tanyhato tfit wom yis yimorn tur kfo bruttnamo mrokfom wompam kfo bruttnamor.

⁴⁵ Wurohpam mkfo bruttna tanymorn tfit yimorn hwe hasetm yihom htiyaknihato kfo memor, “Barenko, nikome asoko yuhre hwe tokr hasiwuko? Be tmift nd hwe tokr hasoneft. Wawanyko. Yihar bi asor. Bi na Bro Najomanhu fasoh fasoh net yimaroh tirroh yi yihayer bi. ⁴⁶ Wasi-nyakahtko riyahnom. Wahtiko, nanhu mhndhnakyuk yimar tor bi niewur.”

Judasr yihato Jisasr mhndhnakmo yuhat

(Mak 14.43-50; Luk 22.47-53; Jon 18.3-12)

⁴⁷ Jisasr yuhre ptha haso hanymor, rorhu yakyuk yimam mhatohmomt bainati mhrs. Tu Jisasrhu disaiper Judasrn hatohakmorm. Prisroh bro yimami Judaroh bro yimam, kfo tkrurmotmm Judasr hasinyamorm. ⁴⁸ Nd Jisasr hndhnakyuk yimarn bi kfo hta bohta memor, “Wahtiyafo hanyswokma. Na yauyaknihato fitoh yimar mikhendhoraknitwa, wamitwako, tor nd yima Jisasr. Ee inji bi htitwokma, nd yimarn yauyaknihato yakkfot.”

⁴⁹ Be nd Jisasr rhumo tkitt mfnahmohat, Judasr yauyaknimorn Jisasr rim kihend-horaknihato kfo kangrr, “Hifa yifunger, Tisa.” ⁵⁰ Inji rim kihendhoraknimotrr Jisasr sinyahato kfo memor, “Yinowe, ni tamoh dukefm nia thombat, mirahn tfit wom akuknaya. Wadimanditwa.” Be yimam yauyaknihato tirtir fakmomr.

⁵¹ Rom fak hanymomr, Jisasrpn toh hasoyuk disaiperr mhti namburnihato bainat watuhakmortn ka prisroh bro tohak yimarhu hingrna yimar bainate yimbhindangt frbubafmotrr misuhmot. ⁵² Tfit Jisasr kfo memor, “Bainat tfit wathuntwe. Yimam bainatpno nambur tonehato nniwam, tfit tu bainatn tmbhiwutm. ⁵³ Tamohmpno ni tfit namburwa? Kangn na ka yifem duhata? Nanhu Yifemr naku kforuha, yudbat 12-pela mounmot rifhum mitoh dbu rafo hmbrerahma. ⁵⁴ To na nhai inji nakfot. Inji naruha, to be nd Bro Nkifrarhu rfa borngt kfomo nefm, nanopno rhuyukm, be nhai mfnahruhatm.”

⁵⁵ Jisasr yakaknimo yimam, Jisasr sinyahato kfo memor, “Barenko, nane raskor yimam kanjo bainat, mhrs hasinyahato nia kekwokma? Na yiha yiha Bro Nkifrarhu temperr yorhwa kmifat tohhato met yindarim mrokfom hemoahat nhai niko inji yihato hfnahaknirmokma. ⁵⁶ To nhai mrokfom. Ndrik niko niwa nmbuhat nhai finji kforuhatnom. Bi profetmn mrokfot bi kfo hnettn to be bi rhu hikwot bi.”

Disaiperm htimom bi Jisasr kak hasiwumre, rom fakrme troh tanymomr.

Jisasr kaunsermpno kot tohmo yuhat

(Mak 14.53-65; Luk 22.54-55; 22.63-71; Jon 18.13-14; 18.19-24)

⁵⁷ Nd Jisasr yakniyuk yimam hanymomrn tu nd prisroh bro tohak yima Kaifasrhun kunysn hanymomr. Nd kunysn Judaroh bro yimam yo nkifra boririfhuthu tisam bi rifiny hasomom. ⁵⁸ Pitar, ror be nhowi mongkongotn fau ss hik hanymourm. Bi prisroh bro tohak yimarhu kuny kmifarn bi hanitwomre, ror be nhowi yimorn Bro Nkifrarhu temperr tohukatohyuk yimampno mrhuhato memor, “Htiruha finji naruhamr.”

⁵⁹ Jisasrhu kotkfot yakitohyuk bro prism yo Judaroh kaunserm fak hambromoum yimam. Memoum, “Wom yimam ayakkahnomn romn wom kfo wok mrokfom htaruhatmm Jisasr wasrahnomr.” ⁶⁰ To bok yimam yihato memoum, “Wom kfo wok mrokfom ahtanom,” to nhai. Rroh mrokfom be inji ptha mmabrafi-nymoumm. Nhai wom

mrokfot krhonirmoat. Tu wurohnano wom hus yimaf sinyahato kfo memof,⁶¹ “To ndar yimarn kfo memor, ‘Bro Nkifrarhu temperr yak tasohrhoyanrn tfit husfirpa yiharpa tfit kasinyaruhanr.’”

⁶² Jisasr nd yimam pthamoa mrokfom wanymoahat nhai kfo wokrmorm. Ndnett prisroh bro tohak yimar sinyahato Jisasr kfo ttiwon memor, “Tamohmpno ndar rom kfiwa mrokfefm be rhuhato wanukanm? Waptha!” ⁶³ Jisasr nhai ptharmor. Tfit wompam kfo ttiwonmorr, “Bro Nkifrarhu yufatpno na kfiwann, asomif Bro Nkifrarhu yufat wayutant. Ni bbinysof thofroh minrfa htiyakyuk yima Kraisin rhu thombat wakfo nuhas mifnnom. Ni Bro Nkifrarhu Yonen o nhai?”

⁶⁴ Jisasr tohhato kfo memor, “Na to tawom nda. Tfit kfiwanko. Kto tfit htirahkoma na, Bro Najoma, tfit bro hta nngrajohet Nkifrarhu tirmifko rhuhato gribpamn hawinhnerahmr.” ⁶⁵ Jisasr inji kfomotr prisroh bro tohak yimar inji wanyhato rorhu yarim ruhakyuk hmbreshat teh dborfamort. Teh dborfahato kfo memor, “Wanukomr ror dkfi mrokfot. Ndhtet kfet yimar kangr, ‘Bro Nkifrar kanjo aruha.’ To be nhai tfit wom yimam yakhato ror nayuk nefm nia ptharuhatm. Ror pthiwa mrokfom to bi asomif wom mrokfom bi wanunomr. ⁶⁶ To finji dukewako? Nd yimare finji naruhanomr?” Tfit nd kot tohyuk yimam kfo memom, “Nd yimar bi mrokfeter anohtwar.”

⁶⁷ Be inji kfonihato tuha kuninfar bokuninfar thumomr. Tirm yak yifi-kathato tat beb bobebmomr. Wommn tire frsrfra bosrfamomr. ⁶⁸ Frsrfra hanyhato kfo ttiwon memoumr, “Ni, Kraise, nd ni frsrfiwa yimame frohem?”

Pitar kfo namhimo yuhat

(Mak 14.66-72; Luk 22.56-62; Jon 18.15-18; 18.25-27)

⁶⁹ Pitar kuny kmifarn kah haunyo hasetrn wom hingrnayuk mett mhtimotr. Mhtihato kfo memor, “Ni to aso womenn Galili thof Jisasrpno tohnho htfasmoa.” ⁷⁰ Pitar sinyahato kfo namhi memor, “Bare, nann yari yutewun. Na nhai tawisafkahann.” ⁷¹ Pitar inji kponi hanyhato kmifathu getkfotn yihom tohmor. Toh hasetrn tfit wom hingrna mett htihato nd getpno toh nafifmoa yimam kfo memotm, “Nd yimar tor womr Nasaret thof Jisasrpno toh htfasmoa.” ⁷² Pitar tfit wompam kfo namhi memor, “Na kfo mif mifwanko, na nhai tu tawisaf mifikahannr nd niko kfiwa yimar.” ⁷³ Ndt inji kfo namhi nhehafafomort. Tfit toh hasetrn, wom brbo tohyukm yi kfo memomr, “Ni aso rroh womenn. Mrokfo kfo pthefm to wany nhta twanhiwunomr.” ⁷⁴ Tfit Pitar sinyahato kfo memor, “Na kfo mif mifwanko, na nhai tu tawisaf mifikahannr nd niko kfiwa yimar. Na kfo firewane Bro Nkifrar yak tutfarahra.” Inji kfo hanymor, krir nakumor. ⁷⁵ Krirhu naku tngtpno Pitarhu yimbhindangm ndnatn tuppomomr. Tuppohato yima yuhur tfit niamotrr tfit dukamort Jisasr kfomo mrokfot. Kfo memor, “Hrek yifungnano krirhu naku tngt tafi wany juha, husfirpa kfo namhit kfo namhi kangnm, ‘Na nhai tawisafka-hanr Jisasr.’” Nd mrokfot dukakhato briahako fnahnihato nhai nur ttifarmor.

27

Pailatrpnno Jisasr kot tohmo yuhat

(Mak 15.1; Luk 23.1-2; Jon 18.28-32)

¹ Dbha ksfutn prisroh bro yimami Judaroh bro yimam rhuhato Jisasrhu was yuhat naptha nhtamom. ² Mrokfot nayak nhtamomtn mti baklain tofe kimomr. Kiyakhato hanymomr Judiaroh gafanar kutewumr Pailatr, rorpno hanymomr.*

Judasr nohmo yuhat

(Aposer 1.18-19)

³ Nd Jisasr hndhnayuk yima Judasr wanymor yimam kfo memomr, “Jisasr nhai rhuruhatr. Wasrahmr.” Judasr inji tfit wanymohat yima yuhur foh tmbhonimorr. Be

* ^{27:2:} Nd yima Pailatr Rom thofer. Tu Rom thofmn htamomr Judaroh gafanar. Tu Judaroh kotkfot tohyuk yimam nhai bi wasrmoamm, afo tfit Pailatrpnno hanymoumm. Ndnetmn Jisasrhu waskfot kfomohat tu Romm htayuk Pailatrpnno hanymomr.

tfit yudbat nd ror yakmo 30 silva marum hanyhato prisroh bro yimami Judaroh bro yimam tfit mhemor. Mhehato kfo memorm, ⁴“Nd yimar na be hndhn furahato nikmoh tirmn bi hta furamo-tanr be was furarahkomr. Ror nhai wom tamoh nefm narmor.” Inji kfomotr kfo memomr, “Nom nhai wom finji kforuhatnom. Ninuhem krhopam. Ni tu wayak nhta.” ⁵ Be Judasr inji kfomotmr yima yuhur krhohato nd 30 silva maruham yakhato Bro Nkifrarhu temperrn rithu brur tanyhato fnahnihato yura mis muhhato tur tuhatokhato teh yifuhmor mtitofe.

⁶ Be nd maru kpt, Judasr thu brur tanymot, prisroh bro yimam fakmomt. Rom yakhato kfo memom, “Ndar maruham yimar yak hndhnamo maruhayem. Nhais Brorhu temperrhu maruhampno rpatttaruhatnomm.” ⁷ Be nd maruham rhumotm mrokfo napthahato nd maruhaye wiknamomt wom tkitt nmbuhat. Roh hingrnamo yimarhu tkitt wiknahato to be nd tkitt nmbuhat yima kopmoumt. Wuri wuri niayuk yimam nohneft ndha hanyhato kopmoumm. ⁸ Jisasr yak hndhnamo maruhaye nd bbinysoft wiknamotmt, ndnettn nd tkitt futamomt, “Yimakkut.” Arihat to be nd yufarpat kuta hanitmt. ⁹⁻¹⁰ Rom inji namohat to be profet Jeremaiar kfomo yuhatn rhu hikmot. Jeremaiar kfo memor,

“Bror kfo memora, ‘Isrerm 30 silva marufenrpaye kfomom, yimarhu wiknanef.’

Nd yimar wiknamo 30 silva marufenm yakmomm

nde tfit kekutnihato wiknamomt roh hingrnayuk yimarhu tkitt.’” *Sek 11.12-13*

Pailatrhu kfo ttiwon nmbuham

(Mak 15.2-5; Luk 23.3-5; Jon 18.33-38)

¹¹ Jisasr Judiaroh gafana yima Pailatrpnno mtohmotr Pailatr kfo ttiwon memor, “Nine Judaroh kinge?” Jisasr memor, “Uwa. Mrokfot to bi kfo twanhiwunt.” ¹² Prisroh bro yimami Judaroh bro yimam kfo wok fura bofuramohat Jisasr nhai ptharmor. ¹³ Pailatr inji htihato Jisasr kfo memor, “Bare, ni wanuknm nd yimam ninhu yufatpno mhfnahniwa mrokfom?” ¹⁴ Jisasr nhai wom mrokfom ptharmor. Pailatr inji htihato duka nhi memor, “Arr tamohtet yimarn nhai kfo wokkahrm?”

Pailatr kfomor Jisasr yura bgre misn anohr

(Mak 15.6-15; Luk 23.13-25; Jon 18.39-19.6)

¹⁵ Pasofa burwa yiharn kalabus tohyuk wom yimar Judiaroh gafanar kak thu hnammour. Tu kmi thofmn fitoh yimar yibonwom yak tuhafoneft, yufat yutamoatm, nd yimar kak thumour. ¹⁶ Nd yihar fasoh fasoh nefm nayet yimar kalabus tohmor. Nd yimarhu yufat Jisas Barabasr. ¹⁷ Nd Pasofakfot yi rifinyuk yimam yi rifiny bugamotm Pailatr wom kfo ttiwon mrokfot htamort. “Ar kmiko! Fitoh yima tungunar yangako ndar Pasofa yihar yak hfhanaforhoya? Jisas Barabasr o Jisasr, yimam kfo yamuka nd Kraisr?” ¹⁸ Jisasr be kfo wok furahato kalabus htamomr. Ndnettn Pailatr ndhtet kfo ttiwon mrokfot htamort. ¹⁹ Yo Pailatr kotkfot rhuyuk gajis rhu hasetrn Pailatrhu mett wom mrokfot kfaf memot, “Mrokfo duha dborior yimar finjina finjina duha. Yifung nd yimarn hwe tweh hanyhato yima yuhur mfro kurhira.”

²⁰ Prisroh bro yimami Judaroh bro yimam kmi thofm kfaf hany memoumm, “Wakfo naku wameko, ‘Pailatr Barabasr ayak hfhanafokahrn Jisasr awasr.’” ²¹ Tfit Pailatr kfo ttiwon memorm, “Froh mifr yamukako ayak hfhanafoya?” Tuhant yindars sinyahato kfo naku memom, “Barabasr.” ²² Pailatr ttiwon memorm, “To Jisasr, yimam kfo yamuka nd Kraisr, nd yimare finji narhoyanr?” Kfo memomr, “Bgre misn wakihegirkomr.” ²³ Pailatr kfo memor, “To tamohmpno? Finji namotr inji narhoyanr?” Tfit mrhuni mrhuni memom, “Bgre misn wakihegirkomr.”

²⁴ Pailatr inji htihato duka memor, “Na tamoh mrokfom kfoneft be nhai wanukotma.” Be ndnatn bupam yakmorn turoh nyngampno tirm kifsamormn kfo memor, “Ndar yimar noh thombat, na mrokfo duhata rhuruha. Niko tukomn mrokfetko rhurahko.” ²⁵ Pailatr inji kfomotr tuhant yindars sinyahato kfo naku memom, “Nhais mrokfom nd yimarhu krhopam nompno rhuhany tfit nmoh yonmpno nd krhopam

yakneft.” ²⁶ Be Pailatr yakmorr Barabasr, fak hfhana-fomorr. Ror yak hfhanafohemormn tfit Jisasr yakhato soldiaroh tirm htamorr. Memor, “Romn wife wife tabotakhato bgre misn kihegirrahmr.”

Soldiam Jisasr kfo tfar botfarmo yuhat

(Mak 15.16-20; Jon 19.2-3)

²⁷ Soldiam Jisasr yaknimomrn hanymomr mrokfo yakinohyuk tkitrn. Nd tkitr hanyhato soldia bugam yi rifiny bugamom. ²⁸ Ror hatohmo hmbresham fak rhoh bugamomrn tfit kku kkorpaa kanjo fnhuyet rmonthar thu kasimomr. ²⁹ Yo soldiam huhra mitoft yakkemomtn kingroh mfham hatohwa yabisoht kanjo yakkemomtn mfhatn wathu hamsismomr. Yo kingm yakinohwa mis nhaf wom miyef mifr yakkemotmr ndr fakitohmorr tirmifkorn. Yo rorhu nyingako bangu myuknamoamn yon mumenm kanjo wukfo tfar botfar memoumr, “Woi, Judaroh kingr.”[†] ³⁰ Inji kfo tfar botfarmoamr yo kuninfar thumoumr. Yo tirt yakinohyuk mis dhemot, ndt tfit yak hutfakmoamr mfha-pako warbigmoumr. ³¹ Kfo tfar botfar thunimomrn yo tfit nd kku kkorpaa kanjo fnhuyet rmonthar yacta thumomrn tfit turhu hmbresha mifm hmbremomr. Hmbrenimomrn hanymomr bgre mis tuhegiryuk tkittn.

Jisasr bgre mis kihegirmo yuhat

(Mak 15.21-32; Luk 23.26-43; Jon 19.17-27)

³² Kmi rim fnahnitn soldiam htiyakmomr Sairini thofr. Rorhu yufat Saimonr. Ror yakkemomr nd Jisasr tita hanymo bgre mis rorn tfit wathu titafmom. Rorn titanota hanymorr. ³³ Be yimomn, mfnahmom wom kmit kutewumt Golgotat. (Kfe sfiohniyet yima mfham kanjo nd tkitt rhumoatt futamoumt yima mfha tpt.) ³⁴ Fasoh huthayet wain bupam hnehato hemotmr, huthamotm nhai yarmorm. ³⁵ Soldiam Jisasr yura bgre misn kihegirnihato yo tfit rorhu hmbresham yakhato pirai satumomm.[‡] ³⁶ Pirai satunihato rhu yukatohmoumr. ³⁷ Yura mfhatpnonko mimkutn wom mrokfot wandfamomt. Nd mrokfot rom wandfakhato htamot kfo memot, “Ndarr Judaroh King Jisaser.”

³⁸ Jisasr tuhegirmo tkittn hus rikoh yimaf mano mano tuhegirmomf. Womr tirmifko hirmor, womr kindonko hirmor. ³⁹ Jisasr hegirmo bgre mis tu yihota yuhat tohettn rim fnahni mfnahniyuk yimam rim grha wase bowasenihato yihom kfo tfarnyi mkfo tfarnyamoumr. ⁴⁰ Kfo memoumr, “Ni kfo mayete, ‘Bro Nkifrarhu temperr yak tasohhato tfit husfirpa yiharpa tfit kasinyahato hingrnaruhanr.’ Ni inji kfet yimaye. To ni tu Bro Nkifrarhu Yon mifn rhu thombat, to btn wamifnahnekahtn ahtinomn.” ⁴¹ Nd prisroh bro yimam yo nkifra boririfhuthu tisam yo Judaroh bro yimam, rom rpat inji kfo tfar memomr, ⁴² “Ndar yimar ror toh hingrna hnamohat bok met yindarim rorn fak marnya hnamorm. Asomift to nhai tur mifnahnekahtn htikahnomr. Ror to Isrerroh kinger. To amifnahnekahtn nom htiruhanomn duka mirahnom tu nmoh nrfa htiyakyuk yimayer. ⁴³ Bro Nkifrar hikwarn kfo kangr, ‘Na Bro Nkifrarhu Yona.’ To bt Bro Nkifrarhu yima yuhur rorpno rhu thombat, to Bro Nkifrar wom nefm anakahtrr nd bgre mis htanyahato amifnahnekahtn ahtinomr.” ⁴⁴ Nd mano mano hirmo yimaf rof nhaf kfo tfar botfar thumofr.

Jisasr myaknimo yuhat

(Mak 15.33-41; Luk 23.44-49; Jon 19.28-30)

⁴⁵ Dany marrn marrhu nukeft be rim nohnimat. Kantri bugat be yambontift rhumom. Wuroh 3 kilok krif marr tfit niarmor. ⁴⁶ Tri kilok kanjo marr toh hanymomr Jisasr tau nakuyafrmor, “Eli, Eli, lema sabaktani?” Nd mrokfothu mrokfo yimbu yuhat inji kfiwit, “Nkifraye, Nkifraye, tamohmpno bi frtrohwona?” ⁴⁷ Inji kfo nakumotr brbo tohyuk

[†] 27:29: Soldiam memom, “Kfo tfar botfarrahnomr.” Ndnetmn kingm kanjo wondhmomr. Nd yiham kingm thu kasimoum kkupitha rmontham yo mfham hatohyuk yabisohm hatohmoum yo miyefr tirmifko kakitohmoumr. Ndnetmn Jisasr inji fak hta nhombramomr. [‡] 27:35: Tahiham tubatu hanymomn htimom, frohrn hifa tahis fturt, nd yimar fakmor Jisasrhu wom hmbresham.

yimam wanyaf hanyhato kfo memom, “Nd yimar Iraijar nakutr.” ⁴⁸ Yudbat womr toni hanyhato spans yakmorn wainpamn tayifakhato miyeftn htahato memom, Jisasr hikahtnom bupam ndtn tmasakrahr. ⁴⁹ Tfit womm kfo memom, “Awi bi mirahn ndm ahianr. Afo htiyaf hanyrahnom, Iraijar naku kfihat Iraijar finji naruharr?” ⁵⁰ Be wuroht tau nakuyafmorn be mfaknimor.

⁵¹ Yimar myakni hanymo fijo nd bro rmonthar temperrhu tu Nngrajoh Hnaru Gnanhehr gna rafomor be buha mifn rmonthar yoh nmbrmorn mano mano rim rhu mrhumor. Yurak wuyoh nmbrakmorn miyoh nmbr witanihato mano mano rim hir mhirmor. Yo nunes rpat tonehato nd tkitkitroh yonmari yonmari tahim foh dbtoha wumtmom. ⁵² Nd yima gum htamo tahi muhm nd yiha foh bbomom. Yoh bbomotm bok yimam Bro Nkifrar hikhato noh hanymom nd yiha tfit sinya hanyhato ⁵³ yopm htany hanymomm Jisasr sinyanimo mongkorn Bro Nkifrarhu taun Jerusalemko yihato wufau faumotm bok yimam htimoumm. ⁵⁴ Jisasr toh yukatohmoa keptenri soldiam nd nunesi tamoh tamoh nefm mfnahmom htihato nhai yimam rhurmom. Tuha mrokfo duhatm rhuhato kfo memom, “To finji tfit kforuhanom? Ndar yimar tu Bro Nkifrarhu Yon mifer.” ⁵⁵⁻⁵⁶ Yo tom wom metm be inji wuri kkof tohhato hti hasomoum. Taun Makdala efkot Mariati, Jemsri Josefrofhu mmem Mariat yo Sebedirhu mett, nd nd metm hti hasomoum. Nd metmn Jisasr Galilit tohmohat romn uhik ahik htfasmoamrn tamoh tamohm romn hiyaf hanymoumr.

*Jisasrh thatipt tahi muht rihtamo yuhat
(Mak 15.42-47; Luk 23.50-55; Jon 19.38-42)*

⁵⁷ Krifnano taun Arimateathu wom maru kunyet yimar yimor. Rorhu yufat Josefr. Ror to Jisasrhu disaiperr tohmor. ⁵⁸ Ror yimorn Pailatr mkfo ttiwonmorr Jisasrhu thatiptu yaknineft. Mkfo ttiwonmotr, Pailatr kfomotr soldiar ror tohukatohmotr fakmort Jisasrhu thatipt. ⁵⁹ Josefr thatipt rim htahato nfri ganyom rmonthaye rir borirmorr. ⁶⁰ Rir borirnihato turhu nfri tahi muh mift hanyhato rihtamorr. Nd tahi muht bi tu Josefrn yimam kfomotrm hingnamomt. Thatipt rihtamortn tfit bro tahis yakhato tahi muhthu yifhatikt hta titto tanymortn yimor. ⁶¹ Makdala efkot Mariati wom Mariat brbo yimar rihtamo tahi muhthu nyingatikko rhuhato hti hasomof yimar rihtamohat.

Soldiam yopt tohukatohmo yuhat

⁶² Tfit hwe nfha ndwom marrn, ndr tu Sabat yiharn, prisroh bro yimami Farisim yimom Pailatrhu htit. ⁶³ Yihato kfo memomr, “Bro yimaye, nom dukewunomt wom mrokfot nd brurmahr yuhre yima nfrir tohhato kfomot. Kfo memor, ‘Na husfirpa marm rhunihato tfit sinyaruha.’” ⁶⁴ Soldiam yihato husfirpa marm toh yukatohkphot. Ka turhu disaiperl yaknihato nndo htaruhamtn tfit kfo ngeh mirahm, bi sinyani yifir. Nd nohro yimarn bi wom kfo fura ngeh mrokfom kfomorm, yo tfit romn tfit wom kfo fura nmbuhat htarahmt, ndtn be tu krhonano yiraht.” ⁶⁵ Pailatr inji wanyhato kfo memorm, “Soldiam wayaknikahkomn yopt romn atoh yukatohtwamt. Nd tahi muht hta tasifyuk tahis wom makkfot htakfot. Yimam nd tahis yak tuhahato yimar rimak rikohneft nd makkfotn hti nhtarahko.” ⁶⁶ Be inji wany hik marnya tanyhato yimom. Yihato nd tahi muht tahiye frkih marnyamomtn makkfot htamomtn yopthu toh yukatohyuk soldiam htamomm.

*Jisasr sinyamo yuhat
(Mak 16.1-10; Luk 24.1-10; Jon 20.1-18)*

¹ Sabat yihar rhunimomrn tfit wom nfri wikrhu barkof yiharn marr yuhre mwondh hanymor, Makdala efkot Mariati wom Mariat yimof yopthu htit.* ² Nd metf yi hanymof, yudbat nunes tonemot. Nd nunespno Brorhu mounmotr hefenko wutoh tanyhato

* 28:1: Ndar veskfot kfiwa wikrhu barkof yihar mirahko ka fitoh yihar ka kfiwit, ndr Sande yihar kfiwit.

nd tahi muht frtasifmo tahiis rihtafmortn yura tahiis mrhumor. ³ Nd mounmotrhu nyingatikt hatohmo nukeft yifatohmohat memom nndo binasohtn kak dbratwom, ror hmbremo hmbreshamn memom nndo yindeng nyisofr fnhutwor. ⁴ Soldiam inji wahtimohat nhai yimam rhurmom. Yafotham frbrirakhato tuha wawutthamohat memom nndo ginunes kekwotm. Yimam noheh yimam kanjo rhumom.

⁵ Nd yopthu htit yiyuk metf, mounmotr kfo memorf, “Nifn mirahfn ayakrmanyo. Na htitanfn nifn nd bgre mis kihegirmo yima Jisasru hti hambrot niefn. ⁶ Mirahfn ka wom asor. Nhai. Be bi sinyanir tur kfomo kanjo. Afo wania wahtifnt ror htamo tkitt. ⁷ Wahti tanykahfnt, tfit bmbri waikahfnn rorhu disaiperm wakfo hany wamitwafnm bi sinyern be bi tfit Galiliko tohak hanitr. Ndko ai ahtitwamr. Inji wakfo nuhastwafnm nanhu kfo nuhas mrokfot.”

⁸ Be nd yimar htamo tahi muht yakrmenano htanymoftn yimof. Wom yima yuhur fakrmemof, tfit wom yima yuhur be yindhorhato tonemof disaiperroh kfo nuhass.

⁹ Tone hanyhato buha Jisasrpno mnafurhato kfo memorf, “Hifa dbhayer.” Be rof inji wanyhato yauyaknimofn, rorhu wuram rimakitohhato kfo hbraumofr. ¹⁰ Jisasr kfo memorf, “To nifn mirahfn ayakrmanyo. Waikahfnn, nanhu nmemrom wakfokahtfnm Galiliko aiswam. Ndko na htirahma.”

Soldiaroh mrokfot

¹¹ Nd met husf yuhre yihotat yau hanyetfn yima yopt toh yukatohmo wom soldiam taunko bi rim fnahnihato prisroh bro yimam kfo nuhas bonuhasmom rom htimo nefm.

¹² Kfo nuhasmotmm prisroh bro yimam yihato Judaroh bro yimampno rpattifinhato wom yima yuhum naptha nafak nhtamom. Naptha nayak nhtahato wom bro marufat yakhato nd yima gur htamo tkitt toh yukatohmo soldiam hehato ¹³ kfo memomm, “Nd yima Jisasr sinyanimo yuhat yimam kfo ttiwon hnewum, wakfo wami-twakomm, ‘Nom hwyetnomn turhu disaiperm yifung yihato rim fak rikohmt rorhu thatipt.’ ¹⁴ Tfit Pailatr nd mrokfot wanyhato finji kfiwur, nom tunomn yihato mrokfot yak marnya bomarnyaruhanomtn niko be mrokfo duhatko rhurahko.” ¹⁵ Be nd soldiam nd maruham yaknihato nd bro yimam kfomo mrokfo yuhat fak hikmom. To be arihat to be nd mrokforpat Judam kfo ptha hanitm.

Jisasr turhu disaipermpno mfnahmo yuhat

(Mak 16.14-18; Luk 24.36-49; Jon 20.19-23)

¹⁶ Jisasru 11-pela disaiperm be Galiliko yihato mifnahmom nd Jisasr kfo htafmo kmi yihofrn. ¹⁷ Ndha Jisasrpno mnahtimohat kfo hbraumomr. Womm nhai kfo hbraurmomm, hus dukefetm rhumom. ¹⁸ Jisasr nd yimampno brbo rim tohhato kfo memorm, “Ndar mounti bbinysoft yorhwa tamoh tamohm Bro Nkifrar bi nanhu tirtn htamorm. Bi nann kakitohwanm. ¹⁹ Ndnettangkang, kmiyakmim wayau fnahkahkomm nanhu disaiperm wayak hta fnahtwako. Yak hta hanyhato Bro Yifemri yinem Jisasr ee Bro Nkifrarhu Yafotharoh yufampno baftaisim tany hanykfot. ²⁰ Yo nd na niko kfo nuhas bonuhasyuk mrokfom waptha nuhas bugatwakomm. Wawanyko, na toya, tohnho hakuruuhanko yiham. Be inji tohnhohany tohnhohany tu wuroh yiharne be.”

**Makr
dwandfamo gutnius mrokfot
Barkof kfo nuhas mrokfom**

Barkof mrokfot Makrhu gonborngt yorhwat kfo memor, “Asom Bro Nkifrarhu Yon Jisas Kraisru barkof gutnius mrokfem.” Makrhu gonborngtn htirahn Jisasr bbukayeter yo bro yufayeter. Ror hingrnamo hingrneftn yo ror namo nefmn htirahnt rorhu bbukeft yo rorhu bro yufat. Ror bbuketrn, yo yufayetrn, tuhant yindars gutnius mrokfot kfo tebos nuhas bonuhasmorm, yo kmi yarhm, tek yarhm tamoh tamoh yafotha bebm fak thumorm, yo bbinysosf thofroh fasoh fasoh nefm rorn fak thuhemorm. Jisasr kfo memor, “Na Bro Najoma niamoyann bbinysosf thofroh fasoh fasoh nefm mfha htaruhanm.”

Makr kfo pthamo mrokfom Jisasr hingrnamoa hingrna yuharoh mrokforpam kfo pthamor, to nd met yindarim hemo skur mrokfom, ndm nhai be mfro ptharmorm ndar gonborngt.

Barkopam Jon Baftaisru tndh mrokfom Makr afo pthamor. Ndm pthani tfit Jisasr baftais yaknihato Satanr yihato Jisasr kfo nheh bonhehmo yuhat kfo tndhmor. Ndmpno ee wonk wonk krhopam yaket met yindarim Jisasr hti yuhuafhato skur mrokfom hemorm.

Yo Jisasrhu disaiperm nhai hti hik bohikrmomm Jisasr namoa nefm. Kto kto ee hti hikmomm Jisasr namoa nefm. Wuroh mrokfom htirahnm yimam Jisasr nhai hifa nytingar htarmomr. Bro kurheft yakhato nohmor. Minohafhato tfit sinyamor.

**Bro Nkifrarhu kingdomkfothu kfo nuhas mrokfom Jisasr mikfo
nuhas hanymo yuhat**

(Sapta 1.1-3.6)

*Jon Baftaisr Bro Nkifrarhu mrokfom kfo pthamo yiham
(Matyu 3.1-12; Luk 3.1-9; Jon 1.19-28)*

¹ Asom Bro Nkifrarhu yon Jisas Kraisru barkof gutnius mrokfem. ² Bi profet Aisaiarn bi barkof mrokfot kfo memor,
“Ninhu yi mrokfeftu kfo nuhas hanyuk yimar bi kfo tkruraf hanyrhotanr
bi rorn tohak hanyhato mrokfot bi kfo hanyrahrt.

Rorn bi tohak hanyhato yihotar bi yau mnong hanyrahrr.”

Mal 3.1

³ “Wom yimar nungur tik furatn tohhato kfo mirahrko,

‘Bro Nungothethru nia yuhat wayak marnyak hanyhekomr.’”

Ais 40.3

⁴ Nd kfo htamo mrokfot Jonrn kfomot. Jonrn nd nungur tkit furat toh habrihato met yindarim kfo memourm, “Nikmoh fasoh fasoh nefm mong trohkahkomm baftaiskfot. Baftaiskahtko Bro Nkifrar yak thuhirahrko nikmoh fasoh fasoh nefm.” ⁵ Jerusalem thofm yo Judia-korhofm Jonrpno yihato nd rroh fasoh fasoh nefm kfo nriyafnimoamm tek Jodentn baftaisimmourm.

⁶ Nd yihart Jonr kamer tmb hingrnayet hmbreshat hmbremour yo let bando thaye nyuh dbkafmour yo rit papkumi winepam, ndm yehato tohmour. ⁷ Ndha ror tohhato kfo memor, “Nanhu mongko nia hnnewa yimarn, tu bro bbukeft hatohwor. Na nhai ror kanjo bbukeft hatohkaha. Na, na be yima furaya rorhu senderfhu ki jbkafyuk mtinf kak nyusakahukanr.* ⁸ Na tek bupa furaye baftaisimwanko. Kto ror niko yimako baftaisim thombat Bro Nkifrarhu Yafothaye baftaisimrahrko.”

*Jonr Jisasr baftaisimmo yuhat
(Matyu 3.13-17; Luk 3.21-22)*

* 1:7: Wom yimar hatohyuk senderroh ki jbkafyuk mtinf yak nyusak thumoahat, tu yufapa duha yima furapam womr hatohyuk senderm kak thumourm.

⁹ Be tor nd yiharn Jisasr Galilikorhof kmi Nasaret htanyhato niamor. Niamotr Jonr tek Jodentn baftaisim-morr. ¹⁰ Jisasr baftaisneftpno wuyak muhakmorn tfit mfrsohneftpno yura mountko hitmortko rim rhu mrhumot. Yiro moun rifhu yuhatn wuhtiyak-mort Bro Nkifrarhu Yafothat ganyom mmkrks kanjo yak nhombranehato fawihnamot. Be nd ganyom mmkrks yawihnamotn yimar mirhumot. ¹¹ Tfit yura mountko wom tngt wanymort. Nd tngt kfo hany memot, “Ni nanhu yone. Nanhu marbit korhwot ninn. Hifa hti yindhorwann.”

Satanr memor, “Jisasr akfo nhebehkahtanr fasoh nefm narahr.”
(Matyu 4.1-11; Luk 4.1-13)

¹² Be yudbatn Bro Nkifrarhu Yafothat niahato yak hatoh hanymottr yimor nungur tik furatn. ¹³ Jisasr 40 yiham nd tkitt tohhato Satanr niahato kfo ngeh bonhehmouurr. Jisasr ndha tohmothat graf fojmpno tohmour. Mounmotmn yihato romn toh dbu hmbre yaknimotmr bbukeft tfit fakmor.

Jisasr Galilit rihingrnakmo yuhat
(Matyu 4.12-17; Luk 4.14-15)

¹⁴ Jonr bi kalabus yiyetrn to be Jisasrn Galiliko yihato Bro Nkifrarhu gutnius mrokfefm ptha habrimourm. ¹⁵ Kfo memor, “Asor bi tu yiha mifr. Bro Nkifrarhu kingdomkfot bi brbohwot. Nikmoh fasoh fasoh nefm wamong trohkahkomm Bro Nkifrarhu gutnius mrokfotn wawany yakiokomm.”

Jisasr yakmo barkof husfhus yimam
(Matyu 4.18-22; Luk 5.1-11)

¹⁶ Jisasr Galili bari thmbt yau hanyhato Saimon Andru najohf rugit yak yif hasetfn htimorf. Rof nd hingrneft hingrnahato maru kakmouf. ¹⁷ Jisasr rof htihato kfo memorf, “Nann wania wahikfn. Nann wahikkahtfn yimaroh yakneft yak nuhasruhanfn.” ¹⁸ Be rof inji wanyhato nd rugi wuskar myak htanihato mhikakni twanhomofr.

¹⁹ Saimon Andru najohf yaknimorn tfit mbrnyi tefihato mhtimorf Sebedirhu yon Jems Jonprof. Rof nhaf mmbrttn tohhato rugim fak nahu dbofta hasomof. ²⁰ Be rof mhtihato kfo memorf, “Nann wania wahikfn.” Be yifem Sebediri wom hingrna yimam mmbrttn htanymofmn Jisasr mhikakni twanhomof.

Jisasr kmi yarh fknayet yimar yak marnyamo yuhat
(Luk 4.31-37)

²¹ Jisasr nd tur yak hanymo hik tamnou yimampno yimomn Kaperneamt mifnahmom. Ndha Kaperneamt tohetmn rhu krna Sabat yihar rhumomr. Nd yiharn Jisasr ndharhof rhu rifinyuk rmonrn yihato Bro Nkifrarhu mrokfom rikfo nuhas bonuhasakmorm. ²² Jisasr mrokfom pthamohat nhai nd nkifra boririfhu tisam kanjo ptharmotr wanyrmomr. Nhai. Tu hifa ptha yembindtmotrm, yimam nd ror pthayuk mrokfom wanyhato bok dukefm yakhato duka memom, “Barenko, ndar yimar pthiwa mrokfom hifa ptha yembindt marnyewurm.”

²³ Nd rhu rifinyuk rmonrn rhumor kmi yarh fknayet yimar. Jisasr kfo nuhas hanyetrn nd yimar sinyahato tau nakuyafhato kfo hutt memor, ²⁴ “Nasaret thof Jisase! Ni asha niaronn, nome finji naruhannom? Nmoh yak batit niaro? Hti nhtiawann ni Bro Nkifrar yak htamo yimaye.” ²⁵ Jisasr sinyahato nd kmi yarhr kfo hutt memor, “Ni nd kmi yarhe, tmifn tngt wayoukihkahnt, nd yimar wathu troh tanynr.” ²⁶ Nd kmi yarhr inji wanyhambtunihato tau tneh fnahmorn nd yimar thu troh tanymorr. ²⁷ Nd yimam inji htihato be tuha mifoh rihanimom. Tuha tum rinakfo nakfo memom, “Bar yimako, ndart be tu wom nfrineft htitwonom. Nd yimar pthe mrokfote tamoh bbukettm nd kmi yarhr wanyhambu tanyhato nd yimar thu troh tanyrr?” ²⁸ Be nd yima rifhur nd neft htihato Galili kmi bugat nakfo nuhashi hanymom.

Jisasr Pitarhu matohemt yak marnyamo yuhat
(Matyu 8.14-15; Luk 4.38-39)

²⁹ Be nd rhu rifinyuk rmont htanyhato tfit yimom Saimon Andrurofhu kunysn. Jems Jonrof rpatn nd Saimonrofhu kunysn fknenimof. ³⁰ Saimonruh matohemt kkah dbohneft yakmottt hwemot. Jisasr fknenimohat kfo memomr, “Tot rot inji dbohnewut.” ³¹ Be Jisasr wanyhato rotpno yihom tohhato tirtn waykmorth teh kasinyamort. Be inji teh kasinyamotrt nd dbohneft thu troh tanymott. Be nd mett yudbat marnyani hanyhato sinyamotn yeshrim hta mskahemotm.

Jisasr bok met yindarim yak marnyamo yuhat
(Matyu 8.16-17; Luk 4.40-41)

³² Krifnano marr bi yohniyetrn, bok dbohnet dbohnetm, kmi yarth fknayetm hne hnamomm. ³³ Nd kmithu met yindari bugat niahato nd ror rhumo kuni yifhatiktn nia rifiny yukatohmomr. ³⁴ Jisasr fnahnehato bok met yindariroh wonk wonk dbohneftm fak marnya hanymorm. Yo nd kmi yarth fknayetm fak thu hanymorm. Kmi yarhm Jisasr hti hikhato duka memom, “Ndarr tu Bro Nkifrarhu Yoner.” Be ndnatn Jisasr kfo gadiyaf hanymoatrm, nhai tfit pthani hanymoam.

Jisasr Galilit ptha habrimo yuhat
(Luk 4.42-44)

³⁵ Tu dbha ksfutn Jisasr fnahnihato nndo yima toh duha tkittn yihato kfo bruttnamor. ³⁶ Saimonri wom yarmotemrom htiyafu hanyhato hik hanymomr. ³⁷ Yau hikaknihato mhtimomr. Mhtihato kfo memomr, “Met yindarim hambriwum.” ³⁸ Jisasr wanyhato kfo memorm, “Be tmifnom tfit wom nndoh kmimn ainyom. Yiruhanomn na wom mrokfom kfo ptha nuhasruhanm. Na to nd mrokfom ptha habrineftn niamoya.” ³⁹ Be Jisasr Galilithu kmi kmim yi htifasmorn Judaroh rhu rifinyuk rmonim yihato mrokfom ptha nuhas habri yo nd kmi yarth fknayet yimam yak marnya, inji na htifasmor.

Jisasr yak marnyamo lepra dbohneft yaket yimar
(Matyu 8.1-4; Luk 5.12-16)

⁴⁰ Wom lepra dbohneft yaket yimar Jisasrpno bangu mtabokmehato kfo naku memor, “Jisase, ndar na hatohwa dbohneft ninhu tnge kforahn, nd dbohneft thu troh tanyrahta.” ⁴¹ Inji kfomotr, Jisasr yuhuafhato nd leprayet yimarn tirt rihtahato kfo memor, “Nhai mrokfem, yak thuruhant.” Inji kfonu hanyhato nd dbohneft kfo memort, “Wathu trohnr.” ⁴² Be inji kfomotr, nd dbohneft yudbat thu trohmotr. ⁴³ Thu troh tanymottr Jisasr wom kfo duka mrokfot kfo memor, ⁴⁴ “Ni nda dbohneft thu troh tanyhat, mirahn tfit womm akfo nuhasanm. Mosesrhu boririfhut yak hikkfot. Yimam lepra dbohneft yaketm marnyanoahat inji namoum. Nd hun gifam prisrpno myak nuhasnimoamn, tariorh mthamoum. Nd tariorh mtha yiharn prism ndt htihato kfo memoum, ‘Nd yimarhu dbohneft bi thu troh tanymotr.’ Ni nd yuhat yak hikkfot.” ⁴⁵ Inji kfo tungunafmotrr yimor. Yihato kfo nriyafmort. Bok tng rihar rhu fnahmott, bok yimam wanyhato niamom. Be ndnatn Jisasr nhai tfit yiro kmim yihato met yindarimpno naffrmoar. Be inji yima toh duha toh htifasmour. Inji toh htifasmoatr yimam be niahato htimoumr.

Jisasr tir wura minysafet yimar yak marnyamo yuhat
(Matyu 9.1-8; Luk 5.17-26)

¹ Dfik marm yinyimotm tfit Kaperneamko yimor. Ndko yihato wom kunys rhuhato pthamoat met yindarim rhu wany yakitohmoumr. ² Nd kunyr rifinyaknimohat memom nndo tpmhur tohwor. Kuny yifhatik yuhat finji wom finji yimam yihom fnahni mfnahnikfot. Ror Jisasr nd kunysn rhuhato Bro Nkifrarhu mrokfom kfo ptha nuhasmourm. ³ Nd kunysn ptha hasetrn wom minysafet yimar husfihu yimam hnamomr. ⁴ Kunyr be tng mnnderpat tohmotr, nhai wom yihotoham nd yimarhu hanyukm. Be inji htihato

yura kuny mingiahus yak tmabrafmomt to be nd yuhatn nd minysafet yimar fafho thumomr. ⁵ Nd yimar hany rim htamohat rroh dukefm duka memom, “Jisasr yima yak marnyeter. Nda minysafet yimar ror kforahr be marnyanirahr. Nhai tfit nd minysaf rifhut rhuruhattr.” Be Jisasr rroh yima yuhum inji htihato kfo memorr nd yimar, “Bar yinowe, ninhu fasoh nefm bi fak tuhahuyann.” ⁶ Nkifra boririfhuthu tisam Jisasr pthamo tngt wanyhato tum rinahti nahtihato kfo memom, ⁷ “Tamohmpno ndhtet mrokfot kfiwar? Kangr Bro Nkifrarhu tkitt ayaka. Nhai wom yima furarn yimaroh fasoh nefm yak thukfot. Bro Nkifrarpas yimaroh fasoh nefm kak thuworm.” ⁸ Nd yimaroh yima yuhum inji dukamohat Jisasr bi htimorm. Htihato kfo memorm, “Tamohmpno inji riduka adukiwako? ⁹ Kangko finji akfoyane? Kangko akfo amiyanr, ‘Ninhu fasoh fasoh nefm bi fak tuhahuyann?’ O kangko akfo amiya, ‘Wasinyakahnn krokt wayaknikahnt wayauyakni?’ ¹⁰ Na, Bro Najoma, yimaroh fasoh nefroh yak thu yafothat Bro Nkifrar bi hemora. Afo asomif wom neft yak nuhasrhotanko, duka mirahko nd yimar bro yufeter.” Inji kfoni hanyhato nd tir wura minysafetr kfo memorr, ¹¹ “Na kfiwann, wasinyakahnn krokt wayaknikahnt tunhu kunyko wain.” ¹² Be inji kfomotrr, tuha nd yima rifiyrrhu nyingahato wasinyamorn, nd tur hwemo krokt ykmortn, be yimor kunyko. Be nd toh rifiy hasoyuk yimam htihato be tuha mrokfo duha tohmom. Tuha Bro Nkifrarhu yufat kfo yindhorhato kfo memom, “Nom hrekrpa ndhtet neft htitawonom.”

Jisasr Lifair naku yakmo yuhat
(Matyu 9.9-13; Luk 5.27-32)

¹³ Jisasr tfit bari thmbko yimotr bok met yindarim rifiymotm Bro Nkifrarhu mrokfom hemorm. ¹⁴ Mrokfom ptha tanyhato yimor. Yau hanyhato Alfiusrhu yon Lifair yihom htimorr takis marut tuyuk kunyent rhu hasetrn. Yihom htihato kfo memorr, “Wania wahikna.” Be Lifair sinyahato fak hikakni twanhomorr. ¹⁵ Jisasri disaiperm Lifairhu kunys yi nuwa yamohat bok takis marut yakyuk yimam yo fasoh nefm nayet yimam rpat yihato nuwa famom. Ndhtet ndhtet yimaroh Jisasrpno rpat yi htfasneft bi riruhakmot. Nhai be nd yiharpar hikrmomr. ¹⁶ Farisiroh boririfhuthu tisam htihato rorhu disaipermpno yihato kfo memomm, “Tamohmpno nd takis yekwa yimami nd ufasoh nefm nayet yimampno rpat rhuhato nuwa ye mskewar?” ¹⁷ Jisasr wanyhato kfo memorm, “Yima furam nhai be yi furakahm hunkotharpno. Nhai. Dbohnet yimarpam kitwom hunkotharpno. Na nhai dborioh yimaroh dukeftn niarmoya. Nhai. Na fasoh fasoh nefm nayet yimaroh dukeftn niarmoya. Memoya, fasoh fasoh nefm nayet yimampno yirhoyann, kforuhotanm, nd rroh fasoh nefm yafhorahmm.”

Nuwa ye juha kfo bruttnanefthu kfo nuhas mrokfeft
(Matyu 9.14-17; Luk 5.33-39)

¹⁸ Jon Baftaisrhu uhik ahik htfasyuk yimami Farisim nuwa kurhato Bro Nkifrarpas rroh yima yuhum htamom. Nd Jon Baftaisrhu yimami Farisim inji namotm wom yimam htihato Jisasrpno niahato kfo memomr, “Jonrhu uhik ahik htfasyuk yimami Farisiroh uhik ahik htfasyukm nuwa kurhato tohwam. To tamohmpno ninhu disaiperm nd rom hingrnewa yuhat yak hik duha yitam?” ¹⁹ Jisasr kfo memorm, “Wom yimar kangr tuhan ayaka, ka nd rorhu tuhan yak yihar ka rorhu yimatm marifom afo nuwa kurhato afo brioh tohrahnom? Ka inji narfom? Nhai. Nhai rompno yuhre tohetrn ndhtet neft narfom.

²⁰ To tfit kto yak hambrafruhamr, ee bt rorhu yimatm nuwa kurhato rhurahm.

²¹ Nhai yimam bingotrhof hmbresham muhettm rhuneft tfit nfri rmontha nmbrm yakhato nahukahmm. Yatk hmbreshathu muht tfit nfri rmonthaye nahuneft nfri rmontha nmbrtn teh hma bugarfott yatk hmbreshat. ²² Yo nhai yimam nfri wain bupam yakhato yatk meme tha kpmn tas hmbrikahmm. Nfri wain bupam yakhato yatk meme tha kpmn tas hmbreneft nd nfri wain bupam rikur prhoruhamn nd yatk meme tha kpmn tas hmbreneft nd nfri wain bupam mitoh bugarahm. Ndnettun nfri wain bupam tu nfri meme tha kpmn tas hmbrikahato be nhai kpm yoh tfoh inji naruhatm.”

Rhu krna Sabat yiharhu mrokfot
(Matyu 12.1-8; Luk 6.1-5)

²³ Wom rhu krna Sabat yihar Jisasr wit swirthu wit suhmn fau nanyor hanymor. Turhu disaiperl rpat yau hanyetmn to nd wit shuroh wit dmm tmbhakmomin fi hanymom.

²⁴ Farisim htihato Jisasr kfo memomr, “Tamohmpno inji nem? Bro Nkifrarhu thfa mntwat inji kfiwut, rhu krna Sabat yiha nhai ndpan ndpam tmbhakkfot.”*

²⁵ Jisasr inji wanyhato kfo memorm, “Nikone Defitri wom yimam yatinohr rhu hasohato nkifra rmont rim htayet nuwa rikat rim yakhato yamo nmbuhathu tndhte, ka htikomt o nhai? ²⁶ Abaiatar Bro Nkifrarhu temperthu tohak yimar tohmo yiha, Defitri yatinohr rhu hasohato Bro Nkifrarhu temperr fknenihato nuwa rikat bi Bro Nkifrarhu yufatpno rim htayukt rimakmortn, briahako turhu yaunho habriyuk yimampno rim htahato famomt. Nuwa rikat bi Nkifrarhu yufatpno rim htayukt nhai be wom yima furam ye wonakrmomt. Tu prisrpam fiyakmomt.

²⁷ Bro Nkifrar Sabat yihar htamohat yimaroh rhu krnayuk yihar htamorr. Nhai be marimor, boririfuhett rhuhato nd boririfhutn yimam yak hta bohtahato muh wohne tuhnirahm. ²⁸ Wawanyko, na Bro Najomann nd rhu krna yihar kakitohwanr. Nd yihar kanga finji anaya, nhai tfit wom yima furar kfo htakfot.” Ndnatn nd Jisasrom namo neft nhai fasoh neft narmom.

3

Rhu krna yiharn Jisasr yak marnyamo tir minysafet yimar
(Matyu 12.9-14; Luk 6.6-11)

¹ Wom yihar Jisasr Judaroh rhu rifinyuk rmont fknenihato rim htimorr wom tir gram tip minysafet yimar. ² Wom Farisim memom, “Jisasr nayuk tamoh nefm na thombat afo hti hikrahnomr. Hti hikhato kfo hndhnarahnomr.” Ndnetmn rhuhato memom, “Afo htirahnom dbohnet yimam rhu krna Sabat yiha yak marnyarahrme nhai.” ³ Nd tir gram tip minysafetr Jisasr kfo memor, “Buha yima rifiny buharn wasinya watohetohn.” ⁴ Be nd yimar sinya tohmotr, Jisasr kfo ttiwon memorm, “Niko finji dukiwako? Rhu krna Sabat yiha yimaroh yak marnyakfote, Bro Nkifrarhu boririfhut finji kfiwat? Rhu krna Sabat yihare hifa nefm nakfot o fasoh nefm nakfot? Yimam yak marnyakfot o yimam waskfot?” Inji kfomotrm nhai wom mrokfot kformom.

⁵ Nd yima rifinyr yukatohhato nyingatikt nndo yopaye nrhamomr. Duka memor, “Nda yimam nhai wom duka yuhuwaf yima yuhum rhukahm nda yimar htitahat.” Be inji htitihato wom yuhuwaf yima yuhur niahato nd yimar kfo memor, “Tir gram tipt wathu susnart.” Be nd yimar tir gram tipt thu susnamort. Thu susnahato marnyanimotr.

⁶ Be nd kunys rhuyuk Farisim inji wahti tanymohat nhai wom warhurmom. Be fnahni twanhommom. Fnahnimomn Herotr hikwa yimampno yihato wajis harhumom. Memom, “Jisasr wasrahnom.”

**Jisasr fak nuhasmorm turhu bbukeft, to nd turhu kmi mna thofm
nhai yima yuhum sinyarmomm**

(Sapta 3.7-6.6)

Tek bari thmbt rifinymo yonmari rifuhetr

⁷ Jisasri turhu disaiperl ndhart htanymomtn tfit yimom Galili tek bariko. Yonmari yima rifhur Jisasr htihato mfaus hikaknimomr. ⁸ Kmi kmirhof yimam fau hik hanymomr. Galili thofm, Judia thofm, Jerusalem thofm Idumea thofm, Jodenthal mano mkuko tohyukm, yo Tair thofm, Saidon thofm. Nd nd kmim nia bugamom Jisasr namo nefm wanyhato. Duka memom, “Nom tu nomn yihato hti hikrahnom.” ⁹ Jisasr nd bro yima rifhur htihato turhu disaiperl kfo memorm, “Mmbrt bi brbo ania hnetwat. Nda yonmari yima rifhur yakaknerhotma finji yirhoya?” ¹⁰ Bok yimam yak marnyamotrm btn wom womt nd dbohnetm furyakni furyakni memom, “Brbo yihato Jisasr myak

* ^{2:24:} Wahti Matyu 15.12 yorhwa kfo nuhasyuk mrokfot.

tiwonruhatnom dbohnefm marnyanirahm.” ¹¹ Nd kmi yarhetm o tek yarh fknayet yimam Jisasr htimoahat be taunihany taunihany fnahnimoum. Mrokforpat tu tany memoum, “Ni tu Bro Nkifrarhu Yone.”

¹² Tu Jisasr kfo memourm, “Mirahko nanhu yufat yima rifiy buharn ayutanomt.”

*Jisasr yakmo barkof 12-pela aposerm
(Matyu 10.1-4; Luk 6.12-16)*

¹³ Jisasr yura kminysofko muhmorn naku yakmorm nd tur yak yibonmo yimam. Nakumotrm yimom. ¹⁴ Yimotm 12-pelakfot fakmor rorhu sioskfothu kasinya htfasyuk aposerm. Duka memor, “Nann tohnhorahma. Tkrurafrrhotanm yiruhann Bro Nkifrarhu mrokfot romn ptha nuhas habrirahmm kmi kmim.” ¹⁵ Yo memor, “Kmi yarh tek yarhroh yak thuyuk yafothat heruhanm.”

¹⁶ Nd ror yakmo 12-pela yimam: Saimonr (tfit rorn wom yufat hmbremorr Pitar), ¹⁷ yo Sebedirhu yon Jemsr yo nmem Jonr. Wom yufat tfit tu Jisasrn futamorf Boanesis. Yufathu yimbu yuhat, “Tohrhu Yonf.” ¹⁸ Yo Andrur, Filifr, Bartolomyur, ee Matyuri Tomasr. Yo womm Alfiusrhu yon Jemsri Tadiusr yo Selot patikfot tohmao yima Saimonr, ¹⁹ yo wurohr Judas Iskariotr. Tor nd Judas Iskariotrn Jisasr hndhnamorr.

*Kfo memom, “Jisasr fasoh tndhrhu bbukeftpno hingrnewur.”
(Matyu 12.22-32; Luk 11.14-23; 12.10)*

²⁰ Jisasr kunys fknenimor tfit bok met yindarim kunys yakknimotmt nhai nuwa yarmom rorhu disaipermpno. ²¹ Be turhu mmemti nmemrom inji wanyhato memom. “Bi bok yimam yak hamumaknitatmr bi ka mfhat mmrifwot.” Ndnatn memom, “Arim htiyaknomr.”

²² Nd Bro Nkifra boririfhuthu tisam Jerusalemko wutoh tanyhato niamom. Niahato Jisasr kfo wok memomr, “Jisasr tndh Belsebur tohworr. Jisasr nd neft nihat yarhroh bro tohak Belseburrhu bbukeftpno kak thuworm kmi yarhm.”

²³ Jisasr inji wanyhato nakuyakmorm. Nakuyakhato kfo nhombra memorm, “Tndh yarh Satanr sinyahato wom yarhm yak thuneft, be nhai wom yarhm tohruhatm. ²⁴ Rpa kantrikfot tohyuk yimam buha nayak mkuhato rim toh mtohhato nnakni-neft, be nd kantrikfot yohniraht. Nhai wom yimam tohruhatmt. ²⁵ Yo rpa kunys tohyuk yimam nhaf inji. Tum nayak mkuhato nnayurneft, be nhai wom yimar tohruhatr. Be tum naye dborha nohhato yima duha tkitm rhurahm. ²⁶ Satanr nhaf to inji buga. Satanr sinyahato wom yarhm yak thuneft, be nhai wom yarhm tohruhatm. Bi be.

²⁷ Nhai wom yimar wom nanyjar nngrajohet yimarhu kunys fknenihato yimar rhuhany rorhu kunys rhuyuk wuskam myaknihekfot. Afo nd kuni sikatr tir wuram kisahato ee btn rorhu kunyshu rhuyuk wuskam yaknikfot.

²⁸ Kfo mifwanko. Bro Nkifrar duka mmorahrm yimam nayuk fasoh fasoh nefm yo tamoh mrokfo bebm tng pthayukm. ²⁹ To fitoh yimar na Bro Nkifrarhu Yafothathu bbukeftpno hingrneta kfo famur, ‘Fasoh tndhrhu bbukeftpno hingrnewur,’ nd yimar nhai tfit kfo gbuhruhatrt, be Bro Nkifrar nhai duka mmoruhatrm nd yimar kfoyuk tngt. Nhai. Duka hatohrahrt.” Jisasr inji kfo nuhas bonuhasmorm. ³⁰ Tumn Jisasr kfo memomr, “Fasoh tndhr korhworr,” ndnetrn nd mrokfot kfo nuhasmorm.

*Jisasru mmemmi nmemrom
(Matyu 12.46-50; Luk 8.19-21)*

³¹ Nd yihar Jisasru mmemti nmem najohfit niamomn, Jisasr ror yiro kunys ruhetrn briahako tohhato kfo memom, “Jisasr afo afnahnar.” ³² Ror bok met yindarim rhu dbu hmbremomr. Kfo memomr, “Ninhu mmemti nmem najohfit tom niem. Niemn, kangm ahtinomn.”

³³ Jisasr wanyhato kfo memorm, “Frohmn nanhu mmemroyem? Frohmn nanhu nmemroyem?” ³⁴ Nd ror rhu dbu habriyuk yimam yukatohhato kfo memor, “Asom ar yorhwam tom nanhu mmemromi nanhu nmemrom. ³⁵ Yimam Bro Nkifrarhu dukefr dukahato yak hikwam, tom nanhu mmemrom, mndaremrom, nmemrom.”

*Yewuri tpim dborhiwa tkitm**(Matyu 13.1-9; Luk 8.4-8)*

¹ Jisasr tfit Galili bari thmbt yihato met yindarim yak nhafohhato mrokfom kfo nuhas bonuhasmorm. Bok yima rishur rifiyinmotr be Jisasr htihato tek barit hiryuk mmbrtm mirhuhato to be met yindarim bari thmbtn rhuhato wany yakitohmoumr ror nd mmbrtm rhuhato pthamoahat. ² Boknambok mrokfom be kfo nhombramourm. Kfo memorm,

³ “Wawanyko. Wom yimar mswirt hingrnahato wit tpim yaknihato thu brur htfasmorm. ⁴ Yihota tafont misuhuykm nungam yihato tout buganimomm. ⁵ Wom tpim misuh hanymoum tahi sikut tkitmn. Bbpam be htfapamn nd yewuri tpim yudbat dborhahato sinyamom. ⁶ Tfit marr tahato tahi sikthu kkah nadbofnfrpno nd yewuri fanroh nembfam fftahato nohmom. ⁷ Womm hig suhmpno misuh hanyukm rpat hig tofmpno sinyahato kihawot hmbriyafmotmm nhai yukha hirrmom. ⁸ Nd tu hifa dborioh bbinysoft misuh hany-yukm romn tu hifa sinya marnya-momn yukha hir trukmom, womm 30 dmetm, womm 60 dmetm, womm 100 dmetm.”

⁹ Kfo memorm, “Yimbhindangeteko, ndar na kfiwa mrokfot wanyfot.”

*Jisasr kfomo kfo nhombra mrokforoh yimbu yuham**(Matyu 13.10-17; Luk 8.9-10)*

¹⁰ Kto Jisasr turpar rhu hasetrn turhu disaipermi wom yimam rorpno tohmoam niahato nd ror pthamoah kfo nhombramoa mrokforoh mrokfo yimbu yuham ttiwon hikmomr. ¹¹ Kfo memorm, “Wanukko, yafuna mrokforoh yakyuk dukefr bi nikomm hemor. Bro Nkifrarhu kingdomkfothu kafrohet mrokfom be kfo nhombra kanjo ptharahm o mrokfom be yura yafunarahm, nikomm dukefm bi yakrahkomm. Nd Bro Nkifrarhu yinhit toh duha yima furam be kfo nhombra mrokforpam wanukm. ¹² Ndnett nyingam yukatoh hakurahm, to nhai wom tamohm htiruhatm. Yo mrokfom, wanyrahm, wanyrahm, to nhai wom dukefm yakruhatm. Nhai. Tumn htihato mrokfem wany tungnemn, ee ka ndnatn yima yuhum yak krekutruhamm Bro Nkifrar rroh fasoh nefm yak thuhirahrm.”

*Yewuri tpiroh kfo nhombra mrokfothu yimbu yuhat**(Matyu 13.18-23; Luk 8.11-15)*

¹³ Jisasr kfo memorm, “Ka nd kfo nhombra mrokfothu yimbu yuhat ka nhai yakkahkom? Kane finji kforhota nd kfo nhombra mrokforoh yimbu yuham yakruhakomm? ¹⁴ Nd yewuri tpiroh yimbu yuhat inji korht: nd yewuri tpi truf hanymo yimar, Bro Nkifrarhu mrokfom hta hanymor. ¹⁵ Nd yewuri tpim yihotat misuhhato nungam nia yamom, ndm yimam Bro Nkifrarhu mrokfom yakhato tfit Satanr niahato yimaroh yima yuhum rhuyuk hifa dborioh mrokfom nia yak thuwa nmbuhat kfo nhombramoya. ¹⁶ Yo nd tahi sikm misuhhato sinya duha yewuri tpim, ndm kfo nhombramoya yimam afo barkofpam hifa yindhor nmbuhatpno yudbat Bro Nkifrarhu mrokfot mhik tefi yaknitmt, ¹⁷ tfit tamoh krhopam kekwomm, to be bmbri thu trohwomt Bro Nkifrarhu mrokfot. ¹⁸ Yo nd yewuri tpim hig suhmn misuhwam, ndm kfomot, yimam afo Bro Nkifrarhu mrokfot kekwomt. ¹⁹ Mrokfot yekwamn, tfit ndar bbinysoftu dukefm kak wunefiwumt Bro Nkifrarhu mrokfeft. Womm tum hatohyuk krho nmbu-hampno duka krho hasiwum. Womm maruharo dukefrpampno korh hasiwum. Womm hifa rhu nmbuharhu yaknefrpatn duka hasiwum. Nd nd dukefmn thu nhombranitatmm, Bro Nkifrarhu mrokfeft myafho thunitmt. ²⁰ Wom yimarpam nd yewuri tpim hifa bbinysoft misuhhato yukha hirmo kanjo rom mrokfefm yak marnyewamm yima yuhum htewamm yukha hirwom, womm 30 dmetm, womm 60 dmetm, womm 100 dmetm.”

*Yiro yak kafknayet lamthu mrokfot**(Luk 8.16-18)*

²¹ Jisasr tfit wom ttiwon mrokfot htamort. Kfo ttiwon memorm, “Niko lamm hta thombat ka yiro rohmn kafknitkomm? O womnam yiro hwe tik rfashitn hta hamongwokomm? Ka nhai. Lamm buha dany yuhamn htewukomm. ²² Nd kfo nhombra mrokfothu yimbu yuhat inji kfifut. Bro Nkifrar, rorhu kfo kafrohet mrokfeft kto be tafontn yak htarahrt. Nd tamoh tamohm Bro Nkifrar yak wuna bowuna hasiwam, kto be tafontn yak htaruhatrm yimam htirahmm. ²³ Yimbhindangeteko, ndar na kfifa mrokfot wanykfot.

²⁴ Niko wanyuk mrokfefm wany hik marnyakfot. Womm finji finji kahuknm, tawo inji hirahmn. Womm he hmarsirahn, tawo Bro Nkifrarko he hmarsirahrn. ²⁵ Frohr mrokfom wanyhato yima yuhurn hmbri hterm, nd yimar Bro Nkifrar tfit thu hmbrihirahrr. Nd yimar mrokfom wanyhato nhai yima yuhur htarform, nd tefi dukefenr rorhu yima yuhur rhuyukr tfit tu Bro Nkifrarn yak thurahrr.”

Yewuri fanthu sinya nmbuhathu kfo nhombra mrokfot

²⁶ Yo tfit wom mrokfot kfo memor, “Bro Nkifrarhu kingdomfot inji korht: Wom yimar yewuri tpim trufworm. ²⁷ Nd yewuri tpi trufuk yimar, ror nd yifung marm hwita fijo rom nd yewuri tpim be turoh fijo dborhanihato sinyewum. Nhai tawisafkahr rom sinyewa nmbuhat. ²⁸ Be nd tu bbinysoftn thu warhewattm yukha hirwom. Sinyewohat afo dborhanitam ee tuwa rfetm rhunihato ee tfa totwamn yukhetm korhm. ²⁹ Yukha hirnihato bi yak yibon yihayer, ee kekworm.”

Mastet tpiyenru kfo nhombra mrokfot

(Matyu 13.31-32,34; Luk 13.18-19)

³⁰ Jisasr tfit wom kfo nhombra mrokfot kfo memor, “Bro Nkifrarhu kingdomfot finji akfo nhombrayant? Tamohmn akfo nhombraya? ³¹ Bro Nkifrarhu kingdomfot kangme tefi mastet tpiyenrn yimar yaknihato turhu mswirtu nuherr. Mastet tpiyenr kangme sayor tpiroh tefi tpiyener. ³² Nd mastet tpiyenr frdorhahato yonmari bufum korhm. Kto tkit tkirh nungam ndha niahato wuswom.”

³³ Jisasr bok mrokfefm Bro Nkifrarhum miyukhamn, mimn, tamohmn kfo nhombramourm. Memour, “Akfo nhombrakahta yimam wany duka tungunarahm.” ³⁴ Nhai be tu mrokfo yimbu yuham kfo hik nuhasrmoarm met yindarim. Nhai. Be kfo nhombra mrokfomn rim kfota mkfotamourm. Turhu disaipermpno ee tu mrokfo mna yuham kfo nuhasmourm.

Jisasr kfohato wifort minoh hmbremo yuhat

(Matyu 8.23-27; Luk 8.22-25)

³⁵ Nd yiharhu tu wuroh krifn Jisasr turhu disaipermpno kfo memor, “Barenko, na kanga tek barit ahir tmbhonikahnomn, mkuko ainyom.” ³⁶ Be nd mmbrt, bi nd tur rhumot, mikmbremomn hahir hayukmomr. Nd yonmari yima rifhur tuha htanyhato yimom. Wom mmbrm rom rpat hir hayukmom. ³⁷ Hir hanymomn buha dany yuhatn bro wifort sinyamot. Nd wifort sinyahato bi fak mndhu hanymotm. Bi bus tas finjo hanymott mmbrt. ³⁸ Jisasr mmbrthu yifhikorn yak tuhtanimorn hwemor. Nd wifortpno yihom yak thohato kfo memomr, “O Tisaye, wasinya. Nom bi wifort kak mndhutwotnom. Nine ka nhai yanhhokahn?”

³⁹ Jisasr wasinyahato nd wifort be tnge kfo memort, “Be tmifn, wateh tmbho.” Be inji kfomotnd wifort teh tmbhohato tek barit nhai wom natonrmot. ⁴⁰ Jisasr nd turhu disaipermpno kfo memor, “Tamohmpno yakmitako? Nhai duka mekahko, ‘Rorpno kitwonom. Aduka yanhowahnom?’ ”

⁴¹ Rom inji wany yanhhohato kfo memom, “Ndarr tamohtet yimarn wiforti burifhut wany yakiohato minoh hmbrif?”

Jisasr yak marnyamo kmi yarh fknayet yimar

(Matyu 8.28-34; Luk 8.26-39)

¹ Hir hanymomn manoh mkuko rim dbkafmom. Gerasaroh tohyuk mkukorn rim dbkafmom. ² Rim dbkafnihato Jisasr yuhre witani hanymor asha wom kmi yarh fknayet yimar yima yopko toh tany niamorn Jisasr mhtimor. ³ Nd kmi yarh fknayet yimar be inji yima gum htamoah tahi bakuny mkumn hweta htfasmour. Yimam nhombratitamoum yakitohtaneft o sene kibokisaneft. ⁴ Bok yiham hankafe, yo sene, tir wuram kisi, tu be nhai mif. Kimoumr, tfit tur wabbuka sinyahato frdbombhonimourm. Nhai rorhu yimaroh yakkfot. ⁵ Yifung marm to be yima gum htamoah tahi bakuny mkumn yo yura kmi yihofmn toh hasomour. Btn tur mumakhato tau hifa bohifamour yo tahim yakhato nde tur puk finy bofinymour.

⁶ Yau hnehato bi wuri tohhato Jisasr htimorr. Htihato be toniyakni twanhomorn Jisasrhu wurampno msuhmor. ⁷ Msuhhato mtau ssiyakni memor, "Jisase, tu yura myorhekwa Bro Nkifrarhu yone, ni finji newuna? Bro Nkifrarhu yufatpno mirahn krho nmbuhah ahiyanrr." ⁸ Jisasr bi kfo twanhomor nd yimar thu hammoma kmi yarhrhu htanyeft nd yimar. Ndnetrn nd mrokfot kfomort.

⁹ Jisasr kfo memor, "Ninhu yufat wayutant." Nd yarhr kfo memor, "Nom rifuhetnom tohwonomr ndar yimar. Ndnatn nanhu yufat, Rifuhetr." ¹⁰ Nd yarh fknayet yimar mkfo ttiwon rafak hany memouur, "Mirahn ayak tuhafkahtanm nndo wom wuri tkittn ain."

¹¹ Wom kmi yorgenrn foh rifhum ke wussohmoum. ¹² Nd kmi yarhm Jisasr naku memomr, "Wakfo tkrurafkahtnnom nd fohmn tfit fknirahnom." ¹³ Be Jisasr kfomotr nd yimar hatohmo kmi yarhm thu troh tanymomrn tfit fohmn fknenimom. Be fohmn fknenihato thu hafunanimotmm, nd fohm kmi kihahir yuhat mitarhotnihato tek baritn mitayif wurasoh bugamom. Nd mitayifmo fohm 2,000 fohm mitayifmom.

¹⁴ Nd fohm hatohmo yimam inji htihato be tonayefrpar yakhato taunthu yimam kfo nuhas bonuhashato kmi kmi kfo nuhas fnahomm rom htimo nefm. Bok yimam inji wanyhato memom, "Ai ahtinom nd neft." ¹⁵ Jisasrpno nd yimar kmi yarh htanyetr htimomr rmonthat tabhutahato tu hifa yima yuhu dukefrpno rhu hasetrn. Rom be inji mthihato be duka yanuhefrpno tohmom. ¹⁶ Jisasr nd kmi yarh fknayet yimar yak marnyamohat tuha tohyuk yimam hti hikmomr. Romn nd niayuk yimam kfo nuhas bonuhas hikmomk kmi yarhm nd yimar thu troh tanyhato tfit fohm fknihato tek mitayif wurasohmohat.

¹⁷ Kmi thofm nd neft htihato Jisasr kfo memomr, "Ni be tmifn ndar kmit wahn-tanykahnt, wain." ¹⁸ Jisasr tfit mmbrtn mikmbrehato memor, aiya. Nd Jisasr kmi yarh yak thumo yimar tfit Jisasrpno yihato kfo memor, "Na kanga ahik hneyann."

¹⁹ Jisasr wanyhato kfo rafo tany memor, "Tuha kmitn warhu hasokahnn tunhu yimatm wakfo nuhastwanm ni Bror yuhuwafhato yak marnyamo yuhat."

²⁰ Be nd yimar inji wany yakiohato nd distrikthu 10-pela kmim yi habrimorn kfo nuhas bonuhasmorm Jisasr yak marnyamo nmbuhah. Bok met yindarim ror Jisasr yak marnyamo yuhat wanyhato be tu bok dukefm fakmom.

Jisasr Jairusrhu yonti yo dbottet mett yak marnyamo yuhat
(Matyu 9.18-26; Luk 8.40-56)

²¹ Jisasr tfit mmbrtn mikmbrenihato barit hir hayuknihato tfit mano mkuko yimor. Rim dbkaf hanymor yonmari yima rifhur nia rifiny hmbriyaknamomr. Be Jisasr tuha bari thmbtn tohmor. ²² Judaroh rhu rifinyuk rmonthu wom tohukatoh yimar, rorhu yufat Jairusr, niamor. Niamorn Jisasr mthihato rorhu wurampno mtabokmemor. ²³ Mtabokmehato kfo memor, "Nanhu yont noh wururifhut kekwott. Wania tir wah-takahtnt marnyaniraht."

²⁴ Be Jisasr wanyhato hik hanymorr. Rof yimohat bok met yindari rifhur hik hanymomrn be nahuta yaborr hanymom.

²⁵ Nd yima rifiny buharn wom dbottet mett rpat fau hanymom. Nd dbotteft 12-pela gunyjimm hatohmott. ²⁶ Yonmari marut be nd rothu dbotteftthu htiyuk hunkotharoh wiknanefpno tubatu witamott. Memout, "Ka hunkothamn htihato nd dbotteft yak raforahma," to nhai, nd dbotteft nhai teh tmbhakrmoot. ²⁷ Nd mett Jisasr hingrnamoa

bbukeft bi wanyettn to be Jisasrhu mongko yauyaknimotn Jisasrhu sakethat mtayoutimott. ²⁸ Rothu dukeft duka memot, “Rorhu hmbreshat be mtayoutiruha be nd dbotteft teh tmbhakraht.” Ndhtet dukeftpno mtayoutimotr.

²⁹ Be nd dukeftpno mtayoutimohat be yudbat nd dbotteft teh tmbhakmott. Tut yironamot nd dbotteft teh tmbhakmohat. ³⁰ Nd mett inji namohat tu Jisasr tfit yironamor rorhu yima yak marnyayuk yafothar nd mett yak marnyamohat. Yironahfato tfit kekutnihato nd yima rishur ttiwon memorm, “Frohr nanhu hmbreshat tayoutirt?”

³¹ Turhu disaiperm kfo memomr, “Wahti bok met yindarim tip tip newamn mtayoutini hanitmn. Tfit tamohmpno kfo yamuka frohr mtayoutira?”

³² Jisasr nd met yindarim hti nhombra memor, “Afo htiyanko frohrn tayoutira.” ³³ Be nd dbottet mett bi Jisasr inji kukatoh habriwore, rot tfit duka fanhomot. Duka memot, “To finji wom finji kafrohruhoya? Bi htitawora.” Be yudbat Jisasrpno rim tabokmehato kfo nuhas bugamotr rothu yak marnyamo yuhat. ³⁴ Ptha nuhasmotr Jisasr kfo memort, “O ar yone, nd ninhu dbotteft, nd hatoh hnamot, duka famu, ‘Ror rimaktirhota, be nd dbotteft teh tmbhakraht.’ Ndnettn ninhu dukef yuhatn nd dbotteft teh tmbhektn. Be hifa yindhor yima yuhurpno waikahnn, watohtwa. Ninhu krho nmbuhat bi fak tuhant.”

³⁵ Jisasr ptha hasetrn Jairusrhu kunyshom toni hnehato Jairusr yihom kfo kangmr, “Mirahn Bror ahany furayanr kunykort. Ninhu yont bi mfaknit.”

³⁶ Jisasr rom pthayuk mrokfom wany marsisahato Jairusr kfo memor, “Ni mirahn awany yanhoya. Ninhu bro dukefr be duka mekfot, ‘Nanhu yont tfit myenyjworaht.’”

³⁷ Be nd met yindari rishur ndhar kfo rafo tanymorm rorhu hikneft. Pitari Jemsre Jonr, Jemsrhu habhir, romrpam husfirparpat kfaknimor. ³⁸ Nd Jairusrhu kunys mwanyaknimot yimam nur hasomohat. ³⁹ Jisasr kunys fknenihato rim kfo memorm, “Tamohmpno nurwako? Nd yont nhai nohrfot, be hwitwot!”

⁴⁰ Jisasr inji kfomotr haningemomr. Nd nur kunys rhuyuk yimam yak tuhafhato fnah buganimotm, nd yonthu yifammafi turhu husfirpa disaiperm yaknitarm yimom nd yont rhumo rumtn. ⁴¹ Rim fnahnihato nd yonthu tirenr wayekwart kfo kangrt, “Talita kumi.” (Nd mrokfothu yimbu yuhat, “Metene, na kfiwann wasinya.”)

⁴²⁻⁴³ Be nd metent inji kfomotrt yudbat wasinyamotn ufaufaumot. Yonthu yifammaf inji htihato be tuha yafotha duhatf tohmof. Jisasr kfo memor, “You! Mirahfn akfo nuhas mif mifnomm nda nifnhu yont myenyjwi yuhat.” Nd yonenthu gunyjimm 12-pelakfot. Inji kfonihato kfo memorm, “Nuwa wayak wahefnt.”

6

Nasaret thofm Jisasr mong trohmo yuhat

(Matyu 13.53-58; Luk 4.16-30)

¹ Jisasr nd ror tohmo tkitt htanyhato tfit yimor turhu kmitn. Turhu disaiperm rpat yimom. ² Turhu kmitn yihato rhu krna Sabat yiharn yimor Judaroh rhu rifinyuk rmontn. Yihato Bro Nkifrarhu mrokfefm kfo nuhas bonuhasmorm. Bok met yindarim rorhu mrokfefm wanyhato tuha mrokfo duhatn rhumom. Duka memom, “Nd yimare fitha nd bbukeft yakhato ndhtet nefm niwarm? Yo ndhtet dukefme fitha yakmorm? Nd ror hingrnewa mirakerkfome tamohtet tongr thu kihwatrr mhingrnwiwarm? ³ Nd yimar to wom kamdarhu yoner. Nd yimar to Mariathu yoner. Jemsr, Josefr, Judasr, Saimonr, tom rorhu nmemrom. Rorhu mndaremrom asom asha korhm.” Ndhtet dukefmpno nhai marimom, “Jisasr rihtirahnomr.” Nhai. Mong troh bugamomr.

⁴ Jisasr inji wanyhato kfo memorm, “Bro Nkifrarhu profetrhu yufat bi kmi kmim rhu htfaswot. Turhu kmiti turhu yorgre turhu kuny shofm, rompno nhai yufapa duhater.”

⁵ Be nd dukeftpno nhai turhu kmit tamohtet mirakerkfom hingrnarmotr htirmomm. Be inji rpa rpa dbohnet yimarpam tirt htahato fak marnyanimorm. ⁶ Duka memor, “Tamohmpno nd yimam nhai wany yakiokahmm nanhu mrokfom?” Inji dukahato yimorn Bro Nkifrarhu mrokfom ptha nuhas habrimor.

Jisasr hatohma bbukeft yak nuhasmotrt kmi thofm htimomt. To nd turhu disaiperm nhai htihato duka tungunefr yakrmom.

(*Sapta 6.7-8.21*)

*Jisasr 12-pela aposerroh hingrna yuham kfo hta bohta nuhasmo yuhat
(Matyu 10.5-15; Luk 9.1-6)*

⁷ Jisasr turhu disaiperm yak nhafohmormn tfit hus hus fak nhtamorm. Hus hus yak nhtamormn tek yarh kmi yarh yak thuyuk yafothar hiyaf hanymorm. Nd yafothar henyihato kfo tkurraf memorm, ⁸ “Niko yinyeft kio musrpam yakitohakkfot. Mirahko nuwa nakupam, hmbre wus yohm, maruhom, nd ndm ayakitohaknom. Be inji sfno yikfot. ⁹ Su wuraroh hmbrenineft rot nhai mrokfom. Hus yagr thaifu hmbrenineftne nhai. ¹⁰ Yihato wom kmit fak miyekmko, kunys fahumko, be nd kunyrapat toh tanyhato tfit sinyani yikfot. ¹¹ O wom kmit o taunt yihato nhai kunym yakmiyahato niko hanyuk mrokfom nhai yindhorkahm wanyneft, nd kmit htanyhato fus wuram tuha nd kmitn frdbofta tanyhato htanykfot. Inji naruhatk, ndt htiruhamn, mirahm, ‘O nom yakmiyah duha yitnomm inji nem.’”

¹² Be nd Jisasrhu disaiperm yimomn Bro Nkifrarhu mrokfot kfo nuhashato kfo memomm, “Nikmoh fasoh nefm mong trohkfot.” ¹³ Nd kmiroh bok kmi yarh fknayet yimam fak marnya bomarnyamomm. Yo nd wom dbohnet yimam, be nd kahpaye htamoatrm marnyanimoum.

*Jon Baftaisrhu noh yuhat
(Matyu 14.1-12; Luk 9.7-9)*

¹⁴ Nd Jisasr namoa nefm nhai wom rpa kmirpat wanyrmomt. Bi kmim rhu fnahmott king Herotr wanymort. Womm Jisasr namoa nefm wanyhato duka memooum, “Ka Jon Baftaisr minohakhato tfit sinyamorn ndhet nefm newurm.”

¹⁵ Womm duka memooum, “Ka Iraijayer.”

Yo womm duka memooum, “Ka bingot tohmo wom profeter.” Be turoh yima yuhunn inji inji fak nhtamoum.

¹⁶ King Herotr Jisasr namoa nefm wanyhato kfo memor, “Nd yimare, Jon Baftaiser. Nd yimar to bi na mfhat tmbhomohat, to bi tor, bi tfit sinyamor.” ¹⁷⁻¹⁸ To bingot Herotr wom nmem Filifru tuhan Herodias yak hutfakmohat, Jonrn kfo memor, “Ndhet neft nhai tu dboriorh neft narmo. Nkifra thfa mntwat kfo kangt, ‘Mirahn womrhu mett ayak hutfayanr.’” Inji kfomotrr, wom yimam kfo tkurrafmotrm Jon Baftaisr fakmomr. Yakhato kalabus htamomr.

¹⁹ Herodias Jonrhu mrokfot wanyhato wanyhato namburhato memout, “Jonr awasanr.” To nhai, ²⁰ Herotr Jonrhu wasneft mfanuhakmour. Duka memoour, “Jonr tu dboriorh yimayer, Bro Nkifrarko kukatohworr.” Ndnetrn Jonrhu toh nmbuhom Herotrhu mofsinhitn tohmour. Jonrhu pthayuk tamoh tamoh mrokfefm Herotr nhai hamuh tfafrmoarm. Nhai. Be rorhu yima yuhur mrokfefm wanyhato krhomouurr. To nd yima yuhur krhomohat nhai marimoar, “Jonrhu mrokfefm nhai tfit wanyrhotanm.” Nhai. Jonr pthayuk tamoh tamoh mrokfefm wany yahitohmouurr.

²¹ Bok yihotam Herodias nhombrati hnamotn ee wanymot Herotrhu betdekfothu bro yemro burwathu hta yuhat. Rot nd mrokfot wanyhato kfo memot, “Hifa, ka na nd yiharn fura mrom yakruha.” Betde yiharn bro yemro burwat htamortn bok yimam nakumorm. Nd turpno gafman hingrneft hingrnanhoyukm, yo nd turhu amikofthu bro yimam, yo Galilikorhof bro yimam naku bugamorm. ²² Nia rifinymotm Herodiashu yon mett fnahnihato nd bro yufet yimam rhumo tkittn yi grhamot. Nd rhuyuk bro yimam htihato masat yindhormom. King Herotr htihato kfo memort, “Nom hifa hti yindhorwonomn. Kangn tamoh ayaka, wakfokahtn yakhiruhann. ²³ Na kfo mif mifwann, tamohm ttiwonrahna be he mifruhann. Kangn, na tohukatohwa yima rifhur niyak nhtahato kangn, wom rifuhetr atohukatoha, na nhai mrokfom. Na to finji kforuhoya?”

²⁴ Be nd met tmaht yitatn mmemt rim ttiwonwott. Kangtt, “Na Herotr inji inji ttiwonra. Ndnatn kanga attiwonanne ni finji dukewa? Tamohmn akfoya?”

Mmemt kfo kangtt, “Jon Baftaisrhu mfhathu yakneft wakfotwa.”

²⁵ Be inji wanyhato yimotn kingrpno rim kfo memot, “Na kanga asomif mif Jon Baftaisrhu mfhathu watmbhakkahnw wom plettn wakmbrehiyafona.”

²⁶ Be wom kingr wanyhato be tuha mrokfo duhatr rhumor. Bi bro mrokfot kfo memort, “Tamoh tamohm ttiwonwona na nhai kfo wokrhottann hanyeft. Be he mif mifruhann.” Bi inji kfetrn to be rot Jonrhu mfhathu tmbhakhato hiyafneft kfomohat nhai tfit wom kfo wokrmort. Ror nd yontpno napthamohat nd rhuyuk bro yimam bi wanymomr ror nd pthamohat. To be ndnatn nhai tfit ror wom kfo wokkfot. ²⁷ Be yudbat kingr wom soldier kfo tkrurafmotrr yimor Jonrhu mfhathu tmbhakt. kalabusm tohmao kunys yimorn Jonrhu mfhath yihom tmbhakmorr. ²⁸ Mfhath tmbhohato plettn kmbriyaknehato nd met tmahtn mhemo. Nd met tmaht nd yima mfhath yaknihato mmemtn rim hemot. ²⁹ Jonrhu uhik ahik htfasmoa yimam rorhu mfhathu pukni mrokfeft wanyhato kalabus kunysn yimomn rorhu tfmbt rimakmomtn hany fopmomt.

Jisasr 5,000 yimam yeshri hemo yuhat

(Matyu 14.13-21; Luk 9.10-17; Jon 6.1-14)

³⁰ Nd rorhu sioskfothu kasinya htfasyuk aposerm tfit Jisasrpno niahato mkfo nuhas bonuhasmomr rom namo nefm yo rom ptha htfasmo mrokfem. ³¹ Bok yimam yi rifiny hatohmoatmm nhai nuwa ya inji narmom. Be ndnatn Jisasr kfo memorm, “Na kamuka wom turpat tkittn aikahnomn rhu wita inji narhko.” ³² Be mmbrt yaknimomn turpatm wom turpat tkittn yimom.

³³ Bok yimam tohhato hti hikaf hanymomm rom hir hanymohat. Hti hikaf hany memom, “Tom bi ndko kitwom mhtirahnomm.” Be tonayef-rpar yakhato be nd ror yiyuk tkittn mtob hasomom. ³⁴ Jisasrom mtadbkafmomn nd yonmari yima rifhur mhtihato yuhuwafmorm. Mhti yuhuwafhato duka memor, “Ar yimam sifsifm yima tohukatoh duha kanjo be inji hutraf tto habrisewum.” Be nd yima rifhur yak nhafotamorm mrokfom hemorm. ³⁵ Jisasrhu disaiperm marr htiyaf hanyhato Jisasr mkfo memomr, “Marr bi yohnitr, ndart yima toh duha wom tkit furayet. ³⁶ Ndar rifinywa yimam wakfo tkrurafkahtnm anatubatunikhmn tumn yeshrim awikna htfaskahmn aye bmtam.”

³⁷ Jisasr tfit kfo memorm, “To nikomn yeshri wahekomm.”

Tfit rom kfo memomr, “Kangne 200 kinakfot yaknihato bretpam awikna hanyomm?”

³⁸ Jisasr tfit ttiwon memorm, “Niko finji bret nuwami harhuwako? Afo wahti nhtakomm.”

Rom yihato hti nhtamomm kfo memomr, “Nom tirfa bret nuwami hus yiraf, injirpa harhuwonon.”

³⁹ Kfo memorm, “Nd yima bugam briaha hifa kipr suhtn hofhet hofhet arhu nhom-bratwam.” ⁴⁰ Be rom hofhet hofhet rhu hanymom, wom hofhet 100 yimam yo tfit wom hofhet 50 yimam. Be inji inji rhu hanymom. ⁴¹ Be nd tirfa bret nuwami hus yiraf yaknimormn yura mount wuyukatohhato kfo bruttnamor. Kfo bruttnaninhato turhu disaiperm yak tifakhany hiyaf hanyhato kfo memorm, “Wahe nhombra htfas hanykomm.” Yo nd hus yiraf be nd rpahtet neft namorf. ⁴² Nd he hanymo yeshrt nd yonmari yima rifhur yihany yi hanymomn, yatim furkihomm. ⁴³ Yatim furkihomm, be nd yesmbhehm yak nhafohhato tfit 12-pela kpnn hmbre nhafohmomm. ⁴⁴ Nd bret nuwa yamo yimam, 5,000 yimam famomm. Nd thomnafat yindarirparohet.

Jisasr yura tek yuhat yau hanymo yuhathu mrokfot

(Matyu 14.22-23; Jon 6.15-21)

⁴⁵ Be Jisasr yudbat turhu disaiperm kfo tkrur memorm, “Niko bi mmbrt wayaknikahkmn Betsaidako wahir hayukni hanyko. Na afo met yindarim yak kafho tanyruha.” ⁴⁶ Be inji kfafhato turpar kminysoft muhmr kfo bruttnaneft. ⁴⁷ Kriftamott nd mmbrt hir hanukm tek bari dany yuhathn hirmom. Jisasr turpetr yura kminysoft

tohmor. ⁴⁸ Hir hanyetm htimorm wifortn frmmomoattm yanygoneft fanygo titamoum. Nhombrati nhombrati tu wuroh ksfutn Jisasm yura tek bupamn mitohhato fau hanymor. Duka memor “Yau hagrotniruham.” ⁴⁹ Nd mmbrt rhuyuk yimam Jisasm yura tek bupamn yau hnatomr htiyakhato duka memom, “Ndarr ka tek yarhr niewur.” Be yakrmiyakhato tuha fengr fengrt tohmot. ⁵⁰ Nd yimam tuha nhai wom yafothetm rhurmom.

Jisasm htihato kfo memorm, “Watoh bmtako. Naya. Ayakrmiwahko.” ⁵¹ Be inji kfonihato rroh mmbrt mikmbrehato buwiform teh tmbhakmom. Nd mmbrt rhuyukm ndt htihato be tuha mifoh rhanimom. Nhais womr ptharmor. ⁵² Ndt to nhai be sfno. Nd yimam Jisasm bret nuwam yak yurhmo yuhat rom nhai hti marimom, “Jisasm tu Bro Nkifrarhu bbukeft yorhwattr kak yuhrworm yeshrim.” Nhais ndhtet dukefr rhurmorm. Ndnettnd yimam Jisasm yura tek bupamn yau hnentr htiyakmohat yafotha duhatm rhumom.

*Jisasm Genesarethu bok dbohnet yimam yak marnyamo yuhat
(Matyu 14.34-36)*

⁵³ Tek barit hir hayuknimomn Genesaret mkuko rim dbkafhato mmbrt ttafmomt. ⁵⁴ Mmbrt ttaftany rim suhnimohat nd Genesarethu yimam Jisasm nhai hti mmormomr. Htihato memom, to tawom Jisaser. ⁵⁵ Be nd yimam inji hti nhta tanymomr nd brbo rhuyuk kmim ptha nuhas hanymomm Jisasmhu nia nmbuhat. Be nd brborhof kmim wanyhato nd dbohnet dbohnet yimam kroket kroketm hany hanymomm. ⁵⁶ Nd Jisasm yimoa kmim o fitoh fitoh tkitm, dbohnet yimam be hnamoamm bro rifiny swirl htatahato Jisas kfo ttiwonmoumr rorhu hmbresha psifrpattn dbohnet yimam tayoutihato marnyanineft. To nd dbohnet yimam inji namoahat yudbat marnyanimoum.

7

*Nkifra boririfhu yirmoht
(Matyu 15.1-9)*

¹ Wom Farisimi wom boririfhuthu tisam Jerusalemt bi htanyhato yi rifinymom Jisaspno. ² Yihato htimom Jisasmhu disaiperu nuwa yamohat nhai tir kifsanihato nuwa yarmom.*

³ Farisimi Juda bugam nkifra mrokfot yaktihetmn, nhai tir kifsarfom, to be nhai nuwa yakfot. ⁴ O maket yihato nhai mhta yukrfom, to be nhai nuwa yakfot. Boknabok nefm hikmoum. Yeshri hta mskamoahat roh, plet, tamoh tamohm afo kifsanihato ee hta mskamoum.

⁵ Ndnettnd nd Farisimi boririfhuthu tisam Jisasm kfo memomr, “Tamohmpno ninhu disaiperu nhai hik duha yitamt nkifra yirmoht? Tfit nkifra yirmoht riyak htefiwamt be ke fura bofurewum. Nhais tirm kifsafhato nuwa yekahm.”

⁶ Jisasm wanyhato kfo memorm, “Niko mikfo nhehta mkfo nhehtayet yimayeko! Bingot profet Aisaiar nikomn kfomor. Mrokfom wandfa memor, ‘Nd yimam be yura tngrpaye kfo yuta yindhorwoma.

Yiro yima yuhum nhai nanhu dukefmpno rhukahm.

Nndo wom dukefmpno korhm.

⁷ Be nd yima mifm bingot htamo boririfhut kfo nuhas htfaswannm kfo kangm, “Bro Nkifrarhu boririfuhet.”

Ndnettnd rom lotuta lotuyeft yafotha duhatet.” *Ais 29.13*

⁸ Jisasm nd profet Aisaiar kfongotmo mrokfot kfo nuhasnihato kfo memorm, “Niko ka bi tu Bro Nkifra mifrhu yirmoht bi mong trohwakomtn, bi nd yima mifroh boririfhu mrokfo furamn hikwoko.

* ^{7:2:} Nkifra mrokfot inji kfomout, “Yimar nuwa yaneft tirm afo kifsanihato ee btn nuwa yakfot.” Ndnettnd rom Bro Nkifrar yirmoht yaktihetmn inji htimohat namburmom.

⁹ Tukmoh nkifram kfo htanihemoo mrokfom yak hikwakomn Bro Nkifrarhu boririfhut nhai yak hik marnyakahkomt. Faso tfit kfo kekutwokomt. ¹⁰ Mosesrn yirmoh mrokfot kfo memor, ‘Ni yifammafh u yinhit rhuhato rofhu mrokfomn hikkfot,’ yo ‘Yimar turhu yifammaf kfo twewurf, nd yimar was hehur thukfot.’ ¹¹ Tfit nikomm kfo yirmoh kangko, ‘Wom yimar turhu yifammafpno wuskam kfo nuhastahihato tfit yifammaf kfo famurf, “Nifn kfo nuhasheyuk wuskam bi Bro Nkifrar htahemoya,” ¹² to be nd yimar mirahr tfit yifammaf adukakahann ayak marnyayanf.’ Niko inji kfo yirmohwoko. ¹³ Ndnettn tukmoh nkifram kfo htanihemoo yirmoh mrokfom yak hikwakomn Bro Nkifrarhu boririfhut nhai yak hik marnyakahkomt. Faso tfit kfo kekutwokomt. Tfit wom rpahtet fasoh fasoh nefmn kak hikwoko.”

*Yimaroh yima yuhum faso yak bebwu nefm
(Matyu 15.10-20)*

¹⁴ Tfit Jisasr nd met yindarim nakuyakhato kfo memorm, “Nantu mrokfefm wawany hik marnyatwa-komm. ¹⁵⁻¹⁶ Tamoh tamoh mur yemrom o hnaru yemrom tng yuhat yiyafoyukm, nhai ndmn Bro Nkifrar htihato kfo mikahr, ‘Ni bi fasoh yimaye.’ Nhai. Nd yiro yima yuhurio sinyahato newa fasoh nefm, ndmn Bro Nkifrar htihato kfo kangr, ‘Ni bi fasoh yimaye.’”†

¹⁷ Be Jisasr inji ptha tanyhato kunyko rim fnahnimor. Rim fnahnimot tfit turhu disaiper kfo memomr, “Tfit afo nd ni kfi mrokfothu yimbu yuhat wakfo hikkahtnt awanynom.” ¹⁸ Jisasr memorm, “Nikome ka nhai yima yuhu duhateko? Yima yuhetko arhuko, to yakrfokomm na pthayuk mrokfefm. Wawanyko! Nd tng yuhat yiyafoyuk yesht o wom tamohm, nhai ndmn Bro Nkifrar htihato kfo mikahr, ‘Ni bi fasoh yimaye.’ Nhai. ¹⁹ Nd yiyafoyuk yesht nhai yima yuhurn yikahm. Nhai. Nd yiyeifiwa yeshrim nyunguram yuhat yitamn ript yihom yorhwom. Ript yihom rhuhato kto tfit rikunys kitm.” Jisasr duka memor, “Tamoh tamoh yeshrim ye fura bofurayukem.” Ndnatn inji kfomorm.

²⁰ Tfit kfo memorm, “Nd yiro yima yuhurio sinyahato newa nefmn, ndmn Bro Nkifrar htihato kfo kangr, ‘Fasoh yimayer.’ ²¹ Nd na kfiwa yima yuhur sinyewa fasoh nefm, ndm inji korhm: nd fasoh fasoh dukefr, yaum kanjo met yindarim niwa nefm, rikohneft, yimar nambur sinyahato womr was furaneft, womrhu mettpno rim fnahneft, ²² yimarhu yima yuhur kangr tamoh tamoh wuskam, maruham nanrpayanuhem, nhai womm henyeft, nd nd fasoh nefm yima yuhur sinyewamn ni womn yak bebneft womr, kfo nhebehneft, tuhagrhhato yimtna duha na fura bofuriwa nefm, womrhu dborior wuskam o mett o tamoh htihato tfit ni womn duka bebneft womr, ‘O tamohmpno ror yekrt nd banuhah mett o shrt. Nann yakrfoyant.’ Ndhtet dukefm o womm faso faso harhu htfasneft, o yufa yurak htaneft, o duka marnya duha naknita nefm. ²³ Tom nd nd nefmn yiro yima yuhurnio sinyewamn Bro Nkifrar htihato kfo kangr, ‘Fasoh yimayer.’”

*Jisasr Fonisia efkothu yont yak marnyamo yuhat
(Matyu 15.21-28)*

²⁴ Be Jisasr nd kmit htanyhato tfit Tairko yimor. Yimorn wom kunys fknenihato ndha rhu kfafrohmr. Duka memor, “Rhu kfafrohrrota nd kmithu yimam nhai htirhotma.” To nhai, bi yimam yak switafetrn to be nhai tfit wom kfafrohkfot. ²⁵ Wom mett, rothu yont kmi yarhr fknemort. Jisasrhu nia nmbuhat wanyhato be ror rhumo kunysn yimotn Jisasrhu wurampno msuhmot. ²⁶ Nd mett, rot rmon mrokfo wany juha kantri Siria efkott. Rothu profins Fonisia. Rot yimotn Jisasr mnaku ttiwonmotr rothu yon mett fknemo kmi yarhrhu yak thuneft. ²⁷ Jisasr wom kfo nhombra mrokfot kfo memort, “Yonroh hayuk yesht nhai bi yakhato yaumn afo wahta hekahmn. Nhai. Afo tu yima yonmn barkofpam kahuknom.”‡

† 7:15-16: Wom safemanm duka memom, tot wom mrokfo nmbuhat ndar veskfothut. Nd mrokfo nmbuhat inji kfifut, “Yimbhindangeteko, ndar na kfiwa mrokfot wanykfot.” ‡ 7:27: Wahti Matyu 15.12 yorhwa kfo nuhasyuk mrokfot.

²⁸ Tfitn nd mettn kfo memotr, “Bro yimaye, ndt rot hifat kfiwun. To nhai, nd yauyenm, tebor yinhit toh hanyukm, rom to nd yonm ye bruraf hanitam ke tuthatak hanitm.”

²⁹ Jisasr rot pthamo mrokfot wanyhato kfo memort, “Ni inji kfitn, wanju kunyko. Nd kmi yarhr bi thu troh tanyrt ninhu yont.”

³⁰ Be rot kunyko yihato mhtimott yont bi kmi yarhr thu troh tanyhato tiktn hwe hasettm.

Jisasr tng yimbhindang kihmniyet yimar yak marnyamo yuhat

³¹ Jisasr tfit Tairt htanyhato yimor Saidonko. Saidonko tohni tfit yimorwe distrik Dekapolisko. Dekapoliskorn hingrma hanyhato Galili barit mfnahmor. ³² Galilit bi mfnahetrn wom yimar hnamomr. Nd yimarhu yimbhindangm kihmnimomr yo pthanefm nhai ptha marnyarmoar. Nd yimar hnehato Jisasr ttiwonmomr nd yimarhu tir htaneft.

³³ Be Jisasr nd yimar yaknimorr, nd yima rifhur htanyhato turpatf wom tkitt yimof. Turpathatho Jisasr tirpinyafe nd yimarhu yimbhindangf htamorf. Tfit kuninfar yakhato tortn htamort. ³⁴ Ee, Jisasr yura mounko wuyukatohhato yawitakiyafmorn ptha memor, “Efata,” (nmoh mrokfotn, “Atuppomn.”) ³⁵ Inji kfomotr nd yimarhu yimbhindangm tuppomomr. Tuppohato mrokfom riptha marnyakmorm. ³⁶ Jisasr nd yimar yak marnyanihato kfo rafo mrokfot kfo memorm, “Nd nda yimar yak marnya yuhat, mirahko wom yimam akfo nuhas mif mifnomm. Be inji turpatkmoh yima yuhumn arhutwat.” To nhai, nd kfo rafo mrokfot nhai yak hikrmomt. Tfit romn mrokfot yaknihato kuni kuni kfo habrimoumt. ³⁷ Be nd kmi kmirhof yimam Jisasr namo neft wanyhato duka memom, “Barenko! Ndu yima Jisasre be tu nhai hingrna happukkahr. Ror newa nefm be tu yafothetm korhm. Ror kfiwur, yimbhindang kihmniyet yimam mrokfom wanukm. Yo ror kfiwur, tng mmkm pthewum.”

8

Jisasr 4,000 yimam yeshri hemo yuhat

(Matyu 15.32-39)

¹ Wom yiha nhaf yonmari yima rifhur rifinymomr. Nhaf nd rifinymo yima rifhur be inji yeshri duhatm tohmom. Be Jisasr htitihato turhu disaiperm nakuyakhato kfo memorm, ² “Nda yima rifhur yuhuwanm. Bi husfirpa marm nanpno tohromn bi yeshriyen duhatem. ³ Yatinoht tohetmn kfo miruhanm, tukmoh kunyko wanjuko, inji kfahato yirahm, to be buha yihotatn yatinoh mmrifakruhamn suhrahm. Womm nhai be brboha toh tanyhato niarmom. Wuri wuri tkitrohm womm nia hnamom.” ⁴ Tfit turhu disaiperm kfo memomr, “Ndashart nom yima toh duha tkitt tohwonom. To href fitha bok bretpam yekwanomn ndar yonmari yima rifhur yahukanomm?” ⁵ Jisasr tfit ttiwon memorm, “Nikome finji finji bretpam harhuwako?” Kfo memomr, “7-pela kfoyet.”

⁶ Be nd yima rifhur Jisasr kfomotrm tuha bbinysoftn sibosi rmonmom. Jisasr nd 7-pela bretpam yakmormn Bro Nkifranko kfo bruttnaninhato bretpam fak tif botifmorm. Tfit turhu disaiperm hemotr romn yaknihato nd met yindars hi hanymomm. ⁷ You tfit wom yirayenm yakhato nhaf Bro Nkifranko kfo bruttnaninhato turhu disaipermn yak mkuyakhany, yak mkuyakhany, hiyaf hanymoatrm, tfit romn he nhombra hanymoumm met yindarim. ⁸ Nd yima rifhur fe furkikh bugamom. Nd rom yesmbhoyuk yeshrim Jisasrhu disaiperm tfit yak nhafohhato hmbremohat 7-pela kpm hmbremom. ⁹ Nd yeshrim yamo yimaroh thomnafat, 4,000. Ndt yindarirparoh thomnafayet. ¹⁰ Be Jisasr nd yima rifhur kfo tkruraf tanyhato turhu disaipermpno mmbrrtn mikmbrenihato Dalmanutako yimom.

Jisasrhu mirakerkfst memom ahtinom

(Matyu 16.1-4)

¹¹ Farisim yihato Jisasrpno yuwi mkfo memomr, “Jisase, mirakerkfst wahingrnakahtnt afo ahtinom. Nom htiruhanomn mirahnom, tu Bro Nkifranko bbukeftpno hingrnewur.” ¹² Inji kfomotmr Jisasrhu yima yuhur krhohato tuha yawita

kiyafhato kfo memor, “Tamohmpno ariharhof yimam yamukoma bro mirakerfot wayak nuhaskahtnnom ahtinom? Na tu be kfo mifwanko. Na nhai tfit ariharhof yimam tfit wom neft yak nuhasrhotanm. Be tu nhai mif.” ¹³ Be Jisasr tfit mmbrtn mikmbrenihato tfit mkuko hir hayuknimor.

Farisiroh yispami Herotrhu yisparoh kfo nhombra mrokfot
(Matyu 16.5-12)

¹⁴ Jisasrhu disaiperm yimohat nhai dukarmom bretparoh yaknineft. Rpa bretparpat faknimom. ¹⁵ Yimomn Jisasr kfo memorm, “Niko Farisimi Herotroh yispam hti marnyaf hanykfot.” ¹⁶ Tfit tum rinakfo nakfo memom, “Ka nom bretpam yakna duha yitnom, ndnetrn nd mrokfot kfiwurnom.” ¹⁷ Jisasr bi wanyhato kfo memorm, “Tamohmpno tuko tfit rinakfo nakfo yamukako, ‘Nom bretpa duhatenom?’ Niko ka nhai yima yuhu duhateko? Nhai yima dukefm rhukahmko? Yima yuhum ka bi kspitapamn toh tittewumko? ¹⁸ Nyingetko arhuko to htirfoko? Yimbhindangetko arhuko to wanyrfoko? Ka nhai. Ka bi nhai wom duka hanykahko ¹⁹ na tirfa bretpam 5,000 yimam yak dbifhato hany nhombra-mohat? Finji finji kpm nd yesmbhehm yak hutuhahato hmbremoko?” Kfo memomr, “12-pela kpm.” ²⁰ Tfit kfo memorm, “Yo tfit na nd wom yiha 4,000 yimam 7-pela bretpam yak dbifhemohat, finji finji kpm hmbremoko nd 7-pela bretpam ye furkikhato yesmbhomom?” Kfo memomr, “7-pelakfot.” ²¹ Tfit kfo memorm, “Na nd nefm namohat, ka nhai htihato duka hanykahko?”

Jisasr turhu disaiperm skurkfot hemo yuhat
(Sapta 8.22-10.52)

Betsaidathu nyinga kunyjet yimar Jisasr yak marnyamo yuhat

²² Nd Jisasrom hir hanymomn Betsaidat rim fnahmom. Nd kmi thofm Jisasr htiyakhato wom nyinga kunyjet yimar hnamomr. Hnehato Jisasr mttiwonmomr nd nyinga kunyjet yimarhu tir htaneft. ²³ Be Jisasr wanyhato nd yimarhu tirt yakitohaknihato nd kmit fnahnimoftn briahako fnahnimof. Briyahako rim htahato Jisasr nd yimarhu nyingam kuninfarmorr. Kuninfarmihato tirm htahato ttiwon memor, “Bi kukatoh wuthewun?” ²⁴ Nd yimar nyingam myukatohhato yimam tamohm htimorm wufau faumom. Kfo memor, “Htitanm yimam mim kanjo kau hanitm.” ²⁵ Tfit Jisasr wompam tir htamotrr ee ndnatpno nyinga rurham mfrfnahnamotmr hti wutha bugamorm yimam, mim, tamoh tamohm. ²⁶ Nyingam yak marnyanimorr kfo memor, “Ni mirahn tfit yiro kmiko arim fnahniya. Ninhu kunyko wanju.”

Pitar Jisasr kfo nriyafmo yuhat
(Matyu 16.13-20; Luk 9.18-21)

²⁷ Jisasri turhu disaipermpno Galilikort htanymomtn yimom tfit Sisaria Filipaikohof kmimn. Yihotatn turhu disaiperm ttiwon memor, “Nane, met yindarim finji dukewuma?” ²⁸ Kfo memomr, “Womm kangm Jon Baftaise. Womm kangm Iraiijaye. Womm kangm wom nkifra thof profete.” ²⁹ Inji kfomotm, tfit ttiwon memor, “To niko tuko finji yute-wukma?” Pitar kfo memor, “Ni kangnomn nmoh hbbayeme, Bro Nkifrar kfo tkrurafmorn nmoh minrfa htiyakyuke.” ³⁰ Be Jisasr inji wanyhato kfo memor, “Yo mirahko mif mif womm akfo nuhasnomm. Mirahko akfo amanyomm, ror ndhtet yimayer.”

Jisasr turhu nohhato sinya yuhat kfo nuhasmorm
(Matyu 16.21-28; Luk 9.22-27)

³¹ Nd yiha Jisasr disaiperm rikfo nuhasak memor, “Na, Bro Najema boknabok krhopam yakruha. Na Judaroh bro yimamn, prisroh bro yimamn, boririfhuthu tisamn, nd nd yimaroh tirmn hirruha. Nohruhoyann tfit husfirpehyuk marrn tfit sinyaruha. Na nhai tfit finji kfo finji kforhota. Na be yi nohnefrpat.” ³² Inji kfo ptha srh nuhasnimormn tfit Pitarn Jisasr yaknihato nndo rim hatohhato kfo rafo mrokfot kfo memor, “Ndhtet mrokfot kfo ptha duha.” ³³ Tfit Jisasr kekutnihato turhu disaipermpno

yukatoh hanyhato Pitar kfo memor, "Satane, wuri wain. Ni nhai Bro Nkifrarhu yima yuhur hikkahn. Nhai. Be nndo yima mifroh dukefm hikwo."

³⁴ Be met yindarimi turhu disaipermp rpat nakuyakmorm. Nakuyakhato niamotm kfo memor, "Wom yimar kangr, na ahik hneya, mirahr tur amdukak hanya. Nd dukefr mong trohhato rorhu bgre mis titahato na hikkfot. ³⁵ Yimar turhu toh marnya nmbuharpat mdukak hanitr, nd toh nmbuhat ror mdukak hanitat nhai tfit wom htiruhattrt. Yimar nani nanhu gutniuskfot dukahato nhai turhu toh marnya nmbuharpat dukarfort, kto tfit htirahrt rorhu toh marnya nmbuhat. ³⁶ Wom yimar ndar bbinysoftu tamoh tamohrpar yakhato kto toh nkifrayuk toh nmbuhat nhai dukarfort, to nd ariha yekwa marut, wuskat, tamoh tamoht kto to finji hifa toh nkifra nmbuhat hiruhamr? ³⁷ Hifa toh nkifra nmbuhat kangr tfit ayakant, to tfit fitoh yuhatn yakruhart? ³⁸ Ariharhof yimam Bro Nkifrar mong trohhato fasoh fasoh nefm newum. Frohr yak rihtefiwura yo nanhu mrokfet yak rihtefiwurt, be nd yimar tawo na Bro Najema yak rihtafruhanr. Nani tu dborioh mounmotmpno nia thombat Bro Yifemrhu nukeftpno yawihnehato yak rihtafruhanr."

9

¹ "Na kfo mif mifwanko, ndasha tohwa womm tafi afo noh duhatmn Bro Nkifrarhu bro nanyjaret kingdomkfot htirahmt."

*Jisasrhu thatipt fnhumo yuhat
(Matyu 17.1-13; Luk 9.28-36)*

² Kto 6-pela yiham yinyimotm Jisasr Pita Jems Jonrom yaknihato turpatm muhmom tu mfro wayakmo kminysoftn. Turpatm rhu hasohato asha htiyaf hanymomr fnhuyaknimor. Memom nndo yindeng nyisofr fnhutwor. ³ Yimar hmbremo hmbresham rpat fnhu bugaknihato memom nndo bruwohmr katiwur. Nhai ndar bbinysoftu wom yimar inji rhu wonakrmor. ⁴ Ee tfit htimomf Iraija Mosesrof Jisasrpno mtohhato pthamohat. ⁵ Pitar inji htihato Jisasr kfo memor, "Tisaye, nmoh asha tohneft hifa. Ka husfirpa kunyenm yimanom nhombrahato singorahnom. Ninhu womt, Mosesrhu womt, yo Iraijarhu womt." ⁶ Pitar nd mrokfot kfo pthamohat be yakrmehato be tu furamort nd mrokfot. ⁷ Be tfit wom gribfat niamotn yawihnehato kasi hmbremotm. Yiro nd gribfattn wom tngt niamot. Nd tngt kfo memot, "Ndarr nanhu Yoner. Be tu marbitn htewanr. Ror pthayuk mrokfom wany yakiokfot." ⁸ Yudbat yukatoh habri memom ahtinom nd mrokfo pthayuk yimar, to nhai, nhai wom yimar htirmom. Tu nd Jisasrpar htimom.

⁹ Be nd kminysofr wuhtanyhato tfit mibrnyimom. Buha yihotatn kfo memor, "Niko nd yura kminysoft htitawoneft bi mirahko womm akfo nuhasnom. Kto na Bro Najoma bi nohnihato bi tfit sinyeya, ee btn wakfo nuhastwakomm."

¹⁰ Be rom nd Jisasr kfo pthamo mrokfot wanymohat, tfit tum nakfo ptha memoum, "Nd ror kfi yamuhat nohnihato tfit sinyanefte tamoh kfir?" ¹¹ Tfit kfo ttiwon memomr, "Tamohmpno nkifra boririfhuthu tisam kfo yamukam, 'Afo Iraijarn bi nia gungonrahr. Tfit kto Bro Nkifrar kfo tkrurafrahr nmoh minrfa htiyakyuk yima Kraisr.' " ¹²⁻¹³ Jisasr wanyhato kfo memor, "Ndt tu kfo mif kfoyet. To nkifra kfot kfo memot, afo Iraijar bi nieruharn rorn nd tamoh tamohm bi yak hta bohtarahrm. Tu mrokfot kfiwit. To tfit kfiwanko, Iraijar to bi niamor. Bi niamotr yimam turoh dukefm hikhato faso faso fak bebmomr. Wawanyko, Bro Nkifrarhu rfa borngt kfo yamukahat, 'Bro Najomr bro krhopam yakruharn yimam kfo behohrahmr.' Ndt tu kfot kfiwit."

*Jisasr yak marnyamo kmi yarhr hatohet yonr
(Matyu 17.14-21; Luk 9.37-43)*

¹⁴ Mibrnyimomn tfit wom disaiper-mpno minahtimohat mihtiyaknimomm wom yimampro rifiny hasomom. Bro Nkifrarhu boririfhuthu tisampno nakfo hamuh nakfo hamuh hasomom. ¹⁵ Be nd rifiny hasomo yonmari yima rifhur Jisasr hti fohtasakhato tfit rorpro mkfo yindhoraknihato mrifin-yaknitm. ¹⁶ Rorhu disaiper Jisasr ttiwon

memorm, “Nikome tamoh mrokfefmn nnakfo hamuh hasiko?” ¹⁷ Tfit nd yima rifhurhu wom yimar sinyahato kfo memor, “Broye, nanhu yonr kmi yarhr mrokfo ptha yafothar yakmotrr ndnettn ninpno hniyanr. ¹⁸ Nd kmi yarhr tattuh thombat, yima yonr suhwor. Suhhato tir wuram noh minysafaknihato bisom youkukakni bruktyima yonr hatoh thombat kangm nndo foher. Ninhuisaipermpno kfo famuya, ‘Wayak thukomr yarhr.’ To nhai, fak thu titawomr.”

¹⁹ Jisasr nd mrokfot wanyhato kfo memor, “Arom Bro Nkifrarhu dukefm rhu duha met yindariyenko, finji tfit nikompno tohrhoya? Finji tfit nikmoh krhopam titahirhoyanko? Wahnakomr nd yonr.” ²⁰ Be nd yonr yaknimomr Jisasrpno hanymomr. Nd yonr tohmo kmi yarhr Jisasr htihato ka nd yonr bbinysoftn wathu tmbhomotrr be tuha bruktpno bruktpno tohaknihato tir wuram tubatu yaknimomr. Tuha memom nndo yejefenrn nmbukaswor.

²¹ Jisasr nd yonrhu yifemr ttiwon memor, “Nda yonre fitoh yiha fakmotr nd mumeft?” Yifemr kfo memor, “O yuhre habhiyenrn nd mumeft rifakakmotr. ²² Rhu hasiwarn nd yarhr thu mumaknitattr kahmn kitr. Womnam tekem mitayifwor. Nd yarhr kangr, inji anakahtanr anohr. Ndnett kanga attiwonann, ka yuhuwafto yak thurfonr nd ror hatohwa yarhr?” ²³ Jisasr kfo memor, “Rot ndt nhai mrokfom. Tu yimann hus yima yuhufn rhurahn be nhai yak marnyahirhotanr. Rpa yima yuhurpar rhuhato duka mirahn, ‘Href mif mif Jisasr kak marnyahukra.’ Inji dukarahm marnyahirahrn.” ²⁴ Nd yonrhu yifemr warhuhato kfo nur memor, “Uwa, uwa na nd yima yuhur kfo kangr, ‘Href mif mif kak marnyahukra.’ To tfit wom yima yuhur nhai be inji masat dukakahanc. Ndhet dukeff yorhwotfa ndnatn kanga ndhet midukata mdukatanef wayak thunt. Be nd yonrhu marnya dukefrpar wayakhtana.” ²⁵ Jisasr met yindari rifhur brbo toniyaknimotm Jisasr nd yimbhindang tng kihmniyet kmi yarhr kfo nambur hik memor, “Asomif wathu troh tanynr. Wathu troh tanykahnr mirahn tfit amfkneyanr.” ²⁶ Be inji kfo nambur hikafmotrr, be nd kmi yarhr tau fnahhato thu troh tanymorr. Thu troh tanymotrr nd yonenr suhhato yebittaknimomr. Memom ka dangnhatn tmbho thum. Yimam htihato memom ka bi fnohr. ²⁷ Tfit tu Jisasrn nd yonrhu tirt wayakhato wateh kasinyakmorr.

²⁸ Kto Jisasr kunyko yihato turpatm turhu disaipermpno rhuhato kfo ttiwon memomr, “Tamohmpno nd yarhr to nom yak thu duha yirfonomr?” ²⁹ Jisasr kfo memor, “Nhai wom tamoh nefm nahato kmi yarhm yak thukfot. Bro Nkifrarhu kfo bruttna-nefrpat. Bro Nkifrapno kfo bruttnarahko kmi yarhm yak thurahko.”

*Jisasr tfit wompam kfo pthamort turhu nohhato sinya yuhat
(Matyu 17.22-23; Luk 9.43-45)*

³⁰ Be nd kmit htanyhato buha Galili yuhat yimom. Jisasr nhai marimor, wom yimar kfo nuhasruhanr rorhu yi yuhat. ³¹ Turhu disaipermp kfo kars bokars, kfo nuhas bonuhas, kfo hta bohta inji nayetrn nhai marimor womm kfo nuhasruha yi yuhat. Turhu disaipermp kfo memor, “Ndar bbinysothu yimam Bro Najomr yak hndhnarahnmr yimampno. Hndhna-ruhatmr yimam wasrahmr. Nohruharn husfirpehyuk marrn tfit sinyarahr.” ³² Jisasr inji kfomotr, nhai rom nd mrokfotu yimbu yuhat yakrmomt. Rom tfit fanhomom nd mrokfotu tfit ttiwon hikneft.

*Frohr broyer?
(Matyu 18.1-5; Luk 9.46-48)*

³³ Jisasri turhu disaipermp yimomn Kaperneamt mfnahmom. Ndha mfnahhato wom kunys fknenihato Jisasr ttiwon memor, “Niko yihotohat yau hnehate tamoh mrokfom rinnakfo nakfo hneko?” ³⁴ Nd yimam yihotoha yuhat niamohat tohakyuk yimarhu nmbuhat nna kfo hamuh nna kfo hamuh hnamom. Womr watohhato memour, “Nann broruhanko.” Tfit womrn, “We, we nann broruhanko.” Tfit womr watohhato memouur, “We, rorn.” Tfit womr watohhato kfo memour, “We, we ror nhai, ndarrn brorahrnom.” Inji inji nna kfo hnamomn Jisasr ttiwonmohat to be nhai womr ptharmor. ³⁵ Jisasr warhumorn nd turhu 12-pela disaipermp kfakmorm. Kfakhato kfo memor, “Wom

yimar kangr, ‘Nyingako atohane,’ nd yimar wom yimaroh mongko tohtahato be rroh hingrnanh yimapar tohkfat.” ³⁶ Wom habhi yonern yakmorrn rroh buha htatahato tire yikitoh hanymorrr kfo memorm, ³⁷ “Fitoh yimar na hikhato na hikwa wom met yindarim yakhato kak marnyewurm, nda yonern yakhato yak marnyiwa kanjo, nd yimar nann yakhato kak marnyewur. Na Bro Nkifrar kfo tkrurafmotra, niamoya. Ndnatn frohr na kak miyekwor, nd yimar Bro Nkifrar kak miyekwor.”

*Nompno nahti dbnot duha yimar nmoh yimater
(Luk 9.49-50)*

³⁸ Jonr kfo memorm, “Tisaye, wom yimar htimonomr ninhu yufat yuta nawohhato kmi yarhm yak thumoatrm kfo rafonomomr. Nd yimar nhai nom ni hik habriwa kanjo nd yimar inji hiknho habrikahrn. Ndnatn nd yimar ninhu yufat yuta nawohhato yarh fknayet yimam yak marnyamoahat, nom nhai yindhorrmonom.” ³⁹ Jisasr wanyhato kfo memorm, “Mirahko akfo rafonomr. Yimar nanhu yufatpno wom mirakerkfot hingrnewur, nhai be yudbat fasoh mrokfom kforhotra. ⁴⁰ Yimar nompno nhai nahti dbnotkahr, nd yimar nmoh yimater. ⁴¹ Wom yimar niko htiyakhato kfo kangr, ‘Ndurm Kraisr hikwa yimayem, bu pikt ahiyanm,’ na kfo mifwanko, nd yimar tawo Bro Nkifrar yak marnyarahrr.”

*Yimam yak kasuhwa fasoh nefm
(Matyu 18.6-9; Luk 17.1-2)*

⁴² “Wom yimar ndar na hikwa yonenm frnhehektrm fasoh nefm fsuhm, nd frn-hehakyuk yimar bro tahis yakhato mohtpitn tmbrekhatu tek dany yuhat yafhohato miptkokfot. Tohruharn fasoh yihotat hanyrahrm. ⁴³⁻⁴⁴ Tirtu fasoh fasoh nefm hanittn, nd tirt tmbho thukfot. Tmbho thuhato be rpa tirrpatpno rhu marnyaruuhann toh nkifranirahn. Hus tir bugaf rpat rhurahf, rofn yakruhafn kaht turahfn. Nd kaht nhai wom yiha minoh hmbreni hanykaht.* ⁴⁵⁻⁴⁶ Yo wurat inji newut, nhaf puk thuhato rpa wurarpatpno rhuhato toh marnyarahrn. Hus wura bugaf rhurahf, rofn kaht hanyrahfn. Nd kaht nhai wom yiha minoh hmbreni hanykaht.† ⁴⁷ O nyingarn fasoh nefm htihato fasoh nefm ner, be nd nyingar yak rurha thuhato be rpa nyingarparpno rhuhato toh nkifranirahn Bro Nkifrarhu kingdomkftn. Hus nyinga bugaf rpat rhuneft wom nyingarn fasoh nefm hanyruhatrn rorn hel rhuyuk kaht hanyrahrn. ⁴⁸ Ndhart nd yimam rurhahato tabotkurwa yejefm nhai nohkahm. Yo kaht nhai wom yiham minoh hmbreni hanykaht.

⁴⁹ Rho mengongm nhai sfno yak susnakfot. Kahtpno sunfahato ee yoh nfewatm kak susnewum.‡

⁵⁰ To wom mrokfot tfit kfiwa. Youpam tamoh tamoh roh nrhayukem. Nd youpam nhai wom you gb ye juha, to tfit finji kanjo naruhatnm tfit you gb yeruham? Youpam yakhato tamoh tamohm nrhafhato htarahnm be nhai finji naruhatm. Be rhu marnyarahrn. Youpam yemrom o tamohm yak marnyewa kanjo niko wommpno nayak marnyahato rpat tohkfat.”

10

*Jisasr pthamor tuhan yakhato tfit yak tuhafoneft
(Matyu 19.1-12)*

¹ Jisasr nd kmit htanyhato tek Jodent hayuknimortn tfit Judia profins yimor. Ndko yimohat nhaf yonmari yima rifhur rifiny hmbriyaknamomr. Rifiny hmbriyak-namotmr

* 9:43-44: Wom safemanm duka memom, tot wom mrokfo nmbuhat ndar veskfohut. Nd mrokfo nmbuhat inji kfiwit, “Ndhart nd yimam rurhahato yima tabotkurwa yejefm nhai nohkahm. Yo kaht nhai wom yiham minoh hmbrenikaht.” † 9:45-46: Wom safemanm duka memom, tot wom mrokfo nmbuhat ndar veskfohut. Nd mrokfo nmbuhat inji kfiwit, “Ndhart nd yimam rurhahato yima tabotkurwa yejefm nhai nohkahm. Yo kaht nhai wom yiham minoh hmbrenikaht.” ‡ 9:49: Wahti Wok Pris 2.13.

nhaf tur na hnamoa kanjo Bro Nkifrarhu mrokfom yakhato kfo ptha nuhas bonuhas-morm.

² Ndko tohetrn ndkorhof Farisim yuwi yihato ttiwon rhti memomr, “Nmoh boririfhut finji kfiwat tuhan yak tuhafoneft? Ka hifane nhai?” ³ Jisasr wanyhato tfit kfo ttiwon memorm, “To Mosesrhu boririfhut finji kfomot tuhan yak tuhafoneft?” ⁴ Tfif Farisim kfo memom, “Mosesrhu boririfhut, nom yak hikwat, kfo kangt, yimar tuhan yak tuhafoneft nhai mrokfom. Afo tuhan yak tuhafoyuk kfo yakio gontwat wandfanihato ee mett yak tuhafokfot.” ⁵ Jisasr kfo memorm, “Rot ndt hifa kfiwukomt. To nd niko wanukwa boririfhut nhai be sfno inji riruhakrmot. Tukmoh Bro Nkifrarhu mrokforoh wany juhaneftpno nd mrokfot inji htamort. ⁶ rfa borngt inji kfiwit, ‘Bingot Bro Nkifrar ndar bbinysoft hingrnahato yimam hingrnamohat mete yindariye hingrnamor.’ ⁷ Yo wom mrokfot inji kfiwit, ‘Ndnnett yindarir turhu yifammam htanyhato turhu yak tuhantpno frtkafhato ⁸ mettn bi tot rorhu tirboh raft.’ Bi rpa raftn tou dbkaf hmbrihato tohkfot. ⁹ Ndnnett Bro Nkifrar yak nmbtekyukm nhai tfit yima mifmn yak tndohkfot.”

¹⁰ Kunyko fknenihato tfit turhu disaipermpno nd Farisimpno napthamo mrokfot tfit wompam ttiwon hikmomr. ¹¹ Kfo memorm, “Wom yimar turhu yak tuhant yak tuhafohato wom mett fekr, nd nfri mett be ijoh yuhathu metet. Nhai turhu tuhan mif rhukaht. ¹² Mett nhaf inji buga. Mett tuthu yak ramr htanyhato wom nfri yimarpno rim suhnineft, nd yimar be ijoh yuhathu yimayer. Nhai tuthu ramem mifr rhukahr.”

*Jisasr yonroh nmbuhat kfo pthamor
(Matyu 19.13-15; Luk 18.15-17)*

¹³ Wom yimam Jisasrpno yonenm hnehato memom, “Jisasr tir htahato kfo bruttnarahrm.” Disaiperm inji htihato tfit kfo huttaknimomm nd yon hnayuk yimam.

¹⁴ Jisasr inji htihato kfo hutt memorm, “Yonenm wahti marsisafokahtkomm nanpno aniam. Mirahko akfo rafonomm. Yimam yon mumenm kanjo yorhwam Bro Nkifrarhu kingdomkfat rhurahm. ¹⁵ To afo wawanyko. Yimam nhai yon mumenm kanjo be Bro Nkifrarparhu kingdomkfat rhukahm be nhai yiruhatm Bro Nkifrarhu kingdomkfat.”

¹⁶ Be nd toni hnamo yonenm yak nhafohmormn Bro Nkifrar kfo bruttnahato fak wus bowusmorm.

*Wuska kunyet yimar Jisasrpno yihato napthamo yuhat
(Matyu 19.16-30; Luk 18.18-30)*

¹⁷ Jisasr sinyani yi hanyetrn wom yimar toni yaknehato Jisasrpno bangu myuknahato ttiwon memor, “Hifa tisaye, nane finji naruhoyann Bro Nkifarpno toh nkifraniruhoya?”

¹⁸ Nd Judaroh bro yimar hifa tisa yufat Jisasr yutamotr Jisasr wanyhato kfo memor, “Tamohmpno kfo yamukona, hifa tisa? Nhai wom hifa yimar tohkahr. Bro Nkifrarpar dborioher. ¹⁹ Nkifra thfa mntwat ni bi wanyete. Kfo kangt, ‘Mirahn wanambur sinyahato yima awas furaya, mirahn ramet tuhantpno arim fnaha, mirahn arikoha, mirahn wom yimar wom mrokfom akfo wokanr, mirahn womm amkfo yuhur nheh bonhehkahann maruham o tamohm amiyakhiyanm, yifamaroh mrokfo wany yakiohato rroh yinhitn rhukfot.’” ²⁰ Jisasr inji kfonomot tfit nd yimar sinyahato kfo memor, “Tisaye, na yuhre yonenann nd thfa mntwam rihikakmoyanm. Nhai riyak htaforroyanm.” ²¹ Jisasr nd yimar hti yuhuwafhato kfo memor, “Rot hifa nkifra thfa mntwat kakitohwont. Tmift wom nefrpak nhai nakahnt. Nd ni harhuwa wuss yak htatahato wommn wiknakfot. Nd wusspno yakyuk marut yakhato tfit nd wuskapa duha yimamn nd marut hekfot. Inji narahn, hefenrko mfro wuss harhurahn. Inji nanihato tfit na nia hikkfot.” ²² Jisasr inji kfonomot rr nd yimarhu nyngatikt faso yimotr. Boknabok wusketrn nd mrokfot wanymohat yima yuhur nhai marnyahato yirmor.

²³ Jisasr kekutnihato turhu disaiperm yukatohhato kfo memor, “Wahtiko, yimam boknabok wusketm be tu mduka nhyekwom Bro Nkifrarhu kingdomkfothu fknenineft.” ²⁴ Turhu disaiperm wanyhato be tuha mrokfo duhatm rhumom. Tfif Jisasr kfo memorm, “Arenko, yimar kangr Bro Nkifrarhu kingdomkfat afkneniya, mirahr ka

be yak dbhofnaniruha. Nhai. Muh wohne fnahrahr. ²⁵ Womhtet mong wakuyet fohr kutewumr kamerr. Nd kamerr fknanyirfort nahuyuk nirthu muht. To yimar wuss mfro haruhetr, Bro Nkifrarhu kingdomfothu fkneneft mduka nhiyakrfor.” ²⁶ Tfif tu Jisasru disaiperm inji wanymohat tfif mifoh rihanimom. Miyoh rihanihato kfo memom, “Barenko, nom kangnom ka ndhtet maru kunyet yimamn hifa rhu nmbuhat miyakrahm. To nhai. Ndhtet yimam mthu nhiyakrahm Bro Nkifrarhu kingdomfothu fkneneft. To nome ndhtet yima furapanom, to nome finji Bro Nkifrapno yihato mtoh nkifraniruhanom?” ²⁷ Jisasr yukatohmormn kfo memom, “Niko yimakomm tamoh tamoh nefroh finjina finjinaneft mduka nhiyekwoko. Tu Bro Nkifrar nhai duka nhiyakkfot wom tamoh nefroh finjina finjinaneft.”

²⁸ Pitarn sinyahato kfo memor, “Wahtinnom. Nom ninhu hikneftn nmoh tamoh tamohm mong trohhato ni mhikaknamonom.” ²⁹ Tfif Jisasrn sinyahato Pitar kfo memor, “Na kfo mif mifwanko, yimam nani gutnius mrokfot dukahato rroh kunym, yon tuhanm, yifa mndarm tamoh tamohm htanym, ³⁰ tfif Bro Nkifrar wom 100 kfot thu hutahi hanyrahram. Tfif htirahmm bok yifa mndaretm, kuny rmonetm, tamoh tamohetm rhurahm. Nhai yak mmbra finyruhatm. Yo rom nda bbinarysoft toh thombat bok yimam yihato yak bebrahmm. Kto Bro Najomrhu yawihnatuk yiharn tfif Bro Nkifrapno toh nkifranirahm. ³¹ Arihart nyingako tohekwa yimam, kto tfif mongko yihom fnahnirahm. Nd mongko tohyukmn tfif nyingako mfnahnirahm.”

Husfirpehyuk mrokfot Jisasr kfo memor, “Nohaforhoyann tfif sinyaruha.”

(Matyu 20.17-19; Luk 18.31-34)

³² Jisasri turhu disaiperm memom, “Jerusalemko yirahnom.” Jisasr tohakmotr yo nd rorpono yauyuk yimam mongt tohmom. Turhu disaiperm inji htihato bok dukefm fakmom. Memom, “Ka Jerusalem thofm yak bebrahmr.” Wom yima furam nhaf inji htihato fanhomom. Jisasr turhu disaiperm yakhato turpathato kfo memom, ³³ “Wawanyko, nom Jerusalemko yitahat, na Bro Najoma hrek kita prisroh bro yi-mami nkifra boririfhuthu tisaroh tirmn. Kmim rompno nakfo habofkniruhamn, yima tangimpno htarhotma, ³⁴ rom sinyahato kuninfar wuna kfo hutatpno kfo hutatpno yenyohrahma. Tfif wife wife yenyoh gurahma. Wife yenyoh guhato tfif yura bgre misn kihegir-rhotma nohruha. Nohruhoyann tfif husfirpehyuk marrpno tfif sinyaruha.”

Jems Jonrof memof, bro yimano arhuno

(Matyu 20.20-28)

³⁵ Sebedirhu yon husf, Jemsri Jonr, nd hus yonf Jisasrpno yihato mkfo memofr, “Tisa, no kangno, nnoh wom dukeft bi akfo nuhas htatanonn.” ³⁶ Jisasr sinyahato kfo memofr, “Tamoh mrokfot yamukafn, akfo nuhasnon?” ³⁷ Nd yon najohf sinyahato kfo memofr, “No kangno, ni kingn toh thoft no najo wayak htatwanno. Womr tirmifko wayak htatwanr, womrne kindonko.”

³⁸ Jisasr sinyahato kfo memofr, “Nifn nhai duka hik marnyahato ttiwonkahfna. Nd na yeruha krhoparoh kaft ka yenyho twanho mifrahfna? Yo na baftaisruha krhopa yakyuk baftaiskfot nifn yakrahfnt?” ³⁹ Kfo memofr, “Uwano.”

Jisasr kfo memofr, “Na yeruha kaft rot nifn yerahfnt. Yo na yakruha baftaiskfot nifn rot yakrahfn. ⁴⁰ Tmift nanhu kindonko yo tirmifko rhuyuk tkitt yak htaneftn, na nhai bi nanhu fijo kfo mekfot ni ndko rhurahn, yo ni ndko. Nhai. Tu Bro Nkifrarhu duka fijo fak hta nhombra htatamorm tkitm. Kto turhu hti fijo tkitm yak hta nhombra hi hanyrahram.”

⁴¹ Jon Jems najohf inji ttiwonmotfr tfif wom 10-pela disaiperm kfo hutt memomf, “Tamohmpno ndhtet ttiwon nmbuhat ttiwonwafnr?” ⁴² Jisasr rpat naku nhafoh bugamormn kfo memom, “Niko bi htiheteko, kingm yima tangim yaktihwohat. Yimam be nd tohak yimarhu yinhibit tohwom. Nhai womr finji tfif kfo pthakfot. Yimam be rorhu tngrpat hikkfot. ⁴³ Niko mirahko nd neft ahiknom. Yimar kangr, ‘Tohukatohr atoha,’ nd yimar afo nikmoh hingrnano yimar tohkfot. ⁴⁴ O kangr, tohak yimaya atoha, afo toh tario yimar tohkfot. ⁴⁵ To na, Bro Najoma niamohat, nhai nanhu rhu nmbuhat dukahato

ndar bbinysoft niarmoyant. Nhai. Nikmoh rhu beb nmbuhat duka tanyhato niamoyant ndar bbinysoft. Nann ndar bbinysof thofroh fasoh nefm suh nanyorruhanm.”

*Jisasr yak marnyamo nyingga kunyjetr
(Matyu 20.29-34; Luk 18.35-43)*

⁴⁶ Yi yimomn Jerikot mfnahmom. Mfnahhato yonmari yima rifinypno rpattn yuhre fau htany hanymomt kmi Jerikot. Nd kmitn wom nyingga kunyjet yimar yihota yifembtn rhu hasomor. Nd yimar Timeusrhu yon Bartimeusr. Nd yimar yihotam rhuhato yihotat yau naffyuk yimam maruha tndaumourm. ⁴⁷ yihota yuhat rhuhato wanyak hanymorm yimam ptha hofhta hnamohat. Kfo memom, “Nasaret thof Jisasr niewur.” Ror inji wanyhato kfo nakuyafo memor, “Defitrhu tangishof Jisase, wayuhuwafna!” ⁴⁸ Inji kfo nakumotr wom yimam kfo thfamomr. Ror nhai wany yakiohato naku tmbhormor. Tfif wompam masat kfo nakuyafo memor, “Defitrhu tangishofe, wayuhuwafna!” ⁴⁹ Be Jisasr nd yimarhu naku tngt wanyhato be mtohmor. Mtohhato kfo memorm, “Nd na nakuta yimar wahnakomr.” Yimam yihato rim kfo memomr, “Mirahn adukaya. Wasinya. Jisasr ninn nakutr.” ⁵⁰ Be yudbat sinyanihato nd ror hmbremoa sakethat wathu hrur tanymortn Jisasrpno yimor. ⁵¹ Jisasr htiyak hanyhato kfo memor, “Wurene tamohmn nakuna?” Nd nyingga kunyjetr kfo memor, “Tisaye, kanga nyngam wayak marnyakahtna ayukatoha.” ⁵² Jisasr kfo memor, “Nanhua nia mrokfot ni wanuhat ninhu bro dukeft nann htahato nakuna. Ndnettn wanju. Mirahn adukaya. Ninhu nyngam marnya-rahmn.” Be nd yimarhu nyngam nhai wom kuknarmomr. Yudbat fukatoh dbtakumorm. Nd nyngam marnyamotmr Jisasr fau hikakni twanhomor.

Jisasr krhopam yakhato nohmor. Nohhato tfit sinyamor.

11

(Sapta 11-16)

*Jisasr king kanjo Jerusalemt yimo yuhat
(Matyu 21.1-11; Luk 19.28-40; Jon 12.12-19)*

¹ Jisasri turhu disaiper yimomn brbo Jerusalemt pno yorhwa Olifet kmi yihofr yorhwa kmi Bettageti Betanit mfnahmom. Ndha mhtahato hus disaiperf kfo tkur memor, ² “Ndar rihtita kmit warine hanyfn. Warine hanykahfnn htirahfnr natifatayet donkiyenr. Nd donkiyenr nhai yimam tafi rhuhato hatone-rrmomr. Nd donkiyenr wayak nyusakaknetwafn. ³ Yekwatfnr yimam ttiwon kangmf, ‘Tamohmpno yaknitafnr?’ wakfo wamitwafnm, ‘Bro Nungothetr hingrnfetrn kfefitrno be yifrar kakni yahukanonr tfit yudbat yarim htanyrahr.’” ⁴ Be rof yimofn mhtimofr donkiyenr kuny yifhatikthu yirawih mispno natifa htatayetrn. Be rof inji mhtihato nyusakaknamofr. ⁵ Yimam inji htiyaf o hanyhato ttiwon memomf, “Barefn, tamohmpno nd donkiyenr yaknitafnr?” ⁶ Kfo memofm, “Bro Yimar kfo tkurefitrno kakniyahuknonr.” Be inji wanyhato kfo memomf, “Wayaknihefnr.” ⁷ Be nd donkir nyusakaknihato hanyhemofr. Jisasrpno mhtahato tufhu rmontham yakkofmn donkirhu mongtn rhuyuk tkitt htamofm. Htanihato Jisasr mrhuhato yimor. ⁸ Ror yimohat yonmari yima rifhur ror htiyak hanyhato turoh rmontham yakkomm, rorhu yiyuk yuhath hta nyngak-momm. Womm miyuhtam yak wokakhato ror yiyuk yihotatn htakmomm. ⁹ Jisasrhu nyngako tohakmo yimam yo mongko tohyuk yimam, romn kfo naku ptha hany memoum, “Wayindhorakkomr. Bro Nkifrar ayak marnyatwarr Brorhu yufatpno niayuk yimar. ¹⁰ Bro Nkifraye, nda nmoh bapem Defitrhu frika yuhat niayuk yimar king toh thoft wayak marnyatwanr. O tu tunga Nkifraye.”

¹¹ Be Jisasr kmi Jerusalemr mfnahhato Bro Nkifrarhu temperr rim fnahnihato temper-rhu kuny rifhut rhuyuk tamoh tamohm hti htfas bugamorm. Marr bi miyak yifho buga hanyetrn be tfit fnahnimorn turhu 12-pela disaiper yaknimorn Betaniko yimom.

*Jisasr fik tihat kfo memort, “Mirahn tfit yukha hir mifa.”
(Matyu 21.18-19)*

¹² Betaniko mhwi tanyhato ndwom dbha memom tfit anianom Jisasr buha myati-nohmor. ¹³ Nndo kkof tohhato fik tihat htimort twettn. Ror memor, “Ka yukha hirwot.” Brbo yihato fukatoh hambro titamort nhai wom yukhayenm hirrmomt. Yuhtam be sfno twabomrpam bommomt. Tu fik wormr atohr awi yukham hirrmom. ¹⁴ Be nd fik tihathu yukham hti hambrotihato nd fik tihat kfo memort, “Mirahn tfit yukha hirkahann yimam yukham ayak ayema.” Jisasr inji kfomohat turhu disaiperw wanymomr.

*Bro Nkifrarhu temperr maket htamo a kmim Jisasr yihato yak thumo yuhat
(Matyu 21.12-17; Luk 19.45-48; Jon 2.13-22)*

¹⁵ Jisasr Jerusalem rim fnahnihato rim htimorm Bro Nkifrarhu temperrn maket htamoum yimam. Rim htihato maket htamo a yimami yeshrim wiknamoa yimam hik tubatumorm. Hik tubatumormn maruha niyak tuknamoa teborm yo nunga ganyom mmkrn htamo a gajim nembos tubatu hikafmorm.* ¹⁶ Nd yiha yimaroh wiknayuk tamoh tamohroh temperrhu hiyau hafkneneft kfo rafomort. ¹⁷ Yak thunihato kfo memorm, “Bro Nkifrarhu rfa borngt kfo kangt, ‘Nanh temperr nanhu kfo bruttnayuk kunys rhuraht.’ Tfit nikomn kango rikoh yimaroh yi kafrohyuk tkitt arhut.”

¹⁸ Ror kfo pthamo a mrokfom met yindarim wanymohat mfha tha duhatm rhu-mom. Ror pthayuk mrokfom wany fanhomomm. Ndnettn prisroh bro yimami nkifra boririfhuthu tisam inji wanyhato kfo memom, “Be wom yuhann kfo nhehakhato wasrahnomr.” ¹⁹ Be krifnano Jisasri turhu disaiperw Jerusalemt htanyhato yimom.

*Rpa dukefrparpno ptha bruttnarahm tamohm ni kfoyukm yakrahnm
(Matyu 21.20-22)*

²⁰ Hwe nfha ndwom dbha Jisasri turhu disaiperw tfit yi hanyhato htimomt nd Jisasr kfo nambur mrokfot kfonimo fik tihat bi twa yuruf hasettn. Memom nndo tohrn yitattrt fokrta hmbrit. ²¹ Pitar nd mis htihato tfit dukamor Jisasr kfo memohat, “Nda mis miraht tfi yukha hirhato yimam yukham tmbra ayama.” Pitar nd mrokfot dukahato kfo memor, “Tisa, nohok nda mis kfo nambur mero, anohtwat. To wahti bi fokrtewt!” ²² Jisasr wanyhato kfo memor, “Nikmoh bro dukefm Bro Nkifrarpar htakfot. ²³ Na kfo mifwanko, nikmoh yima yuhum be tu rpa yima yuhur rhuhato ndar kminysoft kfo mirahkomt, ‘Asomif nom kfiwunom marombtn wamitoh witani,’ to be htirahkomt nd kminysoft marombtn mitoh witaniraht. ²⁴ Nikmoh yima yuhum rpa dukefrpar rhuhato tamohm kfo bruttna kfo mirahko, ‘Nom asomif kfiwohat Bro Nkifrar wanukwarn nd nom kfo bruttnewa shrm htitnomm.’ Inji dukahato kfo bruttnarahko, to be hti mifrahko.

²⁵⁻²⁶ Kangn, ‘Akfo bruttnaya,’ womm nayuk nefm afo mong trohkfot. Womroh nefm mong trohrahnm, tawo ninhu Yifemr hefenr tohwar mong trohhirahrn ninhu nefm.”†

*Jisasr bro yufat yakmo yuhat kfo ttiwonmomr
(Matyu 21.23-27; Luk 20.1-8)*

²⁷ Jisasri turhu disaiperw tfit yimom Jerusalemt. Yihato Bro Nkifrarhu temper kmi-farn fknenimorn fau htfasmor. Yau htfas hanyetrn prisroh bro yimam yo boririfhuthu tisam yo Judaroh wom bro yimam fau yukato-haknimomr. ²⁸ Brbo yihato kfo ttiwon memomr, “Frohmn ndhtet bbuka rifhur hemomn? Frohmn bbuka rifhur hehato kfo memomn inji wanatwa?”

²⁹⁻³⁰ Tfit Jisasr sinyahato kfo memor, “Na to tawo tfit ttiwonwanko. Tone Jonr yimam baftaisimmoahate tu Bro Nkifrar kfovotrr ndhtet hingrneft hingrnamourt o be yima mifm kfovotmr yimam baftaisimmourm? Nd ttiwon nmbuhat kanga wakfo

* ^{11:15:} Wahti Matyu 21.12 yorhwa kfo nuhasyuk mrokfot. † ^{11:25-26:} Wom safemann duka memom, tot wom mrokfo nmbuhat ndar veskfothut. Nd mrokfo nmbuhat inji kfiwit, “Nhai mong trohherfokomm rom nayuk nefm, to tawo niko nayuk tamoh nefem nhai mong trohhiruhatrko nikmoh Bro Yifemr.”

nuhaskahtkma tawo kfo nuhasruhanko na hingrnewa hingrneftu bbukeft yakmo yuhat.”

³¹ Rom inji wanyhato tfit tum nnakfo memom, “Nom sinyahato kfo mirahnomr, ‘Bro Nkifrarn kfomotrr hingrnamour,’ to tfit mirahrnom, ‘To tamohmpno wany yakio duha yirmokomr?’ ³² To Jonrhu mrokfom bi profetm kanjo pthahato yimam bi wany hatohetmn, tfit nom kfo mirahnom, ‘Yimaroh kfotpno kfo pthamour,’ to be yimam sinyahato tat nohrahnmom.” ³³ Be myak nhtaktihato be kfo memomr, “Nom nhai tawisafkahnom.” Rom inji kfomotm tfit Jisasr kfo memorm, “Na to inji. Na nhai kfo nuhaswotanko na hingrnewa hingrneftu bbukeft yakmo yuhat.”

12

Wain swirt tohukatohmo yima bebroh kfo nhombra mrokfot

(Matyu 21.33-46; Luk 20.9-19)

¹ Jisasr bro yimampno wom kfo nhombra mrokfot yakhato kfo memorm, “Wom yimar wain swirt htamor. Wain tofm nuhtanihato gnat gna habrimort. Gnanihato muhr toumorr wain yukharoh yahot kembiftyukr. Ndt inji hingrnanihato tfit nd wain swirthu rhu yukatohyuk kumba kunyr hingrnamorr. Be inji hingrna tanymortn wom yimam yakhato nd mswirthu tohukatohhato yukharoh nayak nhta yuham nayak dbkafhato ror be wom kmimn toh habrimor. ² Kto nd wain swirt yukha hirmott yukha yak yiharn nd tu wain swir tikatr turhu hingrna yimar kfo tkrurafmorr, nd wain swirt yakitoh hasoyuk yimampno. Kfo tkruraf memorm, ‘Waikahnn nanhu yufathu htahayuk yukham wamiyakhina.’ ³ Yihato nd mswirt tohukatoh hasoyuk yimam sinyamomn tabotafmotmr be sfnopa tfit yimor. ⁴ Be nd wain swir tikatr htiyaktihato tfit wom yimar kfo tkrurafmorr. Nd yimar nhaf be rpahtet neft namomr. Mfhapako frddbithato faso faso kfo yimtna boyimtna tuhafmotmr be yimtneftpno yimor. ⁵ Tfit womr kfo tkrurafmor. Ndrne be wasmomr. Be wom wom yimam yimoahat be mifahotakmoum. Nd mswirt tohukatoh hasoyuk yimam sinyamoamn womm tabotmoumm, womm wasmoumm. ⁶ Wuroh turhu garbn yon mifr. Nd yonr be marbit htamourr. Duka memor, ‘Tukanhu garbn yon mifr yiruhatre wany yakiorahmr.’ ⁷ Be nd yonr tkrurafmotrr yimor. Yimotr wain swirt tohyuk yimam htiyakhato tum rinnakfo nakfo memom, ‘Ndarr turhu yonr nier. Yifemr nohnineft to nd yonrn tkitt yakhato ndar wain swirt rorn yakrahrt. Finji dukewako? Awaskahnomr be nd wain swirt be nmoht rhuraht.’ ⁸ To be mrokfot nayak dbkafnihato turhu wain swirt toh hasetrn wasakhato briahako rim tuhafo tanymomr.”

⁹ Jisasr inji kfo pthanihato kfo memorm, “Niko to finji dukewako? To nd wain swir tikatr, turhu yonrhu was mrokfot wanynefte to finji naruharm? Na kfiwanko wain swir tikatr nieruharn nd yimam was hehur thuruhamr tfit wom nndoh tkitthu yimam yakhato yak htarahrm nd mswirtn.

¹⁰ Wom mrokfot Bro Nkifrarhu rfa borngt yorhwat htitwokomt? Nd mrokfot kfo kangt, ‘Nd rahur, kamda yimam hti kurhato yak thumor, be bi tfit nd rahurn bi dany rahur tohwor.

¹¹ Tu Brorn inji hingrna hta bohtamotrt nom be inji htihato mrokfo duha korhwonom.’”

Sng 118.22, 23

¹² Nd nd mrokfom pthamotrm bro yimam wanyhato kfo memom, “Nd kfo nhombra kfot nomn niewut.” Jisasr pthamo mrokfom rom wanymohat yima yuhumio bi nambur kih bugamomm. Memom, “Ka bi kak twanhiwunomr.” To nhai, yimam htihato afo fakrmemom yakneft. Duka memoum, “Finji rinakrahnom, rom sinyaruhamn tabot nohrahnmom.” Inji dukahato fafho thu tanymomr.

Sisarhu maruha he yuhat
(Matyu 22.15-22; Luk 20.20-26)

¹³ Judaroh bro yimam sinyahato Farisimi Herotrhu politiker patikfot tohyuk yimam yakhato kfo memomm, “Nikmoh womm aikahkomn rorhu mrokfo ptha swirmn

rhunhohato yuwi ttiwon rhtikfot. Finji finji kfiwur, nd tkittn yakhato kotimrahnomr bro yimampno.” ¹⁴ Be inji kfafmotmm yimom. Yihato yuwi ttiwon rhti memomr, “Tisaye, ni pthewa mrokfom nom hifa wanuknomm. Mrokfom hifa hifa kfo hik bohik marnyewanmn Bro Nkifrar hikwa nefm kfo hik nuhas marnyewunmm tuhan yindarim. Mrokfom kfo pthiwohat nhai hti mekahn ndr yufet yimayer o ndr yufa duha yimayer. Nhai. Mrokfom kfo pthaneft be kfo pthewunm. Nhai yimar o yufam htihato kfo pthakahnm.” Inji kfonihato wom ttiwon nmbuhat yuwi ttiwon rhtimomr, “Nome ka Sisarhu takis htahenefte ka htarfonome nhai?”

¹⁵ Rom yuwi inji ttiwon rhtimohat Jisasr bi htimorm rroh dukefm. Htihato kfo memorm, “Tamohmpno inji ttiwon rhtitakma? Afo wom tahifat wayak nuhaskoma.”

¹⁶ Inji kfomotrm wom tahifat hemomr. Nd tahifat yakhato kfo memorm, “To nda tahifat yorhwa nyngatikte frohroh nyngatikti yufat yorhwaf?” Kfo memomr, “Sisarhu nyngatikt korhwott.” ¹⁷ Tfit kfo memorm, “Sisarhu nyngatikt korhwott to be tfit Sisarn hekfot. Bro Nkifrarhum nhaf inji. Tu Bro Nkifrarn hekfot.” Inji kfo wokafmotrm be tuha mrokfo duhatm tohmom.

Sadyusim Jisasr ttiwon rhtimomr yimaroh nohnefti sinyaneft

(Matyu 22.23-33; Luk 20.27-40)

¹⁸ Farisim yimotm tfit Sadyusim yimom. Nd Sadyusiroh dukeft duka memoum, “Noh hanita yimam nhai tfit sinyaruhatm.” Rroh dukeft inji rhumout. Nd dukeftpno Sadyusim Jisasrpno yihato mkfo memomr, ¹⁹ “Tisaye, Mosesrhu boririfhut kfo kangt, wom yimar tuhan yakhato nhai wom yonm kasinya htanirfor, nd rorhu tuhan dhirt tfit wom nmemrn najom dhirt yakhato rorpno yonm nasakhato tfit najomrhu tkim romn tohkfot. ²⁰ Wom yima najohfitpno to inji rhumot. Nd yima najohfit 7-pelakfot tohmom. Barkof bro najomr tuhan fakmor. Ror tuhan yakmohat nhai yonm nasak htanihato nohrmor. ²¹ Be nohmotr tuhan dhirt tohmott tfit rorhu wayakrn fakmort tuhan dhirt. Rorpno nhaf nhai wom yonm nasak htanihato nohrmor. Tfit rorhu mongko nuryukrn tfit fakmort nd tuhan dhirt. Ror yakhato be rpahtet neft. ²² Be inji nahany nahany 7-pela yima najohfit rhu nhombra bugamotm. Wuroh 7-yukrpnone nohmot. Nhai wom yufat kasinya-hermotm nd yima najohfi bugat. ²³ Nd 7-pela yima najohfit rpa metrpatt rim rhuta mrhutamotm. Kto nd najohfit sinya thoft nd mette fitoh yimarpno tohruhat?” Inji ttiwon rhtimomr.

²⁴ Jisasr wanyhato kfo memorm, “Bro Nkifrarhu mrokfom yo rorhu bbukeftpno nd noheh yimam sinya thoft ka mumiwuko. ²⁵ Wawayko, nd bi noh hanita yimam kto tfit sinya thoft nhai tfit tuhan yakruhatm. Nhai. Be inji sfno hefenrhu mounmotm kanjo tohrahm.

²⁶ Nd yimaroh nohhato sinya yuhat Mosesrhu tndht duka hanykfot. Wom yiha Mosesr Bro Nkifrar kahm kanjo mi bufupatn funamotr hti hanymorr. Bro Nkifrar Mosesr kfo memorm,

‘Nane Abraham, Aisak, Jekofroh Nkifraya.’

Kis 3.6

²⁷ Bro Nkifrar yima nfri yafothet yimaroh Nkifrayer. Nhai noheh yimaroh Nkifrar rhukahr. Nikmoh kfoyuk mrokfom kfo mumiwuko.”

Nyingako mtohekwa tu bro boririfhut

(Matyu 22.34-40; Luk 10.25-28)

²⁸ Jisasri Sadyusim mrokfom nakfo nakfomoahat wom nkifra boririfhuthu tisar rhuhato wany yakinoh hasomourm. Sadyusim Jisasr kfo ttiwonmoatmr tfit Jisasr kfo nuhas marnyamourm. Ror inji wany hasohato ttiwon memorm, “Ndar nom wanuka boririfhum, fitoh boririfhutn nyngako tohekwat?” ²⁹ Jisasr wanyhato kfo memorm, “Nd nynging tohekwa boririfhut inji kfiwut:

‘Niko Isrerkawawany marnyako, Bro Nkifrarpar nmoh Nkifrar rhukfot.

³⁰ Bror ninhu Nkifrayer, ndnatn ninhu yuhuwaf marbi bugam,

ninhu yafothat, yo ninhu yima yuhu bugam

be rorparn htakfot.’

Lo 6.4-5

³¹ Yo ndwom boririfhutne:

‘Tunn yak marnyewa kanjo inji womm yak marnyakfot.’

Wkp 19.18

Nd hus boririfhufn tu bro boririfhu mifeef.”

³² Be nd nkifrar boririfhuthu tisar inji wanyhato kfo memor, “Bro yimaye, ni tu tpiyet mrokfot kfiwun. Brorpar tor tu Nkifrar, nhai tfit womm. ³³ Nom be rorpary nmoh yuhuwaf marbi bugam, yima yuhum, bbukefm rorpary htakfot. Yo tunn yak marnyewa kanjo inji womm yak marnyakfot. Nd hus boririfhuf tu fipetef. Rofn tohakhato tarior mthaneft be yak tariokfot.”

³⁴ Jisas nd yimar kfomo mrokfot wanymohat, tu hifa duka tungunet yimam pthiwa kanjo inji wanymor. Wanyhato kfo memor, “Ni bi brbohwo Bro Nkifrarhu kingdomkfot rhuneft.” Judaroh bro yimam wanyhato fakrmemom tfit wom ttiwon nmbuham ttiwonneft.

Frohr miyak htiyakruharnom?

(Matyu 22.41-46; Luk 20.41-44)

³⁵ Jisasr Bro Nkifrarhu temper kmifar tohhato tuhant yindars Bro Nkifrarhu mrokfom kfo nuhas hanyhato kfo ttiwon memorm, “Tamohmpno boririfhuthu tisam kfo yamukam, ‘Yimaroh minrfa htiyakyuk yima Kraisr, Defitrhu frikef yuhathu yimayer?’”

³⁶ Bingot Bro Nkifrarhu Yafothatn Defitr yima yuhur hemotrr kfo memor,

‘Bror kfo memor nanhu Bro Nungothet Kraisr,

“Nanhu bro bbukeft yorhwa tirmifko wamrhun.

Wamrhukahtn nd ni namburwa yahr kmim

afu ninhu tirtn htahato ninhu mofsinhitn yak htaruhamm.” ’

Sng 11.1

³⁷ To nd yima Kraisr bi Defitr kfo yuta hna memoa, ‘Nanhu Bro Nungothet,’ to tfit Defitrhu frikef yuhat nierahr?”

Nkifra boririfhuthu tisaroh fasoh nefm

(Matyu 23.1-36; Luk 11.37-54; 20.45-47)

Bro met yindar rifhur rhuhato wanymohat nd Jisasr pthayuk mrokfom yindhormoum.

³⁸ Jisasr kfo nuhas memorm, “You, niko! Boririfhuthu tisam yukatoh hik marnyaf hanykfot. Turoh yuke yuke saketham hmbrehato maket swirl yau hanynfeft kangm, ‘Yimam be ayindhor amemnom, “Hifa dbha Rabai.” ’ ³⁹ Fitoh rhu rifinyhato kfo bruttnayuk rmonm rom nhai mongkorn o kimbohnko rim rhukfot. Tu be nhai mif. Rom tu be nyngako mruhakkfot. Bro yemro ye burwa tkittn nhaf inji. Rom inji yimaroh nyngako mrhu gngonakkfot. ⁴⁰ Met dhirrpampno yitamn mkfo nheh bonhehaknihato wuskenm kak rhoptakni yahukmm. Bro Nkifrarhu kfo bruttnaneft htirahnm. Nhai be yudbat kfo tmbhoniruhutm. Yuwi kangm, ‘Akfo bruttna yukekahtnom yimam inji htiruhannom mirahm, “Hifa yimayem.” ’ Kto Bro Nkifrar kotkfot yakitoh thoft nd yimamn be tu bro krhopam yakrahm.”

Maruha duha mett Bro Nkifrar maruham hemo yuhat

(Luk 21.1-4)

⁴¹ Jisasr nd Bro Nkifrar maruha mhtanihemoa tkitt rhu hasohato htifyafo hanymourm yimam maruha mhtanimoahat. Nd bro maruhetm bro maruham htanimoum. ⁴² Rroh mongkorn wom met dhirpat niamot. Rothu ramemr nohmotr rot turpatt tohmout. Rot nhai tamoh wuskam o tamohm. Rot yimotn wuroh tuthu yohript rhuyuk wuroh fshot marufenf yakmotfn Bro Nkifrar maruha htahemoa tkittn nd marufenf htanihemotr.

⁴³ Jisasr inji htihato turhu disaiperf nakuyakhato kfo memorm, “Na kfo mifwanko, yimam nd htahani hany marufam nd metrpat hte marufenfn be tu bro marufaf htes.

⁴⁴ Wom womm htahani marufam, rom maruhetmn yak nhtemmn wom fam Bro Nkifrarn hnahehato htahumr. Nd metpatn be tu nhai wom maruhemn kunykort. Tu wuroh yohript rhuyuk wuroh rpa toeakfot Bro Nkifrarn htahut. Rot nhai wom yeshri wiknayuk maruham wom rhukahmt.”

13

*Bro Nkifrarhu temperrhu yoh nasoh yuhat Jisasr kfomor
(Matyu 24.1-2; Luk 21.5-6)*

¹ Jisasr temper kmifar htanyhato turhu disaiper-mpno fau hanymom. Yau hanyhato wom disaiperr kfo memor, “Tisa, wahtinn ndar temperrhu dborioh tahim yo temper kmifar tohyuk dborioh dborioh kunym.” ² Jisasr wanyhato kfo memor, “Bare, ndar ni htita kunym nhai inji rhuruhatm. Yimam niahato kafring witarahmm.”

*Jisasr kfomor bok kurhefm mfrfnahrahm
(Matyu 24.3-14; Luk 21.7-19)*

³ Jisasr yura Olifet kmit muhhato mrhumorn rihtimorr temperr. Ndha rhu hasetrn Pita Jems Jon Andrurom turpam niahato ⁴ ttiwon memomr, “Nd ni kfi mrokfot fitoh yihar rhuruhatt htiruhanomt? Tamoh neftn yak dukaruhattnom mirahnom nd yihar bi brbohwor?”

⁵⁻⁶ Jisasr kfo memor, “You niko! Wanyrahko yimam yi htfasruhamn bok yimam kfo ngeh bonheh htfasrahmm. Nanh yufat yutahato kfo mirahmm, ‘Na bi asoya niko gari hasomo yimaya.’ Inji wanukko mirahko yudbat wany yakiohato amhikakninomm.

⁷ Nna yureft mano mano wanyrah-komt yo fitha fitha rhuyuk nna yurefthu mrokfom wanyakrahkomt. Inji wanuknom, bi mirahko bok dukefm ayaknom. Ndhtet nefm rom nierahm. To mirahko ka bi nd nefmpno bi brbohwor yihar. Nhai. ⁸ Htirahko yo wanyrahko wom kantrikfot sinyaruhatn wom kantrikfotpno nnarahf. Wom kingr sinyaruuharn wom kingrpno nnarahf. Wom kmim yatinoh wormr tohrahrm. Wom kmim bro nunes toniraht. Nd nefm yironarah-komm yon fanet mett barkof riyak yironekwa kanjo.

⁹ Niko tuko duka marnyaf hanykfot. Tukmoh kaunsermpno mkotimruhatmko Judaroh rhu rifinyuk rmonmn hanyhato tabotrahmko. Nanh mrokforoh yimaroh ptha nuhas hanyeftn gafmanm, kingm, nd nd yimaroh tirmn htarahmko. Nd tkittn nanhu mrokfot nd bro yimam kfo nuhasrahkomm. ¹⁰ Nd gutnius mrokfot afo yuht kantri bugat afo wany bugarahmt. Bi wany bugemt, ee btn nd yihar nierahr.

¹¹ Fitha kot swim hanitwomko mirahko yakrmihato akfo amanyom, ‘Amai, na finji kforuhoya?’ Mirahn inji aduka yanhoya. Bro Nkifrarhu Yafothar mrokfo ptha dukefr hirahrn. ¹² Najohfi yagnm tum nahndhnarahm. Womr sinyahato womr hndhnaruhatr wasrahmr. Nitohfim nhaf to inji. Yifemr sinyahato yinemr hndhnaruhatr wasrahmr. Yinemrom nhai yifa-mmampno nayak marnyaruhatm. Yinemrom sinyahato yifam-mam hndhnaruhatmm wasrahmm. ¹³ Nann hikruhatko yimam nhai hifa nytingar hta hakuruhatmko. Be faso hti sr thurahmko. Fitoh yimar toh bmtahany toh bmtahany bbinysofthu bat ihar mfnahr, nd yimar Bro Nkifrar yakrahrr.”

*Jerusalemrhu yak bat ihar
(Matyu 24.15-28; Luk 21.20-24)*

¹⁴ Jisasr kfo memor, “Wahtiyaf hanywako. Bro Nkifrarhu temperrhu kforafet kforafet tkitm bi wom hhrek shrr bi rim yorhtrm nd temperrhu Tahi Yarhr bbnaro-fakhato fnahnir, to be Judia profins tohyuk yimam mirahm wom atoh hasonom, yura kminysofko ayakrmanyitwam. (Yimar mrokfom htiyukr hti hik marnya hanyhato mrokfo yimbu yuham yakkfot.) ¹⁵ Yimar bi kunyshu wom yura ken tikrko wurhu mska hasir, mirahr tfit yiro mmem kunyko ayohnikahann wuskam arimaka. ¹⁶ Yimar bi mswirko yirn ndko tohwor, mirahr tfit kmiko aikahann turhu yuke hmbreshat afo tfit ai ayaka. ¹⁷ Metm yon fanetm yo tefi yon hamboriyetm finji yakrmiruham nd bro krhopam yakakna thombat? Romn tu bro yuhuwafeft korht. ¹⁸ Bro Nkifrar kfo brutnahato mirahr nd bro krhopam bro gonng wormrn arhukahtm yimam nd yiharn ayakrmem. ¹⁹ Nd neft nia thombat mirahko ka tefi tefi kurhefm rhurahm. Ndar bbinysoft trhanimohat nhai ndhtet krhopam rhurmom. Yo ndar toh hniwa yiham nhai ndhtet kurhefm htikahnom. Yo kto nhai ndhtet kurhefm wompam rhuruhatm. Be tu bro bro krhopam tohrahm. ²⁰ Nd

kurheft rhu hany Bro Nkifrar nhai bmbri yak nohrfort, be yima bugam nd kurheft ye wus batirahtm. To nhaft Bro Nkifrar tfit dukarahr tur bi kfo htayuk yimam. Romn dukahato nd krhoparoh tohyuk yiham tfit yak kkopenrahrm.

²¹ Nd yiha wom yimam kfo mirahmko, ‘Barenko, nd Bro Nkifrar kfo htamo minrfa htiyakyuk yima Kraisr bi asor, asha.’ Womm kfo mirahm, ‘Usor, usha.’ Inji wanyrahko, mirahko awany yakionomm. ²² Womrne inji narahr. Mirakerkfot hingrnaruuharn kfo mirahr, ‘Na asoya niko toh gari hasiwa minrfa htiyakyuk yima Kraisa,’ o kfo mirahr, ‘Na profeta.’ Inji kfohato wonk wonk mirakerkfot hingrnarahm. Yuwi mirahm, ‘Tu Bro Nkifrar kfo htayuk met yindarim frnhehakhato ahikmnom.’ ²³ Ndnett duka marnyaf hanykfot. Kfo duka mrokfom bi kfo duka htiwanko.”

*Bro Najomrhu yawihna yihar
(Matyu 24.29-31; Luk 21.25-28)*

²⁴ “Nd bro kurheft rhuniruhatt ee htirahko marr rim noh kfirahr, nhai wom taruhatr. Yamt nhaf inji. Rothu nukeft rim fnahniraht, nhai wom taruhatt. ²⁵ Gunym rom nhai mount rhuruhatm. Rom be wuyohninehato misuhrahm. Mount thu habokknamo yifonm mirahm nndo ginunes kekwotm. ²⁶ Ndtpno ee btn Bro Najomr htiyakrahmr gribpamn hawihnerahmr. Ror yawihna thombat turhu bbuka rifhur yo ror hatoh hneruha nukeft mirahm nndo marrn yifa tohhnewur. Inji htiyakrahmr. ²⁷ Ror yawihna thombat mounmotmn kfo tkrurafhwatr romn tur bi kfo htayuk yima bugam yak nhafoh htfasrahmm.”

*Kutr hti hikkfot
(Matyu 24.32-35; Luk 21.29-33)*

²⁸ Jisasm kfo memorm, “Kutr htitwonomr, twam huktewum kfo kangnom kut yinr tohrahr. ²⁹ To be inji hti nhtakrahkomr Bro Najomrhu nia yihar. Bi nd nd nefm htitwoko, wakfo wamitwako, Bro Najomrhu nia yihar bi brbohwor. Yifhatikt bi tohwor. ³⁰ To nd nefm rhu thoft to mirahko arihat tohwa wom yimam bi nohetmn nd neft rhuraht. Nhai. Arihat wom tohwa yimam yuhre tohetmn nd neft htirahmt. ³¹ Nd neft rhuneft htirahko mounti bbinysoft mibatinirahf. Nanhu mrokforpat nhai mibatiniruhatt.”

*Nd nefroh rhuyuk yihar nhai wom yimar tawisafkahr
(Matyu 24.36-44)*

³² Jisasm kfo memorm, “Nd na kfiwa nefroh rhuyuk yihar nhai wom yimar tawisafkahr. Mounmotmi Bro Najomr rom nhaf nhai tawisafkahn. Tu Bro Yifemrpar tawisafwort.

³³ Niko nhai tawisafkahko nd nefthu rhuyuk yihar. Ndnett nikob be duka marnyahato hti yukatoh hasokfot. ³⁴ Nd neft wom yimar kunys htanyhato warkmit yita kanjo inji rhuraht. Kuny sikatr kunys htanyneft hingrna yimam rpa rpa hingrnfem kak htanyworm, kuny yifhatikthu tohyukr kfiwurr kunyshu yukatoh marnya hasoneft. ³⁵ Ndnett nikob be yimbhindangm tohetohaf hanykfot. Nd kuny sikatr ka krifn o yifung o ka dbha ksut nierahr. ³⁶ Miruhatr tfit yudbat ania, mirahn hwe haseta amihtira. ³⁷ Ndar na kfiwa mrokfom yuht met yindari bugam kfiwa. Niko buga difronhato hti yukatoh hasokfot.”

14

*Jisashu was yuhathu mrokfot bro yimam rhu pthamo yuhat
(Matyu 26.1-5; Luk 22.1-2; Jon 11.45-53)*

¹ Yispa hta duha bretparoh ye yiharhu barkof yihar, kutewumr Pasofa burwa yihar,* nd yihar bi brbohnetrn prisroh bro yimami nkifra boririfhu tisam tum rhu rifinyhato Jisashu hndhna nhehakhato was yuhathu mrokfot nafak dbkafmomt. ² Kfo

* ^{14:1:} Isrerm Ijift tohhato Bro Nkifrar miyak htiyakmo yihar kutamoumr Pasofa burwat, nd yihar rhu rifinyhato tfit kedukamoumr Isrerm Ijift htanymohat. To nd Pasofa yihari wom 6-pela yiham yispa duha bretpam kamoum.

memom, “Nd bro Pasofa burwa yihar mirahnom awasnomr, to be you muht kanjo watanhehakrahnom. Bi kmi kmi nia rifinyetmn to be romn wahiyafrahnom.”

*Wom mett Jisasrhu mfhat mfh mtha yahrnyet welpaye yuk wunamo yuhat
(Matyu 26.6-13; Jon 12.1-8)*

³ Jisasr Jerusalemt toh tanyhato Betaniko yimor. Yihato Saimonrhu kunys yi tohmor. Saimonr bingot lepra dbohneft yakmotrn to bi frtrufnimot. Nd Saimonrhu kunysn nuwa ye hasetrn wom mett be tu dborioh mtha yahrnyet wel botort hnamot. Nd wel botort frtfnamottn nd bro maruhaye wiknamo welpaye Jisasrhu mfhat fuk wunamotr. ⁴ Nd mett Jisasr welpa wunamo yuhat yimam htihato tum nnakfo memom, “Tamohmpno nd mett welpam be wurasoh furetm? ⁵ Nd wel botort yimam 300 silva maruhaye wiknarfotmt nd maruham yakrfonomm herfonom nd maruhapa duha yimam.” Inji kfo huttmomt. ⁶ Jisasr memorm, “Inji akfowahkomt. Rot tu dborioh neft nita. ⁷ Nd niko kfiwa maruha duha yimam, rom nhai fitha yiruhatm. Kangko, fitoh yiha ahti dukanomm, nhai mrokfom. Na, na nhai wom tohnhorhotanko. ⁸ Nd mett ka tamohr bi kfo memort, ‘Yima gur welpam wunefiwa kanjo welpam bi wayuk wunafoakahtnr yopt yirahr.’ ⁹ Na kfo mifwanko gutnius mrokfot kfo ptha habrineft, ndar mett nefineft nhaf kmi kmi kfo ptha duka htfasrahmt.”

*Judasr kfo fakiomor, Jisasrhu hndhna yuhat
(Matyu 26.14-16; Luk 22.3-6)*

¹⁰ Nd yiha 12-pela disaiperroh wom disaiperr kutewumr Judas Iskeriotr prisroh bro yimampno yimor. Yihato kfo memorm, “Inji inji hndhnaruhanr.” ¹¹ Nd bro prism wanyhato yindhormom. Yindhorphato kfo memomr, “Maruha hirahnomn.” Judasr wanyhato yima yuhur fak nhtamourr Jisasrhu hndhna yuham.

*Jisasrhu hus disaiperf yeshrim hta mskamo yuhat
(Matyu 26.17-25; Luk 22.7-14; 22.21-23; Jon 13.21-30)*

¹² Be rhumomn nd yispa hta duha bretpam yeyuk yiharoh barkof yihar niamor. Nd yispa hta duha bretpam yamo barkof yiharn Pasofa sifsifr washato ndr tariorh mthamoum. Nd yihar disaiperm Jisasr mkfo ttiwon memomr, “Nd Pasofa burwat rhu thombat, nome yeshrim fitha hta mskaruhatnom ni rhuhato ye jukaruhant?” ¹³ Jisasr turhu hus disaiperf kfo memorf, “Waikahfnn tauntn wom yimar burioh roht titetrpno mnafuryakrahko. To be mirahfn finji ainyo. Rorn wayau hikaknitwafn. ¹⁴ Ror fitoh kunys kitwor, nifn nd kunys yikfot. Fknenihato nd kuny sikatr wakfo wamitwafn, ‘Tisar kfo famur, “Waikahfnn nd kuny shofr ayak nuhastwarfn nani nanhu disaipermpno Pasofa burwa yeyuk tkitt.” ¹⁵ Inji wakfo ttiwonkahtfn yurakorhof rumt yak nuhasrahrfn. Nd rumtn mhtirahfnm tebor gaji nd ndm. Ndharn wahta mskatwafn. Nom nierahnom.” ¹⁶ Be rof yimofn nd Jisasr kfomo yimar kmi yifhatiktn toh hasetr mhtimofr. Ror yimo kunys yimof. Nd nd nefm be Jisasr kfomo tng yuhatn hti bugamofm. Be ndharn rhuhato hta mskamofm nd bro yiha yeyuk yeshrim.

¹⁷ Yifungnano Jisasri turhu disaiperm mfnah bugamotm nd hus yimaf hta mskahasomo yeshrim rhuhato famomm. ¹⁸ Ye hanyhato Jisasr kfo memorm, “Na kfo mifwanko, nikmoh womrn hndhnarhotra wasrahma. Tor asha kenuhiwurnom na hndhnaruhar.” ¹⁹ Be inji kfomotr disaiperroh yima yuhum foh tmbhonimomm. Rpa rpa sinyahato kfo ttiwon memoumr, “Ni kfihat frohmn inji naruhamn? Ka nann?” Tfit womr sinyahato kfo memor, “Ka nann?” Womr, “Ka nann?” Womr, “Ka nann?” ²⁰ Jisasr kfo memorm, “Tor womr korhnuhiwurnom. Nd yimar bretpat yaknhohato wain bupayet dis tayifiknuhir, tor nd yimarn hndhnarahra. ²¹ Bro Najomr kangr anoha, ndt mrokfo duhatet. Rorhu noh nmbuhathu mrokfot bi nkiframpno kfo tndh hnettn nhai finji kforuhatt. Tmift nd Bro Najomrhu yak hndhna hanyuk yimarne kanga fitoh yuhat yiruhar? Mmemt hiyau duha rhurmotr.”

Jisasr disaiperm bretpa, wain bupa hemo yuhat
(Matyu 26.26-30; Luk 22.15-20; 1 Korin 11.23-25)

²² Nuwa ye hasohato Jisasr bretpat yakmortn Bro Nkifrar wukfo yindhornimorrn yak tif nhombrahato disaiperm he nhombrahi hanymorm. Kfo memorm, “Nd bretpam wayak wayakomm. Ndm nanhu nmpayem.” ²³ Wain bu kaft yaktm mort nhaf Bro Nkifrarpno kfo yindhornihato tengot nhombra he bugamotrm famomm. ²⁴ Kfo memorm, “Ndar wain bu kaft tfit niko yekwat nd nfri yihotar hingrnaruha hingrneft. Kto na nohhato nanhu kkut yohni thombat nd kkupamn nd nfri hingrneft be yak dbkafrahtt. Be tawo nd nfri hingrneft wahiktawo. ²⁵ Na kfo mifwanko, na nhai tfit wom wain bupam yerhota. Bro Nkifrarhu kingdomforpatn tohhato ee btn nfri wain bupam tfit yerotha.” ²⁶ Be wuroht, windoht windoh trufnihato be tfit Olifet kmi yorgko yimom.

Pitar mong trohruba nmbuhat Jisasr kfo pthamor
(Matyu 26.31-35; Luk 22.31-34; Jon 13.36-38)

²⁷ Olifet yorgr mfnahhato disaiperm Jisasr kfo memorm, “Bro Nkifrarhu rfa borngt kfo kangt,

“Tohukatohr wasaknirhotanr sifsifm natubaturahm.” Sek 13.7
 Nd mrokfot bi ruhettn niko bugako na finji naknewuma, kakrme trohwokma.

²⁸ Tfit sinyaruha. Sinyahato na bi Galliko tohak hanyruha.” ²⁹ Pitar wasinyahato memor, “Ndar wommn wakfo. Romn buha msuhtahato mhik htafrahmn. Na nhai mhik htafrhotann.” ³⁰ Tfit Jisasr memor, “Na kfo mifwann, hrek yifungnano krirhu husyuk naku tngt tafi wany juha, husfirpa kfo namhit kfo namhi kangnm, ‘Na nhai tawisafkahahn Jisasr.’” ³¹ Pitar sinyahato kfo memor, “Be tu nhai mif. Na kanga, ninpno anoha, to nhai tfit kafrohrhotant ninhu yufat.” Pitar kfomo yuharpat wom wom disaiperm rpa yuharpat kfo hikmom.

Jisasr Getsemani swirtn kfo bruttnamo yuhat
(Matyu 26.36-46; Luk 22.39-46)

³² Jisasri disaiperm afo Olifet kmit tohetmn yimom wom tkitt kutewumt gaden Getsemani. Ndha Getsemanit mfnahhato Jisasr kfo memorm, “Asha afo warhu hasoko. Na afo Bro Nkifrar rim kfo bruttnefiwa.” ³³ Pita Jems Jonrompno yimom. Yihato Jisasrh u yima yuhurio nhai marnyarmorr. Yima yuhur be nur dungunangu yima yuhurpno rhumour. ³⁴ Be yima yuhur yak nhombratihato kfo memor, “Yima yuhur be nd nur dungunangu yima yuhur mtakihwotra kanga be amyakniya. Asha warhu hasoko. Mirahko ahwanyom.” ³⁵ Wunye kkofmorn bbinysoft msuhhato kfo bruttnamor. Memor, “Akfo bruttnakahta nd krho mis nhai yakrhotta.” ³⁶ Kfo bruttna hanyhato kfo memor, “O Dajaye, ndar bbinysoftu yimaroh fasoh nefm na be hta krhorhotma nann nohruhanm. Bi brbohwatt kanga akfoyann. Nd krho mis na yakruhat kangn ayak tuhant, be hifa, na yindhorwa. E nhai, kangn ayakrt, be nhai mrokfom, yakruhant. Na be ninn yukatohruha. Kangn, finji anaya, nhai mrokfom.”

³⁷ Inji kfo bruttna tanyrn tfit yimor nd husfirpa yimam rhu hasomo tkittn. Yihato yihom htimorm hwi hasetmn. Rim tohhato kfo memor Pitar, “Saimone, nine aso hwitin? Nhai rpa auakfot afo ruhakkfot?” ³⁸ Niko sinya rhuhato kfo bruttna hasokfot. Hwe rhu fura hasorahko, to be tamoh nefm mfrnhrahmk to be suhrakko. Yima yuhur sinyarahi finji na finji naneft, to thatipt, fitha bbukeft yakruhat?”

³⁹ Be inji yihom kfo tanyrn tfit yimorn tur kfo bruttnamo mrokfom wompam kfo bruttnamor. ⁴⁰ Tfit wompam nhaf niahato yihom htimorm nyina krkotakhato hwe hasetmn. Yihom htihato tfit yihom frthumorm. Yihom frthumotrm mfhtas sinyahato nhai hifa yima yuhum yakrmom pthayukm.

⁴¹ Ror inji yihom hti tanyhato tfit yimor. Yimorn tfit niahato rpahtet neft yihom htihato kfo memor, “Barenko, nikome asoko yuhre hwe tokr hasiwuko? Be tmift nd hwe tokr hasoneft. Wawanyko. Yihar bi asor. Bi na Bro Najomanhu fasoh

fasoh net yimaroh tirroh yi yihayer bi. ⁴² Wasinyakahtko riyahnom. Wahtiko, nanhu mhndhnakyuk yimar tor bi niewur.”

*Judasr yihato Jisasr mhndhnakmo yuhat
(Matyu 26.47-56; Luk 22.47-53; Jon 18.3-12)*

⁴³ Jisasr yuhre ptha haso hanymor, rorhu yakyuk yimam mhatohmomt bainati mhrs. Tu Jisasrh disaiper Judasrn hatohakmorm. Prisroh bro yimami nkifra boririfhuthu tisame Judaroh bro yimam, kfo tkrurmotmm Judasr hasinyamorm. ⁴⁴ Nd Jisasr hndhnakyuk yimarn bi kfo hta bohta memorm, “Wahtyafo hanyswokma. Na yauyaknihato fitoh yimar mkihendhoraknitwa, wamitwako, tor nd yima Jisasr. Ee inji bi htitwokma, nd yimarn yauyaknihato yakkfot. Yakhato be yima tire hanyruhakomrn bro yimampno hanykfot.”

⁴⁵ Be nd Jisasr rhumo tkitt mfnah-mohat, Judasr yauyaknimorn Jisasr rim kihendhoraknihato kfo kangrr, “Tisa.” ⁴⁶ Be yimam yauyaknihato tirtir fakmomr.

⁴⁷ Rom fak hanymomr, Jisasrpno toh hasoyuk disaiperr mhti nambur-nihato bainat watuhakmortn ka prisroh bro tohak yimarhu hingrna yimar bainate yimbhindangt frububafmotrr misuhmot. ⁴⁸ Jisasr sinyahato kfo memorm, “Barenko, nane raskor yimam kanjo bainat, mhrs hasinyahato nia kekwokma? ⁴⁹ Na yiha yiha Bro Nkifrarhu temperr yorhwa kmifat tohhato met yindarim mrokfom hemoahat nhai niko inji yihato hfnahaknirmokma. To nhai mrokfom. Ndar niko niwa nmbuhat nhai finji kforuhatnom. Bi profetmn mrokfot bi kfo hnetttn to be bi rhu hikwot bi.” ⁵⁰ Nd turhu disaiperm htimom bi Jisasr kak hasiwumre, rom fakrme troh tanymomr.

Wom yima damiagr yakrmemo yuhat

⁵¹ Wom yima damiagenr ganyom hmbresha wondhetr Jisasrn hik hanymor memom, ka yakrahnom, ⁵² to nhai, yakrmiyakhato hmbreshat thu brhoh tanyhato sfno bmbom-brohr fakrme fnahmor.

Jisasr kaunsermpno kot tohmo yuhat

(Matyu 26.57-68; Luk 22.54-55; 22.63-71; Jon 18.13-14; 18.19-24)

⁵³ Nd Jisasr yakniyuk yimam hanymomrn tu nd prisroh bro tohak yimarhu kunysn hanymomr. Nd kunysn prisroh bro yimam yo Judaroh bro yimam yo nkifra boririfhuthu tisam rifinymom. ⁵⁴ Pitar, ror be nhowi mongkongotn fau ss hik hanymourm. Bi prisroh bro tohak yimarhu kuny kmifarn bi hanitwomre, ror be nhowi yimorn Bro Nkifrarhu temperr tohukatohyuk yimampno brbo kahtpno haunyomour.

⁵⁵ Jisasrh kotkfot yakitohyuk bro prism yo Judaroh kaunserm fak hambromoum yimam. Memoum, “Wom yimam ayakkahnorn romn wom kfo wok mrokfom htaruhatmm Jisasr wasrahnomr,” to nhai, wany sitamomm. Rroh mrokfom nndo nndo pthamomm.

⁵⁶ Yimam be yuwi furahato pthamoa mrokfom, womroh mrokfom nndo yimoum, womrohm nndo. ⁵⁷ Wommn kfo wok fura memom, ⁵⁸ “O nomn wanymonom kfo memor, ‘Bro Nkifrarhu temperr yak tasohruhoyanrn tfit husfirpa yiharpa tfit kasinyaruhanr. Kasinya thoft nhai yima tire hingrnaruhatr.’” ⁵⁹ To nhai, nd nd mrokfom rom pthayukm nhai be rpa mrokfo yuhat ptha hikrmomm. Womm nndo ptha-moum, womm, rom nndo pthamoum.

⁶⁰ Jisasr nd yimam pthamoa mrokfom wanymoahat nhai kfo wokrmorm. Ndnett prisroh bro tohak yimar sinyahato Jisasr kfo ttiwon memor, “Tamohmpno ndar rom kfowi mrokfefm be rhuhato wanukanm? Wapthal!” ⁶¹ Jisasr nhai ptharmor.

Tfit wompam kfo ttiwonmorr, “Ni asone nda bbinysofthu yimaroh minrfa htiyakyuk yima Kraisn Bro Nkifrar nd kfo tkrurafmor? Ni nd Tunga Nkifrarhu Yon wife?” ⁶² Jisasr wasinyahato kfo memor, “Na to tawom nda. Htirahkoma na, Bro Najoma, tfit bro hta nngrajohet Nkifrarhu tirmifko rhuhato gribpamn hawihnerahmr.” ⁶³ Jisasr inji kfomotr prisroh bro tohak yimar inji wanyhato rorhu yarim ruhakyuk hmbreshat teh dborfamort. Teh dborfahato kfo memor, “Mirahko tfit wom yimam anakukahnorn nda yimarhu nefm ania apthanom. ⁶⁴ Bi wanukomr kfo yamuhat, ‘Na Bro Nkifraya.’ To finji

dukewako? Ndar yimare finji naruhanomr?” Tfit nd kot tohyuk yimam kfo memom, “Nd yimar bi mrokfeter anohtwar.”

⁶⁵ Be inji kfonihato tuha kuninfar bokuninfar thumomr. Nyingatikt rmonthaye kitasiftahato tire frsrfa bosrfamoumr. Frsrfa hanyhato kfo ttiwon memoumr, “Nd ni frsrifiwa yimame frohem?”

Pitar kfo memor, “Na nhai Jisasr tawisafkahanr.”

(Matyu 26.69-75; Luk 22.56-62; Jon 18.15-18; 18.25-27)

⁶⁶ Pitar kuny kmifarn kah haunyo hasetrn bro prisrhu wom hingrnayuk mett mhtimotr. ⁶⁷ Mhtihato kfo memot, “Ni to aso womenn Nasaret thof Jisasrpno tohnho htfasmoa.” ⁶⁸ Pitar sinyahato kfo namhi memor, “Bare, nann yari yutewun. Na nhai tawisafkahanr.” Pitar inji kponi hanyhato kmifathu getkfotn yihom tohmor. Ndha yihom toh hanymor krir nakumor. ⁶⁹ Toh hasetrn tfit nd bro prisrpno hingrnamo mett ndha yihom htimo. Yihom htihato nd brbo toh nafif htfasmo yimam kfo memotm, “Asor womenr Jisasrpno nd toh htfasmoar.” ⁷⁰ Pitar tfit wompam kfo namhimor. Kfo namhimotr nd toh nafif htfasmo yimam toh hanyhato kfo memomr, “Bare, ni aso rroh womenn. Ni Galili thofe.” ⁷¹ Pitar tfit wasinyahato kfo memor, “Na tu be kfo mif mifwanko, na nhai mif tawisafkahanr nd niko kfiwa yimar. Na kfo furewane Bro Nkifrar yak tutfarahra.” ⁷² Inji kfo hanymore, ee tfit wompam krir nakumor. Krirhu naku tngtpno Pitarhu yimbhindangm ndnatn tuppomomr. Tuppohato yima yuhur tfit niamotrr tfit dukamort Jisasr kfomo mrokfot. Kfo memor, “Hrek yifungnano krirhu husyuk naku tngt tafi wany juha, husfirpa kfo namhit kfo namhi kangnm, ‘Na nhai tawisafkahanr Jisasr.’” Nd mrokfot dukakhato tuha rim nur kaugomor.

15

Pailatrpnno Jisasr kot tohmo yuhat

(Matyu 27.1-2; 27.11-14; Luk 23.1-5; Jon 18.28-38)

¹ Dbha ksfutn prisroh bro yimami Judaroh bro yimam, yo nkifrar boririfhuthu tisam, yo wom kaunser bugam rhu rifinyhato Jisasrhu kotim yuhat napthamom. Napthahato memom, “Pailatrhu tirtn htarahnomr.” Mrokfot nayak nhtamomtn mti baklain tofe kimomr. Kiyakhato Pailatrpnno hanymomr.* ² Pailatrpnno mtohmotr kfo ttiwon memor, “Nine Judaroh kinge?” Jisasr memor, “Uwa. Mrokfot to bi kfo twanhewunt.” ³ Prisroh bro yimam ritohhato wom kfo wok mrokfom tumomm. ⁴ Pailatr kfo memor, “Bare, ni wanuknm nd yimam ninhu yufatpno mhfnahniwa mrokfom? Tamohmpno ndar kfo wok bowokwa mrokfom tawo kfo wok duha yitanm?” ⁵ Jisasr nhai wom mrokfom ptharmor. Pailatr inji htihato duka nhi memor, “Arr tamohtet yimarn nhai kfo wokkahrm?”

Pailatr kfomor Jisasr yura bgre misn anohr

(Matyu 27.15-26; Luk 23.13-25; Jon 18.38-19.16)

⁶ Pasofa burwa yiharn kalabus tohyuk wom yimar Judiaroh gafanar kak thu hnamour. Tu kmi thofmn fitoh yimar yibonwom yak tuhafoneft, yufat yutamoatm, nd yimar kak thumour. ⁷ Nd kalabus htamo yimam gafmanrpno wom yahrt rhumott wom yimam nambur tonehato yima wasmom. To nd yimam kalabus htamomm. Nd yimaroh wom yimarhu yufat Barabasr. ⁸ Nd Pasofakfot yi rifinyuk yimam yi rifiny bugahato Pailatr kfo memomr, “Ni tu Pasofa yiha na hakuta kanjo hrek inji wana.” ⁹ Pailatr mtohnihato ttiwon memorm, “To finji dukewako? Nda Judaroh kingr kangko ayak tuhafoya?” ¹⁰ Jisasr be prisroh bro yimam kfo wok furahato kalabus htamomr. Ndnett Pailatr ndhtet kfo ttiwon mrokfot htamort. ¹¹ Prisroh bro yimam bi kmi thofm kfaf hany memouumm, “Wakfo naku wameko, ‘Pailatr Barabasr ayak hfhanafor.’” Be nd bro prisroh kfomo yuhat kfo hikmom. ¹² Pailatr wanyhato ttiwon memorm, “To nd niko kfo

* ^{15:1:} Nd yima Pailatr Rom thofer. Tu Rom thofmn htamomr Judaroh gafanar. Tu Judaroh kotkfot tohyuk yimam nhai bi wasrmoamm, afo tfit Pailatrpnno hanymoumm. Ndnett Jisasrhu waskfot kfomohat tu Romm htayuk Pailatrpnno hanymomr.

yamuka Judaroh kingr, nd yimare finji naruhoyanr?” ¹³ Nd yima rifhur tohmor wanfak wanfak memom, “Bgre misn wakihegirkomr.” ¹⁴ Pailatr memor, “To tamohmpno? Finji namotr inji naruhoyanr?” Tfit mrhuni mrhuni memom, “Bgre misn wakihegirkomr.” ¹⁵ Be Pailatr memor, “Rroh yima yuhum ayak marnyayanm.” Ndnatn Barabasr yak tuhafmorrn tfit Jisasr yakhato soldiaroh tirm htamorr. Memor, “Romn wife wife tabotakhato bgre misn kihegirrahmr.”

*Soldiam Jisasr kfo tfar botfarmo yuhat
(Matyu 27.27-31; Jon 19.2-3)*

¹⁶ Soldiam Jisasr yaknimomrn hanymomr mrokfo yakinhyuk tkitrn. Nd tkitr hanyhato soldia bugam yi rifyn bugamom. ¹⁷ Ror hatohmo hmbresham fak rhoh bugamomrn tfit kku kkorpa kanjo fnhuyet rmonthar thu kasimomr. Yo soldiam huhra mtitoft yakkemomtn kingroh mfhamb hatohwa yabisoht kanjo yakkemomtn mfhathn wathu hamsismomr. ¹⁸ Yo yon mumennm kanjo wukfo tfar botfar memooumr, “Woi, Judaroh kingr.”† ¹⁹ Inji kfo tfar botfarmoamr yo kuninfar thumoumr. Yo tirt yakinhyuk mis dhemot, ndt tfit yak hutfakmoamr mfhapako warbigmoumr. ²⁰ Nd kfo tfar botfar tonemomrn yo tfit nd kku kkorpa kanjo fnhuyet rmonthar yakta thumomrn tfit turhu hmbresha mifm hmbremomr. Hmbrenimomrn hanymomr bgre mis tuhegiryuk tkittn.

*Jisasr bgre mis tu hegirmo yuhat
(Matyu 27.32-44; Luk 23.26-43; Jon 19.17-27)*

²¹ Kmi rim fnahnitm htiyakmomr wom yimar. Nd yimarhu yufat Saimonr, Sairini thoer. Aleksanda Rufusrofhu yifemer. Nd yima Saimonr memor, “Taunko aiya.” Soldiam ror yakmomn nd Jisasr tita hanymo bgre mis rorn tfit wathu titafmom. Rorn tita hanymort.

²² Jisasr soldiam yakni hanymohat hanymomr wom tkitt kutewumt Golgota. (Kfe sfiohniyet yima mfhamb kanjo nd tkitt rhumoatt futamoumt yima mfhapt.) ²³ Memom wom marasinm wainpampno bi rpat yak tahmor hmbriyetm Jisasr ahikahtnomr yeruharn nd frtekr botkermo tkitm frifrarahmr. To nhai. Kfo kurmor. Nhai yak yarmorm. ²⁴ Soldiam Jisasr yura bgre misn kihegirnihato yo tfit rorhu hmbresham yakhato pirai satumomm.‡

²⁵ Dbha 9 kilok tuhegirmomr. ²⁶ Wom mrokfo nmbuhat plan mkutn wandfakmomtn yura mfhapt pno frdbkafmomtko. Nd mrokfot rom wandfakhato htamot kfo memot, “Judaroh Kingr.” ²⁷⁻²⁸ Jisasr tuhegirmo tkittn hus rikoh yimaf mano mano tuhegirmomf. Womr tirmifko hirmor, womr kindonko hirmor.§

²⁹ Jisasr hegirmo bgre mis tu yihota yuhat tohettn rim fnahni mfnahniyuk yimam rim grha wase bowasenihato yihom kfo tfarnyi mkfo tfarnyamoumr. Kfo memooumr, “Ni kfo mayete, ‘Bro Nkifrarhu temperr yak tasohhato tfit husfirpa yiharpa tfit kasinyahato hingrnaruhant.’ Ni inji kfet yimaye. ³⁰ To btn wamifnahnekahtn ahtinomn.” ³¹ Nd prisroh bro yimam yo nkifra boririfhuthu tisam, rom rpat inji kfo tfar memooumr, “Ndar yimar ror toh hingrna hnamohat bok met yindarim rorn fak marnya hnamorm. Asomift to nhai tur mifnahnekahtn htikahnomr. ³² Nd Isreroh kingrn Bro Nkifrar kfo tkruraf thombat nda bbinysoftu yimaroh nrfa htiyakneft, afo tur amifnahnekahtn ahtinomr. Htiuhanomn duka mirahnom tu nmoh nrfa htiyakyuk yimayer.” Nd mano mano hirmo yimaf rof nhaf kfo tfar mrokfom kfomofr.

*Jisasr nohmo yuhat
(Matyu 27.45-56; Luk 23.44-49; Jon 19.28-30)*

† 15:18: Wahti Matyu 27.9 yorhwa kfo nuhasyuk mrokfot. † 15:24: Tahiham tubatu hanymomn htimom, frohrn hifa tahis fturt, nd yimar faktomr Jisasrhu wom hmbresham. § 15:27-28: Wom safemann duka memom, tot wom mrokfo nmbuhat ndar veskfothut. Nd mrokfo nmbuhat inji kfifut, “Bi Bro Nkifrarhu rfa borngtn mrokfot kfo memota, ‘Nd yimar htimomr fasoh nefm nayet yimam kanjo. Nhai hifa nytingar htarmoamr.’ Nd mrokfot bi kfo htamot bi tot bi mfrfnah hanitt.”

³³ Dany marrn marrhu nukeft be rim nohnimot. Kantri bugat be yambontift rhumom. Wuroh 3 kilok krif marr tfit niamor. ³⁴ Tri kilok kanjo marr toh hanymor Jisasr tau nakuyafmor, “Eli, Eli, lema sabaktani?” Nd mrokfothu mrokfo yimbu yuhat inji kfiwut, “Nkifraye, Nkifraye, tamohmpno bi frtrophwona?” ³⁵ Inji kfo nakumotr brbo tohyuk yimam wanyaf hanyhato kfo memom, “Nd yimar Iraijar nakutr.” ³⁶ Wom yimar toni hanyhato spans yakkorn wainpamm tayifakhato miyeftn htahato memor, Jisasr hikahta bupam ndtn tmasakrahr. Bupam hehato kfo memor, “Afo htiyaf hanyrahnom, Iraijar naku kfihat Iraijar finji naruharr?” ³⁷ Be wuroht tau nakuyafmorn be mfaknimor.

³⁸ Yimar myakni hanymo fijo nd bro rmonthar temperrhu tu Nngrajoh Hnaru Gnanhehr gna rafomor be buha mifn rmonthar yoh nmbrmorn mano mano rim rhu mrhumor. Yurak wuyoh nmbrakmorn miyoh nmbr witanihato mano mano rim hir mhirmor. ³⁹ Jisaspno brbo tohmo amiroh keptenr Jisasr nohmo yuhat htihato tuha mfha tha duhatr rhumor. Memor, “Dajohn! To finji tfit kforuhanom? Nd yimar tu Bro Nkifrarhu Yon mifer.”

⁴⁰ Tom wom metm be inji wuri kkof tohhato hti hasomoum. Taun Makdala ekfot Mariat, Jemsri Josefrohu mmem Mariat yo Saromet, nd nd metm hti hasomoum. ⁴¹ Nd yute metmn Jisasr Galilit tohmohat romn uhik ahik htfasmoamrn tamoh tamohm romn hiyaf hanymoumr. Yo wom metm rpatn Jisasr Jerusalemko yimohat hik hanymomr.

Jisashu thatipt tahi muhtn rihtamo yuhat

(Matyu 27.57-61; Luk 23.50-55; Jon 19.38-42)

⁴²⁻⁴³ Judaroh taun Arimateathu wom yimar tohmour. Rorhu yufat Josefr. Juda kaunserkfot rorrn nd kaunserkfot hingrna tohnhomoumr. Bok met yindarim rorhu nefm hifa hti wofnmoumm. Rorhu dukeft duka memour, “Bro Nkifrarhu kingdomkfot afo nanhu nyngaye afo htiruha!” Nd dukeftpno tohmour. Nd Fraide yihar, bi tu Judaroh bro rhu krna Sabat yihar bi rhu yibon hanymomr. Sarere yihar nd rhu krna yihar rhumoumr. Ndnetrn krifnano Jisasr bi nohetrn nhai wofnrnor Jisashu tfkhat wom rhukfot. Pailatrpn yimorn mtohhato ttiwonmor Jisashu thatipthu yakni yopneft. Nhai yakrmi hanyhato yi mtiwonrmorr. ⁴⁴ Pailatr Jisashu noh mrokfot wanyhato tuha mrokfo duhatr rhumor. Be yudbat turhu keptenr nakumorr. Memor, “Afo tu keptenrpno wany marnyaruha Jisashu noh mrokfot.” ⁴⁵ Pailatr keptenrpno wany sungunahato ee Josef kfo fakiowafmorr Jisashu thatipthu yaknineft. ⁴⁶ Josef Pailatrhu tngt wany marnya tanyhato yimorn nfri ganyom rmonthar wiknakmor. Nd nfri rmonthar yak nyngit htatahato Jisasr bgre miyetr wuyak kasuhakmorrn ganyom rmontharn wahtahato rir hmbremorr. Rir hmbreyaknihato hanymorr. Hanyhato tahi muhtn rihtamorr. Nd tahi muhtn htamorrn tahis yakhato tahishu muht hta tittafmort. ⁴⁷ Makdala ekfot Mariati Josefrohu mmem Mariat tohhato hti hikmom Jisashu thatipt htamo tkitt.

16

Jisasr sinyamo yuhat

(Matyu 28.1-8; Luk 24.1-12; Jon 20.1-10)

¹ Nd rhu krna Sabat yihar rhuni bugahato Makdala ekfot Mariat yo Jems Saromerofhu mmem Mariat welpam wilknakhato memof, “Hanyhato Jisashu thatipt gbrorna wunarahnonr.” ² Sande yiha bi dbha ksutn sinyanihato yimom nd Jisasr rihtamo tahi muht. ³ Yau hanyhato tfit tuf rinnakfo nakfo hany memouf, “Nd tahi muht frtasif tanymo tahise frohmn yak rihtaf nuhafruhamno?” ⁴ Inji nnakfonihato asha mtohhato htimoft nd yonmari tahis muht frkih tanymot nhai wom rhurmot. ⁵ Be sfnohtn be yauyaknihato fau fknenimof. Yiro rim tohhato asha htimoft wom yima damiagr yok thar hmbreyetr tirmifko rhu hasomor. Be tuha mrokfo duha tohmof.

⁶ Nd yima damiagr kfo memorf, “Mirahfn afuntasno. Nifn ka nd bgre mis kihegirmo Nasaret thof Jisashu yau hafott niefn. Nd yimar bi sinyani yifir. Ndart ror yarim htamo tkitt, bi sfnoh tkit furayet. ⁷ Waikahfnn turpno yau htfasmoa yimam yo Pitar wakfo

wamitwafnm, Jisasr bi sinyanihato bi Galiliko mtoh gari hanitrm. Tur kfomo yuhatn Galiliko ndko amhtitwamr.”

⁸ Nd yima damiagr pthamohat, be bro yakrme rifhurpno tohhato wanymoufr. Be nd yakrme rifhurpno fnahnihato yimof. Yimohat nhai wom yimar kfo marimofr, “No inji htitawono.”

Makdala efkot Mariat Jisasr htimo yuhat

(Matyu 28.9-10; Jon 20.11-18)

⁹ Jisasr Sande yihar dbha ksut sinyamor. Sinyanimohat barkoft Makdala efkot Mariatpno myak nriyafnimotr htiyafmotr. Nd met Mariatn Jisasr yima nfrir tohmohat 7-pela kmi yarhm fak thumort. ¹⁰ Mariatn hti switafhato rotn yihato Jisasrpno yau htifasmao yimam nur dungunangu hasetmn mkfo nuhasmotm. ¹¹ Kfo memotm, “Jisasr bi sinyer. Na bi tuka htiyefiyannr.” Nd nur dungunangu hasoyuk yimam nhai wany yakiomomt. Rom memom, ka yuwi furewut.

Hus yimaf Jisasr htimo yuhat

(Luk 24.13-35)

¹² Kto Jisasrhу wom hus disaiperf tuha taunt sinya tanyhato yimof. Buha yihotatn Jisasr htiyafmofr. Rorhu ruheft nndo tfit htimofr. ¹³ Be rof inji htiyahfato womm yi kfo pthamofm. Womm rof kfoyuk mrokfom wanymohat nhai wany yakiomomf. Memom, ka kfo furewuf.

Jisasr rorhu disaiperm kfo tkrurafmo yuhat

(Matyu 28.16-20; Luk 24.36-49; Jon 20.19-23)

¹⁴ Kto wuroht tu Jisasrhу 11-pela disaiperm nuwa ye hasetmn mifnahmotr htimo. Yihato kfo huttmorm. Ror htiyafomoa yimam kfomoahat nhai wany yakiommoam. Memom, ka be kfo furewum. Ndnatn kfo huttmorm. ¹⁵ Kfo memom, “Nikomn ndar bbinyosfhu kmi kmim nanhu mrokfot wakfo nuhashi habri bugatkomm. ¹⁶ Waptha habrikahkomm fitoh yimam wany yakiohato baftais kak hanitm, nd yimam Bro Nkifrarhu tirtn rhurahm. Yimam nhai wany yakiokahm nd yimam be bro kotkfot torahm. ¹⁷ Nanhу mrokfom wany yakio hanyruha yimam wom bbukeft Bro Nkifrar hi hanyrahrm. Nanhу yufatpno yarhm yak thurahmm. Yo wom nndoh yarmumam be ptha furakni hakurahmm. ¹⁸ Yima waset nandom nehum tire yak hakurahmm. Foret yeshrim yerahmm be nhai finji naruhatm. Be fipa duhatm rhu hakurahm. Dbohnet yimam rom tir htarahmm be marnyani hakurahm. Nd nd nefm yimam htiruhann mirahm, tu Bro Nkifrarhu bbukeftpno hingrnewum.”

Bro Nkifrar Jisasr hefenko hamuhmo yuhat

(Luk 24.50-53; Aposer 1.9-11)

¹⁹ Bro Nungothet Jisasr nd mrokfom kfo buganihato be Bro Nkifrar yakhato hamuhmorr hefenko. Hamuhmorr turhu bro bbukeft yorhwa tirmifko fak htamorr. ²⁰ Be Jisasrhу disaiperm kmi kmim yi htifashato Jisasrhу mrokfom kfo ptha habrimomm. Bro Nungothetr tohnho-moatrm rom pthamoa mrokfem fipetm rhumoum. Wom wom mirakerkfom rpat hingrna htifasmoum. Ndnatn rom pthayuk mrokfom wany yakiomoumm.

**Lukr
dwandfamo gutnius mrokfot
Barkof kfo nuhas mrokfom**

Lukr Wandfamo Gutniuskfotn hti dukarahn Jisasr niahato Isrermi riruh aruh kmiyak-mim nrfa htiyakmo yuhat. Jisasrhу hingrneft riingrnakmohat met yindars kfo memorm, “Brorhu Yafothathn thu kasinyamotta nd knbok yuham rirhu arhuyuk yima bebpam nann gutniuskfot kfo hi hanyruhanm,” (wahti Luk 4:18). Ndnettн Jisasr nda bbinyosf thofm yuhuwafhato rorn nohhato rroh rhu nmbuhat fak marnya bomarnyamort.

Lukr tndh hik bohik marnyamorm Mariat Jisasr hiyaumo yuhat yo ror hefenr muhmo yuhat. Tndh hikmotrm yimam htimohat rorhu tndh mrokfom hti yindhormomm.

Jisasr tohhato nahnamo wom wom nefm Lukrparhu rfa borngtn htirahnm. Nhai wom rfa borngm htiruhatnm. Lukrhu rfa borngtn wandfa hik bohikmorm Jisasr nurmo yuhathu mrokfom, Samaria thofr yak marnyamo yimarhu tndht, wom yonr yifemr htanyhato nkiranimatoru kfo nhombra mrokfot yo wom wom tndhmi kfo nhombra mrokfom, nd nd mrokfom Lukrhu rfa borngt korhm.

Wom mrokfom Lukr mfro dukahato kfo pthamom, kfo pthamor kfo bruttnaneft, Bro Nkifrarhu Yafothathu hingrneft, bbinyosf thofroh fasoh fasoh nefm Bro Nkifrar yafho thuhemo yuhat, yo metm Jisasrhу hingrnefm hingrnanhomo yuham. Ndm wom mrokfom ndar gonborngt htamorm.

Lukr wandfamo mrokfom nhai ndar gonborngrpat rhukahm. Nhai. Rorhu wom mrokfom Aposer gonborngtn korhm. Rorn nd Aposer gonborngt wandfamort.

Lukr Tiofilusrno gontwat wandfahato nd kfo nuhasmo barkof kfo nuhas mrokfom

¹⁻² O Tiofilus, Jisasrpno rhu hawihnamo nefm bok yimam htimomm. Rom htihato pthamomm. Pthamotmm wom yimam rompno wanyak hanyhato wandfa hanymomm nd Jisasrhу tndh mrokfom. ³ Ndnatn na to inji kanga ni Tiofilusnpno awandfakahann, akfo nuhas hik bohik marnyann nd Jisasrhу tndht rhumo nefm. Nd mrokfom kanga akfo nuhasann. Bi tuka nd tu hti hiket yimampno rhuhato wany hik marnyamoyanmn ndnatn kanga awandfa nuhasann. ⁴ Tamoh mrokfom ni bingot wanyafmom, nda na wandfayuk mrokfem htiruhann, mirahn, “Dajohmn, nd na wanyafmo mrokfot tu mrokfot wanyafma.”

***Elisabet Jon Baftaisr hiyaumo yuhathu tndhti Mariat Jisasr
hiyaumo yuhathu tndht***

(Sapta 1.5-2.52)

Sekariar nasakmo yonrhu yuhat mounmotr niahato kfo nuhasmo yuhat

⁵ Herotr, Judiaroh kingr tohmo yiharn wom yimar tohmor. Rorhu yufat Sekaraiar. Rorn bro Nkifrarhu temperrhu hingrnefm kakitohmourem. Nd temperr tohyuk yimar kutamoumr pristr. Sekaraiar Abiya kuny shofer. Bingot rorhu nkifra Abiyar nd pris hingrneft mfakitoh fnahmort. Sekariar Abiya kuny shofer. Rorhu metthu yufat Elisabet. Rot nhaf inji buga. Rothu nkifram nd pris hingrneft mfakitoh fnahmormt. Rot Eron frikef yuhatn niamot. ⁶ Sawoh sawohfhu toh nmbuhat hifa tohmoatf, Bro Nkifrar hifa hti yindhormorf. Boririfhu mrokfom rof hifa kak hik marnya-moufm. ⁷ Nd sawohf tohmoahat be inji yon duhatf tohmouf. Mett nhai yon hiaurmoat. Sawoh sawohf bi tabo buga hanymof.

⁸⁻⁹ Wom yiha Abiya frikeft tum rhuhato memom, “Wom yimar ayak htanom temper-rhu fknihato tarioh mtha inji nayukr.” Ndnatn yimaroh yufa yak nuhasuk neft namom. Nd neft nahato nd neftn Sekaraiarhu yufat fak nuhasmotm Bro Nkifrarhu temperr yihato tarioh mthayukr. Bingot bi ndhtet neft na hnamoum. To be nd nef yuhatn fak hikmom.

Bok yimam nd temperr hingrnamoum. Wommn womhtet hingrnefm hingrnamoum. Tfit wommn womhtet hingrnefm hingrnamoum. ¹⁰ To be Sekaraiar temperr fknenihato nd miroh fipam tarioh mthamohat bok met yindarim briahako rhuhato Nkifrarponko kfo bruttnamoum. ¹¹ Nd tarioh mthayuk tkitt toh hasetrn Bro Nkifrarhu mounmotr niamorn, nd tarioh mthayuk tkitt tirmifko mitohmor. ¹² Be wom Sekaraiar inji htihato yafotha duhatr rhumor. ¹³ Nd mounmotr sinyahato kfo memor, “Sekaraia, ni mirahn aduka yanhoya. Ni kfo bruttnamohat bi wany moyann. Nd ninhu met Elisabett, be yonr hiyauhirahtn. Yon yindarir hiyauhiruhattn, yo yufat wayutatwanr Jonr. Bro Nkifrar rorn bro yufat htarahrr. ¹⁴ Ni inji htiruhann, ninhu yima yuhur be yifa marnya-ruharn, yindhorrahn. Bok met yindarim ror htihato be yindhorrah. ¹⁵ Rorn Bro Nkifrar bro yufat hirahrr. Nhai wain bupami yima thu hamumet bupam yeruhatr. Yuhre mmemthu yatit ruhetrn, bi nd Bro Nkifrarhu Yafothat thu nawohrah. ¹⁶ Rorn nd Isrer yon kunys tfit yakruharm, tfit turoh Nkifra Yawerpno yak htarahrm. ¹⁷ Rorn nd Iraijsr hatohmo yafothat mthu nhombraraht. Ror bi Brorhu nyina yuhut bi tohak hanyruhatr, nitohfi nitohfim tfit niak marnya hakurahrm. Yifemrom yak marnya hakurahmm yinemrom. Rorn nd hanyjbornetroh yima yuhum tfit yak marnyarahrh hifa duka hik marnyetrohm kanjo. Bi rorn met yindariroh yima yuhum bi yak marnya haso hanyruharm, ee btn Bror nierahr.”

¹⁸ Sekaraiar sinyahato mounmotr kfo memor, “Nd ni kfiwa mrokfot mduka nhiyaktitwant. Sawoh sawohno ndu bi tabou bugayetno, finji wom finji rhuruhan? Wom nefm yak nuhasrahnno, ee duka mirahno awi ndu mrokfot tu kfomif kfot kfomor.”

¹⁹ Tawo mounmotr kfo memor, “Na Gabriera. Na Bro Nkifrapno brbo tohwa. Rorn kfo tkrurefitra, niya ninhu kfot. Tu hifa dborior kfo nuhas mrokfot hnahuhan. ²⁰ Wawanyn, na kfoyuk mrokfom nhai wany yakiorfomm. Ndnatn be tng mmkn rhurahn. Be nhai ptharuhatn. Nd na kfoyuk yonr bi fnurnire, ee btn tng pthetn rhurahn.”

²¹ Nd briahako rhu hasoyuk yimam gariti garitihato duka memoum, “Barenko bingot yiuk yimare to tamohmn riyak hatohwar?” ²² Ktopa kto be tng mmkr fnahnayetn, hti yak hanymomr. Nhai ptharmor. Be inji tng mmkr fnahnehato be tirrpaye fak nuhasmourm tamoh tamohm. Be yimam inji htihakhato duka memom, “Ka hwe twehnano Bro Nkifrar hti hanir. Ndnatn ka mrokfo yafothar fekrr.”

²³ Rorhu nd temperrhu hingrna yiham hingrna hanymorn, hingrna tmbhonihato be tfit turhu kmiko yimor. ²⁴ Kto rorhu met Elisabett yon fanett rhumot. Tut inji htihato afo tir yuhut yamm kamongmot. Kfo memot, ²⁵ “Nantu yon hiyau duhathu yimtna nmbuhat Bror hifa wahtihato yuhuwa fmora.”

Mounmotr niahato Mariat kfomo yuhut

²⁶ Elisabetthu yon fanet rhu nmbuhat mounmotr kfo nuhasnimortn, dfik yamm tohnihato 6-yuk yamtpno Bro Nkifrar tfit mounmotr Gabrierr kfo tkrurafmorr Galiliko yorhwa taun Nasarethu yinjeft. ²⁷ Nd taunt yorhwa wom met tmahtu yufatpno yimor. Nd met tmaht bi Defit frikef yuhut niayuk yima Josefrpno kfo nanf hanymomt. Nd met tmahtu yufat Mariat. ²⁸ Nd mounmotr rotpno yihato mkfo yindhoraknihato kfo memot, “O bar mete, nine to? O hifa mete, Brorko hifa hti yindhorworn.”

²⁹ Mounmotr inji mkfo yindhoraknimot, tfit Mariat duka kinyaknihato memot, “Name finji kfiwura? Hrekrrpa ndhtet kfo yindhor mrokfot wanuka.” ³⁰ Tfit mounmotr kfo memot, “Maria, ni mirahn finji ariduka adukaya. Bro Nkifrar ninn hifa hti yindhorwor.

³¹ Wanukn, yon fanetn rhuruhan, yonr hiyaurahn. Nd yonrhu yufat wayutatwanr Jisars.

³² Nd yonr sinya thombat be tu bro yufet yonr tohrahrr. Yimam yuta hakurahmr ‘Tu yura myorhekwa Nkifrarhu Yonr.’ Turhu nkidom Defitr hatohmo bro yufat kindo tfit nd yonr Bro Nkifrar nd bro yufat hirahrr. ³³ Nd Jekof frikeft yutiwa Isrerm, rorn tohukatohrahrr. Rorn toh yukatoh hanyrahrr yiha yiham.”

³⁴ Mariat inji wanyaf hanyhato kfo memot, “Na ndhtet ram duhat meta, to finji kanjone yon faneta rhurhoya?”

³⁵ Tfit mounmotr kfo memort, “Bro Nkifrarhu Yafothar mithu nawohruharn, tu myorhekwarhu bbukeftpno toh hnkokn hmbriruharn, nd yonr thu hmbrirahrr. Bro Nkifrar thu hmbri-ruhatrr, to be ndnatn nd yonr yutarahmr Bro Nkifrarhu Yonr.

³⁶ Wawanyn, ninhu tangiyem Elisabett nhai yon hiyaurmoat, futamoumt nmbit. Arihat ar bi tabou bugayett, to nhai, to bi tfit yon fanetet. Bi 6-pela yamm yimom. ³⁷ Nhai wom tamoh nefthu finji naneft Bro Nkifrar mduka nhiyakkfot.”

³⁸ Mariat inji wanyhato tawo kfo memot, “Wawanyn, na Brorhu hingrnefroh hingrnayuk meta. Kangr nd ror kfia tng yuhatn finji anaya, na nhai mrokfom.” Be Mariat inji kfomott, nd mounmotr htanymortn yimor.

Mariat, Elisabett yi htimo yuhat

³⁹ Mariat mounmotr htiyafohato kto rorhu mongkorn rot bmbri Judako yimot. Kminysofm muh wohne fnahhato mifnahmot nd Sekaraia sawohf rhumo kmitn.

⁴⁰ Mifnahhato yimot Sekaraia sawohf rhumo kunysn. Kunys fkneni-hato Elisabett rhu hasettm rim kfo yindhoraknimott. ⁴¹ Rim kfo yindhoraknimott, nd Elisabetthu yatit rhuyuk yonr ka nd yindhor mrokfot rim pthaknimott, ror riyindhorhato ridbuhatokmor yiro yatitn. Bro Nkifrarhu Yafothar yawihnamorn, Elisabettn mithu nawohmor. ⁴² Mithu nhombramotrt, yimat bro yindhor yima yuhur yakhato Mariat masat kfo ptha memott, “Metroh mkukort be ni Mariann Bro Nkifrar yak marnya bomarnyarahrr. Yo nd yatit rhuyuk yonr, ror inji buga yak marnyarahrr. Rpat nimehetfn yak marnyarahrfn.

⁴³ Na ndhtet met furapaya, to tamohmpno ar Brorhu mmemt tfit nanopno wanies?

⁴⁴ Wawanyn, Maria, na ninhu yarim kfo yindhorakna tngt wanyhato nanhu yatit rhuyuk yonr, ror nd kfo yindhor tngt wanyhato ror rpat riyindhorhato yiro yatitn ridbuhatok yindhorrio.” ⁴⁵ Elisabett sinyahato Mariat kfo memott, “Maria, Bror mikfo tanyuk mrokfom ni hifa wany yakiowonm. Ndnatn yak marnya bomarnyarahrn.”

Mariathu yindhor yima yuhur

⁴⁶ Mariat wanyhato kfo memot,

“Nanhу yima yuhur Brorparnko yindhorwor.

⁴⁷ Nanhу yima yuhur na minrfa htiyekwa Nkifrarpar yindhorwor.

⁴⁸ Na rorhu hingrnem hingrniwa met furapaya.

Nhai marimor met furayet. Nhai.

Nanhу rhu nmbuhat htihato hti yuhuwafmora.

Arihami kto bok met yindarim na nda Bro Nkifrar yak marnyewa nmbuhat htiruhann,
kfo yindhorrahmt nanhu yufat.

⁴⁹ Bro bbuka nanyjaret Nkifrar be tu hifa fak htamora.

Ndnatn nanhu yima yuhurio rorhu yufat be inji tahirhut rhuraht.

⁵⁰ Arihat tohwa yimami kto tohruha yimam

be rorparhu duka yanhowefrpar tohhato
rorhu yinhit tohruhamn,
rorhu yuhuwafneft be romn rhuraht.

⁵¹ Nd yimam turoh yufam yura yura htamoam,

rorhu bbuka nanyjaret tirm thu yukehato
bi fak thumorm.

⁵² Nd king yufam tohet yimam bi wuyak thurakmotrm,

tfit nd yufapa duha yimam bi mfrfnahnimom.

⁵³ Yatinohetmn nd hifa hifa shrm bi thu rmonhemor,

tfit nd bok wusketm brioh hti marsisafomorm.
Nhai wom tamohm hiyafhato yakitohakrmom.

⁵⁴ To be ndnettn nd kfo tahi mrokfot bi ruhettn niamor.

Niahato turhu hingrna yimam, kutewumm Isrerm, yuhuwafmorm.

⁵⁵ Bi bingot Bro Nkifrar Abrahamrpno rikfak memor,

‘Rorhu mongko sinyahato toh hanyuk yimam yiha yiham yuhuwaf hakuruhanm.’ ”

⁵⁶ Mariat husfirpa yamm Elisabettpno toh tanyhato tfit tuthu kmiko yimot.

Elisabett Jonr hiyamu yuhat

⁵⁷ Elisabetthu yon fant hatoh hanymott, yon hiyau yiharn yon yindarir hiyaumot.

⁵⁸ Rothu yifa mndarm inji htihato kfo yindhorhato kfo memom, “Bro Nkifrar hifa hti yuhuwafmort.”

⁵⁹ Nd yonr mharhuhato namba 8 dei kfotn yonrhu tha puk thut niamom. Tha puk thunihato yufat memom, “Yifem Sekaraiarhu yufatn tfit hmbrenomr.” ⁶⁰ Tfit tu yonrhu mmemtn warhuhato kfo memot, “Mirahko wom yufat ayutanomr. Jon yufatn wayutatwakomr.” ⁶¹ Tfit rom kfo memomt, “Nd ni kfiwa Jon yufat nhai ninhu tangim yuta hnarmomt nd yufat.” ⁶² Be inji nna kfonihato memom, “Ka tu yon yifemrn yonrhu yufat yuta nuhasrahrnom.” Ror tng mmkrn btn tire yak nuhashato memoumr, “Yon yufat wayuta nuhasnnom.” ⁶³ Sekariar memorm, “Slet mkut wahne hikma.” Slet mkut hnamotmt, Jon yufat wandfa nuhasmorm. Wom yimam inji htihato memom, “Mama! Ndart tu be womhtet neft hrekrpa htitwonom.” ⁶⁴ Yufat wandfani hanyhato ee tort rigrakhato Bro Nkifrar rikfo ptha yindhor boyindhorakmor. ⁶⁵ Sekaraiarhu kmi thofm nd ror namo neft wahtiyafa-mohat nhai wom yafothetm rhurmom. Nd Sekaraiarpno rhumo nefthu mrokfot nhai brbo wom warhu hasormot. Judiakorhof kminysofm rhuyuk kmi bugam wany bugamomt. ⁶⁶ Nd yonrhu mrokfom wany hanyuk yimam wanyhato bok dukefm yakmoamn, duka memoum, “Nd yonre warhoni thofte nko finji kanjohot yimar tohruhar?” Rorhu sinya nmbuhat be Bro Nkifrarhu tirmn fak hta bohtamomr. Ndnatn inji duka nhtamom.

Sekaraiarhu kfo yindhor yuhat

⁶⁷ Be tfit nd yonrhu yifem Sekaraiar Bro Nkifrarhu Yafothar mithu nawohmotrr, Bro Nkifrarhu mrokfom pthamorm. Kfo ptha memorm, ⁶⁸ “O Tunga Nkifrar, arnat bi turhu yon kunys yukatohwarn, be arihatn tfit yak marnyarahrnom. ⁶⁹ Turhu hingrna yima Defitrhu frikef yuhathu yimar bi yak htarorn, nom be rorn minrfa htiyakrahrnom.

⁷⁰ Bingot bi turhu dborioh profetmpno pthamo yuhatn yak hikhato kfo tkurrafmotrr, niamor. ⁷¹ Bi rompno bi kfo hta memor, ‘Nantu yon kunys yahr kmiroh buha yorhwamn, be hti srhasiwumm. Yirhoyann, miyak htiyakruhanm.’ ⁷² Bingot tohmo nmoh nkifram ror yuhuwafmormn, fakmorm. Bingot ror kfo tahimo mrokfot yuhre duka hanitrt. ⁷³ Bi bingot tunmoh nkifra Abrahamrno kfo tahimo yuhatn hikwarn, kangr, ‘Aminrfa htiyakkahanm, tfit tukianhu hingrneft yak htaruhanm. ⁷⁴ Tukianhu hingrneft tohruhamn be nhai wom yakrmiruhatm. ⁷⁵ Be yiha yiham nanhu yufa yuhat tohruhamn toh marnya bomarnyarahm.’ ⁷⁶ Ni nda yonn, kto yutarahmn yura myorhekwa Nkifrarhu profetn. Ninn Brorhu nytinga yuhat tohak hanyruhann, rorhu nia yuhat bi ninn yak hta bohta hanyrahnt. ⁷⁷ Bi ninn yiruhann, kfo mirahnm, ‘Bro Nkifrar nikmoh fasoh fasoh nefm yak thuhiruharko toh marnyarahko.’ ⁷⁸ Tunmoh Nkifrarhu yuhuwaf nmbuhatn bro nukafat hirahrnom. ⁷⁹ Nd yiro kspitat rirhuyukmio yo nd bro yihotar yauwam, rom nd nukafat nieruhatn, nukeft hirahtm. Nmoh yau nmbuham rorn yak htaf hanyruhatrnom, be hifa nd hifa noh hmbre yima yuhurn yaurahnom.”

⁸⁰ Nd yonr warho hanymor, rorhu dukefm rpat yimarpro warho hikmom. Be nd yonr nd yima toh duha bbinysoft toh hanyhato be Isrerk tohyuk yima bugam hti hik bugamomr rorhu nd dborioh dukefr yo rorhu toh nmbuhat.

*Jisasr nurmo yuhathu kfo nuhas mrokfot
(Matyu 1.18-25)*

¹ Nd yihamn bro toh yukatoh Sisa Ogastasr wom mrokfot hta htfasmort. Kfo memor, “Arihat inji narahnom. Romroh gafmanrhu yinhit tohyuk yimam yufam yak bugarahnomm.” ² To be tot nd yiharn Romroh gafmanrhu yinhit tohyuk yimam yufa rihtakmom. Nd yihart Sairiniasrn Siriaroh gafmanroh mfhako rhuyuk yimar tohmor.

³ Ndnatn nd wom wom kmim toh hanyuk yimam tfit turoh kmi mnako yi hanymomn, yufam hta hanymom yufa htayuk bro gonborngtn. ⁴ Josefr Defit frikef yuhat niayetrn, ndnatn Galilikorhof kmi Nasaret tohetrn to be nd kmit htanymortn, tfit yimor Judiako yorhwa kmi Betlehemtn. Nd kmi Betlehemt Josefhrhu nkifra Defitrhu kmitn, ndnettn to be turhu nkifra kmi mnako yimor yufa htat. ⁵ Mariat Josefrpno yuhre kfo nanf hanyettн yon fanett rhumot. Yimohat yon fanett rpat yimof. ⁶ Yihato bi Betlehemt mfnahetfn, Mariat fak yironamot. ⁷ Yak yirona-hato yon yindarir hiyaumot. Nd nurmo yonr tor rot hiyaumo barkof yonr. Hiyauwakhato rmon thaye yak rir borirakhato bulmakaum yeshrim yamoа mmbrtn wakmbremotr. Yiro bro kuny yirukkort yimam rhu furkihatn, to be foхroh yeshri hwe rhu nuwa yemskamoako nurmor, to be nd bulmakaum yeshrim yamoа mmbrtn wakmbremotr.

Mounmotm sifsifroh tohukatohm kfo nuhasmo yuhat

⁸ Nd kmitn sifsifm hatoh yukatohmoa yimam wom tkittn yifung sifsifm hatoh yukatoh hasetmn, Brorhu mounmotr mifnahmorm. ⁹ Nd mounmotr mifnahhato Brorhu bro nukeft, nd mounmotr hatohmohat memom nndo bruwohmrm katiwur. Nd sifsifroh hatoh yukatohyuk yimam nukeftn yakmottm, memom, "Ayakrmanyom." ¹⁰ Tfit mounmotr inji htihato kfo memorm, "Inji ayanhowahko. Na tu hifa dborioh mrokfeft hniya. Nd mrokfot bok met yindarim wanyshoft, wany yindhorrahmt. ¹¹ Wawanyko, hrekn nikmoh hbbakyuk yonr wom mett hiyausr Defitrhu kmitn. Ndr Bro Kraiser. ¹² Wahti hanyswako rmonthaye rir borirakhato bulmakauroh yeshri yeuk mmbrtn htayeter. Htitawokomre, wamitwako, 'To tawomr asor nd nom wanu kfo nuhas mrokfothu yonr.' "

¹³ Inji yuhre nd rpa mounmotrpn naptha hasoyetmn, asha tfit wom yonmari mounmot rifhur yura moun yuhat fawihnamom. Yawihnehato nd wom mounmotrpn naptha hasomo tkitt mirifiny hmbri yaknamom. Mirifinyaknehato miptha yindhorakna memom, ¹⁴ "O yura hefenrhu tunga Nkifraye, nda bbinysofthu yimam ni hti yindhorwam wayak marnyakahtnm, yima yuhum noh hmbrerahmm."

Sifsifroh tohukatohm Betlehemko yihato nd yonr htimo yuhat

¹⁵ Nd mounmot rifhur inji naptha tanyhato tfit wayakhato yura hefenko muhmom. Nd sifsifroh tohukatohm htiyafomm, bi kitwome, ee rom tfit tum rinakfo nakfo memom, "Barenko, Betlehemko aikahnomn, htirahnom nd Bror kfi yonr." ¹⁶ Be inji napthanihato bmbri Betlehemko yimomn, hambro hanyhato mhtimomf Josef Maria sawohf yo nd yonr bulmakauroh yeshri yeuk tkitt wahtetrn. ¹⁷ Nd yonr mhtihato mkfo memom, "O, nom nda yonrhu nur nmbuhat Bro Nkifrarhu mounmotm niaromn, kfo meromnom nd yonr bi fnurr. Nom rroh tngt wany sanyhato nienom nda yonrhu htit." ¹⁸ Bok yimam nd sifsifroh tohukatohm inji kfomotm, riduka adukamom. ¹⁹ Mariat nd wanymo mrokfem wanymotmn, be yima yuhurn wany hmbritamotm. Be memot, "Be afо htiyafо hanyrahnom." ²⁰ Be nd sifsifroh tohukatohm inji hti tanyhato be tfit yindhorefrparpno yimom turohko. Nd rom htihato wanymo mrokfom turoh nyngaye hti yimbu hikmomn, be nhai wom mrokfom ptharmom. Be yindhorefrparpno yimom.

Jisasr yufa hmbremo yuhat

²¹ Kto 8-pela marm rhunimomn, yonrhu that puk thunihato ee yufat nd yiharn futamomr Jisasr. Nd Jisas yufat bi mounmotrn Mariatpno niamohat yonrhu yufat bi mikfo nuhas tany memort, "Jisas yufat wayutatwanr."

Jisasr Bro Nkifrarhu temperr hafknemo yuhat

²² Josef sawohf, Mosesru thfa mntwathu mrokfom yak hiketfn, nd yonr nurnimohat afo yuk trufnimofn, ee tfit kto Jerusalemko hanymofr nd nfri yonr Bro Nkifrarhu henyeft.

²³ Bi Bro Nkifrarhu thfa mntwatn bi kfo memot, "Barkof nkati yonr nuryukr, nanhu yufatn rhukfot." To be ndnettn hanymofr Jerusalemkorn, rorhu hekfotn. ²⁴ Kandhi mthaneft nhaf inji buga, bi thfa mntwatn mrokfot bi ruhettn, memof, "Hus ganyom

mmkrf o nda mtimohet rgumif kandhi mtharahnonrko.” Nd nd hingrneftn nd yonr hanymofr.

²⁵ Rom riphар yimom, nd yihart Jerusalemt tohmour wom yimar. Nd yimarhu yufat Simionr. Nd yimar be tu hifa dborior yimar tohmour. Bro Nkifrarhu thfa mntwat kfoyuk mrokfom kak hik bugamourm. Ror tohmoahat gari haso memour, “Nko fitoh yiha nd Isreroh minrfa htiyakyuk yimar nieruhar?” Bro Nkifrarhu Yafothat toh natwihmoutr Simionr. ²⁶ Nd Yafothatn bi kfo memot, “Ni afo tafi noh duhatnn, htirahnnd Bror kfomo yimaroh minfra htiyakyukr nia thombat.” ²⁷ To Josef Mariarof Mosesrhu thfa mntwat yakitohetfn, nd yon Jisasr bi Bro Nkifrarhu temperrn hany hanymofr, Bro Nkifrarhu henyeftn. Josef riphар bi yau hanyetmn Simionr Bro Nkifrar thu yuhurmorr rmonko yinyeft. ²⁸ Simionr be yihato temperr rim fnahnihato nd riphар rhu hasetmn, rim htimorm. Rim htihato nd yon Jisasr fakmorr. Yakitoh hanyhato Bro Nkifrapno wukfo yindhor memor,

²⁹ “O, Broye, nd ni nanopno kfomo mrokfot asor nd yonr bi tukanhu nyngaye bi htitanr.
Be na arihat nohneft nhai mrokfom.

³⁰ Na bi tukanhu nyngaye bi htitant ni minrfa htiyakruha nmbuhat.

³¹ Kto nda bbinysof thofm hti bugarahmt.

³² Bro Nkifrar Isrerm minrfa htiyakruha nmbuhat,

nd ror hnaruha nukeftn,
nd wom tangishofm htiruhamn,
nd nukeftn yak dukarahtm.
Ndhatn tfit ninhu yon kunys, rorn nd nukeft hneruhatr,
rom bro nukeft yakruhattr,
ndnatn bro yindhoreft yakrahmt.”

³³ Jisasrhu yifammaf inji wanyhato rof tfit duka nhtahato kfo memof, “Nda Simionr kfiwa mrokfothu mna yuhate, nko finji rhuruhat?” Tfif rof sawo inji fak nhtamouft. ³⁴ Be Simionr Nkifrarhu yufatpno yak wus bowusnimormn, Mariat kfo memort, “Wawany, Bro Nkifrar ror htafmor nmoh minrfa htiyakyukr. Bok Isrerm rorhu mrokfefm hanyjbornahato suhrahm. Womm nd rorhu mrokfom yak hikyukm, rom tfit yak kasinyaf hanyrahrm. Nd yima yuhu behohetm o dborior yima yuhetm ndnatn hti nhtahato mirahmnom, ‘O arr ndhtet yimayer.’ ³⁵ Ndhatn bok yimaroh yima yuhum yak duka tungarahrm. Yak duka tungaruhatrm, tafont rhurahm. Nd ni hiyauyuk yonr bok krho nmbuham yakruhattr, ni nd yonrhu hiyau mmemn htiruhann, krhorahn. Mirahme, ‘Kfraye waswomr yima yuhur.’ ”

³⁶ Ndharn wom profet mett tohmout. Rothu yufat Anat. Rothu yifemr Fanyuerr. Nd yima Fanyuerr Asa frikef yuhat niamor. Rot tmaht tohmohat ram fakmot. Ram yakmotn, nhai toh buhtarmor ramemr. Be 7-pela gunyjimrpam tohhato nohmor. ³⁷ Ramemr noh htanimotrt, to be dhirt tohmout. Rothu gunyjimm bi 84-kfot rhumom. Nd metthu toh nmbuhat tohmoahat, nhai Bro Nkifrarhu temperr thu trohrmoatr. Yifung marm be Bro Nkifrarhu temperrn rhuhato nuwa kurhato kfo bruttna hasomout. ³⁸ Maria Josefrof nd yonrhu nmbuhatn Simionrpno naptha hasetmn, Anat nd temperr ruhettn, niahato Bro Nkifrar mkfo yindhormotr. Kfo yindhornihato nd yonrhu mrokfot kfo nuhas hi hanymotm yimam. Kfo hi hany memoutm, “Niko Bro Nkifrarn gari haso memoa Jerusalemrhu minrfa htiyakyuk yimar ahnarr, to bi tor, bi niamor.” Inji kfo nuhas hi hanymoutm.

Josef riphар Nasaretko tfif yimo yuhat

³⁹ Josef sawohf nd thfa mntwat kfoyuk tamoh tamoh hingrnefenm hingrna truf bugamofmn, tfif yimof Galilikorhof kmi Nasaretko. ⁴⁰ Nasaretn tohhato yima yonr warhonimor. Yima yonr warho hanymo fijo, yima dukefm rpatt yimarhu warheftpno fak hikmom. Yo yonrhu toh nmbuham Bro Nkifrar toh natwihmotrr, be hifa hifa toh marnyamor.

Jisasr Bro Nkifrarhu temperr fknemo yuhat

⁴¹ Pasofa burwat Jerusalemrn rifinyhato htamoumt. Jisasrhу yifammaf rpa rpa gunyjimm Jerusalemko yihato hti rhunhomoufm. ⁴² Josef Maria sawohf nd Pasofa yiham nhai rhurmoaf, yiha yiha yimouf. Wom Pasofa yiharn Jisasr bi 12-pela gunyjimetrn, hik hanymorf. ⁴³⁻⁴⁵ Jerusalemkо yimomn, nd Pasofakfothu rhuyuk yiham rhunimomn, be tfit Josef sawohf memof tufhuko ainyo. To be rof sinyani yimof. Rof sinyanimohat, memof yinem yonr ka bi wommpno nyina yuhat tohak hanitr. To nhai, ror Bro Nkifrarhu temperr rhu hasetrn, yifamma sawohf htanymofr. Rof yimofn, nd Nasaretko yiuk yimampno myau hikaknihato memoufm, “Nnoh yonre htitawokomr o nhai?” Tfit womm mhtimoufm kfo ttiwon memoufm, “Nnoh yon htitawokomr, o nhai?” Ttiwonhanysi, ttiwonhanysi, be tfit mkekutakhato tfit Jerusalemkо yimof, rpa marr hambrotihato. ⁴⁶ Jerusalemkо yihato ndha tfit wom marr hambromofr. Hambrohany tfit husfirpehyuk marrpnone rim htimofr Bro Nkifrarhu temperr thfa mntwathu tisampno rhu hasetrn. Rom nd tisam mrokfom ptha boririfhumoahat, ror rhuhato wany yakitohmourm. Wany yakitohhato wom mrokfom ttiwon inji namourm. ⁴⁷ Nd rhu rifinyuk yimampno ror nd kfo ttiwonmoa mrokfom yo pthamoa mrokfom wanymoamrn, duka memoum, “Barenko, ndar yonr be tu bro yimar kanjo tu bro dukayet yoner.” ⁴⁸ Yifammaf tisampno rhu hasetrn, rim hti fohtashato mmemt memot, “Bare, tamohmpno ndhtet neft namo? Ni hambro htashato nnoh yima yuhum dungunanguwomno. Kangno, ‘Nko fitoko yir?’ Tkit tkitm wusono wusono rim hambrak mhambrakrouno.” ⁴⁹ Tfit yinem Jisasr warhuhato memorf, “Tamohmpno rim hambrak mhambrakrofna? Nhai duka mekahfn, ‘Yifemrhu kunys korhr?’ ” ⁵⁰ Yinemr inji kfomohat yifammaf nhai yakrmof yinemr pthamo mrokfothu yimbu yuhat.

⁵¹ Be rim hti yakmofrn, rpat tfit yimom Nasaretko. Yiha yiha yifammafhu kfoyuk mrokfom kak hikmourn. Mmemt nd mrokfom Jisasr pthamom nhai mong trohrmotm. Nd mrokfom rothu yima yuhurn wany hmbritamotm. ⁵² Jisasr bronihato ror yakmo dukefm tu hifa dukefm fakmor. Rorhu toh nmbuham Bro Nkifrarri yo bok yimam nda bbinysofthum, hifa hti yindhormomr.

Tamoh tamoh hingrnefm Jon Baftaisr hingrnamom, Jisasrhу hingrna yuham hingrna gari hasomor

3

(Sapta 3.1-4.13)

*Jon baftaisr Bro Nkifrarhu mrokfom kfo pthamo yiham
(Matyu 3.1-12; Mak 1.2-8; Jon 1.19-28)*

¹ Jon baftaisr Bro Nkifrarhu mrokfom yakhato pthamo yihart, nd yihar Taiberius Sisar, Romroh gafmanr tohmour. Toh yukatoh hanymorn, namba fiftinyuk gunyjimrpno Pontius Pailatr, Judiaroh gafanar tohmor. Herotrn Galilikort, rorhu najom Filifrn Ituriakorti Trakonitiskort, Lisaniasrne Abilenekort. ² Yo Anas Kaifasrofne prisroh nyingako tohyuk yimaf tohmoif. Tot nd yiharn Sekaraiarhu yon Jonr yima toh duha tkitt tohhato Bro Nkifrarhu mrokfo rifhur mithu nawohmohat. ³ Nd mrokfo rifhur mithu nawohmotr, tfit rorn nd mrokfot yaknihato tek Jodenthu mkuyef mkuyeffhu kmi kmim yi habrimoarn, met yindarim kfo memourm, “Nikmoh fasoh fasoh nefm mong wahikahkomm, baftaiskfot. Baftaiskahtko, Bro Nkifrar yak thu-hirahrko nikmoh fasoh fasoh nefm.” ⁴ Jonr mrokfom pthamoahat bingot profet Aisaiar pthamoa mrokfom kanjo inji pthamour. Aisaiar memour,

“Wom yimar nungur tik furatn tohhato kfo mirahrko,

‘Bro Nungothethru niayuk yuhat wayak marnyak hanyhekomr.’

⁵ Nd mi bunduha niyet tkitm Bro Nkifrar yak marnyarahrm.

Nd muh wohneni hanyet kminysofm ror nhaf tou gifra marnya hanyrahram.

Nd tirngnha htani hanyet yihotam rorn touwak hanyruharn be yihotam yak teh marnyarahm.

Tamoh tahi sikut tkitm ror yak marnyarahrm.
Yak marnyahato yihtotam be wutham rhurahm.

6 Ndhtet ndhtet tkitm yak marnya bomarnyahato
ee nd yimaroh minrfa htiyakyuk Bro Nkifrar kfo tkruraforuhattr, htiyakrah-komr.”
Ais 40.3-5

7 Bok met yindarim Jonr baftaisafo hanyhato kfaf hany memourm, “Arom nandomrhu yon kunyso, Bro Nkifrar yimam yak tutfa thombat, finji yak hhrifniruhako? **8** Nikmoh nefm, tohefm amfrfnah marnyakahtm riruh aruhukm htiruhann duka mirahm, ndm bi mong trohmomm fasoh fasoh nefm. Bi mar nukat tohwom. To mirahko, ‘Ka nom Abrahamrhu yon kunysn ka yak trohnirahrnom.’ Nhai. Ndt rot niko mirahko bro yima yuhum ahtanomt. Wawanyko. Na kfiwanko, Bro Nkifrar akfor, nda tahir yak kreku-trfotrm, Abrahamrhu yonm rhurfom. **9** Hudarim bi mispimn bi frhamsisetm korhm. Fitoh mim nhai hifa yukha hir marnyakahm, nd hudariye yohakhany yohakhany, kahrpatn dbuhaf hanyrahm.”*

10 Jonr inji kfomotrm, tfit romn ttiwon memomr, “Tone nome finji naruhanom?” **11** Kfo memorm, “Yimar hus hmbreshetre, wom that yakhato wom hmbresha duhatrn hekfot. Yo yimar yeshretr, be nd rpahtet neft nakfot.” **12** Takis marum yakmoa yimam nhafbaftais yakneft niahato ttiwon memomr, “Nome finji naruhanom?” **13** Kfo memorm, “Niko maruha yakneft mirahko wom maruham be tunmoh duka fijo ayak furanomm. Nd gafmanr kfo htayuk maruharpam yakkfot.” **14** Yo wom soldiam nd baftaiskphot nia yak hanyukm nhaf ttiwon memomr, “Nome nhafne finji naruhanom?” Kfo memorm, “Mirahko yimam kfo yakrmehato marum ayak hanynom, o yimam kotim furahato maruham ayak hanynom. Tuko hingrnayuk maruharpam yakkfot.”

15 Bok met yindarim rroh hbbakyuk yima Kraisr gari hasetmn, tfit Jonr inji kfomohat, to be rroh dukeft duka memom, “Ka asor nd nom gari hasiwa yimar.” **16** Jonr memorm, “Na be nda bupa furaye baftaiswanko. Tor nanhu mong yuhat niewa yimarn, tor tu yimar. Na nhai ror kanjo bbukeft hatohkaha. Na, na be yima furaya rorhu senderfhu ki jbkafyuk mtinf kak nyusakahukanr.† Rorn Bro Nkifrarhu Yafothati kahe baftaisimrahrko. **17** Ror withu hoftha kr nd ndroh thu krhayuk safort tirtn kakitohwort. Tu hifa witham yak nhafohuaharm, turhu naku dany kunysn htarahrm. Nd hoftha kr tikmn tu yiha yiha nanyjar hatohet kahtn kandhi thurahrm.”‡

18 Jonr mrokfom pthamohat nhai be nd mrokforpam kformor. Hifa hifa dborior mrokfom kfo yingmarimorm.

Herotr Jonr kalabusn yak htamo yuhat

19-20 Jonr pthamo mrokfom rom hifa pthamorm tfit turn nd Judaroh gafmanr kutewumr Herotr, ror nahnamo fasoh fasoh nefmi yo najom tuhan Herodias yakmo yuhat, nd ndmpno Jonr kfo nyingo fnahmotrr, be wom Herotr namburhato Jonr yakhato kalabusn htamorr. Herotr nd Jonr kalabus htamo yuhatpno tot tu wom bro fasoh neft ror namot.

Jonr Jisasr baftaisimmo yuhat (Matyu 3.13-17; Mak 1.9-11)

21 Yima bugam baftaishany baftaishany, ee Jisasr baftaismor. Ror baftaisnihato kfo bruttna hanymor, ee yura mountko htimortko yoh tnehmohat. **22** Mount yoh tnehhato nd yoh tnehmo yuhatn wuhtiyakmort Bro Nkifrarhu Yafothat ganyom mmkrs kanjo yak nhombranehato fawihnamot. Be nd ganyom mmkrs yawihnamotn yimar mirhumot. Tfif yura mountko wom tngt wanymort. Nd tngt kfo hany memot, “Ni nanhu yone. Nanhu marbit korhwot ninn. Hifa hti yindhawann.”

* 3:9: Nd kfo nhombra mrokfot Bro Nkifrar nda bbinyosothu fasoh yimam yak thuruha nmbuhathu kfo nhombra kfoyet. † 3:16: Wom yimar hatohyuk senderroh ki jbkafyuk mtinf yak nyusak thumoahat, tu yufapa duha yima furapamn womr hatohyuk senderm kak thumoumm. ‡ 3:17: Nd kfo nhombra mrokfot hifa yimami fasoh yimaroh kfo nhombra kfoyet.

*Jisasrhu nkifram toh hnamo yimaro yufam
(Matyu 1.1-17)*

²³ Jisas Bro Nkifrarhu hingrneft rihingrnakmohat bi 30 gunyjimetrn, Bro Nkifrarhu hingrneft rihingrnakmort. Nd yonr niamo yuhat myak hikakmohat wom yimam duka memom, “Ka Josefren yifemmr nd yon Jisasr.” Asot nd duge katfonyuk yifemrhu nkifra yuhat inji: Josefren yifemr Helir. ²⁴ Helirhu yifemr Matatr. Matatrhu yifemr Lifair. Lifairhu yifemr Melkir. Melkirhu yifemr Janair. Janairhu yifemr Josefr. ²⁵ Tfit Josefren yifemr Matatiasr. Matatiasrhu yifemr Amosr. Amosrhu yifemr Nahumr. Nahumrhu yifemr Eslir. Eslirhu yifemr Nagair. ²⁶ Nagairhu yifemr Meatr. Meatrhu yifemr Matatias. Matatiasrhu yifemr Semenr. Semenrhu yifemr Josekr. Josekrhu yifemr Jodar. ²⁷ Jodarhu yifemr Joananr. Joananrhu yifemr Resar. Resarhu yifemr Serubaberr. Serubaberrhu yifemr Sealtierr. Sealtierrhu yifemr Nerir. ²⁸ Nerirhu yifemr Melkir. Melkirhu yifemr Adir. Adirhu yifemr Kosamr. Kosamrhu yifemr Elmadamr. Elmadamrhu yifemr Err. ²⁹ Errhu yifemr Josuar. Josuarhu yifemr Elieser. Elieserhu yifemr Jorimr. Jorimrhu yifemr Matatr. Matatrhu yifemr Lifair. ³⁰ Lifairhu yifemr Simeonr. Simeonrhu yifemr Judar. Judarhu yifemr Josefren. Josefren yifemr Jonamr. Jonamrhu yifemr Eliakimr. ³¹ Eliakimrhu yifemr Melear. Melearhu yifemr Menar. Menarhu yifemr Matatar. Matatarhu yifemr Netanr. Netanrhu yifemr Defitr. ³² Defitrhu yifemr Jesir. Jesirhu yifemr Obetr. Obetrhu yifemr Boasr. Boasrhu yifemr Salmonr. Salmonrhu yifemr Nasonr. ³³ Nasonrhu yifemr Aminadafr. Aminadafrhu yifemr Atminr. Atminrhu yifemr Arnir. Arnirhu yifemr Hesronr. Hesronrhu yifemr Peresr. Peresrhu yifemr Judar. ³⁴ Judarhu yifemr Jekofr. Jekofrhu yifemr Aisakr. Aisakrhu yifemr Abrahamr. Abrahamrhu yifemr Terar. Terarhu yifemr Nahorr. ³⁵ Nahorrhu yifemr Serukr. Serukrhu yifemr Reur. Reurhu yifemr Pelekr. Pelekrhu yifemr Eber. Eberrhu yifemr Selar. ³⁶ Selarhu yifemr Kenanr. Kenanrhu yifemr Apaksatr. Apaksatrhu yifemr Semr. Semrhu yifemr Noar. Noarhu yifemr Lamekr. ³⁷ Lamekrhu yifemr Metuselar. Metuselarhu yifemr Enokr. Enokrhu yifemr Jaretr. Jaretrhu yifemr Mahalalerr. Mahalalerrhu yifemr Kenanr. ³⁸ Kenanrhu yifemr Inosr. Inosrhu yifemr Setr. Setrhu yifemr Adamr. Adamrhu yifemr Bro Nkifrar. Tom inji Jisasrhu nkifraro yufam.

4

*Satanr Jisas kfo nhebehmo yuhat
(Matyu 4.1-11; Mak 1.12-13)*

¹ Jisasr tek Jodent htanymohat, bi Bro Nkifrarhu Yafothat thu nhombrayetrn, to be nd Yafothatn yak hatoh hanymottr, yimor yima toh duha tkit furatn. ² Jisasr 40 yiham nd tkitt tohhato Satanr niahato kfo nhebehmourr.

Nd ror tohmo yiham nhai nuwa yarmor. ³ Tu wuroh yiharn bi yatinoh namborhohetrn, nd Satanr tfit mfnahhato kfo memor, “Ni Bro Nkifrarhu yonn rhu thombat, ndar tahis wakfokahtnt, bret nuwat kekutraht.”

⁴ Tfit Jisasr kfo memor, “Bro Nkifrarhu gonborngt kfo kangt, ‘Nhai wom yimar nuwarpat yehato toh wonakrmor.’”

⁵ Inji kfomotrr, tfit yaknimorr hamuhmorr yura kminysofmn. Yura mhatohhato fak nuhasmorr ndar bbinys ofthu kmi kmim. ⁶ Kfo memor, “Nda bbinys soft nann tohukatohwant. Fitoh yimar he yibonkfot kfiwa, nd yimarn kahuka. ⁷ Ndnatn kanga akfoyann, ni hikrahna, be ninn nda bbinys soft tohukatohrahnt.” ⁸ Jisasr sinyahato kfo wok memor, “Bro gonborngt kfo kangt, ‘Bro Nkifrarpar hikkfot. Rorrpar tor tu Nkifra mifr. Rorrparhu hingrneft yakitohkfot.’”

⁹ Inji nna pthanihato tfit nd Satanr yaknimorr, hanymor Jerusalemko yorhwa temperrhu mingiahurhu bikatitn. Yura mhatohmorrn, kfo memor, “Ni Bro Nkifrarhu yonn rhu thombat, watuhatoknikahnn, bbinys soft wamitohwonn. ¹⁰ Bro gonborngt kfo kangt, ‘Ni tuhatokni thombat Bro Nkifrarhu mounmotm kforuhatrm, wuyakitohak hanyrahmn. ¹¹ Rroh tirmn mirhuniruhann, nhai tahimpno mita wokruhatnm ninhu

wuram.’”¹² Jisasr tfit kfo wok memor, “Bro gonborngt kfo kangt, ‘Mirahn Bro Nkifrar be yuwi awastiwonanr.’”

13 Be nd Satanr womhtet womhtet nefm nhombra nhombratihato be afo htanymorr. **Jisasr Galliko yihato rihingrnakmohat Bro Nkifrarhu Yafothathu bbukeftpno rihingrnakmor**

(*Sapta 4.14-9.50*)

Jisasr Galilit rihingrnakmo yuhat
(*Matyu 4.12-17; Mak 1.14-15*)

14 Be Jisasr tfit yimor Galliko. Bro Nkifrarhu Yafothathu bbukeft be hatoh twanho hanymort. Jisasrh mrokfot Galilikorhof kmi kmim ptha habrimotrm, yimam wany bugamomt. **15** Judaroh rhu rifinyuk rmontn yihato mrokfom pthamoatrm, bok met yindarim ror pthayuk mrokfom wany yindhormoumm.

Nasaret thofm Jisasr mong trohmo yuhat
(*Matyu 13.55-58; Mak 6.1-6*)

16 Jisasr tur toh warhomo kmi Nasarethu rifinyuk rmont rhu krna Sabat yihar fknenimohat yiha yiha fkneni hakumoa yuhatn hikmorn fknenimor. Fknenimorn, Bro Nkifrarhu mrokfom ptha yibonetrn, be yau yaknihato rim tohmor mrokfo pthayuk tkittn. **17** Rim tohmotr, profet Aisaiar wandfamo mrokfom hemomr. Mrokfefm yakrir hmbreyetmn, to be yak nyimbusakak hanyhato wom mrokfom mihtimorm. Nd mrokfom inji kfomom: **18** “Nann Bro Nkifrar bi fak htamora wuska duha yimami maruha duha yimaroh hifa dborior mrokfothu kfo nuhasneft. Ndnatn Bro Nkifrarhu Yafothat nann thu nawohmot. Bi kfo memora, ‘Waikahnn, mrokfot waptha wamitwa, “Niko kalabus tohyukko tmifko wafnahniko. Niko nyinga kunyjetko tfit wayukatohko. Niko yimam yak bebhato yima yuhenm gumuha muhthunitwako, yima yuhum amirhutwamko.” **19** Yo Bror kfo tkruraf memora, “Wakfo nuhas wamitwanm, asor bi rroh yak marnya yihar bi.”

20 Jisasr nd gonborngthu mrokfom ptha buganimormn, tfit yakrirakmortn, tu kunys tohyuk yimarn rihihato warhumor. Btn nd kunys rhuyuk yimaroh nyingam be rorparn kukatohmoum.

21 Jisasr rhuhato nd kunys rhuyuk yimam kfo memorm, “Nda niko wanu mrokfot to bi asot bi arihatn nd neft htitwokom bi mfefnah hanitt.” **22** Jisasr inji kfomotr, nd yimam wanyhato duka memom, “Ndar yimarhu mrokfom hifa hifa ptha hik bohik marnyewurm mrokfom. Ka nhai Josefahu yonr rhukahr?”

23 Jisasr memorm, “Na kfo mifwanko, mirahkma, ‘Ni doktaye ninhu dbohneft tunn wayak thunt. Ni Kaperneamt tohhato namo nefm kanjo nda tunhu kmi mnat tohwohat inji wana.’” **24** Kfo memorm, “Na kfo mifwanko, nhai wom profetr turhu kmi mna thofm yak miyahkato ror pthayuk mrokfom wany yakio wonakrmomr. Nhai. **25** Iraiajarhu tndht wadukakomt. Iraiajar tohmo yiha Isrerkhu husfirpa gunyjimmi 6-pela yamm bro yinr tohmor. Bro yinr tohmotr, yewurit noh witamot. Noh witamott, yatinohrt tohmoum.

26 Nd yiharn bok met dhirm Isrerkhu yatinohrt tohhato nakumoum, ‘Iraijay, wania, wahti dukannom, nom yorhwa krho nmbuhat.’ To nhai, Bro Nkifrar nhai marimorr, ‘Rompno waiswa.’ Nhai. Tfit nndoh wom Saidonkorhof kmi Sarefathu met dhirtpno yak hatohafo-motrr, rotpno yihato htimort rothu krhopam. **27** Yo womt dukakfot. Siriakorhof yima Nemanrhu hun mimbrt yak marnyamo nmbuhat, ndt nhaf inji rhumot. Iraisar profet hingneft tohmohat nd tuha Isrerthu hun mimbretn nhai marimor, ‘Yak marnyaruhanm.’ Nhai. Tfit nndo wom kmi Siriakorhof yima Nemanrn Iraiajar yimorn, fak marnyamorr.”

28 Nd kunys rhuyuk yimam Jisasr pthamo mrokfom wanyhato namburmom.

29 Namburhato Jisasr yaknihato nd taun Nasaret tahiye gna habriyettn, to be briahako fak hfnahnimomr. Briahako hfnahnihato nd taun Nasarett yura wom kmi mfhat ruhettn,

to be Jisasr yaknimomr, kmi yengongko mihatohhato memom, “Atashotafkahtnomr, amisuhr.” ³⁰ To nhai, nd yimaroh rifiny buharn yau inyar fnahhato yimor.

Jisasr kmi yarh fknayet yimar yak marnyamo yuhat
(Mak 1.21-28)

³¹ Jisasr yimorn, tfit Galiliko yorhwa kmi Kaperneamtn tfi mifnahmor. Ndha mifnahhato ndkorhof rhu rifinyuk rmontn rhu krna Sabat yiham fknemoarn, Bro Nkifrarhu mrokfom kfo nuhas bonuasmourm. ³² Jisasr pthamoa mrokfom tu hifa ptha yembindtmoatrm, yimam nd ror pthayuk mrokfom wanyhato bok dukefm yakhato duka memom, “Barenko, ndar yimar pthiwa mrokfom hifa ptha yembindt marnywurm.”

³³ Nd Judaroh rhu rifinyuk rmontn rhumor kmi yarh fknayet yimar. Nd yimar sinyahato tau nakuyahato kfo hutt memor, ³⁴ “Nasaret thof Jisase! Ni asha niaronn, nome finji naruhammad? Nmoh yak batit niaro? Hti nhtiawann ni Bro Nkifrar yak htamo yimaye.”

³⁵ Jisasr sinyahato nd kmi yarhr kfo hutt memor, “Ni nd kmi yarhe, tmifn tngt wayoukihkahnt, nd yimar wathu troh tanynr.” Be thu troh tanymotrr, nd yimar suh hasomor. ³⁶ Yimam nd Jisasr namo neft htihato wutthamom. Memom, “Bar yimako, nd yimar pthe mrokfote tamoh bbukettm nd kmi yarhr wanyhato nd yimar thu troh tanyr?” ³⁷ Be nd Jisasr nayuk nefm yimam htihato kmi kmi nnakfo nuhashi hanymom.

Jisasr Pitarhu matohemt yak marnyamo yuhat
(Matyu 8.14-15; Mak 1.29-31)

³⁸ Jisasr Judaroh rhu rifinyuk rmont htanyhato tfit yimor Saimonrhu kunysn. Saimonrhu matohemt kkah dbohnettn, nd kunys rhumot. Jisasr nd kunys yimotr, kfo memomr, “Nd mett wayak marnyant.” ³⁹ Jisasr nd mett hwemo tiktpno rim tohhato nd metthu dbohneft htihato kfo nambur-motr, nd dbohneft thu troh tanymott. Be nd mett yudbat marnyani hanyhato yeshrim hta mskahemotm.

Jisasr bok met yindarim yak marnyamo yuhat
(Matyu 8.16-17; Mak 1.32-34)

⁴⁰ Marr bi yohni hanyetrn, fitoh yimaroh yimatm womhtet womhtet dbohneft yak hanyetm hne hna hanymomm Jisasrpno. Jisasrpno hnamoatmm, tir htaf hanymoatrm, marnyani hanymoum. ⁴¹ Nd kmi yarhm fknayetm marnyani hanymoum. Nd yimam fknemoa kmi yarhm tau yakhany, tau yakhany, thu troh tany hanymoum. Thu troh tanymoahat kfo tany hany memoum, “Ni tu Bro Nkifrarhu yone!” Nd kmi yarhm bi hti nhta memom, “Ndr yimaroh hhakyuk yima Kraiser.” Ndnatn Jisasr inji wanyhato nd kmi yarhm kfo gadiyaf hanymoatrm, nhai tfit pthani hanyrmoam.

Judiaroh rifinyuk rmonm Jisasr yihato mrokfom kfo ptha htfasmo yuhat
(Mak 1.35-39)

⁴² Tfit dbha ksutn nd kmit htanymortn, yimor wom yima toh duha tkittn. Yimotr, yimam hambro hambro be wuroh natn mhtimomrn, kfo memomr, “Tamohmpno htanywannom? Nom wofnkahnom ninhu nmoh htanyneft.” ⁴³ Jisasr inji wanyhato kfo memorm, “Nann Bro Nkifrarhu kingdomkfothu gutnius mrokfot kmi kmim yi htfashato kfo nuhas htfaskfot. Nd hingrnetthu hingrna neftn Bro Nkifrar kfo tkrurafmora.” ⁴⁴ To be ndnettn Jisasr nhai tuharpa ptha hasormoar. Judiaroh kmi kmiroh rhu rifinyuk rmonm yihato Bro Nkifrarhu mrokfot ptha htfasmoatrt, wanymoumt.

Jisasr yakmo barkof hingrnano yimam
(Matyu 4.18-22; Mak 1.16-20)

¹ Wom yihar Jisasr Genesaret bari thmbt tohhato Bro Nkifrarhu mrokfefm ptha hasomotr, bok yimam brbo brbo hany yukukaknihato memoum, “Awanynom ror pthiwa mrokfom.” ² Jisasr tohhato htimorf wom hus mmbrf yura nungutn teh hatonatamomfn, yimam nd mmbrf tikatm rugim, ndm thu kibofsamoum. ³ Jisasr nd mmbrf htihato wom

mmbrt mikmbremor. Nd ror mikmbremot Saimonrhut mikmbremor. Mikmbrehato Saimonr memor, "Watakiowafokahnn, mmbrt wuri kkof arim hirt." Be nd mmbrt wuri kkof rim hahirmottr, Jisasr nd mmbrt rhuhato Bro Nkifrarhu mrokfefm kfo ptha nuhasmourm nd yima rifhur.

⁴ Ptha buganimorn, Jisasr kfo memor Saimonr, "Wayagonikahnn, mmbrt tek dany yuhat arim hirkahtt, nini ninpno yira yak htfasyuk yimako rugim wayafhokahkom, yiram watuhaktwako." ⁵ Saimonr watohhato kfo memor, "Bro yimaye, hrek yifungr nhombra nhombra nfha titawonom, nhai wom yirenr yakrfonom. Nhai mrokfom, ninhu tngtpno tfit afo rugim yafho thuwonrahnomm." ⁶ Rugim yafho thuhato tfit memom, "Wayaknomm," rugim be tu yoh tmbrakfot inji namom. Yirat nhai be ffirmhato yakrmom. ⁷ Be wayak nhombratihato tfit nd wom mmbrt hiryukm tire hungasakhato memomm, "Waniako." Be niamotm, rpat nd hus mmbrfn mano mano tohhato wateh sohakmomm nd yira rugim. Btn nd rugiroh yiram yakhany, yakhany, nd hus mmbrf be yoh yifikfot inji namof. ⁸ Saimon Pitar inji htihato Jisasrhu wurampno yihom suhhato kfo memor, "O Broye! Be tmifn wahtanykahna, wanju. Na fasoh nef nayet yimaya." ⁹ Rori nd mmbrf rhuyuk yimam nd yonmari yirat htihato memom, "Barenko! Nome ndar yirate finji yurhites?" ¹⁰ Saimonrhu yarmotemrof Sebedirhu yonf, Jems Jonrof, rof to inji nhaf nd yirat htihato mrokfo kfo duhafft rhumof. Jisasr Saimonr kfo memor, "Ayanhowahn. Kto ni to inji nd yiram yek kanjo yimam inji yakrahnm." ¹¹ Be nd mmbrf rim tatrnahato nd tamoh tamoh wuskar htanymomrn, Jisasr tfit mhikakni twanhomom.

*Jisasr yak marnyamo lepra dbohneft yaket yimar
(Matyu 8.1-4; Mak 1.40-45)*

¹² Jisasr wom kmit tohetrn, wom lepra dbohneft yaket yimar niahato Jisasrhu wurampno msuhhato mkfo memor, "Broye, ndar na hatohwa dbohneft yak thurahnt, to be thu troh tanyrahta." ¹³ Jisasr inji wanyhato nd leprayet yimarn tirt rihtahato kfo memor, "Uwa, na yibonwa." Inji kfoni hanyhato nd dbohneft kfo memort, "Wathu trohnr." Inji kfomotr, nd dbohneft yudbat thu trohmotr. ¹⁴ Thu troh tanymottr, Jisasr nnuhuhato kfo memor, "Ni nda dbohneft thu troh tanyhat, mirahn tfit womm akfo nuhasanm. Mosesru boririfhut yak hikkfot. Yimam lepra dbohneft yaketm marnyanimoahat inji namoum. Nd hun gifam prisrpno myak nuhasnimoamn, tariorh mthamoum. Nd tariorh mtha yiharn prism ndt htihato kfo memoum, 'Nd yimarhu dbohneft bi thu troh tanymotr.' Ni nd yuhat yak hikkfot." ¹⁵ To nhai, nd Jisasr hingrnamo hingrnethu mrokfot nhai tfit wom kafrohrmot. Bok tng rihar rhu fnahmott, bok yimam wanyhato niamom, memom, "Yiruhanomn, ror pthayuk mrokfefm wanyhato dbohnefm yak thurahrnom." ¹⁶ To nhai, yima duha tkitt yimoarn, kfo brutnamour.

*Jisasr tir wura minysafet yimar yak marnyamo yuhat
(Matyu 9.1-8; Mak 2.1-12)*

¹⁷ Wom yiha Jisasr wom kunysn rhumor. Nd kunys rhumotr, yimam nd kunysn rifinymotm, Bro Nkifrarhu mrokfom kfo nuhas bonuhasmorm. Nd yima rifiny buharn wom Farisimi boririfhuthu tisam rpat nia rifinymom. Bok kmi kmim rhuyuk Farisimi boririfhuthu tisam niamom, womm Galilikorhofm, womm Judiakorhofm, yo womm Jerusalemkorhofm. Nd yihart yimaroh yak marnyayuk bbukeft Jisasr thu nhombramotr. ¹⁸ Wom yimar tir wura behohetr to bi wom yimamn kroketr hne hnamomr. Nd yimarhu wuram bi noh minysaf bugamomr. Memom, "Hiyau hafkne-nikahnomr, Jisasrpno brbo rim htarahnomr." ¹⁹ To nhai, hanyuk yihotat bok yimam rifinhyato toh dbu hmbriyafmotmt, be nhombratihato tfit yura kuni mingiahuko yak tmbrrafomomt, nd yimar yura mingiahu yuhat hamuhmomrn, yura mingiahu yuhatn yuht kroketr mano mano mititofm ttafhato thu nyusakaf hanymomrn, tfit yiro kuni yurukko tohyukmn yakmomrn, Jisasrpno rim htamomr. ²⁰ Nd yimar hany rim htamohat rroh dukefm duka memom, "Jisasr yima yak marnyetr. Nda minysafet yimar ror kforahr be marnyanirahr.

Nhai tfit nd minysaf rifhut rhuruhatr.” Be Jisasr rroh yima yuhum inji htihato kfo memorr nd yimar, “Yinowe, ninhu fasoh nefm bi fak tuhahuyann.” ²¹ Nkifra boririfhuthu tisami Farisim Jisasr pthamo tngt wanyhato tum rinahti nahtihato kfo memom, “Nd yimare, kangr Bro Nkifrarhu tkitt ayaka. Nhai wom yima furarn yimaro fasoh nefm yak thukfot. Bro Nkifrarpar yimaro fasoh nefm kak thuworm.” ²² Nd yimaro yima yuhum inji dukamohat Jisasr bi htimorm. Htihato kfo memorm, “Tamohmpno inji riduka adukiwako? ²³ Kangko finji akfoyane? Kangko akfo amiyanr, ‘Ninhu fasoh fasoh nefm bi fak tuhahuyann?’ O kangko akfo amiya, ‘Wasinya wayauyakni?’ ²⁴ Na, Bro Najoma, yimaro fasoh fasoh nefroh yak thu yafothat Bro Nkifrar bi hemora. Afo asomif wom neft yak nuhasrhotanko, duka mirahko nd yimar bro yufeter.” Inji kfoni hanyhato nd tir wura minysafetr kfo memor, “Na kfiwann, wasinyakahnn krokt wayaknikahnt tunhu kunyko wain.” ²⁵ Be inji kfomotrr, tuha nd yima rifinyrhu nytingahato wasinya-morn, nd tur hwemo krokt yakmortn, be Bro Nkifrarhu yindhorefrparpno yimor kunyko. ²⁶ Nd yima rifhur nd kunys tohmor, Jisasr namo neft htihato be tuha tir pinyafm youtahato tohmom. Kfo memom, “Hrek be tu womhtet neft htitawonom.” Inji dukahato tuha Bro Nkifrar kfo yindhor boyindhormomr.

*Jisasr Lifair naku yakmo yuhat
(Matyu 9.9-13; Mak 2.13-17)*

²⁷ Nd neft htinimomt, tfit kto Jisasr fnahnihato takis maruharoh yakyuk yimar turhu takis marut tuyuk kunyent rhu hasetrn yihom htimorr. Nd yimarhu yufat Lifair. Ror yihom htihato kfo memor, “Wania wahikna.” ²⁸ Lifair wanyhato be nd tamoh tamoh wuskam htanymormn, hikakni twanhomorr.

²⁹ Kto Lifair turhu kunysn yemro burwat yak htatamortn, Jisasr naku yakmorr. Jisasr yihato nd yemro burwat rhu famoft. Nd wom wom yimam yo tu nd rpahtet hingrnafat tohyukm rpat fenyhomomf nd yemro burwat. ³⁰ Farisimi boririfhuthu tisam htihato Jisasrhu disaiper kfo nambur memomm, “Tamohmpno nd takis yekwa yimami nd ufasoh nefm nayet yimam rpat rhuhato nuwa ye mskewako?” ³¹ Jisasr inji wanyhato kfo memor, “Yima furam nhai be yi furakahm hunkotharpno. Nhai. Dbohnet yimarpam kitwom hunkotharpno. ³² Na nhai dborior yimaro dukeftn niarmoya. Nhai. Na fasoh fasoh nefm nayet yimaro dukeftn niarmoya. Memoya, fasoh fasoh nefm nayet yimampno yirhoyann, kforhotanm, nd rroh fasoh nefm yafhorahmm.”

*Nuwa kur nefthu ttiwon nmbuhat
(Matyu 9.14-17; Mak 2.18-22)*

³³ Wom yimam Jisasr kfo memomr, “Jon Baftaisrhu uhik ahik htfasyuk yimam Bro Nkifrarhu kfo bruttna yihar brio nuwa kurhato kfo bruttnewum. Yo Farisiroh uhik ahik htfasyuk yimam, rom nhaf inji na bugewum. To ninhu disaiperme tamohmpno nuwa ye hanitam nd kfo bruttna yihar?” ³⁴ Jisasr kfo memor, “Wom yimar wom mett yakrahr, rorhu yimatm nhai bi nuwa ye kafhokahmr ror afo rompno yuhre rhu mska inji na thombat. Nhai. ³⁵ To tfit kto yak hambrafruhamr, ee bt rorhu yimatm nuwa kurhato rhurahm.

³⁶ Nhai wom yimam muhet yatk hmbreshat tfit wom nfri hmbresharhu mkum yakhato nahu hmbrikahmt. Nhai. Nd yatk hmbreshat tfit wom nfri hmbresharhu puk mku yak hanyhato yakhato nahu hmbrirahnt, nd yatk hmbreshat nhai hifa htiruhatnt. Faso hti bebrahnt. Yo nhaf nd dborior nfri hmbreshar nd puk tmbho botmbho neftpno muh bomuh tiketr rhurahr. Nhai hifa hti yindhorrughatnr. ³⁷ Yo nhai yimam nfri wain bupam yakhato yatk meme tha kpmn tas hmbrikahmm. Nfri wain bupam yakhato yatk meme tha kpmn tas hmbreneft nd nfri wain bupam rikur prhoruhamn nd yatk meme tha kpt frtfohhato wain bupam mitoh bugarahm. ³⁸ Ndnett nfri wain bupam tu nfri meme tha kpe tas hmbrikahato be nhai kpm yoh tfoh inji nakfot. ³⁹ Yo yimar yatk wain bupa fut wofnetr nhai tfit wofnkahr nfri wain bupa futneft. Yatk wain bupa fut wofnetr kangr, ‘Yatk wain bupam hifa.’ ”

Rhu krna Sabat yiharhu mrokfot
(Matyu 12.1-8; Mak 2.23-28)

¹ Wom rhu krna Sabat yihar Jisasri turhu disaipermpno wit swirr yihato yau nanyor hanyhato nd wit shuroh wit dmm yak tmbhak hanymoamm, tire tire yak rir tfka botfkamoamm, krm misuhmoatm, ki hanymouumm. ² Farisim inji htihato kfo memom, “Tamohmpno inji neko? Bro Nkifrarhu thfa mntwat inji kfiwut, rhu krna Sabat yiha nhai ndpa ndpam yak tmbhakkfot.”* ³ Jisasr inji wanyhato kfo memorm, “Nikone Defitri wom yimam yatinohr rhu hasohato nkifra temperr rim htayet nuwa rikat rim yakhato yamo nmbuhathu tndhte, ka htitkomt o nhai? ⁴ Defitr to Bro Nkifrarhu temperr fknenihato nuwa rikat bi Bro Nkifrarhu yufatpno rim htayukt rimakmortn, briahako turhu yaunho habriyuk yimampno rim htahato famomt. Nuwa rikat bi Nkifrarhu yufatpno rim htayukt nhai be wom yima furam ye wonakrmomt. Tu prisrpam fiyakmomt. ⁵ Wawanyko, na nikmoh Bro Najemann nd rhu krna yihar kakitohwanr. Nd yihar kanga finji anaya, nhai tfit wom yima furar kfo htakfot.” Ndnatn nd Jisasrom namo neft nhai fasoh neft narmom.

Rhu krna Sabat yiha yak marnyamo tir gram tip behohetrhu mrokfot
(Matyu 12.9-14; Mak 3.1-6)

⁶ Tfit wom rhu krna Sabat yiharn Jisasr Judaroh wom rhu rifinyuk rmont yihato Bro Nkifrarhu mrokfom ptha nuhasmorm. Nd rifinymo kunysn wom tir gram tip behohetr rhumor. Mano tir mifkorhof tir gram tipt yak wok tkittn mnoh minysafakmotr. Tir pinyaafm kfe mngomotmr, be nhai thu susnarmoarm, be inji hoketm rhumoum. ⁷ Rom nd Farisimi boririfhuthu tisam, rom bi niamom. Niamomn, nd yima rifinyrn bi mfk nemomn, tohhato memoum, “Jisasr nayuk tamoh nefm na thombat afo hti hikrahnomr. Hti hikhato kfo hndhnarahnomr.” Ndnetmn rhuhato memom, “Afo htirahnom dbohnet yimam rhu krna Sabat yiha yak marnyarahrme nhai.” ⁸ Nd yimaroh yima yuhum inji dukamohat, Jisasr bi htingotmorm. Hti hato nd tir gram tip behohetr kfo memorm, “Buha yima rifiny buharn wasinya watohetohn.” ⁹ Be nd yimar sinya tohmotr, Jisasr kfo ttiwon memorm, “Niko finji dukiwako? Rhu krna Sabat yiha yimaroh yak marnyanefte, Bro Nkifrarhu boririfhut finji kfiwat? Rhu krna Sabat yihare hifa nefm nakfot o fasoh nefm nakfot? Yimam yak marnyakfot o yimam waskfot?” ¹⁰ Nd rifinymo yimam yukatoh nhombra buganimormn, nd yimar kfo memorm, “Tirt wathu susnant.” Be nd yimar tirt thu susnamort. Tirt thu susnahato marnyanimotr.

¹¹ Inji htihato masat namburhato tum rinakfo nakfo memom, “Nda yimare finji naruhanomr?”

Jisasr yakmo barkof 12-pela aposerm
(Matyu 10.1-4; Mak 3.13-19)

¹² Kto wom yifungr Jisasr kfo bruttna nfhamor yura kminysoftn. ¹³ Kfo bruttna nfhamato dbharn nd rorhu disaiperm naku yakmorm. Naku yakhato niamotm, 12-pela kforpat fakmor. Yakhato kfo memorm, “Niko bi nanhu sioskfothu kasinya htfas-yukeko, bi nanhu aposerek.”

¹⁴ Rroh womr Saimonr, (kto tu Jisasrn nfri Pita yufat hmbremorr), yo womr Saimonrhu nmem Andrur ¹⁵ yo womm Jemsr, Jonr, Filifr, Bartolomyur, Matyur, Tomasr, yo Alfiusrhu yon Jemsr, yo Saimonr, wom yufat Selotr, ¹⁶ yo womr Jemsrhu yon Judasr, yo wurohr Judas Iskariotr. Tor nd Judas Iskariotr hnhdhnamorr Jisasr.

Jisasr bok yimam yak marnyamo yuhat
(Matyu 4.24-25; Mak 3.7-12)

* ^{6:2:} Judaroh nkifra boririfhut, bi nkifram myakitoh fnahmot, kfo memoum, bro rhu krna Sabat yihar nhai wom tamoh hingrenefm hingrnakfot. Kfo memoum, nd yihar nhai wom tamoh yeshrim yakkfot. Nhai. Nkifra gonborngt htikfot Kisim Bek 34.21. Farisim memom, nd thfa mntwat kfoyuk mrokfotn hanyjbornamom.

¹⁷ Jisasr yimam yaknimorn, tfit rpat fawihnamom. Yawihnehato tuha kmi kurhtn tfit nd wom yak troh tanymo yimampno tfit afo mirifinymom. Rifiny hasetmn bok yimam nd Judia-korhofm, Jerusalemkorhofm, Saidonti Tairkorhof tek afsor thmbm toh hanyukm, rpat met yindariyett nia mirifinyaknamom. ¹⁸ Memom, “Ai arifinskyahnomn, Jisasrhu mrokfefm wanyhato yo nmoh tamoh tamoh dbohnefenm yak thu hirahrnom.” Ndhtet dukefetmn yimom. Nd kmi yarh flknayetm, rom yudbat marnyani hanymoum. ¹⁹ Nd yima yak marnyayuk yafothat tu Jisasrn hatohmount. Ndnett yimam ndt htihato memom, “Amyaktikahtnomr, rorhu yafothatn nieruhatn, yak marnyarahtnom.”

Yindhori yihari nur yihar

(Matyu 5.1-12)

- ²⁰ Jisasr turhu disaiperm yukatoh hanyhato kfo memor, “Niko fitoh yimako tamoh tamohm yak nafwako, toh beb nmbuhat yi tohwako Bro Nkifrar hti hasiwurt niko tohwa toh nmbuhat. Rorhu kingdomkfot tohwoko.
- ²¹ Niko fitoh yimako arihat yatinoh tohwako Bro Nkifrar hti hasiwurt niko tohwa toh nmbuhat, kto ye furkihrahko. Niko yimako nur hasiwako, Bro Nkifrar hti hasiwurt niko tohwa toh nmbuhat, kto tfit ningirahko.
- ²² Kto tfit htirahmko Bro Najoma hikruhatko, hti sr thurahmko, kfo yiritrahmko, kfo tfar-rahmko, kfo mirahmko, ‘Ar nthonroh yonm.’ Inji inji kforahmko. To niko mirahko inji wanyhato tfit anambur kekutnom. Niko be yindhorkfot. Bro Nkifrar hti hasiwurt niko tohwa toh nmbuhat.
- ²³ Nd neft nhai be nikomrpakompno rhuruhatt. Nhai. Nd neft bingot bi profetmpno riruhakmot. Kto nikmoh hifa rhu nmbuhat Bro Nkifrar hirahrkonko yura hefenrn.
- ²⁴ To niko boknabok maruhetko tfit kfiwa. Wayeye! Hifa dboriorh rhu nmbuhat bi arihatn htitwokomt.
- ²⁵ Niko arihat ye furkihwako, duka yanuhaf hanykfot. Kto be yatinoh tfit tohrahko. Niko frohko arihat ninge yifa marnya bomarnyawako afo inji wanako. Kto tfit bu nyngam yoh dbottrahmko.
- ²⁶ Yo womt duka yanuhaf hanykfot bingotrhof kfo hnu bohnuyet profetm namoa nefm. Rom namoa neft yimam hti-moammn, memoum ka tu neftn newum. Ndnatn kfo yindhori furamoumm. Ndnatn niko yimam kfo yindhori-womkone, mirahko ka dboriorh yimanomn kfo yindhoriwomnom.”

Niyak marnya yuhat

(Matyu 5.38-48)

- ²⁷ “Niko frohko nanhu mrokfot wanukako kfiwanko. Wom yimar huttworn, ni tawo hifa yima yuhur hmbrekfot nd yimar. Yimar hti srthuworn, ni tawo yak marnya bomarnyakfot nd yimar. ²⁸ Ni kfo beb bobetyuk yimar tfit ninn hifa kfo yima boyima marnyakfot. Nd yimam niko fasoh fasoh nefm nayukm niko tawo Bro Nkifrapno kfo bruttna mekfot, ‘Nd na fasoh nefm newa yimam wayak marnyanm.’ Inji kfokfot. ²⁹ Wom yimar nambur hnehato yengongfat frtatrn, tfit manoko mkukorhofft yak hta hekfot. O sakethat fak hrurekrn, to mirahn yirok hmbreyuk honathat ahakkrant. Rpat yak hrurakhato hiyafkfot. ³⁰ O wom yimar tamoh tamohm tndauworn, yakhato hekfot. O wom yimar tamohm fahunr, ni tfit me juha, ‘O na nd yiha nd yimar fahuyanr nd shrm. Tawo ahira.’ Inji kfo duha. ³¹ Kangn, womm ayak marnyamane, barkopam afo ninn sinyahato womr yak marnyakfot.

³² Tawo tawo hifa yima yuhum nahmbritarpako niyak marnyiakomn, to tfit tamohmpno yamukako, ‘Bro Nkifrar akfo yindhorrnom?’ Nhai. Nd niyak marnya nmbuham nd fasoh nefm nayet yimam, rom nhaf newumm. ³³ Yo nd nikompno niyak marnyiarpam yamukako, ‘Tawo ayak marnyanom.’ Tamohmpno yamukako, ‘Bro Nkifrar akfo yindhorrnom?’ Fasoh nefm net yimam nd nefm rom nhaf newum. ³⁴ Wom

maruham hiyafhato dbima tndauneft, ndt nhai tu dborioh neft. To inji naruhakomn, frohm hti yindhorruhamko? Nd fasoh nefm net yimam inji newum. Yimam tamohm hiyafhato tfit kto kangm, ‘Nom niko yahuhat nd shrm tawo waheknom nom ndm.’³⁵ Nikompno nakfo huttyuk yimam hifa yima yuhur htakfot. Hifa hifa yak marnya bomarnyakfot. Womm tamohm fahukomm, tfit kfo me juha, ‘Na ni yahuhat nd shrm tawo wahina.’ Nd na kfiwa tu hifa dborioh nef yuhat yak hikrahko. Kto be Bro Nkifrar hirahrko hifa rhu nmbuhat. Tu yura myorhekwa Nkifrarhu yonko rhurahko. To mirahko ka Bro Nkifrar nhai yuhuwafkahrm nd kfo yindhor duhatm yo nd fasoh nefetm. Nhai. Ror yuhuwafworm.³⁶ Nikmoh Bro Yifemr yima yuhuwafwa kanjo inji wayuhuwafkomm womm.”

Mirahko wom akfo amanyomm, “O ni ndhtet yimaye.”

(Matyu 7.1-5)

³⁷ Jisasr tfit wom mrokfot kfo memor, “Mirahko womroh nefm hti nhta yak nhtahato rroh nefm frhik bohikhenomm. Inji narahko, tngo Bro Nkifrar inji narahrko. Mirahko womm nayuk nefm htihato ayuta amenomm, ndr nder, o ndr nd nayet yimayer. Inji narahko, tngo Bro Nkifrar inji narahrko. Mirahko wom womroh nefm ayakitoh hanynom. Yafhorahkomm, tngo Bro Nkifrar niko nayuk nefm yafhorahrm.³⁸ Womm tamoh tamoh hirahkomm, tngo Bro Nkifrar mikahtr tawo ahiyanko htirahko wuss tamoh mano mano nierah. Yimam mfro mfro thu brurrahkomm, tngo to inji Bro Nkifrar mfro mfro thu brurrahkomm.

³⁹ Inji kfonihato wom mrokfot kfo nhombra memor, “Wom yimar nyinga kunyjetr nhai tfit yihato wom nyinga kunyjetr yak nuhas hanykfot yiyuk yuhat. Inji naneft ka be hus bugaf yau mmo hanyhato bandrongfa muhmn myahot bani rpat dmetf yohnirahf.

⁴⁰ Nhai wom yonr yuhre wandfa kunys toh hanyetr rorhu dukefm bmbri wandfafarhum kanjo rhukahmr. Nhai. Ror nd yonr afo skur hany bi skur bugahato fekrt safekfot, ee btn rorhu safekfot tisarhut kanjo korht.

⁴¹⁻⁴² Tamohmpno ni womnhu nyingatikt thu kasi rafoyuk yonmari doh mkut yaktafo duha tfit yamuka womrhu nyingam rhuyuk krpum ayak thuhiranr? Be tunhu nefm kak wuna bowunewun. Afo ninhu nyingatikt thu rafoyuk doh mkut yak rihtahato ee yukatoh marnya hanyruhann, btn womrhu nyingam rhuyuk krpum yak thuhiranr.”

Miyukmthu mrokfot

(Matyu 7.16-20; 12.33-35)

⁴³ “Hifa sinya warho marnyet mis nhai tfit fasoh yukha behohm hirkahmt. Fasoh sinya warho marnya duha mis nhaf inji buga, nhai tfit hifa yukham hirkahmt.⁴⁴ Yimam yukham hti nhtewum. Yukham hifayem kangm ee nd mis tu hifa dborioh miyet. Yukham fasohem, kangm o nd mis fasohet. Yimam fik yukha yakneft nhai yiro higef bufuyet tkitrohm yakkahm. Yo wain mtithu yukha yakneft nhaf nhai nd higef bufuyet tkitrohm yakkahm.⁴⁵ Yimar, tu hifa dborioh yima rifuhetr, tu hifa mrokfo rifhur, tu hifa dborioh nefm mfrfnahnewumr. Fasoh yima yuhetr fasoh fasoh nefm mfrfnahnewumr. Yima yuhur rhuyuk tamoh tamoh mrokfo rifhur tfit tngtn ptha nriyafwotm.”

Hus kanjohot kunyf

(Matyu 7.24-27)

⁴⁶ “Tamohmpno naku kfo yamukako Broye! Broye! Na inji nakutahat to btn wakhikkomt nanhu mrokfot. To tamohmpno yak hik duha yitakomt.⁴⁷ Fitoh yimar nanhu mrokfom wanyhato yak hikwa nmbuhat, afo kfo nhombraruhanko.⁴⁸ Nd nanhu mrokfom wany yakiowet yimar, tu hifa duka tungunet yimam kanjo rorhu kuny hingrneft, muhm tou hauhnihato yiro tahi siktpno rahu pokm simene simenim hmbriyahfato be nd simen tahimn hatohkfot rahum. Nhai ninor ba inji nakfot. Hnut wuhnu sinyaneft nhai nd kunyr tadboutakhato suhkfot. Bi nd yonmari simen tahi sikt hatohet kunyr to finji kanjo suhkfot.⁴⁹ Tfit nd wom yimar, nanhu mrokfom wanyhato yak hik duhatr, nd yimar akfonom yima dukef duhat yimam kanjo rorhu kunys be inji

yak brurtahato, hnut nianeft nhai nd kunys toh bmtakfot. Be yudbat hnu buyeft yihom tadboutaknehato tadbombra tubatunifikfot.”

7

*Amiroh keptenrhu hingrna yimar dbohnamotr Jisasr yak marnyamo yuhat
(Matyu 8.5-13)*

¹ Jisasr ndharhof met yindarim mrokfom kfo ptha dbruf tany buga hehato tfit yimor Kaperneamko. ² Ndhahof amiroh keptenrhu hingrna yimar dbohneft yakhato be tu bi brboht rhumot nohneft. Nd amiroh keptenr be tu marbitn htamourr nd rorhu hingrna yimar. ³ Ndnatn Jisasrhu nia mrokfot wanyhato wom Judaroh bro yufet yimam kutewumm “eldam,” rom tkurafmor Jisasrhu mihtiyakhato rorhu hingrna yimarhu yak marnyanef. ⁴⁻⁵ Nd yimam yimomn, Jisasr mkfo naku memomr, “Nd yimar tu dborior yimayer. Nom Judanom hifa kak marnyewurnom. Rorn nd nmoh rhu rifinyuk rmont hingrnamat. Ndnatn waniakahnn, rorhu hingrna yimar wayak marnyatwarr.”

⁶ Be yihom kfakmotmr yimor. Jisasr bi brbo toh hanyetrn, nd amiroh keptenr turhu wom yimatm tkuraf memorm, “Wakfo rafotwakomr, mirahr nanhu kunys aneya. Na nhai dborior yimayann nanhu kunys nieruhar. ⁷ Yo nhaf na rorpno yinyeft na nhai tu hifa dborior yimayann yirhoya brbo rorpno. Be inji nndo tohhato be akfokaht, nanhu hingrna yimar marnyanirahr. ⁸ Nanhu toh nmbuhat to inji buga. Na to wom bro yufetrhu yinhitn tohwa. Rorn tamoh tamoh hingrnefm kahukra. Soldiam nanhu yinhibit tohwom fitoh yimar kfo kanganr, ‘Wania,’ nd yimar niewur. Kfo kanganr, ‘Wanju,’ nd yimar kitr. O nanhu hingrna yimar tamoh hingrnefm kfiwanr, nd hingrnefm hingrnewurm. Ndnatn na kanga be inji nndo tohhato akfokaht, nanhu hingrna yimar marnyanirahr.”

⁹ Jisasr nd yimarhu mrokfefm wanyhato tuha mrokfo duhatr rhumor. Tfit kekut-nihato nd ror hik hanymo yimam kfo memorm, “Barenko, nd yimar nndo wom kmi thofer. Rorhu nkifrar nndohr. Nd mrokfot kfiwatr, nanhu yima yuhur duka kanga, Isrerkort nhai wom yimar htikahanr o wanykahanc kfo mekahra, ‘Be inji nndo tohhato wakfokahtn dbohnet yimar marnyanirahr.’ Nhai. Nhai ndhtet duket yimar htikaha.”

¹⁰ Be nd yimam nd amiroh keptenr kfo tkurafmom tfit kunyko yihato mhtimomr nd keptenrhu hingrna yimar bi marnyaniyetrn.

Kmi Nenthu noheh yimar Jisasr yak kasinyamo yuhat

¹¹ Tfit hwe nfha nd wom yiharn wom kmit kutewumt Naint ndko yimor. Nhaf nd rorhu disaipermi nd wom womt rpat yimom. ¹² Yimomn, yuhre memom, “Ka kmi yifhatikt yau hafkneneirahnomt”, asha htiyak hanymomm yima gur hanur hnamohat. Nd nohmo yimar wom met dhirthu rpa mif yonr nohemort. Be nd met dhirthu yonr nohmotr, nd kmithu met yindarim hanynhohato memom, “Yopnhorahnomt.” ¹³ Bror nd met dhirt htihato yuhuwafmort. Hti yuhuwafhato kfo memor, “Inji anurwahn.” ¹⁴ Inji kfonitart, yau yaknihato nd yima gu krokt rim tayoutitrt. Be tfit nd yima gu krokt tita hanyukm afo yihom tohtewum. Yihom toh tewatm, Jisasr kfo kangr, “Na kfiwann nda yima damiage wasinya.” ¹⁵ Inji kfomotr, be nd bi nohet yima damiagr myenyjwohato mrokfo pthamor. Be Jisasr yaknimorrn, nd yonr mmemtpno rim kfo memor, “Asor bi tfit ninhu yonr.” ¹⁶ Be yimam nd noheh yimar yak kasinyamo yuhat htihato nhai yima yuhetm rhurmom. Bro yanuheft fakmotm. Yanuheft yakkottm, tfit Bro Nkifrar naku kfo yindhormomko. Kfo memom, “Bro profetr bi niaror. Bro Nkifrar turhu yon kunys miyak htiyakneft bi niaror.” ¹⁷ Be nd Jisasr noheh yimar yak kasinyamo yuhathu mrokfot nhai wom brbo warhu hasormot. Ur Juda tkit tkitm ur fitoh fitoh tkitm, wany bugamomt Jisasrhu noheh yimarhu kasinya nmbuhat.

*Jonr turhu uhik ahik htfasyuk yimaf kfo tkurafhato Jisasrpno yimo yuhat
(Matyu 11.2-19)*

¹⁸ Jonrhu uhik ahik htfasyukm nd Jisasr namo neft wanyhato Jonr kfo nuhas bonuhas-momr. ¹⁹ Jonr wanyhato turhu uhik ahik htfasyuk hus yimaf naku yakhato kfaf memorf,

“Brorpno waifn. Waikahfnn, wattiwon wamitwafnr, ‘Ni aso nd nom toh gari hasiwa yima o tor yuhre niewur?’ ” ²⁰ Be nd hus yimaf yimofn, Jisasrpno mfnahhato mkfo memofr, “Jonr famurno, ‘Wattiwon wamitwafnr, “Ni aso nd nom gari hasiwa yima o tor yuhre niewur?” ’ ”

²¹ Nd yihart rof mifnahmohat bok met yindarim womhtet dbohnefetm Jisasr fak marnya hasomor. Bok yimam kmi yarth fknayetm fak marnyamourm, yo nyina kunyjetm fak marnyamourm. ²² To be ndnettn rof mikfo ttiwonmohat tfit kfaf memorf, “Tfit waikahfnn, Jonr wakfo nuhastwafnr nd nifn hrek htitawo nefm yo wanuka mrokfom. Wakfo nuhastwafnr nd nyina kunyjetm marnyani yuhat yo wura bebetm marnyani yuhat nd mimbr yaketm marnyani yuhat yo yimbhindang kihmniyetm marnyani yuhat, noheh yimam myenyjwo yuhat yo nd fasoh knbokroh rirhuyuk yimam Bro Nkifrarhu tu mrokfo mifm wanuka yuhat. Nd ndm wakfo nuhas bonuhastwafnr. ²³ Yo wakfo wamitwafnr, yimam Bro Nkifrar hik hanyhato tfit na niwa nefm mhti yakhato nhai suhkahm, nd yimam ayindhortwam.”

²⁴ Be nd yimaf yimof. Yimotf, rofhu mongkorn met yindarim Jonrhu hingrnafathu mrokfom kfo ttiwonmorm. Kfo memorm, “Niko Jonrhu htit yimohat yima toh duha tkitt, tamohm memoko ai ahtinom? Ka memoko yimar mrokfom rim kfota mkfotetr ai ahtinom? ²⁵ O be nd hifa hifa wondh wuska hmbreyet yimar memoko ai ahtinom? Nd yimam hifa hifa wondh wuskam hmbreyetm, ndhtet yimam kingroh kuny kmifam tohwa yimayem. ²⁶ To nikome tamohroh htit yimoko? Profetrhu htit yimoko? Akfoyanko. Ror tu profeter. Bingotroh profetroh hingrneft nhai rorhu hingrneft kanjo rhukaht. Nhai. ²⁷ Tor nd yima Jonrn Bro Nkifrarhu rfa borngt kfo memot, ‘Wawanyko Bro Nkifrarhu mrokfeethu kfo nuhas hanyuk yimar tohak hanyrahrko. Rorn yihotar mnong hanyrahrr.’ ²⁸ Na kfiwanko, Jonrhu yufat be tu broyet, nhai wom yimar Jonrhu yufat kanjo rhukaht. To tfit kfiwanko, fitoh yimarn tu Bro Nkifrarhu kingdomkfotn ftohr, tor nd yimarn tu bro yufa mift yakrahr.”

²⁹ Nd met yindarimi takis marut yakyuk yimam bi Jonrpno baftais yaketmn tfit Jisasr nd mrokfom kfo pthamohat rom sinyahato kfo memom, “Bro Nkifrarhu mrokfot tu fipayetet.” ³⁰ To tfit Farisimi boririshuthu tisamn nhai wany yindhorrmomt. Hany jbornamomt Jonr pthamo mrokfot yo nhai wofnrmom Jonrhu rroh baftaisneft.

³¹ Jisasr tfit pthahato kfo memor, “Ar yiharhof yimam tamoh shrmn akfo nhom-brayanm? Finji kanjo yorhwam? ³² Yon mumenn maket swirl o wumt swirl rhuhato nnakfo nnakfiwa kanjo nnakfiwuko. Womm rirhuhato womm rikfo mirahmm, ‘Nom tuhan yindarif niyak tatrutwa yiha wumtwa musikkfot wumtnomt, niko nhai grharfoko. Nur windohm mayi nmbuhampno rpat windohnomm, niko nhai nurrfoko.’ Inji yon mumenn kanjo nnakfo nnakfiwuko. ³³ Jon baftaisr niamohat, ror nhai nuwa ya bupa yarmor. Ndtm niko hti kfo memoko, ‘O Jonr fasoh kmi yarhm fknemomr. Nhai nuwa bupa yekahr.’ Inji kfomokomr. ³⁴ Tfit ar yihat na nikmoh tu Bro Najema niamohat, bupa nuwa yewota, tfit ndt htihato tfit kfo kangko, ‘Wahtiko nd yimar nuwa yemungrofoter yo spaket drinkfot masat hmbritarian spakwor. Yo takis yekwa yimami fasoh nefm niwa yimampno nabnot habriwor.’ Inji inji kfiwukma. ³⁵ Bro Nkifrarhu duka tungunefrn tamoh tamoh nefm mhfnahnewatrm, nd tkittn yimam htihato kfo kangm yafotheter nd rorhu dukefr.”

Fasoh nefm nayet mett niahato Jisasrhu wuram kahpaye yuk kifsamo yuhat

³⁶ Farisir yihato Jisasr kfo memorr, “Krif waniakahnn nanhu kunysn nuwa yerahno.” To be Jisasr nd Farisirhu kunys yihato nuwa famor. ³⁷ To nd kmitn wom fasoh nefm nayet mett tohmout. Ndha tohettn, wanymot Jisasr nd Farisirhu kunyshu nia nuwa ye nmbuhat. Rot inji wanyhato fakmot tahiye hingrnayet wel knt. Yakhato yimot nd Jisasr rhumo kunysn. ³⁸ Rot nd mett yimotn, Jisasrpno mtohmot. Mtohhato nurmout. Nurhato nd rothu nur nyiningaroh bupam yima Jisasrhu wuramn mitohmoum. Mitohmotm, tfit yimathu tmarifaye trk domtmoutm. Inji na hanymotn, yimarhu wurat rithu kiyakmotrn, frhaddohato nd rot hanymo welpaye wuram fuk wunamotr.

³⁹ Nd Jisasr naku yakmo Farisir inji htihato be yima yuhurn duka memor, “Ndar yimar tu profet mifr arhur, to bi hti nhtarfot nd mett ror tir htewat. Ndt nhai tu dborioh mett tir htakaht, fasoh fasoh nefm nayet metet.”

⁴⁰ Jisasr inji wanyhato kfo memor, “Saimon, na wom mrokfeft ninpno afo kforhota wawanywsa.” Saimon memor, “Yinowe injuve, waptha.”

⁴¹ Jisasr kfo memor, “Wom hus yimaf wom yimarpno maruha fakmof. Memof, ‘Kto tfit maruhetenone hirahnomn.’ Wom yimarn 100 kinakfot fakmor. Womrn 10 kinakfot fakmor. ⁴² Be tfit kto nhai womr niahato nd rof yaknimo maruham tfit hermofr. Be nd maru tikat yimar garitihato nhai tfit marimor, ‘Tfit wompam naku tndau hatohruha.’ Be duka mumafmorf. To ni Saimonn waduka nd hus yimaf. Frohrn yirforn nd yimar namo dborioh neft kfo yindorrfor? Nd bro marufa yakmorn o habhi marufa yakmo yimarn?”

⁴³ Saimonr memor, “Na kanga nd bro marufa yakmo yimarn yihato kfo yindhorrforn.” Jisasr memor, “Uwa hifa kfiwun.”

⁴⁴ Jisasr kekutnihato mett htihato Saimonr kfo memor, “Htitwont ndar mett? Na ninhu kunys niehat, nhai bupam yakrfonn, wuram yuk kifsarfona. Nhai. Wahti ndar mettn, niesn rothu nur bu nyngaye fuk kifsetm nanhu wuram, yo rothu tmarshu tmarifaye trk domttm. ⁴⁵ Yo na ninhu kunys nia yarim rhuhat ni nhai rithu kiyakhato frhaddorfona. Nhai. Ndar mett niahato nanhu wuram yakhato frhadditm. ⁴⁶ Ni nhai welpaye yukrfont nanhu mfhat. Ndar mettn niahato nanhu wuram welpaye fuk wunita.

⁴⁷ Ndnatn na kifwann, nd mett namo boknabok fasoh fasoh nefm bi fak thu ahuyant bi. Ndnatn na masat yuhu mongisa. Nd yimar habhi nefenm yak thu hayetr, be inji tefinano yuhu mongiwora.” ⁴⁸ Be nd mett Jisasr kfo memort, “Ninhu fasoh fasoh nefm bi fak tuhahuyann.” ⁴⁹ Be nd rpa tebort rhu hasoyuk yimam tum rinakfo nakfo memom, “Ndre tamohtet yimarn, yimaroh fasoh fasoh nefm yak tuhahukarm?” ⁵⁰ Nd mett Jisasr kfo memort, “Ni Bro Nkifrar yak hikwa nmbuhatn fak marnyern. Hifa yindhor yima yuhurpno wanju.”

8

Jisasr yaunhomo metm

¹ Kto tfit nd wom yiharn Jisasr sinyanihato yi htfasmor kmi kmi. Yi habrihato kfo nuhas bonuhas habrimorm Bro Nkifrarhu kingdomkfot. Nd 12-pela yimam rorpno yau habrimoam rpat yimom. ² Yo nd metm bi barkof Jisasr tohhato rroh dbohnefmi rroh kmi yarhm yak thu hemom, rom rpat Jisasr hik hanymom. Nd metmpno yimo wom metthu yufat, Mariat, Makdala efkrott. Nd mett rot tohmohat 7-pela kmi yarhm fknemotmt, Jisasr fak thumorm. ³ Yo Herotrhu kuny kmifat tohukatohyuk yima Susarhu met Joanati Susanat yo wom metm rpat hik hanymomr. Nd metmn hik hanyhato tamoh tamohm romn hti duka hanymouumm. Yeshri nd ndm rroh maruhaye wiknahato he bmta hanymouumm. Yo hweyuk tkitm nhaf romn wiknamoatm hwemoum.

Yewuri tpim dborhiwa tkitm

(Matyu 13.1-9; Mak 4.1-9)

⁴ Wom yiha kmi kmirhof yimam mano mano rifiny hmbri yaknamomr Jisasr. Rify hmbri yak namotmr, wom kfo nhombra mrokfot kfomorm. Memorm, ⁵ “Wom yimar mswirt hingrnahato wit tpim yaknihato thu brur htfasmorm. Wom tpim yihota yau yuhat misuhmom. Kto yimam wiyau yauhato yahot turnamotmm, nungam niahato tout buganimomm. ⁶ Wom tpim misuh hanymoum tahi siket tkitm. Kto dborhanihato memom ka nemba thuhato sinyarahnom, to nhai, bbinyssoft yiro bupa duhattn, be fftahato nohmom. ⁷ Womm hig suhmpno misuh hanyyukm rpat hig tofmpno sinyahato kihawot hmbriyaf-momm. ⁸ Wom tpim tu hifa dborioh bbinyssoft misuh hanyyukm, romn tu hifa sinya marnyahato 100 dmet 100 dmet hir hanymom rpa rpa yewuri fanm.” Nd kfo nhombra mrokfot kfonihato kfo memorm, “Yimbhin-dangeteko, ndar na kfiwa mrokfot wanykfot.”

*Jisasr kfomo kfo nhombra mrokforoh yimbu yuham
(Matyu 13.10-17; Mak 4.10-12)*

⁹ Nd kfo nhombra mrokfom turhu disaiperm wanyhato ttiwon memomr, “Nd kfo nhombra mrokforoh yimbu yuhame finji yorhwam?” ¹⁰ Jisasr kfo memorm, “Wanukko, yafuna mrokforoh yakyuk dukefr bi nikomn hemor. Bro Nkifrarhu kingdomkfothu kafrohet mrokfom be kfo nhombra kanjo ptharahm o mrokfom be yura yafunarahm, nikomn dukefm bi yakrahkomm. Wom yimam be kfo nhombra mrokforpam wanukm. Ndnett tamohroh htineft nhai hti hikruhatmm. Mrokfo wanyneft rot nhaf inji wanyeft rot wanyrahm, tawo mrokfo yimbu yuhann nhai wany hik marnyaruhatmm.”

*Yewuri tpiroh kfo nhombra mrokfothu yimbu yuhat
(Matyu 13.18-23; Mak 4.13-20)*

¹¹ Jisasr kfo memorm, “Nd kfo nhombramo mrokfo yimbu yuhat inji korht: Nd yewuri tpim, Bro Nkifrarhu mrokfot kfo nhombramoya. ¹² Nd na kfo nhombra memo yewuri tpim yima yau yuhat misuh hanyukm, nungam niahato toutnimom, ndm Satanr nunga hafise niahato yimaroh yima yuhum rhuyuk hifa dborioh mrokfom nia yak thuwa nmbuhat kfo nhombramoya. Satanr kangr Bro Nkifrar hikruhamn, hbhakrahrm. Ndnetrn kak thuworm tu hifa dborioh mrokfom. ¹³ Yo nd tahi sikm misuhhato sinya duha yewuri tpim, ndm kfo nhombramoya yimar Bro Nkifrarhu mrokfot yakitoh bmta duha yita nmbuhatn. Yimam afo barkofpam hifa yindhor nmbuhatpno Bro Nkifrarhu mrokfot mhik tefi yaknitmt, tfit tamoh nefm rinhebeh-efiwumm, to be ndha msuhhato myafho thunitmt dborioh mrokfot. ¹⁴ Yo nd yewuri tpim hig suhmn misuhwam, ndm kfo nhombramoya yimam Bro Nkifrarhu mrokfom wanyhato tfit myafho tuhefiwa nmbuhamn. Yimam mrokfom wanukamn, tfit ndar bbinysoftu dukefm kak wunefi-wumt Bro Nkifrarhu mrokfeft. Womm tum hatohyuk krho nmbuhamn, ndmn be duka kinyaki hasiwum. Womm maruharoh dukefrpampno korth hasiwum. Womm hifa rhu nmbuharhu yaknefrpatn duka hasiwum. Nd nd dukefmn thu nhombranitatmm, Bro Nkifrarhu mrokfeft myafho thunitmt. ¹⁵ Nd hifa bbinysoft misuhhato sinya marnyamo yewuri tpim, kfo nhombramoya nd yimam mrokfom wany yakiohato yakitoh dbkafwa yimamn. Nd yimam tu hifa yima yuhet yimamn, rroh wiayau nmbuham hifa kau marnyewum.”

*Lamt yak nukayuket
(Mak 4.21-25)*

¹⁶ “Nhai wom yimar lamt yakhato yiro rohtn kafko hmbriyafkahrt o nhai wom yimar lamt yakhato yiro tik rfashitn hta hamongafkahrt. Nhai. Be inji dany yuhat htewatrt, rorhu kunys yarim fkninayuk yimam lamthu nukeft htitwomt. ¹⁷ Nd kfo nhombra mrokfothu yimbu yuhat inji kfiwut. Bro Nkifrar, rorhu kfo kafrohet mrokfeft kto be tafontn yak htarahrt. Nd tamoh tamohm Bro Nkifrar yak wuna bowuna hasiwam, kto be tafontn yak htaruhatrm yimam htirahmm.

¹⁸ Ndnett wany marnyakfot. Frohr mrokfom wanyhato yima yuhurn hmbri hterm, nd yimar Bro Nkifrar tfit thu hmbrihirahrr. Nd yimar mrokfom wanyhato nhai yima yuhur htarform, nd tefi dukefenr rorhu yima yuhur rhuyukr tfit tu Bro Nkifrar yak thurahrr.”

*Jisasrhu tu mmem nmemrom
(Matyu 12.46-50; Mak 3.31-35)*

¹⁹ Nd yiha Jisasrhu mmemti nmem najohfit niahato memom, “Jisasr ania ahtinom.” Niamomn, to be bok met yindarim rifinymotm nhai brbo yirmom Jisasrpno. ²⁰ Wom yimar yihato Jisasr kfo memor, “Ninhu mmemti nmem najohfit tom niem. Niemn, kangm ahtinomn.” ²¹ Jisasr inji wanyhato kfo memor, “Fitoh yimam Bro Nkifrarhu mrokfeft wanyhato yak hikwam, nd yimam nanhu mmemroyem yo nanhu nmemroyem.”

Jisasr kfohato wifort minoh hmbremo yuhat
(Matyu 8.23-27; Mak 4.35-41)

²² Wom yiha Jisasri turhu disaipermpno mmbrtm mirhuhato Jisasr kfo memorm, “Barenko, na kanga tek barit ahir tmbhonikahnomn, mkuko ainyom.” Be inji kfohato yimom. ²³ Tek yuhat hir hanyhato Jisasr hwemor. Ror hweyetrn, bro wifort sinyahato fryif hany titamotm. ²⁴ Be nd disaiperm yihato Jisasr naku thuhato kfo memomr, “Broye, Broye nom bi wifort fryif boyifwotnom!” Be ror sinyahato nd wiforti nd bu rifhum sinyamom kfomotr, minoh hmbremom. ²⁵ Nd wiforti bu rifhum yak nohnihato kfo memorm, “Tamohmpno yakrmitako? Nhai duka mekahko, ‘Rorpno kitwonom. Aduka yanho-wahnom?’” Rom inji wany yanhhato kfo memom, “Arre tamohtet yimarn be tnge pthitr wiforti bu rifhu sinyayukm wany yakiohato minoh hmbrenim?”

Jisasr kmi yarh fknayet yimar yak marnyamo yuhat
(Matyu 8.28-34; Mak 5.1-20)

²⁶ Be rom hir hany hir hanymomn, Gerasat rifnahmom. ²⁷ Nd kmit rifnahhato nd kmithu wom kmi yarh thu hamumet yimar niamor. Nd kmi yarhr thu hammomoatrr, to be sfnoh bubombrohr tohmour. Ror tohmoahat nhai yima kunym tohrmoar, be inji nd yima gum htamoahati bakuny mkumn toh htasmour. ²⁸ Be nd yimar Jisasr htiyakhato rorhu wurampno rim suhhato mtau ssiyakni memor, “Jisas yura myorhekwa Nkifrarhu Yone, ni finji newona? Mirahn krho nmbuhat ahiyanr.” ²⁹ Jisasr bi kfo twanhomor nd yimar thu hammoma kmi yarhrhu htanyeft nd yimar. Yiha yiha nd kmi yarhr tuhagrha mmomour nd yimar. Tuhagrhamoatrr, yimam to be rorn dukahato kukatoh hasomoum. Womnam sene ttaftamoumr, womnam tasomukr hanyhato kimoumr. To nhai, frtebirknihato yimour. Womnam nd kmi yarhrn tuhafunanimoarr hanymouurr wuri yima toh duha tkitmn.

³⁰ Jisas kfo memor, “Ninhu yufat wayutant.” Nd yimar bok kmi yarh rifhur fknemotmr to be kfo memor, “Rifuhetenom.” ³¹ Nd yimar fknehato tohmo kmi yarhm Jisasr kfo nakuhato kfo memoum, “Nom nhai wofnkahnom kmi yarhm mihmbrita muhrhu yinyeft. Nd muhr yiruhanomn, to finji tfit nieruhanom? Mirahn ndko akfo tkrurafanm.

³² Wahti, wusomio kmi yorgenrn foh rifhum. Be wakfafkahtnnom, nd foahmn fkneni hanyrahnom.” ³³ Be Jisasr kfomotr nd kmi yarhm nd yimar thu troh tanyhato foahmn fkneni hanymom. Be foahmn fknenihato thu hafunanimotmm, nd foahm kmi kihahir yuhat mitarhotnihato tek baritn mitayif wurasoh bugamom.

³⁴ Nd foahm hatohmo yimam inji htihato be tonayefrpar yakhato taunthu yimam kfo nuhas bonuhashato kmi kmi kfo nuhas fnahmom rom htimo nefm. ³⁵ Kmi kmim wanyhato yi hanyhato memom ahtinom. Rom yimomn, nd yimar kmi yarh htanyeft htimomr rmonthat tabhutahato tu hifa yima yahu dukefrpno Jisasruh wurampno rhu hasetrn. Rom be inji mthihato be duka yanuhefrpno tohmom. ³⁶ Jisasr nd kmi yarh fknayet yimar yak marnyamohat tuha tohyuk yimam hti hikmomr romn tfit kfo nuhas bonuhas hikmom rom niamo yimam. ³⁷ Be nd Gerasa thofm Jisasr namo nefm hti yakrmihato kfo memomr, “Ni be tmifn ndar kmit wahtanykahnt, wainy.” Be Jisasr mmbrtm mikmbrenihato tfit yimor. ³⁸ Nd Jisasr kmi yarh yak thumo yimar tfit Jisasrpno yihato kfo ttiwon memor, “Ahikann?” To nhai, Jisasr wanyhato kfo rafo tany memor, ³⁹ “Tuha kmitn warhu hasokahnn kmi thofm wakfo nuhas bonuhastwanm ni Bro Nkifrar yak marnyamo nmbuhat.” Be nd yimar wany yakiohato tuha turhu kmitn rhu hasohato turhu kmi thofm kfo nuhas bonuhasmorm Jisasr yak marnyamo nmbuhat.

Jisasr Jairusrhu yonti yo dbottet mett yak marnyamo yuhat
(Matyu 9.18-26; Mak 5.21-43)

⁴⁰ Jisasr tfit manoh tek barithu kmi mkuko hir hayuknimohat nd tek bari mkukorhof yimam bi rhu gari hasetmn, to be Jisasr hti yakmohat be tir tir fakmomr. ⁴¹ Be yuhre mtoh tefi hanymor, wom yimar kutewumr Jairusr niamor. Nd yima Jairusr Judaroh

rhu rifinyuk rmont tohukatohmour. Ror niahato Jisasrhу wurampno msuhhato mkfo memor, "Jisase, wania. Ainyo nanhu kunyko." ⁴² Ror inji mkfomohat, rorhu 12 gunyjimet yont noh wururifhut yakmott inji mkfomor. Ror nhai bok yonm. Rorhut nd yon metrpatt.

Jisasr yimohat be bok met yindari rifhur hik hanymomrn be nahuta yaborr hanymom.
⁴³ Nd yima rifiny buharn wom dbottet mett fau hanymot. Nd dbotteft 12-pela gunyjimm hatohmott. Bro hunkothampno yimout, to nhai yak marnyarmoamt. Be rroh wiknaneftpno yonmari marut tamoh tamoh shrt tubatu witamott. ⁴⁴ Be Jisasrhу mongko yauyaknimotn, ror hmbreyuk hmbreshathu psift mfak tiwonafmot. Be inji namott, yudbat nd dbotteft teh tmbhakmott. ⁴⁵ Jisasr yironafhato ttiwon memor, "Na frohr tayoutitawora?" Pitar memor, "Ka yimam yau hanyhato mtayoutinimn." ⁴⁶ Jisasr memor, "Tu yima mifr tayoutira. Na tuka yironefiya yima yak marnyayuk yafothat yimar yak marnyehat." ⁴⁷ Tu nd mett duka memot, "To finji wom finji kafrohrhoya? Bi htitawora." Be tuha mrokfo duha Jisasrhу wurampno rim suhmot. Rim suhhato tuha yima rifiny buharn kfo ptha nuhas bonuhas nriyafmotm nd rot Jisasr rim tayoutihato rothu dbotteft teh tmbhakmo yuhat. ⁴⁸ Jisasr kfo memort, "O ar yone, nd ninhu dbotteft, nd hatoh hnamot, duka famu, 'Ror rimaktirhota, be nd dbotteft teh tmbhakraht.' Ndnettн ninhu dukef yuhatn nd dbotteft teh tmbhektn. Be hifa yindhor yima yuhurpno waikahnn, watohtwa."

⁴⁹ Jisasr yuhre nd mettpno nakfo nuhas hasiwume, asha nd Jairusrhу kuny shofr toni hnehatо Jairusr yihom kfo kangrr, "Mirahn Bror ahany furayanr kunykort. Ninhу yont bi mfaknit." ⁵⁰ Jisasr nd mrokfot wanyhato, Jairusr kfo kangrr, "Ni bi mirahn ariduka yanuhaka. Ninhу bro dukeft waduka wame, 'Nanhу yont tfit myenyjworaht.' Be nd dukefrpat arhukahtn, be tfit marnyaniraht." ⁵¹ Jisasr yimorn, Jairusrhу kunys mfnahhato fknenimohat nd wom womt kfo rafo tanymorm kunyrhu fkneneineft. Pita, Jon, Jemsromrpampno, nd nohyuk yonthu yifammampno rhumomt nd yima gus rhumo rumt. ⁵² Yimam nd yima gus hanurmoatm Jisasr kfo memor, "Anurwahko. Nd yont nhai nohrfot, be hwitwot!" ⁵³ Jisasr inji kfomotr, nd met yindarim haningemomr. Rroh dukeft duka memom, "Bi nohett to finji wom finji sinyaruhat?" Ndnatn haningemomr. ⁵⁴ Jisasr nd yonthu tirt yikitohhato yufat yutahato kfo naku memor, "Ar yone wasinya." ⁵⁵ Inji kfo nakumotr nd yonthu yafothat tfit mthu nawohhato sinyamot. Nd yont tfit myenyjwomott, kfo memor, "Yeshrim wayak wahefnt." ⁵⁶ Yonthu yifammaf inji htihato be tuha yafotha duhatf tohmf. Jisasr kfo memor, "You! Mirahfn akfo nuhas mif mifnomm nda nifnhu yont myenyjwi yuhat."

*Jisasr 12-pela aposerroh hingrna yuham kfo hta bohta nuhasmo yuhat
(Matyu 10.5-15; Mak 6.7-13)*

9

¹ Jisass turhu disaiperk kfakhato niamotm, tek yarh kmi yarh yak thuyuk yafothar hiyaf hanymorm. ² Nd yafothar henyihato kfo memor, "Wanjukahkomm, yimam wakfo wamitwakomm, 'Bro Nkifrarhu kingdomkfotn tfit ndar bbinysoft rhuraht.' Nd mrokfot kfo nuhas hi hanyhato yo tamoh dbohnet yimam htitwokomm, wayak marnya hanyswakomm." ³ Rom sinyani yimohat memor, "Yinyeft mirahko kio musm, hmbre wus yohm, nuwa nakupam, maruham, hmbresham ayakito hakenom. Be inji sfno yikfot. ⁴ Yihato wom kmit yak miyakhato, kunys fahumko, be nd kunyrapat toh tanyhato tfit sinyani yikfot. ⁵ O wom kmit o taunt yihato nhai kunym yak miyakhato nikо hanyuk mrokfom nhai yindhorkahm wanyneft, nd kmit htanyhato fus wuram tuha nd kmitn frdbofta tanyhato htanykfot. Inji naruhatko, ndt htiruhamn, mirahm, 'O nom yak miyak duha yitnomm inji nem.'" ⁶ Be inji kfo hta bohtafmotrm, yimom. Kmi kmi yihato Bro Nkifrarhu mrokfeft kfo nuhas hanyhato dbohnet yimam, kmi yarh fknayetm fak marnya habrimomm.

*Herotr Jisasr namoa nefm wanyhato bok dukefm fakmor
(Matyu 14.1-2; Mak 6.14-16)*

⁷ Galilikorhof kmim tohukatohmoa yima Herotr Jisasr namo nefm wany-hato bok dukefm fakmor. Womm yihato kfo memomr, “Nohmo Jon Baftaisr tfit mfnahmor.” ⁸ Womm yihato kfo memomr, “Ka Iraijayer.” Tfit womm yihato kfo memomr, “Ka bingot nkiframpno nohyuk profetr sinyamor.” ⁹ Inji mikfota mkfotamoatm, Herotr kfo memor, “Niko kfia Jonr to bi mfhata puk tmbhomoyanr. To nd yimar frohrn ndhtet ndhtet nefm newatrm mrokfefm wanukanomr. Afo yi htiruhanr.”

5,000 yimam Jisasr yeshri hemo yuhat
(Matyu 14.13-21; Mak 6.30-44; Jon 6.1-13)

¹⁰ Nd Jisasrhu yon kunyshu kasinya htifasyuk aposerm yi habrimomn, tfit niahato Jisasrpno mptha nuhas bonuhasmomr rom nahabrimo nefm. Be tfit romrpam Jisasr yaknimorn tfit wom kmit yimom. Nd rom yimo kmithu yufat Betsaidat. ¹¹ Met yindarim wanymom Jisasrhu Betsaidathu yi nmbuhat. Wanyhato fau hik hanymomr. Jisasr hti yakhato memor, “O hifa nieko.” Yo Bro Nkifrarhu kingdom-kfothu mrokfot yakhato kfo nuhas bonuhasmorm. Ndm kfo nuhasni, yo nd yi hanyuk dbohnet yimam, dbohnefm fak thu hany hemorm. ¹² Tu krifnanorn, disaiperm niahato Jisasr mkfo memomr, “Nom kangnom nd met yindarim be tmifm wakfo tkrurafkahtnm, natubatunim. Natubatunikahmn, hweyuk tkitm hambrokahmn, nuwa yemska rhurahm. To asha yorhwamn, fitoh yimam nuwami hweyuk tkitm yahukamm? Asha yima duha tkitt korhnom.” ¹³ Jisasr inji wanyhato kfo memorm, “To nikomn wahekomm yeshrim.” Tfit rom memom, “To nom href fitha yeshrim yakhato yahukanomm? Nome tirfa bret nuwami hus yiraf, injirpa kakitohwonom. E, be kagn maruhaye yesht wikhahato ndar yonmari yima rifhur ahennom?” ¹⁴ Nd yihar 5,000 yimam rifinymom.

Jisasr turhu disaiperm kfo memorm, “Nd yimam wakfokahtkomm fifti fifti inji arhu nhombra hanym. Wom tkittn wom fiftikfot rhukfot, tfit wom tkittn wom fiftikfot rhukfot. To be inji rhu nhombra hanykfot.” ¹⁵ Nd Jisasr kfomo yuhatn fak hta nhombramomm. ¹⁶ Rhu nhombramotm, Jisasr nd tirfa bret nuwami hus yiraf yakmorn, yura mountko yukatohhato kfo bruttnamor. Kfo bruttnanihato turhu disaiperm yak tifakhany hiyaf hanyhato kfo memorm, “Wahe nhombra htifas hanykomm.” ¹⁷ Nd he hanymo yesht nd yonmari yima rifhur yihany yi hanymomn, yatim furkihmomm. Yatim furkihmotmm, be nd yesmbhehm yak nhafohhato tfit 12-pela kpmn hmbre nhafohmomm.

Pitar kfo nriyaf memor, “Jisasr nmoh minrfa hti yakyuker.”
(Matyu 16.13-19; Mak 8.27-29)

¹⁸ Wom yiha Jisasr turpar Bro Nkifrapno kfo bruttnamohat turhu disaiperm rom tom rhumom. Ruhetmn, kfo ttiwon memorm, “Nane, met yindarim finji dukewuma?” ¹⁹ Kfo memomr, “Womm kangmn Jon Baftaise. Womm kangmn Iraijaye. Womm kangmn wom nkifra profetr tfit sinyamor.” ²⁰ Inji kfomotm, tfit ttiwon memorm, “To niko tuko finji yutewukma?” Pitar kfo memor, “Ni kangnomn nmoh hbhayeme, Bro Nkifrar kfo tkrurafmorn nmoh minrfa htiyayukn.”

Jisasr turhu nohhato sinya yuhat kfo nuhasmorm
(Matyu 16.20-28; Mak 8.30-9.1)

²¹ Pitar inji kfomotr, Jisasr kfo nnhu memorm, “You! Mirahko wom yimampno nd ni kfi mrokfot akfo nuhas mifnomm. Be nikomrpakompno nd mrokfot ayohnes.” ²² Kfo memorm, “Na, Bro Najema, boknabok krhopam yakruha. Na Judaroh bro yimamn, prisroh bro yimamn, boririfhuthu tisamn, nd nd yimaroh tirmn hirruha. Nohrhoyann tfit husfirpehyuk marrn tfit sinyaruha. Na nhai tfit finji kfo finji kforhota. Na be yi nohnefrpat.”

²³ Ndm kfonihato kfo memorm, “Wom yimar kangr, nann ahika, nd yimar mirahr tamoh tamoh nefm turhu duka fijo anaya. Ror be na yakitoh dbkafhato nd mano mano niayuk krho nmbuham rpa rpa yihar titahato toh bmtakfot. ²⁴ Fitoh yimar turhu

toh nmbuharpat dukahato nhai wofnkahr na hikkato krhopa yakneft, kto nd yimar be nhai hifa rhu nmbuhuat yakruhatr. Fitoh yimar na dukahato bro krhopam yakhato ftohr, kto nd yimar hifa rhu nmbuhuat yakrahr. ²⁵ Wom yimar ndar bbinysoftu tamoh tamohrpar yakhato kto toh nkifrayuk toh nmbuhuat nhai dukarfort, to nd ariha yekwa marut, wuskat, tamoh tamoht kto to finji hifa toh nkifra nmbuhuat hiruhamr? ²⁶ Frohr yak rihtefiwura yo nanhu mrokfeft yak rihtefiwurt, be nd yimar tawo na Bro Najema yak rihtafruhanr. Na nia thombat nani Bro Yifemre tu dborior mounmotm, nmoh nukeftpno yawih-nehato yak rihtafruhanr. ²⁷ Kfo mifwanko, nikmoh womm tafi noh duhatmn, htirahmt Bro Nkifrarhu kingdomkfot rhu thombat.”

Jisashu thatipt fnhumo yuhat

(Matyu 17.1-13; Mak 9.2-13)

²⁸ Nd ror kfomo mrokfom kto 8-pela marm tohnihato ee Pitari Jonre yo Jemsr nd husfirpa yimam yaknihato kminyofko kfo bruttnat muhmom. ²⁹ Muhhato Jisasr kfo bruttna hanymor, yimarhu nyingatikt fnhuyaknihato memom nndo yindeng nyisofr fnhutwor. Yimar hmbremo hmbresham rpat fnhu bugaknihato memom nndo bruhohmr katiwur. ³⁰ Nd fnhuyeftpno asha Moses Iraijarof niahato Jisasrpno mitohhato napthamom. ³¹ Kfo nuhas bonuhas memofr, “Ni Jerusalemrn nohrahn. Bro Nkifrar bingot kfo htamo mrokfot ndha Jerusalemrn rhuraht.” ³² Pitari nd wom yimaf nyingam krkotakmotmm, memom, “Ahwinom.” To nhai, be nd Jisasr hatohmo funefti nd mitoh hmbremo yimaf htihato nhai marimom hwirahnom. ³³ Nd yimaf Jisasrpno mitohmof, memof, ka Jisasr htanyhato ainyo. Pitar memor, “Broye, nmoh asha tohneft hifa. Ka husfirpa kunyenm yimanom nhombra-hato singorahnom. Ninhu womt, Mosesrhu womt, yo Iraijarhu womt.” (Pitar inji kfomohat nhai tu hifa yima dukefrpno ptharmor. Be tngrpatn furamott nd mrokfot.)

³⁴ Inji ptha hanyetrn, yudbat gribt wuyohninamotn thu kasi hmbriyafmotm. Gribt thu kasi hmbriyafmotm, disaiperf fakrmemom. ³⁵ Nd gribpamn wom tngt wanymomt, kfo memot, “Nd yonr nanhu yoner. Nanhu yufatn tohwor. Ror pthayuk mrokfom wawany yakiotwakomm.” ³⁶ Nd tngt inji pthanimott, kto htimomr Jisasr turpar toh hasomor. Be rom inji htihato nhai tfit wommpno yihato kfo nuhasrmomm nd rom htimo nefm.

Jisasr yak marnyamo kmi yarhr hatohet yonr

(Matyu 17.14-21; Mak 9.14-29)

³⁷ Tfit nd wom yiharn Jisasrom yura kminysoft wuhtanyhato yohnemom. Rom yohnemohat yonmari yima rifhur Jisasrpno mnafuryakmom buha yihotatn. ³⁸ Nd Jisasrpno mnafuryakmo yimaroh womr sinyahato Jisasr naku kfo memor, “Broye, na kanga nanhu yonr wania wahtihina. Na nhai bok yonm. Nanhu yonr ndarrpar. ³⁹ Mumoyeft kekwotr. Nd yarhr fkniyaknehato mmo rifhut yakakne thombat, yima yonr masat tau naku bonaku yaknit. Tau naku yaknihato suhwor. Suhhato yebittaknihato tir wuram tubuhato brukt brukta hatoh thombat kangm nndo foher. Nd mumeft hatoh hasiwartn, tfit thu troh tany shombat, be yimar kak tehtewur. ⁴⁰ Ninhu disaipermpno kfo famuyanm, ‘Wayak thukomr yarhr.’ To nhai, fak thu titawomr.”

⁴¹ Jisasr nd mrokfot wanyhato kfo memor, “Ye, aromenkono! Niko be tu nhai Bro Nkifrarpano nikmoh dukefm htakahkomm. Ar nohof nikompno ritohakhato nikmoh krhopam titahnamoyanm? Wahnanr nd ninhu yonr.” ⁴² Nd yimarhu yonr yuhre yau hnetrn, ka nd yarhrn thu mumak-nimotrr, nd yonenr suhhato yebittak-nimor. Jisasr inji htihato nd yarhr kfo nambur hikafmotrr nd yonr thu troh tanymorr. Thu troh tanymotrr, Jisas nd yonr yak marnyakhato tfit tu yifemrn hemor. ⁴³ Met yindarim nd Jisasr nd mumet yonr yak marnyamo nmbuhuat htiyahfato tu be mrokfo duhatm tohmom.

Jisasr tfit wompam kfo pthamort turhu nohhato sinya yuhat

(Matyu 17.22-23; Mak 9.30-32)

Nd yimam Jisasr namo nefm htihato duka mmo hasetmn, Jisasr turhu disaiper ⁴⁴ kfo memorm, “Na kfoyuk mrokfot duka hanykfot. Ndar bbinysoftu yimam Bro Najomr yak hndhnarahmr yimampno.” ⁴⁵ Jisasr inji kfomohat disaiper nhai nd mrokfothu yimbu yuhat yakrmomt. Nd mrokfothu yimbu yuhat Bro Nkifrar rompno kafrohmort. Ndnett rom nhai tawisafrmomt. Rom fanho-mom Jisasrhu tfit ttiwon hikneft.

Frohr broyer?

(Matyu 18.1-5; Mak 9.33-37)

⁴⁶ Wom yiha Jisasrhu disaiper tum rhuhato rinnakfo nakfomoum. Womr warhuhato memour, “Nann broruhanko.” Tfif womrn, “We, we nann broruhanko.” Tfif womr warhuhato memour, “We, rorn.” Tfif womr warhuhato kfo memour, “We, we ror nhai, ndarrn brorahrnom.” Inji inji rinnakfo nakfomoum. ⁴⁷ Jisasr bi htimorm rom inji rinnakfo nakfomoahat. Inji htihato wom yonenr yaknehato yarim hatohmorr. ⁴⁸ Yarim hatohhato kfo memorm, “Fitoh yimar na hikhato na hikwa wom met yindarim yakhato kak marnyewurm, nda yonenr yakhato yak marnyiwa kanjo, nd yimar nann yakhato kak marnyewur. Na Bro Nkifrar kfo tkrurafmotra, niamoya. Ndnatn frohr na kak miyekwor, nd yimar Bro Nkifrar kak miyekwor. Fitoh yimar turhu yufat nhai yura htakahrt, nd yimarn bro yufat yakrahr.”

Nompno nahti dbnot duha yimar nmoh yimater

(Mak 9.38-40)

⁴⁹ Jonr kfo memor, “Bro yimaye, wom yimar htimonomr ninhu yufat yuta nawohhato kmi yarhm yak thumoatrm kfo rafonomomr. Nd yimar nhai nom ni hik habriwa kanjo nd yimar inji hiknho habrikahrn. Ndnatn nd yimar ninhu yufat yuta nawohhato yarh fknayet yimam yak marnyamoahat, nom nhai yindhor-rmonom.” ⁵⁰ Jisasr inji wanyhato kfo memorm, “Mirahko akfo rafonomr. Yimar nikompno nhai nahti dbnotkahr, nd yimar nikmoh yimater.”

Jisasr Jerusalemko yimohat turhu disaipermpno rpat yimom

(Sapta 9.51-19.28)

Samaria thofm kfo kurmom Jisasrhu rroh kmithu yinyeft

⁵¹ Jisasrhu hefenrhu muh yihar bi brbohrn ndnatn Jisasr memor, “Jerusalemko yiruha.” ⁵² Inji dukahato wom yimam bi kfaf hanymotrm, bi mrokfot hany hanymomt. Nd yimam yimomn, Samariaroh kmitn yi memom, “Jisasr nierahr. Tkitt rorhu nia mhwenayukt wayak htata hitwakomr.” ⁵³ Samaria thofmpno mphamotm, Samaria thofm wanyhato kfo memom, “Nomi Judam nhai niyak marnyakahnom.” Ndnatn Samaria thofm nhai yak htata hermomr rorhu hweyuk tkitt. ⁵⁴ Jisasrhu hus disaiper Jonri Pitar nd rom kfo rafomo mrokfot wanyhato kfo memofr, “Bro yimaye, no kangno akfokahtnom, kaht yura hefen yuhat yawihnekahtn, akandhitm ndar kmi thofm.” ⁵⁵ Inji kfomotf, Jisasr kfo memorf, “Nifn inji kfo duha. Na Bro Najema nhai be yimaro yafotharoh fasoh yak bebt niarmoya. Yafotharoh yak marnyat niamoya.” ⁵⁶ Be inji kfoniato tfit wom kmit yimom.

Jisasr hik yibonmo yimar

(Matyu 8.19-22)

⁵⁷ Yau hanyetmn, Jisasr wom yimar kfo memor, “Ni fitoh fitoh tkitm yiyukm na hik htfasruhann.” ⁵⁸ Jisasr inji wanyhato kfo memor, “Yifikor tohwa yaum tahi muhm hwitm, yo yafuna nungam wusm hwitm. Na Bro Najomrpaya nhai nanhu wom hweyuk tkitt.” ⁵⁹ Jisasr kekutnihato wom yimar kfo memor, “Ni wania nann wahikn.” Nd yimar memor, “Nanhu yifemr yinohtr, afo rorhu yopt yiruha.” ⁶⁰ Inji kfomotf, Jisasr kfo memor, “Noheh yimam, rom tum anayopm. Ni wania nann wahikkahnn, Bro Nkifrarhu kingdom-kfothu kfo nuhas mrokfot wania wakfo nuhas habriswanm kmi kmim.”

⁶¹ Tfif wom yimar ritohhato kfo memor, “Bro yimaye, na hik yibonwann. To kanga ka kfo yakiorfotn, afo yirfoyann, nanhu yimatm kfo wobuh tanyrfoyanm.” ⁶² Jisasr memor,

"Yimar Bro Nkifrarhu kingdomkfot toh yibonetr, nhai tfit mongkorhof tamoh tamoh nefm hti thu tany hanyakfot o tfit dukakfot."

Jisasr kfo tkrurafmo wom 72 yimam

10

¹ Nd ror hik yibonmo yimampno napthanihato ee tfit Bror wom 72 yimam fakmor. Yakhato hus hus fak nhtamorm. Yak nhtahato hus hus nd ror yibonyuk kmim yi hanymomm. ² Kfo memorm, "Boknabok rais suhm bi huktewamn, nhai bok yimam nd rais yukharoh yakyukm. Ndnatn nd mswir tikatr wakfo bruttnakahtko, wom yimam thu yuhurruhatrm, yi yakhirahmr nd rorhu rais swirthu rais hukham."

³ Nhai mrokfom, wanjuko! Yima dukefmpno waiswako. Sifsifm yifikorhof namburet yauroh rifiny buhar yita kanjo inji nd namburet yauroh rifiny buhar kitwoko. ⁴ Mirahko maru gegb yohenm, hmbre wus yohm o wom hona wuram ayakito haknom. Be inji sfno yima furako yikfot. Mirahko wom yimampno aptha yifahta hanynomm. ⁵ Wom kmithu wom kunys kitwoko, barkofpam afo nd kuny shofm rim kfo yindhoraknikfot. Kfo yindhoraknihato kfo mekfot, 'Bro Nkifrar nda kuny shofko ayak marnyarko!' ⁶ Inji rim kfo yindhorak-niruhatko, hifa yima yuhet yimar nd kunys rhuneft, nd niko rim kfo yindhorak niyuk tngt to be nd yimarn riyah. Nhai ndhtet yima yuhet yimar rhukahr, to be tfit tukompno nieraht nd niko tuyuk kfo yindhor tngt. ⁷ Wom kmit yifiko, mirahko kuny kuny awita fnahnom. Bi rpa kunys fekko, be nd kunyrapat tohhato tamoh tamoh yeshrim kahukmko, be yakhato yakfot. Niko Bro Nkifrarhu mrokfeft kfo nuhas habriwohat tawo ndmn yak yakfot.

⁸ Wom kmit yikomn, kunymn fak htemko, hifa, nhai mrokfom. Tamoh yeshrim nd kuny shofm hayukm, yak yakfot. ⁹ Tamoh tamoh dbohnefm nd kmi thofm korhwomm, yak marnyakfot. Kfo nuhas mekfot, 'Bro Nkifrarhu kingdomkfot bi brbo hnewutko.' ¹⁰ Wom kmit yikomn, nhai nd kmi thofm kunym yakrfomko, yihotat rim tohhato kfo mekfot, ¹¹ 'Ndar nikmoh kmithu bdrt nmoh wuram yarim yenym, tukmoh kmitn tfit kahot trk tanywonomm. To niko dukaf hanyakfot. Bro Nkifrarhu kingdomkfot bi brbohwot. Rorhu yinhitn ndar bbinysoft tfit rhuraht. Ndnettducaf hanyakfot.' ¹² Na kfo mifwanko, ndar kmit yakruha krho nmbuhat mirahko ka kuken krho nmbuhat yakraht. Sodomt yakmo krho nmbuhat be inji habhi krho nmbuhat fakmom. Tawo ndar kmitn be tu bro krho nmbuha mift yakrahm."

Bro Nkifrar yak hik duha kmi kmirhof yimam

(Matyu 11.20-24)

¹³ "O ar Korasin thofenko, finji rhu bebhirkhokma? Yo niko Betsaida thofenko, niko inji buga. Finji rhu bebhirkhokma? Bro yuhuwaf nmbuhat korhtko. Bi wom yimar Tairti Saidont aikahrn mirakerkfot ahingrnart, na nikompno mirakerkfot hingrnamo kanjo, na kanga ka Tair thofmi Saidon thofm tum nayuk fasoh nefm hti bebhato bi bek tham nyuhunihato yuhun brasingt rhuhato yima yuhum bi yak kekutrmomm. ¹⁴ Kto ndar bbinysoft tohwa yimam newa nefm yak nhtaruha yiha, nd yiha nikmoh krho nmbuhat nhai Tairti Saidonthut kanjo yakruhattko. Nhai. Niko yakruha krho nmbuhat be tu bro krho nmbuha mift yakrahtko. ¹⁵ Yo niko Kaperneam thofko, kangko, 'Ka yura mountko riyahnom?' Nhai. Niko nndo helko riyahkonwe."

¹⁶ Turhu disaiperm kfo memorm, "Niko pthayuk mrokfom yimam wanukwomme, nd yimam nanhu mrokfom wanukwom. Nikmoh pthayuk mrokfom nhai wanykahmme, nd yimam nann mong trohwom. Yimar na mong trohyukr, na kfo tkrurafyuk yimar mong trohwor."

Nd 72 yimam niamo yuhat

¹⁷ Nd 72 yimam yimom tfit bro yindhor nmbuhatpno tfit niamom. Niahato Jisasrpno mkfo memom, "Broye, nom ninhu yufat yuta nawoh-hato tek yarh kmi yarhm wany yakiomomm nmoh tngm." ¹⁸ Jisasr wanyhato kfo memorm, "Na htimoyanr Satanr toh

fnhur kanjo wufohninamor. ¹⁹ Wawanyko. Bro bbukeft bi he-moyanko. Nd bbinyosfhu karoh-tknamu yima waset nandomenm yahotrahkomm. Satanru nanyjar rifhut yiho hathurahkomm. Be nhai wom tamohm finji naruhatmko. ²⁰ Inji bi htimokomn, to mirahko akfo amanyom, ‘Kmi yarhmi tek yarhm nmoh tngm fak hikm.’ Mirahko inji akfo yindhornom. Be Bro Nkifrar nikmoh yufam wandfamo nmbuhatn wakfo yindhortwako.”

*Jisasr Bro Nkifrar kfo yindhormo yuhat
(Matyu 11.25-27; 13.16-17)*

²¹ Jisasr nd 72 yimaroh mrokfom kfo yakio hanyetrn, Bro Nkifrarhu Yafothat bro yindhorr nmbuhat hemotr. Nd Yafothathu yindhorr nmbuhatpno Jisasr kfo memor, “Dajaye, ni nda mounti bbinysoft buriwa Nkifraye. Ni tu hifa dboriob neft namo. Nd nefm hifa nd bro duka tungunet yimampno yak kafrohmonmn, tfit habhi yonenmpno fak nriyafmonm. Ndnatn na kfo yindhorrwann.” ²² “Nanhu Yifemr nanhu tirmn tamoh tamohm hta bugamorm. Nhai wom yimam nd rorhu Yonr hti nhtakahmr. Tu Yifem-rpar hti nhtewurr. Yo nhai wom yimam nd rorhu Yifemr hti nhtakahmr. Tu Yinemrpar hti nhtewurr. Yimam tu Yinem yonrn sinyahato turhu Yifemr yak nuhaswatrm, ndnatn hti nhtewumr rorhu Yifemr.”

²³ Turhu disaiperrpampno rhu hasetrn, nhowi kfo memor, “Yimam nd niko htiyuk tamoh tamohm bi htietmn, ayindhortwam. ²⁴ Na kfo miswanko, boknabok profetmi kingm nd niko htita shrm memoou, ‘Ahtinom,’ to nhai. Nhai nd shrm htirmoamm. Yo nd niko arihat wanuka mrokfet memoou, ‘Awanyom’, to nhai. Nhai nd mrokfot wanyrmoamt.”

Samaria thofr namo dboriob neft

²⁵ Nkifra boririfhuthu tisar memor, “Jisasr afo attiwon wona.” Inji duketrn, ttiwon memor, “Broye, na finji narhoyann, toh nkifrarhoya?” ²⁶ Jisasr wanyhato ttiwon memor, “To boririfhut finji kfiat? To ni wanyshoft finji wanukwanm boririfhu mrokfom?” ²⁷ Tfit rorn kfo memor, “Bror ninhu Nkifraye, ndnatn ninhu yuhuwaf marbi bugam, ninhu yafothat, yo ninhu yima yuhu bugam be rorparr htakfot.” yo, ‘Tunn yak marnyewa kanjo inji womm yak marnyakfot.’ ²⁸ Jisasr inji wanyhato kfo memor, “Nd ni pthi mrokfom be tu kfo misfn. Inji nahato toh nkifrarahn.”

²⁹ Nd yimar memor, “Be tukanhu yufat ayak marnyaya.” Ndnatn inji ttiwonmorr Jisasr. Ttiwon memor, “To nanhu yimatr froher?” ³⁰ Jisasr wom tndh mrokfot kfo nuhas memor, “Wom yimar Jerusalemt htanyhato memor, ‘Aiya Jerikoko.’ Yihotat yau hanyetrn, rikoh yimam toh rafakmomrn, tat noh bonohhato wuskam fak rhoptakni buga hemomr. Ror be tu gur yihotatn hwemor. ³¹ Be ror yihotat hwe hasetrn, wom prisr yau hnehato nd yimar yihom htihato manoh yuhat fau hhrifakmor. ³² Be nd prisr inji yihom hti marsisanehato yimor. Rorhu mongkorn Lifai frikefthu wom yimar niamor. Ror nhaf inji. Ror be nd yimar yihom htihato fau hhrifakmor.

³³ Tfit rorhu mongkorn Samaria thofr niamor. Rorne nd yimar yihom hti yuhuwaf-morr. ³⁴ Yihom hti yuhuwafhato brbo nd yimarpno yihato nd yimarhu fhu yuruft wain bupami welpaye kifsamorrn, tawonmorr. Tawonnihato, you, yura nd ror yiyuk donkitn htahato hanymorr yimam yihom hwina mhwenewa kunysn. ³⁵ Ndha hwe nfahahato nd wom dbharn nd kunys tohukatohyuk yimar hus kinakfot hehato kfo memor, ‘Ndar yimar ninhu tirmn htanywanr. Ninn hatoh hasokahnr, tamoh tamohm yaknafr fahunr, kto na nia thombat marulta hiruhann.’”

³⁶ Nd yimarhu mrokfot kfonihato kfo ttiwon memor, “Nd yihotat hwe hasoyuk yimar frohr rorhu yimat misfn tohmor?” ³⁷ Nd yimar kfo memor, “Yimar nd wom yihotat noh hasomo yimar yuhuwafhato yak marnyamo yimar.” Jisasr kfo memor, “Ni waikahnn, nd yimar namo kanjo inji wanatwa.”

Matati Mariat

³⁸ Yau hanymomn, buha wom kmitn Jisasr ndha riwitamor. Wom mett, rothu yufat Matat, rotn yaknimot, hanymot, rothu kunysn. ³⁹ Nd Matathu kunysn mrokfom

pthamoatr, Matathu nmem Mariat Jisasrhu wurampno rhuhato wany yakitohmoutr Jisasr pthamoahat. ⁴⁰ Rot, Matat turpett yeshrim hta mskamout. Ndnatn Jisasrpno yimotn, kfo memotr, “Broye, nanhu nmemt htanysa turpata yeshrim hta mskiwa. Nhai duka mekahn turpatt hta mskewut? Wakfakahtnt, ania ahingrnanhota.” ⁴¹ Inji mkfomott, Jisasr memort, “Mataye, ni bok dukefm yekwatmn, ninhu yima yuhur kangm bi kminysofem. ⁴² Ndhtet bok dukefm arhum. Rpa dborioh dukefrpar wayakn. Mariat ndhtet dborioh dukefrpar kangt ayaka. Nhai tfit womm kfo rafokfot. Nhai.”

Kfo bruttnanef yuhat
(Matyu 6.9-15; 7.7-11)

11

¹ Wom yiha Jisasr wom tkitt yihato kfo bruttna hasomor. Kfo bruttnani bugamotr, turhu disaiperr kfo memor, “Yinowe, kfo nuhasrfonnem ni kfo bruttnewa kfo bruttneft? Bingot Jonr tohmohat rorhu disaiper kfo nuhas bonuhasmourem ror kfo bruttnamo kfo bruttneft. Kfo memourm, ‘Inji inji wakfo bruttnako.’ Nom to inji wakfo bruttna nuhasnnom.”

² Jisasr inji wanyhato kfo memor, “Kfo bruttnanef inji kfo bruttnakfot: ‘O nmoh Bro Yifeme. Ninhu yufat tu hnaru yufayet. Nhai yimam yuta rrha borrhakfot. Nom kangnom ninhu kingdomkfat aniehnat.

³ Nmoh yihof href ye hasoyuk yeshrs wahe hasotwannom.

⁴ Nom niwa fasoh fasoh nefm wayafhonm,
nom womrohm yafuhwiwa kanjo.

Nom niwa kanjo nmoh fasoh nefm waduka mumafonm. Mirahn waduka thu waduka
thu hatohanm.
Satanr nia toh nhehaknewurnom, mirahn ahti marsisayanm.’”

⁵ Nd kfo bruttna mrokfefm inji kfo nuhasnihato wom kfo nhombra mrokfot yakhato kfo memor, “Niko nda na ttiwonwa yimako, nikmoh yimatm kunym bi darmbnihato bi hweyetm tfit ni womn yifung dany yihato ninhu yimatr mfrthohato mkfo merfihat,

⁶ ‘Bare, na niya bretpa tndausn nanhu wom nanyma kmi thofr nanhu kunys nietr, na nhai wom yeshrim rorhu hayukm. Ndnatn nia ninpno. Famuya husfirpa bretpam hiyafrahna.’

⁷ Inji mttiwonrfotn tfit ninhu yimatr yiro kunys rirhuhato kfo merfihat, ‘Tamohmpno ndar yonmari yifung danys bi kunym darmb kihnihato bi yon tuhanmpno hwe guna tuhetnom myak thewarnom? Frohm hrek sinyahato hiyefiwamr?’ Kto ni tuha afo toh kinyakihato tfit ror wany batihato sinyani, yak hiyafrofihat, niko ka finji dukewako?

⁸ Tamoh dukeftpno sinyahato yak hiyafroforr ror mttiwonyuk? Ka be rorhu yimatn yak hiyafroforr? Na kfiwanko, nhai be rorhu yimatn yak hiyafroforr. Nhai. Turhu toh kinyakihato wattiwonthu wattiwonthu hatohtn yak hiyafroforr. ⁹ Ndnatn na kfiwanko, tamohm yak yibonrahko, Bro Nkifrar kfo tatokfot. Kfo tatorahko ee hirahrko. Yimam yak hambrohany yak hambro hanyrahm ee mhtirahm. Yimam brbo yihato mkfo tndaurahm ee htiruharmn yakhato hiyafrahram. ¹⁰ Yimam yihato mkfo tatewumr ee kahukrm tamoh tamohm. Yimam hambro hanitwom ee mhtitwom. Yimam brbo yihato mkfo tndauwom ee htitwarm yakhato hiyefiwurm.

¹¹ Niko wom yiha ka bi htimoko wom yimar turhu yonr yirar mtndaumotr tfit nandomr yakhato ndr wathu nhehafmorr? Nhai. Nhai wom yimar turhu yonr inji narmorr. ¹² O wom yonr yifemrpno yihato ginafm mtndauneft ka yifemr pkinaft yakhato ndt wathu nhehefiwurr? Ka nhai htirmokomr wom yimar yinem yonr inji narmorr.

¹³ Niko nda bbinysofthu fasoh net yimakmoh yonm hifa yak marnya bomarnyewa kanjo inji yura mounthu yifemr mfro kak marnyewurko. Turhu Yafothathu hanyeft nakutwokomr, nhai wany marsisakahrko. Nhai. Kahukworko.”

Yimam kfo memom, “Jisasr tndhrhu bbukeftpno yarhm kak thuworm.”
(Matyu 12.22-30; Mak 3.20-27)

¹⁴ Wom yimar yima mrokfo yafothar tukihwa kmi yarhr fknemotrr nd yimar be mrokfo ptha duha be inji tng mmkr rhumour. Jisasr yihato nd yimar fknenimo yarhr fak thumotrr, yima yuhur niamotrr mrokfo pthamor. Bok yimam Jisasr namo neft htihato be tuha mrokfo duhatm rhumom. Memom, “Bar yimako, Jisasr be tu tamohtet bbukeftpno kfitr, nd yimar tfit bi pthiwar?” ¹⁵ Womm wanyhato kfo memom, “Nd yimar yarhroh bro tohak Belseburruu bbukeftpno kak thuworm kmi yarhm.”

¹⁶ Tfit wommn duka memom, “Mirahnomr yura waufokahtn, wom neft ayawihnekahtt mirahnom awi tu Bro Nkifrarhu Yafothatpno hingrnewur.” ¹⁷ Jisasr bi htimorm rom inji duka-mohat. Htihato kfo memom, “Rpa kantrikfot tohyuk yimam buha nayak mkuhato rimtoh mtuhhato nnaknineft, be nd kantrikfot yohniraht. Nhai wom yimam tohruhatmt. Yo rpa kunys tohyuk yimam nhaf inji. Tum nayak mkuhato nnayurneft, be nhai wom yimar tohruhatr. Be tum naye dborha nohhato yima duha tkitm rhurahm.

¹⁸ Satanr nhaf to inji buga. Na Satanruu bbukeftpno nd rorhu tuhagrhayuk kmi yarhm yak thuneft, be nhai tfit Satanr toh bmtakfot. To fitom rorhu wom thu hamuhyukm? Bi be. Tuko kfo yamukatko Tndhrhu bbukeftpno kak thuwanm yarhm. Ndnatn inji kfiwanko. ¹⁹ Nikmoh wom yimam Bro Nkifrarhu yufatpno kmi yarhm yak thu thoft nhai kfo mekahkomm, ‘Tndhrhu yufatpno kmi yarhm kak thuwomm.’ Nhai. To tamohmpno na Bro Nkifrarhu yufatpno kmi yarhm yak thuwohat, kfo yamukako, ‘Tndhrhu yufatpno kmi yarhm kak thuworm?’ Nikmoh yimatm kfo mirahmko, ‘Kfo furewuko.’ ²⁰ Htikfot. Bro Nkifrarhu bbukeftpno kmi yarhm kak thuwanme kfo mekfot, ‘Nom bi Bro Nkifarn kakitohwornom. Bi rorhu kingdomfot korhnom.’

²¹ Wom namburet yimar turhu kuny kmifar kfra inyarut yakhato rhu hasiwur, rorhu kmifar hifa rhu marnyewur. ²² Tfit womr tu masat nambur nanyjaretr inji htihato kfo mirahr, ‘Barenko, rorrpar nambureter. Na afo nhombranonanr.’ Tfit rorn hafnahaknitrr, womrhu kfra inyaruti rorhu tamoh tamoht mtuhafnitatrt, womrn myak rhoptekwort. Myak rhoptakhato wommpno nayak nhtewumm nd wuss. ²³ Yimar be buha tohhato nanhu tamoh tamoh nefm be nyngarpaye kukatohworm nd yimar nhai nann tohnho yibonkahr. Womrn tohnho yibonwor. Na wom tamohm yuhre yak nhafoh hanyhato womr tohhato be nyngarpaye yukatohhato nhai yak nhafohnhokahra, tor ndhtet yimarn tohhato krmah hikworm na yuhre yak nhafoh hanyuk shrm.”

Kmi yarhr tfit mkekutekwa yuhat

(Matyu 12.43-45)

²⁴ “Wom yimar nd kmi yarhr thu troh tanyshombat afo kitwor rhuyuk tkitroh ham-brot. Hambro habri hambro habri, nhai wom rhuyuk tkitt htirfort, tfit mkekutakhato kitwor tur toh tanyuk tkittn. ²⁵ Yitarn htitwor tkitt be wuthat, nhai wom wusswenm.

²⁶ Be nd kmi yarhr inji mhti tansihato tfit wuyekwor. Wuyakhato tfit kitwor womroh yakt. Yitarn 7-pelakfot myekwor. Tom nd 7-pelakfotn tu bro nefm aruhwom. Rompno niahato be nd kunyr kakaknitmr. Yakaknitmr be kspita bugewur. Yimar tefi nefenm afo na hasoyukr tfit nd 7-pela kmi yarhm yak hatoh hanitatmr tu bro nefm newur.”

Tu yindhorwa yimam

²⁷ Jisasr nd mrokfot pthamohat bro rifiny buharn tohhato nd mrokfot pthamort. Nd ror pthamo mrokfot ptha buganimotrt, wom mett nd yima rifiny buharn wasinyahato Jisasr kfo memor, “Jisase, ninhu hiyau mmemt ninhu hingrneft hti thoft ka be tu bro yindhoreftpno korht.” ²⁸ Jisasr wanyhato kfo memor, “Uwa, to yimam Bro Nkifrarhu mrokfom wanyhato yak hikwam, tom romn yindhorwom.”

Yimam memom, mirakerkfot ahtinom

(Matyu 12.38-42; Mak 8.12)

²⁹ Yimam rifinyaknamotm Jisasr kfo memor, “Ndar yiharhof yimako be tu fasoh yimayeko. Kfo kangkma, ‘Wom neft wanakahtn, afo htirahnom.’ Inji kfiwotkma to na fitoh neft hingrnarhota ndtn htiruhako? Profet Jonar pthamo mrokfef yuharpatn

ptharhota ndtn wany duka tungarahko. ³⁰ Bingot Jonar taun Ninifat inji namor. Bro Nkifrar bi kfomor taun Ninifathu yak batineft. Jonar yihato Bro Nkifrar nd kmithu yak batu nmbuhat kfo nuhasmotrm, nd kmi bugathu yima bugaroh fasoh nefm mong trohmomm. Nd Jonar pthamo yuhatn na Bro Najema inji ptha hikrhota mhti dukarahko. ³¹ Kto yimaroh yak nhta yiharn sautko tohyuk kwint sinyaruhatn tfit rotn tohhato nikmoh fasoh nefm kfo nriyahirahtm. Rot kwint tu bbinysothu wuroh krayeft tohhato wanymot Solomonrhu hifa hifa hingrna dukefm. Wanyhato memot, ‘Afo yirhoyann htiruha ror hingrnewa hingrneft.’ To nhai. Nda ariharhof hingrnayet yimar to broyer. Solomonr nhai. Nhai htihato tukmoh fasoh nefm mong trohrmokomm. ³² Bro Nkifrar yimam yak nhtaruha yiharn nikmoh fasoh nefm Ninifa thofmn mtohruhamn kfo nriyahirahtmko. Jonar Ninifat yihato Bro Nkifrarhu mrokfot kfo pthamohat Ninifa thofm Bro Nkifrarhu mrokfom wany yakrmihato mong trohmomm rroh fasoh fasoh nefm. Rot nd bingotrhof mrokfom Ninifa thofm wany yakrmihato rroh fasoh nefm mong trohmot, nd mrokfot be inji. Ariharhof mrokfot rot tu bro tpiyet mrokfoyet.”

*Dborioh yima yuhur yihota yak nukayuk lamet
(Matyu 5.15; 6.22-23)*

³³ “Nhai wom yimar lamt hta funakhato tfit rikat o wom bro baket yakhato lam funeft hta tasifafkahrt. Nhai. Lamt dany yuha tafontn htewatrt yimam witaniyukm htitwomt. ³⁴ Yimar tu hifa dborioh yima dukefetr, nd dborioh dukefm kshm kanjo yak nuka hanitatmr, hifa dborioh dborioh nefm newurm. Yimar nd hifa yima rifhur bi fnahniyetr to be nyina kunyjetm kanjo yak tato botatohato na fura bofurewurm tamoh tamoh nefm. ³⁵ Ndnatn be tu duka marnyaf hanyakfot. Mirahko nd yiro yima rifhur rirhuyuk ksh nukefr atatpohnomr. ³⁶ Ninhu yima rifhur be hifa dborioh yima rifhurpno rhu marnyarahr, nd dborioh yima rifhurn lamr kanjo yak nuka hanyruhatrn, yau marnyarahn.”

*Farisimi nkifra boririfhuthu tisaroh fasoh nmbuham
(Matyu 23.1-36; Mak 12.38-40; Luk 20.45-47)*

³⁷ Jisasr nd mrokfot pthanimot, wom Farisir niahato Jisasr mkfo memor, “Jisase, wania nanhu kunys nuwa yerahno.” Be Jisasr wanyhato yimor rorhu kunysn. Yihato nuwa yeruk tkitt rim rhumor. Rim rhumot, yeshrim yakhato be fe furakni twanhorm. Nhai yakhato tir kifsa inji nahato nuwa yi yagnirmor. ³⁸ Nd Farisir inji htihato duka memor, “Tamohmpno Jisasr nhai yuk duha be bmbri nuwa yi yagnir?” ³⁹ Jisasr kfo memor, “Niko Farisiko kaf pletm briahako yuk kifsewa kanjo be inji briahakorrpa yuk kifsahato kak marnya bomarnywuko. Nikmoh yima rifhumio rikohnefmi wom wom fasoh nefm furkihwomko. Tukmoh toh nmbuharpat dukahato bi marut wuss tamoh tamohat yak yakhato bi tohwokomt. ⁴⁰ Yon mumenm kanjo ptha mumiwuko. Bro Nkifrar nhai briahako nayuk nefrpam htikahr. Nhai. Yiro yima rifhurio wagrha sinyahato nayuk dborioh nefm ndm rpat htitworm. ⁴¹ Wom yima bebr o met bebt wuskapa duhattn hti yuhuwaftato hirahnt, ee btn Bro Nkifrar hti yindhorrahrn.

⁴² Tamoh tamoh wuritwenm, youpenm, wajipenm yakneft nhai Bro Nkifrar yak brur wunanikahkomr. Nhai. Bro Nkifrar hifa mhtahukkomr. Ndm rom tu hifa dborioh nefm newuko. To nhai. Tu bro neft myak htanitwokomt. Nhai Bro Nkifrapno rpat niyakitohhato rpat tohkahko. Yo nhai wom dborioh nefm nakahko. Ndnett wadukaf hanyswako! Bro Nkifrar be yak bebrahrko.

⁴³ Judaroh rhu rifinyuk rmonm rhuneft be kangko bro yufet yimam mruhekwa barkof gajim arhukahtnom yimam htirahmnom. Yo tamoh maket swim kangko yimam be nomn akfo yindhor boyindhorm. Ndnett wadukaf hanyswako! Bro Nkifrar be yak bebrahrko.

⁴⁴ Aromenkono! Yima yopt htitwokomt? Yura bbrmontn hifa hti fughewukomt. Hti fughahato yura wiaya uwoko. Nd bbrmonthu yirokn torwe yima gur bi kfe bdgniyetr korhr. Yimako to inji rhu nhombrewuko nd yima yopt kanjo. Yimam htitamko kangm ka

hifa dborioh yimayem. To nhai. Nikmoh yima rifhum fasoh nefm furkihwom. Ndnett wadukaf hanyswako! Bro Nkifrar be yak bebrahrko.”

⁴⁵ Wom boririfhuthu tisar sinyahato Jisasr kfo memor, “Tamohmpno nd mrokfot nom rpat yekwatnom? Nom nhai ndhtet nefm nakahnom.” ⁴⁶ Jisasr nd boririfhuthu tisam memorm, “Niko to inji buga. Nikmoh neft to inji newuko. Nhai be hifa hifa mrokfefm yakhato kfo hta bohta marnyakahkomm yimam. Nhai. Niko htewa boririfhum be tu kminysofm kanjo tohwamn yimam mnhiyekwom hikneft.

⁴⁷ Niko dukaf hanykfot! Nikmoh nkifram inji na hnamom. Profetmpno nhai hifa nyngar htarmoamm. Yimoamn, faso faso was beb bobeb thumouumm. Tfit niko yonkomm arihat yitakomm nd profetroh yopm yak marnya bomarnyewakommn wondhwokomm. ⁴⁸ Be tu yuwi firewuko. Nd profetm arihat atohkahmn mrokfom aptham, to nhai wany yakorfotkomm. Tukmoh nkifram namo kanjo nhaf inji wasrfokomm.

⁴⁹ Bro Nkifrar tu hifa dukefetrn kfo kangr, ‘Profetmi aposerm rompno kfo tkurafrhotanm, nhaf be yimamn hirrahm.’ ⁵⁰ Ndnatn ariharhof yimam nd profetm was hnamo yuhatn krhopam yak hanyrahm. ⁵¹ Bingot nikmoh nkifram was hnamo profetm, barkofr Aberr wasmom. Ror wasnihato ee wom womt be yimaroh tirmn hirmom. Wurohenr Sekaraiar yiro temperrn, tarioh mthamoa tkitt toh hasetrn rim wasakmomr. Ndnatn niko bi tukmoh nkiframm katirnamomko. Nhai toh marnyaruhatko, rröh krhopam tfit nikomm yak hanyrahkomm.

⁵² Niko dukaf hanykfot! Niko kfiwa boririfhut nhai tu yak hik marnyakahkomt. Bok nefmn frhammo bohamumiwatkomm yimam rom buha mmo bomumiwum. Tu nd Bro Nkifrar hayuk boririfhutn akfo hta marnyakomm yimam, awi, rom hik marnyarfomt.”

⁵³ Jisasr nd kunys htanyhato tfit fnahnimor. Farisimi nd boririfhuthu tisam, duka memom, “Barenko, nom nd yimarn kangr amfrfnahnnya. Niko finji dukewako? Nd yimar ayak thunomr.” Ndnatn yuwi ttiwon tebfi botebfi htfasmoumr. ⁵⁴ Nd yimaroh dukeft duka memom, “Yuwi inji ttiwon rhti tebfi hanyruhanomr, bi finji kfiwur, ee nd wukier nd yiha tathurrahrr.”

Farisiroh fasoh nefm hti hik marnya hanykfot
(Matyu 10.26-27)

12

¹ Bok yimam rifinynimotm, nhai wom tefi rrfenr htikfot. Rim toh mtohneft to be yimamn muhkfot. Nd yihar Jisasr wom mrokfom kfomorm. Barkofpam afo turhu disaipermn kfo memor, “Niko mirahko ahiknom nd Farisiroh nefm. Kfo fura bofurarahmko. ² Nd kfo fura bofura mrokfom yiro yima yuhur kafroh hasiwam, Bro Nkifrar tafont htarahrm. Tamoh tamoh mrokfom kon kafroh hasiwam kto tfit Bro Nkifrarn nd kon kafrohet mrokfom tafontn htarahrm. ³ Ndnatn nd niko yifung kfoyuk mrokfom Bro Nkifrarn tfit mar tafontn htaruhatrm tfit wanyrahmm. Yiro rumtn turpethato kfo kafrohyuk mrokfom tfit kto yima rifiny buharn Bro Nkifrar ptha nriyafruhatrm wanyrahmm.”

Bro Nkifrarp par yakrmekfot
(Matyu 10.28-31)

⁴ “Barenko niko, nanhu yimatkmn, kfiwanko. Ndar nom hatohwa thatipt waswa yimam ayakrme furawahkomm. Thatipt wasniruhamt nhai tfit wom finji naruhatm.

⁵ Rot yakrmanyefte, Bro Nkifrarp par yakrmekfot. Ror yimam yak nohnihato tfit kangr kaht aim, kaht kitwom. Uwa! Rorpar yakrmekfot.

⁶ Yimam kipr nungam wikna thoft tefi hus toyarpaye wiknewumm tirfa nungam. Nikmoh nyngaye hti thoft kangko, ‘Ndm tefi nunga pirayenem.’ Bro Nkifrar nhai inji hti sminakahrm. Rorhu tirmn korhm. Niko yimako to inji nd nungenm kanjo rorhu tirmn korhwoko. ⁷ Niko yimako be ayakrme furawahko. Bro Nkifrar hti dukewurko. Yimaroh tmariroh tmarifam ror thomna bugewurm. Nhai womfenr rim tohtakahr.”

Jisashu yufat kfo kafroh duha
(Matyu 10.32-33; 12.32; 10.19-20)

⁸ “Kfiwanko, fitoh yimar na hikhato yimampno kfo habri kangr, ‘Na bi Jisasr kak hikwa,’ na kfiwanko, kto nd yimar tawo na Bro Najoma mounmotroh nyingahato kfo miruha, ‘Ndar yimar nanhu nanyma yimayer.’ ⁹ Frohrn na hikhato wom yimampno kfo habri kangr, ‘Na nhai Jisasr hikkaha,’ kfiwanko, nda bbinysoft batiruha yihar tawo na Bro Najema mounmotm kfo miruhanm, ‘Nd yimar nhai nanhu nanyma yimar rhukahr.’

¹⁰ Fitoh yimar na Bro Najema hingrnayuk hingrneft htihato kangr, ‘Nd yimar nhai fipet hingrneft hingrnakahr,’ inji kfoyuk yimar Bro Nkifrarlpno tfit kfo gbuhfot. Ndnatn nhai be kfongot duka hanyruhatrt ror pthayuk tngt. Nhai. Duka mmorahrt. To fitoh yimar na Bro Nkifrarhu Yafothathu bbuieftpnno hingrneta kfo famur, ‘Fasoh tndhrhu bbuieftpnno hingrnewur,’ nd yimar nhai tfit kfo gbuhruhattr, be Bro Nkifrar nhai duka mmoruhattr nd yimar kfoyuk tngt.

¹¹ Yimam na Bro Najema hikwamn kangm, ‘Judaroh rhu rifinyuk rmonkorhof bro to-hukatohmi mejistretm, rompno ahanykahnommn htirahnom toh bmtarahm pthaneft?’ Inji duka-hato hanitwomko. Na kfiwanko, mirahko duka amanyom, ‘Na hrek finji kfiwoya ttiwon thoft.’ ¹² Mrokfo pthayuk tkittn Bro Nkifrarhu Yafothatn mrokfo ptha rifhur hirahrko.”

Wom maru kunyet yimarhu kfo nhombra mrokfot

¹³ Nd Jisas pthamoia yima rifinyrn wom yimar sinyahato Jisasr kfo memor, “Tisaye, nnoh yifemr bi nohmor. Nanhu najemr wakfokahtnr nnoh yifemrhu wuskam ror harhuwam ayak nhtakahrm nanhum bi ahira.” ¹⁴ Jisasr wanyhato kfo memor, “Bare, frohm kfo yamum, na womann yak nhtahato yak nhombra hirhoyanfn?” ¹⁵ Inji kfonihato kfo memor, “Yo niko, wuskam hti wuttha duha. Womr bok wusketr htiruhann mirahn, ‘Na kanga inji bok wusketa aruha ndu yimar kindo.’ Mirahn wuskam adukaya. Tunhu tohneftn dukakfot. Yimar wusketr nhai nd wuskann rorhu yafothat thu bmta hatohruhattr toh hatohruhar. Nhai.”

¹⁶ Inji kfonihato wom maru kunyet yimarhu kfo nhombra mrokfot yak-hato kfo memor, “Wom bro maru kunyet yimar mswirt htamortn nd mswirthu yeshrt hifa sinyahato hirmot.

¹⁷ Nd maru kunyet yimar nd yeshrt htimortn duka memor, ‘To ndar yeshrt yakrhoy-ante, to fitoh bro kunymn yak htarhoyant? Nhai wom bro kunym nd yeshrthu htayukm.’

¹⁸ Be inji mduka nhtahato duka memor, ‘Nhai mrokfom. Nd habhi kunypam tfit yak tmbrarhoyanm tfit bro bro kunyrpam hingrnaruha. Bro kunym hingrniranrhoyann btn nd mswirthu yeshrt yak thoft yo wom wuskam be nd bro kunyrpamn hta tibmonruhant.

¹⁹ Btn nd yeshrt nd tamoh tamohet bro kunyrpamn hta tibmonrhoyanm be nhai mrokfom. Nhai wom tamohm tfit wom dukarhota. Tkitt to bi fekant. Bok gunyjimm be nd yeshr kunym dukahato tohruha. Be ye mmo rhu mmo nefrpat dukaruha.’ ²⁰ Tfif Bro Nkifrarn kfo memor, ‘Bare ni faso kfo hamumiwun. Ni asomif nohneft. To frohmni yakruhamm nd ni hta tibmonyuk wuskam?’ ²¹ Nd kfo nhombra mrokfot kanjo bok yimam inji newum. Asha bbinysoftn wuss yak yakhato hifa rhu nmbuhat kekwom. Nhai yima yafothat mrhuyuk tkitt dukahato yak hta bohta marnyakahm.”

Bok dukefm yak duha
(Matyu 6.25-34)

²² Jisasr nd mrokfot kfonihato kfo memor, “Nd dukeftpno kfo kanganko, mirahko tukmoh toh nmbuhat htihato akfo amanyom, ‘Nome tamohm yehato tohruhanom? Hmbreshame tamoh hmbresham hmbriruhanom?’ Ndhtet dukefm yak duha. ²³ Bro dukeft dukakfot tukmoh yafothathu tohyuk tkittn. Mirahko thatipt tohyuk tkitrpat adukanom. ²⁴ Nunga kusm htitwokomm. Rom nhai wom yewuri fant nuhtakahm. Rom nhai wom kunys singohato yeshrt o tamohet hta tibmonkahm. Rom be inji rhu furewatm tu Bro Nkifrarn kahukrm yeshrt. Niko finji dukewako? Ka be nd nunga furenrpam hti

dukewur? Nhai yimako tur yak yeny nhombrayukko dukakah? ²⁵ Nhai ndar bbinysothu wom yimar noheft yironak hanyhato afo kfo marifort, ‘awi ar noheft. Na wofnaka bmbri nohneft. Na kanga afo atohaka. Tafi toh buhtarroya ndar bbinysoft.’ ²⁶ Ndnatpno to tamohmpno wom tamoh tamohm dukewakomm?

²⁷ Htitwoko plauam sinya thoft nhai tum mtinm mtinhato tum rmontham nahukahm. Kfiwanko, bingot Solomonr wondhmohat nhai nd plauathu wondht kanjo rorhu wondht rhurmot. ²⁸ Htitwokomm plaua tfam Bro Nkifrarn htamorm nd wondht. Nd plaua tfam rhu thoft nhai rhu buhtakahm. Href rhuhato tfit nohof hafit tmbhohato tuhefiwumm kahtn. Ndhtet mifan furenm Bro Nkifrar nhai hti marsisakahrm. Nhai. Rroh wondht kahukrm. To ndar yimanom kangko, ‘Bro Nkifrar nd plauam kanjo nhai wondht heruhatrnom?’ Bar met yindariko, Bro Nkifrar ka be psirnano kakitohwokomr? ²⁹ Ndnatn yesht be mfro adukawahkomt. ³⁰ Yimam Bro Nkifrarhu mrokfeft yak hik duham, nd yimam be yeshrimi tamoh tamoh dukefm, be nd dukefmn korh hasiwm. Niko be ndhtet dukefmn duka haso duha. Bro Nkifrar bi htitworm niko dukiwa dukefm. ³¹ Afo nikmoh bro dukefm afo Bro Nkifrarn yak htakfot. Rorhu yinhit rhuhato tamoh tamohm nakurahkomr be hirahrko.”

Yura hefenrn tamoh tamohm yak htakfot

(Matyu 6.19-21)

³² “Siffsifenko, aduka yanhowahko. Nikmoh Yifemr, yura hefenr yorhwarko, bi duka hta memor, ‘Ndar bbinysoft nanhu yinhit rhu thoft, nikomn tohukatohnhorahkm.’

³³ Niko harhuyuk tamoh tamoh wuskenm yimam awiknakahtmm, tfit nd wuskaye yakyuk maruham tfit hekfot wuskapa duha yimamn. Hiyafruhakomm niko tu burifhut kanjo tone haset maru yihotat htiyakrahkomt. Htiyakhato yura hefenrn nikmoh hifa dborioh wuss rhuraht. Yura hefenrn tamoh tamohm yak htarahkomm, be nhai hti hambroruhatkomm. Nhai wom rikoh yimam yak rikohhiruhatmko. Yo bfongt o dmt nhai yeruhattm. ³⁴ Hifa hifa dborioh wuss yura yak htakahkomm be nikmoh dukefm be nd wuss rhuyuk tkitt duka duka rhurahm.”

Yiha yiha rhu gari hasokfot

(Matyu 6.19-21)

³⁵ “Yo niko! Hti yukatoh hasokfot! Hmbresham nyuh dbkaf marnyahato lamm hta funahato hti yukatoh difron hasokfot! ³⁶ Hingrna yimam turoh tohukatohr kuny grhat yihato rhu yukatoh hasiwa kanjo inji warhu yukatoh hasotwakomr. Hti haso, bi kuny kimbko bi myak nmbarwor, ‘O bi tor,’ yudbat toni yaknihato yifhatikt rim yak tfanyakkfot. ³⁷ Yimam rorhu nia yihar mhtitaworm rhu gari hasimrn, nhai hwerfom, nd yimam yindhorkfot. Na kfiwanko nd tohukatohr niaruharn hmbresham nyuh dbkaf marnyahato nd ror rhu gari hasoyuk yimam turn yak hta-ruharm yeshrim yak nhtahirahrm. ³⁸ Yifung danys o dbha ksut barkof krimpno niahato mhtitaworm rhu gari hasimr, nd rhu gari hasoyuk yimam, rroh yima yuhum yindhorkfot.”

³⁹ Ndt inji kfonimortn tfit womtne kfo memor, “Wom kunys rikoh yimam kangm ania arikohnomt, bi nd tu kuny sikatr bi fekrt nd rikoh yimaroh nia mrokfot, be nhai ror mhwe gushu-nikfot. Rorhu yimbhindangm be tohetoh hasorahm. ⁴⁰ Ndnnett nikmoh yimbhindangm be tohetoh hasokfot. Bro Najomr rhu mmo hasetkomn be yak fohtasakrahkomr.”

Fasoh nayet hingrna yimarhu kfo nhombra mrokfot

(Matyu 24.45-51)

⁴¹ Pitar tohhato kfo memor, “Bro Najeme, nd ni kfo pthiwa kfo nhombra mrokfete nom rpanom kfo nhombra nuhaswone ndar tohwa met yindar bugam rpatn?” ⁴² Bro Najemr sinya-hato tfit kfo memor, “Fitoh yimar hingrna marnyewur, tor nd yimarn turhu tu bro tohukatohr wom tkitm yinyeft, kak htewurr wom hingrna yimaroh tohukatohneft yo kfo nuhasworr hingrna yimaroh yeshr heyuk yiharoh yeshr hanyeft. ⁴³ Nd tu bro tohukatohr kfoyuk hingrneft hingrna hik marnya hasirt, nd yimar yindhorkfot. ⁴⁴ Na

kfo mifwanko, bro tohukatohr nd yimarn htarahr rorhu tamoh tamohroh tohukatohyuk yimar.⁴⁵⁻⁴⁶ To nd yimar hingrna hany hingrna hanyhato bi bok yiham toh garitihato nd kfo hta tanyuk hingneft faso faso riwingrna behohaknihato nd hingrna yimam faso faso ritat bebakhatohr ror be nuwa bupa ye mmo nefrpas duka hasir, inji na mmo hasetrn, nd tohukatohr nia mihti thoft, be nhai wom tohruhatrt nd hingneft. Be nia yak tuhafrahrr. Yak tuhafhato tu rpahtet net yimampno tohraphr.

⁴⁷ Nd hingrna yimar, turhu bro tohukatohr kfo tanyuk mrokfo yuhat nhai hingrna hik marnyafort, be nhai htiruhattr. Mfro namburrahrr.⁴⁸ Yo wom hingrnamo yimar turhu bro tohukatohr nhai wom hingrna mrokfem kfo tanyhariforr hingrna mmo hasetrn, be nhai mfro namburruhattr. Ndnatn yimar Bro Nkifrarhu mrokfot mwany warho fnahetr, nd Bro Nkifrarhu mrokfo pthanef mna yuham tou hikak bugakfot. To yimar Bro Nkifrarhu mrokfot mwany warho fnah duhattr, rorn be yura ptha mmbräfinyineft, nhai mrokfom."

*Jisasr yimarooh yak yibnarneft niamo yuhat
(Matyu 10.34-36)*

⁴⁹ "Na nia bbinyssoftu kahthu mihtanyneftn. Kanga bmbri mihtanyant.⁵⁰ Barkoft kanga krhopam ayaka. Tfit na tuka nd krhoparoh yak nmbuhat riduka thoft yima yuhur nhai marnya-kahr. Ndnatn kanga yudbat ayaka.⁵¹ Na niamohat ka kangko yimarooh nnayur nmbuharoh yak tkafhato yak nohneft niar. Nhai. Na niamota htihato nnakfoni nnanyihato nafrndohmom.⁵² Arihat be afo wahtiyaf hanyswako. Tirfa yimam rpa kunys tohyukm htirahkomm tfit nafrndohrahm. Wom husfirpat rom inji tohrahm wom husf rof inji.⁵³ Nafrndohruhamn, yifemr toni-ruharn yinemrpn tuf tawo tawo nnarahf. Mmemt sinyaruhatn yinemt-pno tuf tawo tawo nnarahf. Met yimborehfim nhaf inji buga tum tawo nna hakurahm."

*Tamohmpno Bro Nkifrar niwa nefm hti nhta duha yitakomm?
(Matyu 16.2-3)*

⁵⁴ Wom mrokfot kfomorm nd tohmo met yindarim. Kfo memorm, "Dbha yiham marr nhai mwondh fnah marnyakahk kfo kangko, 'O hrek yihat ka toh nyukuhwot.' Be nhai kfo fura-kahko. Nd yihar nhai toh marnyakaht. Toh nyukuhwot.⁵⁵ Htitwoko marr hifa mwondh marnya fnahwor, kfo kangko, 'O href hifa yihar tohvor.'⁵⁶ Ar mmo hari kpt! Yihathu rhu yuharpas hti nhtewakomn to nhai hti nhtakahkma nanhu nianeft."

*kot mrokfot bmbritn nakfo nohkfot
(Matyu 5.25-26)*

⁵⁷ "Yau foh mmom kanjo tamoh tamoh nefm yudbat naknitwokomm. Nhai yak hti nhtahato hifa hifa nefrpam nakahko.⁵⁸ Womrpno kot kitwofn, yudbat yihotatn bmbritn ni tufn nakfo nohkfot nd kot mrokfot. Kot yiruhafnn, womr kotimruhatn kalabus yirahn.⁵⁹ To kalabus yinyeft to nhai bmbri fnahneruhatn. Kot kfoyuk wuroh wiknayuk wuroh marufat bi wiknanint ee btn fnahnerahn."

Yimam fasoh nefm mong troh duhatm nohrahm

13

¹ Nd yihart ndha tohmo wom yimam tohhato Jisasr wom mrokfot kfo nuhas memomr, "Jisase, Galili thofm Bro Nkifranko tarior mthamoat Pailatr htihato wom yimam yak tkrurafmotr rom yihato nd yimam tarior mtha hasoyukm wasmomm."² Jisasr wanyhato kfo memorm, "Nd Pailatr yimam yak tkrurhato wasmo yimarpam htihato ptha duha. Niko ka duka kangko rröh toh nmbuharpam fasohmn ndnettn Bro Nkifrar Pailatr mrhuhato inji namorm? Nhai. Ndt fasoh dukeft kekwoko.³ Yima bugam, yonent burent, fasoh nefrpam thu nhombra buganimomm. Ndhtet yimam Bro Nkifrar yak batirahrm. Ndnettn nd fasoh nefm mong troh bugakfot. Nhai womenr rim tohtakfot.⁴ Yo nd Siloamthu 18-pela yimam kunys suhakhato tatmom, to ka kangko ka Jerusalemt tohwa

yimam ka nd Siloamthu kunys tatmo yimparoh toh nmbuham be tu fasoh mifmn kunys tatmotm? Nhai. ⁵ Na kfiwanko be tu nhai. Niko to inji buga. Rpa-hteteko. Niko buga nikmoh fasoh nefm mong trohkfot.”

Yukha hir duha mishu kfo nhombra mrokfot

⁶ Fasoh nefm mong troh duha yimarhu wom kfo nhombra mrokfot kfo memor, “Wom yimar turhu mswirt nuhtamort fik fant. Kto yimorn memor, ‘Afo htiruha bi hirwote nhai.’ Yimorn htimort nd fikt nhai yukha hirrmot. ⁷ Ndnettn nd mswirt tohukatohyuk yimar kfo memor, ‘Wawanyn. Bi husfirpa gunyjimm nia hatohmoyann htimoyant ndar mis nhai yukha hirwonrmot. Hifa hifa bbhat be ndar misn kak furewut. Wayoh hehur thutwant.’ ⁸ Tfit nd mswirt tohukatohyuk yimar inji wanyhato kfo memor, ‘Bro yimaye, kanga afo wurohpenm wom gunyjimr afo tohwonrfot. Tfit afo mishu tpiko bfpam tou yibufr boyibufrrhoyanmn bulmakauroh rim yakhato afo mishu tpiko tou yeny boyenywonraht. ⁹ Inji natiwonhato nhai hirkah ee btn yoh thuraht. Hirwote be tohraht.’”

Jisasr Sabat yiharn mett yak marnyamo yuhat

¹⁰ Wom rhu krna Sabat yiharn wom rhu rifinyuk rmontn Jisasr yihato Bro Nkifrarhu mrokfom kfo pthamorm met yindarim. ¹¹ Nd kunysn rhumot wom mett wom yarhr fknenimotrt, nd yarhrn kak dbohnamourt. Dbohneft nhai yihom tohaf hanyrmoat. 18-pela gunyjimm nd dbohneft hatohmott. Mungranjbimpno inji dbohnamout. Nhai toh susna rhu susna inji narmoat. Benji waswoktahato rhumout. ¹² Jisasr nd mett htihato nakuyakmort. Nakuyakhato kfo memort, “Bar mete, nd dbohnef bebt asomif thu trohwotn.” ¹³ Inji kfoni hanyhato tirt htamort. Tirt htamorte be yudbat nd dbohneft thu troh tanymott. Nd rhu waswok hasoyuk mett be tfit rhu susnamot. Rhu susnahato Bro Nkifranko kfo yindhore boyindhormot. ¹⁴ Tfit nd rhu rifinyuk rmonthu bro yimar namburmor. Memor, “Tamohmpno rhu krna yihar dbohnet yimam yak marnyewarm Jisasr?” Ndnetrn namburmor. Tuhant yindars kfo memorm, “Hingrnayuk yiham 6-pela kfoyet. Dbohnefetko, nd hingrna yiham niahato yimam htirahmko. Rhu krna yiha dbohnefm hna duha.” ¹⁵ Jisasr wanyhato kfo memor, “Ar brumharpam pthayet kpt! Ka niko rhu krna yiham nhai nikmoh bulmakaum bupa yat hanykahkomm? ¹⁶ Nd na yak marnye mett yima Abrahamrhu yonet. Satanr 18-pela gunyjimm yimatn hatohmott. Nd rot hatohyuk yarhr na rhu krna yihar yak thuneft fasoh neft neya?” ¹⁷ Be inji kfomotr nd ror kfomo yimam tfit yimtnamom. Jisasr nayuk nefm nd met yindarim htihato kfo yindhormom.

Mastet tpiyenrhu kfo nhombra mrokfot

(Matyu 13.31-32; Mak 4.30-32)

¹⁸ Jisasr tfit ttiwon memorm, “Bro Nkifrarhu kingdomfot finji akfo nhombrayant? Tamohmn akfo nhombraya? ¹⁹ Bro Nkifrarhu kingdomfot kangme tefi mastet tpiyenrn yimar yaknihato turhu mswirtn nuherr. Nd mastet tpiyenr frdborhahato yonmari bufum korhm. Kto nungam tkit tkiroht ndha niahato wuswomt.”

Yisparoh kfo nhombra mrokfot

(Matyu 13.33)

²⁰ Nd rpa mrokfot tfit wom kfo memor, “Bro Nkifrarhu kingdomfot finji akfo nhombrayant? ²¹ Bro Nkifrarhu kingdomfot bronii thoft 3-pela bek plauaroh plauapam tefi yispen mifm rihtafhato kur yikopwa kanjo inji broniraht.”

Tefi yifhatik yuhat

(Matyu 7.13-14; 7.21-23)

²² Jisasr Jerusalemko yinjeftpno bok kmim toh fnahhato Bro Nkifrarhu mrokfot kfo nuhas fnahmorm. ²³ Wom kmithu wom yimar Jisasr yihato ttiwon memor, “Jisase, nda bbinysothu wuroh batii yihare, rpa rpa yimarpam yakrahr?” Jisasr wanyhato kfo memor, ²⁴⁻²⁵ “Na kfiwanko, yihota rim fnahni yuhate kukentamot. Ndnatn bi arihatn

bbukahato bi rim fnahnikfot. Kto tu kuny sikatr nd kuny yifhatikt frkihaf thombat be finji fkneniruhako? Bok yimam briahako tohhato kfo mirahm, ‘Wayak tfanyakna.’ Kfo mirahrr, ‘Ni fitha thofe? Na nhai wom tkit nihu nyingatikt htirmoyann.’²⁶ Tfit romn kfo mirahmr, ‘Nom to ninpno rpatis nuwa famonom. Yo nmoh kmiroh bro yihotann Bro Nkifrarhu mrokfem kfo nuhas bonuhasmonnom.’²⁷ Tfit rorn kfo mirahrm, ‘Na nhai wom tkitt htirmoyanko. Ka fitha thofeko? Wur fasoh yima bebko. Wuri waikma.’²⁸ Htirahko Abraham, Aisak Jekofromi yo wom profetm, romrpam Bro Nkifrarhu kingdomkot rhuruhatm htirahkomm. Niko wuri briahako tohhato tau nknekrahko.²⁹ Nd bbinyosof bugathu yimam yiruhann Bro Nkifrarhu kingdomkot mrhuhato nd bro yemro burwat yerahmt.³⁰ Ndar yihar yimam mongko niayukm mfrfnahnirahm. Yimam nyingako tohakyukm tfit mongko yihom frfnahnirahm.”

Jisasr Jerusalemt yuhuwafmo yuhat

(Matyu 23.37-39)

³¹ Inji yuhre ptha haso hanyetrn wom Farisim niahato mkfo memom, “Ndashart be tmifn wahtanykahntn wom tkitm wain. Herotr kangr awasann.”³² Inji mkfomotmr, Jisasr tfit kfo memor, “Nd rim kfota mkfotahato kfo nheh bonhehet yimar wamitwakomr, ‘Href yuwonanohmbam afo nd yarh fknayet yimami dbohnet yimam htiruha. Ka yuwonanohmbamnd hingrenefenm hingrna bugaruhanm.’³³ Afo bi mirahm, ‘Nd profetr awas-nomr.’ Bingot Jerusalemko profetm wasmoum. Ndnetttn na yirhwota Jerusalemt wasrahma.”

³⁴ Jisasr tfit kfo memor, “O Jerusalem! Jerusalem! Kfo tkrurafoyuk profetm ninn was hakutwanm, yo womm tahiye tahiye yebhoh noh hakutwanm. Bok yiham memoua nanhu mofsinhitn ahta akafrohneyann mmem kris yonm yak kafrohwa kanjo, to nhai. Nhais wofnrmouna.³⁵ Be wahti hanyswa, nihu temperr brio yima duhattr rhurahr. Ariham nhai wom tfit htirhotna. Bi tunn kfo kangn, ‘O Bro Nkifraye, Brorhu yufatpno niayuk yimar wayak marnya bomarnyatwanr.’ Bi tunn inji kfiwune ee tfit htiyakrahna.”

Jisasr wom yubtet yimar yak marnyamo yuhat

14

¹ Wom rhu krna Sabat yihar Jisasr nuwa yat yimor Farisiroh bro yimarhu kunys. Nd Farisiroh nyingam be Jisasrn yimoum. Memoum, “Afo htirahnom ndar rhu krna yihar nhaf tamoh nefm naruhar.”² Wom yubtet yimar niamorn Jisasrpno mtohmor.³ Jisasr nd yimar htihato tfit ttiwonmorm Farisimi boririfhuthu tisam, “Niko finji dukiwako? Boririfhut finji kfiwat? Rhu krna yiha dbohnet yimam yak marnyarfohate ka hifa?”⁴

⁴ Jisasr inji kfo ttiwonmohat nhai wom Farisir ptharmor. Be Jisasr nd yubtet yimar yakmorr nd yubteft yak marnyafmotrr tfit yimor.⁵ Nd yubtet yimar yak marnyafohato tfit toh kekutnimorn Farisim kfo ttiwon memor, “Nd rhu krna yiharn nikmoh yonm o bulmakaum yau hanyhato teknn yohnifohat ka nhai bmbri yuk hambrakrfotkomm? O be hti marsisa merfoko, ‘Rhu krna yihayer, to finji yuhkato yakruhanomm?’ ”⁶ Nd Farisim nd ttiwonkot ttiwonmotrm be tuha mrokfo duhattr tohmom.

Yimar turhu yufat yiro wahtakfot

⁷ Jisasr tohhato hti hasomourm nd nuwa yat niayuk yimam. Yihato mruhaknimoahat be memoum, “Barkof mruhakyuk gajimn amrhunom.” Inji hti hasohato mrokfot be yura fafunamort.⁸ Kfo memor, “Wom yimar turhu tuhan yak yiharo yemro burwat htahato kfo kangrn, ‘Ni wanietwa nanhu tuhan yak yiharo. Nd yiha bro yemro burwat htaruha. Wania wayenyhotwannom.’ Inji kfitrn yifi, ni frohann yihato yudbat tu nyingako amruhakniya. Nd nyingako htayuk gajim miruhattu bro yufetmn ahta hanyom.⁹ Bi mruhetnn kto tu nd burwat htayuk yimar yauyaknehato kfo mirahrn, ‘Na nhai merfoya ninn yudbat nyingako mrhurahn. Na famuya ndu bro yufetr rhurahrt nd tkitt. Ndar tkitt wahtanyns. Ni mongko warhutwa.’ Be bro yimtneft yakrahtn, tfit sinyani mongko yihom rhunef.¹⁰ Ndnetttn tuhan yak tatrut yiharo yemro burwat htahato nakumn, frohann bi yihato

nyingako amruhakniya. Yinyeft afo yihato afo mtohkfot womroh mongkorn. Bi nd tu burwat htayuk yimarn yihom htihato kfo kangrn, ‘Asha wamrhun,’ ee nd tur kfoyuk tkittn mrhuneft hifa. Nd burwat rhuyuk met yindarim hti yindhorrahmn. ¹¹ Ndt tu bro mrokfot. Yimar kangr, ‘Tamoh nefm nann bmbri nyingako mtohnihato nann tamoh tamoh nefm atohakkahtanm yimam kfo yindhorrhma,’ nd yimar kto Bro Nkifrar yak dburakruharr yiro wahtarahr. Yimar turhu yufat yiro wahtahato yimam nhai kmi kmim yindhorkahmr, nd yimar Bro Nkifrar tfit yura wuhtarahrr.”

Fasoh yima bebpam nom yak marnyakfot

¹² Jisasr nd nuwam nakuyakmo Farisir kfo memor, “Kangn yenyhoyuk yimam ayaka, frohann akfo amiya be yimatrpami tunhu kmithu bro maruyet yimarpam anaku tutuhaya. Rom kfakrahn, to be ni hayuk yeshrt bi turoh tire tawo hirahmn. Frohann nd yihotat ahika. ¹³ Ninhu nuwa nngrit, tamoh tamoh yeshrt yanef fasoh yima bebpam, yimam nd wura bebetm, nyinga kunyjetm, ndmn nakuyakkfot. ¹⁴ Rom nakurahn duka kinyaknirahm, to finji yeshrim yakruhanomn tngo nakuruhanomm. Ndhtet yima bebm Bro Nkifrar kukatohworm. Rom nakurahn tawo Bro Nkifrar wany yakiohato nohnita yimam sinyaruha yiha tawo Bro Nkifrar htiruharn yak marnya bomarnyarahrn.”

Yemro burwathu kfo nhombra mrokfot
(Matyu 22.1-10)

¹⁵ Nd rpat nuwa ye hasoyukroh womr nd Jisasr kfomo mrokfot wanyhato Jisasr kfomorr, memor, “Yimar Bro Nkifrarhu kingdomkftn tohhato nuwa yanyeft ka nd yimar yindhorkfot.” ¹⁶ Jisasr wanyhato kfo memor, “Wom yimar bro yemro burwat hta yibonetrn kmi kmiroh yimam kfo duka hanymorm nd yemro burwathu nianeft. ¹⁷ Nd yemro burwat yak htatamortn tu ye yiharn nd tu yemro burwat htayuk yimar kfo tkrurmorr turhu hingrna yimar. Memor, ‘Waikahnn nd na kfo hanymo yimam wakfo wamitwanm, “Hrek korht nd yemro burwathu ye yihar. Wania hnetwako.”’ ¹⁸ Nd hingrna yimar inji wany sanyhato yimor. Yihato kfo hanymoatrm nhai rroh womr kfo yibonrmor. Womr yi kfomorr, kfo memor, ‘Na wom bbinysof nmbuhat wikneyant afo ndthu htit yiruha. Ndnatn na nhai nierhota.’ ¹⁹ Womr yi ttiwonmorr, kfo memor, ‘Na hingrna-yuk 10-pela nfri bulmakaum wiknaroyann afo hanyrhoyanmn htiruha rroh hingrneft.’ ²⁰ Tfit womr yi ttiwonmor, kfo memor, ‘O na hrek tuhan yekann nhai niewota.’

²¹ Be inji kfo kur bugamotm be tfit yimor. Yihato turhu bro yimar mkfo memor, ‘Nd ni kfomo yimam yi ttiwontanm nianeft, nhai womr kfo yibonrfor nianeft. Ndnatn tfit nia.’ Be nd bro yimar inji wanyhato namburmor. Namburhato tfit turhu hingrna yimar kfo memor, ‘Tfit wai habrikahnn fasoh yima bebm wayak habrin. Wuskapa duha yimam, yimam nyinga kunyjetm, wura bebetm, tir bebetm, ndhtet ndhtet yimam wayak habrin. Wayak habrikahnmn nanhu kunys aniam.’

²² Nd bro yimar kfomo yuhatn yak hikhato nd yimam ror kfoyukm yak habrihato mkfo memor, ‘Nd ni kfoyuk yimam bi fak habriyanm. Nd yimarpampno kunys tafi furkihkaht. Tom yuhre wom rrfam korb furewum.’ ²³ Be nd bro yimar tfit kfo memor, ‘Na wofnkahaa wom rrfam rhu furaneft. Kanga kunys afurkiht. Tfit waikahnn nd bro yihota naff yuham yo msrirroh gna nanyor yuhamn tohwa yimam ndm wakfak habri hanynm. Rompno kunys furkihraht. ²⁴ Na kfiwann, na nd barkof kfo titamo yimam be nhai nd na htayuk yemro burwat nia yeruhatm.’”

Yimam Jisasr hikneft duka marnyahato hikkfot
(Matyu 10.37-38)

²⁵ Jisasr bok yimam yau hik hanymotmr kekutnihato kfo memorm, ²⁶ “Yimar nanpno niahato kangr, nanhu disaiper yimaya aruha, nd yimar turhu yifa mndarm, turhu yon tuhanm yo turhu yima yuhurhu dukefm be mondt hta duha. Nann afo mondt htakfot. Yifammam, yon tuhanm be inji rom dukani hanykfot. ²⁷ Yo yimar kangr, nanhu disaiper

yimaya aruha, nd yimar nhai yakrme-kfot krhoparoh titaneft. Na krhopam yakmo kanjo nd yimar krhopam yakkfot. Nhai yakrmekfot.

²⁸ Wom yimar kunys hingrnaneft, nhai be yudbat sinyanihato singaknikahrt. Barkof-pam afo yorhwarn kunyshu hingrna yuham afo dukahato kak nhtewur. Kunys hingrna thoft finji finji hingrnarhoyant? Finji finji marum htaruha nd kunyshu hingrna wuskaroh wiknaneft? Nd ndm afo rhuhato kak nhtewurm. ²⁹ Be asomif waduka sinyahato singa furaknineft htirahn rahuropam kasinyahato mtuhafnirahrt. Womm htihato haningerahmr nd yimar. ³⁰ Kfo dadidoh mirahmr, ‘Kewayeye! Kunyr kasinya hasomorr memor, “Ka hingrna bugaruhannr.”’

³¹ Ten tausen amiyet kantrikfot merfotm wom twenti tausen amiyet kantrikfot ai hfnahnomm nhai be bmbri wahta brurakhato yiayknikahm. Barkofpam afo nd ten tausen amiyet kantrikfot afo tum yak nhtahato hti nhtewum. Tum yak nhombra hifa hifa ee kitm nnat. Nhai, tum hti nhombra-titme, ³² be wom kantrikfot wuri afo tohetmn bmbri wom yimam yitamn kfo rafiwumm.

³³ To be nd rpahtet yuhatn wom yimarhu dukefr nhai nanhu dukefrn rhu bronikahrr nhai nanhu disaiperr tohruhatr.”

Youparoh kfo nhombra mrokfeft

(Matyu 5.13; Mak 9.50)

³⁴ “Youpam tamoh tamoh roh nrhayukem. Nd youpam nhai wom you gb ye juha, to tfit finji kanjo naruhatnm tfit you gb yeruham? Bi be, bi fasohem. ³⁵ Ndhtet youpam be nhai tfit mswirmn trufkfot. Nhai tfit bulmakau rispno tatkbokt hmbrihato mswirm truf habrikfot. Fasohmn tubatuyefiwum. Yimbhindanganeteko, ndar na kfiwa mrokfot wanykfot.”

Yimar hambrakmo sifsifrh kfo nhombra mrokfeft

(Matyu 18.12-14)

15

¹ Jisasr takis marut yak htfasyuk yimami fasoh fasoh nefm nayet yimampno brbo yimom mrokfo wanyneft, ² Farisimi Bro Nkifrarhu boririfhuthu tisam htihato kfo hutt memom, “Nd yima Jisasr fasoh yima bebmpno rpat nabnothato nuwa kawum.”

³ Inji kfomotm Jisasr wanyhato kfo memor, ⁴ “Bro Nkifrarhu yindhorneft inji. Wom yimar 100 sifsifetr rhuhato nd wan handretyukr hti hambrorfohat ka be mumafrror? Na kanga ka nhai mumafrrfotrr. Ndwom 99 kforpat kipr yeyuk tkitt htanyrform afo nd wan handretyukr afo yau hambrak habrirforr. Bi mhambrekrr ee yima yuhur mirhurforr. ⁵ Yima yuhur mirhuhato be yindhorefrparpno tita hatoh hanyrforr kmiko. ⁶ Kmifat mhtahato kfo merform, ‘Na hti hambromoa sifsifr bi tfit hambrekanr, wayindhornhokma.’ To inji narfor. ⁷ Na kfiwanko nd kfo nhombrakfot kfiwa 99 yimam, bi dboriohrhut rhuhato nhai tfit rroh yima yuhum wom yak kekutkfot. Nd yimam nhai be mfro dukakahrm. Bro Nkifrarhu tu bro dukeft kitt ndwom rpa yimar bi fasoh nefm yihato tfit mtob kekuthato niamor. Nd yimarn Bro Nkifrar be tu mfro yindhorworr.”

Mett hambrakmo marufathu kfo nhombra mrokfeft

⁸ “Wom mett ten kina yak brurfam yakinohhato wom fat hti hambroneft. Htirahnt lam hta funanihato kunyshu wuss hfhan bugarahatt nd rpa marufathu hambroneftn.

⁹ Hambro hany hambro hany, bi fektt, htirahnt tuthu yimatm nakuyak bugaruhatm, kfo mirahtm, ‘Wayindhornhokma. Na hambromoa marufat bi fekant.’ ¹⁰ To nd mrokfot kanjo Bro Nkifrar yindhor-worr wom yimar fasoh nefm tohhato tfit nd fasoh nefm mong trohneft.”

Hus yonet yimarhu kfo nhombra mrokfeft

¹¹ Tfifit wom kfo nhombra mrokfot kfo memor, “Wom yimarhu yon husf tohmouf.

¹² Wom nmemr yihato yifemr mkfo memor, ‘Dajaya, nani nanhu najomr, nmoh wuskam bi wayak nhtahikahtnno nanhum kanga bi ayakanm.’ Be yifemr wany yakio-hato fak

nhtahemorf. ¹³ Be wom nmehrhu wuskam yakhato tuha kmi thofmpno maruhampno nayak tuknaknihato maruharpam myaknihato nhai wom warhu hasormor. Nndo wom wuri kmimm yihato turhu nd fasoh fasoh nefmpno nd ror hanyuk maruhenm tubatu wita bugamorm. ¹⁴ Tubatu witahato kto nd ror tohyuk kmit bro yatinoh wormr tohmor. Be nd yihar nd yimar memor, ‘Be na nohruha yeshrimn. To fitha marufam yakrroyann yeshriyem wiknarhoya? Na hnayuk marufenm to bi tubatu bugamoyann.’ ¹⁵ Be mdukatihato wom yimarpno yihato wom hingrneft fakmor. Fohm tohukatoh inji nahemourr. ¹⁶ Nd fohm tohukatohhato memour, ‘Nd foeroh heyuk binharoh bin krm ndm ayeya.’ Nhai wom yimarn wom tu yeshriyen mifm hermoarr.

¹⁷ Be toh nhombra hanyihato tfit tur dukamor, ‘Nantu yifemrhu hingrna yimam nhai be inji yatinoh dbfakahm. Na asha tohwoyann masat yatinoh dbfiwa. Tamohmpno asha na yatinoh dbfa hasiwoya? ¹⁸ Tfit tukanhuko yiruha. Yirhoyann tukanhu yifemr mkfo yongmaknihato mkfo miruhanr, “Dajaya, Bro Nkifrari ni be tu fasoh neft namoyanfn. Nhai tu hifa dborioh neft narmoyanfn. ¹⁹ Na tu be bi fasoh yon beba. Na nhai tu dborioh yonann kfo mirhona, ‘Nantu yoner.’ Nhai. Na ninhu hingrna yima furaya arhutwaya.”’

²⁰ Be nd dukeft yakmorn sinyamor. Sinyahato yimor turhu yifemrno.

Yi yimorn kmit mfnahmorr. Yuhre wuri yau hanyetrn yifemr htiyakhato tfit yifemrhu yima yuhur yinem yonr inji tfit htiyakmohat nhai bmtarmorr. Be yinem yonrpno toni-yaknihato rim kihato hanurmorr. ²¹ Yinem yonr sinyahato yifemr kfo memor, ‘Dajaya, Bro Nkifrari ni be tu fasoh neft namoyanfn. Na nhai tu dborioh yonann kfo miruha, “Nantu yoner.” Nhai.’ ²² To Yifemr nd yonr kfomo tngt wany marsisahato turhu hingrna yimam kfo memorm, ‘Nantu wondht wayaknekahkomm wawondh-komr. Tor yuke hmbreshar, yo tirpinyaft hatohyuk ringr yo su wuram. Nd ndm wayaknekahkomm wawondhkomr. ²³ Yo tor bulmakau yogr. Ndr wawaskahkomrn roh tfnhato rpat rhu rifinyhato yerahnom. Nuwa yetahato btn ptha yindhor boyindhorrahnom. ²⁴ Nantu yonr bi nohniyetrn bi tfit bi tor bi nier. Bi wom kmimm nkiranimator. To nhai, bi asor bi nier.’ Ndnatn nd bro yemro burwat hta yehato grha yindhormom.

²⁵ Bro najomr mswirko toh tanyhato mwanyaknimor. ‘Arme tamohtpno grha yindhorwam?’ ²⁶ Wom hingrna yimar nakuyakhato ttiwonmorr, ‘Ndm tamohmn grha yindhorwam?’ ²⁷ Kfo kangrr, ‘Ninhu nmemr href tfit mfnahtr, yifemr ror htiyakhato rorhu yindhor nmbuhatt bulmakaur washato ndr yehato grha yindhorwom.’ ²⁸ Be najomr inji wanymohat nhai ror yihato grha yindhornho inji narmorm. Nambur yima yuhetrn be rhumor. Yifemr hti hasotihato yimorn yinemr mkfo memor, ‘Tamohmpno ni nia duha yita?’ ²⁹ Yinemr sinyahato yifemr kfo memor, ‘Wawanyn! Na bok gunyjimm hingrna yima furam kanjo ninhu hingrneft fakitoh hnahemoyann. Nhai ninhu wom tngt hanjbornarmoyant. Nhai. Hingrna marnya hnamoya. Ni nhai ndt htihato wom fohenr washato marimor, “Asor foer. Ndr watasokahnn ninhu yimatm nakukahnw warhu wayako.” Be tu nhai mif inji narmo. ³⁰ Nd kmi kmi yaum kanjo tahuta htfaset yonrn ninhu foer wasahuknr. Nhai mrokfom.’

³¹ Yifemr tfit sinyahato yinemr kfo memor, ‘Ni toh hnamohat nanopno brbo toh hnamo. To mirahn ka nanhu tamoh tamohm ka womrohem. Nhai. Ninuhem. ³² Ndnett nihu nmemr bi nohetr bi tor bi sinyer. Bi wom tkitm bi nkiraniyetr bi tor bi nier. Ndnett ni niahato nom rpat rhuhato yindhorkfot.’”

Hifa yima dukefrpno hingrnamo yuhat

16

¹ Jisassr turhu disaiperm wom mrokfot yakhato kfo ptha nuhas memorm, “Wom yimar nhai be kukenhato harhurmoar yeshri wuska maru kunym. Nd yeshri wuska maru kunym wom yimar yakmorn rorn nd rorhu tamoh tamoh tohukatoh hemourr. Wom yiha wom yimam nd yimarpno yihato mkfo memomr, ‘Nd ninhu wuskam tohukatohwa yimar wom wuskam he fura bofura hanitr yimam, womnam turn kak nfhotiyaf hanitr wom wuskam.’ ² Nd yimar inji wanymohat nakuyakmorr nd wuska tohukatohmoa

yimar. Nakuyakhato niamotr ttiwon memor, ‘Na nd wanymo mrokfot ka tu mrokfot wanymoya? Nd wuskaroh yak nfhoti nmbuhat yo yak he furafhany nmbuhat? Inji wanymoyann ni be nhai wom tohukatohruhatnm nanhu tamoh tamohm. Be yak tuhaforuhann. Wuroht afo waikahnn tamoh tamohm yak hta kars bokars tanykahnm yirahn. Ni nd namo neft gontwatn wahta buga tanykahnm yirahn.’

³ Be nd tohukatohr yimorn kfo memor, ‘Na nd yimar yak tuhaf thombat be finji narhoya kmiko rhu fura thombat? Na nhai wofnkaha sfno marufapa duha rhuhato womm rim tndauneft. Nhai. Be tu bro yimtnaneft yakrahta na inji naneft. Yo nhافت na tu be narho bnhaya. Womm kfo mirahma, “Wania nmoh mswirthu bbpam watou kekuthennom,” na nhai hingrnarhota.’ ⁴ Duka hanysihato kfo memor, ‘Nhai mrokfom. Tot wom dukeft. Inji naruha, be yimam nanhu neft hti yindhorhato kfakrahma yimarhu hingrneft yak tuhaf thombat.’ ⁵ Be nd dukefetrn naku yak hanymorm yimam nd wuskam tamoh tamohm afo yak furani hanymom. Barkof yimar niamotr ttiwon memor, ‘Nine tamoht yakmo?’ ⁶ Nd yimar memor, ‘Na 100 dram welkfot fakmoya.’ Kfo memor, ‘Nd ni be afo yak furanimo wel dramthu kfo nuhas gontwat mirahn akfo amiya 100 dram welkfot, be wawandfatwa 50 dram welkforpat.’ ⁷ Tfit womr niamotr ttiwonmorr, ‘Ni tamoh tamohm afo yak furanimo?’ Memor, ‘Nane 100 wit bekrm afo fak furanimo.’ Tohukatohr memor, ‘Asot ni yak furanimo wit bekroh kfo nuhas gontwat Nd gontwatn wawandfa wamitwa, “Na 80 bek witkforpat fakmoya.” Mirahn awandfaya 100 wit bekrm.’

⁸ Wandfa buganimotmm nd tohukatohr nd gontwam nd yimarpno hanyhato yimar htihato kfo yindhor memor, ‘Be tu hifa yima dukefrpno hingrnamo. Duka tunga yima yuhurpno inji hingrnamo. Nhai mrokfom.’ Nd yimar be inji kfo yindhormorr tohukatohr. Wahtiko. Ndab bbinyosothu yimam bi tum hti dukamomt dboriorh rhu nmbuhathu yakyuk yihota yuhat. Niko nukeft tohwa yimako rpahtet neft wanatwako. Waduka marnyatwakomt dboriorh ruheft yakyuk yihota yuhat.’

⁹ Jisasr tfit nd mrokfot kfo hik buga memor, “Niko nd bbinyosothu tamoh tamoh wuskam yakneft wom yimam nd wuskam kkopentiwam hti dukahato hekfot. Hirahkomm kfo yindhorrahmk. Inji narahko nd nikmoh noh yihar Bro Nkifrar yakmiyakruharkomn hendhorrahkro.

¹⁰ Frohr tefi wuskenm yahutkomr fakitoh marnyerm, bro wuskam ror yikitohneft yikitoh marnyarahrm. Nhai yikitoh marnyarform tefi shrm nd yimar nhai yikitoh marnyaruhatr bro shrm. ¹¹ Nda bbinyosothu tamoh tamoh wuskam nhai yikitoh marnya-rfokomm, to tfit frohm hefenr yorhwa wuskam hiruhatmko yikitohruhakomm? ¹² Womroh tamoh tamoh wuskam nhai hti duka marnyaf hanyhekahkomm, to tfit frohm tawo ninhu yufathu wuskam yakhiruhamn?

¹³ Nhai wom yimar najomrofhu yinhitn rhurfotr. Nhai. Womrpar yuhurrfour, womr yati yejborharforr. Womrhu mrokforpam wany yakiorfour, womrhum nhai. Niko nhai Bro Nkifrarhu dukefti maruharoh dukeft rpat yakitohkfst.”

Mosesr yakmo boririfhuti Bro Nkifrarhu kingdomkfst

¹⁴ Farisim rom be maru hingneftn rrroh dukefm frtkafmoum. Ndnetmn Jisasr inji kfomohat nd yimam yurak krtit karikomomr. ¹⁵ Jisasr sinyahato kfo memorm, “Niko newa nefm yimam htitamko kfo kangm, ‘Ka hifa dboriorh nefm newuko.’ Nhen. Bro Nkifrarhu nyngaye htitworko nikmoh fasoh nefm yirot yima toh rawofm yorhwam. Nikmoh yima rifhumio Bro Nkifrar faso hti bebworm. Tngtn be yuwi furewut. Yimam kfo yamukam, ‘Ndm hifa nefem,’ Bro Nkifrar htihato kfo kangr, ‘Ndm fasoh nefem.’

¹⁶ Bingotrhof nkifra boririfhut, Mosesr yakmot, yo profetm kfo pthamoa mrokfom, afo nd mrokfom yimam yak hik hna yak hik hnamommn wuroht Jon Baftaisrpnone be mfafho-nimomt. Jon Baftaisrn hnamort Bro Nkifrarhu kingdomkfst mrokfot. Be nd mrokfotn bi bronittm kmi kmim. Bronitatt kmi kmiroh yimam nd kingdomkfst yinyeftn yima yuhum bi mfro sinyewum.

¹⁷ To wom mrokfot. Ndar mounti bbinysoft rof rim batinirahf. Nhai Bro Nkifrarhu wom tefi tefi mrokfo nmbuhat be inji naruhatt.”

*Tuhan yak thu nmbuhat
(Matyu 5.31-32; 19.9; Mak 10.11-12)*

¹⁸ Tuhan yak thu nmbuhat ndt Jisasr kfo memor, “Fitoh yimar turhu yak tuhant yak tuhafhato tfit wom nfri mett fekr, nd nfri mett be ijom yuhathu metet. Yo wom yimar yak tuhafet mett tfit womrn fekrt, ndt to ijom yuhathu metet.”

Maru kunyet yimarhu mrokfot yo Lasarusru mrokfot

¹⁹ Jisasr tfit wom mrokfot riyakhato kfo ptha memor, “Wom yiha wom maru kunyet yimar tohmor. Rorhu wondh tha, yeshri, tamoh tamoh be bro bro maru kfetrpam fakmour. ²⁰⁻²¹ Yo tor tohmor wom yima bebr. Rorhu yufat Lasarus. Nd maru kunyet yimarhu kuny yifhatikt ndha rhutamour. Duka memour, ‘Nd maru kunyet yimar ye bruraf hanyuk dborioh dborioh yeshrthu krpupenm tebor rfashit misuhuykm nann ye tuthatak hanyruhanm.’ Inji dukahato rim rhuta hasomour. Lasarusenr nd yonmari, yonmari fhutpno kku bebt harhutamoahat memoum, ‘Nndo yau kuteter.’ Nd fhu tikroh kku bunyangrt tonemoatt tfit yaum yimoamn tepen dbrorhamoumr.

²² Lasarusenr tohhany toh hanymorne nohmor. Nohmotr rorhu yafothat mounmotm yaknimomt, Abrahamrpno brbo mhtanymomt yura hefenrn. Tfit rorhu mongkorn nd maru kunyet yimar nohmotr fopmomr. ²³ Nd maru kunyet yimar nohnihato rorhu yafothat Maringour yimot. Maringour yihato be mitasismor kahtn. Memor, ‘Kekutak auhiya,’ Abrahamr yurak wuhtimorr. Abrahamrhu kkrekorn Lasarus rhumor. ²⁴ Nd maru kunyet yimar nd kah nyunguramt tohhato naku tuhaf memor, ‘Daja Abrahame, wayuhuwafkahna Lasarus wakfokahtnr bupenm tirpinyafe tayifiknekahtn nanhu tort bupaye ahta gonnagafot. Na tu be bro kaht tohwa.’

²⁵ Abrahamr kekutak wahtihato kfo memor, ‘Wawanyn bar yone, ni yima nfri tohmohat ninhu hifa yihar tohmour, Lasarus nd yihat fasoh tkit bebt warhutamor. Tfit arihat ror bi hifa tkitt yorhwarn ni bi tfit fasoh tkitt korhn. ²⁶ To ror nakutatnr finji nieruhar? Nhai yihotam. Niko watohngotwoko nom ako yura yuwa tohngotwonom. Nikomi nom buha Bro Nkifrar frtmbhafmort yihotat.’

²⁷ Be wom maru kunyet yimar inji wanyishah kfo memor, ‘Dajaya, be ndnatn tfit wom mrokfot kfiwann. Kangane, Lasarusre wakfo tkrurafkahtnr nanhu yifemroh kunyko air.

²⁸ Nanhу nmemrom tom 5-pelakfot tohwom. Aikahrn akfotwarm, rroh tohneft mirahm na tohmo toheft atoh hiknom. Rroh tohneft hifa hifa atohtwam. Na finji wofnkaha na tohwa tkitt rom niahato kaht yihom tohneft.’ ²⁹ Abrahamr kfo memor, ‘Lasarus nhai tfit yihat kfokfot ninhu nmemrom. Tom Mosesrhu boririfhum yo profetroh mrokfom, rom nd mrokfom htihato kfoyuk yuhatn toh hikkfot.’ ³⁰ Tfit nd maru kunyet yimar kfo wok memor, ‘Daja Abrahame, nd nkifra mrokfom be nhai wany yakio-ruhatmm. Womr nohhato tfit sinyahto ptharahrm ee btn wany yakiorahmr.’

³¹ Tfit Abrahamr memor, ‘Nhai Mosesrhu boririfhum o profetm pthayuk mrokfom nhai wany yakiokahmm. To nhai tfit womr nohhato tfit sinyahto pthahekfot mrokfot. Ror nohhato tfit sinyahto pthayuk mrokfom be nhai wany yakioruhatmm.’”

*Yimam yak kasuhwa fasoh nefm
(Matyu 18.6-7; 18.21-22; Mak 9.42)*

¹ Jisasr turhu disaiperm kfo memor, “Yima yuhum sinyarahmk fasoh nefroh naneft. Be wom yimarn niahato mkfo kangrn, ‘Ndur yuhat warine o ndur shrt warimakn.’ Nd yak tkruryuk yimar dukaf hanykfot. Bro Nkifrar be yak tutfarahrr.

² Wom yimar ndar na hikwa yonenm frnhehektrm fasoh nefm fsuhm, nd frnhehektrm yimar bro tahis yakhato mohtpitn tmbrehkato tek dany yuhat yafhohato miptkokfot. Tohruharn fasoh yihotat hanyrahrm.

³ Wom Kristen yimar niahato ni wom Kristenn fasoh nefm nern, ni be tohhato kfo mekfot, ‘Wurena mirahn inji anaya.’ Inji kfitn nd yimar tohhato kfo kangr, ‘O, wurene na be tu fasoh neft neyann. Nhai tu dborioh neft narfoyann.’ Bi inji kfiwurn, to be mirahn nd ror nayuk neft tfit wom adukayant. Be duka mumafokfot. ⁴ O 7-pela taimkfot fak nhehrn o finji nern o tamoh nefm nahato tfit 7-pela taim niahato nnakfo nuhashato nnakfo gbhufnm, to mirahn tfit adukayanm ror nayuk nefm. Be duka mumafokfot.”

Bro Nkifrarhu dukefrpam rhunef

⁵ Jisasrhu disaiperm Jisasr kfo memomr, “Wathu bmtatwannom. Be Bro Nkifrarhu dukefrpam arhu-twamnom nmoh yima yuhum.” ⁶ Jisasr wanyhato kfo memorm, “Bro Nkifrarhu dukefenz be ndar sayor tpiyenr kanjo rhuhato kfo mirahn, ‘Ndar miye wayoh tondonikahnn tfit wusha tektn wamitohkahnn wasinya.’ Inji kforahn be htirahnt nd mis ninhu tng yuhath hikraht.”

Jisasr hingrna yimarhu hingrneft pthamo yuhat

⁷ Nd mrokfot inji kfonihato tfit wom mrokfot kfo memorm, “Niko hingrna yimetko rhurfihat ka tfit nikomn hta miska garifkomm? Na kanga ka nhai. ⁸ Hingrna yimamn mihingrnakhato tfit mhta romn yeshrim hta mskaherfotmko niko be yenye-frpat yarfoko. Nikmoh hta mskafhehato kto wuroh mongko rrohm. ⁹ To ka finji dukewako? Nd hingrna yimam niko tohukatohkmoh mrokfom hingrna yimam hikneft ka kfo yindhorrfokomm? Na kanga ka nhai. ¹⁰ To be rpahtet neft niko Bro Nkifrar kfoyuk hingrneft hingrna buga hanyeft. Be kfo mekfot, ‘Nom hingrna fura yimayenom. Ni kfoyuk hingrneft bi hingnamonomt.’”

10-pela lepra dbohnet yimaro mrokfot

¹¹ Jerusalemko yimoa yihotat buha Galili Sameriafhu kmi nanyor yuhatn yihotat ruhettn nd nanyor yuhatn faumoumt. Jisasr nd yihotatn yimor. ¹² Yi yihato be yuhre kmit mifau fnah hanymort, ka nd 10-pela lepra dbohnet yimam Jisasrhу nia mrokfot wanyhato fau tebfi hnamom. Yau hnehato Jisasr htiyakmomr. ¹³ Be wuri yau hnehato Jisasrhу yufat naku hnehato kfo memom, “Bro yima Jisase! Wahti yuhuwafnnom.”

¹⁴ Jisasr nd yimam htihato kfo memorm, “Temperr tohyuk prismpno waikahkomm romn hti kotharahmko nikmoh dbohneft.” Inji kfafmotrm yimom. Buha yihotatn nd lepra dbohneft thu truf tanymotm. ¹⁵ Be nd yimam lepra dbohneft thu truf tanymohat nhai marimom, “Jisasr tfit miyak nuhasrahnomr tham.” Nhai. Rpa Sameria thofrpar lepra dbohneft thu truf tanymohat Bro Nkifrarhu bro yindhoreft yakmotr be yindhoref-rparpno tfit yihato ¹⁶ Jisasrhу wuram-pno msuhmor. Msuhhato mkfo yindhoref boyindhormorr. ¹⁷ Jisasr nd rpa yimarpars htiyakhato kfo memor, “Na famuya ka 10-pela yima bugako dbohneft thu truf tanysisko. Ndwom 9-pelakfot to fitom?”

¹⁸ Tamohmpno ndar womha kmi thofrpar tfit niahato Bro Nkifrar mkfo yindhawarr?”

¹⁹ Be nd yimar Jisasr yak kasinyahato kfo memor, “Nhai mrokfom, wanju. Ni ndar dbohneft thu truf tanyhato tunn duka famu, ‘Na hrek Jisasrpno yitahat ndar dbohneft kak thuwort.’ Inji dukahato niesn Bro nkifrar bi fak marnyern.”

Bro Najomr yawihna thombat kmi kmim htiyakrahmr

(Matyu 24.23-28; 24.37-41)

²⁰ Wom Farisim yihato Jisasr mttiwon memomr, “Fitoh yiha Bro Nkifrarhu kingdomfot htiruhanomt?” Jisasr kfo memorm, “Bro Nkifrarhu kingdomfot nhai be tamohtet neftn nyngaye htiyuket. Nhai. ²¹ Nhai turn kingr tohruhattr kfo miruham, ‘Asor nmoh kingr. Asor asha bi tohukatohwor nomn.’ O nhai miruhatm, ‘Bi wusor wusharhof yimamn tohukatohwor.’ Nhai inji htihato kforuhatm. Niko ttiwon ttiwoneft Bro Nkifrar nhai wom fitha king tohkahr. Tor bi nikmoh yima yuhumn Bro Nkifrarhu kingdomfot tohhato kak hta bohtewurko.”

²² Jisasr kekutnihato turhu disaiperm kfo memorm, “Niko kto Bro Najomr hti hambraf thoft to inji kfo mirahko, ‘To finji tfit htiyakruhanomr yawihna thombat?’ To nhai.

Nhai htイヤクルハトコム。ミラヒコ ヨイマム クフヨク モロクフォム アワニ ヤキオノム。ヨイマム カンゴムコ、‘オ ノム ガリ ハソモ ジサスル ツビ ニダハ ノム クミット ミフナーハ、オ ツビ ニム クミット、オ ウスル ニダル クミット。’ミラヒコ ワニ ヤキオニハト アメニヨム、‘エ、ウワ、アフ ノム クミット ヨハト ヒタラヒノム。ビ ニア ミフリ。’ヒツワコムト フヌル ヨンヒ ヴォンバット。フヌル ツレフム ヤムボヒリトナ ヴォンバット ナヒ ラパ ツキツ ヒタラヒム。クミ クミム ハチ ブギュウム。ナ ブロ ナジョマ ツフィ ヤウヒナ ヴォンバット ツビ クミ クミム ハチヤカラム。’ナヒ ベ バンブリ、アフ バークオフパム ナ ブロ ナジョマ アフ ツカハル クミ シホフム ヴォム ヴォム クルホパム ヒハト ハニジボル-ナラハム ナ クフヨク モロクフォム。ナヒ ワニ ヤキオルホトマ。

²⁶ ノアル ハトドヒ ワヌクワコム。ノム ヨハルホ ヨイマム ナモ カンジョ ブロ ナジョム ヤウヒナ ヴォンバット ツビ ナ モモ バムモ ハソラム ヨイマム。ノアル ヨハ ツビ ナモ ヨイマム。ロム ベ ヌワ ヨ モモ バムモ ハソ、ヨ チハ ヤク、ノム ネフリパム ベ ナ ハソモム、ナヒ ヴォム テモ デュケフム リュルモム。ベ ツビ フオ ニュガム カンジョ モモ ハセツム ノア リフハル シフト フクネモム。ビ ヨロ シフト ツオヘツム ブロ ハヌツ ニアモト。ノム ヴォム ノム ブロ ハヌツ ノ パトコ ワイタモム。’²⁷ ロトル ハトドヒ ニハフト ツビ ツビ。ロトル ヨハ ツオモ ヨイマム ニハフ ベ ノム テロウ ヌワ ヨ モモエフ ヨ モムボ ワスカム ヤク ツクナヘフム、ヨ ミスル ハングルナ、クニ ハングルナ、ノム ノム デカ ハソモム ナヒ ヴォム デュケフム デカルモム。’²⁸ ロトル ノム クミ ソドム ハタニモル、ビ ベ カハ リフヒ ハシ リフヒ ハシ マントコ ワユオニナモハト ノム クミ ソドム ハテ ヤンダリ ブガム ナヒ リュルモム。ベ チハ クミ ソドム ミクル バティニハト ベ ツウンパム リュルモム。’²⁹ ナ ヤウヒナ ヨハ ベ ノム ラハテツ ニフ リュラハト。

³⁰ To イジ モモ ボムモ ハソラム。ヨマリ ブリハコ ツオ モモ ハソハト ミラハル カ ハンク ハトネ ワスカム アヤカ。ナヒ。ヨマリ ミスル ツオ ハソユク ツビ ナラハル。ミラハル、‘ツフィ ハンク ハトニ ハニ ワスカム ヤクルハ。’ツビ ナヒ。’³¹ ニコ ワデカ ハイツワコム ノム ロトル ハテ ヤクモ ニフ。’³² フィト ヨマリ ツル ヨマ ユウル ハスケフム モンド ハテウル ハト ノム ヨマハ ヤフオハ フアソ ツキツ ヤラハ。フィト ヨマリ ブロ ナキフリ ハスケフム モンド ハテウル ノム ヨマハ ヤフオハ ハト ル マルニヤラハ。

³³ ナ クフイワコ、ミコハタ、‘ナ ブロ ナジョマ ヨイフン アネヤ、’ベ ヒタラヒコ ハス サウホフ ツキツ ハウ ハセツ、ブロ ナキフリ ロフ ヴォム オ ヴォム ヤクニラハ。メット フカニル ヤンダリ チハ シノハ ツキツ フラハム ハソラム。ヨンダリ フカニル メット チハ シノハ ツキツ フラハム ハソラム。’³⁴ ハス メツ ブレッパ ハングルナユク プラウ-パム ハングルナ ハソラフ、ブロ ナキフリ ヴォム ヤクルハル ヴォム リュラハト。’³⁵ ハス ヨマフ ミスル ツオ ハソラフ、ブロ ナキフリ ヴォム ヤクルハル ヴォム リュラハル。’³⁶ ヨマスル ヨマハ ヤクルハル ヴォム リュラハル。’³⁷ ジサスル イジ クフ ナハス ブガニモト ツウ ハク ハツモア ヨマリ シニヤハト ツツイ モモリ、‘ブロ ヨマヘ、ノム ノム ナ クフイワ フィハ リュルハタム ハチラハナム？’ジサスル クフ モモリ、‘ホグ クフ ベ ブドガ ツキツ ハンゴロム ヨリ フィニワム。’

Jasrpno mkfo hatohmoa metthu kfo nhombra mrokfot

18

¹ ジサスル クフモム ヨハ ヨハ ブロ ナキフリ ハス クフ ブルタナ ハトヒネフ。ノム ネトラン モモリ、‘ヴォム クフ ナホン モロクフォト アフコカハ ヨマ ユヒム ヤクハム。ヤクルハム ナヒ フフヒルタラハム クフ ブルタナネフ。’² ノム クフ ナホン モロクフォト クフ モモリ、‘ヴォム ブロ ツアント ヴォム ジアス ツオムラ。ノム ジアス ナヒ ブロ デカ ヤンハフ ハニルモア。ヨ ヨマム テモ モロク フム ナイネフ ナヒ ユドバト ワニヘルモアム。ナヒ マリモア、‘アフ リュハト ワニ ヤキトヒルハナム。’³ ヴォム メット デヒ ヨハ ヨハ ナイモアツ ノム ジアス ハス クフ ハトヒ。’⁴ ジアス ノム モロク フム ワニモハト アフ ベ ワニ マルシサ フム。ナヒ マリモア、‘ワニヒルハト モロクフォト。’ツフィ ハト デカモア、‘ブロ ナキフリ ナヒ デカ ヤンホ ハニコハナ。ヨ ヨマロ モロク フム ハニユク ナヒ ワニ ヤキトヒルハコハナム。’⁵ ノム メット ナ マプタ ハトヒ ハトヒ ハトヒネフ。’

⁶ ジサスル モモリ、‘ツオ ツフィ アフ ワニヨコ。ノム ジアス ナモネフ ロト イジ ナモ。’⁷ ノム イジ デカエ ブロ ナキフリ？ ブロ ナキフリ ノム ヨイフン マル ヨハ ヨハ マナク ハトヒネフ ハトヒ ハトヒ。’⁸ ナ フカ ブロ ナジョム ヤウヒナ ハル。

yiha krhopam rhu thombat, nd yiha Bro Nkifrar kfo bruttna hasetm, ka toh bmtaruhamn Bro Nkifrar kfo bruttna yakitoh hanyrahme, ka nd krhopampno Bro Nkifrar myafho thunirahmr?”

Hus yimaf kfo bruttnamo yuhathu kfo nhombra mrokfeft

⁹ Wom yimam kangm, “Nom tu dborioh yimayenom. Nom nhai ndur ndar yimam kanjo fasoh fasoh nefm nakahnom.” Ndhtet kfoyet yimam Jisasr wom kfo nhombra mrokfot kfo memor, ¹⁰ “Wom hus yimaf memof, ‘Akfo bruttnano.’ Womr Farisir, womr takis marut yakmoa yimar. ¹¹ Bro Nkifrarhu temperr yimofn wom Farisir turpar rim tohhato kfo bruttna memor, ‘Bro Nkifraye wahtina. Na nhai ndu ndar yimam newa nefm kanjo na fasoh nefm nakaha. Rom be tu fasoh nefm newum. Rikohwom, kfo nhehwom, ramet tuhanmpno kitwom.’ Tfit takis marut yakyuk yimarn tfit rikfo memor, ‘Na nhai nd takis marut yekwa yimar newa nefm kanjo fasoh nefm nakaha. ¹² Rpa rpa wikhm hus marf nuwa kurhato be kfo bruttna-nefrpat korhwa. Tamoh tamohm rpa wikh yakyukm, 10-pela rmonetm htewoyanm tenyuk rmonett Bro Nkifrarhu yufatn htafahuka.’ Nd Farisir inji inji kfo bruttanamor. ¹³ Ror kfo bruttnanimotr tfit ndwom takis marut yakmoa yimarde ror be nnndo tohhato nhai mfhat yura kasinyahato kfo bruttnarmor. Turduka memor, ‘Na nhai dborioh yimayann yura yukatoh yindhorhato kfo bruttnarhoya.’ Ndnetrn be tariobtahato turhu mond fur hanyhato kfo bruttna memor, ‘O Bro Nkifraye, na be tu fasoh yimaya. Wahti yuhuwafna.’ Takis marut yakmoa yimar ror be injirpa kfo bruttnamor.”

¹⁴ Jisasr nd hus yimafhu mrokfom kfo pthanihato kfo memor, “Na kfiwanko, nd takis marut yakmoa yimar turhu kunyko yimohat rorpamifr hifa yufayetr tohmor. Ndt wawanykomt. Yimar kangr, ‘Tamoh nefm nann bmbri nyngako mtohnihato nann tamoh tamoh nefm atohakahtanm yimam kfo yindhorrahma,’ nd yimar kto Bro Nkifrar yak dbhurakruharr yiro wahtarahrr. Yimar turhu yufat yiro wahtahato yimam nhai kmi kmim yindhorkahmr, nd yimar Bro Nkifrar tfit yura wuhtarahrr.”

Jisasr yonroh nmbuhat kfo pthamor

(Matyu 19.13-15; Mak 10.13-16)

¹⁵ Wom yimam Jisasrpno yonenm hnehato memom, “Jisasr tir htahato kfo bruttnarahr.” Disaiperm inji htihato tfit kfo huttaknimomm nd yon hnayuk yimam.

¹⁶ Jisasr wanyaf hanyhato kfo memorm, “Yonenm wahti marsisafokahtkomm nanpno aniam. Mirahko akfo rafonomm. Yimam yon mumenm kanjo yorhwam Bro Nkifrarhu kingdomfot rhurahm. ¹⁷ To afo wawanyko. Yimam nhai yon mumenm kanjo Bro Nkifrarhu kingdom-kfot rhukahm be nhai yiruhatm Bro Nkifrarhu kingdomfot.” Yonroh mrokfot rot inji kfomort.

Wuska kunyet yimar Jisasrpno yihato napthamo yuhat

(Matyu 19.16-30; Mak 10.17-31)

¹⁸ Wom yiha Judaroh bro yimar Jisasrpno yimorn mttiwon memorr, “Hifa tisaye, nane finji narhoyann Bro Nkifrapno toh nkifranirhoya?” ¹⁹ Nd Judaroh bro yimar hifa tisa yufat Jisassr yutamotrr Jisasr wanyhato kfo memorr, “Tamohmpno kfo yamukona, hifa tisa? Nhai wom hifa yimar tohkahr. Bro Nkifrapar dborioher. ²⁰ Nkifra thfa mntwat ni bi wanyete. Kfo kangt, ‘Mirahn ramet tuhantpno arim fnaha, mirahn wanambur sinyahato yima awas furaya, mirahn arikoha, mirahn wom yimar wom mrokfom akfo wokanr, yifammaroh mrokfo wany yakiohato rroh yinhitn rhukfot.’” ²¹ Inji kfo htamotrr tfit nd Judaroh bro yimar sinyahato kfo memor, “Jisase, na yuhre yonenann nd thfa mntwat kfoyuk mrokfom bi rihikakmoyanm. Nhai riyak htaformo-yanm.” ²² Nd yimar inji kfomotrr tfit Jisasr kfo memorr, “Rot hifa nkifra thfa mntwathu mrokfom kakitohwont. Tmift wom nefrpat nhai nakahnt. Nd ni harhuwa wuss yak htatahato wommn wiknakfot. Nd wusspno yakyuk marut yakhato tfit nd wuskapa duha yimann nd marut hekfot. Inji narahn, hefenrko mfro wuss harhu-rahn. Inji nanihato tfit na

nia hikkfot.” ²³ Nd Judaroh bro yimar boknabok wusketrn nd mrokfot wanymohat yima yuhur nhai marnyahato yirmor.

²⁴ Nd yimar inji duka kinyakimohat Jisasr bi htimorr. Htihato kfo memor, “Wahtiko, yimam boknambok wusketm be tu mduka nhiyekwom Bro Nkifrarhu kingdomkfothu fknenineft. ²⁵ Womhtet mong wakuyet fohr kutewumr kamerr. Nd kamerr fkna-nyirfort nahuyuk nirthu muht. To yimar wuss mfro haruhetr, Bro Nkifrarhu kingdomkfothu fknanyineft mduka nhiyakrfor.” ²⁶ Nd yimam, Jisasr pthayuk mrokfom wany yakitohmoam, inji wanyhato tfit kfo memom, “Barenko, nom kangnom ka ndhtet maru kunyet yimamn hifa rhu nmbuhat miyakrahm. To nhai. Ndhtet yimam mthu nhiyakrahm Bro Nkifrarhu kingdomkfothu fknenineft. To nome ndhtet yima furapanom, to nome finji Bro Nkifrarpno yihato mtob nkifra-niruhanom?” ²⁷ Jisasr kfo memorm, “Niko yimakomm tamoh tamoh nefroh finjinaneft mduka nhiyekwoko. Tu Bro Nkifrar nhai duka nhikfot wom tamoh nefroh finji naneft.”

²⁸ Tfit Pitar mtohnihato kfo memor, “Wahtinnom. Nom ninhu hikneft nmoh tamoh tamohm mong trohhato ni mhikaknamonom.” ²⁹ Jisasr memor, “Na kfo mif mifwanko, yimam Bro Nkifrarhu kingdomkphot rhuneft dukahato rroh kunym, yon tuhanm, yifa mndarm htanymm, ³⁰ nd yimam ndar bbinysoft toh thombat Bro Nkifrar wuskam hta hmbrirahrm. Bro Najomrhu niayuk yiharn Bro Nkifrarpno toh nkifranirahm.”

Husfirpehyuk mrokfot Jisasr kfo memor, “Nohaforhoyann tfit sinyaruha.”
(Matyu 20.17-19; Mak 10.32-34)

³¹ Jisasr turhu 12-pela disaiperm yakhato turpathato kfo memorm, “Niko bi wawanyko. Nom Jerusalemko yitohat niko mirahko ka nhai wom nefm rhuruhatm. Nhai. Na Bro Najoma ndko nohruha. Bingot bi profetmn Bro Najomrhu noh yuhat kfo httamotmt ndnettn fipett rhuraht. ³² Turhu kmi thofmn hndhnaruhatmr wom yima tangimn kuninfar wuna kfo hutatpno kfo hutatpno yenyohrahmr. Tfit wifm miyaknihato nde nde ye gurahmr. ³³ Nohhato hus marf rhunihato husfirpehyukrpno tfit sinyarahr.” ³⁴ Jisasr nd mrokfot inji kfomohat turhu disaiperm fak mmomomt ror inji kfomohat. Nhai yakrmomt ror kfomo mrokfothu yimbu yuhat. Rom memom ka frohmn kfiwur?

Jisasr yak marnyamo nyanga kunyjetr
(Matyu 20.29-34; Mak 10.46-52)

³⁵ Jisasr nd Jerusalemko yiyet yihotat yi yimorn Jerikot mfnahmor. Nd kmit wom nyanga kunyjet yimar yihota yifembtn rhumoarn yihotat yihom yauni myauniyukm maruham tndaumourm. ³⁶ Jisasrpno yau hanyhato ptha kimr hofhta hnamo yimaroh ptha kimr hofhta tngm wanyak hanyhato ttiwonmor, “Ndm tamohtpno ptha kimr hnewam?” ³⁷ Kfo memomr, “Nasaret thof Jisasrpno ptha kimr hnewum.” ³⁸ Nd nyanga kunyjet yimar inji wanyhato naku memor, “Defitrhu tangishof Jisase, wayuhuwafna!”* ³⁹ Inji kfo nakumotr nyangako tohak hanymo yimam kfo thfamomr. Ror, nd nyanga kunyjetr, nhai rroh mrokfom wany yakiohato naku tmbhormor. Tfit wompam mfro memor, “Defitrhu tangishofe, wayuhuwafna!” ⁴⁰ Jisasr be wanyhato mtohmor. Mtohhato kfo memor, “Wahnakomr nd na nakuta yimar.” Hnamotmr Jisasr ttiwonmorr, ⁴¹ “Wurene, tamohmn nakuna?” Nd nyanga kunyjet yimar kfo memor, “Broye, kanga nyngam wayak marnyakahtna ayukatoha.” ⁴² Inji kfomotr Jisasr memor, “Wayukatohn. Nanhu nia mrokfot ni wanuhat ninhu bro dukeft nann htahato nakuna. Ndnettn ninhu nyngam marnyarahmn.” ⁴³ Be nd yimarhu nyngam nhai wom kuknarmomr. Yudbat fukatoh dbtaku-morm. Nd nyngam marnyamotmr yindhoreftpno Jisasr fau hikakni twanhomor. Yimam ndt htihato rom Bro Nkifrar kfo yindhormomr.

Jisasr Sakiusrhu kunys yimor

* 18:38: Judam rroh hbhar futamomr “Defitrhu tangishofr.”

19

¹ Jisasr yau hanyhato Jerikot mfnahmor. ² Nd kmitn tohmor takis yakyuk yimaroh bro yimar. Rorhu yufat Sakiusr. Nd yimar be tu masat marut harhumor. ³ Jisasr nd kmi Jeriko taun yihotat yau hanyetrn nd yima Sakiusr memour, “Afo htiafoya Jisasru ruheft.” Nd dukefetrn memour, “Ahtianr,” to nhai, kkopenparn nhai htirmoarr. Bok yimam toh dbu hmbrimoatmr nhimour htineft. ⁴ Ndnetrn nyinga yuhako bi tonemorn mis muhmor. Memor, “Mis muhhato be Jisasr yau hna thoft htiruhanr.” ⁵ Be Sakiusr, ror mis muhhato fukatoh hasomor. Jisasr nd yima rifhurpno nia niamomn nd Sakiusr rhumo tkittn Jisasr mtohhato wuhtimorr Sakiusr. Wuhtihato kfo memor, “Sakius, yudbat wamifnahna. Na href ninhu kunys newa.” ⁶ Sakiusr yudbat wayoh tfha thumorn Jisasr mikfo yindhoraknehato kunyko hanymorr. ⁷ Jisasr nd Sakiusrhu kunys yimotr womm tum rinakfo nakfo memom, “Jisasr tamohmpno nd fasoh net yimarhu kunys yitar?”

⁸ Sakius Jisasrof kunys rhuhato wom Sakiusr wasinyahato kfo memor, “Nanhu Broye afo wawanyn. Na arihat yakyuk wuskam yak nhta hakuruhanm. Yak nhtahato wom wuskam nd sfnoh wuska duhat yimamn he hakuruha. Wom yimaroh wuskam o tamohm yuwi kfo nhehhato yak hanymom be tfit husfishas hi hanryuhanm.” ⁹ Jisasr memorr, “Nda yimar Abrahamrhu wany yakioneft kanjo inji netrn, Bro Nkifrar fak miyekrm nda kuny shofm. ¹⁰ Bro Najomr niamohat bi nd nkiranimo yimaroh yak hambrakneftn niamor.”

*10-pela hingrna yimam maruha yakmo yuhathu mrokfeft
(Matyu 25.14-30)*

¹¹ Jisasr pthamohat yimam wany yikitohmoum. Bi brbo brbo Jerusa-lemrpno toh hanyetmn Jisasrpno yiyuk yimam be duka memoum, “Nom href finji htitwanom Bro Nkifrarhu kingdomkphot?” Ndnetrn wom kfo nhombra mrokfot kfomort. ¹² Kfo memor, “Wom bro yimar tohmor. Memor, ‘Wom kmit yirhoyann king yufat hiyafrihotma tfit tukanhuko nierhoyann tohukatohruhant.’ ¹³ Yi yibonneftpno afo turhu 10-pela hingrna yimam nakuyakmormn 20 kina 20 kina htany hany hemorm. Memorm, ‘Nd 20 kinakfot rpa rpa yimako yikitohhato nd 20 kinakfot wom yihotamn htahato yak huta maruhat yakkfot. Mirahko arhu furat. Na tfit nierhoyann htiruha.’

¹⁴ Be inji yak hta tany hehato yimor. Rorhu mongkorn wom yimam tohmom. Memom, ‘Wom kmi thofm mkfo mirahnomm, “Mirahko king yufat ahenomr. Nom nhai wofnkahnomm ror nmoh king tohneft.”’ ¹⁵ To nhai, nd yimar king yufat miyakmorn tfit niamor. Niahato nd maruhah htany hemo yimam nakumorm.

¹⁶ Barkof yimar niamorn mkfo memorr, ‘Bro yimaye, ni nd htanymo 20 kinakfothu yak huta maruhat asot 200 kinakfoyet.’ ¹⁷ Nd bro yimar inji htihato kfo memorr, ‘Ni tu hifa hingrna yimaye, hingrna marnyamo. Ndnatn 10-pela taunkfot ninn toh-yukatohrahnm.’

¹⁸ Yo tfit wom hingrna yimar niamor. Ror niahato mkfo memor, ‘Bro yimaye, nd ni htanyhemo 20 kinakfothu 100 kinakfot asot.’ ¹⁹ Kingr inji htihato kfo memorr, ‘Ni tirfa kmim watoh yukatohtwa.’ ²⁰ Tfit wom hingrna yimar niamorn mkfo memor, ‘Bro yimaye, ni htanyhemo 20 kinakfot asot, tfit hnahuhan. Be hopttn rmontha nmbuhaye kitawonmoyanmn htatamoyanm.’ ²¹ Namburet yimann fakrmemoya memoya, “Tubatu-ruhanm niahato kforahna.” Htitwann womm htatayuk wuskam ni be myaknitwonm. Womm nuhtayuk yewurim ni be tunhu fijo myakni furewunm. Nd nefm bi htietann fakrmemoyann.’

²² Kingr kfo memorr, ‘Ni tu be fasoh hingrna yimaye. Ni to inji hti nhombramohat ²³ to mermo, “Be benktn ahtakahtant nd 20 kinakfot,” tfit tuka mfnahhato yak huta maruhampno yakrfoyanm.’ ²⁴ Nd toh rifinymo yimam kfo memorm, ‘Nd 20 kinakfot wayak hutfakkahkomr, nd 200 kinayet yimarn wariheko.’ ²⁵ Kfo memom, ‘To bro yimaye, nd ni kfiwa yimar, ror bi 200 kinayeter. Tamohmpno tfit yamuka wom fam wahekomr?’

²⁶ Nd bro yimar inji wanyhato kfo memor, ‘Wawanyko. Yimar wom wuskam o tamohm kakitohwor, nd yimar tfit wom nfri wuskam hehutaruhanr. Yimar be tu sfnoh mifr korhr,

nd yimar nhai hehutarhotanr. Nd ror yakitohyuk wuskenm tfit yakhutfakruhanr. ²⁷ Nd yimam na tone hikhato kfo memo, “Nom wofnkahnom ror king tohneft,” nd yimam na kfiwa asha wahnekah-komm nanhu nyingahato watmb-hokomm.’”

²⁸ Jisasr nd kfo nhombra mrokfot kfo ptha buganihato be tfit Jerusalemko yimor. Turn nyinga yuhat.

Jisasr Jerusalemr mfnahhato Bro Nkifrarhu temperrn rifinyhato Bro Nkifrarhu mrokfom kfo ptha nuhasmo yuhat

(Sapta 19.29–21.38)

Jisasr kingr kanjo Jerusalemt mfnahmo yuhat

(Matyu 21.1-11; Mak 11.1-11; Jon 12.12-19)

²⁹ Yihato Olifet kmi yihofr yorhwu kmi Betfageti Betanit mfnahmom. Ndha mhtahato hus disaiperf kfo tkurur memorf, ³⁰ “Ndu riyorhwa kmitio wai hanykahfn htirahfnr wom donkiyenr mispno natifatayetr. Nd donkiyenr nhai yimam tafi rhuhato hatoner-momr. Nd donkiyenr wayak nyusakaknetwafn. ³¹ Yekwatfnr yimam ttiwon kangmf, ‘Tamohmpno yaknitafnr?’ wakfo wamitwafnm, ‘Bro Nungothetr hingrgefetrn kfefitrno kakni yahukanonr.’”

³²⁻³⁴ Be nd hus yimaf yimof. Yihato be nd Jisasr kfomo mrokfom hti nhombra bugamofm. Donkiyenr htimoerf mispno natifatayetr. Memof, “Anyusakak hanynonr,” donki tikatm ttiwon memomf, “Tamohmpno nd donkiyenr thu nyusakaknitafnr?” Memofm, “Bror kfefitrno kakni yahukanonr.”

³⁵ Be nd donkir nyusakaknihato hanyhemofr. Jisasrpno mhtahato tufhu rmontham yakmofmn donkirhu mongtn rhuyuk tkitt htamofm. Htani-hato fak tkaftamofr Jisasr mrhumor. ³⁶ Be mrhuhato yimor. Yimam Jisasr htiyahato yuke hmbresham yakmoamn ror yiyuk yihotatn htak hanymoatm be nd hmbreshamn yura fau fnahmor. ³⁷ Be yimorn bi brbo toh hanymor Jerusalemtano Olifet kmi yuhat yau htafmort Jerusalem yuhat riwitamor. Nd Jerusalem yuhatn turhu disaiperf wakfo yindhorak kimrmom. Tum be hti hnamo mirakerm dukahato kfo yindhor memom, ³⁸ “Bro Nkifrar ayak marnyatwarr ndar kingr Brorhu yufatpno yitar. Bro Nkifrarhu yufat yura yura amhtamift. Nom ndar bbinysothu met yindarinom rorn yima yuhum yak marnyaruhatr yima yuhum mirhurahmnom.”

³⁹ Jisasrhu disaiperf inji kfo hnamoatm wom Farisim nd rifinymo yimam tohhato kfo memomr, “Tisa, nd ninhu disaiperf wakfonm inji akfo yindhorwahm. Be tmifm akfo ptha tmbhakm.” ⁴⁰ Jisasr memorm nd Farisim, “Tamohmpno yamukako aptha tmbhom? Tahimn tngemt rhuruhamn Bro Nkifrar kfo yindhorrahmr.”

Jisasr Jerusalemt hanurmo yuhat

⁴¹ Jisasr Jerusalemrpno brbo mtob htihato hanurmorr kmir. ⁴² Nur hanyhato kfo memor, “Jerusalem thofko, hifa rhu marnya nmbuhat bi rhu hnamoko, tukomn kfo kurmoko nd hifa rhu nmbuhathu rhuneft. Arihat nhai. Hifa rhu marnya nmbuhathu yak yuhat bi rinnfakmot. Nhai tfit hifa rhuruhatko. ⁴³⁻⁴⁴ Yahr kmim nieruhamn ye batirahmko. Nd Jerusalem gna habrimo tahi gnam, yahr kmim nianeft nhai happukruhatm nd kmi gnat mtohnihato kmit mitoh-nineft. Rom yahr yinyeft bbpam yakhato tou yeny hamuhhato nd yuhatn mitohnihato kmit wifor hmbrenihato kmi Jerusalem thofm ye batii witarahmm. Jerusalem thofm Bro Nkifrar mong htamo yuhatn ye batii witarahmm.”

Jisasr nd temperr maket htayuk yimam yak thumo yuhat

(Matyu 21.12-17; Mak 11.15-19; Jon 2.13-22)

⁴⁵ Jisasr yimorn Bro Nkifrarhu temperr gna habrimo gnathu yifhatikt rim fnahnimor. Rim fnahnihato rim htimorm wom yimam nungam, sisifm, bulmakaum, nd ndm maketmouumm yiro Bro Nkifrarhu temperrn. Jisasr rim htihato hik tubatuhato nd maket htayuk tkm nembos tubatumorm. ⁴⁶ Yak thunihato kfo memorm, “Bro Nkifrarhu rfa

borngt kfo kangt, ‘Nanhu temperr nanhu kfo bruttnayuk kunyr rhurahr.’ Tfit nikomm kangko rikoh yimaro yi kafrohyuk kunyr arhur.”

⁴⁷ Yiha yiha Jisasr nd temperrn met yindarim kfo nuhas bonuhasmourn mrokfom. Prisroh bro yimam yo boririfhuthu tisam yo Judaroh bro yimam Jisasr hingrnamo hingrneft htihato rpak rhuhato memom, “Wom yiha yuwi kfo nhehakhato was-rahnomr.”

⁴⁸ Inji dukahato memoum, “Kfo nhehakhato awasnomr,” to nhai, met yindarim, rom nhai rroh yima yuhurn rhurmom. Rom Jisasr pthamo mrokfom wany wofnhato yiha yiha yihato wany yakitohmoumr ror pthamoahat.

Jisasr bro yufat yakmo yuhat kfo ttiwonmomr

(Matyu 21.23-27; Mak 11.27-33)

20

¹ Wom yiha rmon kmifarn met yindarim rifinymotm Jisasr Bro Nkifrarhu gutnius mrokfot kfo ptha nuhasmorm. Kfo nuhas hasetrn pris hingrneft tohyuk yimaro bro yimam yo boririfhuthu tisam yo wom bro yimam fau yukatohaknimomr. ² Brbo yihato Jisasr mkfo ttiwon memomr, “Frohmn ndhtet bbuka rifhur hemom? Frohmn bbuka rifhur hehato kfo memomn inji wanatwa?” ³ Tfit Jisasr sinyahato kfo memorm, “To tawo wakfo nuhaskoma. ⁴ Jonr yimam baftaisimmoahate tu Bro Nkifrarn kfomotrr ndhtet hingrneft hingrnabout o be yima mifm kfomotmr yimam baftaisimmourm?” ⁵ Rom inji wanyhato tfit tum nnakfo memom, “Nom sinyahato kfo mirahnomr, ‘Bro Nkifrarn kfomotrr hingrnabout,’ to tfit mirahr, ‘To tamohmpno wany yakio duha yirmokomr?’”

⁶ Jonr pthamo mrokfom profetm kanjo pthamoatrm yimam wanymoumm, tfit nom kfo mirahnom, ‘Yimaro kfotpno kfo pthamour,’ to be yimam tahiye tahiye yenyo-rahmnom.” ⁷ Be myak nhtaktiyakhato be kfo memomr, “Nom nhai tawisaf-kahnom.”

⁸ Rom inji kfomotm tfit Jisasr kfo memorm, “Na to inji. Na nhai kfo nuhaswotanko na hingrnewa hingrnefthu bbukeft yakmo yuhat.”

Wain swirt tohukatohmo yima bebroh kfo nhombra mrokfot

(Matyu 21.33-46; Mak 12.1-12)

⁹ Jisasr tfit wom kfo nhombra mrokfot yakhato nd met yindarim kfo memorm, “Wom yimar wain swirt htamor. Nd wain swirt be htahato tfit womroh tirmn htanyhato ror yimor wom kmit. Wom kmit yihato ndha tohngotmor. ¹⁰ Kto nd wain swirt yukha hirmott yukha yak yiharn nd tu wain swir tikatr turhu hingrna yimar kfo tkrurafmorr nd wain swirt yakitoh hasoyuk yimampno. Kfo tkruraf memorm, ‘Waikahnn nanhu yufathu htahayuk yukham wamiyakhina.’ Nd yimar inji kfo tkrurafmotrr yimor. Yihato nd mswirt tohukatoh hasoyuk yimam tabotafmotmr be sfnopa tfit yimor. ¹¹ Nd wain swir tikatr htiyaktihato tfit wom yimar kfo tkrurafmorr. Yihato nd wain swir yakitohyuk yimam fasoh fasoh kfo huta bohutahato tabotafmotmr be sfnopa tfit yimor. ¹² Tfit womr kfo tkrurafmorr. Ror nhaf inji buga. Tat beb bobeb thuhakhato memomr, ‘Wuri wain.’ ¹³ Be nd wuroh yimar inji nafmotmr memor, ‘Be tfit finji narhoya? To frohmn tfit yiruham?’ Be dukatihato memor, ‘Nhai mrokfom, tukanhu mondtpno mfurwa yonrn yirahr. Ror yiruhatr afo htiruha wany yakiorahmre nhai?’ ¹⁴ Be nd yonr tkrurafmotrr yimor. Yimorn wain swirt tohyuk yimam htiyakhato tum rinnakfo nakfo memom, ‘Ndarr turhu yonr nier. Yifemr nohnineft to nd yonrn tkitt yakhato ndar wain swirt rorn yakrahrt. Finji dukewako? Awaskahnomr be nd wain swirt be nmoht rhuraht.’ ¹⁵ Be mrokfot yak dbkafnihato turhu wain swirt toh hasetrn toh rafaknihato fakmomr. Yakhato tirtir yaknimomr nndo rim htahato wasmomr.”

Jisasr inji kfo pthanihato kfo memorm, “Niko to finji dukewako? To nd wain swir tikatr, turhu yonrhu was mrokfot wanynefte to finji naruharm? ¹⁶ Na kfiwanko wain swir tikatr nieruharn nd yimam was hehur thuruham tfit wom nndoh tkitthu yimam yakhato yak htarahrm nd swirtn.” Inji kfomotr nd yimam wanyhato kfo memom, “O, mirahr inji anaya.”

¹⁷ Jisasr yukatohmormn kfo memorm, “To tamoh dukeftpno Bro Nkifrarhu rfa borngtn kfo memom,
‘Nd rahur, kamda yimam hti kurhato yak thumor,
be bi tfit nd rahurn bi dany rahur tohwor.’

Sng 118.22

¹⁸ Yimam nd dany rahurpno rim frrbigneft o rahu suhnehato frkar-nyaneft to be nhai wom rhukfot o nfrikfot.”

¹⁹ Nd nd mrokfom pthamotrm nd prisroh bro yimam yo nd boririfhuthu tisam Jisasrpno toh pthamoam, wanyhato kfo memom, “Nd kfo nhombra kfot nomn niewut.” Jisasr pthamo mrokfom rom wanymohat yima yuhumio bi nambur kih bugamomm. Memom, “Ka bi kak twanhiwunomr.” To nhai, yimam htihato afo fakrmemom yakneft.

Sisarhu maruha he yuhat

(Matyu 22.15-22; Mak 12.13-17)

²⁰ Be nd yima yuhurpno yimom. Yihato tfit wom yimam mkfo tkruraf memomm, “Nikomn waikahkomm rorhu mrokfo ptha swirmn yuwi rhu tebfi botebfi htfsaskfot. Yuwi inji rhu tebfi hanyhato yuwi ttiwon rhtikfot. Finji finji kfiwur nd tkittn yakhato kotimrahnomr bro yimampno. Bro lokfot afo htiraht.” ²¹ Be inji kfafmotmm yimom. Yihato fau hik htfsasmoumr. Yau hik htfas hanyhato wom tkitt mrhumotr be rom ndha mrhumom. Yuwi rhu tebfi hanyhato ttiwon rhti memomr, “Tisaye, ni pthewa mrokfom nom hifa wanuk-nomm. Mrokfom hifa hifa kfo hik bohik marnyewanmn Bro Nkifrar hikwa nefm kfo hik nuhas marnyewunm tuhan yindarim. Mrokfom kfo pthi-wohat nhai hti mekahn ndr yufet yimayer o ndr yufa duha yimayer. Nhai. Mrokfom kfo pthaneft be kfo pthewunm. Nhai yimar o yufam htihato kfo pthakahnm.” ²² Inji kfonihato wom ttiwon nmbuhat yuwi ttiwon rhtimomr, “Nome ka Sisarhu takis htahenefte ka htarfome nhai?” ²³ Jisasr rom yuwi inji ttiwon rhtimohat bi fakmorm rroh yima yuhum. ²⁴ Jisasr sinyahato kfo memorm, “Wom tahifat wayak nuhaskoma.” Yakhato fak nuhasmomr. Tfit ttiwonmorm, “To nd tahifat yorhwa nyigatikte frohroh nyigatikti yufat yorhwaf?” Kfo memomr, “Sisarhu nyigatikt korhwott.” ²⁵ Tfit kfo memorm, “Sisarhu nyigatikt korhwott to be tfit Sisarn hekfot. Bro Nkifrarhum nhaf inji. Tu Bro Nkifrarn hekfot.” ²⁶ Rom memom, “Inji attiwonkahtnomr finji kfiwure yakrahnomr.” To nhai, inji kfo wokafmotrm be tuha mrokfo duhatm tohmom.

Sadyusim yimarooh nohnefti sinyaneft Jisasr ttiwonmo yuhat

(Matyu 22.23-33; Mak 12.18-27)

²⁷ Farisim yimotm tfit Sadyusim yimom. Nd Sadyusiroh dukeft duka memoum, “Noh hanita yimam nhai tfit sinyaruhatm.” Rroh dukeft inji rhumout. Nd duketpno Sadyusim Jisasrpno yihato mkfo memomr, ²⁸ “Tisaye, Mosesrhu boririfhut kfo kangt, wom yimar tuhan yakhato nhai wom yonm kasinya htanirfor, nd rorhu tuhan dhirt tfit wom nmemrn najom dhirt yakhato rorpno yonm nasakhato tfit najomrhu tkitm romn tohkfot. ²⁹ Wom yima najohfitpno to inji rhumot. Nd yima najohfit 7-pela kfot tohmom. Barkof bro najomr tuhan fakmor. Ror tuhan yakmohat nhai yonm nasak htanihato nohrmor. ³⁰⁻³¹ Be nohmotr tuhan dhirt tohmott tfit rorhu wayakrn fakmort tuhan dhirt. Rorpno nhaf to be rpahtet neft. Nhaf nhai wom yonm nasak htanihato nohrmor. Tfit rorhu wayakr fakmort nd tuhan dhirt. Ror yakhato be rpahtet neft. Be inji nahany nahansn 7-pela yima najohfit rhu nhombra bugamotm. ³² Wuroh 7-yukrpnone nohmot. Nhai wom yufat kasinyahermotm. ³³ Nd 7-pela yima najohfit rpa metrpatt rim rhuta mrhutamotm. Kto nd najohfit sinya thoft nd mette fitoh yimarpno tohruhat?” Inji ttiwon rhtimomr.

³⁴ Nd Sadyusim inji kfo pthamotm Jisasr memorm, “Ariharhof yimam nhai rhu furakahm. Tuhanet tuhanet bugam korhm. Metm ramet bugam korhm. ³⁵ Kto tfit Bro Nkifrar kasinya thombat noheh yimam nhai tfit sawohet sawohet toh hanyruhatm. Nd tuhan yakneft arihat ndhtet neft korhwot. Kto nhai. ³⁶ Kto ndar thatipt minoh nhehafhato Bro Nkifrar tfit afo thu kasinya thoft be rorhu yonm tohrahm. Be

mounmotroh ruheft kanjo rhurahm. Nhai tfit nohruhatm. ³⁷ Nd thu kasinyaneft Mosesrhu tndht duka hanykfot. Wom yiha Mosesr Bro Nkifrar kahm kanjo mi bufupatn funamotr hti hanymorr. Mosesr kfo nuhas hany memor, ‘Yawer, Abraham, Aisak, Jekofroh Nkifrayer.’ Nhai kfo marimor, ‘Yawer Abraham, Aisak, Jekofrom kfo tatomo Nkifrayer.’ Nhai. Nd mrokfot htihato kfo kangnom, yimam nohnitam nhai noh mifikahm. Thatiprpat nohruhatn tfit sinyaraht. ³⁸ Bro Nkifrarhu nyngaye htitworm yimam nohwam nhai noh mifikahm. Thatiprpat nohwatn mrokfo rifhur korhr. Ndnett Bro Nkifrar yima nfri yafothet yimaroh Nkifrayer. Nhai noheh yimaroh Nkifrar rhukahr.”

³⁹ Bro Nkifrarhu boririfhuthu tisam inji wanyhato kfo memom, “Ni kfiwa mrokfot tu kfo mifwo. Nhai yuwi furakahn.” Be inji yak wokmotrm, ⁴⁰ be ndnat fakrmemom tfit wom ttiwonnefm ttiwonneft.

Frohr miyak htiyakruharnom?

(Matyu 22.41-46; Mak 12.35-37)

⁴¹ Jisasr wom ttiwonkfot ttiwon-morm, memorm, “To tamohmpno kfo yamukam, ‘Yimaroh minrfa htiyakyuk yima Kraisr, Defitrhu frikef yuhathu yimayer?’ ⁴² To windohmo windoh gonborngtn Defitr kfo memor,

‘Bro Yawer kfo memor nantu Bro Nungothetr,

“Nantu bro bbukeft yorhwa tirmifko wamrhun.

⁴³ Wamrhukahtn nd ni namburwa yahr kmim afo ninhu tirtn htahato ninhu mofsinhitn yak htaruhanm.” ^{Sng 110.1}

⁴⁴ To nd yima Kraisr bi Defitr kfo yuta hna memoa, ‘Nantu Bro Nungothetr’ to tfit Defitrhu frikef yuhat nierahr?”

Boririfhuthu tisam fasoh nefm namo yuhat

(Matyu 23.1-36; Mak 12.38-40; Luk 11.37-54)

⁴⁵ Yimam toh wany yakitoh hany-mom turhu disaiper kfo memorm, ⁴⁶ “You, niko! Boririfhuthu tisam nia kusmm frsrfarahmko. Turoh yuke yuke yok tham hmbrehato maket swim rhuyuk yimam yihotam toh hasoyuk yimam kangm, ‘Be nom-rpanom akfo yindhorm.’ Nhai be nyngarpaye htikfot. Fitoh rhu rifiny-hato kfo bruttnayuk rmonm rom nhai mongkorn o kimbohn rhukfot. Tu be nhai mif. Rom tu be nyngako mruhakkfot. Bro yemro ye burwa tkittn nhaf inji. Rom inji yimaroh nyngako mrhu gngonkfot. ⁴⁷ Met dhirpampno yitamn mkfo nheh bonhehhato wuskenm kak rhoptakni yahukmm. Bro Nkifrarhu kfo bruttna-neft htirahnm. Nhai be yudbat kfo tmbhonikahm. Afo kfiwum kfiwum wurohna wurohnamne ptha tmbhek wom. Kangm, ‘Yimam htiru-hamnom mirahm, “Hifa yimayem.”’ Kto Bro Nkifrar finji naneft nd yimamn be tu bro krhopam yakrahm.”

Maruha duha mett Bro Nkifrar maruham hemo yuhat

(Mak 12.41-44)

21

¹ Jisasr yukatoh hasohato htiyakmorm maruha maruhet yimam yi hanymomn Bro Nkifrar maruha htahemoa tkittn marufam mhtanihemoumr. ² Rroh mongkorn wom met dhirpat niamot. Rothu ramemr nohmotr rot turpatt tohmout. Rot nhai tamoh wuskam o tamohm. Rot yimotn wuroh tutu yohript rhuyuk wuroh fsohot marufenf yakmotfn Bro Nkifrar maruha htahemoa tkittn nd marufenf htanihemotr. ³ Jisasr nd mett htanimo marufaf htihato kfo memor, “Na kfo mifwanko, yimam nd htani hany marufam nd metrpat hte marufenfn be tu bro marufaf htes. ⁴ Wom womm htahani marufam, rom maruhetm yak nhtemmn wom fam Bro Nkifrarn hnahehato htahumr. Nd metpatn be tu nhai wom maruhemn. Tu wuroh yohript rhuyuk fsohot marufenf Bro Nkifrarn htahut. Rot nhai wom yeshri wiknayuk maruham wom rhukahmt.”

*Bro Nkifrarhu temperrhu yoh nasoh yuhat Jisasr kfomor
(Matyu 24.1-2; Mak 13.1-2)*

⁵ Jisasrhu wom disaiperm nd Bro Nkifrarhu temperrhu wondhet tahi gnam yo wom wondh wuskan yimam hi hanyhato temperr wondh nhtamom, nd ndm Jisasrhu wom disaiperm htihato kfo ptha srhmoum. Jisasr wanyhato kfo ptha memorm, ⁶ “Ndar niko htita wondhet tahi gnat to mirahko ka rhuraht. Wom yiha yimam niahato kafring witarahmm.”

*Jisasr kfomor bok kurhefm mfnahrahm
(Matyu 24.3-14; Mak 13.3-13)*

⁷ Jisasr inji kfomotr turhu disaiperm tfit ttiwon memomr, “Tisaye, nd ni kfi mrokfot fitoh yihar rhuruhatt hti-ruhanomt? Tamoh neftn yak duka-ruhattnom mirahnom nd yihar bi brbohwor?” ⁸ Jisasr memor, “You niko! Bok yimam niahato mkfo ngeh bonhehrahmk. Nanh yufat yutahato kfo mirahmk, ‘Bbinyosothu bat yihar bi asor bi. Na bi asoya niko gari hasomo yimaya.’ Niko inji wanukko, mirahko yudbat wany yakiohato amhikaknynom. ⁹ Mrokfom wanukwoko kamukm, ‘Bi ndha nnayureft korht,’ mirahko ayakrme difronnom. Ndhtet nefm rom nierahm. To mirahko ka bi nd nefmpno bi brbohwor yihar. Nhai.”

¹⁰ Wom mrokfom kfo ptha memor, “Htirahko yo wanyrahko wom kantri-kfot sinyaruhattin wom kantrikfotpno nnarahf. Wom kingr sinyaruharn wom kingrpno nnarahf.

¹¹ Yo htirahko yonmari yonmari nunem tonirahm. Wom tkitm wanyrahko kfo mirahm nd kmit o kantrikfot yesri duhatm tohwom. Wom kmimm o kantrikfotn kfo mirahm bro dbohneft korht. Yura mountko htirahko nndo nndo rhuraht. Nhai ndar rot yorhwa kanjo hti-ruhatkomt. Yimako nhai bmtaruhatk. Yonmari yonmari yima brom, nanyjaret yimam tfit mikukentarahm.

¹² Nd yutahnenefm mongko rhurahm. Barkoft afo Bro Nkifrar hikwa yimako yak tkaf-taruhamko faso faso yak beb bobebrahmk. Judaroh rhu rifinyuk rmontn hanyruhamko nkifra boririfhut ttiwon hebosuknarahmk. Inji nahato nhai kfo marnyarfoko, kalabus htarahmk. Yo womt, nanhu mrokfot ptharahkomt be kantrikfotu bro yimampno kotim hakuruhatmkot toh hakurahko. ¹³ Nd tkittn nanhu mrokfot nd bro yimam kfo nuhasrahkomm. ¹⁴ Mirahko aduka yanhokahnomn akfo amenyom, ‘Amai, na finji kforhoya?’ Inji duka duha. ¹⁵ Mrokfo rifhur nann thu hmbriruhann. Nd kotimyuk yimam nd heyuk mrokfo rifhur kfo hirahnm, be nhai wom finji ptharuhatm.

¹⁶ Tukmoh garbn yifa mndarm tangiyemrom, nhai miruhatm, ‘Arm nmoh yinemroyem o tangiyemroyem.’ Nhai. Tumn hndhnaruhatmk wasrahmk. ¹⁷ Nann hikruhatko yimam be hti sr thurahmk. Nhai hifa nytingar hta hakuruhatmk. ¹⁸ Nd nd nefm nhombrarahm. To mirahko ka nikmoh womr finji narahr. Nhai. Toh marnyarahko. Nhai wom tmarifern yoh rashato misuhruhatr. ¹⁹ Nd yiha toh bmtekomn fakito bmtekom, be Bro Nkifrar yakrahrko.”

*Jerusalemthu bati yuhat Jisasr kfomor
(Matyu 24.15-21; Mak 13.14-19)*

²⁰ “Be afo wahtiyafo hanyswako. Bi htitwoko yahr kmim niahato Jerusalemr bi wohn hmbrimr, ee wakfo wamitwako, ‘Be ndar kmit be batiraht.’ ²¹ Nd yiha bi inji htitwokomt, brbo Judia distrikto toh hanyuk yimam yura kminyosofko ayakrmanyitwam. Yo yiro kmi Jerusalemt tohyuk yimam afnahkahmn ayakrmanyitwam. Kmi Jerusalemt briahako tohyukm mirahm tfit kmiko arim fnaninom. ²² Nd yiha wukierhu tathur yihayer. Nd nakur yihna yihnamomrn inyar tathurhato wukierhu fkni yihayer. Bro Nkifrarhu mrokfot bro rfa borngtn kfomot, be fipett rhuraht. ²³ Metm yon fanetm yo tefi yon hamboriyetm finji yakrmiruham nd bro krhopam yakakna thombat? Romn tu bro yuhuwafeft korht. Be nd yiha Bro Nkifrarhu namburpam mirahr, finji anayanm yimam, be finji naruham? Be htirahko yahr kmim nieruhamn was frekonirahmm. ²⁴ Wom tangishofm be yakni hanyhato kalabusn htarahmm. Be wom kmimm niahato rroh wuram

yahotrahmt Jerusalem bbinyssoft. Be rom nd bbinyssoft romn yakitoh hanimtn kto bi Bro Nkifrar kfiwur yak tuhafonefte ee btn thu troh tanyrahmt.”

*Bro Najomrhu yawihna yihar
(Matyu 24.29-31; Mak 13.24-27)*

²⁵ Jisasr tfit wom mrokfot kfo memorm, “Nd wonk wonk nefm rhuruha yihar be htirahkomm yamt, marr, gunym be nndo htirahkomm. Nndo rhuruhatm mano bro marombt wanyrahmt kur thbi thombat. Bbinysofthu yimam inji wanyshoft nhai bmtaruhatm. Mirahm nndo tamohmn wuttho yibuknewum? ²⁶ Ndar mounti bbinyssoft rhuruha neftn met yindarim htiruhamn nyingam mmrifrahmm. Mount thu habokknamo yifonm mirahm nndo ginunes kekwotm. ²⁷ Ndtpno ee btn Bro Najomr htiyakrahmr gribpamn hawihnerahmr. Ror yawihna thombat turhu bbuka rifhur yo ror hatoh hneruha nukeft mirahm nndo marrn yifa toh hnewur. Inji htiyakrahmr. ²⁸ Bi barkof nefm htitwokomm mekfot bi brbohwot Brorhu yimaroh miyak htiyak yihar. Yimbhindangm bi tohetohaf hanykfot.”

*Kutr hti hikkfot
(Matyu 24.32-35; Mak 13.28-31)*

²⁹ Jisasr hnu wormrhu kfo nhombra mrokfot kfomorm, memorm, “Kutr htitwonomr, ³⁰ twam huktewum kfo kangnom kut yinr tohrahr. ³¹ Be tfit rpahtet dukeft dukakfot. Bi nd na kfiwa nefm mountn o bbinysoftn htitwonomm, kfo mekfot, yimam Bro Nkifrarhu kingdomkot rhuneft bi brbohwot.

³² To nd nefm rhu thoft to mirahko arihat tohwa yimam bi nohetmn nd neft rhuraht. Nhai. Arihat tohwa yimam yuhre tohetmn nd neft htirahmt. ³³ Nd neft rhuneft htirahko mounti bbinyssoft mibatinirahf. Nanhу mrokforpat nhai mibatiniruhatt.”

Jisasrhu disaiperm yimbhindangm tohetohaf haryswamm

³⁴ Tfit Jisasr memorm, “Niko yimbhindangm tohetohaf hanykfot. Mirahko bia bupam yewa yimam kanjo ye mmokahnomm foym kanjo yatiyefm dukahato mfhat bbinysoftn tariobttakfot. Ndrpat duka hasoruha-komn Brorhu nia yihar be sinya fohtasrahko. ³⁵ Wukier kanjo foym nakur ye mmo hany ye mmo hanyhato wuroh inyar yihom tathurahfato wukier yohnita kanjo be inji sinya fohtashato yiro wukiern fkne bugarahko ndar bbinysofthu yima bugako. ³⁶ Yiha yiha yimbhindangm tohetohaf hanyhato be kfo bruttnanefrpat yakinohkfat. Yiha yiha kfo bruttnakfot. Kfo bruttnahato toh bmtaruhakomn Bro Najomr kotkfot yakinohkfat be mrokfo duhatko rhurahko.”

³⁷ Mar yiham Jisasr Bro Nkifrarhu temperr yimoarn met yindarim kfo nuhas bonuhas-mourm Bro Nkifrarhu mrokfot. Yifung yiham yura Olifet kminysofthu kunys muhmoarn hwemour. ³⁸ Met yindari bugam turoh kmim hwe tanymoamn dbha Bro Nkifrarhu temperr yimoamn Jisasr pthayuk mrokfom wany yakinohmoumm.

Jisasr krhopam yakhato nohmor. Minohafhato tfit sinyamor.

*Judas dukamor Jisasrhu hndhnayuk yuhat
(Matyu 26.1-5; 26.14-16; Mak 14.1-2; 14.10-11; Jon 11.45-53)*

¹ Yispa hta duha bretparoh ye yihar, kutewumr Pasofa burwat,* nd yihar bi yibon hanymor. ² Prisroh bro yimam yo nkifra boririfhuthu tisam kmi thofm yakrmihato memom, “Jisasr be was kafrohrahnomr.”

³ Tu Jisasrhu disaiper Judas Iskariotrn Satanr fknemorr. ⁴ Satanr fknemotrr yimor prisroh bro yimami temperr tohukatohyuk hingrna yimampno. Yihato memorm, “Inji

* 22:1: Isrerm Ijift tohhato Bro Nkifrar miyak htiyakmo yihar kutamoumr Pasofa burwat, nd yihar rhu rifinyhato tfit kedukamoumr Isrerm Ijift htanymohat.

inji hndhnaruhanr.” ⁵⁻⁶ Inji kfomotr maru gondt hemomr. Hemotmr Judasr yihato dukamor hndhnayuk yuham.

Jisasru hus disaiperf yeshrim hta mskamo yuhat
(Matyu 26.17-25; Mak 14.12-21; Jon 13.21-30)

⁷ Be rhumomn nd yispa hta duha bretpam yeyuk yiharoh barkof yihar niamor. Nd yispa hta duha bretpam yamo barkof yiharn Pasofa sifsifr washato ndr tarior mthamoum. ⁸ Pita Jonrof Jisasr kfo tkruraf memorf, “Nifn bi wai hanykahfn ndar bro yihar rhuyuk yiha yeyuk yeshrim wamhta mskahanywafnm.” ⁹ Tfit rof ttiwon memorf, “Nd Pasofa burwat rhu thombat, nome yeshrim fitha hta mskaruhatnom ni rhuhato ye juka-ruhant?” ¹⁰ Inji ttiwonmotfr kfo memorf, “Waikahfnn kmi yifhatiktn wom yimar burioh roht titetrpno mnafurrahko. To be mirahfn finji ainyo. Rorn wayau hikaknitwafn. Ror fitoh kunys kitwor, nifn nd kunys yikfot. ¹¹ Fknenihato nd kuny sikatr wakfo wamitwafnr, ‘Tisar kfo famur, “Waikahfnn nd kuny shofr ayak nuhastwarfni nani nanhu disaipermpno Pasofa burwa yeyuk tkitt.” ¹² Inji wakfo ttiwonkahtfn yurakorhof rumt yak nuhasrahrfn. Nd rumtn mhtirahfnm tebor gaj nd ndm. Ndharn wahta mskatwafn. Nom nierahnom.” ¹³ Be rof yimofn nd Jisasr kfomo yimar kmi yifhatiktn mhtimofr. Ror yimo kunys yimof. Nd nd nefm be Jisasr kfomo tng yuhatn hti bugamofm. Be ndharn rhuhato hta mskamofm nd bro yiha yeyuk yeshrim.

Jisasr disaiperm bretpa, wain bupa hemo yuhat
(Matyu 26.26-30; Mak 14.22-26; 1 Korin 11.23-25)

¹⁴ Pasofa burwa ye yiharn Jisasri aposerm yihato rpa tebort rpat mrhumom. ¹⁵ Mrhu bugamotm Jisasr memorf, “Na wofn mifwa nda wuroh bro yihar nikompno rhuhato wuroh yeshrim yehato krhopam yakneft. ¹⁶ Wuroht yenyhokahanko kto be nhai. Afo toh hanyrhoyann htiruha bi Bro Nkifrar king tohneft bi rorn king tohhato rorhu kingdomkfot toh-yukatohwort ee btn Pasofa burwa mift rpatn yerahnom.”

¹⁷ Jisasr inji kfonihato bu kaft yakmortn Bro Nkifranko wukfo yindhornihato kfo memor, “Nda wain bu kaft wayakkahkomtn wanahe habriko. ¹⁸ Na kfo mifwanko, na nhai tfit wom wain bupam yerhota. Bro Nkifrarhu kingdomforpatn tohhato ee btn nfri wain bupam tfit yerotha.” ¹⁹ Tfit bretpat yakmortn nhaf Bro Nkifrar wukfo yindhornimorr yak tif botifhato he nhombramorm tifen tifen. He nhombranihato kfo memorf, “Nd bret tifm wayakkomm. Ndm nanhu nmpayem. Nanhu thatipt niko duka-hato Bro Nkifrarn heshombat inji yoh nembosingoraht. Yekahkomm duka hanyrahkma.” ²⁰ Nd nuwa yesrufnihato tfit nfri wain bupa tas hmbrihato barkof namo kanjo inji namor. Nanihato kfo memor, “Ndar wain bu kaft tfit niko yekwat nd nfri dfa tik yuhar hingrnaruha hingrneft. Kto na nohhato nanhu kkut yohni thombat nd kkupamn nd nfri hingrneft be yak dbkafrahtt. Be tawo nd nfri hingrneft wahiktawo. ²¹ Wawanyko. Wom yimar tor nhowi nompno kawor. Rorn hndhnarahra. ²² Bro Nkifrar kfomo yuhatn Bro Najomr kangr, inji nadborneft nhai mrokfom. To be Bro Nkifrar tutfarahrr nd hndhnayuk yimar.” ²³ Tu Jisasru disaiperm inji wanyhato tum rinahti nahtihato nattiwon nattiwonmom, “Barenko niko wakfoko, frohrn kfiwar? Frohm inji naruhamr?”

Jisasru disaiperm bro yufat yakneft rinakfo nakfomo yuhat

²⁴ Jisasru disaiperm tum rinakfo nakfomoum bro yufathu yakneft. Womr sinyahato memour, “Nann bro yufat hatohruha.” Tfit womrn, “Weye, nann hatohruhant.” Tfit womr memour, “We, rorn.” Inji rinatu natumoum. ²⁵ Jisasr wanyahato kfo memor, “Niko ndar rinatu natutako afo wawanyko. Wom wom yima tangi furaroh kingm nhai tohukatoh marnyakahm. Rroh womr king tohneft, nhai ror wom yima furarhu mrokfeft o dukeft wanyhato hikkfot. Rorpar finji finji kfiwar o dukewur, kmi thoefm be rorhu dukef yuhat hikkfot. Nhai finji kfokfot. Ror tur inji nahato kfo kangr, ‘O na tu hifa kinga.’ Tot inji korhwot wom yima tangiroh hingrneft. ²⁶ Niko nd yuhat hik duha. Bro yonr tfit

nmemenr kanjo rhukfot. Bro yimar tfit afo hingrna yima furam kanjo rhukfot. ²⁷ To afo wawanyko wom mrokfot. Frohrn broyer? Nd be gajis kmit rhu hasohato be wommn mthuhona hasiwa yimar o nd yemro yak habriwa yimar? Finji dukewako? Frohrn broyer? To na nhai inji nakaha. Na nikmoh buha tohnuhiwa yimaya, na be nikmoh hingrnanhoyuk hingrna yimaya.

²⁸ Tamoh nefm memoum, ‘Ayak kasuh inji nanomr,’ niko nia tohnho-moukma. ²⁹ Na nd Bro Nkifrar nd hemo tohukatohyuk gajim, niko wom gajim yak rhurahkomm. ³⁰ Na kinga toh thoft nanhu nuwa yayuk teborth niko nanopno rpat rhuhato rpat nuwa yerahnom. Na yakruha gajis niko to inji buga wom gajim rhuhato nikomn wom 12-pela tangim tohukatohrah-komm.”

*Pitar mong trohruba nmbuhat Jisasr kfo pthamor
(Matyu 26.31-35; Mak 14.27-31; Jon 13.36-38)*

³¹ Jisasr sinyahato Saimonr kfo memor, “Saimon, Saimon! Wawanyn. Satanr niahato ninhu yima yuhur wastiwonrahrn. Tu Bro Nkifrarhu dukefrparpno rhurahrne nhai? Bro Nkifrar bi kfo fakiowafmorr ninhu nia wastiwonneft. ³² To ni Saimone mirahn duka yanhyo. Na kfo tatiwanr Bro Nkifrarko. Ni buha wom nefmn misuh thombat nhai be wundiat suhniruhatn tfit mkekutrahn. Tfit bi mkekutekn tfit yihato wom yimatm kfo bmta mrokfom wahitwanm.”

³³ Pitar tfit sinyahato Jisasr memor, “Broye, na yibonwa ninpno kalabus yinyeft yo ni nohneft na yibonwa ninpno rpat nohneft.” ³⁴ Tfit Jisasr sinyahato kfo memor, “Pita afo wawanyn. Hrek yifungt yimam ttiwonrahmn ninhu nanopno rpat tohneft afo kfo namhirahn. Kfo namhitwonm kangnm, ‘Na nhai nd yimar tawisafkahann.’ Inji kfo namhiahany, kfo namhi hanyruhann husfirpehyuk kfo namhi tngtpno wanyrahnr krir nakurahr.”

Jisasr kfomorm maru kpmi bainatoh yakitohneft

³⁵ Jisasr kfo memor, “Wom yiha niko nanhu hingrnethu hingrnat yimohat kfo rafomoyanko su wuram hmbreni duha yo nhai kpm o maruhem yakitohakkfot. To nd yihart be inji sfno tirrpat yimohat wom shrm faknafmokone nhai?” Kfo memomr, “Nhai. Nhai wom shrm yaknafrmonom.” ³⁶ Inji kfomotm tfit Jisasr kfo memor, “Tfit arihat yinyeft nhai sfno yaufot. Arihat maruhete maruham yaknikfot, kpete kpt yaknikfot. Bainat duhayeko yimakmoh saket tham maruhampno yak tuknahato nd maruhaye bainat wiknaknikfot. ³⁷ Ndt nhai be kfo furakaha. Bi Bro Nkifrarhu rfa borngthu mrokfotn na kfo memota, ‘Nd yimar htimomr fasoh nefm nayet yimam kanjo. Nhai hifa nytingar htarmoamr.’ Nd mrokfot bi kfo htamot bi tot bi mfrfnah hanitt.” ³⁸ Tfit turhu disaiperm kfo memomr, “Wahti. Asof bainat husf.” Jisasr memor, “Nhai mrokfom, tmift.”

*Jisasr Olifet kmitnko kfo bruttnamo yuhat
(Matyu 26.36-46; Mak 14.32-42)*

³⁹ Be inji naptha hasomomn nhaf turhu neft. Turhu disaiperm yaknihato muhmom Olifet kmitnko. ⁴⁰ Muhhato mfnahmom. Mfnahhato turhu disaiperm kfo memor, “Niko kfo bruttnaneft yakitoh kihtakfot. Inji narahko be nhai suhruhatko Satanr nia nhehneft.” ⁴¹ Be inji kfo tanymormn yimor. Be wunye kkofmorn mtabokmehato kfo bruttnamor. Kfo bruttna memor, ⁴² “O Dajaye, ndar bbinysofthu yimaro fasoh nefm na be hta krhorhotma nann nohruhanm. Bi brbohwatt kanga akfoyann. Nd krho mis na yakruhat kangan ayak tuhant, be hifa, na yindhorwa. E nhai, kangan ayakrt, be nhai mrokfom, yakruhant. Na be ninn yukatohruha. Kangan, finji anaya, nhai mrokfom.”

⁴³ Be wom mounmotr yawihnehato mithu bmtamorr. ⁴⁴ Jisasrhu yima yuhur nhai marnyarmorr. Ndhtet ndhtet dukefmpno yima yuhurio rikrho hmbrtamorrne be. Nd yima yuhurpno kfo bruttnamor. Kfo bruttnahato yikiatpno yikiatpno tohmor. Nd yikiat tfit kkut kanjo rhuhato bbinysoftn mitohmom. ⁴⁵ Be injirpa kfo bruttna tanyhato tfit yihato yihom htimorm turhu disaiperm hwe hasetmn. Rom to inji nhaf krho yima

yuhumpno hwemom. ⁴⁶ Yihom tohhato naku thomorm, “Barenko, nikone be hwitwoko? Sinya rhuhato kfo bruttnanefte nhai? Inji be hweta hasoneft to be tamoh wifor yiham be suhknirahko.”

*Judasr yihato Jisasr mhndhnakmo yuhat
(Matyu 26.47-56; Mak 14.43-50; Jon 18.3-11)*

⁴⁷ Yuhre inji ptha hasomor, asha Judasr mhatone fnahmorm Jisasru yakyuk yimam. Nd Judasr mirahko ka wom nndoh yimar. Nhai. Ror tu Jisasru disaiperr, rorn nd Jisasr yakyuk yimam hatohakmorm. Judasr yau yaknihato mkihendhoraknimorr Jisasr. Judasr mkihendhoraknimohat nhai be sfno. Bi tum rpat rhuhato memom, “Bi Judasr mkihendhor tebfiyaknitrr ee ndnatn yudbat wayur sinyahato yakaknikfot yimar.” Bi inji kfo htamomt mrokfot. ⁴⁸ Be Judasr mkihendhoraknimotrr Jisasr memor, “Judas kangn, ‘Yuwi inji amki yindhor tebfiyaknikahtanr yudbat yimam mrhunehato yakrahmr.’ Ndhet dukefetnn inji naknewuna?”

⁴⁹ Turhu disaiperm inji htiyaf hanyhato ttiwonmomr, “Broye, nome finji naruhanom? Ndar nom hnayuk bainate nd ni yakagnayuk yimam tawo hik tubatuyafrahnomm?”

⁵⁰ Be inji yuhre nnakfo ptha hanymom Jisasr fakakni twanhomomr. Be wom disaiperr inji htihato sinyamorn prisroh bro tohak yimarhu hingrna yimar bainate tirmifkorhof yimbhindangt frububafmotrr misuhmot. ⁵¹ Be Jisasr nd yimarhu yimbhindangt inji htihato turhu disaiperm fak dbohfamorm. Be nd yimbhindang duha yimar Jisasr rim tohnihato tir htamort nd yimbhindangt tfit nathu nanyjhomot.

⁵² Jisasr tohhato prisroh bro yimam, Bro Nkifrarhu temperr tohukatohyuk yimam yo wom bro yimam tohhato kfo memor, “Barenko, nane raskor yimam kanjo bainat, mhrs hasinyahato nia kekwokma? ⁵³ Na yiha yiha Bro Nkifrarhu temperr yorhwa kmifat tohhato met yindarim mrokfom hemoahat nhai niko inji yihato hfnahaknirmokma. Hrefn nd Satanr thu rifutrko nieko.”

*Pitar kfo namhimo yuhat
(Matyu 26.57-58; 26.69-75; Mak 14.53-54; 14.66-72; Jon 18.12-18; 18.25-27)*

⁵⁴ Jisasr pthanimotr fakmomr. Yakhato be hanymomr. Hany hanymoumr Pitar, ror be nhowi mongkongotn fau ss hik hanymourm. Jisasr hanyhato hanymomr prisroh bro tohak yimarhu kunysn. ⁵⁵ Nd prisroh bro tohak yimarhu kmifarn kaht yimam tenghato haunyo hasomom. Pitar nhowi yimorn rompno mruhaknimor. ⁵⁶ Kaht haunyo hanyetrn kahthu nukeftpno nd bro yimarhu wom hingrnayuk mett htimotr. Hti hasohato kfo memot, “Barenko, asor wom yimar Jisasrpno nd wiayauw htfasmoar.” ⁵⁷ Pitar kfo namhi memor, “Bare, nann yari yutewun. Na nhai tawisafkahann.” ⁵⁸ Kto tfit womr yihato mhtimorr. Mhtihato kfo memor, “Bare, ni aso womenn Jisasrpno wiayauw htfasmoa.” Tfit wompam kfo namhi memor, “Bare, na nhai tawisafkahann.” ⁵⁹ Kto rhungotafhato wom yimar tu mfro kfo memor, “Na kfo mif mifwa ndar yimar rpat tohhato rpat ufaufaumoum. Ndar yimar Galili thofer.” ⁶⁰ Pitar wompam kfo namhi memor, “Bare, nd ni pthiwa mrokfot na nhai tawisafkahant.” Inji ptha hanymor asha krir nakumohat. ⁶¹ Jisasr kekutnihato fukatohmorr Pitar. Pitar ndnatn dukamor Bror kfo memohat, “Hrek yifungnano krirhu naku tngt tafi wany juha, husfirpa kfo namhit kfo namhi kangnm, ‘Na nhai tawisafkahann Jisasr.’” ⁶² Nd mrokfot dukakhato briahako fnahnihato nhai nur ttifarmor.

*Yimam Jisasr kfo tfar botfarhato ritatakmoyuhat
(Matyu 26.67-68; Mak 14.65)*

⁶³ Jisasr toh hti yukatohaf hanymoa yimam kfo tfar botfar kfo yukioh boyukioh thuhato ritatakmomr. ⁶⁴ Nyingatikt kitasiftahato tatmoumr. Tat hanyhato kfo memoumr, “Wakfo ni frohm tatwamn. Wayutanm ni tatwa yimaroh yufam.” ⁶⁵ Be womhtet fasoh fasohet mrokfom rorpar yi bugamom. Be inji na nfhamomr yonmari yifungr.

*Jisasr kaunseroh nyingahato kotimmo yuhat
(Matyu 26.59-66; Mak 14.55-64; Jon 18.19-24)*

⁶⁶ Dbharn bro yimam, prisroh bro yimam, boririfhuthu tisam rifiny bugamom. Rifiny bugamotm Judaroh mrokfo wanyuk kaunsermpno yimom. Jisasr hanymomr rroh mrokfo wanyuk bro yimampno. ⁶⁷ Mhtatahato ttiwonmomr, “Ni ndar yimann Bro Nkifrar kfomor yimaroh minrfa htiyakneft?” Jisasr sinyahato kfo memorm, “To na kfo miruhanko, na nd yimaya be nhai wany yakioruhatko. ⁶⁸ Yo wom ttiwonkfom kfo ttiwon-ruhanko be nhai ptharuhatko. ⁶⁹ Wom mrokforpat akfoyanko. Ndar yiham be Bro Najomrn Tu Nngrajohet Nkifrarhu tirmifko be tohnirahr.”

⁷⁰ Inji kfomotr tfit kaunser bugam sinyahato ttiwonmomr, “Ni inji kfiwohat ka Bro Nkifrarhu Yonn inji kfiwun?” Kfo memorm, “To finji tfit kfo nuhasrhoyanko? To bi kfo twanhiwuko. Bro Nkifrarhu Yonr to naya.” ⁷¹ Be wany hikmomn kfo memom, “Bi wany hik twanhinomr. Be nd mrokforpat memonom awany hikkahnomn nd tkittn yakrahnomr. To nhai tfit womm yakruhatnom rorhu toh nmbuhathu kfo hikyukm.”

23

*Pailatrno Jisasr kot tohmo yuhat
(Matyu 27.1-2; 27.11-14; Mak 15.1-5; Jon 18.28-38)*

¹ Juda kaunserkfothu kaunser yimam sinyahato Jisasr yaknimomr hanymomr Pailatrno. ² Pailatrno mhatohmomrn Pailatr kfo memomr, “Nda yima Jisasr buha nia mtohwarn kmi thofm faso kfo hta kangrm, ‘Mirahko nda kmithu bro yima Sisar takis ahenomr. Nanrpaya Bro Nkifrar kfomo yimaroh minrfa htiyakyuk kinga.’” ³ Pailatr sinyahato Jisasr kfo ttiwonmorr, “Nine Judaroh kinge?” Jisasr memor, “Uwa. Mrokfot to bi kfo twanhiwunt.” ⁴ Pailatr kekutnihato nd Jisasr kotimmo yimam kfo memorm, “Nd yimar nhai wom fasoh neft narmor. Nhai kfo mirhotanko, ‘Wayaknikomr.’” ⁵ Pailatrno mphayuk yimam kfo memom, “Ndr kfo furewur. Mirahn awany yakiowanr. Rorn tfit buha mitohwarn nda Judathu kmi kmiroh yimam faso kfo hta bohta hnnewurm. Bi Galiliko bi inji rihingrnakmorn to bi tfit bi asor Judako niewur.”

Jisasr Herotrhu nyingahato kotimmo yuhat

⁶ Pailatr inji wanyhato ttiwonmorm, “Ndar yimare fitha thofer? Galili thofere fitha thofer?” ⁷ Jisasrhu toh yuhat Pailatr frhikakhato kfo memor, “Nd yimar Herotr tohukatohwa Galili profins tohwa yimayer.” To be inji mhti hikakhato Pailatr kfomotr Jisasr hanymomr Herotrno. To nd yihart bi Pasofa burwathu rhu yiharn Herotr Jerusalemko bi tohetrn to be ndko hanymomr.

⁸ Herotr htiyakhato memor, “O hifa hnecomr. Nd ror hingrnewa hingrneft afo hingrnaruhatrt htirahnomt. Be wanys wanuknom ror hingrnewa bbukeft.” ⁹ Herotr sinyahato Jisasr ttiwon nhta bonhtamourr. Jisasr nhai ptharmor. ¹⁰ Prisroh bro yimami boririfhuthu tisamm mtohnihato mfro mfro nd kotkfot kfo nnuhaknimomt. ¹¹ To be Herotri turhu soldiakfom faso faso kfo kuken bokuken kfo tfar botfar thumomr. Inji nanihato tu hifa dborioh rmonthar yakhato nd rmon-thaye tu Judaroh rmontha nyuh yuhatn nyuhafmomr. Nyuhafhato kfo memomr, “Tfit Pailatrno wain.” Be inji kfafmotmr tfit yimor. ¹² Be Jisasrhu kotkfot rpat rpat wany hnamoftn be nd hus yimaf rinfak marnyakmof. Barkopfam afo nna hutt nna inji namouf.

*Pailatr kfomor Jisasr yura bgre misn anohr
(Matyu 27.15-26; Mak 15.6-15; Jon 18.38-19.16)*

¹³ Pailatr Jisasr htiyakhato nakumorm prisroh bro yimam yo kmithu bro yimam yo nd yima fura bofurat nakuyak bugamorm. ¹⁴ Nia mrifiny bugamotm kfo memorm, “Niko nda yimar tfit hnecomrn kfo kamukko, ‘Ndar yimarn kmi thofm faso faso kfo hta kangrm, ‘Mirahko Sisar maruham ahenom. Asoya na kinga.’’ Inji kfiwatko na duka mumiwa. Nda yimar nhai niko kfiwa fasoh nefm narmor.” ¹⁵ Pailatr kfo memorm, “Barkopfam Herotrno kotkfot hanikomr. Herotr wanurm ndar yimarhu mrokfom nhai kfo marifor,

‘Nd yimar fasoh nefm ner.’ Wanyhato tfit nanopno nianeft kfefitrr nanopno nier. Nd yimare be wakfo furakhato was furarahnomr? ¹⁶⁻¹⁷ Ndhtet neft be soldiam kforhota romn tat noh bonohafhato fnahnirahr.”

¹⁸ Nd tohyuk met yindariroh tng rihar wanfak nfakmom. “Wawaskomr! Wawaskomr! Rorn wawaskahtko tawo Barabasr afnahnahernom.” ¹⁹ Nd yima Barabasr kalabusmo nmbuhat to nnakfo hamuh nnakfo hamuhhato wom yimar wasmorr. Nd nmbuhampno kalabus htamomr. ²⁰ Tfit wompam Pailatr kfo memorm, “Jisasr fnahni kitwor. Nhai yorhwatr.” Be inji kfo hanymor. ²¹ Be watabrurhakmorm. Waniak waniakhato kfo memom, “Bgre misn wakihegirkomr! Bgre misn wakihegirkomr!” Nd yimaroh tngm be nndo grmmim yakitohmoamn memoum, “Be yudbat atayifuhaknynomr.” ²² Tfit husfirpehyuk ttiwonkfot kfomorm. Kfo memorm, “Nda yimar nhai wom fasoh nefm narmor. Be kotim furahato was furarahnomr? Nhai ror wom tng bebt htakah. Ndnetrn be tabotneft tabotrahmr. Tabothato fnahnerahr.” ²³ To nhai, rorhu mrokfot yiro yimot. Fitha ttifarmotm btn finji yima mrokfom wanykfot. Rom be Jisasrhu noh mrokfot ritohakmohat to be nd tkirpat tohmom. ²⁴ Be Pailatr wany batihato be memor, “Jisasr nohrahr.” ²⁵ Be nd Romroh gafman yimam yakhato kalabus htamo yima Barabasr rorn fnahnimotr tfit Jisasrn tkitt yakhato be soldiaroh tirmn yimor.

Jisasr bgre mis tu hegirmo yuhat

(Maty 27.32-44; Mak 15.21-32; Jon 19.17-27)

²⁶ Be soldiam yakmomr hanymomr. Kmi rim fnahnitn htiyakmomr wom yimar. Nd yimarhu yufat Saimonr, Sairini thofr. Ror yakmomn nd Jisasr tita hanymo mnohyuk bgre mis rorn tfit wathu titafmom. Rorn titanhota hanymorr.

²⁷ Bok met yindarim fau hik hanymomr. Met kmimn nurefr hatoh hanymomr. ²⁸ Nurefr hatoh hany-motmr Jisasr kekutnihato kfo memorm, “Jerusalem efkotko, anur hik hnnewohkma. Be inji wahti marsisako. Niko nurneft tuko dukahato nurkfot. Yonetek yonm yakhato bi hanur hanykfot. ²⁹ Nhai be sfno inji kfokaha. Kto wom yiha bro kurheft nia thoft metm yon hiyau duham, rom hifa, nhai be mfro duka kinyakiruhatm. Yon kkukanetm be tu mfro duka kinyakirahm. ³⁰ Womm nd kurheft htihato kmbru fkohm kanjo tatti bottirahm. Kminysofm kfo mirahmm, ‘Nda kminysofe wawuyoh nafurnekahnn wamithu kasikahtnnom anohnom.’ Wom womt kfo mirahm, ‘Nda kminysofe watoh rafonnem. Nom wofnkahnom krhopam yakneft.’ Inji narahm. ³¹ Yimar dborior neft nayet yimar faso faso kak bebwomr yimam nfri nyume kah tengwa kanjo. Tfit kto nd fasoh nayetm tawo yak bebrahmm yimam inji ffnyume kah tengwa kanjo.”

³² Jisasr yak htamomrn you tfit soldiam yihato fakmomf wom hus yimaf kalabus kunys tohetfn. Nd yimaf rikoh yo fasoh fasoh nefm namoatf fak htamomf kalabus kunysn. Yakhato memom, “Jisasr nohruha yiha rof rpat nohrahf.” ³³ Be nd husfirpa yima bugam hanymomm yima mfha tptin. (Kfe sfiohniyet yima mfham kanjo nd tkitt rhumoatt futamoumt yima mfha tpt.) Ndha nd husfirpa yimam bgre minn nire tir wuram frdbkafhato yuht bgre miyettm kasinyamomm. Nd fasoh nefm nayetf mano mano tohmos. Womr tirmifko, womr kindonko. ³⁴ Jisasr yura bgre misn hegir hanyhato Bro Nkifrar wukfo memor, “Bro Yifeme, ndar na nda yimamwe newa nefm mirahn ni htihato anambur inji naya. Nhai yima dukefrpno inji nakahm. Rom newa nefm waduka mumafotwanm. Mirahn adukayanm.” Yo nd Jisasrhu hmbre-sham yak taborhotamom soldiam tahiham tubatu hanymomm htimom, frohrn tahis hifa fturt, nd yimar fakmorm.

³⁵ Yima rifinyroh nyingahato Judaroh tangi tangiroh bro yimam mtohnimoamn wukfo ddo memoumr, “Nd yimar ror toh hingrna hnamohat bok met yindarim rorn fak marnya hnamorm. Nd yimarn Bro Nkifrar kfo tkruraf thombat nda bbinysofthu yimaroh nrfa htiyakneft, afo tur amifnahnekaht ahtinomr.” ³⁶ Soldiam rom nhaf niahato nd fipa ye juha faso wain bupam hnehato mthu nhehmomr. ³⁷ Mthu nhehtahato wukfo memomr, “Ni Judaroh kingn rhu thombat asomif tu wamifnahnekahtn ahtinomn.”

³⁸ Wom mrokfo nmbuhat plan mkutn wandfakmomtn yura mfhatpno frdbkafmomt. Nd mrokfot rom wandfamot kfo memot, “Judaroh kingr.”

³⁹ Tfifit nd rorpono kasinyamo yima husfn womr riruhato kfo ddo hany memor, “Ni yimarooh nrfa htifyakyuke? Ndhtet yima rhu thoft btn ninn wamifnahnikahnn no ninn nyusakak-rahnno.” ⁴⁰ Inji kfo ddo hanymotr tfifit manoko hiryukrn kfo memor, “Bare inji akfowahn. Nom rpahtet krhopam kekwonom. Bro Nkifrar ka nhai yakrmikahn?” ⁴¹ No yekwa krho nmbuhat nhai be sfno no tunnoh nefmpno krhopam kekwono. Ror nhai. Ror be sfno nd krhopam kak furewur.” ⁴² Inji kfoni hato Jisasr kfo memor, “Jisase, ni kto kingn toh thombat na wadukatwona. Mirahn ammonianr. Nanhu rhu nmbuhat wayak htatwona.” ⁴³ Jisasr memor, “Na kfo mifwann, hrek na yita kmi paradais ni rpat yi myorhwono.”

Jisasr nohmo yuhat

(Matyu 27.45-56; Mak 15.33-41; Jon 19.28-30)

⁴⁴ Jisasr afo yura hirmour yura bgre misn. Dany marrn marrhu nukeft be rim nohnimat. Kantri bugat be yambontif rhumom. Wuroh 3 kilok krif marr tfifit niamor.

⁴⁵⁻⁴⁶ Be inji yarmbon tiftn rhu hanymotn marr tri kilok yihom toh hanymor Jisasr mfaknimor. Wuroh myakni yibonruha turhu yifem Bro Nkifranko naku tau ttinimorr, “Bro Yifeme, na bi toya bi niewa wamiyakna.” Nd Bro Nkifrarhu temperrhu tu Nngrajoh Hnaru Gnanhehr gna rafomoa rmonthat yimar mfakni hanymor, nd rmonthat rpat buha foh tnehmot. Buha yoh tnehhato nmbuhaf mano mano rim rhu mrhumof.

⁴⁷ Amiroh keptenr inji htimo hat mfhat danyr foh tnehmot. Bro Nkifrar kfo yindhorhato kfo memor, “Dajohmn! Nda yimar be tu nhai wom tamoh nefmpno nohrfor. Dborioh yimar be noh furer.”

⁴⁸ Nd met yindarim toh hti hasomom rom nhaf inji hti tanyhato natubatunimohat bro dungunangu yima yuhumpno yi hanymom. Masat yuhuwafmomr Jisasr.

⁴⁹ Jisasrhu yimatm yo ndwom met kmit Jisasr Galilit hik htifascoam rom be inji nndoh tohmoamn htimo umm Jisasr tamoh tamoh nefm namoahat.

Jisasrhu thatipt tahi muht rihtamo yuhat

(Matyu 27.57-61; Mak 15.42-47; Jon 19.38-42)

⁵⁰ Judaroh taun Arimateathu wom yimar tohmour. Rorhu yufat Josefr. Ror be dborioh yimar, ror nhai wom tamoh tamoh nefm. Juda kaunserkfot rorn nd kaunserkfot hingrna tohnho-mourm. ⁵¹ Rom wom kaunser ptha-moahat Jisasrhu finji nanef ror nhai rhunhohato ptha nuhaknirmoarm. Rorhu dukeft duka memour, “Bro Nkifrarhu kingdomkot afo nanhu nyngaye afo htiruha!” ⁵² Jisasrhu thatipt yakhato yopafneft rorn Pailatr pno yimorn Pailatr mkfo memor, “Nann Jisasrhu thatipt yaknirhoyant yopruhant.” Mkfomotr Pailatr memor, “Nhai mrokfom, ninn wayoptwanr.” ⁵³ Be inji kfafmotr yimorn Jisasr yura bgre misn hiretrn yuht bgre miyetr fak kasuhakmorr. Yak kasuhhato yimar yak tundakmorr nndo rim htamorr. Rim htahato ganyom rmonthaye rir hmbremorr. Rir hmbrenihato hanymorr. Hanyhato wom tahi muhtn rihtamorr. Nd Jisasr htamo tahi muht be tu nfri mift htamorr. Tafi wom yima gu hta duha tahi muht htamorr. ⁵⁴ Jisasr muht rihtamohat Fraide rihtamorr. Nd Fraide yihar bi tu Judaroh rhu krna Sabat yihar bi rhu yibon hanymomr. Sarere yihar nd rhu krna yihar rhumoumr.

⁵⁵ Nd Jisasr Galiliko htifyaknamo metm rpat Josef pno yimomn hti hikmom Jisasr rihtamo tahi muht. ⁵⁶ Hti hik tanyhato tfifit turohko yihato Jisasrhu thatipt gbrornayuk welpam yi fak msk a inji namom. Memom, “Ka yirahnom thatiptu gbrornaneft,” to nhai, rhu krna yiharn nhai yirmom.

Jisasr sinyamo yuhat

(Matyu 28.1-10; Mak 16.1-8; Jon 20.1-10)

¹ Sande yiha bi dbha ksfutn met kmim Jisasrhu thatipthu gbrorna wunayukm sinyani yimom. Nd rom yak mska htatamo welpam yaknihato yimom. ² Yihato nd Jisasr rihtamo tahi muht frkihafmo tahis mtohhato mhti hambraknimomt. Nhai wom rhurmot. “Barenko, to fitot tahis? Frohm yak tuhefimt?” ³ Be mhti hambrohato fknenimom yiro tahi muhntn. Fknenihato asha tfit yima gu tfkhat rim hti hambriwumt. ⁴ Be tuha mrokfo duhatm tohmoum. “Barenko, barenko, ndu yimare tamohr yaknirorr?” Be tuha inji yuhre kfo ptha haso hanymom asha hus yimaf ganyom hmbreshetf mtohmof. Hmbresham wafnhumohat memom nndo binasoht yak dbratwatm fnhutwot. ⁵ Be tfit fanhomom nd yimaf htihato. Nhai marimo kukatohwonomf. Yanho rifuhetmn nyingatikm nndo bbinarysoftn wafukatohmom. Nd mtohyuk yima husf kfo memofm, “Barenko, nikone mumiwuko? Tamohmpno tfit yamukako, ‘Yopko anianom?’ ⁶ Nd noheh yimar bi tfit sinyani yifir. Niko ka nhai duka hanykahko ror Galilit hingrnanehato kfomoa mrokfom. ⁷ Kfo hna memour, ‘Bro Najomr fasoh nefm nayet yimamn tat noh bonohakruhamr yura bgre misn mnohrahr. Nohhato hus marf rhunihato husfirpehrpno tfit sinyarahr.’ Nd mrokfom nhai wany hnarmokomm?”

⁸ Be inji kfomotfm tfit dukakmomm Jisasr pthayuk mrokfom. ⁹ Be tfit yimom. Yihato nd Jisasr hik habrimoa 11-pela yimam yo wom met yindarim kfo nuhas hanymomm. ¹⁰ Makdala efkot Mariat, Joanat, Jemsrhu mmem Mariat yo wom wom metm rompno tohyukm, romn yi hti tanyhato kfo nuhas bonuhasmomnd Jisasrhu disaiper. ¹¹ Nd Jisasrhu disaiper met kmim inji kfo nuhasmohat nhai wany yakiormomm. Memom, “Ka be kfo ddiwum.” ¹² Pitar sinyahato memor “Na tukann afo yi hti tungunaruha.” Inji kfo tanyhato toniyefrpar fakmor. Yimorn tahi muht mtohmorn yewirnahato rihtimor yima gurr htamo tkitt. Nhai wom tamohm rihtirmor. Sfnoh, rmontharpam rim htimor. Inji htimohat tuha mfhat hifa mmbrahato mrokfo ptha duha kekutni tfit yimor. Yihota yuhat be duka hany memour, “Ndu yimare sinyani mifr o yimam yekmr nndo htemr?” Boknabok dukefm fakmoumr.

*Hus yimaf htimofr Jisasr Emeusko yiyet yihota yuhatn
(Mak 16.12-13)*

¹³ Nd yiha Jisasrhu hus disaiper Jerusalemt sinya tanyhato memof, “Emeusko anyo.” Jerusalemti nd kmi Emeus 11-pela kilomita yaufot. ¹⁴ Nd hus yimaf yihotat yau hanyhato nd Jerusalemt pno rhumo nefmn ndm tuf naptha srh hanymof yau hanyhato. ¹⁵ Inji naptha hanymof Jisasr ror yimorn rpatis mnathu kmbrenihato rpatis fau hanymom. ¹⁶ Rof nd hus yimaf nhai hti nhtahato marimorf, “Arr Jisaser.” Rof memouf, “Ka wom yima furar kaunho hnewurno.”

¹⁷ Yau hanyhato buharn ttiwon memorf, “Nifne tamohmn naptha hanitafn?” Inji ttiwonmotrf rof tfit mtohhato yima yuhum nhai marnyarmomf. ¹⁸ Nd yau hanymo yimafhu yufam womr Kliopasr. Rorn kfo memor, “Jerusalemr kmi kmiroh yimam nia tohwom. Ka ninrpa mifn nhai wanykahnm nda Jerusalemt yorhwa nefm?” ¹⁹ Inji kfomotf tfit Jisasr ttiwonmorf, “Tamoh nefm Jerusalemt yorhwam?”

Kfo memofr, “Nasaret thof Jisasrpno rhumo nefm kfiwuno. Nd yimar profetr tohmor. Nd yimar Bro Nkifrar yo yima mifm rorhu hingrnfom yo mrokfom htimoer be tu yafothet hingrneft hingrnarmour. ²⁰ Tunmoh prismi tunmoh bro yimamn Romroh tirmn htahato bgre misn hegirmotmr nohmr. ²¹ Nmoh dukefm duka memounom, nd yima Jisasrn Bro Nkifrar tkrurafmor Isreroh minrfa htiyakneft.

To wom mrokfot wawanyns. Nd yimar wasni rhuro yiham bi asor href korhwonomr husfirpehyuk yihar. ²² Nompno tohyuk wom metmn dbha yopko mhti tanyhato nia pthitm nom be sinya fohtasnom. ²³ Rom yihat nhai htifomr Jisasrhu thatipt. Tfit kmifako niahato mkfo famum, ‘Mounmotrpam htitawonom.’ Romn kfo nuhas famumnom, ‘Jisasr bi sinyani yifir.’ ²⁴ Nompno tohyuk womm nhaf nd met kmim kfoyuk mrokfom wany sanyhato rom tumn yihato famum turoh nyngaye, ‘Amhti yimbu tanynom.’ Yihato rom nhaf sfnoh tkitt mhtitawom.”

²⁵ Nd hus yimafhu mrokfom kfo ptha buganimotfm Jisasr kfo memorf, “Nifne ka nhai yima yuhu duhatefn yon mumenm kanjo mumiwuko? Bingot profetm pthayuk mrokfom ayakitohkomm, nhai ndhtet bok dukefm yakrfotko. Href inji htitawohat to be nikmoh dukefm yirfom nd profetm pthayuk mrokfomn. ²⁶ Bro Nkifrar kfo memor, ‘Nd yimarn nieruharn nda bbinysoftu yimam minrfa htiyakrahram.’ Nd mrokfot Bro Nkifrar kfoyukt ka nhai wanyrmokomt? Nd yimar niahato yimaroh minrfa htiyakneft afo yahrt tohhato kku yaknihato ee tfit kto nd yahrt tohyuk yimar Bro Nkifrarpno bro yufat yakkfot.” ²⁷ Inji kfonihato tfit Kraisrpno rhuyuk nefm Mosesri profetme wom womm bi kfomom, ndm rom mkfo htfasakhato kfo hik bohik nuhasmorf.

²⁸ Be inji nakfo ptha hany be rof yimo kmit mfnahmom. Ror Jisasr memor, “Yau fnahruha.” ²⁹ Tfit ndwom yimafn memofr, “Marr bi yohnitr, asha nonpno wahwe.” Be inji kfomotf be rofpno rhumor. ³⁰ Nuwa yenyeftpno tebort mrhumomn bretpat yakhato Bro Nkifrar wukfo bruttnnihato yaktifmortn hemorf. ³¹ Inji namotr ee ndnatn hti dukamofr. To be rpa htit nhai tfit wom htirmofr. Yudbat be tuha mifrtnehnimor. ³² Hti hambraphato tfit tuf nna ptha memof, “Barenko, Bro Nkifrarhu mrokfot ptha nuhas hanyetrn yima yuhum sinyem.”

³³ Be inji nakfo ptha hasohato tfit yudbat sinyahato Jerusalemko tfit yimof. Tfit yi-hato Jerusalemrn Jisasrh 11-pela disaiperm mhtiyaknimofm wommpno rhu hasomom.

³⁴ Romn kfak memomf, “Barefn, Bror sinya mifmor. Saimonr bi hti mifmorr.” ³⁵ Tfit rof sinyahato tawo rof htiyuk nefm kfo srh nuhas bonuhasmofm. Kfo memofm, “Ror pthanihat nhai merfono, ‘Arr Jisaser.’ Nhai. Bretpat yaktifhato hanyeftpno ndnat hti dukenonr.”

Jisasrh disaiperm htimomr

(Matyu 28.16-20; Mak 16.14-18; Jon 20.19-23)

³⁶ Disaiperm inji naptha hasetmn Jisasr yihato mfnahmorm. Mfnahhato kfo memorm, “Yima yuhum ami-rhumko.” ³⁷ Rom Jisasr htihato memom, “Ka nthoner.” Memom, “Amyakrmiyakninom.” ³⁸ Kfo memorm, “Ayakrmiwahko. Nikmoh yima yuhum tamohmpno boknabok dukefm yekwako?” ³⁹ Naya. Wahti-komm nanhu tir wuram. Nanhu thatipt wahti kothakomt. Nthonnm nhai nann kanjo tha tptiketm rhukahm.” ⁴⁰ Inji kfonihato tir wuram fak nuhasmorm. ⁴¹ Rom inji htihato yindhorwom. Tfit wom yima yuhumn duka memom, “Nom mirahnom ka Jisas mifr sinyer. Rorhu yafothatn nia mkfo nhehrahtnom.” Tfit ttiwonmorm, “Niko tom wom yeshrim?” ⁴² Tandhiyet yiraparpat rhumott ndt yakhato hemomr. ⁴³ Ror nd yirapat yakhato rroh nyngahato famort.

⁴⁴ Yenyihato kfo memorm, “Na nikompno toh hnamohat bi kfo memoyanko, ‘Bingot Mosesrhu boririfhut yo profetroh mrokfomn yo windohmn hta hnamom nhai be hta fura hnarmomm. Nd mrokfom fipetm rhukfot.’” ⁴⁵ Rroh yima yuhum fak wutha inji namorm memor, “Yak wuthakahtanm rfa borngt rhuyuk mrokfom dukarahmm.” ⁴⁶ Kfo memorm, “Bro Nkifrarhu rfa borngt kfo kangt, ‘Yimaroh minrfa htiyakyuk yimar, Bro Nkifrar kfo tkrurafyukr, afo bro yahrt tohhato nohkfot. Nohhato tfit hus marf tonihato husfirpehyukrpno sinyakfot.” ⁴⁷ Kto ndar bbinysoftu yimaroh mrokforoh kfo nuhas htfasneft rorhu yufatpno kfo nuhas htfashato yimaroh fasoh nefm mong trohfot. Inji narahm Bro Nkifrar yak thurahrm ndar bbinysof thoferh fasoh nefm. Nd hingrneft tuha Jerusalemt rihingrnakhato hingrna hanykfot.” ⁴⁸ Niko ndar Jerusalemt rhuro nefm kfo ptha srh htfaskfot kmi kmim. ⁴⁹ Wanukko, Bro Nkifrar kfomor turhu Yafothathu niko hanyeft. Ndnett bi brbohwa nd Bro Nkifrarhu Yafothathu niko hanyeft. Tuha Jerusalemt nd Yafothat rhu garikfot.”

Bro Nkifrar Jisasr wayakhato yura kmi hefenr muhmo yuhat

(Mak 16.19-20; Aposer 1.9-12)

⁵⁰ Jisasr turhu disaiperm yaknihato rpat yimomn Betanitn tirm hamuhhato Bro Nkifrar kfo memor, “O Bro Nkifraye, ndar disaiperm wayak marnya bomarnyatwanm.”

⁵¹ Inji kfo ptha hanymor be wafakmorn yura hefenr muhmr. ⁵² Kfo tato tanyhato be

Luk 24:53

156

Luk 24:53

yindhorefrparpno tfit Jerusalemko yimom. ⁵³ Yihato Bro Nkifrarhu temperr rhuhato yiha yiha kfo yindhormoumr.

**Jonr
dwandfamo gutnius mrokfot
Barkof kfo nuhas mrokfom**

Nda Jonr wandfayuk Gutnius mrokfom, Jonr kfo memor, "Jisasr Bro Nkifrarhu toh nkifraniyuk Mrokfoyer, nd Mrokfor tfit yima yonr kanjo yak dborhanehato yimanomponia mitohmor." Nda Gutnius mrokfot htayuk yima Jonr duka memor, "Yimam nda gutnius mrokfomn Jisasrhu tndh mrokfom hti duka tungunaruhamn, Jisasr hti mirahm tu Bro Nkifrar kfo htamo Yoner. Bro Nkifrar rorn kfomor yimaroh minrfa htiyakneft. Nd dukefrpar yimam yakitohruhamn toh nkifrarahm." Jonr nd dukefetrn rorhu gonborngt wandfamort (kfo nuhas mrokfot htikfot 20.31).

Barkof mrokfom Jonr htaknimom, kfo memornom, "Bingot Mrokfor Bro Nkifrarpno afo wutohmour." Ndt kfonimortn tfit Jisasr hingrnamoa mirakerroh mrokfom kfo nuhasmornom. Jonr duka memor, "Nd Jisasr hingrnayuk mirakerroh mrokfom yimam tndh nuhasrhotanm rom htiruhann rroh yima yuhum duka mirahm, 'Jisasr tor tu Bro Nkifrar kfo htamo Yonr nmoh minrfa htiyakyuk.' Yo nd mirakerroh mna yuham ndm Jonr kfo hik nuhas bugamornom. Jisasr mirakerm inji hingrnamotr womm Jisasrn rroh yima yuhum htahato hikwomr, womm nhai.

Sapta 13-17 Jonr kfo tndhmor wuroh yifungr Jisasr turhu disaipermpno wuroh mrokfom hi hasetrn yahr kmim yaknihato kot htanihato bgre mis htamo yuhat. Tu wuroh mrokfomne Jisasr sinyanihato disaipermpno htimo yuhathu mrokfom htamor.

Nda Jonr wandfayuk gonborngt, htirahn bok tkitm Jonr Kristenroh tohyuk toheft tfit yimam yihof href toh hasiwa toheftpno rim kfo nhombrakmourn. Ndnettn htirahn buparoh mrokfot, bretparoh mrokfom, nukefthu mrokfot, wain tofthu mrokfot, sifsifroh tohukatohrrhu mrokfot, nd ndm yakhato kfo nhombramourm Kristenroh tohyuk toheft.

Mrokfor yimar kanjo niahato yimampno mitohmo yuhat

(Sapta 1)

Mrokfor yimar kanjo niam yuhat

¹ Mrokfor bingot bi rhu gungonmom. Mrokfor bi ruhetrn ee kto nda mounti bbinysoft trhamof. Mrokfor bi Bro Nkifrarpno rhumorn, to nd Mrokfor Bro Nkifrar kanjo rhumor. ² Bingot Mrokfor to bi Bro Nkifrarpno rirhungotakmor. ³ Mrokfor kfomor, nd tamoh tamohr Bro Nkifrar hingrnammor. Mrokfor akfo duha yir, nhai wom tamohr Bro Nkifrar hingrnammor. Nhai. Mrokfor bi ruhetrn nd Mrokfor kfomor tamoh tamohr Bro Nkifrar hingrnammor. ⁴ Mrokfor yimaroh ruhefr tohefr kakitohworr. Yakitohhato nukeftpno yimaroh wiayau nmbuhat kak hta bohtewurm. ⁵ Nd nukeft yifung tahasiwut, to nhai tfit yifungpamn yaknihato nd nukeft yifungpamn yak tasikfot.

⁶ To tor wom yimar niam, rorhu yufat Jonr. Bro Nkifrar kfomot niam. ⁷ Ror be nukeft hatohyuk yimarhu mrokfothu kfo nuhasneft niam. Niahato tuhan yindarim kfo nuhasmotrm be nd mrokfot yakhato hikmomt. ⁸ To mirahko ka Jonrn nd nukeft hatohyuk yimayer. Nhai. Jonr to be nd nukeft hatohyuk yimarhu mrokfothu kfo ptha nuhasneft niam. ⁹ Tu yima bugaroh hayuk nukef mift hatohyuk yimar bi niam ndar bbinysoft.

¹⁰ Nd yimar to bi ndar bbinysoft tohmor. Bingot ror kfomot ndar bbinysofti mount trhamof. To nda bbinysoft tohwa met yindarim nhai hti nhtarmom. ¹¹ Turhu kantri mifko yimor. To nd turhu kantriko tohwa kmi Judam nhai kfakrmom. ¹² Wom womrpamn hti nhtahato kfakrmom. Kfakhato rroh yima yuhum rorn htamom. Ndnettn romn yakhato htamorm Bro Nkifrarhu yonm. ¹³ Nhai be yifamaroh kkupam yak nhombrewa yuhatn Bro Nkifrar nd yuhatn yifemrmorm. Nhai. Rroh yima yuhum Kraisrn htamomm. Bro Nkifrar ndt htihato to be rorn yifemrmorm.

¹⁴ Nd Mrokfor tfit yima yonr kanjo yak dborhanehato nia mitohmor nmoh buha. Bi htimonomt rorhu bro yufati rorhu bbukeft. Nd Yonrpar Bro Yifemrhu yoner. Bro Nkifrarhu tu yuhuwafefti yafothet nef mift tu bro mifwotr. ¹⁵ Jonr rorhu nia mrokfot kfo pthahato kfo nakuyaf memor, “To nda yimarn na kfo hna memoya, ‘Tor nanhu mongko nierahr wom yimar, ror bi Bro Nkifrarpno rpat ritohngotakmor. Ndnett rorn buriwura.’”

¹⁶ Nd yimar, yima yuhuwafeftn tu bromotr. Nd rorhu yima yuhuwafeftn, yima yimanom yihof href kak marnya hasiwurnom. ¹⁷ Rot boririfhut Bro Nkifrar hemornom Mosesrhu tirtn. To tfit Jisas Kraisrno, htitnom Bro Nkifrarhu tu yuhuwafefti tu yafothet nef mift. ¹⁸ Nhai nom nda bbinysoftu yimanom Bro Nkifrar bi hti nkrirmonomr, be tu nhai mif. Nd tu Bro Nkifrarhu Yonr, ror tu Bro Nkifrarn, tu Yifemrno toh tany nietrn, rorpno Bro Nkifrarhu ruheft htimonomt.

*Jon Baftaisr pthamo mrokfom
(Matyu 3.1-12; Mak 1.7-8; Luk 3.15-17)*

¹⁹ Judaroh bro yima boyimat kfo tkrurafmomm prismi yo Lifaim. Taun Jerusalemt htanyhato yimomn Jonr kfo ttiwon memomr, “Nine frohe?” ²⁰ Be Jonr nhai marimor finji kforuhar. Toh bugamotm kfohe memorm, “Na mirahko na ka nd rom kfiwa Kraisa.”*

²¹ Tfit ttiwon hasuknakni memomr, “To nine frohe? Ka Iraijaye?” Tfit Jonr kfo memorm, “Nhai.” “E, frohe, ka nd Mosesr kfomo profetr nom gari hasiwar, ka nd profete?” Tfit ror kfo memor, “Nhai.” ²² Tfit wompam kfo memomr, “Ni to frohe? Nom kangnom ni wakfo nuhas marnyafkahtnnom, nom awany marnya tanykahnomn, ee bt yiruhanomn, nom kfo tkrurafyuk bro yimam kfo marnya bomarnyarahnomm.” ²³ Inji kfomotm profet Aisaiar kfomo mrokfot yakhato kfo ptha hik memorm, “Na nd nungur tik furat kfo nakuta yimaya: ‘Bro Nungothethru niayuk yihotat bi wayak marnya bomarnya hasohekomr.’”

²⁴ Farisimn nd yimam kfo tkrurmotmm niamomn, ²⁵ Jonr kfo ttiwon memomr, “To ni Kraisn rhu duha yi shoft, o Iraijan rhu duha yi shoft, o nd profetn rhu duha yi shoft, to tamohmpno yimam baftaiswanm?” ²⁶ Jonr tfit rroh mrokfot kfo wok memorm, “Na be bupa fura baftaisim-wanm yimam, to tor wom yimar tor nikompno tohwor. Niko nhai tawisaf-kahkomr. ²⁷ Nd yimar nanhu mongko niewur. Na, na be yima furaya rorhu senderfhu ki jbcafuk mtinf kak nyusakahukanr.”† ²⁸ Jonr nd mrokfot pthamohat tek Joden mkukor yorhwa kmi Betanit nd mrokfot pthamort. Nd tkittn Jonr yimam baftaisimmourm.

Jisasr Bro Nkifrarhu sifsif yoner

²⁹ Tfit hwe fnah ndwom marrn Jonr htiyakmorr Jisasr. Htiyakhato kfo memor, “Wahtiko. Ndr Bro Nkifrarhu sifsif yoner. Rorn bbinysoft tohwa tuhan yindari bugaroh fasoh fasoh nefm yak thuhirahrm. ³⁰ To nda yimarn na kfo hna memoya, ‘Tor nanhu mongko nierahr wom yimar, ror bi Bro Nkifrarpno rpat ritohngotakmor. Ndnett rorn buriwura.’ ³¹ Na nhai tawisafrmoyanr. Na tamohr kfo marimora, tor nd yimarn Kraisr? Nhai. Na, na be yimaroh tekthu baftaisimhato Isrermpno nd yimarhu myak nriyafuka. Nd nayukann niamoya.”

³² Tfit Jonr kfo ptha memor, “Na nd yimarhu baftaisimneftpno htimoyant Bro Nkifrarhu Yafothat yura hefenr wutoh tanyhato ganyom mmkrs kanjo yak nhombrane-hato fawihnamot. Be nd ganyom mmkrs yawihnehato be yimarn mifakmort. ³³ Na to tamohr kfo marimora, tor nd yimarn Kraisr? Nhai. Na tuhan yindariroh baftaisim-nefthu kfo tkrurafyuk yimarn bi kfo memora, ‘Yimam baftaisim hanyhato wahti hanyswa fitoh yimar htin Bro Nkifrarhu Yafothat yawihnehato mithu nawohwotr, tor nd yimarn Bro Nkifrarhu Yafothaye tfit baftaisimrahrm tuhan yindarim.’ ³⁴ Na tukianhu nyingaye htimoyanrn kfiwanko, nd yimar tu Bro Nkifrarhu Yoner.”

* ^{1:20:} Nd Krais yufat, Grik mrokfothu yimbu yuhat inji kfiwut, “Bro Nkifrar yak htamo yima nrfa hbhakyuk yimar.”

† ^{1:27:} Wom yimar hatohyuk senderroh ki jbcafuk mtinf yak nyusak thumoahat, tu yufapa duha yima furapamn womr hatohyuk senderm kak thumouumm.

Jisasrhu barkof husfirpa disaiperm

³⁵ Hwe nfha ndwom marrn Jonr tfit turhu uhik ahik htfasyuk hus yimafpno tek Jodent toh hasomom. ³⁶ Jonr htiyaf hanymorr Jisasr fau hanymot, nd turhu uhik ahik htfasyuk yimaf kfo memorf, “Htifnr. Bro Nkifrarhu sifsif yoner.” ³⁷ Be nd yima husf inji wanyhato be Jisasr mfa hikakni twanhomof. ³⁸ Jisasr kekutakhato htimo yau hik hanymotfr, kfo ttiwon memorf, “Nifne tamohmn hambro hnewafn?” Tfit rof ttiwon memofr, “Rabai, ni fitoh kunys tohwa?” Nd Rabai mrokfo yimbu yuhat inji kfiwit, Tisa. ³⁹ Be Jisasr kfo memorf, “Wania. Wahtifn.” Marr bi 4 kilok tohmor. Be rof yimofn nd ror tohmoa kunys htihato nd krifr be rorhu kunysn rhu krif bugamofr.

⁴⁰ Nd Jisasr yau hikaknimo yima husf, to Andrur tor womr. Andrur, Saimon Pitarhu najomr. ⁴¹ Andrur Jisasr htanyhato barkopam afo turhu najom Saimonr yau hambra-khato kfo memorf, “Nd profetm kfomoa yima Mesaiar bi htitawo-nomr.” Nd Mesaia yufathu yimbu yuhat, Bro Nkifrar yak htiwa yima nrfa hbhakyuk yima Kraisr. ⁴² Be turhu najom Saimonr mkfakhato Jisasrpno hanymorr. Jisasr htiyakhato kfo memor, “Ni Jonrhu yinem Saimone. Kto yimam yutarahmn Sifas.” Grik yarmumattnd Sifas yufat kutewumt Pita. To tfit nd Sifas yufat yo Pita yufat, nd yufafhu yimbu yuhat, tahis.

Jisasr Filif, Nataniier yima husf nakuyakmo yuhat

⁴³ Tfit ndwom marrn Jisasr memor Galiliko aiya, Filifr yihom htimo. Yihom htihato kfo memor, “Wania, wahikna.” ⁴⁴ Filifr taun Betsaida thofr. Nd kmi Betsaidat Andru Pitarof tohmoa kmiyet. ⁴⁵ Tfit Filifr yau hanyhato Natanierr mhtimorr. Mhtihato kfo memor, “Bare, nom wanymoa tndh kfothu yimar, nd Mosesrhu boririfhu gonborngm kfo tndhmoar, yo nd profetroh gonborngm kfo tndhmoa yimar, tor bi htimonomr. Nd yimar, Nasaret thof Jisasr, Josefahu yinemr.” ⁴⁶ Tfit Natanierr sinyahato kfo ttiwon memor, “Nasaret to tefi kmiyenet. To nhai ndhtet tefi kmiyentn ndhtet bro yufet yimar mfnahkfot.” Tfit wom Filifr kfo memor, “To tu waniekahnn afo wahtitwa.”

⁴⁷ Jisasr Natanierr htiyak hanyhato kfo memor, “Asor tu Isrer thofen mifr. Ror nhai wom kfo nhehefen nmbuham rhukahmr.” ⁴⁸ Natanierr inji wanyhato tfit Jisasr kfo ttiwon memor, “Nane fitoh yiha htihato inji kfiwa?” Tfit Jisasr kfo memor, “Ni afo tafi Filifr mnakuyak duha, na bi htitawoyann fik tihathu tpitn rhu hasetnn.” ⁴⁹ Natanierr nd mrokfot wanyhato kfo memor, “Tisa, ni Bro Nkifrarhu Yone, Isrerroh Kinge.” ⁵⁰ Jisasr kfo memor, “Kfo yamukann ndu fik tihathu tpit rhu hasetnn bi htitawoyann. Ka ni ndt wanyhato ninhu dukefr sinyahato famuna, ni Bro Nkifrarhu Yone. Kfiwann, ndt rot be inji htitwont. Kto bro bro nefm yak nuhasrhotann htirahnm.” ⁵¹ Tfit wom kfot Jisasr kfo memor, “Na kfo mifwanko, kto htirahkomp mount frtnehhato rim rhu mrhuruhatt mounmotm mano hefenko muh tfit Bro Najomanpno nia, yo tfit hefenko muh, tfit Bro Najomanpno nia inji naruhatt htirahkomm.”

Jisasrhu bro yufati mirakerkfot riingrnakmo yuhathu mrokfot

Taun Kanat wom yimar tuhan yakomo yuhat

¹ Filif Natanierrof Jisasr yaktmohat tfit wom hus marf rhunihato ee Galili profinsko yorhwa taun Kanatn wom yimar tuhan fakmor. Nd yima sawohf nayak tatrutmo yihart Jisasrhu mmemt rot yihato rhunhomotm. ² Yo Jisasri rorhu disaiperm rom to inji buga nakumotmm yimomt nd yima sawohf nayak tatruhato htamo yemro burwat. ³ Nd yima sawohf nayakyuk yiha yayuk wain bus yihany yi hanymomtn be fe bugamomm. Jisasrhu mmemt inji hti tanyhato Jisasrpno yimotn mkfo memor, “Nd yima sawohfhu nayakyuk yiha yayuk wainkfat bi yihna yi hnaromm, be bi fe bugaromm.” ⁴ Inji mkfomottr tfit Jisasr kfo wok memor, “Mamai, to nanopno mkfiwann to na finji narhoya? Na nhai bi arihatn na tamoh nefm bi finji narhota. Nantu mirakerroh hingrna yihar tor afo riyorhwor.” ⁵ Be wom mmemt inji kfomotrt, yimotn hingrna yimam kfo ptha memotm, “Ror finji kfiwurko, to be ror kfo pthayuk tng yuhathn hikkfot.”

⁶ Nd kunys rhumoum 6-pela bro bu rohm. Nd bro bu rohm 100 lita bupam tas hmbremoumm. Nd bu rohroh bupam tu Judam nkifra yuk truf o tir kifsa inji nayukmn kakitohmoumm. ⁷ Nd bu rohm brioh bupa duhatmn Jisasr kfo memor, “Bupam watas hmbrekomm.” Be nd bu rohm tas furkiahany bugamomm. ⁸ Be tas hmbreni bugamotmm Jisasr kfo memorm, “Nd asomif tas hmbrehani bupamn wahanyhekomr nd burwat mtohekwa yimar.” Be inji kfomotr wompam hanyhemomr. ⁹ Nd bupa mifm bi wain bupam kekutmom. Nd bupam hanyhemotmr nd burwat tohakyuk yimar fesiwonmorm. Ror be yesiwonhato nhai tawisafrmor nd wain bupam niayuk yuhat. Nd bupam yakyuk hingrna yimarpam tawisafmom nd bupam niayuk yuhat. Nd burwat toh yukatohyuk yimar tfit nakuyakmorr nd tuhan yakyuk yimar. ¹⁰ Nakuyakhato kfo memorm, “Bare, dodh yima bugam inji newum, nd tu marukfet dborioh wain bupam hihany hi hanynitamm, bi fe furkiahme ee tfit wom wain bupa furam yakhato kahukmm. To ni nhai inji nakahn. Nhai. Ninh tu marukfet dborioh wain bupam afo yak htatamonmn tfit asomif fak htenm.”

¹¹ Tot barkof mirakerkfot Jisasr riingrna gngonakmot. Galili profinsko yorhwa taun Kanat tohhato nd miraker-kfot hingrnamat. Nd mirakerkfot hingrnamat, ror yakitohwa yufati bbukefthu yak nuhasyuk neft fak nuasmor. Nd nefmn disaipermtihato to be rroh dukefm Jisasrn htamom.

¹² Be Jisasri turhu mmemt, yo nmemrom, ee turhu disaipermtnd taun Kanat htanyhato tfit Kaperneamko yohnehato ndha tohmom wom yiham.

*Bro Nkifrarhu temperr maket htamo yimam Jisasr yak thumo yuhat
(Matyu 21.12-13; Mak 11.15-17; Luk 19.45-46)*

¹³ Judaroh wom bro yihar kutewumr Pasofa Burwat bi brboh hnamot.* Nd yihar bi brboh hanyetrn ndnettn Jisasr yimor Jerusalemkor. ¹⁴ Jerusalemt yimorn Bro Nkifrarhu temperr gna habrimo gnathu yifhatikt rim fnahnimor. Rim fnahnihato rim htimorm yimam tarior mthayuk bulmakaum, sifsifm, ganyom mmkrm maketim hasomomm. Tfite manoko maruha yak tuknayukm rhuhato maruham nayak tukna-moum.† ¹⁵ Ndhtet ndhtet hingrnefm hingrnamoatm Jisasr rim htihato wom mtitof nmbuham yakmorn wift kanjo hingrnahato nd wiftpno yimam hik nembos tubatumorm. Nd rom maketim haso hanyuk bulmakau sifsifm, rpat fak tubatumorm. Yimam maruha yak tukna hasoyukm, ndm nhaf maruham frbrur bobrur fnahhato teborm yakhato fak kekut fnahmorm. ¹⁶ Be nd nungam maketmoa yimam kfo hutt memorm, “Be na kfiwa asomif nungam tamohm wayakni hany wafnahniko! Ndarte ka nikmoh ndhtet ndhtet hingrnefroh hingrnayuk kunyet? Nhai nanhu Yifemrhu kunys rhukaht? Tamohmpno ndar temperr tfit maket swirt nhombriwat?” ¹⁷ Ror namo neft turhu disaipermtihato tfit dukamomt Bro Nkifrarhu rfa borngtn Defitr kfomo mrokfot. Nd mrokfot inji kfo memot,

“Nanhu bro yima yuhur ninhu temperrn bro dukefr korhwor.

Ndnetann kanga nd temperr be inji arhu marnya hasor.”

Sng 69.9

¹⁸ Judaroh bro yimam nd Jisasr namo nmbuhat htihato kfo ttiwon memomr, “Bare, frohm kfo memomn ndhtet neft wanatwa? To bt asomif wom mirakerkfot wahing-nakahtnt ndt htihato nom kfo mirahnom, ‘Awi, nd yimar Bro Nkifrar kfo tkurrafmorr. Tempert maket htayuk yimam ror nia yak thuneft, nhai mrokfom.’” ¹⁹ Inji kfomotm tfit Jisasr kfo wok memorm, “Nda tempert wayak tasohkomt. Watasohkahtkomt tfit nann husfirpa yiharpa kasinyaruhan.” ²⁰ Be nd yimam Jisasrhu kfomo mrokfot wanyhato kfo memom, “Bar yimako, nda temperr hingrnamoat 46 gunyjim bugam hingrnamoat. Tfite ka ninn be husfirpa yiharpa bmbri kasinyahato hingrnarahnt?”

²¹ To nd ror kfomo tempert nhai tu temper mift kformor. Turhu thatipt kfomor.
²² Ndnetttn kto Jisasr nohhato husfirpa yiham yopt rhuhato tfit sinyamohat, disaipermtihato

* 2:13: Nd Pasofa yihar Judam bro burwat htahato tfit dukamoumt rroh nkifram Ijift tohetmn Bro Nkifrar nrfa htiyakmohat. † 2:14: Romroh gafman maruham yak tuknakhato tfit tu Judaroh maruham yakhato temperrtu takis nd tu Judaroh maruhaye wiknamoum.

tfit dukamomt ror kfoyuk mrokfot. Nd mrokfot dukahato memom, “Bro Nkifrarhu rfa borngt rhuyuk mrokfom yo ror kfoyuk mrokfom fipet mrokfoym.”

Jisasr htitworm yimam niwa nefm yo rom dukewa dukefm

²³ Jisasr afo nd Pasofa burwa yihar Jerusalemr tohhato bok mirakerkfot hingrnamoam bok met yindarim htimouumm. Htihato ndnetmn rroh dukefm rorn htamouum. ²⁴⁻²⁵ To Jisasr yimaroh yima yuhu mifm bi htitworm. Nhai wom yimar tfit rorpno yihato kfo nuhaskfot. Ndnett inji htimohat, duka memor, “Rroh yima yuhum nann be inji hta tefinitammn tfit kto mong trohrahma.”

3

Jisasr Nikodemusrpno pthamo yuhat

¹ Wom yimar, rorhu yufat Nikodemuss, nd yimar Farisiroh hingrneft yikitoh yo Judaroh bro yimar toh inji namour. ² Nd yimar turpathato Jisasrpno yifung yimorn mkfo memor, “Tisaye, nom wom Judanom htitwonomn ni Bro Nkifrar kfo tkrurafoyuk tisaye. Bro Nkifrarhu Yafothat mthu nawoh duha yimar nhai ndar ni hingrnewa kanjohot mirakerkfot hingrnakfot.”

³ Ror inji kfomotr tfit Jisasr kfo memor, “Na kfo mifwann, yimar nhai miyak dborharfor nfri yonm kanjo, nd yimar nhai htiruhatr Bro Nkifrarhu kingdomkfot.”

⁴ Tfit Nikodemusr ttiwonmorr Jisasr, “To yimar bi tabou hanyetr, to finji tfit mmemt fkniruhatr mmemt wompam hiyauruhatr?”

⁵ Inji kfomotr Jisasr tfit kfo memor, “Na kfo mifwann, yimar nhai bupami Bro Nkifrarhu Yafothat yak kekuthato nfri yimar frdborharfor nd yimar nhai fkniruhatr Bro Nkifrarhu kingdomkfot. ⁶ Yima sawohfn kasinyewar, yima mif thetr kak nhombrewur. To tfit Bro Nkifrarhu Yafothathn htewutr yafothar. ⁷ Mirahn bok dukefm ayaka nd na kfo yamukohat, ‘Nfri yonm kanjo miyak dborhakfot.’ ⁸ Wifort wifor thombat, rot be tuthu yiyeft kitt. Ni be mirefrpat wanukantn, nhai htikahnt rot sinya tanya tkitt yo rot yita tkitt. Bro Nkifrarhu Yafothat yimam yak kekuthato nfri yimam frdborha thombat, to inji htirahnm. Nhai htiruhatnt Yafothathu hingrna yuhat.”

⁹ Tfit Nikodemusr ttiwonmorr Jisasr, “To nd Yafothathu hingrnaneft finji kanjo rhuruhat?” ¹⁰ Tfit Jisasr kfo memor, “Bare, ni to Isrerroh tisaye. Tamohmpno ni tawisaf duha yita? ¹¹ Na kfo mifwann, nom kfo pthiwohat, nom bi tunom tawisahfato, yo nom tunmoh nyngaye hti hik bohiket nefmn nom kfo ptha nuhas-wonomko. Nhai be kfo furakahnom. To niko, nom kfo pthiwa mrokfot yekwakomt mongko htewukomt.

¹² Nda bbinysoftthu wuskam, na kfiwanko, nhai wany yakiokahkma. To na tfit yura hefenkorhof wuskam wukfo ptha thombat, to niko finji kanjo wany yakioruhakma?

¹³ Nhai nda bbinysoftthu yimar yura hefenr muhrmor. Nhai. Bro Najomrpar yura hefenr bi muhrmor. Tur yura hefenr wuhtanyhato fawihnamor. ¹⁴ Bingoth Mosesr nungur tik furatn snekbras tuhegirmo kanjo, Bro Najomr tuhegirrahmr. ¹⁵ Nd yuhatn, fitoh fitoh yimam rroh bro dukefm Bro Najomr htemm, be inji toh nkifranirahm.

¹⁶ Bro Nkifrar ndar bbinysoftho fm be tu mfro marbit hta mifmorm. Ndnetrn nd rorhu rpa yon mifr tuhemorm. Memor, ‘Inji anakahta, fitoh yimam rorn rroh dukefm htemm, be nhai nohruhatm. Nhai. Be inji tahi nrwim kanjo toh nkifranirahm.’ ¹⁷ Bro Nkifrar nhai turhu Yonr ndar bbinysoftthu met yindariroh nefroh kothu yikitoh hanyeftn kfo tkruraf-rmorr. Nhai. Rroh nrfa hbhakneftn kfo tkrurafmorr. ¹⁸ Fitoh met yindarim rroh bro dukefm nd Yonrn htewumm, nhai mrokfo duhatem. To nd Bro Nkifrarhu rpa Yon mifrparn nhai rroh bro dukefm htakahmm, nd yimam bi mrokfetm korhm. ¹⁹ To nd rom kotkfot tohruha nmbuhat nhai be sfno. Nda bbinysoftthu yak nukayuk kshr bi niamor. To nhai nd met yindarim htihato nd ksh nukefrn yarim tohkahm. Be nd turoh fasoh fasoh nefmpno yesiswamn nndo kspitat rim tohwom. ²⁰ Met yindarim fasoh fasoh nefm niwam be tu hti nambur mifwomt nukeft. Nhai wofnkahm nd rroh fasoh fasoh nefm nukeft yakhato tafont rhukfot. Ndnetmn nhai nukeftpno yarim tohkahm. ²¹ To yimam

tu dborioh nefm niwam nukeftpno yarim tohwom. Nukeftpno yarim tohwatm, yimam htihato kfo kangm, ‘Rom niwa nefm tu Bro Nkifrarhu dukef yuhat hikwom.’ ”

Jon Baftaisr Jisasrhu toh yuhat kfo ptha hikmo yuhat

²² Nikodemusrpno nakfo ptha buganihato kto tfit Jisasri turhu disaiper Jerusalemr htanyhato tfit tuha Judia profinsn toh htfasmom. Ndha toh htfashato ndharhof met yindarim baftaisimmorm. ²³ Jonr nhaf kmi Ainonthu met yindarim baftaiskfot hemorm. Nd kmit brbo Salimtpno korht, ndombhart bok bu yinham ruhetmn bok met yindarim yihato baftaiskfot yi fakmoum. ²⁴ Nd yihart Herotr tafi Jonr yakhato kalabus hta duhatrn hingrna htfasmor.

²⁵ Jonrhu uhik ahik htfasyuk yimami wom Judar, turoh nkifra yuk truf yuhatpno rinahtakhato nnakfo huttmom. ²⁶ Ndnatn wom Jonrhu uhik ahik htfasyuk yimam yimomn Jonr mkfo memomr, “Tisa, nd yimar ninpno rpat Joden mkukor tohhato kfo memo, ‘Nd yimar Bro Nkifrarhu Yoner,’ to nd yimarn bi bok met yindarim baftais yahukatrm bi rorparpno yimam kitm.” ²⁷ Jonr nd mrokfot wanynihato kfo memor, “Yura hefenr wuyorhwa Bro Nkifrar rpa rpa hingrnfem kahukrm rpa rpa yimam. ²⁸ Nikom bi tukmoh yimbhindange wanymokomt na nd kfo pthamo mrokfot. Memoyanko, ‘Na htiruhakomn mirahko ka asor nd yimar met yindariroh minrfa hhakyuk yimar Bro Nkifrar kfo tkrurafmor. Na nhai. Na be rorhu nyngako tohak hanyuk yimaya.’ ²⁹ Yimar turhu kfo nanf tuhant yakyukr, ror tor. Yinowemr ror be tohhato wanukr mett yindarirhu yufat yuta thombat. Mett bi yindarirhu yufat kutewutr yinowemr be bro yindhoreft kekwot. Ndtn tot nanhu tu bro yindhor nmbuhat yorhwat.* ³⁰ Na kanga rorhu yufatn abrot, nanhu yufat ayohnes.

³¹ Nd yimar ror yura hefenr wutoh tanyhato yawihnamoyer. Yawihnehato rorn yura buriwurm tamoh tamohm. Na, na be ndar bbinysof thofena, ndar bbinysofthu tamoh tamoh nefmn na pthiwa. ³² Ror, ror tu hefenr toh tanyetrn turhu nyngaye hti hik tanyuk nefm yo wany sanyuk mrokfom, nd ndmn pthiwur. To nd ror kfo pthiwa mrokfom nhai bok yimam wuyakkahmm. Dfik yimenrpam wany yakiowomm. ³³ Met yindarim nd rorhu mrokfot wany yakiohato yak hikwam, nd yimam rroh dukefm kangm Bro Nkifrarhu mrokfot tu fipayett. ³⁴ Nd yimar Bro Nkifrar kfo tkrurafetrn ndnatn tu Bro Nkifrarhu mrokfo yuhamn ptha hikwor. Ror mrokfom inji ptha hik bohikwohat to tu Bro Nkifrarhu Yafothar thu dbothat bugayetrn inji ptha hik bohikworm. ³⁵ Nd yimar ror tu Bro Yifemrhu Yinemrn tu marbit htewurr. Ndnetrn tamoh tamohm rorhu tirtn htamotrm rorn bi kakitohworm. ³⁶ Ndnett fitoh yimam o metm Bro Nkifrarhu Yonrn rroh bro dukefm htemm, nd yimam be inji toh nkifranirahm. Nhai inji narfom, be nhai toh nkifraniruhatm. Bro Nkifrarhu namburpam romn yirahm.”

4

Jisasr Samaria efkottpno nakfo pthamo yuhat

¹ Farisim wanymomt Jisasr baftaisimmoa yimaroh thomnafat muhmot, Jonrhut yohnemot. Nd Jisasr baftaisimmoa yimam Jisasrn uhik ahik htfasmoamrn rorhu mrokfom wany yakitohmouumm. ² Nd Jisasrhu yimaroh baftaisimneft nhai tu Jisasrn baftaisimrmoarm. Nhai. Rorhu disaiper mn baftaisimmouumm. ³ Jisasr tur hti nhtahato kfo memor, “Kmim bi nanrpaya bi hikwatm tom Farisim bi htihato kfo pthewum.” Be ndnatn nd Judia profins htanyhato tfit Galili profinsko yimor. ⁴ Judia profins toh tanyhato Galili profinsko yinyeft, Samaria profins yuhat yiyyetet yihotat. Ndnetrn Samaria yuhat yimor.

⁵ Yimorn Samaria yorhwa taun Sikart mfnahmor. Nd taun Sikart korht brbo Jekofr yinem Josef kfo nuhasmo tkit nmbuhatpno. ⁶ Bingot Jekofr toumo bujr nd tkitt rhumor. Jisasr myau minysafmorn nd bujrpno mrhumor. Marr bi dany marr kanjo toh hanymor.

* 3:29: Jisasr mett yakruha yimar kanjo inji tohwor. Met yindarim Jisasr yakruha kfo nanf metem.

⁷⁻⁸ Jisasrhu disaiperndha mhtanimomrn taunko yeshri wiknat yimom. Ror turpatr nd bujr rhu hasetrn Samaria efkott yimot bupa tasis. Jisasr nd mett htihato kfo memort, “Bupam wahina.” ⁹ Nd Samaria efkott inji wanyaf hanyhato kfo memot, “Bare, ni finji kfiwa? Ni Judaye na Samaria efkota. To tamohmpno na nndo Samaria efkota kfo yamukona, ‘Bupam wahina?’” Judami Samariam nhai rpata rhuhato yemska inji narmoam. Ndnetttn inji kfomot. ¹⁰ Inji kfomottr tfit Jisasr kfo memort, “Bro Nkifrar yahuka tamoh tamohm ni bi wahti hik bohiknm yo na bupa tndauwa yimaya bi wahti nhtana, to tfit ninn toh kekuthato womhtet bupam kfo tndaurfona. Inji tndaurfona womhtet bupam herfoyann. Nd womhtet bupam yanyeft yimam toh nkifranitm.” ¹¹ Jisasr inji kfomotrt, tfit mett kfo memot, “Bro yimaye, to ni bupa yakyuk baket duhate. Bujruh bupam watohngotwom. To fitha yakhirhoyanm nd ni kfiwa bupam?” ¹² Nmoh nkifra Jekofr ndar bujr tou htanihemornom. Bujr mfro yohnemotr bupa tashato rorhu yon tuhanm, sifsif bulmakaum, bupa tashemoahat be baketrpaye bupa tasakhemourm. Ndnetttn nhai wom fitoh yuhamn bupa tasruhatnom. Ka ni kangn, wom yuhatn bupam yakruha?” ¹³ Nd Samaria efkott inji kfomottr tfit Jisasr kfo memort, “Fitoh met yindarim nda bujrhu bupam tas yewam, nyunguramm tfit knarahmm. ¹⁴ To fitoh yimar nd na heruha bupam favor, be nhai tfit wom nyunguram knaruhatr. Nd na hayuk bupam yiayhato mirhurahm, nd bupam tfit yinha kanjo mfrfnah hasohato nd bupamn yakinohruhatmt rorhu toh nmbuhat, be inji toh nkifranirahr.” ¹⁵ Jisasr inji kfomotrt tfit rot kfo memot, “Bro yimaye, nd ni kfi bupam wahina. Nd bupa yekahann, nhai tfit nyunguram knakhato tfit bupa tasis nierhot.”

¹⁶ Inji kfomott tfit Jisasr kfo memort, “Afo ninhu ramemr wamkfaknr.” ¹⁷ Tfit rot memot, “Na nhai ram duhata.” Tfit Jisasr kfo memort, “Nd ni kfo yamukohat nhai ram duhate, ndt tu kfot kfiwun, ¹⁸ yimam bi yakhna yakhnamonmn bi tirfa yima rhuhnamo. Nd 6-yukr to bi tor womr. To mirahn ka ndr nanhu tu ramem mifer. Nhais. Ni kfi mrokfot tu kfot kfina.” ¹⁹ Jisasr inji kfomotrt kfo memot, “Bro yimaye, bi wany nhtewann ni ka profete. ²⁰ Nom Samarianmoh nkifram Bro Nkifrar bro lotum yakinohmoahat nda kminysofr mrifinyhato lotu hakumoum.* Tfit arihatn niko Judako kangko, ‘Be Jerusalemrpar yihato walotuko.’”

²¹ Mett inji kfomott tfit Jisasr kfo memort, “Bar mete, na kfiwa mrokfom wawany yakionm. Tor wom yihar riyorhwor. Nd yihar nhai ndar kminysofrn yuwa muhhato Bro Yifemr loturuhatkomr o Jerusalemr yihato loturuhatkomr. ²² Niko Samariako Bro Nkifrar lotutwohat niko be nmbuha nmbuha mrokfom wanyhato lotutwoko. Nhais tawisaf marnyahato lotukahko. Nom tu Judanom Bro Nkifrar lotut-wohat nhai be lotu furakahnomr. Nmoh nkifra tndh mrokfot kfo nuhas-wotnom Bro Nkifrar yimam nrfa htiyakyuk yuhat. Nom nd tndh mrokfot bi nkiframn yo profetmn ptha hnamotmt nom wanyhato ndnetttn nom Judanom tawisaf marnyahato Bro Nkifrar lotutwonomr. ²³ To kfiwanko, yihar niayukr to bi asor bi niaror. Yimam Bro Yifemr kangm alotunom, nhai tfit kminysofm o Jerusalemr dukahato loturuhatm. Nhais. Bro Nkifrarhu Yafothat thu nawohruhattm tu Bro Nkifrar dukewa dukef yuhatn kanjo loturahmr. Ndhtet yimam Bro Yifemr hifa hti yindhor-wor. ²⁴ Mounti bbinysoft Bro Nkifrar thu yurhato kukatohwor. Ndnetttn yimam kangm Bro Nkifrar alotunom, turhu Yafothat thu nawohkahttm tur dukewa dukef yuhatn kanjo lotukfot.” ²⁵ Jisasr inji kfomotrt tfit nd Samaria efkott kfo memot, “Na tawisafwa, Bro Nkifrar kfo htamo yima nrfa hbhak-yuk yima Kraisr nierahr. Ror niere, rorn kfo nuhas bonuhas bugarahrnom tamoh tamoh mrokfom.” ²⁶ Rot inji kfomott tfit Jisasr kfo memort, “Na to nda. Na ndann kfo pthanuhiwann.”

²⁷ Rof inji nakfo ptha haso hanymo fijo disaiperndha mfnahmom. Be yihom hti fohtasmomr nd Samaria efkottpno nakfo ptha hasetfn. Rom inji yihom htimohat be gonnng yagonngt toh natohmom. Nhais womr marimor, “Ttiwon miruhanr, ‘Tamohmpno

* ^{4:20:} Nd mett kfomo kminysofr Gerisimr kfomot. Samaria profins korhr nd kminysofr. Samariam bro lotum yakinohmoahat to nd kminysofrpar muhhato lotumoum. Nd kminysofrhu kfo nuhas mrokfot Lukr kfomort sapta 9 ves 53 kfotn.

nd mettpno napthiwan? Yo tamoht kangan ayaka?" " Nhai womr inji kfo ttiwonrmorr.
²⁸ Be nd mett bu baket wuskam wahtanymotmn taunko tfit yimot. Yihato kmi thofm mkfo memotm, ²⁹ "Bar yimako, waniakah-komn wahtikomr wom yimar. Na nahayuk tamoh tamoh nefm kfo hik bohik bugerm. Ka tor nd yima Kraisr Bro Nkifrar kfomor."

³⁰ Be inji mkfomottm taunthu tuhant yindars sinyahato yi htimomr Jisasr.

³¹ Nd yiharpno disaiperm Jisasr kfo memomr, "Tisaye, ni nuwa afo waya." ³² Rom inji kfomotmr tfit Jisasr kfo memorm, "Nantu yayuk yeshrim niko nhai tawisafkahkomm."

³³ Disaiperm tum rinahti rinahtihato kfo memom, "Ka nom taunko tohetnomn wom yimam yeshrim hnahuumr." ³⁴ Jisasr inji wanyaf hanyhato kfo memorm, "Nantu yeshrim akfo nuhasanko. Nd na tkrurafmo yimarhu dukef yuhatn na be hikhato nd ror kfoyuk hingrnafat afo na hingrna bugakfot. Tot nantu tu yeshrt.

³⁵ Wom mrokfot kfo kangko, 'Kto husfiusyuk yamtpno ka mswirroh yeshrt bi yeshriyettn yakrahm.' To tfit kfiwanko, mswir mswirroh yewurit afo wayukatohkomt bi finji yorhwam? Bi yak yibon nefrpayet bi. ³⁶ Nd yimar mswirroh yewurithu yak nhafoh htfasyukr dborioh marufat bi yekwarn, nd mswir mswirroh mtoh nkifraniyuk yewurit kak htfaswort. Ndnettnd yimar yewuri nuhtayukr yo yewuri yak nhafoh htfasyukr rpat yindhorrahf. ³⁷⁻³⁸ Bi wommnuhta htamo yewuriyah yakneft kfo tkrur-afomoyanko. Bi wommn yikiat hta-motmt, niko be rroh yikiat htayuk yewuritn yihato fakmoko. Ndnettnd mrokfot niko kfiwat, tu kfot kfiwuko. Womr yewuri fan nuhta hanyuker, tfit womrn mongko tohhato nd bi yak yibon hanyet yewuriyah yak nhafoh hnayuk yimayer."

³⁹ Nd Samaria ekfott taun yihato mkfo memohat, "Na nahayuk tamoh tamoh nefm kfo hik bohik bugerm." Inji mkfomohat, boknambok Samaria thofm wanyhato rroh bro dukefm Jisasr htamom. ⁴⁰ Jisasr nd mettpno napthamo bujrpno rhu hasetrn Samaria thofm yihato mkfo ttiwon-momr rompno afo toh tanyneft. Inji mkfomotmr afo hus marf tohnho tanymorm. ⁴¹ Nd ror tohmo yihaf tohhato kfo pthayuk mrokfom hifa wanymomm. Ndnetmn bok met yindarim wany yakiohato hikmomt rorhu mrokfot. ⁴² Nd Jisasrh mrokfom wany yakiohato hikmo yimam yihato nd mett mkfo memomt, "Ni mirahn ka nd ni kfoyuk mrokfo-rpatpno riwanyakhato ka nmoh bro dukefm rorn htewunom. Nhai. Nom tunmoh nyngaye yo yimbhindange hifa wanukwanomn ndnatn kangnom ror tu ndar bbinysofthu met yindari-roh nrfa htiyakyuk yimayer."

Jisasr kingrhu ofisarhu yonr yak marnyamo yuhat

⁴³ Jisasr hus marf Samariat toh tanyhato tfit Galili profinsko yimorko. ⁴⁴ Bingot tu Jisasr bi kfo memor, "Bro Nkifrarhu profetrhu yufat bi kmi kmim rhu htfaswot. Turhu kmiti turhu kuny shofm, rompno nhai yufapa duhater." ⁴⁵ Jisasr Galili profins yimohat, yindhorakmomr. Nd Jerusalemr rhumo bro Pasofa burwa yihar rom tum yimomn nd Jisasr hingrnamo mirakerfom turoh nyngaye htimomm. Ndnatn tfit Jisasr Galiliko yimohat yindhormomt rorhu yi nmbuhat.

⁴⁶ Jisasr Galili profins yihany yi hanyhato bupa mifm tfit wain bupam yak kekutmo kmi Kanat mfnahmor. Nd yihar kingrhu ofisarhu yonr taun Kaperneamko dbohneetr rhumor.

⁴⁷ Nd ofisar wany memohat Jisasr bi Judiako htanyhato Galiliko nier, nd ofisar yimorn Jisasr mkfo ttiwonmorr Kaperneamko yihato rorhu yonrhu yak marnyanef. Rorhu yonr bi nohyuk tkitt rhumor. ⁴⁸ Inji kfo pthamotrr tfit Jisasr kfo memor, "Niko mirakerfom hti duha, nhai nann nikmoh bro dukefm htakahkma." ⁴⁹ Kingrhu ofisar kfo memor, "Broye, bmbri wania. Nantu yonr nohhirahra." ⁵⁰ Jisasr nd ofisarhu mrokfot wanyhato kfo kangrr, "Wanju, ninhu yonr nhai nohruhatr." Be wom ofisar nd Jisasr kfoyuk tngt wany yakiohato yimor.

⁵¹ Nd ofisar yihotat yi hanyhato tafi taun Kaperneamt mfnah duha turhu hingrna yimam toni hnehatu yihotatn mkfohiyak memomr, "O, ninhu yonr tor yima nfriyer. Nhai nohrror." ⁵² Rom inji mkfohiyakmotmr tfit ror ttiwon kangrm, "To fitoh yiharn nd dbohneft thu trohrotr?" Tfit rom kfo memor, "Yihofnano 1-kilok krif marr dbohneft thu troh tanyrotr." ⁵³ Be yifemr inji wanymohat tfit duka memor, "Dajohmn, na Jisasr

to ndhtet yiharn kfo mariora, ‘Ninhu yonr nhai nohruhatr.’” Be nd ofisar ndt htihato rori yo nd rorhu rpa kuny shofm Jisasrn rroh bro dukefm rihtakmom. ⁵⁴ Tot ndt husuk mirakerkfol Jisasr Judiat toh tany tfit Galiliko yihato hingrnamat.

Jisasr nd bro rhu krna lotu yiharoh mrokfo yuham kfo nuhas bonuhasmo yuhat

5

(Sapta 5-10)

Betesda yuk bfar Jisasr yak marnyamo yimarhu mrokfo yuhat

¹ Tfit kto Judaroh wom bro lotu yiharhu yemro burwat Jerusalemr htamotmt, Jisasr Jerusalemko yimor.

² Nd Jerusalemrhu wom bro kmi yifhatikt kutewumt Sifsifroh Yifhatikt, to brbo nd kmi yifhatiktpno hingrna-momr wom bro yuk bfar. Hibru yarmumat kutewumr Betesa.* Nd yuk bfarhu manoh manoh thmbmn yimaroh rhu mskayuk tirfa kuny nafom hingrna habrimomm. ³⁻⁴ Nd kuny nafomn rhu hasomoum dbohna yimam, nyinga kunyjetm, wura bebetm, yo wura noh minysafetm.[†]

⁵ Ndha nd tkittn rhumor wom dbohnet yimar. Nd yimar 38 gunyjimm rorhu dbohneft hatohmort. ⁶ Jisasr yau hanyhato nd yimar hwe kkor hasetr mhtimorr. Nd dbohneft htimorr bi rihatongtotakmor. Inji htihato kfo ttiwon memor, “Nine tu waduka. Kangn nd dbohneft athu trohta?”

⁷ Jisasr inji kfomotrr tfit nd dbohna yimar kfo kangr, “Bro yimaye, nda tek bupam hamuh dbrufwohat to fitoh yimarn yaknihato wahtewotra bt nd dbohneft thu trohkahta? Buparoh hamuh wohnepam htihato kanga tukann yudbat aikahann amitohniya, wommn bi dimandinihat mitohnitatm dbohneftm thu trohwomm.” ⁸ Inji kfomotr Jisasr kfo memor, “Wasinya! Wasinyakahnn yitwat wayakkahnt wayauwakni.” ⁹ Be yudbat nd yimar marnyanimor, nndo memom ka kparn watuyekwor. Be nd tur hwe hasoyuk yitwat miyak riraknihato fauyaknimor.

Sabat yiharn ndhtet neft rhumot. ¹⁰ Ndnettun Judaroh bro yimam inji htiyakmohat kfo memomr, “Bare, tamohmpno nda bro Sabat yiharn nd yitwat yihom hauyak mhauyekwant? Boririfhut kfo kangt, ‘Mirahn Sabat yiharn yitwat yihom hauyak mhauyakant.’” ¹¹ Tfit ror sinyahato kfo memor, “Nd na yak marnyafoyuk yimar kfo famura, ‘Wasinyakahnn yitwat wayaknikahnt wayauwakni.’” ¹² Tfit kfo ttiwon memomr, “To frohrn kfo yamurn, ‘Yitwat wayaknikahnt wayauwakni?’” ¹³ To nd wura noh minysafet yimar nhai hti hik marnyaf-rmornd ror yak marnya tanyuk yimar. Yonmar yima rifinyrn Jisasr nd yimar yak marnya tanymohat to be nd yima rifinr buharn tayinyarnihato frtkunimor.

¹⁴ Kto Jisasr Bro Nkifrarhu temper kmifar rim fnahnihato nd yimar yiro temper kmifar toh hasetrn rim htimorr. Rim htihato kfo memor, “Wahti. Ni bi tu yimaye. Nd ni hatohmo yonmari dbohneft be bi thu troh tanymotn. Arihat mirahn tfit wom tamoh nefm arim naya. Tfit finji rim narahn, to be nd yiha be tu bro krhopam yakrahn.” ¹⁵ Be nd yimar ror yak marnyamo yimar hti hikhato Judaroh bro yimampno yihato kfo nuhas memorm, “Nd na yak marnyamo yimare, Jisaser.”

¹⁶ Be nd Judaroh bro yimam inji wany hikak marnyahato Jisasr rihti dbnotakhato riptha namburak memom, “To nd yima Jisasre frohm kfo memomr, Sabat yiha ndhtet hingrnefm wah-ingrnatwa?” ¹⁷ Jisasr nd rroh kfo hutt mrokfom wanyhato kfo memorm,

* ^{5:2:} Wom yimam kutewumt Betsata. † ^{5:3-4:} Ndar Bro Nkifrarhu rfa borngthu mrokfom hti hik bohiket yimam ndar hus vesfhu mrokfom hti nhta yak nhtamomn kfo memom tom wom mrokfom. Nd mrokfom kfo memom, “Nd wonk wonk dbohnet yimam rhu hasohato nd yuk bfarhu hamuh wohnepam hti hasomoum. Wom yiham Broru mounmotr nd yuk bfarn yimoarn yohnenimour. Yohnenihato bupam hamuh dbfamourm. Nd dbohnet yimam nd hamuh wohnepam hti hasohato bi nd hamuh wohnepam wuthani hanyetmn fitoh yimar fukni gngonr, nd yimaru dbohneft thu trohmoutr.”

“Nanhу Yifemr nhai rhu witakahr hingrnaneft. Na to nd yuhatn na nhai rhu witakfot hingrnaneft.” ¹⁸ Be nd ror kfomo tngrpno Judaroh bro yimaroh yima yuhum kahm kindo wakur sinyahato kfo memom, “Nome ndar yimar finji anakahtnomr anohr. Sabat yiham nhai mikahr nd yihar be wom tamoh nefm finji na duha. Yo nhai be nd nefrpas nakahr, Bro Nkifrar kangrr rorhu Yifemer. Kangr Bro Yifemr kanjo aruha, nd dukeftn nd nefm newurm.”

Bro Nkifrarhu Yonrhu yakitohyuk hingrnem

¹⁹ Jisasr nd Judaroh bro yimam kfomo mrokfot wanyhato tfit ror kfo memorm, “Na kfo mifwanko, Yonr turhu Yifemrhu hingrnem hingrnem. Nhai be turhu yima yuhurn o dukefrn tamoh hingrnem hingrnakahr. Nhai. Ror turhu Yifemr hingrnayuk hingrnem yuham hti hikakhato hingrna hik hanitr. ²⁰ Nd Yonr be Yifemrhu mondt yihom furwarn nd ror niwa nefm yak nuhaswatrr newurm. To mirahko ka be nd nefrpam htirahnom. Nhai. Tu bro bro nefm yak nuhasruhatr tfit rorn nd nefm nikompno naruhatrnikom tfit hti kshrfahato kfo mirahko, ‘Mamai! Ndart tamohet nefet?’ Mfham danyr yohtnehrahm. ²¹ Ndt nhai be kfo nhehkfoy. Bro Yifemr noheh yimam yak kasinyahato yima tkonham kafkni yahuka kanjo, to be nd yuhatn yinem Yonr turhu hti fijo yimam tkonham kafkni yahukrm. ²² Yo nhai tfit Bro Yifemrni kotkfot yakitohruhatrt. Nhai. Nd hingrnem bi Yonrhu tirtn htamort. ²³ To be ndnatn nda bbinysothu yimam be yinem Yonrhu yufat yuta hagrharahm Bro Yifemrhu yufat wuyuta hagrha hakutwa kanjo. Fitoh yimam nhai yinem Yonrhu yufat yuta hagrakahm, nd yimam nhai nd yonr kfo tkruryuk Yifemr kfo hagrakahm.

²⁴ Na kfo mifwanko, fitoh yimam na kfo tkrurafyuk Yifemrni rroh dukefm rhuhato nanhu mrokfom hikwom, toh nkifranirahm. Nhai nd kotkfot tohruhatm. Be mrokfo duhatm rhurahm. Nd hel yita yihotat bi htanyhato Bro Nkifrar htayuk dfa tikr bi rim tohnihato hefenrhu yihotat kau hanitwom.

²⁵ Na kfo mifwanko, yihar niayukr to bi asor bi niaror. Nd hel yi hanita met yindarim yinem Yonrhu tngt wanyrahm. Wanyakhato Bro Nkifrarhu yihotat toh hanyrahm.

²⁶ Yimaroh rhu tohefr tu Yifemrni kakitohworr. Nhai wom yima furam yakitohkahmr. Yifemr yakitoh hasohato tfit tu Yinemrhu tirtn yimaroh rhu tohefr fak htamorr.

²⁷ Yo kotkfotu yakitohneft bi tu Yinemrni, nmoh Bro Najomr, turhu tirtn fak htamort.

²⁸ Mirahko nd na kfiwa mrokfom pno mfha tha duhatnom arhunom. Yihat nieraht, noheh yima bugam yopm toh hanyukm tfit Yonrhu naku tngt wanyhato ²⁹ tfit sinya hanyrahm. Fitoh yimam toh marnyem nd yimam tfit sinya thombat, be mrokfo duhatm rhuruhamn dboriorh rhu nmbuhat yakhato toh nkifranirahm. Fitoh yimam fasoh nefm nayetem, nd yimam sinya thombat, be kotkfot tohniruhamn rroh toh nmbuhat, fasoh toh nmbuhat yakrahm.”

Jisasrhu rhu toh nmbuhat womm htihato kfo pthamo yuhat

³⁰ Jisasr tfit kfo memorm, “Na nhai wom hingrnem be nanhu yima yuhurpar wak-fakhato hingrnakfot. Nhai. Na tukianhu Yifemr kfo htafmo mrokfo yuhatn hikwoyann met yindarim nayuk tamoh tamoh nefm htihato kak hta bohtahukanm. Ndnatn na yimaroh nefm yak hta bohtiowhat na tuka kfo tkrurafmo Bro Yifemrhu mrokfo yuham hikhato kak hta bohta marnyahukanm. Nhai nndo mando riyohne ayohneka.

³¹ Be na tukiann, na tukanhu toheft aptha srhant, be nhai nanhu mrokfom wany fugharfotkomm. Nhai. ³² To tor womr riyorhwar. Rorn nanhu yufat kfo ptha yimbu hikwort.‡

³³⁻³⁴ Yo Jon Baftaisr tu nanhu rhu toh nmbuhat kfo ptha yimbu hikmort. Ndnett nikmoh wom yimam Jon Baftaisrni yihato rorhu kfoyuk mrokfom wanyakmom. Nanhu dukeft duka kanga, nd mwanyakyuk mrokfom hikrahkomm, Bro Nkifrar nrfa htiyakrahrko. To na nhai duka mekoha, ‘Tfit wom yimarn buha tohhato nanhu rhu toh nmbuhat rorn yimampno kfo ptharuhatrt yimam wanyhato hikrahma.’ Nhai. ³⁵ Jonr

‡ ^{5:32:} Nda veskfot kfo yamuka, “tor womr riyorhwar,” ndr to Bro Nkifrar kfiwt.

kshr kindo niahato fakitohmorr. Ror nd yakitohmo kshrhru nukeftpno afo myindhor tefinimoko.

³⁶ Yima Jonr niahato kfo pthamo mrokfom rom tu nanhu rhu toh nmbuhathu mrokfom kfo pthamor. To nd Yifemr na hemo hingrnefm na hingrniwam, tom nd hingrnefmn yimam kak nuhaswomm na Bro Yifemr kfo tkrurafmo yuhathu tu hingrnefm. Nd hingrnefmn yimam htihato kfo kangm, tom tu Bro Yifemrhu hingrnefm. ³⁷ Na Yifemr tkrurafmotra nda bbinysoft niamoya. Turn nanhu rhu toh nmbuhat kfo ptha nuhasmor. To rorhu tngt nhai nikmoh yimbhindange wanyrmokomt yo nhai rorhu nyingatikt nikmoh nyingaye htirmokomt. Nhai. ³⁸ Na nd Bro Yifemr kfo tkruryuk yimaya, to na nhai hikkahkma, ndnettn nhai rorhu mrokfom yakitohkahkomm.

³⁹ Nikmoh dukeft duka kangko, ‘Bro Nkifrarhu mrokfomn tu toh nkifraniyuk dborioh rhu nmbuhat yak htarahnmom.’ Ndnettn nd mrokfom htitakomn kak nhta bonhtewukomm. To nd mrokfom to nann kfo hik bohikwom. ⁴⁰ To niko nhai wany yakiohato na hikkahko. Ahikko to hifa rhu nmbuhat herfoyanko.

⁴¹ Na nhai mikaha, mrokfom apthakahta yimam wany kafhurrahma. Nhai. ⁴² Na hti hasiwanko nikmoh yuhuwaf marbim nhai Bro Nkifrar rhukahm. Nhai. ⁴³ Na niamohat, tu Bro Nkifrar tkrurafmotra fawihnamoya. To niko nhai marimoko, nd na kfoyuk mrokfot wuthu kmbriyakhato ayak hiknomt. Nhai. Be wom yima furar be turhu fijo niahato mrokfo kfo pthaneft niko be yudbat myoh brurnihato bmbri hikaknitkomt. ⁴⁴ Niko ndhtet met yindariko be tu nhai mif yak hikruhatkomt nanhu mrokfot, nhai mif. To nikmoh bro dukefm be kangko, ‘Be tunom nayuta yindhorhato bro yufat ayak hasonom.’ Nhai wofnkahko Bro Nkifrarpayahuka bro yufat.

⁴⁵ To niko mirahko ka nann kotimruhanko Bro Nkifrarhu nyinga-tikhato. Nhai. Nd niko kotimyuk yimar tor riyorhwor. Mosesrn kotimrahrko. Niko kangko, ‘Nda Mosesrhu mrokfotn hifa tkitt htarahtnom.’ To nd mrokfotn tfit toh kekuthato kotimrahtko. ⁴⁶ Nd Mosesr wandfamo mrokfom to nanhu rhu toh nmbuhat wandfa hikmor. Ndnettn kanga niko Mosesrhu mrokfot yakhato ahikko, nann hikrfoko. To nhai. ⁴⁷ Na bi htitanko nd Mosesr wandfayuk mrokfot nhai yak hik marnyakahkomt. Ndnatn to nanhu mrokfot nhai yak hikruhatkomt.”

6

Jisasr 5,000 yimam yeshr hemo yuhat

(Matyu 14.13-21; Mak 6.39-44; Luk 9.10-17)

¹ Tfit kto Jisasr tfit mmbrt yaknihato tek Galili barithu mkuko yimor. Nd tek barithu wom yufat kutewumt Taiberias. ² Boknabok met yindarim Jisasr hingrnamoaa mirakerkfom htimoumm. Yimam tamohtet tamohtet dbohnefm hatohetm ror kfomour marnyanimoou. Ndnetmn yonmari rifuhetr yihom hikak mhikakmoumr. ³ Ndnetrn wom kmir muhhato turhu disaipermpno afo rhumom. ⁴ Jisasr inji namohat nd Judaroh bro rhu krna yihar, kutewumr Pasofa burwar, nd yihar bi brboh hanyetrn turhu disaipermpno rhumor. ⁵ Jisasr memor, “Ayukatohafoya,” asha htiyakmorm yonmari rifuhetr. Be ror nd yonmari met yindari rifhur htiyakhato tfit Filifr ttiwon rhti memor, “Nda yonmari rifinyr niwarne, to yeshrim fitha wiknahato yahukanomm?” ⁶ Nd ttiwon mrokfot Jisasr kfomot, be yuwi Filifrhu yima yuhurhu was tiwonneftn inji ttiwon rhtimor. Tu Jisasr ror tor rhumor rorhu yima yuhur nd yimaro finji nayukr.

⁷ Jisasr inji kfomotrr tfit wom Filifr kfo memor, “Mirahnom 200 kina yak nhafohkah-nomn 200 kinakfet bretpam ayaknom nda yonmari rifhur href finji yak nhtahukam?”

⁸ Tfit tu Jisasrhu disaiper Andrur, Saimon Pitarhu habhir, ror warhuhato kfo memor,

⁹ “Asor wom yima damiagr kakitohwor bari plauapaye tonet 5-pela bretpami hus yira bjhenf. To kangnome nda yonmari yima rifinylre ka hifa kak nhombra twanhiwum nd 5-pela bretpenmi hus yira bjhenf?” ¹⁰ Jisasr sinyahato disaiper kfo memorm, “Nd yimam wakfokahtkomm afo ndha nd kipr suhtn asibosi rmon hanym.” Be kfomotmm tuha kipr suhtn sibosi rmonmom. Nd yindarim nd rifinymom, 5,000 yindarim rifinymom.

¹¹ Be nd tuhan yindars sibosi rmonmotm Jisasr nd bret nuwat yakmortn Bro Nkifrar wukfo yindho-rakhato yak tif botif rmonmortn fak nhtahemorm. Yimam be turoh yak fijo fakmom. Yo nd yira bjhenf yak nhtahemohat, nhaf rpahtet neft namor. ¹² Ye furkihmotm Jisasr turhu disaiperm kfo memorm, “Waikahkomn nd rroh yesmbhehm wayak nhafohomm, rhu gbitnarahm.” ¹³ Be nd turhu disaiperm sinyahato nd 5-pela bretparoh yesmbho hta hanyuk bretpam fak nhafoh bugamomm. Yak nhafohhato kpm hmbremohat 12-pela kpm hmbremomm nd yesmbhehm.

¹⁴ Met yindarim nd Jisasr namo mirakerkfot htihato be tfit tum rinakfo nakfo memom, “Dajohmn, nd Bro Nkifrarhu rfa borngt kfo hnamo profetr ka asor bi niamor.” ¹⁵ Nd rom nakfo pthamohat, Jisasr bi wanymormn ror duka memor, “Arm bi inji rinakfo pthekwamn tir tir yak rim htahato kfo mirahma, ‘Rorn nmoh kingr tohrahr.’” Jisasr nd dukefr yakmotrr nd tkitt htanymortn tfit turpetr yura kminyoskfo muhmor.

Jisasr yura tek yuhat yau hanymo yuhat
(Matyu 14.22-33; Mak 6.45-52)

¹⁶ Krifn disaiperm tfit tek bariko yimomwe. ¹⁷ Yimomn mmbrt yaknihato memom, “Tek barit hir hayuknihato tfit Kaperneamko riyahnom.” Yifungta hanymot nhai bi Jisasr mifnahrermorm. ¹⁸ Hir hanyetmn bro wifort sinyahato sikfot rpat sinyamot. ¹⁹ Nd wifortpno rihirhany rihirhany, ka bi 5 o 6 kilomita kanjo bi rihir hanyetmn ee Jisasr htiyak hanymomr yura tek yuhat yau hnehato brbo mmbrt pno fau yaknimor. Rom inji htiyakhato fakrmemom. ²⁰ Be bmbri tu Jisasr kfo kangrm, “Mirahko ayakrmenom. Na Jisasa niewa.” ²¹ Be inji kfomotrm disaiperroh yima yuhum mirhuhato rroh mmbrt tfit fak kmbremomr. Mikmbremotr be yudbat nd mmbrt rim fnahmot rom yiyuk tkittn.

Met yindarim Jisasr yau hambromo yuhat

²²⁻²³ To nd Jisasr kfo bruttnahato yeshrim yak nhtahemo tkitt toh hasomo yimam, tfit ndwom dbha marrn barit hirmo mmbrm htihato kfo memom, “To nom yihof Jisasr yeshrim herohat afo rpa mmbrrpat htironom. To nd mmbrt to bi disaiperrpam krif fakniomt. Jisasr nhai hikrrorm.” To ndha hirmo mmbrm Taiberiuskorhof mmbrm hirmoum. ²⁴ To Jisasri rorhu disaiperm hti hambromohat, be tfit nd Taiberiasroh mmbrmn myaknihato Kaperneamko hir hikmomm.

Jisasr hefenrhu bretpayer

²⁵ Kaperneamko rim htanihato Jisasr hambro hanyhato mhtimomr. Mhtihato kfo ttiwon memomr, “Tisaye, to nine asombha niarohate fitoh yiharn niaro?” ²⁶ Be rom inji ttiwon-motmr tfit Jisasr kfo memorm, “Na kfo mifwanko, niko na hambro hnewohat nhai be na nahniwa mirakerf htihato kfo mikahkma, ‘Dajohmn! Tu Bro Nkifrarhu Yon mifer.’ Nhai. Be nd bretpam yak yurhhato ye furkihmo yuhat htimokomn ndtpno tfit kak hambro htfaswokma. ²⁷ Mirahko be yatiyeft yakyuk yeshrt adukanom. Yiro yafothat yakyuk yeshrt dukakfot. Nd yafothathu yeshrt ye hmbrihato toh nkifranirahko. Nd yeshrt na Bro Najoma hiruhanko. Bi Bro Yifemr nd hingrneft bi fak htamora.”

²⁸ Jisasr inji kfomotrm tfit rom ttiwon memomr, “To nom finji nahato nd Bro Nkifrar kfoyuk hingrnefm yak hikruhanomm?” ²⁹ Rom inji kfomotmr tfit Jisasr kfo memorm, “Bro Nkifrarhu hingrneftu hingrneft inji korht: Nikmoh bro dukefm nd tu Bro Nkifrar kfo tkrurafomo yimarn rhukfot.”

³⁰ Rom nd mrokfot wanyhato tfit Jisasr ttiwon memomr, “To ni finji kanjohtet mirakerkfot hingrnaruhatnt nom htiruhanomn kfo miruhanom, ‘Dajohmn! Tu Bro Nkifrarhu Yon mifer.’ To ni tamohtet hingrneft hingrnaruha? ³¹ Nmoh nkifram nungur tik furat, kutewumt deset, nd tkitt hwe toh hnehato manakfot yakmohat, to rfa borngt kfo kangt, ‘Yura hefen yuhat yawihsayuk bretpam ndm hemotrm famom.’” ³² Be rom inji kfomotmr tfit Jisasr kfo memorm, “Na kfo mifwanko, Mosesr nhai yura hefen yuhat yawihsayuk bretpam yakhato hermorko. Nhai. Nanhu Yifemrn kahukrko tu yura hefenkorhof bretpa mif mift. ³³ Nd bretpat Bro Nkifrar heyukt yura hefen yuhat wutoh

tanyuket. Nd bretpat yayuk tuhant yindars be toh nkifranirahm.” ³⁴ Jisasr inji kfomotr tfit rom kfo memom, “Bro yimaye, nom kangnom, nd bretparpam yiha yiha wahi hanywannom.” ³⁵ Rom inji kfomotm tfit Jisasr kfo memorm, “Na to nd toh nkifraniyuk yafothat heyuk bretpaya. Yimam nanpno nierahm be nhai tfit yatinohruhatm. Yo nann rroh bro dukefm rhurahm, be nhai tfit bupa knaruhatm.”

³⁶ Jisasr inji kfonihiato tfit kfo memorm, “Mrokfot to bi kfiyanko. Niko na nahayuk nefm ar bi htihetko, to nhai nann nikmoh bro dukefm rhuhato hikkahkma. ³⁷ Yimam Bro Yifemr bi nann fahur nanpno nia tohrahm. Nhai kfo krmah o yak thu inji narhotanm.

³⁸ To na hefenr wuhtanyhato yawihamohat, nhai be tukianhu dukefthu hikneftn yawihamo. Nhai. Memoya, ‘Bro Yifemrhu dukef yuhatn na be hikhato nd ror kfoyuk hingrnafat hingrnaruha.’ ³⁹ Na Bro Yifemr kfo tkrurafetann fitoh met yindarim bi tu Bro Yifemr nanhu tirtn bi hterm na nhai womr yak troh tanykfot wuroh ndar bbinysofthu bat yihar. Nhai. Nanhu tirt bi htetm yahot tathakni bugaruanm. ⁴⁰ Nanhu Yifemrhu yima yuhur inji duka kangr, nd dodh met yindari bugam Yonr yukatohhato ror yak hikwam, rom tu dborior toh nmbuhat yakhato be toh nkifranikfot. Na tukann wuroh yihar nann yahot tathakniruhanm.”

⁴¹ Jisasr kfo memotr, “Na yura hefen yuhat yawihamo bretpaya,” nd mrokfotpno Judam wanyhato rroh yima yuhum nhai marnyarmomm. Kfo hutt memom, ⁴² “Nd yimar nom tawi-safwononmr. Josefrhu yinem Jisaser. Rorhu yifammaf nom tawisafwononmf. To tfit tamohmpno kfo yamukar, ‘Na hefen yuhat fawihnamo.’”

⁴³ Jisasr kfo memorm, “Be tmifko tukmoh rim pthata mpthataneft. ⁴⁴ Na tu Bro Yifemr kfo tkrurafmotra fawihnamo. Nhai wom yimar be turparhu duka fijo wayibon sinyahato nanpno niakfot. Tu Bro Yifemrnd yimar thu yuhurworre ee btn nanpno niakfot. Kto wuroh yihar nd yimar yahot tathakniruhanr. ⁴⁵ Profetm wandfamo mrokfot kfo memom, ‘Tu Bro Nkifrarn mrokfom hirahrm.’ Yimam nd ror hayuk mrokfom wanyhato dukefm yekwam nanpno niewum.

⁴⁶ Nhai wom yimar Bro Yifemr htirmorr. Nhai. Nd tu Bro Nkifrapno toh tany niayuk yimarpary Bro Yifemr htimorr. ⁴⁷ Na kfo mifwanko, yimar rorhu bro dukefm nann rhuhato nanhu mrokfom wany yakiohato yak hikwar, tor nd yimarpary dborior toh nmbuhat yakhato toh nkifranirahr. ⁴⁸ Na nd toh nkifraniyuk yafothat heyuk bretpaya. ⁴⁹ Nd nikmoh nkifram nd nungur tik furat yutewa deset, ndko hwe sohhnhato manat yi hnamo yimam be bi noh witamom. ⁵⁰ Nd bretpat yura hefen yuhat yawihamo ndt womhtet bretpayet. Yimam nd bretpat yanyeft to be nhai tfit nohruhatm. ⁵¹ Na to nd yura hefen yuhat yawihamo toh nkifraniyuk yafothat heyuk bretpaya. Yima nd bretpat yak ye hmbrirahn to be toh nkifranirahn. Nd bretpat na yakhiruhat to tukanhu yima nmpayem. Ndar bbinysofthu met yindariroh rhu nmbuhat dukahato suh nanyorruha.”

⁵² Jisasr inji kfomotr, Judam wanyhato tum rinakfo nakfo memom, “Bar yimako, tone nda yimare finji turhu nmhapam yakhato hiruhatrnom yeruhanomm?”

⁵³ Rom inji kfomotm tfit Jisasr kfo memorm, “Na kfo mifwanko, nhai Bro Najomanhu nmhapami yo nanhu kkupam yak yarfokomm be nhai dborior rhu nmbuhat yakruhatko.

⁵⁴ Yimar o mett nanhu nmhapami kkupam kekwomm nd yimam be toh nkifranitm. Kto wuroh yihar yahot tathakniruhanm. ⁵⁵ Nanhu nmhapam tom tu yeyuk yemrot yo kkupam tom tu yeyuk bupam, ndnetann inji kfiwanko. ⁵⁶ Yimar nanhu nmpami nanhu kkupam yewar, bi ke hmbrkiye-kwora. Ror bi nann thu nhombrewur yo na bi rorn thu nhombrewa. ⁵⁷ Na tu toh nkifraniyuk yafothat heyuk Yifemr kfo tkrurafmotra fawihnamo. Na to nd Bro Yifemr nanhu rhu toh nmbuhat yakitohwatrt tohwa. Nanhu toh nmbuhat inji ruhettn, ndnettn yimar nanhu nmpam yaneft to be rorhu rhu toh nmbuhat yakitohrhotant tohrah. ⁵⁸ Tot tu bretpa mift yura hefen yuhat yawihamot. To mirahko ka nikmoh nkifram yamo kanjohot bretpayet. Nhai. Rom yamo bretpat nhai ndt yehato toh nkifranirmom. To nd ariharhof bretpat yimam yakhato yanyeft be inji toh nkifranirahm.” ⁵⁹ Jisasr Kaperneam taunthu rhu rifinyuk Judaroh rmont rhuhato nd mrokfom kfo ptha nuhasmorm.

Toh nkifrani yuhathu kfo nuhas mrokfot

⁶⁰ Bok disaiperm Jisasr kfoyuk mrokfom mwany frnatahato kfo memom, “Jisasr mrokfom inji kfo pthaneft to frohm wanyhato hikruham?” ⁶¹ Jisasr bi htimorm rom inji kfo pthamoahat. Inji htihato kfo ttiwon memorm, “Ka nd na kfoyuk mrokfot wanyhato mfrnahirtewuko? ⁶² To kto Bro Najomr mikaht, nd tur toh tanymo kmikor muhwa, to niko htiyaf hany thombat to finji? ⁶³ Bro Nkifrarhu Yafothatn kahuktnom tu toh nkifraniyuk yafothat, nhai yima mifmn. Nd na kfoyuk mrokfot, ndt tu yafothet mrokfoyet. Nd mrokfotn kahuktm yimam toh nkifraniyuk yafothat. ⁶⁴ To tom nikmoh womm nhai wany yakiolahmt nda na pthiwa mrokfot.” Bingotn Jisasr bi htimorm fitoh yimamn nhai wany yakioruhatmr. Yo bi htimorr fitoh yimar hndhnarahrr. ⁶⁵ Ddnatn Jisasr wom mrokfot kfo memorm, “Yimam nhai wany yakiolahm. Nd yuhatn niko bi kfo kanganko, nhai wom yimar be turparhu duka fijo wayibon sinyahato nanpno niakfot. Tu Bro Yifemrn nd yimar thu yuhurworre ee btn nanpno niakfot.”

⁶⁶ Be nd yiharpro Jisasr nd mrokfot inji kfomotrt bok disaiperm frtrohmomr. Nhai tfit uhik ahikrmoamr. ⁶⁷ Be Jisasr inji htiyaf hanyhato nd turhu 12-pela disaiperm ttiwon memorm, “To nikone, rpat htany bugarahkma?”

⁶⁸ Tfit Saimon Pitar warhuhato kfo memor, “Broye, nom ni htanyruhanomn to wom frohrpno rim tohruhanom? To ninrpanhu mrokforpat harhuwott tu toh marnya hatohyuk yuhat. ⁶⁹ Nom ninn nmoh yima yuhum htahato duka kangnom, ni tu Bro Nkifrar yak htamo yimaye.”

⁷⁰ Ror inji kfomotrr tfit Jisasr kfo memorm, “Rot nann niko 12-pela disaiperko fakmoyanko. To ror tor nikmoh womr. Rorn Satanru hingrneft hingrnayuk yimayer.”

⁷¹ Nd ror kfomo yimar to Saimon Iskariotrhu yinem Judasrn kfomor. Nd Judasr to nd 12-yuk wom disaiper yimayer. To rorn kto frfnahnihato tfit Jisasr hndhnamatrr yahr kmim yihato wasmomr.

7

Judaroh briaha kuny nafo mkuroh rhuhato ye burwa yihar Jisasr yi htimo yuhat

¹ Jisasr nd mirakerm Galili thofm yak nuhasnimohat, afo tuha Galili distriktn afo fau habrimor. Judiako bi yinyeft nhai. Judiakorhof bro tohak yimam bi rorhu wasneftthu wajis bi haruhetmn to be Jisasr nhai bi marimor, “Judiako bi yiruha.” ² Judaroh briaha kuny nafo mkuroh rhuhato ye burwa yiham bi brbo rhu hnetmn, ³ Jisasrhu wom habhim kfo memomr, “Nom kangnom ni nda kmit wahtanykahnn tu Judiako waiswa. Tu Judiako waikahnn nd ni hingrniwa womhtet womhtet miraker hingrnefm wahingrnakahtnm tunhu disaiperm afo htirahmm nd hingrnefm. ⁴ Wom yimar kangr, ror niwa nefm yimam ahtimm, ror nhai be hingrna kafroh-kahrm. To ni kangn, mirakerm ahingrnayanm, tafontn met yindariroh nyngatikhato wahingrnakahtnm ahtimm.” ⁵ To tu Jisasrhu habhim nhai rroh bro dukefm Jisasrn rhurmom. ⁶ Be rom inji kfomotmr, tfit Jisasr kfo memorm, “Nanhu tu yi yihar tafi afo bi niakahr. Niko fitoh yuha fitoh yuha yinyefm niko tuko yakitohwakommn yiham, niko tuko yi furaknitko. ⁷ Niko nda bbinysof thofm nhai be mfro hti srkahmko. Na be rroh gobenann be fndr htitwoma. Kangm, ‘Tamohmpno kfo ptha nriyafwarm nom niwa fasoh fasoh nefm?’ ⁸ Nd niko Jerusalemr yihato Judaroh kuny nafo mkuroh rhuhato lotuneft yi shombat, na nhai hik hanyrhotanko. Nanhu yi yihar nhai bi niakahr. Tuko waiswako.” ⁹ Inji kfaf nuhasafhato ror tuha Galilitn toh gari hasomorm.

¹⁰ Ror wom habhim afo htiya-fmormn bi kitwome, ee ror kto mongkor yimor. Nhai yimam htiyafrmomr ror sinyanimohat. ¹¹ Nd Judaroh kuny nafo mkuroh lotu yiharn Judaroh bro yimam Jisasr yukatoh hasotihato kfo ttiwon hambrum memoum, “Bar yimako, nd yima Jisasre to fitor? Nhai niarfor?” ¹² Tuha met yindars be nhowi brumhamn nakfo nuhas nakfo nuhas memoum, “Ndr tu dborioh yimayer.” Tfit wommn kfo memoum, “Nheno, ndr yima frnhehet yimayer.” ¹³ Met yindarim Jisasrhu mrokfom kfo pthamoahat, Judaroh bro tohak yimam yanhhahato, nhai be masat tafontn kfo ptha

nriyaf inji narmoam. ¹⁴ Nd Judam turoh bro yiham rhu haso hanymom Jisasr yiro Bro Nkifrarhu temper kmifar rim fknenihato met yindarim mrokfom hemourm. ¹⁵ Judaroh bro tohak yimam Jisasr kfomo mrokfom wanymohat tuha mrokfo duha rhumomn tfit afo Jisasr yukatohhato hifa mmabra memom, “Ndhtet skurr yi juha yimar to finji kanjo ndhtet duka tungunefm yekwarm?” ¹⁶ Jisasr tawo kfo memorm, “Nda mrokfom, na nd kfiwam, niko mirahko ka be tukanhu yima yuhuruhem. Nhai. Nd na kfo tkrurafyuk Bro Nkifrarhu mrokfom kfo ptha nuhaswanko. ¹⁷ Wom yimar kangr, ‘Be tu Bro Nkifrarhu dukef yuhat ahik mifa,’ nd yimarn yakrahrt nda na kfo pthiwa mrokfothu mna yuhat. Rorn yak nhtarahrt nda na kfiwa mrokfot tu Bro Nkifrarhu mrokfot kfiwan o tukanhu dukefrn niewatm pthiwanm. ¹⁸ Yimar be turhu yima yuhurn mrokfom wakfo pthakneft, nd yimar kangr be yuwi yimam akfo kafhurma. To yimar nd tur kfo tkrurafyuk yimarhu yufat kfo kafhurwort, nd yimar tu dborioh yimayer. Nhai yimam frnhehkahrm.

¹⁹ Bingot Mosesr hemo boririhu mrokfom, to nhai nikmoh wom rpar myakni marnyakahrt nd boririhu mrokfot. To tamohmpno tfit nann kfo yamukako, ‘Ror nhai hikkahr nkifra boririfhut.’ Nd nambur yima yuhumpno nanhu waskfot kfiwuko? ²⁰ Ror inji kfomotr, tfit met yindarim sinyahato kfo memomr, “To frohm waskfot kfiwamn? Nine ka womhtet kmi yarhr mthu nawohtrn inji kfo mumiwun.” ²¹ Rom inji kfomotm tfit Jisasr kfo memorm, “Na Sabat yiha wom mirakerkfot hingrnamatant, niko to htihato tuha yafotha duhatko rhumoko.* ²² To niko Mosesrhu nkifra boririhu mrokfot nkifra tha pukneft yak hikwakomn womnam Sabat yihamn yonroh tham puk-wokomm. Nd tha pukneft nhai be Mosesrn buha wahtakrmort nd hingrneft. Nhai. Bingot bi nikmoh nkiframpno riingrnaknomt nd hingrneft. ²³ Nikmoh nkifra tha puk yuhat Mosesr kfomot nhai yafhokah-komt. Yonr nurnineft 8-yuk marrn tha pukwokomm. To Sabat yiharn nd yonrhu tha puk yihar rhuneft nhai mekahko, ‘Afo Sabat yihar rhunihato tfit ndwom yiha tha pukrahnomr.’ Nhai inji nakahko. Nd Sabat yiharn tha pukwokomr. To tfit tamohmpno na Sabat yiha wom yimar yak marnya-motanr niko kfo namburwako? ²⁴ Mirahko be nyngaye htiyuk tamoh tamoh nefm htihato bmbri mrokfom tubatu furakninomm. Afo hti nhta yak nhta marnyahato ee btn mrokfom tukfot.”

Met yindarim memom, Jisasr ahti hiknomr, tu Krais mifer?

²⁵ Jerusalemrhu wom met yindarim nd Jisasr pthamo mrokfom wanyhato kfo memom, “Ka nda yimarn Judaroh bro tohak yimam kangm awasnom? ²⁶ To nd yimar to asor nda yonmari yima rifiny buhar pthiwohat, to nhai wom rpa yimar kfo wokkahrr. Nhai. Ka ror pthiwohat, ka rorhu mrokfom wany nhtiwanm ka duka kangm asor met yindariroh minrfa htiyakyuk yimar Bro Nkifrar htangotmor. Ka inji dukewamm nhai kfo wokkahmr?” ²⁷ To tfit wommn kfo memom, “Nd niko kfiwa tngr hifa. Tmift nd niayuk yima Kraisr nhai wom yimar tawisafruhattr rorhu trha yuhat. To nda nom kfo pthiwa yimar ror nom tawisafwonomt rorhu nia yuhat.”

²⁸ Jisasr Bro Nkifrarhu temper kmifar tohhato met yindarim kfo yahrnya memorm, “Niko ka duka kangko ka tawisafwokma yo nanhu trha yuhat ka tawisafwokomt? Nanhu nia nmbuhat, nhai na be tukanhu fijo niarmoya. Tu Yifem mifr kfo tkrurmota niamoya. Niko nhai tawisafkahkomr. ²⁹ Na, na tawisafwanr. Na rorpno toh tanymoya. Rorn kfo tkrurmota niamoya.” ³⁰ Inji kfomotr rom wanyhato memom, “Ayaknomr.” To nhai. Tafi rorhu yak yihar bi niarmor, to be nhai wom yimar bi yakaknirmorr. Nhai.

³¹ Bok met yindarim rroh bro dukefm Jisasrn yihato kfo memom, “Ka asor nd yimar met yindariroh minrfa hhakyuk yimar Bro Nkifrar kfo tkrurafmor. Ka rorn nd Kraisr hingrnayuk mirakerkfom mfro hingrnewur.”

Bro Nkifrarhu temperrhu tohukatohyuk polism Jisasrhu yakt yimo yuhat

* ^{7:21:} Nd Jisasr kfomo mirakerkfot ka nd Betesdathu yuk bfar hingrnamo mirakerkfotn kfomor. Nd tndh mrokfot htikfot Jon 5.1-18 kfotn yo tfit htikfot Kisim Bek 31.14-15 kfotn.

³² Yimam nd Jisasrhu hingrnefroh mrokfom nhowi nakfo nuhas nakfo nuhasmoatm, Farisim wanymom. Wanyhato memom, "Jisasr myakhato kalabus htarahnomr." Nd-nettn romi prisroh bro yimam yihato Bro Nkifrarhu temperrhu tohukatohyuk polism kfo tkrurafmotm rom yimom. ³³ Jisasr kfo memor, "Na be inji dfik yiham tohnho tanyrhoyanko tfit yiruha tukia kfo tkrurafyuk Yifemrhu kmiko. ³⁴ To nd yiha yak hambro hasorahkma, to nhai htirhotkma. Nd na yiruha kmit niko nhai yiruhatkomb." ³⁵ Be Judam inji wanyhato tum rinakfo nakfo memom, "Bar yimako, fitohko yiruhatr nom hti hambro hasoruhanom? Ka ndu nmoh wom yimatm kantri Grikko tohyukmpno yihato ndkorhof yimam mrokfom hirahr? ³⁶ Yo kfo kangrnom, 'Yak hambro yak hambrorahkma, to nhai htirhotkma.' Yo tfit wom kfot kfo kangrnom, 'Na yiruha kmit niko nhai yiruhatkomb.' Tone finji dukahato inji kfiwarnom?"

Tu yafothet bu yinhar bupam mfifnah hasoruhayuhat

³⁷ Nd lotu burwa yiharoh wuroh tikofhna yihar ndr tu bro yihar rhumoumr. To nd wuroh bro yihar rhumorn Jisasr wasinyahato kfo yahrnya memor, "Ni fitoh yima nyunguram knewun, nanopno waniekahtn, bupam hiruhann. ³⁸ Mrokfot Bro Nkifrarhu rfa borngt yorhwat to inji kfo kangt, yimar nanhu mrokfom wany yakiohato hikwar, rorhuko tu yafothet bu yinhar bupam be mfifnah hasorahm." ³⁹ Nd Jisasr kfomot, ndt yimam rorhu mrokfom wany yakiohato yakruha Bro Nkifrarhu Yafothat, ndtn kfomor. Nd yiham Jisasr tafi nohhato sinya duhatrn ndnettn Bro Nkifrarhu Yafothat nhai bi yimam hermorm.

Met yindarim nayak mkumo yuhat

⁴⁰ Wom met yindarim Jisasr kfoyuk mrokfom wany nhtahato kfo memom, "Dajohmn, ka asor nd profetr Bro Nkifrar kfo tkrurkfot kfomor." ⁴¹ Womm warhuhato kfo memom, "To tawom ndr. To nd yimar Bro Nkifrar kfo memo, yimaroh minrfa htiyakyuk yima Kraisr nierahr." Tfit womm warhuhato kfo memom, "Nheno. Ror arhur to nhai Galili yuhat niarmotr. ⁴² Bro Nkifrarhu rfa borngt bi kfo hta memot, 'Kraisr nianeft tu Defit frikek yuhatn nieruharn Defitrhu taun Betlehemtn minurrahr.' ⁴³ Be ndtpno rinakfo nakfakhato nafak mkumom. ⁴⁴ Womm wasinya fnahhato memom, Jisasr ayaknom, to nhai, nhai womr tir htarmorr.

Judaroh bro tohak yimam Jisasr kfoyuk mrokfom nhai wany yakioromm

⁴⁵ Nd temperr tohukatohyuk polism tfit yimotm prisroh bro yimami Farisim kfo ttiwonak memomm, "To tamohmpno nhai yakna duha yirfokomr nd yimar?" ⁴⁶ Inji kfo ttiwonakmotmm tfit kfo memomm, "Nhai wom yimar ror pthiwa kanjohot mrokfom kfo pthakahr. Nhai." ⁴⁷ Tfit Farisim kfo wok memomm, "Ka kfo nheh bonhehmorko? ⁴⁸ To htitkmnom nom Farisinomi Judaroh bro tohak yimam wany yakiowonomr nd yimar? Nhai mif. ⁴⁹ Yimam rorhu mrokfom wany yakiohato hikwam, nd yimam boririfhut yikitoh duhatm, romn wany yakiowomr. Bi Bro Nkifrar yak tutfakfot kfomorm nd yimam."

⁵⁰ To Farisiroh womr, rorhu yufat Nikodemusr, ror bingot bi Jisasrpno yihato napthetfn, ndnat womm pthamohat tfit ttiwon memorm, ⁵¹ "Nmoh nkifra boririfhut nhai inji kfokaht, wom yimar tafi rorhu mrokfom wany hik marnya duha, be bmbri finji naknikfot." ⁵² Ror inji kfomotrm tfit rom kfo memomr, "Bare, nine rorhu kmi Galili thofe? To wahtint Bro Nkifrarhu rfa borngt yorhwa mrokfot. Mrokfot nhai kfo mekaht wom profetr Galili profinsn nierahr. Nhai."

Wom ramet mett ijoh yuhat yimott Jisasrpno hanymomt

⁵³ Nd nia rifiny hanyuk yimam bi turoh kuny kmifako yi hanymom.

he hasetrn wom boririfhuthu tisami yo Farisim wom ramet mett wom yima furar yimoatt rom htihato yaknimomtn nd met yindar rifinyrpno mhatohmomt.

⁴ Mhatohhato Jisasr mkfo memomr, “Tisaye, nda mett wom yimarpno fasoh neft na hasettm hti nriyafaknimomt. ⁵ Mosesr yakitohyuk boririfhut inji kfo kangt, wom mett ndhtet nefet nem be tahiye tahiye frdbofna nohkphot. To nom inji na thombat ni finji kforuha?” ⁶ Nd rom kfo ttiwonmo mrokphot be yuwi memom, “Inji akfo ttiwon rhtikahnomr finji kfiwure, nd ror kfoyuk mrokphot nom tohhato yakrahnomr.” Rom inji kfo ttiwonmohat, Jisasr nhai mfhat kasinyarmort. Ror bbinysoft taro-bttahato bbinysoft tir pinyafe wandfa-mour.

⁷ Masat masat ttiwon hasuknamoatmr Jisasr wasinyahato kfo memorm, “To niko ndar tohwako nhai womr wom fasoh neft narmor ee rorn ndar mett barkof tahis atutwart.”

⁸ Ror inji kfonimormn tfit nyingatikt bbinysoft tariobttahato tir pinyafe wandfamour.

⁹ Be rom nd mrokphot wanymomn be mrokfo kfo duha mrokfo kfo duha fnahni hanymom. Nd bro yima boyimat tohak gngonmotm, ee bt wom womt rifiny hanyukm mongtn fnah yaktohmom. Jisasr turpar tariobt hasetr htanymomr. Mettne rorhu nyingatikko tohmout.

¹⁰ Be Jisasr mfhat kasinyahato nd mett kfo ttiwon memort, “Ndasha tohhasi yimame bi fitoh yuhat yitam? To nine frohm tohhato ni nayuk nefm kfo pthiwamm?” ¹¹ Be inji kfomotrt tfit kfo memotr, “Bro yimaye, to nhai womr.” Tfit Jisasr kfo memort, “Na nhai finji kforhotann. Wain. Waikahnn mirahn tfit wom fasoh neft anaya.”

Jisasr ndar bbinysoft yak nukewa ksher

¹² Jisasr tfit kfo memorm, “Nann nukeft hatohhato nda bbinysoft kak nukewant. Fitoh yimam nanhu mrokphot wanyhato hikma, rroh nda bbinysoftu toh yuham yi marnyarahm. Nhai yifungt yau mmo bommiwa kanjo yau mmo bammoruhatm.” ¹³ Wom Farisim nd mrokphot wanyhato Jisasr kfo memomr, “Ni be tunhu hingrnefroh mrokfomi yo tamoh tamoh nefroh mrokforpamn kfo ptha srhwon. Ndnetn met yindarim nhai nd ni pthayuk mrokfom wany fugha-ruhatmm.” ¹⁴ Rom inji kfomotm tfit Jisasr kfo memorm, “To hifa inji kfo kangko, na be tukianhu tamoh nefroh mrokforpamn ptha srhwa. Na, na sinya tanyuk kmir na tuka tawi-safwanr yo na yiruha yuhat na tuka tawisafwant. Ndnettun nanhu toheft kfo ptha yimbu hikwant. To niko nhai tawisafkahkomt nanhu kmit yo nhai tawisafkahkomt na yiruha yuhat. Ndnettun nanhu toheft niko nhai hti hikkfot. ¹⁵ Niko kak nhtewukma ndar bbinysoftu yimam yak nhtewa kanjo. Na, na nhai inji wom yimarhu nefm htihato kfo pthakaha. ¹⁶ To na kanga wom yimarhu nefm htihato akfo pthaya, nhai turpeta kfo pthakaha. Nhai. Nd na kfo tkrurafmo Yifemrpno tohhato nonn kfo pthewuno. Ndnettun nd na pthayuk mrokfom met yindarim wanyneft rom wany yakiorahma. ¹⁷ Mosesrhu boririfhuthu mrokphot inji kfo kangt, ‘Wom hus yimaf kfo srhyuk mrokfom be rpa yuhat mrokfom kfo hikfm, be nd mrokphot tu kfo mif kfoyet.’

¹⁸ Na tukianhu hingrnefroh mrokfo yuham kfo ptha srhwam, na tkrurafoyuk Yifemr to be na kfiwa yuhatn kfo hikworm.”

¹⁹ Be Farisim inji wanyhato ttiwon memomr, “To nd ni kfiwa yifemre fitha yorhwar?” Tfit Jisasr kfo memorm, “Na nhai tawisafkahkma, nhai nanhu Yifemr niko tawisafkphot. Na tawisafrahko, nanhu Yifemr tawisafrahkomr.”

²⁰ Ror nd mrokfom met yindarim kfo hemohat temper kmifarn brbo ofa maruham htamoat tkittpno mrokfom hemorm. Tafi rorhu yak yihar bi niarmor, ndnetmn nhai yimam sinyarmom rorhu yakneft.

Jisasr kfo memor, “Na yiruha kmit, niko nhai yiruhatko.”

²¹ Met yindarim Jisasr wompam tfit kfo memorm, “Na frtrohruhanko. To niko yak hambro hasorahkma. Niko tukmoh fasoh fasoh nefm nahaso nahasoruhakomm nohrahko. Nd na yiruha kmit nikom nhai yiruhatkomt.” ²² Judaroh bro yimam nd Jisasr kfomo mrokphot wanyhato tum rinakfo nakfo memom, “Bar yimako, to tamohmpno kfo yamukarnom, ‘Niko nhai yiruhatkomr nd na yiyuk kmir?’ Nd mrokfote finji dukahato

inji kfirt? Ka turn yak nadborrahr?" ²³ Rom inji kfomotm tfit Jisasr kfo memorm, "Niko ndar bbinysoft watohyukeko. Na yura hefenr wutohyuka. To na mirahko ka nda bbinysof thofa. Nhai. ²⁴ Na kfo famuyanko, niko tukmoh fasoh fasoh nefm na hasoruhakomm nohrahko. Niko nhai kfo miruhatkoma, 'Tor Bro Nkifrarhu kfo tkrurafyuk yimar.' Ndnett n kfiwanko, niko tukmoh fasoh fasoh nefm na haso-ruhakomm nohrahko."

²⁵ Kfo ttiwon memomr, "Bare, nine frohe?" Tfit Jisasr kfo memorm, "Na bi asonhof rikfo nuhasakmoyanko. ²⁶ Na nd niko niwa nefmpno bok mrokfom kforfoyanko yo jasm kanjo rhuhato nikmoh nefm yak nhta-herfoyanko. Tmift na nhai be nanhu dukefrn na tamoh tamoh mrokfom kfo pthakfot. Na, na be nd na kfo tkrurafyuk Yifem mifrhu tng yuhatn hikhato ndar bbinysofthu yimam mrokfom kahukanm." ²⁷ To rom wanymohat nhai duka marimom, "Jisasr ka Bro Yifemrn kfiwurnom."

²⁸ Ndnatn Jisasr kfo memorm, "Na Bro Nkifrarhu kfo tkrurafmohat, kto niko na Bro Najoma yura bgre mishu wuhta yiharn, nd yiha nyngam yoh dborhahato hti dukarahko. Yo hti hikrahko, na nhai wom neft be tukanhu dukefrn hingrnakaha. Na Yifemr kfo htiwa yuhatn hingrna hikwa. ²⁹ Na kfo tkrurafyuk Yifemr toh tkafwora, nhai frtrophhato turpetrpaya yak mmbrafinykaha. Nhai. Na niwa nefm tur hti yindhorwa nefm na hikwa, ndnatn nhai frtrophkahra." ³⁰ Bok met yindarim nd Jisasr kfo pthamo mrokfot wanymohat rroh bro dukefm rorn htamom.

Nd tu yafothet mrokfot met yindarim mhti hikakruhamtn, nd fasoh fasoh nefm frtrophhato frfnahrahm

³¹ Be nd Judam, Jisasrhu mrokfom wany yakiowetm, kfo memorm, "Niko nanhu mrokfot yakitoh kihrahkomt, be nanhu disaiper mifko rhurahko. ³² Nanhu disaiper mifko rhuhato nd tu yafothet mrokfot mhti hikakruha-komtn be nd mrokfotn nd niko kihmbre htatewa fasoh fasoh nefm yafhohato frfnahrahko." ³³ Be rom nd mrokfot wanyhato kfo memom, "Nom Abrahamrhu frikef yuhathu yonenom. Nom nhai wom yimarhu yinhitn hingrna hafknekahnom. To tamoh dukeftpno kfo yangannom, 'Tfit frfnahrahko?'"

³⁴ Jisasr kfo memorm, "Na kfo mifwanko nda yima yimat fasoh nefm niwam, rom be turoh fasoh nefmn kihmbre htatewumm. ³⁵ Wom slefr wom ripharpno tohwohat, nhai be rompno rim tohnihato rorhu yufat rompno rhukaht. Nhai. Be hingrnfroh hingrna hanyeefn tohekworm. Tu nasak yonrpar yifammaroh yufampno korhr. ³⁶ Ndnett bi Yinem Yonrn nd fasoh fasoh nefm mtitikt kanjo kihmbritayukm bi frtmbho tebikr trufekrko, to be niko nhai wom fasoh nefm kihmbrekahmk.

³⁷ Rot to niko Abrahamrhu frikef yuhayet. To tmift nanhu mrokfot nhai rhukahtko. To ndnetkomn nanhu wasneft waji yauskma. ³⁸ Na kfo pthiwa mrokfot na tukianhu Yifemr kfo hta bohtayuk mrokfo yuhamn kfo ptha hikwa. Niko rot tukmoh yifemr kfo nuhasyuk mrokfo yuhamn hikwoko."

³⁹ Judam nd Jisasr kfo pthayuk mrokfot wanyhato tfit kfo memomr, "Abrahamr to nmoh nkifrayer." Tfit Jisasr kfo memorm, "Niko tu Abrahamrhu frikef yuhathuko arhuko, to be nd ror namo nef yuham yak hikrfoko. ⁴⁰ Na kfo pthiwa mrokfom, na tu Bro Nkifrarhu tu mrokfo mifm kfo pthiwa. To tfit kangko awasnomr. To ndt nhai tu Abrahamrhu neft hikkahko. ⁴¹ Nd niko niwa nefm, ndm niko tukmoh yifemrhu yuhamn kak hikwoko." Tfit rom kfo memomr, "Nmoh mmemrom nhai ijom tonehato hiyaurmomnom. Nhai. Nmoh yifemr, to Bro Nkifrarpar." ⁴² Rom inji kfomotm, tfit Jisasr kfo memorm, "To na to froha? Na to rorpno wusinya tanyhato niayuka asha tfit nia tohwa. Niko tu Bro Nkifrarhu mifko arhuko, to na yakrfokma nikompno tohrfoya. Nanhu nia nmbuhat, nhai na be tukanhu fijo niarmoya. Tu Yifemr kfo tkrurmotra niamoya.

⁴³ To tamohmpno na pthayuk mrokfo yuham wany hik duha yitakomm? Ndt nhai be sfno. Nanhu mrokfom nhai wanyruhatkomm. ⁴⁴ Niko tukmoh yifem Satanrhu yonkomm kangko tukmoh yifemrhu dukef yuhatn ahiknom. Bingot to frohmn yima wasmoam? To ror yima wasmoarn nhai tu mrokfot yakitoh-rmoar. Yo yima kfo nhehneft to frohm yifemmoamt? To rorn yifemmourt. Ror nd neft bi mhatoh fnahmort. ⁴⁵ Nd

na kfiwa mrokfot tu yafothet mrokfot kfiwanko, to niko Satanrhu yonkomn nhai wany yakiokahkma. ⁴⁶ Ka na fasoh nefm nayet yimayann nhai wany yakiokahkma? To niko inji duka thoft, to bt wakfo nuhaskma na niwa fasoh fasoh nefm. To na tu yafothet mrokfot ptha thoft, to tamohmpno na pthayuk mrokfom wany yakio duha yitakomm? ⁴⁷ Bro Nkifrarhu yonm Bro Nkifrarhu mrokfom wanukwomm. Niko nhai ka tu Bro Nkifrarhu yonko rhukahko, ndnetkomn nhai rorhu mrokfom wanykahkomm.”

Jisasr kfo memor, “Abrahamr tafi trha duha na bi inji rhungotmoya.”

⁴⁸ Tfit Judam sinyahato Jisasr kfo memomr, “Nome ka kfo mifwonom nom kfo yamukahat ni Samaria thofnn kmi yarhr thu hamumiwurn?” ⁴⁹ Rom inji kfomotm tfit Jisasr kfo memorm, “Na nhai wom kmi yarhr thu hammokahra. Na tukianhu Yifemrhu yufatn wuyuta grhiwota, to tfit nikomn nanhu yufat yiro wahtewukomt. ⁵⁰ Na nhai be tukianhu yufatn yura yura htakaha. Tor wom yimar, rorn nanhu yufat yura wuhtarahra, ror jaser. ⁵¹ Na kfo mifwanko, wom yimar nanhu mrokfot wanyhato yak hikrahrt, nd yimar nhai nohruhatr. Be tu nhai mif.”

⁵² Tfit inji kfomotr Judam kfo memomr, “To nom bi wany nhte-wunomn ni ufasohtet kmi yarhr thu hamumiwatrn bi kfo mmo bamumiwun. To Abrahamr Bro Nkifrarhu mrokfom hiketr to nohmor, yo profetm Bro Nkifrarhu hayuk mrokfom kfo pthamoam to nohmom. To tamohmpno tfit nom kfo yangannom, ‘Wom yimar nanhu mrokfot yak hik marnyarahrt, nhai nohruhatr?’ ⁵³ Bar yimako, ka tu inji kfiwohat ka kagn nanrpaya tu bro yufeta. Ka nohmo nmoh nkifra Abrahamri profetme ka nhai yima furayem?”

⁵⁴ Tfit Jisasr kfo memorm, “Na be tukianhu yufat yura wuhtayant, nanhu yufat fipa duhatt rhurfont. Tu hifa nanhu Yifemr, nikmoh Bro Nkifrar, rorn nanhu yufat wuhtamort.

⁵⁵ To niko rorhu ruheft nhai htirmokomr. Na awi htiyeta rorhu ruheft. To na tfit kfo miruha, nhai htirfoyanr, to be niko kanjo kfo brurmaha rhurfoya. Na bi rorhu ruhefm hti hiketann to be ndnatn rorhu mrokfom kak hik marnyewanm.

⁵⁶ To nikmoh nkifra Abrahamr dukamohat nanhu nia yiharhu htineft, ror yindhormor. To na niahato turhu nyingaye htihohat, yima yuhur mirhumorr.” ⁵⁷ Judam nd mrokfot wanyhato Jisasr kfo memomr, “Bare, ni tafi 50 gunyjim duhaye, to finji kanjo htiyafmonr Abrahamr?” ⁵⁸ Tfit Jisasr kfo memorm, “Na kfo mifwanko, Abrahamr tafi mmemt hiyau duharn, na bi inji rhumoya.”* ⁵⁹ Rom inji wanyhato tahim yakmomn memom, tahiye frdbofna nohnomr. To nhai, Jisasr nhofijo temper kmifar htanymorrr fnahnimor.

9

Nyinga kunyjet yimarhu mrokfot

¹ Wom yiha Jisasr wiayau hanymorn nyinga kunyjet yimar mhtimorr. Mmemt ror hiyaumohat bi inji nyinga kunyjetrn hiyaumotr. ² Jisasrhu disaiperm nd nyinga kunyjetr htihato ttiwon memomr, “Tisaye, frohmn fasoh fasoh nefm namotm nyinga kunyjetr mmemt hiyaumotr? Nd tu yimarn fasoh fasoh nefm namotr o yifammafn fasoh fasoh nefm namotr nyinga kunyjetr rhumor?”

³ Tfit Jisasr kfo memorm, “Nhai ndar yimar wom fasoh neft narmor yo nhai rorhu yifammaf wom fasoh neft narmof. Nhai. Nd yimar inji rhumohat Bro Nkifrar memor, ‘Nanhu hingrneft rorpno tafont mhfnahrhotant met yindarim htirahmt.’ ⁴ Na Bro Nkifrar tkrurafmotra fawihnamoya. Nda mar nukar yorhwa fijo nom Bro Nkifrarhu hingrneft hingrnakfot. Kto tfit mirkahtt yifung tiwa, yimam nhai wom tamoh hingrnfem hingrnaruhatmm. Nhai. ⁵ Na afo nda bbinysoft tohhato nann nukeft bbinysoft kahukant.”

⁶ Jisasr inji kfonimorn bbinysoftn wabruktumor. Wabruktuhato nd brukpami bdrpam rpata yakk botkak-mormn nd nyinga kunyjet yimarhu nyingamn rifak yenymor. ⁷ Riyak yenyafhato kfo tkruraf memorm, “Siloam bujr warim yuk trufafont nd bdr yenys.” (Nd yufa Siloamthu yimbu yuhat inji korht: Kfo tkrurafkfot). Be nd nyinga kunyjr yimorn

* ^{8:58:} Jon 8.24 htikfot.

fuk truf thumorm nd nyingaf thu yenymo bdrpam. Rim yuk truf tanyhato tfit kmifako yimohat nyingam bi yukatohetm kmifako yimor.

⁸ Nd nyinga yukatohetru kmi thofmi yo ror barkof afo nyinga kunyjetr rhuhato buha yiota yuham rhu hasohato met yindarim maruha wuskam tndaumoam, htimomrn tum rinakfo nakfo memom, “Barenko, nd yimare ka ndu yihotam rhu hasohato maruha wuskam tndaumoa yimayer?” ⁹ Womm kfo memoum, “Uwa to tawomer.” Tfit wommn kfo memoum, “Nhai. Arr womer. Rpahtet ruhetfn inji hti mumiwunomr.” Tfit turn kfo memourm, “Nhai womm, to tawom naya.”

¹⁰ Tfit rom ttiwon memomr, “To nyingam finji netnm yukatohwanm?” ¹¹ Tfit ror kfo memorm, “Nd rom yutiwa yima Jisasr, rorn brukpami bdrpam rpat yak yeny boyenyakhato nanhu nyingam nde yak yenyahato kfo tkrur famura, ‘Siloam bujr waikahnn nyingatikt wayuk truftwant.’ Inji kfefitra na yihato tek bujr nyingatikt yuk trufhat, be nyingam rifukatoh-ekanm.” ¹² Tfit rom ttiwon memomr, “To nd yimare fitha inji yorhwar?” Tfit ror kfo memorm, “To na nhai tawisafkaha.”

¹³ Be nd yimar yaknimomrn Farisimpno hanymomr. ¹⁴ Jisasr nd yimarhu nyingam brukpami bdrpam rpat yak yenyakhato nyingam htahato nyinga yukatohmohat, nd hingrneft Sabat yihar hingrnarmot. ¹⁵ Farisim-pno hanymotmr tfit romn wompam ttiwonmomr rorhu nyingam frdbtakmo yuhat. Tfit ror kfo memorm, “Rorn brukpami bdrpam rpat yak yenyakhato nyingam htitra tfit bujko yihato nd yak yenyafyuk bdrpam yuk trufthanm nyingam frdbtakma.” ¹⁶ Be wom Farisim inji wanyhato kfo memom, “Nd yimar Sabat yiharhu boririfhut nhai yak hikkahrt. To mirahko ka Bro Nkifrar kfo tkrurafmotrr niamor. Nhai.” Tfit wommn kfo memom, “Yimar, ndhtet mirakerkform nayetr, to finji kanjo ufasoh nefm hingrna-rform?” Rom tum inji rinakfakhato nafak mkumom. Womm Jisasrpno tohmom, womm rom tum inji tohmom.

¹⁷ Farisim tfit wompam ttiwon memomr, “Ninhu nyingam yak marnye yimare, ni finji dukiwanr?” Ror tfit kfo memor, “Nd yimar, ror profeter.”

¹⁸ Nd Judaroh bro yimam nhai marimom, nd yimar tu nyinga kunyjetr rhumotr nyingam marnyamomr. Nhai. Memom, fura kfoyet. Ndnetmn tfit nd yimarhu yifammaf nakuyakmomf. ¹⁹ Be rof niamotf ttiwon memomf, “Nifn wakfofn. Ndarre nifnhu yoner? Mmemt hiyaumohate ka bi inji nyinga kunyjetr hiyaumot? To finji netr rorhu nyingam bi yukatohwarm?” ²⁰ Be nd yonrhu yifamma sawohf kfo memof, “Nda yonr nnoher. Ror nurmohat nyinga kunyjetr nurmotr htimononr. ²¹ To nda rorhu nyingam frtrhahato yukatohwa yuhat nhai tawisafkahno, yo yimam rorhu nyingam yak marnyayukm no nhai tawisafkahnonm. Turn wattiwonkahtko kfo ptha nuhasrahrko. Bi bro damiager turn ptharahr.” ²² Nd yonrhu yifamma sawohf bi Judaroh bro yimaro yima yuhum bi tawisafetfn to mrokfom kfo pthamohat tfit kfo memof, “Tu yonrn kfo ptharahr.” Bi Judaroh bro yimam kfo hta memom, “Frohr kfo kangr, Jisasr tor nd yimar ndar bbinysof thofroh nrfa htiyakyukr. Inji kfovuk yimar nhai nom Judanmoh lotukfot rhunho hakuruhatrnom.” ²³ Yifamma sawohf bi nd mrokfot bi wanyetfn to be tu yonr kfomof mrokfo kfo pthaneft.

²⁴ Tfit wompam nakumomr nd bi marnyaniyet nyinga kunyjr. Tfit wompam yimotr kfo memomr, “Ni Bro Nkifrarhu nyingampno wakfo miftwannom ni asomif tfit kfo pthiwohat. Ni nd barkof kfi yimar nom tawisawonomr tu fasoh fasoh nefm nayet yimayer.” ²⁵ Inji kfomotm, tfit kfo memorm, “Yo ka, ndhtet ufasoh nefm nayeter? Ndm na nhai tawisafkaha. Na tawisafwat akfo nuhasanko. Bingot na nyinga kunyjeta rhu hnamoya, tfit ariha na bi kukatohwa.”

²⁶ Tfit rom ttiwon memomr, “To ror finji namorn? Finji namotrn ninhu nyingam yukatohwann?” ²⁷ Tfit kfo memorm, “To bi kfo nuhasanko. Kfo nuhastanko nhai wanyrfoko. To tamohmpno kfo yamukako, ‘Wompam awany hatohnom?’ E, kangkone, ‘Rorhu disaiperko arhunom?’ ”

²⁸ Farisim inji wanyhato kfo memomr, “Arom rhupete, tfit nomn yari yutewun. To tunn rorhu disaipere. Nom nndoh Mosesrhu disaiperenom. ²⁹ Nom wany hnamo

mrokfot Moses-rpar Bro Nkifrar pthamorr. To nd yimare fitoh yuhat niamotr nom nhai tawisafkahnomr? Nom mmiwunomt rorhu nia yuhat.” ³⁰ Be nd yimar kfo wok memorm, “Nd niko kfiwa mrokfot be tu nndohtet hnomha mrokfot kfiwuko. Nd yimar nanhu nyingam yak marnyamor mumiwukomt rorhu nia yuhat.” ³¹ Nom womt htitnom Bro Nkifrar nhai wanyhekahrm fasoh fasoh nefm nayet yimaroh mrokfom. Yimar Bro Nkifrarhu yima yuhur rhuhato rorhu dukefrn hikwar, tor nd yimar tamoh mrokfom Bro Nkifrapno kfo pthaneft wanukrr. ³² Bingot mifn nmoh nkifram toh hnamompno nhai wom tndhkfot wanyrmonomt, kfo marimom wom yimar mmemt nyinga kunyjetr hiyaumottr, kto tfit wom yimarn wom hingrnefm hingrnamatrr nyingam frtrhahato fukatohmor. Nhai. ³³ To Bro Nkifrar akfo tkruraf duha yirr nd yimar to nhai wom tamoh nefm narfotrm.”

³⁴ Farisim nd mrokfot wanyhato kfo memomr, “Ni wanurtamohat fasoh fasoh nefm bi rpat mihasuhmonm. To tfit frohm yamuka akfo tebosa?” Be inji kfohato nd rifiny kunyr toh hasetr fak tuhafmomr.

Yimam, Bro Nkifrarhu mrokfom yak hik duham, nyinga kunyjet yimam kanjo korhm

³⁵ Judaroh bro tohak yimam nd yimar yiro rifinyuk kunyr ruhetr yak tuhafmotmr Jisasr inji wanyhato fak hambro hanymorr. Yak hambro hanyhato mhtimorrn ttiwon memor, “Ni Bro Najomrhu dukefrpno korhn o nhai?” ³⁶ Tfit nd yimar kfo memor, “Bro yimaye, nd ni kfiwa Bro Najomr to froher? Wakfo nuhaskahtna nanhu dukefr be rorpno htaruhahn.” ³⁷ Tfit Jisasr kfo memor, “To bi htitwonr. To nd ninpno pthiwa yimayer.” ³⁸ Tfit nd yimar kfo memor, “Broye, nanhu dukefr ninpno htewanr bi.” Be inji kfonihato Jisasrhu wurampno mtabokmehato mfhat wasimort.

³⁹ Jisasr kfo memor, “Na nda bbinyssoft niamohat nda yimam niwa fasoh fasoh nefroh tafonthu yak htaneftn niamoya. Ndnett met yindarim, nyinga kunyjetm yorhwam, tfit yukatohhato nann hikrahm. Tfit nd nyingetm, rom tfit nyinga kunyjetm rhuhato yau mmo bammorahm.” ⁴⁰ Wom Farisim Jisasrpno tohetmn Jisasr nd mrokfot tumohat kfo ttiwon memomr, “Nome ka rpat nyinga kunyjetenom?” ⁴¹ Tfit Jisasr kfo memorm, “Niko nyinga kunyjetko warhuko, to nhai wom tamoh mrokfoyetko rhurfoko. Nhai. To tfit tukomn kfo kangko, ‘Nom hifa dborioh nyingetenom.’ Ndnatn niko nayuk fasoh nefm tom afo korhmko.”

10

Jisasr sifsifroh tu dborioh tohukatoher

¹ Jisasr tfit wompam kfo memor, “Na kfo mifwanko, yimar nhai nd sifsifm yorhwam gnathu yifhatik yuhat rim fnahnikahr, be turn buha gnat muhnihato miftohnir, ndhtet yimar rikoh yimayer. ² Yimar tu yifhatik yuhat rim fnahnitar, ndr tu sifsifroh tohukatoher. ³ Nd sifsifroh gnat tohukatohwa tohukatohr yifhatikt yak tfanyekwattr rim fnahnitr. Sifsifroh yufam yutahato nakuneft rorhu tngtn wany tonitatom kak hfhanwatrm fnahnitm. ⁴ Sifsifm rim hfnahni thombat turn hatohekworm. Sifsifm bi rorhu tngt wany nhtetmn be rorn kak hikwom. ⁵ Rom nhai wom yima furam hik furakfot. Nhai. To wom yima furar nakuneft wany kakrmitmr. To rom nhai wom yima furaroh tngm wany tonekfot.” ⁶ Jisasr nd kfo nhombra mrokfot kfo pthamohat rom fak mmotamomt, nhai yakrmomt. ⁷ Ndnatn Jisasr kfo memorm, “Na kfo mifwanko, nanrpaya nd sifisifroh rim fnahni yuhathu yifhatika. ⁸ Ndwom womt nanhu nyinga yuhat tohak hanyukm, rom rikoh yimayem, wuska teh hbotfayet yimayem. To ndnatn sifsifm nhai rroh tngm wany tone-rmoamm. ⁹ Na, na tu yihota rim fnahni yuhaya. Yimar nanopno nierahr, Bro Nkifrarhu tirmn rhurahr. Nhai wom tamohm finjina finjinaruhatmr. Yarim fnahna rim fnahnihato ye wussoh htfas hakurahr.

¹⁰ Rikoh yimar nianeft ror nhai wom tamoh dukefrpno niakahr. Nhai. Ror be nd sifsifroh yak rikohhato was yenyeftn newur. To na niamohat, nhai nd dukefr niarmoya. Na yimaroh toh marnyaneft dukahato niamoya. Yimam nanopno tohhato be nhai tfit wom tamohm yak hambroruhatm o dukaruhatm. ¹¹ Na, na sifsifroh dborioh tohukatoha.

Dborioh tohuka-tohr inji niewur, ror turn rorhu sifsifroh tamoh nefm mfha htewurm. ¹² Yimar be maru dukefrn hingrna-neft, nhai sifsif tikat mifr tohukatohwa kanjo sifsifm tohukatohkahr. Nhai. Yifiktohwa yaum htiyakneft sifsifm yakrme htanyrahr. Yakrme htany-ruhatrm yifikorhof yaum niahato sifsifm ye jborfahato rpa rpa hik tubaturahmm. ¹³ Nd yimar inji nayukr rorhu dukefr be maru hingrna dukefrparn korhrr. Rorhu bro yima yuhur nhai sifsifm rhukahr.

¹⁴⁻¹⁵ Na tukia sifsifroh tu dborioh tohukatoha. Nanhu Yifemr na tawisafwora. Ror na inji tawisafwa kanjo na inji tawisafwanm nanhu sifsifm. Yo na Yifemr tawisafwa kanjo nanhu sifsifm inji tawisafwoma. Na sifsifm dukahato kanga anoha, nhai mrokfom. ¹⁶ Tom nanhu wom sifsifm. Nhai bi ndarwom sifsifmpno bi tohkahm. Ndmn kanga aiyakkahanmn wom sifsifmpno rpat htahato nanhu tngt bi wany nhtarahmt. Rpat wom sifsifmpno htahato rpa tohukatohrpaya yakitohruhanm. ¹⁷ Na, na be wofnwya mfha htahato tfit sinyaneft. Ndtpno nanhu Yifemr yindhor mifwora. ¹⁸ Nhai wom yimarn nanhu yak nadborhato nohkfot. Nhai. Na be tukianhu fijo mfha htaruha. Na tukianhu Yifemr bi inji kfo htamora. Ndnatn kanga, mfha htahato tfit sinyaya, be inji naruha.”

¹⁹ Judam nd mrokfot wanyhato tfit nafak mkumom. ²⁰ Bok yimam kfo memom, “Kmi yarhr thu hamumiwatrr inji kfo mumiwur. Tamohmpno rorhu mrokfom wany yakitohwakomr?” ²¹ Tfit womm kfo memom, “Ndm to mirahko ka kmi yarh thu hamumet yimaro mrokfoym. Nhai. Kmi yarhm athu hammomr nd nyina kunyjet yimar yak marnyarforr?”

Judam nhai hifa nyinahtarmoamr Jisasr

²² Bro frfon wormr tohmo yiharn Judam bro tofs Jerusalemko faki-tohmom. Nd tofs rom rhumot bingot Bro Nkifrarhu temperr Judam hingrnahat nd yiha Bro Nkifrarhu tirtn nd temperr htamomr. To nd yihar tfit Judam rhu duka hanymoum. ²³ Jisasr temper kmifar yihato Solomon yufet kuny mkur yihom fauyak mfauyakmou. ²⁴ Yihom yauyak myauyak hasetrn Judam rifiny hmbriyaknihato kfo ttiwon memomr, “Nome ar nohof rigariyakronomn ninhu toh yuhati ninhu nia yuhathu kfo nuhasneft. Fitoh yiha kfo nuhas-ruhannom? Ka ni ndar yimann Bro Nkifrar kfo htamor yimaro nra htiyakyukr?”

²⁵⁻²⁶ Jisasr tfit rroh mrokfot kfo wok memom, “Na to bi kfo nuhas hnamoyanko, to niko nhai wany yakiokahkma. Nanhu Yifemrhu yufat-pno hingrnewohat niko nhai ndmn mhti nhtak mikahko ndr ndhtet yimayer. Niko to nanhu sifsifkomm btn wany yakiokahkma, niko wom nndoh yima furayeko. ²⁷ Nanhu sifsifm awi nanhu mrokfom wany yakiowoma. Na tawisafwoyanmn nanhu mrokfom hikwomm. ²⁸⁻³⁰ Toh nkifraniyuk yafothat yahukotanm nhai finjinaruhatt. Bi tu nngrajohet Yifemr bi nanhu tirtn htayet yimam nhai wom yimar tfit nia yakruhatrm. Nani nanhu Yifemr nhai wom nndoh nndoh. Nnoh ruheft rpat. Ndnatn Yifemrhu tirtn bi ruhetmn nhai wom yimar niahato yakkfot.”

³¹ Judam nd mrokfot mwanyhato tfit tahim yakmomn memom, tahiye frdbofnahnomr. ³² Tfit Jisasr kfo memom, “Na fak nuhasmoyanko nanhu Yifemrhu bok dborioh dborioh hingrnewohat. To fitohtn niko hti namburhato yangako afrdbofnahnomr?”

³³ Judam sinyahato tfit kfo memomr, “Nom nhai nd ninhu dborioh hingrnewohat tahiye frdbofnakfot kfokahnom. Nhai. Tunn kfo yamukatn, ‘Bro Nkifrarhu tkitt ayakant.’ Tot nd yuhatt kangnom, tahiye afrdbofnahnom. To ni be yima furann kangn, ‘Tfit Bro Nkifrar kanjo aruha.’”

³⁴ Jisasr inji wanyhato kfo memom, “Niko htiyeteko. Niko yikitohwa Bro Nkifrarhu yirmoht inji kfo kangt, ‘Na inji kfo memoyanko, ‘Niko Bro Nkifrar kanjo korhko.’’”

³⁵ Mrokfom, Bro Nkifrarhu rfa borngt yorhwam, nhai kfonihato tfit kfo kekutkahrm. Nhai. Bingotn bi Bro Nkifrar yimam mrokfom hemoahat inji kfo memourm, ‘Niko Bro Nkifrar kanjo korhko.’ To mrokfom, Bro Nkifrarhu rfa borngt yorhwam, nhai kfonihato tfit kfo kekutkahrm. Nhai. ³⁶ Na tu Yifemr bi kfo htahato kfo tkrurafmotra nda bbinysoft

fawihnamoya. To ndnetann na tfit kfo yamukahat, ‘Na Bro Nkifrarhu Yinema,’ to tamohmpno wany namburhato kfo yamukokma, Bro Nkifrarhu tkitt kangr ayaka?

³⁷ Na ndar tukianhu Yifemrhu hingrnemf nhai hingrnakanhamne, ee btn nanhu mrokfom wany yakio duha. ³⁸ To na, na hingrnewanm rorhu hingrnemf. Na Yifemr thu hamuhmora na tawo thu hamuhmoyanr. To nd na pthayuk mrokfomn nhai wany yakiokahkomme, tfit na hingrnayuk hingrnemfndm wamhti dukakko. Wamhti dukakkahkomn waduka wameko, ‘Rof nito rofhu toh nmbuhat nhai nnndo nnndo.’”

³⁹ Inji kfomotr tfit memom ayaknomr to nhai, ror yak hhrifnimorm yimor.

⁴⁰ Be Jisasr tfit yimorn tek Jodent yau hayuknimortn rim fnahmor bingot Jonr yimam baftaisimmoa tkittn. ⁴¹ Ndha tohetrn bok met yindarim ror mhtimomrn kfo memom, “Rot Jonr hingrnamo hingrneft nhai wom mirakerfom hingrnarmoar. To Jonr ndar yimarhu mrokfom kfo pthamoahat, be tu fipet mrokfom kfo pthamourm.” ⁴² Jisasr ndha tohmohat bok met yindarim rroh bro dukefm htamoumr.

Jisasr Judiakoni Jerusalemko yimotr Judaroh bro yimam memom, “Awasnomr.”

11

(Sapta 11-12)

Lasarusru noh nmbuhat

¹ Wom yimarhu yufat Lasarus. Nd yimarhu kmit Betanit. Turhu kmit tohhato dbohneft rifakakmotr. Nd kmi Betanitn tohmouf Martati tuthu nmem Mariat. ² To nd met Mariatn Jisasrhu wuram sanda welpaye yuk wunahato tfit tuthu yuke tmarifaye wuram trk domtmotr. Nd dbohnamo yima Lasarus to nd Marta Maria met najohfhu mndaremer. ³ Nd met najohf Jisasrpno mrokfot htafhato kfo memof, “Broye, nd yimar ninpno nabnot hakutar dbohnewur.” ⁴ Jisasr nd mrokfot wanyakhato kfo memor, “Nd dbohneft nhai Lasarus wundiat minohnihato mifnahniuhatr. Nhai. Nd dbohneft tuhan yindariroh Bro Nkifrarhu bbukeft htihato Bro Yifemr bro yufat hayuket. Yo nd yuhatn Bro Najomr bro yufat yakrahr.”

⁵ Jisasr Marta Maria najohfi rofhu mndarem Lasarus be tu marbit htamourm.

⁶ Lasarusru dbohna mrokfot wanykmohat nhai bi marimor, “Bmbri yirhoyann rorhu dbohneft htihiruhanr.” Nhai. Afo wom hus yiha toh tanymor nd ror tohmo kmit. ⁷ Nd hus yiha toh tanyhato Jisasr disaiper kfo memorm, “Tmifnom ashart ahtanykahnomt tfit ainyom Judia profinsko.” ⁸ Jisasr kfo yibonmotr Judiako yinyeftpno disaiper kfo memomr, “Tisaye, ni dukewun ayuwonanoh nmbuhat Judam tahiye tahiye frdbofnah noh hany sitamohat, tamohmpno yamuka tfit Judiako ainyom?” ⁹ Tfit Jisasr kfo wok memorm, “Marr yuwa muhhato yohni thombat ka nhai 12-pela auakfot mar nukeft rhukaht? Yimam ndar bbiny-softhu mar nukeftpno yauwamn nhai suhkahm. ¹⁰ Yimam yifung yauhato suhwam, yifung nkrt yak tato hanyhato mimpno mfrgughato suhwom.”

¹¹ Jisasr inji kfoni hato tfit kfo memorm, “Nmoh yimatem Lasarus be hwitr. Na yi shombat yak thakruhanr.” ¹² Jisasrhu disaiper nd mrokfot wanyhato kfo memomr, “Broye, be hwe mif thombat, rorhu dbohneft htanyrahr.” ¹³ Disaiper nhai marimom Jisasr kfiwohat Lasarus bi nohetrn hwekfot kfiwurr. Rom memom, “Ka be hwe mifneft kfiwur.” ¹⁴ Ndnett Jisasr kfo nuhas marnya memorm, “Lasarus bi noh mifmor. ¹⁵ Na hifa nhai bi marimoya bi yirhoyann Lasarus htiruha. Nhai. Niko mdukakmoya. Memoya, ‘Rpat yiruhanomn rom turoh nyngaye htiruhann rroh bro dukefm htarahma.’ Yo be waniako yi htirahnomr.”

¹⁶ Jisasr pthanomotr you Tomasr, rorhu wom yufat Didimusr, wom disaiper kfo memorm, “Wasinyako. Aikahnom rorpno rpat nohrahnom.”

Jisasr kfo memor, “Na noheh yima kasinyayet yimaya. Na yimam kasinyahato toh nkifraniyuk yafotham yahukotanm toh nkifranitm.”

¹⁷ Jisasr kmi Betanit mfnahmohat Lasarus bi tahi muht rim htafhato bi husfihus marm bi tohetm mfnahmor. ¹⁸ Nd kmi Betaniti Jerusalemr nhai wuri wuri rhukahf. Wom kmit

toh tany tfit manoh wom kmit yinyeft be 3 kilomitakforpat yauniyetet. ¹⁹ Brbo brbo ruhetfn ndnettn tum Judam yimat yimat toht yima nur bb kunys yi tohnhohato Marta Mariarof bmtamof rom htihato.

²⁰ Nd kunys rhu hasetmn Martat Jisasrhu yi mrokfot wanymohat be wasinya fnah twanhomotn Mariat kunys rhu htanymottn fnahnihato Jisasr yi rim htihato. ²¹ Jisasr rim htihato Martat kfo memot, “Broye, ni asha atohkahnn nanhu mndaremr nhai inji nohrmotr. ²² To nanhu yima yuhur duka kanga asomift ni Bro Nkifrarlpno tamohm wukfo bruttnarahnr, wany yakiohato wahirahrn.”

²³ Inji kfomott Jisasr kfo memort, “Ninhu mndaremr tfit sinyarahr.” ²⁴ Jisasr inji kfomotrt tfit kfo memot, “Uwa, nanhu yima yuhur duka kangr wuroh ndar bbinysosfhu batu yihar sinyarahr.” ²⁵ Jisasr kfo memort, “Na ndar yimaya na noheh yima kasinyayet yimaya. Na yimam kasinyahato toh nkifraniyuk yafotham yahukotanm toh nkifranitm. Yimam na htihato rroh bro dukefm nann htem, htirahnm nd yimam ar bi nohetm tfit sinyahato toh nkifranirahm. ²⁶ Yo yimam yima nfrim tohhato na htihato rroh bro dukefm nann htem, nd yimam nhai nohruhatm. Nhai. Rom be inji toh nkifranirahm.” Jisasr nd mrokfot pthanihato Martat wattiwon memort, “Ni nd na kfiwa mrokfot wanukohat wany yakio kangn tu kfot kfiwa?”

²⁷ Tfit Martat kfo fakio memot, “Uwa nanhu Bror, na ni kfiwa mrokfom wanyhato htitann ni tu Bro Nkifrarhu Yone. Ni nda yimann Bro Nkifrar kfomor nda bbinysosfhu tuhan yindariroh minrfa htiyakneft.”

Jisasr nurmor Lasarusr riduka yuhuwafakhato

²⁸ Martat Jisasrpno inji ptha tanyhato tuthu nmem Mariat rim htiyakmott. Rim htiyakhato nhowi yimbhindangm kfohe memott, “Tisar tor bi nier. Ni kfefirn.” ²⁹ Mariat be inji wanyhato yudbat memot Jisasr yi htiruha. ³⁰ Jisasr tafi kmit rim fnahrmor. Martat rim htimo tkittn yuhre rhu hasomor. ³¹ Mariatpno yima nur bb kunys rhu hasomo Judam Mariat fnahnimott rom htiyaf hanyhato memom ka yima gur rhuyuk tkitt kangt, yikahann yihom nur tanyruha, ndnetmn mhikaknimomt.

³² Mariat yimotn yihom fnahmot Jisasr rhu hasomo tkittn. Rim fnahhato Jisasrhu wurampno brbo rim tabokmehato kfo memot, “Broye, ni asha atohkahnn nanhu mndaremr nhai inji nohrmotr.”

³³ Jisasr htimort Mariat nurmoatt yo nd rotpno yiyuk Judam rpat nurmoatm tfit Jisasr rom htihato rorhu yima yuhur tfit wamortakihato memor anura. ³⁴ Yima gur htamo tkitt kfo ttiwon memorm, “Fitha htamokomr?” Kfo memomr, “Broye, afo wania wahti.” ³⁵ Be Jisasr nurmor. ³⁶ Judam inji htihato kfo memom, “Wahtiko rorhu yima yuhur nd yimar korhr.” ³⁷ Tfit womm rirhuhato kfo memom, “Nda yimar to nyina kunyjm fak marnyamorm. To tamohmpno nhai kformotr ndar yimar nhai nohrmotr?”

Jisasr Lasarusr kasinyamo yuhat

³⁸ Jisasrhu yima yuhur nhai marnyarmorr. Be nd nur rifhurpno yimor yima gur htamo tkitt. Kmi yihofr hingrna htamo tahi muht ndtn htahato tfit wom tahis yakhato muht frtittafmomt. ³⁹ Jisasr kfo memorm, “Nd yopthu tahis wayaktakomt.” Inji kfomotr Martat, nd nohmo yimarhu mndaremt, kfo memot, “Broye, nd yimar bi husfibus marm bi ruhetrn tahis yaktewohat yima gu mthefr fnahwor.” ⁴⁰ Jisasr rothu mrokfom wanyaf hanyhato kfo memort, “Na bi kfifiann, ninhu yima yuhur duka kangr kasinya mifwor, nd dukefr kakitohwo htitwont Bro Nkifrarhu bro bbukeft.” ⁴¹ Be nd muht frtittafmo tahis faktamomt. Yaktamotmt Jisasr yura hefennr wuyukatohhato kfo bruttna memor, “Bro Yifeme, na kfo yindhorwann. Na kfo bruttnaneft wany yakiohnewuna. ⁴² Yiha yiham na ninpno kfo bruttna hna thombat wany yakiohnewuna. Na ndar tohwa yimam dukahato inji kfiwa, htiruhamn duka mirahm tu Bro Nkifrar kfo tkrurafmotrr niamor.”

⁴³ Jisasr inji kfonihamo yufat yutahato mfro rinakumor, “Lasaruse, wari-sinyana.” ⁴⁴ Be Lasarusr sinyahato yarim fnahna twanhomor. Rorhu tir wurami nyngatikt nohet yimam

rir borirmoa rmonthaye kitf botfmomr. Be yuht rmontha kitf kihetr fnahnamor. Jisasr kfo memorm, “Nd rmontham kitf botfetm wayak nyusakafokahtkomr ayir.”

Bro yimam waji famom. Memom, “Jisasr wasrahnom.”

(Matyu 26.1-5; Mak 14.1-2; Luk 22.1-2)

⁴⁵ Nd tuhant yindars Lasarusru nur kunys niahato Mariat rhunhoyukm, Jisasr Lasarusr kasinyamo yuhat htihato nd yiha hti memom, tu Bro Nkifrar kfo tkruraf mifmorr. ⁴⁶ Tfit wommn Farisimpno tfit yihato mkfo nuhas bonuhasmom Jisasr nayuk nefm. ⁴⁷ Be ndnatn Farisimi prisroh tohak yimam Judaroh kaunserm yakhato kfo ttiwon memomm, “Nd yimar bok mirakerkfom hingrnewur. Niko finji dukewako, finji ananomr? ⁴⁸ Nom be inji rihti marsisakrahnomr kmikmi rorrpar hikrahm. Bi kmikmi rorn mhikaknitm htirahko tfit Romrhu bro yufet yimam mrokfo napthakhato nieruhann Bro Nkifrarhu temperr riyohniyakrahr ee yuht kantrikfot bha wohnirahmt.”

⁴⁹ Nd bro yimam rhumom tor wom yimar rhunhomorm. Rorhu yufat Kaiafasr. Rorn nd gunyjimir htamomr rroh bro tohak prisr. Ror wasinyahato kfo memorm, “Niko ka be tu nhai yima dukefm! ⁵⁰ Kangko yuht kantri bugat abha wohni duha rhumot, to be rpa yimarpar Judanmoh tkitt yakhato nohneft hifa. Nd dukefrpar hikkfot. Mirahko tfit wom dukefr ayaknom.”

⁵¹ Kaiafasr kfomo mrokfot nhai be turhu yima yuhurn ptharmor. Nhai. Ror nd gunyjimir prisroh tohakr tohetrn kfo htata mrokfeft kfo memor, Jisasr Judaroh tkitt yakhato nohrahr. ⁵² To mirahko ka Jisasr Judarpam dukahato nohmor. Nhai. Bro Nkifrarhu yonm wur fitoh fitoh tkitm riruh aruh hanyukroh yak nhafohhato rpa yimarhu yon kunys kanjo yak htaneft dukahato nohmor.

⁵³ Tor nd yiharn Judaroh bro yimam Jisasru was yuham ripthakmomm. ⁵⁴ Jisasru was mrokfot bi yiro yiro nakfo hafkniettn Jisasr nhai Judaroh nyingahato yau nriyafrmoar. Ror mrokfot wany nkriyaf tanyhato nd kmit htanymortn yimor wom nungur tik furat yorhwa kmi Efraimtn. Ndha turhu disaipermpno tohmom.

⁵⁵ Nd kmit tohetmn Judaroh bro Pasofa burwa yihar rhumomr. Wuri wuri toh hanyuk yimam bi Jerusalem-rpar bi yi rifiny hanyhato rroh tamoh tamoh fasoh nefm bi yi hanyhato bi fak wus bowus hanymoumm. ⁵⁶ Jerusalemr yi rifinyhato tfit Jisasr fukatoh hambromoum. Yukatoh hambrohato tfit tum Bro Nkifra rmonrhu temper kmifar tohhato nakfo ttiwon nakfo ttiwon memooum, “Niko finji dukewako? Rore ka niahato rhunhorahrnom ndar nom yorhwa bro yihar o ka nhai?” ⁵⁷ Prisroh mtohak yimami Farisim bro mrokfot kfo memom, “Fitoh yimam Jisasr fitha htitwomr mrokfot bmbri nompno aniekahtt yakrahnomr.”

12

Mariat Jisasru wuraf sanda welpaye wunamo yuhat

(Matyu 26.6-13; Mak 14.3-9)

¹ Afo yuhre 6-pela yiham Pasofa burwathu rhuyuk yiham afo ruhetmn Jisasr Betaniko yimor. Nd kmi Betanit, Jisasr kasinyamo yima Lasarusru kmiyet. ² Betani thofm Jisasr htiyahkato you yesht yakhato Jisaspno yimam rpat rhuhato nuwa famom. Martatn nd htamo yesht fak nhta nhombrahemotm. Yimam Jisaspno rhuhato yeshri yamom, Lasarusr tor rhuhato fenyhomorm. ³ Mariat nd bro marukfoyet sanda knt yakhato Jisasru wuram fuk wunamotr. Yuk wunanihato tfit tuthu yuke tmarifaye trk domtmotr. Nd sanda knt yuk wunamohat mtha yarfon gbeфр yuht kunys thu kasi bugamort. ⁴ Mariat nd hingrnett Jisasr hingrnamottr tfit Jisasru wom disaiperr tu nd Jisasr hndhnaruha yima Judas Iskariot, rorn kfo memor, ⁵ “Bar yimako, tamohmpno nd met Mariat yonmar bro marukfet sanda knt be wawurasohtt. Marifotnom, nd sanda knt 300 kinakfoye yimam wiknarfotmt tfit nd maruham yakhato wuskapa duha yimamn nd maruham hi hanyrfonom.” ⁶ Judasr nd mrokfot pthamohat nhai wuska duha yimarohe mifneft

dukahato kfo ptharmor. Turhu rikohneft kfo rhtimor. To rroh maru kpt to frohm yakitohhato yak nfhotimoamm? To ror. To rorn yakitohhato tfit rorn kak rikohmourm.

⁷ Jisasr Judam wanymom Jisasrhu Betanithu toh nmbuhat, ndnetmn memom Betaniko yihato Jisasr htirahnom. To nhai be Jisasrhu htinefrpat marimom yirahnom. Nhai. Jisasr Lasarusr kasinyamo mrokfot bi wanyetmn, be memom Jisasr yi htihato Lasarusr htirahnom, ndnetmn yimom. ¹⁰ Ndnetmn prisroh bro yimam bi kfo habofkni htamom Jisas Lasarusrofhu rpata wasneft. ¹¹ Nhai be sfno nd Lasarusrhu wasneft kfo ptha kasinya-rrmomt. Rroh dukeft duka memom, “Ni Lasarusnn, Jisasr kasinyamotrn Judam ndt wahtiyahfato prisroh bro yimaroh tngm bi yakhato yiho tuhaf tanywamm bi Jisasrn hikwom.” Nd dukefmpno memom, “Lasarusr awasnom.”

Prisroh bro yimam memom, “Lasarusr awasnom.”

⁹ Bok Judam wanymom Jisasrhu Betanithu toh nmbuhat, ndnetmn memom Betaniko yihato Jisasr htirahnom. To nhai be Jisasrhu htinefrpat marimom yirahnom. Nhai. Jisasr Lasarusr kasinyamo mrokfot bi wanyetmn, be memom Jisasr yi htihato Lasarusr htirahnom, ndnetmn yimom. ¹⁰ Ndnetmn prisroh bro yimam bi kfo habofkni htamom Jisas Lasarusrofhu rpata wasneft. ¹¹ Nhai be sfno nd Lasarusrhu wasneft kfo ptha kasinya-rrmomt. Rroh dukeft duka memom, “Ni Lasarusnn, Jisasr kasinyamotrn Judam ndt wahtiyahfato prisroh bro yimaroh tngm bi yakhato yiho tuhaf tanywamm bi Jisasrn hikwom.” Nd dukefmpno memom, “Lasarusr awasnom.”

Jisasr king kanjo Jerusalemr mfnahmo yuhat

(Matyu 21.1-11; Mak 11.1-11; Luk 19.28-40)

¹² Jisasr Betaniko Lasarusrhu kunys nuwa ye tanyhato nd wom marrn memor, “Yiruha Jerusalemko.” Bok met yindarim Jerusalemr turoh Pasofa burwat rifinymom. Wanymom Jisasrhu Jerusalemkorhof yi nmbuhat. ¹³ Rom inji wanyhato yomkpo kanjohot twa gham yakmomn yihotoha yuhat toh gariyakmomr. Toh garihato yimotr rom grha hayuyak hanyhato kura het grhahato kfo hany memoum, “Wa! Wa! Wa! Tunga Nkifrara wayak marnyatwanr ndar Isrerroh kingr Brorhu yufatpno niewar.” ¹⁴ Jisasr yimohat donkir mrhumotr nd donkirk hiyau hanymorr. Ror donkir rhuhato yimohat to gonborngt kfoyuk mrokfot rhu hikmot. Nd mrokfot gonborngtn profet Sekaraiar kfo memor,

¹⁵ “Niko Saion thofko, mirahko ayakrmenom.

Wahtiko nikmoh kingr bi donkiyenrn myorhtr hnewurr.”

Sek 9.9

¹⁶ Jisasr donkir hanymohat Jerusalemko rorhu disaiperm nhai yima yuhu yakrmomt mrokfofhu yimbu yuhat. Kto Jisasr nohhato sinyani bi bro yufat yaketrn nd mrokfofhu yimbu yuhat fak dukamomt. Nd rom Jisasr kfo yindhorkhato namo neft gonborngt kfo hik twanhomott.

¹⁷ Lasarusr yopt husfihus yiham rhuhato tfit Jisasr kasinyamohat bok tuhan yindarim Jisaspno tohhato htihomr Jisasr Lasarusr nakuhato sinyamohat. Romn tfit wommpno yi rhuhato Jisasr namo neft naptha nuhas hi hanymom. ¹⁸ Womm wanyhato ndnetmn Jisasr yihota yuhat toh gari hasomomr. ¹⁹ Farisim inji htifafo hanyhato tum rinakfo nakfo memom, “Niko htitko? Yimam bi rorrpar bi hikwom. Nom kangnom, akfo rafonomm, be nhai. Tuhan yindarim ror hingrnamo mirakerkfot naptha nuhas hihany, naptha nuhas hi hanitamn bi rorrpar kak hikwom.”

Wom Grik thofm memom, “Jisasr ahtinom.”

²⁰ Nd Pasofa burwa yiharhu lotuneft Judam niamohat wom Grik thofm rpata hik hnamomm Jerusalemko. ²¹ Nd Grik thofm niahato afo Filifrpno yimom. Nd yima Filif Galili profinsko kmi Betsaida thofer. Rorpno niahato mttiwon memomr, “Broye, nom kangnom, Jisasr ahtinom.” ²² Yo be Filifr wany sanyhato Andurupno mnahtiyaknihato Jisasr mkfo memoer, “Ni Grik thofm kangm, ahtinomn.” ²³ Jisasr tfit kfo wok memorm, “Bro Najomrhru bro yufathu yak yihar bi brbohwor. ²⁴ Na kfo mifwanko, wit tptit nhai bbinysoft misuhhato nohrfot, to be inji rpa tpirpat rhuraht. Misuhtn froht, tfit frdborhahato sinyaruhatn dmet dmet hirrahmt. ²⁵ Yimar be turhu toh marnya nmbuhat mfro dukewur, kto nd toh marnya nmbuhat tfit hti hambrafrahrt. To fitoh yimar nda bbinysofthu toh marnya nmbuhat mong trohhato tfit nhai mfro dukakahrt, rorhu toh marnya nmbuhat toh nkifrarahr. ²⁶ Fitoh yimar nanhu yinhit tohvor, nd yimar na

hikhnhahato nanopno rpat tohkfot. Yimar nanhu yinhit tohrahrr, nd yimar nanhu Yifemrn bro yufat hirahrr.”

Bro Najomrn kfo grhakfot

²⁷ Jisasr tfit kfo memor, “Nanhу yima yuhur krhohato bok dukefm kekma. To finji kforhoya? Ka kfo miruha, ‘Bro Yifeme, na wofnkaха nd krhoparoh yakneft?’ Ka inji kforuha? Nhai. Na kanga finji anaya na nhai inji kfo rafokfot. Na to nd krhoparoh yakneftn niamoya. ²⁸ Bro Yifeme, ninhu yufat abrotwat.” Jisasr inji pthanimotr wom tngt yura hefen yuhat niamot. Nd tngt kfo memot, “Nanhу bro yufat bi fak nuhas hnamoyanm. Tfit wompam yak nuhasruhanm.” ²⁹ Jisasrpno brbo tohmo tuhan yindarim nd mrokfo kfo tngt wanyhato kfo memom, “Ka toher.” Womm memom, “We, ka mounmotr pthiwur.”

³⁰ Jisasr rroh mrokfom wanyafo hanyhato tfit kfo memorm, “Nda niko wanu tngt nhai nann dukahato nd tng yawihnarfot. Nhai. Niko dukahato nd tngt fawihnes. ³¹ Ar yiharn Bro Nkifrar nda bbinysoftu tuhan yindariroh nefm yak nhtarahrm. Yo nda bbinysoftu tndhr yak wahtarahrr. ³² Na ndar bbinysoft tohhato bgre miyeta kasinya thombat tot nd yiharn nda bbinysoftu tuhan yindarim rpat nanopno yarim tohrahm.” ³³ Jisasr nd mrokfot pthamohat turhu noh yuhathu mrokfo yuhatn kfo ptha nuhasmorm.

³⁴ Yo tfit nd rorhu mrokfom wany yakitohmo tuhan yindarim ttiwon memomr, “Bro Nkifrarhu boririfhut kfo kangt, ‘Nd yimar Bro Nkifrar tkrurafohato yimam minrfa htiyakruhar toh nkifrarahr.’ To ni tamohmpno inji kfo yamuka Bro Najomr bgre miyetr tuhegirrahmr? Nd yimare froher?”

³⁵ Jisasr tfit kfo memorm, “Tor afo nukefnr. Nd nukefnrpno afo wawi-yauyauko. Nd wuroh nukefnr wuteh pskuyakrahr to be finji yihotat htihato yauruhako? Yimam nd yifungt wuyau-yauhato yak tato botatiwam nhai yihotat htikahmt. ³⁶ Niko wuroh nukefnr yorhwa fijo nd nukefnr yak hikhato nd nukefnrhu yonko rhurahko.”

Bok Judam Jisasr hingrnamo mirakerkfom htimohat nhai rroh bro dukefm Jisasrn htarmomm

Jisasr met yindarimpno naptha buganihato be htanymorm. Htanymohat be yihato rhu kafrohmor. ³⁷ Jisasr ar yonmari mirakerkfom hingrnamoahat nhai rroh yima yuhum sinyahato rroh bro dukefm rorn htarmoam. ³⁸ Rom inji namohat profet Aisaiar kfoyuk mrokfot fak hikmom. Profet Aisaiar to kfo memor, “Broye, nom pthiwa mrokfom frohm wanukamnom?

Yo frohm nd ni hingrnewa bro hingrnemf htihato rroh yima yuhum sinyewamm?” *Ais 53.1*

³⁹ Be nhai Jisasr nayuk nefm htihato yima yuhum sinyarmomm. Nhai be sfno Jisasrhu mrokfom hik duha yirmomm, tot tfit wom mrokfot profet Aisaiar kfo memor,

⁴⁰ “Bro Nkifrar nyingam takunyj-motrm nhai yukatohruhatm,
yo duka yima yuhum takih-motrm nhai tamoh mrokfom tfit dukakfot.
Nyingetm rhuhato wom nefm htiruhamn,
yo yima dukefetm rhuruhamn mrokfo mna yuhum yakruhammn,
yima yuhum yak kekuthato tfit nanopno yarim tohruhamn yak marnyaruhanm.” *Ais 6.9-10*

⁴¹ Aisaiar nd mrokfot pthamohat Jisasrhu bro nanyjar bbuieft htihato inji kfomor.

⁴² Jisasr mrokfom kfomoahat Judaroh bro yimam bokm wany yakiomoum. Tmift tafonthu yak nriyafneftne nhai. Farisim yaktme-moamn nhai yak nriyafrmoam. Memoum, “Farisim htirahmnom be nhai Judaroh rhu rifinyuk rmonm kfakruhatmnom.”

⁴³ Rroh dukeft be duka memoum, “Be yima mifmn akfo yindhor boyindhormnom.” Nhai marimoam, “Bro Nkifrarn akfo yindhorrnom.”

Jisasr pthayuk mrokfomn yak nhtarahmm tuhan yindariroh nefm

⁴⁴ Jisasr buha yima rifiny swirtn nnuhuhato kfo ptha memorm, “Fitoh yimam na wany yakiohato hikwom, to mirahko ka nanopayann hikwom. Nhai. Na tkrurafoyuk Bro Yifemrpno rpat hikwomno. ⁴⁵ Yo frohroh nyingam nann kukatohwom nhai nanopaya

yukatohkahm. Nhai. Na kfo tkrurafyuk Bro Yifemrpno rpat kukatohwomno. ⁴⁶ Ndar bbinysoft yiro kspitat rhumohat nann niahato kshr mifiktoh nuka-moyanr. Ndnettн yimam na hikwom nhai yifung kspt tohhato yak tato botatoruhatm. ⁴⁷ Yimam nanhu mrokfom hik duha yitam na nhai htihato tfit rroh nefm yak nhtahekanhm jasm kanjo. Na nhai ndhtet neft niarmoya. Na niamohat yimaroh minrfa htiyakneft niamoya. ⁴⁸ To yimam na mong trohhato nanhu mrokfom yak duha yitam, tot rroh nefroh yak nhtayuk jaskfot. Nd na pthayuk mrokfotn jaskfot kanjo tu wuroh ndar bbinysoftu batи yihar yak nhtarahtm rroh nefm. ⁴⁹ Nd na kfiwa mrokfom mirahko ka be nanhu yima yuhurhu mrokfom pthiwa. Nhai. Bro Yifemrhu yima yuhurhu mrokfom pthiwa. Na to rorn tkrurafomotra niamoya. Ror kfo hta bohtafoyuk mrokfomn na kfo pthiwa. Ndnettн nd na pthayuk mrokfotn jaskfot kanjo yak nhtarahtm rroh nefm. ⁵⁰ Bro Yifemrhu mrokfot tu hifa rhu nkifrani nmbuhat mhfnahnewutt, ndnatn nd na pthiwa mrokfot tu Bro Yifemr kfoyuk tng yuhatn kfo ptha hikwa.”

Jisasr turhu Yifemrpno yiyuk kfo duka nmbuhat kfo dukamorm turhu disaiper

13

(*Sapta 13-17*)

Jisasr slef yimar kanjo turhu disaiperroh wuram bupaye yukmo yuhat

¹ Pasofa burwathu rhuyuk yihar yibonmo marrn Jisasr rhuhato duka hik duka hikhato kfo memor, “Hrek marr yorhwanomn nohok nd Pasofat riruhakrahnomt. Be nda marrn asor nanhu wuroh yihar rhuyukr. Nohokn nanhu nohhato nda bbinysoftu htanyhato tfit tukanhu Yifemrhu yi yihar.” Jisasr nhai duka mmormoarm turhu disaiper. Rorhu yima yuhur be romn rhumour. Noh-nefrpatpno mfafhonimorm. ² Nd wuroh marr rhumo krifn Jisasri disaiperm rpat rhuhato nuwa famom. Nd yiharn Saimon Iskeriotrhu yon Judasr, bi Satanr fasoh yima yuhu bebr htamorr Jisasrhu yahr kmimpno hndhnaneft. ³ Jisasr bi tur fak nhombramort Bro Yifemrhu bro bbukeft bi fakmort yo bi hti hikmort ror niamohat Bro Nkifrarpmo wutoh tanyhato niamor tfit nohnineft tfit sinyanihato Bro Yifemrpno yirahr. Ndm bi tur hti hik bohik bugamormn, ⁴ be Jisasr wasinya fnahhato nuwa yeyuk tebort htanyhato turhu yuke hmbreshar yak hrur thumorr tfit trkthar yakmorn ndar nyuhmor. ⁵ Bro dis yakmorn bupam tas hmbremort. Tas hmbrenihato nd bupaye turhu disaiperroh wuram yukaf hanyhato tfit nd ror nyuhmo trkthaye trcaf hanymourm.

⁶ Yo be yima yimaroh wuram yukaf hany yukaf hanymorn memor, “Saimon Pitarhu wuram ayukanr,” Pitar sinyahato kfo memor, “Broye, nine nanhu wuram kagn ayuka?” ⁷ Tfit Jisasr Pitar wahtiyak hti hamuhhato kfo memor, “Ni nhai tawisafkahnt nda na hingrniwa hingrneft. Kto tawisafrahnt.” ⁸ Pitar kfo memor, “Mirahn nanhu wuram ayukanr. Mirah mifn.” Jisasr inji wanyhato tfit kfo memor, “Nhai ninhu wuram yukrfoyann, nhai nanhu disaipern rhuruhatn.” ⁹ Saimon Pitar Jisasr pthamo mrokfot wanyhato tfit kfo memor, “Broye, kagn ayukanr, to btn mirahn wurarpam ayukanr. Tirfi mfhate rpatn wayuktwna.” ¹⁰ Jisasr tfit kfo wok memor, “Yimam bi yuht yimam yuetm nhai tfit wompam yukkfot. Bdr wurarpam yukkfot. Bi wurarpam fukme, yuht yimam fnhu bugewum. Nikmoh thatipm fnhu bugewumko. To nhai be niko buga kfokaha. Nhai.” ¹¹ Jisasr inji kfomohat bi htimor turhu wom disaiperrn yahr kmiroh tirm htarahrr. Ndnetrn kfo memor, “Nhai niko buga kfokaha.”

¹² Jisasr disaiperroh wuram yuk buganimormn tfit tur hmbremoa yuke hmbreshar hmbrenihato rim rhumor tur rhu tanymo tkittn. Rim rhuhato ttiwon memor, “Niko tawisafwoko nd na nefineftu yimbu yuhat? ¹³ Niko kutewukma Tisaya yo womnam kutewukma Bror. Rot hifa inji kutewukma. ¹⁴ Na nikmoh Tisaya yo na nikmoh Broya nikmoh wuram fukanko. To niko, nd na yak nuhasefi yuhatn niko tuko wuram nayukkfot. ¹⁵ Na bi fak nuhasanko to be nd yuhatn wahiktako. ¹⁶ Wawanyko, na kfo mifwanko,

hingrna yimar be turhu tohak yimarhu yinhit tohwor. Yo mrokfot hanyuk yimar nhaf kfo tkrurafyuk yimarhu yinhit tohwor. ¹⁷ Bi fekkomt nd na yak nuhasefinefthu yimbu yuhat. Nd yuhatn hingrna hikrahko tfit tuko rhu nmbuhat hifa yiruhatt tfit yindhorrahko.

¹⁸ Na nhai nikom buga kfokaha. Na tawisafwanm tukanhu yufatpno bi kfo htatayukm. Yo tuka bi htitant nd Bro Nkifrarhu gonborngt bingot htamot tu yimbuyefett rhuraht. Nd mrokfot kfo kangt,

‘Yimar, nanopno nuwa yenyho-yukrn,

bi toh kekuthato nanhu wasyuk wajis hatonemort.’

Sng 41.9

¹⁹ Tafi nd neft mfrpskena duha bi kfo nuhaswanko. Kto nd neft mfrpskena thombat tfit nikmoh yima yuhum nanrpaya htahato kfo mirahko na to nda, tu Bro Nkifrar kfo tkrurafyuka. ²⁰ Na kfo mifwanko, frohr na tkrurafyuk hingrna yimar yakmiyakhato fak marnya bomarnyerr, nd yimar nann yakmiyakhato kak marnya bomarnyewur. Yo nd yimar na yakmiyakyukr, nhai be nann yakmiyakkahr. Nhai. Nd na tkrurafyuk Bro Yifemrn kakmiyekwor.’

Jisasrhu hndhna yimarhu mrokfot

(*Matyu 26.20-25; Mak 14.17-21; Luk 22.21-23*)

²¹ Jisasr nd mrokfom kfonihato tfit yima yuhur rimortakihato kfo memorm, “Na kfo mifwanko, nikmoh womrn hndhnarhotra wasrahma.” ²² Jisasr inji kfomotr disaiperm tfit tum rinahti nahtihato nattiwon memom, “Nd ror kfi mrokfote frohr kfir?” ²³ Wom disaiperr Jisasr mfro yuhu mongimoar, ror nuwa yeyuk tebort rhumohat be Jisasrpn brbo rumor. ²⁴ Saimon Pitar nyinyage rikfo memor, “Wattiwonnr, frohr kfir.” ²⁵ Be nd disaiperr brbo rhu kekutni hanyhato ttiwon memor, “Broye, ni kfi yimare frohr kfir?” ²⁶ Jisasr tfit kfo memorm, “Frohr bretpat yekantn nnari disn bretpat tayifakhato fahuya, tor nd yimarn hndhnarhotra wasrahma.” Inji kfonihato bret nuwat yakhato watayifakhato rihemor Saimon Iskariotrhу yon Judasrn.

²⁷ Judasr nd bret nuwat yakhato famort. Fenyi hanymort Satanr fkne twanhommor. Jisasr kfo memor, “Judase, kangan finji anaya, to be asomif fura mrom wayakn. Mirahn wom kukna hatoha.” ²⁸ Nd yima bugam nuwa yeyuk teborthu mku mku rhu wohnmom, nhai yakrmomt nd Jisasr kfomo mrokfothu yimbu yuhat. ²⁹ Judasrn maru gegb yoht haruhetrn, Jisasr inji kfo pthamohat disaiperm duka memom, “Ka Pasofa burwat rhuruha bro yiharhu yeyuk yeshri wiknaneft kfirr. O ka wuskapa duha yimaro hayuk wuskaroh wikna hanyeftn kfirr.” ³⁰ Be nd nnaripam tayifaket bret tifenr Judasr yak yenyimorr fnahnimor. Yihat bi wufak bugamot.

Jisasr nfri boririfhu mrokfot hemo yuhat

³¹ Nd yima Judasr fnahnimotr Jisasr kfo memor, “Be bi asor bi Bro Najomanhu bro yufathu yak yihar. Na nohruha noh nmbuhatn Bro Nkifrar bro yufat yakrahr. ³² Nanhu nohneftpno Bro Nkifrar bro yufat yakruha yuhat tawo Bro Nkifrar sinyahato be yudbat bro yufat hirahra. ³³ O arenko, bi brbohwor nikmoh htanyuk yihar. Hti hasiwokma tfit hti hambraforahkma. Judam rpahtet mrokfot kfo nuhas-moyanm yo tfit nikompno rpahtet mrokfot pthiwa. Na yiruha yihotar nikom nhai yau hikruhatkomr. ³⁴ Bi wom nfri boririfhu mrokfot kfo nuhas tanywanko. Niko rpa rpa yimako wommpno nayak marnyahato rpat tohkfot. Niko nanhu tirtn rhu bugamoko. Tawo niko wommpno nayak marnyahato rpat tohkfot. ³⁵ Niko wommpno nayak marnyahato tohrahko, wom riruh aruhukm htiruhamn kfo mirahm, ‘Ndm tu Jisasrhu disaiper mifem.’ ”

Pitar kfo namhimo yuhat

(*Matyu 26.31-35; Mak 14.27-31; Luk 22.31-34*)

³⁶ Saimon Pitar warhuhato Jisasr kfo ttiwon memor, “Broye, ni fitoko yiruha?” Jisasr kfo memor, “Na yita yuhat ni nhai hik hnewotna. Kto mongkorne ee btn nierahn.”

³⁷ Tfif Pitar warhuhato kfo ttiwon memor, “Broye, to tamohmpno nhai hik hnewotann? Na kanga, nann hikhato nann ninhu nohyuk tkitt yakruhant.”

³⁸ Jisasr inji wanyhato tfit kfo ttiwon memor, “Tu kfo mif mifwona? Na kfo mif mifwann, krirhu naku tngt tafi wany juha, husfirpa kfo namhit kfo namhi kangnm, ‘Na nhai tawisafkahahn Jisasr.’”

14

Jisasrn tor Bro Nkifrarpano yiyuk yihotat

¹ Jisasr tfit kfo memor, “Niko nda mrokfot wanuk-wohat mirahko bok dukefm ayakkah-nomn yima yuhum akrhomnom. Nikmoh dukefm be Bro Nkifrar duka yo na duka, be nd dukefrparpno rhukfot. ² Nanh Yifemrhu kmir yonmari yonmari kuny rmonr korhr. Ndnatn na yi shombat nikmoh kunyroh bi yak hta hanyneftn bi yi hanyruha. Be kuny rmon duha arhut na nhai inji kfo tany hanyrfotanko. ³ Na yi shombat kuny rmonm yak marnya hta tanyrhoyanmn tfit niahato miyak htiyakhato be rpatah yihato rpatah nanpno rpatah tohrahnom. ⁴ Na yita kmikorhof yi yuhat niko bi htiyeteko.”

⁵ Tomasr inji wanyhato ttiwon memor, “Broye, ni kfiwa yihota yuhat nome nhai tawisafkahnomt. Tone fitoh yuhatn nieruhanom?” ⁶ Tfit Jisasr kfo memor, “Yimam kangm Bro Nkifrarpano ainom, nann yihotaya, yo nann Bro Nkifrar fak nhombranamor, yo nann toh nkifrayuk yafothat yimam kahukanm. Nhai wom fitoh yuhamn yimam Bro Nkifrarpano yikfot. Tu be nhai mif. Nanrpayanpno niakfot. ⁷ Bi ahti tawisafkma, nanhu Yifemr hti tawisafrfokmr. Ariham bi hti hik bohikwakomrn bi tawisaf-wokomr.”

⁸ Filifr wom ttiwon mrokfot wakfo memor, “Broye, nom kamuknom, Bro Yifemr wayak nuhaskahtnom nmoh yima yuhum mirhurahnmom.” ⁹ Jisasr tfit memor, “Filif, ni tamohmpno kfo yamuka, ‘Bro Yifemr wayak nuhasnnom?’ Ar yonmar yiham nikompno toh hnamohate ka nhai hti tawisafrmokma? Yimam na htitwom, to Bro Yifemr htitwom. To tamohmpno tfit kfo yamuka, ‘Bro Yifemr wayak nuhasnnom?’ ¹⁰ Ni ka nhai duka mikahn na Yifemr thu hamuhmoya yo Yifemr na thu hamuhmora? Nani nanhu Yifemrpno nnoh toh nmbuhat nhai nndo nndo. Mrokfom na niko kfohemoaam nhai be nanhu tngtn ptha hnarmottm wany hnarmokomm. Nhai. Bro Yifemr nann mrhuhato mrokfom ptha hnehato mirakerkfom hingrna hnamor. ¹¹ Na ptha yamu-kohat na Yifemr thu hamuhmoya yo Yifemr thu hamuhmora, nd mrokfot na kfiwat wawany yakiotwakomt. To nd na pthayuk mrokfomn nhai wany yakiokahkomme, tfit na hingrna hnamo mirakerkfomn dukakhato wahiktowkma.

¹² Na kfo mifwanko, frohm rroh bro dukefm nann htewuma, nd na niwa nefm nd yimam narahmm. Uwa, ndt nhai be kfo furakfot kfokaha. Na Bro Yifemrpno yi tohruha. Ndnett rom naruha nefm tu bro nefm narahm. ¹³ Tamoh tamohm nanhu yufatpno kfo ttiwonrahko, hiruhanko. Nd yuhatn Bro Yifemr bro yufat yakrahr. ¹⁴ Ndt to bi kfiwant tamoh tamohm nanhu yufatpno kfo ttiwonrahkoma, hiruhanko.”

Jisasr kfo memor, “Bro Nkifrarhu Yafothar yawihnerahr.”

¹⁵ Jisasr tfit kfo memor, “Nikmoh yima yuhum nanpno korhme, na pthayuk mrokfom yak hik marnya bomarnyarahkomm. ¹⁶ Na yi shombat nanhu Yifemr kforhotanr nikmoh toh tamnouhato thu bmtayukr kforuhattr yawihnehato be nikompno toh nkifranirahr. ¹⁷ Nd toh tamnouyukr nieruhar to Yafothar nieruharn toh tamnourahrko. Nd Yafotharn yimam kak nuhas bonuhasworm Bro Nkifrarhu tu yafothet nef mifm. Ndar bbinysof thofm nhai hti tawisafkahmr, ndnett rom yakkfot. To niko awi nd Yafothar nikompno yorhwarn hti tawisafwokomr. Kto nd Yafothar mithu nawohrahrko.

¹⁸ Na yi shombat nhai mong trohnihato yon kutenm kanjo yak mmabrafiny hasoruhatko. Nhai. Tfit niahato mihtiruhanko. ¹⁹ Ndar bbinysof thofm wurohpam hti hasiwuma hti hambrafrahma. To niko awi hti hanyrahkoma. Na nohhato tfit sinyaruha. Niko to inji nohhato tfit sinyaruhko. ²⁰ Na nohhato tfit sinyarhota, nd yiharn hti dukarahko nani nanhu Yifemrpno nnoh toh nmbuhat nhai nndo nndo yo nikomi na nmoh toh nmbuhat nhai nndo nndo. ²¹ Yimam nanhu boririfhu mrokfom yakhato kak hik marnyewumm, rroh yima yuhum nanpno korhm. Yo nd yimam nanhu dukefr

yorhwam nanhu Yifemr hifa yima yuhur hmbritrm, yo na hifa yima yuhur hmbrihato rompno mfnahhato yak nriyafruhanm.”

²² Jisasr inji kfomotr tfit Judasr, nhai tu Judas Iskeriotr, wom nndoh Judasr kfo ttiwon memor, “Broye, tamohmpno nomrpanompno yak nriyafhato ndar bbinysof thofmpno nhai yak nriyafruhatn?” ²³ Jisasr kfo memor, “Yimam rroh yima yuhum nanopno korhm, nd yimam na kfo nuhasyuk mrokfom hikrahmm. Mrokfom hikruhatmm nanhu Yifemr hifa yima yuhur hmbrihato to be nani nanhu Yifemr rompno yihato tohnhorahnonm. ²⁴ Yimam nhai tu rroh yima yuhum nanopno rhukahm, nd yimam nhai nanhu mrokfom hik marnyakahmm. Nda niko wanuka mrokfom nhai be na tukanhu dukefrhu mrokfom ptha nuhaskahanko. Nhai. Na kfo tkrurafyuk Yifemrhu mrokfom kfo ptha nuhaswanko.

²⁵ Na nikompno afo tohwa fijo nda mrokfom bi kfo ptha nuhas tanywanko. ²⁶ Nikmoh toh tamnouyuk Yafothar, Bro Nkifrarhu Yafothar nierahr. Nanhu yufatpno Bro Yifemr tkrurafuhattrr nierahr. Rorn nikmoh dukefm yak hta bohtaruhatrm na ptha nuhas bonuhas hnamo mrokfom dukarahkomm.

²⁷ Na bi htanywanko. Niko rhu haso thombat mirahko tamoh tamoh dukefmpno arhunom. Tamoh tamoh dukefm yafhohato be warhu furatwako. Nanrpaya ndhtet yindhor yima yuhur kahukwanko, nhai ndar bbinysof thofr ndhtet yima yuhur herfotrk. ²⁸ Bi wanukma kfo yamuhat yirhoyann tfit nieruha. Nanhu Yifemr yura mtohekwor, na be rorhu yinhibit ritohewa. Ndnett nkmoh yima yuhum nann korhm, be nanhu yinyeft be hti yindhorrahko. ²⁹ Nd neft tafi mfrpskina duhattn bi kfo nuhastewanko. Tfit kto nd neft mfrpskinaneft tukmoh nyngaye htiruhakomn na kfoyuk mrokfom wany yakiorahkomm.

³⁰ Nhai tfit wom ptha hatohwota. Nda bbinysoftthu tndhr bi tor bi niewur. To ror nhai nanhu toh nmbuhat yak hta bohtakahra. Nhai. Bro Yifemrhu dukef yuhat hikwa.

³¹ Tmift kanga na tukanhu Yifemrhu dukeft rhuhato rorhu mrokfom hikwa yuhat afo ndar bbinysoftthu met yindarim afo yak nuhaskahtanm ahtim. Be tmifko wasinyakahtko ainyom.”

15

Jisasr tu wain tof mifer

¹ Jisasr tfit wom mrokfot kfo memorm, “Na tu wain tof mifa. Nanhu Yifemr wain swirl tikater. ² Na nd wain tofanhu yuhtam yukha hir duha yitam wain tof tikatr puk thuworm. Nd yukha hiret yuhtarpam be frtept wusworm yukha hir marnyanef yihato.

³ Niko bi nd na pthaheyuk mrokfotn bi fak wus bowus marnyamottko be bi yukha hir yibonwoko. ⁴ Ndnett nanopno niko frtkafhato na nikompno frtkafuruha. Nhai wom wain tofthu yuhtam mmem toftpno nadodru duhatm yukha hir furakahm. Nhai. To inji kanjo niko nanopno frtkaf duha yirahko be nhai yukha hirruhatko. Nanpo frtkafrahko ee btn yukha hirrahko.

⁵ Na tu wain tofthu mmem tofa. Niko wain tofthu yuhtayeko. Yimam nanopno frtkafhato na rompno frtkafneft nd yimam yukha hirneft yuhtam be yihohathuwom. Nhai hir ffirmkahm. Na duha nhai wom finji naruhatko. ⁶ Nanpo frtkaf duha yita yimam kak thuwomm yuhtam puk thuhato fftewa kanjo. Kto nd ffyuhtam yak nhafohhato kandhi thuwomm.

⁷ Niko nanopno frtkafhato nanhu mrokfot yakhato yakitohrahkomt, nhai mrokfom, tamoh tamohm ttiwonneft, to be tukmoh duka fijo kfo ttiwon-ruhatkomr hirahrko.

⁸ Niko nanhu disaiper mifko rhurahko tu mfro mfro hir nattrahko. Ndtpno nanhu Yifemr tfit bro yufat yakrahr. ⁹ Na be Bro Yifemrhu yima yuhurn korhwa. Nd yuhatn tawo nanhu yima yuhur nikomn niamor. Yiha yiha niko be nanhu duka yima yuhurn rhukfot.

¹⁰ Na Bro Nkifrarhu boririfhu mrokfom hikhato rorhu yima yuhur rhumo kanjo niko na hayuk boririfhu mrokfom wany yakiohato hikrahkomm, nanhu yima yuhurn rhurahko.

¹¹ Na inji kfiwohat nanhu dukeft duka kanga, nanhu yindhor rifhur nikomn arhukahrn be nd bro yindhor yima yuhurparn arhurko. ¹² Na wom mrokfot kfiwanko: Niko tuko

niyak marnya niyak marnyakfot na niko dukahato nikmoh rhu nmbuhat yak marnyamo kanjo. ¹³ Kfiwanko, Kfiwanko, wom yimar yimat tohtn yimatm dukahato fnohr, tot tu yimat toheft. ¹⁴ Nanhu kfoyuk mrokfo yuhat hikrahko, nanhu yimatko rhurahko. ¹⁵ Na nhai wom kfo mekaha, ‘Arm hingrna yimayem.’ Nhai. Hingrna yimam nhai turoh tohak yimam hingrnewa hingrna yuham tawisafkahm. To na Bro Yifemrpno yakmo mrokfom bi ptha dbruf nuhasmoyanko. Ndnetann kfo kanganko, niko nanhu yimateko.

¹⁶ Na nhai nikomn yakrmokma nikompno tohneftn. Nhai. Nann fakmoyanko. Nann yakhato hingrneft hemoyanko. Memoya nd hingrneft wayakni waikahkomm niko hingrnayuk hingrneft fipett rhuhato yukhett rhuraht. Tu rhu nkifraniyet yukham hirrahm. Ndnett nantu yufatpno Bro Nkifrar wom shrm ttiwonrahkomr be hirahrko.

¹⁷ Ndnett boririfhu mrokfot kahukwanko. Nikmoh womm marbit htakfot.”

Bbinys of thofm hti dbnotrahmm disaiperm

¹⁸ Jisasr tfit wom mrokfot kfo memorm, “Nda bbinysoftu yimam hti dbnotwomkone, mirahko ayak mmonom. Nhai be ar nohofrpa nikomrpakompno inji nakahm. Nhai. Nanpno to inji namom. ¹⁹ Be nda bbinysoft tohwa yimaroh ruheft arhuko, yakmiyakhato hifa yima yuhur hmbrerfomko. To nhai. Ndar bbinysoftu yimampno toh hasetkomm yakmotanko rom tfit kfo kangm, ‘Tamohmpno frtrohwamnom?’ Ndnetmn namburhato hti dbnotwomko. ²⁰ Waduka hik marnya hanyswako na kfoyuk mrokfot. Wom hingrna yimar turhu tohak yimarhu yinhit tohwor. Ndnett rom ahti dbnotma, niko to inji hti dbnotrahmk. Nantu mrokfom ayak hikmm, to inji nikmoh mrokfom hikrahmm. ²¹ To nhai. Rom nhai tawisafkahmr na kfo tkrrafofuk Bro Yifemr. Ndnetmn niko bi nanpno yarim fnahnehato tohwatko be hti srthurahmk.

²² Na nia duha yihato Bro Nkifrarhu mrokfom aptha nuhas duha yianm be nd rom nayuk fasoh nefm be nhai mrokfo duhatm rhurfom. To nhai. Arihat bi mrokfot wanyetmn to be nhai nd rroh fasoh nefroh kamongyuk tkitm. ²³ Fitoh yimam na hti dbnotwoma, to nantu Yifemrn hti dbnotwom. ²⁴ Be na niahato rompno tohhato nd yimam hingrnawon duha bro bro nefm ahingrna duha yianm, be rom nayuk fasoh fasoh nefm mrokfo duhatm rhurfom. To nhai, na nayuk miraker-kfom bi turoh nyngaye htimommn tfit hti dbnotwomno nantu Yifemrpno. ²⁵ Nd rom nayuk nefm to bi turoh boririfhut kfomo mrokfo yuhatn bi kak hikwom. Nd mrokfote inji kfiwit:

‘Be hti dbnot furamoma.’

Sng 35.19, 69.4

²⁶ Nikmoh toh tamnouyuk Yafothar Bro Yifemrpno tohvor. Nd Yafothar tu Bro Yifemrpno tohhato tawisafwort tu Bro Yifemrhru rhu toheft. Bro Yifemrhru rhu toheft tawisafhato yimam kak nuhas bonuhasworm Bro Yifemrhru tu yafothet nef mifm. Na yihato tkrrafrhotanr nierahr nikompno. Nd Yafothar nieruharn nantu nefm yo hingrneft ptha srh nuhasrahrko. ²⁷ Yo to niko inji buga waptha srh nuhas-twakomm nantu hingrneft. Na rihringrnakmohat niko tohnhohato htimokomt nantu hingrneft. Ndnett ptha srh nuhaskfot yimam.’

16

¹ “Na nhai wofnkaha niko Bro Nkifrarhu mrokfot miyahfoneft. Ndnatn nd mrokfot kfiyanko. ² Judaroh rhu rifinyuk rmonm kfo yiritikfot kforahmk. Yo wom yiham was beb bobebrahmk. Rom inji na thombat mirahm, ‘Nom Bro Nkifrarhu dborioh nefm newunom.’ ³ Nd yimam niko ufasoh nefm naruhm nhai Bro Nkifrar tawisafkahmr yo na nda tohwohat nhai hti dukakahma. Nhai. Ndnett nd fasoh nefm narahmk. ⁴ Bi kfo nuhasanko nd yimam naruhu ufasoh nefm. Kto ndhtet nefm htitnomm tfit wadukatwakomt ndar na kfo nuhaswa mrokfot.”

Jisasr ptha nuhasmorm Bro Yifemrhru Yafotharhu hingrneft

Jisasr kfo memorm, “Na nikompno tohmohat nhai nd nd mrokfom kfo nuhasmoy-ank. Bi tukanhu Yifemrpno yiyuk yiham bi abrboh hnam, ee btn kfo nuhasmoyanko. To nhai. Yiham afo wuri ruhetmn ndnett nhai kfo nuhasmoyanko. ⁵ To be bi kita

tukanhu Yifemrpno. Tur kfo tkruraf-motra niamoya. Ndnetann bi tfit kita turpno. To niko nhai kfo ttiwon mikahkma, ‘Nine fitohko yita?’⁶ Na bi inji kfiwota nikmoh yima yuhum bi rinur finywom.⁷ Na kfo mifwanko, nane sinya troh tanyruhanko. Hifa inji sinya trohruhanko. Na sinya troh tany shombat, Bro Yifemrpno muhruha. Rorpno yirhoyann tfit nd toh tammouyuk Yafothar kfo tkruraforhotanr thu hamuhrahrko.⁸ Nd Yafothar nieruharn nda bbinysoftu tuhan yindarim yak nuhasrahrm fasoh fasoh nefm niewa yihotam, yo yimaroh toh marnyahato yima yuhum wutham rhuneft, yo ariham finji finji toh marnyahato Bro Nkifrarhu kotkfot mrokfo duhatm rhurahm. Nd ndm Yafotharn yak hta bohta nuhasrahrm.⁹ To frohmn fasoh fasoh niwa yihotam hikwam? To nd na hik duha yita yimam, romn nd yihotam hikwom.¹⁰ To frohmn Bro Nkifrar hti wuthewar? Nhai wom frohm hti wuthakahr. Ndnett nann nohhato Yifemrpno yihato nhai wom htirhotkma.¹¹ To frohmn Bro Nkifrarpno mrokfetm rhuruham? Nda bbinysoftu yurmo tndhr, rorn bi Bro Nkifrarpno mrokfeter. Ndnett yimam nd tndhr hikwam to rom inji buga Bro Nkifrarpno mrokfetem.

¹² Rom tom nanhu yima yuhur yorhwa bok mrokfom. Htitanko nhai yimbhin-dangm tohetohkahnko nanhu mrokforoh yakneft. Ndnatn nhai ptha dbruf nuhas bugewotanko. ¹³ Kto Bro Nkifrarhu yafothet mrokfot mhfnahwa Yafothar yak nuhas bonuhasrahrko Bro Nkifrarhu tu yafothet nef mifm. Nd Yafothar nieruharn nikmoh yima yuhum yak hta bohtaruhatrko nd yiharn yak dukarahko nd na pthayuk mrokfom. Nd Yafothar pthayuk mrokfom nhai be turhu fijo ptha fura bofuraruhatr. Nhai. Mrokfom na kfo nuhasyukrpam ptha nuhashirahrko. Yo ktopakto rhu hanyruha tamoh tamoh nefm yak nuhasrahrko. ¹⁴ Na harhuyuk mrokfo rifhur rorn yakruharr pthahirahrko. Ror nayuk tamoh nefm nann bro yufat yakruha. ¹⁵ Bro Yifemr harhuwa tamoh tamoh nanuhet. Ndnett kangango, nanhu mrokfo rifhur rorn yakruharr kfo nuhasrahrko.”

Krhopami yindhor nmbuhathu mrokfot

¹⁶ Jisasr tfit kfo memor, “Bi brbohwot nanhu yinyeft. Afo hti hambrafrakhma, ee tfit toh hany tefihato tfit htiyakrahkma.”¹⁷ Jisasr inji kfomotr wom disaiperm wanyaf hanyhato tum rinahti nahtihato kfo memom, “Ror kfi mrokfothu yimbu yuhat finji yorhwat? Kfo famur, ‘Toh tefi hasiwakomn hti hambraforahkma yo tfit toh tefinihato tfit htiyakrahkma.’ Yo womt kfo famur, ‘Ndnett nann nohhato Yifemrpno yihato nhai wom htirhotkma.’”¹⁸ Yo kfo memom, “To nd wom mrokfot kfo famur, ‘toh tefinihato,’ nd mrokfo nmbuhat afo myak mmotewunomt nd mrokfo nmbuhathu yimbu yuhat.”

¹⁹ Jisasr bi htimorm rom ror pthayuk mrokfot myak mmotamohat. Jisasr inji htihato kfo ttiwon memorm, “Nikome nd na kfo yamu, ‘Toh tefi hasiwakomn hti hambraforahkma, yo tfit toh tefinihato tfit htiyakrahkma,’ ndtn kak mmotewuko?²⁰ Wawanyko! Na kfo mifwanko, niko nur dungunangurahko. Ndar bbinysoftu tuhant yindars rom nhai inji naruhutm. Rom be yindhorhato rhurahm. To nhai mrokfom. Niko warhu dungunangu-twako. Kto tfit niko rhu yindhorrahko.²¹ Wom kfo nhombra mrokfot akfoyant. Wom mett yon yak yibonraht rhu kurhiwatn bro krhopam kekwot yon yak yihar. Krhopam yak hanitatin bi yonr fnurnir, bi be. Nd yonrn tfit bro yindhor nmbuhat hnewurt, nd rot hatoh hasoyuk krhopam nhai wom dukakahtm.²² Niko inji narahko. Nikmoh yima yuhum krho hasoruhamn kto na nikompno nahtiruha yiharn tfit nd krho yima yuhum yohniruhamn tfit bro yindhor nmbuhat yakrahko. Niko yakruha yindhoreft nhai yimam yak nohruhatmt.²³ Nd yihar mfrpskina thombat niko nhai nanopno wom tamoh kfo ttiwonruhatko. Na kfo mifwanko, tamoh tamohm nanhu yufatpno Bro Yifemr kfo ttiwonrahkomr, be yakhato wahirahrko.²⁴ Niko toh hnamo yiham niko nhai inji nawon-rmoko. Afo ariham wanhombranon-twako. Afo Bro Yifemr nanhu yufatpno wom shrm wakfo ttiwon wontwakomr. Inji ttiwonhato fekkomm, htirahko tfit bro yindhoreftpno rhurahko.”

Jisasr be bi mfrfnahnhato nda bbinysoftu bbukeft mano mano fahotmort

²⁵ Jisasr tfit kfo memorm, “Ariharhof mrokfom kfo nhombra mrokfompno ptha nuhas hnaroyanko. Kto nhai kfo nhombra mrokfompno kforhotanko. Tamoh tamoh rim kfota mkfota mrokfom Yifemrhum be kfo hik bohik nuhasruhanko. ²⁶ Kto nd yihar be nanhu yufatpno tamoh tamohm Yifemr kfo ttiwonrahkomr. Nhai nann tfit nikmoh mrokfom Yifemrpno kfo ptharhotanm. ²⁷ Bro Yifemr hti wofnworko. Nhai be sfno inji hti wofnrfotko. Na hti yindhorhato niko na htimohat, duka memoko, ‘Ndarr Bro Nkifrapno niamo yimayer.’ Ndnettn Bro Yifemr hti wofnworko. ²⁸ Na afo Bro Yifemrpno wutohmoa. Tfit Yifemr wuhtanyhato ndar bbinysoft fawihnamoya. Tohmoyann be bi tfit kanga ndar bbinysoft htanyhato tfit Yifemrpno aiya.”

²⁹ Tu Jisasrhu disaiperin inji wanyhato kfo memom, “Nd mrokfom asomif ni pthem, nhai be kfo nhombra mrokfom kanjo ptharfonm. Ptha hik mifnm. ³⁰ Nom bi hti hik bugewunomn tamoh tamoh mrokfom yimam duka kkopenhato hus yima yuhetem, ni bi htitnm. Nhai afo mekahn, ‘Afo turoh tnge kfo ttiwonrahma.’ Ndnatn nom inji htitanomn kangnom, a to Bro Yifemrpno toh tanyhato niayetrn tamoh tamoh dukefm bi htitrm.”

³¹ Rom inji kfomotm tfit Jisasr kfo memorm, “Bi duka ppohato bi hti duka tun-gunewukma? ³² Wawanyko! Na kfo hnamohat to be bi yihayer. Rpen rpen hik tubatuyafruhakko na turpetena tuhaf tanyrahko. To mirahko ka nhai nanhu wom frohr. Nhai. Tor nanhu Yifemr. ³³ Nanhdukeft kanga nanopno wafrtkafkahkomn be rhu mmorahko. Ndnetann nd mrokfom kfo pthiyanm. Niko nda bbinysoft toh thoft, to ka mirahko ka be toh yindh-orrahnom. Nhai. Krhopam yakrahko. To mirahko riyakrmiyakhato arisuhak-nom. Toh bmtakfot. Bi nann ndar bbinysofthu bbukeft mano mano fahot tkafmoyant.”

17

Jisasr turhu disaiper Bro Nkifrapno kfo bruttnamo yuhat

¹ Jisasr turhu disaipermpno mrokfo kfo pthahe buganimormn yura hefenr wuyukatohhato kfo bruttna memor, “Bro Yifeme, be bi asor bi yihar. Ninh Yonr bro yufati bro nanyjar bbuka rifhur wahenr. Wahekahtnr tawo ror hingrnayuk hingrneftn ni tfit bro yufat yakrah. ² To bi rorhu tirtn ninhu hingrneft htamont. Rorn tuhan yindariroh bro tohak yimar fak htamo. Ni hayuk yimam rorn toh nkifraniyuk yafothar kahukrm. ³ Yimam ni htihato duka kangm, ninrpa tu Bro Nkifraye, yo Jisas Kraisr tu Bro Nkifrar kfo tkrurafmo yimayer, inji duket yimam toh nkifranirahm.

⁴ Nd ni hayuk hingrneft bi hingrna bugamoyant. Inji nahato ninhu bro yufati bro nanyjar bbuka rifhur bi nd bbinysof thofm bi fak nuhas bonuhas bugamoyanm. ⁵ Bro Yifeme, nda bbinysoft tafi dborha duha na ninpno tohmohat afo bro yufeta tohmoya. Na kanga arihat nd bro yufat tfit wahe-kahtna ninpno tohruha.

⁶ Nda bbinysofthu tuhan yindarim, nanhu yufatpno kfo htahemom, bi ptha nuhasmoyanm ninhu yufati ninhu toh yuhat yo ninhu dukefr. Ni tunhu yufatpno rhuyukm, to bi nann hemo. Hifa fak hik marnyamomt ninhu mrokfot. ⁷ Arihat bi tawisafwom, ndar nanhu tirt yorhwa tamoh tamohm ninn hemoyem. ⁸ Nd ni hayuk mrokfo bugam kfo ptha nuhas bugamoyanm. Nd mrokfom yak duka tungunamotmm na ninpno toh tanynia yuhat bi wany hikmomtn rroh bro dukeft duka kangm, ni mifnn kfo tkrurafmotna niamoya.

⁹ Na rroh dukefrpno kfo bruttniwa nhai nda bbinysofthu yima bugam dukahato kfo bruttnakaha. Nhai. Nd ni tu hayukm kfo bruttniwa. Nd yimam to tunhu yufatpno korhm. ¹⁰ Na yakitohwa tuhan yindar bugam ninuhem. Yo ni yakitohwam to nanuhem. Rompno na bro yufat kekwa.

¹¹ Na nieruha, na nhai nda bbinysoft wom toh hatohrhota. Na nia thombat rom nda tuha bbinysoft toh hasorahm. Rom asha tuha bbinysoft toh haso thombat ni tu yura myorhekwa Bro Yifeme, bi ninhu bro bbuka nanyjaret tirtn htewanm, wayukatohaf hanyswanm, nd yimam ni tunn hemona. Ninh tirtn rhu haso thombat nayakitohkahmn rpat atohtwam no rpat tohmo kanjo. ¹² Na rompno toh hnamohat ni hemo bro bbuka

nanyjaret yafotharpno toh hongmb hnamotanm toh marnya hnamom. Nhai womr frtrohrmornom. Nd frtrophmo yimar, ror bi hukrn, rorpar frtrophmohat be yihato nohmor. To Bro Nkifrarhu rfa borngt bi nd mrokfot ruhettn, to be nd neft rhu twanhomot. ¹³ Na bi nia yibonwoyann nda bbinyssoft afo tohetann nd mrokfom kfo pthiwanm. Kanga tuka hatohwa yindhoreft kanjo rom inji bro yindho-reftpnno atohm.

¹⁴ Ninhu mrokfot bi kfo pthahe-moyam. Kfo pthahemotanm nhai ndar bbinysof thofroh dukefm hikkahm. Nhai. Ni dukiwa dukefr, na dhikwar, ndr kanjo inji hikwatm, ndnettn nda bbinysof thofm hti srthuwomm. ¹⁵ Na nhai kfo mikahann, wayaktwanm. Nhai. Be kfo bruttna kanga ninhu mofsinhit watabohifat hmbrikahtnm Tndhr nhai finji naruhatrm. ¹⁶ Rom nhai ndar bbinysof thofroh dukefm hikkahm. Nhai. Ni dukiwa dukefr na dhikwar, ndr kanjo inji hikwom. ¹⁷ Ninhu mrokfot tu fipet mifet. Ndnatn kanga, nd mrokfot nd yimaro yima yuhum ahingrnakahtn ayak wus bowuskahttm be ninpno rim tohni bugarahm. ¹⁸ Na ni tkrurafmotna nda bbinyssoft niamoya. Nd yuhatn nd yimam tkrurafhotanm kmi kmim rhu fnahrahm. ¹⁹ Rom dukahato na bi ninhu tirtn rhuhato ninhu dukef yuhatn hikwa. Tawo rom na hikwa kanjo ninhu tirtn htahato ninhu dukef yuhat hikrahm.

²⁰ Na nhai nanhu disaiperpam dukahato kfo bruttnakaha. Nhai. Rom pthayuk mrokfom wanyhato na hikruha yimam rpat duka nhafoh bugahato kfo bruttniwa. ²¹ Na kanga no nito tohwa kanjo rom inji rpat nafrtkafhato rpat atohm. Yo rom nonpno afrtkafkahtm nda bbinysofthu tuhan yindarim htiruhann nanhu nia nmbuhat duka mirahm tu Bro Nkifra tkrurafmotna niamoya. ²² Nd ni nanopno hayuk bro yufat bi hemoyanm. Nd bro yufatpno rpa yima yuhur rhurahm no rpa yima yuhur yorhwa kanjo. ²³ Na kanga na romn thu hamuhkfot, yo ni tfit nann thu hamuhkfot, inji inji anakahnomin rom be rpa yima yuhur rhurahm. Tfif ndar bbinysof thofm inji htiruhann nanhu nia yuhat duka mirahma, Bro Nkifrar tkrurafmo yimayer. Yo duka mirahm, nanhu disaiperm ni Bro Nkifra mondtt htewunm na ni Bro Nkifra mondtt htamo kanjo.

²⁴ Bro Yifeme, nd ni hemo yimam na kanga na tohruha kmit rom rpat atohtwanom. Na kanga nd na hatohruha bro nukefti bro yufat afo ahtitwamt. Nda bbinyssoft tafi dborha duhattn na hti wofrhato hemona nd nukefti bro yufat. ²⁵ Tu dborioh nefm yakitohet Yifeme, nda bbinyssoft tohwa tuhan yindarim nhai tawisafkahmn. Nanrpaya tawisawann. Nd ar nanopno tohwa yimam, rom tawisafwomt nanhu nia nmbuhat. Kangm, Bro Nkifrar kfo tkrurafmo yimayer. ²⁶ Bi fak nuhasmoyanm ninhu yufati ninhu toheft yo ninhu dukefr. Tfif wom yiha wom yiham yak nuhas hanyruhanm. Inji narhotanm, ni Bro Nkifra na marbit htewa kanjo rom tfif nd neft yakhato womm marbit htarahmm. Yo na inji htirhoyann thu hamuhruhanm."

Jisasr bro krhopam yakhato nohmorn tfit sinyamor

18

(Sapta 18-20)

*Judasr yahr kmiroh tirmn Jisasr htamo yuhat
(Matyu 26.47-56; Mak 14.43-50; Luk 22.47-53)*

¹ Jisasr Bro Nkifrapno kfo bruttna buganihato turhu disaiperm myaknihato tek Kidront hayuknihato mkuko yimom. Nd tek mkuko rhuyuk olif suhnt yi rhumom. ² Nd olif suhnt bok yiham Jisasr turhu disaiperm yaknimoarm ndha yi rhu rifinymoum. To Jisasr hndhnayuk yima Judasr ror bi htimort nd tkitt. ³ Ndnettn Jisasr to be nd yuhatn hanymorm Romroh soldiami polism. Polism prisroh bro yimami Farisim kfo tkrurafmomm. Yahrt tohyuk kfra inyarut yo kshm rpat fakitohakmomm.* ⁴ Jisasr nd yimam htiyak-mohat nhai yak mmormort rroh yi nmbuhat. Ror bi tawisafmorm rorhu yakyuk krhopa bugam. Bi tawisafetrn kfo ttiwon memorm, "Nikome frohm hambriwako?"

* 18:3: Nd temperthu prisroh bro yimam kfo tkrurmo polism Bro Nkifrarhu temperr tohukatohmoum.

⁵ Kfo memomr, "Nom Nasaret thof Jisasr kak hambro hnewunom." Jisasr sinyahato kfo memorm, "Na to asoya." Nd Jisasr hndhnayuk yima Judasr, ror rpat nd yahr kmimpno rpat tohmoum. ⁶ Jisasr kfo memotr, "Na asoya," nd yimam tfit mongthur mongthur yihato tuha dangn yukha dangn yukham tmbho thumom.

⁷ Tfit wompam Jisasr kfo ttiwon memorm, "Niko frohr hambriwako?" Kfo memom, "Nasaret thof Jisasr hambriwunom." ⁸ Jisasr kfo memorm, "To bi kfifyanko, na asoya. Na hambro hne thombat to bt ndar na hik htfaswam afo aim." ⁹ Ror nd yima yuhur inji mfnahhato inji kfo pthamohat, to bingot mrokfot bi kfo memor, "Nd yimam ni hayukm nhai rroh womr yakrmotmr frtrophrmornom." Nd mrokfot bi inji ruhettn to be ka yimamn fak htamotmr inji kfomor.

¹⁰ Saimon Pitar ror bainat fakitothakmor. Nd bainat kimt teh tundakhato prisroh bro tohak prisrhu hingrna yimarhu tirmif yimbhindangt frbubafmotrt misuhmot. Nd yimarhu yufat Malkusr. ¹¹ Pitar inji namotr tfit Jisasr kfo memor, "Bainat tfit wathuntwe. Ni finji dukewuna, ka kagn, nd krho nmbuhat bi Bro Yifemr dkfoyukt ayak duha yirte? Nd dukeftpno inji newun?"

Jisasr Anasrpno hanymo yuhathu mrokfot

¹² Nd Jisasrhu yakt yimo yimam Jisasr tir tir yakkomr mtitofe kiboki-momr. ¹³ Kibokiyakhato afo Anasrpno hanymomr. Anasr Kaiafasrhu matoh-emer. Kaiafasrn prisroh bro tohak yimarhu hingrneft fakitohmort nd gunyjimr. ¹⁴ To nd Kaiafasrn bro tohak prisr tohhato Judaroh bro yimam bi kfo memor, "Rpa yimarpar Juda buga-nmoh tkitt yakhato suh nanyorneft hifa."

Pitar mett kfo nhehmo yuhat

(Matyu 26.69-70; Mak 14.66-68; Luk 22.55-57)

¹⁵ Jisasr hanymohat Saimon Pitari wom disaiperr hik hanymofr. Nd wom disaiperr bro tohak prisr bi tawisaf-morr. Ndnetrn ror rim fnahnimor nd bro tohak prisrhu kuny kmifako Jisasr hafknemohat. ¹⁶ Pitar ror kmifa rim fnahnitn mtoh hasomor. Tfit ndwom disaiperr Pitar hti hambrohato tfit nd kmifa rim fnahnit tohukatohmoa mett kfo ttiwonhato Pitar fknenimor. ¹⁷ Nd mett inji htiyaf hanyhato Pitar kfo ttiwon memor, "Ka ni aso nd yimarhu wom disaiper?" Pitar kfo memor, "Nhai na. Na wom yimaya." ¹⁸ Yifung-nano bro frfoneft yakmottm nd bro tohak prisrhu kuny kmifar yukatohaf hanyuk yimami polism kaht tenghato haunyomoum. Pitar ror nd yimampno rpat tohhato kaht haunyomoum.

Prisroh bro tohak prisrn Jisasrhu kotkfat yakitohmo yuhat

(Matyu 26.59-66; Mak 14.55-64; Luk 22.66-71)

¹⁹ Prisroh bro tohak prisr sinyahato kfo ttiwonmorr disaiperroh nmbuhat yo tu Jisasr mrokfom kfo pthamoa yuham. Ndm kfo ttiwon hik bohik-mourr. ²⁰ Jisasr sinyahato kfo memor, "Na mrokfom kfo pthamoahat nhai wom kafroh tkitt tuhan yindarim yak nhafohhato kfo ptharmoayanm. Briyaha tafontn Judam rifiny hakuta rmonmn yo Bro Nkifrarhu temperr rifinymoatm mrokfom hemoanm. ²¹ Ndnettn to tamohmpno na ttiwonwa? Na pthamo mrokfom wanymo yimamn wakfo ttiwonn. Rom tawisafwomm na pthamo mrokfom."

²² Jisasr inji kfo pthamotr brbo tohyuk polismanr sinyahato Jisasr nyngatikt frsfamorr. Frsrfahato kfo memor, "Tot inji tohak prisr kfoyuk mrokforoh kfo wokneft?"

²³ Tfit Jisasr kfo memor, "To na finji kfuya? Faso kfuya? Faso kfo thombat to wakfo nuhasna na kfoyuk tng bebt. To na dborioh mrokfot ptha thoft to tamohmpno nyngatikpako be frsrfafurena?"

²⁴ To be yuht baklain kiyetr Anasr yakmorr Jisasr tfit Kaiafasrhu tirtn htamorr.

Pitar tfit wompam kfo namhi nhehmo yuhat

(Matyu 26.71-75; Mak 14.69-72; Luk 22.58-62)

²⁵ Saimon Pitar afo kahtpno tohhato haunyomour. Kaht haunyo hasetrn wom yimam rorpno tohmom kfo ttiwon memomr, “Ka ni aso nd yimarhu wom disaipern?” Pitar nhaf kfo memor, “Nhai na. Na wom yimaya.” ²⁶ Tfit nd bro tohak prisrhu wom hingrna yimar tohhato Pitar kfo ttiwon memor, “Ka ni ndar yimann mswirt yihof htiroya?” Ror nd Pitar yimbhindangt frbbomo yimarhu yimater. Ror tohhato htimorr Pitar sinyahato nd prisrhu hingrna yimarhu yimbhindangt frbbomohat ndnetrn inji kfo ttiwonmor. ²⁷ Inji ttiwonmotrr tfit wompam Pitar kfo namhi memor, “Nhai.” Pitar inji kfo namhi hanymor krir nakumor.

Jisasr Pailatr pno hanymo yuhat
(Matyu 27.1-2; 27.11-14; Mak 15.1-5; Luk 23.1-5)

²⁸ Be Jisasr prisroh tohak yima Kaiafasrhu kmifat ruhetrn tfit Judaroh bro yufet yufet yimam yaknimomr Judiaroh gafanarhu kunyko tfit hanymomr. Yihat bi nitre dbtaku hanyett Judam nhai rpat hafknermomr gafanarhu kmifat hanymohat. Be inji briahako mtohmom. Turoh nkifra tndht yakitohetmn rom Pasofa burwa tofi yihar bi brboh hanyetr rom nhai tfit tamoh tamoh nefm yihato turoh rhu nmbuhat yak beb hanykfot. Be rhu marnya bomarnyahato Pasofakfot htayuk yemro burwat rom yakfot. Nd dukefetmn nhai fknermomr Jisasr gafanar rhuyuk kmir hanymohat.† ²⁹ Pailatr fnahnihato nd briahako tohyukm kfo ttiwon memor, “Tamoh tofirpno nda yimar yamukako kot atohr?” ³⁰ Kfo memomr, “Ror ufasoh nefm ana duha yir nhai ninpno hnarfotnomr.”

³¹ Pailatr kfo memor, “To be ndhtet neft tuko wayaknikahkomr tukmoh boririfu yuhat wahikko. Yimar finji finji nayetr finji niwakomr nd yuhatn wahiktawo.” Tfit Judam sinyahato kfo memom, “Romroh gafmanr kfo rafo memor, nom Judanom nhai wom tofiyet yimar nmoh tire bgre misn kihegir nohkfot. Be tu nhai mif.” ³² To nd nefm Jisasrpno rhumom, to bi tur kfomoa kanjo nd yuhatn to be rhu hik twanho mifmom. Bi kfo memor, “Na ndar bbinysoft tohhato bgre miyeta kasinyarahma.”‡

³³ Pailatr tfit turhu kmifar rim fnahnihato Jisasr nakumorr. Jisasr yi rim tohmotr kfo ttiwon memor, “Nine Judaroh kinge?” ³⁴ Pailatr inji ttiwonmotrr tfit Jisasr ttiwon memor, “Ni inji kfo ttiwonwohate tunhu dukefrn inji ttiwonwona o womm nanhu toh yuhat kfo nuhasmotmn inji kfo ttiwonwona?” ³⁵ Tfit Pailatr kfo memor, “Tamohmpno ndhtet ttiwon nmbuhat nanhu yima yuhurn wadukakhato ttiwonrfoyann? To na Judayann inji ttiwonrfoyann. Ni tunhu kmi thofmi tunhu prisroh bro yimamn nanhu tirt htaromn. To tamoh neft namotn asha hnaronm?”

³⁶ Tfit Jisasr kfo memor, “Nanhu kingdomfot nhai ndar bbinysoftu kingdomfot rhukaht. Nanhu kingdomfot be ndar bbinysoftut arhut, nanhu hingrna yimam sinyarrromn toh raforrotma nhai yimam yakhato Judaroh bro yimaroh tirtn htarrotma. Nhai. Nanhu kingdomfot nndoh womharhofn ndnetrn Judaroh bro yimaroh tirt htaroma.”

³⁷ Jisasr kingdomfot kfomoatr tfit Pailatr kfo memor, “Ni ka kinge, ndnetnn kfo kangn, ‘Nanhu kingdomfot nhai ndar bbinysoftut rhukaht.’” Jisasr kfo memor, “Uwa, na to finji kforhoya? Mrokfot to bi tot bi tunn kfiwunt. Na mmemt hiyauhato ndar bbinysoft niamohat, to yimaroh king tohhato Bro Nkifrarhu tu mrokfo yimbu yuha mifthu kfo ptha nuhasyuka niamoya. Yimam Bro Nkifrarhu mrokfo mift yakitohwam, nd yimam nanhu mrokfot wanukwomt.” ³⁸ Pailatr tfit kfo ttiwon memor, “To nd ni kfiwa kfo mif mif mrokfot to tamoh mrokfoyet?”

Jisasr bgre mis frdbkafmo yuhat
(Matyu 27.15-31; Mak 15.6-20; Luk 23.13-25)

† 18:28: Nd gafanar o Pailatri rorpno tohyuk yimam rom nndo Rom thofmn nhai hikrmoamm Judam rhuyuk tofim o tamoh nefm. Nd dukeftpn Judam memom, “Nd nndoh kmimpno nhai nom brboh yihato rompno nabnotkfot. Inji narahnom Bro Nkifrar hti bebrahrnom.” ‡ 18:32: Fasoh net yimam kot tohnihato nohmoahat husfirpa yuham nohmoum. Judaroh kotkfot tohyukm be yakmoamm tahiye tahiye frdbofnah nohmoumm. Romroh kotkfot tohyuk yimam hus yuhaf htamoumm. Womnam bgre mimn kihegir nohmoumm. Womnam mfham tmbhomoumm.

Pailatr Jisasrpno ptha tanyhato fnahnimorn Judam rim kfo memorm, “Nd yimar htitita nhai wom tamoh neft narmor.”³⁹ To niko bi hti hnayeteko, ndhtet bro Pasofa rhuyuk yihamn kalabus tohwa yimaroh womr fnah-newur. Niko tukomn kangko frohr afnahnar, tukomn yufat wayuta-twakomt. Kangko ndar Judaroh kingr afnahr?”⁴⁰ Tng rihar wayur sinyahato kfo memom, “Nhai, nhai rorn. Barabasrn afnahr.” Nd yima Barabasrn kalabus htamohat, rorn rikohnetti yima tatneft damiagt hatonemourm. Nd nefm inji namoatr kalabus htamomr.[§]

19

¹ Rom inji waniak waniak-motm Pailatr wanysi wanysi-hato soldiam kfomotrm soldiam wifkfot yakhato Jisasr nd wife wife smbho bosmbhaknimomr. ² Tfit huhra mtitoft yakmomtn kingroh mfhamb hatohwa kraunkfot kanjo yakke yakmomtn yuht huhra rmonett mfhant wathu hamsismomr. Yo kku kkorpa kanjo fnhuyet yuke hmbreshar yakmomn hmbremomr.* ³ Inji natamomrn bt tom yuwi kfo nhehakni memooum, “Asor nd rom kfiwa Judaroh kingr.” Inji kfo nhehaknihato tire srfamoumr.†

⁴ Pailatr tfit wompam fnahnihato briahako tohmo tuhan yindarim rim kfo memorm, “Wawanyko. Nd yimar tfit kforhota nikompno tfit hnerahmr. Ndt niko hti kshrfaruhakomn duka mirahko ror nhai wom krhopam htikahrr.”⁵ Be Jisasr yarim fnahnamor. Nd mflat wathu hamsismo huhra mtitofti nd hmbremo kku kkorpa kanjo fnhuyet hmbreshar, ndm rpat yarim hatohmorm. Yarim hatohmotrm Pailatr kfo memorm, “Wahtiko. Asor nd yimar.”

⁶ Yarim hatohmotr prisroh bro prismi Bro Nkifrarhu temperr tohukatohwa polism wayur sinyahato kfo memom, “Wahegirkomr, wakihegirkomr. Bgre misn wathu hegirkomr” Pailatr rom pthamo mrokfot wanyhato kfo memor, “To ndhtet neft tuko wayaknikahkomr tukomn wakihegirkomr. Nane htitita nhai wom nefm narmotr btn nann finji narhoyanr.”⁷ Tfit nd Judaroh bro yimam kfo memomr, “Nmoh nkifra thfa mntwat mkfo fnahmot, kfo kangt, wom yimar kfo kangr, ‘Na Bro Nkifrarhu yona,’ nd yimar bi mrokfeter anohtwar.”

⁸ Pailatr nd mrokfot wanyhato yima yuhur mfro fanhomorr. ⁹ Pailatr tfit gafanarhu kmifako yimorn tfit Jisasr rim ttiwon memor, “Ni fitoh kmi thofe?” Jisasr asor. Nhai wom mrokfom kfo ptharmor. Be wany marsisamorr. ¹⁰ Jisasr Pailatrhu kfo ttiwon mrokfot nhai kfo yakiomotrr kfo memor, “Ni nhai kfo yakiokahna. Wawany. Nanrpaya kforuha ni nhai bgre mis tuhegirruhatmn. Yo nanrpaya kforuha bgre misn tuhegirrahmn. Ndm ni ka nhai tawisafkahnm?”

¹¹ Jisasr kfo memor, “Yura bro kmi hefenr tohwa Bro Nkifrar nd ni hatohwa bro yufat hemotrn nanhu mrokfot ninn kakitohwont. Na yiro ritohtayuka na nhai finji kforhota. Ndt mrokfo duhatet. To tmift nd yimar na hndhnayukr, mirahn ka tu dborior neft namor. Ni nayuk nefmi ror nanopno namo neft yak htineft, ninhu nefm be inji yura kitm, nd ror na hndhnamo yuhat ndt tu krhonano kitt, rothu krhopam broyem.”¹² Jisasr pthamo mrokfot Pailatr wanyaf hanyhato memour, “Fitoh yuhamn ayak hfhanafoyann,” to nhai, Judaroh bro yimam wayohrfat wayohrfathato kfo memom, “Nd yimar be inji yafhorahnr, ndt ni nhai tu Sisarhu yimatn rhukahn. Rorhu yimatn arhun to nhai inji narfotn. Yimar kfo kangr, ‘Na kinga,’ nd yimar kangr, ‘Sisar riyak htafhato tfit nann kinga atoha.’”

¹³ Be Pailatr nd mrokfot wanyhato Jisasr fak hfhanmorr. Yak hfhanhato Pailatr ror jasr yorhwa gajis rim rhumor. (Nd Pailatr jasrhu gajis rim rhumo tkitt Hibru yarmumat

§ 18:40: Nd rfa borngthu mrokfom hti hik bohiket yimam duka memom, Barabasr nhai yindhorrmoar Romm Judaroh kantrikfot tohhato tfit Rommn gafman yufat yakhato tohkfot. * 19:2: Nd Jisasr hmbremo yuke hmbreshar, briahako yarim ruhakyuk hmbresha kanjohot hmbreshar hmbremomr. Yo nhai batenim duhater, be tirrpaf tuheter.

† 19:3: Soldiam Jisasr wondh nhta bonhtamohat yuwi memom inji kingm kanjo wondhruhanomrn bt mkfak mkfak srafbosfarahnomr. Nd dukefetmn kingm hatohwa wondht kanjo wondhmomr.

kutamoumt Gabata.) Nd rhu yefinyuk tkitr tahirpaye thu trku htfas bugamomr. ¹⁴ Nd yihar Judaroh Pasofa burwa yeuyk yeshrioh yak hta miska yibon yihar rhumom. Mar bi dany marrn Pailatr kfo memorm, “Judako wahtikomr nikmoh kingr.” ¹⁵ Judam wayur sinyahato kfo memom, “Wuri air! Wuri air! Yura bgre misn wakihegirkomr!” Pailatr ttiwon memorm, “To kangko nikmoh kingr yura bgre misn akihegirre?” Prisroh bro yimam kfo memom, “Nom nhai wom kingm. Sisarpar nom tawisafwonom. Nom rorrparhu yinhitn korhnom.” ¹⁶ Pailatr be Jisasr yakhato kfo memorm, “Asor Jisasr. Bi tukmoh tirmn htewanr. Tukomn wakihegirtwakomr.”

Jisasr bgre mis kihegirmo yuhat

(Matyu 27.32-44; Mak 15.21-32; Luk 23.26-43)

Inji kfonihato soldiaroh tirm htamorr. ¹⁷ Be Jisasr fakni hanymomr. Rorhu tuhegiryuk bgre mis tur tita hatohta hanymort. Kmi taunt htanymortn wom kmi mfhat kutewumt yima Mfha Tpit, ndha hanymort.‡ (Hibrufot futamoumt Golgotat.) ¹⁸ Ndha bgre misn tir wuram nire frdbkafhato yuht bgre miyetr kasinyahato tou fopmomr. Wom hus yimaf yakkomf bgre miyett mano mano tohmof. Womr tirmifko, yo womr kindonko. Jisasr buha tohmor.

¹⁹ Pailatr kfomotrm wom mrokfot mimkutn wandfakmomtn Jisasrhu bgre misn yura mfhako frdbkafakmomt. Nd mrokfot rom wandfakhato htamot kfo memot, “NASARET THOF JISASR, JUDAROH KINGR.” ²⁰ Pailatr memorm, “Nd mrokfom Hibrufotn, Romkfotn, yo Grikkfotn inji wawandfa hanyswakomm mimkutn.” Jisasr hegirmo tkitt brbo tauntpno hegiretrn bok Judam rim fnahni mfnahnimoamn nd rom wandfamo mrokfom rim htini mhtinimouumm. ²¹ Prisroh bro yimam nd mrokfot htimohat Pailatr mkfo memomr, “Awandfawahn, ‘Judaroh Kingr.’ Wawandfa wame, ‘Nd yimar kfo memor, ‘Na Judaroh kinga.’”

²² Tfit Pailatr kfo memorm, “Mrokfot bi inji wandfiyant to be inji arhut.”

²³ Soldiam Jisasr yuht bgre miyetr tou yopnihato nd ror hatohmo hmbre wuskar husfishus yimam nhombrabato fak nhta nhombramomm. Nd yiro rim ruhakmoa yuke hmbresharpar fak trohmomr. Nd hmbreshar nhai be nmbuha nmbuha rmontham yakhato nahurmomr. Nhai. Be yuht thar hmbremourr. ²⁴ Be inji htihato soldiam kfo memom, “Be inji yuhtr arhukaht pirai saturahnomr. Frohr winr rorn yakrahrr.” Rom namo neft nkifra rfa borngt kfomo mrokfo yuhatn fak hikmot. Nd nkifra rfa borngt rhumo mrokfot kfo memot,

“Na hatohmo hmbresham yak nhtahato fak nhombrani-momm.

Yiro rim ruhakyuk yuke hmbresharne pirai satuhato yimam fakmomr.”

Sng 22.18

Soldiam to nd nkifra rfa borngt rhuyuk mrokfo yuhatn fak hik mifmom.

²⁵ Jisasr tuhegirmo bgre mispitn tohmo met kmime, tu Jisasrhu mmemt yo rothu nmemt, yo Klopasrh met Mariat ee Makdala efkot Mariat. Nd husfishus metm Jisasr thu hegirmo mispit tohmom. ²⁶ Jisasr memor wahtiyafoya htimort turhu mmemt. Yo nd tu Jisasr yuhu mongimoa disaiperr htimorr rorhu mmemtpno brbo tohmor. Inji htihato mmemt wakfo memort, “Nd ninpno brbo tohwa yimar bi ninhu yoner.” ²⁷ Tfit kekutnihato nd disaiperr wakfo memort, “Rot bi ninhu mmemet.” Be nd yiha nd disaiperr Mariat kfaknimortn be rorpno ritohakhato rorn rifakitoh-akmort.

Jisasr myaknimo yuhat

(Matyu 27.45-56; Mak 15.33-41; Luk 23.44-49)

²⁸ Jisasr ndar bbinysoft niahato hingrna hnayuk hingrnem mdukakhato duka hna duka hnamormn duka memor, “Nd na niahato hingrnayuk hingrnem bi hingrna buga twanho-moyanm. Bi be nanhu hingrnem.” Inji kfonihato kfo memor, “Bupa knewa.” To nd ror kfomo mrokfot nhai be kfo furarmort. Bi nkiframpno kfo htamo mrokfot to be tfit kfo hik mifmort. ²⁹ Wain buroht rohett tohmot. Wom spans yakkomn nd wain rohtn thu yifakhato hisop yuhtarn kiyakhato Jisasr wuhemotm tmasakmorm spans

‡ 19:17: Nd kmi mfhat kfe sfiohniyet yima mfhamb kanjo rhumoatt to be futamoumt yima Mfha Tpit.

ruhetmn. ³⁰ Jisasm nd wain bupam yenyi hanymorn wuroht kfon memor, “Be bibe.” Be inji kfonihato mfhat yohnemotrn mfaknimor.

Wom soldiar kfrat yakhato Jisasrhu kkreko was tiwonmo yuhat

³¹ Nd yimam kihegirmohat Fraide yihar kihegirmomm. To nd Fraide yihar tor Judaroh Pasofa Sabat yiha rhuyuk yeshrioh yak miska yihar. Nd Sabat yiha Judaroh tu bro yihayer, rom nd yihar nhai rom wom tamoh nefm nakfot o hingrnefm hingrnakfot. Turoh nkifra yirmoht mdukakhato duka memom nhai ndar hirwa yimam tfit Sabat yiha hirkfot. Ndnetmn Judaroh bro yimam Pailatrpnno yihato kfo ptha memomr, “Nd kihegiret yimam wuram frwokruhatmm nohrahm. Nohruhatm yak thurahmm. Nhai tfit nmoh bro Sabat yihar nd yimam tfit yura bgre mimn hirruhatm.” ³² Be nd kfotpno soldiam yimomn barkof yimarhu wuraf fryifikatmomf. Rorhuf fryifikatni yo tfit yimomn womrhuf yi fryifikatmomf. ³³ Yo tfit yimomn memom Jisasrhu wuraf afryifikatnomf to nhai, htimomr bi nohetrn to be nhai fryifikatrmomr rorhu wuraf. ³⁴ Be wom soldiar kfrat yakhato Jisasrhu mano kkreko wuwashato htimor kkupami bupam rpat yudbat fnahmom. ³⁵ Wom yimar ndar nefm turhu nyingaye htihato kfo ptha srhwor, rorhu mrokfom kfo mif mifworm. Ror tur htitr nd ror kfoyuk mrokfo kfo mif mifworm, ndnett niko nd ror kfoyuk mrokfom wany yakiokfot. ³⁶ Jisasrhu wuraf fryifikat duha yimohat to rfa borngt yorhwa mrokfo yuhatn hikmot. Nd mrokfot inji korhwot: “Nhai rorhu wom tpit fryifikatruhatmr.” ³⁷ Yo wom mrokfot kfo kangt, “Tum wasyuk yimarn tfit yukatohrahm.”

Jisasrhu thatipt nfri tahi muhtn rihtamo yuhat

(Matyu 27.57-61; Mak 15.42-47; Luk 23.50-56)

³⁸ Arimatea taunthu yima Josefr yimorn Pailatr mttiwon memor, “Na kanga Jisasrhu thatipt yagniruhant?” Pailatr kfo memor, “Hifa, nhai mrokfom, wayaknitwant.” Be Josefr nd mrokfot wanyhato Jisasrhu thatipt mfakmort. Nd yima Josefr to Jisasrhu wom disaiperer. To Jisasr hikmoahat nhai Judaroh bro yimampno yak nriyafrmoar. Nhai. Be inji kafrohnano hikmouerr. ³⁹ Josef nd Jisasrhu thatipt yakmohat Nikodemusr faknhomorr. Nd yima Nikodemusr, to rorn wom yiha yifung yimorn Jisasrpnno mfnahmor. Nd yima Nikodemusr Josefr yaknhot yimohat ror dborioh mtha yarfonet paurakfot hanymor. Hushtet mtha yarfonet mifhu mtha yarfonet paurakfot hanymor. Ror hanymo paurakfothu krhopam 30kg kurhet paurakfot hanymor. ⁴⁰ Josef Nikodemusrof yihato thatipt wuyak thurakmoft tu Judam noheh yimam hingrnamo hingrnf yuhat hikmof. Nd Nikodemusr hanyuk dborioh mthet paurakfot yakmofn yuke yuke rmontha nmbrr nmbuham truf wuna hmbre buganimofmn, ee nd pauryet rmontha nmbrr mkuye ki tawonmofr yagr nmbuhar. ⁴¹ Nd Jisasr soldiam yakhato bgre mis tuhegirmo tkittppno rhumor wom bro mswirr. Nd mswirrn rhumor wom nfri tahi muhr. Nd tahi muhr nhai wom yimam bi htarmomr.

⁴² Nd yihar Judaroh Sabat yiharhu rhuyuk yeshrioh yak miska yiharn, to be Jisasrhu thatipt yaknimoftn nd tuha brbo mswirr rhuyuk tahi muhtn rim htanymoft.

Jisasr sinyamo yuhat

(Matyu 28.1-8; Mak 16.1-8; Luk 24.1-12)

¹ Sande yiha dbha ksfu mif Makdala ekfot Mariat sinyahato yimot Jisasrhu tahi muhthu htit. Yimotn htimott nd tahi muht frtittomo tahis nhai wom rhurmot. ² Mariat be inji mhti tanyhato be tfit mkekutnihato tonayefrpar yimotn mtone fnahmot Saimon Pitari Jisasr mfro yuhu mongimoa disaiperrpno. Rof htiyahato ttiwon memoft, “Nine?” Mariat kfo memot, “Brorhu thatipt be bi fakniromr. Yaknihato ka fitha htaromr?”

³ Pitarof be inji wany sanyhato rof yimof tahi muhthu htit. ⁴ Rpat afo tone hanymof, tfit buha wom disaiperrn tone dimandihato tone troh tanymorr wom Pitar. Rorn bi tone dimandinihato yima gur htamo tahi muht mfnah gungonmor. ⁵ Tahi muh yifhatikt

mtohhato wayirnamorn rihtimor nd yima gur tawonmo yuke rmontha nmbrrpam. Nhai yiro fknenirmor. ⁶ Kto Pitar mongko mtone fnahmor. Ror mtone fnah thuhato be fau hafkneni twanhomor. Yau hafknenihato rim htimorm nd yimarhu yagr nmbuhat tawonmo rmontha nmbr manys. ⁷ Yo wom rmontha nmbuhar tng tpithu teh dbkafyukr mfhatpno mthu kiyakhato mfhatpno rpat kitawonmor, ndr ror be turpatr yak marnya bomarnyahato mfha mthutamoko rhumor. ⁸ Tfit ndwom disaiperr bi barkof mtone fnahmor, ror fknenihato rim htimorm nd yima gur ki tawonmo wuskam. Htihato memor, “Dajohmn, yimar bi sinyani twanhir.” ⁹ (To nd Kraisrhu nohhato tfit sinya mrokfothu mna yuhat nhai bi yakrmoft. Nd Bro Nkifrarhu rfa borngt yorhwa mrokfot afo yuhre fak mmotamoft.) ¹⁰ Nd disaiperf mhti hambro tanyhato be tfit yimof kmifako.

Makdala efkot Mariat Jisasr htimo yuhat

(Matyu 28.9-10; Mak 16.9-11)

¹¹ Makdala efkot Mariat yima gur htamo tahi muhtpno brbo tohhato nurmout. Nur hanyhato wasifamotn memot, “Yiro tahi muh yuhat arihti-yafoya.” ¹² Asha rihtimotf hus moun-motf ganyom hmbresha hmbreyetf rhumof yima gur htamo tkittn. Womr mfha mthutamoko rhumor. Womrne wurasifko rhumor. ¹³ Nd mounmotf ttiwon memoft, “Bar mete, nine tamohmpno inji nurwa?” Kfo memoft, “Nanhu Brorhu thatipt ka yimam yaknihato nndo htaromt. Ndt hti hambrohato nurwa.” ¹⁴ Mariat inji kfon hanyhato memot, kekutniya, htimotr Jisasr. Rot Jisasr htimohat nhai duka marimot, “Arr Jisaser.”

¹⁵ Tfit tu Jisasrn kfo ttiwon memort, “Bar mete, ni frohmn nur hambriwa?” Jisasr Mariat ttiwonmohat rot duka memot, “Ka nd Jisasr htamo tkitthu mswir tikatr kfo ttiwonwora.” Ndnett kfo memotr, “Yinowe, nanhu Bror ni yaknihato nndo hta thombat, wakfo nuhasafkahtna tfit yihomakruhanr.” ¹⁶ Jisasr tfit tuthu yufat naku memort, “Maria.” Mariat kekutnihato Hibru mrokfotn wukfo memotr, “Rabonai!” Nd mrokfothu yimbu yuhate, “Tisa.” ¹⁷ Jisasr kfo memort, “Mirahn bi ayaktiyanr. Na tafito afo Bro Yifemrpno muhrmoya. Be waikahnn nanhu nmemrom wakfo wamitwanm, na tfit yura muhhato na yifemwa Yifemr yo niko yifemwa Yifemrpno tfit yiruha yo na kfo bruttnewa Bro Nkifrar yo niko kfo bruttnewa Bro Nkifrarpano tfit yiruha.”

¹⁸ Be Mariat yihato kfo memotm, “Na bi Bro Nungothetr htitawoyanr.” Yo Jisasr kfo pthayuk mrokfom kfo nuhasmotm.

Disaiperf Jisasr htimo yuhat

(Matyu 28.16-20; Mak 16.14-18; Luk 24.36-49)

¹⁹ Sande krif yifung disaiperf Judaroh bro yimam yakrmihato kuny kiyake yiro kunys rhu hasetmn Jisasr buha mitohmor. Mitohhato kfo memorm, “Yima yuhum amirhumko.” ²⁰ Inji kfonimorn tirfhu fhuf yo kkreko kfraye wasmo fhut fak nuhasmorm. Disaiperf turoh Bror htihato yima yuhum tfit yindhormomm. ²¹ Jisasr tfit wompam kfo memorm, “Yima yuhum amirhumko. Na Bro Nkifrar tkrurafomora. To tawo niko, tfit nann kfo tkrurwanko.” ²² Inji kfonihato fahsha wunamorm. Yahsha wunanihato kfo memorm, “Bro Nkifrarhu Yafothat athu hamuhtko.” ²³ Womm nayuk fasoh fasoh nefm yafhorahkomm, tawo Bro Nkifrar yafhorahrm. Womm nayuk fasoh fasoh nefm nhai yafhokahkomm, tawo Bro Nkifrar nhai yafhoruhatr.”

Tomasr Jisasr htimo yuhat

²⁴ Nd yiha Jisasr turhu disaipermpno mfnahmohat rrroh womr nhai rhu-nhormorm. Nd yimar, Tomasr. Rorhu wom yufat Didimus. ²⁵ Nd yima Tomasr wom disaiperf kfo memomr, “Nom Jisasr bi htitawonomr.” Tomasr wanyhato kfo memorm, “Na nhai bmbri wany yakiowotanko. Na kanga afo tukanhu nyngaye tirroh fhum yo kkrekorhof fhut htihato tukanhu tirpinyafe yaktiwone, ee btn wany yakioruhanko.”

²⁶ Tfit 7-pela yiham rhunihato nd disaiperf tfit yimomn kunys frkihnihato yiro rhumom. Nd yiha Tomasr rhunhomorm. Yiro kunys rhu hasetmn Jisasr buha mitohmor. Mitohhato kfo memorm, “Yima yuhum amirhumko.” ²⁷ Jisasr Tomasr htihato kfo

memorr, "Tomas, ninhu tirpinyaft asha yarim htakahnt tif wahti kothanf. Yo tirt wafrhtfasnekahnt mano kkreko wahtant. Mirahn hus yima yuhufpno atoha. Rpa dukefrparpno tohkfat." ²⁸ Tomasr turhu nyingaye Jisasr htihato kfo memor, "Ni nanhu Bro Nungothete. Ni nanhu Bro Nkifraye."

²⁹ Tfit Jisasr kfo memor, "Hifa ni tunhu nyingaye htihato kangn na Bro Nkifraya. Yimam na tafi hti duha be mrokforpat wanyhato rroh yima yuhum nanpno htewumm, nd yimam rroh rhu nmbuhat hifa yi marnyaraht."

Nda gonborngt yimbu yuhat

³⁰ Jisasr bok mirakerm hingrna-moatrm turhu disaiperperm htimoumm. To na nhai nd miraker bugam hta bugarmoyanm ndar na wandfayuk gonborngt. ³¹ To nd dfik mirakerroh mrokfo nmbuham na htayukm, ndm be nikmoh hti, yo wany yimbuyukmn htamoyanm. Memoya ndm htiruhann Jisasrhu mrokfom yakhato hikrahmm. Nd yima Jisasr tor nd Yonr yimarooh minrfa htiyakyukr Bro Nkifrar kfo tkrurafmor. Rorhu mrokfom wany yakiorahkomm, be toh nkifranirahko.

Jisasr tfit disaipermpno mfnahmo yuhat

21

(*Sapta 21*)

7-pela disaiperperm Jisasr htimo yuhat

¹ Tfit wom yiha Galili baritn Jisasr tfit wompam turhu disaipermpno rim fnahmor. Nd Galili barithu wom yufat Taiberias. ² Jisasr disaipermpno mfnahmohat inji mfnahmorm. Wom yiha, Saimon Pitar, Tomasr (rorhu wom yufat Didimus), yo Galili profinshu kmi Kana thof Natanierr, yo Sebedirhu yon najohf, yo wom disaiper husf rpat toh hasomom. ³ Saimon Pitar sinyahato womm kfo tany memorm, "Nane barit rugi htat kitwa." Womm sinyahato kfo memomr, "Nom to kamuknom ahiknomn." Be inji kfomotm rpa mmbrrpat mikmbrenihato yimom. Nd yifungr rugim htati htati nhai wom yirenr yakrmom.

⁴ Marr mwondh fnah hanymor Jisasr tek bari thmbtn mitohmor. Disaiperperm nhai duka marimom nd yimar Jisaser. ⁵ Jisasr mitohhato rittiwon memorm, "Wurenko, yiram fekko?" Rom kfo memomr, "Nheno." ⁶ Rom inji kfo namhimotm tfit Jisasr kfo memorm, "Rigit wayakkahkomt mano tirmifko watukahtkomt bok yiram tuhakraht." Jisasr kfomo yuhatn tirmifko rugit tuhato memom tfit wateh sohaknomt, nhai watehakkfot. Yirat nhai be kukenhato tuhakrmot. Ndnettne watehakneft nhombratimoum.

⁷ Nd disaiperr Jisasr mfro yuhu mongimoar sinyahato Pitar kfo memor, "Nd yimar Broyer." Kfo memotr Broyer, Saimon Pitar inji wanyhato turhu yak hrur thumo yuke hmbreshar tfit yakmorn ndr nyuhmor. Nyuhnihato tekt fuknimorn rifune hanymor thmbko. ⁸ Wom disaiper rom bot rhuhato yira rugit riteh hanymomt. Nhai be wuri danyko rihirrmom, be brbo thmbtpno hirmom. Boti mano bari thmbt be 100 mitakforpat.

⁹ Rom rim dbkafnihato mhtimom kaht yo yirar kahtn kurmour yo wom bretpam htatamorm. ¹⁰ Jisasr kfo memorm, "Nd niko yek yiram womm wahnako." ¹¹ Jisasr inji kfomotr, Saimon Pitar tfit mmbrt mitohnihato rugit ritehakhato teh hawitamort nungurn. Nd rugit tuhakmo yiram 153 yiram tuhakmot. Be tu bro yirarpam tuhakmot. To nhai frtmbrarmomt rugit.

¹² Jisasr kfo memorm, "Waniakahkomn afo nuwa wayako." Disaiperperm bi hti nhta yo wany nhtahato duka memom, "Arr Bror nier." Ndnatn yakrmenano nhai womr duka marimor, "Kfo ttiwon miruhanr, 'Nine frohe?' Nhai." ¹³ Jisasr kahtpno yauyaknihato bretpat yakhato hemorm yo yirar nhaf yakhato hemorm.

¹⁴ Jisasr nohhato tfit sinyamohat nd yiha husfirpehyuk htit htimomr turhu disaipermpno mfnahmor.

Jisasr sinyahato Pitar kfomorr sifsifroh tohukatohneft

¹⁵ Jisasri turhu disaiperm nuwa yenyimomn Jisasr sinyahato Saimon Pitar kfo ttiwon memor, "Saimon, Jonrhu yone, wur arm rroh dukefr nanpno korhr. To ninn ka marbit htewuna?" Pitar sinyahato kfo memor, "Broye, nanhu yima yuhur htitnr, nanhu yima yuhur nhai wom frohmpno rhukahr. Nhai. Nanhu yima yuhur ninrpanpno korhr." Be Jisasr inji wanyhato kfo memor, "Nanhu sifsifenm wayukatohaf hanyhitwona."

¹⁶ Tfit wompam Jisasr ttiwon memor, "Jonrhu yon Saimone, ninhu dukefr ka nanrpa mifanpno hta mifwonr?" Saimon Pitar kfo memor, "Uwa, uwa Broye, nanhu yima yuhur ninrpanpno korhr." Tfit Jisasr kfo memor, "Nanhu sifsifm wayukatohaf hanyhitwona."

¹⁷ Jisasr tfit husfirpeh ttiwonneft ttiwon memor, "Jonrhu yon Saimone, ninhu dukefr ka nanrpa mifanpno korh mifwor?" Saimon Pitar Jisasr husfirpeh ttiwonneft ttiwonmotr duka krhohato memor, "Arr be masat ttiwon hasukna hatohwora. To finji wom finji kforhoya?" Kfo memor, "Broye, tamoh tamoh nefm htitnm. Nanhu dukefr ninrpanpno korh mifwor." Jisasr kfo memor, "Nanhu sifsifm wayukatohaf hanyhitwona.

¹⁸ Na kfo mifwann, ninhu damiag tohtpno tunn hmbreshat hmbrehato tunhu tire foh thaye dbkafnihato fitoh fitoh tkitm tunn ufau fau htasmoun. Tfit kto tabou buganihato tirm mano mano tuhayitruhatnm wommn tirm kjbkafakniruharn wom tkitt hanyrahmn. Nd tkitt nhai be tunhu duka fijo yiruhatn." ¹⁹ Jisasr nd mrokfom inji kfomohat to Pitar nohruha noh yuhatn Bro Nkifrar bro yufat yakrahr, nd yuhatn Jisasr kfo mrokfom inji kfomorm. Jisasr nd mrokfot kfo pthanihato Pitar kto tfit kfo memor, "Wania wahikna."

Jisasr mfro yuhu mongimoa disaiperrhu mrokfot

²⁰ Pitar kekutakhato yihom hti-yakmorr Jisasr mfro yuhu mongimoa disaiperr mongko fau hik hnamorf ror Jisasrpno. To Jerusalemr Jisasrpno wuroh nuwa yamohat to nd yimarn Jisasrpno brbo rhu kekutni hanyhato ttiwon memor, "Broye, frohrn ni hndhnaruuharn?" ²¹ Pitar kekutnihato Jisasr rikfo memor, "Broye, ndar nnoh mongko niewa yimare finji finji rorhu rhu nmbuhat yiruhat?" ²² Jisasr kfo memor, "Na tuka kanga afo yima nfrir atohkahrn nanhu nia yihar atoh gari hasorr, to nhai mrokfom. To ni womn tamohmpno kfo pthiwa? Be tunn wania wahikna." ²³ Kto wom Kristenm Jisasr kfomo mrokfot yak kekutnihato nnakfo hihany memom, "O, kfo memor nd disaiperr nhai nohruhatr." To Jisasr nhai kfo marimor, "Nhai nohruhatr." Nhai. Ror be kfo memor, "Na duka kanga afo yima nfrir atohkahrn nanhu nia yihar atoh gari hasora, to nhai mrokfom. To ni womn tamohmpno kfo pthiwa?"

²⁴ To nd kfiwa disaiperrn wandfa-morm nda mrokfom. Nom htitnom nd ror kfoyuk mrokfom tu kfo mif mif kfoyem. ²⁵ Jisasr namo nefm mirahko ka rpa nefm namor. Tu boknabok nefm namor. Be amikahmn nd nef bugaroh mrokfom gonborngmn awandfa bugam, kane finji htarfom gonborngm. Ka nda yuht bbinysoft gonborngroh htayuk tkitm kkopen-tarfom.

Aposerm namo nefm Barkof kfo nuhas mrokfom

Ndar Aposer gonborngt yorhwa mrokfom, Lukr gutnius gonborngt wandfahato wandfa tmbhonimo mrokfomn ndmn wandfamor. Ndar Aposer gonborngt to Lukrn wandfamort. Nd aposer hingrneft Bro Nkifrarn yak nuhas bonuhas yo yak hta bohtamotrm Jisasrhу gutniuskfot Jerusalemr yo Judia Sameriafhу kmi kmim hingrna htfas buganihato tfit nda bbinysfthu kmi kmim hingrna htfasmom (htikfot Luk 1.8).

Nda aposer hingrneftu mrokfom yorhwa rfa borngtn hti hikrahnt Jisasrhу sioskfot waburakmo tkitt. Kristen sios bromo tkitt htirahnt Judampno ndha waburakmot. Ndha waburakhato kto kmi kmi thu yufurnimot. Nda gonborngt Kraisr hingrnayuk hingrnefti yo kmi kmim rorhu hingrneft htihato yakhikmo yuhat htirahnt be tu Bro Nkifrar Isrermpno kfo htamo yuhatn fak hik twanhomot.

Wom bro mrokfot nda Aposer gonborngt yorhwat, Bro Nkifrarhu Yafothathu hingrneft yuhathu kfo nuhas mrokfom korhmt. Barkopam afo tu Jisasrhу disaipermn nd Bro Nkifrarhu Yafothat Pentikos yiha mithu nawohhato bbuka rifhur fakmom.

Ndar gonborngt htirahn aposerm yihato wom met yindarimpno gutnius mrokfom kfo ptha nuhashemoahat nhai be yudbat kfo tmbhonirmoamm mrokfom. Nhai. Yuke yuke mrokfom pthamoum. Nd neft htitnom nd yuhatn gutniuskfot yakhato toh bmtamom.

Ndar gonborngt kfo tndh hikmotm bok aposer yimaroh hingrnefm, womroh tndhm rom be inji tndhni hanymotm, Pita Porrof namo nefroh tndh yuhamn tu mfro tndh hik bohikmotm ndar Aposer gonborngt. Pitar tor wom yimar Jisaspno wiayau htfasmoa yimar. Porrne nhai. Ror be inji nndo tohhato memour, "Jisasrhу sioskfot ayak bebobekkohtant anohnit." Porr inji na hanyetrn Jisasrhу nakumorr. Nakuyakhato be rorn barkof yimar tohmor Jisasrhу hingrneftu yakinohyuk yimar.

Lukr Porrhu tndh mrokfom kfo hanymoahat Lukr tfit kfo nhaftik hany memour "nom". Inji kfo nhaftiknimoatr bok yimam, ndar gonborngroh mrokfom hti hik bohiket yimam, inji htihato duka memom ka Lukr tur kfo nhaftiknimoa tkitm ka Porrpnо wom yiham rpat kau htfasmooum. Ndnetrn kfo memour "nom".

Aposerm Jerusalemko yihato Jisasrhу mrokfom kfo pthahemo yuhat

(Sapta 1.1-8.3)

Jisasrhу kfo memor, "Tu Bro Nkifrarhu Yafothat thu nawohrahtko"

¹ O Tiofiluse, na Luka bi na barkof wandfamo gonborngtn bi wandfa bugamoyann Jisasrhу ndar bbinysfthu namoa nefm yo ror hingrnamoahingrnefm. ² Ror ndar bbinysfthu rinakmo nefm yo ptha nuhasmo mrokfem wandfa buganimoyann tu wuroh mrokfomn ror nohhato tfit hefenr muhmo yuharoh mrokfom htamoyann. Tu wuroh sinyanineftpno Bro Nkifrarhu Yafothat thu kasinyamottr tur aposer hingrneft yak htamo yimaroh hingrna yuham kfo hta bohta tanymorm. ³ Barkopam afo krhopam yakhato nohmor. Kto tfit sinyahato yima nfrir tohmor. Yima nfrir tohhatu ufaufaumor. Ufaufaumor turhu aposerm tafontn nahtihato napthamoum. Ndhtet nefm namoatr htihato duka memom, "Asor sinyern tohwar." Foti yiham tohmor. Tohhatu yiham Bro Nkifrarhu kingdomkfot kfo nuhas bonuhasmoum. ⁴ Wom yiha turhu aposerm yak nhafohhato kfo memorm, "Na bi yifiya niko mirahko bi kmi Jerusalemt ahtanynom. Nann kfo memoyanko, tu Bro Nkifrarhu Yafothat afo hirahrko. Hiyafruhatrko ee btn waiswako. ⁵ Jonr ndar tek furaroh bupaye, baftaisimworm. Bro Nkifrar ror dfik yiham turhu Yafothaye baftaisimrahrko."

⁶ Aposerm Jisasrpno narhu rifinymohat aposerm sinyahato Jisasmr wom ttiwon mrokfot kfo ttiwon memomr, “Bro Yimaye, ka asor ndar yiharn Isrerm thu bmtaruhatnm bbukeft yakhato tum king yakhato tum ritohakrahm?” ⁷ Tfit Jisasmr sinyahato kfo memorm, “Nd niko ttiwon mrokfot, nhai be nikmoh fijo bi wakfakkfot. Tu Bro Nkifrarn be afo htiyafo hanykfot. Turhu fijo dukaruharn hirahrko. ⁸ Niko inji adukawahko, niko tu Bro Nkifrarhu Yafothat mithu nawoh-ruhattko mrokfo ptha bbuka rfhur yakrahkomr. Nd bbukeft yakinruhakomn, Jerusalem, Judia, Samaria, yo ndar bbinysoftu kmi kmim nanhu mrokfot ptha htfaas buga habrirahkomt.”

Jisasmr hefenr muhmo yuhat

⁹ Wuroh wuroh mrokfom kfo ptha nuhas tany bugamormn, be Bro Nkifrar yaknimorr hamuhmorr. Aposerm tohhato htiyafo hanymomr ror hir hamuhmo yuhat. Wuroh gribpam fknenimot be hti hambrafmomr. ¹⁰ Yuhre inji yukatoh hasetmn asha wom ganyom rmontha hmbreyet yimaf rom toh hasomo tkitt mitohmof. ¹¹ Mitohhato kfo memofm, “Galili thofko tamohmpno be mfro yukatoh-wako? Nd niko htiyefi yimar, kto tfit inji wuhtiyakrahkomr.”

Judasrhu tkitt yakmo yimar

¹² Aposerm Jisasmr mtoh kafhomo kmithu yufat, Olifet kmit. Ndha toh hasohato tfit Jerusalemko wohnemom. Olifet kmiti Jerusalemt nhai wuri wuri rhukahf. Be wan kilomitakforpat yaunihato wom kmit mifnahkfot. ¹³ Aposerm Jerusalemt mifnahhato tum toh tanymo kunyshu wom yura rhuyuk tikrpar mrhu rifin bugamom. Nd rifinymo yimarooh yufame Pitar, Jonr, Jemsr, Andrur, Filifr, Tomasr, Bartolomyur, Matyur, Alfiusrhu yon Jemsr, Selot grufkfothu yima Saimonr yo Jemsrhu yon Judasr. ¹⁴ Nd yimami ee Jisasmrhu mmem Mariati wom metme Jisasmrhu nmemrom, inji inji yi rhu rifinhyato rroh yima yuhum rpa yima yuhurpar rhuhat kfo bruttna hasomoum.

¹⁵ Inji kfo bruttnamoatm bok yimam rifinynhomoumm. Wom yiha 120 yimam rifinymotm Pitar tohhato wom mrokfot kfo memorm, ¹⁶⁻¹⁷ “Barenko, Judasr afo nompno rpat tohhato rpat hingrnounom. Bingot Bro Nkifrar Defitrn mthu nawohhato wom mrokfot Defitr pthamort. Nd mrokfot Bro Nkifrarhu rfa borngtn korht. Tu fipet mrokfot pthamort. Bi Judasrn nd kfomo mrokfot rhumot. Rorn yahr kmim hasinyahato Jisasmr fakmomr.

¹⁸ Judasr Jisasmr hndhnahato yakmo maruham bbinysoftn wiknamor nd maruham. Kto tfit tur wiknamo bbinysoftn yatis mifrtfohhato danyrn frtnehhato wirto grmt yuhtt fnahmotr. ¹⁹ Kto Jerusalem thofm Judasrhu misuhhato yatis mifrtfohhato wirteft fnahmo nmbuhat wanyhato nd ror mifrtfohmo tkitt futamoumt Akeldamat. Akeldama yufathu yumbu yuhate, yima kkut.”

²⁰ Pitar Judasrhu rrfathu yakyuk yimarhu mrokfot kfo memor, “Windoh gonborngtn kfomot,

‘Rorhu kunys be inji yima toh duha arhunitwat.’

Sng 69.25

Tfit nd windoh gonborngthu wom tkittn kfo memot,

‘Ror yakitohnamo hingrneft tfit wommn yakkfot.’

Sng 109.8

²¹ Ndnettn rorhu rrfathu yakyuk yimar yak htakfot. ²² Yimar yak htaneft htikfot, Jisasmr Jonr baftaisim-moahat, Jisasmr ndar bbinysoft niahato hingrnakhato kto nohnihato muhmo yiha rpat nompno rpat tohhato hti bugerm nd nefm, tor nd yimarn yak htakfot. Yak htahato rorn Jisasmrhu sinyamo mrokfo yuhum pthanho htfasrahrnom.”

²³ Pitar inji ptha buganimotr hus yimaf fak htamom. Barkofr Josefr, wom yufat Barsabas Jastusr yo wom yimarn Matiasr. ²⁴ Nd yimaf yak htatahato Bro Nkifrapno kfo bruttna-mom. Kfo bruttna memom, “Broye, yima yimarooh yima yuhum ninn htitwonm. Ndar nom yek yimaf ninn htihato wayak nuhasnnom. ²⁵ Fitohrn ni yibonwa Judasrhu tkitthu yakyuk, ni tunn wayak nuhasnnom. Judasr nohhato nd aposer hingrneft bi htanymortn bi yimor Maringour.” ²⁶ Inji kfonihato yo yufayet tahiham tuhato kfo nhta

memom frohrn nd hingrneft yakruhart. Be Matiasrn Judasrhу tkitt yakhato aposer hingrneft tohyuk wom 11-pelakfotpno rihingrnakmor.

2

Bro Nkifrarhu Yafothat yawihnamo yuhat

¹Judaroh wom bro yihar kutewumr Pentikos.* Nd Pentikos yiharoh riruhakyuk barkof marrn Jisasr hiket yimam rpa bro kunyрpar yihato rifiny bugamom. ²Rifinyhato rhu haso hanymom asha yura moun yuhatn wuwanyakmom wifort kanjo wumir nadidar sinyamohat. Nd nadidareft yimotn nd rom rhu hasomo kuny yuhtt nadidaraknimot. ³Asha tfit htiyaf hanymom kah funefm yima toren kanjo rhu hanyhato yimaroh mfhamn mitoh nhombra hanymom. ⁴Nd kunyr rifinymo yimam Bro Nkifrarhu Yafothat thu kasinya hanymottm kmi kmiroh yarmumat ptha bugamomt.

⁵Nd yihar, Judaroh bro yiharn, Juda yimam boririfhut yak hiketm wuri wuri kmim toh hanyukm yimomn Jerusalemrpar rifinymom. Nd kmi kmi tohyuk Judam nhai rpa yarmumat pthetrpam rifinymom. Nhai. Nndoh nndoh yarmumat pthetm rifinymom.

⁶Nd nadidareft wanyhato memom, “Afo ai ahtinom.” Yimomn asha be mwany fhtas hanymom nd yiro kunyr rifinymo yimam nndo nndo yarmu-mamn pthamoumm. Womr yi mtoh-hato memor, “Awanya,” turhu yarmumatn pthamoatmt mrokfot wanymour. Womr nhaf inji. Memor, “Amtoh awanya,” turhu yarmumatn mrokfom wanymour.

⁷Be nd Judam inji mwany hanyhato tum rinahti nahtihato nnakfo memom, “Barenko, ndarm nndo Galili thofem. ⁸To tamohmpno kmi kminom pthiwa yarmumatn mrokfom pthiwatmm wanukwanomm? ⁹Nom asha Jeru-salemt nia rifinyyanom kmi kminom rifinyywon. Nom Partianom Midia-nom, Elamnom, Mesopotemia distrik thofnom, yo nom Kapadosia, Pontus, Esia, nd nd distrik thofnom. ¹⁰Yo Frigia Pamfilia distrik tohyuknom, kantri Ijift tohyuknom, Libia thofnom brbo taun Sairinitpno tohwanom yo kantri Rom thofnom be yifra yaus niayuknom. ¹¹Yo nom Judanom yo wom kmi thofm turoh nefm htany-hato nom Judanmoh nefm yak hiketm, Krit thofnom yo Arebia distrik thofnom. Nom nd nd kmi thofnom, to tamohm-pno kmi kminmoh yarmumamn Bro Nkifrar bbuka nanyjarefmpno niwa nefm pthiwatmn wanukanomm?” ¹²Be nd Judam inji htihato be tuha mrokfo duhatm tohnom. “Nome ndarte tamoh neft yorhwat.” Tum inji rinakfo nakfomom. ¹³Womm kfo memom, “Nd yimam niko mirahko nko tamohrn fknitrm kmi kmiroh yarmumam pthewum. Ndm nndo bupa ye mumimn ptha mmo bomumiwum.” Inji kfo huta bohutamomm.

Pitar Kraisr toh hanyruha yiham kfo pthamo mrokfom

¹⁴Pitari wom 11-pela aposerm rpat sinya tohmomn Pitar kfo memor, “Niko Judako yo niko wom womko niahato nompno Jerusalemt nia rifinyywako asomif yorhneft nann ptha ntreyafrotant afo wawayswako. ¹⁵Asomif yorhneft htitawokomn womm kfo famumnom, ‘Bupa yawomn kfo ptha mmo bomumiwum.’ ¹⁶Wahtiko marr yuhre asomif mfnahwor. Yuhre 9 kilokkfoyet. Ndhtet yihar nom nhai bmbri bupa nuwa mye fnahkahnom. Nd niko asomif htitawo neft to mirahko profet Joerr ndt ka nhai kfo pthamort. Nhai. Profet Joerr ndt bi pthangotmort. ¹⁷Kfo memor,

‘Bro Nkifrar kfo famur, “Kraisr toh hanyruha yiham nanhu Yafothat tkrurafrotant met yindar bugam Yafothat mithu nawohhato thu dbothatrughattm tamoh tamoh nefm kto rhuyukm bi romn kfo ptharuhatmm wanyrahmm yimam. Metenm yindariyenm rom ptharahm.

Damiagm rom yimam hwe tweh hanita kanjo rom hti hanyruhamn ptharahm.
Bro yimam bi kunyрpar ruhetm rom nhaf tweht htihato ptharahm.

¹⁸Nanhu hingrneft yakitohwa tuhan yindars rom nhaf kfo ptha bugarahm.

¹⁹Mounti bbinysoft nndo rhuruhatf htirahmf.

* 2:1: Nd Pentikos yihar, Pasofa yiham rhu hanyhato fiftyuk marrpno tfit Pentikos yiham riruhakmom.

Kah hipefr thu sinya thombat mirahm ka kku rmontharn faknattmf.

²⁰ Mount mirahm ayukatohnomt htirahmr marr yarmbon tiftarahr.

Yamt htirahmt mirahm nndo kku baritn hirwot.

Ndhtet ndhtet nefm rhuniruhatm bt Bror nierahr.

²¹ Nd yihar yimam Bro Nkifrar nakurahm hbhakneft yudbat yakrahrm." , *Joel 2.28-32*
Tom bingot pthamo mrokfom.

²² Niko Isrerkna kforuha mrokfom wany marnyaf hanyswakomm. Nasaret thof Jisasrhu mrokfom ptharuha. Nd yimar miraker hingrnayuk bbukefti dbohnet yimaroh bbukeft hehato kfo tkurrafmorr. Ror nd bbukeftpno ndar bbinysoft bok nefm namotrm htimokomm. ²³ Nd yimar niamohat nikmoh tirmn htamorr. Bi turhu dukeftpno inji htamorr. Rorhu dukeft duka memor, 'Rompno toh hasoruharn fasoh nefm nayet yimamn htaruhatmr nohrahr.' To bi htamokomr. ²⁴ Htamohat nhai wundiat nohnirmor. Nhai. Tfit tu Bro Nkifrarn kasinyamotrr tfit sinyamor. Bro Nkifrar nhai wofnrnmor nd noh yafotharn Jisasr yaktakfot. Yudbat fak thumort nd noh yafothat. Nd nohyuk tkitt nhai Jisasr yak tkafkfot. ²⁵ Defitr Jisasr nohhato sinyaneft kfo htamort, memor, 'Na htitanr Bror be nanpno brbo mfrtkafwor.

Ndnatn nhai nanhu yima yuhur be bmbri woh dbuknaknikfot.

²⁶ Ndnatn nanhu yima yuhur marnyewarn windoh ptha yindhorwa.

Bro Nkifrar kfomo rhu marnya yihar, ndr rhu gari hasiwa.

²⁷ Bro Nkifraye na nhai kfo miruhatn bi nohniyet yimaroh kmitn atohtwar. Nhai.

Ni bi tunn kfo htayet yimar nhai kfo miruhatn yoptn amibdgnir.

²⁸ Wom nfri toheftu toh yuhat to bi fak nuhasmona.

Nd nfri toheft na tohneft, be tunn toh tkafrhotna
na be yindhorhato tohruha.'

Sng 16.8-11

²⁹ Pitar wom mrokfot yakhato kfo memor, "Barenko, nmoh nkifra Defitrhu mrokfot ptharhotant wawanyswakomt. Nd Defitr pthamo mrokfot nhai turn yirmot. Defitr ror bi nohngotmotr fopmomr. Rorhu yopt tot yuhre rhu hanitt. ³⁰ Defitr profet hingrneft tohetrn Bro Nkifrar bi kfo hta memor, 'Ni yakitohwa king hingrneft kto tunhu frika yuhathu yonrn nd hingrneft yakitohrahrt.' ³¹ Nd Defitr kfo memo nhai nohniyet yimam yita tkitt yiho tohruhatr, yo nhai mikfe bdgniruhatr, nd hus mrokfo nmbuhaf nhai tur kformor. Nhai. Bro Nkifrarhu dukefm yakhato kfomor. Bbinyosf thofroh minrfa htiakyuk yimarn kfo pthamor. Nd yimarn nohruharn tfit sinyarahrm.

³² Nd yima Jisasr yopt bi ruhetr Bro Nkifrarn kasinyamotrr tfit yafothetr rhumor. Nd yimar sinyamohat nom hti bugamonomr. Nom tunomn htihato rorhu sinya yuhathu mrokfomn pthewunom. ³³ Jisasr bi sinyanihato hefenko muhmr. Tu Bro Nkifrarhu bro bbukeft yorhwa tirmifko mrhumor. Mruhato Bro Nkifrarhu Yafothat fakmort. Yakhato hrek nd Yafothat nom buganom yahutrn nom Yafothatn thu nhombrettom pthewunom. ³⁴ Defitr nhai Jisasr muhmo kanjo muhmr. Nhai. Ror tor be kfo memor, 'Yawern nanhu Bror kfo memor, "Nanhu bro bbukeft yorhwa tirmifko wamrhun."

³⁵ Wamrhukahtn nd ni hti dbnotmoa yimam

afu ninhu mofsinhitn yak htahiruhann."

Sng 11.1

³⁶ Ndnett ni ko Isrerkna dukakfot. Nd niko wasmo yima Jisasrn bi Bro Nkifrar fak htamorr nmoh Nungothetr. Rorn nrfa htiyakrahram kmi kmim."

Bok met yindarim fasoh nefm mong trohhato baftaismo yuhat

³⁷ Nd mrokfom Pitar sinyahato pthamom, bok met yindarim kfram kanjo wasmomm. Sinyahato mkfo memom, "Nd mrokfom nndo kfraye fwitmm nmoh yima yuhum. Finji naruhanom?" ³⁸ Pitar kfo memor, "Nhai finji. Nikmoh yima yuhum yorhwa fasoh fasoh nefm mong trohkfot. Mong trohhato Jisas Kraisru yufatpno baftaiskfot. Inji narahko, nikmoh fasoh fasoh nefm Bro Nkifrar nhai wom dukaruhatrm. Duka mumafhato turhu Yafothat hirahrko. ³⁹ Bi tu Bro Nkifrar kfo hta memor, 'Na kfak hanyruha yimam tukanhu Yafothat hi hanyruhanm.' Nhai be nikomrpakom. Nikmoh yonm hi hany bugarahrm. Wuri toh hanyukm he buga hanyrahrm."

⁴⁰ Pitar nhai be nd mrokforpam ptharmor. Bok kfo yanho mrokfom kfo memorm, “Yo niko dukahato tohkfat. Fasoh fasoh nefm nayet yimampno kanga rpata faso yak bebrahrko.” ⁴¹ Pitar kfo pthamo mrokfom nhai hanyjbornarmomm. Hifa wany yakiohato baftasmom. Nd yiha wom nfri 3,000 yimam Jisasr hiket yimampno mnathu hmbrehato be yonmari rifuhetr rhumor.

Met yindars rpa yima yuhurpar rhumo yuhat

⁴² Nd nfri yimam nia hanyukm tu aposermpno afo rpata tohhato afo kak nuhas bonuhasmoumm Jisasrhu hik yuham, Kristen yimaroh tohefm, tamoh komunion yaknefm, kfo bruttnanefm, hti hik bohikmoum afo. ⁴³ Bok mirakerkfon Bro Nkifrar aposermn mithu nawohhato namoatmm bok met yindarim yafotha duhatm rhumoum. ⁴⁴ Nd tuhant yindars Jisasrhu mrokfom yi wany yakiomoam nhai nndoh nndoh yima yuhetm rhurmom. Rroh yima yuhum be rpa yima yuhurpa mifr rhumor. Tamoh tamoht tum be rim nahiayak mnahiayakmom. ⁴⁵ Yimam bbinysofetm wom yimam yihato wiknamoahat nd bbinysofetmn yakyuk marut yakmoamtn tfit yimam wuska duhatm o marufapa duhatmn tfit nd marut thu brurhemoum. ⁴⁶ Yiha yiha Bro Nkifrarhu temperr yi rifinynfeft rom rpata yihato rifinymoum. Nuwa yanyeft nhaf, wom yiha womrhu kunys famoamn tfit wom yiha womrhu kunys yi famoum. Tum rpata ptha yindhorhato niyak marnyahato rpata nuwa famoum. ⁴⁷ Rpa yima yuhurn rhu yindhormoatm womm inji htihato kfo yindhormoum. Yiha yiha bok met yindarim Bror yak miyak hanymoatrm nd Kristen yimam nhai wom kuken rifhur rhurmor.

3

Rikiye yimar marnyamo yuhat

¹ Wom yiha Pita Jonrof memof, “Bro Nkifrarhu temperr yihato kfo bruttnarahno.” Krifmar tri kilok kfo bruttnetmn to be krif yimof. ² Yihato yuhre mtoh hanymof asha htiyak hanymofm wom yimam rikiye yimar hnamomr. Nd Pitarof yimo rmonthu yifhatikthu yufat futamoumt “dborioh yifhatikt.” Nd rikiyer nd yifhatiktn mhtamomr. Ndha rhumoarn yimam rmont fkneniyukm maruha tndau yikitoh hanymour. Nd yima rikiyemohat mmemt bi inji ruhetr hiyaumot. ³ Pita Jonrof fau fkneni hanymof tndaumorf. ⁴ Tndaumotr rof rim tohmof. Pitar memor, “Wayuka-tohnno.” ⁵ Inji kfomotrr ror Pitarof yukatohhato memor, “Ka wuska kahukfa.” ⁶ Pitar kfo memor, “Na nhai ninhu hayuk maruham. Ndar na uhiyau ahiyauwamn hiruhann. Na kfiwa Nasaret thof Jisas Kraisrhu yufatn wasinya wayauyakni.” ⁷ Pitar inji kfonihato tirmifkorhof tirt yakhato wateh kasinyakmorr. Be nd hokmo wuram susnanimomr. ⁸ Susnanimotmr tuha yura msuh tanyhato mitohmorn tuha rim fau nfak mfauf nfakmor. Pitarof rmont fknenimohat ror rpata fknenihato ror yauhany tuhatokhany yauhany tuhatokhany inji nahanyhato Bro Nkifrar kfo yindhor hanymour. ⁹⁻¹⁰ Nd rmont rhuyuk yimam tuhatok hnehato Bro Nkifrar kfo yindhor hanymoatr memoum ka froher. Kto hti hik marnyamomrn kfo memom, “Nd yimar dborioh yifhatikt rhuhato maruha tndaumoa yimayer.” Be tuha nd rmont rhuyuk yimam inji htihato mrokfo duhatm rhumom.

Pitar yiro rmont kfo pthamo mrokfom

¹¹ Solomonrhu rmonthu rhu nafifyuk tkittn rhu hasetfn ror niahato mkinyafinyaknihat ki yindhormorf. Ndha mtohmotr yimam toneyaknihato mtoh htimoymr. Inji htihato mrokfo duhatm rhumom. ¹² Nd yimar mtoh-hato yukatohmoa yimam Pitar sinyahato kfo memorm, “Niko ndar Isrer thofko tamohmpno ndar rikiye yimar marnye nmbuhat htihato duka kinyakiwakomn tfit nonn yukatoh-wako? Niko to mirahko nko ka nnoh bbukeftpno nnoh dborioh nefm Bro Nkifrar htihato no kfitno ndar yimar marnyer. Nhai nonn. Afo aphakahta wawanyswako. Jisasr fak marnyerr. ¹³ Abraham, Aisak, Jekofroh Bro Nkifrar, nmoh nkifraroh Bro Nkifrayer. Nd Nkifrarn turhu hingra yima Jisasr tu bro yufat hemor. Tor, nd yimarn niko hndhnamoko. Pailatr yafho yibonkfat kfomohat niko nhai kfo yakiormoko. ¹⁴ Nd yimar be tu Bro Nkifrarhu yinhit

tohmour. Tu hifa yufayet yimar tohmour. Nd dborioh yimar Pailatr yafho hermorko. To nhai. Nd fasoh yima wasetrn kfomotkofafuhafhemorko. ¹⁵ Tu hifa dborioh rhu nmbuhat hnayuk yimar nikomn wasmokomr. Wasmohat nhai Maringour mitohnirmor. Nd yimar nohmorn tfit sinyamor. Ror sinyamohat nnohnyingam htimomr wiyau yaumohat. No htihato kfo nuhaswononko. ¹⁶ Nd ar yimar marnyehat rorhu bbukeftpno marnyanir. Nnoh dukefm rorpar htanyonm. Inji dukahato kfo pthino nikmoh nyngahato ndar yimar marnyer.

¹⁷ Rot nd nikomi nikmoh bro yimam namo neft Jisassr nhai be yima dukeftpno narmokomr. ¹⁸ Bi tu Bro Nkifrar profetm mthu nawohhato kfo pthamohat rorhu noh nmbuhat to be fak hik twanhomot.

¹⁹ Ndnettnd niko hatohwa fasoh fasoh dukefm mong troh bugahato Jisasrpar tfit nikmoh dukefm htakfot. Inji narahko, Bro Nkifrar htiruharko nikmoh yima yuhum rhuyuk fasoh nefem yak wus bowus thu bugarahr. ²⁰ Yima yuhum wutham rhurahmko Bror tfit nfri bbukeft hirahrko. Rhu marnya hasetkomn nd niko nia yakyuk yimar nierahr. Bro Nkifrar fak htamorr nd yimar. Rorhu yufat Jisassr. ²¹ Afo yura hefenrn korhwor. Profetm kfomo yuhatn bi tamoh tamohroh yak wus bowus yihayere ee btn yawihnerahr.

²² Bingot to Mosesr kfo memor, ‘Bro Nkifrar na kanjohot Juda frikefthu profetr yak htarahrr. Ror tamoh tamoh mrokfom kfiwurko niko wanyhato hikkfot. ²³ Rorhu mrokfom wany yakio duha yimam be Bro Nkifrar yak tutfa wurasohruhatrm noh witarahm. Nhai tfit Isrermpno fkniyakruhatm.’ ²⁴ Profet Samuerr rorhu mongko tohhnamo profetm pthahnamoa mrokfom ndar yiha rhuro nefmn pthahnamoum.

²⁵ Niko to nd profetroh yon kunyet. Nikmoh nkiframpno Bro Nkifrar kfo htatamo mrokfot to kangko frohmn nd neft rhuraht? To nikomn. Bro Nkifrar Abrahamr kfo memor, ‘Ninhu frikefthu wom yonr tohruharn rorn bbinysof thof bugam tu hifa rhu nmbuhat hirahr.’ ²⁶ Nd dukeftpno niko dukahato rorhu hingrna yimar nia nohhato tfit kasinyamorr. Bro Nkifrar duka memor, ‘Yak marnya bomarnyarhotanm fasoh fasoh nefm mong trohrahmm.’ Ndnetrn inji inji hingrna hta bohtamor.”

4

Pita Jonrof kalabus yak htamo yuhat

¹ Pita Jonrof yuhre nd rifiynimo yimam mrokfom kfo ptha nuhas haso hanymofm asha prismi Sadyusim yo rmont tohukatohyuk yimaroh bro yimar rmont yau fknenihato rim tohmom. ² Nd yimaroh dukeft duka memom, “Nd yimaf nhai wom tamoh mrokfom kfokahfm. Noheh yimaroh tfit sinya yuhatn kfo nuhaswofm. Kfo kangfm, ‘Jisassr nohhato tfit sinyamo kanjo inji narahm yimam noh neft.’” Nd dukefm yakmotmm namburmom. Memom, “Tamohmpno inji kfiwafm?” ³ Be ndnatn tir tir fakmomf. Marr bi yohniyetrn to be afo rumgatn afo fak htatamomf. ⁴ Nd Pitarof pthamo mrokfom bi 5,000 yimam wany yakiohato hiketmn rof fakmomf.

Pita Jonrof kaunseroh nyngampno myak htamo yuhat

⁵ Hwe nfha dbha Juda kaunserroh bro yimam, yo prisroh bro yimam, ee boririfhuthu tisam niyak nhafohhato Jerusalemrpar rifiyhato napthamom. ⁶ Nd yihart Anasrn Judaroh bro tohak prisr tohmor. Rori rorhu tangimi Kaiafasr, Jonr yo Aleksanderom, rompno rpat rifiynmom. ⁷ Rroh nyngampno myak htatahato kfo ttiwonmomm, “Nifn nd yimar yak marnyewohate tamoh bbukeftpno yak marnyewafnr yimar? Frohroh yufat yutahato kasinyewafnr nd yimar?”

⁸⁻⁹ Pitar bi Bro Nkifrarhu Yafothat bi mthu nawohetrn kfo memorm, “Niko nda Juda kaunserroh bro yimakomi yo niko nda prisroh bro yimako, kangko nd rikiyer marnyamo yuhat attiwon hiknom? ¹⁰ Nda rikiyer marnyamohat nhai finji nahato marnyarmor. Nd niko Isrer thof bugako kihegir nohhato tfit sinyamo Nasaret thof yima Jisassrhu bbukeft kfomot nd yimar marnyanimor. ¹¹ Bro Nkifrarhu rfa borngtn kfo memom, ‘Nd kunyshu dany rahur htayuk yimam hti hhrehkato yak tuhafmor,

bi tfit dany rahur tohwor.

Nd dany rahurn kunyr hatohworr.'

Sng 118.22

¹² Nhai wom fitoh yimarn nom bi yitohwa tkit bebt yakruhatrnom. Jisasrpar yakrahrnom. Rorrpar Bro Nkifrar fak htamor nmoh yakyukr."

¹³ Pita Jonrof toh pthamohat nhai yakrmehato mrokfom ptharmofm. Juda kaunserthu bro yimam htihato tuha mrokfo duhatm rhumom. Duka nhta memoou "Ndar yima furayef. Fitha yakmofr ndhtet mrokfo rifhur? Ndar yimaf ka Jisasrpno toh habrihato nd mrokfo rifhur fakmofr." Inji dukamom. ¹⁴ Nd marnyanimo rikiyer Pita Jonrofpno tohmotr be nhai wom mrokfom ptharmom.

¹⁵ Be ndnatn afo kfo memomf, "Wafahnifn." Fnahnimotf tum bro yimarpam rhuhato mrokfom nafak nhtamomm. ¹⁶ Womm sinyahato kfo memom, "Barenko, niko finji dukewako? Nd yimaf naro neft bi Jerusalem thofm bi hti bugaromt. Nhai kfo miruhatnom, 'Nd yimar finji yak marnyarfofr.' ¹⁷ Kfo raforahnomf Jisasrhu yufat yutahato yimam yak kasinyaneft." ¹⁸ Nd mrokforpat yak dbkafmomn tfit nakuyakmomf. Nakuyakhato kfo memomf, "Arihat nifn mirahfn tfit Jisasrhu yufat yuta nawohhato yimam ayak kasinyanonm. Arihat Jisasrhu yufat wayafho thu-twafnt."

¹⁹ Pita Jonrof inji wanyhato kfo ttiwonmofm, "Niko to finji dukewako? Fitoh yuhat no hikneft Bro Nkifrar htihato yindhorrf? Niko kfi tngtn o Jisasr kfoyuk tngtn? ²⁰ No nhai niko kfoyuk tng yuhatn hikruhatno. No htimo nefm no wanymo mrokfom afo tunonn kmi kmi kfo nuhas bugarah-nonm."

²¹⁻²² Nd rof yak marnyamo rikiyer bi bro yimar, bi 40 gunyjimetr. Kmi thofm nd rikiyer yak marnyamo neft bi hti yindhorhato Bro Nkifrarpar yindhormom. Be ndnatn kaunserm htihato be kfo yanho mrokfot kfo memomf, "Jisasrhu yufat yuta nawohhato dbohnet yimam yak marnyarahfnm, be yakrahnomfn."

Jisasrhu mrokforoh ptha rifhu yakneft Bro Nkifrar kfo bruttnamo yuhat

²³ Pita Jonrof kaunserm kfo tkrur memomf, "Tufnhuko waiswafn." Be tufhuko yihato tufhu yimatm kfo nuhas bonuhasmofm rof kot tohhato bro prismi kaunserroh bro yimam kfo pthamo mrokfom. ²⁴ Kfo srh nuhas buganimofmn tfit tum rpat rhu rifiny-hato Bro Nkifrapno kfo bruttnamom. Kfo bruttnahato kfo memomr, "Broye, ninn hingrnamonm bbinyssoft, mount yo marombt ee nd husfirpa tkitm yorhwa shrm.

²⁵ Bingot tunhu Yafo-thatn nmoh nkifrar ninhu hingrnafat tohmao yima Defitr wom mrokfot kfo nuhasmotnr tfit ror kfo memor, 'Tamohmpno tuhan yindars be mfro namburwam?

Tamohmpno nd wajis be harhu fura bofuriwamt?

²⁶ Wuri kmirhof kingm wajis bi harhuwom.

Kmi kmirhof bro yimam bi rpat rhuhato mrokfom nayak dbkafwomm

Bro Nkifrari nmoh nrfa htiyakyuk yimarhu nambur tonineft.'

Sng 2.1-2

²⁷ Ndar kmit to nd neft bi korht. Herotr, Pontius Pailatr, yo wom yima tangim yo tu Isrerm bi rpat nathu hmbritamn kangm ninhu kfo htamo hingrna yima Jisasr awasnomr. ²⁸ To ninhu bbukeftpno bingot kfo hta mrokfot to tot inji ruhaknitattn be was mifrahmr. ²⁹ Bro Nkifraye, nd yimam kfo kakrmitwomnom. Nom nhai wofnkahnom yakrmanyeft. Ni tunn wathu bmtatwannom ninhu mrokfothu pthaneft.

³⁰ Dbohnet yimam wayak marnya bomarnyatwanm. Ninhu hingrna yima Jisasrhu yufatpno mirakerfom wanakahtn yimam htirahm."

³¹ Inji kfo bruttna hanymom, nd rom rhumo kunys memom nndo nunes kekwott. Bro Nkifrarhu Yafothat thu nhombra bugamottm rom tohhato pthamohat mrokfom nhai yakrmehato ptharmomm mrokfom.

Jisasr hiket yimam tum nahti duka nahti dukamo yuhat

³² Jisasr hikmo yimam nhai womr wom nndoh yima yuhetr rhurmor. Yima bugam be rpa yima yuhurpar rhumom. Rom yikitohyuk tamoh tamohm nhai womr marimorr,

“Nanhu tamoh tamohm turpetanuhem.” Nhai. Tamoh tamohm be inji rpat yakitoh-hato rpant nayaktirmouumm. ³³ Aposerm Jisasrhu nohhato sinya yuhathu mrokfom kfo pthamoahat Bro Nkifrarhu Yafothathu bbukeftpno pthamoatmm mrokfom tuhan yindars rhuhato wany marnyamouumm. Bro Nkifrar tohnhomaoarmn fak marnyamourm. ³⁴ Yak marnyamoatrm nhai rroh womr yeshrim o tamohm sfno tohrmoar. Yimam bbinysoftm, kunyetm womm hemoatm wiknahemouumm. ³⁵ Nd yuham yakyuk marut hnamoamt tfit aposermn mhemooum. Aposermn yakhato romn yak nhtahato frohm tamohmn kaknafwom nd marut romn kak nhtahemoum.

³⁶ Ndha tohmour wom yimar. Rorhu yufat Josef. Aposermn tfit wom yufat futamomr Barnabas. Nd Barnabas yufathu yimbu yuhate, “Yima kfo bmta marnyetr.” Barnabas, Saiprus tohmaoa Lifai tangishofer. ³⁷ Nd yimarhu bbinysoft yimam wiknamohat marut yakmot aposerroh tirmn mhtamorm.

Ananaias Sapairarof Bro Nkifrar kfo namhi nhehmo yuhat

5

¹ Yo tof wom yima sawohf tohmouf. Ramemrhu yufat Ananaias. Tuhanemthu yufatne Sapairat. ² Wom yiha Ananaiasrhu bbinysoftwomm yihato wiknamomt. Nd bbinysoftu marut yakkmortn nhai marimor, “Be hopttn aposerm hne-hiruha.” Nhai. Nd marut yakkmortn womm yak hamong tanyhato wom farpam hanyhato aposerm mhemor. Ananaiasr inji namohat turhu tuhanemt htimostr. To nhai kfo marimot, “Mirahn inji anaya.” ³ Aposermpno mhtamotrm Pitar htihato kfo memor, “Ananaias, tamohmpno Satanr fasoh yima yuhur yahutrn wom maruham yak hamong tanynmn wom farpam hnehato Bro Nkifrarhu Yafothat nd farpam mfrnhehwanr? ⁴ Nd bbinysoft yima tafi wikna duha rhumohat nhai wom frohroht rhurmot. Ni tunhut rhumot. Tfit yimam wiknahato marut yakrohat nhaf tunrpann hmbreront. Tamohr inji namotrn inji naro? Nhai yimanomn kfo namhi nhekahn. Bro Nkifrar kfo namhi nhehwo.” ⁵ Pitar inji kfo hanymor Ananaiasr nndo dangn yukhat tmbho thumom. Be tuha gur. Kmi thofm Ananaiasrhu noh mrokfot wany hanyhato mfha tha duhatm rhumom. ⁶ Be nd yima Ananaiasr bi gurn, damiagt rmonthaye rim yakrirakmomrn hany fopmomr.

⁷ Husfirpa auakfot bi yiyettn asha tuhanemt. Rot memot ramemr yuhre yima nfriyer. ⁸ Rim tohmott Pitar ttiwonmort. “Nifn sawo bbinysoftu maruhame be dfik fenrpam fakmofn?” Sapairat sinyahato memot, “Uwa, to be nd hne dfik fenrpam.” ⁹ Pitar sinyahato kfo memort, “Bare, tamohm-pno nifn sawo memofn, ‘Bro Nkifrar afo mkfo namhi nhehwonrahnonr.’ Wahti ninhu ramemr myop tanyuk yimam bi tom bi nd kuni yifhatiktn tohwom. Ninhu tha tipt yoprahmt.” ¹⁰ Pitar inji kfo hanymor Sapairat memom nndo dangnhatn tmbho tuhefim. Be tuha gus Pitarhu wurampno suhmot. Be nd damiagt bi mtob gari hanyukt yaknimomtn ramemr yopmo tkittn rpant fopmomf. ¹¹ Bro Nkifrar hiket yimam yo ndwom yima fura bofurat nd yima sawohfhu noh mrokfot wanyhato fanho bugamom.

Aposerm yak marnyamo dbohnet yimam

¹² Boknambok nefm aposerm namoatmm tuhan yindars htihato mfham danyrn fohtnehmouumm. Jisar hiket yimam Solomonrhu rmonthu rhu nafifyuk tkitt rhuhato Bro Nkifrar kfo bruttnamoum. ¹³ Barkofpam nhai wom yima furam rhunhohato kfo bruttnanhormomm. Duka yanhoneftpno be tngrpaye kfo yindhormouumm. ¹⁴ Kto memom nndo tek bu yenyfahtn tehbubekm. Boknambok yimam Jisasrhu mrokfot hikmom.

¹⁵ Aposerm hingrnamoia nefm bi kmi kmim wanyetmn rroh dbohnet yimam yaknimoamm Pitar yauhnamoa yihotamn mkahahwetamouumm. Duka memooum, “Pitar yauhnehato rorhu yafothat yak hnkoknruhattm tamoh dbohnefm thu trohrah.”

¹⁶ Jerusalem taunpno toh hanyuk kmiroh dbohnet yimam, yo kmi yarhm fknayet yimam yaknimoamm aposermpno hanymouumm. Hanymoatmm dbohnefm o kmi yarhm thu troh tany hany-mouumm.

Aposerm kalabus tohmo yuhat

¹⁷ Bro tohak prisri rorhu yarmotem Sadyusim, rom nd aposerm hingrnamo nefm htihato yuhuwehmoum. ¹⁸ Namburhato be nd yimam yak-momm kalabus htamomm. ¹⁹ Aposerm bi kalabus kunys tohetmn yifungnano Bro Nkifrarhu mounmotr yihato tfanyakmorm. Tfanyakhato kfo memorm, ²⁰ “Waikahkmn rmont rim tohhato tuhan yindars wakfo nuhas-twakomm ndar nfri yuhathu tohneft.” ²¹ Be nd aposerm inji wanyhato dbha rmont yimomn tuhan yindars kfo ptha nuhasmomm nd nfri yuhathu toh hikneft.

Bro tohak prisri rorhu yarmotem Sadyusim nhai tawisafrmom aposerm fnahnimohat. Rom memom ka tom. Ndnetmn naku nhafohmomm kaunsermi yo Isrerroh bro yimam. ²² Yi nhafoh bugamotm aposerroh yakyuk polism kalabus yimom. Yimomn be yihom tone hambromom brioh tkittn. ²³ Nd polism tfit yihato mkfo memom, “Barenko, nom yifi-nomn kalabus darmb kihett yo gatyuk yimam mano mano ftohm. Nom tfanynihato rim fnahni famunom ka tome yagnirahnomm. To nhai, be brioh tkitt rim htitawonom. Nhai htirfonomm.”

²⁴ Rmont tohukatohmoa yimaroh bro keptenri bro prism inji wanyhato duka memom, “Tone nd yimame fitoh yuhatn yimom? Nome nko finji wany-ruhanom?” ²⁵ Wom yimarn yihato kfo memorm, “Barenko nd niko hambriwa yimam wusom bi rmontn tohhato Bro Nkifrarhu mrokfom tuhan yindarim kfo ptha nuhaswomm.”

²⁶ Be nd bro prism inji wanyhato nd keptenri polism kfo tkrurafmotmm yihato nd aposerm fakmom. Myak-mohat nhai finji narmomm. Kmi thofm hti yakrmihato memom, “Tahiye tahiye tabotrahnmom.” Ndnatn nhai finji narmomm.

Aposerm kaunsermpno kot tohmo yuhat

²⁷ Polism yihato aposerm yak-momnn kaunsermpno hanymomm. Kot tohhato prisroh bro tohak yimar sinyahato aposerm kfo memorm, ²⁸ “Nikome wanymoko nom kfo rafo mrokfot kfomohat. Kfo memonomko, ‘Mirahko Jisasr kfo htaniyuk mrokfom tfit niko yagnihato Jerusalem thofm akfo nuhas htfasnomm.’ Inji kfomo-nomko. To nhai. Niko nhai wany yakiomkoko. Yi pthamotko Jerusa-lemtipno brbo rhuyuk kmim bi wany sugarom. Tfit nomn kfo kangko, ‘Romn nd yimar fwitmr.’”

²⁹ Pitari wom aposerm sinyahato kfo memom, “Nom nhai wom yima furaroh kfoyuk tngmn hikkfot. Tu Bro Nkifrar kfoyuk tngrpatn nom hikkfot. ³⁰ Niko to bi yura bgre misn Jisasr tuhegirmotkomr yura bgre misn mfaknimor. Hifa nmoh nkifram yakitohmoa Nkifrarn Yafothat thu hmbremotrr tfit mfenyjwomor. ³¹ Bro Nkifrarn Yafothat thu hmbreyaknihato yura hefenrn hamuhhato turhu tirmifko htamorr. Htamatrr nmoh nrfa htiyakyukr tohwor. Rorn nom Isrernom dfa tikr hta tehakmornom. Nd fasoh fasoh nefroh mong trohhato yak thunefm rorn fak nuhasmornom. ³² Bro Nkifrar hingrnamo hingrneft bi tunmoh nyngaye be hti hikhato kfo nuhas hanitnomm yimam. Bro Nkifrarhu Yafothatn kak nuhas marnyewutm nom kfo mmoni hanita mrokfom. Yimam Bro Nkifrarhu mrokfom hikwam Yafothar hi hanitrm.”

Gamalier aposermpno tohmo yuhat

³³ Kaunserm nd Pitar pthamo mrokfom wanyhato yima yuhum nhai marnyarmomm. Yima yuhum namburhato memom, “Aposerm awasnom.” ³⁴ Hifa wom kaunserr tohhato wom kaunserm memorm, “Aposerm afo afnahnim.” Nd kaun-serrhu yufat Gamalier. Farisi hingrneft rorn kakitohmount. Nkifra boririfhut to ndhtet yimamn fakitohmoumt. Rorhu nefm tu dboriohmn wom rirhu arhuyuk yimam kfo yindhormoumr. ³⁵ Aposerm fnahnimotm Gamalierr wom kaunserm kfo memorm, “Niko, Isrerk, kangko, ‘Tamoh nefm ananomm ndur aposerenm?’ Afo duka marnyaf hanyhato btn tamoh nefm nakfot. ³⁶ Niko Teudasrh gngr yakitoh hanykfot. Ror inji namor. Kmi thofm kfo brur bobrurmotrm kmi kmi nafakmomm memom wom hingrneft hingrnarahnom. Ndnetmn 400 yimam nayakhato Teudasrn nyngako tohmor. To nhai. Nd Teudasr yimam wasmotmr, nd hingrneft mfak htanimomt. ³⁷ Yo tfit Galili thof Judasrn wom

neft namor. Bro sensispno yimam yak nhafohmorn memor, ‘Nd yima wohnr-pno yihato gafman yimampno nnarahnom.’ Nd kmim nayak haso-momn Judasr mteh yifhumor bi be, nd yimam natubatumom. ³⁸ Na nd nefm bi hti hnayetann ndnetann kfo rafiwanko aposerroh wasneft. Rom tamoh hingrnewum be nyngarpaye yukatohaf hanykfot. Rroh fijo hingrnewum, nhai toh bmtaruhatm. ³⁹ Bro Nkifrar yima yuhum yahutrm nd hingrneft kasinyemt, nhai nikomn tfit buha mttohhato kfo rafokfot. Inji naneft be yuwi kangko, ‘Bro Nkifrar yak batirnome.’”

Gamalier bi inji kfiwure, be wom kaunserm nhai wom ptharmom. Be ror kfoyuk yuhatn hikmom. ⁴⁰ Be inji nakfo nohmomm tfit aposerm nakuyak-mom. Nakuyakhato rim fnahnimom. Rim fnahnimotm be wife frtmbho botmbhomomm. Inji frtmbhonihato bro kfo rafo mrokfom hemomm. Kfo memomm, “Arihat be tfit mirahko Jisasrh mrokfot met yindarim akfo nuhas habrinomm. Be tmifko.” Inji kfonihiato memomm, “Wafnahniko.” ⁴¹ Be fnahnimom. Fnahnimohat nhai wommpno yihato rim kfo nur marimom, “O nom nd yimam ftatmnom.” Nhai. Rom to be yindhor yima yuhurpno yihato kfo memom, “Nhai mrokfom. Nom Jisasrh mrokfom kmi thofm kfo ptha nuhaswatnom tatwomnom, nhai mrokfom.” ⁴² Nd Jisasrh hingrneft nhai yafhormomt. Yiha yiha rmont yihato Bro Nkifrarhu mrokfom met yindarim kfo ptha nuhasmoumm. Met yindarim kfo nuhas marnya memoumm, “Bro Nkifrar kfo hnamoa yimar tor nd yima Jisasrn kfo hnamour yimaroh minrfa htiyakyukr.”

6

Aposerm yakmo wom 7-pela nfri yimam

¹ Barkof yimam Jisasrh hikmoam nhai bokm rhurmom. Kto hingrna hanyspno rifinysamom. Rifinysahato tfit tuhan dhirroh maruha yak nhta marnya he duha nmbuhatpno wom Judam, Grik yarmumat pthetm, duka marimoum, “Barenko, ndar aposerm yekwa marut nmoh tuhan dhirpam nhai hekahmm. Be Aram kfetroh tuhan dhirrpam kahukm.” ² Be 12-pela aposerm wanyhato naku nhafoh bugamomm Jisasrh hiket yimam. Nakuyak bugahato kfo memomm, “Nhai wofnkahnom Bro Nkifrarhu hingrneft yakinohhany yo tfit tuhan dhirroh maruham yakinohhekfot. Ka hus hingrneft bugaf yakinohneft ka Bro Nkifrarhu hingrneft miyafho thuniraht.” ³ Ndnatn nom kangnom 7-pela yimam wayakko. Wayakkahtko romn nd hingrneft yakinohrahm. Tuko hti hanyhato fitoh yimar Bro Nkifrarhu Yafothat yorhwattr rorhu dukefr riduka adukewurm tamoh tamohm, ndhtet yimam yakhato nd hingrneft yak htarahnomr. Nome nhai nd hingrneft yakinohkfot. ⁴ Nmoh hingrneft to be kfo bruttnaneft yo Bro Nkifrarhu mrokfot kfo nuhas to be nd hingrneft nom tohkfot.” ⁵ Nd rom pthamo yima yuhur met yindars ufakmomr. Me-momm, “Nd niko kfifa yima yuhur hifa pthiwuko.” Ndnetmn Stifenn, tu Bro Nkifrapno frtkafhato Bro Nkifrarhu Yafothat ruhetr, yo Filifr, Prokorusr, Nikanorr, Timonr, Parme-nasr ee Nikolasr, nd nd yimam fakmom. Nikolasr ror nndo yima tangiroh kmi Antiock thofr. Bro Nkifrarhu rmon mrokfeft riwanyak-hato Bro Nkifrar hikmor. Tfite kto Jisasrh mrokfeft hikmoatr ndnatn ror rpat fakmomr.

⁶ Aposermpno hanymotmm romn tir htahato kfo bruttnamomm. ⁷ Be nd Bro Nkifrarhu mrokfot mfaknimomt kmi kmim ptha fnahmotmt bok met yindarim wany wofnmomt Jisasrh mrokfot. Tuha Jerusalemt ndnatn bok Kristenett rhumot. Yo nd Bro Nkifrarhu temperr tohukatohyuk yima prism, Bro Nkifrarhu mrokfot wanyhato rroh bokm Jisasrh hikmom.

Judam sinyahato Stifenn kotimmo yuhat

⁸ Bro Nkifrar hifa hifa yak marnya bomarnyamorr Stifenn. Yak marnya bomarnyahato bro hingrna bbuka yafothar thu hmbremotrr wonk wonk nefm namourm. Met yindarim ror namoa nefm htihato yafotha duhatm rhumoum. ⁹ To tfit wom kmi thofm sinyahato Stifenn pthayuk mrokfom kfo hanyjbornamomm. Nhai fitoh kmim inji narmom. Judaroh

wom rhu rifinyuk rmonr kutamoumr Frimanroh rmonr rifinymoa yimamn kfo hany-bornamomr Stifentr. Nd yimam Areksendria thofmi Sairini thofm yo Siristia thofmi Esia thofm rpat nathu hmbrihato Stifentr pthayuk mrokfom kfo hanyjbornamomm.¹⁰ Memom, “Ka nomn sinyahato tamoh mrokfom kfo nohafrahnomr Stifentr.” To nhai. Bro Nkifrarhu Yafothar dboriorh dukefm hemotrr nhai romrpam ptha nohrmomr.¹¹ Ptha nohafmotrm ndnetmn wom yimampno yihato mkfo memomm, “Wakfo wamitwako, ‘Stifentr wanymonomr Mosesri Bro Nkifrar faso faso kfomorf.’”¹² Rom nd mrokfot yaknihato mhta wokmotm kmi thofm, tohak yimam, boririfhuthu tisam sinyanihato Stifentr fakmomr. Yakhato kaunsermpno kot hanymomr.¹³ Stifentr bi mrhumotr ee mrokfot hta wokyuk yimam mongko yimom. Mtohmomin mkfo memom, “Nd yimar yiha yiha Bro Nkifrarhu temperr faso faso kfo bebwort yo Mosesrhu boririfhut ndt nhaf faso kfo bebwort.¹⁴ Nd yima Stifentrparn nhaf kfo memor, ‘Nasaret thof Jisasrn nd nkifra rmont yak tebosohrahrt. Nkifra boririfhut nhaf inji. Yatkt yak tuhaf-ruhartn tfit nfrit yak htarahrt.’”¹⁵ Nd kot swirt tohyuk yimam Stifentrhu nyngatikt wahtimohat memom nnndo mounmotrhu nyngatikt fnhutwotr.

Stifentr kot swirt pthamo mrokfom

¹ Bro tohak pristr kfo ttiwonmorr Stifentr, “Stifen, ni wakfo ptha marnya. Nd rom kfo pthiwa mrokfome ka tu wany mifmomn pthewum?”² Stifentr wasinyahato kfo memor, “Yinouroko, nann afo pthakahta wawanywako. Nmoh nkifra Abrahamr tafi Mesopotemiat htanyhato Haranko yi duhatrn yura mounthu tu bro bbukayet Bro Nkifrapno nahtimofn nakfo pthamof.³ Nd yiha Bro Nkifrar kfo memor, ‘Ndar tunhu kmit, ninhu yifammam, ndm wahtanyswanm. Wahtanykahnm waiswa na kfo nuhasaforuha tkittn.’⁴ To be nd yiharn Abrahamr Kaldiaroh kmit htanymortn yimor Bro Nkifrar kfomo kmi Haranko. Be Haranko tohetrn yifemr nohtanimotrr Bro Nkifrar yak hatohhnammorrn tfit ndar nom Isrer-nom arihat tohwa bbinyssoftn fak htamotrr tohmor.⁵ Bro Nkifrar ndar bbinyssoft yak htamohat nhai kfo nuhas marimorr, ‘Ndar bbinyssoft ninuhet.’ Nhai. Be kfo memor, ‘Ni ndar bbinyssoft toh hanyruhann nohnirahn kto tfit ninhu yon frikar ndar bbinyssoft yakrahm.’ Bro Nkifrari Abrahamr nd tkitt nakfo nuhasmohat Abrahamr to mirahko ka yonetrn inji nakfo nuhasf. Nhai. Abrahamrhu mett nmbit tohmout.⁶ Bro Nkifrar kfo memor, ‘Ninhu yon frikar sinya thoft 400 gunyjimm afo womroh yinhit tohhato afo wommn hingrna hafknirahm. Wom kmimm yejimmoh thurahmm nd yiham.⁷ Inji nahany inji nahanyruhamm to tfit kto rom yak beb hasoyuk kmim nann krhopam hirhotanm ndt htihato yafuhafrahmm. Yafuhafruhattmm tfit ndar ni kfo nuhaswa tkitt nieruhamn na kfo tatorahma.’⁸ Bro Nkifra Abrahamr of mrokfom nayak dbkafni-mohat Bro Nkifrar sinyahato Abrahamr kfomorr tha puk thuneft. Memor, ‘No mrokfom nayak dbkafhat, ni tha puk thuwa tkitt hti hanyruhann mduak hanyrahn nani ni mrokfot nayak dbkafhat.’ Kto rorhu barkof yon Aisakr nurnimohat trku rijohit rhunihato 8-yuk marrpno tha puk thumorr. Tfite Aisakr bronihato tuhant yakni ror nasakmo yon Jekofr nhaf nd rpa yuhat hikhato tha puk thumorr. Tfite Jekofr nasakmo 12-pela yonm, nmoh nkifram, nd nkifra neft hikhato tha pukthu bugamorm.

⁹ Nd 12-pela nkifram rroh womr Josef. Nd yima Josef rorhu wom najomrom nhai dboriorh neft narmomr. Faso riduka bebakhato wom kmimpno nahehato wiknanimomr. Ijifmn wiknani hanymomr. Josef Ijift yi tohmohat Bro Nkifrar nhai mong trohrmorr. Tamoh tamohm Bro Nkifrarhu tirmn rhumor.¹⁰ Bro Nkifrarhu tirmn ruhetrn ror yakmoa krhopam Bro Nkifrarn fak marnya hnamourr. Ror yihato Ijifthu kingrpno yi mtohhato pthamohat Bro Nkifrar tu dboriorh dukefm hemotrr mrokfom hifa ptha marnyamorm. Ijifthu kingr wany yindhorhato be tfite rorn Ijifthu praiministar htamor. Kingrhu kuny kmifar rorpar tohukatohmou.

¹¹ Josefr bi nd nd hingrnefm yakhato tohetrn bro yatinoh wormr Ijifti Kenant tohmor. Nd hus kantrif tohyuk yimam rim ta ttiyak mta ttiyakmoum yeshri yakneft. Nmoh nkifram rom inji buga. Bi yeshrimn foh tebehmom. ¹² Kto wanyakmom memom Ijifko harhuwom wit. Jekofr wanyhato nmoh nkifram barkof yiha kfo tkrurafmotrm yimom wit wiknat. ¹³ Barkof yiha miyakyukm mye buga tanymomm, yo tfit yimom. Nd yispno Josefr kfo nuhas memorm, ‘Na hti mmorahkma. Na nikmoh wuroh nmemen Josefa.’ Bi inji kfo nuhas-worme, kingr ndnatn hti duka tungunamorm, ‘E na kanga ka wom yima furayem. Arm Josefahu najom-royem.’ ¹⁴ Josefr sinyahato ttiwon-morm, ‘Nmoh yifem Jekofre tor yuhre?’ Memomr, ‘Tor.’ ‘O wamhtiyakkorm.’ Be wom najomrom inji wanyhato yimom yifemrhu yakt. Rorhu mhtiyak-neftpno rorhu yorgtohthu rhu hasoyuk wuroh 75 yimam mhtiyakhato rpat yimom Ijifko. ¹⁵ Be Jekofr Ijiftn yi tohhato ndharn nohmor. Nmoh nkifram nhaf ndharparn noh wita bugamom. ¹⁶ Be noh bugamotm tpi tikrpam yaknimomm hanymom Sekemko. Ndko hanyhato Abrahamr Hamorhu yonmpno wiknamo bbinysothu tahi muhmn hany htamomm.

¹⁷ Nd rom noh htaniyuk yon rishur nhai kuken rishur sinyarmor. Bi Bro Nkifrar Abrahamrpno kfomorr Isrerm Ijift yi tohyuk yiham. Bi yonmari rifuhetrn to be Ijift htanyuk yiham bi brbohmom. ¹⁸ Nd yiharn nd nfri kingr nhai tawisafrmor Josef Ijift yima nfrir tohhato namoa dborior dborior nefm. ¹⁹ Be nd Josefahu kmi thofm Ijift noh htanimom nhai yak marnyar-moarm. Isrerm gmuha muht muh thunimoum. Kingr htimorm Isrerm nhai sinya ffirmrmom. Dndnatn kfo memor, ‘Arihat Isrerroh yon yindarim akisupaf hanyswamm.’ Be Isrerm nasak hanymoa yon yindarim yihom kisupaf hanymoumm. ²⁰ Wom yiha wom mett wom yonr hiyaumot. Nd yonrhu yufat futamotr Mosesr. Bro Nkifrar nd yonr hifa hti yindhormorr. Nd yonr tu dborior yonr nhai kisupafrmotr. Dndnatpno fak hamong-motr husfirpa yamt. ²¹ Kto tfit yak-nimotr briahako htamotr. Briyahako htamotr kingru yont htihato fakmotr. Yakhato be rotn duge warhomotr. ²² Be toh warhonimorn Ijifroh hingr-nefm, hingrna dukefm, tamoh tamoh nefm fak buga bugamorm. Yak bugamormn rorn tohmor tu bro ptha nanyjaret yimar.

²³ Tohhany toh hanymorn bi 40 gunyjimetrn yima yuhur sinyamorr turhu kmi Isrer thofroh yau hafott yinyeft. ²⁴ To be yimorn turhu nyingaye htimor wom Ijifr sinyahato wom Isrerr tmbho botmbhafmotrr wasuh bebmor. Mosesr ndt mhti namburnihato tawo wom Ijifr tmbho botmbhafmotrr be tuha gur rhumor. ²⁵ Mosesr memor, ‘Inji nakahta Isrerm hti dukarahma. Duka mirahm, “Ka nd yimarn yak hakrmenirahrnom.”’ To rom nhai hti dukarmoumr. ²⁶ Tfit wom yiha nhaf tu Isrerf tuf tawo tawo nna hasetfn memor, ‘Kfo dbohfarhoyanfn afo htiruha hti nhtarahfan o nhai.’ Nna hanyetfn yak dbkafaknihato kfo memor, ‘Barefn, tamohmpno tufn tfit tawo tawo nnewafn?’ ²⁷ Tu rinam-burakyukrn Mosesrhu tirm frtfafhato kfo memor, ‘Nine frohm kfo memomn turoh nefmpno ni buha mitohhato wakfo dbohfatwanm?’ ²⁸ Bi nohok womr yewofnronn tfit kagn wompam?’ ²⁹ Mosesr inji wanyhato fakrmenimor. Yakrmenihato yimor Midianko. Ndko yi tohhato mett yakhato hus yonf nasakmor.

³⁰ Be ndko bok gunyjimm tohmor. Tohhany 40-yukrpno Sainaitn yima toh duha nungu furatn toh hasetrn mounmotr yimorn mifnahmorr. To nd mounmotr kah funefm kanjo mi bufupamn funa nuhasmorr. ³¹ Mosesr nd kah funefm htihato memor, ‘Ka tu kah funef mifet.’ Memor, ‘Yauyaknihato brbo yi htiruhant.’ Yuhre fauyakni hanymor asha Brorhu tngt kfo memor, ³² ‘Na ninhu nkifra Abraham Aisak Jekofrom kfo bruttnamoa Bro Nkifraya.’ Be Mosesr Bro Nkifrarhu tngt wanyhato yimar wutthamohat memom nndo ginunes kekwotr. Kaht htihato nyngam mmrtamotmr nhai htirmort. ³³ Bror kfo memor, ‘Nd ni hmbrita hona wuram wayak thunm. Nd tkitt na Broya wiuya yauwa tkitet. ³⁴ Nanhu yon kunys Ijift tohwom. Ijifm yak bebwatmm na yuwa naku nurwohah rom kangm ka nhai htihato wanykahrnom. Na wanyhato htitanm. Na nd nmbuham htihato ninpno nia ninhu kfotn. Ninn na be kfo tkrurwa Isrerroh mihtiyakneft.’

³⁵ Isrerm sinyahato afo Mosesr kfo memomr, ‘Nine frohm kfo memomn turoh nefmpno ni buha mitohhato wakfo dbohfatwanm?’ Afo frtfafmomr kto nd rom frtfafmo yimarn Bro Nkifrar kfo tkurafmotrr fak hakrminamorm. Tur kah funefm kanjo htimo moun-motrn bro bbuka nanya rfhur hemotrr hakrminamorm. ³⁶ Mosesr Ijift tohetrn wonk wonk mirakerkfot hingrna tanyhato fak hakrminamorm. Rom Retsit yo yima toh duha tkitt yau fnahmohat to be mirakerkfot kfomot 40 gunyjimm nd yonmari yihotar fau sufnahmomr. ³⁷ Nd yima Mosesrparn Isrerm kfo memorm, ‘Na hingrnewa hingrneft kanjohot yimar kto wom yiha tukmoh frikeft toh hamuhuyk yimarn Bro Nkifrar nd profet hingrneftn yak htarahrr.’ ³⁸ Nmoh nkifram yima toh duha tkitt yi tohmohat to nd yima Mosesrn tohnhomorm. Rorn Sainait muhhato rhu nkifraniyuk mrokfot mounmotr hemotrr hemornom.

³⁹ Mosesr nd mrokfot yaknihato Isrerm kfomourm nhai wany yakior-moamr. Ijifkorhof dukefr rhumoatrm ndnatn hanyjbornamoumm Mosesr kfoyuk mrokfom. ⁴⁰ Mosesr Sainait muhhato wutoh hatohmohat, Isrerm Aronrpno yihato kfo memomr, ‘Nmoh hatohakmoa yima Mosesr nhai ka tfit nieruhatr. Nom bi duka mumiwunom yiyuk yihotam. Nom kangnom wom yifonm wahingrnakahtn nd yifonmn yihotat toh tamnou hanyrahmnom.’ ⁴¹ Be nd dukeftpno bulmakaaur hingrna nhombramomr. Hingrna nhombranihato bulmakaaur washato tarior skurn mthanihato nd yemrot yehato grha yindhormomr nd nfri bulmakaay yifonr tum hingrnayukr. ⁴² Be inji rinakmotm to be Bro Nkifrar mong trohmorm. Mong trohmotrm tfit mount rhuyuk mar yam guny ndmn kfo tatomoum tamoh tamoh nefm. Profetm kfomo mrokfot to be kfo twanhomm. Kfo memom,

‘Niko Isrerk, niko yima toh duha wesan furat

40 gunyjimm hwe toh fnahmo yiha bulmakaum washato tarior mthamoahat
nhai nann tarior mtharmoako.

⁴³ Nd niko hiyau habrimo ser tha rmont

ndt nndo tahi Molekr tohyuk ser tha rmonti
yo gunyr kanjo hingrna nhombret tahi Refanr
hatoh habrimouko.

Ndm nndo tukmoh kfo tatoyuk tahi yifonm hingrnamoko.

Tuko inji newatko nhai asha tohruhatko

wuri Babilonko htaruuhanko.’

Amos 5.25-27

⁴⁴ Nmoh nkifram yima toh duha tkitt toh fnahmohat Bro Nkifrar mithu nawohuyk ser kuny rmont kakitoh-moum. Nd ser kuny rmont hingrna-mohat tu Bro Nkifrar Mosesrpno kfo nuhasmo yuhatn hingrna nhombra-momt. ⁴⁵ Kto nd nmoh nkifraroh yon frikeftn nd ser kuny rmont Josuarpno yaknimomtn hanymomt wom kantriroh bbinysoftn. Nd kantrikfothu yimam Bro Nkifrar yak tuhafmormn nd ser kuny rmont tfit ndha mkasinyamomt. Be nd rmont tohettn ee Defitr king tohmr. ⁴⁶ Defitrn Bro Nkifrar hifa kak marnyamour. Jekof frikeftu Bro Nkifrarhu nfri rmonthu kasinya nmbuhat Defitrn Bro Nkifrar kfo naku ttiwonmorr. ⁴⁷ Kto Solomonrn nd nfri rmont kasinyamort.

⁴⁸ Nd nfri rmont to be hingrna furamomt. Nd yurak myorhekwa Bro Nkifrar yimamif hingrnayet rmonm tohetrn to btne tohrmort? Nhai. Profetm to kfomomt mrokfot,

⁴⁹ Brorhu mrokfot kfo kangr,

‘Hefenr nanhu sia kinger.

Bbinysoft nanhu wuraf wayahotwa tkitet.

Ndnetttn to tfit fitoh tkittn yamukako

nanhu rhu witayuk tkitt ahingrna hanyomr tfit?

To fitoh tkittn nanhu rhu witayuk tkitt rhuruhat?

⁵⁰ Nd nd shrm nann hingrna hta bohtamo shrkayem.’”

Ais 66.1-2

⁵¹ Stifentr nd kaunserm kfo memorm, “Niko ndar Judaroh kaunserko niko be tu mfro tahisamomko nikmoh yima yuhum. Yimbhindangm kihmnimom. Nhai Bro Nkifrarhu mrokforoh wany-kfot. Bro Nkifrarhu Yafothat kfoyuk mrokfom be tu frfta thuwokomm tukmoh nkifram nahnamo kanjo. ⁵² Nhai wom profetr nikmoh nkifram

hifa yak marnyarmomr. Bro Nkifrarhu hifa yufayet yimarhu mrokfot me-moum akfo nuhasnomko rom riyak-moamm was beb bobeb thumoumm. Nd hifa yufayet yimar to bi niamotr nikomm hndhnamatkomr wasmomr.⁵³ Ar mounmotmpno boririfhut yakyuk kmiko to nhai nd boririfhut hikrmokomt."

Stifentr tahiye frdbofnamo yuhat

⁵⁴ Stifentr pthamo mrokfom kaun-serm wanyhato nhai yindhorrmom. Nyingatikm memom nndo krpaye srfemm.⁵⁵ Stifentr Bro Nkifrarhu Yafothat tohmoutr. Memor, yura auhtiya, htimorr Bro Nkifrarhu wondht hatohmohat memom nndo marrn yifa tohwor. Bro Nkifrarhu tirmifkorn htimorr Jisasr.⁵⁶ Stifentr inji htihato kfo memorm, "Wawanyko, na bi htitwant hefenrhu rim fnahni yuhat. Tu rim fnahni yuhatn htitawanr Bro Najomr tohwor Bro Nkifrarhu tirmifkorn."⁵⁷ Stifentr inji ptha hanymor kimr wunahato yimbhindangm takihmomm. Nhai wofnrmom ror pthayuk mrokforoh wanykfot. Be yudbat rpat wayur sinyamomm toneyaknihato tir tir fakmomr.⁵⁸ Yakhato fakni hanymomr. Taunt yau troh tanyhato wuri nndo rim htahato tahim yakhato tahiye tahiye febhohmomr. Nd mrokfot wakfo wokakyuk yimaroh yuke hmbresham yakhato wom yima damiagr, rorhu yufat Sorr, rorhu wurampno wahtamomm.⁵⁹ Tahiye yenyohafmotmr Jisasr nakumorr, "Nungothet Jisase, nanhu yafothar wayaknr."⁶⁰ Wura yihom tabokme-hato kfo memor, "Broye, rom na ndar tat bebwohat mirahn finji anayanm." Be inji kfonihato mfaknimor. Sorrn kfo yakio mrokfot hemorm Stifentrhu tat nohneft.

8

Sorrn hatonemorm Jisasr hiket yimaroh hik tubatuneft

¹ Nd yima Stifentr tat nohmo yiharn Jerusalemtu Kristenm yak beb bobebafmotmm faktume tubatumom. Womm tuha Judiakorhof kmimm fakrmenimom womm Sameria-korhof kmimm. Aposerrpamn tuha Jerusalemt toh hasomom.² Bro Nkifrarhu mrokfot hiket yimam Stifentrhu thatipt hanurmomtn fop hambre-momt.³ Jisasr hiket yimam turoh kunym ruhetmn Sorr hik hawitahato myakmoarm kalabus htamourm. Memour, "Inji anakahann yak bati bugayanm Jisasr hiket yimam."

Aposerm Judiati Sameriako yihato ndkorhof kmi kmim Jisasrhu mrokfom kfo pthahemo yuhat

(8.4-12.25)

Bro Nkifrarhu mrokfot Sameriat hany pthamo yuhat

⁴ Nd yakrmenimo met yindarimn gutniuskfot romn kmi kmim hanymomt.⁵ Filifr yakrmenimohat Samariako yorhwa taunt yimor. Rorn Kraisrhu kfo nuhas mrokfom kfo nuhasmorm.⁶ Filifr mrokfom pthamoahat kmi thofm rom rhu marnyahato wany yakinohmou ror pthayuk mrokfom. Wonk wonk mirakerm namoatr rom rhu marnyahato htimoumr.⁷ Tek yarh fknayetm rom yarhm yak thumoatrm tau tanyhato fnahnimoum. Wura bebetm, rikiyem ror kfo bruttnamour marnyanimoum.⁸ Kmi thofm Filifr namo nefm htihato bro yindhoreft fakmotm.

Saimonrhu tndht

⁹ Nd kmitn wom yimar tohmour rorhu yufat Saimonr. Nd yimar duka memor, "Na bro yufayet yimaya." Nd yimar metroh thu bbrakyuk hingrnefm yo kiret nyina hingrnefm yakinohhato wonk wonk nefm namoatrm Sameria thofm htihato duka memoum, "Barenko, nd yimare finji hingriwar?"¹⁰ Sameriat tohyuk yima fura bofurat, kukent, burent, fitoh fitoh yimat, be rorrparn bro dukeft htamoum. Rroh dukeft duka memom, "Nd nmoh nkifraroh bro bbukeft, tot nd yima Saimonrn."

¹¹ Wonk wonk nefm nahatohmotr Sameria thofroh dukefm rorrpar htamoumm.¹² To tfit Filifr yihato yimam Bro Nkifrarhu kingdomfoti Jisas Kraisrhu yufat kfo pthamor Sameria thofm wany yakiomot. Filifr nd ror pthayuk mrokfom wany yakiomo met yindarim baftaisimmorm.¹³ Nd yima Saimonr, ror Filifr pthayuk mrokfom wany

yakiomotr Filifr baftaisimmorr. Saimonr baftais yakni-hato Filifrpno rpat tohhato Filifr wonk wonk nefm namotr Saimonr htihato tfit mifoh rihamor. ¹⁴ Jerusalemt toh hasomo aposerm wanyak memom, “O, Sameria thofm Bro Nkifrarhu mrokfot wanyhato kak hikwomt.” Be inji wanyakhato Pita Jonrof kfo tkrur memomf, “Wamhti marnya tanyfnm.” ¹⁵⁻¹⁶ Be rof tufn mhti tungunahato htimofm Bro Jisasrhу yufarpatpno baftaiskfot yakmomn nhai Bro Nkifrarhu Yafothat yakrmom. Inji mhtitihato yo rofn Bro Nkifrarpno kfo tatomofm Bro Nkifrarhu Yafothathu yakneft. ¹⁷ Kfo tatonihato tir htamotfm Yafotha fakmom. ¹⁸ Saimonr inji htihato maruham yaknihato mkfo memorf, ¹⁹ “Nd nifn yakitohwa bbukeft kanga awiknayanfn. Na nd bbukeft yakitohhato na fitoh yimam tir htahato kfo tatoruha Yafothathu yakneft yudbat yakrahm.” ²⁰ Inji mkfomotr Pitar kfo memorf, “Bro Nkifrar he furiwa nefm wiknakfot kfiwatn, tunhu maruhampno hel yirahn. ²¹ Ninhу dukefr nndo korhr, nhai Bro Nkifrarhu dukefr hikkahr. Ndnatn nhai nom hingrnewa hingrneft tohnhoruhatnnom. ²² Ninhу ndhtet fasoh dukefr wayafho thunr. Wayafho thukahtnr Bror kfo bruttnahato nd ni yikitohwa dukefr ror nhai wom dukaruhattr. ²³ Htitann ninhu dukefr Bro Nkifrar he furiwa nefm htihato be mfro mfrhutewur. Nd dukefr yorhwatrн be tu fasoh neft newun.” ²⁴ Inji kfomotfr Saimonr kfo memorf, “Bro Nkifrarpno wakfo bruttnakahtfna yuhuwafrhora nd nifn kfi nefm nhai yakrhotma.” ²⁵ Be Pita Jonrof Bro Nkifrar yak nuhashato kfohemoa mrokfom kfo nuhas tanymofm be rof tfit Jerusalemkо yimof. Yinyeftpno yihotathу kmim Sameriathum Bro Nkifrarhu mrokfom kfo nuhas hanymofm.

Filifr Itiopia thofr Bro Nkifrarhu mrokfot kfo nuhasmo yuhat

²⁶ Filifr wom mounmotr yihato kfo memorf, “Wasinyakahnn sautko yorhwa yihotat waiswa. Nd yihotat Jerusalemt mkiomotn yimot Gasako, yima toh duha tkitko nd yihotat korhwot.” ²⁷ Be Filifr sinyahato nd mounmotr kfoyuk yihotarn yimor. Yau hanyhato wom Itiopiathu yimar-pno yihom nafurmof. Nd yimar frfuha duhatr. Frfuhaф faktamomr. Itiopiathu kwin met Kandasithu maruham rorn kakitohmourm. Jerusalemkо Bro Nkifrarpno kfo tato tanyhato ²⁸ memor, “Tfit kmiko aiya.” Turhu karis toni hanyhato profet Aisaiarhu mrokfot htihato ptha hanymour. ²⁹ Bro Nkifrarhu Yafothat yihato Filifr kfo memor, “Nd yimarhu karispno brbo waikhann ror ptha hanyuk mrokfom wawany yikitoh hanyswanr.” ³⁰ Filifr tonenihato karispno brbo yau hanyhato wanymorr nd yimar profet Aisaiarhu mrokfot htihato ptha hanymour. Filifr sinyahato kfo ttiwonmorr, “Nd ni htihato kfo pthiwa mrokforoh yimbu yuhame ka kekwonm o ka nhai?” ³¹ Nd yimar sinyahato kfo memor, “Nanrpaya htineft to finji mrokfo mnay yakkfot. Wom yimam akfo nuhasma, awi yakrfoyanm.” Inji kfonihato kfo memorf, “Yuwa muhn karisn.” Be Filifr muhmor karisn. ³² Nd yimar karis rhuhnehato htihnamo mrokfom kfo memom,

“Sifsifr nhombrarahr.

Yimam was thombat nhai tauruhatr.

Yimam yakhato tmbm yoh thombat nhai yififaruhatr.

To inji na nhombrarahr.

³³ Womrparoh tng rihar grmmim kanjo tayifuhafrahmr.

Nhai be ptha hik marnyahato nohyuk tkitt htaruhatmr.

Ror bi nohruhatr to frohmn rorhu yimatm arihat tohruhamn

kfo nuhasruhamm ror yak bebmo nmbuhat?”

Ais 53.7-8

³⁴ Nd yimar nd mrokfo nmbuhat hti buganihato kfo ttiwonmorr Filifr, “Filif, ttiwonwann, profet Aisaiare frohm dukahato nd mrokfot inji kfomort, turn o wommn?” ³⁵ Filifr sinyahato kfo nuhas bugamorr ror hti hnamo mrokforoh mna yuhat. Kfo nuhasnihato ee Jisasrhу mrokfom kfo ptha nuhasmorr. ³⁶⁻³⁷ Yi yimofn wom tekt htihato nd Itiopia thofr kfo memor, “Asot tekt. Na ndar tektn baftaisnirfoya? Ka wom fasoh nefm yorhwatma nhai baftaiskfot?” Filifr inji wanyhato kangrr, “Yinowa, na nhai mrokfom ninhu baftaisimneft. Tunhu yima yuhur wayibon sinyewur Jisasrhу hikneft, to na nhai tfit kfo rafokfot.” Itiopia thofr wanyhato memor, “Jisas Kraisr Bro Nkifrarhu Yon mifer.”

³⁸ Inji kfomotr karis mtohmot. Be Filifr mitohnihato nd Itiopia thofr tekt hanyhato baftaisimmorr. ³⁹ Baftaisimnimorrr yuhre mtohna hnamof, be yudbat Bro Nkifrarhu Yafothatn Filifr thu hafunanimotr. Be wom Itiopia thofr brioh tkitt hti hambro hasohato be yindhorefrparpno yimor yihotar. ⁴⁰ Filifr Bro Nkifrarhu Yafothat thu hafunanimotr Asdot mifnahmor. Be ndharhof kmim Jisasru mrokfom kfo ptha nuhas habrimorm. Inji yi hanyhato Sisariat mifnahmor.

9

Sorrhu fasoh yima yuhur yak kekutmo yuhat

¹ Sorr nhai ttifarmor Jisasru disaiperroh yak bebneft. Ror hatoh hnamo neft to be fakitoh hany swanhomort. ² Wom yiha prisroh bro tohak yimarpno yimorn mkfo memor, “Nanhu bro kfo nuhas mrokfot wawandfakkahnt Damaskus yorhwa Judaroh bro rifiny rmonm bi wahe nhombratwanm. Gontwaroh mrokfom wakfo wamitwa, ‘Fitoh yimar o mett, Jisasr hikwam, nd yimam, Sorr yak-ruharm Jerusalemt kalabus hany htarahrm.’ Nd mrokfot wakfotwanm.” ³ Nd mrokfot bi ruhettn wom yiha Sorr Jerusalemt toh tanyhato Damaskusko yimor. Yimorn brbo Damaskuspno toh hanymor asha nukeft wuhtiyakmort. Memom ka nndo bro ksh nmbuhatn yura mountko wuhatohhato wayak nukewumt. ⁴ Nd nukeft masat funa rramott yima Sorr yura hos ruhetrn memor auhtiya nyngam mmrifakhato bbinyssoft misuhmor. Be tuha nyngam kunyjetr rhumor. Tfit yura hefenko wom tnkt kfo memor, “Sor, Sor, na tamoh dukeftpno yak bebwona?” ⁵ Sorr wanyaf hanyhato kfo memor, “Broye ni frohe?” Yura hefenko wukfomo yimar kfo memor, “Na Jisasa. Ni nd niwa nefm Kristenmpno nhai romn yak bebkahn. Nann kak bebw. ⁶ Asomif wasinyanikahnn Damaskusko wanju. Tor nd kmit korhr wom yimar. Rorn wom mrokfom kfohirahrn.”

⁷ Nd Sorrpno yiyuk yimam nd neft htihato be tuha yafotha duhatm tohmom. Nd Sorrpno pthamo yimar nhai nyngatikm htirmomr. Be tngrpat wanymoum. ⁸ Be Sorr wasinyahato memor ayukatoha fitohat yukatohrmor? Be yimamn tirtir yakitohaknihato Damaskusko yimom. ⁹ Husfirpa marm nyngam nhai yukatohrmor yo nhai bupa nuwa yarmor.

¹⁰ Nd kmi Damaskusn Jisasru disaiper tohmour. Rorhu yufat Ananiasr. Ananiasr Bror yimorn minakumorr. Yimam hwe tweh hanita kanjo inji minakumorr. Ananiasr wanyaf hanyhato kfo kangr, “Broye na asoya.” ¹¹ Bror kfo memor, “Judasru kunyko waiswa. Rorhu kunyko yita yihotarhur yufat ‘Dborioh Yihotar,’ nd yihotarpar waikahnn Judasru kuny shofm wattiwon wamitwanm, ‘Tasis thof Sorre tor?’ Ror tor nd kunysn kfo bruttna hasiwur. ¹² Yak nuhasruhatmn htirahnr nyngam kunyjeter. Nd yima Sorr ror nhaf hwe twehnano bi Ananiasr htiyak hanymorr. Yi hanyhato tirm hta hanymotrr nyngam fukatoh hanymorm.”

¹³ Ananiasr wanyhato kfo memor, “Broye, Jerusalemt ni hikwa yimam yak bebhnewa yimar bok yimam nd yimarn kutewum. Kangm ror kak bebhnewurm. ¹⁴ Bro prism kfo yakiomotmr Damaskushu yimaroh yakneft ndnetrn bi ako niewur.” ¹⁵ Ananiasr inji kfomotr tfit Bror kfo memor, “Wanju nd yima Sorrpno. Nanhu hingrneft rorn hingrnarahrt. Rorn yima tangim yo kingm yo tu Isrerm yihato kfo nuhas hirahrm. Kfo nuhasruhatrm na mhti dukakrahma. ¹⁶ Ror nd hingrneft tohhato yakruha krhopam na tukann kfo nuhasruhanr.”

¹⁷ Ananiasr inji wanyhato yimor nd Sorr rhumo kunys. Yihato tir rim htamorrn kfo memor, “Yinowe, Jisasr kfo tkrurefitra niya ninpno. Ni ako Damaskusko niahato yihotat htimo yimar, to nd Jisasr htimo. Ninhu nyngaroh yak marnyaneftn kfo tkrurefira yo womt duka kangr Bro Nkifrarhu Yafothat nd yimar amthu nawohtwatr. Ndnetrn kfo tkrurefitra niya.” ¹⁸ Ananiasr inji kfonomotr be nd Sorrhu nyngam hta tasifmo shrm yira nfm kanjo yohrofnihato misuhmom. Be nyngam tfit fukatoh wuthamorm. Yukatoh wuthahato baftais fakmor.

Jisasru mrokfom Sorr Damaskus pthamo yuhat

¹⁹ Kto Sorru nuwa ye bmta marnya-hato tu yima rifhur tfit niamorr. Nd kmit afo dfik yiham Jisasrhu disai-permpno tohmor. ²⁰ Nd ror tohmo yihamn Judam rifiymoa rmonm yihato Jisasrhu yufat rikfo nuhasak memourm, “Jisasr tu Bro Nkifrarhu yon mifer.” ²¹ Sorru pthayuk mrokfom yimam wanyhato kfo memom, “Barenko, nd yimar tamoh yakt asha niaror? Jerusalem tohyuk Jisasr hikwa yimam to nd yimarn kak bebhnewurm. Tfit bi asha niahato asha tohyukm kangr ayakni hanyam kalabus.”

²² Damaskus tohyuk Judam inji kfo hanymoumr ror nhai wanyhato kfo marimor, “Dajohnmn, bi inji kfiwuma, be tmifa pthaneft.” Nhai. Bro Nkifrar bro nanyjar rifhur hemotrr kfo nuhas bonuhas memorm, “Jisasr tor tu yimar Bro Nkifrar kfo tkrurmor bbinysof thofroh minrfa htiyakyuk yimar.” Judam inji kfo nuhasmotrm be nhai wom ptharmom.

Sorr yakrmenimo yuhat

²³ Tohhany toh hanyhato wom yiha tu Judam rhu rifinyhato Sorru was mrokfot nafak dbkafmomt. ²⁴ Sorru ror bi wanymor rorhu was mrokfot. Judam yifung marm taun yifhatiktn toh hajoh haso memoum, “Kmi yifhatiktn toh tatakhato wasrah-nomr.” ²⁵ To nhai, Jisasr hikwa yimamn yaknimomr yura kmi gnat mhatohhato kpetr yafho tuhafmotmr misuhnihato fakrmenimor.

²⁶ Sorru yakrmenimohat Jerusalemko yimor. Yihato memor, “Jisasrhu disaipermpno atohaka,” to nhai, rom hti fakrmemomr. Sorru Jisasr rihiakmohat wanyhato memom, “Ka kfo nhehwornom.” Ndnetmn afo fakrmemomr. ²⁷ Barnabasrn yihato Sorru yaknihato aposermpno hanymorr. Hanyhato aposerm kfo nuhas memorm, “Sorr Damaskus yihotoha yuhatn bi Bror htihato mrokfom hemotrr ror asha Jerusalemt namoa nefm bi fafho thumorm. Ror nd fasoh nefm yafho thunihato Damaskus tohmohat nhai yakrmermor pthaneft. Jisasrhu mrokfot kfo nuhas tanymorm.” ²⁸ Kfo nuhasmotrm be rpat Jerusalemt tohhato rpat ufaufaumoum Jisasrhu mrokfom ptha htfasmoahat. Ror nhai yakrmermor mrokfo pthaneft. ²⁹ Grik yarmumat pthet Judampno nakfo hamuh nakfo hamuhmotm memoum, “Awasnomr.” ³⁰ Rorpno wiaya yau htfasmoa yimam wanyhato Sisariat mihtafmotmr Tarsusko yimor. ³¹ Be nd yiharn Judia, Galili, Samariaroh siosm rhu marnymom. Turoh tamoh tamoh dukefm minoh hmbre bugamoatmm Brorhu Yafothat tfit fak hta bohtamoutm rroh toh nmbuham. Yak hta bohtamoatrm bok yimam Jisasrhu mrokfot hikaknimomt.

Pitar Ainiask yak marnyamo yuhat

³² Pitar Samariat tohmohat kmi kmim nhombra bugamorm. Wom yiha Lidat yimorn ndha tohyuk Jisasr hikwa yimampno memor, “Ai atoha.” ³³ Nd kmit yihato wom noh minysafet yimar mihtimorr. Rorhu yufat Ainiask. Nd yimar bingot noh minysafeft yakmotr 8-pela gunyjimm be inji kunyrapat rhumour. ³⁴ Pitar mtohni-hato yufat nakumorr, “Ainiask wasinya. Jisas Kraiser hrek kak kasinyewurn. Wasinyakahnn hwe wuskam wayaknm.” Inji mkfomotrr to be yudbat wayur sinya twanhomor. ³⁵ Taun Lidati Saronfhu tuhan yindars inji htihato rom hatohmo fasoh fasoh nefm kfo dbruf bugahato Brorhu mrokfom hikmom.

Pitar Tabitat kasinyamo yuhat

³⁶ Taun Jopatn wom mett tohmout. Jisasrhu mrokfom hikhato dborioh nefm namout. Yimam tamoh tamohm kaknafmoum rothumn yakhato hemoutm. Nd metthu yufat Tabitat. Grik mrokfotn futamoumt Dorkas. ³⁷ Wom yihar bro dbohneft yakmott nohmott yak marnyamomtn wondht wondhakhato wom yura rhuyuk buha tikrn mhtamomt. ³⁸ Jopati Lidat nhai wuri wuri rhurmoaf, be brbo. Jisasr hiket yimam Pitarhu Lidathu yi nmbuhat wanyhato wom hus yimaf kfo tkrurafmomf. Memomf, “Waikahfnn Pitar wamihtiyakfnr. Mirahr tfit wom awi kanga hatoha. Bmbri anietwar.” ³⁹ Nd hus yimaf yi mkfomofr nhai wom kuknarmor. Rpat mnahtiyakhato yimom. Pitar Lidat mfnahmotr nd yima gus rhumo kunyshu wom buha tikr hamuhmomr. Rom nd met dhir bodhirm rpat Pitarpno mtohhato nd nohmo mett yima nfrit tohhato nahumo

wuskam nur hanyhato kak nuhasmoumr. ⁴⁰ Nd rifinymo met yindars Pitar yak tuhaf bugamormn turpar nd mettpno rim bangu yuknahato Bro Nkifrar wunakuhato nd yima gushu yufat nakumor, "Tabita wasinya." Tabitathu nyingam mfrdborhahato mfukatoh fnahmotm. Pitar rihtihato wasinyamot. Wasinyahato rhumot. ⁴¹ Pitar yauyaknihato tirt fakmort. Yakhato teh kasinyamort. Tohmott Pitar rim tohnihato Bro Nkifrar yakitohet met yindarmi tuhan dhirm nakuyakmorm. Nakuyakhato mtoh-motm kfo memorm, "Tabitat asot bi tfit mfanyjwit." ⁴² Nhaf Pitar nd mett kasinyamo yuhat nhai brbo tohrmot mrokfot. Jopa thofm bokm inji wany-hato Bro Jisasr rifak hikakkmom. ⁴³ Pitar Jopat bok yiham Saimonrpno tohmor. Nd yima Saimonr bulmakau tha hingrneft tohmour.

10

Mounmotr niahato Korniliusr mnakumo yuhat

¹ Wom yimar taun Sisariat tohmor, rorhu yufat Korniliusr. Italit tohyuk 600 soldiam rorn Rom-korhof 100 soldiam tohukatohmorm. ² Rori rorhu kunys rpat tohmoa yimam Bro Nkifrar yakrmehato rorhu tamoh tamoh mrokfom o tamoh tamoh nefm fak hik marnyamoumm. Kfo bruttnaneft nhai yafho thurmort. Yima bebpam tamoh tamoh kak naftumoum, rorhum yakhato hemourm. ³ Wom yiha 3 kilok krif marrn Korniliusr be rhu hasohato mounmotr be tafontn twe kanjo htiyak hanymorr. Nd mounmotr niaknehato yufat nakumorr, "Korniliuse." ⁴ Korniliusr be yakrmehato be yeny-jworfnano kfo fakio memor, "Broye, tamohet?"

Tfit mounmotr kfo memor, "Ninhu kfo bruttnanefti dborior nefm Bro Nkifrarn htihato dukewurm. ⁵ Href-nano wakfokahtnm wom yimam Jopako anjukahmn amkfaktwamr wom yimar, rorhu yufat Saimon Pitar. ⁶ Nd yimar tohwor nd foh bulmakau thaye wonk wonk wuskam hingrniwa yimarhu kunysn, rorhu yufat Saimonr, bro maromb thmbko watohwor." Be nd mounmotr inji kfo tanyhato yimor.

⁷ Korniliusr mounmotr htiyahato nakuyakmorf turhu hingrna yimafi wom soldiar. Nd soldiar tu Korniliusrhu brbo tohyuk hingrna yimar. Rorn Bro Nkifrarhu mrokfeft kakitohmour. ⁸ Nd yimam niamotm ror htiyuk nefm kfo nuhas buganihato ee kfo tkrurafmotrm Jopako yimom.

Pitar tweht kanjo htimo yuhat

⁹ Nd Saimon Pitar miyakmo yimam buha mihwemom. Tfit nd wom yiha tfit sinyani yimom. Rom brbo Jopatpno bi toh hanyetmn Pitar ror sinyanimor turhu kunyshu wom ken tikr muhhato memor, "Kfo bruttnaruha." Marr bi dany yuhat toh hanyetrn. ¹⁰ Pitar yatinohhato memor, "Nuwa y eruha." Yuhre yeshrim hta mska hanyetmn ka Pitar hwe tweh hanita kanjo rmonthar htiyak hanymorr fawihna hanymor. ¹¹ Yura mountko rim hir mhirhato nd rmontharhu manoh manoh psifm memor, "Nndo yimamn ka psifm mano mano yikitohhato yafuhaf hanitatmr kawihnewur." ¹² Nd rmonthar wonk wonk yeshrim hawihnamor. Rhumom bukorm, nungam, yo nd wonk wonk yemrom. ¹³ Pitar nd rmonthar hawihnamo yeshrim hti hanyetrn naku tngt niamot, "Pita, wasinyakahnn nda yemrom wawasak waya." ¹⁴ Tfit Pitar kfo wok memor, "Broye, ka nhai mif inji narhota! Bingot nom tohhnamohat nhai ye hnarmoyanm. Mur yemroyem." ¹⁵ Tfit kfo memor, "Tamohtet yemrom arihat Bro Nkifrar kangrn wayanm mirahn akfo kurann." ¹⁶ Tfit wompam be nd rpahtet tngt kfomorr. Wurohpam kfonihato tfit nd rmonthar mount rim fnahnimot.

¹⁷ Be Pitar nd neft htiyahato duka nhta bonhtamour, "Tamoh neft na htitawoya?" Inji duka hasetrn nd Korniliusr kfo tkrurafmo yimam Pitar tohmoa kunys kfo ttiwonhnamoum. Kfo ttiwonhna be nd tu Pitar tohyuk kuny yifhatikt mtohmom.

¹⁸ Mtohhato naku ttiwon memor, "Barenko, Saimon Pitar tor? Asha tohwor?" ¹⁹ Pitar turhu tweht duka hasetrn Bro Nkifrarhu Yafothar kfo memor, "Saimon, husfirpa yimam naku hambruhnewumn. ²⁰ Wasinya wahiknm. Nanhu tngtpno nd yimam hambruhnewumn. Mirahn aduka kinyaki bokinyaki hanya. Be wai furatwa."

²¹ Be Pitar mibrnyimorn memorm, “Barenko, na asoya. Tamoh yakt nieko?” ²² Tfit kfo memomr, “Nom 100 amiroh tohak yima Korniliusr kfo tkrurafmotrnom niamonom. Nd yima Korniliusr Bro Nkifrar yakrmihato ror nhai wom fasoh nefm nakahr. Judam hifa hti yindhorwomt rorhu toh nmbuhat. Bro Nkifrarhu mounmotr rorpno yimorn kfo memorm, ‘Pitar mrokfeter. Afo nd mrokfom ninpno nia rhuhato ptharfotrm wanyherfonr.’ Mounmotr inji kfomotrr to be tfit nomn kfo tkrur memor, ‘Pitar wamhtiyakkomr.’ Ndnatn nom niamonom ninhu htifyaktn.” ²³ Pitar nd rorhu htifyakyuk yimam kunyko hafknihato nd yifungr rorpno hwe nfhamomn dbha tfit tum toh tanymoko yimom. Pitar rpatn yimom. Jopat tohyuk Jisasr hiket yimam Pitar hik tamnou hanymomr.

Pitar Korniliusrhu kunys yimo yuhat

²⁴ Be nd yimam yau hanymomn buha mihwemom. Nd wom marrn taun Sisariat mfnahmom. Ror Korniliusr bi turhu yimatm yo turhu froh frohm bi yak nhafohmormn be rhu gari hasomom. ²⁵ Pitar kmit mfnahhato memor, yau fkneni hanyruha, ka Korniliusr rorhu wurampno mtabokmehato mfhat wasifamort. ²⁶ Pitar inji htihato wateh kasinyakmorrn kfo memorm, “Wasinya. Na yima furapaya.” ²⁷ Pitar Korniliusrpno ptha hanymorn kuny yuhat yau fknenimorn rim htimorm boknambok met yindars rhu rifiny hasomom.

²⁸ Inji rim htihato kfo memorm, “Niko tuko tawisafwoko, nom Juda-nomi niko yima tangiko nhai rpat tohhato tamoh tamoh nefm nakfot o rhu nafif inji nakfot, tu be nhai mif. Nd bro mrokfot inji rhuhnamotn tfit ar yuwonano Bro Nkifrar kfo nuhas memora, ‘Mirahn wom yimar akfo beb amiyanr, “Tamohmpno yima tangimpno rhu duha yitako?”’ ²⁹ Tfit niko kfafmohat nanhu nianeft nhai tfi wom kfo kurrmoya, be nia twanhomoya. Ndtn kanga attiwonanko, ‘Tamohmn kfafmokma?’”

³⁰ Pitar inji ttiwonmotrm Korniliusr kfo nuhas memorm, “Bi husfirpa marm rhuronomm, husfishusyk marrpno johrafot 3 kilok marr toh hanyetrn na Bro Nkifrarpano kfo ptha bruttna hasetann nanhu nyngatikko wom mounmotr mtohmor. Rorhu nukeft memom nndo marrn tewur. ³¹ Mtoh-hato kfo ptha hany memor, ‘Korniliuse, ni nd kfo bruttnewohat Bro Nkifrar bi wany hasiwurn yo met beppa yindari bebpam wuska yahukwohat ndm Bro Nkifrar htitworm. ³² Ndnettн wom yimam wakfo tkrurafkahtn Jopako aikahmn Saimon Pitar amyakm. Nd yimar wom yufa wasariyem Saimonrhu kunys tohwor. Nd yufa wasariyem Saimonr bulmakau tha hingrneft tohwarn bro maromb thmbko tohwor.’ ³³ Bro Nkifrar inji kfomotra to be yimam kfo tkrurafmota mikfakmomn. To be hifa ni bi aso nie. To be nom bi aso buganom nia rifiny bugenom. Hrek Bro Nkifrar kukatohwornom ni yakmo mrokfom kfo ptha nuhaswohat.” Korniliusr inji kfo pthamor.

Pitar Korniliusrhu kunysn pthamo yuhat

³⁴ Pitar inji wanyhato kfo memor, “Dajohmn! Na to bi hti yimbutwa Bro Nkifrar nhai yimam yakitohwa yufam o rom yakitohyuk tamoh tamohm htihato yakitohkahrm. Nhai.

³⁵ Fitoh fitoh kmim ror yakrmihato dborioh dborioh nefrpam niwam, tom nd yimamn Bro Nkifrar hti dukahato kak-miyekworm. ³⁶ Niko tawisafwokomt Bro Nkifrarhu gbhu yuhathu mrokfot nom Isrernompro niamot. Yima bugaroh Bro Nungothet Jisas Kraisr nd gbhu yuhathu mrokfotn mkfo nuhasmornom. ³⁷⁻³⁸ Niko tawisaf-woko Nasaret thof Jisasrhu wiayau nmbuhat. Jonr Jisasr baftaisim-nimotrr tfit Bro Nkifrarhu bbukayet Yafothar yaknihato fau habrimor distrik Galilit. Distrik Galilit yau habri bugamortn tfit kantri Judiathu kmi kmim inji buga. Yi htfasetrn Satanr yakitohmoa yima bugam fak marnya htfasmorm. ³⁹ Ror kantri Iserti Jerusalemt namo nefm yo ror yura bgre mis mnohmo yuhat hti hikhato mrokfot kfo pthayuk yimayenom. ⁴⁰ Tfit husfirpehyuk yiharn Bro Nkifrar kasinyamohat mfenywomotr htimonomr. ⁴¹ Ror sinyamohat nhai yuht Juda thof bugam htirmomr. Nom Bro Nkifrar kfo htayuk yimarpanom htimonomr. Nomrpanom ror sinyamohat nuwa fenyhomonomr. ⁴² Rorn kfo htany memornom, ‘Bbinysof thofm wakfohi hany wamitwakomm, “Nd yimarpas Bro Nkifrar yak htamotrr

noheh yimam yo ar yuhre tohwa yimaroh kotkfot yakitohrahram.”⁴³ Profetm mrokfom kfo pthamoahat kfo memom, ‘Rorhu dukefrpno rhuruhatko be rorhu yufat yutahato nikmoh fasoh nefm yak thuhirahrko.’ ”

Yima tangim Bro Nkifrarhu Yafothat yakmo yuhat

⁴⁴ Pitar yuhre ptha hanymor, Brorhu Yafothar yawihnamorn thu nawohak-nimorm. ⁴⁵⁻⁴⁶ Thu nawohaknimotrm wonk wonk yarmumam pthaknihato Bro Nkifrarhu yufat yura yura kfo nafhurmomt. Juda thofm Pitar hikhna-mom nd neft htimohat yima yuhum kkopentamomm. Kfo memom, “Dajohmn, yima tangim Bro Nkifrarhu Yafothar bi kekwomr.” ⁴⁷ Pitar ptha sinyahato kfo memor, “Rom bi nom yak hakumoa Yafothar bi kak twanhi-wumr. To nhai tfit wom frohr kfo raforuhatrbaftais yakneft.” ⁴⁸ Pitar kfo memorm, “Niko Jisas Kraisrhu yufatpno baftaiskfot.” Inji ptha buga-nimotr tfit kfo memomr, “Afo asha nom-pno wom yiham watohnhotwannom.”

11

Pitar Jerusalemt yihato kfo nuhas bonuhasmorm ror Antiokt yimo yuhat

¹ Judaroh aposermi Jisasr hiket yimam wanykmom kfo memom, “Yima tangim bi arihat gutnius mrokfeft wanyhato hikwomt.” ² Bi nd mrokfot wany htatetmn tfit Pitar Jerusalemt yimohat nkifra tha puk thuneft yakitohet yimam Jisasr hikwam Pitar htihato namburmomr. ³ Kfo memomr, “Nine tamoh dukeftpno nome yima tangiroh kunym yihato nuwa yenyhomonm?”

⁴ Pitar inji wanyhato ror namo nefm kfo nuhas bonuhasmorm. ⁵ Kfo memorm, “Na Jopat tohmoya. Ndha tohhato wom yiha kfo bruttna hasohato wom shrt hwe tweh hanita kanjo yura moun yuhat htiyak hanymoyant. Memom ka bro rmontharn yimam manoh manoh psifm yikitohhato kafuhefiwumr. ⁶ Inji htiyak hanyhato memoya, ‘Afo hti hik marnyaruha.’ Yukatohak hany asha wonk wonk tif graf foh nungat yo nd wonk wonk bukor yemrot inji hti hanymoya. ⁷ Inji hti hanyetann barkof tngt wanymoya. ‘Pita, nd yemrom watufnahkahnm waya.’ ⁸ Na inji wanyhato kfo memoya, ‘Broye, ka nhai mif inji narhota! Bingot nom tohhnamohat nhai ye hnarmoyanm. Mur yemroyem.’ ⁹ Inji kfomoya tfit wom tngt kfo memor, ‘Tamohtet yemrom arihat Bro Nkifrar famurn wayanm mirahn akfo amiya hnaruym.’ ¹⁰ Tfit wompam be nd rpahtet tngt kfomora. Wurohpam kfo-nihato tfit nd rmonthat rim fnahnimot.

¹¹ Inji htini hanyhato asha nanhu htiyakyuk husfirpa yimam mfnahmom na tohmo kunysn. Sisariako toh tany niamom nanhu htiyakt. ¹² Bro Nkifra-rhu Yafothatn kfo memota, ‘Mirahn aduka kinyaki hanya hik hanyneft. Wahik hanyswanm.’ Inji kfomotta ndar Jisasr hiket 6-pela yimampno rpat yimonomn Korniliusrhu kunys mfnahmonom. ¹³ Mfnahmotnom kfo memornom, ‘Bro Nkifrarhu mounmotr kfo memora, ‘Wom yimam wakfo tkrurafkahtn Jopako aikahmn Saimonr amihiyaktwam. Rorhu wom yufat Pitar. ¹⁴ Nd yima Pitar nieruharn niko riphari ninhu hingrna yimam, wom mrokfom kfo hirahrko. Ror kfoyuk mrokfom wanyhato hikruhakomn Bro Nkifrar yakmiyakrahrko. Nhai finji naruhatrko niko fasoh nefm niwohat.’ ’ ¹⁵ Nd yimarhu mrokfom inji kfo ptha buganimotrm ee memoya, ‘Nanhu mrokfom kfo ptharuhannm,’ yuhre ripthak hanymoya Bro Nkifrarhu Yafothat mithu nawohmotm. Nom Bro Nkifrarhu Yafothat barkof mithu nawahmo kanjo rom inji mithu nawohmotm. ¹⁶ Na inji htihato tfit dukamoya Bro Jisasr kfomo mrokfot. Kfo memor, ‘Jonr tek bupa furaye baftaisimmorm met yindarim. Tfif nikomn Bro Nkifrarhu Yafothaye baftaisimrahrko.’ ¹⁷ Bingot nom Bro Jisas Kraisrhu mrokfom wany yakiohato Bro Nkifrarhu Yafothat yakmot, kangr, nd rpahtet Yafothat ahianm, na nhai tfit buha mtohhato Bro Nkifrar kfo rafokfot.”

¹⁸ Pitar bi inji kfiwure, be nd nambur hasomo yimam nhai tfit wom nam-burrrmom. Tfif Bro Nkifrar kfo yindhorr-hato kfo memom, “Be, arihat bi htitwonm Bro Nkifrar wom wom kmim bi kukatohworm. Yima yuhu yak kekuthato toh nkifrayuk yihotat bi kak nukak kahukrm. Arihat bi yihotetem.”

Antiok thofm Bro Nkifrarhu mrokfot yakmo yuhat

¹⁹ Stifehr wasmo yiharn Jisasr hiket yimam fakrme tubatumimom. Wom Fonesia distrikko fakrmenimom. Womm ailan Saiprusko. Womm Antiokko. Nd nd kmimm yakrmenihato Jisasrhru mrokfot ndko kfo ptha htifasmomt. To nhaf nhai be yima fura bofurampno ptharmoamt. Nhai. Tu Judarpampno pthamoumt nd Jisasrhru mrokfot. ²⁰ Rom tom rroh womm Saiprusi Sairinikor thofm. Romn nd Bro Jisasrhru mrokfot Antiokt hanyhato Antiokt tohyuk Grikm romn kfo ptha nuhasmomm. ²¹ Bro Nkifrarhu bbukeft-pno pthamotm bok met yindarim wanyhato rroh fasoh fasoh yima yuhum yafho thuhato Jisasr rihiakmom.

²² Jerusalemr tohyuk Jisasrhru yon kunys inji wanyakhato Barnabasr kfo tkrurafmotm Antiokko yimor. ²³ Yihato mhti yindhormorm rroh rhu nmbuhat Bro Nkifrar yak marnyamotrt. Mhtihato Jisasrhru yiha yiha yakitoh kihhato yafuhaho duha nmbuham, ndm rorn kfo habokknamorm. ²⁴ Barnabasr nd kmi Antiokt tohmohat tu hifa dborior yimar tohmor. Bro Nkifrar kakitoh kihmourr. Yo Bro Nkifrarhu Yafothat rhumoattr mrokfom kfo pthamoahat yimam wany yindhorni wany yindhorni Jisasr hikmoum. Nd Jisasr hiket yimam tfit nfri nfri yimampno thu hmbrimohat be tu bro rifuhetr rhumor.

²⁵ Barnabasr bok yimam htihato tfit Sorrhu hambrot yimor Tasisko. ²⁶ Yihato mhtiyakmorr. Mhtiyakhato rpatt Antiokko tfit yihato Antiokt tohyuk Jisasr hikwa yimampno rpa gunyjimr tohnhohato Jisasrhru hik yuham, ndm kfo nuhas bonuhasmoufm. Tot nd yiharn nd Jisasr hikmo yimam rifutakmomm Kristenm.

²⁷ Nd yiharn Jerusalemr tohyuk wom profetm Antiokko yimom. ²⁸ Rroh womr, Agabusr, Bro Nkifrarhu Yafothat mthu nawohmott kfo memor, “Nda Rom thofm tohukatohwa bbinysof bugat bro yatinoh wormr tohrahr.” Nd ror kfomo mrokfot fipet mrokfot kfomor. Kto Sisa Klaudiasr king tohmo yiharn nd yatinoh wormr tohmor. ²⁹ Nd yatinoh wormrhu mrokfot wanyhato Antiokt tohmo Kristenm Judat tohyuk Kristenm dukamom wom maruharoh yak nhafohhato htaf hanyeft. Yima yima turoh marut hti nhombrahato hta nhafohhemomm. Womm bok maruhetm bro maruham hta hanyhemomm. Womm nd dfik maruhetm dfikm hta hanyhemomm. ³⁰ Hta nhombra buganihato Barnabas Sorrof hemotm rofn hanyhato Jerusalemt tohyuk sioshu bro yimaroh tirmn mhtamofm.

12

Jemrhu was mrokfoti Pitar rumgat htamo yuhat

¹ Nd yiharn sioshu wom yimam king Herotr kfomotriwas beb bobebakmomm. Nhai hifa nyingar htarmomm, be yimamn hirmom. ² Jonrhu najem Jemrhi yikhato bainate rithumotmr nohmor. ³ Herotr inji namohat Judaroh yima yuhum yindhormomm. Herotr inji mhtinihatof tfit kfomotri Pitar fakmomr. Yispa hta duha bretparoh ye yiharn fakmomr. ⁴ Yakhato afo rumgatn kafkne htatamomr. Sikistin polism yakhato fak nhtamorm husfishus husfishus. Wom husfishus polism husfirpa auakfot yi tohukatohmoumr. Tfit wom husfirpa auakfot wom husfishus polism. Be inji husfishus husfishus yi hanyhato tohukatoh-moumr. Herotrdukeft duka memor, “Isreroh bro yemro burwa yihar kutewumr Pasofa, nd yihar bi forhnimre, ee yakrhoyanr Judam rifinyruhamn rroh nyingahato kfo ptharuhanm ror nahayuk nefm.” ⁵ Nd dukeftpno be rumgat kafknehato polism tohukatoh-moumr. Pitar rumgat tohmo yiharn sioshu yimam, rom be rorhu dukefrpno rhuhato masat kfo bruttna hasomoumr.

Bro Nkifrarhu mounmotr yihato Pitar yaknimo yuhat

⁶ Herotr bi kfo yibon hanymor Pitarhu kot tohneft. Nd wuroh yifungr Pitar hwemor hus sene tmbrekhatu hus polisf mano mano hwe tkaf rafomofr. Womf kalabus kunyshu yifhatikt toh hajohmof. ⁷ Yudbat Bro Nkifrarhu mounmotr yawihnehato Pitar hwemo rumgat nukamot. Nd mounmotr Pitarpno rim tohhato bringako yakhato teh thomorr. “Bmbri wasinya.” Nd Pitar hatohmo senf tuf yoh nyusaknihato misuhmof. ⁸ Mounmotr kfo memor, “Foh that wanyuh dbkafkahnn hona wuram wahmbre.” Pitar foh that

nyuh dbkaf-hato hona wuram hmbremor. Tfit kfo memor, "Yuke hmbreshar wahmbre-kahnn wamhikaknetwona." ⁹ Pitar rumgat htanyhato mounmotr mhikak-nimor. Pitar inji namohat memour, "Ka be hwe twehato inji na hanita." ¹⁰ Rum gathu yifhatikt toh hajohmoa polisf yau hehurnimoffn tfit wuroh kalabus gna habrimo gnathu ain yifhatikt mfnahmof. Be tut yoh tfanyni furamott fnahnihato taunko yimof. Yihato tfit wom yihtot riwitahato be nd mounmotr frtkunimor.

¹¹ Pitarhu yima rifhur tfit niamotrr kfo memor, "Asomif bi nd tu hifa yima rifhur niewotra bi dukiwa. Na bi Herotrhu tirmn rhuhato nanhu noh yuhat bi Judam bi kfo hta bohtatayettin hifa Brorhu mounmotr fak hakrminera." ¹² Pitar yimorn memor, "Jon Makrhu mmem Mariathu kunys yiruha." Nd Mariathu kunys bok yimam rhu rifynhato Pitarn kfo bruttna hasomoum. ¹³ Pitar yihato kuny yifhatikt mfrnyungumor. Mfrnyungumotr wom hingrna mett, rothu yufat Rodat, rot yimotn memot, "Yifhatikt yak tfany-ruhant." ¹⁴ To nhai, Pitarhu tngt mwany yindhor tanyhato bmbri rim kfo memotm, "Barenko, na Pitarhu tngt wanuya. Bi tor, bi nier." ¹⁵ Inji rim kfomott kfo memomt, "Bare, ni ka mumiwun?" Memotm, "Nhai mif, Pita mifrho tngt wanuya." Kfo memomt, "Ka rorhu mounmotr wanu."

¹⁶ Rom inji rinnakfo hamuh nnakfo hamuhmoahat Pitar ror yifhatikt tohhato frnyungumour. Rim tohni memom, "Ayak tfanynomt," asha be rim hti fohtasmomr Pitar kuny yifhatikt toh hasetrn. ¹⁷ Nahti nahtihato tire frgadimorm. Frgadihato kfo ptha nuhasmorm ror rumgat tohhato Bror yak hakrminamohat. Kfo memorm, "Nd na nikompno kfo nuhas tanywa mrokfom wakfo nuhastwakomm Jemsri womm Jisasr hikwam." Inji kfo tanymorn wom tkitt yimor.

¹⁸ Pitar bi yiyyetrn dbharn polism, ror hatoh hajoh nfhamom, sfnoh tkitt hti hasomom. Be tuha mrokfo duhatm tohmom. Tum nattiwon nattiwonmoum, "Pitare fitoh yuhat yifir?" ¹⁹ Pitarhu hti hambro nmbuhat Herotr wanyhato wom yimam kfo tkrurmotr yi hambromomr. Hambro hanysi nhai yakrmomr. Ndnatn nd Pitar toh hajoh nfhamo polism Herotr kot fakmorm. Kot yakhato Herotr kfo ttiwonmorm Pitarhu hti hambro nmbuhat, nd polism nhai ptha marnyarmom. Ndnatn Herotr wom polism kfomotr romn ndwom polism hanyhato tufnahmomm. Kto Herotr Judakort htanyhato tfit taun Sisariako yi mitohmor.

Herotrhu noh mrokfot

²⁰ Herotr nhai yak marnyarmoarm Tair thofmi Saidon thofm. Nd hus kmif yeshrim yakmoahat nd king Herotr yakitohmoa kantritn yihato yeshri wiknamoum. Herotrhu hwe rumr tohukatohmoa yima Blastusrpno yihato mkfo yongm boyongmaknimotmr kfo fakiomorm Herotrpnno yihato pthaneft. Herotrpnno yihato kfo memomr, "Nom wayuhuafnnom. Nom be mfro anamburwahnnom."

²¹ Inji mkfomotm Herotr yiha hemorm. Memorm, "Nd yiha wanie-twako." Nd kfomo yiharn Herotr kingroh wondht wondhnihato kingm rhuyuk gajir mrhuhato mrokfom hemorm. ²² Nd yimam Herotrhu tngt wanyhato kfo naku memoum, "Nd pthiwar mirahko ka yima mifrho tnget. Nhai. Wom nkifra tahirhu tnget." ²³ Herotr inji wanymohat nhai Bro Nkifrarhu yufat kfo yuta yindhorrmort. Ndnatn Bro Nkifrarhu mounmotr yak tutfamotrr nhmn ye nohmotmr nohmor.

²⁴ Bro Nkifrarhu mrokfot nhai mnohrmot. Kmi kmi yimot bok met yindars wanyhato fakmomi.

²⁵ Barnabas Sorrof Jerusalemthu hingrnefm hingrna buga tanyhato Jon Makr yakni-hato rpat Antiocko yimom.

**Porr bok kantrim yi htifashato Jisasrhu mrokfom kfo pthahe
htfasmo yuhat**

Antiok tohyuk Kristenm Barnabas Sorrofn fak htamom Bro Nkifrarhu hingrneftu hingrna htfasneft

¹ Antiok tohmo sios, rroh womm profet hingrneft kakitohmoum. Wommn Bro Nkifrarhu mrokfot kmi thofm kfo hta bohta nuhasmoumm. Nd hus bro hingrneft yakitohmoa yimaro yufam Barnabas, Simeonr wom yufat futamoumr Niger* yo Sairini korhof yima Lusiusr yo Manainr, gafana Herotrpno myewarho fnahmo yimar ee womr Sor. ² Wom yiha nuwa kurhato be Bro Nkifrarpu kfo bruttna yifahtamom. Inji namotm Bro Nkifrarhu Yafothat fak nuhas memotm, “Barnabas Sorrof nanhu hingrneftn wayak htatwako. Nd hingrneft hingrnayukfn fakmoyanf.” ³ Inji wanyhato nd yimam nuwa kurhato kfo bruttnamomn tir htany-momf. Inji nafmotmf yimof.

Barnabas Sorrof Saiprus yihato Bro Nkifrarhu mrokfot pthamo yuhat

⁴ Bro Nkifrarhu Yafothat kfo tkruretfn to be yimohat Selusiat yimof. Ndharn tfit sift yaknihato yimof ailan Saiprus. ⁵ Nd ailanrhu taun Salamis yau habrihato Judam rhu rifiny inji namoa rmonmn yimoafn Jisasrhu mrokfom kfo ptha nuhasmoufm. Jon Makr rpat yimom. Rorn hingrnano hany inji namourf.

⁶ Nd ailan Saiprushu kmim fau htfas bugahato Pafos mfnahmof. Yau htfas bugahato Pafos mfnahmof. Nd kmi Pafosn wom Judar mhtimofr. Rorhu yufat Bar-Jisas. Nd yimar metroh thu bbrakyuk shrmi yo kiret nyngayetroh hingrneft kakitohmou. Yimam kfo ngeh memourm, “Na profeta.” ⁷ Nd yimar nd ailan Saiprushu primiarpno tohmour. Primiarhu yufat Sergius Paulus. Nd Sergiusrhu dukefm tu dboriohm, Jisasrhu mrokfom wany yibonetrn Barnabas Sorrof nakuyak-morf. ⁸ Barnabas Sorrof yihato memouf, “Jisasrhu mrokfom akfo ptha nuhasnonr.” Nd yima Bar-Jisasr Grik yarmumat ndhtet yimam kuta-moumr Elimas. Ror buha tohhato rof mrokfom kfo wok bowokhato kfo ptha wuna bowunamourf. Nd Elimasr nhai wofnrmor Sergiusr Jisasrhu mrokfothu wanyneft. Ndnetrn kfo ptha wuna bowuna hanymourf. ⁹ Be Sor, wom yufat Por, Bro Nkifrarhu Yafothat thu bmtaknimottr nd Elimasr yukatohhato kfo memor, ¹⁰ “Ni tu be tndhrhu yone. Bro Nkifrarhu dborioh rhu nmbuham, dborioh nefm kangm yimam ahiknomm ninn tfit buha mtohhato faso faso kfo hta bohtewunm. Ninhu ndhtet neft be tu nhai yafho thuwonkahnt. ¹¹ Hrek Bro Nkifrar kfiwar nihu nyngam mmrta kih bugewum. Nhai bmbri yukatoh wutharuhatnm tamoh tamohm.” Porr inji kfo hanymor yudbat Elimasrhu nyngam hti ksptaknimomrn bi be. Nyngam kspta kih bugamomr. Be tuha yak tato botatohato yakitohakniyuk yimam fak hambro habrimour. ¹² Nd ailan Saiprushu primiar inji htihato memor, “Dajohmn, ndar yimaf tu yafothet hingrneft hingrnewuf.” Inji htimorn Jisasrhu mrokfom riwany yakiowakmorm.

Barnabas Porrof Pisidia distrikkorhof kmi Antiokt yihato Bro Nkifrarhu mrokfom kfo hemo yuhat

¹³ Porri nd rorpno yimo yimam Pafos htanyhato tfit sift yaknihato Pamfilia profinskorhof taun Pergat yimom. Jon Makr Pergat mkekutak-morn tfit Jerusalemko yimor.

¹⁴ Pergat htanymomtn tfit Pisidia distrikkorhof kmi Antiokt yimom. Sabat yiharn rom rpat yihato Judam rhu rifiny moa rmontn rpat rim rhumom. ¹⁵ Nd rmontu bro yimam Bro Nkifrarhu boririfhu mrokfomi profetroh mrokfom kfo ptha bugani-mommm wom yimar kfo tkrurafmom Por Barnabasrofhu yihom kfahato wom kfo bmta mrokfom mtohhato kfo pthaneft.

¹⁶ Nd yimar yihato rof yihom kfomotrf Porr sinyahato frgadimorm rmont rhu rifinymo tuhan yindars. Frgadinihato barkof mrokfot tumort, “Niko Isrerkoy niko yima tangiko rpat asha rhu rifinymo Bro Nkifrar kfo bruttniwako wawayaf hany marny-atwakomm na ptharuha mrokfom. ¹⁷ Isreroh Bro Nkifrar nmoh bapem krugomrom fakmorm. Memor, ‘Bi nanuhem.’ Ndnetmn turoh kmit htanyhato Ijifko yitohmohat tur kfomotr nhai kukenhato sinyarmom. Kto tur kfomotr Ijift htanymomt. Nhaf

* 13:1: Krta yimam kutewumm Niger. Wom yimam Simeonrhu tha krtat htihato memom Afrika thofer, ndnetrn Niger yufat futamoumr.

turhu bbukeftpno hanymorm. ¹⁸ Rom 40 gunyjim bugam yima toh duha tkit yuhar yau fnahmohat turhu tirmn rhu hanymom. ¹⁹ Yi hanymomm Kenan bbinysoft bi 7-pela kantri kmimn bi tohett Bro Nkifrar yak batı thu buga-hato nkiframn tfit fak htamor. Kfo memorm, ‘Asot bi nikmoh tohyuk bbinysoft. Asha watohtwako.’ Nd nefm 450 gunyjimm rhuhnamom. ²⁰ Isrerm nd Kenan bbinysoft yak bi tohwomt ee rhu nmbuharo hta bohta marnyayuk yimam, kutewumm jasm, fak htahemorm. Nd jasmpno tohhany toh hanymomm profet Samuerrpnone be.

²¹ Yo tfit memom, ‘Kingmn tawo yakrahnom.’ Inji kfomotm Kisrhu yinem Sorrn, Benjamin yon kunys, rorn nd king hingrneft Bro Nkifrar fak htamor. Ror nd king hingrneft yakhato 40 gunyjimm tohhato hingrnamm. ²² Bro Nkifrar Sorr yak tuhafhato nfri kingr yak htahemohat Defitr fak htamor. Yak htanihato Bro Nkifrar Isrerm kfo ptha nuhas memorm, ‘Jesirhu yinem Defit kanjohot yimam nanhu yima yuhur wofnwor. Ndhet yimarn nanhu yima yuhur hik marnyarahrr.’ ²³ Nom Isrernom nmoh nrfa htiyakyuk yima Jisasr Bro Nkifrar kfomotr to nd Defitrhu frikef yuhatn niamor.

²⁴ Jisasr tafi riingrnak duhatrn afo Jon Baftaisrparn Bro Nkifrarhu hingrneft yaktihato Isrerm kfomourm rroh fasoh fasoh nefroh mong trohhato baftais yakneft.

²⁵ Hingrna hanymorn tu wuroh hingrna tmbho twanhoruha Isrerm ttiwonmorm, ‘Nane finji duke-wokma? Ka nikmoh dukefm duka kangko, “Ka asor bi nmoh nrfa htiyakyuk yimar?” Kfiwanko na nhai. Nd yimar niko gari hasiwar htirahkomr nanhu mongkorn. Na hingrna tmbho-niruha ror nierahr. Na nhai ror kanjo tu dboriohann, btn na wasihato rorhu hona wuraroh dbkaf mtitofm teh nyusakafhekfot.’

²⁶ Niko nanhu nanyma kmi Isrerk, Abraham frikeft trhayuk yon kunys yo niko yima tangiko, Bro Nkifrar hikwako, Bro Nkifrar kfo memohat, ‘Minrfa htiyakruhanm,’ nd mrokfot to nmoh minrfa htiyakneft kfomor. ²⁷⁻²⁸ Jerusalemt tohmo yimam yo rroh tohak yimam profetroh mrokfom yiha yiha Sabat yihato rhuhato wanyoumm. To nhai marimom, ‘Jisasr nmoh nrfa htiyakyuk yimar nier.’ Kotkfot tohmoht htimomr nhai wom neft narmor, btn nd neftn htihato waskfot. Nhai. Yimann Pailatr kfo tkrur kfo tkrurmotmr be Pailatr rroh tng yuhatn hikhato be bgre misn tuhegir furahato nohmor. Ndnetmn nd profet-roh mrokfom gonborngtn rhuhnamom fipetm rhumom. ²⁹ Profetm kfomo mrokfom rhu hik bugamom. Nhai wom neft profetm kfoyukt rim tohtarmot. Kto yuht bgre miyetr yak kasuhak-momn thatipt yaknihato tahi muhtn rihtamomt. ³⁰ Rihtamomr to nhai rhurmor. Bro Nkifrarn tfit kasinyamorr. Tfite ufaufaumor. ³¹ Ror sinyanimohat rorpno Galiliko toh tany Jerusalemko rpattiyukmpno, rompno mnriyafmoatr htiyafmoumr. Romn htiyaf hatohhato Judam kfo nuhasni hanitmm rorhu nohhato sinyani nmbuhat.

³² No Barnabasrpno gutniuskfot kfo nuhaswononko, Bro Nkifrar nmoh nkiframpno kfo memohat, ‘Niko minrfa htiyakruha yimar nierahr.’ ³³ Arihat nd ror nkiframpno kfomo mrokfot nom yonnom htimonomt nd mrokfot rhu hik mifmot ror kfomo yuhatn. Nd yimar ror kfomor to Jisasr kfomor. Nd yimar to bi nia twanhomorn nohhato tfit sinyamor. Bi tu Bro Nkifrarhu Yoner. Nd mrokfot to be Defitrhu windohm yorhwa windoh gonborngthu sapta 2-kfot Bro Nkifrar kfomor,

‘Ni nanhu yone. Hrek na bi ninhu yifema.’

Sng 2.7

³⁴⁻³⁵ Bingot Bro Nkifrar Isrerm kfo memorm,

‘Bi king Defitrpnno kfo memoyanr,

“Ninhu yonm nanhu tirtn rhu hakurahm.”

Na kfo mifwanko niko to inji buga nanhu tirtn rhu hakurahko.’

Ais 55.3

Yo arihat nom turhu tirtn rhuwonom. Ndnett nmo hrfa htiyakyuk yima Jisasr bi fak kasinyamorr. Yo wom mrokfot Defitr sinyahato Bro Nkifrar kfo memor,

‘Ni bi tunn kfo htayet yimar nhai kfo miruhatn yoptn amibdgnir.’

Sng 16.10

Nd Bro Nkifrar kfo htayet yimar, to nd Jisaser. Tu Bro Nkifrarn fak kasinyamorr. Yak kasinyamotrr rorhu tha tipt nhai yoptn kfe bdgrmot. ³⁶ Defitr ror bbinysoft tohmoht Bro Nkifrarhu dukefrn hikmor. Ror noh-mohat turhu nkifra bbinysoft yop-motmr

rorhu tha tipt mikfe bdgnimot. ³⁷ Nd yima Jisasr Bro Nkifrar kasinya-morn nhai rorhu thatipt mikfe bdgnirmot. ³⁸ Ndnett niko nanhu yimatko wawany marnyakomm no Barnabasrpno pthiwa mrokfom. Wahtiko, nd yima Jisasr nikmoh fasoh nefroh yak thuyukr niamor. ³⁹ Nhai Mosesrhu boririfhu mrokfom yimam hikhato rroh yima yuhum Bro Nkifrar hti wuthakahrm. Nhai. Yimam Jisasrhu dukefrpno korhm, tom nd yimaroh yima yuhum Bro Nkifrar hti wuthewurm. ⁴⁰ Yimbhindangm atohetohaf hanyswamko. Bingot profetm kfomo neft yakrahtko, yo! Profetm kfo memom,

⁴¹ ‘Niko yimako na pthiwa mrokfom wanyhato

burmham hamuh snouwako
be sinya fohtashato miprho-nirahko.

Htirahko asha nikmoha wom neft naruhant wom yimam niahato

na nayuk neft kfo nuhasmko nhai wany yakioruhatkomm.’

Mirahko nd bingot tohmo yimam hanyjbornamo kanjo

inji hanyjbornanom.”

Hab 1.5

⁴² Porr nd mrokfom kfo pthanimormn memof, “Barnabasrpno fnahnihato yirahno,” kfo memomf, “Tfit nd wom Sabat yiha waniekahfnn nd hrek pthi mrokfot wompam wakfo nuhas hik bohik nuhastwafnnom.” ⁴³ Kfo ptha dukafmotmf fnahni hanymof asha yonmari Juda rifhur yo nd yima fura bofurat Judaroh nefm hiketm fau hik hanymomf. Kfo memofm, “Nikmoh rhu toh nmbuham Bro Nkifrar yak htayuk dukefrpar hikkfot.”

⁴⁴ Tfit ndwom Sabat yihar yimof. Nd Sabat yihar nd taunthu met yindars yi rhu rifinyhato Brorhu mrokfom wany yakitohmom. ⁴⁵ Judam nd rifinymo yonmari rifhur htihato kfo memom, “Tamohmpno Bro Nkifrarhu mrokfom kfo ptha nuhaswafm?” Nd nambur rifhurpno ruhetmn Porr ptha hanymoa mrokfom rom kfo ptha nheh hany ptha wuna hany inji namom. ⁴⁶ Por Barnabasrof inji htihato kfo nnhu memofm, “No nia pthaneft niko Judakompno bi nia pthanihato kto yima tangimpno yihato Bro Nkifrarhu mrokfot ptharfonont. Tmift, tukomn kfo kurmoko mrokfom yakhato toh marnya nkifraneft. Ndnett nhai nikompno yihato mrokfom kfo ptharuhatno. Tawo wom kmimpno yihato ptha nuhasrahno. ⁴⁷ Nhai be tunmoh fijo nd wom yimampno yihato Bro Nkifrarhu mrokfot ptha nuhasruhatnom. Nhai. Bror Nkifrar kfo memornom, ‘Kmi kmim, ndar bbinysoftum, yima tangim ninn yihato

Bro Nkifrar yimam nrfa htiyekwa yihotat kfo nuhasruhatnm
rom hti dukarahmt.

Ninn kshr kanjo yak nuka nuhasakrahnm

Bro Nkifrar yimam yekwa yihotat.’”

Ais 49.6

⁴⁸ Nd yima tangim nd Porr pthamo mrokfom wanyhato rroh yima yuhum yindhormomm. Yima yuhum yindhor-hato Bro Nkifrar kfo yindhormomr. Bok yimam Bro Nkifrar thu yuhur hanymorm hifa rhu nmbuham yakhato be nd dborioh rhu nmbuhamn toh nkifraneft. Nd yimamn Porr pthamo mrokfom fakitohmomm. ⁴⁹ Rom yakinohhato tfit romn nd Brorhu mrokfot myaknihato nd distrik bugat kfo nuhas fnah bugamomm. ⁵⁰ Judam inji htihato Antiokthu bro yimam yo tu Bro Nkifrar hikwa yufet metm rpat wanakfo kasinyakhato yimomn Barnabasrof faso faso yak bebobebak-hato fak tuhafmomf. ⁵¹ Wuroh yi swanhorahno wom neft fak nuhas tanymofm. Rof hmbreyuk hona wuraroh bbfut frdbofta nuhasmofm. “Be nhai tfit ndar kmit nieruhatno, bi be.” Nd dukeftpno frdbofta nuhasmofm. Be rof nd kmi Antiokt htanyhato Aikoniamko yimof. ⁵² Nd rof htanymo kmi Antiokthu yimam, Jisasrhu mrokfom yakitohetm, rom Bro Nkifrarhu Yafothar thu nawohmotrm rom be yindhor rifhurpno toh hasomom.

boknabok Judami Grikm wany yindhorphato fak hikmomm. ² Wom Judam nhai wany yindhorr-momm Porrof pthayuk mrokfom. Tfit romn yihato yima tangim tfit fasoh fasoh yima yuhum hemotmm sinyamom Jisasr hiket yimaroh yihato yak bebnfeft. ³ Por Barnabasrof bok yiham Aikoniamt tohmof. Nhai Aikoniam thofm yakrmihato marimof, “Be inji pthani hanyhato yirahno.” Nhai. Rof yiham tohhato Bro Nkifrar ndar bbinysof thofm yuhuwafmo yuhathu mrokfom kfo ptha nuhasmofm. Bror bro bbukeft hemotrf wonk wonk mirakerm namoufm. Nd nefm tuhan yindars htihato kfo memom, “Dajohnm, Brorhu yuhuwafmo yuhathu mrokfom rof pthiwam, tu mrokfom pthiwum.” ⁴ Nd taunthu yimam nafak mkumom. Womm Por Barnabasrof namo nefm htihato rofpno tohmom. Womm Judaroh yima yuhum hikhato rrohko tohmom. ⁵ Kto Judami yima tangim rpat nathu hmbrihato rpat rroh tohak yimam rpat waji yehato memom, “Por Barnabasrof hfnahrahnomf.” Memom, “Tahiye tahiye yebhoh gurahnomf.”

Barnabas Porrof Bro Nkifrarhu mrokfeft Likoniat pthamo yuhat

⁶ Rofhu hfnah mrokfot wanyhato Likonia distrikko yorhwa taunf Listrati Derbet, ndko faktremenimof. Yakrmenihato nd hus kmifpno brbo rhuyuk kmimn toh htfasmof. ⁷ Ndha yimofn gutniuskfot kfo nuhasmofm.

⁸ Nd taun Listratn wom yimar tohmour. Nd yimar nhai wiyauyaaur-moar. Wuram bi nohmomr mmemthu yatit rhuhat. ⁹ Porr Bro Nkifrarhu mrokfom kfo pthamohat nd yimar wany yakitohmour. Wany yakitoh hasohato duka memor, “Ndar na nhai wiyauya duha yitahat, Bro Nkifrar kforahr, na marnyanihato wiyauyauruha.” Nd yimar inji dukamohat Porr bi fakmorr rorhu yima yuhur. ¹⁰ To be Porr rim tohni kfo memohat, “Wasinya watohn,” be nd yimar wasinya twanhomorn tohhato hwatok yura msuh tanyhato fauyakni twanhomor.

¹¹ Kmi thofm rof hingrnamo hingrna bbukeft htihato turoh Likoniakfotn wakfo nakuyak memom, “Barenko, nkifram yima nyngatikm yak dborha-nehato niem!”

¹² Barnabasr futamomr Susr. Porrne futamomr Hermesr. Hermesr nkifraroh mrokfom wuhatone hatonemourm. Porrn mrokfom uhatone hatonemourm ndnetrn nd Hermes yufat futamomr.* ¹³ Susrhu rmont taunthu taun gnathu briyahako tohmout. Nd rmont tohmaoa Susrhu prisri tuhan yindars bulmakaumi misfam yaknihato taunthu yifhatikko hanymomm. Ndha hanyhato mhtahato memom, “Porrof tarioh mtharahnomf.”

¹⁴ Por Barnabasrof inji wanyhato wondh wuskar dborfahato nd yi rifinymo yima rifiny buharn tone nanyor fnahhato kfo naku hany memof,† ¹⁵ “Bar yimako, tamohm-pno ndhtet neft yamukako ananom? No niko kanjohot yimayeno. No be nikmoha nia tohhato kangno gutnius-kfot akfokahtnonko niko wanyhato nikmoh tamoh tamoh nefenm yikitohwam, yafho thuhato yafothet Nkifrar hikrahko. Nd Nkifrarn nda mounti bbinysoft yo marombt yo nd tkitm rhuyuk shrkar hingrna htamorr. Nd dukeftpno no asha nia tohwono. ¹⁶ Bingot nikmoh bapemrompno yimam be inji hti marsisamoatr tamoh nefm be turoh fijo nafura bofuramoum. ¹⁷ To mirahko ka nd yihar Bro Nkifrar ka rim fnahnihato nhai tamoh tamoh nefm yak nuhasrmorm. Nhai. Ror turhu kmi hefenr rhuhato kfomoatr bum wihamoum, hifa hifa yewurithu sinya yihar sinyamout, yemrot thu brur hemourko yima yuhum thu yindhormoatrko yindhori riphumpno tohmouko.” ¹⁸ Nd mrokfom hemofm. To nhai marimom, “Inji mwanyakhato nhai tarioh mtharuhatnomf.” Nhai. Rroh yima yuhum memooum, “Tarioh mtha mifnomf.”

¹⁹ Wom yiha Antiokti Aikoniamt tohyuk Judam taun Listrat niamom. Niahato kfo memomm, “Ndar yimaf niko be inji hagrhevukomf. Tatkfote nhitwokomf?” Nd yima yuhum hemotmm rom sinyahto Porr tahiye yebhoh boyebhoh guyakhato teh briraknimomr. Teh briraknihato kmi gnathu briyahako rim teh htany-momr. Rom

* ^{14:12:} Grikroh dukeft duka memooum boknabok nkifra tahi yifonn korhm. Susrn tor tu nkifraroh bro tohak nkifrar. Yo Hermesne nkifraroh mrokfo uhatone hatone yuken. Grikim inji dukamoum. † ^{14:14:} Wondh wuskar dborfaneft ndt Judaroh nkifra neft. Yimar wom neft htihato nhai yindhorkahrt, wondh wuskar dborfamoum. Womm ndt htihato duka memooum, nhai yindhorkahr.

memom, "Ka bi fnohr." ²⁰ Tfit Jisasr hiket yimam yihato rifiny hmbremotmr yafothat tfit niamotr. Yafothat mthu nawohmotr sinyahato tfit taunko yimor. Taunko yihato hwe nfha dbha Barnabasr yaknihato Derbeko yimof.

Barnabas Porrof kfo yembindt mrokfom Jisasr hiket met yindars hemo yuhat

²¹ Por Barnabasrof Derbet yihato Bro Nkifrarhu mrokfom kfo pthamotfm bok met yindarim wanyhato hifa wany yindhorphato Jisasrhu hiket yimam toh hanymom. Ndha toh tanyhato tfit Listrako yimof. Listratn bi tfit Aikoniamt. Aikoniamt bi tfit Antiokt.

²² Nd nd kmim toh fnahhato Jisasr hikmo yimam kfo bmta hany-mofm. Kfo hany memofm, "Niko nda Bro Nkifrarhu mrokfot yakinohwat mirahko tfit yafhonomt. Yakinoh bmtakfot. Kangnom kto Bro Nkifrar kingdomfot ainyom nhai be toh yindhorr hasohato nd kmit yikfot. Nhai. Nd kmit yinyeft muh wohne fnahhato krhopetet. Krhopam yakfnah ee kto nd kmit mrhukfot." ²³ Rof toh fnahmo kmim eldam fak hta hanymof. Eldam yak hta hanymohat, nuwa kurhato be kfo bruttnefrpat yakinoh-hato nd tohak yimam nd rom hikwa Brorhu tirtn hta hanymoufm.

Barnabas Porrof distrik Siriakorhof taun Antiocko dbima yimo yuhat

²⁴ Kto distrik Pisidia yuhat yimof. Nd yuhat yau fnahhato profins Pamfiliako mifnahmof. ²⁵ Pamfiliat mifnahhato taun Pergat Bro Nkifrarhu mrokfot kfo ptha nuhas tanyhato be tfit taun Ataliat yimof. ²⁶ Ataliatn sift yaknihato tfit nd tuf hingrneft yaknimo kmi Antiocko yimof. Nd tuf hingrneft yaknimohat Bro Nkifrarhu tirtn hta-momf. Memom, "Bro Nkifrarhu tirtn htakahnomf yuhuwafruharf hingrneft hingrnarahft." Por Barnabasrof hingrneft yaknihato hingrna habrihany mhingrna buga tanyhato tfit sift yaknihato Antiocko yimof. ²⁷ Antiokt mfnahhato kmithu Jisasrhu hiket yimam kfo-motfm rifiyom. Rifiyomotm kfo nuhas bonuhasmofm Bro Nkifrar rofpno hingrna habrimo hingneftu mrokfom. Kfo memofm, "Bro Nkifrar yihotam yak hta bohtamotrm yima tangim Bro Nkifrarhu mrokfot bi wanukmt. Wanyhato bi kakitohwomt." ²⁸ Nd kmi Antiokthu Kristenm bok yiham tohnho tanymofm.

15

Jisasrhu sios Jerusalemt rhu rifiynymo yuhat

¹ Judiako wom yimam toh tanyhato Antiocko yimom. Antiokt yihato ndharhof Kristenm kfo hta memomm, "Mosesrhu boririfhut hikhato tha puk thukfot. Tha puk thu duha rhurahko, Bro Nkifrar nhai yakmiyakruhatrko." ² Por Barnabasrof nd tha puk thu mrokfot wanyhato Judiakorhof yimampno nnakfo hamuh nnakfo hamuhmom. Nd krhopam rhumotm tuha Antiokthu Kristenm rhu ptha nhtahato kfo memom, "Por Barnabasrofi wom yimam, romn Jerusalemk yihato nd krhopam aposermi sioshu eldampno nnakfo ptha nuhashato yak nhtakfot."

³ Nd sios kfomo yimam be yimom. Fonesia, Sameria yuhat inji yihato nd yuhathu kmiroh Kristenm kfo nuhas hany memomm, "Yima tangim be bi Bro Nkifrar kakito-hwom." Nd mrokfom kfo nuhas hanymotmm kmim wany hanyhato yindhormom.

⁴ Be rom yi Jerusalemt mfnahmohat Jerusalemtu Kristenm, aposerm, eldam kfo yindhoramomm. Rompno rhuhato Pol Barnabasrof kfo nuhas bonuhas bugamofm rofpno Bro Nkifrar hingrnamo hingnefm. ⁵ Nd mrokfom kfo ptha hanymotf ka Farisiroh wom Kristenm wany hanyhato kfo memom, "Nd yima tangim kangm nompno afkninom, be wakfokahtkomm rroh tham pukkfot. Pukhato Mosesrhu boririfhut mrokfotn tfit hikkfot."

⁶ Nd mrokfot mfnahmott aposermi eldam rhu rifiyhato fak nhtamomt. ⁷ Nd mrokfom napthahany naptha hanyhato Pitar sinyahato kfo memom, "Bar yimako niko tuko tawisafwoko nom Bro Nkifrar hingnefm yak nta he nhombramohat, nann yima tangimpno fak htamor. Memor, 'Rorn nd kmim gutniuskfot kfo ptha nuhas-ruhatrm rom wanyhato yakrahmt.' ⁸ Bro Nkifrar yimaroh yima yuhum htitar, rroh yima yuhum htimormn turhu Yafothat hemorm nom tu kminom Yafothat hemo kanjo. Ror

Yafothat hemohat to rroh yaknefthu yindhor yima yuhurn fak nuhasmornom. ⁹ Nhai yak nhtahato marimor, ‘Tukanhu ttha kmimm ndar neft naruhanm, tfit ndur wom yima tangimn nd neft naruhanm.’ Nhai inji dukarmor. Rorhu mrokfothu wany yakiohato hik nmbuhatn htimor. Nd wom yima tangim wany yakiohato fak hikmotmt ndt htihato rroh fasoh fasoh nefm fak thumorm. ¹⁰ Mosesrhu boririfhut nmoh nkifram nhai yak hik marnyarmomt. Nom ariharhofnom nom inji buga nhai hik marnyakahnomt. Ndnett to tamohm-pno yamukako wom kmiroh Kristenm nmoh nkifra Mosesrhu boririfhu mrokfot ahikmt? Ndhtet neft Bro Nkifrar htihato namburahrnom. ¹¹ Nom tunmoh bro dukeft duka kangnom, Nungothet Jisasrhu yuhuwaf nmbuhatn nom yakrahrnom rom yakmo kanjo.”

¹² Pitar pthanimotr nd rhu rifinymo yimam tfit nhofijo rhuhato memom, “Afo Porrof pthayuk mrokfom wany-rahnom.” Tfit Porrofn nd bro bbukeft Bro Nkifrapno yakhato wom kmimpno mirakerm namom kfo nuhas bonuhas bugamofm. ¹³ Rof pthanimotf tfit Jemrsr sinyahato memorm, “Bar yimako, afo tfit nann ptharhota wawanswako. ¹⁴ Bro Nkifrar yima tangim hti yuhuwafhato yakmiyakmo yuhat bi wanukomt Saimonr pthirt. ¹⁵ Bingot profetm pthamo mrokfo yuhatn bi inji rhu hik hanitt. Profetm to kfo memom,

¹⁶ ‘Bror kfo kangr, “Defitrhu frikeft rmonr yoh nafurwa kanjo inji foh nafurmot.

Kto tfit nann yakaknihato kasinyaruhanr.

Nann habokkna marnyar-hoyanr toh bmtarahr.

¹⁷ To be yima tangim na Broya kfo ptha hambrorahm.

Nd yimam bi na tuka kfo htamom romn hambrohna hambrohna mhtirahma.”

¹⁸ Ndar mrokfot na pthiwat Brorhu mrokfoyet.

Bingot kfo htata memor, “Nd nefm inji rhu hik hanyrahm.” ’

Amos 9.11-12

¹⁹ Ndnett nanhu dukeft duka kanga, nd Bro Nkifrar bi hti yuhuwaf-hato yakmiyekwa yima tangim, nhai kfo miruhatnomm boririfhu bugam ahiktwamm. Nhai. Be nd ye kars nd nd nefenrpam kforahnomm. ²⁰ Ndnett be gontwarpat wandfakhato kfo mekfot, mirahm tfit turoh tahi rmonm o yifonmpno mhtayuk yeshrim ayak ayanomm. Bro Nkifrar fasoh hti bebworm. Mirahm ijoh yuhatn mett ayaknomt o metm be turoh wuramn ariyaknomm. Yo mirahm mti mkuye teh yifuhet fohm o tamohm ayanom. Mirahm kkuyet yemror aye fura bofurakninomr. ²¹ Nhai be nfri mrokfot pthakahnom. Bi Sabat yiha bugamn Judam rroh rhu rifinymo ptha hnamomt nd boririfhut.”

Aposermi eldam gontwat wandfakhato yima tangim hemo yuhat

²² Jemrsr mrokfom pthanimotrm you aposerm, eldam yo nd sioshu yimam rhu rifinhyato hus yimaf fakmom Por Barnabasrofhu hik hanyukf. Fakmome Judasr, rorhu wom yufat Barsabasr. Rori ee Sailasr. Nd Jerusalem sios rofn tohakmouft. Rofpno Por Barnabasrof yimom taun Antiokko. ²³ Porrof hikmo yimafthu tirmn Antiokko yiyuk gontwat fakitohak-moft. Nd gontwat htamo mrokfom inji htamomm: “Nom aposernomi nom eldanom, nom nikmoh yimatenom. Nomn ndar gontwat kahuknomko. Nom bok kfo yindhor mrokfom kahukwonomko niko, yima tangiko, Antiokt tohwa Kristenko, Siria profinsi Silisia profins toh bugewako. ²⁴ Bi wanyakmonom wom mrokfom, nmoh yimatm yimomn mrokfom hemotmko duka kinyakimoko. Nom nhai marimonomm, ‘Inji inji wakfo-twako,’ nhai. ²⁵ Nom nd mrokfot wanyakhatu rhu rifinymonom. Rhu rifinhyato naptha napthamonomn hus yimaf kfomonom Porrofpno yinyeft, Porrof nmoh yima yuhum korhf. ²⁶ Rof nhai yakrme hnarrof nmoh Bro Jisas Kraisrhu hingrneneft. Nd hingrneneft be tu nohyuk hingrneneft. To nhai rof yakrmehnarrof. ²⁷ Ndnett Judas Sailasrof rofpno niahato rofn yima tnge tfit kfo nuhasrahfko, gontwat rhuyuk mrokfom. ²⁸ Bro Nkifrarhu Yafothati nom yimamifnom nmoh yima yuhum rpat korhm. Kang-nom nhai nom tfit wom nfri mrokfot kfohato wom krhopam hiruhatnomko. Nhai. Nd nkifra boririfhurpat yakitohkfst. ²⁹ Mirahko tahi rmonm htayuk yemrom ayanomm. Mirahko kkuyet yeshrt bmbri aye fura bofurakninom. Mirahko mti mkuye teh yifuhet

yemror ayanomr yo ijoh yuhatn mett ayaknom. Nd nefm yakitoh duha be toh marnya bomar-nyakfot. Nmoh mrokfom to be injirpa.”

³⁰ Be nd Jerusalem sios kfomo yimam Jerusalemt htanyhato Antiokko yimom. Yimomn ndharhof met yindarim yak nhafohmommn nd gontwat hemomm. ³¹ Nd gontwathu mrokfom htihato yima yuhum yindhormomm. Kfo memom, “Hifa kfo hta bohtemnom.” ³² Judas Sailasrof profet hingrneft yikitohetfn Antiok thofmpno afo tohmofn kfo bmta mrokfom hemofm. ³³ Dfik yiham Antiokt tohmof. Kto tfit tuf toh tanymoko yimof. Antiokthu Kristenm rof yimohat rhu kafho marnyamomf yimof. ³⁴ (Sailasr wom yima yuhur yakhato Antiokt toh hasomor). ³⁵ Por Barnabasrof tuha Antiokt toh hatoh-hato tuha Antiokthu yimampno Brorhu gutniuskfot kfo nuhas bonuhasmofm.

Por Barnabasrof nafrndohmo yuhat

³⁶ Tohhany toh hanyhato Porr kfo memorr Barnabasr, “Na kamuka no Brorhu gutniuskfot kfo ptha habri htfasmo kmiroh met yindarim yau hafot htfasrahnonm rroh toh nmbuham.” ³⁷ Barnabasr kfo memor, “Jon Makr ayaknikahnonn rpat ainyom.”

³⁸ Porr nhai kfo yakiormor. Memor, “Nd yimar no hingrnahnamo hingrneft nhai rpat hingrnahnehato rpat mhingrna tmbhormnom, buha Pamfiliatn mhingrna kafh-morno.” ³⁹ Be inji nnakfohato nafrndohmom. Barnabasr Makr yaknihato rof nndo Saiprusko sife yimof. ⁴⁰ Porrne Sailasr fakmor. Ror yakhato rof inji yimof. Kristenm kfaf hany memomf, “Brorhu yuhuwafeft ayak hta bohta hanyswatfn.” ⁴¹ Be rof Siria, Silisia inji yihato Kristenm kfo bmta mrokfom kfo bmta hanymofm.

16

Timotir Por Sailasrof hik hanymo yuhat

¹ Porr tfit Derbet yimor. Derbet tohni tfit Listrat yimor. Listrat yi tohmohat wom Kristen yimar tohmor. Nd Kristen yimarhu yufat Timotir. Timotirhu hiyau mmemt Juda kott. Yifemrne Grik thofr. Timotirhu mmemt Jisasr hikmout. ² Listrati Aikoniamt tohyuk Kristenm Timotirhu toh nmbuhat hifa hifa kfo yindhormomt Porrpno. ³ Porrhu yima yuhur wofnmor Timotirhu yaknihato rpat kmi kmi yau htfasneft. Tfit Timotirhu sinya yuhat Porr mdukakmor. Duka memor, “Rorhu yifemr Grik thofer. Kmi kmim yitohwa Judam bi wany bugamomt rorhu sinya yuhat.” Nd dukeftpno Timotir yakmorr afo tu Judaroh nkifra hingrnejf yuhat hingrnanimorr. Tha puk-thu inji namorr. ⁴ Inji hingrnanimorrn be rpat yimom. Porr Jerusalemt yihato aposermi eldam nd kfafmo mrokfom, nd nd mrokfom kmi kmi kfo nuhas fnahmomm. Kfo memomm, “Nda nom kfiwa mrokfomn yikitoh-hato hikkfot.” ⁵ Inji kfo htfasmotmm kmi kmiroh Kristenm wany hik bohik marnyahato fakitoh bmtamomt Bro Nkifrarhu mrokfot. Yiha yiha nfri yimam nd Jisasrhu sios nathu hmbri hany nathu hmbri hanymomn be nd sios bronimot.

Porr Troasn twe Masedonia thofr htiyakmo yuhat

⁶ Rom yimohat distrik Frigia, Galesia inji inji yi htfasmom. Bro Nkifrarhu Yafothat nhai marimot, “Esia profinsko yihato ndkorhof kmim Bro Nkifrarhu mrokfom wakfo nuhast-wakomm.” ⁷ Be nd Bro Nkifrar kfo htafoyuk yuhat yimomn Misia thofr myau nanyor tmbhiwa tkitt mfnahmom. Mfnahhato memom, “Profins Bitiniako yiho witarahno,” to nhai, Jisasrhu Yafothat nhaf nhai marimot, “Ndko wayiho witawako.” ⁸ Be Misiat yau hehurnihato tfit Troasko yimomwe. ⁹ Yifungnano yimam hwe tweh hanita kanjo Porr inji kanjo yifungnano Masedonia thofr mtoh hanyhato kfo hany memor, “Pore, bro marombt wahir hayuk-nekahnn Masedoniat niahato afo wahtinnom.” ¹⁰ Porr inji htihato yudbat wuskam yak kebirsmonommn rhu yibonmonom yinyeft. Nmoh dukeft duka memonom, “Bro Nkifrar kangrnom, ‘Ndko yihato mrokfot wakfo nuhaskomm.’” Nd dukeftpno Porr fak nuhasrr.

Lidiat Jisasr hikmo yuhat

¹¹ Be Troasn sift fakmonom. Sift yaknimohat afo Samotres yimonom. Tfit ndwom marrn Neapolis yimonom. ¹² Neapolis sift htafmotnom tfit fau hamuhmonom kmit. Yihato profins Masedoniathu wom distrikt yorhwa bro yufet kmi Filipait mfnahmonom. Nd taun Filipait Rom gafmanrhu tirtn rhumout. Nd taun Filipait mfnahhato nd kmit wom yiham tohmonom. ¹³ Ndha tohhato Sabat yiharn taunt htanyhato wom tekthu thmbko yimonom. Duka memonom, “Judam rifinyhato kfo bruttniwa tkitt tek thmbko tohraht.” Nd dukeftpno ndko yimonom. Yimonomn wom tkitt wom metm rifiny hasetmn nom yi htihato rompno rhuhato mrokfom nom hanyukm kfo nuhas bonuhasmonomm. ¹⁴ Nd rhu rifinyhato nom pthayuk mrokfom wany yakitohmoa metm rroh womt Lidiat. Nd met Lidiat Taiataira efkott. Nd mett Bro Nkifrar hikmout. Rot tohmoahat kukupitha rmontham yakitohmoatn yimam rotpno nia wiknamoumm. Rothu yima yuhur Bro Nkifrar yak marnyamotrt Porr pthayuk mrokfom be fak twanhomotm. Rothu yima yuhur nd yiharn fak krekuhmoat. ¹⁵ Yima yuhur yak krekuhmoat baftais fakmot. Rot baftaismot yo rothu kunys tohyuk yimam rpatt baftais bugamom. Lidiat baftais yaknihato kfomotnom rothu kunys yinyeft. Kfo memot, “Na Bro Nungothetr hikwa yuhat niko hifa hti thoft to bt nanhu kunyko afo niarfoko.” Be inji kfo yongm hatohmottnom be rothu kunyko yimonom.

Por Sailasrof Filipait kalabusmo yuhat

¹⁶ Wom yiha kfo bruttnayuk tkitt yi hanyetnomn kmi yarh fknayet met tmaht, nd taun Filipait hut, mfuryak-motnom. Nd met tmaht sleft tohmout. Kmi yarhr tukihmoatrt tamoh tamoh nefm bi rotn kfomoutm. Tamoh tamoh nefm yimam memoum atawisafnom, rot wiknamoatm rotn tukihhato rotn kfo nuhas bonuhasmoutm. Nd mett nhai be turpat nd hingneft yakitoahr-mott. Tom rothu tohukatoh yimam. Rot yakmoa bro marut to tuthu tohukatoh yimamn kakmoumm. ¹⁷ Nd mett Porri nom yau hik hanymoatn kfo naku hany memoout, “Nd yimam tu yura miyorhekwa Bro Nkifrarhu hingrna yimayem. Bro Nkifrar yima nrfa htiyekwa yuhat nda yimamn kfo hik nuhashnewumko.” ¹⁸ Bok yiham nd mett inji na hatohmott Porr nhai yindhorrmor. Ndnatn Porr kekuthato nd mett hatohmo kmi yarhr kfo memor, “Ni nd kmi yarhe na Jisasrhu yufatpno kfiwann, nd mett asomif wathu troh tanyns.” Porr inji kfomotr nd kmi yarhr be thu trohmort.

¹⁹ Be nd metthu tohukatohm inji htihato kfo memom, “Barenko, nmoh maru yakyuk yihiotat be bi frtmbhefirt. To tamohmpno inji nahurnom?” Inji wakfo nambur sinyahato Porr Sailas-rof rpattir tir fakmomf. Yakhato be tehr tehr hanymomf maket swirl rhuyuk mejistretmpno hanymomf. ²⁰ Nd mejistretmpno hanyhato kfo memom, “Nda yimaf nndo Juda thoff nmoha niarof. Niahato rofhu bori-rifhut mhtahato kangf, ‘Ndt wahikko.’ Kmi thofm inji wanyhato yima yuhum nhai marnyakahmm. ²¹ Rofhu boririfhut, rofhu nkifra mrokfot nndohet, nom Rom thofmoh tndohet, nhai rpattiyak tkafkahf.” ²²⁻²³ Nd rifinymo yimam to be nd rpa yuharpat mnarhuni mnarhuni, be mejistretm kfomotm Porr Sailasrofhu hmbresham yakta thumomf kumbuhum yakhato kumbuhe kumbuhe yenyoh bonohakhato rumgat htamomf. Rumgat tohukatohmoa yimar kfo memor, “Nom htewa yimaf wayukatohaf hanyswanf.” ²⁴ Be nd rumgathu yimar inji wanyhato tu yiro yihom ruhakyuk rumtn hanymorfn wura dbkafyuk pran mkut yakhato wuram dbkaf hmbremorf.

²⁵ Be rof wura dbkafetf rhuhato yifung dany Bro Nkifrapno kfo bruttnahato windohm windohmof. Rof windoh inji namoahat wom kalabusm wany yakitoh hasomoumf. ²⁶ Yuhre windoh bugani hanymof asha nunes. Nd nunes tonehato nd rumgathu kuny rahum teh tut botut-mottm kuny yifhatikm foh bbomom. Nd yimam senimtamo semm ndm rpatt foh dbombhomom. ²⁷ Nd rumgat toh yukatohyuk yimar hweyetrn mfohtashato mhti fnahmorm kuny yifhatikm be bi yoh bubetm. Be tuha mrokfo duhattr rhumor. Memor, “Kalabusm ka be bi fnahnim.” Nd duka yanuheft yakhato turhu bainat yakhato memor tur awasa. ²⁸ Porr inji htihato yudbat fak thfamorr, “Bare inji anawahn. Nom aso buganom!” ²⁹ Be nd rumgathu yimar inji wanyhato memorm, “Ksht wahnahikma.” Ksht hemotmr yihom brnyihato Por Sailasrof pno yihom suhhato tuha nndo ginunes fakmotr.

³⁰ Briyahako hafnahnimorfn kfo memorf, “Barefn, nane finji narhoyann Bro Nkifrar yak miyakrhora?”

³¹ Inji kfomotr kfo memofr, “Bro Nungothet Jisasr hikrahko ninhu kunyshu tohyuk yimampno rpatn yak miyakrahrko.” ³² Nd rumgat tohyuk yimar pthanihato tfit yimofn rorhu kunys tohyuk yimampno tfit rompno Brorhu mrokfot pthamof. ³³ Nd tu yifungrpar nd rumgat tohyuk yimar Por Sillasrof harhumo fhu yuruft fuk kibofsa marnyamorf. Inji nanihato Por Sillasrof tfit sinyahato nd rumgat tohyuk yimari rorhu kunys rpat tohyuk yimam rpa kfot yudbat baftaisimmofm. ³⁴ Baftaisnihato nd rumgat tohukatohr tfit Por Sillasrof yaknimorfn kunyko hanyhato nuwa yeshri hemorf. Nd rumgat tohukatohri rorpno tohyuk yimam be tu bro yindhoreft fakmotm tum Bro Nkifrar rihikakmo yuhat mhtiyakhato.

³⁵ Hwe fnah dbha mejistretm polis kfo tkrur memomm, “Wanjukahkomn nd rumgat tohyuk yimar wakfokahtkomr nd hus yimaf rumgat tohwaf akfokahtrf rumgat ah-tanyswaft. Atfauyafoakahtrf aisswaf.” ³⁶ Be nd polism yi rumgat tohyuk yimar mfkomotmr tfit rorn Por Sillasrof kfo memorf, “Mejistretm mrokfot htefimt. Kfo famum, ‘Por Sillasrof wayafho-kahtnf aisswaf.’ Ndnett nifn href fnahnitfn. Nifnhu yima yuhum ayindhortwam mirahm tfit aduka krhonom.” ³⁷ Tfit Porr sinyahato nd polism kfo wok memorm, “No Rom thofeno. No rumgat yak htamohat nhai wom nefm namotno rumgat htarmomno. Nhai. No be yimaroh nyngahato tat noh bonohakmomno rumgat hta furatamomno. Hta furamomno tfit kangm, ‘Be nhowi wom wany juha yak hfhanaforah-nomf.’ Frohm inji kfim? Nd tu mejistretm aniekahmn ayak hfhanafotwamno.”

³⁸ Be nd Porr pthayuk mrokfot polism tfit mejistretmpno hany mpthamomm. Kfo memomm, “Nd yimaf kfo famuf, ‘No Rom thofeno.’” Nd mrokfot mejistretm wanymohat fanho bugamom. ³⁹ Be nd mejistretm yihato Por Sillasrofpno mrokfom naptha gbhuni-hato kfo memomf, “Nifn fnahnitahat mirahfn tfit asha wom atoh hasono, nnod wom kmi tfit waiswafn.” ⁴⁰ Be Por Sillasrof inji wanyhato fnahnimohat be Lidiathu kunyrapt yihato Kristenm kfo bmta mrokfom kfohi tanymofm be nd kmit htanyhato yimof.

17

Tesalonaika thofm kangm, “Por Sillasrof atat noh bonohnomf”

¹ Porri rorpno yau htfasnho-moa yimampno Masedoniat htanyhato yimohat Amfipolis mihtini-hato Apoloniapnone Tesalonaikat mifnhahmom. Ndha Tesalonaikatne Judaroh rhu rifinyuk rmont tohmout. ² Porr tur nahnamoa neftn nhaf rroh rmont tumpno rpat fknehato Bro Nkifrarhu mrokfot kfo nuhasmorm. Husfirpa rhu krna Sabat yiham rhu-nhohato Bro Nkifrarhu mrokfot kfo ptha nuhas bonuhasmorm. ³ Memorm, “Bro Nkifrar kfomo yimar, yimaroh nrfa htiyakyukr afo yahr kmiroh tirmn nohruharn ee kto tfit sinyarah. Na kfo pthiwa yimar Jisasr kfo pthiwa.” ⁴ Wom dfik Judam Porr pthamo mrokfom wany yindhohato wuthu kmbriyakmom. Tom bok Grikm ndha tohhato Bro Nkifrar hikmoam, rom nhaf Porrhu mrokfom thu yuhurmotmm rorhu dohrn mitohmom. Yo bro yufet metm rom rpat Porrofhu dohrpar mitoh bugamom.

⁵ Judam inji wahtiyahato yima yuhum nhai marnyarmomm. Yima yuhum wakiyahato maket swirl yihato nd maketm toh fura htfashato fasoh nefm namoa damiagm fakmom. Yak nhafohhato nd taunt yihom hetak mhetakmom. Yihom hetak mhetakhato Jesonrhu kunys yihato tmbrahato memom, “Porr Sillasrof ndha korhf.” ⁶ Jesonrhu kunys yirok thu yurak thutihato tawo Jesonri wom Kristenm yak hfhanhato mejistretmpno hanyhato kfo memom, “Asom nda yimam kmi kmim yorhwa rhu nmbuhat faso faso kak hta htfaswomt. To bi asom nmoha nihamom. ⁷ Jesonrhu kunysn hatohworm. Nmoh Sisarhu bro lokfot hanyjbornahato kfo kangm Jisasr tor nmoh wom kingr.” ⁸ Nd mejistretmi rifinyuk yimam inji wanyhato yima yuhum duka fanhomomm. ⁹ Be nd Jesonri rorpno yakmo yimam kfo memom, “Nhai yafho thu furaruhatnomm. Afo kotkfot wiknahato btn fnahnirahm.”

Por Sillasrof taun Beriako yihato gutnius mrokfeft pthamo yuhat

¹⁰ Bi yifungtn Por Sailasrof Kristenm kfo memomf, "Bi yifunget wanjufn." Be rof tfit taun Beriako yimof. Beriat mifnahhato ndha tohyuk Judaroh rhu rifinyuk rmontn nhaf yimof. ¹¹ Beriat tohyuk Judam awi tu dborioh yimam. Nhai Tesalonaikat tohyuk Judaroh neft kanjo htirmofm. Porr pthayuk mrokfom hifa wany yindhormomm. Tfit tumn Bro Nkifrarhu gonborngt yakhato ror pthayuk mrokfompno yak hta nhtahato kfo memom, "Awi tu dborioh mrokfom kfiwur." ¹² Tum inji hti nhtahato bok Judam fak hikmom. Porr pthayuk mrokfom. Grikm nhaf tumn wanyhato rroh yufet metm yo bok yindarim Porr pthayuk mrokfom hikmom.

¹³ Beriathu yimam Porr pthamo mrokfom hikmotm tfit Tesalonaika tohmo Judam wanyakhato rom Beriat yihato kfo memomm, "Mirahko Porr pthayuk mrokfom awany yakionomr. Kfo ptha furewur." Inji kfohato nnakfo sinyamomm memom, "Porr hfnahrahnom." ¹⁴ Be yudbat Beriathu Kristenm Porr yaknihato maromb thmbko hanymomr. Sailas Timoti-rofrpaf tuha Beriat toh hasomof. ¹⁵ Porr hanymomrn Atensn mikafho-momr. Ndha mitohakhato memom, "Tfit Beriako ainyom." Porr rompno kfafo hany memorm, "Sailas Timotirof bmbri aniekahfn amihiyaknetwofa."

Porr taun Atensn gutnius mrokfot ptha nuhasmo yuhat

¹⁶ Porr bi Sailas Timotirof kfafo hanyetrn to Atensn toh gari hasomorf. Sailasrofhu garineftpno nd kmit nhai be kukenhato htirmort nd kmi thofm kfo tatomoa nkifra tahim. Inji htihato yima yuhur nhai marnyarmorr. ¹⁷ Porr nd krho yima yuhurpno Judaroh rhu rifinyuk rmontn yihato Judami Bro Nkifrar hikmoa Grikm rompno gutnius mrokfot kfo nuhas-mourm. Yo yiha yiha maket swirl yihato maket niayuk yimam yakmoarm kfo ptha nuhasmourm. ¹⁸ Epikuria Stoikrof hikmoa tisam* Porr pthamo mrokfom wanyhato nnakfo hamuh nnakfo hamuhhato womm kfo memom, "Ndre fitoh yimar kfo pthewar. Be yuwi kangr, 'Afo wany yindhorrhama.' Fitoh nkifrar, fitoh nfri mrokfot yamukar akfo nuhasanm." Porr Jisasrhu gutniuskfoti Jisasr sinyamo yuhat kfo pthamoatr nd mrokfot tumount. ¹⁹ Be nd mrokfotpno Porr fakmomr. Yakhato Areopagas rifinymoa kaunsermpno hanymomr. Rompno hanyhato kfo ttiwon memomr, "Nom kangnom awany hiknom nd ni yimam kfo nuhaswa nfri mrokfot. ²⁰ Nmoh yimbhindangm wanukwomt nd ni pthiwa mrokfot be tu nfri mrokfoyet. Ni pthiwatn nom be afo tunom rinahti nahtitwonom. Ndnetnomn kangnom waptha hikkahtn awanynom." ²¹ Tuha Atens thofm yo womha thofm Atens nia toh hanyukm nhai wom tamohm dukakfot. Be kangm, "Womm pthayuk nfri mrokfom wanyhato aptha hasonom."

²² Porr nd Areopagashu kaunserm-pno kfo memor, "Niko nda kmi Atens thofko tamoh nkifra tahim o tamoh tamohroh lotu neftn be tu mfro buriutko. ²³ Nikmoh nda taun Atens yau habrihato nikmoh kfo tatoyuk tkitm hti htifasmohat wom kunysn wom altar htimoyanr. Nd altarn wom mrokfom htamomm. Nd mrokfom kfo memom, 'Yima hti won duha nkifrarhu altar.' To nd hti duha nkifrar niko be kfo tatohato kfo bruttna furiwarhu mrokfot na ptha nuhaswanko.

²⁴ Bro Nkifrarn ndar bbinysofti ndar bbinysoft yorhwa shrkahar hingrnamm. Nd Bro Nkifrarn bromort ndar mounti bbinysoft. Ndnetrn ror nhai yimam hingrnayuk kunymn tohkahr. ²⁵ Tuhan yindars Bro Nkifrarhu bbuieftpno tohwom. Ndnetrn ror nhai wom tamohmn mkkopentahato tfit yima mifnomn nd ror kkopentayuk tamohm yakhekfot. Nhai. ²⁶ Rpa nkifrarp par hingrnamm rorpno yimam dborhamom. Dborhahato nda bbinysoft yifammanimomt. Yimam tohyuk yiham turn kfo htahato nda bbinysoftu tkitm fak nhta nhom-brahemorm. ²⁷ Bro Nkifrar duka memor, 'Tuhan yindars ayak hta-kahanam kto tumn hti yukatoh hamuhrahma.' Bro Nkifrar nhai wuri rhukahr. Tor brbo yimampno. ²⁸ Rorn kfiatr nom tohhato wiayaauwonom. Nikmoh tisam kfo memom, 'Nom rorhu yon bugayenom.' ²⁹ Nom Bro Nkifrarhu yonenom, to mirahko ka Bro Nkifrar ka gor silva yo tahi kanjohot yimayer. Yo mirahko ka yimanomn tth kaugomonomr. Nhai.

* ^{18:18} Epikuria Stoikrof bingot tohhato duka tungunefet mrokfot kfo ptha nuhasmouf. Wom Grikm rofhu mrokfom kakitoh hnamoum.

³⁰ Bingot tohmo yimam mmohato tamoh tamoh nefm namoatmm Bro Nkifrar nhai mfro krhormorm. To arihat rorhu bro mrokfot kfo kangr kmi kmiroh yima bugam fasoh nefm mong trohkfot. ³¹ Yimaroh kot tohyuk yihar bi kfo htamorr. Yo nd kotkfot yakitohyuk yimar tor bi rpatn fak htamorr. Rorn yimam nayuk nefm htiyak hanyhato kotim hanyrahrm. Nd yimar minohafohato tfit sinyamor. Ndtm nom htihato duka mekfot nd hingrneft tu Bro Nkifra mifrn fak htamorr.’”

³² Yimarhu minohafohato tfit sinya yuhat wanymomn burmham hamuh snou bosnouhato kfo memom, “Ndr yuwi frnhehwornom.” Tfit womm kfo memomr, “Bare afo nd yima nohhato sinya yuhat afo tfit waptha hikkahtn afo tfit awanynom.” ³³ Porr nd mrokfo ptha swirt htanyhato fnahnimor. ³⁴ Nd rifiny swirt rhumo yimam, wommn nd Porr pthayuk mrokfom wany yindhorhato wufakmom. Rroh womr Dionisiusr. Dionisiosr tor wom Areopagas kaunser membar. Metroh-kort Damaris tot wom mett nd Porr pthayuk mrokfom wany yindhorhato wuyakmot. Yo tom wom met yindarim nd Porr pthayuk mrokfom hifa wany yindhorhato yakitohmom.

18

Porr taun Korint gutnius ptha nuhasmo yuhat

¹ Porr Atens htanyhato tfit Korinko yimor. ² Korinko yihato wom Judar mhtimor. Rorhu yufat Akwilar. Akwilar Pontas profins thofr. Bingot Romko tohyuk Judam Sisa Klodiasr Romko yak tuhafmotrm rpa rpa natubatunimom. Ndnett Akwila Prisila sawohf yakrmayihato Korinko yi tohmof. Rof sawo ser kunyenroh hingrneft hingnamouf. Porr rofhu htit yihato ³ be mhti foh-tasmorf rof nd hingrneft hingrnamoatf. To Porr nd ser kunyen hingrneft ror hingrnayetrn to tfit Akwila sawohf inji mhtimohat to be rofpno tohhato ser kuni hingrneft rpat hingrnamoam. ⁴ Be nd sawohfpno tohhato Sabat yihamn Judaroh rhu rifinyuk rmont yimoarn Judami Grikm Jisasrhu mrokfom kfo ptha nuhasmourm. Memour, “Akfo nuhaskahtanm rroh yima yuhum Jisasrpar htarahm.”

⁵ Sailas Timotirof Masedoniako tohmohat Korint Porr toh hasetrn mihtimofr. Porr Sailas Timotirof htiyakhato Porr nhai wom yiham rhu furarmor Jisasrhu mrokfothu kfo pthaneft. Yiha yiha Korin tohyuk Judam kfo nuhas memourm, “Niko wany hnamoa nrfa htiyakyuk yimar tor Jisasr.” ⁶ Porr Korint tohyuk Judam mrokfom kfo nuhas hanysi mrokfom nhai wuyakmom. Hamuh tfahato kfo wuna bowunamomr. Be Porr inji htitihato hmbresham frdboftanihato kfo memor, “Nhai mrokfom. Tukomm myahot nafni wohniko mirahko nann akfonom. Tuko wakfotwako. Arihat na tfit yima tangimpno yihato Jisasrhu mrokfot kfo ptha nuhasruhanm. Niko nhai, frffa thuwokomt.” ⁷ To be Porr nd rmont htanymorthn tfit yimor Titius Jastusrhu kunysn. Nd yimar bi Judaroh rmon mrokfot bi wanymort. Rorhu kunys Judaroh rmontpno rorhu kunys tohmout. ⁸ Nd Judaroh rmont tohmao bro yimarhu yufat Krispusr. Rom riphari wom bok yimam Korinthum Porr pthamo mrokfom hikhato baftasmom.

⁹ Wom yifungt Porr hwe sweh kanjo Bror kfo ptha hany memorr, “Mirahn yakrmehato tngt ayoukihat pthaneft. ¹⁰ Na toh tamnouruhann. Nhai wom yimar finji naruhatr. Tom nanhu yufat yorhwa bok yimam nd taun tohwom. Ndnett nhai wom yimar ninhu finji nakfot.” ¹¹ Porr nd taun Korint rpa gunyjimti 6-pela yamm tohhato Bro Nkifrarhu mrokfom kfo nuhas bonuhasmorm.

¹² Porr afo hifa toh hanymor. Tohhany ee Galiorn tfit Akaia profinshu bro gajis fakmort. Rorn gajis yakmohat Judam Porrhu yak mrokfot rim harhuta mharhutamom. Mrokfot rim harhuta mharhuta hasohato Porr fakmomr. Yakhato kot hanymomr.

¹³ Hanyhato kfo memom, “Ndar yimarn tuhan yindars faso kfo htewatrm nkifra boririfhut bi nhai hik marnya-kahmt. Bro Nkifrarhu tu hik marnya yuhat be fahforomt bi nfri yihota yuhat ndar yimar yak nuhaswatn bi mhikaknitm.” ¹⁴ Porr memor, “Ka nd Judam kfoyuk mrokfom kfo wok-ruhanm,” to nhai, Galiorn sinyahato Judam kfo memorm, “Niko Judako nda yima Porr nhai nanhu lokfot o wom fasoh neft narmor. Wom lokfot o wom fasoh neft anar, awi mrokfot yakitohherfoyanko. ¹⁵ Nd niko kfiwa mrokfot

be nd tukmoh Judakmoh mrokfo ptha yuhat yo yufa yuhat yo tukmoh Judakmoh nkifra yirmohthu yakitoh yuhatn pthiwuko. Ndnett na nhai ndhtet mrokfot wanyhirhotanko. Tuko wahanykahkomt wapthakomt.” ¹⁶ Be nhai yakitohrmort rroh mrokfot. Fak thumort kot. ¹⁷ Galior yak tuhaf-motrm Korinm tuha kot swirtn Judaroh rmonthu bro yima Sostenesr yak tkaftahato rbig borbigmomr. Galior nhai marimor finji naruha. Be nyngarpaye fukatoh marsisatamorm.

Porr Korint htanyhato Antiokko yimo yuhat

¹⁸ Porr bok yiham Korint wom Kristenmpno rpat toh hasohato ee htanymorm. Prisila Akwila sawohfpno Senkriatn sift yaknihato yimom Siriako. Porr Korint tohhato kfo tahihato tmars hatohmohat be tu kmi Senkriatn rorhu tmars foh tanymort.* ¹⁹ Akwila sawohf rpat Porrpno yihato Efesus mdbkafmom. Ndhar Akwila sawohf htanymorf. Turpar Judaroh rhu rifinyuk rmont fknenimorn Judampno nakfo pthamom. ²⁰ Kfo ttiwon nhombratitamomr Efesushu afo tohneft. To nhai, kfo kurmor Efesus tohneft. ²¹ Be nd kmit htanyhato kfo memorm, “Warhuko. Kto Bro Nkifrar kangr tfit, ‘Arughat wania,’ ee arughat tfit nieruha.” Be inji kfo tanhato yimor. ²² Be nd ror yimo sift hirhany hir hanymotn Sisariat mdbkafmot. Porr fnahnihato be yimor Sisariatko. Sisariathu Kristenm yindhorhato kfo pthanho tanhato tfit yimorwe taun Antiokko.

²³ Be tfit Antiokko tfit yimohat afo dfik yiham afo tohmor. Tohhato ee tfit sinyanihato yimor. Tfif sinyani yimohat yihotat yimor. Galesia distrik, Frigia distrik, nd nd distrik yuham yimor. Yihato nd kmiroh Kristen met yindarim mrokfom kfo bmta hanymorm tfit.

Apolosr taun Efesus ptha nuhasmo yuhat

²⁴ Aleksandria taunthu wom Juda yimar niamorn Efesus tohmour. Rorhu yufat Apolosr. Nd yimar tamoh mrokfom kfo pthaneft, mrokfom hifa ptha hik bohik marnyamoatrm yimam wany yindhormoumr ror pthayuk mrokfom. Yo Bro Nkifrarhu nkifra gonborngt rhuyuk mrokforoh duka tungunefr ror fak marnyamorr. ²⁵ Jisasrhu toh yuham yo rorhu hingrna yuham Apolosr fak marnya tungunamorm. Yak tungunahato ror wommpno nd Jisasrhu mrokfom tumoahat tu kfo yembindt mrokfom tumour. Tmift ror be nd Jonr bupa mife yima baftaismoa yuharpat ror tawisafmour. ²⁶ Judaroh rhu rifinyuk rmonm Apolosr yihato mrokfom pthamoahat nhai yakrminano mrokfom ptharmoarm. Akwila Prisila sawohf ror pthayuk mrokfom wany nhtahato rofhu kunyko fakmofr. Rofhu kunyko yakhato tfit Bro Nkifrarhu wom dukefm hemofr. ²⁷ Kto Apolosr memor, “Akaia profinsko aiya,” Efesushu met yindarim kfo memomr, “O hifa ndko wainy.” Yo tumn rhu-hato rorhu yi nmbuhathu kfo nuhas gontwat, wandfakmomtn Akaia profins thofmpno yimot. Kfo nuhas memomm, “Apolosr nia thoft wayind-horaktwakomr.” Apolosr yihato Akaia profins mifnahmohat rorn nd Bro Nkifrar yuhuwahato yakhato kfo ptha nuhas memorm, “Jisasr torpar yimar Bro Nkifrar kfomor yimaro rnfah htiyakyukr, nhai wom fitoh yimam.” Judam mfnahhato memoum, akfo woknomr, Apolosr tohhato kfo wokhato mrokfom hemorm.

19

Porr taun Efesusn gutnius ptha nuhasmo yuhat

¹ Apolosr Korint tohmohat Porr afo yuhre yura kminy-sofroh kmimn afo fauhnamor. Ktone Efesus mifnahmor. Efesus Kristen yimam mihtimor. ² Mihtihato kfo ttiwon memorm, “Niko Jisasr hik-wohate Bro Nkifrarhu Yafothat mithu nawohwotkome nhai?” Kfo memomr, “Nom nhai mekahnom Bro Nkifrarhu Yafothat korhwot.” ³ Tfif Porr ttiwon

* ^{18:18:} Juda yimam inji namoum: wom mrokfot Bro Nkifrarpu nakfo htatahato kto nd kfo ptha tng yuhat hikhato finji ner, nd yimar tmar koh bbomour.

memorm, “Tone fitohtet baftais niko yekwako?” Kfo memomr, “Nom yekwa baftais Jonrhu baftaiskphot kekwonom.”

⁴ Tfit Porr kekutnihato kfo memorm, “Jonr tohmo yiham, yimam baftaisim-moahat kfo memourm, ‘Yimako kangko baftais ayaknom, afo fasoh nefm mong trohhato ee btn baftais yakkfot. Baftais yakhato nd nanhu mong yuhat niewa yimar nikmoh bro dukefm htakfot.’ Nd Jonr kfomo yimar Jisasrn kfomor.” ⁵ Nd yimam inji wanyhato Jisasrhu yufatpno baftais fakmom. ⁶ Porr mfham tir htamotrm Bro Nkifrarhu Yafothat mithu nawohmotm. Bro Nkifrarhu Yafothat mithu nawohmottm nd yimam tfit nfri nfri yarmumat ptha hanymom. Bro Nkifrar mrokfo ptha rifhur hi hanymoatrm turhu mrokfot kfo ptha nuhas bonuhasmoumm wom yimam. ⁷ Nd Yafothat thu nawohmo yimam ka 12-pela yimam.

⁸ Porr Judaroh rhu rifinyuk rmont yihato mfro mfro gutniuskfot kfo ptha nuhas bonuhasmoum. Judampno rhu pthahato kfo nuhas bonuhasmou Bro Nkifrarhu kingdomkfot. Husfirpa yamm Judampno rhuhato kfo nuhas bonuhasmorm. ⁹ Nd husfirpa yamm Judampno tohhato Porr mrokfom kfo nuhasmoahat womm nhai wany yindhorromoamm. Fasoh nambur yima yuhumpno fasoh kfo bebmomm nd Bro Nkifrarhu yuham. Be inji namotm Porri Jisasr hikwa yimam nhai tfit marimom tfit Judaroh rmont yirahnom. Nhai mif. Yiha yiha tfit Tiranusrhu skuryuk kunyr yihato ndha mrokfom naptha nhtamoum. ¹⁰ Be inji na hanysn inji na hanysn hus gunyjimf kur spohmof. Porr inji hingrnahato Esia profinsroh Judami Grikm Brorhu mrokfot rpat wany bugamotm.

Sefarhu yonm memom, “Tek yarh fknayet yimaroh yarhm ayak thunomm.”

¹¹ Bro Nkifrarhu Yafothat Porr mithu nawohhato nd mirakerkfm hingrna-moatrm yimam hti bugamoumm. ¹² Wom yimaroh dbohnefm yak marnyamoahat inji htimo. Porr yak gbet hangisifm yaknihato nd dbohnet yimam mhemoahat, dbohnefm thu trohmoumm. Kmi yarh tek yarh fknayetm nhaf nd Porr yak gbet hangisifm mhemoahat, yarhm thu trohmoumm.

¹³ Wom Judam kmi kmim yau htashato kmi yarh tek yarh fknayet yimaroh yarhm yak thu htashoam, duka memom, “Afo arhombranom Jisasrhu yufat yuta nawohhato yarh yak thuneft.” Kfo memoum, “Porr kfo ptha htashwa yima Jisasrhu yufatpno nom kfiwonom nd yarhn wathu trohnt mett o yindarir.” ¹⁴ Judaroh prisroh tohak yimar Sefarhu 7-pela yindar yonmn inji hingrnamo. ¹⁵ Wom yiha wom yimarhu tek yarh memom ayak thunomr, ka wom yarhr kfo ptha memor, “Na Porri Jisasr tawisafwanf. To nikone froheko?” ¹⁶ Wo, ka nd yimar rom yarh yak thu hasomor sinyahato nd yimam srfa bosrfaknimorm. Nhai tfit marimom, “Tfit tohhato tatrahnomr.” Nhai. Rorrpar tohhato fe noh bonohafmotrm fhutikmpno sfno rmontha duhatm fakrme tubatumom. ¹⁷ Nd kmi Efesus tohmo Judami Grikm inji wanyhato bro yahrme rifhur yakhato Bro Jisasrhu yufat yura yura htamom. ¹⁸ Bok yimam bi Jisasr hiketm yima rifinyrn niahnahato rom nayuk fasoh nefm kfo nriyafmomm. ¹⁹ Bok met yindarim for bi singm wandfet gonborngm tafont kandhi wurasoh bugamomm. Nd gonborngroh marufam thomnamohat 50,000 kiniakfet gonborngm kandhi-mom. ²⁰ Inji nahato Brorhu mrokfot mtob nnuhaknihato nhai tfit suhrmot.

Efesus thofm

²¹ Porr htimort Brorhu hingrneft, mrokfot, bi hifa hifa bi kakitoh bmtewumte dukamor nd kmi Efesus htanyneft. Porrhu dukeft dukamor, Masedonia, Akaia, nd nd profins yuhat yihato Jerusalemko mifnahneft. Kfo memor, “Nd nd kmim tohni hany tfit Romko yihato nd kmit htini hanyruhant.” ²² To be hus yimaf, Timoti Erastusrof kfo tkrurmotr rofn bi Masedoniako tohak hanymof. Porr afo Esia profinsn afo dfik yiham tohmor.

²³ Tot nd yiharn yimam faso faso kfo rindho borindhomom Jisasrhu hikneft. ²⁴ Wom yimar tohmour, rorhu yufat Demitriusr. Nd yimar silva tahiye wonk wonk shrkar hingrnamo. Efesusroh nkifra tahi Artemis tohmaa rmont Demitriusrn tfit nd silva

tahiye habhi rmonenm hingrna hta nhombramourm. Bok yimam nd hingrneft hingrna hemoamrn bok marut fakmoum. ²⁵ To be nd yimami wom nndoh yimam wom nndoh shrm hingrna tafsetm Demitriusr rpat yak nhafohmormn kfo memorm, “Bar yimako nom yekwa bro marut nom hingrnewa hingrna yuhatn bro marut niewut. ²⁶ To nd yima Porr be tu yonmar yima rishur faso kfo hta mmo bamumiwurm. Nd na kfiwat bi tuko htihato wanyeteko. Nd neft nhai be Efesusrpat nakahr. Nhai. Yuht Esia profins inji kak hamumiwurm. Kmi kmim kfo kangrm nom yimanom hingrnewa tahi yifonm nhai yafotha duhatem.

²⁷ Mirahko ka nd Porr yi tuta mrokfot ka nmoh bisnis hingrneftu yufat ka wom yufett rhurfot, be tu nhai mif. Rorhu mrokfotn yak nohrfott be yufat minohnirfot. Yo mirahko ka ndrpas, nhai tahi Artemis tohwa rmont be inji kuny furam kanjo htirfomt nhai bro dukefm nd rmont htarfotmt. Afo Esiat tohyuk kmi kmim nda yuhut bbinysofthu kmi kmim afo tahi Artemis faktoh hnamom, Porr hatone habriwa mrokfotn yak nnariottm be bi mhti nnarsewumt tahi Artemis.”

²⁸ Nd mrokfot inji wanyhato nd toh rifinymo yimam wanambur het sinyahato kfo memom, “Nom Efesus thofnmoh Artemis tot tu yafothet nkifra tahis.” ²⁹ Nd yiha nd taun Efesus nhai yima mrokfom wanyrmom. Kmi yuht nadidarmot. Nd het grha hasoyuk yima rishur teh tmbho fnah bro rifiny swirrpar mirifinymom. Gaius Aristakusrof Masedonia thoff to Porrpnno rpat kmi kmi rpat yi htfas-moum. Rof yakmomf nd rifiny swirrn hanymomf. ³⁰ Porr memor, “Nd yima rifiny buhar afknekahann rpat ainyom,” tfit Kristenmn kfo rafomomr. ³¹ Esia gafmanrhu wom bro yufet yimam Porrpnno niyak marnyamoum. Romn mrokfot htafmomt. Kfo memom, “Mirahr Porr nd bro rifiny swirl amfnaha.”

³² Nd bro rifiny swirr yi mirifinyuk yimam nhai mrokfom nawany nawanyrmom. Womm rom nndo waptha hanyswako, womm rom nhaf nndo waptha hanyswako. Be tu nhai yima mrokfom nawanykfst. Nndo gobis ndha nfehimmot. Nhai wom yimar tawisafrmort nd rom rifinymo yuhathu mnat. ³³ Judam hti batihato Areksendar kfo tkrur memomr, “Ni rifiny buhar waikahnn afo wafrhikaknt mrokfo mna yuhat.” Areksendar rim wany hikakhato memor, “Yura mtohhato ptharuha.” Yuhre tirm yura htahato memor, “Ptharuha.” ³⁴ Nd rifinymo yimam bi hti nhta memom, “Arr Juda thofer.” Be ndnat tu mfro mfro rpatn tng riher kfo memoum, “Artemis tu bro yafothet tahiyyet! Artemis tu bro yafothet tahiyyet!” Be nd mrokforpat kfo hany kfo hany be 2 auakfot yohnemot.

³⁵ Kto Efesushu kuskusr wasinyahato fak thfamorm. Yak thfanihato kfo memorm, “Niko be nndo nunga mafmham kanjo pthiwuko. Kmi kmim bi htihnamomt Artemis tohyuk rmont. Nd yura moun yuhat yawihnamo hnaru tahis nda kmi Efesus thofm kakitohwomt. ³⁶ Nhai wom fitoh kmi thofrn riyak htafruhatrt. Ndnett niko be nhowi afo rhukfot. Mirahko be nikomn bmbri bmbri finji ananom. ³⁷ Niko nda hus yimaf nda rifiny swirl hnehat nhai wom tamoh nefm narfotf hnarfokomf. Nhai nmoh rmonthu tamohmn yak rikohrfot o nhai nmoh nkifra tahi Artemis faso faso riyuta ayutarfoft. ³⁸ Demitriusri rorhu hingrna yimam wom mrokfom korhwom wom yimarpno, kot yiharn mejistretmpno yihato nd mrokfom nafrhikakkfot. Nafrhikakhato nayak dbhofnakfot. ³⁹ Wom mrokfom rhuneft tuko rhu rifinymotf yak nohrfokomm. Inji nanef gafmanr htihato yindhorffor. ⁴⁰ To nd nom hrek marr nefi neft nhai tu dborioh neft narfonom. Mrokfo mna yuhat wany hik marnya duha asha be het fura bofurenom. Gafmanr ahtirt nd nom nefi neft finji kforfonom?” ⁴¹ Nd mrokfefm ptha buganimormn be tuhan yindars kfomotrm natubatu-nimom.

Masedoniako yimor. ² Masedoniako yihato ndkorhof kmi kmiroh Kristenm toh bmtayuk mrokfom hi hanymorm. Mrokfom hihany hihany be tfit Grikko mifnah-mor. ³ Grikko mifnahhato ndko husfirpa yamm tohmor. Ndko toh hanyhato memor, “Sift yakni Siriako yiruha,” wom mrokfot wanymor. Judam memom, “Awasnomr.” Nd mrokfot wanyhato be tfit kekuthato tu Masedonia yuhat yimor. ⁴ Beria thof Pirusrhu yon Sopater, Tesalonaika thof Aristakusri Sekundusr, Derbe thof Gaiusr, Esia korhof Tikikusri Trofimus ee Timotir, nd nd yimam hikmomr Porr Filipaiko. ⁵ Ndha rom yimomn Troas mtoh gari haso hany-momnom. ⁶ Nom yispa duha bretpam yemoa yiham rhunihato Filipait htanymonomt. Htanyhato sift yaknihato be yimonom. 5-pela marm sift yimonom. Yihato Troas mfnah-monom. Troas minahtihato ndha 7-pela marm rpat tohmonom.

Porr Troasn Yutikusr yak marnyamo yuhat

⁷ Sarere krif yifung Troashu Kristen yimampno rhuhato komunion fakmo-nom. Porr bi wom kmiko yi yibonyuk yifungr mrokfom pthahany pthahany tu wuroh yifung dany mfak htanimort. ⁸ Nom rhumo myorhakyuk rumr bok lamroh nukeftpno nd rumr rhu-momnomr. ⁹ Wom yima damiagr rorhu yufat Yutikusr. Ror nd yifungr rhunhomornom. Ror tatuna muhtpno rhuhato wany yakitoh hasomour Porr pthamoahat. Wany yakitoh hasohato nyngam hwe krkotahato ka myak banihato bbinysoft mitmbhomor. Yura husfirpehyuk rumt tohetrn btn myak bani yawihnamohat nhai be brbo yawihnamarmor. Be tuha gur, nhai wom nfriermor. ¹⁰ Be Porr mifnahnimorn nd yimar yak kebisnaknihato kfo memorm, “Mirahko adukanom, nda yimar tor nfriyer”. ¹¹ Inji kfonomormn be tfit tum rhu tanyuk rumr muh mrhumorn bretpam yak mkumormn famomm. Ror pthamo mrokfom nhai be brboh mrokfom ptharmor. Yifungr ptha nitremorr. Nitrenimott be Porr ptha tmbhonihato yimor. ¹² Nd misuhmo yima damiagr tfit myenyjwomotr yima yuhum marnyanihato yimom.

Porr Troas htanyhato Miletusko yimo yuhat

¹³ Ndha Troasn nom bi sift yakni hanyhato nom bi Asos mgari haso hanymonom. Memonom, “Ndha Porr kmbrenirahnomr.” Bi kfo memornom, “Na yihotat yirhoyann Asos ndha wakmbrenitwokma.” ¹⁴ Asos garihato mfnahmotr kmbrenimonomrn be yimonom. Yimonomn Mitilinit mfnah-monom. ¹⁵ Mitilinit htany yimohat ndwom marrn Kios mfnahmonom. Tfit ndwom marrn Samos. Tfit ndwom marrn Miletus mfnahmonom. ¹⁶ Porr bro Pentikos yihar mdukakmorn ndnetrn Efesus hir hagrotnimortn Miletus midbkafmor. Duka memor, “Nhai Esia profins awi kanga hatohrhota. Bi tuha Jerusalemt rhuhato Pentikos yihar rhuneft hifa.”

Porr Efesushu eldam kfo wobuh mrokfom kfomo yuhat

¹⁷ Ndnetrn Efesus hir hagrotnimor Miletus midbkafmor. Be Miletus rhuhato Efesusk be gontwat yimotn fakmotm Efesus sioshu eldam. ¹⁸ Yimotm kfo memorm, “Na barkof yiha Esia profins yimohat niko tukmoh nyngaye htimoko na nikompno tohhato namo nefm. ¹⁹ Nanh yufat nhai kfo grha hnarmoyant. Judam waji ya hatohmoahat niko tuko wanyhato htimoukomm. Bok yihama yihama yuhur krhohato bu nyngar kawihnamour. ²⁰ Na nhai Judam namoa nefm hti yakrmermoa. Nanh yihama yihama yuhur yihama dbkaf marnyahato Brorhu hingneft hingrnamoant. Fitoh bro rifiny swirl o tukmoh kunymn na yihato mrokfom hemoanko. Finji finji tohneft o mrokfo hikneft nd ndm kfo hta bohtamoanko. ²¹ Fasoh fasoh nefm mong trohhato Bro Nkifrar hikhato nmoh Bro Nungothet Jisasru mrokfom wany yihama hikneft, nd nd mrokfom yiha yihama Judampno, Grikmpno ptha buga bobugamoanm. ²² Bro Nkifrarhu Yafotharhu tng yuhatn na hikwoyann na Jerusalemko bi yi hanita. Na Jerusalemko yi hanyhato na tamoh nefm nanpno rhu thombat na nhai tawisafkaha. Be yirhoyann yukatoh hasoruha. ²³ Kmi kmim yi htashato Bro Nkifrarhu Yafothat yak nuhaswa mrokforpat na kakitohwa. Bro Nkifrarhu Yafothat kfo kangt, ‘Ni nhai toh marnya hakuruhatn. Yiha yiha krhopam yakhato kalabus hta hakurahmn.’

²⁴ Na nhai nanhu toh nmbuhatn bro dukeft mdukakkaha. Nhai. Nanhu dukeft kanga nd Bro Nkifrar hayuk hingrneft afo amhingrnafo bugayant. Bro Nkifrar yimam yuhuwafmo nmbuhat kanga afo kfo nuhas bonuhas bugayam kmi kmim.

²⁵ Na nikompno toh hnamohat kfo nuhashnamoyanko Bro Nkifrarhu kingdomkfot. Arihat mdukak kanga, kto be nhai nanhu nyngatikt htiruhatkomm. ²⁶⁻²⁷ Tfit mrokfom bi kahukanko. Na nhai duka marimoya, ‘Tamohmpno Bro Nkifrarhu yima yuhur kfo nuhas-rhoyanm.’ Nhai inji dukarmoya. Kfo nuhas bugamoyanko. Ndnetann nikmoh womr fasoh tkit bebt yinyeft na mrokfo duhata rhuruha. ²⁸ Niko tukmoh toh nmbuham hti yukatoh marnyafo hanykfot. Yo Jisarhu sios rpat yukatohaf hanykfot. Bro Nkifrarhu Yafothatn bi nd yimam nikmoh tirtn htamotm. Bro Nkifrarhu sios bi turhu Yonrn bi noh wiknamorm. Ndnett niko toh yukatoh marnyafo hanyhekfout. ²⁹ Na tuka hti nhtewa kanga na htanyruhankto nd yifako tohwa yaum fnahnehato sifsifm riyakhato yejborfa wumtrahmm. ³⁰ Kto nd niaruha yiham niko tuko nakfo nheh nakfo nhehrahko. Womr yihato womr mfrnhehruhatr rorhu mrokfefm yak hikrahrr. ³¹ Ndnett yiha yiha niko duka marnya bomarnyahato tohkfout. Na yak nuhashnamoa nefm mirahko ayafphonomm. Na husfirpa gunyjimm nikompno tohmohat yifung marm dboriorh dboriorh yima yuhum yima yimako he nhombra bugamoyanko. Bu nyngarpno mrokfom hihnamoanko.

³² Bi Bro Nkifrarhu tirtn htiwanko. Rorhu tirt htewohat ror yuhuwafmo yuhathu mrokfout wayakitohtwakomt. Nd Bro Nkifrar yuhuwafmo yuhathu mrokfout yaki-tohrahkomt htirahko be toh bmtarahko. Toh bmtahato dboriorh rhu nmbuhat hirahrko. Bro Nkifrar tur kfo htayuk yimam hta garita wuskam nikomn hirahr. ³³ Na tohmohat nikompno nhai wom yimarhu maruham o wuskam hti yuhurhato marimoya, ‘Na finji ndu yimar kanjo aruha,’ nhai. ³⁴ Tuko htimokma na tukanhu tire hingrnahato tamoh tamohm yakhato nanopno tohyuk yimam hemoanm. ³⁵ Na hingrnahamo hingrnefm memoya, ‘Ahingrna nuhaskahtanm rom htihato hingrna hingrnahato wuskam o tamohm yak-hato nd hingrnapa duhatm heshu-rahmm.’ Bro Jisar kfomo mrokfout nom dukakfout. Kfo memor, ‘Wom yima furam tamohm hirahmn, nhai be mfro yindhorruhatn. Ninn tamohm yakhato womm hirahn, ndt be tu bro yindhor nmbuhat yakrahn.’”

³⁶ Porr inji kfoni bugamorn nd Efesushu eldampno rpat bangu mtabok-mehato kfo bruttnamom. ³⁷ Nd eldam Porr myakitoohato hanurmomr. ³⁸ Porr nhai tfit htiruhatmr ndnetmn bro dungunangu yima yuhum fak-momm. Be Porr yaknimomr hanyhato yihom toh kafhomomr sif yakniyuk tkittn.

21

Porr sift yaknihato Jerusalemk yimo yuhat

¹ Be nd Efesuskorhof eldam htanymonommn sift yaknihato yimonom. Nom yimohat be hir hayukni twanhonihato Kos rim dbkafmonom. Tfit hwe fnah tfit sift yakni yimohat Rodes midbkafmonom. Rodes htanyhato taun Patarar mifnah-monom. ² Taun Patararn memom, “O! Sift Fonisiako kitt.” Be nd siftn kmbrenimonom yimonom. ³ Hirhany hirhany Saiprus be inji htini hanymo-nomt. Saiprus be inji kindonko rihti tany hanyhato nom be hir fnahhato Siria profinsko mifnahmonom. Profins Siria mifnahhato taun Tairt rim dbkafmonom. Ndha rim dbkafhato ndharhof wuss fak htanymomt. ⁴ Tairtn wom Kristenm mhtihato be ndha rpa wikr rompno tohmonom. Bro Nkifrarhu Yafothat nd Kristenm thu yuhur memotm, “Porr wakfo rafokahtkomr Jerusalemkort mirahr aiya.” ⁵ Sift Tairt htany yibonmott nom be taunt htanyhato yimonom sifm dbkafmoa befkako. Nd taunthu Kristenmi rröh yon tuhane yaknimom-nom yimonom befkako. Nungur yihom htahato bangu mtabokmemonom kfo bruttnamonom. ⁶ Kfo bruttnanihato be nakfo wobuh tanyhato nom be sift yakni yimonom. Rom tfit turoh kunyko yimom.

Profet Agabusr Porr mrokfom hemo yuhat

⁷ Be nom Tairt htanymohat hirhany hirhany Tolemes mifnahhato rim dbkafmonom. Rim dbkafhato nom ndharhof Kristenmpno nahtihato be ndha rpa marr tohmonom

rompno. ⁸ Tfit ndwom marrn Tolemes htanyhato hirhany hirhany Sisariat rim dbkafmonom. Be nom ndharn Filifrhu kunys yimonom. Ndharhof yimam rorn Bro Nkifrarhu mrokfom kfo ptha nuhasmourm. Be rorpno ndha tohmonom. Nd 7-pela yimam aposermpno hingrnanhomoam to ror rroh womr. ⁹ Rorhu yon metm husfihus yon metm. Tafi ram yak duhatm. Be inji toh furahato Bro Nkifrarhu mrokfot profetm pthamoa kanjo inji pthamoumt.

¹⁰ Siriati tfit wom yiham tfit tohmonom. Ndha toh hasetnomn wom profetr, rorhu yufat Agabusr, Judiat htanymortn fawihnamor Sisariako. ¹¹ Niamorn nompno yihato Porru nyuh tkafyuk foh that yakhato turhu tir wuram kibokimorm. Kibokinihat kfo memor, “Bro Nkifrarhu Yafothat kfiwotta kfiwanko, ‘Ndar foh tha tikatr Jerusalemr tohwa Judam inji kanjo kibokiyakhato yima tangiroh tirtn htarahmr.’”

¹² Nom nd taunthu Kristen yimam-pno inji wanyhato kfo rafo memonomr, “Mirah mif mif Jerusalemkai aiya.” ¹³ Tfit Porr sinyahato kfo memor, “Tamohmpno nurwatko nanhu yima yuhur gumuhatewar. Na to kanga fitoh kmimm ndhtet neft anama. Na to wofnwia Jerusalemthu nohneft. Na inji narhota Jisasrh yufat yura yura htarahmt yimam.” ¹⁴ Htimonomr Porr tur mfro kfo yibonmotr to nom nhai tfit kfo kekutkfat. Be kfo memonom, “Tu Bro Nkifrarn kangr inji anamr, a to nhai mrokfom.”

Porr Judiako kalabus tohhato rorhu kotkfot yakitohmo yuhat (21.15-26.32)

Porr Jerusalemt mfnahmo yuhat

¹⁵ Dfik yiham yinyimotm be wuskam yak kebirshato yimonom Jerusalemkai. ¹⁶ Sisariathu wom Kristenmpno rpat yimonom. Yihato hanymomnom Saiprus thof Nasonrhu kunysn. Nd yimar bi bingot Bro Nkifrarhu mrokfot rifakitohakmort. Nd yimar memor, “Afo nanhu kunysn wamtohniko.” ¹⁷ Jerusalemr mfnah-mohat ndharhof Kristenm nom htiyakhato rroh yima yuhum yindhor-mom.

¹⁸ Hwe fnah dbha Porr hik hanymornom Jemsrhu htit. Nd sioshu eldam rpat rifiny bugamom. ¹⁹ Porr kfo yindhor mrokfot tunihato ee btn ror yima tangimpno hingrnamo hingrneft kfo ptha nuhas bugamorm. Tamoh tamoh nefm Bro Nkifrar rorpno namom, yo nd yima tangim Bro Nkifrar rihikakmo yuham, ndm kfo nuhas bugamorm.

Jerusaremthu sioshu eldam kfomomr Porr Bro Nkifrarhu rmonko yinyeft

²⁰ Porr kfo ptha buganimotr Bro Nkifrar kfo yindhormomr. Kfo yindhor-nihato tfit kfo memomr, “Bare, to boknambok Judam bi Jisasrh hikwom. Jisasrh hikwamn tfit nkifra boririfhut rpat kakito tkafwomt. ²¹ Tfit wom Judam yitamn kfo fura kangmm, ‘Porrn yima tangimpno tohyuk Judam kfo kangrm, ‘Nd Mosesrhu boririfhu mrokfot wayafho thukomt. Nikmoh yon yindariyenroh tham mirahko apuk thu hanynom. Yo nkifra yirmoht masat yak hik duha.’” ²² Nom tawisafwonm ninhu ashahof bi nia nmbuhat wanyrahm. Nome to finji kforuhanom? ²³ Wom kfo hta mrokfom kangnom akfo htanomn. Asombhat tom wom husfihus yimam bi Bro Nkifrapno nakfo tahimom. ²⁴ Nd yimampno rpat waikahnn rom yuk trufruha yuhat wayuk truf hiktwa. Rom tmarim yoh bbo thombat ninn rroh tarior mthewa yemrom wawik-nahitwanm. Inji wanakahtn womm duka mirahm, ‘Ka rorhu yufat be kfo wok furemr. Ror nhai nkifra boririfhut yafho thurfot.’ Inji kforahmn. ²⁵ Nd yima tangim, Jisasrh hikwam, bi gon-twaw wandfahato kfo memonom, ‘Niko mirahko tahi rmonm tarior mthewa yemroroh yemropam yo nd kkupayetmi nd mtiye teh tfnayet yemrom ayanom. Ndm ye juha. Yo mirahko ijoh atonenom.’” ²⁶ Porr nd Bro Nkifrapno nakfo tahimo yimam yaktormn hwe fnah dbha fuk trufmom. Yuk trufnihato Porr nd Bro Nkifrarhu temperr yimor. Yihato prism kfo nuhas memorm, “7-pela yiham yinyiruhatm nieruhanomn rpa rpa yimanom Bro Nkifrar tarior mtharahnom.”

Porr yiro Bro Nkifrarhu temperr toh hasetrn Judam yakaknimo yuhat

²⁷ Nd kfomo 7-pela yiham bi yi hanyetmn Porr yiro Bro Nkifrarhu temperr toh hasetrn Esiakorhof Judam htimomr. Mhtihato kmi thofm romn hasinyamomm. Kmi thofm hasinyahato Porr tir tir fakmomr. ²⁸ Yaktahato naku hany memooum, “Niko Isrerko wania yaknhoknmom. Nda yimar kmi kmim kfo habri kangr, nom Isrernomi nd Mosesrhu boririfhut yo nda rmont, ndm kangr, ‘Yak wuna bowunayanm.’ Yo tfit yima tangim yaknewarm nda rmont hnewurm. Hnehato nd rroh futn rmont thu kasitt.” ²⁹ Bi taunkorn htimomr Porr Efesus thof Trofimusrpno ufa faumour. Ndnetmn memom, “Ka rpat fknif rmont.”

³⁰ Nd Porrhu mrokfot rim wifnak mwifnak rim wifnak mwifnakhato be Jerusalemthu yimam wany bugahato kmi thofm yursnanihato Porr rmont toh hasetrn tir tir yakhato teh brir hanymomr. Teh brir fnahhato yudbat rmonthu yifhatikt frkihmomt.

Romkorhof soldiam Porr yakmo yuhat

³¹ Porr tat noh bonohmoatmr mrokfot yimot Rom soldiaroh krnungo-thetrpno. Memomr, “Jerusalem thof bugam bi foh yaum kanjo nnayur mmo bomumiwum.” ³² Be yimar wanyhato ofisami soldiam yakhato yimomwe Porr tat noh hasomo tkittn. Be nd Porr tatmo yimam nd yimam htiyakhato Porr fafho thumomr. ³³ Be krnungothetr brbo Porrpno yauyakni-hato Porr fakmorr. Yakhato soldiam kfomotrm hus senf yakhato kimomr. Tfit kekutnihato Judam ttiwon memorm, “Nda yimare, fitoh yimayer? Finji ner?” ³⁴ Bt nd rifinyr waniak waniakmohat nhai yima mrokfom wanyrmomm. Womm inji waptha hanymom womm mano. Be nd krnungothetr wanysihato soldiam kfomotrm Porr yaknimomrn memom, “Soldiaroh kmifako hanyrahnomr.” ³⁵ Yuhre kuny dda tiktpno mtob hanymom nd yima rifinyr toniyakna memom, “Awasak kitohnomr.” Soldiam inji htihato Porr titamomr. Titaknihato hawitamomr. ³⁶ Nd yima rifinyr yau hik hanyhato kfo memooum, “Wawas hehur thukomr.”

Porr Judam kfo nuhasmorm ror tohhnamo yuham

³⁷ Soldiam memom, “Porr hafkneni twanhorahnomr,” tfit Porr kfomorr nd krnungothetr. Grik yarmumatn kfo memor, “Ka na wom mrokfot ptharfoyann?” Tfit krnungothetr kekutnihato ttiwon memor, “Ni pthewunt nd Grik yarmumat? ³⁸ Ni htitwoyann kanga Ijif thofe. Bingot wom Ijif thoer Rom gafmanroh mrokfom hanybornahato 4,000 yahr kmim yakhato yima toh duha tkitt kafrohmom. Na kanga ka ni nd yimaye.” ³⁹ Tfit Porr inji wanyhato kfo memor, “Na Juda tangishofa na ndu Silisia distrikko yorhwa bro taun Tarsus nurmoya. Na kangane met yindarim wom mrokfom kfo ptharfo-yanm?” ⁴⁰ Krnungothetr kfo memor, “Nhai mrokfefm.” Kfo yakiomotrr be tuha kuny ddamic wasinya tohetoh-hato met yindarim tire frgadimorm. Be rom inji htihato gadi rhumotm Porr Hibru yarmumatn pthamorm.

22

¹ Hibru yarmumatn kfo memor, “Bar yimako yo niko yifemroko, nanhu mrokfot ptharhotant wawanyswakomt.” ² Porr pthamohat Hibru yarmumat pthamotr rom be gadi rhumom. Kfo memor, ³ “Na tu Juda tangishofa, na mmemt hiyaumota distrik Silisiako yorhwa taun Tarsusn. Tfit asha Jerusalemrn toh warhomoya. Bi bro yimayann Gamalierrhu skurkfot yihato fak nuhas bonuhasmora nd nmoh nkibaproh yirmoht. Bro Nkifrar fakito hnamo-yanr niko arihat Bro Nkifrar yakito hwa kanjo. ⁴ Na toh hnamohat bok met yindarim Jisasrhu mrokfot wany yakiohato yak hiketm memoa awasanm. Womm mtitofe kihato kalabusn hany htamoanm. ⁵ Bro tohak prisri kaun-serm htimomm nd na nahnamo nefm. Romn kfo nuhasyuk gontwam wandfahemomm Damaskus tohyuk Judaroh bro yimam. Be nd gontwam yaknihato fau hanymoya Damaskusko yiyet yihotar. Memoya, ‘Nd kmithu Kristenm Jerusalemko hnerhotanm ndharhof bro yimam yakhato afo kalabus htarahmm.’”

Porr kfo nuhasmorm nd ror Jisasr rihikakmo yuhat

⁶ Porr wompam pthamor, memor, “Na yimohat Damaskus bi brbo yau hanyetann, marr danyr tohetrn asha wom nukeft yura mount wutoh tany-hato yawihnamotn fakmota. Memom ka nndo bro ksh nmbuhat yura mountko wuhatohhato wayak nukewum. ⁷ Na be nd nukeft yakmotta mmrifakhato bbinysoftn misuhmoya. Bbinysoft misuhhato wanymoya wom yimar naku memora, ‘Sor, Sor, na tamoh dukeftpno yak bebwona?’ ⁸ Tfit na kekutnihato kfo memoyanr, ‘O, broye, ni frohe?’ Memor, ‘Na Nasaret thof Jisasa. Ni Kristenm yakbebwohat nhai romn yak bebkahn. Nann kak bebwō.’ ⁹ Nd nanpno yau hanymo yimam rom htimoht nukeft to yimarhu tngt nhai wanymomt.

¹⁰ Tfit na ttiwon memoya, ‘Bro yimaye, na finji niwoya?’ Tfit kfo memor, ‘Wasinyakahnn Damaskusko wanju. Ndharpno tor wom yimar, rorn kfohirahrn nd na kfo htamo hingrnefm ni hingrnaruham.’ ¹¹ Nd nukeft masat fnhuhato nyingam yakmotma nhai wom tamohm htirmo-yanm. Nyingam kunyj kihmoma. Be nd nanpno yau hanyuk yimam inji htihato tir tir yaknimoma Damaskusko hanymoma.

¹² Nd taun Damaskusn tohmour wom yimar, rorhu yufat Ananaiasr. Nd yimar Bro Nkifrarhu ynhit tohmoarn rorhu boririfhu mrokfom kak hik marnyamourm. Nd Damaskus tohyuk Judam rorhu toh nmbuhat kfo yindhormoumt. ¹³ Ror nanhu tohyuk kunys niahato brbo nanpno yarim tohhato kfo memora, ‘Yinowe, na kfiwann ninhu nyingam afrdbtakukahmn wayukatohn.’ Be inji kfomotra nanhu nyingam mfrdborhahato fukatoh hamuhmoyanr. ¹⁴ Tfit kfo memora, ‘Nmoh nkibaproh Bro Nkifrar bi kfo hta memor, “Ni Pornn hti hikrahnm nanhu yima yuhur yorhwa dukefm. Nd nanhu tu hifa yufayet yimar* htiruhann ror pthayuk mrokfom wanryahn.”’ ¹⁵ Ni nd htiruha nefmi yo wanyuk mrokfom yakhato met yindarimpno ptha nuhasrahnm. ¹⁶ Bmbri wasinyakahnn Jisasrhu yufat wayutatwa. Yutahato be nd ninhu ufasoh nefm rorhu kkupaye yak thurahrm. Inji nanihato wabaftaistwa.’”

Bro Nkifrar Porr kfo tkurafmo yuhat

¹⁷ Porr kfo memorm, “Na tfit asha Jerusalemr niamoyann yiro rmont fknihato kfo bruttnamoya. Kfo bruttna hasohato tfit hwe twehnano ¹⁸ Bror htiyak hanymoyanr. Nia hnamorn kfo memora ‘Nanhu mrokfom ni ptharuham nd Jerusalem thofm nhai wany yakio-ruhatm. Ndnettnd Jerusalemr yudbat wahtanykahnnr wanju.’ ¹⁹ Tfit kfo memoya, ‘Broye, na Judaroh rhu rifinyuk rmonm yi htashato Jisasm hiket yimam yaknimoanm tfit kalabus hanyhato ufasofaso tabot bebmoanm. Nd Jerusalem thofm na namoa nefm bi htimoum. ²⁰ Nd ninhu mrokfot uhature hatone htashayuk yima Stifenr wasmohat na toya brbo tohmoya. Toh hanyetann rorhu tat noh bonohmo yimaroh yuke hmbresham hatohhato hti yindhormoyanm.’ ²¹ Tfit Bror kfo memora, ‘Ni wanju. Ni be ndu yima tangimpno inji watoh habriswa.’”

Porr kfo nuhas memorm, “Na Rom thofa.”

²² Be Porr yima tangimpno toh habrineft pthamotr bt nd ror rhu wany yikitohmo met yindars wahet sinyahato kfo memom, “Wayaknikah-komrn wawaskomr! Nom wofnkahnom nd yimarhu tohneft!” ²³ Be kfo hutt hanyhato yuke hmbresham teh tmbrak hanyhato nungufut yura tu hanymomm. ²⁴ Ndnettnd Judaroh kimr hofhta tngm krnungothetr wanyhato wom soldiam kfaf memorm, “Wanju-kahkomr Porr wamiyaknikahkomr soldiaroh kmifako wahanykomr. Wahanykahkomr warmtatakkahkomrn rorpn nd met yindarim hofhtiwa nmbuhathu mrokfo mna yuhat frhikakrahnom.” Be ror kfafmo yuhat hikhato mifakmomr.

²⁵ Be myak tumakhato rahuspno kihato memom tat twanhorahnomr Porr ndha tohmo ofisar ttiwon memor, “Romroh thfa mntwat finji kfiwat? Kfo kangt na Rom thofa nayuk nefthu mna yuhat tafi frhikak marnya duha be bmbrit tat furaknikfot?”

²⁶ Be wom ofisar inji wanyhato krnungothetr mttiwon memor, “Tamohmpno inji niwa? Nd yimar Rom thofer.” ²⁷ Be nd krnungothetr inji wany sanyhato yimorn Porr mttiwonakni memor, “Wakfo nuhas marnyana. Nine, Rom thof mife?” Porr tfit kfo

* 22:14: Nd hifa yufayet yimar Jisaser.

fakio memor, "Uwa. Na Rom thofa." ²⁸ Tfit krnungothetr kfo memor, "Na to wom kmi thofa nikmoha tohwa. Na Romko yari witamohat bro maruha wiknahato tohwa." Tfit Porr kfo memor, "Na nhai. Nanhу yifamma sawohf Rom thoffn ndnettn na Rom thofa." ²⁹ Be nd Porr miyakmo soldiam nd mrokfot wanyhato fanhomom. Krnungothetr tfit nd Rom thofrhu tummo yuhat mhti dukakhato fakrmemor.

Porr Judaroh kaunsermpno pthamo yuhat

³⁰ Hwe fnah dbha Porr kisummo mtitofm yaktanihato krnungothetr memor, "Afo frhikak marnyaruha Judami Porr nna kfomo yuhat." Be ndnatn bro prismi Judaroh kaunserm kfomotrm rifinymom. Rhu rifiny bugamotm rroh nyngatikko Porr mtohmor.

23

¹ Porr kaunserm yukatohhato kfo memorm, "Bar yimako, na Bro Nkifrapno rim tohnihato toh hnamo yiham na nhai wom fasoh nefm na hnarmoya. Nanhу yima yuhur nhai krho ba inji nakahr. Nanhу yima yuhur be yindhorwor." ² Inji kfo hanymotr prisroh bro tohak yima Ananaiasr brbo toh hanyuk yimam kfomotrm tngko frsrfra thumomr. ³ Porr kfo memor, "Ananaiase, Bro Nkifrar tawo inji frsrfarahrn. Ni kangan, 'Nkifra boririfhut htiyakhato kotimwann.' Ndt fura mrokfot kfiwun. Nkifra boririfhut ahtiyakkahnn to inji kforfotnm tngko frsrfarfoma?"

⁴ Porrpno brbo tohyuk yimam kfo memom, "Bro Nkifrarhu bro tohak prisr inji faso kfo duha." ⁵ Porr kfo memor, "Na nhai merfoya, 'Ndarr Bro Nkifrarhu bro tohak priser.' Bi ahti dukayanr, to nhai inji kforfotanr. Bro Nkifrarhu rfa borngt kfo kangt, 'Mirahn ninhu kmi thofroh tohak yimar faso faso akfoyanr.' Na nd mrokforpat tawisafwa."

⁶ Nd kaunser yimam Porr bi hti nhtamorm. Nd kaunser yimam tohmo yimam womm Sadyusim, yo womm Farisim. Inji hti nhtahato wom mrokfot kfo memor, "Bar yimako, na Farisiya. Na Farisiroh yona. Nanhу dukeft duka kangt, yimam noh hanitam kto tfit sinyarahm. Na inji kfiwota ndnatn kot tohwa."

⁷ Porr inji ptha hanymor ka Sadyu-simi Farisim tum mnatuhaknihato nna kfo hamuhakni nna kfo hamuhaknihato nafak mkumom. Sadyusim rom inji tohmom. Farisim rom inji tohmom. ⁸ (Sadyusim kfo kangm, "Yimam noh hanitam nhai tfit sinyaruhatm." Yo womt kfo kangm, "Mounmotmi yafotham nhai rhukahm." Sadyusim inji inji kfiwum. Farisim nndo kfiwum. Rom kfo kangm, "Yimam nohwam kto tfit sinya hanyrahm. Yo mount mounmotetet. Yimam yafothetem.") ⁹ Inji nna kfo hamuhaknihato Farisim Porrpno tohhato ptha nuhaknimomr. Nkifra boririfhuthu tisam Farisimpno rpat tohmoam, romn sinya tohhato kfo memom, "Nome nda yima Porr nhai wom krhopam htikahnomr. Ror pthiwa mrokfom ka wom yafotharn o mounmotrn pthahemo mrokfom pthiwur." ¹⁰ Farisimi Sadyusim masat masat nakfo hamuh nakfo hamuhmotm amiroh krnungothetr inji htihato kfo memor, "Ndar yimam inji nakfo hamuh nakfo hamuhkniruharn Porr kmbru pukum kanjo rinatehta rinatehta-ruhamrn teh tmbhorahmr." Be nd dukeftpno soldiam kfo tkrurafmotrm soldiam mibrnyihato mifakmomr. Judampno tohetrn miyakhato tu soldiam tohyuk kuny kmifako hanymomr.

¹¹ Ndwom yifungrn Bror Porrpno brbo yihato kfo memor, "Mirahn ayakrmeya. Watoh bmtatwa. Nanhу mrokfot asha Jerusalemt ni pthamohat, nhai yakrmehato ptharmont. Tohhato nanhu mrokfot ptha nanyjarmont. Romko yi shoft to be nd yuhat wahiktwa."

Judam waji yamo yuhat

¹² Hwe fnah dbha wom Judam waji famom. Memom, "Porr awasnom." Mrokfot fak dbkafmomt. Kfo memom, "Porr was mif mifrahnomr. Yimar tafi wasrfonomr, nhai womr bmbri nuwa ya bupa ya inji naruhatr. Awi afo." ¹³ Porrhu was mrokfot kfo htamo yimaroh nambakfot 40-kfoti wom yimam. ¹⁴ Nd yimam bro prismi eldampno yihato kfo memom, "Nome tu kfo mifmifwonom. Nom nhai bmbri nuwa yemska inji

naruhatnom Porr was duha. Bi Porr was tinghato yima yuhum miforhmnom ee bt nuwa ya inji narahnom. ¹⁵ Ndnettñ nom kfo kangnom nikomi kaunserm amiroh krnungothetr wakfafkahtkomr afo hnerahrr Porr. Wakfaf wamitwako, ‘Porr afo aniekaht afo mrokfom frhikakrahnomr.’ Inji wakfo nhehak-kahtkomr mirahr, ‘Aneya,’ yihotohat toh rafakhato wasrahnomr.”

¹⁶ Rom inji kfomohat Porrhu yindamem yonr inji wanyhato soldia-roh kuny kmifako yihato Porr kfo nuhas bonuhasmorr Judam kfo htatamo mrokfom. ¹⁷ Porr inji wanyhato wom soldiaroh tohukatohr nakuyakhato kfo memor, “Nda yima damiagr yaknihato krnungothetrpno wahanywanr. Rorpno wom mrokfeter.” ¹⁸ Be nd tohukatohr nd yima damiagr yaknihato krnungothetrpno hanyhato mkfo memor, “Rumgat tohwa yima Porr kfefitra nda yima damiagr hniyanr. Wom mrokfetrn hniyanr.”

¹⁹ Be nd krnungothetr nd yima damiagr yaknimorr rim rhumof. Turpaf rim rhuhato kfo memor, “Tamoh mrokfom hne? Wakfo pthakahtn awanya.” ²⁰ Nd yima damiagr kfo memor, “Judam bi kfo htarom Porrhu hanyuk mrokfot. Merom, ‘Kfafruhatnom nohok hnerahrr.’ Merom, ‘Kfo nheh mirahnom, ‘Afo ahnekahttr kaunsermn rorhu mrokfot frhik bohik marnyarahmt.’” ²¹ Na kfiwann mirahn rroh tng yuhatn ahika. Rroh yimaroh nambakfot 40-kfoti wom thomna yimam rhu rafak memom, ‘Porr wasrahnom.’ Bro mrokfot fak dbkafhato memom, ‘Nom nhai bmbri nuwa yemska inji naruhat-nom. Bi Porr wasninome ee bt nuwa yemskarahnom.’ Nd mrokfot inji kfo htahato to be ninhu kfo yakio tngrpat gari hasiwum.” ²² Be nd krnungothetr nd yima damiagrhu mrokfom wany-hato memor, “Hifa nd kfo hamong htatamo mrokfom bi wanuyanm. Ni yi shoft mirahn womm akfo amiya, ‘Nann nd nd mrokfom kfahuyanr.’”

Porr gafmanroh tohak yima Feliksrpno hanymo yuhat

²³ Nd krnungothetr nakuyakmorf hus soldiaroh tohak yimaf. Yimotf kfo memor, “Wayak htatafnm 200 soldiam yo hos hatoneyuk 70 soldiam yo kfra inyarut hatoneyuk 200 soldiam. Wayak htatakahfnm hrek 9 kilok yifung wahasinyakahfnm Sisariako wahanywafnm. ²⁴ Porrhu hatonayuk hosm rpat wayak hta bohtatwafnm. Rpat wahany marnyakahfnr aiswar Feliksrpno. Feliksr nambawan gaf-maner.” ²⁵ Nd soldiaroh krnungothetr gontwat wandfahato kfo memor,

²⁶ “Na Klodius Lisiasia. Ndar gontwat ni gafmanrhu tohak yima Feliksnpno wandfiwant. ²⁷ Wom yimar Judam yakmomr memom, ‘Awasnomr.’ Nd yimar Rom thofrn memom, ‘Awasnom.’ Na inji wanyhato nanhu soldiam yaknihato mita nrifik-monomr. ²⁸ Kfo memotm, ‘Awasnomr,’ ndnatn tu Judaroh kaunsermpno memoya, ‘Ahanykahnr afo wany hikruha. Tamohmpno yamukam, “Awasnomr?”’ ²⁹ Be tu Judaroh kaunsermpno rhuhato nafrhikhato nhai wom tamoh krhopam htirmoyanrn, bt miruha wasrahmr o kalabus htarahmr. Be nd nkifra boririfhuthu hik marnya duha nmbuhatpno memor, ‘Awasnomr.’ ³⁰ To bi wanyroyant mrokfot bi kfo habofkni kangm, ‘Awasnomr nd yimar.’ Nd nat ninpno niewur nd yimar. Nd rorpno namburwa yimam kfafroyanm. Ninpno tohhato rroh mrokfom ptharuhatmm wawanywanm. Be injirpa”

³¹ Be nd soldiam krnungothetrhu mrokfot hikhato nd yifungn Porr yaknihato hanymomr taun Antipatrisn. ³² Tfit ndwom marrn hos hatonayuk soldiamn tfit Porr yaknihato taun Sisariako hanymomr. Be nd bbinysof yuhat yau hanymo soldiam bi hos hatonayuk soldiam miyaknitwomre be rom ndha mtohakhato tfit tu soldiaroh kuny kmifako yimom Jerusalemko. ³³ Nd hos hatonayuk soldiamn Porr yakni hanymohat be hanymomrn Sisariat mfnahhato bro gafman yimar myak nuhashato gontwat hemomr. ³⁴ Gafmanroh tohak yimar nd gontwat yakhato htimortn Porr kfo ttiwonmorr, “Nine fitoh profins thofe?” Porr memor, “Na Silisia thofa.” ³⁵ Be inji ttiwonnihato kfo memor, “Nd yimam ninpno nna kfiwam bi nieme, ninhu mrokfom wanyruhanm.” Be soldiam kfomotrm Porr hanymomr Feliksrhu bro kunyr htatahato toh-yukatohmomr.

¹ Faifpela marm yinyimotm prisroh bro tohak yima Ananaiasri Judaroh eldam yo Rom thofroh thfa mntwat yakitohet yimar, rorhu yufat Tertulusr, nd nd yimam yimom Sisariako. Sisariat yi mfnahhato gafmanroh tohak yima Feliksrpno memom, “Porr na hnamoa nefm ptharuhatnomm wanyrahrm.” ² Feliksr inji htiyakhato Porr nakuyakmorr. Porr yi mtohmotr Tertulusr ripthak-morm mrokfom. Kfo memor, “Bro yima Felikse ni gafman hingrneft myakaknimohat nmoh rhu nmbuhat yak hta bohta marnyamotn nom rhu marnya hnaronom, nhai nahutt nna inji na hnarronom. Ninhu dborior yima yuhurpno yatk lokfot yak thumontn nfri lokfot htaront. ³ Nom nd nefm htihato nmoh yima yuhum yindhorhato kfo yindhorwonom.

⁴ Nhai be yikitoh hatohrhottann wurohte kangane afo nmoh mrokforpat wany yikitoh tany herfonnom? ⁵ Nome nd yimar htitwonomr ror nom Judanompno tohwarn rorn wom mro-kfom wahtekwatrm ndar bbinyssoftu kmi kmim tohwa Judanom nhai toh marnyakahnom. To tor nd yimar tohhato fak tndohmornom. Yak tndohmotrnom tunom nna kfo hamuh nna kfo hamuhmonom. Rorn wom yimam rim hatohmorm. Nd ror rim hatohmo yimam Nasaretm. ⁶⁻⁸ Yo nd yimarpary nmoh nkifra rmonr kangr, ‘Faso faso ayak bebanr,’ ndtpno kotkfot htamonomr. Ndnettn ni tunn wayakkahnw wattiwon hikkahnw yakrahnm mrokfom. Mirahn ka be kotim furemr.”

⁹ Judam rom Tertulusrpno tohhato Porppar krhopam thu hutamomm. Kfo memom, “Nd Tertulusr pthiwa mrokfom tu kfot kfiwur.”

Porr Feliksrpno mrokfo pthamo yuhat

¹⁰ Rroh mrokfom pthanimo gafmanroh bro yimar mfhaye Porr kfo memor, “Ni waptha.” Porr sinyahato kfo ptha memor, “Na hti hnamoyann ni tu bok gunyjimm ndar kmiroh mrokfom fakito hna hemonm. Ndnatn nanhu yima yuhur yindhorwor nanhu mrokfom kfo pthaneft. ¹¹ Yimam ttiwon habrirahn kfo mirahmn 12-pela yiharpam yirom na Jerusalemko yihato kfo bruttnamohat. ¹² Na yimohat nhai wom Judarpno rroh nkifra rmon kmifarn nna kfo hamuh nna kfo hamuhmotno womm htirmomno. Na nhai tauntn o taun tohyuk rifiny rmonm yihato faso fasoh yima yuhum hermoyanm. ¹³ Nd rom pthiwa mrokfot tu fipa duhatet. To fitoh yimar o mett htimota o wanymota, btn rorn o rotn ptha miruhat, ‘Uwa, na htitawoyann o wanuyann o ndha ni inji pthamo?’ Nhai, ndar mrokfot tu fipa duhatet.

¹⁴ Tu mrokfot mna yuhat nann kforhotant wawanswant. Nanhu nkifraroh Nkifrar kfo bruttna hnamoya. Nd nkifram yikitohmo boririfuti profetm kfo ptha htamo mrokfom na yikitohhato yimam Jisasm hikwa yuhat kfo pthamota memom, ‘Wom nfri mrokfot mhfnahnewur.’ Ndtpno namburhato kotimmoma. ¹⁵ Nani ndar Farisim nmoh dukeft duka kangnom, dborior yimami ufasoh nefm yikitohet yimam kto Bro Nkifrar tfit kasinyarahrm. ¹⁶ Ndnatn yiha yiham be toh marnya hna twanhoro. Na nhai wofnkaha Bro Nkifrar yo kmi thofm nanhu toh nmbuhat faso htineft.

¹⁷ Boknambok gunyjimm wom wom kmim toh hnamoya. Toh htfashato ee tfit Jerusalemko tukanhu yimatmpno yimoya. Wuskenm rpat hanymoya. Memoya, ‘Hanyhato wuskapa duha yimam hi hanyruha.’ Yo memoya, ‘Jerusalemko yihato afo Bro Nkifrar tarior mtha inji naruha.’ Nd nd dukefmpno kmiko yimoya. ¹⁸ Tunmoh Nkifra rmont fknihato na tarior mtha hasomohat nhai yimam rim rifiny tohhato htirmoma. Yo nhai wom yimam ptha kimr inji narmom. Nd yima toh rawofroh yak marnya nmbuhathu hingrneft hingrna buganimota ee yimam rim htimoma. ¹⁹ Esia profinsko tohyuk Judam, romn yauyaknihato fakmoma. To nd yimam nanopno mrokfetm rhu thombat romn aniekahmn ninpno amptham. ²⁰ Nhene, to ndar tohwa yimam, romn na nd kaunserroh nyingampno tohmohat wom nefm htitawoma, romn aptham. ²¹ Wom mrokforpat nann apthayant. Wom mrokforpat nanhu tnge ptha-moyant. Kfo memoya, ‘Nanhu bro dukeft duka kanga, “Noheh yimam kto Bro Nkifrar tfit kasinya hanyrahrm.”’ Ka nd mrokfot kfomotpno kotimwoma.”

²² Feliksr Kristenroh dukefm bi hti hik bohiketrn to be afo kfo rafo memorm, “Awi bi nhai wom mrokfom kforhotanko. Afo amiroh krnungothet Lisiasr bi niere, ee nikmoh mrokfot yak marnya hiruhanko.”

²³ Inji kfonimormn Feliksr sinyahato amiroh ofisar kfo memor, “Porr yaknikahnr afo rumgat wahtawanr. Mirahn tamoh tamoh nefm kfo rafo bugayanr. Turhu yimatm kangm, ‘Tamohm ahenomr,’ ndm rom nhai mrokfom.”

Porr Feliksr yakhato hus gunyjimf kalabus htamo yuhat

²⁴ Dfik marm tonhihato Feliks Drusila sawohf niamof. Drusilat Juda kott. Niahato Feliksr afo Porr nakuyak-hato memor, “Afo wom mrokfom afo awanyanr.” Porr niahato Kristenm Jisas Kraiser hikwa yuham kfo hik bohik nuhasmorr. ²⁵ Tamoh tamoh nefroh duka marnyahato rhu marnya nmbuham yo wuroh yihar Bro Nkifrar kotkfot yakitoruhat, nd nd mrokfom Porr kfo nuhasmotrr Feliksr fakrmemor. Yakrmehato kfo memor Porr, “Wanju. Kto wom rhu fura yihamn tfit nakuruhann.” ²⁶ Wom dukeft Feliksr dukamoat duka memour, “Porr hirahra maruham.” Nd dukeft pno yiha yiha Porrpno yihato pthamour.

²⁷ Kto hus gunyjimf yinyimotf Posias Festusr fakmort Feliksrhu tkitt. Feliksr memor, “Judaroh yima yuhum ayak marnyayam.” Ndnatn Porr kalabus kafkne tanymorr.

25

Porr pthamor Sisarpno rorhu kotkfotu tfit wanyheneft

¹ Festusr turhu profins yi mfnahmor. Mfnahhato husfirpa yiham tohmor. Husfirpa yiham Sisariat toh tanyhato tfit Jerusalemko yimor. ² Jerusalemt mfnahmotr bro prismi Judaroh bro yimam kfo hutt memomr, ³ “Kangn, nmoh yima yuhum ayak marnyayam to bt nd yimar wakfakahtn anietwar asha Jerusalemko.” Yuwi memom, “Inji kfo ngehakhato mirahr, ‘Aneya,’ yihotat rhu rafakhato wasrahnomr.” ⁴ Festusr sinyahato kfo memor, “Porr Sisariat kalabus tohvor. Na asha be dfik yiham toh tanyhato tfit Sisariako tuka yiruha. ⁵ Ndnettn nikmoh bro tohak yimam nanpno Sisariako aiswam. Aikahmn nd yimarhu nefm kotkfot htahato htikfot.”

⁶ Festusr rompno Jerusalemt 8-pela o 10-pela marm toh tanyhato Sisariako yimor. Sisariat yihato marr rhumo yiharn ketyuk kunys yihato kfo memor, “Porr wayakkomr.” ⁷ Porr ketyuk kunys yi mfnahmotr nd Jerusalemko toh tany yimo bro yimam kot mtohhato rroh mrokfom mtumomm. Be tu krho mrokfom tumom. To nd rroh mrokfom be mtu furamomm. Nhai tu mna duha mrokfom ptharmom. Be kfo wok fura bofuramomr. ⁸ Porr sinyahato kfo memor, “Na nhai wom tamoh neft narmoya. Na nhai Judaroh boririfhu mrokfom faso kformoyanm o Judaroh nkifra rmontn o Sisarn. Nhai.”

⁹ Festusr memor, “Judaroh yima yuhum ayak marnyaya.” Ndnetrn ttiwonmorr Porr, “Nine Jerusalemko yinyefte yibonwo? Yi yibonwone ee btn wusha Jerusalemt ninhu kotkfot wany hiruhann.” ¹⁰ Porr sinyahto kfo ptha memor, “Ndar na tohwa kunys asot Rom gafmanrhu kot wanyuk kunys. Asot ndar kunyrpat kot wanyuk kunys. Ni tu tawisafwo na nhai wom neft narmoya. ¹¹ Na wom neft mnamoto kangm, ‘Awasnomr,’ to na nhai yakrmekfot. Nd rom kotkfot htewat nhai mna duhatet. Na nhai be rroh tirmn yi furakfot. Na kfiwa Sisarn nanhu kotkfot bi htewant.” ¹² Be Festusr rorhu kaunsermpno rhuhato napthamomn kfo memor, “Ninhu kotkfot Sisarpno htamont to be bi Sisarpno htewunomn. Rorn wany hirahrn ninhu kotkfot.”

Porr king Agripa Bernaisirofpno hanymo yuhat

¹³ Wom yiham rhunihato king Agripa turhu mndarem Bernaisit niamof Sisariat. Memof, “Aikahnonn Festusr mkfo yindhor tanyrahno.” ¹⁴ Bok yiham Sisariat tohmo. Ndnettn Festusr kingrpno yihato Porrhu mrokfom kfo nuhas bonuhasmorr. Kfo memor, “Tor wom yimar Feliksr kalabus htamotrr tor kalabus tohvor. ¹⁵ Na Jerusalemt yimohat htimoya Judaroh bro prism yo eldam rorpar krhopam htahato kfo memoma,

‘Inji nayet yimar was hehur thukfot.’ ¹⁶ Inji kfomotma tfit kfo wok memoyanm, ‘Nom Rom thofnom nhai ndhtet nef duhatenom. Nhai wom yimar mrokfot tafi frhikak duha be bmbri was furaknikahnomr. Nd yimar mrokfeter afo nd kotimyuk yimampno natoh natohhato mrokfo pthakfot.’

¹⁷ Ndnettn rom asha nanopno niamohat nhai wom kuknarmoya rroh kotkfothu yakitohneft. Hwe fnah ndwom marrn na kotyuk kunys rhuhato nakumoyanm nd yimarhu niahato rroh mrokfothu toh pthaneft. ¹⁸ Nd ror kotimyuk yimam tohmom to memoya, ‘Rorn kotim twanhiwum.’ To nhai. Nhai wom tamoh tamoh nefm ror nayukm ptharmom. Nhai. ¹⁹ Be nd turoh lotu yuharoh kfo nambur nmbuham, ‘o nhai nd yimar tunmoh nkifra lotu yuhat yak hikkahr,’ nd mrokfom pthamom yo Jisasr nohmo yuhat, ndm kfo pthamom. Porr bi kfo memorm, ‘Jisasr nohmohat to mirahko ka yopt tohwor. Nhai. Ror bi sinyamor.’ ²⁰ Memoya, ‘Mrokfo mna yuham afo frhik bohik marnyakruhanr.’ To nhai. Nhai yima yuhur afo yak marnyar-moya, ndnettn kfo ttiwon titamoyanr Jerusalemko yihato tfit wompam frhikak marnyanef. ²¹ Porr tfit kotkfat kfo memort, ‘Na kanga afo rumgat tohkahann kto Sisar tfit nanhu kotkfat wany hirahra.’ Be Porr inji kfomotr be rumgat afo htanymoyanr. Kto tfit Sisarpno rorhu kotkfat kotrahrt.” ²² Agripa sinyahato kfo memor, “Na kanga na tukann afo rorhu kotkfat wany hiruhanr.” Festusr memor, “Nohokn bt wawany hitwanr.”

²³ Hwe fnah dbha Agripa Bernaisi-rof kotyuk wondht wondh hmbrine-hato kotyuk kunys yimof rpatn nd taunthu bro tohak yimami amiroh bro krnungothetm. Nd kotyuk kunys bi kawondh hmbre bugamomt. Kotyuk kunys rim rhumotm Festusr kfomotr Porr tfit faknamomr. ²⁴ Porr kotyuk kunysn rim tohmotr Festusr kfo memorm, “Wahti bugako ndar yimar. Jerusalemt tohyuk Judami asha tohyukm bro mrokfot kfo memom, ‘Nd yimar wawastwanr. Mirahr nd yimar wom aruha.’ ²⁵ Na inji wanyhato kfo memoya, ‘To ndar yimar tamoh neft namotr yamukoma, “Wawasnr?”’ Turn sinyahato kfo memor, ‘Nanhu mrokfot Sisar afo wany hirahra.’ To be na rorhu tng yuhat hikhato memoya, ‘Sisar wany hirahrr.’ ²⁶ Ror barkof kotkfat toh hnamohat tafi mrokfom yak marnyar-moyanm, ndnatn nhai rorhu mrokfom gontwat htahato nmoh bro yima Sisarpno htafrmoyant. Ndnatn king Agripaye yo niko bro yimako, nikompno ndar yimar hnewanr. Rorhu mrokfom ptharuhatr wany hik marnyahato gontwatn rorhu mrokfom htaruhanm. ²⁷ Be yimarhu mrokfom yak marnya he duha Sisarpno htafneft, ndt nhai hifat.”

26

Porr King Agriparpno kfo pthamo yuhat

¹ Agripa kfo memor Porr, “Ninhu mrokfom wakfo ptha dbruftwanm.” Porr inji wanyhato tirt kasinyanihato kfo ptha memor, ² “King Agripa, na duka kanga, hifa nanhu mrokfom ninpno ptharhotanm afo wanyrahn. Judam kfo pthamo mrokfom tawo tfit nanhum ptharhotanm afo wawanswanm.” ³ Nom Judanom nmoh toh nmbuham, nmoh yirmoht, tamoh tamoh dukefm ni bi tawisafete. Ndnettn kanga afo rhu wawanswanm nanhu mrokfom. Mirahn bi ahreka.

⁴ Na habhiyena ritohakmohat tukanhu kantriko toh yo Jerusalemko toh inji toh hnamoya. Nanhu rhu toh nmbuham Juda bugam hti hnamomm. ⁵ Bingot bi rihtiyakmoma. Kangm nanhu nefm womm akfo ptha srh nuhasnomm to nhai mrokfom. Htimoma na toh hnamohat. Na Farisiroh toh yuham toh hnamoya. Rroh nefm be tu yima duka marnyahato rim tohnifikfot. ⁶ Na asha kot tohwohat, na bi Bro Nkifrar nmoh nkiframpno kfo htaniyuk mrokfom na yaktihhato kanga fipett rhuraht, rom inji hti namburhato kotimwoma. ⁷ Nmoh 12-pela tangim Bro Nkifrar yiha yiha yifung mar kfo tatohato kakitohwonomr. Bro dukefm Bro Nkifrar yihato duka kangnom, ‘Afo ror kfiwa nefm afo htirahnom.’ To kinge, na to nd dukeft duka hasiwota rom ndt htihato kotimwoma. ⁸ Tamohmpno niko womko kfo yamukako, ‘Nom mduka nhyekwonom Bro

Nkifrarhu noheh yimaroh tfit kasinyaneft? Wadukako, Bro Nkifrar bi kfomor yimaroh kasinyaneft kasinya mifrahrm.

⁹ Bingot na tohmohat boknambok nefm namoam memoa, ‘Nasaret thof Jisasrhu yufat amifnahnit.’ ¹⁰ Na Jerusalemt tohhato nd nefm namoahat bro prisroh tngtn hikhato bok yimam Jisasr hikmoam yakmoayanmn kalabus htamoanm. Waskfot kfomoahat na rompno fknehato kfo memounom, ‘Wawaskomm.’ ¹¹ Na nd Kristen yimam riyak bebakmohat turoh rhu rifinyuk rmonm hik hafknehato rim ki bokiyakmoanm. Memoa, ‘Inji ayak bebkahtanm Bror yafho thurahmr.’ Yima yuhur nambur kihhato fitoh fitoh taunm tohetm afo rim hikak mhikakmoanm nhai rroh wom kafrohyuk tkitm.”

Porr kfo pthamor rorhu fasoh nefm mong trohhato Jisasr hikmo yuhat

¹² “Bro prisroh tngtpno memoya, ‘Yiruha Kristenroh yakt.’ Damaskusko yita yihotar yimoya. ¹³ Yihotat yau hanymoyann dany marrn wom nukeft yura moun yuhat fawihamot. Be tu mfro mif funamot. Marrhu funeft rot be inji. Funeft nann fak yukiohmot. Nanpno yau hanyuk yimam nd funeft rpat fak bugamotnom. ¹⁴ Nd funeft yakmottnom nd yau hanyuk yima buganom bbinysoft suhnasuhmonom. Suhnasuh hanyetnomn wom tngt Hibrukfotn kfo memot, ‘Sor Sor, na tamoh dukeftpno be kak bebwona? Ni be tu huhra krt tu frtatotwo.’ ¹⁵ Na nd tngt wanyhato kfo ttiwonmoya, ‘Broye, ni frohe?’ Bror kfo memor, ‘Na Jisasa. Ni nd niwa nefm Kristenmpno nhai romn yak bebkahn. Nann kak bebw. ¹⁶ Be tfit wasinya watohn. Ni bi nanhu mrokfothu kfo hta htfasyuk yima bi kak htewann. Nd dukeftpno mifnahann. Yo ni asomif htitwa nefm, kto yak nuhasruha nefm, nd ndm wakfo srh nuhas hanywanm. ¹⁷ Ninhuh toh nmbuhat tfit nndo yak htaruhant. Tunhu kmi thofm yo yima tangim, ndm yak beb thombat nann hbbakruhann. ¹⁸ Nann yakrhoyann nyanga kunyjet nyanga kunyjetm ninn nyngam yak dborha htfasrahnm. Nyngam yak dborharuhatnm yima yuhum yak kebokthato kspitat htanyhato mar tafont rim tohrahm. Satanr ki jbkaftewohat nd mtitikt mfrtebikrnihato Bro Nkifrar-pno rim tohrahm. Inji nahato rroh fasoh fasoh nefm yak thuhato be nd bi na hiket yimampno yufa yakhato Bro Nkifrarhu yonm rhu bugarahm.’ ”

Porr Agripapno turhu misin hingrneft kfo pthamo yuhat

¹⁹ “King Agripa, na nd nefm htimohat nhai rorhu tngt hanyjborna-rmoyant. Nhai. ²⁰ Na wany yakiohato rorhu mrokfom tuha Damaskus yo Jerusalemkoy yima tangimpno mrokfot kfo ptha htfas bugamoyant. Kfo memoyanm, ‘Niko yima yuhum wayak kekutkahkomm Bro Nkifrar wahikko. Hikhato tu yima yuhu yak kekutet yimam tohwa kanjo inji tohkfat.’ ²¹ Nd nd nefm namota Judam yiro rmont fakmoma. Yakhato kangm, ‘Awasnomr.’ ²² Bro Nkifrar toh tkaf hnamora, nhai yafho thurmora. Yakitoh hnamotra na tohhato na href asha tohhato mrokfom pthiwotanm yima furam, yufet yimam rpat wanukwomm nanhu mrokfom. Na pthiwa mrokfom nhai wom fitoh mrokfom pthakaha, bi nd nkiframpno profetm ptha htayuk mrokfom yo Mosesr ptha htayuk mrokfom ndm pthiwa. ²³ Nd nkiframpno pthayuk mrokfom kfo hta memom, ‘Kraisr krhopam yakhato nohhato tfit sinyarahr. Sinya thombat rorn sinya gngonrahrm wom yimam. Sinyahato yima tangim minrfa htiyak yuhat kfo ptha nuhasrahrm.’ ”

Porr Agripap kfovom Brorhu hikneft

²⁴ Porr inji inji mrokfom pthamotrm Festusr wafohrfatmor, “Por ni ka bi mumiwun. Masat skurwann nd safekfotn bi kak mumiwutn.” ²⁵ Tfit Porr sinyahato kfo ptha memor, “Bro yima Festuse, na nhai mmohato mrokfom pthakanm. Tu mrokfot kfiwa. ²⁶ Kingr, ror nd mrokfom bi wanyeter ndnetann nhai yakrmehato ptha nuhas hekahanc. Nd na pthiwa mrokfom bi turhu nyngaye htmorm to turhu yimbhindange wanymorm. Nd na kfiwa nefm nhai be yak hamong-rmom. Yima yimam hti bugamomm. ²⁷ King Agripa, profetm pthiwa mrokfom nine wany yakiowonm? Awi htitann wany yakiowonm.”

²⁸ King Agripap sinyahato kfo ptha memor, “Pore, ka be kak kekut twanhwiwuna?”

²⁹ Porr memor, “Yihof href, yihof href na kfo bruttna kanga nini ndar wany yakitohwa

yima bugako kanga asomif na Jisasr hikwa kanjo wahikko. Mirahko ka na kalabus tohneft kfwiurnom. Nhai.”

³⁰ Porr inji kfoniromot be nd kingri Festusr, Bernaisit, yo wom yimam rpat tohmom fnahnimom. ³¹ Fnahnihato tum rim toh rifinyhato kfo ptha memom, “Ndar yimar nhai wom neft namotr yamukanom, awasnomr o kalabus atohr.” ³² Agripar sinyahato Festusr kfo memor, “Ndar yimar be Sisarpno rorhu mrokfom ahta duhat yirm be href fnahrfor.”

Porr Romko yimor

27

(Sapta 27-28)

Porr Romko yimo yuhat

¹ Italiko nmoh yiyuk mrokfot bi kfo htatamomt. Porr yakmomr wom kalabusmpno ofisarhu tirtn htamomm. Nd ofisarhu yufat Juliusr. Sisar bi kfo tkrurafmorr. ² Adramitiumroh sift memot, “Esia profins yuhat hir hanyhato sifroh bekfam dbkaf hanyruha.” Inji wany-hato to be nd siftn Masedonia yorhwa kmi Tesalonaikathu yima Aristakusr rpat yimonom. ³ Hirhany hirhany ndwom marrn Saidont midbkaf monom. Juliusr dborioh neft namorr Porr. Hti marsisamotrr Porr rim sunihato turhu yimatmpno yihato nuwa tamohm turhu yimatmpno fakmor. ⁴ Be tfit sift kmbrenihato yimonom. Yihany yihany wifortn tfit yaknimotnom kmi yumb Saiprushu mongko hanymotnom. ⁵ Be bro marombt inji hir hanyhato profins Silisiati Pamfilia hir hagrotnimonom Lisiakorhof kmi Mairat mfnahmonom.

⁶ Mairatn Aleksandria thofroh sift memot, “Italiko yiruha.” Nd ofisar kfomotrnom nd sift tfit kmbremonom. ⁷ Be nd Italiko yiyuk sift kmbrenihato yimonom. Sift nhai hir yukermot. Be nd hir you hanysn bok yiham yimom. Wurohnam wurohnam Nidas mfnah-monom. Ndharn wifort mfro mfro sinyamott to be nhai wom hir hanykfot. Be Salmonethu kmi ktu yuhat hir habrinihato kmi yumb Krit yuhat yimonom. ⁸ Hta nhipounom siftu yak hta bohta hanyneft. Ndnett brbo nambispno hir sshanymonomm wom kmit mfnahmonom. Nd kmit kutewumt Sifroh Dborioh Bekfat. Nd kmi korhwot brbo taun Laseatpno.

⁹ Be nd marombthu hir hanysn bok yiham yimom. Judaroh nuwa kurhato toh fura yiham be nd marombthu hir hanysn nd yiham yimom. Marombt fifrtumotn burifhum memom nndo kminysofem. Be Porr inji htihato kfo memorm, ¹⁰ “Bar yimako, na kanga mirahnom nda tekt inji htini hany mirahnom anhombranom be bok wuskam marombt yirahm. To mirahko ka wuskarpamn o sifrpatt, nhai yimam rpatn burifhut yak namotku hmbriyafrahm.” ¹¹ To nhai, ofisar nhai wany yakiormort Porrhu mrokfot. Nhai. Tu sif tikatri siftu keptenrhu tng yuhat hikmor. ¹² Nd rom mdbkafmo bekfat tu bro burifhu sinyayuk tkitt mdbkafmom. Ndnatn bok yimam inji htihato kfo memom, “Ndar tkitt ahtanykahnomt Finiksko ainyom.” Nd tkitt kmi yumb Krithu sautko yorhwatn kukyohwot marr yhnitako. Finiks yorhwa sifroh bekfat hifa nhai burifhum mfro mfro sinyakahm. Ndnett memom, “Nd burifhu sinyewa yiham afo Finiksko mtohrahnom.”

Wifort sinyahato marombt mfro natonmo yuhat

¹³ Wifort bi noh hambre hanyettn duka memom, “Nhai mrokfom. Tunom kfoyuk yifau yuhat hir marnyanirahnom.” Sifthu ankakfot yak kmbremomt be Krit mkuyef yuharn hir hanymom. ¹⁴ Hirhany hir hanymonomm asha bro wifort kutewumt “Notkorhof Wifort.” Kritko wawifor sinyamot. ¹⁵ Be nd wifortpno hirhanysi hirhanysi hato be wiforeftn hanymotnom. ¹⁶ Be nd wiforeftn hany hanymotnom kmi yumb Kaudathu saut mkuko mihirmonom. Ndharn memom dingit atehaknomt to nhai wifortpno nhombrati nhombrati wurohnamn yimaroh bbukapampno fakmomt. ¹⁷ Yakhato yura siftn teh hamuhhato baklain tofm yakhato sifpno dbkafmomt. Dbkafnihato wom baklain tofm yakhato tu sift kiboki-momt. Memom inji nakahtnomt nhai burifhut dbmbraruhatt. Be inji hingrnanihato wiforeftn hanymotnom. Be inji wiforeftn hany hanymotnom

memonom Afrikatpno brbo yorhwa rifkfotn sift mrhutaraht. Be inji dukahato sifthu hatonayuk sertham yak dbourakmomm be sfno hir hanymonom. ¹⁸ Ndwom marrn wifor bum masat masat yakaknimotmnom be sift rhuyuk wuss marombtn dbuhafmomm. ¹⁹ Wifor bum yuhre toh hanyetmn hwe fnah ndwom marrn tu sifthu hingrna wuskam dbuhafmomm. ²⁰ Bok yiham be nd wifor bum frmmo hatohmotmnom nhai marr o gunym htirmonomm. Nhai marimonom kmim mfnahrahnom. Bi memonom marombtn mmbrawoni-rahnom. Yima yuhum bi inji duka hanymomnom.

²¹ Bok marm nhai yima yuhum bi mirhurmotm nuwa yemska inji narmonom. Porr kfo memornom, “Na Krit kfomo tngr wany yakiohato ahtany duha yinomt nhai yonmari wuss marombt yrfott. ²² Na asomif bi kfiwanko. Mirahko yima yuhum aduka yanhomnom. Nhai nmoh womr tekt yohnitatr, sifrpatt yohnitt. ²³ Na Bro Nkifrar hikwa yimaya. Rorn yak htamotra rorhu hingrneft tohwa. Hrek yifungt Bro Nkifrarhu mounmotr nanpno brbo mtob hanyhato kfo hany famura, ²⁴ ‘Pore, mirahn aduka yanhoya. Sisarhu nyingako wamtohtwa. Wawanyn, ni kfo bruttnamohat bi Bro Nkifrar wanyhato nd ninpno sift yorhwa yimam nhai finji naruhatm. Rhu bugarahko.’ ²⁵ Ndnett na kfiwanko, mirahko aduka yanho inji nahanyom. Nanhu bro dukefr duka kanga, Bro Nkifrar nhai kfo furarfora. Ror kfi yuhat hikhato nhai womr marombt yohniruhatr. ²⁶ Nanhu dukeft duka kanga inji hir hanitanomn wom kmi yumbr sift yihom rhutewut.”

²⁷ Be hirhany hir hanymonomn 14-yuk marrpno wom maromb nmbuhat kutewumt Mediterenian, ndha hirmonom. Yifung dany boskru yimam kfo memom, “Bi wom kmi yumbtpno hir hanitnom.” ²⁸ Marombthu hafott yakmomt tek dany yuhat makimmomt 40 mites tfit wompenm rihir kkof hanyhato tfit makimmomte 30 mites tohmot. ²⁹ Be inji makimnihato duka memom, “Nhai tfit wompam rihir hanyruhatnom. Yura tahim sift mrhutaraht.” Be inji dukahato sifthu yifhikorhof 4-pela ankam yakhato fafho thumomm. Be ankam yafho thuhato yihathu yudbat nuka diman-dineftn kfo bruttnamoum. ³⁰ Sifthu boskrum memom, “Ayakrmanyinom.” Ndnetmn dingit yakmomt sifthu mfha yuhatn fafho thumomt. Yuwi kfo ngeh memoum, “Mfhakorhof ankam kafho thuwonom.” ³¹ Porr inji htiyafo hanyhato soldiaroh ofisari soldiam kfo memorm, “Nd yimam sift htanywomt be niko yimako nhai yorhwatko.” ³² Be soldiam dingithu mtitoft pukafomotmt suhmot.

³³ Nitre twanho hanyruha ee Porr yeshriyenroh ye bmta nmbuham kfo ptha memorm, “Yonmari yiham nhai yima yuhum bi mirhurrotmnom nuwa ye dukefm niarrom. Wur yonmari 14 marm be inji nuwa ye juha toh hnaronom. ³⁴ Ndnatn na kfo bmta mrokfot kfiwanko, afo nuwa waye bmtako. Wawanyko, nhai nikmoh womr finji naruhatr. Hoptt rhu buga marnyarahko.” ³⁵ Kfoni hanitarmn ror bretpat yakhato rroh nyingahato Bro Nkifrar kfo yindhornihato yak tifhato kiyaknitrt. ³⁶ Be nd yimam inji htiyafo hanyhato rom yima yuhum mirhuhato rom nuwa fe mska inji namom. ³⁷ Nom nd sift yimo yimamoh nambakfot 276. ³⁸ Ye furkih marnya bomarnyamomn wom witkfot yakmomtn marombt tubatumomm. Memom, “Bok wuskatpno sift yohnitt,” ndnett wom witkfot tubatumomt.

Sift tekthu natonpam frmku bomkumo yuhat

³⁹ Marr mta fnahmotr boskrum htimom wom kmit. Htihato memom, “Fitoh kmiyet?” Be htimom wom bro tek yingafr rim htahato nungum htamor. Htihato kfo ptha memom, “Yinyeft to nd nungumn sift witarfot.” ⁴⁰ Be nd sift hatohmo ankam puk thumomm. Yifhikorhof mnangf hatohmo mtitofrpaf be nyusakakmomfn mnang husf fafho thumomf marombt. Yo wiforparoh yakyuk serthat kasinya-momt. Kasinyamotmm sift nungu thmbko ritone hanymot. ⁴¹ Ritone hanyhato dany nungur sift tone hamuhhato mrhutamot mfhakort. Yifhikoripa nhai mfro mrhutarmot, ndnett burifhut rim fur mfurmoatt yihom thuta mthutahato frdbombra wumtmott. ⁴² Soldiam memom, “Kalabusm fune fnahhato yakmeni-rahm,” ndnetmn memom, “Atufnah-nomm.” ⁴³ Soldiaroh ofisar Porr mdukakhato kforafo mrokfot kfomort. Memorm, “Mirahko inji ananom. Frohm funayetem rom funenihato be nunguko yi hanykfot.

⁴⁴ Frohm fune duhatem romne, nd sifthu pran mkum, marombt frdbombra tubatutam, ndmn mhutahato funeni hanykfot.” Inji kfo hta bohta marnyahato be nd yuhat hikhato nd yima bugam nungu thmbko yi bugamom.

28

Porr kmi yumbrpar Maltat tohmo yuhat

¹ Be kmi yumbrpar rim tnwa bugamonnom. Nd kmi yumbrhu yufat wanymonom kfo memom, “Maltayer.” ² Nd kmi thofm dborioh nefm fak nuhasmomnom. Bro bruyohr niamorn frfon bugamonnom. Nd kmi thofm inji htihato kahm thunahato kfo memom, “Wania wahaunyoko.” ³ Porr nyumm yak habrimoarn kaht mthunamour. Nyumm thuna hanyetrn to yiro nyumtn wom nandomr rhumor. Kaht yakmottr fnahnehato tirt fountamotr. ⁴ Kmi thofm htimomr nandomr yimarhu tirt youtahato yimar hatoh-moatrr kfo memom, “Nd yimar ka wom yimam wasmor. Tekt funenehat nhai nohrfor, ndnetrn nd ror wasmo yimaroh nkifram htihato kfitm, nd nandomr niahato fwitrr.” ⁵ Porr nd nandomr hifa pkriyafomotrr kaht yimor. Porr nd nandomr wasmohat yimar nhai finji narmor. ⁶ Hti haso memooum, “Afo htirahnom Porr nandomr yawohat yubtorahr o suhrahr.” To nhai, hti hasoti hti hasoti nhai suhrmor o finji narmor. Inji htihato kfo memom, “Nd yimar ka tahi yifoner.”

⁷ Nd kmitpno brbo rhuyuk bbinyos nmbuhuat kmithu bro yima Publiusru bbinysos nmbuhayet. Nd yima Publiusru rorhu kmifako hanymornom rorpno husfirpa marm tohmonom. ⁸ Publiusru yifemr dbohnefti rikmbuheft yakmottr rhumour. Porr yihato kfo bruttnamorr yo tir htihato fak marnyamorr. ⁹ Inji namotr wom dbohnet yimam inji htihato yi hanymoatm fak marnyafo hanymourm. ¹⁰ Nom nd kmi yumbr tohmoat hifa hifa fak marnya bomarnyamomnom. Kto tfit nom nd kmit htanyhato yimohat hti nhtamom, nom nd nd duhatenom, rrohm yak hanyhato sift htafohemomnom.

Porr Romt mfnahmo yuhat

¹¹ Maltat afo husfirpa yamm ndha toh tanymonom. Nd wifortpno Aleksandria thofroh sift nd kmi yumbtn afo wifort garimout. Nd siftn tfit kmbrenihato yimonon. Nd sifthu mfhakorn nkifra Susru hus yonfhu nyigatikm rhumoum. ¹² Be nd siftn yihato Sirakyus mfnahmonom. Nd kmitn husfirpa marm tohmonom. ¹³ Ndha Sirakyus htanyhato tfit hi hany hirhany Regiumt mfnahmonom. Ndwom marrn sautkorhof wifort sinyahato tonemot. Tfif ndwom marrn Puteolitn mfnahmonom. ¹⁴ Nd kmi Puteolitn wom Kristen yimam mthihato ndha rpa wikr tohnhomonom. Ndha toh tanyhato Romko mfaufnahmonom. ¹⁵ Nmoh yimatm Romt tohmoam nmoh yi mrokfot wanyakhato rom yihato mtoh gari hasomom Apius Maket yo husfirpa pasindia kunym tohmoa nmbuhuatn. Ndha mnahtiyakhato Porr rom htihato Bro Nkifrar kfo yindhor-hato rorhu yima yuhur tfit bmtamorr.

¹⁶ Rom taun yihato soldiaroh ofisar kfo memor, “Nhai mrokfom Porr turpatr wom kunys tohneft be wom soldiarn tohnhohato hti yukatoh hanykfot.”

Porr Bro Nkifrarhu mrokfot ptha nuhasmo yuhat

¹⁷ Husfirpa marm tonihato Porr nakumorm Judaroh bro yimam Rom taunt tohmoam. Yi rifinymotm kfo memorm, “Barenko, na asha Romko kalabus hnamohat na nhai nom tunom Judanompno wom tamoh nefm narmoyann o nmoh nkifra boririfhut kfo bebrmotant asha Romt kalabus hnarmoma. Be usha Jerusalemko yakkoma Romroh tirt hta furamoma. ¹⁸ Romroh tirm htamotma Rommpno nanhu mrokfom pthamoyanm. Rom nanhu mrokfom wanymohat nhai mrokfom faso yirmom. Hifa wanyhato memom, ‘Ni nhai mrokfo duhate.’ ¹⁹ Tfif Judam inji wanyhato rom nhai yindhormom. Be ndnatn memoya, ‘Sisarn nanhu kotkfot wanyhirahra.’ Na kotmohat nhai marimoya, ‘Tfit tu Judam kotimruham,’ nhai. ²⁰ Nd dukeftpno niko memoya, ‘Aniekahtm mrokfom hiruhanam.’ Nanhu bro dukeft Bro Nkifrar htahato kanga nom Isrernmoh nrfa htiyakyuk yimar bi niamor. Ndar na hatohwa sent to nd yuhatpno ndar sent hatohwant.”

²¹ Tfit Romt tohyuk Judamn kfo memomr, “Nom asha tohyuk Judanom nhai Jerusalemkorhof Judam wom gontwam kfo ptha srhrmom ninhu mrokfo nmbuham yo nhai nmoh womr ndko toh tanyhato faso mkfo bebrmorn o mkfo ptha wokrmorn. ²² Nom kangnom ninhu yima yuhurhu mrokfom ni tunhu tnge wakfo ptha nuhasnnom. Nd ni yauwa nfri yihotat kmi kmim tohwa yimam kfo wok bowokwomt. Ndnetnomn kangnom ni tunn wapthakahtn afo tfit awanynom.”

²³ Be rifinyuk yiham tu Porrpno yudbat yak nhtahato kfo memom nd yihar. Be nd kfomo yiharn wom wom met yindari bugam rpat yi rifinymom Porr rhumo kunysn. Dbha nd king-domkfothu mrokfot Porr ripthakmohat ptha yifungafomor. Bingot profetm kfo ptha htayuk mrokfom yo Mosesrhu nkifra boririfhu mrokfom, ndm ptha nuhas hik bohikmorm. Memor, “Mrokfom kfo nuhas hik bohik marnyarhotanm yima yuhum sinyarahmm Jisasmru tfit yakitohneft.” ²⁴ Wom yimam nd ror pthamo mrokfot wanymohat fak duka tungunamotm. Wom yimam nhai, nhai wuyakrmomt. ²⁵ Be nd yimam tum nhai rpa yima yuhurparpno yirmom. Nhai. Womm wom yima yuhurpno yimom, womm wom yima yuhurpno yimom. Memom, “Yauyakninom,” afo Porr wom mrokfot kfo memorm, “Bro Nkifrarhu Yafothat nmoh nkiframpno profet Aisaiarpno tu kfo mifmifmot. ²⁶ Bro Nkifrarhu Yafothat kfo memot,

‘Waikhnn wakfo nuhas wamitwanm.

Ar yonmari mrokfor wany wanyruhakomn nhai wany sakriruhatko.

Ar yonmari htit htiruhakomn to nhai htiruhatko.

²⁷ To tamohmpno nhai wany sakriruhatm, o nhai htiruhatm?

Nd yimaroh yima yuhum nhai wom dborioh dukef duhatem.

Wanyuk yimbhindangm bi be, bi kihmnimmom

yo yukatohyuk nyngam bi kunyj kihmomm.

Inji ana duhat yima to nyngam yukatohrfomm,

yimbhindangm yima mrokfom wanyrfomm,

yima yuhum dborioh dukefetm rhurfom.

Dborioh dukefetm rhuhato yima yuhum yak kekuthato nanpno tfit niarfom.

Niarfotm na yak marnyarfoyanm.’

Ais 6.9-10

²⁸ Niko womko na kfoyuk mrokfot nhai wuyakrfokomt, ndnettn waduka-twako. Nd nmoh nrfa htiyakyuk mrokfot be bi kitt yima tangimpno. Bi yitatt rom wanyhato wuyakrahmt.”

²⁹ (Porr nd mrokfot kfo nuhasafo-motrm kmiko yihato tfit tum rinatuhakhato natkbotkmom.)

³⁰ Porr hus gunyjimf wom kunys yakhato wikna hanyhato tohmourt. Turhu toh kunys tohhato yimam mrokfefetm yimoahat kakkourm. ³¹ Bro Nkifrarhu kingdomkfothu mrokfom yo Bro Nungothe Jisas Kraisrhu mrokfom, nd ndm nd kmit tohhato kfo nuhas bonuhasmourm. Bro Nkifrarhu mrokfot Porr nd kmit pthamohat nhai yenyjworfnano ptharmor. Nhai. Mrokfot kfo ptha bromort. Ror Bro Nkifrarhu mrokfot kfo pthamohat nhai wom yimar kfo raformorr pthaneft.

**Rom thofroh gontwat
Porr dwandfakhato htafmot
Barkof kfo nuhas mrokfom**

Porr bro kmi Romko tohyuk Kristenmpno tohni hanyhato tfit Spenko yihato gutniusk-fot kfo nuhas yibonetrn ndar kfo nuhas gontwat Rom Kristenmpno bi htaf hanymort. Ndar gontwatin Kraisrhu gutnius mrokfom wandfa hik bohik nuhasmorm. Jisasr hikwa yimam tohwa yuham, nd ndm kfo nuhas bonuhasmorm.

Barkof mrokfom aflo kfo hambonna mrokfom hemorm. Ndm kfonihato tfit rom duka-hato kfo bruttnamo yuham kfo nuhasmorm. Ndm kfo nuhasnihat ee ndar gontwat rompno wandfamo yuhat kfo nuhasmorm. Kfo memor, “Kangko Bro Nkifrar yima rifhumio ahti wutharnom, Jisasrhu mrokforpam yakinohhato hikkfot. Hikrahkomm Bro Nkifrar nikmoh yima rifhum hti wutharahrm” (1:17). Porr kfo memor, “Nhai wom dborioh yimar tohkahr. Fasoh nefrpam kmi kmim furkihwomm. Tu Judami yima tangim be nd ruhefrpat korhm. Ndnettn Bro Nkifrar inji hti yuhuafhato turhu yon Jisasrpnbro hingrneft hingrnamort. Jisasrn yihotat fak hta bohtamort. Fitoh yimam Jisasr hingrnamo hingrneft mhtiyakhato rroh bro dukefm rorn htemm, nd yimam o metm yakruharm turpno rim tohrahm. Rim tohhato Jisasrhu nmemrom rhurahm.”

Fitoh yimar Bro Nkifrar bi yekrr turpno brbo fak hterr, nd yimar nfri toheft, nfri wuyauyau nmbuhampno tohwor. Nd yimar Bro Nkifrarpno tohwarn Bro Nkifrarhu Yafothat yuht yimar thu nhombra bugewattr, nhai fasoh fasoh nefm o noheft niahato yak kasuhkfot. Sapta 5-8 Porr kfo hik bohikmorm Bro Nkifrarhu kfo yirmoh mrokforoh mna yuham yo Jisasr hikwa yimam Bro Nkifrarhu Yafothat thu nhombrahato hingrnewa bbuieft. Ndm kfo nuhasmorm.

Sapta 9-11: Porr yakmo wom bro krho nmbuhathu mrokfom htamor. Porr Judayer. Bro Nkifrar nd Juda frikeftn kfo memor, “Juda frikeft tom tu tannefenm.” Jisasr nda bbinysoft niamohat, Judam nhai Jisasrpnbro yirmoam. Yima tangirpam Jisasr brbo yimoum, tu Judam nhai. Porr kfo memor, “Nd tu tannefenm (Judam) nhai htirmomt nd Bro Nkifrar hingrnamo hingrneft. Rom dukahato hingrnamort nd bro hingrneft. To niko mirahko ka Judam inji namo nmbuhat ka Bro Nkifrar htihato nhai yakruhatrm. Nhai. Kto rituhakruharm turpno rim tohrahm.”

Gontwat htamo wuroh mrokfom Kristenm nayuk nefm, ndm wurohm htamorm. Nd womroh yak marnya nmbuham, yo Bro Nkifrarhu hingrneft hingrna yuham, yo gafman hingrneft tohyuk yufet yimaro yinhithu toh yuham, ndm wurohm kfo pthamorm.

**Jisas Kraisr yakinohhato hikneftn Bro Nkifrar yima yuhum hti
wuthewurm**

(Sapta 1-4)

Porr yakmo aposer hingrneftu kfo nuhas mrokfot

¹ Na Pora, nann ndar gontwat wandfiwanko. Jisas Kraisr nann aposer hingrneft fak htamor. Na be rorhu yinhithu tohhato nd aposer hingrneft yakinohwoyantn Bro Nkifrarhu gutnius mrokfot kfo ptha htfaswant.

² Bi bingot nkiframpno tohmo profetmpno Bro Nkifrar kfo nuhas memor, “Kto kmi kmim nanhu gutnius wany bugarahmt.” Nkifram inji wanyhato nd Bro Nkifrar kfo nuhas mrokfom gonborngtn htatamomm. ³ Nd gutnius mrokfom turhu yonrhu kfo tndh mrokfoym. Nd yonr tfit yima mifr kanjo miyak dborhamohat King Defitrhu frikek yuhatn mifak dborhamor. ⁴ To rorhu ruheft finji rhumor? Bro Nkifrar memor, “Athus habokknakahtanr bbinysof thofm hti hamuh mirahm, ‘Arr tu Bro Nkifrarhu yoner.’” Nd dukeftpno yopt ruhetr kasinyamorr. Kasinyahato thu haboknamorr. Nd

yonr na kfiwar, Jisas Kraiser, nmoh Nungothetr. ⁵ Bro Nkifrar nann aposer hingrneft yak htamohat memor, “Kraisrhu yufatpno nd gutnius mrokfothu mna yuhat kfo tndh hik nuhasrahrm yima tangim. Yima tangim wany hik bohikruhamn Jisasrpno yarim fnahnerahm. Yarim fnahnehato be rorhu skurfitn tohrahm.” ⁶ Niko, yima tangiko, be bi Jisas Kraisrhu skurfitn tohwoko. Bro Nkifrar bi inji fak htamorko.

⁷ Bro Nkifrar be tu mfro dukewurko. Niko, Rom thofko, be bi rorhu yufatn korhko. Bro Yifemri Nungothet Jisas Kraisr, nikmoh yima yuhum ayak marnya bomarnyakahtfko yima yuhum mirhurahmko.

Porr Romroh htineft duka hasomour

⁸ Barkof kfo nuhas mrokfot kanga akfo nuhasanko. Wawanyko, kmiya-kmim niko Jisas Kraisr yikitoh kihwa nmbuhat bi kfo ptha htfaswomt. Na ndt wanyhato Bro Nkifrar tu kfo yindhor mifwanr. ⁹ Bro Nkifrarhu yonrhu gutniuskfot kfo ptha htfasneft awi kfo ptha htfaswant nhai yafho thukahant. Bro Nkifrar na hti mifwora, yiha yiham be nikmoh dukefrn korhwa. ¹⁰ Nikmoh dukefrn rhuhato kfo bruttna thoft to be nikmoh nia htiyuk yihotamm Bro Nkifrar kfo bruttniwa. Tu Bro Nkifrarn kangra Rom thofm wayau hafot htfasnm, nhai mrokfom. Na nieruha. ¹¹ Yima yuhur mfro wayibon sinyewur nikompno yihato tohneft. Kanga, nikompno anekahann kfo bmta mrokfom ahiyanko. Kfo bmta mrokfom hirhotanko Bro Nkifrar yikitoh kihrahkomr. ¹² Nanhu dukeft kanga na Bro Nkifrar yak hikwa yuhat niko htiruhakomn yima yuhum yakrahko. Yo na nhaf inji, niko Bro Nkifrar hikwa yuhat htirhoyann yima yuhur yakruha.

¹³ Wom mrokfot kanga akfo nuhasanko. Niko mirahko ka ror nhai yibonkahr nikmoh yi htineft. Nhai. Na yibon hatohmaa nikmoh yi htineft, tmifm bok nefm wuyak ayakmouma. Memoya, “Aikahann Romko tohwa Kristenm kfo bmta mrokfefm hiruhanm wom yima tangim mrokfo hemo kanjo.” ¹⁴ Ndar na hingrnewa hingrneft nhai Grikrpampnon o skur yiyet kmirpampno tohhato na hingrnakfot. Nhai. Wom riruh aruh kmim yo nd skur yi juha kmim rpat buga na tohnhohato Bro Nkifrarhu hingrneft hingrnakfot. ¹⁵ Ndnetann nanhu yima yuhur wayibon sinyewur niko Rom thofkompmo yi tohhato gutniuskfot kfo nuhasneft.

Bro Nkifrarhu gutnius mrokfot tu yafothetet

¹⁶ Gutniuskfothu kfo ptha htfasneft na nhai yimtna hanykaha. Nhai. Na bi htimoyant gutniuskfothu bbukeft. Froh froh yimam gutnius mrokfot wany yakiohato hik thoft Bro Nkifrar kekworm. Afo Judam fakmor. Rom yakhany yakhanymorn, arihat bi yima tangim kak hanitr. ¹⁷ Nd gutnius mrokfothu hik yuhatn met yindarioh yima rawofm hifa hti wuthewurm. Yimam gutnius mrokfot wany yakiohato hik thoft yima yuhum yak wus bowuswarm yima rifhum wutham korhm. Nkifra profetr nhaf inji kfo memor, “Yimam Bro Nkifrar yikitoh kihhato hifa tohwam, rom nhai mrokfom, toh nkifranirahm.”

Nhai wom hifa yufayet yimar tohkahr

¹⁸ Nd yimam, Bro Nkifrar myafho-nihato be nd fasoh fasoh nefmn fknihato Bro Nkifrarhu dukefentr rhu won duha yita yimam, miyorhekwa Bro Nkifrar namburworm.

¹⁹ Nd yimam Bro Nkifrar hingrnayuk htitwomt. To nhai nd ror hingrnayuk hingrneft mhtiyakhato yikitohkahmr, ndnetrn namburworm. ²⁰ Bi ndar bbinysoft hingrnamo yiha ritohakmo yimam bi hti hawihnamomt Bro Nkifrarhu ruheft yo ror hingrna hawihnamo wonk wonk bbukefm, ndm hti buga hnamomm. Nhai tfit wom yimar riyaktahato kfo miruhatr, “O, na nhai htirmoyanm nd Bro Nkifrar hingrna hawihnam yingrnafm o bbukefm.” Nhai.

²¹ Yima tangim Bro Nkifrarhu tamoh tamoh nefm, wonk wonk bbukefm bi hti hnayetm, to nhai marimom, “Tor tu Bro Nkifrar. Rorn yikitohhato kfo yindhor inji nanom.” Nhai. Mmo yimam kanjo yiro kspitat tohhato fau mmo bammomom. ²² Nd fasoh mmo rifhur rhumoatrm kfo memom, “Nom hifa dukefetenom.” To nhai, mumetm kanjo mmo bammomom. ²³ Mmo bammohato tu toh nkifret Nkiframifr yafhonihato foh

nungam, nandomm, yimam, yifonm, tamoh tamohm yoh nhombrahato ndmn tfit kfo tatomom.

Tuhan yindars newa fasoh fasoh nefm

²⁴ Ndnettun tuhan yindars to nd fasoh fasoh nefm nayetmn Bro Nkifrar fukatoh marsisamorm. Yukatoh marsisamoatrm turoh fasoh fasoh nefm hatonemoatmm yau fonihoh nefm hikmom. Nhai tu yimaroh nefm hikrmom. Be tu yimaroh yak yimtnayuk nefm namom. ²⁵ Tu Bro Nkifrar yak nuhasmo nefm yafhonihato tfit turoh yifonm kfo tatohato hikmom. To Bro Nkifrar torpar tu yiha yiha kfo tato hatohyuk Nkifrar. Ndt tu kfoyet. To nhai, ndhtet met yindarim tu Bro Nkifrar hingrna htayuk tamoh tamohm, ndmn kfo tatohato hikmom. Nhai Bro Nkifrar kfo tatohato hikrmom. Nhai.

²⁶ Ndnettun Bro Nkifrar yukatoh marsisamoatrm to be nd turoh fasoh fasoh nefmn thu kasi htatamoatmm metm nhai yindarimpno yirmoam nhai, metm tfit tum metm nafak kafrohmooum. ²⁷ Yindarim nhaf inji buga. Nhai metmpno yirmoam. Tfit tum yindarim nahtimoum. Tum yindarim inji namoamn to be tumn fasoh tkitt htamom.

²⁸ Nhai be marimom, “Bro Nkifra-rparhu yinhit tohhato rorn yak htarahrnom.” Nhai nd dukefr rhurmoarm. Nhai. Turoh fasoh dukefm yimoatm to be Bro Nkifrar riyaktahato be yukatoh marsisamoatrm turoh fasoh nefm namoum. ²⁹ Be nd fasoh yima yuhu bebim rhumoatmm tuhan yindarim nhai tu dborioh nefm yakitohrmoam. Wuskat tamoh hmarsiyakt kakmoumt. Womnam be wanambur fura sinyahato womm faso kak beb thumoumm. Womroh dborioh shrm htimoahat yima yuhum be sinyamoumm. Duka memooum, “Na ndur shrt ayakitoha o banuha.” Yimaroh was dbufnahneft nhai yihom tohaf hanyrmoatm. Womm nhai yak nanymarmoamm. Nndo you fuham kekutmoum. Rroh mrokfom pthayukm yak suka bosuka marnyamoatmm womm memooum, ka tu kfot kfiwum. Wom metenm, yindariyenm riyak-moamm kfo nyina fna bonyinga fnahtamoumm. Womroh mrokfefm romn tafurnya furamoumm. Ndhtet ndhtet fasoh fasoh nefm furkihmoumm. Yo womnam inji namoum. ³⁰ Yima rifiny buharn womm kfo wok fura-moumm. Bro Nkifrar tu be nhai mif wofnrmoamr. Womm kfo huta bohutamoumm tamoh tamohmpno. Rroh dukeft duka memooum, “Nomrpanom tamoh mrokfom pthahato womm be hikkfot.” Turoh yufam be yura yura htahato kfo hagrhamoum. Fasoh fasoh nefroh na yuham romn tfit wom nfri nfri nefm mhfnahnamoumm. Romn nd fasoh nefroh mnat harhumoumt. Yifammam pthayuk mrokfom nhai hikrmoamm.

³¹ Nhai wom dborioh dukefm rhu mifrmoom. Tum bi kfo htayuk mrokfo yuham nhai hikrmoamm. Nhai turoh najomrompno nmemrompno mndarem-rompno nayak marnyahato tohrmoam. Wom yima furam nhai yak marnyakrmoamm. ³² Bro Nkifrarhu mrokfot kfo kangt, “Ndhtet net yimam nhai toh buhtakfot.” Nd mrokfot bi wanyetm. To nhai mwany yakrmiyakrmoamt. Nhai. Hany yukukaknimoum. Yo nhaft nhai be nd fasoh nefrpam narmoam. Nhai. Yimam nd fasoh fasoh nefm namoam tfit kfo yindhor boyindhor marnyamoumm.

Bro Nkifrarhu kotkfot

¹ To tfit niko womko mirahko inji htihato akfo grha amanyom, “Tu hifa Bro Nkifrar nd fasoh fasoh net yima tangim afo yak gnngtatrahrm.” Niko inji kfoyuk yimako duka hik marnyahato ndhtet mrokfot pthakfot. Niko to rpahtet net yima bugayeko. Bro Nkifrar amekahr, “Finji anayanko,” niko finji kforfoko? ² Wahtiko, Bro Nkifrar yima tangim yak gnngtat thombat nhai be sfnoh inji naruhatr. Nhai. Tum niwa fasoh nefmpno yak gnngtatrahrm. ³ Ndnettun niko duka hik marnyahato womm kfo pthakfot. Ni mirahn ka womrpam mrokfetm rhurahm. Bro Nkifrar tfit mekaht, “Kekutni finji akfoyann,” finji kforuha? Nhai wom yak rafo mrokfot turuhatr. Niko to rpahtet fasoh net yima bugayeko. ⁴ Niko mirahko Bro Nkifrar nikompno niwa dborioh nefm ariyak htafnom. Niko niwa fasoh nefm Bro Nkifrar nhai htihato yudbat nambur-kahr. Nhai. Hifa hifa yima yuhur hmbritworko. Duka kangr, “Hifa yima yuhur hmbrekahtanm,

ndt htiruharn rroh fasoh nefm myafhoni hanyrahmm.” ⁵ To nhai, nikmoh yima yuhum tahiawamn nhai yima yuhum yak kekutkahmko. Be nd fasoh dukefrpar yorhwakomn nd fasoh nefm mfro mfro newakomn bi kangm kminysofem. Be tukomn Bro Nkifrarhu namburpam fknitko wukier kanjo. Kto mekaht, kotkfot ayakithant nd yiha rpa rpa nefroh krhopam yak nhombra bugarah-komm. ⁶ Yima yima niwa rpa rpa nefm hti nhombrak hanyhato rpa rpa nefroh krhopam yak nhombra hany-rahkomm. ⁷ Yimar bbinysoft tohhato be dborior dborior nefrpam yakitoh-hato rorhu dukefr Bro Nkifrapno mrhuniyuk dukefrn korhwor yo toh hatohyuk bro yufati toh nmbuhat duka duka korhr, nd yimar Bro Nkifrapno mtoh nkifranirahr. ⁸ Tfif nd wom yimar bbinysoft tohhato fasoh nefm nahato kfo kangr, “Kokrwa Bro Nkifrar kfo htayuk mrokfom hikneft. Tukanhu duka fijo tohruha,” nd yimar Bro Nkifrar masat namburrahrr. ⁹ Fasoh net yima bugam bro krhopam hiruhatr yima yuhum nur bugarahmm. Krhopam tu Judam-pno riyonihiyakruhatm ee bt tom yima tangimwe. ¹⁰ Dborior nefm yikitohet yima bugam Bro Nkifrar kfo yindhor marnyaruham dborior rhu nmbuhat hirahrm. Nd dborior rhu nmbuhat he shombat nhaf tu Judam afo dborior rhu nmbuhat yakinruhatm ee btn yima tangim. ¹¹ Bro Nkifrar nhai yimam yikitohwa yufam o rom yikitohyuk tamoh tamohm htihato tamohmn hekahrm. Nhai. Ndnetrn Judami yima tangim rpahtet neft newurm.

¹² Fasoh nefm nayet yima tangim Mosesrhu nkifra boririfhut yak duham, Bro Nkifrar yak thurahrm. Yo fasoh nefm nayet Judam bi rorhu boririfhut yaketm, rom tum boririfhu mrokfom riyak htafnihato fasoh nefm niwa nmbuhatn kotkfot tohrahm. Kotkfot tohhato kotkfotn yak nhtarahtm rroh mrokfom. ¹³ Yimam boririfhut wany marsisewam, nd yimaro yima rawofm Bro Nkifrar nhai yak wushato hti wuthakahrm. Nhai. Yimam rorhu boririfhut wanyhato hikwarpamn, nd yimaro toh rawofm yak wushato wutham korhmm. ¹⁴ Yima tangim tafi Mosesrhu boririfhut wany juha be turoh fijo turoh boririfhut hikwamn, tumn kak nhtewumm tum niwa nefm. ¹⁵ Yimam inji hikwam bi tu yiro yima yuhur rihtayuk yima dukefr hikwom. Tamoh nefm naneft nd dukefr yak hta bohtewurm. ¹⁶ Gutniuskfot na kmi kmim kfo htfaswat kfo kangt, “Kto tu wuroh yiharn nd kon kafrohet kon kafrohet nefm tafontn Jisas Kraisr yak htarahrm. Fasoh net yima tangim yo fasoh net Judam rpatn yak thurahrm. Tu Jisasrn wuroh bro mrokfot yikitohrahrt.”

Judam kangm, “Boririfhut yikitohhato dborior nefm hikwonom.”

¹⁷ Niko Judako wom mrokfot kforhotant wawanswakomt. Niko kfo grha kamukko, “Nom Judanom, nomrpanomn tu Bro Nkifrarhu boririfhut yikitohwatnom, rorhu kmiyenom. ¹⁸ Rorhu kminomn boririfhut yak hta bohtiwattnom Bro Nkifrarhu dukefr hti hikwanomn nd yuhat hikwonom.” ¹⁹ Yo kamukko, “Nyinga kunyjetm yak nuhasak hanitnomm yimam kshr yikitohhato womm yak nukak hanita kanjo. ²⁰ Bro Nkifrarhu tu fipet boririfhut yikitoh-hato yimam yon mumenm kanjo mmo bamumiwam nomn yihato kak hta bohtewunomm.” ²¹ Niko inji kfo grhiwako, mirahko womrpam akfo htanom. Tuko afo mhtiyakkfot. Womm kfo kangkomm, “Mirahko arikohnom,” to ka niko nhai rikohba inji nakahko? ²² Ramet tuhanroh rim fnahneft kfo pthiwakomn, to ka niko nhai inji nakahko? Tahi yifonroh kfo tatoneft kfo rafiwakomtn, to ka niko nhai tahi rmon rhuyuk yifonm rikohba inji nakahko? ²³ Niko kfo grha yindhor kangko, “Nom Judanom Bro Nkifrarhu boririfhut yikitohet kmiyenom.” To tfif nd boririfhut riyak htefiwohat Bro Nkifrar kak yimtnewuko. ²⁴ Bingot tohmo profetm wom mrokfot kfo memom, “Niko Judako inji niwatko yima tangim Bro Nkifrar kfo garibwomr.”

Tha puk thunef

²⁵ Bi barkof kfoyuk mrokfot tfit wompam kforhota wawanswako. Niko Judako kfo kangko, “Nom Judanom tu nkifra tha pukthu yuhat yikitohwatnom Bro Nkifrarhu yonenom.” Ndte nhai. Rote Bro Nkifrarhu kfo boririfhu mrokfompno nd hingrneft rpat yikitohneft, ndt hifa. To nd tha puk thunefrpat yikitohhato Bro Nkifrarhu boririfhut hanyjbornaneft tha puk thu duha yima tangim kanjo inji tohwoko. ²⁶ Tha puk thu duha

kmiroh toh nmbuham Bro Nkifrarhu boririfhu yuhatn toh hikneft, to be Bro Nkifrar htitrm turhu frikeft kanjo. ²⁷ Niko tha pukwa Judako boririfhut bi hanyjbornewukomt. Nd tha puk thu duha yimam, tu boririfhu yuhat toh hikwam, kto nd yimampno mrokfetko rhurahko. ²⁸ Nd na kfo hne mrokfom tfit kfo hik marnyarhotanm wawany marnyawakomm. Yimar, Juda tangishofr tohyukr, nd tha puk thunefrpak yakinohhato kfo kangr, “Na Bro Nkifrarhu yona,” nd yimar nhai tu Juda mifr rhukahr. Nhai. ²⁹ Yimar be tu Bro Nkifrarhu duka yima yuhur korhr, nd yimarn tu Juda mifr korhr. Bro Nkifrar nhai tha pukneft yukatoh-kahr. Nhai. Yimarpam wom yimarhu tha pukneft htihato kfo yindhorwom. Yimar be turhu yima yuhur Bro Nkifrarhu Yafothat yak wus bowuswatr yima rifhur wuthar korhr, tor nd yimarn Bro Nkifrar yukatohhato kfo yindhorwor.

3

Nhai fasoh nefmn yak nohruhatmm dborioh nefm

¹ Bro Nkifrar nd tha pukneft ahti duha yirt, Judam ka be yufapa duhatm rhurfomn nd rroh tha pukneft nhai wom fipa duhatt rhurfott? ² Nhai. Judam yufayetem. Bro Nkifrar barkof htayuk boririfhut rroh tirtn htamort. Rroh tirtn rhuhato romn kakitohahukwomr. ³ Wom Judam nd Bro Nkifrar htayuk boririfhut hik duha rhuneft, Bro Nkifrar ka nhai wom hikruhatr nd Judampno bi kfo htayuk mrokfom? ⁴ Nhai. Rompno bi finji finji kfir, ror to be nd tur kfoyuk mrokfo yuharpatt hikwor. Nhai yima mifnom kanjo kfo nhehtahato tfit mikfota mkfotakah. King Defitr kfoyuk mrokfom kanjo ror kfo memohat,

“Yimam htirahmm ni kfoyuk mrokfom tu fipet mrokfom kforahn.

Yimam inji htihato mirahm ayak wunanomn,

to nhai, ninn mrokfom myakni myakni kfo wunafrahn.”

Sng 51.4

⁵ Wom Judam kfo mirahm, “Nmoh fasoh nefm yorhwatm Bro Nkifrarhu dborioh neft tafont mfrfnahnewut. Nmoh fasoh nefm arhu duha yim to fitoh yuhatn rorhu dborioh neft tafont mfrfnahnarfot? Nmoh fasoh nefm kfiwatm rorhu dborioh neft mfrfnah-newut. Ndnett to tamohmpno tfit kfo yamukar, yak gnngtat gnngiruhanm?” Yimar inji kfoneft yima dukef duha yimar kanjo inji pthewur. ⁶ Bro Nkifrar kangr ayak gnngttanm, nhai mrokfom. Inji anatwarnom. Yo tfit kto tur ndar bbinyosothu tuhan yindari bugaroh kotkfot yakinohhirahrm. ⁷ Wom Judam duka mirahm, “Nmoh mrokfom kfo fura kfo nhehwatnomm, ee Bro Nkifrar inji htihato rorhu mrokfom kfo yembindthato kfo mifworm. Nom akfo fura duha yinom Bro Nkifrarhu mrokfom nhai kfo yembindthato kfo mifrotm. Ndnett to tamohmpno tfit kfo yamuka, yak gnngtat gnngi-ruhanm?” Inji kfoyuk yimar tu be yima dukef duha yimar inji kfiwur. ⁸ Be nd yimarhu mrokfom aptha hik marnyarm, ka kfo marifonom, “To btn nom fasoh fasoh nefm ananom. Inji nakahtnom yimam Bro Nkifrar hifa hti yindhorrahmr.” Wom yimam nanhu yufat yutahato kfo kangm, “Rorn inji wapthakmor.” Inji kfo wokwoma. Tamoh tamoh nefm nd yimam nayukm Bro Nkifrar yak nhombra bugaruham fasoh tkit yuhatn yak hatohaforahrm.

Nhai ndar bbinyosothu wom yimar dborioh neft nakahr

⁹ Nom Judanmoh toh nmbuhati wom yima tangiroh toh nmbuhat Bro Nkifrar finji htitar? Bi kfo hnnyanko Judanomi yima tangim rpahtet ruheft korhnom. Rpahtet fasoh nefrpam kuny ki hmbrtamnom nd fasoh nefmn hatonitmnom. ¹⁰ Bro Nkifrarhu rfa borngt yorhwa mrokfot to kfo kangt,

“Nhai wom rpa yimar rorhu yima rifhurio
wuthar rhuhato dborioh yimar tohkahr.

¹¹ Nhai wom yimar Bro Nkifrarhu dukefrn rhuhato
kfo bruttna ba inji nawon o rorpno brbo yi rhuwon inji nakahr. Nhai.

¹² Kmi kmim be tu mong troh twanhiumr.

Nhai ndhtet dborioh dukefm rhukahmm.

Nhai wom rpa dborioh net yimar ndar bbinysoft tohkahr.”

Sng 14.1-3

- ¹³ “Rroh tngm nnarihayem. Womm yak nnariyefiwatmm fasoh yuham kitwom.” *Sng 5.9*
- ¹⁴ “Womm nhai be tu hifa nyingar hmbrikahmm.
Riyakhato kfo rindho borindho thuwomm.” *Sng 10.7*
- ¹⁵ “Kangm, ‘Be asomif womm amtuhaknikahnom
aye nohnomm gobenm kanjo.’
- ¹⁶ Wom fitoh kmim yinyeft wuskapam tamohm riyaka-hukamm
kafring bokafring tanyahu-kammn
yo tfit wom kmim yinyeft to be rpahtet neft nahukmm.
Kmi kmiroh wuska yawonr tamohr be nur krer korhr.
- ¹⁷ Rroh toheft nhai wommpno nayak marnyahato rpat tohkfot.
Tu be nhai mif.” *Ais 59.7-8*
- ¹⁸ “Bro Nkifrar nhai duka yanho mifikahmr.” *Sng 36.1*
- ¹⁹ Nom Judanom bi hti duka tungunewunom, nom nd boririfhuthu yinhit tohwonom.
Nhai wom Judar tfit wom yak hhrif mrokfot kfo miruhatr, “Nhai dborioh dukeftpno nd
fasoh nefm narmoyanm.” Nhais wom dborioh yimar asha tohkahr. Nd ar bbinyosfhu
tuhan yindars Bro Nkifrapno bi mrokfet bugayetem. ²⁰ Ndnettn nhai boririfhu
mrokforoh hikneftn Bro Nkifrar yukatohhato yima yuhum yak wuskahrnom. Nhais. Nom
niwa nefm nd boririfhutn yak nuhas kangtnom ndt fasoh nefet.

Yimar Kraisr hikwar dborioh yufeter

²¹ To tfit arihat yima toh rawofm tu Bro Nkifrar hti wutha marnyewa htiyeftn Bro
Nkifrar kfo pthewur. Nhais boririfhu hikneftn kfo pthakahr. Nd yima toh rawofroh
hti wutha yuhat bi Mosesr pthamor. Yo tfit profetm pthamohat, Mosesr pthamo
yuhatn ptha hikmom. ²² Bro Nkifrar yima toh rawofm hti wutha thoft nhai be hti
wutha furakahrm. Yimaro hukefmn hti hikwor. Tu yimamn duka kangm, “Nmoh
fasoh fasoh nefm bi Jisas Kraisrn hanohnimorm.” Yimam inji dukewam, nd yimaro
yima toh rawofm hti wuthewurm. Bro Nkifrar nhai Judam yikitohwa yufam o yima
tangiroh tamoh tamohm yukatohkahr. Nhais. ²³ Kmi kmi buganom bi fasoh fasoh nefmn
kasimotmnom to be Bro Nkifrar frtromornom. Nhais nompno brbo niarmoar. ²⁴ Nmoh
fasoh nefmn Jisas Kraisr suh nanyormorm. Bro Nkifrar inji htihato yuhuwa mornom.
Yuhuwa mornom nmoh fasoh fasoh nefm fak wus bowus thumorm. ²⁵⁻²⁶ Bingot toh hnamo
fasoh net yimam Bro Nkifrar hti namburmour. Inji hti namburmoahat nhai finji
narmoarm. Be inji nyingarpaye kukatoh marsisamour. Duka memour, “Kto rom
nayuk fasoh fasoh nefm nhai yukatoh marsisarhotanm arihat niwa kanjo. Nhais. Rroh
fasoh fasoh nefm yak thuhirhotanm hti duka tunguna-rahma.” To be nd mrokfot inji
ruh hnamotn tfit arihat nd fasoh nefroh yak thuyuk yihotat Bro Nkifrar hingrnamotrt
htitnomt bi. Jisasr nohmo yuhatn Bro Nkifrar hti nambur rifhur minoh hmbremorr.
Jisasr hti kkut yohnemohat Bro Nkifrar be kukatoh hasiwr. Fitoh yimam kfo kangm,
“Nom nahnayuk fasoh fasoh nefm bi Jisasr hti kkupamn fak thumomm,” yimam inji
dukayukm, Bro Nkifrar hti wuthewurm.

²⁷⁻²⁸ Ndnettn mirahko boririfhut ahikkahnomn akfo grhanom. Nhais. Arihat nhai
boririfhut hiket yimaro toh rawofmn hti wuthakahr. Nhais. Arihat bi nd Jisasr hikwa
yimarpah toh rawofmn hti wuthewur.

²⁹ Bro Nkifrar nhai be turhu kmi Judarpam yukatohkahr. Nhais. Wom yima tangim
rpat kukatohworm. ³⁰ Nhais wom nkifrarn yima tangim yak wuskahr. Nhais. Nd rpa
Bro Nkifrapar Judami yima tangim kak wusworm. Fitoh yimamn Jisasr nohmo yuhat
duka kangmt, “Bi nd Jisasrn suh nanyormorm nmoh fasoh nefm,” inji dukiwa yimaro
yima yuhum wutham korhmm. ³¹ To mirahko ka bi Jisasr hikwanomn nd boririfhut bi
fipa duhattn riyak htafrahnomt. Nhais. Nom Jisasr hikneft nom tohhato wiyauyaunetf,
tamoh nefm nanef, boririfhut kfiwa yuhatn hikwonom.

Bro Nkifrar Abrahamrhu yima rishurio hifa hti wuthamo yuhat

¹ Bro Nkifrar yimaro yima tohrawofm hti wutha thofte finji niwatm hifa htitarm? Nmoh nkifra Abrahamrhu yima tohrawofm Bro Nkifrar hifa hti wuthamo yuhat tndh hikrhota wawanywako. ² Abrahamr rorhu ruheft hifa rhuhato Bro Nkifrar ahti wutharr, Abrahamr ka kfo grharfor? Uwa. Kfo grharfor. To nhai, Abrahamr nhai nd yuhat hikrmor. ³ Bro Nkifrarhu rfa borngt kfo kangt, “Abrahamr Bro Nkifrar pthamo mroksefm yakitoh kihmotrm Bro Nkifrar rorhu yima yuhur hti wuthahemorr.” ⁴ Yimar wom hingrnafam hingrnahato maruham yak thombat nhai kfo mekahr, “Be he marufat kahukma.” Nhai. Ror turhu hingrna yuhatn nd marum kekworm. ⁵ To yimar kangr Bro Nkifrar ahti wuthara, ka boririfhut yakitohhato dborioh dborioh nefm naruharn o hingrnefm hingrnaruhan hti wutharahrr? Nhai. Yimar Bro Nkifrar yakitoh kihhato rorhu yima dukefr riduka kangrr, “Fasoh fasoh net yimam Bro Nkifrar yuhuwaahato yak marnya bomarnyewatrm yima yuhum wutham korhmm.” Inji dukarahr, Bro Nkifrar yak wutharuhattr yima yuhur wuthar rhurahrr. ⁶ To yimam nkifra boririfhut yakitoh duhatm, be nd Bro Nkifrarhu yakitoh kih yuhatn Bro Nkifrar hti wuthahato kfo yindhorwam, to ndmn Defitr kfo memor,

⁷ “Fitoh yimaro fasoh nefm

Bro Nkifrar yak wus bowushi-hato bi fafho thurm,
nd yimam yindhorkfot.
Bro Nkifrar hifa htitrm.

⁸ Fitoh yimar Bror nhai wom duka hany hikahrr rorhu fasoh fasoh nefm,
nd yimar yindhorfot.

Bro Nkifrar hifa htitrr.”

Sng 32.1-2

⁹ Nd Defitr kfomo mrokfot finji dukewakomt? Bro Nkifrar, ror hikwa tha puktuhet yimarpam ka hifa htitworm? Nhai. Ror hikwa tha puktuhet yimami tha pukthu duha yimam rpat hifa htitworm. Bi kfiyanko, Abrahamr Bro Nkifrar pthamo mroksefm yakitoh kihmotrm rorhu yima yuhur Bro Nkifrar hti wuthakmorr. ¹⁰ Bro Nkifrar Abrahamr rihti wuthak-mohat tafi tha puk duhatrn yima yuhur rihti wuthakmorr. ¹¹ Rihti wuthakhato kfo memor, “Ni barkof yima nanhu mrokfom riyakitoh kihakmotnm yima yuhur hti wuthamoyann. Ndnettn tha wapuktwa.” Ndnettn tha puk duha yima tangim Bro Nkifrarhu mrokfom yakitoh kihhato yima yuhum hti wuthamom, Abrahamr tor nd kmi kmiroh barkof nkifra yimar. ¹² To mirahko ka nd rpayet. Abrahamr tor tha puket Judaroh barkof nkifra yimar Bro Nkifrar hti wuthamor. Ror tafi tha puk duha bi Bro Nkifrar rifakitoh kihakmor. Judam, Abrahamr namo neft hikmo yuhatn, Abrahamr tor Judaroh barkof nkifrar.

Tamoh tamohm, Bro Nkifrar kfo htayukm, Bro Nkifrar hikwa yimamn kekwomm

¹³ Bingot Bro Nkifrar Abrahamrpn yihato heyuk rhu marnya nmbuhat kfo nuhas-mohat nhai boririfhut hikmoa nmbuhat htihato rhu marnya nmbuhat kfo nuhasrmorr. Nhai. Abrahamr tu Bro Nkifrarh yakitoh kihmotr Bro Nkifrar hti wuthahato kfo nuhas memor, “Kto ninhu frikeftn hifa rhu marnya nmbuhat hiruhanm.” ¹⁴⁻¹⁵ Mirahko ka boririfhut hik-ruhanomn ee Bro Nkifrar kfo htayuk hifa rhu nmbuham hirahrnom. Nhai. Mrokfot nhai inji yikaht. To nom boririfhuthu hik yuhat nhai hik marnyakahnomt, wom kfo boririfhu mrokfom yak frikatiyafoni hanitnomm. Yak frikatini hanitatnomm Bro Nkifrar namburwornom. Ndnettn nhai boririfhuthu hik yuhat htihato ror kfo htayuk hifa rhu nmbuhat hiruhatrnom. Nhai. Bro Nkifrarhu mrokforoh yakitohhato hikneftn htiruharn ee btn ror kfo htayuk hifa rhu nmbuhat hirahrnom.

¹⁶ Ndnettn nmoh dukefm nd Bro Nkifrar bi kfo htayuk tamoh tamohroh yak dukefrn rhukfot. Bro Nkifrar nmoh yima yuhum inji htiruharmn nd ror kfo htayuk tamoh tamohm hirahrnom. Arihat fitoh fitoh Judami yima tangim Bro Nkifrar kfo htayuk mrokforoh dukefrn korhm, nd yimam kekwomm nd ror kfo htayuk tamoh

tamohm. Ndhtet dukefrpno ruhet yimam Abrahamrhu yonm korhm. Abrahamrhu yonm yorhwamm nd rorhu yufatpno kfo htamo tamoh rhu nmbuham o nefm nd yonmn yakrahmm. ¹⁷ To Bro Nkifrarhu rfa borngt Abrahamrhu toh yuhat kfo memot, “Na, Bro Nkifraya, kforuha tangi tangi kasinyarahn.” Bro Nkifrarhu htiyefit inji htitrt. Rorhu tngt yafothayet. Ror kfoneft noheh yimaroh sinyaneft noheh yimam tfit sinyarfom. Abrahamrhu bro dukeft duka memor, “Bro Nkifrar tamoh mrokfom rorhu tngt bi kfoneft nhai yi furakaht rorhu tngt. Fipett korht.”

¹⁸⁻¹⁹ Abrahamrhu yon frikefthu kasinya yuhat Bro Nkifrar nd kfomot, Abrahamrwanymohat nhai marimor, “No sawohno bi tabon bugahato bi bas kasi hmbriyetno. Na bi 100 gunyjimeta. Nhai tfit wom yonm nasakkfot.” Nd yon frikefthu kasinya yuhat Bro Nkifrar kfomot nhai marimor, “Duka mumafruhant.” Nd dukefr be yima yuhur rhuhato be duka hasomour. Dukahaso dukahaso ee kto htimort nd Bro Nkifrar kfoyuk mrokfot fipett rhumot. ²⁰ Tufhu tohefti ruheft htimohat nhai kfo marimor, “No ndar bi tabon bugahato bas bi tebitt hmbriyetno to finji wom finji yon frikeft kasinyaruhan?” Be nd Bro Nkifrar kfoyuk mrokforpat yakitoh kihmour. Yakitoh kihhato toh bmtamoarn be Bro Nkifrar kfo yindhor hasomour. ²¹ Nhai finji finji dukarmor. Be kfo memour, “Bro Nkifrar kfoyuk mrokfot nhai furarmor. Htiruhant tu fipett rhuraht.” ²² Bro Nkifrar kfomo dukefrpar rhumotnd nettn “Bro Nkifrar hti wuthamorr rorhu yima yuhur.”

²³ Bro Nkifrarhu rfa borngt kfo yamuka, “Bro Nkifrar rorhu yima yuhur hti wuthamorr,” nd mrokfot nhai Abrahamrpar kformor. Nhai. ²⁴ Nom rpat buga kfomor. Jisasr nohhato tfit sinyamo yuhat nom duka famunom, “Nmoh Nungothet Jisasr nohmohat Bro Nkifrar tfit kasinya mifmorr.” Inji dukaneft Bro Nkifrar kangr, “Tu yima toh rawof wuthayet yimayem.” ²⁵ Jisasr nohmohat nmoh fasoh nefmn yak hatoh hanymotmr yahr kmimn wasmomr. Be rorn nohhato nd fasoh nefm minoh nhehafmorm. Jisasr nohmohat tfit tu Bro Nkifrarn fak kasinyamorr. Yak kasinyamotrr nd yiha Bro Nkifrar nmoh yima yuhum rihti wuthakmorm.

Kraisrpno rpat nohmonomn tfit rpat sinyahato rpat tohwonom

(Sapta 5-8)

Bro Nkifrar kutewurnom dborioh met yindarinom

¹ Na bi kfo ptha hnayuk mrokfom tfit wompam kfo ptha wutha bugarhotannm wawanywakomm. Nom Bro Nkifrar yakitoh kihwatnom nmoh yima yuhum hti wuthewurnom. To be nmoh Nungothet Jisas Kraisr nohmo yuhatn Bro Nkifrari nome bi nayak marnyahato rpat toh marnyewunom. ² Kraisr nohmo yuhatn Bro Nkifrar nom bi hti yuhuwaf-warnom yak marnya bomarnyewur-nom. Duka kangnom, “Bro Nkifrarhu tu dborioh rhu nmbuhat kanjo rhu marnyarahnom.” Nd dukeftpno yindhorwonom.

³ Nmoh dukefm inji yorhwatm btn tamoh tamoh nefm ndar bbinysofthum, nhai nom bmbri wohsisaknikfot. Nom be yindhorhato toh bmtakfot. Krhopam yakhany yakhany be toh bmtarahnom. ⁴ Krhopam tpi hayukem. Krhoparoh yak yihar nom toh bmtahato frdbruf thu thombat Bro Nkifrar htihato yindhorwornom. Yindhorwatrnom duka kangnom, “Bro Nkifrarhu tu dborioh rhu nmbuhat kanjo rhu marnyarahnom.”

⁵ Nd mrokfot fipett rhuraht. Bro Nkifrar nom bi hti dukamornom. Hti dukahato marbit htamornom. Marbit htahato rorhu Yafothat hemotrnom thu nawohmotnom.

⁶ Nom fasoh nefm hatone hnamo yiharparn Bro Nkifrar kfomot Kraisr suh nanyormorm nmoh fasoh nefm. ⁷ Nom ndar bbinysof thofnom nhai womrhu nefm womr htihato rorn tkitt yakhato nohkahrr. Nhai. ⁸ Bro Nkifra-rpar ndhtet neft namor. Nmoh toh nmbuhat be nd fasoh fasoh nefrpamn gribt kanjo kasi hmbretamotnmom Bro Nkifrar hti yuhuwafhato Kraisrn nd nmoh nefm nohmorm. ⁹ Kraisr washato rorhu kkut yohnemot. Nd kku hongmbtn ndar bbinysoft kasimottt nd fasoh nefm wafaknimom. Nd fasoh nefm wayaknimotm Bro Nkifrar nmoh yima yuhum hti wuthamorm. Yo tfit

kto bro kotkfot yakitoh thombat nhai nom namburruhatrnom. ¹⁰ Nomi Bro Nkifrar krhopam kasimohat be turhu yon Jisasrn suh nanyormotr be nd krhopam wafaknimom. Wayaknimotm be Bro Nkifrar nd yiha rifakmiyak-mornom. Ror nohhato tfit sinyanihato Bro Nkifrar pno yimo nmbuhattn nom be rorpno mtohrahnom. ¹¹ Barenko mirahko ka be ndrpayet. Bro Nkifrar Jisasr Kraisrpno hingrnamo hingrneft-pno nom Bro Nkifrar pno nayak nanymahato rpat tohwanomn yindho-rwonom.

Adamr namo nefti Jisasr namo neft

¹² Bro Nkifrar hingrnamo barkof yima Adamr, rorn tu fasoh neft rinakmotr to be ndar bbinyssoft nd fasoh neftn kasimott gribt kanjo. Nd fasoh neftn noheft hnamott, nhai be nia furarmot. Asomif wanurtayuk yonenm to be fasoh nefm niwatm noh wita bugewum. ¹³ Tafi Mosesr tohhato boririfhut yak duha, yimam fasoh nefm namoum. Boririfhut tafi rhu duha nmbuhattn nd fasoh nefm Bro Nkifrar be inji nyngarpaye kukatoh marsisamourm. ¹⁴ Nd boririfhut yak duha yimam nhai Adamr hanyjbornanihato fasoh neft namo kanjo inji Bro Nkifrarhu kfo rafo mrokfot hanyjbor-narmom. Nhai. Nd yimam to mirahko ka Bro Nkifrar hti marsisamoatrm toh nkifranimoum. Nhai. Noh wita bugamom.

To barenko, Adamrhu ruhefti Kraisrhu ruheft waduka nhtakomt. ¹⁵ Nmoh nkifra Adamr namo neft yo nmoh tohak yima Jisasr namo neft nhai rpat rhukahf. Rpa yima Adamrpar fasoh neft namo yuhattn bok yimam noh witamom. Tfit nd tu rpa yima Jisas Kraisrpar yuhuwafmo yuhattn Bro Nkifrar bok yimam hti yuhuwafhato fak wusmorm. ¹⁶ Yo Adamr namo neftn Bro Nkifrar hti namburhato memor, "Yima bugam fasoh nefetem." Tfit kto yimaroh fasoh nefm kminysofm kanjo rhumotm yuhuwafhato fak wusmorm. ¹⁷ Kanga, rpa yima Adam-rpar fasoh neft namotr to be noheft bbinyssoft kasimott gribt kanjo. To mirahko ka be nd noheftu yinhitn toh hanyrahnom. Nhai. Jisas Krais-rparhu noh nmbuhattn Bro Nkifrar hti yuhuwafmornom. Hti yuhuwafhato nmoh toh rawofm yak wus bowushato be hti wuthamornom. Kto Jisasr king toh thoft king hingrneft yakinohnho-rahnomr.

¹⁸ Yo wom kfo nuhas mrokfot kfo nuhasruhanko. Rpa yimarparhu fasoh neftn Bro Nkifrar htihato memor, "Nd fasoh net yima bugam noh witarahm." Tfit wom rpa yimarparhu dborior neft htihato memor, "Nd yima rifhu wutha-yet yima bugam toh nkifranirahm." ¹⁹ To rpa yimar Bro Nkifrar kfoyuk mrokfom hanyjbornahato fasoh neft namo yuhattn fasoh nefm kasi buga-momm yima bugam. To tfit rpa yimar wany yakiomo nmbuhattn yima bugaroh yima yuhum wutha bugarahm.

²⁰ Boririfhut mfnahhato yimaroh fasoh nefm yak nuhasmottm yimam mfro mfro rihamyjbornakhato fasoh nefm rinakmom. Fasoh fasoh nefm mfro mfro rinakmotm, Bro Nkifrar mfro mfro riyuhuwafakmorm. ²¹ Yimam fasoh nefmn uhatone hatonemoatmm to be noh witamom. Tfit Bro Nkifrarhu yuhuwafeft uhatone hatonitwattnom toh nkifranirahnom. Nmoh Nungothet Jisas Kraisr hingrnamo yuhat hikruhanomn nmoh toh rawofm Bro Nkifrar hti wuthahato toh nkifranirahnom.

6

Kraisrpno rpat nohmonom

¹ Nom fasoh nefm niwohat Bro Nkifrar hti yuhuwafwornom. Arihat finji kforuhanom? Ka nom fasoh nefm na hanyeft nd Bro Nkifrarhu yuhuwafeft tfit rhu yakinohnrahnom? Ka inji akfonom? ² Nhai mif. Nd fasoh nefroh yafothar bi minohnimor. To finji tfit nd yafothar sinyahato hatoneruharnom? Nhai. ³⁻⁴ Nmoh baftaisneft wadukako. Nom bi Jisas Kraisrpno rpat ritohakhato baftaismonom. To be nd baftais yuhattn Kraisrpno nom rpat nohhato fop hmbremomnom. Bi yopt tohetnom tfit tu Nanyjaret Yifemr Kraisr yak kasinyamo kanjo inji yak kasinyar-fornom. Yak kasinyahato nfri rhu nmbuhatt herfornom.

Kraisrpno rpat tohrahnom

⁵ Jisasrpno rpat tohhato rpat nohmonom, to be tfit rorpno rpat sinyarahnom. Nd mrokfot kfiwa kanjo nmoh fasoh fasoh nefm bi yafho thumonommn, bi tfit Kraisrpno frtkahfato hikwonomr. ⁶⁻⁷ Yimar, fasoh yima rifhur bi minohniyetr, nhai tfit fasoh nefm uhatone hatone-kahmr. Ndnettn mirahko fasoh yima rifhur tohyuk yafotha bebr uhatone hatonernom. Nhai. Kraisr yura bgre misn kim hegirhato nohmohat to be nd yiharn nd fasoh yima rifhur bi rorr mhanohetrn to be arihat nom nhai bi nd fasoh yima rifhur tohyuk yafotha bebr uhatone hatonekahrnom.

⁸ Nanhu dukeft duka kanga nom Kraisrpno tu noh mifneft, to be Kraisrpno rpat tohrahnom. ⁹ Kraisr nohmohat tfit tu Bro Nkifrarn fak kasinyamorr. Nd ror minohafhato tfit sinyamohat, nd yiha nd noh yafothar minoh nhehafmorr. To be arihat nhai tfit ror nohkfot. ¹⁰ Bi nd rpa noht nohmohat to be nd fasoh fasoh nefm nd yiha minoh nhehafmorm. Kraisr nd hingrneft hingrnafhato to be, bi Bro Nkifrarpno bi tohwor. ¹¹ Ndnettn niko mirahko tfit bok dukefm ayaknom. Be kfo mekfot, “Nd nom hatoh hnamo fasoh fasoh nefm bi Krais Jisasrpno rpatn nohhato minoh nhehafmonomm. Nhai wom fasoh fasoh nefm uhatone hatonekahmnom. Nom bi Jisasrpno rim tohhato Bro Nkifrarpno rpat tohwonom.”

¹² Kraisrpno bi noh mifetnomn ndnettn mirahm tfit nikmoh tirm, wuram, tngm, nyingam, yuhut yimanysof bugat tfit fasoh yima rifhurn ayak hta bohtarm. ¹³ Mirahm nikmoh tirm, wuram o yuhut thatipt be fasoh fasoh nefmn arhunim. Nd niko hatohmo fasoh yima rifhur bi nohnimorn tfit Bro Nkifrar nfri yima rifhur hemorko. Ndnettn nikmoh tohefm to be Bro Nkifrar tohwa toheftn toh hikkfot. Nikmoh thatip bugam Bro Nkifrarpas hehato rorn yak htarahrko. ¹⁴ Niko nhai duka mekahko, boririfhut yakinohhato nd boririfhutn yak hta bohtakahtm nikmoh wiayauw nmbuham Bro Nkifrar yakmiyakrahrko. Nhai. Kraisr yakinohwatko Bro Nkifrar hti yuluwafhato kakmiyekworko. Ndnettn nhai tfit nd fasoh nefroh yafothat rim kuny singohato yak hta bohtaruhattko.

Dborioh nefroh hingrna yimanom tohkfot

¹⁵ To finji bi dukewako? Ka bi Bro Nkifrarhu yuluwafeft tohwanomn fasoh nefroh naneft ka mrokfo duhatet? Nhai mif! ¹⁶ Wom yimarhu slef yimako tohneft nhai be tukmoh fijo tamoh tamoh nefm nakfot. Tohukatoh-rhu yinhrpat hingrna hafknitwoko. Nd fasoh nefroh yinhit tohneft to inji newuko. Fasoh nefmn doh pukm kanjo thu yebitt habritwomko. Inji na hanyhato nd fasoh nefmn yak hatoh-aforuhatmko hel yirahko. Bro Nkifrarhu yinhit tohneft hifa rhu nmbuhat yakrahko. ¹⁷ Bingot afo fasoh fasoh nefroh yinhitn tohmoko. To tfit nd gutnius mrokfom wanymohat nhai wom bok dukefm yak hanyrmoko. Nikmoh yima yuhu bugam be nd niko wanyuk mrokfomn nikmoh dukefr yimor. ¹⁸ Bi nd fasoh fasoh nefmn kihmbre htatamotmko nhai wusinya asinyarmoko. Tfit Bro Nkifrar puk dbrufakmotrk frfnahhato be bi dborioh yima rifhur yorhwa dborioh yafothar bi kak hta bohtewurko. ¹⁹ Na kfoyuk mrokfom nhai yak marnyaruhatkomm. Ndnetann nom bi tawisafet nefm yakhato kfo nhombra nuhaswanko. Niko toh hnamohat afo fasoh nefmn kuny kihmbre bugamomko. Be arihat dborioh nefroh yafotharn yak hta bohtakahtko dborioh nefrpam wahiktawako.

²⁰ Afo fasoh fasoh nefroh yinhit tohmohat nhai yima yuhum sinya-rmomko dborioh nefroh naneft. ²¹ Nd niko na hnamoa fasoh nefm tamoh dborioh rhu nmbuham hemomko? Nd nefmn bi hel fak hatohaf hany sitamomko. Tfit nd tuko na hnayuk nefm mhtiyeckohat tfit bro yimtneft korhtko. ²² To fasoh fasoh nefm yukr mtit kanjo kihmbre htatamohat Bro Nkifrar niahato puk dbruf wusakmorko. Puk dbruf wusakhato rorhu yufat rim tohhato kak hta bohtewurko. Turn yak hatohafo hanyruhatrko be turpno rim toh nkifranirahko. ²³ Fasoh fasoh nefmn yimam yak hatohefiwatmm hel kitwom. Bro Nkifrar yak hatohefi-watrm nmoh Nungothet Jisas Kraisr-pno toh nkifranirahm.

¹ Bar yinouroko, nkifra boririfhut yakitoh marnyewa yimako ndar mrokfot kforhota wawanywako. Yimar, yima nfrir afo tohwor, boririfhu mrokfom kak hta bohtewumr. Yimar, nohnitr, nd boririfhute bi be, frtrophwotr. ² Tfit ramet tuhant kfo nhombrarhota wawanywako. Mett afo ramemr tohwor nd mett nd yimarhu mett korht. Ramemr noh trohwort bi be. Nhai nd yimarhu mett wom rhukaht. Boririfhut inji kfiwit. ³ Mett afo ramemr yuhre tohhany, wom yimar yakneft nd mett kutewumt yihotohathu mett. Dhirt tohhato wom nfri yimar tfit yakneft nhai inji fasoh kfokahmt. ⁴ Yinouroko, to nd metthu mrokfot kanjo niko nhai bi Mosesr yakmo nkifra boririfhut toh hikkahko. Bi Krairpno nayakitoohhato rpat nohmoko. Ndnettnd boririfhut nhai yak hta bohtakahtko. Bi nd Bro Nkifrar yak kasinyamo yima Kraisruhenom. Ror yak hta bohtiwaro niko hingrniwa hingrneft hifa sinya marnyiwatn yukha thuburrwot. ⁵ Nom mhatoh fnahyuk nefm yakitoh hnamohat boririfhut ruhettn nd fasoh nefroh nayuk dukefm mfro sinyamoum. Sinyahato fasoh nefm namounom. To be nd nefm namoatnom be hel yiyuk yihiotat bi tohmonom. ⁶ To be arihat bi nohmonom, nd boririfhut nhai wom yak hta bohtakahtnom. Ndnettnd nom nhai nd wandfamo boririfhut rhuhato Bro Nkifrar hikkahnom. Nhai. Nfri yihiotat hikwonom. Nd yuhatt Bro Nkifrarhu Yafothat kak hta bohtewutnom.

Fasoh nefmn fak bebmomnom

⁷ Kane finji dukewako? Ka boririfhut ruhettn fasoh fasoh nefroh naneft yima yuhum mfro sinyewum. Ndnettnd boririfhut fasohet? Ka inji? Nhai mif. Mosesr Bro Nkifrapno boririfhut ayak duha yirt arihat to finji htihato kfo merfoya, wurt art fasoh nefet? Womroh metm, wuskam, tamoh tamohroh hti yuhurnefte, tamohr kfo merfora ndt fasoh nefet? Boririfhut kfo memot, "Mirahn womroh tamoh tamohm ahti yuhura." Boririfhut inji kfomott, ee kanga ndt fasoh nefet. ⁸ Boririfhut arhu duha yis fasoh fasoh nefm nhai be kfongot sinyarfotm. To nd thfa mntwat inji kfomott, ee nd womroh tamoh tamohroh hti yuhuryuk yima yuhur mfro sinyamor. ⁹ Na nkifra boririfhut tafi wany juha toh mmomoa. Nd thfa mntwat wanymoyant ee nd fasoh fasoh nefroh dukefr mfro wasinyamor. ¹⁰ Be ndnatn Bro Nkifrar fak yiritiyafmora. Na memoya, ka thfa mntwat yakitoohhato Bro Nkifrapno tohruha. To nhai, nd thfa mntwat yakitohmoyann Bro Nkifrar fak yiriti bugafmora. ¹¹ Thfa mntwat kfo memohat, mirahn inji anaya, ee nd fasoh yima yuhur mfro risinyamotr fasoh nefmn misuhmoya. Ndnatn Bro Nkifrar fak yiritiyafmora.

¹² To finji kforuhanomt boririfhut? Boririfhut rot tu Bro Nkifrar yak htayuket. Nd thfa mntwa mrokfom ndm rom Bro Nkifrar hta bugayukem. Ndm dboriohem. ¹³ To na nhai kfo mirhota tu dboriorh thfa mntwatn fak yiritiyefita. Nhai. Tukianhu yima yuhur sinyayuk fasoh dukefmn fasoh yima yuhur hemotma Bro Nkifrarhu dboriorh thfa mntwat rifak htafmayant. Ndnettnd Bro Nkifrar fak yiritiyafmora. Na Bro Nkifrar yak yiritiyafmohat memor, "Inji anakahtanr nd rorhu fasoh yima yuhur sinyewa fasoh nefm hti duka tungunarahrm."

Nmoh toh nmbuham fasoh nefmn kak hta bohtamoumm

¹⁴ Nd Bro Nkifrarhu Yafothat hemo boririfhut rot tu dboriohet. To nane tu fasoh yima bebann na tohwa toheft fasoh nefmn uhatone hatonitwotma na be rroh yinhitn tohwa.

¹⁵ Nd na niwa nefm nakni thombat tfit tuka duka mumiwa. Tamoh dukeftpno niwoyanm? Tamoh tamoh nefm kanga ndmn anaya, to nhai, ndm mhtafnihato tfit nd fasoh nefm na hti hhrekwam, ndmn tfit yihato niwa. ¹⁶ Nd fasoh nefm nanitayanmn tfit nkifra boririfhut mhti dukakhato yima yuhur tfit duka kangr, ndt fasoh neft ne. ¹⁷ Ndnettnd na niwa fasoh nefm nhai be nann nakahanm. Nhai. Nd na hatohwa fasoh fasoh yima rifhurn nd nefm newurm. ¹⁸ Na tuka hti nhtewa. Na mhatoh fnahyuk nefm fasohem. Nd nanhu dboriorh yima rifhur wayibon sinyewur dboriorh nefroh naneft, to nhai nd dboriorh nefm nakahanm. ¹⁹ Dboriorh nefm kanga naya, to nhai. To tfit na hti hhrekwa

fasoh nefmn tfit ndmn niwa. ²⁰ Nd na hti hhrekwa nefm newohat nhai be yimayann nakahanam. Nhai. Nd na hatohwa fasoh yima rifhurn nd nefm newurm.

²¹ Ndnett bi tuka hti nhtewa. Ndhtet nefmn be tu kakitoh dbkaf kihtewuma. Kanga dborioh nefm anaya, nhai mif, yudbat nd fasoh nefm mfrrfnahnewum. ²² Nanh yima yuhur, ror hifa yindhorwort Bro Nkifrar hemo boririfhuthu hikneft. ²³ To tfit htita mano wom dukefr kekwora tfit mano wom dukefr kekwora. Nd hus dukeff mano mano nateh natehhato fasoh dukefrn mfro wabbuka sinyahato be nd dukefrn uhatone hatonitra. ²⁴ Nd fasoh dukefr uhatone hatonitwotra be hel yita yihotatn bi tohwa. Na nd yihotohat bi tohwohat to frohmtn toh raforwoma? ²⁵ O Tunga Bro Nkifrar, rorn nanhu Nungothet Jisas Kraisr tkrurafmotrr mitoh rafomora!

To bi kfo hne kanjo nanhu ruheft inji korht: yima yuhur ror wayibon sinyarahr boririfhuthu hikneft, to tfit nd na hatohwa fasoh nefmn uhatone hatonitwoma.

8

Kraisrn fasoh nefm yak thumorm, tfit Bro Nkifrarhu Yafothat thu hmbremornom

¹ Nom fitoh fitoh met yindarinom bi Krais Jisasrpno bi rpat niyak tkafhato rpat bi tohetnom, nom bi nhai wom mrokfom. ² Jisasrn nfri dfa tik yuhar htakmorr. Nd nfri dfa tik yuhar hefenko mkiomor. Nom helko yita yihotar tohhato nd fasoh yima rifhur yak hatohwohat Bro Nkifrarhu Yafothatn rimta nrfekwatnom tfit hefenko yita nfri dfa tik yuharn rimak htewutnom. Rimekwatnom kak hta bohtaf hanitwotnom. ³ Nd nom mhatoh fnahyuk nefm nhai yak htaf hanyrfotmnom boririfhut yak hik-rfonomt. Nhai. Bro Nkifrar inji htithato turhu yonr kfo tkrurafmotrr fasoh net yimamifnmoh thatipt kanjo yak dborhanehato bbinysoft mitohmor. Bbinysoft mitohmohat nmoh toh ruhefm fak hik bugamorm. Fasoh nefrpamn ror nhai yakinohrmorm. Be Jisasr asha bbinysoft nia tohhato nmoh fasoh nefm rorn minoh nhehafmorm. ⁴ Bro Nkifrar duka memor, “Jisasrn yimaroh fasoh nefm aminoh nhehaf-kahtrm tuka Bro Nkifrayanhu boririfhu yuhatn toh hikrahm.” To be nd yuhatn ariham be bi Bro Nkifrarhu Yafothat kak hta bohtewutnom. Nhai tfit yimanom mhatoh fnahyuk yima rifhur yak htakahrnom.

⁵ Yimam tum mhatoh fnahyuk fasoh nefmn yudbat mrhunineft, to be nd nefmn rim tehta mtehtarahmm. Yimam tu Bro Nkifrarhu Yafothat kfoyuk yuhat hikneft to be Bro Nkifrarhu Yafothatn yak hta bohta-rahtm rroh toh rhu nmbuham. ⁶ Yimam tum mhatoh fnahyuk nefmn hikneft Bro Nkifrar yak yirityafrahrm. Yimam Bro Nkifrarhu Yafothar yak hta bohtiawm, nd yimam toh nkifranihato rroh yima yuhum mirhunirahmm. ⁷ Yimam be nd tum mhatoh fnahyuk fasoh nefrpam hatohwam, Bro Nkifrapnno nhai nayak marnyahato rorhu kfo boririfhu mrokfom hikkahm. Boririfhu mrokforoh hikneft nhombrati nhombratitwom. ⁸ Inji niwatm Bro Nkifrar nhai yindhorkahrm.

⁹ Niko Rom thofko nhai tuko mhatoh fnahyuk fasoh nefm bi yak hta bohtakahmko. Nhai. Bi Bro Nkifrarhu Yafothat yaketkomm kak hta bohtewutko. Yimar Kraisr htayuk Yafothat yak duha yimar nhai Krais-rhuko tohkahr. ¹⁰ Kraisru hayuk Yafothar yimakomm hatohhato nikmoh toh rawofm wutham rhurahm, to be nikmoh yafotham be inji Bro Nkifrar-pno toh nkifranirahm. Thatipm fasoh fasoh nefm hatohetmn rom nohrahm. ¹¹ Bro Nkifrarhu Yafothat, Jisasr kasinyamot, nd Yafothat niko hatoh-neft, to be mirahko adukanom. Nd Yafothatn kforaht, nd nohyuk thatipt tfit thu kasinyarahtt.

Bro Nkifrarhu Yafothat kfiwut Bro Nkifrarhu yonnom korhnom

¹² Ndnett froh frohnom, Jisasr hikwanom Bro Nkifrarhu Yafothat kfo htewa yuharpattn nom hikkfot. Nhai tfit tunom mhatoh fnahyuk nefm yakinohhato tohkfot. ¹³ Thatipt mhatoh fnahmo nefm tohrahko to be Bro Nkifrar yak yirityafrahrko. Tukomm Bro Nkifrarhu Yafothathu bbuieftpno yak thurahkomm ee Bro Nkifrapnno toh nkifranirahko. ¹⁴ Yimam, Bro Nkifrarhu Yafothatn yak hta bohtiawm, tu Bro Nkifrarhu yonn korhm. ¹⁵ Bro Nkifrar nhai duka marimor, “Kfo yanhorhotanm hikrahma.” Nhai. Turhu Yafothat hehato rorhu yonn nom yorhwanomn naku kfo kangnomr, “O Dajaye, ni nmoh Yifeme.” ¹⁶ Bro Nkifrar turhu Yafothat nom yahukohat bi rorhu yonn nom

yohrwatnom kak nuhaswornom. ¹⁷ Bro Nkifrarhu yonnom rhurahnom, ee Kraisrpno mrhuyuk dborioh rhu nmbuhat yakrahnomt. Kraisr yakmo krhopam afo yaknihato ee btn rorpono bro yufat yakrahnom.

¹⁸ Bro Nkifrar tu bro yufat he thombat be nhai arihat rhuwa ruheft kanjo rhuruhatnom. Ndnetttn na duka haso kanga, ar nom hatoh hasiwa krhopenm, nhai mrokfom. ¹⁹ Nda bbinysoft Bro Nkifrar hingrna htamo tamoh tamohm be Bro Nkifrar kukatoh hasiwurm. Kto tu Bro Nkifrarhu yonm bro yufat yakruha yiha, nd yiha tfit yak marnyarahrm tamoh tamohm. ²⁰⁻²¹ Bingot Bro Nkifrar bi duka hta memor, “Ndar bbinysofthu tamoh tamohm afo fasoh rhunirahm. Kto tfit yak hta marnyahato rhu marnyarahm. Yak hta marnyaniruhanmn nhai tfit fasoh rhu bebruhatm o bdgtaruhatm o nohruhatm. Nanh yonm hifa nmbuhat yakrahm, nd yiha ndar bbinysofthu tamoh tamoh be inji rhu marnyanirahm. Nhai finji naruhatm. Nd rhu marnya nmbuhat ruhakni thombat barkofpam afo krhopam yakrahm.”

²² Ndnetttn Bro Nkifrar hingrna htayuk tamoh tamoh krhopam kekwom. Metm yon yakrphekwa kanjo be inji krhopam kak hnewum. ²³ To mirahko ka nd Bro Nkifrar hingrnayuk tamoh tamohrpam ka krhopam yakhato kfo nurwom. Nhai. Yimanom to inji buga. Bi Bro Nkifrarhu hayuk Yafothat bi yimanomn hatohett, to nhai, yiro yima rifhur afo yuhre nurwor. Nurhato gari haso kangnom, “Bro Nkifrar turhu yonnom yak htarahrnom. Tot nd yiharn nmoh thatipt yak marnyahato nndo rhuraht.” ²⁴ Bro Nkifrar gari haso memounom, “Rorn nrfa htiyakhato yak marnya-rahrnom.” Nom inji duka duka tohneft nhai be sfno. Yimam duka darwon yukatoh hasiwam, tafi hti duha o yakitoh duha be dukahato kukatoh hasiwum. Yimam bi nd ror duka darwon hasoyuk tamohm bi fekmm o htitawomm, nhai wom dukahato yukatoh hasokahm. ²⁵ Nom be mrokforpat wanyhato rhu darwon hasiwohat kto be yak mifrahnom. Nd dukeftpno rhuhato gari hasiwunom.

²⁶ Ndar bbinysofthu krhopam yakrpak yakrpak hta karmitta thombat nhai wom ptha rifhur rhukahr. Dborioh dukefr nhai wom rhukahr. Be nd yiro nur mmng rifhurn Bro Nkifrarpno kfo nur thombat Bro Nkifrarhu Yafothathn kekwotm nd kfo nur mmng rifhur. Yakhato Bro Nkifrar wukfo nuhaswotr. ²⁷ Bro Nkifrar bi htitwornom be yima yuhurparn kfo bruttna thombat. Ndnetttn Bro Nkifrarhu dukefr hikhato wukfo bruttna thombat Bro Nkifrar wanyhato htitworm nd dukefm.

²⁸ Nom Bro Nkifrarhu dukefr ruhet yimanom, Bro Nkifrar nompno wom dukefetrn bi rorhu yufatn fak htamor-nom. Ndnetttn tamoh tamoh krhopam yakneft bok dukefm yak duha. Nd krhopampno mrhu tefinihatof tfit dborioh rhu nmbuhat htirahnt. ²⁹ Bingot Bro Nkifrar bi hti htamor fitoh yimamn rorhu yonm rhurahm. Inji htihato yufam bi fak nhombra bugamorm. Yufam yak nhombrahato memor, nd nd yimamn turhu yon Kraisrhu toheft ruheft yakruhamn turhu yon Kraisrn brohato rom be nmemen kanjo tohrahm. ³⁰ Nd yimam bingot Bro Nkifrar bi hti htahato yufam yakkmom, nd yimaroh yima rifhum fak wus bowusmorm. Kto bro yufat hirahrm.

Nhai wom tamohtn Bro Nkifrarhu yima yuhur hta rafokfot

³¹ Ndnetttn nome finji kforuhanom? Nom bi Bro Nkifrarhu tirtn ruhetnom, frohmn riyak hutfakhato yak beb-ruhamnom? ³² Nom dukahato Bro Nkifrar nhai yak tkafrmorr turhu yon Jisasr. Nhai. Tkrurafmotrr niahato suh nanyormor. Turhu yonr tkrurafmo nmbuhatn htihato kangnom, tamoh tamohm he bugarahrnom.

³³ Bi Bro Nkifrarn nmoh toh rawofm yak wus bowusmormn rorhu yufatn fak htamornom. Ndnetttn nhai tfit wom yimar yimaroh nytingahato kfo miruhatr, “Nd yimar nd nd neter.” ³⁴ Bi Krais Jisasr nohmorn tfit sinya-mor. Sinyahato tu Bro Nkifrarpno rim tohhato tu bro yufat fakmor. Tu Bro Nkifrarpno tohetrn, yimam nmoh yufampno tamoh tamoh mrokfefm mpthanef, rorn kak thuworm. ³⁵ Kraisrhu bro dukeft nompno yorhwatt nhai wom frohrn o wom tamoh nefmn yak tuhafruhatmnom. Nhai. Yimam yak bebwohat o, nom yatinohwohat, wuskam yaknafwohat, bi nohyuk tkitm tohwohat, yahrt tohwohat, nhai nd nd nefmn Kraisrhu tirm ruhetnom yak tuhafruhatmnom. Nhai.

³⁶ Nd thomna hne nefm nhai kfo mirhota, “Nhai yakkahmnom,” nhai. Kekwomnom. Bro Nkifrarhu rfa borngt kfo kangt,

“Ninpno yi tohwatnom rom hti namburhato
yihof href kak beb hasiwumnom.

Foh nungam kanjo inji htitwomnom.”

Sng 44.22

³⁷ Kraisrhu bro dukeft nomn htamor. Ndnettn nd tamoh tamoh nefm ror kfiwur, to be nd nefm mmbrawonitm. ³⁸⁻³⁹ Uwa, Bro Nkifrar nomn bro dukeft htewur. Ndnettn nhai noheftn o krho nmbuhamn, nhai mounmotmn o kmi yarhmn, nhai arihat yorhwa nefm o tfit kto rhuruha nefm, nhai tamoh manyjaretm o yura mount tohyukmn o yiro bbinyssoft tohyukmn, yak tuhafruhatmnom. Tu be nhai mif. Bi nmoh Nungothet Jisas Kraisr bi suh nanyormor. Nd yuhatn Bro Nkifrarhu bro dukeft nomn korht.

Bro Nkifrar Isrermpno namo nefm, ndm Porr kfo ptha srhmor

9

(*Sapta 9-11*)

Porr mfro yuhuwafmorm Isrerm

¹ Na tu Kraisrpno toh tkafwa yimaya, ndnetann na nhai wom mrokfom kfo furakaha. Tu Bro Nkifrarhu Yafothatn nanhu yima toh rawofr yorhwatta nanhu yima yuhur kfo kangr na kfiwa mrokfom kfo mifwanm. ² Na tukanhu garbn yimatm Kraisr mong trohmotmr nanhu yima yuhur nhai tu marnyakahr. Nd dukeftpno yima yuhurio rikrho hmbritewarane, be. ³ Nanhu yima yuhur duka kanga, nanhu tangiyemromn ayakmiyakr. Ndnettn be Kraisr nanhu yima yuhur ahikr, to be kfo bruttnar-fotanr nanhu yufat yak thuhato tfit rroh yufamn htarfor. ⁴ Rom tu Isrer frikeftuhem. Nd Isrer frikeft Bro Nkifrar kfo memor, “Isrerm tom tu nkifra tannefem.” Romn Ijift toh tanyhato tfit kmiko yimohat, turhu nukafat tohakmoatt rom be nd nukafat hti hti yimoum. Yo turoh nkiframpno Bro Nkifrar mrokfom nafak dbakfmomm. Yo Mosesrpno Isrerroh toh nmbuham kfo boririhu nuhashato lotu yuham kfo hta bohta nuhasmorm. Yo tamoh tamoh kfo hta mrokfom rompno rhuyukm ndm bi kfo nuhas bonuhas bugamorm. ⁵ Turoh nkifram, Abraham Aisak Jekofrom, Bro Nkifrar fak htamorm. Nd rroh frikef yuhat niayuk mettn nom hbhakyuk yima Kraisr tfit hiyaumotr. Nd yima Kraisr tu yura myorhekwa Nkifrayer. Nd dukeftpno yiha yiha nom rorhu yufat kfo yuta hagrhhahany, yuta hagrha hanye, be. Nmoh dukefm to be inji duka hanyakfot.

Bro Nkifrar Isrermpno namo nefm ndm Porr pthamor

⁶ Kanga, bok Isrerm nhai nd nom hbhakyuk yima Kraisr yakinohkahmr. To mirahko ka Bro Nkifrar Isrerroh rituhakhato rorpno yarim tohnefthu kfo hta mrokfot ka fahomort. Nhai. Yo to mirahko ka Isrer bugam ka Bro Nkifrar rituhak bugamormn rorpno yarim toh bugamom. Nhai. ⁷ Yo mirahko ka Abraham frikef yuhathu yima bugam ka Bro Nkifrar yakmormn rorpno yarim toh bugamom. Bro Nkifrar yihato Abrahamr kfo memor, “Aisakrhu yonrpam kfo miruha ninhu yon frikefet.” ⁸ To bi asot tu mrokfo yimbu yuhat. Mirahko ka be nd yima Abrahamr nasfuryuk yon bugamn Bro Nkifrar rituhakmor. Nhai. Nd Bro Nkifrar kfo htayuk yima Aisakrhu yon frikefrpatn Abrahamrhu yon frikefet. Ismerrhu yon frikeft fak yirityafmort. ⁹ Nd kfo hta mrokfot Bro Nkifrar kfomot inji kfomort, “Na nia thombat tuka kfo htamo niayuk yiharn ninhu met Sarat yon yindarir hiyauraht.”

¹⁰ Yo womte Rebekathu yon fant hiayuk yon husfhu tndht dukakfot. Rothu yonfhu yifemr rpar, nmoh nkifra Aisakr. ¹¹⁻¹³ Nd Aisakrhu yon husf tafi nur duhatfn yo tafi wom nefm na duhatfn Bro Nkifrar Rebekat kfo memort, “Najemr, tfit nmemrhu yinhibit tohrahr.” Rebekat hiyamo yonf womrpar Bro Nkifrar htihato fakmoy. Yakmohat Bro Nkifrarhu rfa borngtn Bro Nkifrar kfo memor, “Jekofrpar hti wofnhato fakmoya. Isor nhai.” Bro Nkifrar yima yakneft nhai yimam niwa nefm htihato yakkahrm. Nhai. Be turhu hti fijo kekworm.

¹⁴ Bro Nkifrar inji namohat to nom finji kforuhanom? Ka kfo mirahnom nhai hti nhta marnyahato yak nhta marnyarmorf? Nhai mif. ¹⁵ Bro Nkifrar Mosesrpno kfo memor, “Na wom yimar kanga ayuhuwa, yuhuwafwanr. Kanga wom yimar ayak marnyaya, kak marnyewanr.” ¹⁶ To be ndnettn Bro Nkifrar nhai be yimam dukiwa dukef yuhatn o niwa nefm htihato hikkahr. Nhai. Be yuhuwafhato kekworm. ¹⁷ Bro Nkifrar king Feror kfomohat Bro Nkifrarhu rfa borngt kfo kangt, “Ni Fero king yufat yakmohat nann fak htamoyann. Memoya, ‘Feror nanhu kfoyuk mrokfom hanyjbornaruhatrnanhu bbuka rifhur yak nuhasruhanr. Yimam nanhu nefm kmi kmim kfo nuhas htfasruhatmm wanyrahmm.’” ¹⁸ Ndnettn duka hik marnyakfot. Bro Nkifrar kangr, wom yimar ayuhuwanfanr, nd yimar yuhu-wafworr. Yo kangr womrhu yima yuhur atahisar nd yimarhu yima yuhur tahisewarn nhai wany yakiokahr Bro Nkifrarhu mrokfefm.

¹⁹ Nikmoh womr sinyahato kfo mirahra, “To nanhu yima yuhur tahisewohat tamohmpno Bro Nkifrar tfit nann kfo huttwar? Nhai be nanhu kfotpno yima yuhur inji tahisarmor. Nhai. Tu Bro Nkifrar kfomotr nanhu yima yuhur inji tahisamor. Nhai wom yimar Bro Nkifrar kfo htayuk mrokfo dukef yuhar kfo kekuthato rorn wom dukefr tfit kfo pthakfot. To Bro Nkifrar finji htihato kfo yamukarnom, ‘Niko fasoh nmbuhat htewuko?’” ²⁰ To ni tamohtet yimann Bro Nkifrarhu dukefm kfo wokruhanm? Tu Bro Nkifrar hingrna htamo yimayeko, nhai tfit nikomn kfo wokkfot rorhu dukefr. Roht nhai tfit tngett rhuhato tfit nd roht hingrnayuk yimar kfo merfot, “Tamohmpno inji hingrna nhtena?” ²¹ To mirahn ka nd roht hingrnayuk yimar ka nhai hingrnarfotrf hushtet rohf. Nhai. Turhu duka fijo, hus rohf hingrna nhtarforf rpa dif kranyjhaye. Womr hingrna marnya bomarnyahato wandfa marnyarforr bro yihihparoh roh mskayukr. Womr be hingrna furarforr yiha yiha roh mskayukr.

²² Bro Nkifrar turhu duka fijo yimam fak htamorm. Yimam fasoh nefm namohat bi yak batingotrmorm. To nhai, be afu kukatoh marsisa hasomourm. ²³ Womm bi hti htamorm. Memor, “Afo yukatoh marsisahato yak nuhasruhanm nanhu dborior nefm.” Memor, “Nd nd yimamn yuhuwafhato hifa rhu nmbuhat hirhoyanmn nanpno tohrahm.” ²⁴ Nd Bro Nkifrar yuhuwafwa yimam, to nd Bro Nkifrar bi yak htamo yimanom yuhuwafwor. Nhai Judarpanom yak htarmor. Yima tangiroh wom rpa rpa yimam fak htamorm nd dborior rhu nmbuhathu yakneft. ²⁵ Bingot Bro Nkifrar profet Hosearpno kfo memor, “Fitoh fitoh kmim nhai nanpno brbo niarmoam

kto nanpno brbo nierahm.

Fitoh kmim nhai nanhu yima yuhurn rhurmoam
kto nanhu yuma yuhurn rhurahm.”

Hos 2.23

²⁶ Yo, “Wom wom kmim nanpno yarim fnahne duham
kto tfit yimam yutarahmm, ‘Hta nngrajohet Nkifrarhu yon kunys.’”

Hos 1.10

²⁷ Aisaiar Isrerm dukahato nd kfomo mrokfotn kfo memor,
“Isrerm nasfurhato yonmari rifuhetm rhu thoft,
ndar nungurtik furam kanjo rhu thoft,
to mirahko Bror ka yak bugarahrm. Nhai.
Dfikenrpam yakrahr.

²⁸ Bro Nkifrar nhai wom kukna-ruhatr kotkfothu yikitohneft.

Yima yimarooh yak hanyuk krhopam bi hajohetm rhurahm.

Kotkfot yikitohni thombat to be yudbat turoh krhopam fknirahm.”

Ais 10.22-23

²⁹ Bingot Aisaiar kfomo mrokfot kfo memor,
“Be nd tu yura myorhekwa Nkifrar nhai womenm ayak htani duha arhur,
to be Sodomti Gomorat kanjo nhombrahato mibatini-rfonom.”

Ais 1.9

Isrerm nhai tu Bro Nkifrarhu mrokfot yikitohhato dborior yimam tohrmom

³⁰ To finji tfit kforuhanom? Yima tangim nhai wom dukefm duka marimoam, “Wom yihotam ahikkah-nomn Bro Nkifrar yak wus bowus-rahrnom.” Nhai. Be inji rhu furamoum. To gutnius mrokfot wanymohat nd yuhatn hikmom. Nd yuhat

hikhato rroh yima yuhum Bro Nkifrar fak wus bowusmourm. ³¹ To Isrerm wom dukeft fakmotm. Romn duka memoum, “Nko fitoh yuhatt hikruhanomn Bro Nkifra yak wus bowusruharnom?” Nd dukeftpno memom, boririfhut hikrahnom. To nhai. Boririfhut hik nhombratimoumt. To nhai Bro Nkifrar htihato rroh yima yuhum yak wusrmorm. ³² Tamohmpno Bro Nkifrar nhai yak wusrmorm? Mirahko ka Isrerm Jisas Kraisru dukefrn tohmom. Nhai. Boririfhurpat hikhato memoum, “Ka nd yuhatt Bro Nkifrar yak wus bowusrahrnom.” To nhai, nhombrati nhombratihato buha rhuyuk tahirn htakmotrm suh nasuh bugamom. ³³ Bingot Bro Nkifrar profet Aisaiarpno kfo memor, “Wawanyko. Wom tahir taun Saiontn htiwanr.

Nd tahirn htakruhatrm suhrahm.

To yimam ror hikruham nhai suhhato yak nambtng-ruhatm.”

Ais 8.14, 28.16

10

Isrerm nhai hti duka marnyarmomt Bro Nkifrarhu neft

¹ Bar yinouroko na Isrerm yutahato kfo bruttnewohat nanhu bro dukeft duka kanga, Bro Nkifrar arituhakkahrm rorpno arim tohm. Nd dukeftpno kfo bruttnewa. ² Isrerm Bro Nkifrar hikwa yihotat bi tuka hti hikwant. Rom Bro Nkifrar hikwohat nhai wom tamoh nefm rim tohnkahm. Rim hikak bugekwomm. To rom inji hikwohat nhai tu Bro Nkifrar dukewa dukef yuhatt hti hikkahm. ³ Bro Nkifrar yima rifhum yak wus bowuswa yihotat nhai hti hikrmoamt. Rom duka memoum, ka boririfhu hikneftn Bro Nkifrar kak wus bowusworm. Ndnett nhai Bro Nkifrar yima rifhum yak wus bowuswa yuhatt hikrmoam. ⁴ Wawanyko, Mosesr yakmo kfo boririfhu mrokfom bi be. Yimam Kraisrpar yakitoh kihwa yuhatt Bro Nkifrar kak wus bowusworm.

⁵ Bro Nkifrarhu boririfhut hikhato yima rifhur wuthar rhuneft, Mosesr kfo memor, “Yima boririfhu mrokfo bugat yak hik bugarahm to be toh nkifranirahn.” ⁶⁻⁷ Yimar kangr yima rifhur wuthar arhura, ka nd yima rifhu yak wusyuk yimar ka tfit hefenko yak hambro hanykfot o Maringouko yak hambro hanykfot? Nhai. Nd yimar, nd yima rifhu yak wusyuk yimar, tor bi niamor. Nd yimar Kraisrpar. ⁸ Bro Nkifrar yimam rituhakhato rorpno rim tohwa yuhathu kfo nuhas mrokfot to bi fakmokomt. Bi tukomm harhuwakomtn nd mrokfotn rim nakfo nuhasak mnakfo nuhasekwoko. Nd mrokfot to nd nom ptha nuhaswa gutnius mrokfoyet. ⁹ Ptha nuhashato kfiwunom, “Kfo mirahn, ‘Jisasr nanhu Nungotheter,’ yo ninhu dukeft duka mirahn, Jisasr nohmohat Bro Nkifrar kasinya mifmorr, inji dukarahn, Bro Nkifrar yakruharn rorhu tirmn htarahrn.” ¹⁰ Nmoh yima yuhumio, Bro Nkifrarhu dukefrpar yorhwatm Bro Nkifrar yak wus bowushato hti wuthewurnom. Yo tnge kfo kangnom, Jisasr nmoh Nungotheter. Inji kfiwunom, Bro Nkifrar wanyhato be yekwarnom rorhu tirtn htewurnom.

¹¹ Bro Nkifrarhu rfa borngt kfo kangt, “Yimam, ror hikruham, nhai suhhato yak nambtngruhatm.” ¹² To mirahko ka Judami yima tangim rorhu nyngaye nndo nndo htitworm. Nhai. Nmoh Bror rpa mifer, nhai nndo nndo. Froh frohm nakutmr kak marnyewurm. Nhai womrpam yukatoh-kahr. ¹³ Bro Nkifrarhu rfa borngt kfo kangt, “Froh froh yimam nakutmr rituhakruharmn rorpno rim tohrahm.”

¹⁴ Kanga, tafi yimam Jisasr myakitoh kihakni duha, to finji nakurfomr? Yo Jisasrhu gutnius mrokfot tafi yimam kfohehato wany juha, to finji hikrfomr? Yo tafi wom yimar yihato mrokfom kfo ptha nuhashe duha, to finji kanjo wanyrfom? ¹⁵ Yo tafi yimar Bro Nkifrar kfo tkur duha, to finji kanjo mrokfot kfo ptha htfasrfor? Bro Nkifrarhu rfa borngtn Aisaiar kfo memor, “Kmi kmim yindhorwom gutniuskfot hanyuk yimaroh htiyakneft!”

Isrerm nhai gutniuskfot yakrmomt

¹⁶ Judam nd gutniuskfot ykmohat dfikenrpam wany yakiomomt. Bro Nkifrarhu rfa borngtn Aisaiar kfo memor, “Broye, nom hany pthayuk mrokfot dfikenrpam wanyhato

wufakmomt.” ¹⁷ Ndt to wawanykomt. Yimam Kraisrhu gutnius mrokfot kfo pthiwatmm womm wanyhato hikwomm.

¹⁸ Mirahko Judam ka nhai gutnius mrokfot wanyrmom. Nd gutnius mrokfot yimam ptha nuhasmohat rom bi wanymom.

“Kmiyakmim bi wany bugamomm rroh tngm.

Rom pthayuk mrokfom bi wany bugamomm.”

Sng 19.4

¹⁹ Yo mirahko ka tu Isrerm nhai yakrmomt nd mrokfothu yimbu yuhat. Nhai. Rom bi fakmomt. Tfit mdukakkfot Mosesr kfomo mrokfot. Kfo memor,

“Yufapa duha yima tangim na Bro Nkifraya yak marnya thombat,
niko Isrerko kfo gungmioh-rahkomm.

Nd mumet yima tangim hti namburrahkomm.”

Lo 32.21

²⁰ Bro Nkifrar Aisaiar to kfo memor,

“Yima tangim, nanhu yufat nhai wom yiha kfo nakuwon duham,
naku kfomotma wanyhato fakiomoyanm.

Nanhu yufat yutawon duha kmim htimoma.”

Ais 65.1

²¹ Yo kfo memor,

“Na yonmari yiham Isrerm nakuhaso nakuhaso memoa
ka yudbat wany tonirahm.

To nhai, rom be wany marffitahato rhumoum.”

Ais 65.2

11

Bro Nkifrar fak marnyamorm wom Isrerm

¹ Wom ttiwon nmbuhat kfo ttiwonwanko. Nikone ka finji dukewako? Ka duka kangko ka Bro Nkifrar bi kfo yiriti bugamorm turhu tannefenm? Nhai Isrer thof buganom kfo yiriti bugarmornom. Nhai. Na Pora wahti dukako. Na mirahko ka mhafkneya. Nhai. Na tu Isrerena. Tu tannefena. Nanhu nkifrar, Abrahamr. Abraham frikeft niayuk yima Benjaminr nasfurmo yon frikeftn na niamoya. Na Bro Nkifrar nhai bi kfo yiritirmora.

² Bro Nkifrar nhai kfo marimorm Isrerm, “Na bi mong trohwanko.” Nhai. Rom, Isrerm, tu Bro Nkifrar kfo hbha htayuk kmiyem. Iraijarhu kfo tndh mrokfot, Bro Nkifrarhu rfa borngt yorhwat, htitwokomt? Iraijar Bro Nkifrapno kfo bruttnahato kfo memohat,

³ “Broye, ninhu profetm bi was bati buga hnamommn yo ninhu tarloh mthayuk tahi bajum bi kabofring wita hnamomm. Be tfit kangm, na wuroh taftuhena awasnom.”

⁴ Iraijar inji kfomohat to Bro Nkifrar tfit finji kfomorr? Kfo memor, “Nanhu yufatpno tohhato tahi Barr kfo bruttna duha yimo yimam, 7,000 yimam, tohwom.”

⁵ Tfit arihat mirahko ka Bro Nkifrarhu yufat rhuyuk Judam ka nhai tohkahm. Tom womm tohwom. Tu Bro Nkifrar yuhuwafhato kfo hbha htamorm womm. ⁶ Turhu yuhuwaf nmbuhatn kfo hbha htamorm. To mirahko ka rom hingrnayuk hingrneft htihato kfo hbha htarmorm o rom nayuk tamoh nefm htihato kfo hbha htarmorm. Nhai. Turhu hti duka fijo hti yuhuwafhato fakmorm.

⁷ To finji kforuhanom? Isrerm turoh nkifra boririfhu mrokfom fak bnka hik bugamomm memom, “Ka inji nahato Bro Nkifrar yak wus bowusrhrnom.” To nhai, Bro Nkifrar nhai yak wus bowusrmorm. Dfiken-rpam yak ttuhakhato fak wus bowusmorm. Wom womt nhai. Rroh yima rifhum tahisa hmbremomm. ⁸ Bro Nkifrarhu rfa borngt to kfo hik twanho kangt,

“Bro Nkifrar kfomotr rroh yima yuhum tahisamomm.”

Ais 29.10

“Yimbhindangm takih bokih-motrm

nhai wany marnyahato yak nhtarmomm tamoh mrokfom.

Yo nyngayet bet takunyjmotrm

nhai yukatohrmom.

Memom nndo mi nmbuha furam puk tmbho htatem.

Be ndhtet toheft rituhakmohat to be toh hik hnnewum.”

Lo 29.4

⁹ Defitr to nhaf wom mrokfot Bro Nkifrapno kfo memor,

“Na kanga rom yemro burwat wahta nhehakkahtnm
 nd yemro burwat yeroha yiha amyak bakkahmn
 yiram kanjo rugit afknitwam
 yo mim knbasekwa kanjo wahtakkahtnmasuhtwam.
 Nd natn gnngtatrahm.

¹⁰ Yo kanga nyngam watakunyj-kahtnm mirahm ayukatoh-nom
 yo krhopam wahta krhokahtnm be nd krhopamn hta kasuh-ruhatmm
 nhai toh susnawonruhatm.
 Be nd ruheftn toh nkifrani-twam.”

Sng 69.22-23

Yima tangim Bro Nkifrar fakmorm

¹¹ Nd nettn na be ttiwonwa. Ka Isrerm Kraisr hti kurmo nmbuhatpno ka Bro Nkifrar bi fak yirityaf buga-morm? Nhai. Isrerm yak yirityafmohat tfit yima tangim rithu nhirakmor. Bro Nkifrar duka memor, “Yima tangim rithu nhirakrhota Judam htihato kfo mirahm, ‘Nome, wom furanomn yak yirityaforuharn wom furam yakrahr? Nom tunomn yakrfor.’ Nd dukefr rhuruhatrm nanopno frtakfyuk yima yuhur mfro sinyarahrm.” ¹² Isrerm Kraisr hti kurmo nmbuhatn Bro Nkifrar yak yirityafmormn tfit yima tangim fak marnya bomarnyamorm. Nd nettn kto nd Judam Kraisr hikwam bi nd tur dukayuk thomnafat fekme ee nom rpat buga nd tu hifa rhu nmbuhat rhurahnom.

¹³ Tfit niko yima tangikomn bi tfit kfiwa. Na yindhorwa yima tangimpno tohhato Bro Nkifrarhu mrokfothu kfo ptha nuhasneft. ¹⁴ Isrerm Bro Nkifrar mong trohmo nmbuhat htihato nanhu dukeft duka kanga, nikompono Bro Nkifrarhu mrokfot akfo ptha nuhaskahta nikmoh womm wany yakiohato Bro Nkifrar rithu nhirakruhatrm tfit wom Isrerm inji htihato rroh yima yuhum sinyarahmm Kraisrhu hikneft. Hikruhatm Bro Nkifrar inji htihato tfit rithu nhirakrahram. ¹⁵ Bro Nkifrar afo Isrerm myafho tefinihat yima tangim rithu nhirakmor. Tfit kto Bro Nkifrar Isrerm rithu nhirakrahram. Nd mir bi yahot kasuhafhato suhnimor mekahtf tfit asinya atoha, nd yiha Isrerm womhtet rhu nmbuhat yakrahm.

¹⁶ Yimam bretpam hingrnewohat bi barkofpathu tift bi yak tifakhato Bro Nkifrarhu yufatn htefimt, to be nd yak tif tmbhoyuk bretpat Bro Nkifrarhu yufatn korht. Yo mirhu nyisoft bi Bro Nkifrarhu yufatn htemt to be nd mirhu yuhta tikt Bro Nkifrarparhut rhu bugewut. To be nd yuhatn Isrer frikeft inji rhu hikwot. Isreroh barkof tohyuk nkiframn bi Bro Nkifrar rifaktohakmor. To be nd Isrer frikeft to be Bro Nkifrar yakitoh hanyrahrm. ¹⁷ Wom kfo nhombra mrokfot akfoya. Isrerm tif olif tihayet. Yima tangim graf olif tihayet. Nd tif olif yuhtam Bro Nkifrar puk thumohat tfit nd graf olif tihatu yuhtam pukakmorn rithu nanyjihomor. Rithu nanyjihonihato nd olif tihat warhiwut nd rithu nanyjihoyuk yuhtam rom nadodru hmbrihato warhiwum. ¹⁸ To niko, yima tangiko, mirahko inji htihato akfo hagrhanom. Niko graf olifthu yuhtako duka marnyakfot. Nhai niko yuhtakomn thu warhokahkomt mmem nyisoft. Nhai. Tu mmem nyisoftn sinyahato thu warhiwutko yuhtako.*

¹⁹ Kfo mirahkma, “Nom kfo hagrhaneft nhai mrokfom, Bro Nkifrar hifa wom yuhtam frtmbho thuhato nom yakhato rifak natt hmbremor.” ²⁰ Ndt rot Bro Nkifrar inji hingrna twanhomor. Na nhai finji kforhota. Tumn nd gutnius mrokfeft nhai wany yakioromomt. Nd nmbuhatn rom riyak htafhato tfit niko yima tangikomn, nd gutnius mrokfeft wuyakmotkomt rithu nhirakmorko. Nd nettn niko be yakrmehato rhukfot. Mirahko akfo hagrhanom. ²¹ Bro Nkifrar Isrerm pno namo neft mdukakfot. Nhai marimor, “Arm tukanhu garbn kmiyem. Nhai yak thurhotanm.” Nhai. Fak thumorm. Nd nettn niko duka marnyaf hanyakfot. Niko nhai gutnius mrokfot hikkahkomt, to be yak thurahrko.

²² Niko duka marnyakfot. Bro Nkifrarhu nefm inji newur. Wom yiham hifa yima

* ^{11:18:} Nd mrokfot inji kfiwit. Yima tangimrpamn finji Bro Nkifrar hti dukahato yakitohrfomr. Hifa tu Bro Nkifrarhu tannefen Isrerm nhai wany yakio bugarmomr. Nd nettn nd wany yakio duha yimam yak tuhafhato rroh tkittn tfit yima tangim yakhato rihtamorm.

yuhur hmbritrm yimam, tfit wom yiham tumn fasoh dukefr yinyeft nhai hti marsisa hasokahrm. Judam Bro Nkifrar mong trohwam, nd yimam krhopam kahukrm. Niko yima tangiko awi hifa kak marnyewurko. Niko, tukomn, nhai yakitoh hanyakahkomr, nhai hifa yima yuhur hmbreruhatrko. Nhai. To be yak thurahrko. ²³ To nd tu Isrer frikeft yak thumot, be tumn Bro Nkifrar dukakhato tfit niem ee tfit yakmiyakrahrm. Bro Nkifrar be gari hasiwur yakmiyakneftn. ²⁴ Niko yima tangiko be Bro Nkifrarn rithu nhirak-hato rorpno yarim tohmoko. Tfit nd tu garbn Isrer frikeft kangr, “Tfit yakmiyakrhoyann tukanpno yarim fknirahm.”

Bro Nkifrar yimam yak marnyewa yuham kangr kmi kmim ayak nuhasanm

²⁵ Bar yinouroko, nikmoh dukeft duka kangko, “Bro Nkifrar nhai Judam bi wom yak marnyakahrm, bi nom yima tangirpanom kak marnyewur.” To Bro Nkifrarhu yima yuhur, kafrohetr yorhwar, niko nhai htikahkomr. Bro Nkifrarhu kafrohet yima yuhur inji korhr: Nd Isrerm Bro Nkifrar mong trohwa nmbuhat, ndt tukfot kfiwuko. To afo wawanyko. Nd Isrerm be inji afo nndo toh tefi hanyruhamn kto nd yima tangim Kraisr hikwam bi nd tur dukayuk thomnafat fekme ee tfit Bro Nkifrar Isrerm rithu nhirakrahrm. ²⁶ Rom rithu nhirakhato romn tfit yak hany yak hanyruharn bi nd Isrer bugam turpno rim tohni bugeme, be. Bingot profet Aisaiar bi ndt pthamort. Kfo memor, “Isrernom nrfa htiyakruha yimar tu Judarohr frfnah-nerahr.

Frfnahnehato nd Judam hatoh-nayuk fasoh fasoh neft

rorr yak wus bowus thu bugahirahrm.

²⁷ Nd Bro Nkifrar bi kfo htayuk mrokfot hikhato
yak wus bowusrahrm.”

Ais 59.20-21, 27.9

²⁸⁻²⁹ Isrerm, rom tumn gutnius mrokfot rimong trohakmotmt to be rihti namburakhato tfit niko yima tangikomn rithu nhirakmor. To nd Isrerm to mirahko ka mong troh buganirahrm. Nhai. Bingot bi rrroh nkifra Abraham Aisak Jekofrompno, kfo tahikfot htamort. Kfo memor, “Isrerm tom tu nanhu tannefenm. Tukanhu tannefenm yak marnya bomarnyaruhanm.” Ndnatn nhai wom dukefm yakhato mong trohkfot.

³⁰ Bingot afo niko yima tangikomn Bro Nkifrarhu mrokfom rifak htaf-mokomm. Tfit arihat tu Isrerm Bro Nkifrarhu mrokfot rifak htafrotmt Bro Nkifrar htihato tfit nikomn rorhu yuhuwafeft korht. ³¹ Arihat Isrerm Bro Nkifrarhu mrokfot hanyjbornewum to kto niko yuhuwafmo kanjo Bro Nkifrar rom yuhuwafrahrm. ³² Tu Bro Nkifrarn Isrermi yima tangim hti marsisamotrm fasoh hanyjborna rifhurpar brotamorm. Tu Bro Nkifrar duka memor, “Inji anakahann tfit kto nanhu yuhuwafeft htirahmt.”

Bro Nkifrarhu yufat ayuta hagrhanomt

³³ Bar yimako, Bro Nkifrar hatohwa riduka aduka yima yuhur be tu bro mifer. Nhai wom yimar rorhu dukefr kanjo rhu kfot. Nom yima mifnmoh dukefr kkopener. Nmoh dukefr buha mduka simbutewunom. ³⁴ Bro Nkifra-rhu rfa borngtn Aisaiar kfo memor, “Frohmn Bro Nkifrarhu dukefr yekwamr?

Frohmn kfo hta bohtiwamr?”

Ais 40.13

³⁵ “Yo frohmn wuskam o tamoh shrkam hemotmr
ror ndt htihato tawo hiruharm?”

Jop 41.11

³⁶ Bro Nkifrar ror turhu tnge kfomotr tamoh tamohm trhamom. Trhahato tur kfiwatr rhu hanitm. Rhu hanitam Bro Nkifrar bro yufat kekwor. Ndnatn rorpar yuta yindhor hatohkfot yiha yiham. To be inji.

Kraisr hiket yimam nayuk nefm, ndm Porr kfo pthamor

he bugakfot, yimam yuht yemror Bro Nkifrar mhtahuka kanjo. Be rorrpar hihato nikmoh toh nmbuham Bro Nkifrarhu toh yuham toh hikrahkomm Bro Nkifrar hti yindhorrahrko. Inji toh thombat, Bro Nkifrarn lotu mif mifrahko. ² Mirahko Bro Nkifrar yakitoh duha yimaroh toheft atoh hiknom. Nhai. Nikmoh yima yuhum Bro Nkifrarn yak kekut bugahato tfit nfri yima yuhum yakkfot. Inji narahko, Bro Nkifrarhu dukeft, niko rpa rpa yimokompono rhuyukt, hti hikrahkomm. Yo fitoh fitoh dborior nefm nahato Bro Nkifrarhu yima yuhur yindhorruhar, nd ndm hti hik bugarahkomm.

³ Bro Nkifrarhu yuhuwaf rifhut nann htamort. Nann htahato aposer hingneft nann hemor. Nd hingneft hemotra kfo hta mrokfom kahukanko. Mirahko amanyom, "Nom bro yufetenom. Nomn Bro Nkifrarhu hingneft kakitohwonom. Womm nhai nom kanjo Bro Nkifrarhu hingneft yakitohkahm." Mirahko inji adukanom. Ndhtet mrokfefm duka marnyahato kfo pthakfot. Bro Nkifrar womhtet womhtet hingrnafam kahukrko. Ni womn womhtet hingneft kahukrn, womr ror womhtet hingneft kahukrr. Ndnett duka hik marnyahato kfo pthakfot. ⁴ Yimanmoh tabhat rpayet. Nd rpa tabhatn korhm mfha nmbuhat, yagrt yo wurasift. Nd mfha nmbuhat yorhwa yimbhindangf, tngt, kusmt, tamoh tamoh yo yagrt yorhwa tamoh tamohm yo wurasift yorhwa tamoh tamohm nhai rpahtet hingneft yakitohkahm. Nhai. Nndoh nndoh hingneftm kakitohwom. ⁵ Nom Kristen yimanom nom bok met yindariyenom. To mirahko ka rpa rpa tohwonom. Nhai. Nom Kraisrhu hik yuhatn rpat yak tiphato rpat tohwanomn tunomn nahti duka nahti dukewunom.

⁶ Bro Nkifrar nom yuhuwafhato wonk wonk hingrna tafsefri ptha tafsefr he nhombra buga hanymornom. Ndnett ni womn Bro Nkifrarhu mrokfothu pthayuk mrokfo ptha yafothar fahutrn Bro Nkifrarhu mrokfom ptha hik bohik tafs marnyewunm, to be ni nd hingneft yakitohhato tu Bro Nkifrarhu dukef yuhatn ptha hikkfot. ⁷ Ni womn fahurn wom Kristenroh hingrnafem o sios hingneftm hingrnano fura bofuraneft to be ni ndhtet neft na hanykfot. O ni womn Bro Nkifrarhu mrokforoh kfo nuhas bonuhasneft hingrna tafs marnyewunt, to be ninn nd hingneft hingrna hanykfot. ⁸ O ni womnn wom Kristen-roh kfo bmta mrokfo hanyeft ni hifa tafs marnyewunt, to be ninn nd hingneft hingrna hanykfot. O ni womn wom Kristenroh tamoh tamoh hanyeft kakitohwont, to be nd yima he wiforneft yakitoh hanykfot. O ni womn Bro Nkifrar hikwa yimaroh tohak yimam hingneftu hingrna yuham hingrna tafs marnyewunm, ni nd hingneft yakitoh marnyakfot. O ni womn yima yak marnya fura bofurayete, to be ni nd neft yindhorhato nd neft yakitoh hanykfot.

⁹ Womm hifa hifa yima yuhumpno yuhuwafwanme, mirahko tngrpaye akfo haddo yindhor furanomm. Fasoh nefm mong trohhato dborior nefm yakitohkfot.

¹⁰ Niko Kristenko, tuko nayak marnya bomarnyakfot najohfiko kanjo. Mirahko tamoh tamoh nefm tukmoh yufamn yura yura awuh-tanomm. Womroh tamoh nefmn kfo yindhorneft hifa. ¹¹ Mirahko Bro Nkifrarhu hingneftu yakitohneft ahrehknomt. Be nd dukefrn tohkfot. ¹² Bro Nkifrar nikmoh yufampno kfo htamo tamoh tamohroh dukefrpno rhuhato yindhor hasokfot. Tamoh tamoh krhopampno mirahko ariwohsisaknom. Toh bmtakfot. Toh bmtahato Bro Nkifrar kfo bruttna hasokfot.

¹³ Fitoh Kristenm tamoh tamohm kaknafwom niko ndetko rhuneft yudbat yakhato hekfot. O fitoha toh tanyhato nikmoha niem, hifa rika bukr yak htakfot.

¹⁴ Wom yimam fasoh kak bebwomko, be niko mirahko finji ananomm. Bro Nkifrar kfo bruttna-kahtko yak marnyarahrm. Uwa, tfit wompam kfiwa, be Bro Nkifrapno kfo bruttnahato yak marnyarahrm. Bro Nkifrapno kfo toya duha. ¹⁵ Wom fitoh yimam tamohmpno yindhor-wom, niko rpat yindhornhokfot. O womm tamohmpno nur dungunangu inji newum, niko womko rpat rhuhato nur dungunangunhokfot. ¹⁶ Niko rpahtet rhu nmbuhat wommpno rhukfot. Mirahko bro yufat ayak hanynom. Nd yufapa duha yimampno niko rhu mskakfot. Mirahko womrhu yufam wahtahato tukmoh yufamn yura auhtanomm.

¹⁷ Womm fasoh fasoh nefm newumko, mirahko tfit toh kekuthato tawo fasoh nefm ananomm. Ndt bebet. Niko be dborioh dborioh nefrpam nakahtkomm yima bugam hti yindhor-rahmko.

¹⁸ Finji newumko, niko hifa yima yuhurpno tfit kfo yongm boyongmak-nihato brbo furyaknikfot. ¹⁹ Bar yinouroko, womm finji naknewumko mirahko bi finji ananomm. Be Bro Nkifrarpar yukatohaf hanykfot. Bi Bro Nkifrarhu rfa borngtn Bro Nkifrar kfo memor, "Yimam finji newumko, bi mirahko nikomn finji ananom. Nann nd yimam htiruhanm."

²⁰ "Yimam namburwomko, niko tawo nambur duha.

Hifa yima yuhur rhuhato tamoh tamohm nd yimam he wiforkfot.

Nuwa yatinohwom, nuwam yak hekfot.

Bupam kfiwum, bupam yak hekfot.

Inji narahkomm htirakomm tfit tum yimtnarahm." Snd 25.21-22

²¹ Mirahko yudbat sinyahato tawo fasoh nefm ananomm. Nhai. Hifa nefm narahkomm, htirahko nd rom hatoh hnayuk kah rifhur tfit migonng hmbrenirahr.

13

Nom be gafmanroh yinhit rhukfot

¹ Fitoh yimam gafman hingrneft yakhato tohwomt niko wom yima furako be rroh yinhitn rhukfot. Nd gafman hingrneft yikitohet yimam nhai be tumn nd hingrneft rifak furakrmom. Nhai. Bro Nkifrar kfomotr nd hingrneft rifakak-mom. ² Ndnettn wom yimam gafman yimam kfoyuk tngt hanyjbornaneft to be kalabus htakfot o womnam wom nefm nakfot, to nhai tfit wom yimar finji kfokfot. Nd gafmanm Bro Nkifrar fak htamorm. ³ Gafman hingrneft nhai be dborioh yimaroh yak yanhoyuk hingrneft Bro Nkifrar yak htarmort. Nhai. Nd hingrneft fasoh nefm nayet yimaroh yak yanhoyuk hingrneftn htamort. Ndnettn be dborioh nefrpam yikitohkahkomn nhai hiti yakrmeruhatkomm. Inji narahko be kfo yindhorrahmk. ⁴ Gafman hingrneft tohwa yimam nikmoh dborioh nefroh kfo hta marnyayuk yimam Bro Nkifrar fak htamorm. Be yak yanho fura duha. Tukomn tamoh neft neko, ee btn yakrmehato rhukfot. Mirahn ka be wumtrahma. Fasoh nefm newa yimaroh yak bebyuk yimam Bro Nkifrar fak htamorm. ⁵ Nd dukeftn gafman yimam kfoyuk tngm yak hikkfot. Nikmoh dukeft duka mekfot, "Bro Nkifrar fak htamorm. Ndnettn ndhtet yimam kfoyuk tng yuhatn nom be hikkfot." Inji dukahato hikrahko nd dukeft hifayet. Gafman yimaroh tngm hik duha yirahnomm Bro Nkifrar namburrahrnom.

⁶ Gafman yimam Bro Nkifrar fak htamorm. Rom nd hingrneft yiha yiha tohhato kak hta bohtewumko. Ndnettn takis marut tuhato rroh hingrneft hingrnarahmt. ⁷ Afo kfo hik sugarhotant wawany hik marnyatwako. Tamoh tamoh takis gafman yimam ttiwonwom hanyeft, hekfot. Kfo kangm ser takis o kastam takis o het takis o fitoh fitoh takis kangmn wawikna, ni mirahn ahanyjbornaya. Fitoh yimar gafman hingrneft yakhato nikmoh kmit gafman hingrneft kakitohwort, rorhu kfoyuk mrokfom wany yakiohato hikkfot. Dborioh nefm yak marnya bomarnyakfot. Yo nd yimarn bro yufat htakfot.

Wommpno nayak marnyahato tohkfot

⁸ Mirahko wommpno tamohm yakneft aye mumafongotnomm. Nhai. Wommpno tamohm fekko yudbat hiyafhato rhu mmorahko. Yima nayak marnyanerpat kfiwanko. Womm kak marnyewanme, to be nd nefrpam yikitoh hanykfot. Yimar womm kak marnyewurm, nd yimar tu Bro Nkifrarhu boririfhut kfiwa yuhat kak hikwor. ⁹ Bro Nkifrar htamo boririfhut bi wanyetenom. Boririfhut kfo kangt, "Niko tuhanet yimako mirahko wom mettpno arim fnahnomp. Niko ramet metko mirahko wom yindarirpno arim fnahnomp. Mirahko womm awas furanomm. Mirahko arikohnom. Mirahko womroh tamoh tamohm ahti yuhurnomm." Nd boririfhu mrokfo bugam rpa mrokfo nmbuhattn myak tkaf bugewum. Nd mrokfot inji kfiwut, "Tunn yak marnyewa kanjo inji womm

yak marnyakfot.” ¹⁰ Yima yak marnyet yimar nhai womm yak bebkahrm. Nkifra boririfhuthu mnat to tot inji.

Nom be hifa hifa wiyauyaufot

¹¹ Nhai be sfno kfo furakahanko. Wawanyko. Ndarr bi wom yihar bi tohwonom. Nyingam frtrhahato yima yuhum adifromm. Jisas Kraisr kfo memohat “Yak marnyaruuhanko wom yiha,” nd yihar to bi asor bi brbohwor. Nom fasoh tkitt afo tohhato Kraisr nrfakmohat, nd yihart afo wuri rhumot afo. Tfit arihatn bi brboh hanitt.

¹² Yifungr yinyihato tfit marr mta fnah yibonwor. Ndnett yifungthu fasoh nefm nom yafho thuhato mar nukefthu nefm tfit yakkfot yima yahrt yiyuk wondh wuskam yak hmbrita kanjo. ¹³ Nmoh yau nmbuhat yau marnyakfot yimam mar nukat yauwa kanjo. Nhai wommpno rhuhato drinhato ptha mmokfot, yo kminysofm yihom toniyak mtoniyakhato kimr het grha hasokfot spakmanm kanjo. Wom met furampno rim fnah duha. Nmoh thatipm nhai foh yaum niwa nefm kanjo nahikkfot faso yimtnayet nefm. Yimayenom tu yimaroh neft nahikkfot. Nhai nayak nhtahato womm rom inji, womm rom inji tohkfot. Nhai womroh tamohm hti yuhurhato kfo yuhuweh-hato kfo wokkfot.

¹⁴ Jisasr wohn rikar kanjo wahmbrekomr. Tfit mirahko ndar bbinysoftthu fasoh fasoh dukefm ayaknom.

14

Mirahko tu garbn yimattroh nefm htihato kfo babobanomm

¹ Arihat wom yimam, Kraisrhu mrokfom hikwam, afo hik mmo bomumiwum. Nhai be yudbat myak teknikahm nfri dukefrn. Nhai. Tom womm afo nkifra boririfhut rpatt kakitoh hanitmt. Ndnett kanga akfo nuhasanko. Mirahko ndhtet yimam htihato wom mrokfom akfo pthanomm. Be yakhato nikompno rpatt tohhato tamoh tamohm rpatt hingrna mskakfot. ² Wom yimam, Kraisrhu hik yuham bi hti hik bohiketm, nhai tamoh yeshri ye kars yuham mdukakhato ye hikkahm. Nhai. Rom be ke fura bofurewumm nd tamoh tamoh yeshrim. Womm, rom nhai. Rom tamoh tamoh yeshrim kurhato yewurirpat kawum. ³ Fitoh yimam nhai tamoh tamoh yemrom o tamohm ye fura bofurakahmm, mirahko niko tamoh tamohm ye fura bofuriwako rom htihato apthanom. Tfit fitoh yimam ye fura bofurewum tamoh tamoh yeshrim tfit mirahko niko womko kekuthato akfo amanyom, nd yimam, yemska fura bofurewam, nhai tu hik marnyakahm. Mirahko inji akfonomm. Nd yimam bi Bro Nkifrar hifa hti yindhorworm. ⁴ Ni frohnn rom kfo pthiwa? Rom wom yimarhu yinhitn tohwom. Nd yimarn kfo merform, ni fasoh neft newun o dborioh neft newun. Nd yimam tu Bro Nkifrarn yak htaf hanitatrm rroh toh nmbuham hifa yi tohwatm hti yindhorworm.

⁵ Yo wom yimam duka kangm, nd nd yiham tom Judaroh bro yiham. Tfit womm kfo kangm, nd yiham Bro Nkifrar nhai wom yukatohkahrm. Inji nakfo nakfiwum. Ndnett na kfiwanko. Mirahko womroh dukefmn ahiknom. Tukmoh dukefmn hikkfot. Tunhu yima yuhur kfo kangr, inji inji wahikn ee nd dukefrn hikkfot. ⁶ Wom yimar Bro Nkifrar mdukekwarn kfo kangr, “Nd yihar bro yihar rhurahr.” To be nd ror kfoyuk yihar htewurr Bro Nkifrarhu bro yihar. O womr duka kangr, “Tamoh tamoh yemrom be ye fura bofurayukem, nhai mrokfo duhatem.” Inji kfonihato tamohm yenyeft Bro Nkifrar mdukekwarn kfo bruttnanihato kawurm. O yemrom kurhato be nd mswir yeshrirpat yanyeft nhaf inji. Bro Nkifrar mdukekwarn, yewurirpat kfo bruttnahato kawur.

⁷ Nom ndar bbinysoft tohwahat nhai wom yimar kfo mikahr, “Na tukann kfohato ndar bbinysoft tohwant.” O “Tukann kakitohwann tukanhu nohyuk yihar.” Nhai. ⁸ Nom ndar bbinysoft yi tohwahat tu Bro Nkifrar kfiwatr tohwonomt. Nohneft nhaf tu Bro Nkifra kfiwatr ee nohwonom. Ndnett ndar bbinysoftthu tohnefti nohneft Bro Nkifrarpar kakitohworf. ⁹ Nhai be sfno inji kfokaha. Kraisr nohmohat be minoh nhehafhato tfit myenyjwahato tohmor. Nd nmbuhatn rorpar kakitoh-worm noheh yimami yima nfrim.

¹⁰ Bro Nkifrar bro mrokfot yikitoh thombat nom buga rpat toh bugarah-nom. Ndnett to tfit tamohmpno tfit tuko nakfo nakfiwako? ¹¹ Bro Nkifrarhu rfa borngt kfo kangt, “Na Broya, na toh nkifraniruha Nkifraya, na kfo mifwa, nda bbinysoftu tuhant yindars nia bugaruhamn nanrpayanpno bangu myukna-ruhamn kfo mirahm, ‘Asor ndar Nkifrarpar ayakitoh-kahrnom rorrpar nmoh tamoh tamoh nefm akfo ptharm.’”

Ais 45.23

¹² Ndar bbinysoft tohhato niwa nefm kto tunomn Bro Nkifrarhu nyingahato rpa rpa mtohhato tamoh nefmpno riruhakhato tamoh nefm namomm, nd yiharn kfo dbruf nuhas buga hanyrah-nomr.

Mirahn womr wom nefm anhehkahtanr fasoh nefmn amsuhr

¹³ Ndnett mirahko nd womroh nefm htihato akfonom. Be nyingarpaye yukatohkfot. Rom turoh dukeftn Bro Nkifrar inji hikwomr. Tfit nikmoh nefm hikruhamn yima yuhum nhai marnyaruhatmm. Ndnett mirahko ndhtet nefm ananom. ¹⁴ Na, Jisavr hiket yimaya, nanhu yima yuhurio kfo kangr, nd tamoh tamoh yemrom ye fura bofurayukem. To wom yimaroh dukefmn kfo kangm, nd yemrom hnaruym, to be nd yemrom hnarus korhm. ¹⁵ Ndnett niko tuko Jisavr hiket tuhan yindariko tuko nahti dukakfot. Womm tamoh tamoh yemrom yuhre ke hik hanitmm, rompno niko womko ye fura bofura duha. Niko htiyakhato womm ye fura bofurarahm, kto tfit yima yuhum krho hmbrirahmm. Jisavr nohmohat nmoh nefm rpat minoh nhehafhemornom. Ndnett ni womn mirahn womrhu yima yuhur inji anakahann yima yuhur faso arhurr. ¹⁶ Ni womn bi tat yima yuhetn, ninhu dukeft duka kangn, na nd nd nefm naneft, nhai mrokfom. To be ni htihato womm ninhu yuhat hikhato msuhradm, to be tfit ninn mrokfot yiraht. ¹⁷ Yimam Bro Nkifrarhu kingdomfot tohethm nhai nd yemro ye hik yuham o bupa ye hik yuham dukakahm. Nhai. Bro Nkifrarhu kingdomfot tohet yimam htirahnm dborior yima yuhumpno rhurahm. Yo noh hmbre yima yuhumpno rhurahm. Yo be Bro Nkifrarhu Yafothathu yindhorefrparpno rhurahm. ¹⁸ Ndhtet dborior yima yuhet yimar, Kraisr hikwar, Bro Nkifrar hti yindhorworr. Yo kmi thofm rorhu nefm htihato kfo yindhorwomr.

¹⁹ Ndnett nayak marnyahato rpat tohkfot. Yo fitoh nefm ni womn niwatnm womr htihato toh bmtewur, nd nefrpam yikitohkfot. ²⁰ Na kanga, nd tamoh tamoh yemrom ye fura bofurayukem. To Bro Nkifrar wom yimarhu yima rifhur bi finji fak hta marnyerr, to ni womn mirahn rorhu nyingahato tamoh tamohm aye fura bofuraya. Ni htiyakhato womr ye fura bofurarah, kto tfit rorhu yima yuhur krhorahrr. Mirahr, “Be bi tuka fewoka.” ²¹ Womroh ye nhehneft ndt fasohet. Ndnett ni womn nd yemro ye fura bofuraneft, wain bupa yanyeft, be yafho thu bugakfot. O wom tamoh nefm ni womn yikitohwatnm womr htitwarn hikhato yima yuhur fasoh korhr, ndm rpat yafhokfot. ²² Nd kfo hnayuk tamoh nefenm ni womnu yima yuhur kfo kangr, “Nhai mrokfefm nd nefthu yikitohneft,” ni be hifa yimaye. To be nd dukeft turpanhu yima yuhur rhukfot. Ninrpani Bro Nkifrar nd neft tawisafkfat. ²³ Tamoh tamoh yemro yenyeft yakrme yima yuhurpno yemrom yerahr, Bro Nkifrapno mrokfetr rhurahr. Nhai rpa yima yuhurpno yekahr. Ndnett Bro Nkifrapno mrokfetr rhurahr.

Kraisru dukefti neft hikkfot

¹ Nom froh frohnom Bro Nkifrarhu yihotam bi hti hik bohiketnom mirahko turpatnom ahti duka hasonom. Nomn nd Kraisr hikyuk muhra yimam hifa yima yuhurpno yakkfot.

² Yakrahnomm Kraisrhu hik yuham myakitoh trpknirahmm. ³ Kraisrhu dukeft nom yak hikkfot. Nhai turhu ruheftu rhu yuhat dukarmor. Nhai. Nd rorpno rhumo nefm to Bro Nkifrarhu rfa borngt kfomo yuhatn nd nefm rorpno rhumom. Bro Nkifrarhu rfa borngt kfo kamukt, “Ninpno tumo tng bebm, nhaf inji buga, nanpno nd tng bebm nhaf

tumomm.” ⁴ Bingot Bro Nkifrarhu rfa borngt htamo mrokfom, nmoh yak hta bohtayuk mrokfomn wandfamomm. Nd mrokfomn htiruhanomn yima yuhum bmtaruhann tamoh tamoh nefm toh bmtahato Bro Nkifrar duka duka gari hasorahnem. ⁵ Bro Nkifrarpars thu bmtewatrnem rorhu mrokfot yakitoh kihhato hikwonomt. Kanga, Bro Nkifrar nikmoh yima yuhum ayak marnyakahtrm Krais Jisasrhu dukeft yak hikrahko. Yak hikhato tuko niyak marnyahato rpat toh marnyahako. ⁶ Rpat toh marnyahato nmoh Nungothet Jisas Kraisrhu Yifemrhu yufat rpat naku yutahato kfo yindhorrahko.

⁷ Ndnettun niko womko, bi Jisasr hikwako, Kraisr niko yakhato rorpno tohwa kanjo tfit womm inji wayakkah-komm rpat watohko. Inji narahko htirahko wom wom Bro Nkifrar kfo yindhor boyindorrahmr. ⁸ Na kfiwanko, Kraisr yawihsnamohat nom Judanmoh yak marnyaneftn fawihnamor. Bingot Bro Nkifrar nmoh nkiframpno kfo hta memohat wom nrfa htiyakyuk yimar niahato dborioh rhu nmbuhatt hnerahrt, to be nd mrokfeft nhai kfo furarmort. Nd mrokfot rhu hikmot. ⁹ To nhaft, womt duka memor, “Yimam yuhuwaf-hato nrfa htiyakyuk yimar aikaht yima tangim htiruhann Bro Nkifrar kfo yindhorrah.” Bro Nkifrarhu rfa borngt to kfo kamukt,

“Na yima tangimpno ninhu yufat yutahato kfo yindhorruha.

Yo ninhu yufat yutahato windoh yindhorruhann.”

Sng 18.49

¹⁰ Yo wom mrokfot kfo kamukt,

“Niko yima tangiko,

Bro Nkifrarhu frikeftu tuhan yindarspno rpat yindhorkfot!”

Lo 32.43

¹¹ Yo tfit wom tkittn wom mrokfot kfo kamukt,

“Niko yima tangi bugako Bro Nkifrar yuta yindhorkfot.

Niko yima bugako windoh yindhorkfot.”

Sng 117.1

¹² Tfit Aisaiarn wom mrokfot kfo memor,

“Kto Jesirhu frikeftn wom yimar sinyaruaharn king tohahr.

Nd yimarn king tohhato kmi kmim yakitoh bugarahrm.

Nd yimarn yima tangiroh dukefm yukatohrah.”

Aisaia 11.10

¹³ Hifa rhu nmbuhathu yak nmbuhatt bi tu Bro Nkifrarn mrokfot kfo htamort. To be nom ndtn dukahato toh gari hasiwunom. Niko nd ror kfo htamo mrokfot duka duka toh gari hasiwatko na kanga tu Bro Nkifrarhu Yafothatn hifa yindhor rifhur ahikahtko yima yuhum mirhurahmk.

Porr turhu hingrneftu mrokfom kfo pthanihato kfo yindhor mrokfom hemorm

(Sapta 15.14-16.27)

Porr tu yindhormor turhu misin hingrneft

¹⁴ Bar yinouroko, nd wom yimaro hifa hifa yak marnya nmbuhatt, nanhu bro htiyeft htita bi kak bugewukomt. Nd riduka adukayefm bi kekwokomm. Nikomn womm yak hta nuhas bonuhasrfokomm. ¹⁵ Na gontwat htayuk mrokfom wom kfo nnhu mrokfom htiwa. Mirahko nd mrokfom htineft ayak bebnomm. Kanga, Bro Nkifrarhu dukeftn wahikko. Ndnettann kfo nnhu mrokfom kfiwanko yo nhaft nd hingrneft nann Bro Nkifrar htamor. ¹⁶ Nann yima tangikompo tohhato Jisas Kraisrhu gutniuskfot kfo ptha nuhaswanko. Nann prism hingrnamoa hingrneft kanjo niko yekwoyanko Bro Nkifrarpno hanitanko yimam tarior mthayuk yemrom yaknihato Bro Nkifrar hanyhemoa kanjo. Be rorpno hanitatanko rorn turhu Yafothat thu hmbrtarko be turhu bugako korkho.

¹⁷ Na hingrnewa hingrneft Krais Jisasrpno yak tkafhato hingrniwant. Na tuka yindhorwa nd hingrneftu hingrnanef. ¹⁸⁻¹⁹ Nhais na wom tamoh mrokfom ptharhota. Na rorhu hingrneft tohmohat htimoja tu Kraisr toh nhomoatra tamoh tamoh nefm be rorhu tirtn mrhunimou. Yo nhaft htimoja tamoh tamoh nefm Bro Nkifrarhu Yafothat nhai frtrophrmoata. Rotn thu bmtamouta tamoh tamoh nefm. Nd wonk wonk miraker nefm na mthu nawohhato namoam memour, “Yima tangim hti yuhurhato Bro Nkifrar hikrah.” Nd dukeftn nd wonk wonk nefm namourm. Na gutnius ptha nuhasneft riingrnakmohat tuha Jerusalemrn hingrnakhato kmi kmi hingrnahany,

wuroht Ilirikum profinsn mihingrna tmbhomoya. ²⁰ Na Kraisrhu gutnius mrokfot wany juha yimampno yihato mrokforoh yi kfo ptha nuhasneft yindhor mifwa. Na wofnkaha bi wom yimamn wohnfa rahum kasinyahato na kto yauyak-nihato wohnfa rafonm thu tabotruthato hegir kiyaknikfot. ²¹ Na kanga Bro Nkifrarhu rfa borngt kfiwa mrokfo yuhatn ahika:

“Yimam rorhu mrokfot tafi wany juham htirahmr.

Yo yimam rorhu mrokfot wany juham turoh nyngaye hti switrahm.”

Ais 52.15

Porr memour Rom thofm htinihatno Spenko aiya

²² Ndar na tohwa hingrneftn ufak afakimoatta nhai nia htirmoayanko. ²³ To be bi hingrna hnamoyann, akorhof hingrneft bi be. Kmi kmim bi fak bugaromt Bro Nkifrarhu mrokfot. Bok gunyjimm dbiyaf hatohmoa nikmoh yi htineft. ²⁴ Ndnettann na Spenko yi shoft afo nikompno afo mtohniruha. Na yindhorwa nikompno Romt tohnineft. Nikompno tohnihatno tfit Spenko yi shoft tfit nikomn yihotam hingrnafhirhotkma Spenko yiruha.

²⁵ Afo arnat afo Jerusalemko yihato Jisasr hikwa yimam maruham hanyhiruha. Maruha duhatmn nhai yeshri tamohm wiknakahm. ²⁶ Ndnetttn Masedoniakorhof Kristenmi Akaia-korhof Kristenm maruha yak nhafoh-momn nanhu tirtn htamomm rroh hany heyukrm. Ndnettann afo nd maruham Jerusalemko hanyruha afo. ²⁷ Nd marut rom yak nhafohmot be turoh dukeftn fak nhafohmomm. Ndt tu dborioh neft namom. Bingot Judaroh Kristenm gutnius mrokfot hanymotmt yima tangim wanyhato hikmomp. Ndnetttn Judaroh Kristenm tamohm yak nafneft tawo yima tangim hti dukakfot.

²⁸ Afo nd bro hingrneft afo ahingrna bugayant. Afo Jerusalem thofroh marut mhtanyhiyanm afo. Kto mekahta Spenko aiya afo nikompno mtohniruha. ²⁹ Nd yiha na nikompno yi tohnineftpno nikomi na nahti nahtihato Jisasrhu hik yuham rpat rhuhato nakfo tndh nuhas thombat be tu bro yindhor nmbuhat yakrahtnom.

³⁰ Bar yinouroko, nmoh toh nmbuhat nmoh Nungothet Jisas Kraisrpno tohwatnom Bro Nkifrar inji htihato rorhu Yafothatn thu kasinyewutnom womroh hti dukaneft. Kanga kfo yingmari mrokfot kfiwanko. Bro Nkifrapno wakfo bruttna hasotwokma.

³¹ Jisasr hik duha yimam, Judiako tohwam, kangm, “Ayak bebnomr.” Ndnettann kanga Bro Nkifrar kfo bruttnakahtkomr hti yukatohaf hanyrahra. Yo kfo bruttnakahtkomr Jisasr hikwa yimam nd na hanyuk maruham yindhorhato yak hutfarahma. Nhai kfo kurruhatmm. Mirahm akfo kurnomm. Nd nd nmbuhamppno kanga wakfo bruttnatwako.

³² Be Bro Nkifrapar hti yukatohaf hanyrahrnom. Tur yibonwor nanhu nikmoh kmi yuhat yinyeft, be hifa. Nanhu yima yuhur yindhorrahr. Nikompno mrhu krna tefinihato yima yuhum wuthahato tfit nfri bbukeft nierahta.

³³ Dborioh rhu nmbuhati dborioh yima yuhur hayet Bro Nkifrar atohnho bugatwarko. To be inji.

16

Porrhu kfo yindhor mrokfot

¹ Nmoh mndarem Fibithu yakinoh nmbuhat kanga akfo nuhasanko. Fibit taun Senkriat tohhato ndharhof sios hingrnewa kakitohwotm. ² Nd mett tu dborioh Kristen metet. Nikmoha mfnahwot kfo yindhorakhato hifa tkitt yak htakfot. Tamoh tamohm nikmoh tirmn arhutwat. Bok yimam rothu tirtn rhumom yo na buga. Na rothu tirmn rhumoya.

³ Prisila Akwila sawohf wakfo-twakomf, na rof dukahato kfo yindhor mrokfot htefiwant rofpno. Na hingrnewa hingrneft rofn kakitohnuhiwufa. ⁴ Nanhu nrfa htiyakneftpno bi noh hany sitamof. Na ndt htihato na be tu kfo yindhor mifwanf. Nhai be nanrpaya kfo yindhorkahanf. Nhai. Yima tangim, Jisasr hikwam, wanyhato kfo yindhorwomf rof namo neftpno. ⁵ Yo wom kfo yindhor mrokfot wakfo hitwakomm rofhu kunys rifinywa sioshu yimam.

Yo wom kfo yindhorkfot nanhu yimat, Epainetusrn, wakfohitwako. Rorn Esia profinshu barkof yimar Kraisr rihikakmor. ⁶ Yo nanhu wom kfo yindhorkfot Mariatn wakfohitwako. Rot hifa hingrna bbukanhotamotko.

⁷ Yo wom kfo yindhorkfot Andronikus Juniasrofn wakfohitwako. Rofi na rpa kantriko niayukenom. Na kalabus tohmohat rof rpatis tohmonom. Jisarsru hik nmbuhat rofn bi rihikakmotf ee kto na. Rofhu aposer hingruefmn bi kmi kmi wany bugewum.

⁸ Tfit wom kfo yindhorkfot Ampliatusrn wakfohitwako. Ror tu nanhu Kristen yimater.

⁹ Yo tfit Urbanusrn wom kfo yindhorkfot wakfohitwako. Kraisrhu hingrueft ror hingrnanuhiwurnom. Yo Stakir rpat kfo nuhaskfot. Ror tu nanhu yimat mifer.

¹⁰ Apelesrn wom kfo yindhorkfot wakfohitwako. Ror Kraisrhu yufatpno krhoparoh yakneft bi htimort. Nom htihato kfo kangnom, nd yimar tu Kraisr yakitoh kihwa yimayer. Yo nanhu wom kfo yindhorkfot wakfohitwako Aristobulusri rorhu kuny shofm.

¹¹ Nanhu wom kfo yindhorkfot wakfohitwako Herodionrn. Rori na rpa kantriko niayukeno. Yo Narsisusrhu kunys tohwa Kristenm, romn nanhu wom kfo yindhorkfot wakfohitwako.

¹² Yo wom kfo yindhorkfot Trifina, Trifosa Persisromn wakfohitwako. Nd metm Brorhu hingrueft hingrna nnfewumt.

¹³ Yo nanhu wom kfo yindhorkfot wakfohitwako Rufusrn. Nd yimar tu dborioh yimayer Brorhu hikneft. Yo rorhu mmemtn nanhu wom kfo yindhorkfot wakfohitwako. Na tuthu yona kanjo tamoh tamohm fak marnya bomarnyamouta.

¹⁴ Yo tfit nanhu wom kfo yindhorkfot wakfohitwako Asinkritus, Flegon, Hermes, Patrobasr, Hermas yimandounrn yo wom yimam rompno rpat rifinyhato Bro Nkifrar kfo bruttniwam.

¹⁵ Tfit nanhu wom kfo yindhorkfot wakfohitwako Filologus Julia sawohf yo Nereus mndarehf, yo Olimpasri Kraisr yak hiketm rompno rpat tohwam.

¹⁶ Niko nd yimako yo metko, niko wom yiham rpat rifinyhato Bro Nkifrar kfo bruttnaneft tuko naki yindhorkfot wakfohitwako. Nahti marsisa duha.

Ndar na tohwa tkitthu sioshu tuhan yindars niko dukahato kfo yindhorkfot htefi-wumt.

Wom yimam kangm Kristenm ayak nanyornomm

¹⁷ Bar yinouroko, wom bro mrokfot kfiwanko. Niko ndar Jisarsru mrokfot bi yakhato hikwako yukatoh hik marnyakfot. Tom wom yimam mrokfom kfo kekut bokekutwam. Ndar Jisarsru mrokfot niko wanukat rom buha mfnahhato frtmbho botmbhiwumt. Rom nhowi nieruhamn rikfo akforuhutmko rpa rpa tfit fnahnirahko. Ndhtet yimam nikmoh rifiny swim rhu hnewum, frohnorn amanyom nd yimam wom mrokfom atum. ¹⁸ Rom nhai tu nmoh Nungothet Kraisrpno toh tkafkahm. Nhai. Be nd turoh yima yuhuroh yak marnyayuk mrokfom kfo pthewum. Kfo yongm boyongmak-nitamm nd yimam, mrokfom yak nhita marnya duhatm be yudbat wany yakiowaknitamm rroh dohmn mikmbrim. ¹⁹ Nikmoh gutnius mrokfotu wanyhato hikneft, bi kmi kmi wanymom. Hifa na yindhorkfot. To tfit wom mrokfot mkfekwant. Nanhu dukeft kanga dborioh nefrpamn niko htihato yakinohneft ndt hifa. Na wofnkaha niko mmo bommohato tfit fasoh fasoh nefmn yakinohneft. ²⁰ Bi brbohwot nikmoh Satanruh yahot tkaf yihar. Hifa dborioh yima yuhur hayet Nkifrar tohnhoruhatrko yahot tkafrahkomr Satan. Nmoh Nungothet Jisars yuhuwafto ayak marnya bomarnyatwarko.

Romko wom yimam kfo yindhorkfot htafmom

²¹ Nanpno hingrnewa yima Timotir kfo yindhorkfot kahukrko. Yo wom husfirpa yimam, Lusius, Jeson, Sosipater yimandounrn wom kfo yindhorkfot kahukmko. Romi na rpa kantriko niayukenom.

²² Na Tertiusa, nann nda Porrhu gontwat wandfahukanr. Na nhaf wom kfo yindhorkfot kahukanko.

²³⁻²⁴ Gaiusr nhaf inji buga. Rorn wom yindhorkfot kahukrko. Na rorhu kunys tohhato rorn kakitohwora. Ndasharhof Kristenm rorn kakitohworm.

Erastusr ndasharhof bro gafman hingrnefthu maruha yakitohwa yimayer. Rori Kwartusr, nmoh yimatr, rof wom kfo yindhorkfot kahukfko.*

Bro Nkifrarhu yufat yuta yindhorkfot

²⁵ Nom Bro Nkifrarhu yufat yuta hagrha yindhorkfot. Jisas Kraisrhu gutniuskfot, na kfo nuhaswat, thu bmtarahtko. Nd gutniuskfot bingot bi nkifra nkiframpno afo Bro Nkifrar kafroh hnamourt. ²⁶ Tfit arihatn tafont htamotrt nomn kfo nuhaswonomm. Nd toh nkifraniyet Bro Nkifrar rorn kfo htewatrnom nom yihato bingot tohmo profetm htayuk mrokfom kmi kmim kfo ptha nuhaswonomt. Kfo pthiwatnomm kmi kmim bi wanuk-womt. Memor, “Inji anakahta yima tangim wany yakioruhann hikrahm.” ²⁷ Nd nom kfiwa Bro Nkifrar ror tu be bro dukefeter. Ror kfomotr, Jisas Kraisr fawihnamor. Nom ndt dukahato rorhu yufat yiha yiha yuta hagrha yindhorkfot. To be inji.

* 16:23-24: Ndar rfa borngt yorhwa mrokfom hti hik bohik marnyet yimam ndar veskfothu wom mrokfo nmbuhat fak frikatiyafnimomt. Wommne htamomt. Nd yak frikatiyafonimo mrokfo nmbuhat inji kfiwut: “Nmoh Nungothet Jisas Kraisr yuhuwfhato ayak marnya bomarnyatwarko. Be.”

Korin thofroh barkof gontwat

Porr dwandfakhato htafmot
Barkof kfo nuhas mrokfom

Wom taunt futamomt Korin. Nd taunt kantri Griskorhof Akaia profins rhumot. Porr tohhato hingrnamo yiham nd taun Korint nhai be tu kuken taunt rhurmot. Tu bro taunt rhumot. Akaia profinshu kapiter taunt to Korintn rhumout. Porrn tu barkof yimar nd taunt wurat htahato Bro Nkifrarhu mrokfot pthamotrt nd taunt Bro Nkifrarhu mrokfot misuhhato Kristen sios kasinyamort. Kto Porr nd taunt htanyhato bi wom kmimn hingrna htfas hanyetrn nd ror kasinya tanymo sioskfot krhopam fakmom. Porr wanyakhato ndar gontwatn wandfamorm rroh krhoparoh kfohtayuk mrokfom yo rroh yima yuhuroh yak marnyayuk dborior mrokfom.

Porrhu dukefr memor, "Nhai yukatoh marsisarhotanm. Yukatoh marsisaruhanm, rroh dborior nefm yohnirahm." Ndnett tuhanet yimaroh krhopam yo ramet metroh krhopam mrokfom hemorm. Yo yimam nhai marimoam Bro Nkifrarhu Yafothathu yak hta yuhatn hikrahnom, nhai. Be turoh dukeftn yaumoatm mrokfom hemorm. Yo Bro Nkifrarhu tu lotu yuham, yo Bro Nkifrarhu Yafothat yahuka dukefrhu hingrna yuham ndm kfo hta bohtamorm. Yo nd noheh yimam sinyaruha yuharoh mrokfom, ndm rpat kfo nuhas bonuhasmorm.

Nd Korin Kristenm krhopa yakmoa nefroh mrokfom kfo hta bohta nuhas marnyamorm. Porr wandfayuk mrokfom, sapta 13-thu mrokfom Kristenm tu hifa hti yindhorwomm. Nd saptakfotn Porr kfo memor, "Wom yima fura bofuraroh htihato yak marnya bomarnyanef, tot tu neft Bro Nkifrar yimam he furiwat."

**Kristenm mirahm tum nakfo nna bonnanom yo turoh yufam akfo
yuta yindhornomm**

(*Sapta 1-4*)

¹ Na Pora, na Krais Jisasrhu aposera. Tu Bro Nkifrarhu duka fijo nd aposer hingrneft fak htamora. Nani nanhu yinowem Sostenesr, ² no ndar gontwat wandfewunonko niko Korinthu Kristenko. Niko bi Bro Nkifrar yak wus bowus marnyakhato Krais Jisaspno bi fak dbkafmorko. Yak dbkafhato turhu yufatpno rim fak htamorko. Yimam nmoh Nungothet Jisas Kraisrhu yufatpno rhu rifinyhato kfo bruttniwam, niko rpat rorhu yufatpno rim fak hta bugamorko. Jisas Kraisrpar tor nmoh rpa Nungothet. ³ Nmoh Yifem Bro Nkifrar, nmoh Nungothet Jisas Kraisr ayuhuwafkahfko nikmoh yima yuhum ayak marnyakahtfm mirhurahmko.

Porr kfo yindhormorr Bro Nkifrar

⁴ Niko bi Jisas Kraisrpn rpat tohwa nmbuhatpno Bro Nkifrar yuhuwafwarko kak marnya bomarnyewurko. Na inji htihato yiha yiha Bro Nkifrar bro kfo yindhoreft htowanr. ⁵ Niko Kraisrpn rpat tohwa nmbuhatpno mrokfo pthefm, riduka aduka yima yuhum yo tamoh tamohm bi yak bugewa yuhampno na htihato Bro Nkifrar tu kfo yindhoreft. ⁶ Yo nd Kraisrhu mrokfom nom pthahato niko wanyhato yakmom, bi nd mrokfomn kuny kiwomko. ⁷ Ndnett niko tohhato nmoh Nungothet Jisas Kraisrhu yawihna yihart toh gari hasiwohat, Bro Nkifrar niko nhai mong trohnikahrko. Bro Nkifrarhu Yafothat niko hatohwokomt. Ndnett tamoh tamoh nefm Bro Nkifrarhu Yafothat kasinyewam, niko nd nefm newukomm. ⁸ Jisas Kraisr thu bmtaruhatrko, toh bmtahany, toh bmta hanyruhakomn Nungothet Jisasrhu nia yihar, nhai wom tamoh mrokfetko rhuruhatko. ⁹ Nd Bro Nkifrar, niko kfo nakuyakhato turhu yon Jisas Kraisr, nmoh Bro Najomr, rorpno rim htamo Bro Nkifrar, awi nmoh bro dukefm ror htakfot. Tamoh mrokfom ror bi kfo ptha htayukm, nhai yi furakahm. Yafothetm korhm.

Mirahko wannakfo nnakhato nafr tndohnom

¹⁰ Bar yinouroko, nmoh Nungothet Jisas Kraisrhu yufatpno bro mrokfot kfiwanko. Tamoh tamoh mrokfom kfo ptharahnom, be rpa yima yuhurn rhuhato mrokfetenm kfo pthakfot. Mirahko mrokfom nateh natehakhato womm yuhuwehakhato womm nndo rim rhu, yo womm rom nndo rim rhu inji ananom. Be rpat tohhato rpa yima yuhur yo rpa dukefrpar rhukfot. ¹¹ Klowirom kfo memoma, niko tohwohat niko tuko nnakfo nnewuko. ¹² Kfo memoma, niko nnakfo nna thombat, womm kfo kangm, "Nom Porr kfiwa mrokfomn nom kak hikwonom." Yo womm rirhuhato kfo kangm, "Nom Apolosr kfiwa mrokfomn nom kak hikwonom." Tfit womm rirhuhato kfo kangm, "Nom Pitar kfiwa mrokfomn nom kak hikwonom." Yo tfit womm kfo kangm, "Nom tu Kraisr kfoyuk mrokfomn kak hikwonom." ¹³ Tamohmpno Kraisrhu sioskfat bi kasinya hanyett tfit wannakfo nnakhato niyak mku niyak mkutakomt? Ka na Porann niko nayuk fasoh fasoh nefm bgre mis nohhato minoh nhehafmoyanm? O ka na Poranhu yufat yuta hanyhato baftaismoko? ¹⁴ Nd baftais hanyuk yimam, na Krispus Gaiusrofrpaf baftaisimmoya. Womm nhai. Hifa ndrpaf baftaisimmoyann Bro Nkifrar kfo yindhorwanr. ¹⁵ Ndnett nhai wom yimar kfo miruhatr, "Na Porr baftaisimmo yimaya. Ndnettann na ror kfoyuk mrokfomn hikruha." ¹⁶ E, tfit asomif tfit dukekwam Stefanas riphar. Nd ripharpar na baftaisimmoyanm. Nhai tfit wom frohm wom dukakaha na baftaisimyukm. ¹⁷ To hifa nhai bok yimam baftaisimmoya. Kraisr na kfo tkrurafmohat, to nhai yima baftaisimneft kfo tkrurafmora. Nhai. Na gutnius mrokfothu kfo ptha htfasneftn kfo tkrurafmora. To na mrokfom kfo pthaneft nhai be nanhu yima yuhurn mrokfom frpsa marnya bomarnya yo yak marnya bomarnyahato yimam be wany yindhorhato mrhunakfot. Nhai. Be nanhu yima yuhurn tamoh mrokfom kfo pthaneft, Kraisr bgre mis nohmo yuhat be nhai duka miruhattm Kraisrhu noh mrokfot tu yafothet mrokfoyet. Nhai. Nd tndh mrokfot be wany huhrasrahmt.

Kraisrn hatohwort Bro Nkifrarhu bbukefti dukefti

¹⁸ Nd helko bi yiyet yihotar bi tohet yimam, duka kangm, "Jisasr bgre mis nohmo yuhathu mrokfot yimbuyef duhatet. Mmom kanjo kfo pthewukomt." To tfit nom, nd hefenr bi yiyet yihotar bi tohet yimanom, htitnomt, nd Jisasr bgre mis nohmo tkitt Bro Nkifrarhu yakitohwa bbukeft hingrnamat. ¹⁹ To nd na kfiwa mrokfot to bingot Bro Nkifrarhu rfa borngt kfongot memot,

"Bro duka tungunefr haruhet yimaro dborioh dukefm yak thuhato
mmom tfit rhurahm,
yo tamoh tamoh dukefm yimam bi duka hta hanyukm
na kforuha nd dukefm nhai hingrnaruhatm."

Ais 29.14

²⁰ Tone to fitom nd bro riduka aduket yimam? Yo nd Mosesrhu boririfhut kfo hta bohtiwa yimam? Yo mrokfo kfo ptha marnya bomarnyet yimam? Nd nd yimam nhai tu Bro Nkifrarhu dukef yuham hti hik marnyakahmm. Nhai. Rorhu dukefm myak mmota-hato be turoh yima yuhumn kfo fura bofurewum.

²¹ Bro Nkifrar to tu bro riduka aduka yima yuhetrn nhai marimor, ndar bbinysothu yimam turoh duka yima yuhumn hti hikrahmt ror fasoh nefm nayet yimam yekwa yihotat. Wonk wonk yihotam nhombra bugamomm, to nhai htirmomt Bro Nkifrar yimam yekwa yihotat. Nhai. Ndnett Bro Nkifrar htamort wom yihotat. Nd nom kfo pthiwa mrokfot, rom kfo yamuka, "Yimbuyef duha mrokfot." Tot nd mrokfotn yimam wanyhato hikrahmt, Bro Nkifrar yak-rahrm. ²² Nd nom kfo pthiwa mrokfot Judam kfo kangm, "Afo mirakerkfot afo ahtinom. Ndt htiruhanomn kfo mirahnom, niko kfo pthiwa mrokfot tu yafothet mrokfot kfo pthiwuko." Yo Grikmn kfo kangmn, nd nom kfo pthiwa mrokfom yafotha duhatem. Kangm, "Riduka adukayet yimam kfo pthayuk mrokfom awany yakionom." ²³ To nom, nom kfo pthewunom Jisas Kraisr bgre mis nohmo yuhat. Ndt kfo pthewunom, Judam wanyhato namburwomnom. Namburhato kfo kangmn, "Nd mrokfoye kak nnariyefiokmnom." Grikm o yima tangim kfo kangmn, "Mmom kanjo kfo ptha mumiwuko." ²⁴ To nd met yindarinom,

Bro Nkifrarhu naku tngt wany soneyuknom, nom Judanom yo Griknom htitnom Bro Nkifrar tu bro riduka aduka yima yuhetrn Kraisr bgre mis nohmo yuhat bro bbukeftpno nmoh fasoh fasoh nefm yak thuhato fakmornom.²⁵ Ndar bbinysoftu yimam duka kangm, “Dborioh dukef duhat yimam Jisasr bgre mis nohmo yuhat kfo ptha mumiwumt.” To nhai, nd rom kfiwa yima yuhum faso kfiwumm. Tumn nhai Bro Nkifrarhu dborioh dukefmpno inji kfokahm. Yo Jisasr bgre mis nohmo yuhat htihato nhaf kfo kangm, “Bro Nkifrar bbuka duhater. Ndnatn Jisasr bgre mis nohmor.” Inji kfiwum. To nhai, Jisasr nohmo yuhatn Bro Nkifrar nmoh fasoh fasoh nefm yak thuhato fakmornom. Yima mifm nhai fasoh nefm yak thu inji naruhatm.

²⁶ Bar yinouroko, tfit wamdukaktwakomt niko Bro Nkifrar nakuhato niko Bro Nkifrar rihikakmohat, niko finji htimoko? Ka nikmoh womm ka bro riduka aduka yima yuhetmn Bro Nkifrar rihikakmomr? O, ka kmiroh bro yimakomn fakmorko? O, ka bro yufet yimaroh yonkomn nakuyakmorko?²⁷ Bro Nkifrar nhai ndhtet ruhet yimakomm nakurmorko. Nhai. Ndar bbinysoftu yimam kfo kangm, “Ndhtet dborioh dukef duha yimam yo bro bbukef duha yimam ka Bro Nkifrar yak twanhoraahrm?” Nd mrokfot inji kfiwatmt, ndnettn nikomn fak tutuhakmor. Memor, “Ndhtet ruhet yimam ayakkahta nd riduka aduket yimam yo nd bro bbuket yimam htiruhamn kfo mirahm, ‘Nom famunom ka nom ndarhtet yimanomn yakrahr. To nhai, bi romn kekwor.’” Tum inji htiruhamn tfit tum bro yimtneft yakrahm.²⁸ Bro Nkifrar fakmor yufapa duha yimam, yimam hti behohwam. Bro Nkifrar inji nahato tfit yimam bro yufetm yo bro bbuketm rroh yufam nhai wom mfrfnahkahm. Rroh yufam be mifrfnahnitm.²⁹ Ndnettn nhai wom yimar Bro Nkifrapno rorhu yufat kfo hagrifikfot.³⁰ Tu Bro Nkifrar bi yakmorko Krais Jisasru tirtn htamorko. Yo Kraisrn htamorr nmoh riduka aduka yima yuhurhu hayuk yimar. Turn nmoh fasoh nefm suh nanyormorm. Nd yima Kraisrparhu yuhatn Bro Nkifrar nom hti wutheurnom, yo turhu yufatpno korhwonom.³¹ Ndnettn Bro Nkifrarhu rfa borngt kfiwa yuhat wahikko, “Yimar kangr ayindhora, nd yimar to be Brorparhu nayuk nefmn yindhorkfot. Mirahr turhu nefm akfo hagrha yindhora.”

2

Kraisr bgre mis nohmo yuhathu mrokfom

¹ Bar yinouroko, na nikompno yi tohhato Bro Nkifrarhu kafrohet mrokfom tohhato kfohemohat, na nhai marimoya, “Yimayanhu riduka aduka yima yuhum be mfro rim kfak mkfakhato wany yindhorahmm.” Nhai. Nanhu mrokfom be inji kfoni hanymoanm.² Nanhu dukefr duka memoya, “Na Korint tohruha yiham na nhai wom tamoh mrokfom kfo ptharhota. Be Jisas Kraisrhu mrokforpam kfo ptharuha, yo Jisas Kraisr bgre misn nohmo yuhathu mrokforpam kfo ptharuha.”³ Na nikompno yi tohhato mrokfom kfo pthamoahat, be yakrminano tohhato mrokfom kfo pthamoanm. Duka memoa, “Ndarhtet kmimpno tohhato mrokfom kfo ptha-nefte, finji finji mrokfom kfo ptharhotanm, rom wanyhato hikruhamm?” Nd bro duka yanuheft rhumoatta mrokfom kfo pthamoahat yikiat buga htamoant.⁴ Yo na kfoyuk mrokfom yo gutnius mrokfom na kfo pthamom, nhai marimoya duka tungunet yimam kanjo tfit yimayanhu duka tungunefr-pno mrokfom mfro mfro tfit frhik bohikrhotanm mrokfom wanyruhamn yima yuhum yak kekutrahm. Nhai. Mrokfom be inji pthanimoatanm tfit tu Bro Nkifrarhu Yafothatn nikmoh yima yuhum hingrnamotm.⁵ Nanhu yima yuhur duka memoya, “Nhai nanhu ptha dukefrn mrokfom kfo ptharhota, Korin thofm Bro Nkifrar mhikaknikfot. Nhai. Tu Bro Nkifrarhu Yafothatn rroh yima yuhum yak dborhahato Bro Nkifrar hikneft hifa.”

Bro Nkifrarhu Yafothat dborioh dukefmi dborioh yima yuhum kahuktnom

⁶ Nd yimam bi Bro Nkifrarhu riduka aduka yima yuhum yaketm, nd nom kfo pthiwa mrokfom kekwom. To nd nom pthiwa mrokfom nhai ndar bbinysoftu yimaroh dukefr yakitohhato pthakahnom. Yo nhai ndar bbinysoft yakitohwa yimam, bi nd hel yita

yihotat tohwa yimaroh dukefr yakitohhato pthakahnom. ⁷ Nhai. Nd nom kfo pthiwa mrokfom, ndm Bro Nkifrarhu duka yima yuhurhu kafrohet mrokfom kfo pthewunom. Nd Kraisrhu yawihnehato ndar bbinysoftu yimaroh fasoh nefm minoh nhehafneft, nd dukefr bingot ndar bbinysoft yorhwa tamoh tamohr tafi hingrna duha, nd dukefr bi duka htangotmorr. Yimam yura hefenr yihato Bro Nkifrar rhu marnyewa kanjo rhuneftn, nd dukefr duka htamorr. ⁸ Nd dukefr, nhai wom yimar ndar bbinysoft tohukatohwar nd dukefrpno yakrmorr. Nhai. Bi ayakmr, to nhai nmoh bro bbuka manyjaret Bro Nungothetr washato bgre misn frdbkafrmomr. ⁹ Bro Nkifrarhu mrokfom kfo kangm, “Nd Bro Nkifrar duka htamo dukefr nhai wom yimar htirmorr o wanyrmorr o nhai wom yimar nd dukefr niarmotrr duka marimor, ndhtet neft rhuraht. Nhai. Tu Bro Nkifrarhu yima yuhur ruhet yimam dukahato nd dukefr dukahato fak nhombra htamorr.” ¹⁰ Nd dukefr be afо kafrohetr rhumour. Tu Bro Nkifrarhu Yafothatn nd kafrohet dukefr nompno mfak nriyafmotr. Bro Nkifrarhu Yafothatpno nhai wom tamohm kafrohkft. Nhai. Tafont rhu bugewum. Ar Bro Nkifrarhu kafrohet dukefm tu Yafothatn hti hikwotm. ¹¹ Nhai wom yimarhu dukefm ni womn htikfot. Nhai. Nd tu yimarhu yafotharpatn htitwotm nd yimar yorhwa dukefm. Ndnettн nhai wom froh yimar Bro Nkifrarhu yima yuhur rhuyuk dukefm htikfot. Nd turhu Yafotharpat htitwotm Bro Nkifrarhu dukefm. ¹² To nom tu Bro Nkifrarhu Yafothatn hemornom, tur yak marnya bomarnya nmbuhathu hti dukaneft yihato. Nd Yafothatn yak nuhasrahtm, nd dukefetrн turhu Yafothat hemornom. Ndar bbinysoftu dukefr yima dukiwar ayaknom, to nhai hti dukarfotnomm nd Bro Nkifrar yak marnya bomarnyiwa nmbuham. ¹³ Nom ndar Bro Nkifrarhu bro riduka aduka yima yuhur rhumoa mrokfom kfo pthewunom. To nd nom kfo pthiwa mrokfom, nhai ndar yimanmoh dukefmnd mrokfom niakahm. Nhai. Nd mrokfom Bro Nkifrarhu Yafothatn mrokfo dukefr yahukattnom mrokfom kfo pthewunomm. Nd Bro Nkifrarhu Yafothat yahuka mrokfom, nd mrokfom kfo pthiwunomm Bro Nkifrarhu Yafothat ruhet yimampno.

¹⁴ Yimar Bro Nkifrarhu Yafothat rhu duhar, nhai nd Bro Nkifrarhu Yafothathu dukefm hti dukakfot. Nhai. Hti huhrasworm. Ndnettн nhai nd dukefm ror yakkfot. Yimam Bro Nkifrarhu Yafothetm, romrpam rhuhato hti duka nhta yo yak nhta inji newumm nd Bro Nkifrarhu Yafothathu dukefm. ¹⁵ Yimar Bro Nkifrarhu Yafothat ruhet, tamoh tamohm yak nhta hti nhta bugewurm. To nhai wom yima furar Bro Nkifrarhu Yafothat ruhet yimarhu nefm hti nhta yak nhta inji nakfot. Nhai. ¹⁶ Bro Nkifrarhu rfa borngt kfo kangt, “Frohrn Bro Nkifrarhu dukefr yorhwatrr

tfit rorn tohhato Bror kfo hta bohtafrrorr?”
To nom awi, Kraisrhu dukefr korhrnom.

Ais 40.13

3

Sios hingrnewa hingrna yimam, ndm Bro Nkifrarhu hingrna yimayem

¹ Bar yinouroko, niko Korint tohwa metko, yindariko, na nikompno yi tohhato mrokfom hemoahat, nhai bi Bro Nkifrar rihikngotakhato Bro Nkifrarhu Yafothat yaket yimam mrokfom yahuka kanjo inji mrokfom kfo hermoyanko. Nhai. Fasoh nefm mhatoh fnahet yimam mrokfom yahuka kanjo inji mrokfom hemoyanko. Nd na yi tohmo yiham nhai bi fitoh dfik Kraisr rihikakrmokomr. Kraisrhu dukefr yuhre yon mumenroh dukefr kanjo nikmoh dukefr inji rhu hanymor. ² Be yuhre mingapamn hi hanymoyanko. Nhai bi tat yeshrim bi hermoyanko. To ariham nhaf inji, nhai bi tat yeshrim niko bi yakfot. ³ Nd mhatoh fnahyuk nefm afо tom rpat kakitoh dbkafwokomm yuhre. Nd wom Kristen yimampno mrokfom nateh natehakhato womm yuhuwehakhato womm nndo rim rhu, yo womm rom nndo rim rhu inji nanefm, ndm tom yuhre korhmko. To nd niko niwa nefenm, ndm to tuko mhatoh fnahyuk fasoh nefem. Ndar bbinysoftu yimaroh nefem nd nefm. Mirahko mrokfom nateh natehakhato womm yuhuwehakhato womm nndo rim rhu, yo womm rom nndo rim rhu inji ananom ⁴ Womr sinyahato kfo yamukahat, “Na Porr kfiwa mrokfo yuhat hikwa.” Yo tfit womr sinyahato, “Na Apolosr kfiwa mrokfo

yuhat hikwa." Ndhtet nayak nanyor nayak nanyor nefm ndar bbinysoftu yimaroh nefm newuko.

⁵ To no aflo wamdukakkmo. Apolosr froher? To na froha? No, no be hingrna yimayeno. Rpa yimparhu hingrneft hingrnewuno. Hingrnefm nndoh nndoh hingrneft hingrnewuno. No nd Kraisru hingrneft ahingrna duha yino, to niko to finji Kraisru mrokfom htihato rorhu mrokfom hikrfokomm? Nonn nd rorhu hingrneft hingrnamotnont niko tuko hti hik yo wany hikmokomtn hikwokomt. ⁶ Nnoh hingrneft, mswir hingrneft kanjo yimot. Nann mrokfot hnehato kfo ptha nuasmoyanko, yimar yihato yewurit nuhtiwa kanjo. Tfit nanhu mongko Apolosr yihato rorn nd na kfo ptha nuhasyuk mrokfom frhik bohik nuasmotrko fak duka tungunamokomt, wom yimar yihato bupam yewurim yahuka kanjo. Nnoh hingrnefm inji hingrnamonomm. To tu Bro Nkifarn thu bmtamotrko Kraisru mrokfot mfak trpaknimokomt, to tu Bro Nkifrar dboriorh bbhar yo bu marm hihat mswirroh yesht sinya marnyiwa kanjo. ⁷ To htikomt nd kfo nhombra mrokfot? Yewuri nuhtayuk yimar yo bupa hayuk yimar, nd hus yimaf nhai yufa duhatef. Yimar nd yewurim thu warhiwarn yufeter. ⁸ Nd hus yimaf, yewuri nuhtayukr yo bupa hayukr, nd yimaf nhai wom nndoh nndoh dukefrn hingrnarmof. Nhai. Rpat tohhato rpa dukefrn Kraisru hingrneft hingrna dukefrn hingrnamof. Rof hingrnewa hingrneft Bro Nkifrar ttha thombat, turhu hti fijo ttharahrf. ⁹ No rpat rpat Kraisru hingrneft hingrnewunont, nikone rorhu mswireko.

Sios hingrnewa hingrna yimam kamdam kanjo hingrnewum

Yo niko Bro Nkifrarhu tohyuk kunyko hingrna htamorko. ¹⁰ Bro Nkifrar bi dboriorh dukefr hemotra kunyrhu hatohyuk rahum bi ndmn kasinyamoya, bro duka tungunet kamdam kanjo. Tfit womr yauyaknehato rorn wohnfam yo rafonm thu tabotrutnihato hingrnamorr. To tfit niko womko nd kunyshu hingrna buganhoneft, dukefrpno duka marnyahato hingrneft hingrnakfot. ¹¹ Nd kunyrhu hatohyuk buha dany rahur, Jisas Kraisr Bro Nkifrar bi htamor. Ndnett nhai tfit wom yimar yihato nd kunyrhu hatohyuk rahum tunda thuhato tfit wom rahum yakhato kasinyakfot. Nhai. ¹² Nd kunyrhu htayuk rafon wohnfam, mingiahum, hegir tikm, womm bro tat mim yakrahm, womm tefi gmohefenm rim yak wokakhato nde htarahmr kunyr. Gahturm, womm darhi mkum, mofnyuk mkum yakhato nde htarahmm. Womm yesuta gmoh mkum o yof mkum htarahm. Nanginy sikr, womm nanginy mifm yakrahm, womm rpa yamt rhuyuk misham yakhato nde dboh tikrahmr kunyr. Kpa gnam, womm mfu mkum o kpam yakhato nde gnarahmm gnam. Wommne be gtwaye thu rabforahmm. ¹³⁻¹⁴ Nd rpa rpa yimam hingrnayuk hingrnefm, Bro Nkifrar kfomo kothu yakitohruha yiharn, nd rpa rpa yimam hingrnayuk hingrneft yak nhtarahrm. Fitoh yimam, rom hingrnayuk hingrneft yak marnyahato rroh hingrneft fipetm forhm, nd yimam ttha hanyrahrm Bro Nkifrar. ¹⁵ Yimam nhai hingrna marnyarmomm rroh hingrnefm, nd yimam be nhai ttha hanyruhatrm Bro Nkifrar. Hefenrhu yinyeft, rot riyahm. Tfit yinyeftn nhai bi romn tohakruhatm. Nhai. Rom tu wuroh mongtn tohrahm.

Niko Bro Nkifrarhu kunyeko

¹⁶ Niko bi tawisafeteko. Niko yimako, Jisasr hikwako, nikomn bi Bro Nkifrarhu rmonr kasinyewukomr rorhu nia tohyukr. ¹⁷ Niko, Bro Nkifrarhu kunykomn, turhu yufat fak htamorko. Fitoh yimar nd Bro Nkifrarhu nia tohyuk kunyr finji narahrr, nd yimar mrokfetr rhurahr. Ndnett fitoh yimar fasoh nefm nayuk yihotohat tfit hanirko, nd yimar Bro Nkifrar kaht htarahrr.

Yimaroh yufam nom kfo yuta hagrha duha

¹⁸ Mirahko tuko ndar bbinysoftu duka tungunefr yakhato akfo amanyom, nom bro duka tungunefetenom. Nd bbinysoftu duka tungunefr rihtafhato tfit Bro Nkifrarhu duka tungunefr yakkfot. Nd Bro Nkifrarhu duka tungunefr ndar bbinysoftu met yindarim htitmumetroh duka tungunefr kanjo. ¹⁹ To ndar bbinysoftu duka

tungunefr Bro Nkifrar htitrr mumetroh duka tungunefr kanjo. Bro Nkifrarhu rfa borngt kfo kangt,

“Duka tungunet yimam kfo yamukam womm faso ayak bebnomm, rom inji dukewohat, rom be turoh fkneyuk wukier kim hegirwom.”

Jop 5.13

²⁰ Yo wom mrokfot Bro Nkifrarhu rfa borngtn kfo memot,

“Duka tungunet yimaroh dukefm Bro Nkifrar htitrm.

Tamoh tamoh dukefm rom duka htateewam,

be tu nhai fipa duhatm rhurahm.”

Sng 94.11

²¹ Ndnett mirahko niko hikwa yimam akfo hagrhanomm. Niko nhai rroh tirmn rhukahko. Nhai. Niko Bro Nkifrarhu tirtn korhko. Nikmoh hayuk tamoh tamohm bi tom Bro Nkifrar bi hemotrko ndmpno korhko. ²² Nikompno nia hingrna tohnhooyuk yima Pora, Apolosr, Pitar, nd nd yimanom tom bi hemorko. Yo Bro Nkifrar ndar bbinysoft hingrna htamo tamoh tamoh to bi nikomn hemotr bi nikmohem. Yo Bro Nkifrapno toh nkifrani nmbuhat ndt bi fak marnyahemotrko rorpno mtoh nkifranirahko. Yo nikmoh nohhato sinya nmbuhat ndt rot to bi fak marnyahemotrko nikmoh nohneft tfit kasinyarahrko. Ndar yiha yorhwa tamoh tamoh yo kto rhuruha tamoh tamoh, nikmoh bugam rhurahm. Bi fak hta marnyamotrko bi korhkomt rhu nmbuhat. ²³ Niko Kraisruheko. Kraisrne, Bro Nkifraruher.*

4

Kraisrpar turhu hingrna yimaroh hingrnefm htihato kfo nhtakfot yo yak nhtakfot

¹ Nom Kraisruh hingrna yimanom kanjo wahtiknom. Nomn nd kafrohet mrokfot Bro Nkifrar nmoh tirmn htamotrt kfo ptha htfaswonomt. Nd hingrneftn Bro Nkifrar fak htamornom. ² Wom yimar yihato wom yimar yakhato rorhu hingrneftn fak hterr, nd yimar mrokfom wany yakiohato hikkfot. ³ Na kanga, yima mifmn na hingrnewa hingrneft htihato kfo kangm, faso hingrnewurt o hifa hingrnewurt, nhai mrokfom. To na tuka hingrnewohat, nhai tfit rhuhato hti nhtakahant tuka hingrnewa hingrneft.

⁴ Na kanga hingrneft ka be yi marnyewut. Ndnetann hingrna fura bofuraknita. To na fitoh yuhamn tukanhu hingrneft tuka hti nhtarfoyan? Kto Bro Nungothetrpar nanhu hingrneft hti ntaruhartn rorrpar kfo mirahra, “Hifa hingrnamon o faso hingrnamo.”

⁵ Ndnett bi mirahko bi nikomn Kraisruh hingrna yimam hingrnewa hingrnefm bi nikomn akfo amanyom, “Nd yimarhu hingrneft hifa, nd yimar nhai.” Kothu tohyuk yihar afo tor riyorhwor. Bi mirahko bi nikomn akfo nhtanomm o ayak nhtanomm. Bro Nungothetr afo nierahr. Ror nieruharn nd kafrohet kafrohet nefm yo kafrohet kafrohet duka yima yuhum yimam wany won duham yakhato tafontn htarahrm. Nd yiha yima yimanom hingrna hanyuk hingrnefroh kfo yindhor mrokfom, Bro Nkifrar kfoh hanyruham, wany hanyrahnomm.

Korin thofm kfo grhamom

⁶ Bar yinouroko, no Apolosrpno, nnoh yufampno rim pthakmo mrokfom nhai be sfno rim pthakrmoyanm. Memoya, “Mrokfom inji akfo pthakahtanm dukefm yakruhakomm Bro Nkifrarhu rfa borngt kfiwa yuhatn hik marnyahato nhai wom yimaroh hingrnefm kfo grhahato tfit womrohm kfo bebruhatkomm.” ⁷ Frohm memomko, “Bro yimako warhukahkomm Kraisruh hingrneft hingrnewa yimaroh hingrnefm nikomn hti nhta kfo nhta inji narahkomm?” Nd niko kfo grhiwa yimam, romrpamn ndhtet hingrnayuk dukefm finji yakrfomm? Nd hingrna dukefm Bro Nkifrar hayukem. Ndnett kfo grha fura duha.

* 3:23: 1 Korin 1.12 yo 3.4 Porr kfo memor, Korin thofm tum nakfo yiriti nnamomn, womm kfo memom, nom Porruhenom, womm kfo memom, nom Apolosruhenom. Ndhtet mrokfom yimam kfoykm, ndm ndar bbinysoftu yimaroh nakfo nnefet. Por Apolosrof, rof be Korin thofroh Kraisruh mrokfothu kfo nuhashato mrokfothu hikneftn yi tohmof. Be Korin thofm tu Bro Nkifrarhu dukefr ayakmr, kfo marimom, “Por Apolosrof, nmoh hingrna yimayef.” Wahtiko 1 Korin 3.1-9.

⁸ Niko to finji wom kforuhanomko? Nikmoh dukeft duka kangko, "Jisas Kraisrhu hik yuham nom bi fak bugamonomm. Yo Bro Nkifrarhu Yafothat kasinyewa nefm bi fak bugamonomm. Nhai wom yimam niahato tfit kfo nuhas bonuhaskfot." Yo kangko, "Nom bi Kraisr kanjo king yufat yakhato bi nomn ndar bbinysofti mount bi kakitohwonomf." Inji kfiwuko. To nom aposernom nom be nndo knbokt rhuyukenom. Ndt rot to hifa. Hifa, niko kingko watohkahtko nom be rpat king hingrnethu hingrnanhoyukenom.

⁹ To ka nhai. Nom nhai king hingrneft yakitohnhokahnomko. Nanhu htiveft inji htitant. Nom aposernom, Bro Nkifrar yakmorn tu yiro knbokt htamornom. Nom yimam hti srthuhato yak bebwohat yonent burent hti bugewumnom. Yimam htitwom yo mounmotm htitwom yimam inji newohat.

¹⁰ Yimam kangmnom, "Niko, dborioh dukef duhat yimako Kraisr nohmo yuhat kfo ptha mumiwukomt. Bro Nkifrarhu bbukeft nhai niko rhukahtko." To nikmoh dukeft duka kangko, "Nom hifa Kraisrpno brbo frtkafwanomn bro duka tungunefr kekwonomr. Yo Bro Nkifrarhu bbukeft harhuvonom." Nikomn bro yufetkomn, nikmoh yufam met yindars kfo yuta hagrhewumm. To nom yufen duhatnomn yimam nhai nmoh yufam kfo hagrhehahmm.

¹¹ Nom ndar toh hnewa toheft to be inji yatinoh tohwonom. Hmbresham yoh nmbr bonmbretm ndm fura hiyauwonom. Nom nd toheft ritohakmohat, to be toh hik twanho hanitnomt. Yimam riyekwomnom rir borir thuwomnom. Nom be inji hutraf htfaswonom. Wom kmitn rpa wurat tfit wom kmitn rpa wurat. Rpa kmit tohrfonomn fita rhurfonom?

¹² Nom tunmoh tireh yeshrim kaunom, yo tunmoh tireh wuskam hmbrtnom o tamoh tamohm nom tunom korhnom. Yimam fasoh fasoh mrokfom kahukmnom, nom tfit kfo kangnom, "O Bro Nkifraye, wayak marnyanm." Fasoh fasoh yak bebmnom, nom nhai kekuthato tawo wom mrokfom hekahnomm. Nhai. Nom be tngm youkikhato korhnom.

¹³ Rom fasoh hnoma mrokfom heshombat, nom tfit dborioh mrokfom kahuknomm. Yimam faso hti bebwomnom. Ndt mirahko ka be nohokrhofrpayet. Nhai. Nd neft bi riruhakngotmot.

Tu Porrhu nefm Korin thofm hikkfot

¹⁴ Na mrokfom inji wandfiwihat, mirahko ka nikmoh yak yimtnaneftn mrokfom inji wandfiwanm. Nhai. Niko nanhu yon bugakomn kfo hta mrokfom kahukanko.

¹⁵ To na kanga wom mrokfom finji akfoyanko, to nhai wom frohm kfokfot. Yonmari ten tausen tisam yihato Kraisrhu mrokfom tisimrahmk, to niko Kraisr hikwa yuhat, nanrpaya yifemwanko. Nann gutnius mrokfot nikmoha hanyhato mrokfom hemotanko, niko Kraisr rihiakmokomr. Nd yuhatn nanrpaya yifemwanko.

¹⁶ Nd nettn yifema tohwa yuhatn niko hti hikak hanyhato watoh hikko.

¹⁷ Nd dukeftpno Timotir kfo tkurumoyanr. Gutnius mrokfohu hik yuhatn ror nhaf nanhu yoner. Rorhu hingrneft hifa hti yindhorwant. Bro Nungothetrhu hingrneft ror hifa kakitoh marnyewurt. Nd yonrn nikompno nia tohruharn, rorn na Kraisrpno frtkafhato hikwa hikeft tfit kfo nuhasrahrko. Nd nikompno yi tohhato hiruha mrokfom, na nd mrokfomn kmi kmim rhu htfaswa sios kfo nuhas htfaswanm.

¹⁸ Nanhu nia nmbuhat wanyaktihato tuko nakfo nakfo memoko, "Porr nhai nieruhatr." Inji nnakfomokomn na kfoyuk mrokfom kfo bebmokomn tfit tukmoh mrokfom kfo grha yindhormoko.

¹⁹ To nanhu nia nmbuhat niko kfiwihat, na nieruha. Na bi brbohwa nianeft. Bro Nungothetr kangr fitoh yiha, nd yiha mfnahruha. Na nia thombat, mirahko ka nd niko kfo grha yindhora yimaroh mrokforoh wanyneftn nieruha. Nhai. Na be nierhoyann afo hti hikruha nd rom hingrnewa bbukeft.

²⁰ Yimam bi Bro Nkifrarhu kingdomkfot fknihato bi rorn kak hta bohtewurm, htirahn rorhu bbukeft kforah, rroh toheft nndo htirahnt. To mirahn ka tngt kfoyuk mrokfomn htiruha. Nhai. Rom nayuk nefmn hti nhtarahn.

²¹ Kfo ttiwonwanko. Na nikmoha niahato nd niko womroh mrokfom kfo bebhato tfit womroh mrokfom kfo grha yindhorneft tfit mhtineft finji narhoyanko. Kumbuhu nmbuhaye tathato nd neft yafhorahkomt? Nd neft yafhorahkomt na be nia mhtineft na be yindhore yima yuhurpno mrhuhato htirahkma kfo ptha yindhornhohato hifa yima yuhum hmbriruhanko.

Kristen yimampno buha rhuyuk nefm tum rhuhato nakfo gubhukfot

5

(Sapta 5-6)

Korin sioshu met yindariroh fasoh beb nmbuhat

¹ Wom yafotha duha neft nikompno rhumot yimam bi kfo ptha habriwomt. Nd neft be tu fasoh beb nmbuhat korhtko. Wanymoya kfo memom, nikmoh sioshu wom Kristen yimar turhu yifemrhu fndoh tuhant hatohmort. Nd ror namo neft, Bro Nkifrar hik duha yimam nhai ndhtet neft nakahm! ² To nd neft htikkom? Ndt tamoh neft yorhwattko tfit niko kfo yindhore yamukako, “Nom hifa korhnom?” Nikmoh womr nayuk neft wahti yimtnakomt. Wahti yimtnakahkomt yima yuhum akrhomko. Yima yuhum krhohato nd yimar nhai tfit nikmoh rifiny swirl o tamoh nefm yi rhunhokfot. Be inji wuri tohkfot. Turn nd neft bi fafho thurt, ee btn niko yakmiyakkfot. Na kanga inji narmokomr.

³⁻⁴ Ar wuri toheta, thatiprpat wuri tohwot, nanhu yima yuhur nikompno korhr. Yima yuhur nikompno yorhwarn nd yimar nayuk neft na bi htimoyant. Ndar na yimaya hatohwa nyngam htita kanjo nd yimarhu neft bi htimoyant. Htihato nd yimarhu finjina finjina yuham bi duka htamoyam. Ndnett na nmoh Nungothet Jisasru yufatpno kfiwa. Ndhtet neft nayet yimar wayak gnngtattwakomr. Warhu rifinskyahkomn nd yimar kangko finji ananomr, mrokfot bi rifiny swirln wayak dbkaftwakomt. Nanhu duka yima yuhur nd rifiny swirl rhurahr yima mifa yorhwa kanjo. Nd niko yak dbkafruha mrokfom, nmoh Nungothet Jisasru bbukeft hingrnarahtm. ⁵ Na kfiwanko, nd yimar wayak tuhafotwakomr. Mirahr tfit nikmoh rifiny swirl o tamoh nefm tfit arhunhoyanko. Be inji atoh furatwar. Tur inji toh furaruharn tfit tur htirahrt nd ror tohruha toh nmbuhat finji tohruhart. Tur htiruharn rorhu yima yuhur yak kekutrahrr. Yak kekuthato bro kotkfot toh thombat mrokfo duhatr rhurahr.

Korin thofm fasoh net fasoh net yimam yak thukfot

⁶ Nd womrhu mett hatohet yimar hatohwakomrn tfit nikmoh sios kfo hagrha yindhorewokomt. Ndt nhai tu neft nakahko. Niko htitwokomt bretparoh hingrneft? Tefi yispenm bretpat rihtafrahnt, htirahnt bretpat tfit kur fannahato bropat rhuraht. Ndnett na womrhu mett hatohet yimar tuha siosn hatohrahkomr, to be rorhu neftn womm htiyakhany htiyakhany be nikmoh sios be nd neftn broniraht. ⁷ Nd kunym yorhwa yatk yat yis yak thuwa kanjo nd womrhu mett hatohet yimar wayak thukomr. Nikmoh sios tfit wom toh duha. Inji narahko, nhai tfit wom yispam nikmoh kunym wom rhuruhatm. Niko bi tu Bro Nkifrarn yak wus bowus marnyamorko bi tur kanjo bi ruhetkomn, ndnett ndhtet fasoh rine wuniyet yimam yak thuhato turpatko Kristenko inji rhukfot. Bi Kraisrn nmoh fasoh fasoh nefm minoh nhehafmorm. Bingot Pasofa burwa yiha Judam sifsifm wasmoa kanjo inji wasmomr. Ndnett nikom wutha yima yuhumpno rhukfot. ⁸ Ndt tu kfot kfiwanko. Nom fasoh fasoh nefm yafhohato Bro Nkifrar hiket yimam kanjo nom inji rhukfot. Nhai tfit tunom toh hnamo yatk yima yuhur kanjo nom tfit inji tohkfot. Nhai. Womroh hti srthu hasohato yuf bunyim kanjo rir borir hasoneft, yafhokfot. Nd nefm yafhohato tfit hifa yima yuhurpno womm yak marnya bomarnyakfot.

⁹ Ndwom gontwat na nikompno htafmot, wom mrokfot kfomoyanko. Kfo memoya, “Mirahko nd ijom tone htifaset yimampno arhunom.” ¹⁰ Na nd mrokfot kfomohat, nhai kfo marimoya, ndar bbinysoftu ijom tonayet yimam, o wuss hmarsi yakt yaket yimam, o rikohet yimam, o nkifra tahi rmonm o nkifra tahim kfo bruttnayet yimam, rompno brbo arhunom. Ndhtet ndhtet yimam ndar yuht bbinysoft toh htifas bugewumt, ndnett nhai romn nd kfo rafo mrokfot kformoya. ¹¹ Na kfomo mrokfot yimot, nd yimam kfo yamuka, “Kristenenom,” to tfit htirahnm metmpno yi habrirahm, wuss hmarsi yakt yakrahmt, nkifra tahim kfo bruttnarahm, womm faso faso kfo rindho borindhorahmm,

drin spak htfasrahm, womroh wuskam rikoh htfasrahm, tom ndhtet ndhtet yimamn na kfo memoyanko, mirahko arhunhonomm, o ayemskanhonomm. ¹²⁻¹³ Mirahko wom yima fura bofuram tafi sios yarim fnahna duhatm nayuk nefm htihato ayak gnngtatnomm. Nhai. Rom Bro Nkiffrarn htirahrm. Bi sios tohet rhunefm htihato yak gnngtatneft, nhai mrokfom. Wayak gnngtattwakomm. Bro Nkifrarhu rfa borngt kfiwa mrokfot kfo kangt, “Fasoh fasoh nefm nayet yimar wayak tuhafotwakomr.” Ndnettnd womrhu mett hatohet yimar rhunho duha.

6

Tuko Kristenko nakotim nakotim duha

¹ Niko Kristenko tuko nakotim nakotimwoko. Ndnettann kfiwanko. Niko tuko Kristenkompo mrokfom rhuneft, tamohmpno Bro Nkifrar hiket yimam myak trohnihato tfit Bro Nkifrar hik duha yimampno mrokfom hanitakomm? Ka tu sioshu yimam yakhato romn nikmoh mrokfom wanyhenefte, ka nhai? ² Wawanyko, kto bro kotkfot yakitoh thombat, nom Bro Nkifrarhu yimanomn Kraisrpno rhuhato ndar bbinysoftu yimaroh mrokfom yakinohnhorahnomm. Ndnettnd ndhtet tefi mrokfenm tuko Kristenkompo rhuyukm, tamohmpno niko Kristenko nhai yakinohhato yak nohrfotkomm? ³ Yo mounmotroh mrokfom nomn wany yakinohirahnomm. Ndnettnd ndar bbinysoftu tamoh tamoh nefenm yihof href yimam na hasiwam, nomn wany yakinohhato yak nohrfonomm. ⁴ Ndnettnd niko tuko Kristenkompo rhuyuk mrokfenm tamohmpno tfit Bro Nkifrar hik duha yima furampno tfit hanitakomm? Tukmoh sioshu yimar yakhato rorn yak noh marnyahirahrko. ⁵ Wayimtnako niko ndhtet neft newohat. Niko tukmoh sioshu yimam myak htanihato tfit Bro Nkifrar hik duha yimampno mrokfom hanitahat, kangme sios ka ndhtet yima duhattn mrokfom tfit wom yima furampno hanitkomm. ⁶ Tamohmpno wom Kristenr sinyahato tfit wom Kristenr kot hanitarr? Kot hanyhato tfit Bro Nkifrar hik duha yimarn mrokfom wanyukarf.

⁷ Nd niko tuko Kristenko niwa neft, wom Kristenr sinyahato wom Kristenr kot hanitahat, ndt be tuko nayak kasuhwoko. Nhai bi Jisasrhu yihotat hikkahn. Tamohmpno ni Kristenn wom Kristenr tamohm yak nhehneft yak marsisa duha yita? O, wuska yak rikohniheneft hti marsisafo duha yitanr? Womr kot hanitnr, to be nd tkitttu kak suhwo. ⁸ To nhai duka mekahko, “Ndhtet dborioh nefm ahiknom.” Nhai. Tfite tuko nayak nheh nayak nhehwoko. Yo tuko narikoh narikohwoko. Ndhtet nefm tuko Kristenkompo korhm. ⁹ Niko mrokfom bi wany hneteko, fasoh fasoh nefm nayet yimam nhai Bro Nkifrarhu kingdomkot flkniruhatm. Mirahm wom yimam niahato amkfo nheh bonhehnomm. Yimam nd ijom tonitam yo nkifra tahim kfo brutnewam, yo womroh metm hatohwam, yo yindarim tfit tum yindarim nahti kekutwam, ¹⁰ yo rikohwa yimam, yo wuskat hmarsi yakt yaket yimam, yo drin spaket yimam, yo womm faso faso kfo rindho borindhet yimam, yo womroh wuskam teh hutfaknita yimam, ndhtet ndhtet yimam nhai Bro Nkifrarhu kingdomkot flknihato tohruhatm. ¹¹ Nikmoh womm nd tkitt afo tohmuom. To hifa bi Bro Nkiffrarn fak wus bowusmorko. Yak wushato bi turhu yufatpno fak nmbtekmorko. Bi yima yuhum bi wuthamn bi dborioh met yindariyeko. Jisasrhu yufati yo Bro Nkifrarhu Yafothathu bbukeftpno bi dborioh tuhan yindariko korhko.

Nmoh thatipt Bro Nkifrarhu Yafothathu kunyet

¹² Womm kfo kangm, “Mrokfo duhatenom tamoh tamohroh finjina finjina nefm. Nhai wom kfo rafo mrokfot rhukahtnom.” Tmift, to mirahko ka nd tamoh tamoh nefm ka be na fura bofurahato hifa hifa rhu nmbuhahat yankrahnom. Nhai. Kfo kangm, “Mrokfo duhatenom tamoh tamohroh finjina finjina nefm.” Tmift, na tamoh tamohroh naneft, na nhai nd neftn na ttafakhato nd neftn na hatone htfaskfot. ¹³ Womm kfo kangm, “Tamoh tamoh yeuk yeshrt yatithu yiyuket. Yatit yeshri yanyeftn yuhurwot.” Ndt rot hifa. To tfit kfiwa. Kto yati duhatnom rhurahnom. Ndnettnd nhai nd yeshri yayuk dukefr rhuruhatr. Nd ijom tone dukefr ruhet yimam kfo kangm, yatit yeshri yanyeft

yuhurwa kanjo thatipt sinyewut ijoh yi htfasneft. Nd dukeft fasohet. Thatipt Bro Nkifrar htamohat nhai marimor, "Ijoh tone htfasyukt ahingrnayant." Nhai. Thatipt Bro Nungothetruhet, turhu hingrneftn nd thatipt hingrnakfot. Rorn ndar thatipt kakitohwort. ¹⁴ Jisasr bi nohetr, Bro Nkifrarhu bbukeft kfomot kasinyamorr, nom to inji kanjo kasinyarahrnom Bro Nkifrar.

¹⁵ Niko Jisasrpno rim tohnihato hikaknitahat, to nd yiharn niko bi rorpno nathu nanyjhohato kangme bi rpa yima Kraiser. Ndnettnd Kraisrpno nathu nanyjhohato bi Kraisr kanjo ruhet thatipt nhai tfit wom tirt o wurat o tamoht yakhato tfit ijoh yuhatn htakfot. Inji naneft ndt nhai tu dborioh neft. ¹⁶ Yo wom mrokfom nhaf bi wanyeteko. Yimar nd yima yimampno yi htfaset mettpno bi yifir, to be bi rotpno frtkafwarn bi hti kangm rpa yimayer. Bro Nkifrarhu rfa borngt kfo kangt, "Nd hus met yindarif be rpatt nafrkafruhafn be mirahme rpa yimayer." ¹⁷ To nd yimar Bro Nungothetrpno frtkafetr, nd yimar bi Bro Nungothetrhu Yafothatpno frtkafwör. ¹⁸ Niko dukefmpno yiha yiha rhukfot. Nd ijoh tone dukefr mfnahwor yak karhukfot. Yimam ndar tamoh tamoh nef furam niwohat nhai turoh yafotham faso yak bebkahmm. Yimar wom metmpno yi htfaswor o mett wom yindarimpno yi htfaswot, nd neft yimam niwat, ndt be turoh yafothat kak bebwom. ¹⁹ Ka nhai hti mikahko, thatipt Bro Nkifrarhu Yafothathu rhuyuk tkitet? Nd tkitt bi tu Bro Nkifrarhu Yafothat rihtamort. Bi rorhu Yafothat rihtamotrt, niko bi rorhuweko. Bi rorhu yinhit korkho. Nhah tukmoh yinhitn wom rhukahko. ²⁰ Nikmoh nmbuhatpno kmi tiamr fohmomr. Ndt tu bro nmbuhat. Ndnettnd tamoh tamoh nefm nikmoh thatipm naneft, afo htikfot. Tamoh nefmn thatipm naruhatm riruh aruhuk yimam htiruhann Bro Nkifrar kfo yindhorrah, nd nefmn nakfot.

Porr kfo ptha memor, "Yimam tuhan yakkfot."

7

(Sapta 7)

Tuhan yakneftu mrokfot

¹ Nd niko wandfamo tuhan yak yuharoh kfo ttiwon mrokfotn, bi afo kfo ptha nuhasaforuhanko. Yimar kangr tuhan yak duha be inji sfno atoha, nhai mrokfom. ² Tmift, htitnom met yindarim nhai warhukahm. Thatipm he htfaswom. Ndnettnd duka kanga met yindarim nhai toh furakfot. Metm ramet bugam rhukfot yo yindarim tuhanet bugam rhukfot. ³⁻⁴ Metm yindarim ramet bugam yo tuhanet bugam rhuhato tuhanemt nhai hakkrkfot rothu thatipt. Rothu thatipt ramemruhet. Yo ramemr nhaf inji, nhai rorhu thatipt hakkrkfot. Rorhu thatipt tuhanemtuhet. Tuhanemthu thatipt, nhai tu tuhanemtn kfohato ramemr be hikkfot. Nhah. Ramemrhu tngtn rot be wanyhato hikkfot. Ramemrhu thatipt nhaf inji. Nhah tu ramemr turhu thatipt kfohato tuhanemt be hikkfot. Nhah. Tuhanemthu tngtn ror be wanyhato hikkfot. ⁵ Ni ramet metn, yo ni tuhanet yindarin mirahfn thatip nahanyeft nakfo kur o nakfo hhrekno. Bro Nkifrarlpno kfo bruttnanefrpapno kangfn rhu furahato Bro Nkifrar afo kfo bruttnano, ee afo tufnn rhu napthahato hifa yindhorwofnr nd dukefr ee btn inji nakfot. Nd yiharpa rhu furafohato tfit kto rpat tfit hwekfot. Inji na duha yirahfn, Satanr ndha yarim tohnerahr. Yarim tohnehato wom dukefr mtawastiwonrahrn ni metn o yindarin. Mwastiwonruhatrn yima yuhur sinyahato wom mett o yindairpno yihato msuhrahn. ⁶ Ndt be kfo nuhas mrokfot kfiwa. Nhah kfo mikaha inji wahiktawo. Nhah. ⁷ Na, na damiag toht tohwa. Nanh dukeft kanga, na tohwa toheftn niko buga be inji tuhan yak duha atoh furanom. To nhah. Bro Nkifrarn nd tuhan mtitofr harhuworr. Womm nd tuhan dukefr kahukrm, womm nhai. Metm nhaf inji wommn yindari dukefr kahukrm, womm nhai.

⁸ Nd brio toh furewa met yindarim yo met dhirm o tuhan yafonm, ndm kfo kanga, rom hifa be inji na tohwa kanjo be inji damiag toht tohneft. ⁹ Ndt be tukomm tukmoh yima yuhum yak nhombrakfot. Kak nhombra titko brio toh furanef, to be ni metn

ram yakkfot, yo ni yindarin met yakkfot. Briyo tohrahn, metmpno yo yindarimpno yi htfasneft yak tfaktirahnr.

¹⁰⁻¹¹ Yimam nd bi ram yaketm o met yaketm wom mrokfot kahukanm. Nd mrokfot mirahko ka nanuhet, nd mrokfot, Bro Nungothetruhet. Nd mrokfot inji kfifut: Mirahr ramemr turhu mett ayak tuhafoyant, yo mett miraht tuthu ramemr ahtanykohanh ayakrmanyiya. Bi htansre, nd mett be inji toh fura habrikfot, miraht nfri ramr ayaka. Tutn toh hanyhato tut toh fura habrinyeft kokrwote, tfit tut yakafo tanyuk yimarpno tfit yikfot.

¹² Yo tfit niko wom Kristen met yindarikompno wom mrokfot kfifa. Nd mrokfot be tukanuhet. Mirahko ka Bro Nungothetruhet. Nann be kfo kanga, wom Kristen yimar, rorhu mett nhai Bro Nkifrar hikkaht, to metthu toh nmbuhat hifa yindhorwot nd Kristen yimarpno tohneft, nd Kristen yimar mirahr ayak tuhafoyant. ¹³ Kristen mett nhaf inji. Rot yakyuk yimar nhai Bro Nkifrar hikkahr, to yindarir hifa yindhorwor nd Kristen mettpno tohneft, mett miraht ayak tuhafoyanr. ¹⁴ Kristen yimarhu toh nmbuhat hifa nd Bro Nkifrar hik duha mettpno rpat nafrtkaf marnyahato rpat tohwof, nd sawohf Bro Nkifrar hifa hti yindhorhato nd Kristen yimarhu mett Bro Nkifrar kukatohaf hanitrt. Kristen mett nhaf inji. Nd Bro Nkifrar hik duha yimarpno hifa rpat nafrtkafhato tohwof, Bro Nkifrar hifa hti yindhorhato rothu ramemr Bro Nkifrar kukatohaf hanitrr. Ndnettnd sawohfhu yonm Bro Nkifrar nhai hti marsisakfot. Tur hiket tuhan yindarim kanjo rorhu tirtn korhm. ¹⁵ Bro Nkifrar hik duha mett kangt nd rot yakyuk Kristen yimar ahtanyanr, nhai mrokfom. Kristen yimar hti marsisafokfot. Yo Bro Nkifrar hik duha yimar nhaf inji. Kangr nd ror yakyuk Kristen mett ahtanyant, nhai mrokfom. Kristen mett hti marsisafokfot. To tfit Bro Nkifrarhu bro dukefr nhai wofnkahr nafrtdohneft. Kangr be inji rpat watohfn. ¹⁶ Ka rpat tohhato Bro Nkifrar hik duha yimar, ni nd ror yakyuk Kristen metnhu rhu nmbuhatn yak kekutruhattr Bro Nkifrar yakrahrr. Yo Bro Nkifrar hik duha mett nhaf inji. Ka rot yakyuk Kristen yindarinhu rhu nmbuhatn, yak kekutruhattr Bro Nkifrar yakrahrt.

Bro Nkifrar kfo htamo toh yuhatn nom toh hikkfot

¹⁷ Nom rpa rpa yimanom, bi tu Nungothet Jisasrhu hti fijo bi fak hta nhombramornom. Ni womn bi tuhan yakniyetnn Bro Nkifrar fakmorn, to be tuhanetn tohhato Bro Nkifrar hikkfot. O finji finji tohetn Bro Nkifrar fakmorn, ni be nd toheft tohhato Bro Nkifrar hikkfot. Na kmi kmiroh sios yi htfas thoft, to be nd na kfifa mrokforpat kfo ptha htfaswanm. ¹⁸ Wom yimar bi tha pukniyetrn Bro Nkifrar fakmorr, to be tha puketr rhukfot, nhai tfit that rimakhato yak nanyjhokfot. O tafi tha puk thu duhatrn Bro Nkifrar fakmorr, to be tha puk duhatr rhukfot, nhai tfit that puk hhrif thukfot. ¹⁹ Nhai tha puketnomn Bro Nkifrar htihato hti yindhorkahrnom. Nhai. Nd tha puk hhrif thu hingrneft nd nndo thatipthu hingrnefet. Ror kfo pthayuk mrokforoh hikneftn tot tu Bro Nkifrar yimam hti yindhorwat. ²⁰ Finji finji tohetnomn Bro Nkifrar fakmornom, nom to be nd toheft toh hikkfot. ²¹ Ka nikmoh wom yimam o metm bi slef tohetmn Bro Nkifrar fakmorm Kraisrhu hikneft. Slef tohetmn Bro Nkifrar yak thombat, to be mirahm nd yimam o metm yima yuhum krhohato akfo amanyom, "O nom slef tohwanomn nhai Kraisr hik marnyaruhatnomr." Bi inji kfakni duha. Tum yak hanyuk yimaroh duka fijo kangm ayafhonomm, to be hifa. ²² To fitoh yimamn o metmn slef tohetmn Bro Nkifrar fakmorm Kraisrhu hikneft, nd yimam o metm be bi fnahmomn bi Kristenem. Fitoh yimamn o metmn slef toh duhatmn Bro Nkifrar fakmorm, nd yimam o metm be bi tfit Kraisrhu slef yimayem o metem bi. ²³ Nd fasoh fasoh nefm yak nhirtamoat mititkt be bi thu nyusakmokomtn be bi nhai wom mtitoff yakitohkahtko, be bi tfit Kraisruheko. Niko dukahato turhu yonr niahato rorn nikmoh nohyuk tkitt yakhato rorn nohmor. Ndnett yimam kfo kangmko, inji inji watohkahkomn o inji inji waikahkomn Bro Nkifrar hti yindhorrhrko, mirahko yimam kfoyuk tngmn ahiknom. ²⁴ Bar yinouroko, tfit wompam

nd na kfi mrokfot mkfekwant. Nom finji finji tohetnomn Bro Nkifrar yakhato Kraisr mhikaknimonomr, to be tunom tohyuk toh yuhatn tohhato Bro Nkifrar yakitohkfot.

Tuhan duha yimami ram duha metroh mrokfom

²⁵ Tuhan duha, yo ram duha met yindariroh mrokfom niko kfo ttiwonmot, ndtn afo kfo ptharuha. Met yindarim tafi ram yak duham yo tuhan yak duham, ndm Bro Nungothetr nhai rompno yiay wom tamoh mrokfom kformorm, be nanhu duka yima yuhurn wom kfo hta mrokfom kfo ptharuhanm. Nd na kfoyuk mrokfom niko yakkfot. Nd tamoh tamoh riduka aduka yima yuhum na kfiwam Bro Nkifrar nann hti yuhuwafhato nd riduka aduka yima yuhum hemora. Ndnettn nd na kfoyuk mrokfom niko yakkfot. ²⁶⁻²⁷ Nom Bro Nkifrar hiket yimanom be tu fasoh yiha bebr tohwanomn bro krhopam kekwonom. Ndnettn kfo kanga frohm bi tuhanetem rom be inji tuhanetm tohkfot. Mirahm tfit wom fitoh yuhamn tuhanemrom ayak tuhafonom. Frohm damiagm tohwom rom be inji damiagm tohkfot. Mirahm tuhan yakneft adukanom. ²⁸ Kto tuhan yakrahn, ndt mirahn ka Bro Nkifrapno mrokfeta rhuruha. Nhai. Yo Bro Nkifrar hiket tuhan tmaht, tafi yindari dukefr toh duha met tmaht, nhaf inji, kto wom yimar yakneft mirahm ka ndt Bro Nkifrapno mrokfeta rhuruha. Nhai. Yimam tuhanetm rhuneft bok krhopam yakrahm, ndnetann nhai wofnkaha niko tuhanetko rhuhato ndhtet krhopam yakneft. Nd dukeftpno nd mrokfom kfiwanko.

²⁹ Bar yinouroko, nhai be sfno inji kfokahanko. Yiham bi kkopen hnewum. Ndnettn ndar dfik yiham Kraisr nom toh gari hasoruham, tuhanet yimam Bro Nkifrarn barkof bro dukeft htakfot. Nhai tuhanemromn. Yo metm nhaf inji. Bro Nkifrarn barkof bro dukeft htakfot. Nhai ramemromn. ³⁰ Bro Nkifrar hiket yimako tamoh nmbuhampno yima yuhum dukahato nurwoko, mirahko nd nefmn bro dukefm ahtanom. Nd nefm nhai wom rhuruhatm. Yo tamohmpno yima yuhum yindhawomko, mirahko be nd yindhoreftn bro dukefr ahtanom. Nd yindhoreft nhai wom rhuruhatt. Kristen yimam wuss wiknewam nhaf inji. Be nd tum wiknayuk wussn bro dukefm hta duha. Nd wuss nhai romn tfit wom yakitohruhatmm. ³¹ Ndar bbinysoftthu kur bnka yihar to bi brboh hanitr. Ndhtet hingrnefenm nom hingrnewam, ndm bbinysoftpno rpat hti hambrabrahnomm. Ndnettn yima yuhum mirahm be nd bbinysoftthu hingrnefmn yo dukefmn afrtkafm.

³² Tfit wom mrokfot kforuhant. Na nhai wofrikaha niko bok krho dukefmpno rhuneft. Niko htitwokomm tuhan duha yimam hingrnewa yuhat. Rom nhai wom bok dukefm rhukahmm. Rroh dukeft duka kangm, "Hifa be damiagnom tohhato Bro Nungothetrhu hingrna dukefrpar tohneft. Bro Nkifrar hifa hti yindhawornom." Rroh dukeft inji korhtm. ³³ To tfit tuhanet yimar nhai rorhu dukefr inji rhukahrr. Nhai. Rorhu dukefr tuhanemtn bro dukefr afo kitr. Kangr, rhu nmbuhat yak marnya bomarnyahato mett yindhorraht. ³⁴ Ndnetrn yindarirhu dukefr bok dukefm kekwomr. Bro Nungothetrhu hingrnefm dukaf hany yo tfit turhu mett dukaf hany inji newarn hus bok dukefetr korhr. Ram duha mett o wom yimarpno tafi yi juha mett, rothu dukefr Bro Nungothetrhu hingrneftthu hingrna dukefrpar korhrt. Kangt, "Be Bro Nkifrapno rim fnahni bugahato yuht thatipti yima yuhu bugam Bro Nkifrapar he bugakfot." Ram duha metthu dukefr inji korht. To tfit ramet metthu dukefr nndo korhrt. Rot, tuthu yindarirhu hti yindhaw nmbuhat dukahato tamoh tamoh kunyshu hingrnefenm yak kars, hingrna kars, yo briahakorhof hingrnefenm hingrna, yo tufhu sawoh rhuyuk rhu nmbuham ndm dukaf hany ndhtet ndhtet bok dukefmi hingrnefmn korht ramet mett. ³⁵ Na nd nd mrokfom kfo pthiwohat, nikomn dukahato nd mrokfom kfo pthiwanm. Ndm nhai nikmoh kfo rafoyuk mrokfom kfo pthakahanko. Nhai. Kanga dboriorh nefm wahikkahomm Bro Nungothetrhu hingrneft wahingrnako. Na wofnkaha nikmoh yima yuhum krho hanyhato Bro Nungothetrhu hingrneft yakitohneft.

³⁶ Wom nakfo nanfet met yindarif tohhany tohhany, yindarir nhai wofnkahr toh hatoh furaneft, kangr, "Be yudbat mett ayaka," nd yima yuhur be mfro tohworr, to be nhai

mrokfom yudbat niyakneft. Bro Nkifrar nhai finji kforuhatr.³⁷ To yimar met dukefr nhai bmbri tohkahrr, kangr, “Be inji afo toh furarahno, nhai bmbri niyakruhatno,” ndr tu dborioh dukef mifer.³⁸ Ndnett yimar turhu kfo nanf tuhant nuwat kanjo yatinohwort yudbat yakneft, ndt dborioh nefet. To yimar nd kfo nanf tuhant nhai nuwat kanjo yatinohkahrt yudbat yakneft, kangr be inji afo atoh furano, ndt tu dborioh dukef mifet.

³⁹ Tfit ramemrom noh htanita metroh mrokfotn tfit kfo ptharuha. Niko bi wany hneteko. Mett tafi rot yakyuk yindarir noh duha, afo rpa raft kakitohwotf. Nd rot yakyuk yimar bi fnohnir, nd raft nhai wom rpat yakitohkahtf. Kangt, wom nfri ramr ayaka, nhai mrokfom. Tmift nfri yimar yakneft, hti hanyhato Kristen yimarn yakkfot.⁴⁰ Be nanhu duka yima yuhurn duka kanga nd yindarir nohtaniyet mett tfit wom yimar yak duha yinyeft hifa, rothu rhu nmbuhat rhu yindhorrhahtt. Na inji htita, na nd kfiwa mrokfom, Bro Nkifrarhu Yafothat yorhwotta mrokfom kfo pthiwanm.

Tahi yifonm rim htahuka nuwa rikat ka Kristenm yakfot o nhai?

8

(*Sapta 8-10*)

Tahi rmonm rim htahuka nuwa rikathu mrokfot

¹ Tahi rmonm rim htahuka nuwa rikathu ya nmbuhat kfo ttiwonmokma. Nd mrokfotn tfit kfo ptharuhan.^{*} Wom Kristen yimam kfo kangm, “Tahi rmonm rim htayuk yeshrioh ye hik yuham nom nhai wom mmokahnomm, nom bi tawisaf bugewunom. Ndm rom hifam. Nd yeshrim rimakhato yak yerahnomm, Bro Nkifrar nhai faso htiruhatrnom.” Hifa kfiwum. To tfit kfiwa, ndhtet dukefet yimaro mrokfom kfo pthaneft, nhai wom nfri Kristenm dukahato pthakahm. Mrokfom be kfo grhanano kfo pthewumm. Wom Kristenm afo hti dukahato tamoh mrokfom kfo pthanefm, ndm hifa. Tfit womm wanyruhamn dukefm yakruhamn myakitoh trpknirahmt Bro Nkifrarhu mrokfot. ² Yimam kfo yamukam, “Nom tahi rmonroh tamoh tamoh yeshri ye yuham nom nhai bi wom mmokahnomm, nom bi kak bugewunomm yeshri ye yuham.” Na kfiwa ndhtet kfet yimam kfo furewum, nhai tafi dukefm yakkahm. ³ Yimar marbitn Bro Nkifrar htewar Bro Nkifrar bi htitworr.

⁴ Tahi rmonm rim htahuka nuwa rikathu ya nmbuhat nom Kristennmoh htiyeft inji htitnom, nkifra tahi rmonm nhai yafotha duhatem. Yo htitnom, nhai Bro Nkifrar kanjohot nkifrar ndar bbinysoft rhukahr. Nhai. Rpa Bro Nkifrarpar ndar yuht bbinysoft kakitohwort. ⁵ Rom tom yimam kfo yamuka kmi yarhm, tek yarhm, tkit nkim, tangi tangiroh nkifram, yo mar gunyr, yamt, mim, foh nungam yiram tamoh tamohm kfo tndhet bugam korhm. Kangm nmoh nkifra shrem. Ndm rom hifa nd tndh mrokfom korhm, ⁶ to nom Kristennmoh htiyeft htitnom, rpa Bro Nkifrapayer. Rorn tor nmoh Yifemr. Rorrpar kfomor tamoh tamohm nom htitam dborhamom. Yo yimanom rorn hingrnamornom. Hingrnahato nmoh dukefmpno, yima yuhu bugampno toh hikwonomr. Yo rpa Bro Nungothetrpar korhr, ndr Jisas Kraiser. Tamoh tamohm rorn hingrnamorm. Ror kfiwur nom korhnom.

⁷ Wom Kristenm nhai mekahm, nkifra tahi rmonm yafotha duhatem. Rom bi hti hnamoumm tahi rmonm yemrom rim htahehato bbukeft hingrnamoahat. Ndnett nd nkifra tahi rmonm rim htayuk yemrom yanyeft bok dukefm kekwomm. Wom dukefr kangrm wayak wayakomm, tfit wom dukefr kangrm mirahko ayak ayanomm nd nkifra tahi rmonm htayet yemrom. Ndhtet bok dukefm yekwamn yima yuhum be krho htatewumm. ⁸ Mirahko ka yeshr ye yuham Bro Nkifrapno brbo yirahnom. Nhai. Bro Nkifrar nhai nd yeshr ye hik yuham dukakahr. Nd yeshrim rimakhato yak yerahnomm, Bro Nkifrar nhai faso htiruhatrnom, o kfo kurrahnomm nd tahi rmonm

* ^{8:1:} Porr nd kmi Korinko hingrnamo yiham Bro Nkifrar hik duha yimam (haidenm), fohm, nungam, kmbrum, nd ndm yagnimoamm turoh nkifra tahi rmonm rim htamoumm. Kto tfit nd yemrom yagnimoamm maket swirrn htamoatmm yimam wiknamoumm. Kristenm ndhtet nefm htimoamn kfo ttiwon mrokfot Porrpno htamomt.

htayuk yeshrim, nhai toh marnyaruhatnom Bro Nkifrarhu nyingampno. ⁹ To niko bi ritohngotaket Kristenko dukefmpno niko nkifra tahimpno rim htayuk yemrom yakfot. Nfri Kristenroh nyingampno niko ye fura bofura duha. Rom kfo kuryuk yeshrim niko rihtiyakhato yeruhammn yima yuhum tfit mkrhotarahmm.

¹⁰ Ni yima bi Kristen tohngotetn nd tahi rmonm htayuk nuwa rikat yak yanyeft afo rihti ahtihato yak yiyaknikfot. Wom nfri Kristenr rorhu yima yuhure yonenrohr kanjo rhu hanyetr, rorhu nyingampno yak yerahn, to be ror inji mhti wofnnihato yerahr.

¹¹ To be ninn mrokfot yiraht. Nd Kristenr bi Kraisr nohhato nrfa htiyakmor ninn fe nhehmotnr ror yehato suhmr. ¹² Wawanyko. Wom Kristenm tafi tohngot duhatm rroh yima yuhum yuhure yon mumenrohm kanjo yuhure korhmm. To niko inji narahkomm niko Kraisrpno mrokfetko rhurahko. ¹³ Ndnettn na wom yemropat yehato wom Kristenr mhti wofnnihato yehato fsuhr, to be na nhai tfit ndhtet yemropat wom yiha womroh nyingampno yakfot.

9

Porr aposer hingrneft hingrnamoahat nhai marimoar, tir htaruhanm ror hingrnamoak mim

¹ Nhai wom tamohit yakitohkahta. Kraisr kfiwa yuharpat hikwa. Kraisr kfiwa yuharpat hikwoyann, aposer hingrneft kakitohwa. Kraisrhu kfotpno nd hingrneft kakitohwant. Na tukianhu nyingaye nmoh Nungothet Jisasr htimoyanr. Na Jisas Kraisrhu mrokfom kfo pthamohat, to bi toko nikomn bi Jisas Kraisr hikwokomr. ² Yimam htitma yima furam kanjo. Niko nhai inji htikahkma. Bro Nungothethru mrokfot na kfo pthamot, niko wany yaktihato hikmokomtn Jisas Kraisrpno brbo frtkafwoko. Nd yuhatn niko htikma aposerm kanjo.

³ Na hingrnewa hingrneftu maruha yakneft wom yimam kfo ptha yamukahat, “Tamoahmpno hti dukaruhanomr,” mrokfom inji kfiwanm: ⁴ Nom yimanom aposer hingrneft yaktihato kmi kmikompno yi tohwanom, ka nhai yeshriyenm yakhato yak hekfot? ⁵ Nom nmoh Kristen metm ka nhai Pitar yo wom aposerm yo Bro Nungothethru nmemrom turoh metmpno rpat yi htfaswa kanjo nom tunmoh metmpno kmi kmi rpat yi htfaskfot? ⁶ Ka no Barnabasetno nonrpanonn wom maruha hingrnefenm hingrnakfot? Ka nhai womm nikmoh tirm rhuwa kanjo no nikmoh tirmn rhukfot? ⁷ Yimar wom amikfotn soldia tohneft nhai turn yeshri wiknahato yak yekahr. Nhai. Yimar nnari fanm nuhtewohat, rorhu hingrneft nhai yi furakaht, tfit tur nuhtayuk nnari mishu nnarihamn yakhato kawur. Yimar sifsifmi memem tohukatoh htfaswohat, nhaf inji, tur tohukatohwa sifsifroh mingapam yekwarn tfit kawur. Ndnettn nom aposer hingrneft hingrnayuk yimanom nikmoh tirmn arhunom.

⁸ To mirahko ka be yimaroh mrokfo kfo pthiwa yuhatn hikhato kfo pthiwa. Nhai. Ndt nkifra boririfhut kfiwa yuhatn kfo hikwa. ⁹ Nkifra mrokfot Mosesr wandfamot, kfo memor, “Bulmakaur wit yukham kahot rofworm, mirahn tnkt akitasifkahtanr ror yi yak hany juha.” Nd mrokfot ka bulmakaurpam kfomot? Ka nhai yimanom nd mrokfot rpat kfokaht? ¹⁰ Nd mrokfot rpat yimanompno niamot. Yimar bbinysoft tou yibufrwar yo wit yukham tmbrahato krha rmonwar nhai hingrna furakahr, rorhu hingrneftum kekwor womm. Nd yuhatn wom Kristen yimar wom kmitn yi hingrnaneft nd kmi thofmn ror wiknakfot. ¹¹ Kraisrhu mrokfom, Bro Nkifrar kfoyukm, nom nikompno yi tohhato kfo ptha nuhasmohat, yimam yewurit nuhtiwa kanjo inji yihato nuhtamonmt. Nom inji namohat, tawo niko nom tamohm hanyefte fasoh nefet?

¹² Wom yimam nikompno yi tohhato Bro Nkifrarhu mrokfom yahukahat niko tawo kahukkomm wuskenm, yeshrim tamohm. Nom to aposerenom. Aposer hingrneft hingrnayuk yimanom nikmoh tirmn arhunom.

To nhai. Nom nhai kfo mikahnom, “Nom rroh tirmn rhurahnom tamoh tamohm.” Nom nhai inji nakahnom. Kangnom, “Nhai romn tfit krhopam hiruhatnom. Nom tunmoh wuramn tohfot. Rroh tirmn rhurahnom, hingrneft nhai yi marnyaruhat.” Kraisrhu gutnius mrokfot, nom pthayukt, nhai wany yaktihato hiruhatmt. Kfo mirahm,

‘Maruha dukefrparpno hingrnewum.’”¹³ Niko htieteko, Bro Nkifrarhu temperrhu hingrneft yakitohwa yimam, romn tu Bro Nkifrarhu temperr rim htayuk yeshrimm kawum. Nd tarior mthiwa yemroroh yemropamn kawum. Tu Bro Nkifrarhu kfo yuhatn kak hikwom.¹⁴ To be nd yuhatn, yimam gutnius mrokfom kfo ptha htfaswam, to nd rom mrokfom hta htfaswa kmimn tawo rroh rhu nmbuhat hti dukakfot. Tu Bro Nungothetr inji kfo htamor.

¹⁵ Na ndar yimaya, na nhai kfohna marimoya, “Na aposera. Na gutnius kfo hanyuk kmimn na tamoh tamohm hti dukarahma.” Nhai inji kfo hnarmoya. Nhai. To tfit mkfekwa, na ndar mrokfom inji wandfiowhat, mirahko ka wuskam o tamohroh hanyeft dukahato mrokfom inji htewanm. Nhai. Na wofnaka na hingrnewa hingrneft maruha yakneft. Ka btn womroh tirm hirhotma maruham yakruha.¹⁶ Na ndar gutnius mrokfot kfo ptha habriowhat, na nhai tuka kfo grhahato kfo mekaha, “Na ndar yimayann gutnius mrokfot kfo ptha habriowhat kmim wanukmt.” Na nhai inji kfo grhakaha. Rot nd gutnius mrokfothu kfo ptha htfasneft, ndt tu Bro Nungothetrn nd hingrneft hemotra hingrnewant. Na nhai nd hingrneft yafhokfot. Na nd gutnius mrokfot na yikitohyukt akfo ptha htfas duha yiyan, Bro Nkifrar krhopam herfora.¹⁷ Na gutnius mrokfothu kfo ptha htfasneft be tukanhu duka fijo nd hingrneft ahingrna furayant, ee btn marufa yakrfoyant. Ndar hingrneft tu Bro Nungothetrn hemotra hingrnewant.¹⁸ Ndnett tone tamoh yakhoya na ndar hingrneft hingrnewohat? Na kmi kmimpno gutnius mrokfot kfo ptha htfaswohat, nhai mekaha, “Na gutnius mrokfot kfo ptha htfaswa aposera, Kristenmn marufam tamohm hirahma.” Na nhai inji nakaha. Nanhut to be bro yindhorefrpat kekwota. Kmi kmim na mrokfom kfo ptha htfaswam mrokfom yakhato hikwatmm, na nd yindhorefrpatpno korhwa. Nhai marufam na kfokfot.

Porr yima yimaroh hingrna yimar tohmor

¹⁹ Na, na be inji tohwa. Na nhai wom yimarhu yinhitn tohhato rorn hikkfot. Na ndar tohwohat, na be inji tohhato yima yimaroh hingrna yimaya. Na kanga, inji tohakni hanyhato gutnius mrokfot watuhiruhanm, be wuyak marnyaruhamt hikrahmt.²⁰ Ndnettann na Judampno tohhato Jisas Kraisrhu mrokfom kfo pthamoahat, na Judaroh toh yuhatn na toh hikmoa. Na kanga, rroh toh yuhatn inji tohakni hanyhato gutnius mrokfot watuhiruhanm, be wuyak marnyaruhamt hikrahmt. Mosesrhu boririfhuthu yinhibitn tohneftn na nhai boririfhuthu yinhibitn tohkfot. To boririfhut hiket yimampno tohmoahat, be rhu mska inji naneft boririfhut hiket yimam kanjo boririfhuthu yinhibitn tohmoa. Na kanga, inji tohakni hanyhato gutnius mrokfot watuhiruhanm, be wuyak marnyaruhamt hikrahmt.²¹ Yo yima tangim, Mosesrhu nkifra boririfhut yikitoh duha kmim, rompno tohmoahat, nhaf to Mosesrhu boririfhut yikitoh duha yimam kanjo tohmoa. Na kanga, inji tohakni hanyhato gutnius mrokfot watuhiruhanm, be wuyak marnyaruhamt hikrahmt. To mirahko ka Bro Nkifrarhu borsisha mrokfom myafhonihato tohwa. Nhai. Na Kraisrhu kfo borsishayuk mrokfomn hikwa.²² Yo yimam Jisas Kraisrhu hik yuham o tohefm tafi tu bro duka tungunefm yak duha yimampno tohmoahat, na to be rom kanjo tohmoa. Na kanga, inji tohakni hanyhato gutnius mrokfot watuhiruhanm, be wuyak marnyaruhamt hikrahmt. Na Kraisrhu mrokfom kfohemoaahat, womhtet womhtet tohefm tohet yimam, womhtet womhtet boririfhut yikitohet yimam o tamoh ruheft ruhet yimampno yi tohmoahat, na be rroh yuhat fknihato tohmoa. Duka memoa, rroh ruhefm o tohefm tohakni hanyhato gutnius mrokfot watuhiruhanm, be wuyak marnyaruhamt hikrahmt.²³ Na ndhtet ndhtet nefm namoahat, memoa ndar nom yikitohwa gutnius mrokfot kmi kmim awany bugamt, nd dukeftpno inji inji yimoa. Memoa awany bugakahtmt romi na nd Bro Nkifrar kfomo dborioh rhu nmbuhat rpat yak bugarahnomt.

Niko praiskfot yakneft dukahato tone tmbhoyuk makkfot hti hti tonekfot

²⁴ Niko htieteko, yimam tone resiskfot tonitam, rpa yimarpars praiskfot kekwor. To inji kanjo niko nd tonita resiskfot watonekahkomt praiskfot yakrahko.²⁵ Yimar

tone resiskfot yiyukr, ror bi wuri yihamn ror bi tur tone nhombra bonhombrakfot. Kto nd tone yihar ror mtohhato tonineft nhai wuram bmbri minysafhato buha msuh hasoruhatr. Bi tone nhombrayetrn nd tone resiskfot fnahnineft, nd resiskfot winhato praiskfot yakrahr. Nd praiskfot nom kfiwat ndt be ndar bbinysoftu toniyefthu praiskfoyet nhai rhu buhtaruhatt. Nd praiskfot nom Kristennom dukewat yakneft, ndt nhai finji naruhatt. Nd praiskfot be inji rhu nkifraniraht. ²⁶ Ndnetann na tu tonita yimam kanjo nhai na rihti ahti hanykaha o mongko yiho hti thu tanykaha. Nhai. Nanhu dukefr, nanhu nyingam makkfot hti hti tonita. Yo boksam nnewa kanjo tirt tutahat nhai yi furakaht. ²⁷ Nhai. Bi tukann tukanhu yatit tukanhu tirm yak kufhahato tananh bonanhhato yatit bi tattewut. Kto wommpno nnahato womroh tirm yak kufhahato tananhneft nhai yironakhato suhrhota. Nanhu toheft to be inji kanjo tohwant. Nanhu tohefm, nanhu wiayauu nmbuham, nanhu pthefm duka hik marnya bomarnyahato tohkfot. Na wofnkaha gutnius mrokfom womrpam hehato romrpamn praiskfot yakkfot. Ndnetann nanhu tir wuram, nyingam, yimbhindangm, yima yuhum, tamohm na tukann yak hta bohtahato praiskfot yakkfot.

10

Tahi yifonm kfo bruttna duha

¹⁻² Bar yinouroko, kanga wadukaf hanyswakomt nmoh nkifram, Mosesrpnno nungur tik furat yau fnahmo yuhathu tndht. Rom yimohat, Mosesrn tohakmotr Isrerm rom be Mosesr hikmoum. Yura Bro Nkifrar htamort gribfat. Ndt yura hir hanymoatt yimam ndtn wuhtiyakhany wuhtiyakhany fau hikmoum. Nd gribfath hanymotm hanymotm Retsi barit fau hayukni marnyamomt. To nd tndht tfit ariharhof mrokfot to tfit finji kfiwatt? Yimam Mosesr hik hanyhato gribfathu yinhit yau hanymohat yo Retsit yau hayuknimohat, ndt nom Jisasr hikhato baftais yekwa kanjo inji yimot nd tndht. ³ Nd yima rifhur yimor, yura moun yuhat yiha yiha yawihnamoa bretpam yak hutuhahato fi hanymoum. Ndm Bro Nkifrar thu brurhemoatrm yakhato famoumm. ⁴ Yo rom ye habrimoa bupam nhaf inji. Bro Nkifrar kfomoatr bu rifhut harhumoa bu tahis rpat yimampno yi htfasmoatt ndtn bupam yakhato famoum.* To nd bu tahis yimampno yi habrimoate tu tahi mift yi habrimout o frohmn kfo nhombriwat? Nd bu tahis Kraisr kfo nhombrewut. Kraisrn hik htfasmourm rom yimoa tkitm. ⁵ To nd yima rifhur nd nungur tik furat yau fnahmoroh nefm Bro Nkifrar nhai hti wofn hanyrmoarm. Ndnett tu bro rifuhetr buha nungur tik furatn noh wurasohmotm htanimomm.

⁶ Nd Isrermppno rhumo nefm ndm be kfo nhombra mrokfoym. Nom rroh tndh mrokfom mhtiyakhato nom yima yuhum yakhato nom nhai rom namo kanjo yima yuhum sinyahato fasoh nefm nakfot. ⁷ Yo mirahko rom namo kanjo nkifra tahi yifonm yeshri mhtahihato kfo tatonomm. Bro Nkifrarhu rfa borngt kfo kangt, “Rom rhuhato nd tahi yifonr htayuk yemro burwat ye yehato yo drin spakmom met yindarim sinyahato tir mniyaknihato grhahato nd tahi yifonr grha yindhormomr.” ⁸ Nom mejuha rom namo kanjo metm wom yimampno waiswako yo yindarim wom metmpno waiswako. Rom inji namomn yonmari 23 tausen met yindarim be rpa marrn bafinat yimom. ⁹ Yo mirahko aduka amanyom, “Fasoh nefm naruhanomn afo htirahnom Kraisr finji naruharnom.” Mirahko inji ananom. Rroh womm inji namotm nandomm wasmotmm nohmom. Nd gnngr yakitoh hanykfot. ¹⁰ Yo mirahko gutnius mrokfot kfohayuk tohak yimam wom tamoh kfo hutt mrokfom akfonomm. Rroh womm Moses Aronrofpno kfo huttmohat nhai rhurmom. Noh yafothat hatohyuk mounmotr fukatohmotrm noh wita bugamom.

¹¹ Nd bingot tohmo nkiframpno ndhtet ndhtet nefm rhu hnamom, ndm nmoh ariharhof yak duka tungunayuk nefmn yimam Bro Nkifrarhu rfa borngtn wandfa

* 10:4: Mosesr tahi tathato bupam yakmo yuhat, hus gonborngfn kfo tndhmoft. Wom tndh kfot korht Kisim Bek 17.1-7 yo wom tndh kfot korht Namba 20.1-13. Judam nd hus bukf kfo tndhmo tahishu mrokfot htimohat, rpa tahishu tndhrpat kfomof. Nd tahis Isrerm fitoh fitoh tkitm yimoahat nd tahis rpat yimoum.

htamomm. Bi wuroh yiharhu yiham bi tohwanomn kfo dukayuk mrokfom wandfa hta-momm. ¹² Ndnettn wom Kristenr kfo kangr, “Nanhu toh nmbuhat awi hifa tohwoyann toh bmtewa.” To ndhtet kfet Kristenr, to tfit mirahrasuha. ¹³ Tamoh tamoh nefm o dukefm niahato nikmoh yima yuhum mtawastiwonwam, to mirahko ka womm ndhtet dukefm o nefm nhai yakkahmm. Nhai. Nd nefm yima yima kekwomm. To ndhtet nefm o dukefm nikompno rhunefm, niko finji duka duha, Bro Nkifrar toh tkafruhatrko, Bro Nkifrar tur bi kfoyuk mrokfom hikhato toh tkafhato yima yuhum thu bmtarahrko. Nhai tamoh tamoh nefm yak kasuhruhatmko.

Nkifra tahi yifonmi Bro Nkifrar rpat yakitohhato kfo bruttna duha

¹⁴ Ndnettn niko nanhu dborioh yimatko kfiwanko, yimam kfo bruttniwa nkifra tahi yifonmpno brbo yi juha. ¹⁵ Niko htitank, tamoh tamoh mrokfom kfoyukm awi kak nhtewukomm. Ndnettn nd na niko yahuka mrokfom wayak nhtatwakomm. Tu yafothet mrokfot kfiwankon o nhai? ¹⁶ Barkof mrokfot inji akfoyanko. Nd wain bupam yorhwa kafti yo bretpat, nd hus shrf nom kfo bruttna yindhornihato nayahukaf, ndf inji korhf: Wain bupame Kraisrhu kkupayem yo bretpate rorhu nmpayem. Nd hus shrf nom yekwanomn to be Kraisr yak nhafohwarnom kak hongmb hmbrirnom. ¹⁷ Nd rpa bretparpat niyak tif nhombrahato yewat, ndtn ar boknabok yimanom kak nhafohwotnom. Yak nhafohhato rpa thatipnom korhnom. ¹⁸ Niko nmoh nkifra Isrerm namoa neft dukewukomt? To inji kanjo kitt. Nmoh nkifra Isrerm Bro Nkifrar rim htahemoa nuwa rikat ye ttnameahat,† fitoh fitoh yimam nd altarpno rifinyukm, Bro Nkifrar kak hongmb hmbremourm.

¹⁹ To tfit wadukakomt tahi rmonm rim htahuka nuwa rikathu ya nmbuhat. Na nhai kfo mekoha tahi rmonm rim htahuka yemrom wom nndoh ruheft korhm. Yo nhai kfo mekaha tahi rmonmn tom tu yafothetm. ²⁰ Nhai. Nhai inji kfokaha. Na kfo kanga yima tangim yemrom yakhato tahi rmonmpno rim htewohat, ndm nndo Satanrhu hingrnet yakinohwa yafothamn rim htahukm. Nhai tu Bro Nkifrar rim htahekahm. Yo nhai wofnaka niko nd Satanrhu hingneft yakinohwa yafothampno rhuyuk tamoh tamoh nefm fknekfot. ²¹ Nhai niko Bro Nungothetrhu kafti Satanrhu hingneft yakinohwa yafotharoh kaft rpat yakhato yakfot. Yo niko nhai Bro Nungothetrhu teborti Satanrhu hingneft yakinohwa yafotharoh tebort rhuhato nuwa yakfot. ²² Nom Bro Nungothetr yakinoh hany tfit mano wom tirtn tfit tahi rmonm yakinoh hanyneft, ka be yuwi kangnom, “Bro Nungothetr anamburrnom.” Ka nmoh namburefti rorhu nambureft rpahtett?

Bro Nkifrarhu yufarpat nom yiha yiha kfo yuta grha yindhorkfot

²³ Na nd bi barkof kfoyuk mrokfot tfit kfiwanko. Womm kfo kangm, “Mrokfo duhatenom tamoh tamohroh finjina finjina nefm. Nhai wom kfo rafo mrokfot rhukaht-nom.” Tmift, to mirahko ka nd tamoh tamoh nefm ka be na fura bofurahato hifa hifa rhu nmbuhat yakrahnom. Nhai. Kfo kangm, “Mrokfo duhatenom tamoh tamohroh finjina finjina nefm.” Tmift. To mirahko ka nd tamoh tamoh nefm ka be na fura bofurayukmn wom Kristenm htineft hifa toh bmtarahn. Nhai. ²⁴ Tamoh tamohroh naneft mirahko tuko dukahato tamoh tamoh nefm be ana fura bofurakninomm. Womm dukaf hanyhato tamoh tamoh nefm nakfot. Womrhu nyngampno ni wom neft na thombat, womr hti marsisahato toh bmtarahr o finji naruhar? Ndhtet dukefm yakkfot.

²⁵ Tamoh tamoh yeshrim maket htayukm niko wilknahato ye fura bofurakfot. Mirahko bok dukefm yakhato tfit nd yemroparoh niayuk yuhat nakfo ttiwon hiknomt. ²⁶ Bro Nkifrarhu rfa borngt kfo kangt, “Ndar bbinysoft Broruhet. Yo nd bbinysoft harhuwa tamoh tamoh Brorparuhet.”

²⁷ Yo tfit wom mrokfot kfo dukewanko. Jisar hik duha yimar kfekworn rorhu kunyshu nuwa yanyeft, yo ni kangn aiya, mirahn bok dukefm ayaka ror htayuk yemroroh yanyeft. Tamoh yeshrim hter, be ye fura bofurakfot. Tfit kfo ttiwon me juha, “Ndar yeropame,

† 10:18: Wahtiko Wkp 7.6, 7.15

fitha yakhomm?" Inji tfit kfo ttiwon hik duha. ²⁸⁻²⁹ Be yimar yemropam htihato yimako hti yo yemropam hti inji hti hasohato kfo ttiwon kangrko, "Nda tahi yifonmpno htayet yemropame yakhato keswanhiwokomm?" Bi ndhtet mrokfot wanukomt, to be mirahko nd yemropam ayanomm. Yerahkomm, nd kfo nuhasuk yimarn kfo mirahr, "Tamohmpno nd yimam bi tahi yifonmpno mhtayet yemropam tfit yewamm? Ndt fasoh neft newum. Na nhai ndhtet yemropam yarfota." Ndnettn nd kfo nuhasuk yimarn yima yuhur dukahato nd yemropam ye juha.

Nikmoh womm kfo mirahma, "Nd ror kfo pthiwa mrokfom tur kfo ptha mm-brafinyworm. Frohm wanyhiruhamr? Nom, nom tunmoh dukeft hikrahnom. ³⁰ Nd tahi yifompno htayet yemropam Bro Nkifrapno kfo bruttna yindhornihato be ye furarahnom."

³¹ Bro mrokforpat kfiwanko, nd yemrom htihato nikmoh yima yuhum finji dukahato kangko finji ananom afo dukakfot. Niko nd neft na thombat, yimam htihato Bro Nkifrap kfo yindhorrahmr o nhai? Nd dukefrpat mdukakkfot ee btn tamoh nefm nakfot. ³² Tamoh tamoh nefm nanef afo mdukakkfot, wom Juda thofr tohhany nom nd neft na thombat finji dukaruhar o Grik thofr tohhany o sioshu wom yimar o mett tohhany nom nd nefm nanefm finji dukaruham? Ndhtet dukefm afo dukakfot. Mirahko wom tamoh nefm ana nhehkahtnomm womm nd nefm nahato asuhm. ³³ Na tohwa toh yuhatn toh hikkfot. Na kanga yimam o kmi thofm ahti yindhorma, nanhu toh yuham yo nanhu nefm to be rroh yuhatn hikkfot. Kanga, inji tohhato Bro Nkifrap tfit yakrahrm.

11

¹ Kraisr yorhwa ruheft na htihakhato nd yuhat korh hikwa. Niko tfit na yorhwa ruheft htihakhato nd yuhat warhu hikko.

Bro Nkifrarhu Yafothat yahuka hingrna dukefmi yo tu Kristenroh tamoh tamoh rifiny yuharoh mrokfom Porr kfo pthamor

(Sapta 11-14)

Mfharoh kasi yuharoh mrokfom Porr kfo pthamor

² Na kfo yindhorwanko. Na nhai duka mmokahkma. Dukiwakomn na kfo hayuk mrokfom kak hikwokomm. ³ To tfit kanga wom kfo nuhas mrokfot akfo nuhasanko. Kraisr hikwa yindari bugam tu Kraisrn mfhako mtohekwarn turn kak hta bohtewurm. Yo mett nhaf inji. Tuthu ramemrn mfhako mtohekwarn mett kfo hta bohtewurt. Yo tfit Kraisr nhaf inji. Bro Nkifrarn Kraisrhu mfhako mtohekwarn Kraisr kfo hta bohtewurr. ⁴ Ndtn kanga akfo nuhasanko. Wom yimar kangr mfhat kasihato bro lotu swirl kfo bruttnayan o wom mrokfom Bro Nkifrap hayukm kangr nd kongrigesenkfot akfo nuhasanm, nd yimar be tur tfit kak yimtnewur. Metroh mfha kasiyef tfit kak hikwor. Metroh nefrpayet mfha kasihato lotu swirl kfo bruttnakfot o Bro Nkifrap hayuk mrokfom kfo nuhaskfot nd kongrigesenkfot. ⁵⁻⁶ Yo mett mfhat tohyuk kasi that yak thuhato brioh mfha furat tohhato bro lotu rifiny swirl kfo bruttnaneft o Bro Nkifrap hayuk mrokfom kongrigesenkfot kfo hanyeft, kangme yindarir tohvor. Ka kangt yindarim kanjo atohane, to be rothu tmars yohhato bijis rhukfot yindariroht kanjo. To nhai. Nhai inji naruhatt. Inji naraht to be tut bro yimtneft yakraht. Ndnettn mett bro rifiny swirl tohhato kfo bruttnaruhan o Bro Nkifrap hayuk mrokfom kfo ptharuha, nd metthu mfhat kasi thett mfhat rhukfot. ⁷ Yindarir myorhekwor. Bro Nkifrap yorhwa ruheft rhu hikwor yo rorn bro yufat kahukrr Bro Nkifrap. Ndnettn rorhu mfhat brioh kasi tha duhatt rhukfot. To mett, rot yindarir bro yufat kahukt. Ndnettn rothu mfhat kasi thett rhukfot.

⁸ Bro Nkifrap yimar barkof hingnamohat nhai metthu kkrespir yakhato hingnamorr. Nhai. Yindarirhu kkrespir yakhato mett hingnamort. ⁹ Bro Nkifrap nhai mett dukahato yindarir hingnarmorr. Nhai. Yindarir dukahato mett hingnamort. ¹⁰ To ndnatn mett bro lotu rifiny swirl tohhato kfo bruttnaneft o Bro Nkifrap hayuk mrokfom

kongrigesenkfot kfo ptha nuhas hanyeft mfhat kasikfot. Mfha kasiyet mett bi yufayett bro rifiny swirl kfo bruttnaneft o Bro Nkifrar hayuk mrokfom kongrigesennm kfo ptha hanyeft. Mounmotm mfha kasi that hti nhtaruhamn duka mirahm, awi nd mett rifiny swirroh kfo bruttnaneft o Bro Nkifrar hayuk mrokfom kfo pthaneft bi yufayetet.

¹¹ To arihat Kristen mett nhai rot tut tohkahtt rothu toh nmbuhat yo Kristen yindarir nhai ror tur tohkahrt rorhu toh nmbuhat. Nhai. Mett yindarirhu tohnhoyuk toh tamnou metet yo yindarir metthu tohnhoyuk toh tamnou yindariyer. ¹² Bro Nkifrar mett hingrnamohat, yindarirhu kkrespir kfomor mett mfnahmot. To tfit ndar bbinysoft, arihat mett kfiwit ndar bbinysoft yimett korht. Tu Bro Nkifrar bi inji hingrna nhtamorm ndhtet ndhtet yihotam.

¹³ Niko tukomm nd mrokfot wayak nhtakomt: Mett mfha kasi duha tohhato bro lotu rifiny swirl kfo bruttnaneft ka dborior nefet? ¹⁴ Nom yimanmoh htieftn hti kangnom, yimar yuke bro tmari hatohetr faso korhr. Tfit metm kanjo tmars hatohwort. ¹⁵ Mett yuke tmars hatohneft ndt hifa. Yuke tmarim metroh wondhet. Bro Nkifrar bi inji kfo hta memor, "Yuke tmarim rroh mfaroh kasiyukem." ¹⁶ To nd na kfo hawihne mrokfom fitoh yimar wanyhato rorhu yima yuhur nhai mikmbrekahr, nd yimar adukatwar, nomi Bro Nkifrarhu siosroh met yindarim nhai wom fitoh yuhat hikkahm. Nom buga be nd na kfiwa mrokfo yuharpas hikwonom.

Bro Nungothethru bretpati wain buparoh ye yuhat Porr kfo ptha nuhasmorm Korinm

¹⁷ Tfit wom kfo hta mrokfom kfo ptha hta nuhasruhanko. Na nikmoh rifiny yuharoh mrokfom wanymohat nhai wany yindhorrmoya. Niko Kristenko rifiny shombat, nhai mekahko, "Be rpat rifiny marnyarahnom." Nhai. ¹⁸ Barkof mrokfot na kforuhat, wanyakmoya kfo memoma niko Kristenkmoh rifinyneft rifinyhato Bro Nungothet Jisasr ya nyuhas tanymo yesht dukakhato tfit niko rifinyhato nd yesht htahato ye shombat, tuko nnakfo nna nnakfo nnewakomm nafrndohwoko. Womm rom nndo, yo tfit womm rom nndo. Inji inji nayak nhtewuko. Na inji wanyakmohat nanhu dukeft duka memoya, ka nd mrokfot tu kfoyent. ¹⁹ Tukmoh toh nmbuhathu nahti nhombraneftn, kangko, "Nafrndohkahnomn htirahnom fitoh yimamn tu hik mif mifwamr Bro Nkifrar." ²⁰ Niko tuko Kristenkmoh rifinyneft rifinyhato nd Bro Nungothet Jisasr ya nyuhas tanymo yesht niko tfit ye dukaneft rhu rifinyhato ye shombat, nhai nd yeshrthu tu ye yuhat yak hik marnyakahko. ²¹ Wom yimam yeshrim hanitwohat, be yudbat mhta thuhato yudbat nd yesht yakhato kiyefiwumt. Nhai womm gariyakhato wommpno rpat nayak nhtahato yekahmm. Nhai. Womm yewamn tfit womm yatinoh korhm. Wain bupam nhaf inji womrohm tum mhtahato yekehato spakwom. Nhai wommpno nayak nhtakahmm. Nhai womm hti dukaf hanykahkomm. Ndt nhai tu dborior nmbuhat nakahko. ²² Kangane ka nhai kuny juhateko tukmoh kunymn yeshri ya yo bupa ya inji naneft? Ndnetkomm tfit nd Kristenroh rifinyhato ye yeyuk yeshri rpa yimakomrpakomm yudbat kiyefiwukomt? Bro Nkifrar hikwa Kristen yimam niko ka nhai duka mikahko ndhtet yimam Bro Nkifrar kukatohworm? Ndnett yeshri duha yimapam niayukm ke hatitohefiwukomm. Inji newatkomm tfit tum yimtnewum. Finji kangko akfoyanko nd niko niwa neft? Ka akfo yindhoranko? Nheno. Nhai kfo yindhorhotanko nd niko niwa neft.

Nungothet Jisasr hemorm disaiperm bretpami wain bupam

(Matyu 26.26-29; Mak 14.22-25; Luk 22.14-20)

²³ Nd bretpa wain bupa ye yuhathu mrokfot na niko kfohemot, Bro Nungothetrpno fakmoyant. Nd mrokfot inji kfomot: Bro Nungothet Jisasr hndhnamo yifungrn turhu disaipermpno nuwa famom. Bretpat yakmortn, ²⁴ Bro Nkifrar wuyak nuhasakhato kfo bruttna yindhornimorrn fak tif botifmort. Yak dbif rmonnihato kfo memorm, "Ndar na yak dbif rmon bretpam nanhu nmpayem, nikmoh yak marnyayukem. Wadukakahkma wayetwakomm." ²⁵ Bretpam yenyihato tfit wain kaft wafakmort. Wayakhato nhaf Bro Nkifrar wuyak nuhasakhato kfo bruttna yindhornimorn kfo memorm, "Ndar wain bupam nanhu kkupayem. Na nohhato nanhu kkut yohniruhatt fasoh nefm

wayaknirahm. Ndar wain bu kaft tfit niko yekwat, nd nfri dfa tik yuhar hingrnaruha hingrnefet. Kto na nohhato nanhu kkut yohni thombat nd kkupamn nd nfri hingrneft be yak dbkafrahtt. Yiha yiha wain bupam yenyeft tfit wadukak hanyswakomt nanhu kkut yohniruha yuhat.” ²⁶ Ndnettn niko yiha yiha nd bretpami wain bupam yewohat, ndt kak nuhas hany kangko nikmoh fasoh fasoh nefm bi Bro Nungothetrn fak wus bowusmorm. Nd neft be inji nahany nahanykahkomtn kto Jisasrh u nia yiha miyak htanirahkomt.

Nikmoh yima yuhum yak nhta marnyahato ee Bro Nungothetrhu yeshrt rhunhohato yakfot

²⁷ Ndnettn fitoh yimam kangm, “Be yeshri furam yewa kanjo wom dukefen duha be aye fura bofurantomt,” nd yimam mrokfetm rhurahm. Nhai Jisasrh nohmo yuhat mduka hikakhato nd bretpami wain bupam yekahmm. ²⁸ Yimar afo tur duka hik marnya, tu hifa hifa korhr, ee btn nd bretpami wain bupam yak yakfot. ²⁹ Yimar nhai Jisasrh nohmo yuhat mduka hikakhato ke fura bofirewurt yeshri furat kanjo, nd yimar be mrokfetm korhr. ³⁰ To nd ye fura bofuraneftn nikmoh bokm rhu kriyohzewum yo wadbohna thu wadbohna thunewum, yo bokm bi noh wuraschwom. ³¹ Be tunom nd yeshrt duka hik marnyahato ayanomt, nhai ndhtet nefm rhurfotmnom. ³² To nd nefm Bro Nungothetr newohat, hifa ndhtet nefm newurnom. Rorhu dukeft duka kangr inji anakahtamm dukefm yakruhamn dborioh nefm hikrahm. Dborioh nefm hikhato kto nohneft nhai fasoh nefm nayet yimampno hel yiruhatm.

³³ Ndnettn, yinouroko, nd Bro Nungothetrhu yeshrt rhuhato yanyeft, afo narhukatohak narhukatohak marnyahof. Bi mfnah bugeme ee btn rpat rhuhato rpat yakfot.

³⁴ Wom yimar yudbat yatinoheter, duka kangr womroh rhu gari hatohneft yudbat yatinohruha, ee ndhtet yimar bi turhu kunyko ye bmtanehato niakfot nd rifiny swirt. To rorn yudbat yatinohakhato ror yudbat mirahr ayeya, be nd rhu rifiny swirt rhuyuk yimam mrokfetm rhurahm. Nd wom wom kfo nuhas mrokfom kto tuka nieya nikmoh htit ee nd yiha kfo nuhas marnya bomarnyaruhanko.

12

Bro Nkifrarhu Yafothat yahuka wonk wonk hingrna dukefm

¹ Kfo ttiwonmokma Bro Nkifrarhu Yafothatpno hingrnayet yimaroh hingrneft. Bar yinouroko, mirahko ayak mmonomt rorhu Yafothat hingrnewa yuhat. ² Niko bi tuko htiyeteko, niko afo Bro Nkifrar hikhna duha tohhnamohat, nd tng ptha duha tahi rmonm tohyuk yifonmn nndo nndo yak hatohafomoatmko nikmoh yau nmbuhat faso yimot. ³ Ndnettn kanga wom mrokfom akfo nuhas marnyayanko. Bro Nkifrarhu Yafothat yak hatohet yimarhu mrokfom kfo pthaneft, nhai kfo towa miruhatr, “Jisasrh kaht aiswar.” Bro Nkifrarhu Yafothat yak hatohet yimar kfo mirahr, “Jisasrh Bro Nungotheter.”

⁴ Nndohtet nndohtet hingrna dukefm yimam yakitohwam, rpa Yafotharpn nd nndohtet nndohtet hingrna dukefm kasinya hakuttm. ⁵ Yo nd nndohtet nndohtet hingrnefm yimam yakitoh hakutam, nhaf rpa Bro Nungothetrhu hingrnefrpat hingrna hakuttm. ⁶ Yo nd nndohtet nndohtet hingrna yuham hingrnewam, to rpa nd Bro Nkifrarpar nd hingrna dukefm kasinya hakutatrm Kristen bugam hingrna hakutmm. ⁷ Nd nndohtet nndohtet hingrna dukefm yima yima hingrna hakutam, sioshu rhu marnya nmbuhat dukahato yima yima bi Yafothat thu nawohhato kahukattm nndohtet nndohtet hingrnefm hingrnewum.

⁸ Womr Bro Nkifrarhu Yafothat kasinya hakuttr sioshu tuhan yindariroh yak hta bohta marnyanef.

Tfit nd rpa Yafotharpn womr kasinya hakuttr Bro Nkifrarhu mrokfo yimbu yuharoh kfo nuhas hik bohik marnyanef.

⁹ Yo tfit womr nhaf nd rpa Yafotharpn kasinya hakuttr Bro Nkifrarpar rorhu bro dukefm yinyeft.

Tfit nd rpa Yafotharpn womr kasinya hakuttr dbohnefroh yak marnyanef.

¹⁰ Yo tfit womr mirakerkfothu hingrnaneft kasinya hakuttr.

Womr Bro Nkifrar hayuk mrokforoh kfo pthaneft kasinya hakuttr.

Womr nndohtet nndohtet yafotham yimam fknihato mrokfo kfo pthiwaroh yak nhtanefthu dboriorh dukefr kasinya hakuttr.

Womr wom nndoh yarmumaye Bro Nkifrarpno kfo bruttnayuk yarmuma pthaneft kasinya hakuttr.*

Tfit wom nndoh yimarn womr kfo bruttnayuk mrokfom Bro Nkifrarhu Yafothat kasinya hakuttr tfit kfo kekutneft.

¹¹ To nd rpa Yafotharpat nd yima yimam nndohtet nndohtet hingrnefm he nhombra hanittm. Tu nd Yafothathu hti duka fijo womr kasinyewutr wom hingrneft yo tfit womr wom hingrneft kasinyewutr. Inji he nhombra hanittm.

Yima yima buganom yimar hatohwa tir, wura, mfha, nd ndenom

¹² Yimar rpayer. Nd yimar hatohwa tir, wura, mfha, nd tamoh tamoh boknambokem. Nd shrkar yimar hatohwar nhai rpa hingrneft hingrnakahm. Nhais. Nndoh nndoh hingrnefetem. Nd nndoh nndoh shrkar rpa yimar rhuhato hingrna nhombrewumm nndoh nndoh hingrnefm. To Kraisru hingrneft to inji kitt. Yimar rpayer. Nd yimar hatohwa tir, wura, mfha, nd tamoh tamoh boknambokem. To Kraisru yon kunys to inji korht. Rorhu yon kunys rpayet. Nd yon kunys yorhwa yimam boknambokem. ¹³ Nom Kraisru yon kunyshu yimanom nhai rpa kmithunom o rpa rhu nmbuhat ruhetnom hikkahnomr. Nhais. Nndoh nndoh kmiyetenom yo nndoh nndoh ruhefetenom. Nmoh womm Judayem yo womm Grikem yo womm slefem yo womm nhai slef tohkahm. To Bro Nkifrarhu rpa Yafotharpatpno yima buganom baftaismotnom kangme bi rpa yima bugayer. Yo rpa Yafotharpat Bro Nkifrar htewurnom yima yimanom.

¹⁴ Yimar nhai wurarpafn htihato kfo mikahnom yimayer. Nhais. Yuht wurasif bugat yo wurasift yorhwa tamoh tamohr yo yuht yima nyisof bugat yo yima nyisoft yorhwa tamoh tamohr yo mfhat yo mfhat yorhwa shrka bugar nd ndm hti nhombra bugahato kangnomr yimayer. ¹⁵ Wuraf sinyahato akfo amef, “No nhai tirf kanjo rhukahno. Ndnett nhai yimar hatohkahrno.” Ndt ka tu kfoyet? Nhais. Nd wuraf to yimar hatohworf. Nhais rof ndhtet kfo hhrif mrokfot kfo pthakfot. ¹⁶ Yo yimbhindangaf akfo amef, “No nhai nyingaf kanjo rhukahno. Ndnett nhai yimar hatohkahrno.” Ndt ka tu kfoyet? Nhais. Nd yimbhindangf to yimar hatohworf. Nhais rof ndhtet kfo hhrif mrokfot kfo pthakfot.

¹⁷ Be yukatohyuk nyingarpaf yimar aharhur, to tamoh mrokfom wanyrform? Yo yimbhindangrpaf yimar aharhur, to tamoh gbeфр mthatirforr? ¹⁸ To hifa Bro Nkifrar turhu hti duka fijo tamoh tamohm hingrna hta nhombra bugamorm, yo hta fijo htihato hta nhombra bonhombramorm turoh rhuyuk tkitmn. ¹⁹ Be wurarpaf arhuf, to nhais kfo marifotnom yimayer. Nhais. ²⁰ Yimar nhai inji rhukahr. Yimar tireter, wurayeter, yimbhindaneter, tngeter, tmarifayeter, nd ndeter. To nd shrkar yimar hatohworm. Kraisru yon kunys to inji korht. Rorhu yon kunys rpayet. Nd yon kunys yorhwa yimam boknambokem.

²¹ Nhais nyingaf sinyahato tirf kfo merfotff, “Nifn tirfn arhu duha yifn no banuha rhu marnyarfono.” Yo nhais mfhat sinyahato wuraf kfo merfotf, “Nifn wurafn arhu duha yifn na turpeta banuha rhu marnyarfoya.” ²² Nhais inji nakfo nna nakfo nnahato nayak thukfot. Thatipt yorhwa tamohm nom htihato kfo yamuka, “Tamohmpno ndarm rhumom?” Nd kfiwa tamoh tamohm hingrna bugefetem. ²³ Yo wom tkitm faso hti bebwom hmbresha duha rhuneft, tfit yimanomn hmbresham yakhato hmbre hutefiwunomm. Yo fitoh tkitm briyo rhuhato yimam htineft tham bbnarofwom, hmbresham yakhato hmbre hutefiwunom. ²⁴ Yo nd wom wom tkitm be inji rhu furewum. To nd nd tkitm bi tu Bro Nkifrarn bi inji hingrna nhombra htamotrm inji korhm. Womm hmbresha duha korhm, womm wondhetm korhm. ²⁵ Bro Nkifrar yimaru thatipt bi inji rpat hingrna nhombra htamort. Memor, “Inji ahingrna hta nhombrakahtant nd

* ^{12:10:} Tu nd yimar wom yarmumaye kfo bruttnayukr nhai ror kfoyuk yarmumat wanykfot. Bro Nkifrarhu Yafothathu kasinyahato kfoyek mrokfomn ndnett nhai tu yima mifr wanykfot ror kfo pthayuk mrokfom.

nd tkitm nhai nafrtnohhato nahti marsisaruhatm. Tum nahti duka nahti dukarahn.”
 26 Ndnnetn wom fitoh tkitt kaut o ke nyrikewut, yuht yimar yironewurt nd ye nyrikeft. Fitoh tkitt bro yufat kekwot, yuht yimar yindhor bugewur.

27 Niko Kraisrhu yima thatipeko. Womr tirer, yo womr wurayer, yo womr yimbhindanger. 28 Bro Nkifrar nndohtet nndohtet hingrnefm yakitohet met yindarim sios hta nhomboramorm. Barkofm aposerm htamor.

Yo tfit rompno Bro Nkifrar hayuk mrokfom kfo pthayukm htamorm.
 Yo tfit romponwe Bro Nkifrarhu mrokfo mna yuharoh kfo nuhas hik bohik marnyayuk yimam htamorm.

Ee btn miraker hingrnayuk yimam htamorm.

Yo dbohnefroh yak marnyayuk yimam,
 yo wom yimaroh hti dukayuk yimam,
 sios hingrnayuk yimam htamorm.
 yo nndohtet nndohtet yarmumaye kfo bruttnayuk yimam htamorm.†

29 Bro Nkifrar nhai marimor be aposer bugam tohrahm o profet bugam tohrahm o Bro Nkifrarhu mrokfo mna yuharoh kfo nuhas hik bohik marnyayuk yima bugam tohrahm o mirakerkfohu hingrnayuk bbukeft yak bugarahm 30 o dbohnefroh yak marnyayuk bbukeft yak bugarahm o wom nndoh yarmumaye kfo bruttnayuk mrokfot yak bugarahm o wom nndoh yarmumat kfo bruttnayuk mrokfom be yima bugam tohhato nd mrokfom tfit kfo kekutrahmt. Nhai. Bro Nkifrar nhai hingrneft inji yak htarmort. Yima yima nd hingrna dukefm he nhombra hanymorm. 31 Kangko, Bro Nkifrarhu Yafothat yahuka hingrna dukefm ayaknom, sioshu kasinya nnuhakniyuk hingrna dukefm mfro yakkfot.

Wom met yindarimpno nayak marnyahato rpat tohkfat

Bro Nkifrarhu Yafothathu kasinyewa nefm, rom hifa yakrahkomm. To tfit kfo nuhasruhanko tu toh marnya yuhathu tu bro mna mrokfot.

13

1 Na ndar bbinys of thofm kfo bruttniwa wom nndoh yarmumatn o mounmotm kfo bruttniwa yarmumatn Bro Nkifrar akfo bruttnayanr, to nd na kfo bruttnayuk yimaya, nanhu tu yiro yima yuhurio nhai wom yima fura bofuram htihato yak marnya bomarnyakahanm, nanhu kfo brutneft fipa duhatet. Nrwir frdbrango fura bofuriwa kanjo inji dbrango fura bofuriwa. 2 Yo na tohhato Bro Nkifrar hayuk mrokfom akfo pthayann o Bro Nkifrarhu kafrohet kafrohet yima yuhum bi nann aharuhanm o rorhu mrokfo yimbu yuham akfo hik bohikanm o nanhu yima yuhur Bro Nkifrarpar rhuhato rorhu yufat yutahato kminysoft kfo tkurhato nndo arim toht, rom nd nefm mrokfo duhatem, tmift nanhu tu yiro yima yuhurio nhai wom yima fura bofuram htihato yak marnya bomarnyakahanm, na tu be yima furapaya. 3 O nanhu yonmari yonmari wuss yakhato wuska duha wuska duha yimam ahiyan, o nanhu thatipt kahe kahe akandhi nohma, rom nd nefm mrokfo duhatet. Tmift nanhu tu yiro yima yuhurio nhai wom yima fura bofuram htihato yak marnya bomarnyakahanm, nd na nayuk dboriorh dboriorh nefm be yi furarahm.

4 Yimar wom yima fura bofuram htihato marbitn htewurm, htirahnr womm finji naknerahmr ror nhai finjina finjinakahrm. Hifa yima yuhur hmbrithrm. Yo ror nhai wom yimaroh marut o wuss htihato kfo yuhuwehkahr o kfo dabiny kfo nurkahr. Yo ror tamoh nefm nanefm nhai rorhu yufat tur kfo yuta hagrakahrt. 5 Yo ror nhai wom yimam fasoh fasoh nefm yak nuhaskahrm o mrokfom kfokahrm. Yo nhai ror turpar dukakahrm. Nhai ror tamoh nefm be yudbat namburaknikahr. Wom yimam rorpno finji naneft nhai rroh nefm tfit duka hanyhato thomna hanykahrm. 6 Fasoh fasoh nefm na haset yimam nhai hti yindhor hasokahrm. Dboriorh nefm na haset yimam hti yindhorworm. 7 Womr sinyahato wom fasoh neft nerr, nhai yudbat rorhu fasoh neft mhtiyakhato kfo mikahr,

† 12:28: Wahti 12.10 kfo nuhasyuk mrokfot.

"O be tmifa nd yimarpno tfit wom dborioh nefm naneft." Nhai. Nhai yudbat rorhu yima yuhur bi inji yiyanikahr. Nd yimarpno bi barkof tohhnayuk rofhu dborioh toh nmbuham mhtiyakhato to be rofhu dborioh toh nmbuhat be inji rhu yakitoh hanitwotf.

⁸ Nd wom yima furaroh marbithu htaneft be inji rhu yakitoh hanyraht. Nhai minohniruhatt. Nd yimam sinyahato Bro Nkifrar hayuk mrokforoh kfo pthaneft minohniraht. Nhai wom rhuruhatt. Yo nd nndoh nndoh yarmumaye Bro Nkifrar kfo bruttnaneft minohniraht. Nhai tfit wom nndoh nndoh yarmumaye kfo bruttnaruhatmm.* Yo nd Bro Nkifrarhu mrokforoh pthayuk bro riduka aduka yima yuhum, ndm nhaf nhai tfit yimam wom yak hanyruhatmm. Kto Bro Nkifrar nmoh rhu nmbuhat yak marnya bomarnyani thombat, nd nd nefm nhai wom rhuruhatmm. ⁹ Nom ndar yiham tohhato Bro Nkifrarhu mrokfo yimbu yuhum kfo nuhas hik bohikwohat, nom nhai Bro Nkifrarhu dukefm yorhwa yima yuhum bi yak bugahato frhik bugakahnomm. Nhai. Yo nom Bro Nkifrar hayuk mrokfom kfo pthiwohat, nom nhai bi Bro Nkifrarhu dukef bugam yak bugahato kfo pthakahnomm. Nhai. Be inji nmbuha nmbuha dukefrpam yakhato kfo pthewunomm. ¹⁰ To tfit kto, Bro Nkifrar tur duka htewa duka yuhatn nmoh rhu nmbuhat yak marnya bomarnyani buga thombat, nd tamoh tamoh duka nmbuham nom yikitohwam, be myafhonirahm. ¹¹ Na afo yuhre yon mumena waruhakmohat nanhu ptheft, dukeft, htiyeft yon mumen rhut kanjo rhumot. Kto warhonimoya nd yonroh nefm mafafhonimoyanm. ¹² Ariham Bro Nkifrarhu nefm nom htitwohat, nom be binasoht hti mmrtiwa kanjo rorhu nefm hti mmrtewunomm. To tfit ktone, ee tu Bro Nkifrarhu nyingatikt hti wutharahnomt. Yo ariham Bro Nkifrarhu dukefm frhikwohat, na be nmbuha nmbuham frhikwa. To kto Bro Nkifrarhu dukefm frhik bugaruhanm ariham ror na hti hik bugewa kanjo. ¹³ Husfirpa bro nefm rhu hanyrahm. Barkof husf, Bro Nkifrarn bro yima yuhum yihato rorn duka duka rhu gari hasoneft, ee wuroh neft, yima furaroh htihato marbitn htaneft. Nd husfirpa nefm rhu yakitoh hanyrahm. Tu bro neft, wom yima fura bofuraroh htihato yak marnya bomarnyanef. Tot tu bro neft.

14

Bro Nkifrarhu Yafothat yahuka hingrna dukefr

¹ Yima yak marnya yuk duka yima yuhurn niko dukakfot yakneft. Yo nd Bro Nkifrarhu Yafothat yahuka hingrna duka tungunefroh yak dukefr dukafot. To nd dukefr dukewunome, to afo barkoft profetm hingrnamoah hingrna dukefr, ndr barkofr yakkfot.

² To yimam Bro Nkifrarhu Yafothatn kasinyahato wom nndoh yarmumatn mrokfom kfo bruttna thoft, nhai yima mifroh kfo hayuk mrokfomn bt yima mifm wanykfot. Nhai. Tu Bro Nkifrarpno kfo hayuk mrokfomn yima mifm wany mmotewum. ³ To profetm Bro Nkifrarpno mrokfom yakhato kfo pthiwa mrokfomn, yimam wanukwamn dukefm yakhato Bro Nkifrar myakitoh nnuhaknitm, yo dukefm kekwom yo nd mrokfom wanyhato yima yuhum bmtewumm. ⁴ Yimar wom nndoh yarmumat kfo bruttnewar, ror turn inji pthewarn tpi kekwor. To profetr Bro Nkifrarpno mrokfom yakhato kfo pthiwam, nd mrokfom sioshu yimam wanukwamn tpi kekwom. ⁵ Nanhu yima yuhur kanga wom nndohtet yarmumat kfo bruttnayuk yafothar wayak bugakahkmn wom nndoh yarmumatn wakfo bruttnako. To wom bro dukefr kanga Bro Nkifrarpno profetm mrokfom yakhato mrokfom kfo pthiwa kanjo mrokfom inji wakfo ptha htfasko. Yimar Bro Nkifrarhu Yafothatn mrokfo rifhur thu hmbrihato wom nndoh yarmumatn mrokfo ptha sinyaneft rot hifa, tmift nd mrokfot kfo kekut yimar tohhato kfo kekutkfot. Wom yimarm mrokfom kfo kekutruhatrm tuhant yindars mrokfom wanyhato tpi yakrahm. ⁶ Bar yinouroko, nd na kfoyuk mrokfom waduka hik marnyatwakomm. Na wom yiham nikompro niahato wom yarmumatn na kfo bruttnaya, to nd na kfoyuk kfo bruttna mrokfom finji naruhank? Na Bro Nkifrarpno yakyuk kafroh mrokfom kfoheruhank hifa. O Bro Nkifrarhu mrokfo yimbu yuharoh mrokfom kfo nuhasruhank hifa. O Bro

* 13:8: Wahti 12.10 kfo nuhasuk mrokfot.

Nkifrarpno yakyuk kfo hta bohta mrokfom kfoheruhanko hifa. O Bro Nkifrarhu yuhat kfo boririfhu nuhasruhanko hifa.

⁷ Tng duha shrkam, akfonom yirofinym dbint, nd yirofinym dbint yimam yakhato nhai tu yirofinymt yakyuk windohm windohkahm, to yimam finji wany miruham yirofinymt windohwot? ⁸ Yahrt yiyuk tanmbar nrwir nhaf inji. Yimar guryukr tu tanmbar nrwir kanjo gur hta marnya duha yirahrr, womm finji wany hikruhamn kfo miruham yahrt yiyuk nrwiyer? ⁹ Niko to inji. Bro Nkifrarhu Yafothatn niko kasinyahato wom nndoh yarmumatn kfo bruttnaneft, womm rhu wanyukm to finji wanyruhamm nd niko kfo pthayuk mrokfom? Mrokfom wany mmotarahmm. ¹⁰ Wom mrokfot tfit kfo ptharuha. Ndar bbinyosofthu kmi kmim nndoh nndoh yarmumat kfo pthewum. Rpa yarmumat kfetm rom turoh mrokfotn mrokfom nakfo pthahato nawanukm. ¹¹ Wom yimar nanpno niahato turhu yarmumatn kfo pthahato na nhai wanyrfoyanr. Kfo mirahr no wom nndoh nndoh kmi thofeno. ¹² Nikmoh yima yuhum kekwanko, kangko Bro Nkifrarhu Yafothathu kasinyewa nefm ayaknom. To nd dukefetekone, sioshu tpi heyuk yafotham yakkfot.

Nndoh nndoh yarmumathu kfo bruttna yuham

¹³ To nd nmbuhatpno kfo kanga, yimar wom nndoh yarmumaye kfo bruttnayuk mrokfot Bro Nkifrarhu Yafothat kasinyewutr kfo pthaneft, nd yimar tfit Bro Nkifrarpno akfo bruttnakahtr Bro Nkifrar tfit wom yafothat hirahrr, nd tur kfo bruttnayuk mrokforoh kfo kekutyuk yafothar. ¹⁴ Tfite akfo nhombraya. Na wom yarmumatn akfo bruttnaya, nd na kfoyuk mrokfom nhai na yimayanhu dukefr rhuyuk mrokfom kfokaha. Nhai. Mrokfom be tukanhu yafothatn mhfnahnewutm. ¹⁵ To ndnettn finji narhoya? Na kfo bruttnaneft, rot yafothat htayuk mrokfom kfo bruttnaruha, to tfit yiro yima yuhur rhuyuk mrokfom kfo bruttnaruha. Yo windohneft nhaf inji. Yafotha htayuk windohyuk windohefm mfnahrahm, yo yiro yima yuhur rhuyuk windohroh windohefm windohruha. ¹⁶ Be yafothat htayuk mrokforpam Bro Nkifrar kfo bruttna yindhorrahn to finji nd yiro lotu swirt rhuyuk yimam wany hik hanyhato wuroh yak dbkafyuk mrokfom miruham, “To be inji?” Wom nndoh yarmumatn mrokfom kfo bruttna hanyetmn yimam nhai wany hik hanyruhatmm. ¹⁷ Nd ni kfo bruttnahato kfo yindhoryuk mrokfom hifa kfo yindhorrahn, to mirahn ka wany yindhorhato tpi yakrahm. Nhai. ¹⁸ Na Bro Nkifrar kfo yindhorwanr, nanrpaya wom yarmumatn kfo bruttna hakuta, niko nhai na kanjo wom nndoh yarmumatn kfo bruttnakahko. ¹⁹ To na sioshu bro lotu rifiny swirl yinyeft, be tirfa mrokfo nmbuha marnyam, tu yimam wany hik marnyiawm, ndrpam kekwa. Kanga wom nndoh yarmumathu yonmari 10 tausen mrokfo nmbuham yakhato kfo pthiruhanm, yimam nhai wanyhato yima yuhum yakruhatm.

²⁰ Bar yinouroko mirahko yon mumenroh dukefm kanjo nikmoh dukefm arhumnom. Tu bro yimaroh dukefm kanjo rhukfot. Fasoh fasoh nefroh nanefm yon mumenm kanjo inji rhu mmokfot. ²¹ Bro Nkifrarhu boririfhu mrokfot kfiwut,

“Bror kfiwur, ‘Wom nndoh yarmumat kfet yimam kforhota

romn yihato wom nndoh yarmumatn nanhu yon kunys mrokfom kfo pthahirahmm. To nhai wany yakioruhatm.’”

Ais 28.11-12

²² Ndnettn yimam Bro Nkifrarhu Yafothat kasinyahato wom nndoh yarmumatn kfo bruttna thombat, ndt nhai Bro Nkifrar bi hiket yimaroh yak nuhasyuk hingrneft rhukaht. Nhai. Ndt Bro Nkifrar hik duha yimaroh yak nuhasyuk hingrneft. Tmift profet kanjo Bro Nkifrarpno mrokfom yakhato pthaneft, ndtne bi Bro Nkifrar hiket yimaroh yak nuhasyuk hingrneft, nhai Bro Nkifrar hik duha yimaroh yak nuhasyuk hingrneft rhukaht.

²³ Ndnettn niko sioshu tuhant yindars rpat rifiny bugahato wo nndoh nndoh yarmumamn mrokfom kfo bruttnarahkomm, nd Bro Nkifrar hik duha yima furam fknenihato wanyruhamn kfo mirahmko, “Mmohato mrokfom wom yarmumamn kfo bruttna mumiwum.” ²⁴ To niko nd profet mrokfom rifiny swirlt ptha hasetkomm nd Bro Nkifrar hik duha yima furam nd niko rifinyuk kunyr rim fknenihato nd

profet mrokfom wanumm, nd mrokfomn tafont htarahmm rroh nefm. ²⁵ Rroh fasoh fasoh dukefm, rhu kafrohyukm, Bro Nkifrar tafont htaruhatr mtabokme rmonhato nyingatikm yohniruhamn Bro Nkifrar naku kforahm. Bro Nkifrar nakuruhamn kfo mirahm, “Dajohmn, Bro Nkifrar tohnho mifworko.”

Lotu yiharoh hingrnefm hingrna hik marnyakfot

²⁶ Bar yimako, ndnettn niko lotu yiha rifinyhato lotuneft inji nakfot. Womr windoheter, rorhu windoht windohkfot. Womr kangr Bro Nkifrarhu mrokfo yimbu yuharoh mrokfom akfo nuhasanm, ror sinyahato kfo pthakfot. Womr Bro Nkifrar wom mrokfom yahutrr kangr nd mrokfom womm akfo nuhasanm, ror nhaf sinyahato rorhu mrokfom kfo pthakfot. O womr wom nndoh yarmumatn kangr akfo bruttnaya, ror sinyahato kfo bruttnakfot. Yo womr Bro Nkifrar nd kfo bruttna mrokforoh kfo kekutyuk yafothar yahutrr kangr apthaya, be tfit rorn sinyahato nd womr wom yarmumatn kfo bruttnayuk mrokfom rorn tfit kfo kekutkfot. Nd tamoh tamoh nefm niko nayukm, sioshu met yindarim htiruhamn yo wanyruhamn tpi yakrahm. Ndnettn lotu yiham rifinyhato loturahnom, inji inji hingrna hikkfot. ²⁷ Kangm wom yimam wom nndoh yarmumatn akfo bruttnanom, husf o husfirpa yimarpam kfo bruttnakfot. Nhai be rpattipet sinyahato mrokfom kfo bruttnakfot. Nhai. Rpa rpa sinyahato kfo bruttnakfot. Yo mrokfo kfo kekutyukm rom nhaf yimam nhombrahato tohhato mrokfom kfo kekutkfot. ²⁸ Nd yimam kfo bruttnayuk mrokforoh kfo kekutyuk yimam kak hambriwokome, to be nd wom yarmumat kfo bruttnayuk yimam tohhato kfo bruttna duha. Be nhowi rhuhato yima yuhurio Bro Nkifrarpno kfo bruttnakfot. ²⁹ Yo Bro Nkifrarpno mrokfo yakyuk yimam kfo pthaneft hus yimaf o husfirpa yimarpam mrokfom kfo pthakfot. Womm be rhuhato nd rom kfo pthayuk mrokfom wanyhato yak nhtakfot. ³⁰ Yo wom yimar Bro Nkifrarhu mrokfot kfo ptha hanitrn, tfit nd rifiny swirt rhuyukm Bro Nkifrar womr wom mrokfom yahutrr kangr sinya tohhato akfo pthaya, nd barkof yimar afo rorhu mrokfom kfo ptha tmbhonikfot. Bi kfo ptha tmbhonirm ee btn womr sinyahato rorhu mrokfom kfo pthakfot. ³¹ Lotu yiharoh hingrna yuham inji yi marnyarahm. Htirahko womr pthayuk mrokfomn wom dukefm yakrahm tift womrpno wom dukefm yakrahm tfit womrpno wom dukefm yakrahm, yima yimam kfo pthayuk mrokfom sioshu met yindarim wany hik bohikakruhamn dukefm yakruhamn toh bmtarahm. ³²⁻³⁴ Bro Nkifrar nhai mekahr mrokfom rpatn nathu mrkaknihato tfit womroh yima yuhum myak mmotarahmm. Nhai. Kangr mrokfo kfo pthaneft rpa rpa kfo pthahato rpa yima yuhur rhurahnom. Ndnettn yimam Bro Nkifrarpno mrokfom yakhato mrokfo kfo ptharahm, nhai be rpattiyahato mrokfom thu mrkaknikfot. Rpa rpa sinyahato mrokfom kfo pthakfot.

Bro Nkifrarhu yimaroh lotu rifiny swir bugam metm sinyahato mrokfom kfo ptha duha. Mosesr kfo boririfhumo mrokfot hikhato metm rom be yindarioh yinhitn rhukfot. ³⁵ Nd lotu swirtn wom mett wom yima yuhur nietrt kangt akfo ttiwona, nhai tuha rifiny swirtn sinyahato kfo ttiwonkfot. Inji naraht fasoh yimtnayuk neft naraht. Tamoh ttiwon nmbuham korhm kto kunyko yihato tuthu ramemrn kfo ttiwonkfot. ³⁶ Tone finji? Nd Bro Nkifrarhu mrokfote ka nikompno misuh gungonmot? Ka nikomrpakomn mrokfot fakmokomtn, womme ka nhai yakrmomt? ³⁷ Wom yimarhu dukeft duka kangr, Bro Nkifrarpno mrokfom yakhato met yindarimpno kfo ptha he htfasyuk yimaya, o duka kangr Bro Nkifrarhu Yafothat kasinyet yimaya, nd yimar adukatwart ndar na wandfiwa mrokfot, Bro Nungothetrhu boririfhu nuhasyuk mrokfoyet. ³⁸ Nd yimar ndar na wandfiwa kfo nuhas mrokfom nhai hikkahrm, kfiwanko nd yimar mirahko aduka amanyom ka nd Bro Nkifrarpno mrokfom yakhato womm kfo hanyeft ka tu Bro Nkifrar nd hingrneft hemorrh. Nhai. ³⁹ Ndnettn, bar yinouroko, Bro Nkifrarpno mrokfom yakhato met yindarimpno mrokforoh kfo ptha habrinyeft, ndt niko Bro Nkifrar kfo ttiwonhato nd hingrnaneft yakkfot. Yimam Bro Nkifrarhu Yafothat kasinyewattm wom nndoh yarmumatn kfo bruttnewum, niko mirahko akfo rafonom. ⁴⁰ Tmifm lotu yiharoh hingrnefroh yak hta bohta marnya nmbuhamn yak hta bohta marnyakfot.

Noheh yimam tfit sinyarahm

15

(Sapta 15)

Kraisr nohhato sinyamo yuhat

¹ Bar yinouroko, nd gutnius mrokfot na niko kfo nuhashehato niko bi nd wany yakio-hato yikitohwat, nd mrokfotn kanga tfit akfo dukayanko. ² Nd gutnius mrokfot, nikmoh yima yuhum yikitoh kih hanyhato hikrahkomt, htirahko Bro Nkifrar yakmiyakrahrko. Yikitoh duha yirahkomt, Bro Nkifrar be hik furarahkomr.

³ Nd bro mrokfot bingot Bro Nungothetrpno fakmoyant. Nd mrokfot inji kfomot: Nmoh fasoh fasoh nefm Kraisr suh nanyormorm. Bro Nkifrarhu rfa borngt inji kfo tndhmott. ⁴ Nohmotr, yakhato tahi muht htamomr. Husfirpa marm tahi muht rhuhato tfit sinyamor. Bro Nkifrarhu rfa borngt to inji kfo tndhmott. ⁵ Tfit sinyanimohat Pitarpno mfnahmotr Pitar htimorr, yo tfit nd 12-pela aposermpno mfnahmotr htimomr. ⁶ Yo tfit 500 Kristen met yindarimpno mfnahmotr rom htimomr. Nd htiyafoyuk yimam bokm tom yuhre tohwom, wommne bi nohmom. ⁷ Tfit kto Jemsrpno mfnahmotr Jemsr htimorr. Yo tfit kto aposer bugampno mfnahmotr rom htimomr.

⁸ Bi nd wom wommpno yak nuhashna yak nuhashnamorn ee kto tu wuroht nanopno mfnahmotr htimoyanr. Na memome, “Yiro yatit rhuhato fasoh bebtamotr mett bmbri hiyautr.” ⁹ Aposer hingrneft hingrnewa yimam na ndar yimena hingrnanuhiwanm. To mirahko ka rom aposer yufat yutewa kanjo na inji aposer yufat ka yutakfot. Nhai. Na namo fasoh beb nmbuhathu tndh mrokfot broyet. Nann Bro Nkifrarhu sioskfot faso faso fak bebbnamoyant. ¹⁰ Tu hifa Bro Nkifrar yuhuwafmora. Rorhu yuhuwaf nmbuhathu na bi ndarhtet hingrneft bi kakitohwant. Yo nd rorhu yuhuwaf nmbuhathu nhai be yi furarmot. Nhai mif. Na hingrnewa hingrnafat htitant wom aposerm nhai na hingrnewa kanjo inji mfro hingrnakahm. Nhai. Na tu mfro hingrniwant. Nanh fijo ndarhtet yonmari hingrneft finji hingrnarfoyant? Bro Nkifrar yuhuwafhato bbuka rifhur yahukotra hingrneft hingrnewanm. ¹¹ Na hingrnewa hingrnafat yo wom aposerm hingrnewa hingrnafat, nom nhai wom nndo mando hingrneft hingrnakahnom. Nhai. Romi na, nom hingrnewa hingrneft rpa Kraisru nohhato Bro Nkifrar kasinyamo yuhathu mrokfot kfo pthewunom. Nd mrokfom nom kfo pthamotnomm niko wany yakiomokomt.

Noheh yimam kto tfit sinyarahm

¹² Nom Kraisru nohhato Bro Nkifrar kasinyamo nmbuhath kfo ptha hakutwohat, to tamohmpno nikmoh womm wanyhato kfo yamukam, “Bi nohet yimam nhai tfit sinyaruhatm.” ¹³ Niko tu kfo mif thombat, ka Bro Nkifrar nhai kasinya mifrmorr Kraisr. Ka yuhre yopt tohwar. ¹⁴⁻¹⁵ Ndnett rorhu nohhato tfit sinya nmbuhath nom kfo ptha ht-faswat be kfo fura htfaswonomt. Nom be tu yimam frnheh htfas kangnomm Bro Nkifrar kasinyamorr Kraisr. Yo niko nom kfoyuk mrokfot wany yakiowako, mrokfot be wany yakio furewukomt. Bro Nkifrar be tu nhai kasinya mifkahrm noheh yimame, to ndhtet neft Kraisr nhai kasinyarmorr. ¹⁶ Tu kfo mifwanko. Bro Nkifrar be tu nhai mif noheh yimam kasinyakahrm, to be Bro Nkifrar nhai kasinyarmorr Kraisr. ¹⁷ Bro Nkifrar be tu nhai mif kasinyarmorr Kraisr, to nd niko mrokfom hikwa nmbuhath be hik furewukomm. Nikmoh fasoh fasoh nefm tom yuhre korhmko. ¹⁸ Yo yimam Kraisr hikhato bi noh hanymom nhai wom rhukahm. Be nohhato hel yimohat mmbrafinyinimom. ¹⁹ Nom Kraisr hikhato kukatohwonon nmoh rhu nmbuhathu yak marnyanef. To mirahnom nmoh rhu nmbuhath bi ndar bbinysofrpak ayak marnyatwatrt, to tfit Kraisrpno yiyuk bro dukeft be yi furaraht.

²⁰ To nhai. Nhai inji. Kraisr bi noh mifmor. Nohmotr bi Bro Nkifrar tfit kasinyamorr. Nd noh hanita yimam to rorn bi tor barkof yimar sinya gngonmor. Bi ror inji namotr to be kto noheh yimam tfit sinyarahm. ²¹ Wom yimar namo nmbuhatpno noheft niamot. Tfit wom yimar namo nmbuhatpno yimam tfit sinyarahm. ²² To inji korht. Adamr

hanyjbornamo yuhatn nd ror kasinyamo frikar rinohakmom. Tfit Kraisr wany yakiomo yuhatn to be tfit arihat Kraisrpno frtkafyuk yimam tfit sinya bugarahm. ²³ To nom buga, nmoh sinya yihar nierahr, nom sinya bugarahnom. Barkofr bi Kraisr sinyamor. Kto tfit ror nieruha yiharn nom rorhu buganom, sinya buga hanyrahnom.

²⁴ Nd yiharn Kraisr hingrna hnayuk hingrnefm mhingrna tmbhorahrm. Kminysof kminysofthu yurmo tongr, kminysof kminysofroh yarhm, kmikmiroh gafman yimam Kraisr yak bisisruhatrm rom hatoh hnayuk bbuka nanyjareft yohniraht. Nd rorhu kingdomfot yakruharts Bro Nkifrar, nmoh Yifemr, rorhu tirtn htaruhatrt, rorn yakitohrahrt. ²⁵ Afo tu Kraisrn king yufat yakhato kingr tohrahr. Kingr tohhato yahrt afo rorn yahot tpohhato rorhu mofsinhitn htarahrm yimam. ²⁶ Nd rorhu yahr kmim bi mofsinhitn hterm ee tfit yimam nohwa yuhat frtittafrahrt. ²⁷ Bro Nkifrarhu rfa borngtr kfo kangt, “Bro Nkifrarn nd tamoh tamohm yakmorm Kraisru yinhitn htamorm.” Bro Nkifrarpars nhai Kraisru yinhitn tfit rhukfot. ²⁸ Kto, nd tamoh tamohm bi Kraisru yinhitn bi forhni bugem, ee Bro Nkifrarhu Yonr tfit Bro Nkifrarhu yinhitn tfit rim rhurahr. Barkopam Bro Nkifrar afo nd tamoh tamohm Yinem Yonruh tirtn htamotrm rorn fakitohmorm. To tfit Yinem Yonr turhu Yifemrhu yinhitn rim rhu thombat, tfit nd yiha Bro Nkifrarn tfit yura mrhurahr.

²⁹ Yimam bi nohetm sinya duha yi shombat, to tamohmpno nd yimam tafi baftaisnihatoh nohwam tfit yima nfrimn nohehroh yufam tfit baftaisahukamm? ³⁰ To nome tamoh nmbuhatpno ndar nom hingrnewa hingrneftpno be nohyuk tkitt yorhwanom? Yimam bi nohetm sinya duha yi shombat, to tamohmpno be nd noheh yimaroh mrokfotn yihom pthak mpthak hasohato nhai yafhowonkahnomt? ³¹ Bar yinouroko, niko bi Kraisr Jisasr, nmoh Nungothetr, hikwatko bro yindhor nmbuhat korhta. Ndnetann na kfo mifwanko. Na yiha yiha be nohyuk tkitt korhakuta. ³² Yimam bi nohetm sinya duha yi shombat, to tamohmpno na Efesus tohhato nd namburet namburet fojmpno nnayurmoya? Ka be tuka ndar bbinyosftu toh nmbuhatpat dukahato nd fojmpno nnayurmoya?* Nhai. Nanhu dukeft duka memoya, “Nd fojmpno nna hanyhato mfnoha, nhai mrokfefm. Tfif sinyaruha.” To yimam bi nohetm sinya duha yi shombat, to be, tamoh tamoh nefm nafura bofura hasohato nohokne be miyawitanitnom.

³³ Mirahko wom yima fura bofuram arihti marsisakkahtnomm aniekahmn afrmmo bammomko. Niko wom mrokfot bi wanyeteko, nd mrokfot inji kfifut, “Fasoh nefm nayet yimampno nabnothato tamoh tamoh nefm rpat finji na finji narahnom, to be nmoh dborioh nefm yohniruhamn to be tfit rroh fasoh yuhatn mhikaknirahnom.”† ³⁴ Nikmoh fasoh mmo nmbuhat wayafhotwakomt. Wayafhokahkomt tfit dborioh yima dukefm wayaktwako. Yo nikmoh fasoh nefm wayafhotwakomm. Nikmohart, tom womm tafi Bro Nkifrarhu dukef yuhat hikkahm. Nhai. Hti mmo bomumiwum. Nd mrokfot na niko inji kfifohat wayimtnakomt.

Nfri thatipt tfif sinyaruhat nndo rhuraht

³⁵ Ka womm rirhuhato kfo ttiwon mirahm, “Yimam nohwam finji kanjo sinyaruham? Sinya thombat to rroh thatipm finji rhuruham?” ³⁶ Ndt tamohtet mmoroh ttiwon mumefet? Niko wom yewuri tpim bbinysoft nuhtiwan htitiwokomm. Yewuri tpim tou yoprahkomm afo yiro bbinysoft rhuhato tpim rinohrahm. Kto tfit htirahkomm tfif frdborharahm. ³⁷ Nd ni nuhtayuk wit tpim o tamohm frdborha thombat nhai tfit tu wanuhtewa tpi furam kanjo rhukahm. Nhai. Tfif nndo korhm. ³⁸ Tu Bro Nkifrar kfifur, nd yewuri tpim o tamohm frdborhahato sinyewamn twa rfetm, yuhtetm, nyisofetm, thetm korhm. Tu Bro Nkifrarn kangr nd yewuri tpim finji arhum, ee inji sinyahato inji korhm. ³⁹ Yimam, fojm, nungam, yiram, tamohm nhai rpahtet ruheft rhukahm. Nhai.

* 15:32: Womm duka memom ka tu foh mifm Porr kfomor. Rom gafmanr neft inji namour. Wom yimar wom fasoh neft mner, fojmpno yak htatamoatmr nd fojmpno nnamour, akfonom laionmpno nnamour. To nd mrokfot bok yimam duka kangm Porr nhai tu namburet foh mifm kformor. Nhai. Ndt ror waskfot kfomoa yimann kfomor.

† 15:33: Nd mrokfot Grikkorhof wom safemanr kfomoa mrokfoyet.

Yimarooh ruheft nndohet, fohroh ruheft rot nndohet, nungaroh ruheft rot nhaf nndohet, yiraroh ruheft rot nndohet. ⁴⁰ Yura mount hatohwa wondht rot nndoh korht rothu ruheft. Yo ndar bbinysoft hatohwa wondht rot nndo korht. ⁴¹ Marr hatohwa wondht nndohet. Yamt hatohwa wondht rot nhaf nndohet. Yo rpa rpa gunym hatohwa wondht nndoh nndoh wondht hatohwom.

⁴² Yimam nohhato sinya thombat inji rhuraht. Ndar nom hatohwa thatipt yopefiwohat mikfe bdgnitt. Tfit Bro Nkifrar kasinyaruha thatipt rot nhai tfit nohruhatt.

⁴³ Thatipt nohhato yopefiwat fasoh rhu bebwot. Nd thatipt tfit sinyaruhat, ginafm frdborhewa kanjo inji frdborharaht. Yo thatipt yopefiwat nhai bmtakaht. Yudbat mikfe bdgnitt. Nd thatipt tfit sinyaruhat tu tat thatipt sinyaruhatn nhai tfit mikfe bdgniruhatt.

⁴⁴ Ndar nom yopefiwa thatipt ndar bbinysoftu thatipet. Nd tfit sinyaruha thatipt tu hefenrhu thatiptn tfit sinyaraht.

Mirahko ka rpahtet thatipt hatohwon. Ndar bbinysoftu tohyuk thatipt, rot womet yo hefenr tohyuk thatipt, rot womet. ⁴⁵ Bro Nkifrarhu rfa borngt inji kfiwut, “Barkof hingrnamo yima Adamrn, Bro Nkifrar ssfoneft hemotrr tohmor.” Tfit kto wom nfri Adamr niamor.[‡] Nd nfri Adamr Kraiser. Ror niahato Bro Nkifrar tu toh nkifraniyuk yafothat hemotrr tfit Kraisrn nd toh nkifraniyuk yafothat hemornom nom. ⁴⁶ Nhai bi hefenr toh nkifraniyuk yafothatn bi niahato tohkaht. Nhai. Afo ndar bbinysoft tohyuk yima mif thet yima thatipt niewut. Rot niewatt ee btn yafothat niewut. ⁴⁷ Barkof Adamr Bro Nkifrar hingrnahato htamor, ndar tu bbinysoftu bbpaye yak yeny nhombramo Adamer. Tfit ndwom mongko niamo Adamr, ndr yura hefenkorhof Adamer. ⁴⁸ Ndar bbinysoft tohyuk yimam korth nhombrewum nd bbpaye yak nhombramo yimar kanjo. Yimam, hefenr tohyukm, korth nhombrewum tu hefen yuhat niayuk yimar kanjo. ⁴⁹ Arihart afo nd bbpaye yak nhombramo yimar kanjo inji afo korhnom. Kto tfit nd hefenrhu yimar kanjo rhurahnom.

⁵⁰ Bar yinouroko, na kfia mrokfom inji akfo wutha hikkahtanm wawany hik marny-atwakomm. Ndar nom hatohwa thatipm, nhai Bro Nkifrarhu kingdomfot fknihato tohkfot. To nhaf womt, ndarhtet mikfe bdgniyuk thatipm nhai toh nkifranikfot.

⁵¹⁻⁵² Wom kafroh mrokfot kfo ptharhotant wawanswakomt. Nom ndar yima buganom nhai noh bugaruhatnom. Ndar bbinysoftu toh bnkayuk kfo dukayuk fumrr toh hanyrahr, yudbat toh mhunfat kanjo frdborha rmon bugarahnom. Nd noh hanyuk yimam rom sinyahato frdborhahato nd hefenr toh nkifraniyuk thatipt yakrahm. Yo ndar yima nfrinom nhaf nd fumrrpno frdborha bugarahnom. ⁵³ Ndar thatipt nohhato mikfe bdgnitat, ndt thu hrur tuhraht. Thu hrur tuhhato tfit nfri thatipt yakrahnom. Nd nfri thatipt nhai tfit nohruhatt. Be inji toh nkifraniyuk thatipt tfit yakrahnom. ⁵⁴ Nd nmbuhat bi inji forhnit, ndar nohhato mikfe bdgnita thatipt bi frdborhanihato bi tfit toh hatohyuk thatipt bi feknom, be kfo mirahnom nd nkifra mrokfot bi nkiframpno rhumot bi asot fipetet. Rom nd kfo memo, “Bro Nkifrar noheft bi fak nohrt.” ⁵⁵ “Ni nd noh yafothaye, fitot ni nd hatonita noheftu bbuieft? Ni nd noh yafothaye, to fitot yima wasyuk kfrat ni nd hatonitat?”

⁵⁶ Nd noheft hatonita kfrat to fasoh nefet. Mosesrhu boririfhutn kfiohat, mirahn inji anaya, ee yimarooh fasoh yima yuhum mfro risinyewatm fasoh nefmn misuhm. ⁵⁷ Tu hifa Bro Nkifrar fitha arhu duha yir nom finji narfonom? Hifa rorn kfomor nmoh Nungothet Jisas Kraisr nohhato nd fasoh nefm yak thuhato nfri yafothar tfit thu hmbremornom.

⁵⁸ Ndnettn bar yinouroko, niko toh bmtakfot. Mirahko tamoh tamoh nefem awohsisnom. Wadukako, nd niko Brorhu hingrneft hingrnewat nhai yi furaruhatt. Ndnettn yiha yiha Brorhu hingrneft hingrnakfot.

Porr turhu hingrnayuk mrokfo yuharoh mrokfo yuham kfo pthamor

[‡] 15:45: Nd wom nfri Adamr kto niamor, ndr Kraiser. Mrokfot htikfot 15.21-22 yo Rom 5.14-19.

16

(Sapta 16)

Jerusalemt tohyuk Kristenroh maruharoh htafhe yuhat Porr kfo pthamor

¹ Kfo ttiwon mrokfot kfo ttiwonmokma Jerusalemt tohyuk Kristenroh maruha hta nhafohhato htaf hanyeft. Ndthu yuhatn kanga akfo nuhasanko. Maruham kangko hta nhafohhato Jerusalem thofm ahtaf hanyomm, na Galesia thofm kfo nuhasmo yuhatn hikkfot. ² Niko yiha yiha yakyuk maruham, Sande yihamn niko rpa rpako tuko rhuhato maruham yak nhtahato womfam nndo yak htakfot. Wom wikr yakyukm Sande yiha rhuhato yak nhtakfot. Yo tfit wom wikr yakyukm nhaf be inji. Inji na hanyen maruham brorahm. Kto na nia kfoneft, bi yak hta nhafotayetmn be yakhato hirahkma, nhai tfit yak hambroruhatko. ³ Na nia mfnah thombat, tukomn wom yimam wayakkahkomn romn nd maruhami yo na wandfayuk kfo nuhas gontwampno rpat Jerusalemko hanyrahmm. ⁴ Be tukann, kanga tukanpno rpat ainyom, be tukanpno rpat riyahnom.

Korin thofroh yi hti yuhat Porr kfomor

⁵ Na nia thombat afo Masedonia profins tohyuk yimampno inji hti hnerhoyanmn ee kto nikompno mfnahruha. ⁶ Nikompno ka dfik yiham mtohnho nahneruhanko. Afo htiyaf hanyruha ka nd frfon wormr ka nikompno tohruha afo. Nd frfon wormr bi ftohnir ee btn sinyaniruha. Na tfit wom kmit yi shombat wahti dukaf hanyswakomt nanhu yi nmbuhat. ⁷ Na ndar niat nia thombat, na nhai wofnkaha na be yifrar mtohni hanyneft. Bror kangr wom yiham afo ndha watohni ee wom yiham tohniruha. ⁸ Pentikos yihar afo ar tuha Efesusn afo tohruha.* ⁹ Asha htita Bro Nkifrarhu mrokfothu pthaneft bi yihoteta. Bro Nkifrar bi fak wuthamotrt na nhai nd hingrneft mhtanikfot. Tot nanhu tu bro hingrneft. Nd dukeftpno afo asha tohruha. To htita na hingrnewa hingrneft yimam wahtewumt.

¹⁰ Timotir nikmoha mfnahwor, wayaktwakomr. Mirahko finji anakahtnomr be yakrme yima yuhurpno kukroht arhur. Turhu kmit yorhwa kanjo inji arhutwar. Ror Brorhu hingrneft hingrnewur na tuka hingrnewa kanjo. ¹¹ Mirahko ka yima furarn nyngarpaye ayukatohnomr. Nhai. Nd yimar na hingrnewa hingrneft kanjo hingrnewur. Rorhu nia yihar watoh kafho marnyakahtkomr yihotar nia marnyarahrr. Rori rorpno iyuk yimam rpat nia marnyarahmr yihotar.

¹² Apolosrhu ndkorhof nia nmbuhat kfo tkrur titamoyanr ndko wom yimampno rpat yinyeft. To nhai, nd yiha yima yuhur nhai sinyarmorr yinyeft. Kto turn wom yiham yibonwore, ee btn nierahr.

Wom mrokfom

¹³ Yo niko! Niko tuko duka marnyaf hanykfot. Bro Nkifrarhu dukefrparpno rhuhato toh bmtakfot. Toh bmtahato tamoh tamohm duka yakrmi duha. ¹⁴ Tamoh tamoh hingrneft hingrnarahnomm, hifa yima yuhurpno hingrneft hingrnakfot.

¹⁵ Bar yinouroko, niko Stefanas riphari rorhu kunys tohyuk yimaroh mrokfot wanymokomt. Romn nd Akaia profins Bro Nkifrarhu mrokfom rihik gungonakmom. Romn bi tohhato Bro Nkifrarhu met yindarim mfnah hanyukm romn wafakitohakmom. Tfit kfiwanko, ¹⁶ ndhtet yimampno niko yi tohneft, niko be yihato romi rompno hingrnewa yimampno, rroh yinhit niko tohakkfot.

¹⁷ Nanhu yima yuhur niko duka darwon hasomoar, hifa Stefanas, Fortunatus, Akaikus-romn niamotm to be romn na htihato yima yuhur miyorhwora. ¹⁸ Romn niahato nanhu yima yuhur mirhumora yo nikmoh yima yuhum mirhumomko. Ndhtet yimaroh mrokfom wany yikitohkfot.

¹⁹ Asia profins yorhwa kmi kmiroh sioshu met yindars niko dukahato kfo yindhor mrokfot htefiwumt. Akwila Prisila sawohfi rofhu kunys lotunefm rhu rifiny hakuta

* 16:8: Pentikos yiharhu kfo nuhas mrokfot htikfot Aposer 2.1.

Kristenm, rom buga Jisasrhu yufatpno kfo yindhor mrokfot htefiwumt. ²⁰ Nom asha Kraisr hikwa Kristen buganom, nom buga kfo yindhor mrokfot htefiwunomt.

Niko tuko Kristenko tir nhekfot. ²¹ Na Pora, na tukanhu tire kfo yindhor mrokfom wandfiwanm.[†]

²² Yimar nhai Bro Nungothetru yima yuhur rhukahr, “O, Bro Nkifraye, nd yimar wayak tutfatwanr. Na kfiwa nmoh Nungothet ayawihnar.”

²³ Bro Nungothet Jisasrhu yuhuwafeft arhuwatko. ²⁴ Jisas Kraisrhu yuhatn nanhu yima yuhur nikomn korhr.

[†] 16:21: Porru gontwam nhai tu Porrn wandfa hnarmorm. Rorru mrokfom wommn wandfamoumm. Womm wandfamoatmm ror be kfo yindhor mrokfomi yufa sainimnefrpatn Porr yikt yakhato wandfamour.

Korin thofroh husyuk gontwat

Porr dwandfakhato htafmot

Barkof kfo nuhas mrokfom

Taun Korinthu sios tohyuk wom yimamn wom mrokfo bebm Porr hemotmr, ndtpno Porrhu yima yuhur nhai marnyarmorr. Memor, "Gontwaye nd krho yima yuhur Korint tohyuk sioshu yimam kfo dbruf nuhasrhotanm yima yuhur mirhuruhan tfit hifa yima yuhur hmbriruhanm." Ndnetrn ndar gontwat wandfamort.

Barkof kfaknimo barkof mrokfom, Porr kfo srh nuhasmorm ror bingot sinyahato Korin thofm kfo nnhu mrokfom hemo yuhat. Nhai be rorhu fijo kfo nnhu mrokfom hermorm. Nhai. Tumn fasoh mrokfom hemotmr ndnetrn kfo nnhumorm. Kfo nnhumotrm rom wanyakhato rroh fasoh nefm fafho thumomm. Kto Porr wanyakhato yima yuhur tfit mirhumorr.

To nd yihart Judia profinsko tohma Kristenm nhai hifa toh nmbuhat tohrmom. Faso yatinoh bebobeb yo tamoh hmbresham kaknaf inji namoatm Porr yima yimampno fak nhafohakhemorm. Ndar gontwathu sapta 8-9 Porr to nd maruha yak nhafohneftn Korinmpno mrokfot htamort.

Ndar gontwat kfonimo wuroh mrokfom, Porr kfomor giaman aposerm Korint tohhato Porrhu yufat wahtahato rorhu aposer hingrneftm kfo bebmoa yuhum.

Bro Nkifrar aposerm hemo hingrneftu mrokfot Porr kfo pthamor

(*Sapta 1-7*)

¹ Na Pora, na Krais Jisasrhu aposera. Bro Nkifrarhu duka fijo aposer hingrneft fak htamora. Nani nanhu yinouwem Timotirpno ndar gontwat no wandfewunonko niko taun Korinthu Kristenko, yo Akaia profinshu Kristen bugako. ² Nmoh Yifem Bro Nkifrankoni nmoh Bro Nungothet Jisas Kraisr ayak marnya-kahtfkoyima yuhum amirhutwamko.

Porr hatohmo krhopam Bro Nkifra yak thuhemotrr Porr ndt htihato Bro Nkifrar kfo yindhor-morr

³ Bro Nkifrarhu yufat akfo yindhor-nomt. Turn nmoh Bro Nungothet Jisas Kraisrhu Yifemer. Ndr yima yuhuwafet Bro Nkifrayer. Tamoh tamoh krho yima yuhumpno rhu hasoneft nd Bro Nkifrarn hifa yima yuhum hnewatrm yima yuhum thu jubtwanitm.

⁴ Tamoh tamoh krhopam nom yakneft rorn nmoh yima yuhum kak marnyewurm. Ndnettn tfit womm tamoh krhopam-pno rhuneft, nomn yihato nd yimam-pno rhuhato kfo yima boyima marnya-hato nd rom haruh hasoyuk krho yima yuhum thu jubtwarahmm.

⁵ Nom Kraisr krhopam yakmo kanjo nom inji kanjo krhopam kekwonom. To inji kanjo Kraisrhu hifa dborioh yima yuhur nmoh yima yuhum htewurnom. ⁶ Nom krhopam yekwohat Kraisrn tfit hifa yima yuhur hnewarrn yima yuhum yak marnyewatrm yima yuhum miyorhwomnom. Ndnettn niko krhopam yakneft, nom nd yuhat hikhato nikompno yi rhuhato nikmoh yima yuhum yak marnya bomarnyahato yima yuhum mirhurahmko. Yima yuhum mirhuruhatmko Bro Nkifrar tfit yak miyakrahrko. Nom yihato nikmoh yima yuhum yak marnya bomarnyanef, tamoh krhopam tfit nianeft, nhai tfit wom finji wohsis-ruhatko. Nom krhopam titahnamo kanjo be inji tita hanyrahkom. ⁷ Nmoh dukefti hti kangnom nhai suruhatko. Htitnom nom yak htfaswa krhopam kanjo niko inji kekwoko. Nom nd krhopam yekwohat, to tfit Bro Nkifrar finji finji niahato nmoh yima yuhum kak marnya bomarnyewurm, nd yuhat Bro Nkifrar hikhato niko inji narahrko.

⁸ Bar yinouroko, nom Esia profins yakmo krhopam tndh nuhasrhotanko wawanyko. Nom Esia profins tohmohat mirahko be tu kuken krhopam tita-monom. Be tu bro

krhopam titamonom. Nhai marimonom rhurahnom. Bi memonom ndar krhopampno nohra-nom. ⁹ Bi memonom bi nohyuk tkitt bi tohwonom. Ndt to nhai be sfno inji rhurmot. Ndt nmoh yak dukayuk neftn rhumotnom. Ndhtet krhopam yakneft nhai tfit tunmoh bbukeft yukatohkfot. Nhai. Bro Nkifrarpar nom tfit yukatohkfot. Rorrpar bi nohet yimam tfit kasinyewurm. ¹⁰ Nom bi nohyuk tkitt tohyuknom Bro Nkifrar toh rafomotrnom nom rhumonom. Ndt inji htihato nmoh dukefti htiyeft duka kangnom kto to inji toh rafo hanyruhatrnom nhai nohruhatnom. ¹¹ To niko wakfo bruttnakahtkmnom Bro Nkifrar tamoh nefm toh rafo hanyrahrnom. Bok yimaroh kfo bruttna tngm wanyruharn toh raforahrnom. Rirhu arhuyuk yimam ndt htiruhann, Bro Nkifrarko kfo yindhorrahmr.

Porr Korinko yi juha yimo nmbuhathu kfo duka mrokfom

¹² Nanhu toh nmbuhat yo nanhu nefm nikompno tohhato niwam ridukak thombat, nanhu yima yuhur nhai finji duka yimtnakahr o duka krhokahr. Nhai. Bro Nkifrar yak hta bohtamotra nanhu toh nmbuhat be yi marnya mifmot. Nhai wom beb nmbuhat nikompno htarmoyant. Bro Nkifrar yuhuwahato hemora ndhtet ruheftu rhuyuk rhu dukeft. Nhai ndar bbinysothu yimaroh rhu dukeft hikrmoya. Nd Bro Nkifrar heyuk nefmpno nikompno yo ndar bbinysothu yimampno toh hnamoya. Ndnetann nanhu yima yuhur nhai finji duka yimtnakahr o duka krhokahr. Nhai. Nanhu yima yuhur be yindhorwor. ¹³⁻¹⁴ Na nikompno gontwam wandfa hnamohat, na nhai wom mrokfom mkfo rhti tany o yura be yafuna hnarmoyanm. Nhai. Tamoh mrokfom wandfafmoahat, wandfa nuhas marnyamoanko. Rot wom yiham wandfamoa mrokfomn mfak mmota-moukomm. To nanhu dukeft memoa nanhu mrokfom htiruhakomm nanhu dukefr yakrahkomr. Htiruhakomrn, kto Jisasr, nmoh Bro Nungothetr, bro kotkfot yakitoh thoft tfit tunom wusha nahtihato nnakfo yindhorrahnom. Niko na htiruhakomn tfit kfo yindhor-rahkma. Na tfit niko htirhoyann kfo yindhor mrokfot kforuhant.

¹⁵⁻¹⁶ Ka bi fakmokomm na kfoyuk mrokfom. Nd dukeftpno duka hta memoya Korin yuhat niko mhtinihato kto tfit Masedonia profinsko yiruha. Masedonia profins mtoh tanyhato tfit wompam Korin yuhat nierhota tfit wom htit htiaforuhakomm yindhorrahko. Tfit nanhu Judia profinshu yi yuhat nikomn hingrnafhirahkma. ¹⁷ To nhai, na nhai Korinko niarmoya. Tone finji dukewako? Ka duka kangko ka be nomn frnhehmor? Kangko ka na nda bbinysoft tohwa yimam kanjo hus yima yuhetann mrokfom kfonihato tfit kto kfo kekutwanm? Nhai mif. ¹⁸ Bro Nkifrar nhai mikfota m kfotakahhr. Tur bi kfoyuk tngrpat hikwor. Na to inji kanjo bi barkof kfoyuk tngrpat hikwa. Bi kfo yakio tngt kfiant, to be nd bi kfo yakio tngt hikwa. ¹⁹ Na, Sailas, Timoti, nom husfirpa yimat nikompno tohhato mrokfom hemoam, Bro Nkifrarhu yon Jisas Kraisrhu mrokfom hemounomko. Kraisr nhai mikfota m kfotarmor. Bro Nkifrar kfoyuk mrokfom hikmorn Bro Nkifrar kfo htayuk mrokfom Jisasrpno mfrfnahnamom. ²⁰ Bok mrokfom nmoh yufatpno Bro Nkifrar yak dbkaf htatamom, Kraisrpno mfrfnahna bugamom. Ndmn nom mhtiyakhato duka mekfot Bro Nkifrar nhai mikfota m kfotakahhr. Tamoh mrokfom ror bi kfo htayukm hingrna hikworm. Ndnett Bro Nkifrar nom kfo yuta hagrha yindhorkfot. ²¹ Tu Bro Nkifrarn nikomi nmoh toh nmbuhat Kraisrpno tohyukt thu bmtewurt. Yo yakhato bi kfo hbhamornom. ²² Barkof nia kfo hbhamohat inji namor, turhu Yafothat hnamortn nmoh toh rawofmn htamort. Rotn hta tehakmotm tamoh tamohroh niayuk yihotat. Ndnett nmoh yufam-pno yorhwa tamoh tamohm Bro Nkifrar be yafho hasorahrm.

Porr tfit Korinko yi juha yimo nmbuhathu kfo duka mrokfot

²³ Bro Nkifrar nanhu yima yuhur hti mifworr na nhai kfo nhehrmoyanko Korinkorhof nianeft. Nhai. Duka kanga bmbri yihato wom mrokfom kforuhanko, tfit niko wanyruhakomm tfit wom krhopam yakrahko. ²⁴ Na nhai tatkrur mikahanko, “Nikome be inji korhko. Inji inji wanakon o mrokfom inji inji wahikkomm.” Nhai. To nikmoh Bro Nkifrarhu tohhato hik yuham faso yitam btn inji tatkrurfo-yanko? Nhai. Niko hifa toh

bmtahato bi Bro Nkifrarhu mrokfot wanyhato hikwokomt. Nom, nom be kangnom Bro Nkifrarhu hik yindhorefrpat abronitko. Nom ndrpattukukatohwonom.

2

¹ Na nhai Korinko niarmoya. Nanhdukeft duka memoya, tfit ndko yihato wom mrokfom kforuhanm, rom tfit wanyruham yima yuhum krhorahmm. Ndnetann nhai niarmoya. ² Na niahato nikmoh nyngatikhato wom mrokfom kfohato niko yima yuhum krhorahmko, to tfit na frohmpno rhuhato naptha yindhorruhanom. ³ Nd dukeftpno bi wom gontwat htafmoyant. Memoya afo bi gontwaye kforhotanm bi tumn rhuhato rom nayuk nefm bi yak marnya hasorahmm. Kto na yinyeft, yindhoreftpno rhu hasoruhatm na be mhti yindhorak-niruhanm. ⁴ Na nikompno wom gontwat bi wandfaf hanymohat, nd yiha nanhu dukefr nhai rhu marnyarmor. Yima yuhur rigumuhata bugahato nur hanyhato wandfamoyant. Na nd gontwat wandfafmohat, nhai marimoya krho mrokfom hirhotanko yima yuhum krhorahmko. Nhai. Nanhu yima yuhur nikompno rhumor. Nd dukeftn nd gontwat wandfahato memoya gontwatn nd nanhu yima yuhur htirahkomr.

Korinm nd yimar nayuk fasoh neft yafhohato tfit dukak hanyhato ptha duha

⁵ Gontwatn bi kfomoyanko. Nikmoh wom yimar wom fasoh neft ner, nd yimar tfit yakhato kfo yima boyima marnyahato mrokfom hekfot. Ndar gontwat nhai tfit nd mrokfotn tfit kfo ptha hatohrhota. Nd yimar nayuk neft nhai nanrpaya krhormoyant. Niko rpat krhomokomt. ⁶ Be bi fak gnngtat-mokomr, be tmifko mirahko tfit wom nefm ananomr. ⁷ Be tfit wayakkahkomr ror nayuk nefm wayafhohikahkomr hifa hifa mrokfom hihato rorhu yima yuhur tfit thu jubtwarahrr. Be mfro mfro krhopam hi hatohrahkomr be rorhu yima yuhur krhohato Jisasrhu hik dukefr yafhoni bugarahrr. ⁸ Tfit yakmiyakhato, ndt htiruharn duka mirahr nd yimam dukewuma. ⁹ Na bi wandfafmo gontwat, memoya, “Afo htiruhanm, nd na gontwat kfoyuk mrokfom hikrahmm o nhai?” ¹⁰ Wom yimar nayuk neft mong trohhirahkomr, na to inji mong trohahukanr. Yimam nanpno mrokfetm rhuneft, Kraisrhu nyngahato nd yimam nayuk nefm yafhohato mong trohwamm. Duka kanga na inji amakahta niko htiruhakomn nd yuhat hikrahko. ¹¹ Nd yuhat hikru-hakomn Satanr nhai frnhehakruhatrko. Nom bi hti hiketenom Satanrhu neft. Ror yima frnhehaketer.

Porr memour Troasn Taitusrpno mnahtihato ror yimo nmbuhathu mrokfom wanyruha

¹² Na Troas gutniuskfothu kfo pthaneft yimohat, htimoya Bro Nungothetrn ndko yi hingrnayuk yihotat fak nukakmort. ¹³ To na Troas yimohat, nhai nanhu yinouwem Taitusr htirmoyanr. Ndtpno yima yuhur nhai marnyarmora. Be tfit Troas htanyhato tfit Masedonia profinsko fak hambro hanymoyanr.

Kraisrhu bbukapampno aposerm yahrt kahot noh fnahwomt

¹⁴ O Tunga Nkifraye, yiha yiham ninn yekwannom ninhu tire tkityatkitm kak hatoh hanitwonnom. Yak hatoh hanitatnnom, kfo nuhas fnahwonom, nom Kraisr nrfa hbbakhato tfit rorhu yufatpno rim htamo yuhat. Nd yuhatn kmi kmiroh met yindarim Bro Nkifrar mhti dukekwomr. Rorhu mrokfot kangme paura gbeft o wel gbeft kanjo frfnahwatr kmi kmi gbeft kekwomr. ¹⁵ Ndt tu kfo mif kfoyet. Nom to nd dborior mthet paurakfoyet. Kraisr yakhato Bro Nkifrar wutarioh mthamotr, nd paurakfothu tarioh mtha gbeft kekworm hefenko yita yihotat tohyuk yimami helko yita yihotat tohyuk yimam. ¹⁶ Hel yuhar tohyuk yimam, nd gbeft toh nkifraniyuk gbeft kanjo mthatitmr. To hefenko yita yihotat tohyuk yimam, nd gbeft toh nkifraniyuk gbeft kanjo mthatitmr. To tum frohmn ndhtet hingrneft hingrnarfomt? ¹⁷ Nom, nom nhai wom yimam kanjo nd Bro Nkifrar hingrneft maruha yak hingrneft kanjo hingrnakahnomt. Nhai. Hifa yima yuhumpno Bro Nkifrarhu mrokfot kfo ptha htfaswonomt. Tu Bro Nkifrar kfo tkrurafetnomn nmoh toh nmbuhat Kraisrpno tohwonom. Ndnett Bro Nkifrar kukatohwornom. Mrokfom nhai be kfo brur fnahhato kfo furakahnomm.

3

Yimaroh yakyuk nfri yihotoharhu yak dbkaf mrokfot aposerm kfo nuhasmom

¹ Gontwathu mrokfom nom inji htewohate, ka kangko ka be tunmoh yufaroh kfo hagrha yindhorneftn mrokfom inji htewunomm? O ka wom yimam kanjo nmoh dborioh hingrnethu kfo nuhasyuk gontwat kangnom, yimam awandfahikahtmnom nd gontwatpno yimam yak nuhasneft hti mirahm, “Ndm tu Bro Nkifrarhu tu dborioh hingrna yimayem?” O ka kangnom nikomn ndhtet gontwat wawandfahitwakmnom? Nhai mif. ² Nmoh hingrnethu kfo nuhas gontwat, to bi nikomn toko nmoh hingrnethu kfo nuhasyuk gontwako. Niko nmoh marbimn korko. Niko Bro Nkifrar hikhato yauwa dborioh yau nmbuham nom kmi kmi kfo nuhas hanitnomm. ³ Nom Bro Nkifrarhu hingrneth hingrnamat to toko niko Bro Nkifrar hikwokomr. Nd yuhatn to bi nikomn bi toko nmoh hingrnethu kfo nuhasyuk gontwat Kraisr wandfamot. Yimam niko htihato kfo mirahm, “Nd yimam Porrhu mrokfom wany yakiohato Kraisr hikwom.” Kraisr nd gontwat wandfamohat, nhai ndar tu yimam yakitohwa pene wandfarmort. Nhai. Toh nkifraniruha Nkifrarhu Yafothaye nd kfo nuhas gontwat wandfamort. Yo nd gontwat wandfamohat, nhai yura nmbi tahimn wandfarmorm. Nhai. Yimaroh yiro yima yuhunn riwandfarmorm.

⁴ Nom bi Kraisrpno rim toh-niyetnomn Bro Nkifrarn nd aposer hingrnafat hta-mornom. Nmoh bro dukeft duka kangnom tu Bro Nkifrarn bi hingrna tafsefr hta-mornom. ⁵ Nomrpanomn ndhtet hingrna tafsefr fita yakrfonomr? Nhai. Tu Bro Nkifrarn nd hingrna tafsefr hemotrnom nd hingrnafm hingrna hik marnye-wunomm. ⁶ Bro Nkifrarn hingrna duka tafsefr hemotrnom, ee btn Bro Nkifrar yak dbkafmo nfri yihotoharhu mrokfot kfo pthamonomt. Nd Bro Nkifrar duka htamo nfri yihotoharhu yak dbkaf mrokfot nhai bingot Mosesr yakmo boririfhut kanjo inji yikaht. Nhai. Ndt tu Bro Nkifrarhu Yafothatn mhfnahnewutt. Mosesrhu boririfhut-pno yimam nohwom, tfit Bro Nkifrarhu Yafothatn toh nkifraniyuk yafothat thu hmbritrn.

⁷ Wadukakomt nkifra boririfhut hingrnamo yuhat. Boririfhut niamot, noheft rpat boririfhutpno fak tkafak-namot. Nd boririfhu mrokfom nmbi tahimn wandfakhato hemohat, Bro Nkifrarhu bro funa nanyjareftpno niamom. Mosesr nd boririfhu tahim wuyaknamohat, rorhu nyngatikt memom nndo marr tewur. Isrerm htimohat nyngam mmrtamomm. Kto nd nyngatikt hatohmo funeft tfit wuyak hanymotn be minoh hmbrenimot. ⁸ Nd nkifra boririfhut niamohat, afo Bro Nkifrarhu funa nanyjareftpno niamot. Tfit arihat nd funa nanyjareft tfit bi tu Bro Nkifrarhu Yafothatpno bi rim suhnimotn Bro Nkifrarhu Yafothatpno bi tfit hingrnnewut. ⁹ Rot nd noheft hnamo boririfhut Bro Nkifrarhu funa nanyjareftpno niamot. To nhai. To nd yima yuhuroh yak wuthayuk nfri yihotohar to htirfonomr Bro Nkifrarhu bbuka nanyjareft mfro hatohrfort. ¹⁰ Nd boririfhut hatoh hasomo bro funa nanyjarefr nhai yima yuhum yak wutha hnarmorm. Nhai. Ndnettnd boririfhuthu funa nanyjarefr bi be. ¹¹ Nd boririfhut bi yohnenirott tfit bi Bro Nkifrar yak dbkafmo nfri yihotar faktort tkitt. Nd yihotar be inji rhu nkifranirahr. Ndnettnd Bro Nkifrarhu bro bbukeft nd yihotarn mfro hatohwotr.

¹² Nd nfri yihotar Bro Nkifrar yak dbkafmor htitnom tu yafotheter. Ndnettnd nhai yakrmikahnom nd nfri yihotarhu mrokforoh kfo pthaneft. ¹³ Nom nhai Mosesr namo kanjo inji nakahnom. Mosesr inji namor, nd ror hatohmo nukeft htiyaf hanymort bi rim noh hmbreni hanitte, rmouthat yakmorn nyngatikt thu kasimort. Duka memor, Isrerm nhai htiruhutm nyngatikthu nukeft minoh hmbreni thombat. ¹⁴ To nd yihart nhai Mosesrhu nyngatikrpat kasimort. Nhai. Isreroh duka yima yuhum nhai dukefm yakrmoam. Tfit ariham tohwa Isrerm nd bingot Bro Nkifrar nkifram-pno yak dbkafmo mrokfothu mrokfom ritimrahmm, nhai yima yuhum yakruhatm. Duka tungunefroh nia yuham yuhre rmouthamn thu rafiwumm. Kraisrpno rim tohnihato rorpno frtkafrahm, ee btn Bro Nkifrar htihato nd duka yima yuhum hta rafija rmoutham yak thuruhatrm dukefm yakrahm. ¹⁵ To ndar yiham rom nd Mosesr yakmo boririfhum ritim nuhasneft nhai dukefm yakkahmt nd boririfhuthu yimbu yuhat. Nd rmouthamn yuhre hta

rafiwumm dukefm. ¹⁶ Yima yuhum yak kekuthato tfit Brorpno rim tohnirahm, Bro Nkifrar yak thuhirahrm dukefm hta rafiwa rmontham. ¹⁷ Na kfo yamu-kahat, "Bror," ndr Brorhu Yafothatn kfiwa. Brorhu Yafothat yukatohrahtr wom yimar, nd yimar nhai wom tamohm wom wuyak tkaftaruhatmr. Bi be. ¹⁸ Yimanom, bi Bro Nkifrar hiketnom, nhai tfit Mosesr namo kanjo nmoh fnhuyet nyngatikm tfit kafrokhahnomm. Nhai. Brorhu Yafothatn nd nyngatikm hta rafomo rmonthar yak thuhato tfit nfri nfri yima yuhum htewutnom. Nd nfri yima yuhum turhum kanjo korhm. Ndnettn Brorhu nukeft mfro mfro tanuka hasiwatt wom riruh aruhyukm hti hasiwumt.

4

Nom aposernom tu dborioh gutniuskfothu yakinohyuk yima furayenom, nom bupam nyungombre hmbrita roh tambon kanjohot roh furayenom

¹ Bro Nkifrar hti yuhuwaftato hemornom nd gutnius ptha nuhasyuk hingrneft. Ndnetnomn nhai hingrna noh hingrna nohkahnompnd hingrnethu hingrnaneft. ² Bi mong trohmonomm nd fasoh yimtnayet yimtnayet nefm yimam kafrohhato niwam. Bro Nkifrar nom htitwornom, nom nhai yihato yimam kfo ngeh bonhehhato Bro Nkifrarhu mrokfom tfit kfo kekut bokekutkahnom. Nhai. Nom kfo hik marnya bomarnyahato kangnom yimam nom hingrniwa hingrneft htihato yak nhtaruhamtn duka mirahm, asom armn tu hingrneft hingrnewumt. ³ Yimam ndar nom kfo pthiwa mrokfot wanyhato nhai yakkahmt mrokfo yimbu yuhat, ndm bi hel yuhat bi tohetmn nhai mrokfo yimbu yuhat yakkahmt. ⁴ Ndar bbinysoft tndhrn yima yuhum hta kurhiwatrm, nhai Bro Nkifrarhu mrokfot hikkahmt. Nd tndhrn dborioh gutniuskfothu nukeft toh rafiatrt nhai nukeft tanukakahtm rroh yima yuhum. Ndnetmn nhai Kraisr hti mikahm, arr tu Bro Nkifrar yak nhombranamo yimayer.

⁵ Nom ndar mrokfot kfo ptha htfaswat nhai nmoh mrokfotn nom tunom dukahato mrokfom kfo pthakah-nom. Nhai. Nom kfo kangnom, "Jisas Kraisr nmoh Broyer. Nom rorhu mrokfom hikwanomn kmi kmi kfo ptha htfaswanomn, nom kmi kmikmoh hingrna yimayenom." ⁶ Bingot Bro Nkifrar kfo memor, "Yifung tayuk nukeft amfnahtwat." To be ror kfomo yuhatn nukeft tanuka wuthamott yifungt. Nom gutnius mrokfot tafi wany juha, to inji tunmoh fasoh nefroh yifungtn tohmonom. Kto gutnius mrokfot mar nukeft kanjo niamott nom wanyhato hikmotnomt nd fasoh nefm thu trohmonnom, nukeft niahato yifungt tanuka hikefiwa kanjo. Nom nukeft tohhato nd Bro Nkifrarhu yuhuwafti bbukeft hti duka tungu-newunomt. Kraisr nmoh yima yuhunn htahato rorhu gutnius kakitoh kihwonomt.

⁷ Nom, nom be nd gutniuskfothu yakinohyuk yima furayenom. Bupam nyungobre hmbrita roh tambon kanjohot roh furayenom. To nd gutniuskfot nom yakinohwohat, nhai be tunmoh nanyarpampno nd gutniuskfot yakinohkahnompnt. Nhai. Bro Nkifrarhu nanyarpampno kakitohwonomt. ⁸ Krhopam mano mano niewum. To nom nhai bi riyo yibuknakkahnom. Wonk wonk nefm yak yibukkakna thombat, nhai duka kinyaki hasokahnom. ⁹ Yimam yek-wamnom faso faso kak bebwomnom, to nhai. Bro Nkifrar nhai frtrohkhahrnom. Yimam tataknihato tat kasuhwomnom, to nhai. Tfit sinya tohwonom. ¹⁰⁻¹¹ Yiha yiha Jisasr yakmo krhopam kanjo inji kekwonom krhopam. Jisasrhu gutnius mrokfothu pthaneftpno nom tohwa yiham be nohyuk tkitt toh-wonom. Ndnettn nd Jisasr tohmo toh yuham tfit nompno yimam tfit htitmt Jisasr tohmo toheft. ¹² Nom nd nohyuk tkitt tohwatnom niko gutnius mrokfot wanukakomn hifa rhu nmbuhat yakhato toh nkifranirahko.

¹³ Bro Nkifrarhu rfa borngthu mrokfot kfo kangt, "Na bi Bro Nkifrarhu mrokfom wany yakiohato hikmoyann mrokfom kfo pthamoyann." Nom to inji. Nom Jisasrhu gutnius mrokfom wany yakiohato hikwanomn gutnius mrokfom kfo pthewunomm. ¹⁴ Nom bi tunom tawisafwonom. Bro Nungogeth Jisasr nohetr, Bro Nkifrar kasinyamorr, nom to inji kanjo Bro Nkifrar kasin-yarahrnom. Kasinyaruhatrnom Jisasr-pno mrifinyrahnom. Tfit nikomi nom rpat Bro Nkifrar yagniruharnom turpno brbo yak htarahrnom. ¹⁵ Na

nd bi kfo tndhhne krhoparoh mrokfom yak hnamoam to niko gutnius mrokfot yakmo yuhat yihato nom nd krhopam fak hnamonom. To be arihat be bi Bro Nkifrar bok met yindarim yuhuwaf-watrm Bro Nkifrar kfo yindhorwomr. Inji newatm Bro Nkifrar bro yindhor nmbuhat kahukmr.

Aposerroh dukefm nd hefenr rhuyuk dborioh rhu nmbuhatn rroh dukefm yimom

¹⁶ Nd Bro Nkifrar hingrnamo dborioh hingrneft mdukakhato nom nhai hingrna noh hingrna nohkahnomt hingrneft. Nhai. Briyaha thatiprpam bi yohni hanitm tfit yiro yima rifhumio hatohwa yafotham, rom nhai. Rom yihof href yihof href bbuka ssfonefm hta huta hasiwatrml bbuka ssfonefm be inji kohr hasiwum. ¹⁷ Ndar nom ariha yak hasiwa krhopenm nom nhai ndmn yukatohkahnom. Hifa to ndmn tfit tu toh nkifraniyet dborioh rhu nmbuhat htarahmnom hefenr. ¹⁸ Ndnetnomn nmoh dukefm nd hefenr rhuyuk dborioh rhu nmbuhat nmoh dukefm kitm. Nhai nd nom yekwa krhopamn yukatohkahnom. Nd krhopam rom be inji ariarpa rhunirahm, nd hefenr rhuyuk dborioh rhu nmbuhat rot rhu nkifranirahnomt.

5

¹ Kanga akfo nuhasanko ndar nom hatohwa thatiptu mrokfot. Ndar nom hatohwa thatipt kangme mngra kunyet. Nhai toh buhtaruhatt. Be inji toh dfikniruhatt suhhato mikfe bdgniraht. To nd mngra kunys suhhato mikfe bdgni thoft to tfit wom nfri kunys tu Bro Nkifrarn hirahrnom. Nd kunys nhai yimamn hingrnaruhatmt, tu Bro Nkifrarn hingrnarahrt. Ror hingrnettun nhai finji naruhatt, be inji toh nkifraniraht. ² Nom ndar bbinysof-thu kunys toh hhrekwanomn tfit kfo duka darwon haso kangnom be tmifnom, hefenrhu nfri thatipt hmbrihato atohnom. ³ To hefenko nhai be brioh yafotharpatpno tohruhatnom. Nhai. Tfit tu hefenrhu thatipt hmbrihato tohrahnom. ⁴ Ndar bbinysoftu thatiptpno tohwanomn krhopam yakhato bu nyngam yohni hasiwum-nom. Nhai be ndar bbinysoftu thatiptu thu hrur thuneft yihato nd krhopam yakhato bu nyngam yoh-nikahm. Nhai. Be kangnom yuhre yima nfri nyngetnom ndar bbinysoft tohwa fijo hefenrhu nfri thatipt yakhato ahmbritanom nfri hmbresham yakhato hmbrita kanjo. Inji nahato ndar noheh thatipt thu hrur thuhato tfit yiha yiha toh nkifraniyuk nfri thatipt yakhato hmbrirahnom. ⁵ To ndt to bi tu Bro Nkifrar nom hingrnamat bi ndt bi duka htamort. To nd rhu nmbuhathu ruhakni yuhat to bi turhu Yafothat yaktmorn nompno hta gungonmort. To bi tot bi barkof htateh minghat htamort. To bi inji iyaknitahat to be Bro Nkifrar hirahrnom ror kfotayuk shrm.

⁶ Nom ndroh dukefrpno nmoh toheft toh bmtewunom. To nom nda thatiptpno ndar bbinysoft tohwohat nhai bi Bro Nungothetrpno rorhu kmit brbo tohkahnom bi. Nhai.

⁷ Be inji afi wuri tohhato be dukefrparpno Bro Nungothetrn duka duka tohwonom, nhai bi yima mif nyngaye htikahnomr. ⁸ Mrokfot to bi kfiyant. Yima yuhur ror tor korhr. Ndnetnomn kangnom ndar thatipt nohhato htanykahnomtn, Bro Nungothetrpno tu kmi mnako amtoh nkifraninom. ⁹ To ndnetnomn nom wur kmi mnako tohneft o asha tohneft nom yiha yiha Bro Nungothetr hti yindhorwa nefm na hasokfot. ¹⁰ Ndt nhai be sfno inji kfokaha. Kraisruh kotkfot toh bugarahnom. Nd kotkfotn nom thatiptpno tohhato niwa dborioh nefm o fasoh nefm yak nhta-ruharmn ttha nhombra hanyrahrnom.

Yimam yakhato Bro Nkifrapno rimak hta yuhat

¹¹ Nom to nd kotkfotpno yakrmi-tanomn kangnom wom met yindarim gutnius mrokfom ahikahtnom Kraisr hikrahm. To nom nd gutnius hingrneft hingrna thombat nom nhai wom dukefr-pno nd hingrneft hingrnakahnom. Nhai. Bro Nkifrar hti mifworm nmoh yima yuhumi dukefm. Niko Korinko to hti hnewukmnom. Nom nhai ndar hingrneft tohhato wom yiha nikompno yihato mfrnhehrmonomko. ¹² To mirahko ka be kangnom inji akfokah-tnom niko wanyruhakomn nom hingrnewa hingrgef yuhat kfo yindhorrahkomt. Nhai. Nom nhai inji dukahato kfokahnom. Be kangnom nom hingrnewa hingrgef yuhat akfo nuhaskahtnomko niko bi wanyarahko. Wanyahato wom yiham wom yimam be briahako yimam niwa nefrpam htihato kfo yindhorwamn,

nhai tu yiro yima rifhum mfrfnahnayuk nefm htihato kfo yindhorkahm, tfit nikomm tohhato nompno htita yiro yima rifhum mfrfnahnayuk nefm kfo nuhashirahkomm.

¹³ Womm kfo kangmnom nom hingrnewa hingrneft hingrna mumiwunomt. Nhai mrokfom. Inji akfo hanymnom. Nom be kangnom Bro Nkifrar hikhato rorhu hingrneft ahingrnynom. Nhai hingrna mmokah-nom. Niko dukahato nom hingrne-wunom.

¹⁴ Nom nhai be sfho hingr-narfotnom. Kraisr nmoh rhu beb nmbuhat yuhuwafhato hti dukamort. Hti dukahato nom met yindarinmoh nohyuk tkitt rorrpar yakhato nohmort. Nd ror nohmo yuhatn nmoh fasoh yatk yima yuhum bi minoh nhehafmorm. Nom ror yuhuwafhato nohmo yuhat htihato nom ndtn kasinyewutnom ndar hingrneftu hingrnaneft. ¹⁵ To be bi nd yimarn bi nmoh tkitt nohhato tfit sinyamor. To nom frohnom yima yuhum ror dukahato yauwanom, to nhai nmoh yima yuhum tfit tunmoh dukefr hikhato yaufkot. Nhai. Be rorhu dukefrpar dukahato yaufkot.

¹⁶ Ndnetnomn nom nhai ndar bbinysothu fasoh yatk yima yuhur hikhato yimam nayuk nefm yukatoh-hato hti kebokthikahnomm. Nhai. Rot barkopam afo ndar bbinysothu yatk yima yuhur tohetnomn Kraisrhu nefm hti kekut hti kekutmonomm. Tfit ariham bi nfri yima yuhumpno yorhwanomn nd fasoh yatk yima yuhum fahfomonomm. ¹⁷ Ndnett fitoh yimar Kraisrpno frtkafwor, nd yimar bi nfri yima yuhurpno korhr. Yatk nefm bi be mifn. Bi tfit nfri nefmn mfrfnahwom.

¹⁸ Tu Bro Nkifrarn inji kak htewur-nom. Nom bi barkof toh hnamo yiham, Bro Nkifrapno nhai bi inji yak nanyma hnarmornom. Be inji narhu mong narhu mongmounom. Kto Kraisrpnone ee gbhu mtir rorn hnammor. Nd yiha Bro Nkifrar rifak marnyakmornom. Riyak marnyakhato tfit nomn kfo tkrurmor wommpno yi kfohato Bro Nkifrapno nayak nany-maneft. ¹⁹ Nom kfo pthiwa mrokfote inji: Kraisr nohhato sinyamotr be Bro Nkifrar inji htihato be nd yiha yimam yakinoh hawihnamo fasoh fasoh nefm rimong trohkhato rifak marnyak-morm. Nomn nd kfo nuhas mrokfothu kfo duka htfasyuknom htamornom. ²⁰ Ndnetnomn nom Kraisrhu tkitt yakhato kfo nuhas htfaswonomm yimam. Bro Nkifrarhu naku tngt nmoh tngmn mrhuhato nakutrm yimam. Kraisrhu mrokfom kfo hany kangnomm, “Nd Bro Nkifrapno narhu mongwa nmbuhat be tmifko wayafhokahkomt, Bro Nkifrapno nayak marnyahato rpa yima yuhur warhuko.” ²¹ Tu Kraisr nhai wom fasoh neft nahato nohrmor. Nhai. Bro Nkifrar nomn dukamor. Nom dukahato tfit nom nayuk fasoh fasoh nefm tfit yakhato Kraisrn thutamor. Kraisr tfit fasoh nefm nayet yimam kanjo nd fasoh nefm thu kasimomr. Bro Nkifrar memor inji anakahta, nom Kraisrpno brbo frtkafhato ror hingrnayuk hingrneftpno Bro Nkifrar hti wutharahrnom.

6

Aposerm bok krhopam fakmomt aposer hingrneft

¹ Nom Bro Nkifrar tohnhohato hingrneft yakinohnuhiwanom, bro mrokfot kf-wunomko. Kraisr nohmo yuhatn niko Bro Nkifrar yuhuwafmorko. To tfit mirahko hus dohfn atohnom. ² Bingot Aisaiarpno Bro Nkifrar kfo memor, “Nikmoh nrfa hhakhato yak marnya yihar bingot bi kfo htamoyanr.

Tu nd yiha mif naku kfomokone ee nikmoh naku tngm wanymoyanm.” *Ais 49.8*

To wawayko. Nom ndar yiha tohwa yimanmoh yak marnya yuhat to bi ndar yihann Bro Nkifrar kangr, ayak marnyayanko yo ndar yihann kangr, anrfa hhakanko.

³ Nom nhai wofnkahnom nom ndar hingrneft tohhato nomn wom fasoh nefm nahato o wom mrokfo bebm tuhato tfit yimam ndm htihaton o wanyhato tfit ginyetm kanjo mongthur mongthur yikfot. Nhai. ⁴ Nom Bro Nkifrarhu hingrna yimanom kanjo tohhato nmoh toh nmbuham be yak teh marnyakfot. Tamoh tamoh krhopam nianeft o yakneft o finjina finjina neft toh bmtakfot. ⁵ Yimam tat nohakhato kalabus htewumnom yo yimam yahr hmbritatmnom, nhai yifungm hwekahnom yo nhai rim fnahni mfnahnihato tamohm yak mskakahnom. ⁶ To nom inji htitahat nom nhai mekahnom, tfit wanambur sinyahato kfo huttrahnom. Nhai. Dborioh duka yima yuhumpno hifa hifa nefm kak

nuhaswonomm. Tu Bro Nkifrarhu Yafothat tohnuhiwattnom ndhtet dborioh nefm newunom. ⁷ Nom tu tpiyet mrokfom kfo pthewunom. Bro Nkifrarhu bbuka nanyjar rifhur korhrnom. Yo tfit nmoh dborioh nefm wohn rikati kfrat kanjo yakitohwanomn yahrthu kfra inyarut frdbfewunomt.

⁸ Womm nmoh yufam kfo yindhor-womm, tfit womm kfo kangm, “Tamohmpno kfo yindhor furaruha-nomm?” Womm kfo yindhor htfaswomt nmoh hingrneft, tfit wommn kfo kangm, “Nheno, rroh hingrneft fipa duhatet.” Womm kfo kangmnom, nom kfo pthiwa mrokfom kfo fura bofirewunomm. To nhai. Nom pthiwa mrokfom kfo mifwonomm. ⁹ Nom hingrnewa aposer hingrneft nhai yimam hti duka mekahm, “Arm aposerem.” Nhai. Yima furam kanjo inji htitmnom. To nhai, tom bok yimam htitmndar nom hingrnewa hingrneft aposer hingrneft hingrne-wunom. Ar nohyuk tkitt bi tohyuknom, to nhai. Nom asonom tohwonom. Ar yimam tat noh bonohetnom, nhai nohkahnom. ¹⁰ Ar yima yuhum nur dungunangunirahm, to nhai. Tfit yindhor yima yuhum tfit niewum. Nom ar wom womroh toh nmbuharpak yak marnyahato rom hifa rhu nmbuhat rhuhato nom tfit fasoh rhu nmbuhat rhuneft, to nhai. Nmoh rhu nmbuhat Bro Nkifrar kukatohwort.

¹¹ Niko Korinko, nmoh yima yuhum rhuyuk dukefm to bi kfo nriyaf bugamot-nomm wanymokomm. Niko nmoh marbimn korkho. ¹² Mirahko ka romn nhai yuhu mongikahmnom. Nhai. Niko tukomn nhai nmoh yima yuhur rhukahko. ¹³ Yifemr sinyahato yonm mrokfom yahuka kanjo bi inji mrokfom kahukanko. Niko to inji nom nikompno niwa kanjo inji wanatwakmnom. Nikmoh yima yuhum nomn arhu bugatwam.

Nom Bro Nkifrarhu tohyuk kunyenom

¹⁴ Niko mirahko Kraisru mrokfom wany yakiohato hik duha yimampno anabnot htfasnom. Rroh nefmi nikmoh nefm nhai rpat niyak tkafkahm. Nhai. Rom nndoh nefetem. Nhai dborioh nefti fasoh neft rpat nabnotkfot. Nhai marri yifungt rpat nabnotkfot. ¹⁵ Tone Satanri Kraisre ka rpat tohhato nabnotwof? Kraisr hiket yimari Kraisr hik duha yimar ka rpa yima yuhur tohwof? ¹⁶ Tone finji kanjo Bro Nkifrarhu temperri tahi rmonnm rpat yak htakfot? Nom to toh nkifraniruha Bro Nkifrarhu kunyenom. To bi tu Bro Nkifrar bi kfo memor,

“Isrerm tom tu nanhu tannefenm.

Na toya rompno tohhato rompno ye wussoh htfasruha.

Na kfo bruttna hakurahma rroh Bro Nkifraya kanjo.

Rroh fitoh rim yau myau yuham yo tamoh nefm rom nayukm,
na toya yukatoh hakuruhanm.”

Wkp 26.12; Ese 37.27

¹⁷ Ndnettn Bror kfo kangr,

“Wafrfnahko. Wafrtroh tanykah-komm nndo turpako watohko.

Fitoh yemrom o tamohm Bro Nkifrar wofnkahr niko tir htaneft o yanyeft,
to be nyngarpaye yukatohkfot.

Inji naruhatkofit nann yakmiyakruhanko.”

Ais 52.11; Ese 20.34

¹⁸ “Nann yifemhato nanhu yonko rhurahko.

Tu yura myorhekwa Bror inji kfiwur.”

2 Sml 7.14; 1 Sto 17.13

7

¹ Bar yinouroko, ndar Bro Nkifrar nmoh rhu nmbuhat dukahato kfo htamo mrokfot, nom to bi ndtn bi korhnom. Ndnettn ndar nom hatohwa thatipt niwa fasoh fasoh nefm yo nom hatohwa fasoh yima rifhur yak wus bowus marnyakahtnomr nmoh toh rawofm Bro Nkifrar hti wutharahrm. Yo nom Bro Nkifrar duka yakrmihato be rorpno rim tohni bugahato tamoh tamoh nefenm yafho bugahato be dborioh rhu nmbuharpak rhukfot.

Korin thofm nahnamo fasoh nefm mong trohmotmm Porr htihato yindhormor

² Wayakmiyakkahkmnom nikmoh yima yuhumn wayak htakmnom. Nom nhai wom yimar yak bebrmonomr. Nom nhai wom yimar Bro Nkifrar hik hanyetr tfit nom mtohnihato tfit rorhu yima yuhur frtmbhormonomr, o wom yimar kfo nhehhato rorhu

marum o tamohm yak hermonomr. ³ Mrokfom na inji kfiwohat na nhai kfo wok kanjo mrokfom inji kfokahanm. Nhai. Bi kfo memoyanko, niko marbit htewunomko. Nhai mong htaruhat-nomko. Nohnefrpatpno mduka mum-a-fonirahnomko. ⁴ Na bi wanymoya niko Bro Nkifrarhu mrokfom hikwa yuham. Nikmoh toh nmbuham hifa yitatm na tu bro kfo yindhor nmbuhat htiwanko. Na tamoh tamoh krhopam yakneft nhai mekaha ndmn yukatoh-hato yima yuhur krhorahr. Nhai. Nanhu yima yuhur tfit niko duka yo niko Bro Nkifrarhu mrokfom hikwa yuham dukahato yima yuhur miyorh-warn tfit yindhor yima yuhur niewura.

⁵ Nom Masedoniako yimohat nhaf nhai rhu marnyarmonom. Be krhopam mihamuh-mon. Fitoh fitoh tkitm yimounom be krhopam fknihato yakrme yima yuhumpno rhu htfasmounom. ⁶ Tu hifa Bro Nkifrar kak marnya bomarnywurm krhopampno rhu haset yimam. Ndnettnd nmoh krho yima yuhum rhu hasoyukm, hifa Bro Nkifrar kasinyamotrr Taitusr, rorn niahato ror hnayuk mrokfom nom wanyhato be nmoh yima yuhum mirhumom. ⁷ To nhaf nhai be ndrpatt-pno nmoh yima yuhum mirhurmom. Nhai. Womt Taitusr kfo memornom niko Taitusr nikmoh tirmn rhumor. Nom ndt kfo nuhasmotrnom nom wanyhato yima yuhum mirhumomnom. Yo kfo nuhas memornom nikomi na nafrtrohmo yuhat tfit kangko aniekaht nakfo dbruf nuhasrahnom. Na inji wanymoyann nanhu yima yuhur mfro yindhormor.

⁸⁻⁹ Na tuka htimoya nd na bi barkof wandfayuk gontwathu mrokfom htihato krhomoko yo yimtnamoko. Na ndtpno afo duka krhomoya. To tfit arnat na tfit yindhorwa. Nhai nd krhopam hemo yuhum htihato yindhor-kaha. Nhai. Niko nd krhopami yimtna nmbuham yakmom, ndmn yima yuhum rihingrnahato nikmoh yima yuhum fak kekutmom. Nanhu yima yuhur ndmpno yindhorwor. To nd krho nmbuhami yimtna nmbuham ndm tu Bro Nkifrar htamotrko ndmpno niko yima yuhum tfit fak kekutmom. To ndnettnd kfo yimtnapam rhu tefinihato tfit hifa nmbuhat mfnahmot. ¹⁰ Tamoh tamoh krho nmbuham o yimtna nmbuham Bro Nkifrar yahukam nom ndm mhtiyekwanom fasoh nefm mong trohwonom. Inji newatnom Bro Nkifrar tfit kekwornom. Ndt tu hifa nmbuhat. Ndar bbinyosothu yimamn ndhtet krhopami yimtnapam yakhato fasoh nefm nhai mong trohrfomm Bro Nkifrar nhai yakruhatrm. ¹¹ Niko waduka hikkomm nd krhopami yimtna nmbuham Bro Nkifrar tfit finji yak htafmorm. Nd krhopami yimtna-pam niko yakmom memoko, nom ndm harhuruhatmnom Bro Nkifrar wom nefm narahrnom. Nd dukefrpno tfit niko sinyamokomn niko harhumo krhopam fak nohmokomm. Yo nd yimtna nambur nmbuham niko harhumom tfit yimokomn nd fasoh neft nayuk yimar kfo huttmokomr. Ndt hifa nmbuhat namoko. Ndt kangko tfit nom ahtinom. Nd dukeftpno mrokfom yak nohmokomm yo nd yimar kfo huttmokomr. Ndt htitnomt niko bi nhai wom mrokfo duhateko.

¹² Na ndwom gontwat nikompono wandfamohat nhai nd fasoh neft namo yimarhu mrokfo kfoneftn wandfarmoya. Yo nhai nd fasoh neft yakmo yimar dukahato nd gontwat wandfarmoya. Nhai. Na nd gontwat wandfamohat, nanhu dukeft duka memoya, akfo-kahtanm nanhu mrokfom hikhato nd fasoh neft namo yimar kfo huttruhatmr nd rom nayuk neft Bro Nkifrar htirahrt. ¹³ To be nd niko namo nefmn nom wanyakhato nd krho yima yuhum nom yaktoh hasomom be yohnemom. To nhai be ndrpatt, womt Taitusr yimo dukefr wufakmokomr yo fak marnya bomarnyamokomr, ndm tfit mkfo nuhasmotrnom nmoh yima yuhum mirhumom. ¹⁴ Bi barkopam bi Taitusr kfo yindhor nuhasmoyanr nikmoh dborioh dborioh nefm. To tfit ror nikompono yihato tfit niko nd dborioh nefm yak nuhasmohat, na nhai tfit wom yimtnefm rhukahma. Na kfomo mrokfot tu kfo mifkfot kfomoyanr. Be fasoh nefm ayak nuhaskomr, o be nann bro yimtneft niarfot. ¹⁵ Taitusr yuhre duka hanitrm nikmoha yihato niko yakrme yima yuhumpno yakhato rorhu mrokfom hikmohat. Nd dukefr yak thoft masat dukewurko. ¹⁶ Nanhu bro dukefr duka kanga ariham niko be dborioh nefrpam na hakurahko, ndnetann na bro yindhoreftpno korhwa.

Judia Kristenm hayuk maruham Korinm bi yak htata hanykfot

8

(Sapta 8-9)

Judiakorhof Kristenm hayuk he marufat fak nhafohmom

¹ Bar yinouroko, kanga Masedonia profins yorhwa sios niwa nefm akfo nuhasanko. Rom Bro Nkifrarhu tu yima yuhuwaf yuhat kak hik marnya mifwomt. ² Rom tu bro krhopam fakmom. Nd yiha be inji marufen yeshriyen duha toh furatamom. To rroh toh nmbuhat inji tohmohat nhai duka marimom, “Nom rhu bebwonomn to fitha maruham yakhato wom Kristenm hiruhanom?” Nhai inji dukarmom. Bro Nkifrar yindhor yima yuhum hemotrm marut yindhortpno yindhort-pno yak yakmomp Kristenroh yufatpno hta rmonmomt. ³ Kfiwanko, marut htamohat nhai tu hayuk thomnafat hta hanyrmoam. Yima yimam be turoh yindhore nmbuhatn bro bro marufarpas hta hanymoum. ⁴ Tum nompno nia-hato yihof href yihof href kfo hatoh-mouynom nom kfo yakio mrokfot hihatoh marufathu yak nhafohhato wom sios htayuk marufatpno thu hmbrehato Judia profinshu Kristenroh hanyeft. ⁵ Nom memonom, ka nhai inji hta hanyruhatm. Nhai. Barkofpam afo Brorpno rroh yima yuhum htahato kfo bruttnanimomn tfit Bro Nkifrar yima yuhum kasinyamotrm maruham hta hanymomm.

⁶ Nd Judia Kristenroh yuhuwafhato he marufathu hanyeft, Taitusrn nikompno tohhato nd dukefr mhfnah-namorr. To be ndnettn tfit mfro kfomonomr tfit nikompno yihato nd marufathu yak nohhato Judia Kristenm hanyheneft. ⁷ Niko niwa tamoh tamoh nefm niko dboriorh dboriorh nefrpam newuko. Bro Nkifrar kakitoh bmtewukomr. Yakitoh bmtahato Bro Nkifrar hikwa hiket kfo nuhaswokomm womm. Bro Nkifrarhu mrokfot niko tawisaf marnyewakomtn yima yuhum yindhorewom Bro Nkifrarhu hingrneneft hingrnaneft yo nom be nikmoh yima yuhumn korhnom. To be nd yuhatn Judia Kristenm yuhuwafhato maruham yak nhafoh marnyahato hekfot.

⁸ Na nd Judia Kristenroh maruha hanyeft kfiwohat nhai be kfo tkrur mekaha wahitwakomm. Nhai. Be kanga Masedonia Kristenm inji akfowonkahann htiruha yima yuhum sinyaruhamn Judia Kristenm hti dukarahmm o nhai? ⁹ Nmoh Nungothet Jisas Kraisorhu yuhuwafeft bi htimokomt. Niko duka tanyhato hefenr tohmoa dboriorh rhu nmbuhat wuhtanymortn fawihnamor. Yawihnehato tfit ndar yima furanom tohwa kanjo inji toh mmbrafinysamor. Nom yimanmoh rhu beb nmbuhathu yak marnyanefthi yihato tfit yimanom kanjo tohmor.

¹⁰ Nd niko yak nhafohwa maruhathu dukefrn kanga nanhu wom dukefr akfo nuhasanko. Nd maruhathu hta dukefr bi ndwom gunyjimrn riduka gngonakmoko. Nikomn nd dukefr wapthakhato nikomn barkof maruhat hta gngonmokomt. ¹¹ To be arnatn kanga nd maruhat wayak nohafokomt. Bi bro yindhore yima yuhumpno nd maruhat rihtakmokomt tfit bro yindhore yima yuhumpno wayak nohafotwakomt. Tukmoh maruhathu yak nhtahato kangko finji finji ahtanom to be inji hta hanykfot. ¹² Yima yuhur wayindhor sinyahato Bro Nkifrar hayuk shrm Bro Nkifrar wofnhato kekworm. Bro Nkifrar nhai hti tmanyhiruhatr yima myak kkopenakhato finjirpa hta hanyeft. Yindhore yima yuhurpno hayuk shrm Bro Nkifrar nhai tfit hti tmanyhehato ninhu nefm yak nhtakfot.

¹³⁻¹⁴ Na nhai mekaha wom kmim yakyuk krhopam womrpakomn tita-hekahtkomm rom rhu marnya nmbuhat yakrahm. Na nhai inji duka-hato kfokahanko. Nhai. Na kanga womm bi myak kkopenekwom, niko thu hmbrehetekfot. Tawo niko myak kkopentarahko, tawo rom thu hmbre-hirahmko. Krhopam tawo tawo nahti duka nahti dukahato niko tuko Kristenko maruhet bugako rhu bugarahko. Nhai womr mfro harhukfot yo nhai womr be tu sfnopa mifr rhukfot. ¹⁵ To Bro Nkifrarhu rfa borngt kfo kangt, “Bro Nkifrar manat thu brurhato yimam yak hutuhamohat tum nahti nhtamom. Nahti nhtahato nd yimam mfro mfro yak hutuhamom nhai womm yak furarmomm. Yimamn nhombrahato mfro fakmom.

Yo nd dfikpam yakyukm rom nhaf yimamn nhombrahato dfikpam fakmom.” *Kis 16.18*

Porr yimam kfo tkrurhato Korinko yimo yuhat

¹⁶ Taitusr nikompno yi hanyuk yima yuhur sinyewatrr na Bro Nkifrar kfo yindhorwanr. Taitusr nmoh dukefr hikwor. Bro Nkifrar yima yuhur hemotrr ror yibonwor nikompno bi yi hanyhato maruha yak nhafoh mrokfot bi kfo hanyhato maruhat bi yak nhafosta hanykfst. ¹⁷ Nikompno tfit yinyeft kfo ttiwonmotnomr kfo fakiomor. To nhai be nmoh kfo ttiwon nmbuharpaptno yibonrmor. Nhai. Ror to nikmoh yi hti dukefr bi ruhetrn to be kfo ttiwonmohat be kfo fakio twanhomor yinyeft. ¹⁸ Tor wom yimar hik hnerahrr. Nd yimarhu gutnius kfo ptha htfasneft awi hifa. Kmifa kmifaroh siosm kfo yindhorwomr. ¹⁹ Yo nhaf nhai be ndrpaptno. Nhai. Asharhof siosm rorn kfomom nompno rpat yi htfashato maruha yak htfashato Jerusalemk hanyneft. To nmoh yima yuhum yindhor mifwom Brorhu dukefrn hikhato Judiakorhof Kristenroh maruhat yak nhafohaknihato hanyhe-neft. ²⁰ Nom wofnkahnom yimam hta nhafohwa he marufathu mrokfothu titaneft, ndnetnomn ndar Kristen bratar fakmonomr. Tamoh mrokfom mfnahneft rorn tohnhorahrnom. ²¹ Nmoh bro dukeft duka kangnom nom hingrnayuk hingrneft mfrfnah marnyakfot. Nhai be Brorhu nyina-rpampno hingrneft yi marnyakfot. Nhai. Met yindarimpno nom hingrnayuk hingrneft yi marnyakfot.

²² Yo tor wom Kristen bratar Taitusrofpno niayukr. Nd yimarhu hingrneft bi hti nhombramonomr tu mfro hingrneter. Nd yimapenr yima hingrnanhoneft be inji korhr. Rorhu bro dukeft duka kangr niko yak nhafoh mifrahkomt nd maruhat, ndnetrn ror yibonwor niahato hingrnanhoneft.* ²³ Taitusr nanhu toh tamnou yimayer yo na nikompno hingrnewa hingrneft hingrnanihiwa yimayer. Yo ndwom Kristen brataf rof Kraiser mdukakhato rofhu tohefm toh marnyewuf. Asharhof siosroh yufatn rof nierahf.

²⁴ Dborioh dborioh nefm nd yimam wayak nuhastwakomm. Nikmoh dborioh nefm nom kfo grha htfas-wonomm kmi kmim. Ndnetrn nd yimam niayukm dborioh nefm wayak nuhas-kahtkomm rroh siosmpno kfo mirahm, “Nd kmiroh dborioh nefm nom wanu-kam bi tunmoh nyinyage htimonomm.”

9

Kristenroh he marufathu htahe yuham Porr kfo pthamorm Korinm

¹ Bro Nkifrarhu met yindariroh he marufathu hta nhafohhato hayuk marufathu mrokfot bi kfomotant wanymokomt, ndnetrn nhai tfit wompam kforhotant. ² Htitanko niko yima hanyeft be inji korhko. Na tuka bi htietann Masedoniampno nikmoh yufam yura htamoyanko. Kfo memo-yanm, Akaia thofm nhai ar yihof Kristenroh hayuk he marufat rihtakr-momt, bi nd rim nohnimo gunyjimrn bi rihta nhafohakmomt. Inji kfomota Masedonia thofm wanyhato rom maruha rihtakmom.* ³ To niko Korinko wahtiko nikmoh yufam kfo yindhor htfaswanm. To na nhai wofnkaha nikmoh yufam be kfo yindhor fura htfasneft. Na kanga nikmoh yima hanyeft tfit turoh nyinyage ahtimt. Nd dukeftpno maruha yak htfasyuk Kristen bratam nierahm. Turoh nyinyage htiruhamn kfo mirahm, “Awi, nom wanymohat asot nd neft bi tunmoh nyinyage htitnomt.” ⁴ Nanhu bro dukeft htitanko nikmoh maruhathu Kristenroh he nmbuhat, ndt mrokfo duhatet, htarahkomt. Tmift nani Masedoniakorhof yimampno bi rpat nianeft afo duka krho hanita. Kanga bi miruha bi rpat aikahnomn maruhat yak htfasnomt, tfit mhtirahnom tafi htata duhattn, be nd tkittn nikomi na bro yimtneft yakrahtnom. ⁵ Nd dukeft-pno maruhathu yak nhafoh mrokfot bi Kristen bratam tohak hanyhato kfo hanyrahmk. Kto na nianeft, nd nanopno niayuk yimam htirahmt marufat bi yak htatett. Nhai be yima kfo tngtpno htaruhatkomt. Nhai.

⁶ Nkifra mrokfot wamdukak hanyswakomt: Yima yewurit mfro mfro htarahn, yewurit mfro mfro sinyaruhatt yohet kpet yakrahn. Yima be inji dfik fanenf nuhtarahhn, to be

* 8:22: Hus yimaf Taitusrpno iyukf, Porr dkfomof nhai yufam yutarmorf Porr. Womr ves 18-20 kfomorr, yo tfit womr ves 22 kfotn kfomorr. Nd yimafhu yufam nhai yutarmorf. * 9:2: Taun Korint Akaia profins korht.

nhai mfro yakruhatn. ⁷ Ndnettn niko tuko rhuhato yak nhtakfot afo. Tu yindhorwo hanyeft, ee btn hekfot. Mirahn krho yima yuhurpno htahato tfit akfo amiya, “Be yimaroh kfotpno marufat hteyant, nhai be tukanhu yindhor yima yuhurn htarfoyant.” Ndhtet dukefmpno yima hanyeft ndt Bro Nkifrar nhai yindhorkahrt. Yind-hor yima yuhumpno yima hanyeft Bro Nkifrar yindhorwor. ⁸ Nd yindhorpam-pno Bro Nkifrar mikahtu athu brurhi-yanko, nikmoh rhu nmbuham nhai wom tamohm yak nafruhatk. Mfro mfro harhuruhanomn wom womt hti duka hanyrahkomm. ⁹ Nkifra mrokfot kfohna memom, “Yimar, wuskapa duha yimampno rorhu tamoh tamoht thu brurwort, nd yimar Bro Nkifrar nhai mong htaruhattr ror nayuk dborioh neft. Yiha yiha Bro Nkifrar yak marnya hasorahrr.” ¹⁰⁻¹¹ To nd Bro Nkifrar yimam yewuri tpim hihato mswirm trufwam yo yeshrim hihato yeshrim yewam, to nd Bro Nkifrarn wuskat, marut, tamoh tamoht mfro mfro thu rmonhiruhatrko mfro harhuruhanomn, wom Kristenm tfit hti dukarahkomm. Nd niko nmoh tirmn htafyuk he marufatn wom Kristenm htiyakruhamtn Bro Nkifrar mfro mfro kfo yindhorrahmr.

¹² To ndnettn nd niko htaheruha marufatn wom Kristenm yak hiru-hatmm nd marufatpno nhai wom yak kkopentaruhatm, yo womt, nd niko hayuk marufat htiruhamn Bro Nkifrar mfro mfro kfo yindhorrahmr. ¹³ Wom Kristenm marufam yak hiruha yuhatn nikmoh dborioh neft kfo ptha bro mirahm, “Nd kmim tu yima hayet kmiyem.” Kfo tndh mirahmko tu gutnius mrokfot kfiwa yuhat tu kak hik mar-nyewukomt. Yo niko Jerusalemko tohyuk Kristenm thu rmonhiruha bok maruham yo wom riruh aruhuyuk Kristenm thu rmonhiruha maruham yimam htiruhamn Bro Nkifrar kfo yindhorrahmr. ¹⁴ Kfo mirahmko, Bro Nkifrarhu yuhuwafeft be tu niko mif korht. Inji kfohato rroh dukefr be nikomn rhuhato Bro Nkifrar kfo bruttnarahmr nikmoh yak marnyanef. ¹⁵ Bro Nkifrar nom tu bro neft namornom nom ndar bbinysof thofnom. To nd ror namo yonmari neft to finji kfo ptha hikkfot. Nhai. Nom be Bro Nkifrarparhu kfo yindhor nmbuharpat kfo yindhorkfot.

Wom yimam Porr faso kfomotmr tfit Korinm namburmotmr Porr, tfit Porr Korinroh yima yuhum fak marnyamorm*

10

(Sapta 10-13)

*Bro Nkifrarhu hingrneft Porr dhingrnamoat yimam memooum ateh brurafkahtnomt ais, tfit
Porr mtone rafak hanymourt*

¹⁻² Kraisrhu noh hambre yima yuhurpno na Pora mrokfot kfiwanko. Mirahko na kfoyuk mrokfom awany marsisanomm. Wom yimam kfo wok kangma, “Porr be bbinysofthu yimam kanjo turhu rhu nmbuhat dukahato hingrneft hingrnewur. Rorhu neft inji htitwonomr, nompno tohahr nmoh nyngampno rorhu mrokfom kfo marnya bomarnya, yak marnya bomarnyarahrnom. Tfit wuri tohwor, rorhu mrokfom kaht kanjo kurwom.” Inji kfwiwuma. Wawanyko, na nia thoft inji kfoyuk yimam afo kaht kurnirahm. Na mirahko kfo ddiwur. Afo kaht kur gnngirahm. Niko awi nhai kforhotanko. Mrokfo kfoyuk yimarpam afo htiruhanm. ³ Rot to bbinysoft tohwonom, to nom Kristenom nhai be ndar bbinysof thofm kanjo yahrt tohneft rika kfra inyarut myaknihato nnakahnom. ⁴ Nom yahrt tohhato yakitohwa kfra inyarut nhai ndar bbinysofthu kfra inyarut kanjohot kfra inyarut yakitoh-kahnom. Nhai. Nom yakitohwa kfra inyarut bi Bro Nkifrarhu kfra inyarut kakitohwonom. Yahr kmim tu hambre-neft nhai wom hamuhkahm. ⁵ Nom tohhato nd yimam yakitohwa nd tamoh tamoh

*

10:: Mrokfom sapta 10-13 yorhwam nhai 2 Korinthu wom saptam yorhwa mrokfompro niyak tkafkahn. Nhai. Sapta 9 yorhwa mrokfom htirahnm Porr kfoyuk mrokfom afo kfo yindhormorm Korinn, tfit sapta 10 htirahnm Porrhu mrokfom tfit nnuhato Korinm kforahrm. Ndnettn ndar Bro Nkifrarhu rfa borngt yorhwa yimaroh mrokfom hti hik bohiket yimam inji hti nhahato duka memom nd sapta 10-13 yorhwa mrokfom Porr wom nndoh yiha wandfamo wom nndoh gontwathu mrokfom yakkomm tfit ndar gontwatpno rpat rihtakmomm.

fasoh riduka aduka yima yuhum kak thuwonomm yo yimam Bro Nkifrarhu hik dukefr wuteh nhirtewa fasoh dukefr kak thuwonomm. Yak thuhato tfit nomn Kraisrhu hik yuhum kfo tebos botebos nuhaswatnomm nd yuhat mhikaknitm. ⁶ Nom afo nikomm yukatohrahnom, nom kfoyuk mrokfom htitnomko bi hikwokomm, nom be nd mrokfo hany-jbornet yimarpamn yak gnngtatrahnom.

⁷ Niko nhai yimam nayuk nefm htihato yak nhta marnyakahkomm. Yimar tur hti nhombra yak nhom-brakfot. Tur yak nhombrahato duka kangr, "Na Kraisrno bi rim tohnimoya." To nd yimar tfit adukatwar, mirahr ka be nanrpaya Kraisrno tohwa. Nhai. Nom to ror kanjo nom bi Kraisrno rim tohnimonom. ⁸ Niko Jisasr yaki-tohwa nmbuhat nomn Bro Nungothetr kfomor nikmoh kfo bmta mrokfo hanyeft. Nom nhai mtohnihato niko Jisasr hikwa dukefr tfit kfo wok bowokkfot. Nhai. Ndnett na kanga kfo yindhorhato nmoh yufa yufam yura ahtayanm, nhai mrokfom. Na nhai myimtnak hanyrhota. ⁹ To mirahko nd na wandfiwa gontwam ka be nikmoh kfo yakrmeyuk gontwamn wandfiwa. Nhai. ¹⁰ Rot womm kfo kangma, "Porr wuri tohhato gontwaye htafyuk mrokfom nnhu nnuhuato mrokfom kfiwurm. Tfit yima tnge yima nyngahato kfoyuk mrokfom wanyrahhomr noh hmbrenano mrokfom be inji kfo mmbrafiny bommbrafinyrahrm. Mrokfom nhai wany fugharuhatkomm." Inji kfiwuma. ¹¹ Nd yimam ndhtet mrokfom kfiwam ka nhai dukef duhatem? Nom gon-twam htefiwa mrokfom yo yima tnge yi kfiwa mrokfom nhai tfit nndo nndo kfokahnomm. Ndnett nom wuri tohhato gontwamn htafmo mrokfom, nom tfit nia thombat nd yuhatn kfo hikrahnomm.

¹² Nom nhai kfo miruhatnom nom nd yufa yura htet yimam hingrnewa kanjo nom inji hingrnewunom. Yo nhai kfo miruhatnom nmoh nefm rroh nefm kanjo korhm. Nhai. Rom niwa nefm duka tungunef duha yimam kanjo inji na mmo bamumiwum. Tum hingrnewa hingrnewpam yukatohhato kfo kangm, nomrpanom hifa hingrna marnya ptha marnyanom. ¹³ Nom nhai tfit wom tamohmn kfo yindhor furakfot. Nom Bro Nkifrar kfo htayuk hingrnewef yuhat nom htihato kfo yindhorwonom. To nd kfo hta nuhasmo hingrna yuhat to be bi niko Korinkom-pno mfnahmonom. ¹⁴ Nom nd gutnius mrofkat hnehnahato nomn nikompno mfnah gungonmonomt. Ndtn kfo yindhorwonomt. ¹⁵ Nom nhai mekahnom nomrpanom nikompno yihato hingrnamonom. Nhai. Kto nmoh mongkorn tfit womm nikompno yihato hingrnamonom. Rroh hingrnewf nom htihato yindhorwonom. To nmoh bro dukeft duka kangnom gutnius mrokfom akfo nuhas marnya bomarnyakahtnomko Kraisr myakitoh bmtaknirahkomr. Myakitoh bmtakni-hato nikmohart Kraisrhu mrokfot broniraht. ¹⁶ Kto tfit nikmoh mongko toh hanyuk kantrim mrokfot hanyrah-nomt.[†] Nhai bi yimam yihato mrokfom bi kfo nuhasset kmim yiruhatnom. Nhai. Tafi gutnius mrokfot yi juha nfri kmimn nom yirahnom. Nom tu nfri kmim tunomn yi hingrnahato tfit nom kfo yindhor mirahnom, nom nd gutnius mrofkat hnehnahato nomn mfnah gungonmonomt. Kanga ndhtet kfo yindhorneft, be nhai mrokfom. ¹⁷ Bro Nkifrarhu mrokfot kfo kangt,

"Yimar kangr akfo grhaya, Bro Nungothetr hingrnayuk hingrnewt kfo grhakfot." *Jer 9.24*

¹⁸ Nom bi tawisafetenom. Yimar be turn turhu yufat kfo hagrrewur, nd yimar Bro Nkifrapno nhai yufapa duhater. Yimar tu Bro Nungothetr yufat yura kfo grhewurr, nd yimar yufeter.

11

Porr niwa nefmi giaman aposerm niwa nefm

¹ Na wom mrokfom afo faso kfo mmoni hanitanme, afo wawany marsisafo hany-wokma. Bi mirahko finji akfonom. ² Bro Nkifrarhu bro yima yuhur duka kangr dodh

[†] 10:16: Porr kfomor wom mongko tohyuk kmim. Nd mongko tohyuk kmim to ka bro taun Romr kfomor yo kantri Spen kfomor. Tom nd nd kmimn Korinthu mongko marr yohnitako tohwom. Nd kmiroh kfo duka mrokfom htifik Aposer 19.21 yo Rom 15.24-28.

met yindari bugam be rorrparhu yinhitn atohm. To Bro Nkifrar dukewa kanjo to nanhu bro yima yuhur duka kanga niko Kraisrpar wahik mif mifko. Kanga Kraisrpno ayak htakahtanko Kraisrn ayakrko. Wom met tmaht tafi wom yimarpno yi juha be yifammam yakhato yindarirpno yak htiwa kanjo kanga inji kanjo ayakkahanko Kraisrpno ayak htayanko.³ Tmift Tndhrn kakrmitanko. Ror tu mfro yima frnhehet nandomer. Bingot to rorn Ift yihato frnhehmotrt suhmot. Ndtn na kakrmitanko. Kanga inji kanjo yimam nieruharn mfrnhehakruhatmko rroh yuhat mhikakniruhakomn Kraisr myafhonirahkomr.⁴ Na nhai be sfno yakrmikahanko. Wahtiko! Tom wom yimam nikompno niewamn Jisasrhu gutnius mrokfot nom kfo pthiwat tfit yak kekutnewamt tfit romn nndo kfo pthewumt. To niko wanukahat, nhai afo mrokfot yak nhtakahkomt. Niko wanukahat, be yudbat rroh mrokfo yuhatn mitohnitko. Mitohnihato tfit nfri yafothat yo nfri gutnius kekwoko. Nd barkof yakyuk Bro Nkifrarhu Yafothat myak htafonitkomt yo nom barkof kfo nuhasyuk gutnius mrokfot myak htafonitkomt.

⁵ Wawanyko. Nd yimam niko kfo yamuka, "nmoh aposerm," rom nhai nanhu duka tungunefr kanjo rroh duka tungunefr rhukahr. ⁶ Mrokfo pthanefrpat nhai ptha marnyakaha. Bro Nkifrarhu mrokfothu duka tungunefr, ndr nhai yimam na kfokfot. Nd duka tungunefr na bi fakmoyanr. Nd duka tungunefr na yakitohwar niko bi htimokomr.

⁷ Na gutnius mrokfot nikmoha yi kfo pthamohat, na nhai kfo marimoya wawiknatwokma. Nhai. Nikmoh gutnius mrokfothu yi kfo ptha nuhas-neftn na yufapa duha yimam kanjo yi hingrna furatamoya. Na inji namohate ka fasoh neft namoya?⁸ Na nikmoha tohhato hingrnamohat, wom nndoh kmiroh siosroh maruhaye wiknamoatma na nikmoha gutnius mrokfot kfo ptha nuhasmoyanko. Nhai nikomn wiknar-mokma. To ndte ka fasoh neft namoya?⁹⁻¹¹ Na brio maruha duha, yeshri duha yo hmbresha duha rhumohat, na nhai marimoya nikomn krhopam hiruha nd tamoh tamohroh yak hanyeft. Nhai. Wur nndo Masedoniako tohtany niayuk yimamn marut, yeshrt, yo hmbresham hnahrenoma. Na nd rom hnayuk shrkann rhumoya. To nikom-pno kfo tndau duha yimohat, nhai wom dukefmpno inji narmoya. Nhai mif mif. Bro Nkifrar hti mifwora. Nanhu yima yuhur nikompno rhu mifwor. Be duka memoya, nhai krhopam hirhotann nanhu tamoh tamohroh yak hanyeft, ndnetann ariham yo kto wom yiha wom yiham toh hnayukm nhai kfo mirhota nikomn yak hirahkma na tamohm myak kkopenakneft. Nhai mif mif. To na gutnius niko he furamo nmbuhatpno na kfo grhaneft nhai wom Akaia thofrn kfo raforhotra.

¹² Na nikompno yi hingrnaneft na nhai maruha yak hakurhotanko. Bi inji rinakmoya to be inji nahanyruha. Inji narhota nd wom giaman aposerm nhai tfit turoh yufam kfo grhahato kfo miruhatm, "Nom Porrom Korint niwa nef yuhat hikwonem."¹³ Nd yimam nndoh giaman aposerem. Rroh nefm yak kekutnewamm yuwi kangm niko htiruhakomn duka mirahko tu Krais-rhu aposer mif mifem. Ndm yuwi nikmoh frnhehakneftn inji newum.¹⁴ To niko rom nayuk nefm htineft, to mirahko htihato bok dukefm ayaknom. Niko tawisafwoko. Satanr kangr afrnhehakanm ndnetrn rorhu nefm yak kekutwarm tfit fnhuyet mounmotr kanjo kak dborhewur.¹⁵ Ndnett Satanrhu hingrna yimam to inji inji newum, rroh nefm yak kekutwamm tfit dborioh nefthu hingrna yimaroh nefm kanjo newum. Nom inji htineft, to bi bok dukefm bi yak duha. Kto tum niwa nefroh krhopam yakrahm.

Porr aposer hingrneft hingrnahato yakmo krhoparoh mrokfot

¹⁶⁻¹⁷ Na nhai wofnkaha tfit wompam wompam nanhu nefmi yo na hingrnewa hingrnethu mrokfot be wapthathu wapthathu hasoneft. To tfit womt akfoyanko. Nd nanhu tohefti nanhu hingrneft tuka kfo grha yindhorwante, to mirahko akfo amanyom, "Ndr nhai bi Bror kfiwa yuhat hikkahr, bi mmom kanjo bi kfo mumiwur." Mirahko bi inji akfakninom. Niko inji htitwokma o wanukwokma, afo wahti marsisatwokma.¹⁸ Niko inji newuko, wom yiham wom yimam nayuk nefmpnon o tum hingrnayuk hingrneftpno bro yindhoreft yakhato yihof href yiho href kfo ptha yindhor thombat, niko to be

rompno brbo rhuhato wany yakitoh yindhor hasi-wukomm. Na tfit wawanyswako na ka inji tukanhu nefmi tukanhu hingrnefm kfo yindhor grharuhan o na tu yafothet mrokfot kforuha?

¹⁹ Wawanyko. Niko hifa dborioh dukefeteko. Yimam kfoyuk mrokfom kak nhita marnyewukomm. To tfit tamohmpno nd faso faso kfo mmo bammoyetroh mrokfom mfrhamumi-watmko niko be rroh mmo yuhatn mhikaknitako? ²⁰ Ar mmohari kpt. Niko to rpat mmo bugewakomn rom newamn mfrhammo bohamumiwamko, niko riwany yakiowakhato nikmoh wuskenm kak rhoptakni bugahukmko. Inji mnewamko tfit turohko yitamn turoh yufam yura yura htahato niko tfit yiro wahtewumko. Ndt dborioh neft newumko? Nikmoh kusmm mfrsrfe wahat niko to be dukiasroh nyngam kanjo karmt hasiwukomm, nhai wom mrokfom kfokahkomm. ²¹ Na nhai mfro inji narmoyanko. To niko finji dukewako, na dborioh neft namoyan o nhai?

Dndett rom kangm tum niwa nefm o hingrnewa hingrnefm akfo ptha yindhornomm, to nhai mrokfom. To nanhum to kfo ptha yindhorruhanm. Awi nhai, ka inji kfifohat kanga ka bi faso kfo mmoni hanita. ²² Rom kfo kangm, "Nom Hibruyenom," yo kfo kangm, "Nom Abraham frikef yuhat niayuenom," yo kfo kangm, "Nom Isrerrenom." To na froha? Na to Hibruya, na Abraham frikef yuhatuha, yo na Isrera. To finji kforuhaf?* ²³ Kfo kangm, "Kraisrhu hingrna yimayenom." To rom fita bi Kraisrhu hingrna yimam tohhato bi wonk wonk krhopam bi yakrom? Wawanyko. Asoya yimaya Kraisrhu hingrneft tohhato bok krhopam yakyuk yimaya. Rom bi hingrnarotm kalabus htaromm? Yo wife smbhoromm? Yo nohyuk tkitt bi tohrom? Na asoya Kraisrhu hingrneft tohhato kalabus tohyuka, yo wife smbho bosmbhoyeta, yo nohyuk tkitt bi toheta. Ndm nhai be tukanhu yufathu yura htaneft kfokahanm. Nhai. Be kanga akfo nuhaskohtanko wawanyko. ²⁴ Judam wife wife smbho bosmbhomoma, 5-pela yiham. Nd 5-pela yiham 39 taim 39 taim smbho bosmbhomoma. ²⁵ Yo Romrhu gafmanr 3-pela taimkfat kfomotr kumbuhe kumbuhe yenyoh bonoh-moma. Yo tfit wom yiha tahiye tahiye febhoh gumoma. Yo na hingrneft yihato kmbrenimoa sifm, husfirpa sifm wifor toh bu mingrm fak mundhu-motmm yohnemom. Womt wifor toh bu mingrm yak mundhuhato yoh-nemohat na tu sifthu pran mkutn yura mhutahato rpa yifungri rpa marr buha maromb danyuha furatn hir yifah-tamoya. ²⁶ Bok yiham na fitoh yuka skitm yimoahat yakrmenano be yakrme yima yuhurpno kaumoa. Tekm miptkoneft yakrmihato tekme be yakrmenano yimoanm, yo raskorm yakrmihato yihotam yaumoahat o fitoh tkitm rhumoahat be yakrme yima yuhurpno rhumoa, yo tu Judam, tukanhu kmi thofmn yihotat rhu rafakhato memoum awasnomr, ndnetann be yakrmenano rhumoa, yo yima tangimn tabotakhato kalabus htaneft kfomoatm na be yakrmenano rhumoa. Na taunm tohmoahat o wom yuke skitm yimoahat, krhopam be inji hajohmoatm na be inji yakrmes rhumoa. Sifm yaknihato marombt tone hanymoahat be yakrmenano yimoa. Yo giaman Kristenm memoum yahr kmimpno hndhnarahnomr, ndnetann be yakrme yima yuhurpno rhumoa. ²⁷ Wonk wonk hingrnefm hingrna hingrna yifungmoa. Nhai hwemoaya. Wom yiham yatinoh minysafnimoa. Wom yiham sfno nuwa ye juha tohmoa. Bok yiham frfon minysafmoa. Nhai kor siotham frfon yiham hmbreyukm. ²⁸ Wom wom krhoparoh dukefm rom tom korhwom, tmift na kasinya hanyuk Kristen siosroh yak hta bohta yuharoh dukefm tu bro dukeft korhwoma. ²⁹ Wom Kristenru bbuka nanyjar rifhur bi ryohniyekwor, na to inji, tuka yironiwa na hatoh hasoyuk bbuka nanyjar rifhur yohniyaknitr. Yo wom tamoh nefmpno wom Kristenr msuhneft, nanhu yima yuhur nhai hwe marnyakahra. Na tfit namburwa inji wanyneft.

³⁰ Na nhai tuka kfo grha yindhor mekfot na nd nahnamo nefm tukanhu duka tungunefrpno nahnamoyanm yo na hingrnahnamo hingrnefm tukanhu duka tungunefrpno o bbukefrpno hingrnahnamoyanm. Nhai. Na ndhtet yimena, be nanrpayann finji

* ^{11:22:} Hibrumi Isrerm trhamo yuhat inji: Hibrum tthamo yuhat, rom yima Abrahamr kasinyamo frikefet. Isrerm tthamo yuhat, rom tu Bro Nkifrar kfohato tthamo frikefet.

narmoyanm tamoh nefm o finji hingrnarmoyanm tamoh hingrnefm. Bro Nkifrar toh-nhomotra nd tamoh tamoh nefm namoyanm o hingrnefm hingrna-moyanm. Ndtpno na Bro Nkifrar kfo grha yindhorwanr. ³¹ Nd Bro Nkifrar, Bro Nungothe Jisasru Yifemr, nom nd yura yura kfo yuta hagrhewar, na nd Nkifrar tawisafwora, na kfo hnayuk mrokfom nhai kfo nhehkohanko. ³² Damaskusn king Aretasru yinhit tohyuk gafanar nanhu yakyuk mrokfot soldiampno htamotrt soldiam taun rim fnahnitn toh hajohmooum. ³³ To nhai. Wom Kristen yimam yuke mtitofe ttatet kpt mihibremota taun gnathu windua yuhatn kpeta yafuhafmotma bbinysoft mitohnihato fakrmenimoya.

12

Porr hwe twe hany kanjo Bro Nkifrar yak nuhas hanymo kafrohet mrokfom yo kafrohet nefm

¹ Na tukanhu toh nmbuhathu mrokfotn kfo ptha hasohato niko be ndtn yihof href wany hasorahko, nhai nikmoh toh nmbuham yak htaruhattm. Be wanys wanyrahko. To nhai mrokfom. Na hwe twehany kanjo wany hanymo kafrohet mrokfom yo kafrohet nefm, ndroh mrokfomn kfo ptharuhanko. ² Na tawisafwanr wom Kristen yimarhu tndh mrokfot. Bingot wom Kristen yimar, Bro Nkifrar tuhafunanimotrr yimor tu hefenrhu tu wuroh kmi mfhatn. Nd tndh mrokfot bi 14 gunyjimm yohnemom. Nd yimar tuhafunanimohat na nhai tu tawisaf marnyakaha, ka yuht thatipetr tuhafunanimorr o be yafotharpat fnahni yimot. Bro Nkifrarpar tawisafwor.* ³⁻⁴ Tu Bro Nkifrar tuhafunanimotrr yimor hefenko. Nd yimar hefenr yihato wanymor wom kafrohet mrokfom, yo wom kafrohet nefm. Na nhai tawisaf marnyakaha ka yuht thatipetr tuhafunanimorr o be yafotharpat yimot. Bro Nkifrarpar tawisafwort rorhu yi nmbuhat. Nd ror wanymo mrokfom yo htimo nefm, nhai yimam kfo ptha hikkfot yo nhai nd mrokfom yimam kfo ptha nriyaf mif mifkfot. ⁵ Kanga nd yimarhu yufat ayuta grha yindhorante, to nhai. Na nhai tukanhu yufat tfit yuta grha yindhorkfot. Na ndhtet yimena, be nanrpayann finji narmoyanm tamoh nefm o finji hingrnarmoyanm tamoh hingrnefm. Bro Nkifrar tohnhomotra tamoh tamoh nefm namoyanm o hingrnefm hingrnarmoyanm. Ndtpno na Bro Nkifrar kfo grha yindhorwanr.

⁶ Nanhu tamoh mrokfom be kfo mif mifwanm. Ndnettn na kanga nanhu yufat ayuta grhayant, to nhai mrokfom, to na mrokfom kfo pthaneft nhai mmo kanjo mrokfom be tubatu-yaknikahanm. Nhai. Nanhu mrokfom dukak hanyhato kfo pthiwanm. Yo mrokfom kfo mif mifruhanm. To na, na nhai wofnkaha na Bro Nkifrar tuhafunanimo yuhathu mrokfomn yimam wanyhato be nd mrokfotn rim rhuta mrhutahato nann yimam bro yufat htaneft. Nhai. Na nikompono tohhato namo nefm yo pthamo mrokfom dukakkfot. Nd tkittn htirahn, na tamohtet yimaya.

Krho nmbuhat Porr wasmotr huhrat kanjo

⁷ Bro Nkifrar hefenrhu dborioh dborioh shrkar fak nuhasmora yo dborioh dborioh mrokfom kfo nuhas-mora. To Bro Nkifrar nhai wofnkahr na kfo grha yindhor manyeft, “Nanrpayann Bro Nkifrar fak nuhasmor hefenrhu kafrohet shrkar yo kafrohet mrokfom. Nanrpaya yufeta.” Ndnetrn wom bro krho nmbuhat hemora. Nd krho nmbuhat huhrat washato hiyamonwa kanjo inji yironamoa. Bro Nkifrar nd krho nmbuhat hemohat Satanr htihato memor, “Hifa nd krho nmbuhu yuhatn rim tohniruha.” To be Satanr nd yuhat buha yarim tohnehato nd krho nmbuhat tfit rorn yakhato tfit rorn nd krho nmbuhaye hta karhumorr nd kfo grha yima yuhur. ⁸ Husfirpa kfo bruttnat kfo bruttnamoyanr Bror nd krho nmbuhathu yak thuneft. ⁹ Kfo bruttnamotanr nhai yak thurmort nanhu krho nmbuhat. Be kfo memora, “Nd krho nmbuhat nhai yak thurhotant. To mirahn ka nhai yuhuwafkohann. Nhai. Na yuhuwafwann. Na nhai yukatoh marsisarhotann ni ndar krho nmbuhat titewohat. Na titahiruhann.” Bror inji kfomotra na tamoh krhopam titaneft na be yindhorhato titewanm. Nanhu Kraisr tor,

* 12:2: Nd yimar Porr dkfo memo Kristen yimar yura hefenrhu tu wuroh kmi mfhat yimor, ndr tu Porer.

rorn bmtefr hnewurr. ¹⁰ Ndnettn na Kraisrhu hingrneft hingrnahany hingrna hanyhato mhingrna narhohtewan o wonk wonk kurhefenm kekwoman o yimam sinyahato rir borirwoma, nhai mrokfom. Nanhу Kraisr tor, rorn bmtefr hnewurr.

Porr dukamort Korinm Jisasr hikwa nmbuhat

¹¹ Nd nanhu dboriorh nefroh kfo yindhор mrokfom tfit tukann kfo pthiwanm, ndm rom nikomn kfo ptharfokomm. Tamohmpno nhai nikomn kfo yindhorkahkomm na niwa dboriorh nefm? Nd yimam niko kfo yamuka, “nmoh aposerm,” nd yimaroh hingrneft kfo yindhorneftn niko be mrhunitko. Rom hingrnewa hingrneft nhai na hingrnewa hingr-neft kanjo inji hingrnakahmt rroh hingrneft. Nhai mrokfom. Na htitkoma yima furapam kanjo. Rot htitkoma yima furapam kanjo, ¹² to htimokomt na nikompno tohhato hingrnamo hingrneft? Finji tohhato hingrnamoya? Tot fak nuhasmoyanko tu aposerroh hingrnayuk hingrna yuhat. Nd wuruha aruha niayuk krhopam na tohhato titamohat ndm htimokomm, yo htimokomm na wonk wonk mirakerm na hingrnamom, yo wonk wonk nefm na hingrnahato tuhant yindars miyoh riha rmonhato Bro Nkifrarhu bbukeft htimohat. ¹³ Na nikompno tohmohat, na wom siosmpno tohhato nahnamoa nefm kanjo inji nikompno namoya. Wom rpa nefrpatt nikompno namot, nhai wom siosmpno narmoyant. Yeshri, maruha, hmbresha nd ndroh he nmbuhatt na nhai nikomn kfo tndaukfot htarmoya. Ndrpat nndo namoya. To na inji namohate ka ufasoh beb nmbuhat namoya? Nikone yima yuhu duhateko na nayuk nefroh yak nhtaneft? Yima yuhume yaum famomko? To na fasoh neft na thombat wayafhotwakomt na nayuk beb nmbuhat.

¹⁴ Tfit bi yibon hanita nikompno namba tri taim nianeft. To ndar yaus na nia thombat nhaf nhai kfo mirhota nikomn krhopam hiruha nanhu tamoh tamohroh yak hanyeft. Nhai. Na nhai wofnkaha nikmoh tamohroh yak hutfanef. Kanga niko yimakomn na ayak ahatoha. To mrokfot nhai kfo mekaht yonmn yeshri tamoht yak htfashato yifammam mthu wuna hasorahmm. Nhai. Yifammam yeshrt yak htfashato yonm mhtahukmm.

¹⁵ Na nia thombat na be yindhorruha nanhu tamoh tamohroh nikmoh yak hanyeft. Na nhai wom tamohm dukarhota, niko dukahato nanhu yiham, nanhu hingrneft, nanhu dukefm, nanhu yikia tpt nikompno htaruhant. To wahtiko, ka nanrpaya ndhtet yima yuhur nikompno hta-ruhanr, to niko nhai tawo mfro nan-pno nikmoh yima yuhum htaruhat-komm.

¹⁶ Tfit nikmoh wommn kfo kangma, “Porr nompno tafon yuhat niahato tamohm tndauneft ror nhai ndhtet neft. Rorhut to be yima mkfo yongm boyongm yo mkfo ngeh bonhehhato wuskam tamohm kekwor.” ¹⁷ Niko inji kfiwatkma na duka mumiwa. Ka nd maruharoh yak nhafohyuk mrokfothu mkfo hanyuk yimam na kfo tkrurafmom, ka nikmoh yi mfrnhehhato nanhu wuskaroh yakneftn yimam kfo tkrurafmoyan o nhai? ¹⁸ Taitusr nann kfo kasinyafmoyanr nikompno yinyeft, yo tor wom Kristen bratar rpatt niamof. Ka Taitusrn wom yak brurfam yak nfhotinehato hna-morm? Nd no wiyauyaupa dukefr ka nhai tuno rpa yima yuhur rhuhato Bro Nkifrarparhu bbukeftpno wiyauyaukanhono nhai? Niko waduka hik marnyakahkomm mrokfom wakfo pthakomm.

¹⁹ Nom ndar gontwat wandfiowhat, nom nhai duka mekahnom, “Inji inji akfokahtnom Korinm hti mirahm, ‘Ndm tu aposer mifem.’ ” Nhai. Nom nikompno wandfiowhat, niko Jisasr hikwa hik yuhathu kfo bmtayuk mrokfomn gontwat htewunomm. Nom Kraisrpno bi rim tohniyet yimanomn nom Bro Nkifrarhu nyigampno kfo mifwononko. ²⁰ Na wom dukefr duka yanho hanitar, kanga kfo duha yirah-nomm, tfit miruha nikmoha aneya, tfit niko nayuk nefm mhti hhrekruhanm. Mhti hhrekhato tfit miruha kfo tebos mrokfom o kfo hta mrokfom ahiyanko nhai yindhorruhatko. Na wofnkaha na rhu hanyhato niko mrokfom gijohmt kanjo nateh natehneft o womroh hifa nefmpno o womroh dboriorh wuskam-pno kfo nur yuhuwehneft o tamoh mrokfom be watanhehakneft o niko tuko Kristenko nafrtndohhato rpen rpen o husen husen tohneft. Yo na wofnkaha rhu hanyhato tuko nakfo rindho borindhoneft o kfo rkmok kfo gungmiohnefm o niko tuhagrhhahato sioshu nefm tfit nikomn kfo kekutneft. ²¹ Yo na miruha nikompno aneya,

ka nia mhti yimtnaruhanm bok met yindarim nhai yima yuhum yak kekuthato mong trohrmom turoh ijoh tone yuham, fasoh nefroh naneftn o wom mett o yindarir htihato yima yuhu tohetoh nefm. Na ndhtet nefm mhtineft na be bro duka dungunangu-nefti bro yimneft Bro Nkifrarhu yingampno yakruha.

13

Wuroh kfo duka mrokfom

¹ Ariha namba tri yaus nikmoha niahato htiruhanko. Bi wom nianefmpno bi mhtimoyanm nikmoh fasoh nefm, tfit ar yauspno tfit finji mhtirhoyanko? Bro Nkifrarhu rfa borngt kfo kangt, "Hus yimaf o husfirpa yimam wom yimar wom neft nahasitr hti nriyafaknimr, nd yimar nhai wom kfo namhikfot kot htakfot." ² To ndt finji dukewako? Na bi namba tu taim nianeftpno nikmoh fasoh nefm mhtiyaknihato bro kfo duka mrokfot kfo tanymoyanm nd fasoh nefm nayet yimam. Tfit ariha afo yuhre nndo tohhato kfo duka mrokfot kfo duka kangango, na tfit niahato nd fasoh neft mhtineft, nhai hti marsisa-rhotanm nd fasoh neft nayet yimam. ³ Kangko awany hikname, wawanyko! Kraisr nhai hti marsisa hasokahrm fasoh nefm nahaset yimam. Nhai. Ror bbuka nanyjaretrn rorhu bbuka nanyjareftpno nd fasoh nefm nayet yimam kak hta bohtewurm. Ndnetttn na rorhu tkitt tohhato rorhu mrokfot kfo pthayuka, na kfo nyinga fnah-wanm nd fasoh nefm nayet yimam. ⁴ Jisasr bgre mis frdbkafhato bgre miyetr kasinyamohat, afo tafi bbuka duhatrn inji namomr. Tfit Bro Nkifrarhu bbukeftn thu kasinyafmottr, ariha bi nd bbukeftpno tohwor. Nom Jisasrpno frtkafhato tohyuk yimanom womnam bbukeft thu trohwotnom. Womnam Bro Nkifrarhu bbukeft korhnom. Nom nianeft to nd bbukeft-pno nom nia htirahnomko.

⁵ Niko tuko yak nhtahato htikfot, tu Kraisr kakitohwokon o nhai. Niko tuko hti nhtakfot nhai Kraisr ninhu yima yuhur rhukahr, to be ni nd yima mirahn ka Kristena. Nhai. Ni bi yima furaye. ⁶ Nom ndar hingrnewa aposer hingrneft niko rhuhato hti hik bohik-rahkomt nom hingrnewa hingrna yuhat, htirahko nomn tu aposer hingrneft mift hingrnewunom. ⁷⁻⁹ Nom Bro Nkifrar kfo bruttna thombat nikmoh fasoh nefroh yafho nmbuhatt kfo brutnewunomr. Kangnom akfo bruttnakahtnomr dboriorh nefrpam yakitohhato nd fasoh nefm yafhorahkomm. Kto nom yi mhtineft nd nikmoh fasoh nefm bi yafho thuhato Kraisrhu dboriorh dukefmi yima yuhur hiketkomn mfnahrahnom. Bi inji dboriorh rhu nmbuhatt ruhetko nom mhtineft be nhai kfo nyinga fnahruhatnomko. To tfit kfo nyinga fnah duha yirahnomko, womm kfo mirahm na Pora nhai aposer hingrneft tohhato kfo nyinga fnahrifornom. Mrokfom inji kfoneft, to nhai mrokfom. Nom to be niko Kraisr hikwa nmbuhatpno nom be yindhor yima yuhumpno korhwonom. Tor nmoh tu bro dukefr. ¹⁰ Bror nd aposer hingrneft fak htamora. Nd hingrneft yak htamohat nd hingrneftu hingrna-yuk hingrna yafothar rpat htamora. Na wuri afo tohhato ndar gontwarpatn mrokfom htefiwohat, nanhu yima yuhur duka kangr hifa bi wuri tohhato mrokfom bi akfohiyanko, kto na nianeft na nhai wofnaka tukmoh nyingatikhato tuko nayuk fasoh nefm-pno na kfo nyinga fnahneft. Na aposer hingrneft tohwohat, na nhai niko Jisasr hikhany tfit na mtohnihato nikmoh yima yuhum frtebikr botebikr-kfot. Nhai. Nann Jisasr hik hanyet yimako kfo bmta mrokfom hi hany-hato tpi habokkna hanykfot. Nd dukeftn nd aposer hingrneft fak htamora.

Porrhu kfo wobuh mrokfom

¹¹ Bi asom wuroh mrokfom. Watoh marnyatwako. Nikmoh tamoh tamoh nefenm naneft be Kraisr dukewa dukefrpar hikkfot. Niko buga rpa dukefr hikhato rpa yima yuhur rhukfot. Inji narahko Bro Nkifrar toh tamnourahrko. Toh tamnouhato rorhu yima yuhur nikompno rhurahr. Nikompno rhuhato noh hmbre yima yuhum htarahhrko. Torpar yima yuhur bi kfohneyanr, ndrpar hikkfot.

¹² Niko lotu yiham rifinyneft, niko tuko Kristenko naki yindhorhato tir nhekfot. Bro Nkifrarhu met yindarim kfo yindhorkfot htefiwumt.

13-14 Nungothet Jisas Kraisr yuhu-wafhato ayak marnya bomarnya-twarko. Yo Bro Nkifrar mondtu ahtatwarko. Yo Bro Nkifrarhu Yafothat tuhamuhkahtko tuko Kristenko nayak marnya nayak marnyahato rpat tohrahko.

**Galesia thofroh gontwat
Porr dwandfakhato htafmot
Barkof kfo nuhas mrokfom**

Judam tom tu barkof kmim Jisasr rihik gungonakmom. Kto yima tangim. Aposer Porrn gutnius mrokfot hany habrihato kfo ptha nuhas htifasmotrt yima tangim wanyhato Jisasr rihikakmomr. To nd yima tangim rom tohhnamo yiham nhai Mosesrhu boririfhut hikrmoam. Ndnetmn bok dukefm kakmoum. Duka memoum, “Nom Jisasr hikwohate ka Mosesrhu boririfhut ka hikrahnomt o nhai?” Nd bok dukefm kakmoum. Judam sinyahato kfo memom, “Yimam kangm Jisasr ahiknom, nd yimam Judaroh nkifra tha pukwa yuhat hikkfot. Yo Mosesrhu wom boririfhum hikkfot.” Porr ndhtet mrokfom wanymohat kfo memor, “Arihat Bro Nkifrar nhai tha puketm htihato hti yindhorkahrm, nhai. Arihat Jisasr hiket yimarpam hti yindhorphor. Hti yindhorphor tohwom.”

Galesia thofmpno ndar gontwat wandfafmohat, Porr wanyakmor wom Judam Galesiako yihato Galesiakorhof Kristenm kfo tkrurmomm Mosesrhu boririfhuthu hikneft. Porr nd mrokfot wanyakhato ndar gontwat Galesiampno htafmort. Porr duka memor, “Nd Judam yihato nkifra boririfhu hikneftn frhammadahmm.” Ndnetrn ndar gontwat wandfakhato htafmort.

Porr ndar gontwat htamo barkof mrokfot kfo memor, “Bro Nkifrarn nda Aposer hingrneft htamora. Nhais be tukanhu fijon o wom yimar htarmora. Nhais. Bro Nkifrar yima tangim dukahato memor, ‘Rorn nd kmimpno yihato gutnius ptha nuhasrahram.’” Ndt kfonihato tfit wom mrokfot kfo memor, “Yimam Krais Jisasr yakitohwam tom nd yimarpam rroh toh rawofm Bro Nkifrar hti wuthewurm.” Wuroh mrokfom kfo memor, “Nom bi yiro nyimsrn rir hmbreyetnom Jisasrn fak nyimbisakakmornom. Yak nyimbisakakmotrnom yimanom korhnom. Yo Bro Nkifrarhu Yafothan yak hta bohtiawtnom dborior dborior nefm newunomm.”

Tu Bro Nkifrarn Porr Aposer hingrneft fak htamorr.

(*Sapta 1.1-2.14*)

Tu Bro Nkifrarn Porr aposer hingrneft fak htamorr

¹ Na aposer Pora, nann ndar gontwat wandfiwanko. Nd aposer hingrneft yakmohat nhais wom fitoh bro yimamn wakfakhato kfo tkrurrrmoma gutniuskfothu kfo htifas habrineft. Nhais. Jisas Kraisri ee Jisas Kraisr kasinyamo Bro Nkifrar, nmoh Bro Yifemr, rofn nd hingrneft fak htamofa. ² Nani nanopno hingrnewa Kristenm, nom rpatn kahukwonomko ndar gontwat niko Galesia profins yorhwa siosroh met yindariko.

³ Bro Nkifrar, nmoh Yifemri yo Nungothet Jisas Kraisr, rofpno kfo bruttna kanga, nikmoh rhu nmbuham, yima yuhum yak marnya bomarnya, yak hta bohta marnyakahtfko be rhu marnyarahko. Nhais wom tamoh dukefenmpno rhuruhatko. ⁴ Kraisr Bro Nkifrar, nmoh Yifemr, kfomo tng yuhatn hikhato suh nanyormor. Nhais be sfno noh furarmor. Memor, “Anoh-kahta, yimam nanhu noh nmbuhat htihato toh bmtaruhamn nd fasoh fasoh nefm mong trohhato dborior nefrpam hikrahm.” ⁵ Ndnetrn yiha yiha kfo yuta hagrha yindhorrhahnomr.

Rpa gutniuskforpat korht

⁶ Nd niko niwa nefmpno na tfit mduka nhiyakahukanko. Bro Nkifrar niko hti yuhuafhato Kraisr kfo tkrurrafmotrr ror niehato fakmorko. To bi rorhu tirt ruhetko tfit yudbatn mong trohmokomrn tfit womhtet gutniuskfot hikmoko. Na wofnkaha niko ndhtet neft naneft. ⁷ Nd womhtet gutniuskfot niko hikwat niko mirahko ka tu Kraisrhu mrokfo mifet. Nhais. Be wom yimam niewamn kfo kekut bokekut nhehwomko. Niko rom kfoyuk mrokfom wanyhato mduka happuktewuko. ⁸ Bi niko barkof wanyhtayuk gutniuskfot tfit nomn o mounmotmn niahato tfit womhtet gutniuskfot kfo

nuhaswomko, nd yimar inji nayukr, na kfiwa, “Bro Nkifraye, wayak hatohafokahtnr kaht aiswar.”⁹ Bingot bi kfomonomko tfit ndar gontwattn tfit rpahtet mrokfot tfit wompam kfiwanko. Wom yimar niahato nhai niko barkof yakyuk gutniuskfot kanjo kfo pthakahrt, na kfiwa, “Bro Nkifraye, wayak hatoh-afokahtnr kaht aiswar.”

¹⁰ Na nd kfiwa mrokfot to niko finji dukewakomt? Bro Nkifrar kanga awany yindhorra, ndnetann nd mrokfot kfiwanko? E, yimam kanga awany yindhorma, ndnetann nd mrokfot kfiwant? Nhai. Na kfiwanko, amekahann yimam inji dukahato awany yindhortwoma, na nhai Jisasrhu hingrna yimaya tohrfota. Nhai.

Porr aposer hingrneft yakmo yuhat

¹¹ Bar yinouroko, kfo mifwanko, nikompno na nia kfo nuhashemo gutniuskfot, nhai wom yima mifmn wakfo pthakrmomt.¹² Nhai wom yimarn kfo nuhas bonuhasrmotra na wanyhato nia kfo nuhasrmoyanko. Nhai mif. Tu Jisas Kraisrn mrokfom yak nuhasmotra na mrokfom rorpono yakhato nia kfo nuhasmoyanko.

¹³ Na bingot namoa nefm wany-moukomm. Na bingot tohmohat Judaroh nkifra boririfhut fak hik marnyamoyant. Na nd boririfhut yakitohhato Jisasr hikwa met yindarim bi fak batihany titamoyanm.¹⁴ Na toh hnamohat, na nhai Judaroh nkifra boririfhut riyak htafo wonrmoyant. Nhai. Judakorhof bok damiagm nanpno rpat warho hanyuknom nann boririfhut yak marnyahato nann tfit kfo hta bohtamoanm. Nanrpaya tunmoh nkifrar boririfhut faktoh kihmoyant.¹⁵ Na yuhre mmemthu yatit ruhetann bi Bro Nkifrar hti yuhuwaftato kfo memor, “Nd yonrn aposer hingrneft yakinohrahrt.” Hti yuhuwaftato yakmora rorhu hingrneftn fak htamora.¹⁶⁻¹⁷ Rorhu dukeft duka memor, “Tukanhu yonr ayak nuhaskohtann ror htiruharn yima tangim kfo nuhas hi hanyrahrt.” Nd dukeftpno fak nuhasmora. Na ror htinimohat nhai tfit marimoya, “Wom yimarpno yirhoyann rorn kfo hta bohtahato yak nuhasrahra hingneftu hingrna yuhat.” Nhai. Yo nhai marimoya, “Jerusalemko afo yiyaknirhoyann nd aposer hingrneft bi ritoh gngonakyuk yimampno afo yiruha.” Nhai. Na Bro Nkifrarhu yonrpno nahtimohat be kantri Arebiako be yiyakni twanhomoya. Be ndko afo tohafonihato ee tfit taun Damaskusko yimoya.

¹⁸ Husfirpa gunyjimm yinyimotm Jerusalemko yifrar yihato Pitar mhti tanymoya. Fiftin yiham tohnho tanymoyanr.¹⁹ Pitarpno mtih tany-mohat nhai wom aposerm htirmoya. Brorhu nmem Jemsrpar htimoya.²⁰ Na mirahko, ka kfo firewurnom. Na tu kfo mif mifwanko.

²¹ Jerusalemko tohni hanyhato kto tfit Siria yo tukanhu distrik Silisiako, nd hus distrikf yi htifasmoya.²² Judia distrikthu Kristen yimarpam nhai tafi htirmomt nanhu nyigatikt.

²³ Be wanys wanyomoum kfo memoum, “O nd yima Porr, nom yak batihany sitamo yimar, rorn tfit arihatn tfit kfo kangrm, ‘Kraisrhu mrokfot wawany yakiolahkomtn wahikkomt.’ Arihat bi inji kfiwurm.”²⁴ Inji bi wanyomomn Bro Nkifrar kfo yindhormomr.

Porri wom aposerm tfit rpa yima yuhur fakmom

¹ Fotin gunyjimm tohnhato ee kto tfit Jerusalemko Barnabasr-pno yimno. No yimohat Taitusr faknimno.² Tu Bro Nkifrar niahato kasinyamora Jerusalemko yinyeft. Na Jerusalemko yi tohmohat tuha Jerusalemthu sios hingrneft tohwa yimarpampno turpatnom rhuhato kfo nuhas bonuhasmoyanm na yima tangimpno yihato gutniuskfot kfo nuhasmo yuhat. Memoya, “Rroh dukeft wany marnya duha be nanhu dukefrpatn hingrnaruha nanhu hingneft yi furaraht.”³⁻⁴ Na sios hingneft tohwa yimampno rhu rifinyhato nom napthamohat nmoh mrokfefm wany rikohyuk yimam yuwi yimomn mkfo nheh memomnom, “Nom Jisasr hiket yimayenom. Kangnom, rhuhato niko pthayuk mrokfefm wany yakinohrahnomko.” Yuwi inji mkfo nhehmemnom. Rroh dukeft memom, “Rhuhato wany yakinohrahnom. Judaroh boririfhut finji kforuhamt? Yak yirityafrahmt o yakinohrahmt?” Na nd riny swirt mrokfo kfo pthamohat nhai

marimoya nd nkifra boririfhuthu nmbuhat ptha srhrahnomt, nhai. Rifak htafmoyant. Gutnius mrokfothu mrokforpat rhu napthamonom. Ndnatn nd yimam wanysihato kfo memom, "Wakfotwanm, 'Judaroh nkifra tha puknefti boririfhut mirahn ayafho thunomt.' Yafho thurahmt Bro Nkifrar nhai yindhorrughatr." Rom yihato inji kfo pthamohat Jerusalemthu sios hingrneft tohwa yimam nhai rom pthamo mrokfot hikhato kfo mari-moma, "Nd ninpno niayuk yima Taitusr nndo Grik thofer, tha wapuk-twanr." Nhai inji kformoma.⁵ To na nhai marimoya, "Nd yi pthayukroh mrokfom wany yakiohato Taitusrhu that puk thurahnomt." Nhai. Nanhу yima yuhur nhai wofnkahr gutnius mrokfo yuhat kfo nuhashany tfit wuyakhato tfit wom yuhat pthakni inji nakfot. Gutnius mrokforpat pthewunomt ndrpatt ptha nuhashato niko yimako nd gutniuskfot wanyukko wanyhato ndrpatt hikraho.

⁶ Na nhai bro yufat mhtiyakkha. Yo Bro Nkifrar nhai yima hatohyuk bro yufatn htikahr. To na nd Jerusalemthu sios hingrneft tohwa yimampno rhuhato na hingrna habrimo hingr-nefthu hingrna yuham kfo ptha nuhasmohat rom nhai wom mrokfom kfo ptharmom.⁷⁻⁸ Kfo memoyanm, "Bro Nkifrarn Pitar mrokfo rifhur hemotrr aposer hingrneft Judampno hingrna habrimort. Nd Pitar mrokfo ptha rifhur hemo kanjo, na inji mrokfo ptha rifhur hemotra aposer hingrneft yima tangimpno hingrna habrimoyant." Na inji kfomota nd bro yimam kfo memom, "Pitarn Bro Nkifrar fak htamor Judampno tohhato gutniuskfothu kfo ptha htfasneft. Porrne yima tangim-pno."⁹ Sios hingrneft, met yindarim htimoahat htimoahat Jemsri, Pitare, Jonr, romn bromoumt sios hingrneft. Nd bro yimam nanhu hingrneftu mrokfom wanymohat memom, "Be tu Bro Nkifrar yuhuwahato nd aposer hingrneft fak htamorr." Be nd yiha rifakitohakmomno Barnabasrpno. Riyakitohakhato hingrna yuham nafak nhtamonomm. Nonn yima tangimpno aposer hingrneft fakitoh-mono. Romn tu Judampno.¹⁰ Hingrna yuham nayak nhtanimohat rpa mrokforpat kfomomno. Memomno, "Nmoh siosn tohwom wom yimam maruha duhatm o wuskapa duhatm. Nd yimam mirahfn, ahti marsisanonm. Nifnhu tirtu arhutwam." Na bi ndhtet yimam bi yikitoh hnetann tfit nd bro yimarohtngt inji wanymohat na be yindhormoya nd yimarohtngt yikitohneft.

Pitar namo neftpno Porr yima nyiningahato kfomorr

¹¹ Kto Pitar tfit yimor Antiokko. Ndko tohhato wom neft namotr tu Pitarhu nyiningahato kfo nyininga fnahmoyanr.

¹² Na Pitar kfo nyininga fnahmo nmbuhat nhai be sfno. Pitar Antiokt tohmohat yima tangimpno yimoarn nuwa yemska inji namour. Wom yiha Jemsr kfo tkrurafyuk Juda Kristenm yimom nd Pitar tohmo kmi Antioktn. Pitar nd Juda Kristenm htiyakmohat nhai yima tangiroh kmifam tfit yihato yemskarmoar. Fakrmemor, memor, "Yima tangimpno rhu nafinyrhota hti nriyafrahma."¹³ Wom Judam nd tuha Antiok tohyukm, nd Pitar yimo yimbuyef duha yuharpatt hik bugamom. Barnabasr, ror nhaf nd yuharpatt yimor.

¹⁴ Nhai gutniuskfot kfoyuk yuhath hikrmom. Na nd rroh nefm htimoayann, Pitar yimarohtngt kfo nyininga fnahmoyanr. Kfo memoyanr, "Ni Juda thofn arhun nhai tfit yima tangimpno yihato rhu nafif inji narfotn. Ni wom tangishofm kanjo tfit wom tangimpno yitann rompno rhu mska inji newun, to tamohmpno tfit kfo yamukanm, 'Judaroh boririfhut wahikko?' Ndt nhai tu dborioh neft nakahn."

Met yindarim Krais Jisasr yikitohhato hikwam, tom nd yimamn Bro Nkifrar kak wus bowuswor.

(Sapta 2.15-4.31)

Yimam Krais Jisasr yikitohhato hiketm Bro Nkifrar kak wus bowusworm

¹⁵ Nom Juda nmoh trha yuhat, nom tu Juda frikef yuhtn trhamonom, nhai nd fasoh nefm nayet yima tangiroh frikef yuhath trharmonom. Nhai.¹⁶ To nom nhai duka mekahnom, Mosesr htanihemo boririfhutn yimam hikwamn Bro Nkifrar kak wus bowusworm. Nhai. Nom nhai inji dukakah-nom. Nmoh dukeft duka kangnom, yimam tu Jisasr Kraisr yikitohhato hikwam, tom nd yimamn Bro Nkifrar kak wus bowusworm. Ndnett

nom to inji buga. Nom Krais Jisasr yakitoh-watnom Bro Nkifrar kak wus bowus-wornom. Nhai nd boririfhuthu hikneftn. Bro Nkifrar bi kfo memor, “Yimar nhai boririfhu hikneftn yak wus bowusrhotanr. Nhai.” ¹⁷ To nom Judanom kangnom Jisas Kraisr hikruhanom Bro nkifrar hifa hti wutharahrnom. Nd yuhat kangnom ainom, to tfit htinom nmoh ruheft yima tangim kanjo fasoh fasoh nefm furkihwom. Tom nom inji htineft ka tfit kfo mekfot Kraisrn nd fasoh nefm mhfnahnamorm? Ka inji kfokfot? Ka nhai. ¹⁸⁻¹⁹ Nanhu htiyeft inji htitant, bingot Mosesr htanihemmo nkifra boririfhut hikmoahat Bro Nkifrar nhai hifa hti wutharmorr nanhu yima yuhur. Nhai. To be ndnatn nd nkifra boririfhut yafho thunimoyantn Jisasr bi hikwa. Jisasrpno bi tir niyakitohhato Bro Nkifrapno rpat tohwono. Tfit arihat na Jisas Kraisr hik hany hik hany tfit Jisas Kraisr myafhonihato nkifrar boririfhut hikaknineft na nhai tu dborioh yimaya rhurfota. Tu fasoh yimaya rhurfoya. ²⁰ Na bi bgre misn Kraisrpno rpatn tuhegirmoyann bi rpatn nohhato nfri yima yuhur fakmoya. Nd na yakitohwa nfri yima yuhur, tu Kraisrhu nfri yima yuhur korhra. Be nanhu duka yuhuwaf nmbuhatn nohmor. Ndnett n tamoh tamoh nefm finji naneft nda bbinysoft, Bro Nkifrarhu Yafothat yahkhato hingrnewanm. ²¹ Bro Nkifrar yuhuwafmora. Ndnatn nd rorhu yuhuwaf nmbuhat na nhai yahkhato rituhaftakfot. Mosesrhu boririfhutn nmoh yima yuhum yak marnyahato Bro Nkifrar ahti wutharnom, to be Kraisrhu noh nmbuhat be noh furarmort.

3

Nkifra boririfhuthu hiknefti Kraisrhu yakitohneft

¹ Galesia thofko, be tu mmo hariyeko, Jisas Kraisr bgre mis nohmo yuhathu mna yuhat bi kfo nuhasmoyanko. To tfit frohmn kfo mmo bommomomko? ² Rpa ttiwon nmbuharpat kanga attiwonanko. Niko Bro Nkifrarhu Yafothat yakmohate fitoh yuhatn yahkhato? Judaroh nkifra boririfhut hikhato fakmokomt o Kraisrhu gutniuskfot wany yahkhato fakmokomt? ³ Ka bi yon mumemn kanjo nhai wom dukefm rhukahmko. Afo Bro Nkifrarhu Yafothat thu bmta hnamottko Bro Nkifrar hik marnya hnamokomr. Tfit arihat nd Bro Nkifrarhu Yafothat yafho thunihato kangko, “Tukmoh fijo ahiknomr Bro Nkifrar.” ⁴ Niko bi barkof yakmo krhopam ka be fak furamokomm? Na kanga, ka nhai yak furarmokomm. ⁵ Ka niko Bro Nkifrah Yafothat hihato nd mirakerm hingrna thofte ka Judaroh boririfhut hikwatko mirakerm hingrnewukomm? O ka gutniuskfot hikwatko mirakerkfot hingrnewuko?

⁶ Abrahamrhu tndht dukakkfot. Abrahamr Bro Nkifrarhu mrokfom wany yakiomo yuhatn Bro Nkifrar fak wus bowusmorr. ⁷ Ndnett niko ndt hti dukakfot. Abrahamr Bro Nkifrar wany yakiomo kanjo yimam Kraisr wany yahkhato fitoh yimam Bro Nkifrar kutewurm Abrahamrhu yon kunys. ⁸ Bro Nkifrarhu gonborngt kfo kangt, “Bingot Bro Nkifrar bi duka hta memor, ‘Kto yima tangim nanhu mrokfot wany yahkhato fitoh yimam Bro Nkifrar.’” Nd dukefetrn bi Abrahamrpno gutniuskfot bi kfo nuhas hta memor, “Nanhu mrokfom bi ninn wany yahkhato fitoh yimam Bro Nkifrar.” ⁹ To be Abrahamr Bro Nkifrarhu mrokfom yahkhato fitoh yimam Bro Nkifrar yak marnyamo kanjo, fitoh yimam Bro Nkifrarhu mrokfom inji fakitoahmm, to be inji Bro Nkifrar yak marnyarahrm Abrahamr kanjo. ¹⁰ Yimam Judaroh nkifra boririfhut hikhato kangm, “Bro Nkifrar nmoh yima yuhum ayak wus bowusrm,” nhai yak wus bowusruhatrm. Yak hatohaforuhatr kaht riyahm. Bro Nkifrarhu gonborngt kfo kangt, “Yimam nhai nkifra boririfhuthu mrokfo bugam hik marnyakahmm be Bro Nkifrar yak hatohaforuhatr kaht riyahm.” ¹¹ “Bro Nkifrarhu mrokfom wany yahkhato hikwa yimam yak wus bowusruhatrm be rroh tohefm toh marnyarahrm.” Nd mrokfom htitanomn duka kangnom, “Be tu nhai mif yimam nkifra boririfhut hikhato rroh yima yuhum Bro Nkifrar yak wus bowusneft. Nhai mif.” ¹² Judaroh nkifra boririfhuthu hiknefti Kraisrhu mrokfothu wany yahkhato hikneft nhai rpat niyaktkafkaf. Nndoh nndohef. Kraisrhu mrokfom wany yahkhato

hikrahkomm hifa rhu marnya hatohrahko. To mirahko nkifra boririfhut hik hanyhato amyak yafidatni ayohninom.

¹³ Boririfhut inji kfomot, “Yimam nhai nd boririfhut kfoyuk mrokfo toh hikkahr, nd yimar bi huker.” Nd tkittn Kraisr yawihnehato rorn nmoh nohyuk tkitt yakhato rorn nohmorn nom be nhai nohrhwatnom. To Bro Nkifrarhu gonborngt kfo memor, “Yimam misn tuhegirhato nohmoam kfo miyakmom, “Bro Nkifrar yak hatohafoyukem.” ¹⁴ Bingot Bro Nkifrar bi kfo hta memor, “Abrahamr yak marnyamo kanjo yima tangim inji yak marnyaruhanm. Yak marnyahato nanhu Yafothat rompno htaruhant.” Nd dukeftpno Kraisr nohmotr to be Bro Nkifrar ndt htihato nhai namburhato yak hatohafokahrnom. Kak marnya bomarnyewurnom. Nom Jisas Kraisrhu mrokfom wany yakiohato hikneft rorhu Yafothat thu hamuhwotnom.

Bro Nkifrarhu boririfhuti Bro Nkifra Abrahamrof nayak dbkafmo mrokfot

¹⁵ Yinouroko, Bro Nkifrar Abrahamr-pno mrokfom nayak dbkafmohat nhai Bro Nkifrar tfit mrhu kekuthato tfit kfo kekutrmor. Nhai. Wom yimar noh yibonneftpno tamoh tamohm bi yonroh yufamn fak htaniyahurm nhai womm tfit nndo yak nhtakahmm.

¹⁶ To be nd yuhattn Bro Nkifra Abra-hamrof inji namof. Bro Nkifrar sinyahato Abrahamr kfo memor, “Nini ninhu frikeft yak wus bowushato yak marnyaruhan.” To nd Bro Nkifrar kfo memo frikeft yak marnyaruhan, nhai frikef bugathu yimam yak marnyarmor. Nhai. Kraisrpar fak marnyamor. ¹⁷ Na kfiwa mrokfothu mna yuhat inji korht. Bingot Bro Nkifrar Abrahamr bi kfo htamorr rorhu frikefthu yak marnyaneft. Bi nd mrokfot kfonimorth kto 430 gunyjimm yohnenimotm ee tfit mongkorn boririfhu mrokfom fakmomm. Ndnettn nhai tfit nd mongko niayuk boririfhu mrokfomt tfit myak tuhafokfot nd yimaroh yak marnyayuk mrokfot Bro Nkifrar bi kfo pthamot. Nhai.

¹⁸ Bro Nkifrar hifa yima yuhurpno Abrahamr kfo htamo mrokfom hikhato fak wus bowusmorr. Bro Nkifrar yimam yak wus bowus thoft nhai boririfhut hikwa nmbuhat htihato yak wus bowuskahrm. Nhai. Bi Abrahamr kfo htamo mrokfot yakitohhato kak wus bowusworm. ¹⁹⁻²⁰ To tamohmpno Bro Nkifrar boririfhu mrokfom hemorm? Tamoh dukeftpno? Nd boririfhut hemohat bi Bro Nkifrar Abrahamrhu frikefthu yak marnya yuhat kfonimorn ee kto boririfhut htamort. Rorhu dukeft duka memor, “Boririfhu mrokfom ahtakahtanm tamoh nefm yimam naneft tfit boririfhu mrokfeft mhtiyakhato duka mirahm, ‘O art fasoh nefet. Art dborioh nefet.’” Memor, “Nd boririfhutn yakitoh hanyruhamn ee nd Abrahamrpno nnakfo nuhas htamo yima Kraisr nierahr. Nieruharn nd boririfhut rorn riyak htaforahrt.” Nd boririfhut Bro Nkifrar hemot mounmotm kfo nuhasmotr tfit romn Mosesr kfohemomr. Tfit rorn kfo nuasmornom. Ror be buha tohhato Bro Nkifrarlpno mrokfom yakhato nom kfohemornom. Abrahamr nhai wommn Bro Nkifrarlpno mrokfom yakhato kfoharimomr. Ror tu Bro Nkifrarn kfohemorr.

Bro Nkifrar hemo boririfhuthu mna yuhat

²¹ Bro Nkifrar hus yihotaf htamor. Abrahamrpno wom mrokfot nafak tkafmoft. Yo tfit Mosesrpno boririfhut htamor. Ka Bro Nkifrar Abrahamr kfo htamo mrokfom rihtafohato boririfhutn htamort? Nhai mif. Bro Nkifrar ame-kahrn, “Yimam boririfhut hikhato yakrhoyanmn nanopno yarim tohrahm,” inji akfor to nd boririfhutn yimam hikrfom Bro Nkifrar yak wus bowusrform. Nhai inji kformor. ²² Turhu gonborngtn kfo memor, “Ndar bbinysofthu met yindari bugam ndar bbinysofthu fasoh nefmn yak kasitwatmm nhai dborioh yima yuhum yakkahm.” Ndnettn Kraisr yakitohet met yindarirpam Bro Nkifrar kak marnyewurm.

²³ Kraisrhu gutniuskfot tafi nia duha afo nkifra boririfuhe Bro Nkifrar fak hta bohtamornom. Duka memor, “Boririfhut yakitoh tefi hanykahmn ee kto Kraisrhu gutniuskfot hiruhanm.” ²⁴ Boririfhutn yak hta bohta hnamot-nom ee Kraisr niamor. Bro Nkifrarhu dukeft duka memor, “Boririfhutn yak hta bohta tefi hanyruhattm Kraisrhu gutniuskfot wany yakioruhamn yak wus bowusuhanm.” ²⁵ Arihat bi Kraisrhu gutniuskfothu hik yihayer bi. Nhai tfit boririfhuthu yak hta bohta yihar wom rhukahnom.

Kraisrhu mrokforoh wany yakiohato yak hik yuhat

²⁶ Niko bi Krais Jisasrh mrokfom hikhato rorpno frtkafwatko to be bi Bro Nkifrarhu yon bugayeko korhko. ²⁷ Niko bi baftaisnihato bi Kraisrpno rim tohet yimako bi Krais hmbrtakomr hmbrsham hmbrita kanjo. ²⁸ Nom bi Kraisrpno tohyuknom Bro Nkifrar nhai yak nhtahato kfo mikahr, “Wurr Judayer wurr Griker, o wurr slefer o wurr nhai, o wurr yindariyer wurt metet.” Nhai inji kfo nhtakahrnom. Bi Kraisrpno rim tohni bugewanomn bi kangme rpa yimayer. ²⁹ Niko rpat yak tiphato Kraisrpno rim tohneft to bi Abrahamrhu frikefthu yon bugayeko. Nd Bro Nkifrar Abrahamrpn nnakfo nuhas hta memohat, “Ninhu frikeft kto hifa yak marnyahato hifa rhu nmbuhat hiruhanm,” to nhai womm yakruhatmt nd hifa rhu nmbuhat. Nikomn yakrah-komt nd rhu marnya nmbuhat.

4

Kraisr hingrnamo hingrneftn nom Bro Nkifrarhu yonnom korhnom

¹⁻² Nanhdukeft inji dukiwa. Wom yimar turhu yinemrhu yufatpno htayuk yewurit o tamohit nhai wommn yakkahmt. Tu yinem yonrn kekwort. Yinem yonr tafi duka tungunakahar nd rorhu yufatpno htayuk yewurit o tamohit afo yifem nmbrtomromn yakinohwatmt ror be wom yima furar tohwor afo. Bi bro damiagere ee tfit turhu tirtn korhm. ³ Nom to inji namonom. Yon mumemn kanjo nkifra boririfhuthu yinhit tohhato fak hta bohtamoutnom. ⁴ Nd boririfhutn toh hanymonomn yonrhu nia yihar niamotr ee kfo tkrurafmotrr fawihnamor. Yima mif thet mettn hiyaumot. Hiyaumot to be Juda thofr tohmor. Juda thofr tohhato Judaroh nkifra boririfhutn hikmor. ⁵ Bro Nkifrar duka memor, “Nanh yonr aikahrn kfo hta bohta mirahrm, ‘Boririfhut be tmift wayafho thukomt. Hikrahkomt be nhai hifa rhu nmbuhat o hifa tkitt yak htaruhattko.’” Nd dukeftpno kfo tkrurafmorr. Memor, “Nanh yonr aikahrn boririfhu hiket yima buharn suh nanyorrah. Suh nanyorruhatr ndt htiruhann nanpno yarim fnahnehato nanhu yonm rhurahm.”

⁶ Arihat bi Bro Nkifrarhu yonko korhko. Ndnett turhu yinemr mithu nawohmo Yafothat kfo tkrurafmotr mithu nawohmotnom. Nd Yafothatn mithu nawohhato thu kasinyewatt-nom Bro Nkifrar kutewunomr dajar. ⁷ Ndnett niko nhai bi wom slecko wom tohkahko. Bi Bro Nkifrarhu yoneko. Bro Nkifrar nikmoh yufatpno htayuk tamoh tamohm nikomn yihato yakrahkomm.

Porr Galesia thofm dukahato yima yuhur nhai marnyarmorr

⁸ Niko tafi Bro Nkifrapno nahti duka duha toh hnomo yiham tukmoh nkifra tahi yifomn hik hnamouko. Nd niko hik hnamoa tahi yifomn nhai ndar nom hikwa Bro Nkifrar kanjo rhurmom. ⁹ Tfit bi arihatn Bro Nkifrapno nahti duka nahti dukewuko. To tfit tamohmpno ginyetm kanjo mongthur mongthur yitakomn yamu-kako tfit, “Nd yatk nkifra boririfhut ahiknom?” Nd yafotha yimbuyef duha boririfhut hikruhakomn to ka mirahko hifa rhu marnya nmbuhat hirahtnom. Nhai. Nd boririfhut hikrahko be tfit fnykt mim ki tawon hmbrita kanjo ki hmbriyaforahtko. ¹⁰ Niko inji newuko. Fitoh yiharn o yamtn o gunyjimtn tamoh neft bi kfiko rhuhato yemro burwat o tamoh neft finji naneft, nd niko kfoyuk yihar nhai rhu mmoni-kahko. Nhai. Nd niko kfoyuk yiham korhwokomm. ¹¹ Nd nefm tfit hikwatko nanhu yima yuhur nhai marnyakahr. Ka nd gutniuskfot na nikompno yi pthamot ka nhai yakitoh-kahkomt?

¹² Bar yinouroko, inji newatko yima yuhur nhai marnyakahr. Ndnett kanga, akfo nnuhanko. Nanh toheft hikkfot. Na nhai wom Judaroh neft yakinohrmoyant nikompno yi tohmoht. Niko na htimoht nikmoh tirmn rhumoya. ¹³ Niko ka duka hanitko na wom yiha dbohmeta nikompno yitoh-hato barkof yiha gutniuskfot kfo nuhasmohat. ¹⁴ Nd yiha niko na dbohneft yakhohat nhai hti marsi-sarmokma. Nhai. Mounmotm o Kraisr kanjo inji yakhohat nikmoh tirmn rhumoya. ¹⁵ Na nd bro dbohneft yakhohat nyingam bebtamohat na tukanhu nyingaye hti mifmoyanko. Nyingam be yak rurhakett arhum, ka nikmohmn yak rurhakhat nanhu nyinga bebr yak rurha thuhato nikmohmn

htarmokma. ¹⁶ Nd yiha hifa yima yuhur hmbremokma. Tfit arihatn faso yima yuhu bebr hmbrtkma. Bro Nkifrarhu tu mrokfom kfo nuhas hanitwotanko gobenm kanjo htitwokma.

¹⁷ Wawanyko. Nd niko mkfo yuhur boyuhuryuk yimam, nhai hifa rhu nmbuhat hiruhatmko. Yuwi kangm, “Inji amkfo yuhuraknikahnomm ayak tndohnomm. Yak tndohhato nompno yarim tohrahm.” ¹⁸ To nanhu yima yuhur nhai fitoko rhukahr. Nikomn be korhr. Nikompno brbo tohneft o wuri skitm tohneft na nhai duka mmonika-hanko. ¹⁹ Niko nanhu tu dborior yimateko. Niko ridukak thoft nanhu yima yuhur kurhiwur. Be nd kurho yima yuhur rhu hanyruharn bi tfit Kraisrhu mrokforpamn tfit hikwokome be yima yuhur marnyanirahra. ²⁰ Na wuri tohwoyann nikmoh mrokfot wanyhato yima yuhur nhai marnya-kahra. Be rpa tkitt rpat atohnom, awi, hifa hifa tfit kfo marnya bomarnyar-fotanko dborior yima yuhum tfit niarfomko.

Hagar Sararofhu kfo nhombra mrokfot

²¹ Nikmoh womm duka kangm, “Nkifra boririfhut ahiknom.” Afo Mosesr wandfamo mrokforoh mna yuham afo myak hik marnyakkfot. ²² Mosesr wandfamo mrokfot kfo memot, “Abrahamr hus metf yakhato hus yon yindarif kasinyamor. Tu yak tuhan mif Sarat hiyaumotr Aisakr. Rorhu hingrnefroh hingrnayuk fndoh tuhan Hagartn Ismerr.”

²³ Wom yak tuhanthur Bro Nkifrarhu tngtpno nasakmorr. Wom fndohthur nhai be Bro Nkifrar kformotr nasakrmor. Nhai. Ror be nasak furakmorr. ²⁴⁻²⁵ Bingot Bro Nkifrari Abrahamr wom mrokfom nafak dbkafmofm. Tfit kminysof Sainaitn Judampno nafak dbkafmommi boririfhu mrokfom. Sara Hagarrofn rhu nhombramoff nd Bro Nkifrar yak dbkafmo hus mrokfeff. Sainait korhwot Arebiako. Nd Sainait Arebiam kute-wumt “Hagart”. Yimam nd boririfhu mrokfom hikmoahat tohukatohroh tngm yak hikwa kanjo be inji hikmoumm. To mirahko ka bingotrpa nd boririfhut hikmoum. Nhai. Arihat taun Jerusalemthu yimam nd boririfhut yuhre kakitoh hanitmt. Ndnettn Hagarthu yon Ismerr kanjo yuhre boririfhuthu hingrna yimam korhm. ²⁶ Nom tu Bro Nkifrarhu taun Jerusa-lem mift tohyuknom, nom nhai nd boririfhu mrokfom tohukatohroh tngm yak hikwa kanjo hikkahnom. Abrahamrhu yak tuhan Sarathu yon Aisakr kanjo korhnom.

²⁷ Bro Nkifrarhu rfa borngtn profet Aisaiar wom mrokfot kfo memor,

“Ni, yon hiyau duha mete, yindhorrahn!

Yon yak rphawon duhatn yonmari yiham toh hnamo mete,

kfo yindhor boyindhorrahn!

Yindari frtroh tanyet metn, to nhai,

tfit yindariyet metm kanjo yonmari yon rifhur hiyau-rahn.

Yindariyet metm nhai ni hiyauruha yon rifhur kanjo hiyaukahm.”

Aisaia 54.1

²⁸ Bar yinouroko, nikomn Aisakr kanjo Bro Nkifrar kfohato dborhayuk yoneko. ²⁹ To tfit nd Bro Nkifrar kfo duha nasak furakyuk yonrn sinyahato Bro Nkifrar kfohato nasakyuk yonr faso fak bebmorr. Arihat to be nd rpahtet neft korht. Nkifra boririfhut hikwa yimam sinyewamn Kraisrhu mrokfom hikwa yimam faso kak bebwomm. ³⁰ Bro Nkifrarhu rfa borngtn kfo kangt, “Wayak tuhafonf hingrna metti rothu yonr. Fndoh tuhanthu yonr nhai tfit niahato yifemrhu wuskam yakitohkfot. Nhai. Tu bro tuhanthu yonr yakneft nhai mrokfom.” ³¹ Bar yinouroko, nom nd tndht htihato nmoh yima yuhum duka mekfot, “Nom nhai nd fndohthu yonnom rhukahnom. Nhai. Nom tu bro tuhan mift hiyauyuk yonenom.” Ndnettn nomrpanomn hifa rhu nmbuhat Bro Nkifrar hirahrnom.

**Kraisrn nmoh toh rawofm yak wus bowuswatrnom ee Bro
Nkifrarhu Yafothat yak hta bohtewattnom womm dborior nefm
newunomm.**

¹ Be nd nkifra boririfhutn tfit rim hikak mhikak yifahta hatoh duha. Kraisr bi nfri yihotar fak hta nuhasmornom. Tfit wom yimam niahato mtawas tiwonwomko tha pukneft wany marsisafohato toh bmtakfot. Riwany yakiowakrahkomm to be nd boririfhutn yak hta bohta hasorahktko.

² Wawany marnyafo hanyswako na Pora kforuha mrokfom. Tfit mirahko Judam kanjo boririfhut hikhato tha apuk thunom. Inji narahko to be Bro Nkifrar nhai Kraisr nohmo yuhat mhtiyakhato yak marnyaruhatrko. ³ Tfit wom mrokfot kfiwanko. Fitoh yimam kangm, “Nd nkifra boririfhut hikhato tha apuk thunom,” nd yimam to be mirahm wom kfo boririfhu mrokfefenm arim tohnim. Nhai. Nd kfo boririfhu mrokfom rim hikak mhikak bugakkfot. ⁴ Niko kangko, “Ka boririfhut hikruhanomn Bro Nkifrar yak wus bowusrahrnom.” Nhai. Niko be tukomn boririfhut hikwakomn tfit Kraisr yekwakomr nndo riyak htefiwukomr. Inji newuko Bro Nkifrar nhai hti yuhuwafhato yak marnyaruhatrko. ⁵ To nom nhai. Nom be Kraisr wany yakiohato rorhu mrokfom bi hikwanomn nmoh yima yuhum be rhu duka haso kangm, “Nmoh yima yuhum Bro Nkifrar yak wus bowusrahrm.” Bro Nkifrarhu Yafothatn nd dukefr kahukwotnom. ⁶ Bro Nkifrar yimam yukatoh thoft nhai tha puket yimam o tha puk duhat yimann htikahr. Nhai. Yimam Kraisrpn rim tohhato womm hti dukewam, tom ndhtet yimam Bro Nkifrar kukatohworm.

⁷ Barkofpam afo hifa Kraisrhu mrokfot fak hik marnya hnamokomt. Yak hik hnamokomtn to tfit tamohrn buha tanhehafomotrko manysifm kanjo yihom kke rmonmoko? ⁸ Nhai nd niko nakuyakmo Bro Nkifrar tanhehaformorko. ⁹ Nikmoh yima yuhum tom bi nndo yiayknitm. Inji tefinitamn kto be nndo yirahm. Htitwokomt bretparoh hingrneft. Tefi yispenm yakhato plauapamn rihtafo-rahnk kto htirahnt nd bretpat tfit broraht. ¹⁰ Nanhdukeft duka kanga, “Bror fitha yiruhatr rroh yima yuhum nndo yiruham?” Na duka kanga, “Nd rom yorh hasiwa yima yuhum be Kraisrn yak marnya bomarnya-ruhatrm tfit nanhu yima yuhurn mikmbrehato hikrahm.” Nd niko harhuwa yima yuhurparne kangane, “Tamohrn frmmo bomumiwatrko mduka happuktewako?” Nhai mrokfom. Nd niko frmumiwa yimar Bro Nkifrar afo htiwonrahr.

¹¹ Bar yinouroko, nanhu mrokfom kfo pthamom, be akfo mekahann, “Tha pukneft nhai mrokfom,” yimam nhai namburrfotma. To nhai, kfo memoyanm, “Tha pukneft bi bgre misn Kraisr mfha htahato fak nohmort. Nd neft wayafho thukomt.” Nd mrokfot kfomota namburwoma. ¹² Nd yimam niko kfo mmo bomumiwam, tha pukneft kangm, “Ayakitoh hanynomt.” Nhai mrokfefm. Tumn nd neft yakitoh-hato be yuht nyisofetm puk tmbha thu hanykfot.

¹³ Niko, nanhu yimatko, afo nkifra boririfhu mrokfomn afo ufak afak-moumko. Tfit arihat bi Kraisrn nd niko yak nhirtamo mtitof tuket puk thumortn rorn yakaknihato rorhu mkuko rim fak htamorko. To mirahko akfo amanyom, “Nkifra boririfhut bi be. Bi nhai wom yakitohkahtnom tfit tunom hatochnayuk fasoh yima yuhu bebmn ahiknom.” Mirahko ndhtet yima yuhum ayaknom. Niko Bro Nkifrar hikwako tuko rpatn nahti duka nahti dukakfot. ¹⁴ “Tunn yak marnyewa kanjo inji womm yak marnyakfot.” Nkifra boririfhuthu mnat tot inji. ¹⁵ Be nd foh yaum nahti srthuwa kanjo inji nahti srthu hasorahko be nhai rpat tohruhatko. Inji rinahtakhato nathu mmbranirahko. Bro Nkifrarhu temperr be ndnatn tfit yoh nasohrahr.

¹⁶ Kfo hta mrokfot kfiwanko. Bro Nkifrarhu Yafothat yak htafo hanyuk yuharpat hik hakurahko, be nd fasoh yima yuhum yiho sinyaneft nd Yafothatn yak karhurahtm.

¹⁷ Nd fasoh yima yuhuri Bro Nkifrarhu Yafothathu dukefr nhai rpat nayak tkafkahf. Bro Nkifrarhu dukefr ror nndo. Fasoh yima yuhurhu dukefr ror nndo. Ndnetfn mano mano tohwafn tehwofm nikmoh yima yuhum. Dborioh nefm kangko ananom, to nhai nakahkomm. To tfit fasoh nefm niko hti hhrekwam tfit nd nefmn newuko. ¹⁸ Bro Nkifrarhu Yafotharpat yak hta bohtarahtko be htirahko boririfhut nhai tfit yak hta bohtaruhattko.

¹⁹ Nd fasoh yima yuhur rhuyuk nefm bi htieteko. Fasoh yima yuhur yorhwa nefm to,

Ijoh tonanyeft.

Ijoh tonehato yihof href to be nd dukefrn tohetoh hasokfot.

²⁰ Nkifra tahi yifonroh kfo tatoneft.

Yima tipneft, grwasneft, fortawon, nd nd yikitohneft.

Womm be hti srthuneft.

Kfo nambur kfo huttnefm.

Womroh hifa hingrneft o wuskam o tamohm hti yuhurhato kfo yuhuwehhato kfo wokneft.

Yima yuhum kaht kanjo wakur sinyaneft.

Nhai mifhat kasinyahato womm tamohm hti dukakfot.

Nayak mkuhato womm rom inji, womm rom inji, ndhtet tohneft.

²¹ Womroh hifa hingrneft o wuskam o tamohm hti yuhurhato yakneft.

Drin spak nefm.

Drin spakhato yaum kanjo yihom nakuyak mnakuyakneft.

Ndhtet ndhtet nefm.

Mrokfot to bi kfomoyanko tfit wompam kfiwanko. Ndhtet ndhtet fasoh nefm na haset yimam to mirahko Bro Nkifrarpu ka muhrahm Kraisr yawihna thombat. Tu be nhai mif.

²² Yimar Bro Nkifrarhu Yafothat ruhetr htirahn.

Wom yimam hti dukarahrm.

Yindhor rifhurpno rhurahr.

Wommpno hifa hifa nayak marnyahato rhu marnyarahrm.

Tamoh mrokfom wanyneft nhai be bmbri kaht kanjo wakuryakhato huttakniruhatr.

Hifa hifa yima yuhur womm hmbrerahrm.

Wom yimam yak marnya bomar-nyarahrm.

Rorhu wiayau nmbuhat hifa yau marnyahato kmi thofroh dukefm rorrpar bro dukeft htarahrm.

²³ Rorhu ruhefm, pthefm, ptha yima boyimarahrm.

Fasoh fasoh nefm duka hikhato yak hhrifnirahrm.

Tom ndhtet net yimam Bro Nkifrarhu Yafothat korhtm. Nhai wom boririfhut kfo mikah, “Ndhtet nefm mirahko ananomm.” Nhai. ²⁴ Kraisrpn bi rim tohet yimam rroh fasoh fasoh yima yuhum bi Krais Jisarhu bgre misn bi frdbkafmomm.

²⁵ Bi Bro Nkifrarhu Yafothatn nfri yima yuhur thu hmbremornom. Ndnetnomn Bro Nkifrarhu Yafothat finji kfiwutnom be nd Yafothat kfoyuk yuhatn nom hikkfot.

²⁶ Mirahko akfo hagrakahtnom womm wanyhato yima yuhum atifranjimm. Mirahko womroh hifa hingrneft o wuskam o tamohm htihato yima yuhum asinyamnom.

6

Fitohtet yewurit nuhte, ndhtet yewurit kekwo

¹ Bar yinouroko duka marnyafo hanykfot. Nikmoh womr htita-wokomr wom fasoh neft yifir, niko womko, Bro Nkifrarhu Yafothatn nikmoh wiayau nmbuham yak hta bohtiwako, nikomn yihato hifa yima yuhur nd yimar kfo hta bohta marnya-kfot. To niko, nd yimar mrokfom kfo ptharahnomr, niko tuko duka marnyafo hanyhato womr kfo pthakfot. Satanr nikomn tfit rim sunihato hatone nhehruhatrko surahko. ² Tuko nahti duka nahti dukakfot. Nikmoh womm tamoh tamoh krhopam kekwom, niko womko yihato titanhokfot. Tot tu Kraisr hiket yimaro neft. ³ Ni womn mirahn akfo amiya, “Na nd yimar kanjo krhopam yekwoyann na yi htiruhan?” Ndhtet tngt ka be kfo fura twanhiwun. ⁴ Yima afo tunhu rhu wiayau nmbuham hti tungunahato ee kfo pthakfot. Tu hifa hifa korht ninhu rhu wiayau nmbuhat ee btn kfo yindhorneft hifa. To mirahn ninhu rhu wiayau nmbuhat hifa htihato tfit womr faso akfoyanr. ⁵ Ni womn tunhu wiayau nmbuhat hti yukatohaf hanykfot. Mirahn womrhu nefm htihato apthaya. Womr, ror turhu duka fijo rhurahr.

⁶ Fitoh yimarn Bro Nkifrarhu mrokfeft kak nuhasworko niko tawo maruham o wuskam o yeshrim ndm yakhato hekfot.

⁷ Mirahko aduka amanyom, “A, nhai mrokfom. Nom nhai bi wom boririfhut rhukahtnom. Tunmoh fijo wiayau thombat Bro Nkifrar nhai htiruhatrnom.” Ka Bro Nkifrarhu kusmt frsrfewuko? Na kfiwanko, be tu nhai mif. Tamohet wuri fanm trufn o nuhte be ndhtet wuri fanm sinyarahm. Nhai tfit kekuthato womhtet wuri fanm sinyaruhattm. ⁸ Yimar turhu fasoh yima yuhur mhatoh fnahmor afo rhu yakitoh hanitr, nd yimar Bro Nkifrar yak hatohaforuhattrr kaht riyahr. Nd fasoh yima yuhur yak thuhato Bro Nkifrarhu Yafothathu dukefrn hiketr, be nd yimar tu Bro Nkifrarn yak hatohaforuhattrr turpno mtob nkifranirahr. ⁹ Ndnetttn dborior dborior nefroh naneft nom nhai hhrekakhato yafho thukfot. Yakitoh kihhato Bro Nkifrar fitoh yiharn dborior rhu nmbuhat heshombat nhai rim tohtaruhatnom. ¹⁰ Ndnetttn nom Jisasr hiket yimanom wom yiham wom Jisasr hikwa yimam htihato kangnom, “Womm dborior nefm ayak nuhasnomm,” nhai mrokfom. Yo nom wom wom yima bugamn dborior nefm yak nuhaskfot.

Jisas Kraisru yufarpat kfo yuta hagrha yindhorkfot

¹¹ Ndar na asomif kforuha mrokfot tukanhu tire wandfamoyant. Nantu wandfetem nd bro wandfafam. Wahtikahkomm duka marnyakfot! ¹² Wawanyko, nd nikmoha nia kfo pthiwa yimam yuwi duka kangm, “Tha pukneft akfokahtnom Galesia thofm tha pukruhamn nom hingrnayuk hingrneft Judam htiruhamn kfo yindhorrahnmom.” Nd dukeftpno tha pukneft kak tkurwomko. Duka kangm, “Kfo mirahnom, ‘Bi bgre misn nikmoh fasoh fasoh nefm Kraisr mfha htamorm.’ Inji kforahnom Judam nhai hifa nyngam htaruhatmnom.” Nd dukeftpno inji kfiwumko. ¹³ Nd yimam rom tha puketm. To nhai Judaroh boririfhut hik marnyakahmt. Be yuwi kangm, “Wommn akfokahtnom, tha apukkahmn, Judam wanyruhamn kfo yindhorkfot. Nantu kfo yindhorneft nantu fasoh nefmn mfha htahemo yima Jisas Kraisru yufarpatn na kfo yuta hagrha yindhorkfot. Rorn nantu fasoh nefm mfha htamotrm nhai wom dukakahamn ndar bbinysfthu fasoh nefm. Womrpamn ndar bbinysfthu nefm dukewamn nhai dukakahmt Jisasr mfha htamo nmbuhat. ¹⁵ Arihat Bro Nkifrar nhai tha puket yimam o tha puk duha yimam htihato yindhorkahr. Nhai. Yimam tu Bro Nkifrarn yima yuhu yak wus bowuswam, tom ndhtet ruhet yimamn Bro Nkifrar hti yindhorkwom. ¹⁶ Ndhtet ruhet yimam hti yuhuwafruharmn yak marnya bomarnyahato Bro Nkifrarhu yon kunys rhurahm.

¹⁷ Na nhai wom wofrikaha yimam tfit wom krhopam hanyeft. Bi yonmari fhu gifa trukt harhuwa. Nd fhu gifa trukt kfiwut na Jisasru hingrna yimaya.

¹⁸ Be injirpa nantu mrokfom. Warhutwako. Bro Nkifrar kukatohaf hanitworko.

Efesus thofroh gontwat Porr dwandfakhato htafmot **Barkof kfo nuhas mrokfom**

Ndar gontwat Porr kalabus tohhato wandfamort. Be wandfamortn Tikikusr hiyafmotr rorn Efesus thofm hanyhemor. Porr hus bro dukeffpno ndar gontwat wandfakmortn Efesus thofmpno htafmort. Barkof kfo nuhas mrokfot kfo memorm, “Kto ndar mounti bbinysoft yorhwa tamoh tamohm Bro Nkifrar yakruharm tfit Kraisru tirtn htarahrm. Be tfit Kraisru yinhitn rhurahm” (1.10). Ndm kfo nuhashato kfo bmta mrokfom hemorm. Kfo memorm, “Ndar niko htita tamoh tamohm mount yorhwam yo bbinysoft yorhwam kto Kraisru yinhitn be rhu bugarahm. Ndnett niko be rpa yima yuhurpar rhu bugahato Jisas Kraisrpno frtkafhato tohkfot.”

Barkof mrokfom Porr pthamom afo nd rpa yima yuhuroh toh nmbuham ndm afo pthamor. Kfo memor, “Bro Yifemr kfo hta memor, nom rorhu yon kunyenom. Turhu yon Jisas Kraisrn nom hatohyuk fasoh fasoh nefm fak wus bowusthumorm. Yima yuhum wutham rhumotm, Bro Nkifrarhu Yafothat niahato mithu nawohhato nmoh rhu nmbuham hifa rhuhato rpa yima yuhur korhnom.” Wuroh mrokfot Porr nd kfomot kfo memor, “Niko bi Kraisrpno nayakitohhato tohwoko, ndnett wommpno nayak marnyahato toh marnyakfot.”

Nd Kraisrpno nayakitohhato wommpno nayak marnyahato tohneft Porr bok kfo nhombra mrokfom kfomor. Barkoft kfo nhombra memor, “Sioskfot yimar kanjo inji korht. Tu Kraisrn mfhayer. Sioskfot o Kristenm tir wura nd ndem.” Yo womt kfo memor, “Sioskfot kunyr kanjo korht. Kraisr dany rahur kanjo tohhato nd sioskfot hatohwort. Kristen yimam nd dany rahur hatohwa kunyrhu wohnfa hegit tik nd ndem.” Yo womt mett kfo nhombramor. Kfo memor, “Sioskfot metet. Kraisrn ramemer.” Nd nd kfo nhombra mrokfom kfo hta bohtamorm. Porrhu bro dukefr Kraisr yuhuwaftato yura bgre mis mnohhato fasoh fasoh nefm yak thuhato yiha yiha yak marnya bomarnyewa yuhamn ndm kfo nuhas bonuasmorm Efesus thofm.

Kraisru kkupaye Bro Nkifrar fak wus bowus thumorm yimaroh fasoh fasoh nefm

(Sapta 1-3)

¹ Na Pora, na Jisas Kraisru aposer hingrneft tohwa. Tu Bro Nkifrarn nd hingrneft fak htamora. Nann ndar gontwat niko Efesus thofkmoh yufatpno htefiwant. Niko Bro Nkifrar hikhato Jisas Kraisrpno rpat tir nayakitohhato tohwako, nikmoh yufampno ndar gontwat niewut. ² Bro Yifemri nmoh Nungothet Jisas Kraisr ayak marnya bomarnyakahtfko nikmoh yima yuhum mirhurahmk.

Nd rhu marnyayuk yafothar nomn bi kukatohwor

³ Bro Nkifrarhu yufat yuta yindhor boyindhorkfot. Bro Nkifrar nmoh Nungothet Jisas Kraisru Yifemer. Nmoh toh nmbuhat Kraisrpno nayakitohhato hifa tohwatnom Bro Nkifrar inji htihato nd hefen rifhur yorhwa dboriorh dboriorh wuskar yak hirahrnom. ⁴ Bi ndar bbinysoft tafi hingrna duha bi Bro Nkifrar kfo hta memor, Kraisrpno tir nayakitohruhanom tu Bro Nkifrar kanjo rhuhato yima yuhum wutham rhuruhamn nhai wom kspitefenm rhuruhatm. Bingot Bro Nkifrarhu yima yuhur bi nompno riruhakmor. ⁵ Ndnett yima yuhur bi Jisasrn duka hta memor, “Jisasrn nohruhatr nd rroh yarim fnahna yuhat yak nukakruhatrt be nd yiha nanpno yarim fnahnehato nanhu yufatn rhurahm.” Inji duka htamor. ⁶ Bro Nkifrar nmoh rhu beb nmbuhat htihato be tu bro yuhuwaft rhumotr. Ndnatn turhu marbit htamoia yonr yakmorr nd yuhatn htamorr. Nd yonr inji htamohat nhai wom dukefm yaktohrmor. Bro yindhoreftpno htamorr.

Nom nd Bro Nkifrar yuhuwafmo nmbuhat mhtiyakhato Bro Nkifrar be tu mfro kfo yindhor boyindhorkhato rorhu yufat yuta yindhorkfot.

⁷ Bro Nkifrar nom be tu mfro mif yuhuwafhato rorhu yon Jisas Kraisr niahato nmoh fasoh fasoh nefm rorn suh nanyormotrm nd fasoh nefm wuthanimom. Bro Nkifrar be mong troh bugamorm nmoh fasoh nefm. ⁸ Bro Nkifrar yuhuwafmo nmbuhat finji kforuhanomt? Rorhu yuhuwaf nmbuhat be tu bro mift rhumot. Bro Nkifrarhu riduka aduka yima yuhur be tu bro mifr. Hingrneft finji yiraht o ruheft finji rhuruhat ndm bi yak tkaftetm kakitohworm. ⁹ Kraisrpno hingrnamo hingrneftn fak dukamot-nom rorhu wom yima yuhur rhu kafrohmao dukefr. Nd dukefr be rorhu yima yuhurpar duka htatamorrn be rhumour. Nd yiha mfrpskenamor. ¹⁰ Bro Nkifrarhu yima yuhur yorhwa bro yima yuhur to be bi inji rhu hik hanitr. Rhu hikhany rhu hik hanyruharn nd tur bi duka htayuk yiharn be nd mounti bbinyssoft yorhwa tamoh tamohm be Kraisrhu tirtn htaruham be Kraisrhu yinhit rhu bugarahm.

¹¹ Bro Nkifrar bi tur duka htayuk dukeft hikwarrn tamoh tamoh nefm rorhu dukefrn rhu hik hanitm. Nom Judanom to nhaf bi tu Bro Nkifrarhu dukefrn memor, “Nd kmim Kraisrpno tir nayakitoohruhamn Bro Nkifrarhu yon mifm rhurahm.” ¹² Nom Juda-nomm tu barkof kminom Kraisrhu mrokfom yakhato hikmonomm. Nom nd kminomn bro nuka nanyjareft hatohet Bro Nkifrarhu yufat yutahato kfo yindhor boyindhorkfot.

¹³ Niko yima tangiko to bi wanye-teko gutnius mrokfot. Nd mrokfot wanyhato hikmotkomt, Bro Nkifrar inji htihato fakmorko. Yakhato nikomi nom bi Bro Nkifrarhu yon bugayenom. Bro Nkifrar tur kfo htayuk mrokfot hikhato turhu Yafothat thu hmbremorko. Bro Nkifrarhu Yafothat hatohet yimam to be bi Bro Nkifrarhu yimayem. ¹⁴ Nom Bro Nkifrarhu Yafothat yakmo yimanom to bi tot barkof htatehyuk minghat. Ndt nom mhtiyakhato duka mekfot, froh frohnom bi Bro Nkifrar yakhato bi rim tohni bugiwanom Bro Nkifrapno mrhuruhanomn hirahrnom nmoh yufampno yorhwa tamoh tamohm. Ndtpno nom nd bro nuka nanyjareft hatohet Bro Nkifrarhu yufat yutahato kfo yindhor boyindhorkfot.

Porr kfo bruttnamo yuhathu kfo nuhas mrokfom

¹⁵ Na wanyakmoya niko nmoh Nungothet Jisasrhu mrokfom wany yakiohato hikwa yuhat yo Bro Nkifrar hikwa yimam niko yak marnyewa nmbuham. ¹⁶ Nd ndm wanyakhato na kfo bruttna thombat Bro Nkifrar nikmoh yufam yutahato kfo yindhorwanr. ¹⁷ Nmoh Nungothet Jisas Kraisrhu Bro Nkifrar, tu bro nuka nanyjareft hatohet Bro Yifemr kfo bruttna thombat kfo kanganr, “O tunga Nkifraye, nmoh Bro Yifeme wayak hta bohtakahnm riduka aduka yima yuhum wahany. Wahekahtnm ninhu mrokfothu yimbu yuhat yak-rahmt. Yakhato mhti dukakruhamn. Mhti dukakruhamn ninpno nia tohrahm.” ¹⁸ Yo womt na Bro Nkifrar-pno kfo bruttnewat kfo kanganr, “Bro Nkifraye wom riduka aduka yima yuhum wahekahtnm, ninhu naku tngr htafmor nhai yak mmotaruhatmr. Yima yuhum wahekahtnm duka mirahm, ‘Bro Nkifrar nakumohat, nmoh rhu nmbuhathu yak marnya nmbuha yuhatn nakumornom. Nom rorhu mrokfom hikhato rorhu Kristen yimanom tohwatnom dboriorh rhu nmbuhat hirahrnom. Nd dukefrn nakumornom.’” ¹⁹ Dboriorh rhu nmbuhat yakruhanomn Bro Nkifrarhu bro bbukeft nierahtnom nom Kristenom.” Nd bro bbukeft nompno hingrniwat, ²⁰ to nd bro bbukeftn hingrnamat Kraisr nohmohat. Kraisr bi nohniyetr to Bro Nkifrarhu bbukeftn kfomot Kraisr tfit myenyjwohato Bro Nkifrar yaknimorr hefenr hamuhhato tirmifko htamorr. ²¹ Kraisr tu Bro Nkifrarhu tirmifko yorhwatr bro bbukeft korhtr. Kminy-sofroh nkiframi hefenr yorhwa mounmotm rorn yura mtohekworm. Nd bro yimam, gafman yimam, nd bro yufet bro yufet yimam rorrpar toh wasitrm. Arihat yorhwam yo kto rhuruham be rorpar toh wasi hany-rahrm. ²² Tamoh tamoh hingrnf, rhu nmbuham, o tamoh tamohm Bro Nkifrar to bi Kraisrparhu tirtn htamorm. Rorn yura mtohekworm bi. Ndnett Kraisrn sioshu tohak yimar fak htamor. ²³ Nom sioshu

tuhan yindarinom Kraisrn nmoh yima mrokfo rifuher. Sioshu tuhan yindarinmoh rhu nmbuhat yau nmbuhat Kraisrn kakitohwort mnat.

2

Bro Nkifrar nmoh yafotham yakmorm kafknehemornom

¹ Bingot tukmoh hanyjbornahato fasoh fasoh nefroh naneftpno yima yafotham bi frfnahmomn bi hel yita yihotarn bi yi hanymom. ² Ndar bbinysofthu fasoh fasoh nefm niko yikitohhato na hnamoam, to ndar bbinysoft yakinohwa tmb nyingetr, kutewumr Satanr, rorhu nefm fak hik hnamoko. Bro Nkifrar hanyjborniwa yimaroh toh nmbuham rorn kak hta bohta hnewurm. ³ Nom buga to nd nefm toh bugamonomm. Tunom mhatoh fnahyuk fasoh nefm faktoh hnamonom. Bi nd tunom nayuk fasoh fasoh nefmn yak hikafmotmm nmoh yafotham fnahhato bi hel yita yihotar bi fak mmbrafiny hanymom. Be wom yimam kanjo mekahnom nd nefrpam atoh hik hanynom to be Bro Nkifrarhu namburpam yakrfonom.

⁴ To hifa Bro Nkifrarhu hti dukefti yuhuwafeft tu brot rhumot. ⁵ Kraisr-pno nayakitohmotnom nd nmoh yafotham yak mmbrafinymoam, Bro Nkifrar yakmormn tfit kafknehe-mornom. Hifa Bro Nkifrar hti yuhu-wafhato fakmornom. ⁶ Bi Kraisrpno tir nayakitohetnomn to be Bro Nkifrar kafknehemornom. Kafknehato rpat Krais Jisasrpno hefenrhu king hingrneft kakitohnuhiwunomr. ⁷ Nd Bro Nkifrar nom hti dukahato Kraisr hemohat, rorhu tu bro yuhuwaf nmbuhat rhumoatn fak nuhasmornom. Duka memor, “Kto toh hanyuk yimam ndt duka hanyhato ptha tndh hanyrahmt nanhu yuhuwaf nmbuhat.” ⁸⁻⁹ Ndt nhai tukomn fitoh fitoh yuham yihato Bro Nkifrar htihato yakmiyakrmorko. Nhai. Ndnett mirahr wom yimar sinyakahann akfo hagr haya. Nikmoh yima yuhum Kraisr bro dukefm htahato hikmo yuhatn Bro Nkifrar hti yuhuwafhato fakmorko. ¹⁰ Jisas Kraisr nohmotr to be nd yuhatn Bro Nkifrar htihato nmoh yima yuhum yak marnya bomarnyamormn memor, “Na dukewa dborioh dukef yuhatn tfit toh hikrahm.”

Kraisr hnamorr gihu mtir

¹¹ Niko yima tangiko, niko tfit wamdukaktwakomt niko tafi Bro Nkifrapno yarim fnahna duhatko tohmohat. Nikmoh nkifram nhai Judam kanjo tha puk hnarmom. Nd yuhatn Judam kutewumko tha puk duha yima tangim. ¹² Niko Kraisrpno tafi nayakitoh duha, nhai bi Bro Nkifrar kfo htayuk kmi Isrermpno bi fknehato rompno nabnothato tohrmoko. Nhai. Niko be inji yau foym kanjo tohtamoko. Bi frohmn hti dukahato yakrmorko. Bro Nkifrar Isrermpno nakfo tahihato kfo memohat, “Niko Isrerkmn nanhu tannefen mif mifeko.” Inji nakfo tahimohat niko nhai bi yakrmorko Bro Nkifrar. Ndnett Isrermpno yak marnyamo kanjo nhai yak marnya hnarmorko. ¹³ To tfit arihatn Kraisr nohmo yuhatn Kraisrpno tir nayakitoh-hato Bro Nkifrapno brbo tohwoko. ¹⁴ Kraisrn nd gihu mtir hnamorr. Rorn Judami yima tangim yakhato rpat fak htamorm. Barkopam afo Isreremi yima tangim Mosesr yakmo nkifra boririfhuthu hik yuhamn fak tndohmotm. Yak tndohhato nahti dbnotmoum. Tfit Kraisr nohhato rorn gihu hnehato rpat fak htamornom. ¹⁵ Kraisrn niahato nd Mosesrpno yakyuk boririfhu mrokfomi wom kfo yirmoh mrokfom rpat fak thumorm. Nhai be sfno. Barkopam afo nd boririfhutn Isreremi yima tangim fak tndohmotm. Kraisr nd boririfhut yak thumortn be tfit rorpno rpat fak htamorm. Nhai wom nakfo yiriti inji nakahm. Be bi rpat rhu yemska inji newum. ¹⁶ To be bi Kraisrn yura bgre mis mnohhato Isreremi yima tangim yak nhafohhato rpat fak htamorm. Rpat yak htahato be Bro Nkifrapno rinayakmiyakhato rinfak nanymakmom. ¹⁷ Kraisr bbinysokko yawihnehato gutnius kfo ptha memor, “Niko kmi kmiko, nikompno nhai bi wom mro-kfom Bro Nkifrapno. Bro Nkifrapno nayakmiyakhato nayak nanyma-rahko.” Nd tngr niko wuri ritohbewa yima tangipakomi Bro Nkifrapno brbo toh tkafwa Isrer tangim, niko rpat dukahato nd tngr kfomorr. ¹⁸ Bro Nkifrarhu Yafotharpat bi hatoh nhombra bugewunom yima yimanom.

Nd yihotar Bro Yifemrpno yiyukr Jisas Kraisr yak htakhemor, nd yima yimanom hatohwa Yafotharn hta tehak hanitrnom.

Kristenm Bro Nkifrar mithu nawohwa kunyem

¹⁹ Niko yima tangiko afo gobiyem kanjo miswannn ttaf hnamoko, tfit arihat nhai bi inji rhukahko. Arihat bi bbinysofeteko. Bi nd Bro Nkifrar yakitohwa kmimpno bi fknihato bi rompno rpat tohwoko. ²⁰ Niko Bro Nkifrar hingrnayuk kunyrhu hegir, wohnfa, tikeko. Nom aposernomi profetm nd kunyrhu wohnfa rahuye-nom. Tu Kraisr dany rahuyer. ²¹ Tu Kraisr nd kunyrhu dany rahur tohhato kunyr hatohwatrr, kunyrhu hegir, tik, wohnfa, tamoh tamoht, rpat nathu dbcaf kihhato korhm. Nd kunyr Bro Nkifrar yuhre yiho hiyak hanitrr. Yiho hiyak hanitatrr kunyr tfit brota hanitr. Brorhu ye wussohyuk kunyr korhr nd kunyr. ²² Kraisrpno nayakitohwa yuhatn, to be Bro Nkifrar yekwarko nd rpat kak htewurko. To be Bro Nkifrarhu Yafothathu tohyuk kunyko korhko.

3

Porr gutnius mrokfot yima tangimpno hanyhato ptha htfasmo yuhat

¹ Na Pora, na Krais Jisasrhу hingrna yimaya. Na kalabus tohwohat nhai wom tamohmpno kalabus yak htarmoma. Kfo yamukota, yima tangi furam bi Bro Nkifrapno fknihato tohwom. Inji kfiwita kalabus fak htamoma. ² Na nikompno yihato gutnius mrokfothu kfo ptha nuhas hanyeft ka bi wanymoko. Bro Nkifrar niko hti yuhuwaftato nann fak htamor nikompno yihato kfo nuhas hanyeft. ³ Nd yima yuhur be Bro Nkifraparhu yima yuhurpar rhumour. Kto nanrpa-yanpno fak nriyafmorr. Ndthu kfo nuhas mrokfom to bi ndar gontwathu barkof htamo mrokfom kfo nuhas-moyanko. ⁴ Nd Bro Nkifrar Kraisr htafmo yuhathu kafrohet yima yuhur na ykmohat, ndar gontwat yorhwa mrokfom hti hik marnyewukomme, ee btn hti hikrahkomm na nd rorhu kafrohet mrokfom yakmo yuhat. ⁵ Bingot toh hnamo yiham Bro Nkifrar nhai wom yimampno kfo nriyaf hnarmorm rorhu yima yuhur rhuyuk mrokfom. Asot ariarpa tu Bro Nkifrarhu Yafothath nom rorhu yak htamo aposernomi profetmpno kak nuhaswotnom nd kafrohet mrokfom. ⁶ Nd kfo kafrohet mrokfot inji kfiwut: Nd gutnius mrokfot nikompno yitat niko yakhato hikrahkomt, to be nd yuhatn nom Judanmoh skurfitn yarim fnahnerahko. Nom pno yarim fnah-nehato nom pno rpat tohhato nom yakitohwa Nkifrapar rpat yakitohrah-nom. Kraisr rpat yakitohhato tohruha-nomn tamoh tamohm Bro Nkifrar kfo htayukm mekaht, ahiyanm, niko rpat yakrahnomm.

⁷ Bro Nkifrar nann hti yuhuwaftato fak htamora gutnius mrokfothu kfo ptha htfasneft. Nd hingrneft yak htatahato gutnius mrokfothu kfo ptha htfasyuk mrokfo yafothar tu Bro Nkifrarhu bbukeft kfomot, nd mrokfo yafothar nann muhmr. ⁸ Barkopam afo Kraisrhu sioskfot fak beb hnamoya. Inji nahnamota fasoh yufa bebt fak-moya. Tmift, Bro Nkifrarhu yuhuwaft nmbuhattn wom hingrnafat fakmora. Yima tangiroh gutnius mrokfothu hanyeft dukahato nd hingrneft fakmora. Nd gutnius mrokfot, Kraisr nom pno hingrna hta bohta marnyewa yihotaroh gutnius mrokfoyet. ⁹ Bro Nkifrar ndar bbinysoft hingrnanimohat rorhu rhu kafrohet yima yuhur nhai tafont htarmotrr yimam wany bugarmomr. Arihatn nd rorhu yima yuhur rhuyuk mrokfom nann kfomor kfo ptha htfasneft. ¹⁰ Arihat Judami yima tangim bi rpat fak nhafohmormn bi rpat Bro Nkifrapno fknihato rpat tohwom. Inji yak htamohat duka memor, “Kminysofroh nkiframi hefenr yorhwa mounmotm htirahmr nanhu riduka aduka yima yuhur rhu kafroh-moar.” ¹¹ Bi bingot Bro Nkifrar nd dukefr bi duka htamorr. Tfit arihat nmoh Nungothet Krais Jisasrpno nd dukefr mfrfhahnatomr htimonom. ¹² Kraisrpno nayakitohhato rorpapno yima yuhum htarahnomm, to be nhai duka kinyaki hanyruhatnom Bro Nkifrapno brbo yihato tamohm kfo pthaneft. ¹³ Niko mirahko tfit na yekwa krhopam mhtiyakhato gutnius aduka amanyom, “O, nom dukahato gutnius mrokfot kfo ptha nuhaswatrnom Judam krhopam kahukmr. Nom be tmifnom nhai rorpno brbo yiruhat-nom.” Mirahko

inji adukanom. Na nd gutnius mrokfot akfo ptha nuhas duha yiyaniko nha Kraisrhu dukefrn rhurfotko.

Efesus thofroh toh bmta nmbuhat Porr kfo bruttnamorm

¹⁴ Na Bro Yifemr bro riduka aduka yima yuhurpno namo bro neft mhti dukewoyann na bangu myuknahato kfo bruttnewanr. ¹⁵ Nom yima nfrinom ror wany yakiohato tohwanom yo ror hiket yimam noh hanitam rorparhu yufatn toh bugewunom. ¹⁶ Na bangu myuknahato kfo bruttna kanga, bro nuka nanyjareft hatohet Bro Nkifrarhu Yafotharhu bbuka rifhur athu bmtarm nikmoh yima yuhum. ¹⁷ Yo niko Kraisr wany yakiohato hikwa nmbuhat, ndt kfo bruttna kanga, Kraisr nikmoh yima yuhum rim rhuhato athu yuhur-kahtko wommpno nayak marnyahato tohneft yakitohruhakomtn toh bmtarahko mim bbinarysoft nemba thuhato toh bmtewa kanjo. ¹⁸ Niko be tu Kraisrhu marbi miftn korkho. Ndnetann kanga niko, Kraisr hikwa yima bugako afo wahti dukakomr rorhu yima yuhur. Be inji rihtewurkon o marbi mif htewurko? Kanga afo tukomn wahti dukakomt ror yima hti yuhuwafwa nmbuhat. ¹⁹ Rorhu yima yuhuwafeft nhai yima mifnom yima yuhuwafwa kanjo inji yima yuhuwafkahr. Nhai. Rorhu yima yuhuwafeft nndo. Na kanga Kraisr yakinohwa yima yuhuwafeft ahikahtko ndt niko wayakitohko. Nd yima yuhuwafeft wayakitohkahkomn to be nd Bro Nkifrarhu nefrpam rhurahmko. ²⁰ Bro Nkifrar wukfo ttiwonrahnom rorhu bbuka rifhurhu hanyeft, to be nd bbuka rifhur yakrahnomr. ²¹ Ndnett tu Kraisrpn frtkafwa met yindarim Kraisr nom nrfa htiyakmo yuhatn yiha yiha kfo yuta yindhorhany, kfo yuta yindhorhanye to be inji.

Bro Nkifrarhu nefm hikhato wommpno nayak marnyahato rpattohkfot

4

(Sapta 4-6)

Wommpno nayak marnyahato rpattohneft

¹ Na Pora, na kalabus tohwohat, Brorhu hingrneft uhatone hatonemoatant kalabus fakmoma. Bro Nkifrar memor, “Nanhu yonm tohrahm,” ndnetrn nakumorko. Na kfo bmta mrokfot kahukanko. Hifa nd niko womkompono yiyuk naku tngt wany fakiomokomt. To be niko mirahko tfit finji ananom, be nd naku tngr htafyuk dukefrpar toh hikkfot. ² Wom Kristenmpno be dborioh yima yuhurparpno nayak marnyahato rpattohneft rhu marnya bomarnyakfot. Toh nmbuhat be noh hmbre yima yuhur-pno tohkfot. Wom Kristenmpno kfo ptha yima boyima marnyakfot. Tamoh nefm be yak marsisakfot. ³ Bro Nkifrarhu Yafothatn hemotnom womm-pno nayak marnyahato rpattohneft. Nd neftn rpattohneft dbkaf hmbritattnom be rpattohneft rpa yima yuhur korhnrom. Ndnettnd neftn yakitoh nhirtakfot. ⁴ Nom Kraisr hikwa yimanom rpa yon kunyenom yo Yafothat rpa Bro Nkifrarhu Yafotharpattohneft kahukrnrom. Rpa yima Kraisrhu duka dukahato tohneftn Bro Nkifrar nakumornom. ⁵ Kraisr torpar nmoh Bro Nungothetr. Gutniuskfot nhaf rpa gutniuskforpat nom yakitohhato hikwonom. Yo rpa yufarpatpno baftais kekwonom. ⁶ Rpa Nkifrarpar tohwor. Nd Nkifrarpar tor yima buganmoh Yifemr. Rorrpa mifr brohato nyingako tohekwor. Rorrpar tuhan yindariroh yima yuhum rhuhato kangrm inji waiko, inji wahingrnako, nd nd nefm wanako. Yo nd Nkifrarpar korhrm rorhu mrokfot hikwa yimam.

⁷ Mrokfot rot kfo kangt nom rpa thatipenom. To rpa rpa yimanom Bro Nkifrarhu hingrneftn Kraisr htamor-nom. Turn hti nhtahato fitoh hingrneftn hingrna tafs marnyewunom, to be nd hingrneftu hingrna yafothat yahu-katrnom hingrnewunom.

⁸ To be Kraisr inji yak nhtahato yimam inji yak hta nhombriwohat to be bro gonborngt kfiwa yuhatn Kraisr yimam inji kak hta nhombewurm. To gon-borngt kfo kangt:

“Ror yura kmiko muhmohat,

nd ror hikakhato yak nhafohmo yahr kmimn hamuhmor.

Turn hatohakmorm.

Yura mhtahato wuskam yak-morm kmi thofm fak nhtahemor.”*

Sng 68.18

⁹ To nd mrokfo nmbuhat kfo yamuka “yura kmiko muhmohat” nd mrokfote finji dukahato nd mrokfo nmbuhat inji kfomomt? Ndt to afo yiro ndar bbinysothu kmi rifhut yohnemorn tfit kto yura muhmor.[†] ¹⁰ Nd yima Jisasr yiro yohnemor, yohnehato tfit muhmor. Tu Bro Nkifrar yorhwu tu kmi hefenr muhmor. Yura mrhuhato ndar yuht bbinysofti mount thu nhombra buga-morf. ¹¹ Rorrparn ndar bbinysoftu yimam hingrna yafothar yo mrokfo ptha yafothar o tamoh tamoh nefm hi hanitrm. Womm aposer hingrneftu hingrna yafothat hi hanitrm, womm profet hingrneft hingrnayuk hingrna yafothar hi hanitrm, womm gutnius mrokfothu ptha htfasyuk mrokfo rishur hi hanitrm, wommne pasto hingrneftu hingrnayuk hingrna yafothar hihato nd hingrneft tohhato Bro Nkifrarhu rfa borngt kfiwa mrokfefm kfo hta bohtewumm. ¹² Kraisr nd hingrna yafothar hi hanitahat kangr, “Nd hingrna yafothar bi ahi hanykahtanm, Bro Nkifrarhu hingrneft hingrna hik marnyarahmt. Nd rom hingrna hta bohtaruha hingrneft yuhamn rroh Kristen toh yuham bmtefm yakni hanyrahm.” ¹³ Nd hingrneft be hingr-nahany hingrnahany, be Kraisrhu hik yuhathu rpa yima yuhurpar rhuhato Bro Nkifrarhu Yonr dukiwa dukefr, hingrnewa hingrnefr, niwa nefr, hti hik bohik bugarahnomr. Be ndnatn nd Kristen yihotar mtoh trpnirahnomr. Mtoh trpnihato be tu Kraisr tohwa toheft kanjo toh hikrahnom. ¹⁴ Inji toh hikrahnom, to be nhai tfit yon mumennm kanjo toh mmoruhatnom. Nhai toh mmo hasohato mfrnhelyuk yimam niahato frnheh bonhehaknehat dohm wifort frhammohato doh mfar nndo yukatohwa kanjo nndo yak yukatohruhatnom. Nhai. ¹⁵ Nom rom kfo nhehwa kfo nheheft yakitoh duha. Nom yima yak marnyaneft yakitohhato tamoh mrokfom womm kfo neft, mrokfom kfo mifikfot. Ndhet nefm nahanyruhanomn nmoh tohefm nd yuhamn yi marnyakniruhamn be Kraisrhu tohefm yakrahnom. Ror yura mfhayer, ¹⁶ tir wura nd ndm nd rpa mfharpat hatohwotm. Nd mfhate kfiwit tirthu hingrneft hingrnewutt yo mfhate kfiwit wurathu hingrneft hingrnewutt o tamoh tamoh mfharpat hikwann hingrneft hingrnewummm nhai tum nnakfo nnakahm. Nhai. Tum nahti duka nahti dukewamn nd thatipt rhu marnyewatn warhiwut.

Kristenm nfri nefm yakitohkphot

¹⁷ Dndettm wom mrokfot kfiwanko. Bro Nungothetrhu yufatpno kfo nnhuwanko. Mirahko tfit Bro Nkifrarhu mrokfom yikitoh duha yita yima tangim kanjo atohnom. Nd yimaroh dukefm nhai tu rhu digr yima yuhum-pno rhukahmm. Nhai. Be inji duka mmbrafiny yima yuhumpno korhwom. ¹⁸ Rroh dukefm be inji nkrtm korhmm. Bro Nkifrarhu mrokfom mhamuh tfanihatong trohwomr. Ndnetmn nhai Bro Nkifrapno brbo yikahm. Be inji wuri korhm. ¹⁹ Tamoh tamoh nefroh naneft nhai wom yimtna hanykahm. Tu be nhai mif. Yima yuhum be tohetohwomm, nhai ritohak-kahm. Nndo yaum nhombrewum. Nhai yimat tuhant yikitohkahmt, o froht. Nhai.

²⁰ Kraisrhu mrokfom niko yimam nia kfo nuhasmom, nhai marimomko, “Yima tangim niwa nefm wahiktawo.” Nhai. ²¹ Rom Jisasr hti yindhorwa nefm kfo nuhas memomko, “Jisasr nd nd nefm hti yindhorwor. Ndm yikitoh-kfot.” ²² Kraisrhu mrokfom inji korhm: bingot niko afo nd fasoh yima yuhurhu nefm, nd womroh tamohm hti yuhur hanyeft, ndm yikitoh hnamokommn bi nd nefmn bi fasoh tkitt hta hany sitamomko. Dndettm nd niko hatohwa fasoh yima yuhurhu nefm mong troh bugakfot. Yak thu bugakfot. ²³ Tfit nfri yima yuhur yakkfot. ²⁴ Nfri yima rifhur yakkfot. Nd nfri yima rifhurhu toheft tu Bro Nkifrarn kak htewartn turhu tu dborioh toheft kanjo korht. Nd nfri toh nmbuhat tu Bro Nkifrarhu toheft toh hikwot. Dndattn Bro Nkifrar yindhorwor.

²⁵ Nd womroh kfo nheh, frnheh nefm be tmifm ayohnitwam. Mirahko ayakitochnomm. Niko bi rpa thatipeko, dndettm womm tamoh mrokfom kfiwukomme, tu kfot kfokfot. ²⁶ Womr tamohm yak nhehtrn yima yuhur namburworn, to mirahn nd nambur rifhur

* 4:8: Wuskam ror yakhato yak nhtamom, ndm nom yahuka yafotham kffom. † 4:9: Ndar bbinysoftu kmi rifhut ror yohnemor, ndte yiro Maringour yohnemo yuhathu mrokfojet.

be tfit faso arhuni bugar. Mirahn nd nambur rifhur aharhu krifafoyanr. ²⁷ Inji narahn to be Satann hta tehakrahn. ²⁸ Rikoh yimam mirahm tfit arikohnom. Rom tum hingrnakfot. Tum hingrnahato turoh tirehm yakhato womm hekfot. ²⁹ Mirahko fasoh fasoh tng bebm akfo pthakahtnom womroh yima yuhum akrho htatamm. Dborioh mrokforpam kfo ptharuhatko womm wanyruhamn yima yuhum thu jubtwarahmm. ³⁰ Mirahko Bro Nkifrarhu Yafothat ahta krhonomt. Bro Nkifrar nom tanrfak thombat, to tot bi barkof yak nuhasyuk minghat bi turhu Yafothat hi hanitrnom. ³¹ Ndnettnd fasoh yima rifhur mfnahnewa yima kfo mari hany nefenm, yimampno namburhato nakfo huttnefenm, yimaroh kfo yukioh boyukioh nefenm, nd nd nefenm wayafho bugakomm. ³² Be dborioh yima yuhurpno, dborioh nefrpampno wom Kristenmpno yuhuwafhato rhukfot. Womm tamoh nefm newumko niko tfit dukahany juha. Kraisr nohhato Bro Nkifrar niko namo fasoh nefm yafhohemo kanjo womm nayuk nefm yafhohekfot.

5

Mar nukeft tohkfot

¹ Bro Nkifrar hifa hti dukewarko, rorhu yonko korhko. Ndnettnd nikmoh rhu nmbuham be tur dukewa dukef yuhatn rhu hikkfot. ² Kraisrhu bro yima yuhur nompno rhumour. Nd dukeftpno rorn nohmor nom dukahato. Rorhu noh nmbuhat yimot dborioh narotwa gbet yemror Bro Nkifrar tariorh narotwewa kanjo. Ndnettnd nom tawo womm hifa yima yuhur htakfot. ³ Niko to bi Bro Nkifrapno fknihato bi rorhu yoneko. Be inji rorhu yonko rhu mif mifkfot. Mirahko tfit met yindarim nayak kafroh htfaswa nefm tfit ahiknom. Yo mirahko yima yuhum wabbrekwu nefm ahiknom. Yo mirahko be maruha dukefrn arhunom. Nd maruha dukefm yorhwakomm nhai Bro Nkifrar dukakahkomr. ⁴ Mirahko womm akfo dbotna bodbotnanomm. Yo mirahko womm fasoh mrokfom akfonomm. Yo mirahko fasoh fasoh nakfo ddonom. Ndhtet nefm tohetnomn Bro Nkifrar fakmornom. Ndnetnomn nom be rhuhato Bro Nkifrar kfo bruttna yindhorkfot. ⁵ Na kfo mifwanko, yimam o metm rine auniyetm o yimaroh yima yuhum fasoh nefroh naneftn be tohetoh hasiwam o maruha dukefrpar yorhwam, ndhtet yimam nhai Bro Nkifra Kraisrof kfoyuk tamoh tamohm yakruhatm. Nd nd nefm lotutwomm nkifra tahim kanjo. Dukefm be nd dukefm korhm, nhai Bro Nkifrarhu dukefm rhukahm.

⁶ Niko waduka marnya hanyswako. Ndhtet ndhtet net yimam mfrnhehak-ruhatmko rim suhnirahko. Bro Nkifrar ndhtet ndhtet net nefm hikwa yimam namburworm. ⁷ Ndnettnd mirahko rompno nabnothato rpat awiyauyau-nom, tu be nhai mif. ⁸ Niko to rom kanjo afo yiro kspitath tohmouko. Tfif bi ariha bi Bro Nungothethrhu tuhan yindariyeko. Bi rorhu mar nukeft tohwoko. Ndnettnd niko mar nukeft tohwa yimam kanjo tohkfot. ⁹ Mar nukeft dborioh dborioh nefm mhfnah-newutm. Nhai yau nmbuham, pthefm, rhu nmbuham, faso faso rine wunekfot. Nhai mifkota mkfotakfot. ¹⁰ Tamoh tamoh nefm nhombra bonhombrwon-kfot. Fitoh neft Bro Nkifrar hti wofnwor, be nd nefrpatt yakitohkfot. ¹¹ Mirahko ndhtet kspitath nefm nayet yimampno nabnot habrinyom. Nhai. Ndhtet yimam htikomm tfit kfo hta mekfot, "Bar yinowe, ndhtet neft ni niwat fasohet. Wayafhont." Nikomn tfit inji kfo htakfot. ¹² Rom niwa nefm tu fasoh yima nytingatik duha hnoma nef mifm newum. Na yimtnewa rom niwa nefm nikom kfo ptha nuhasneft. ¹³ To nd Bro Nkifrarhu nukeft, to nd nukeftnd tamoh tamoh nefroh mnayukm tafon mar nukatn korhm. ¹⁴ Wom shrt bi marrhu nukeft fektt, to be nd shrt tfit mar nukeft hatohwott. Ndnettnd wom mrokfot kfo kangt,

"Ni yima hwes rhut hwes rhut rhu hasiwa,

be tmifn wamfryurnikahnn wasinya warhun.

Yima yopt wathu trohkahtnt,

Kraisrhu nukeft yakrahtn."

Aisia 26.19, 60.1

¹⁵ Ndnettnd nikmoh rhu toh nmbuham duka marnyahato tohkfot. Mirahko dukef duha yimam kanjo arhu mmo bammonom. Tu yima duket yimam kanjo tohkfot. ¹⁶ Arihat yimam be tu fasoh nefm fkinitamn fasoh nefrpam korhmm. Ndnettnd yima duket yimam

kanjo tohhato dukef duha yimam kfo hta bohta marnyaf hanykfot. ¹⁷ Mirahko be mmom kanjo tamoh tamoh nefm mtusohnihato amhik fura bofurakninomm. Bro Nungothethru dukefr mhti hikak hanyhato hikkfot. Ror finji finji kak htewurn be ror yak htiwa yuhatn hikkfot.

¹⁸ Mirahko drinkfot masat masat aye mmokahnomm ammo bammonom. Inji narahko to be nikmoh rhu nmbuhat nhai hifa rhuruhatt. Bro Nkifrarhu Yafothatn yuht yimako thu nhombrahato be nd Yafothatn yak hta bohtakfot. ¹⁹ Yimampno rifinyhato lotuneft, Windoh Gonborngthu windoh mrokfompno windohnhokfot yo Bro Nkifrarhu windoh furam windohnho-kfot. Niko Bro Nkifrar kfo yindhorhato Windoh Gonborngthu windohm yo nd Bro Nkifrarhu windoh furam, nd nd windohm windohkfot. ²⁰ Yiha yiha nmoh Nungothet Jisas Kraisrhu yufatpno Bro Yifemr tamoh tamoh nefm kfo yindhor buga bugakfot.

Porr pthamort ramet tuhanmi tuhanet yindariroh mrokfot

²¹ Niko Kraisrhu yinhit toh buge-wuko. Ndnetttn niko tuko Kristenko nawany yakio nawany yakiokfot. Nawany marsisa duha. ²² Niko Kristen metko, Jisasrhu yinhit tohwa kanjo yindariroh yinhitn rhuhato rroh tngm hikkfot. ²³ Nhai sfno inji kfokahanko. Kraisr sioshu mfhako tohwa kanjo yindarimn metroh mfhako tohwom. Sios Kraisrhu thatipet ndnetttn nnrfa hbhamort. ²⁴ Sioskfot tu Kraisrhu yinhitn korht. Ndnetttn niko metko nd yuhat hikhato tukmoh yindariroh yinhitn rhu hanykfot.

²⁵ Niko yindariko tukmoh metm marbitn htakfot. Sioskfotn Kraisr marbit htahato mffa htamo kanjo niko yindariko ndhtet dukefr yakhato nikmoh metm marbit htakfot.

²⁶ Ror inji namohat Bro Nkifrarhu yufatpno yimaroh yak htaneftn inji namor. Rom rorhu mrokfot yakhato hikmo yuhatn yo baftais yakmo yuhatn Kraisr fak wus bowus marnyamormn yima yuhum wutham rhumomm. ²⁷ Rorhu dukeft nhai wofnrmar sioskfot wuspenm o krtafenm rhukfot. Rorhu dukeft memor, “Be inji Bro Nkifrar yorhwa ruheft kanjo arhukahmn nhai wom tamoh nefenm rhukfot.” ²⁸ Ndnetttn niko yindariko tukmoh thatipm yak marnyiwa kanjo tukmoh metm yak marnyakfot. Yimar turhu mett yak marnyiwar, nd yimar turhu thatipt hti wofnhato yak marnyiwa kanjo inji kak marnyewurt mett. ²⁹ Nhai wom yimar turhu thatipt tfit turn krjbowur inji nakahrt. Nhai. Rot yak marnya bomarnyiwartn yeshri kahukrt. Kraisr sioskfot yak marnyiwa kanjo inji newurt turhu thatipt. ³⁰ Nom Kraisrhu thatipthu tir, wura, nyinga nd ndenom. ³¹ Bro Nkifrarhu gonborngt kfo kangt, “Ndnetttn yindarir turhu yifammam htanyhato turhu yak tuhantpno frtkafhato rpat tohkfot rpa yimar kanjo. Nhai tfit husf tfit rhukfot.”

³² Nd kfo nhombra mrokfot tu bro mnetet. Nd kfo nhombra mrokfot kfiut Kraisri rorhu sioskfot o ror hikwa met yindarim. ³³ To mirahko nd mrokfot ka Kraisri ror hikwa yimarpampno kitwot nd mrokfot. Nhai. Nd mrokfot to rpat kitwot niko rpa rpa yimako yo rpa rpa metko. Ni yindarin, tunhu yak gb tuhant marbit htakfot. Tunhu thatipt yak marnyiwa kanjo mett inji yak marnyahato yakinohkfot. Yo ni metn tamoh nefm naruha, tunhu yindarir mhti yakrmiyak hanykfot.

6

Porr pthamort yonmi yifammaroh mrokfot

¹ Niko yonko, yifammam tamoh tamohm kfiwumko, hanyjborna duha. Be rroh tng yuhamn hikkfot. Tot tu neft. Ndhtet neft Bro Nkifrar hti yindhorwort. ²⁻³ Bro Nkifrarhu yirmoht kfo kangt, “Yifammaroh yinhit tohhato rroh mrokfom hikkfot. Yifammaroh mrokfom hikrahko, nikmoh tamoh tamoh hingrnefm yi marnyaruhann ndar bbinyssoft toh yifahtarhko.” Ndnetttn nd boririfhut be tu bro mrokfoy.

⁴ Niko yifammako mirahko yonm fasoh nmbuhat ayak nuhasnomm. Inji narahko, to be fasoh nmbuhat wahiyafarahkomm. Tfit nikomppno nakfo nna inji narahm. Niko yifammako be hifa yima yuhurpno yonmpno rhuhato Bro Nungothethru mrokfom kfo nuhas bonuhaskfot.

Tohakmi hingrna yimaro mrokfom Porr kfo pthamor

⁵ Niko hingrna yimako, niko tukmoh tohak yimaro tng yuhamn hingrna hikkfot. Tamoh tamohm romn mhti yakrmiyak hanyhato romn hikkfot. To mirahko brumharpam apthanom. Yima yuhumpno pthahato rroh mrokfom hikkfot niko Kraisrhu mrokfom hikwa kanjo. ⁶ Mirahko be rroh yima yuhuroh yak marnya nmbuhatn rroh nyingahato tamoh tamoh hingrnefm ahingrna marnya bomarnyanomm. Nikmoh dukefm Bror duka yanhhato be dborioh hingrna yihotam hingrnakfot. Kraisrhu hingrna yima mifko tohhato hingrnafat hingrnakfot. ⁷ Yindhortpno yindhortpno tamoh tamoh hingrnefm yakitohkfot. Brorhu hingrnefet. Nhai yima mifroh hingrneft rhukaht. ⁸ Tu Nungothet Kraisr kukatohworm niko niwa nefm yo hingrniwa hingrnefm. Kto niko froh frohko ttha hanyrahrko. Nd nmbuhat bi wanyeteko.

⁹ Niko hingrnefroh tohak yimako, tukmoh hingrna yimam dborioh nefm yak nuhaskfot. Mirahko akfo yakrme boyakrmenomm. Nikomi tukmoh hingrna yimam hefenr tohwa tohak yimarpa mifrhu hingrna yima bugayeko. Ror yimam yak marnya thombat nhai hti tuthahato kfo mekahr, “Nd ndrpam yak marnyaruha, nd ndm nhai.” Ror nhai inji nakahr. Rpat kak marnya bugewurnom.

Kristenm soldiam kanjo tohkfot

¹⁰ Wuroh mrokfot kfiwanko. Nikmoh toh nmbuham Bro Nungothetrpno frtkafkfst. Rorpno frtkafhato rorhu bro bbukeft yakkahkomtn toh bmtakfot. ¹¹ Yahrt tonayuk wondh tham Bro Nkifrar yahukamn, niko ndm hmbrihato tohkfot. Nd wondh tham hmbrihato frdbfaknirahkomm Satanr tuyuk kfram. ¹² Nhai be yima mifrpampno nd yahrt tokhahnomt. Nhai. Nda bbinysothu Satanr uhatone hatonita fasoh fasoh nefm kangm, ayak kasuh-nomm, nom tfit wabbuka sinyahato nd fasoh fasoh nefm kangnom frdbfa thuhato amtohnomm. Inji natoh natohwonom. Yo namburet namburet yarhm, tahi nasungarm, nthonm, nd ndmpno nd yahrt tohwonomt. ¹³ Ndnettn Bro Nkifrar yahuka fitohtet fitohtet wondh bugat yakhato hmbrekfot. Nhai rhu fura bofura hasokfot. Satanru yahrt nianeft nhai kfrat o rikat o tamohat yak hambro-ruhatn. Satanr tuyuk kfrat frdbfa thurahnt. Satanr mnhombratiruharn nhai tfit wom yiha nieruhatr.

¹⁴ Kangko atoh bmtanom, tu Bro Nkifrarhu mrokfo mif mift yakhato bro let bando tham kanjo nd mrokfom yakhato yufur mtintn nyuh tkafkfst. Yo Kraisrhu hayuk wutha yima yuhur yakhato mondt hta kafrohyuk siot kapakfot kanjo nd yima yuhur yakhato dbkafkfst. ¹⁵ Bro Nkifrar pno rpat tfit tir nayakitoh yuhathu gutnius mro-kfothu kfo nuhas htfas nefthu wayibon sinyaneft, nd dukeft su wuram kanjo hmbrekfot. ¹⁶ Nd nd wondh wuskar yak bugahato yahrt tohkfst. Bro Nkifrarhu wany yakio nmbuhat, ndt wohn rikat kanjo hmbrekfot. Nd wohn rikat hmbrehato hta tfakrahkomm Satanr tuyuk kahet kahet kfram. ¹⁷ Bro Nkifrar nrfa htikyakmo yuhat dukahato nd dukefr hat kapakfot kanjo nd dukefr mfhat htahato rhukfot. Bro Nkifrarhu Yafothathu bainat kimt yahitohkfot. Nd bainat kimt Bro Nkifrarhu mrokfoyet. ¹⁸ Nd nd nefm kangko ananomm, Bro Nkifrar kfo bruttnahato nd nd nefm nakfot. Tu Bro Nkifrarhu Yafothathu yak hta bohtakahtko nd Yafothathu dukeftpno kfo bruttnakfot. Mirahko arhu wita-nom kfo bruttnaneft. Kraisr hiket yimaro yufam yutahato kfo bruttna hatohkfot. ¹⁹ Nanh yufat mirahko ammonomt. Nanh yufat yutahato kfo bruttnakfot. Na kanga, Bro Nkifrar turhu mrokfot nanhu yima yuhur ahtakahrt apthayant. Nhai yakrme yima yuhur rhu hanykfot. Bro tat yima yuhurpno nd gutnius mrokfot Bro Nkifrar hta kafrohmoat ptha nuhasruhanm tuhan yindarim. ²⁰ Nd nd gutniuskfot kfo ptha htfaswa yimaya. Ndtpno na kalabus tohwa. Ndnettn wakfo bruttnakahtkma Bro Nkifrar yakrme yima yuhur yak thukahttr tat yima yuhur ahikahtra gutnius mrokfot kfo ptharuhant.

Wuroh mrokfot

²¹ Tikikusr kfo nuhas hik bohik-rahrko na hingrnewa hingrnafat. Tikikusr nompno rpat nabnothato rpat tohnuhiwa yimayer. Bro Nungothetrhu hingrnafat ror hifa kakitoh

marnyewurt. ²² Rorn nikompno nieruharn tndh hik bohik nuhasrahrko nom yorhwa ruheft. Kfo nuhasruhatrko yima yuhum bmtarahmko.

²³ Bro Yifemri Nungothet Jisas Kraisr ahitwafko noh hmbre yima yuhum. Noh hmbre yima yuhum ahikahtfko wom yimam hifa yima yuhur hmbrihato Bro Nkifra Jisasrofhu dukefr nhai yafho thuruhatkomr. ²⁴ Nanhu dukefr kanga Bro Nkifrar ayak marnyarm nmoh Nungothet Jisas Kraisr yafho thu duha yita met yindarim.

**Filipai thofroh gontwat
Porr dwandfakhato htafmot
Barkof kfo nuhas mrokfom**

Porr wandfamort ndar gontwat. Ror Yuopko yihato Bro Nkifrarhu hingrneft kasinyamo barkof kmit. Filipait Masedonia Profins korht. Porr nd kmi Filipait Bro Nkifrarhu hingrneft kasinya tanyhato wom kmit tfit yimor. Wom kmit yi hingrna hasetrn fakmomr. Yakhato kalabus htamomr. Kalabus tohhato wanyakmor Filipaitu Kristenm wom yimam yihato tfit wom yima yuhum hemotmm nd rom wanyuk mrokfom mafahonimomm. Nd mrokfom ror wanyakmohat nhai krhohato rorhu krho yima yuhurhu mrokfom tfit ndar gontwat htarmorm. Nhai. Ror Jisasr yakitoh kihhato tohmorm. Ndnetrn ror be yindhor yima yuhurpno tohmorm.

Porr Bro Nkifrarhu hingrneft tohhato marufen duhattr rhumohat, Filipaitu Kristenmn marufam hta nhafohhato htafhemomr. Ndnetrn Porrhu kfo yindhor mrokfot ndar gontwatin htafmort. Yo womt kalabus tohetrn duka memor, “Na kalabus tohwa mrokfot Filipai thofm wanyakruhamn bok dukefm yakruhamn yima yuhum krhorahmm.” Ndnetrn wom kfo bmta mrokfom gontwatin htafmorm.

Porr kfo memorm, “Nd niko Jisasrpno yakmo nfri toh nmbuhati nfri yima dukefr, nhai Judaroh nkifra boririfhut hikhato yakrmokomr. Nhai. Jisasr hikhato fakmokomr.” Memorm, “Jisasr tohmo toheft tohhikfot. Jisasr nhai marimor, ‘Na bro yimaya,’ yo nhai turhu dukefr hikrmor. Nhai. Ror be hifa yima yuhurn Bro Nkifrar hayuk hingrnefrpat fakitohmorm.” Kfo memorm, “Yimam Kraisrpno brbo frtkafwam, rroh yima yuhum miyorhwamm yindhor rifhurparpno korhrom.”

Ndar gontwathu mrokfom hti thombat, htirahn Porr be tu marbitn htamorm Filipaitu Kristenm.

**Porrhu tamoh tamoh nefm Filipai thofm hti dukamoumr. Ndnatn
Porr bro yindhor rifhurpno tohmorm.**

(Sapta 1-4)

¹ No Por Timotirono Jisas Kraisru hingrneft hingrnewa yimayeno. No niko Filipaitu yimako dukewunonko. Ndnettun na Pora wandfiwant ndar gontwat. Niko Filipaitu yimako, Krais Jisasr hikwako yo niko pastoko yo niko Kraisru hingrneft hingrnanuhiwa yimako, nikmoh yufampno ndar gontwat htefiwant. ² Nmoh Bro Yifemrkoni nmoh Nungothet Jisas Kraisr nikmoh toh nmbuham atoh natwiikhahfko ayak marnyatwafko.

Porr Bro Nkifrar kfo yindhormo yuhat

³ Yiha yiha na nikmoh dukefr yak thoft, Bro Nkifrar kfo yindhorwanr. ⁴⁻⁵ Na nikompno barkof mtohakni-hato gutnius mrokfot Filipait pthakni-mohat, hifa nikomn nd mrokfot bi yakhato, tfit nikompno rpat nd gutnius hingrneft hingrnanuhaknimokma. Rihingrnakmohat to be toko yuhre hingrnanho hanitkma. Ndnatn nanhu yima yuhur yindhorwor niko yutahato kfo bruttna yindhorneft. ⁶ Nanhu htiyeft inji htitant, Bro Nkifrar bi nikompno bi inji ndhtet dborior hingrneft rihingrnakmohat, to be nikompno hingrnahany hingrnahany Kraisr nierahr. ⁷ Niko nanhu hingrna tamnouwa yimayeko. To na ndhtet yimena Bro Nkifrar yuhuwafhato dhemo hingrneft hifa nikomn kakitoh-nhohnewukma. Na kalabus tohneft o kalabus toh duha yimam kangm gutnius ayak thunomt o finji ananomt hifa nikompno rpat tohhato gutnius yonm kanjo kakitohwonomt. Nhai yimam gutnius mrokfot finjinakfot. ⁸ Bro Nkifrar nanhu yima yuhur htitworr. Na tu kfo mif mifwanko, nanhu yima yuhur niko dukewur nikmoh yi htineft. Krais Jisasr niko duka yuhuwafmo kanjo inji dukiwanko.

⁹ Na niko yutahato kfo bruttna thombat, nikmoh yima nayak nanyima-neft, o yima nayak marnyaneft yo tuko nahti duka nahti dukaneft, nd neft kanga mfro mfro yakitohaknikah-komn, Bro Nkifrar dukewa dukef yuham hti duka tungunaruuhakommn yo hti duka tungunarahkomm fasoh nefmi dborioh nefm. Ndm kfo bruttnne-wanko. ¹⁰ Fasoh nefm hti nhta mirahko ndm fasoh nefem. Dborioh nefm inji buga, hti nhtarahkomm. Hti nhtaruuhakomm, nikmoh toh nmbuham be hifa toh marnyarahko. Nhai wom fasoh nefm wom yimam yak nuhasruhatkomm. Be hifa dborioh toh nmbuhattn toh hasetkomn Kraisr yawihnerahr. ¹¹ Nd Jisas Kraisr yak nuhasryuk dborioh nefrpam womm yak nuhasruhatkomm womm nikmoh dborioh nefm htiruhann Bro Nkifrar kfo yindhorrahmr.

Porr kalabus tohmotr Kraisrhu mrokfot bromot

¹² Niko nanpno hingrnewa brata-kfot kanga, akfo dukayanko. Mirahko ka bi kalabus tohwarn gutniuskfot ka nhai wom yiruhatt. Nhai. Kfiwanko nd tkittn gutnius tfit hingrneft mburaknitatn hingrneft mfro mfro yiyaknitt. ¹³ Nd ashahof yimam yo kingrhu kuny kmifat tohukatohwa yimam na kalabus htamo nmbuhat htihato kfo memom, “Na Kraisrhu gutniuskfot kfiwota yakhato kalabus htamoma.” ¹⁴ Bok yimam asha Kraisr hikwam na Bro Nkifrar tohukatohmo nmbuhat htihato rom bi Kraisrpar rroh bro dukefm htewum. Nhai wom yakrme yima yuhumpno rhukahmm. Kraisrhu mrokfot ptha habri thombat, nhai yakrme hanyhato pthakahmt bro rifiny skitm. Nhai. Rifiny skitm tohhato pthiwumt.

¹⁵⁻¹⁷ Kfo ptha htfas thombat womrpam kfo yuhuweh htfaswom. Kangm, “Tamohmpno Porrpar Bro Nkifrar yak marnyewatr kmi kmi rorhu yufarpot kfo yindhorwam? Nom to inji kangnom Bro Nkifrar ayak marnyakahtnom nmoh yufam kmi kmi akfo yindhor habrimnom.” Rom ptha yuhuweh htfas thoft, rroh dukefm duka kangm, “Inji akfo htfaskahtnom, na Pora wanyakrhoyann yima yuhur krhorahra.” Be yuwi kangm, “Wom nfri krhopam ahtanomr.” Ndnetmn inji newum. Womm nd hifa yima yuhetm rroh dukefm duka kangm, “Tamohmpno Porr kfo yuhuweh htfasruhanomr? Nom be gutniuskfot akfo htfaskahtnom kmi kmi nd gutniuskforpat broniraht. Ror be Bro Nkifrarhu hingrnethu htiyahohany yuken. Nd hingrneftn Bro Nkifrar fak htamorr. Kraisr hik duha yimam mirahm, ‘Akfo dburna inji ananomt tfit rorn tohhato kfo nuhas hik marnyarahrm.’” ¹⁸ Na nd kfo yuhuweh htfaswa yimam na nhai kfo mekfot, “Tamohmpno inji kfo yuhuwehwama?” Na nhai inji kfokfot. Nd kfo yuhuwehet yimami nd hifa yima yuhet yimam rom bugam na yindhorwanm Kraisrhu mrokfot romn kfo ptha htfaswatmt.

Porr kangr atohkahann Filipai thofm kfo bmtaruhann

¹⁹ Nanhu yima yuhur duka kangr, niko Filipaithu Kraisr hiket yimako kfo bruttni-wotkma Jisas Kraisrhu Yafothat toh natwihwota. Rot kforaht na fnahniruha. ²⁰ Toh bmtarhoyann ptha thombat, nhai bso yewirnano yimtnahato ptharhota. Ptha brorhotann mrokfom wanyrahmm. Na yima nfriya tohan o fnohniya dborioh nefm na nayukm yimam htiruhann Kraisr kfo yindhorrahmr. ²¹ Nanhu htiyeft inji htitant, yima nfriya afo ftoha nhai mrokfom. Kraisrhu hingrneft tohhato hingrnaruuhant. Fnokane ndt to hifa mrokfo duhatet. Nd tkittn Kraisrpno yi tohruha. ²²⁻²³ Afu yima nfriya ftohane, be Kraisrhu mrokfot kmi kmi kfo ptha fnahruhant. Nd hus yima yuhuf korhwofa. Bro yima yuhur duka kangr, hifa anohkahann be Kraisrpno amtoha. ²⁴ Tfifit wom yima yuhur nikom mdukekwoyann kanga afo atohkahann Kraisrhu mrokfom kfo bmtaruhanko. ²⁵ Nanhu yima yuhur inji htitanr nikomn afo mdukak hanita, kanga afo niko Jisasrhu mrokfom afo wayakitoh bmtakomm, nd dukeftpno afo tohhato nikompno niahato Kraisrhu mrokfot kfo ptha bmtarhotanko Jisasrhu mrokfot yakitoh bmtaruhakomm yima yuhum yindhorrahmk. ²⁶ Na afo yima nfriya ftohann nieya nikmoh kmit, be nhaf Krais Jisasr masat kfo yindhor mirahko, “O hifa Kraise toh rafomotnr, nhai yimam wasrmomr. Asor yima nfrir tohwarn nia kau hafotwornom.” Inji kfo yindhorrahko.

Porr yakyuk krhopam kanjo Filipai thofm yak hnerahm

²⁷ Bro mrokfot kfiwanko. Nikom tohyuk toh nmbuham, be Kraisrhu mrokfot kfiwa yuharpat toh hikkfot. Na be tukann yima nfriya afo ftohane, ee btn tuka nia htiruhanko. Nhai asha afo kalabusn ftoha, kanga nikmoh toh nmbuhathu mrokfot awanyaktwoya amitwam, “Filipaithu Kristenm, nhai rinatuhtakahm. Rpatn rpa yima yuhurparn tohwamn Kraisrhu mrokfot kukatohaf hanitmt. Yimam kangm faso ahanyinomt o kfo dburnanomt, romn tfit kfo hik bohik marnyewumt. Inji newatm Kraisrhu mrokfot buriwut.” Na kanga inji awanyaktwoya. ²⁸ Yo tu bro nmbuhat na kanga awanyaktwoya amitwam, “Nhai yakrmikahm Kraisrhu mrokfom yak dburnayuk yimampno nna kfo hamuh nna kfo hamuh thoft. Tum Kristenm rpatn natoh dbkafwamn Kraisrhu mrokfot kfo hta bohta marnyewumt.” Na kfiwanko, inji rpat tohhato Kraisrhu mrokfot yaki-tohhato ptharahkomt, be nd nikompno nia pthayuk yimam mhti yanhorahmko. Mhti yanholah kfo mirahm, “Nom injina injinanef, Bro Nkifrar nom yak batiruharn, Filipai thofmn yakmiyak-rahr.” ²⁹ Ndnatn nikmoh toh nmbuham be rpat tohhato rpa yima yuhurpar yakinohkphot. Bro Nkifrar hifa nikomn hti dukahato Kraisrhu hingrneft wafak htamorko. To mirahko ka be rorhu mrokfothu hiknefrpat hikkfot nhai, krhopam rpat yakkfot. ³⁰ Niko htimoko na Filipait tohhato yakmo krho nmbuham, yo tfit arihat na asha Romt tohhato yekwa krho nmbuham wanyekwoko. Niko krhopam yakneft mirahko ka nnndo. Nikomi na rpa yihtor kauwonom. Na yakyuk krho-pam niko to kekwomko.

2

Rpa yima yuhur yakinohhato rpat tohkfot

¹ Rpa yima yuhur yakinohhato rpat tohneft kfiwanko. Kraisr thu bmtiwatrko niko rorhu mrokfeft hikwohat o krhopam yekwohat, toh bmtewuko. Yo rorhu mondt htewatrko nikmoh yima yuhum miyorhwomko. Yo nikmoh yafothami Bro Nkifrarhu yafothat rpat nabnothato rpat tohwom. Yo nikmoh wom yimatm hifa yak marnyahato hti yuhuwafwokomm. ² Tmift rpa yima yuhurparhu toh nmbuharpat kanga rpa yima yuhurpar tohhato tuko niyak marnya niyak marnyakahtko na htihato nanhu yima yuhur yindhorrahr. ³ Rhu nmbuham mirahko be turpkmoh rhu nmbuha-rpam o yau nmbuharpam htihato ayak marnya bomarnyanom. Nhai. Womroh rhu yau beb nmbuham hti dukakfot. Womm finji rhu bebwom, afo romn yak marnya bomarnyafo, ee, kto tukmoh rhu nmbuham yak marnya-kfot. Mirahko be turpako yak marnya bomarnyahato womm ahti yindhorm-nom. Nhai. ⁴ Yo mirahko turpkmoh shrkam ahti dukanom. Womm tamoh shrketem rrohm afo yak marnyafhe-hato kto tukmohm.

Kraisr yima furam kanjo toh hnamotr Bro Nkifrar tu bro yufat hemorrh

⁵ Niko Krais Jisasrhu yima yuhurhu dukefm kanjo inji dukahato tohkfot. ⁶ Ror inji tohmor. Ror yura hefenr Bro Nkifrapno wutohmohat, rofhu toh ruhefm nhai nndoh nndoh. Nhai. Rofhu ruheft, toheft, yufat rpat. Kto Kraisr nda bbinysoft yawihnamohat, nhai nd ruheft, toheft, yufat tfit dukarmort. Nhai. Monghemort. ⁷ Monghehato nda bbinysoft nia tohmohat, tfit hingrna yima furapa kanjo nia tohmor. ⁸ Be yima furam kanjo tohmor. Yimam htimoahat htimoahat yima furam kanjo. Ror nhai marimor, “Yindhohato yufat yura yura htaruhant.” Nhai. Ror be yima furam kanjo tohhato nd Bro Nkifrar kfoyuk tng yuharpat toh hik hanymorn yura bgre misn kihegirmotmr nohmor. Tu bro yimtnayuk tkittn nohmor. ⁹ Nd nmbuhatpno Bro Nkifrar tu yura myorhekwa tu bro yufa brot hemorrh. Nhai ror yakmo kanjohot yufat wom yimam yakinohkahm. ¹⁰ Nd bro yufat hemotrr be bbinysoftu yimam, Maringour watohyukm, yo yura hefenr wutohyukm be rorhu yufat yutahato tabokmerahm. ¹¹ Tabokmehato Bro Yifemr kfo yindhoh mirahmr, Jisas Kraisr tu Broyer.

Bro Nkifrar duka yanho hanyhato hikkfot

¹² Niko tu nanhu yimat mifikomn kfiwanko. Na nikmoha tohmohat, hifa htimoahank Kraisr hifa hik marnya-mokomr. Be nd na htimo htiyeft kanjo wahiktwakomr. Mirahko

be na htihato Kraisr ahiknomr. Ndt nhai hifat. Na wuri tohwa niko Kraisr hikkfot. Nikmoh fasoh nefm bi Bro Nkiffrarn fak thu hemorko. Ndnatn niko Bro Nkiffrar hikneft duka yanho hanyhato hikkfot. ¹³ Bro Nkiffrar thu yuhurhato kasinyewatrko tur hti yindhorwa nefm newukomm. Yo turn thu bmtaf hanitatrko nd nefm newukomm.

¹⁴ Tamoh tamoh nefenm kangko ananomm, mirahko nna kfo baboba hanyhato ananomm. ¹⁵ Niko nda bbinysoft fasoh fasoh nefm nayet yimaro buha tohwoko. Ndnatn be rpa yima yuhurparn rhuhato tamoh nefenm nakfot. Nd rirhu arhuyuk yimam htihato mirahm, “Tu hifa dborior nefm newum.” Nd niko tohwa tkitt nhai be dborior yimarpam tohkahmt. Nhai. Fasoh yimam tom rpat tohwoko. Ndnatn nd niko nayuk dborior nefmn nd kspita yaayuk yimam kshr kanjo yakinhhato yak nukak hanyrahkomm. ¹⁶ Yak nukak hanyruhatkomm hti dukarahmt tu tohyuk toheft. Niko inji narahko, be kto Kraisr yawihna thombat, kfo ptha yindhorruhanko. Kfo yindhor miruha, “Na Filipaimpno tohhato hingrnamo hingrneft nhai be hingrna furarmoyant. Nanhu hingrneft Filipait hingrnamot yafothett rhumot.”

¹⁷ Na fnohane, nhai mrokfom. Niko Bro Nkiffrar ofa yahuka kanjo nikmoh yima yuhum ofa kanjo hemokomr. Na washato prisroh wain ofa yak nengitwa kanjo nanhu kkut yohnineft, nhai mrokfom. Na to yindhorwa. ¹⁸ Ndnett niko rpat ayindhornom.

Timotir Filipaikorhof yi nmbuhat Porr kfo tkrurmo yuhat

¹⁹ Bi brbohwot Timotirhu nianeft. Nhai be bmbri nanhu fijo kfo tkrur-rhotanr. Bi tu Bro Nkiffrarn kangr, wakfo tkrurnr, ee btn kfo tkrurafrhotanr myau hafot tanyrahrko. Rorn mhti tanyruharko tfit nia ptha nuhasrahra nikmoh toh nmbuham. ²⁰ Nhai wom yimam na kanjo duka kfo pthakahmko. Nhai. Timotirpar na kanjo dukewurko. ²¹ Wom womt rom turoh rhu nmbuha-rpam hti dukewum. Kraisrhu tamoh tamoh dukefenm be inji dukani hanitmm. Nhais Kraisrhu dukefm rhukahmm. ²² Niko htimokomr Timotir, Bro Nkiffrarhu hingrneft na hingrnanhomoahat, yima nitohf kanjo inji hingrnamouno Bro Nkiffrarhu tamoh tamoh hingrneft rorn hingrna-nhomoura. ²³ Ndnatn yimaro kfo tkrurneft nhai wom yima furam kfo tkrurkphot. Tu Timotir kfo tkruraforuha. Afo nda Romt tohwa bro yimam kanga afo awany marnyayanme, finji finji kforhomma. Wany marnyahato ee btn kfo tkrurafrhotanr nierahr. ²⁴ Na tukianhu nia nmbuhat nanhu bro dukeft duka kanga Bro Nkiffrar be nhai wom kuknaruhatr nanhu kfo tkrurafneft. Be Timotirhu mongko hti yakrahkma.

Epafradaitusr Filipaikorhof yi nmbuhat Porr kfo tkrurmo yuhat

²⁵ Epafradaitusr, nanhu yimatr, ka tfit kmiko nierahr. Filipaithu yufathur ror asha nanopno nia tohmohat htimo-yanr Bro Nkiffrarhu hingrneft rorn hifa fakitoahnho marnyamora. Na soldiam hingrniwa kanjo inji hingrna-nhomora. Tamoh krho nm-buham rorn titanhomoura. ²⁶ Ror bro dbohneft yakmohat kmi thofko wanyakmokomt rorhu dbohneft. Ndnett duka kangr, “Bmbri yirhoyann htirahma. Nhais bmbri yirfoya rom duka mirahm, ‘Ka bi fnohr.’” Ndnetrn nierahr. ²⁷ Nd rorhu dbohneftu yak mrokfot niko wanymot, ndt nhai kfo fura mrokfot wanymoko. Dbohneft fak mifmotr. Bi noh nyngam fak hany sitamor. Bro Nkiffrar ahti yuhuwaf duha yirr bi nohngotrmor. Hifa Bro Nkiffrarn hti yuhuwafhato fak kasinyamorr. Yo nhaf Bro Nkiffrar nann wom dukeft mdukakmor. Duka memor, “Nd yimar nohrahr, tfit wom krhopam yakrahr.” Nd dukefmpno nd ror yakmo dbohneft fak thumort. ²⁸ Ndnatn nanhu bro dukefr duka kanga ayikahtu Filipai thofm htiruhamrn rroh yima yuhum yindhorrahmm. Yo nd na duka krho hasiwa krho yima yuhur mirhurahra. ²⁹ Epafradaitusr asha niahato tohmohat, Bro Nkiffrarhu hingrneftn niarmor. Ndnatn tfit kmiko nia thoft wayindho-raktwakomr Kraisr yima yindhorwa kanjo. ³⁰ Wadukako, Filipaithu yufathur ror niamorn, ashahof Kraisrhu hingrneft rorn nia hingrnanhomoahat. Nd hingrneft tohhato bi noh hany sitamor. Ndnatn ndhtet hifa dborior nefm nayet yimam bro yindhor nmbuhat htakfot.

Kraisr hiket yimarhu yima yuhur wuthayerr

¹ Barenko, kanga wuroh mrokfom akfoyanko. Brorhu yindhor nmbuhat niko yakitohwat, mirahko ayafho thunomt, yakitohkfot. Bi ndwom gontwamn pthamoyanko. To tfitndar gontwattn tfit wompam pthiwanko. Na nhai hhrekkaha nd rpahtet mrokforoh wawandfa thu wawandfa thu hatohneft. Na tuka kanga, “Akfo hatohkahtanm duka hanyrahmm mrokfom. Yimam mirahm, ‘Faso faso akfo htanomm,’ na nd kfo htayuk mrokfem mhtiyakruhamn toh bmtarahm. Nhai suhruhatm.”

² Bi nd na kfo hnamo mrokfom waduka hanyswakomm. Wom fasoh net yimar kangr, “Nikompno amruh-aknekahann fasoh fasoh akfo htayanko,” nd yimar sinya troh tanykfot. Wany yakitoh duha. Wany yakitohrahkomr be rorhu fasoh nefm yau kutetm kanjo nia yak truf wunarahko rorhu kutt. Ndhtet yimam, tha pukneft kukatoh-wom, kfo nheh mirahmko, “Tha pukrahko Bro Nkifrarhu yonko rhurahko.” Inji kfo nheh bonhehrahmko. ³ Ndhtet yimam nia pthiendumko mirahko awany yakitohnomm. Sinya troh tanykfot. Nhai tha puk thuneftpno Bro Nkifrarhu yonnom rhukahnom. Nhai. Nom tu Brorhu Yafothat thu kasinewattnom tu Bro Nkifrarhu lotu mifneft yak nuhaswattnom nom lotu-hato Krais Jisasr kfo yindhorwonomr. Tot tu tha puk thunefthu yimbu yuha mift. ⁴ Be amekahmn Bro Nkifrar hti yindhorwor nkifrar boririfhut hiket yimam, na nhai wom yimar finji kforfotra. Na nd nkifra hingrnf yuhat fak dbothat hikmoyant. ⁵ Barkoft akfoyanko, nanhu mmemt na hiyauni-mohat 7-pela marm rhunihato 8-yukr-pno nanhu that puk thumomt. Tot barkoft. Yo nanhu nia yuhat nhaf inji. Na nasakmo yifammaf rof tu Isrerf. Tu Benjamin kuny shoff nasakmofa. Na tu Hibru mifa. Na nd Bro Nkifrarhu Farisiya tohmoyann nd rorhu boririfhut fak hik marnyamoyant. ⁶ Farisiya tohhato Bro Nkifrarhu hingrnft hingrnahato rorhu yon kunys hikmoa nefm faso hti bebhato hik nembos tubatu inji namouanm. Womm tuha tat noh bonohmouanm. Be amekahmn, “Be nd boririfhut hikhato Bro Nkifrarhu yonn rhurahn,” na nhai wom tamohm dukarfota. ⁷ Nd na hik hnamo yihotar yo na nahnamo nefm memoa ka injinahato Bro Nkifrar hifa hti yindhorrahra, to nhai. Nd nefm be bi fahomoyanm. Bi tfit Kraisr nanhu dukefm htewa. ⁸ Memoa, “Ka na nahnayuk nefm ka Bro Nkifrar htiruharn dborioh rhu nmbuhat hirahra.” Ndnetann nd nefm na hnamoyann. Arihat bi nanhu Bro Nungothet Kraisrpno rim tohnimoyann, nd na nahnamo nefm tfit faso hti bebwannm. Tfit Kraisrhu nefm hti wofnwa. Nd na bingot nahnamo nefm bi htitwanm tu yafotha duha nefem. Kanga Kraisrpar tfit ayakitoh tkafkahann ⁹ be rorpno arim frfnahni bugakahann rorpno arim tohniya. Ndnetann na nhai wofnkaha nd nkifra boririfhut hikhato Bro Nkifrar na hifa hti yindhorneft. Nhai. Na kanga Kraisrhu mrokfot wany yakiohato hikneftn Bro Nkifrar htihato na dborioh yufat yakneft na wofnwa. ¹⁰ Nanhu dukefm kanga tu Kraisrpno arim frfnahni bugakahann nd ror nohhato sinyamo yuhathu bbuka rifhur afo ahtiyanr yo ror yakmo yahrt kanga ayakwonant. Nd yahrt tohhato kanga nd tkittn anoha, to nhai mrokfom. ¹¹ Na kanga ror nohhato sinyamo kanjo na inji nohhato asinyaya.

Porr makkfothu yakneft duka duka tonemor

¹² Na Kraisr yakmohat, dborioh rhu nmbuhathu yakneft dukahato fakmora. To nd ror kfoyuk rhu nmbuhat na tafito yakkahant. Nd rhu nmbuhathu yakneft dukahato na yuhre nhombra bonhombriwa. Ndnetann na nhai bi kfo mekfot na bi Kraisr kfoyuk rhu nmbuhat bi yak bugahato be bi nd rhu nmbuhathn korhwa. Nhai. ¹³ To yinopenroko, rot nd Kraisr kfoyuk rhu nmbuhathu yakneftn, tafi afo yak-kahant. To nd na bingot tohmo toh nmbuhahm o namo nefroh yafho thunef, ndm na bi fahomoyanm, na nhai tfit wom dukak hanykahamn na bingot tohmo tohfm o namo nefm. Bi tfit nyngako rhuyuk rhu nmbuhathu yak dukefr duka duka korhwa. Torpar nanhu bro yima yuhur. ¹⁴ Nd yima yuhur yorhwotra kanga yimam tone resishato be nd praiskfothu yak dukefrpar duka duka tonita kanjo kanga na inji Kraisrparhu dukefrpar duka duka atoh nnfakahann nd

ror kfoyuk tkitt yakruhant. Kraisr na yakmohat to rorpno hefenr mtoh nkifranineftn fakmora. Tot nd tkitthu yak dukefr yorhwotra na toh nnfewa.

¹⁵ Nd dukefr na kfiwar, be yima dukefetnom arhunom, to nd na kfiwa dukefrparn hikkfot. Womr wom nndoh yima yuhetr rhuneft, tu Bro Nkifrarn yak nuhasrahrr. Yak nuhasruhatrr hti dukarahrt tu Jisas Kraisr dukewa dukefr. ¹⁶ To ror nd dborioh dukefr nom bi yikitohwar, yafhothu duha. Nd dukefr yikitoh kihkfot.

¹⁷ Niko tukanhukomn kfiwanko. Na nikmoha tohmohat, nanhu toh nmbuham bi htimokomm. Be nd yuhat niko toh hikkfot. Yo frohm nikmoha nanhu tohefm toh hikwom, rroh tohefm toh hikkfot. ¹⁸ Nhai be sfno inji kfokahanko. Nhai. Ndharhof yimam bi hti hik bohikmoyanm wom yimaroh nefm fasohem. Jisas Kraisr bgre mis nohmo yuhat nhai mhtiyak-hato duka mekahm, “Bi nmoh fasoh nefmpno yimar nohmor. Be tmifnom fasoh nefroh nanefm.” Nhai. Nhai inji mhtiyakkahm. Fasoh nefm kakitoh yikitoh hanitmm. Ndhtet yimam niwa nefm bi kfo nuhasmoyanko. Tfif wompam kanga rom niwa nefm akfoyanko bu nyngam kawihnewuma. ¹⁹ Ndhtet fasoh net yimaroh nefm nhai yima dukefmpno nakahmm tamoh tamoh nefm. Turoh thatipthu rhu nmbuharpethu dukefrpamn buriwumm. Bro dukefm korhm thatiptn. Be ndar bbinysoftthu tamoh tamohroh dukefrparoh dukefm korhm. Tamoh nefm naneft nhai yimtna hanyhato nakahmm. Be yihato na fura bofure-wumm. Ndhtet yimam kto Bro Nkifrar yakhato yak batirahrm. ²⁰ Nom, nom yura moun thofenom. Be Jisas Kraisrhu miyaknefrpatn toh gari hasiwunom. ²¹ Nd yiha ror yawihne thombat ndar nom bbinysoft hatohwa tfkha bebt thu troh tanyhato rorhu bbukeft kforaht, tfif turhut kanjo yak nhombranihato muhrahnom. Bro bbukeftpno nieruharn nd tamoh tamohm bbinysoft rhuyukm rorhu yinhitn rhurahm.

4

Porr Filipai thofm mrokfom hemo yuhat

¹ Niko na hingrnanhomoako, Bro Kraisr yikitoh kihkfot. Na asha toh thoft ka duka kangko mumiwurnom. Nhai. Na masat dukiwanko. Na Filipait htamo mswirt memoya, “Ka be nhai sinyaruhatm yewurim.” Awi, yewurifanm tom dborhamom. Nikomeko nd yewurifanm. Na asha rhu haso thoft duka haso kanga aikahann ahti hafotanm.

² Nifn Yuodia Sintikerofn, nifn nd hus metfn afo wawanyfn. Nifn nhai be met furafn rhukahfn. Nifn tu Bro Nkifrarhu met husefn. Ndnett nifn tufn metfn niyak marnyahato rpat toh marnyakfot. ³ Yo ni, nanopno brbo tohhato Bro Nkifrarhu hingrneft rpat nanopno hingrnanhoyukn, ni nd hus metf hti yau hafothato rofhu rpat niyak marnya duha nmbuham yihato yak marnyahekfot. Na Filipait tohhato hingrnamo hingrneft rofn yindarim kanjo fakitoahnhomoufa. Klemenrom damiagt rompno inji rpat hingrnamounom. Rom buga rroh yufam korhwom toh nkifraniyet yimaroh yufam yorhwa gonborngtn.

⁴ Niko tohneft be yindhor yima yuhurpno tohkfot. Nhai be sfno inji kfokahanko. Niko bi Bro Nungothetr fakmorko. Ndnett wayindhortwako. Tfif kfiwanko, wayindhortwako.

⁵ Be hifa yindhor yima yuhurpno tohkfot. Yimam nikmoh dborioh nefm htiruhann brbo furyakna hnerahmko. Brorhu yawihnaneft bi brbohwot. Ror yawihna thoft yak nhtarahrm nmoh nefm. ⁶ Tamoh tamoh krho nmbuham korhmnom, mirahko be nd krho dukefm aduka hasonom. Yudbat Bro Nkifrar nakukfot. Tamoh tamoh krho nmbuham, ndm pthanihato tfif yurakn kfo yindhorkfot. ⁷ Nd na kfiwa yuhat hikrahko hifa yima yuhum yakruhakomn nikmoh yuhuwaf marbimo mirhu marnyarahmko. Bro Nkifrar ndhtet yima yuhum yimam hanyeft yima yuhum nhai wom krhokahmm. Yima yuhum be frjbtwa buganitamn tfif Jisas Kraisrpar kitm. Ndhtet yima yuhumpno yimam rhuneft womm htihato mduka nhita mirahm, “To ndhtet yima yuhume finji finji yakhato inji yorhwam?”

⁸ Barenko, tfit wom wuroh mrokfot kfiwanko. Mirahko nandomrhu neft ayaknom. Nandomr tu masat thu nheheter. Niko rorhu nefm hik duha. Tu Brorhu nefrpam yakinohhato hikkfot. Wom met yindarim nd niko nayuk dboriorh nefm hti yindhorrhato rom yindhorrhahm. ⁹ Na nikmoha nikompno tohmohat, tamoh dboriorh nefm bi fak nuhasmoyanko. Yaunefm, pthanefm, nd ndm bi hti hikmokomm. Be nd na yak nuhasmoyank. Inji toh marnyarahko htirahko nd nom tita hatohwa krhopam yak thuwa Nkifrar brbo nia tohnhorahrko.

Porr Filipaimpno maruhat yakhato kfo yindhormo kfo yindhore mrokfot

¹⁰ Hifa tuko wanakfo dukakmokomn tfit marufem dukamokma. Ndtpno na Bror kfo yindhorwanr. Nhai be ariharpa dukakahkma. Nhai. Duka hnamoukma tmifm, maruhat yihotam mduka nhiyaktihato be nhai htahermokma. ¹¹ Na nhai be maruham yaknafhato inji kfokaha. Nhai. Nanhu toheft bi inji ritohakmoya. Na sfno wuska duha tohneft o wusketa rhuneft, na nhai mrokfom. Na tohkfot. ¹² Na sfno wuska duha tohneft na nhai womm kanjo kfo nur hatohkfot wommpno. Na nhai ndhtet nefm. O bok wusketa rhuneft nhaf inji buga. Na nhai finji kfokfot. Tamoh yatinoh o yeshriyeta rhuneft, na nhai wom mrokfom. Nanhu rhuneft to be yon mumennm kanjo rhukfot. Nhai tng ptha inji nakfot. ¹³ Nanhu toheft Kraisr thu bmtewotra nd rorhu bbukeftpno na hifa tohwa. Na nhai tamoh tamohroh dukefm dukakfot.

¹⁴ Na tamoh krho nmbuham rhuneft niko tukmoh hti yuhuwaf nmbuhatn maruham htahukkma. ¹⁵ Niko tu Filipai thofko htimoko. Na nikmoha Masedonia profinsko barkof yihato Bro Nkifrarhu mrokfot hany pthahato tfit kto wom kmiko yimohat, niko tuko htimoko. Nhai wom kmithu Kristenm wom maruham yak nhafoh-hato nanhu yufatpno htahrmomm. Tu be nhai mif. Niko Filipai thofkmoh maruhenrpam na korhwa.

¹⁶ Na Tesalonaikat yi tohmohat nhaf inji. Nikmoh marufam htimoyanm. Dfik yiham maruhem htahemokma. ¹⁷ Na nd mrokfom inji kfiwohat to mirahko ka maruham yuhurhato yuwi inji kfo rhtitr. Nhai. Nhai nanhu hanyeft dukahato kfokaha. Nhai. Kanga yima hanyeft yakinohkahtkomt Bro Nkifrar inji htihato tawo thu brurhirahrko. ¹⁸ Ndar na wandfiwa mrokfot maruharoh kfo nuhas mrokfot kanga akfo nuhasanko. Nd niko htahmo maruham asom bi fakmoyanm.

Epafrodaitusrpno htahmo maruham asom bi hnahrentra fakmoyanm. Hifa na yindhorwa. Be tu bok maruham htahemokma. Ndmpno bok yiham tohniruha. Be tu Bro Nkifrar yimam hifa mthet kahpam tariorh mthahato Bro Nkifrar mthahato yindhorwa kanjo inji htitanm ndar niko htahmo maruham. Hifa. Na be tu masat yindhorwa. ¹⁹ Nanhu Nkifrarko be tu mfro tamoh tamoh harhuwor. Ndnett niko, Krais Jisasrpno rpatorh yuwi inji htahmo maruham. Nkifrar nmoh Yifemer. Ndnett rorhu yufat nom yiha yiha yuta yindhorkfot.

Kfo yindhore mrokfom

²¹ Niko Krais Jisasr hikwako, nani nanopno asha hingrnewam nikompno kfo yindhore mrokfom htefiwumm. Yo asha Romthu yimam Bro Nkifrar hikwam, rom to inji nhaf kfo yindhore mrokfom htefiwumm. ²² Yo asharhof bro yima Sisarhu kunys hingrniwa Bro Nkifrar hiket yimam nhaf nikompno kfo yindhore mrokfom htefiwumm.

²³ Bro Nkifrarhu yuhuwaf nmbuhatn nikmoh yafotham thu kasirahtm.

**Kolosi thofroh gontwat
Porr dwandfakhato htafmot
Barkof kfo nuhas mrokfom**

Kolosit, Esia profins korht. Brbo Porr yi tohmo kmi Efesuspno korht nd kmi Kolosit. Nd kmi Kolosit Bro Nkifrarhu sioskfot sinyamohat nhai Porrn nd kmi Kolosit yihato sioskfot kasinyarmort. Nhai. Kane ka Porr Efesus yi tohmohat, ka nd yiha Porr wom yimam misin hingrneft kfo tkrurhato hingrna htfasmoahat, ka nd yiha nd kmi Kolosit Bro Nkifrarhu mrokfom kfo pthanimoatmm Kolosi thofm wanyhato sioskfot sinyamot.

Nd kmi Kolosit bi sioskfot sinyayettn tfit wom yimam nd kmit yimoamn memoum nd kmithu Kristenm wom nfri nfri mrokfom akfo hta bohtanomm. Porr inji wanyhato ndar gontwat wandfamorm Kolosi Kristenm. Rroh kfo bmtayuk mrokfom wandfamorm. Kfo memor, “Krais mifpar tamoh tamohroh mfhakort korhrt. Kraisrpar toh rafohato rorhu mofsinhitn yak htarfornom, wom yimam nhai. Rom yakrfomnom nndo wuri yak htarfomnom. Nhai Kraisrpno brbo wom tohrfotnom.”

Kfo memor, “Kraisrhu tirmpno Bro Nkifrar hingrna hta bohtamorm hefenri bbinysoft rhuyuk shrkam. Kraisrpno frtkafwatnom thu hamuhwornom. Thu hamuhhato nfri yima rifhur niewur. Nfri yima rifhur niewatr tfit tu Kraisrhu duka yima yuhur hikwonom.”

Porr ndar gontwat wandfakmorn Tikikusr hiyafmotr Kolosiko hanymort. Onesimus-rpno yimof. Filemonrhu gontwat Porr wandfamot to nd yima Onesimusrhu mrokfotn wakfotuh wakfotuhmour.

**Kraisrn buriwurm tamoh tamohm. Bro Nkifrar bi rorn thu
dbothatmor.**

(Sapta 1.1-3.4)

Kolosim Kraisr yak hik mifmo yuhat

¹⁻² Na Pora, na Krais Jisasrhu aposer hingrneft kakitohwa. Tu Bro Nkifrarhu hti fijo nann htihato nd aposer hingrneft fak htamor. Timotir, nmoh Kristen yimater, ror nanpno tohwarn, rorpnno ndar gontwat wandfewunonko niko Kolosit tohwa Kristenko. Niko Kraisrpno frtkafwa yimako, Bro Yifemr nikmoh rhu nmbuham ayak hta bohta marnya-kahtro be rhu marnyarahko. ³ No kfo bruttnahato nikmoh yufam yuta thombat, nmoh Nungothet Jisas Kraisrhu Yifemrpno kfo yindhorwo-nonko. ⁴ Nhai be sfno Bro Nkifrarpano kfo yindhor furakahnonko. Mrokfot wanyakmono kfo memomno, “Kolosi thofm Jisas Kraisr hikwann Bro Nkifrarhu tuhan yindarim hifa hifa kak marnyewumm.” No inji wanyak-hato Bro Nkifrarpano kfo yindhorwo-nonko. ⁵ Niko nhai bi nd nefm riyakitohakrmokomm. Hefenr yimam muhhato Bro Nkifrar hiruha wussbu mrokfot riwanyakhato Jisas Kraisrhu yafothet gutnius mrokfot riwany yakiowakhato nd nefm rifakitohak-mokomm. ⁶ Yimam nd gutnius mrokfot kmi kmi kfo ptha htfasmotmt niko wanyhato rihiakmokomt. Rihikak-motkomt Bro Nkifrar inji htihato fak marnyamorko. Tfit tukomn Bro Nkifrarhu yimam yak marnyewa nmbuhat mhtiyakhato duka memoko, “Dajohmn, gutnius mrokfot tu fipetet.” Nd gutnius mrokfot be bi kmi kmi kitt. Nhai wom kmit rim tohtakaht. Be bi kmi kmi yitatt tuhan yindars wany hanitamn yima yuhum kak kebokt hanitmm nikmoh yima yuhum yak keboktmoo kanjo. ⁷ Bro Nkifrarhu yuhuwaf nmbuhat hifa Epafrasr nikompno tohmoarn kfo nuhas bonuhasmorko. Rorhu hingrneft, awi hifayet. Nom hifa hti yindhorwonot ror hingrnewa hingrneft. Ror nmoh yimater. Rorn tkitt yaknihato nd gutnius mrokfot yi kfo ptha nuhas-morko. ⁸ Mkfo ptha nuhas tanyhato tfit niahato rorn tfit nia kfo ptha nuhasmornom, niko Bro Nkifrarhu Yafothat thu kasinyahato wom riruh arhuyuk Kristenm yak marnyewa yihotam.

Porr Kolosim kfo bruttnamo yuhat

⁹ No nd Epafrasr kfo nuhasyuk mrokfom wanymo yiha, no Timotir-pno rikfo bruttnakmononko. No nhai yafhokahnonko. Kangno, “Bro Nkifrar akfo bruttnakahtnonr Kolosithu Kristenko be Bro Nkifrarhu dukef yuhatn hikrahko.” Yo Bro Nkifrarhu Yafothatn tu dborioh riduka aduka yima yuhur hirwattko be nd dborioh dukefrpar brorahrko. ¹⁰ Be nd dborioh dukefr broruhatrko Bro Nungothetrhu dukef yuhatn hikruhatko hti yindhor-rahrko. Niko hingrnayuk hingrnafam nhai finji naruhatm. Be yi marnyarahm. Nikmoh toh nmbuham be dborioh nefrpam narahko. Nd yuhamn Bro Nkifrar hti duka tungunarahkomr. ¹¹ Bro Nkifrar harhuwa bbuka rifhur nhai be rpahtet bbuka rifhur harhukahr. Nhai. Nndohtet nndohtet bbuka rifhur rorn harhuworr. Ndnatn kangno Bro Nkifrar akfo bruttnakahtnonr nd ror harhuyuk bbuka rifhur hiruhatrko titarahkomm wuruha aruha niayuk krhopam. Tpim habokknaruhatrko nhai wohsisruhatko. Nhai. Tamoh tamoh nefm nhai be bmbri kaht kanjo wakuryakhato huttnkriruhatko. Be yindhorhato ¹² nikmoh Bro Yifemr yuta yindhorrahkomr. Nd Bro Yifemrn yihotam yak hta bohtamotrm nikmoh yufam bi rorhu rmon swirln o rorhu rmon rifhutn korhwom. Yufam bi rorhu rmon rifhut ruhetmn nd tamoh tamohm nikmoh yufampno hefenr rhuyukm yakrahkomm. Rpat nd Bro Nkifrarhu nukeft tohet met yindarim-pno rpat yak hanyrahkomm. ¹³ Nom afo Satanrhu tirtn rhumonom. Tfif Bro Nkifrar yakmornom Jisasrhu tirwafitn wakmbremornom. Turhu marbit rhuyuk Yonrhu tirtn wakmbremornom. ¹⁴ Nd Yonr suh nanyormotr Bro Nkifrar inji htihato be nd nmoh fasoh fasoh nefm nhai tfit dukakahrm.

Kraisrhu nefmi rorhu hingrnem

¹⁵ Kraisr Bro Nkifrarhu yoner. Nda nom hti duha yita Nkifrarhu ruheft, to nd Kraisrn fak nhombramort. Kraisr, Bro Nkifrarhu nkati yonrn, to be rorhu yinhitn rhu bugewum tamoh tamohm. ¹⁶ Kraisrhu tirmmpno Bro Nkifrar hingrna hta bohtamorm hefenri bbinysoft rhuyuk shrkam. Hefenr rhuyukm nhai htikahnomm, bbinysofrpathum womm htitnamm. Rorpar hingrnamorm mounmotm, kminysofroh nkifram, gafman yimam, nd ndm rorpar hingrna bugamorm. Memor, “Ahtakananmn nanhu yinhit tohhato nanhu yima yuhurn hikrahm.” ¹⁷ Kraisr bi ruhetrn mounti bbinysoft yorhwa shrkar dborha hanymor. Nd dborhayuk shrkar rorpar kfiwatr nd shrkar nom htitwa htiveftn korhwor. Ror kfiwatr tekem yiretm yorhwatm yimanom yiram yakhato kawonom. Ror kfiwatr yimanom wiyauyauponom. Nd nd nefm o tamoh tamohm inji rhu hikwatm htitwonomm. ¹⁸ Kraisr tohhato rorhu sioskfot kasinyahato rmon kimor. Turn rmon bis rhuhato kak hta bohtewurt. Kraisr tor tu barkof yimar bi nohetr tfit sinyamor. Tamoh tamohm rorparhu yufatn nyngako htakfot. ¹⁹ Bro Nkifrar bi Jisasrn thu dbothat bugamor. Memor, “Athu dbothatkahtanr be rorn yakrahrm nanhu nefm.” ²⁰ Nomi Bro Nkifrar nndo nndo toh hnamohat yo ndar bbinysoftu fasoh rhu beb nmbuhat rhumot Kraisrn yura bgre mis tuhegir-hato rorhu kkut yohnemott Bro Nkifrarhu namburpam Kraisrn hta nohmormn gbhu mtir hnamorr.

²¹ Niko afo fasoh nefm yikitohhato yo fasoh dukefmpno rhuhato nhai Bro Nkifrapno brbo yirmoako. Be inji hti sr thumoukomr. ²² To be hifa Kraisr yura bgre mis nohmor. Inji namotr Bro Nkifrarhu namburpam rorn hta nohmotrm hifa yima yuhur niehato rifak marnyakmornom. Bro Nkifrar duka memor, “Inji anakahta yimaroh yima yuhum tukanhu yima yuhum kindo rhuruhamn ee hifa htihato tfit yakruhanm. Yo nhai tfit wom mrokfetm rhuruhatm.” ²³ To nd dukeftpno, nd niko yikitohwa gutnius mrokfot mirahko yikitoh hrufreh hasohato tfit wom nefmpno amyafhoninomt. Nhai. Nikmoh dukefm nd gutnius mrokfot kfoyuk mrokfo yuhamn duka duka hti yukatoh hasokfot. Na Pora, nann aposer hingrneft myaknihato nd gutnius kmi kmim kfo ptha htfaswonomt.

Porr sios tohyuk tuhan yindariroh hingrna yimar tohmr

²⁴ Ndar yihart na kalabus tohwa. Na yindhorhato kekwanm nanpno niewa krhopam. Nd krhopam Kraisr yakmo krhopam kanjo kekwa. Niko yakyuk krhopam nann tfit kakahukanko. Ndnetann kanga nd Kraisrhu sioskfot yakyuk krhopam nann tfit kak

hanyahukanm. ²⁵ Bro Nkifrar niko yima tangikmoh duka nmbuhatn na sioshu hingrna yimaya fak htamora. Ndnetann na niko sios tohwa tuhan yindarikmoh hingrna yimaya tohwa. Nann nd hingrneft tohhato nann nd rim lta mhta mrokfefm frhik bohikak-hato kfo hik bohik nuhasruhank. ²⁶ Bingot toh hnamo yimampno nd mrofket afo fak kafroh hnamort. Ariharn nd kafrohet mrokfot bi tafont htiwatrt Bro Nkifrar hikwa tuhan yindarinom bi htihato wanuknomt. ²⁷ Bro Nkifrar turhu dukeftpno nd kafrohet mrokfot hta nriyaf nuhas-mornom. Nd kafrohet mrokfot inji kfiwut. Yima tangim Bro Nkifrar yukatohhato yak marnyarahrm. Nikompno Kraisr frtkafwa yuhatn hefenr hanyruharko hefenrhu dborior dborior rhu nmbuhat hi hanyrahrko. ²⁸ Ndnettn nom aposernom kmi kmiroh tuhant yindars kfo nuhas buga hanitnamm gutnius mrokfot. Nd gutnius mrokfot kfo ptha nuhas thoft, nom yakitohwa bro duka yima yuhur kfo kangnom, Bro Nkifrarhu hikneft hik marnya bomarnyakfot. Nom kangnom tu dborior dborior dukefm-pno nd Bro Nkifrarhu hik yuham akfo hik bohik nuhas marnyakahtnamm, mrokfom yak duka tunguna marnya-rahmm. Yak duka tungunaruhamn Kraisrpno frtkaf kihruhamn Bro Nkifrar hti marnyarahrm. ²⁹ Ndnettn Kraisr yahuka bbuka rifhurpno aposer hingrneft hingrna nnfiwant.

2

Toh bmtahato tamoh tamoh nefm niayukm frtfa thukfot

¹ Na kanga akfo nuhasanko niko nanopno tafi nahti duha Kolosiko, Laodisiako yo niko womko, na niko dukahato yiha yiha kfo bruttna nnfiwa. ² Na inji hingrna nnfiwohat nanhu yima yuhur duka kangr, niko Bro Nkifrar hikwa tuhan yindariko bi tat yima yuhumpno warhukahkomm tir nayakitohhato rpa yima yuhur bi warhuko. Ndhet dborior dukefm wayakkahkomm niko Bro Nkifrar hikwa yihotar nd dborior dukefm thu bmta hanyruhatmko nd Bro Nkifrarhu yak kafkoyet mrokfot htirahkomt. Nd kfo kafkoyet mrokfot to nd Kraisrhu gutnius mrokfoyet. ³ Kristen yima yakitohyuk riduka aduka yima yuhum, mrokfo ptha yafothar, tamoh tamoh dukefr Kraisrhu gegb yohrn hmbre kafrohetm korhm. Yima Kraisrpno riyahn, ee susubur nuhashirahrn.

⁴ Mrokfom bi wanukwokomm. Wom yimam niahato mkfo wuti bowutitmko, to mirahko bi ariwany yakiowaknamm. ⁵ To na, na nhai nikompno rpa kmit tohkahnom. Na nndo tohwa. To nanhu htiyeft inji htitant, thatiprpat nndo tohwot, dukefr nikompno korhwor. Hifa nikmoh toheft toh marnyiakomm Kraisr kakitoh nnuhaknitkomr. Nd ndm wanyakhato yima yuhur yindhorwora.

Kraisrpno frtkaf mifhato rorhu toheft yakkfot

⁶ Niko bi Nungothet Jisas Kraisrhu gutniuskfot wanyhato yakitohetko, be Kraisrpno frtkafhato wuyauyaukfot. ⁷ Miroh nembfam tum wom miroh nembfampno nathu dbkafhato tohwa kanjo nikmoh tohefti wiyauyau nmbuhat inji tohkfot. Nd nom yihato kfo nuhas htfaswa gutniuskfot yakitoh kihhato hik marnyakfot. Nd gutniuskfot hikhato Bro Nkifrar nikompno niwa dborior dborior nefm tfit Bro Nkifrar kfo yindhor boyindhorkfot.

⁸ Niko dukefmno tohkfot. Wom yimam wom nkifra tndhmi mount yorhwa mar-rhu tndht o gunyrhu tndht o yamthu tndht o bbinysoft yorhwa shrkaroh nkifra tndht hneruhamt yuwi mkfo tndh nhehruhatmko niko mwany wofnnihato mhikaknirahkomm. Ndhet yimam nkifram yakitoh hawihnamo nkifra boririfhuti mount yorhwa shrkaroh nkifra tndh mrokfomi bbinysoft yorhwa shrkaroh tndh mrokforpam kakito-hwom nhai Jisasm hikhato rorhu dukefr hikkahm.

⁹ Bro Nkifrar bi Kraisrn thu dbothat bugamor. Ndnettn niko dukaf hanykfot. ¹⁰ Kminysofroh nkifram bi Kraisrpar kak wasitrm. Nhais rom mfrfnahnihato tfit rom mtohkfot mfhako. Nhais. Niko Kraisrpno frtkafwa yuhatn to be ror hatohyuk yafothar be bi niko mthu nawoh bugamor. ¹¹ Niko Kraisrpno bi frtkafhato tohwa yuhatn be bi kak hikwokomt tu tha pukthu yuhat. Ndt nhais be thatiprthu hingrneft rhukaht.

Nhai. Kraisr nd bingot hatoh hnamo yima yuhu bebm fak thumor. Tot tu tha pukthu yuhathu mrokfo yimbu yuhat. ¹² Bi Kraisrpno nohmokomn rpat sinyamoko. Baftais hingrneftn nd Kraisr nohhato sinyamo hingneft baftais nuhasmoko. Kraisr nohhato tfit sinyamohat, fitoh yimam duka kangm, Kraisr nohmohat tfit tu Bro Nkifrarhu bbuka yafotharn tfit kasinyamorr, ndhtet dukeft yakitohet yimam baftais neftpno nd dukefr kak nuhaswomr. Niko to ndhtet dukefr yakitohmotko baftaismoko. ¹³ Niko ritohakhato toh hawihnamohat tuko rihatohakmo fasoh yima yuhurpno toh hawihnamokomn nhai wom dborior nefm nahnamoko. Be nd fasoh nefmn yakitoh hnamokomn bi hel yita yihotar bi tohmoko. Kraisr sinyamo yuhatn niko tfit nfri yima rifhur thu hmbrehemorko. Nd fasoh fasoh nefm nd yiha Bro Nkifrar mong trohmorm. ¹⁴ Be nd nmoh yufam bi kotpepafot ruhetm Jisasr nohmo bgre misn rpat frdbkafhato rpat nd kotkfot minohnimot. ¹⁵ Kraisr bgre mis nohmo tkittn Bro Nkifrar yimaroh nyngatikhato tafontn nda kminysofm yo nkifra yarhm hatohmo nungrajoh bbuka rifhum fahot nohmorm.

Bi Kraisrpno nohmonom. Nhai tfit nkifra tfha mntwatn yakhta marnyaruhattt nmoh rhu nmbuhat

¹⁶ Mirahr wom yimar mrokfot hnehato yemroroh ye hik yuham, yo Judaroh bro yiharoh rhu hik yuham, yo nfri yamroh mfnah yiharoh yemro burwa hta yuham yo Sabat yiharoh rhu krna yuham, nd nd nkifra yirmoht tfit amhfnahneyant. ¹⁷ Nd nefm nkifram yakitoh hik hnamom rom nkifra yirmoht yakitohetmn fak hik hnamomt. Rom yakitoh hnehato bi romn hanohnimomt. Nom yonnom tfit nd nkifra nefm yakitoh duha. Nom Kraisr hingrnamo hingrnf yuhatn tfit hikkfot. ¹⁸ Wom yimam niahato kfo rafo kangmko, “Tamoh tamoh yeshri-roh ye kars yuham kfiwunomko yo kfo kars mrokfom kahukwonomko, hikkfot. Hikhato mounmotmn kfo bruttnakfot.” Rom kfoyuk tng yuhat hikrahko to be nd Bro Nkifrar hiruha hifa rhu nmbuhat nhai yakruhatkomt. Ndhtet dukefm nd yimam kfiwam, be nd hwe tweh hanyhato yekwa mro-kfom kfo nuhaswomko. Be turoh tuhagrha yima yuhumnd mrokfom kfiwumm. ¹⁹ Nhai romn Kraisrpno frtkafkahm. Nhai. Nomn Kraisrpno frtkafwatnom ror hatohekwo nom. Nom sioshu tuhan yindarinom rorn nmoh yima mrokfo rifuher. Rorn kak htaf bohtaf hanitrnom. Ndnetnomn rpat nayakitohwanomn Bro Nkifrarhu dukef yuharn hik hanitnom.

²⁰ Niko bi Kraisrpno nohhato nkifra tahi rmonroh nkifra boririfhut bi minoh nhehafetko. To tfit tamohmpno tfit nd nkifra boririfhut yakitohwako? To tamohmpno kfo boririfhu yamukako, ²¹ “Hnaru yemrom tire yakti duha yo ye siwon duha.” Tamohmpno kfo kars mrokfom hikwako? ²² Mirahko ndhtet kfo kars mrokfom ahiknom. Ndhtet hnaru yemrom tng yuhat yiyeifiwam nhai yihom rhukahm. Yihom fnahnitm. Be yimamn ndhtet yemro ye kars mrokfom mhfnahnewumm. ²³ Yimam to ndhtet yemro ye kars nmbuham ye hikwamn kangm ka tot tu dborior neft. Kangm, “Ka nd yemro ye kars yuhamn hikhato nd fasoh yima yuhur minoh hmbrenirahr.” Ndnetmn mounmotm kfo tatewamn, yima yuhum yak karhuhato turoh thatipm tmbho wok bowokwomm. Kangm, “Ka nd yuham inji anakahnomn ka nd fasoh yima yuhur minoh hmbrenirahr.” Nhai mif.

Bi Kraisrpno rpat sinyamonom

¹ Niko bi Kraisrpno rpatn Bro Nkifrar kasinyamorko. Ndnettn nikmoh yima yuhum be hefenko rhuyuk shrkamn nikmoh yima yuhum duka duka rhu hasokfot. Hefenrn Bro Nkifrarhu tirmifko Kraisr mrhumor. Bro yufa yekwa mkuko mrhuhato kingroh gajis yakmorn korhr. ²⁻³ Niko bi nohmoko. Tfit Kraisrn nfri yafothat thu hmbrehato be rorpno rim tohmoko. Kraisrpno rim tkafhato to be Bro Nkifrar rpat Kraisrpno rpatn toh natwiworko. Ndnettn yiha yiha hefenr rhuyuk shrkar duka duka rhu hasokfot. Mirahko ndar bbinysoft rhuyuk tamoh tamohroh dukefrn be arhu hasonom. ⁴ Nikmoh rhu nmbuhathu rhu hik hanyuk yihotam Kraisrn harhuwort mnat. Ror tafont miyak

nriyafhato tuhant yindars tafont hti thombat rorpno tafont rpat toh bugarahko. Rorpno rpat tafont tohhato rorpno rpat fnhu bugarahko bruwohmr katiwa kanjo.

Kraiser thu hamuhwatrnom nfri yima riphur mfnahnewur (Sapta 3.5-4.18)

Nfri yima riphurhu nefm

⁵ Niko to bi Kraiserpno rpat nohmoko, ndnetkomm mirahko tfit nd fasoh fasoh nefm tfit ayakitochnomm. Nda bbinysoftu fasoh fasoh dukefm niko hatohwam yafho buga mifkfot. Na kfiwa fasoh fasoh nefm, to kfiwa nd met yindarim nayak kafroh htfaswa nefm, yo yima yuhum wabbra sinyekwa nefm, yo nytinga nnwihiyefm, yo maruha dukefr. Nd maruha dukefm yorhwammn nhai Bro Nkifrar dukakahmr. ⁶ Mirahko inji ananom. Yimam inji niwam, Bro Nkifrar namburrahram. ⁷ Niko tafi Bro Nkifrarhu mrokfot hik duhakomm afo ndhtet nefm fakitor hnamokomm.

⁸⁻⁹ To tfit arihat, namburneft, nd yima yuhum kahm kanjo wakuryak-hato womm kfo huttnefm, womm be hifa nyngar hta duha, womm faso kfo rindho borindhohato faso faso kfo dbotna inji nanefm yo womroh kfo fura nhehneft, nd bugam be yafho thu bugakfot. Nd fasoh yatk yima yuhu bebr bi fahomokomr. ¹⁰ Bi Bro Nkifrarn nd dmbt rhumot bi frwus bowusmortn yima riphum bi wutha-yemko. Yiha yiha nfri nfri dukefm hi hanitrko. Nfri dukefm yahukatrko nikmoh yima riphur turhur kanjo korhr. ¹¹ Nom frohnom bi mar nukeft bi ruhetnom, to nhai tfit tunom yak nhtahato Judam rom tum watohko yo yima tangim rom tum inji watohko, tha puketm rom inji tha puk duhatm rom inji, wom mreht pthayetm rom inji, yo tahi muhm tohetm rom inji, slefm rom inji yo yima furam rom inji. Nhai tunom tfit inji yak nhta kfo nhtakfot. Nhai. Kraiser thu hamuh nhombra bugewurnom yima yima buganom. Ndnetnomn nom bi Kraiser-parhu yima bugayenom.

Wommpno nayak marnyahato rpa yima yuhurhu toh nmbuhat yakkfot

¹² Niko bi Bro Nkifrar yakmorko bi rorhu yufatn korhko. Rorhu dukefr nikomm korhr. Ndnett niko womroh hti yuhuwaf nmbuhat yakkfot. Hifa hifa yima yuhum womm hmbrekfot. Nikmoh yufam yura yura hta duha. Nikmoh ruhefm, pthefm, ptha yima boyimakfot. Womm finji tamohm fak nhehmkon o finji newumko, niko be mirahko yima yuhum wakur sinyahato finji anakninom. Mrokfo ptha duha be rhuhato yingarpaye yukatohkfst. ¹³ Nikmoh wom frohr wom Kristenmn tamohm fak nhehmr o finji nemr, mirahr nd yimar be sinyahato finji anaya. Be hifa yima yuhurn nd yimam nayuk nefm yafhokfot. Mirahr rhuhato nd womm nayuk nefm akfo nam-buranm. Nmoh Nungothet nmoh fasoh nefm yafhomo kanjo womm nayuk nefm yafhokfot. ¹⁴ Nd na bi kfo hne mrokfom rom inji kfoni hanitanm. To ndmpno yakitohyuk wom bro nmbuhat kfiwanko wom yimaro yah marnya nmbuhat. Tuko Kristenko tir nayakitothato tawo tawo nayak marnya nayak marnyakfot. Inji narahko, to be nd tkittu tuko nahti dukaruhakomm be nd yiha tir riniyakitothakrahko. Yo Bro Nkifrar kfo yindhorkfot. ¹⁵ Kraiser nd dukeftn fakmorko. Ndnett nd tir nayakitotheft yakitohkahkomtn nd dukefrn yak htarahrm nikmoh rhu nmbuham. ¹⁶ Kraiserhu tu dborior mrokfom mfhat htakfot. Niko rpa rpa yimako wom wom Kristen yimampno yi rhuhato dborior dborior dukefmpno nakfo hta bohta marnyakfot. Niko Bro Nkifrar kfo yindhorkhato Windoh Gonborngthu windohm yo nd Bro Nkifrarhu windoh furam, nd nd windohm windohkfst. ¹⁷ Nikmoh tamoh tamoh mrokfom, tamoh tamoh hingrnefm, yo tamoh tamoh nef bugam niko nayukm, Nungothet Jisasru yufarpatpno na bugakfot. Yo rorhu yufarpatpno Bro Yifemr kfo yindhorkfot.

Kristen riphah toh nmbuhat Porr kfo pthamor

¹⁸ Niko metko, niko be yindariroh yinhittu rhuhato rroh tngm hikkfot. Tot tu dborior nmbuhat. Bror ndhtet neft hti yindhorkwot. ¹⁹ Yo niko yindariko tukmoh metm marbitn htakfot. Mirahko faso faso ayak beb bobebnomm.

²⁰ Yo niko yonko, yifammam tamoh tamohm kfiwumko, hanyjborna duha. Be rroh tng yuhamn hikkfot. Tot tu dborioh nmbuhat. Ndhtet neft Bro Nkifrar hti yindhorwort.
²¹ Yo niko yifemroko mirahko yonm fasoh nmbuhat ayak nuhasnomm. Inji narahko, to be rroh yima yuhum krhorahmm.

Tohakmi hingrna yimaroh mrokfom Porr kfo pthamor

²² Niko hingrna yimako, niko tukmoh tohak yimaroh tng yuhamn hingrna hikkfot. Mirahko be rroh yima yuhuroh yak marnya nmbuhatn rroh nyngahato tamoh tamoh hingrnefm ahingrna marnya bomarnyanomm. Nikmoh dukefm Bror duka yanhohato be dborioh hingrna yihtam hingrna-kfot. ²³ Tamoh tamoh hingrnefm hingrnnewukon o tamoh tamoh nefm newuko, yima dukefmpno hingrnakfot. Nd hingrnefm nhai be nikomn fitha yakrmokomm. Bror kahukrko nd hingrnefm. Ndnetkomn hingrna hik marnyakfot. ²⁴ Tu Bro Kraisr kukatoh-worm niko niwa nefm yo hingrniwa hingrnefm. Kto rorn ttha hanyrahrko. Nd nmbuhat bi wanyeteko. Nd bi hta nhombret wuskam yakruharn ttha nhombra hanyrahrko. ²⁵ Bro Nkifrar kotkfot yakitoh thombat, nhai nndoh nndoh kotkfot yimam tohruhatm. Nhai. Rpa kotkforpat yima bugam toh bugarahm. Nd bro yufet yimam finji nem, bro namburet yimam finji nem, nd yima furam finji nem, rpa kot-kforpat toh bugahato krhopam he buga hanyrahrm.

4

¹ Niko hingrna yimaroh tohak yimako, niko tu hifa dborioh nefm hingrna yimam yak nuhaskfot. Niko dukaf hanykfot nikmoh tohak yimar to yura hefenr tohwor.

Kfo bruttnanefti yau marnyaneft

² Kfo bruttnaneft yafho thu duha. Yihof href kfo bruttna hasokfot. Duka yima yuhum Bro Nkifrarpar yi bugahato duka hik bohik buga, ee, kfo bruttna-kfot. Kfo bruttnahato Bro Nkifrar kfo yindhorkfot. ³ Nmoh hingrna nmbuham ndm kfo bruttnakfot. Bro Nkifrar wakfo bruttnakahtkomr Kraisrhu mrokfom kfo pthayuk yihtam yak hta bohtarahrm. Nd Kraisrhu kafrohet mrokfot rhumoat, be tafont kfo ptharuhatnomt tuhant yindars wanyrahmt. Na nd nmbuhatpno yakkoma kalabus htamoma. ⁴ Wakfo bruttnakahtkma nd kafrohet mrokfeft tu Bro Nkifrar dukewa dukef yuhatn kfo hikrhotant wany hik bohikrahmt.

⁵ Kristennom tohwa tkitm tom Jisasrhu mrokfom hik duha yimam tom rpat tohwonom, ndnettikmoh tamoh mrokfo pthanefm ptha marnya-kfot o toh nmbuham be dborioh dukefmpno toh marnyakfot. Nd Jisasr hik duha yimam nikmoh pthefm o toh nmbuham mhiyakruhamn Jisasr mhikaknirahmr. ⁶ Tamoh tamoh mrokfom niko pthayukm be dborioh mrokfom pthakfot. Mrokfom be kfo yima boyima marnyakfot.

Porr kfo tkurmotrf Tikikus Onsimusrof yimof Kolosiko

⁷ Tikikusrn kfo nuhas hik bohik-rahrko na hingrnewa hingrna yuharoh mrokfom. Tikikusr nmoh nanyma kmi thofer. Nmoh Nungothet Jisasrhu hingrneft rorpno rpat hingrnewunomt. Rorhu hingrneft, awi, hifa. ⁸ Nmoh toh nmbuhat asha tohwat rorpno wawanywako. Ror niahato kfo bmta mrokfom kfo hirahrko. ⁹ Nikmoh kmi thof Onsimusrpno rpat nierahf. Onsimusr nhaf nmoh dborioh yimatemer. Nompno rpat tohwor. Rofn kfo nuhas hik bohikrahfko nmoh toh nmbuhat yo nompno yorhwa nefm.

Porr kfo yindhor mrokfot Kolosimpno yimot

¹⁰ Aristarkusr nanpno rpat kalabus tohwonom. Ror dukewarko kfo yindhor mrokfot htefiwurt. Yo Makr, Barna-basrhu rahemr, ror to rpat tohwanomn rorn wom kfo yindhor mrokfot htefiwurt. Fitoh yiha Makr nikmoha niewur, na kfomo yuhatn wahikkah-komn wayindhoraktwakomr. ¹¹ Yo Jisasr, wom yufat kutewumr Jastasr, rorn nhaf wom kfo yindhor mrokfot htefiwurt. Juda yimam na hingrna-nuhiwam, to nd nd yimarpam hingrnanuhiwuma. Bro Nkifrarhu yinhit tohwa yuhathu mrokfot, hifa nd nd yimampno kfo nuhas hanitnomt kmi kmim.

¹² Nikmoh kmi thof Epafrasrn wom kfo yindhor mrokfot htefiwurt. To nd Epafrasrn tor niko hingrnanuhwa yimatr. Yiha yiha nd yimar nikmoh yufam yutewarko kfo bruttnewur. Nhai wom yihar rhu furakahrr. Kangr, “Bro Nkifrar akfo bruttnakahtanr, rroh Kristen toh nmbuhat toh bmtaruhamn mirahm nko fitoh dfikrhof Kristenem.” ¹³ Ror niko dukewarn yihof href yihof href kfo bruttna hasiwurko. Niko duka, yo Laodisiathu Kristenm duka, yo Hierapolishu Kristenm duka, nhai rhu witakahr kfo bruttnaneft. ¹⁴ Yo nmoh yimatem Lukr, nd dokta hingrneft yakitohwar, rori Demasr wom kfo yindhor mrokfot htefiwurt.

¹⁵ Na tukanhu kfo yindhor mrokfot wakfohitwokma Laodisiat tohwa Kristenmpno. Yo wom kfo yindhor mrokfot wakfohitwokma Nimfati rothu kunys yi rifinywa Kristenmpno. ¹⁶ Niko Kolosi thofko ndar gontwat waritimnikahkomt tfit Laodisia thofm wahekahtko rroh sios ritimrahmt. Yo Laodisiathu yufatpno yiyuk gontwat Laodisiathu sios aritimnikahmtn tfit Kolosi thofm ahekahtm rroh sios ritimrahmt. ¹⁷ Arkipusruhet ndar mrokfo nmbuhat. “Ni Arkipuse, ni Brorpno yakmo hingrnafat mirahn amyafhoniyant. Nd hingrnafat wayakitoh marnyakahnt wahingrna marnyetwant.”

¹⁸ Na Pora ndar gontwat wandfahato kfo yindhor mrokfot htefiwanko. Mirahko aduka mmonomr na kalabus tohwahat. Bro Nkifrar ayak marnya bomarnyatwarko.

Be injirpa mrokfom.

Tesalonaika thofroh barkof gontwat

Porr dwandfakhato htafmot

Barkof kfo nuhas mrokfom

Tesalonaika tauntn, tot Masedonia profins rhumoa tu bro taunt. Porr misin hingrneft yihato Filipait tohnimohat to be tfit Tesalonaikako yimor. Ndha yihato ndha misin hingrneft hingrnahato sios kasinyamort. Tesalonaikathu misin hingrneftu kfo nuhas mrokfom htikfot (Aposer 17.1-9). Porr Tesalonaikat misin hingrneft hingrnamohat, bok metm, yindarim Bro Nkifrarhu mrokfom wany yindhorhato hikmomm. Tfit Judam inji htihato namburmom. Namburhato Porr kfo hutt hikafmomr. Kfo hutt hikafmotmr Korinko yimor. Memom, ror tohwarn gutnius mrokfom ror pthiwartrm yimam bi Jisasr hikwom. Korinko tohetrn Jisasr hik duha yimam sinyahato Tesalonaika Kristenm krhopam hemomm. Timotir brbo Beriat tohetrn htihato wanymorm Tesalonaikathu Kristenroh krhopam. Timotir wanyhato rorn Korinko yihato Porr kfo nuhashemorr.

Timotir pthayuk mrokfom Porr yak bugahato tfit Por, Sailas, Timoti, rom husfirpat rhuhato Tesalonaikaroh yufatpno kfo bmta mrokfom wandfamomm. Bro Nkifrarhu rfa borngt rhuyuk mrokfom hti hik bohiket tu dborioh duka tunguna yimam Tesalonaikat iyuk gontwam htihato kfo memom, “Nd kfo bmta mrokfom rhuyuk gontwaten tot Porr wandfayuk barkof gontwat.” Nd barkof gontwaten htamorm Tesalonaika thofm Jisasr hikmo yuhathu kfo yindhor mrokfom, yo rroh dborioh nefroh kfo yindhor mrokfom.

Timotir Porrpno yihato Tesalonaika thofroh kfo ttiwon mrokfom kfo ptha nuhas memor, “Tesalonaika thofm kfo kangme, ‘Kraisr kto tfit yawihna thombate, finji yawihneruhar? Yo fitoh yuhat nieruhar? Yo nohet yimam finji sinyaruham?’” To nd rroh ttiwon mrokfom Timotir pthamotrm gontwaye tfit kfo nuhas hik bohikmorm.

**Porri rorhu hingrninho yimam Tesalonaika Kristenm mfro
dukamo yuhat**

(*Sapta 1-3*)

¹ Nom Por, Sailas, Timotironomn ndar gontwat wandfewunomko niko taun Tesalonaikat yorhwa sioshu tuhan yindariko. Niko nmoh Bro Yifemri Nungothet Jisas Kraisrpno frtkafwa tuhan yindariyeko, nikompno ndar gontwat htefiwunomt. Bro Nkifrar yak marnyakahtko, nikmoh yima yuhum mirhurahmko.

Tesalonaika thofm Jisasr hikmo yuhatpno Porr yindhormor

² Niko Bro Nkifrar yakitohwa nmbuhat dukahato yiha yiha Bro Nkifrar kfo yindhorhato kfo bruttne-wunomko. ³ Nom htitwonom nikmoh dukefm Jisasrn yihato dborioh nefm hikwoko. Dborioh nefm yakitohetkomn womm htineft kak marnyewukomm. Yo tamoh krhopam nianeft nhai yakrmekahko. Tohhato titewukomm. Krhopam titahato nikmoh dukefm kitm Nungothet Jisas Kraisr hneruha dborioh rhu nmbuhatn. Nom inji htitanomn Bro Nkifrar kfo yindhor-wonomr. ⁴ Bar yinouroko, Bro Nkifrar be marbit htewatrko, nom inji htihato kfo kangnom, Bro Nkifrar bi turhu yufatn kfo htamorko.

⁵ Nom nd gutnius mrokfom nikmoha hnehato kfo ptha nuhasmohat be Bro Nkifrarhu Yafothathu bbukeftpno ahingrna duha yinom, be mrokfo furam kanjo wany huhrasaformokomm. Nd Bro Nkifrarhu Yafothat, nom hatohyukt, nd Yafothatn nikmoh yima yuhum thu yuhurmottko nom pthayuk mrokfom wany yindhorhato wufakmokomm. Nom nikompno yi tohmohat, memonom, “Rompno ai atohkahnomn, nom tohruba toheft rom htiyakruhamn nd yuhat toh hikrahm.”

⁶ Niko Bro Nkifrarhu mrokfom wany yakiohato hikmohat, bok yimam inji htihato bok krhopam hemomko. To niko nd krhopam yakmohat niko nmoh nefti Jisas Kraisrhu neft hikhato tohhato nd krhopam titamokomm. Nhai yonenm kanjo kfo nurrmoko. Bro Nkifrarhu Yafothat yima yuhum hemottko nd krhopam yindhortpno titamokomm.

⁷ Ndnettn Masedonia profinsi Akaiat tohyuk Kristen bugam nikmoh nefm rihtiyakhato bi nikmoh nefm hikwom. ⁸ Bro Nungothetrhu mrokfot, niko pthayukt, bi frfnahnitatt kmi kmim bi wanukwomt. Yimam nrwir tanmbarafhato kmi kmi wanyekwa kanjo kmi kmim bi wanukwomt. Nhai be Masedonia profinsi Akaiarpat mrokfot wanykahmt. Nhai. Bi kmi kmim wanukwomt. Bi wanyetmn nom nhai tfit kfohekfot. ⁹ Nom tumn tfit kfo tndh nuhas hanitwomnom nom nikmoha yihato Jisas Kraisrhu mrokfot kfo pthahato niko wanyakiohato nd nkifra tahi yifonm myafphonihato yima yuhu yakkekutmo yuhat, yo niko Bro Nkifrarhu hingrna yimako yorhwa yuhat. Nd ndm kfo tndh nuhaswomnom. ¹⁰ Yo kfo tndhmomt niko Bro Nkifrar hikhato rorhu Yinemr toh gari hasiwa yuhat. Nd yon Jisasrn nohhato tfit Bro Nkifrar kasinyahato, rorn fak noh-morm Bro Nkifrarhu namburpam bi duka htamom.

2

Porr Tesalonaikat hingrnamo yuhathu kfo nuhas mrokfot

¹ Bar yinouroko, bi tukomn hti-mokomt nom nikmoha hingrnamo hingrneft. Nd nom hingrnamo hingr-neft nhai yi furarmot. Awi, yafothett rhumot. ² Niko bi wanymoko, nom Tesalonaikat yimohat, afo Filipait tohnimonom. Filipait tohnimonat kfo rindho borindhomonom yo faso faso fak bebmomnom. Huhra krt kanjo mfrhabtotmonom. Filipait tohni tfit Tesalonaikat yimohat, nhaf krhopam fkneemonom. To nhai yakrmermonom. Nhai. Bro Nkifrar nmoh yima yuhum thu bmtamotrm nom tohhato gutnius mrokfom kfo nuhasmonomko. ³ Niko Jisasrhu hikneft nom niko kfomohat, nom nhai wom dukefmpno yuwi duka marimonom, “Bro Nkifrarhu mrokfom akfo nuhaskahtnomm Jisasr hikruhamn marufam hirahnmom, o nom kfo yindhorhato bro yufat hirahm.” Nom nhai nd nd dukefmpno gutniuskfot kfo nuhasrmonomko. Nhai. ⁴ Bi tu Bro Nkifrarn bi nmoh yima yuhumi nmoh dukefm hti nhombra bonhombrabato ee nd hingrneft nmoh tirmn htamort. Ndnettn nom nhai mekahnom, “Nom pthayuk mrokfom tuhan yindarimn awany yindhormm.” Nhai. Nom kangnom, “Bro Nkifrarn awany yindhorm nom pthayuk mrokfom.” ⁵ Htimokmnom, nom nhai wom yiha nikmoh wuskam o tamohm htihato mkfo rhti borhti o mkfo yuhur boyuhur-rmonomko. Nhai. Bro Nkifrar htitwor nom inji kfiwohat, nom nhai wom yiha inji nawonrmonomko. ⁶ Nhai marimonom, nikomn o wom frohmn nmoh yufam yura yura yuta hagrarahmm. ⁷ Nom Kraisrhu aposerenom. Nomn aposer hingrneft kakitohwonomet. Be amekahnomm nmoh yufam wayuta hagrhatwakomm, to inji kformonomko. To nhai, nom nhai inji kformonomko. Nom be noh hmbrenano tohhato mmemrom yonm yikitohhato hmnewa kanjo inji fakitohtmonomko. ⁸ Nmoh yuhuwaf marbim nikomn rhu mif mifmom. Ndnetnomm nmoh dukefm bi duka memonom, “Nom rroh kmit yihato gutnius hi hanyeftpno kangnom, anohnom o finji anamnom, nhai mrokfom.” Nom be yi tohnhohato kfo bmta mrokfom hemonomko.

⁹ Bar yinouroko, nom nikompno tohhato Bro Nkifrarhu gutnius hingr-neft hingrnamohat htimokmnom yonmari marm hingrna krifafmounomm, yifungm hingrna yifungafmounomm. Nhai be marimonom, be nikomn krhopam hirahnom tamoh yeshri hanyeft, o hweyuk tkitroh he, nd nd nefm. Nhai.

¹⁰ Niko Kraisr hiket yimakompno nom tohmo toheft, niko htimokmnom yo Bro Nkifrar htimornom, nom nhai wom fasoh neft rim na nuhasrmonomko. Nmoh toheft toh marnya bomarnya-motnomt htimokomt. ¹¹ Tamoh tamoh nefenm nom namoam, yifemr tohhato turhu yinemrom tamoh tamoh nefenm kfo tebos nuhaswa kanjo inji kfo tebos nuhasmounomm. ¹² Nikmoh yauyefm tohefm mduka krho htatamoahat, nomn kfo kasinya-mounomm, o tamoh krhopam yak-moahat nomn yihato tohnhohato kfo bmta mrokfom hemounomm. Yo kfo tebos botebos nuhasmounomm toh marnyahato Bro Nkifrar tohwa toheftu toh yuham. Nd tu Bro Nkifrarn fakmorko. Yakhato turhu mofsinhitn yak htatahato toh hongmb hmbremorko.

Tesalonaika Kristenm Bro Nkifrar yakitoh kihhato toh bmta kihmom krhoparoh titaneft

¹³ Niko Bro Nkifrarhu mrokfot yakmo yuhat ridukak thombat, Bro Nkifrar nom kfo yindhorwonomr. Niko nom pthayuk mrokfom wanymohat, nhai duka marimoko, “Nd rom pthiwa mrokfom be yimamn pthiwumm. Tamohmpno yakruhanomm?” Nhai inji dukarmoko. Duka memoko, “Bro Nkifrarhu mrokfoym.” Ndnettn fakmokomm. Nd mrokfot nikmoh yima yuhum rihingrnahato Kraisr hikwoko. ¹⁴ Bar yinouroko, Judiako rhuyuk siosroh Kristenm yakmo krhopam kanjo niko inji krhopam fakmoko. Nhai be briyo krhopam he furarmomko. Bro Nkifrarhu mrokfom hikmotko tukmoh korhof yimam hti namburhato faso faso fak bebmomko. Judiaroh Kristen sioskfot to turoh korhof Judamn namburhato fak bebmoumm. ¹⁵ To nd Judarpamn nmoh nkiframpno tohmo profetm wasmomm, yo tfit Jisasr tohmo yihamn tohyuk Judamn, nmoh Nungothet Jisasr wasmomr, yo tfit arihat nom tohwa yihamn nd Judarpamn, be hti dbnot thuwonnom. Nhai hifa nyngar htakahmnom. Kangnom wom taunn ainyom, kak tuhefiwumnom. Rom inji nahniwa nefm be tu nhai mif Bro Nkifrar hti yindhorkahrm. ¹⁶ Nhai wofnkahm yima tangim gutnius wany-hato Bro Nkifrapno rim tohakteft. Ndnetmn ndhtet neft newum. Rom nd nahnewa fasoh fasoh nmbuham bi nahna nahnewamn nd rroh fasoh fasoh nefm bi kminysofm kanjo wayekwamn nd wukier bi tathur yibonwomr.

Porr mfro yibonmour tfit Tesalonaikako yinyeft

¹⁷ Bar yinouroko, nom Judam mhutt hikafhato nndo nndo afo toh-mohat, to mirahko ka mumafonimo-nomko. Nhai. Yonr frtrohhato yifemr yonrhu dukefr yorhwa kanjo nmoh dukefr inji dukamononomko. Yima nyngatikroh nahtineftn, nhai nahti-rmoanom. Nmoh yima yuhum nikmoh dukefrn tohmoatm, ndnetnomn niayuk yihotam rim hambrak mhambrakmou-nom. ¹⁸ Nikmoh tfit yi hti yibonet-nomn, na Pora dbiyaf hatohmoa yinyeft, to nhai. Satanrn nmoh yiyuk yihotam wuyak ayakmourm. ¹⁹ Nhai be sfno marimoanom, yihato ahtinomko. Nmoh dukefm be nikomn duka haso-mounom. Kto Jisasr tfit nianeft kfo mirahnomr, “Tesalonaika thofm gutnius mrokfom kfohemohat, yakhato fakitoh kihmomt.” Nd yiha be tu bro yindho-reft yakrahtnom. ²⁰ Niko gutnius mrokfom wanymohat, be yakhato fakitoh trp kihmokomm. Nom ndtpno kfo yindhorwonomko.

3

Timotir tfit Tesalonaikako yimor

¹ Niko be tu mfro dukamou-nomko. Nd dukeftpno nhai tfit wom kuknarmonom nikmoh yihato htineft. Ndnetnomn rhu napthamo-nomn no memono, Atensn toh hasorahno. ² Timotirne Tesalonaikako riyahr. Nd yima Timotir, nmoh hingrna namnou yimayer. Bro Nkifrarhu hingrnafat ror yikitohwartn Kraisrhu gutnius mrokfom kfo ptha nuhas htfasworm. Niko Bro Nkifrar hikwa yuhatpno tamoh krhopam o yima yuhum korhmko, rorn nikompno rhuhato wom dukefm o yima yuhum hiruhatrko yima yuhum thu jubtwa-rahmko. ³ Kangnom be nd krhopam o tamoh dukefmpno rhurahko, yima yuhum nhai rhu marnyaruhatmko. Tuko bi wanyeteko, ndhtet krhopam niko yekwam, to be tu Bro Nkifrar kfomo yuhatn nd krhopam kekwoko. Rorhu mrokfot hiket yimam ndhtet krhopam kekwom. ⁴ Bi nikompno tohmohat, bi kfo memonomko, “Yimanom Bro Nkifrar hiketnom, yimam sinyahato krhopam hirahm-nom.” To nd nom kfomo mrokfot to bi tot bi htitwokomt. ⁵ Yimam inji yak bebmootmko memoya, “Nhai wom kukna hatohrhota rroh yi htineft. Kukna hatohruha, bi yima yuhur mwastiwyuk yima Satanrn yihato bi rorn rithu nhirakruhatrm nom hingrnamo hingrneft be yi furaraht. Nd dukeftpno Timotir kfo tkruraf-motanr niamor nikmoh hti hafott.”

Timotir Tesalonaika korhof hingrnethu kfo yindhor mrokfot hanymotrt Porr yindhormor

⁶ Timotir nikmoha htanyhato niamohat, bi asha nompno mfnahhato bi ptha nuhas bonuhasmornom nikmoh mrokfom. Kfo memornom, “Awi, tom tohhato Bro Nkifrar

kakitohwomr. Bro Nkifrar yakitohhato tum nayak marnya yo womm yak marnya inji newum.” Kfo memornom, “Niko dukewukmnom. Dukahato kangko, ahtinomm.” Yo nom to inji kangnom ai ahtinomko. ⁷ Bar yinouroko, nikmoh Bro Nkifrarhu yakitoh kihwa mrokfot wanyakhato be tu bro yindhoreft fakmotnom. Nd yindhoreft yaktottnom nd nom hatoh hasoyuk krhopam nhai tfit dukarmo-nomm. Tfit yindhorefrpatn bromot-nom. ⁸ To be nhai nom wom tamoh duka kurhefem rhuruhatnom, be niko Bro Nkifrarpno rim tohni bugahato myakitoh kihaknineft. ⁹ Nom nikmoh nmbuhatpno yindhorwa yindhoreft finji kforuhanomt? Be tu nndohtet yindhoreft yekwattnom, to finji Bro Nkifrarpno nd yindhoreft kfo hikruha-nomt? ¹⁰ Nikmoh yi htinefttu dukefr nhai yafhokahnomr. Nd duka yima yuhurpno yifungm, marm kfo bruttna-hato kangnom, “Rompno yi tohhato kfo hta, kfo marnya, kfo bmta inji naruhatnomm nd Bro Nkifrarhu hik duka yima yuhur yi marnyaknirahrm.”

Tu Bro Nkifrarn Porrhu yiyuk yihotat yak nukakkfot

¹¹ Nom Bro Nkifrarpno yiyuk yihotam kfo bruttnewunomr. Nd Bro Nkifrarn, nmoh Bro Yifemr, yo Nungothet Jisasr, kangnom rof tufn nmoh yiyuk yihotat ayak htakkaftt yi htirahnomko. ¹² Yo nom nikompno nayakitotha kanjo nom kfo bruttna kangnom, niko, Jisasr hiket yimako, ndhtet yima yuhum ahikahtko rpat tir niyakitohhato rpat toh marnya bomarnyarahko. Yo wom yima furam-pno to inji buga nayak nanymahato rpat tohkfot. ¹³ Nom kangnom, inji akfo bruttnakahtnom thu bmtarahrko. Thu bmta hanyruhattrko dborior nefm hikrahko. Kto nmoh Nungothet Jisas Kraisr turhu mounmotmpno yawihna thombat, yima yuhum be wutham ruhetmn mihtirahrko.

Tesalonaika thofm dborior dborior nefrpam yakitohhato tohkfot

4

(*Sapta 4-5*)

Dborior toh nmbuhat tohkfot

¹ Bar yinouroko, nd bi wandfa hnayuk mrokforoh wuroh mrokfo nmbuham htaruham. Bro Nkifrar hti yindhorwa toheft nom kfomot bi wanymokomt. Niko nd tohefroh kfo nuhas mrokfom wanyhato Bro Nkifrar hti yindhorwa tohefm ritohakmoko. Tfit Jisasrhu yufatpno kfiwunomko, be ndhtet tohefrpat toh hik hanykfot.

² Nungothet Jisasrn ndhtet mrokfo duka yima yuhur hiyaf hanymoatrnom kfo hta nuhasmounomko. Ndnettnd nom kfo nuhas yuhur toh yuhatn toh hikkfot. ³ Bro Nkifrarhu duka yima yuhur duka kangr, nikmoh tohefm be tur kanjo tohhato turhu dukef yuhatn toh hikhato tamoh tamoh nefm nakfot. Nhais wofnkahr wom tuhanet yimar wom met furatpno yikfot o wom ramet mett wom nndo yima furarpno yikfot. Damiag yimam yo met tmahm nhaf inji buga. Nhais be yima fura met furampno yikfot.

⁴⁻⁵ Niko tuhanet yimako yo ramet metko yo niko damiagko yo tmahko mirahko Bro Nkifrar hik duha yimam kanjo met fura bofurampno yo yindari fura bofurampno arim fnahnom. Wom mett htihato yima yuhur sinyewur o mett wom yimar htihato yima yuhur sinyewur, nd yima yuhur yudbat yak thukfot o yakrme trohkfot. ⁶ Niko Bro Nkifrar hiket yimako mirahko womrhu sinyahato womrhu mett amtoh nheh-hiyanr. Bi nikompno tohmohat bi kfo memonomko, ijom tonayet metm o yindarim Nungothet Jisasr nhai miruhatr, “Nhais mrokfom inji arinah hanym.” Nhais mif. Ndhtet nayet yimam rorn yakhato nndoh yuhat yak hatoh-aforahrm. ⁷ Bro Nkifrar nom nakuyak-hato ror hikmohat, nhais marimor, “Anakuyakkahtanm aniekahmn, ndhtet ndhtet nefm narahm.” Nhais. Rorhu dukeft duka memor, “Anakuyak-kahtanm aniekahmn na tuka tohwa toheft tohrahm.” Nd dukeftpno nakumornom. ⁸ Tu Bro Nkifrarhu Yafothat yahukatrm yimam rroh toheft Bro Nkifrarhu toheft kanjo tohwom. Fitoh yimam ndar kfo hta bohtayuk mrokfom wanyhato hamuh tfa thuwomm, nhais be nd mrokfo kfoyuk yimarn hamuh tfa thukahm. Nhais. Bro Nkifrar hamuh tfa thuwom.

Dborior dborior nefrpam yakitoh kikhfot

⁹ Tuko Bro Nkifrar hiket yimakmoh nayakitohhato nayak marnya yuharoh mrokfom nhai tfit gontwatin hta-rhotanm. Ndm bi tu Bro Nkifrarn nd nefm fak nuhas bonuhasmorko. ¹⁰ Bi Bro Nkifrar nd nefm yak nuhasetkomn, fitoh Masedonia tkitm tohyuk Kristenm, rpat nayakitohwakomn nayak marnya bomarnyewuko. To bar yimako, kfo bmta mrokfot kfiwunomko, nd dborioh nefm, tuko nayak nuhaswam, wayakitoh kihtwakomm. Mirahko ayafhonomm. ¹¹ Mrokfom bi kfomonomko niko rhu digr yima yuhur rhu nhombra bonhombrawonkfot. Rhu digr yima yuhurpno nhowi rhu marnyahato tukmoh hingrnefmn hingrna mmo bommokfot. Tukmoh rhu nmbuhat dukahato niko tukmoh tire hingrnahato tukmoh tirehm yakkfot. ¹² Inji narahko nhai wom tamohm yak kkopentaruhatko. Wom riruh aruhuykm niko yiha yiha rhu hasoyuk rhu nmbuhat hti hikruhamtn kfo yindhor-rahmt nikmoh rhu nmbuhat.

Nungothet Jisasr yawihnehato yak nhafohrahrnom

¹³ Bar yimako, noh hanita yimaroh mrokfot kangnom, akfo dukanomko. Womm kfo kangm, nohwa yimam nhai tfit sinyaruhatm. Niko mirahko ndhtet dukefet yimaroh dukefm hikhato yimam nohneft anur yibobi-yafnom. ¹⁴ Nmoh bro dukeft duka kangnom, Jisasr nohmohat, tfit sinyamor. To nd rorhu mrokfot wany yakiohato nohwam tfit sinyarahm. Tu Jisasr kforahr, Bro Nkifrar tfit kasinyafruhatr tfit Jisasrpno nierahm.

¹⁵ Tu Bro Nungothet Jisasr kfoyuk mrokfo yuhat nom kfo hikwonom. Bro Nungothet Jisasr yawihna thombat, nhai bi yima nfrinomn nakuhato tohakruhatnom. Nhai. ¹⁶ Nungothet Jisasr yawihna thombat, barkoft tu Jisasrn kforuhatr, mtohekwa mounmotr naku tawihafrahr, ee tfit noheh yimaroh yakthoyuk fumrr tohrahr. Ndrpno Nungothet Jisasr moun yuhat yawihnerahr. Yawihnehato nd rorhu mrokfom wany yakioni hanyhato noh hanyukm afo nyngam mfrdborharahm. ¹⁷ Rom myukatohruhatm ee bt yima nfrinomi rom rpat buga muhnfat kanjo watuhakruharnom rpat mnathu hmbreniruhanomn rpat mounko Jisasrpno mrifinyrahnom. Rorpnno mnahtihato ror tohruha tkirpat toh nkifranirahnom. ¹⁸ Ndar wandfawa mrokfom yakhato nakfohi hanykah-komn yima yuhum tfit marnyahahmko.

5

Nungothet Jisashu nia yihar nom toh gari hasokfot

¹ Bar yinouroko, nhai tfit gontwatin wuroh yiharhu yiharoh kfo nuhas mrokfom kforuhatnomr. ² Nd wuroh yiharhu yiham nieruha yuhat, ndt bi kfo nuhasmotnomko wany hik bohik-moko. Nd yihar be yak fohtasakrahr, rikoh yimam yifung niewa kanjo.

³ Bi yimam kfo hany kangm, “Arr bi dborioh yihayer. Rhu marnyahahnom.” Inji kfo hanyhato mirahm, ka hifa kfoyet, yimam yak batiyuk krhopam yudbat nierahm mett yon yakrphewa kanjo. Nhai wom yimar frfnahniruhatr. ⁴ To yinouroko, nd yihar, to nikome kspitat tohwakomn rikoh yimam kanjo yak fohtasakrahkomr? Nhai. ⁵ Nom, Bro Nkifrar hiketnom, nom yima dukefmpno dborioh nefrpam newunom, yimam mar nukeftpno hti hikak hanyhato tamoh nefm niwa kanjo. Nom nhai kspitat yak tato botatiwa kanjo tamoh tamoh nefm na fura bofuraknikahnomm. ⁶ Ndnettn nom, Bro Nkifrar hiket yimanom, mirahnom ahwanyom yifungthu yimam kanjo. Yimam hwitam nhai yima dukefm rhuhato wanykahmm tamoh nmbarefm. Yo nhai htiyakkahmm tamohm niayukm. Nom inji hwe juha. Nom yima dukefmpno rhuhato tamoh tamoh nefm yima dukefmpno yak nhtakfot. ⁷ Htiyeteko, yimam hwitam yifung hwitm yo yimam drinhato spakwam, nhaf yifungtn drinhato spakwom. ⁸ To nom, Bro Nkifrar hiket yimanom, nom mar nukat tohwa yimayenom. Nom yima dukefmpno rhuhato tamoh tamoh nefm htihato yak nhtakfot. Nom soldiam kanjo siot kapakfoti hat kapakfot hmbrihato tohhato yukatoh hasokfot. Nom nd soldiam kanjo toh bmtahato yukatoh hasokfot. Nom Bro Nkifrarhu mrokfom wany yakiohato wom wommpno nayak marnyahato Jisashu niayuk yihar toh gari hasokfot. Ror nia thombat miyakruharnom rorhu tirtn rhurahnom. ⁹ Nd kim hegirtayet wukier Bro Nkifrar bi kim hegirtamor, nhai nmoh yufatpno Bro Nkifrar

kim hegirtarmorr. Nhai. Nom tu Nungothet Jisas Kraisrn miyak htiyahato turpno rhuyukenom. ¹⁰ Nom bi Jisasr suh nanyormo yimayenom. Ndnettн nom be rorpno tohnirahnom. Afo yima nfrinom tohetnomn nier, nhai mrokfom, nom be yinyefrpayet. Ө bi nohetnomn nier, ndt to nhai mrokfom, nom be yinyefr-payet. ¹¹ Ndnettн Bro Nkifrar hiket met yindariko, niko tuko rpаt tohhato tuko nakfo bmta, nakfo bmta hasokfot.

Wuroh kfo nuhas mrokfom

¹² Bar yinouroko, wom mrokfo nmbuhat kfiwunomko. Nikmoha frohmn tohhato ndha tohyuk Kristenko yakinohhato kukatohaf hanitwomko, niko be nd yimarpam yukatohhato rroh yinhitn tohkfot. Nd yimam Nungothet Jisasr kak htewurm nikmoh mrokfo hehato yak hta bohta inji naneftn. ¹³ Romn kakitohwomko. Ndnettн niko romn bro yima yuhum htahato nd yimam yak marnyakfot. Niko buga nd yimampno nayak marnya nayak marnyahato rpаt tohkfot.

¹⁴ Bar yinouroko, kangnom, wom yima yuhum ahenomko. Wom Kristenm rhu hhrek hasohato nhai turoh rhu nmbuhat dukahato turoh hingrnem hingrnakahmm, yihato mrokfom hekfot. Yo Yimam boknambok dukefm kasi htatewatmm bok dukefmpno yima yuhum gumuhatewumm, niko yihato rhu wanyhekfot. Rhu wanyhehato hifa yima yuhum hehato hifa yima yuhum yakhato yima yuhum mirhu-rahmm. Yimam Bro Nkifrar hik hanyhato wom nmbuham krhopam yakhato kfo nakutmko, niko yihato rroh krhopam wanyhato kfo hta mrokfom hekfot. Yo wom yimampno yudbat sinyahato namburakni duha.

¹⁵ Yimam sinyahato finji newumko, niko mirahko toh kekuthato tawo finji ananomm. Niko be tfit hifa yima yuhurn tohhato dborioh dborioh nefm yak nuhaskfot nd Bro Nkifrar hiket yimam yo wom yima fura bofuram.

¹⁶ Yiha yiha niko be yindhor yima yuhurpno rhukfot. ¹⁷ Yindhor yima yuhurpno rhuhato yiha yiha kfo bruttna hasokfot. ¹⁸ Tamoh tamoh nefm korhmnom, be Bro Nkifrapno kfo bruttna yindhorkfot. Tot tu Bro Nkifrar dukewa dukef yuhat. Yimam, Krais Jisasrpnо frtkafetm, nd yuhatn hikkfot.

¹⁹ Bro Nkifrarhu Yafothat bi wom yimampno mthu dbothathato kahm kanjo hingrna sinyewut, mirahko tfit ahwa tpohnomt. ²⁰ Bro Nkifrarhu Yafothat wom yimam thu dbothathato wom mrokfom kfo pthewumm, niko mirahko rom pthayuk mrokfom wanyhato akfo amanyom, “Ndr tur ptha mmbrafinywor. Frohm wanyruhamr?” ²¹ Tamoh mrokfom kfo pthewum, niko rroh mrokfom wanyhato yak nhtakfot. Yak nhtahato fitoh mrokfom hifa wany fughewukomm, ndm yakitohkfot. ²² Fitoh mrokfom faso wanukwokomm, yafhokfot.

²³ Nd dborioh noh hmbre yima yuhu hnewa Bro Nkifrarn niko yakhato turpno rim yak htewatrko be rorhu tuhan yindariko rhu buganirahko. Rorpno tohruhakomn nikmoh yafotham yo yima yuhum yo tohefm be nhai faso faso yiruhatm. Nmoh Nungothet Jisas Kraisr nia thombat be nhai mrokfo duhatko rhurahko. ²⁴ Nd niko naku-yakmo Bro Nkifrar bi wom mrokfot kfirt, to be kak hik twanhiwurt. Ndnettн nd ror bi kfo htamo mrokfot yak hikrahrt.

²⁵ Bar yinouroko, Bro Nkifrapno wakfo bruttnatwakmnom.

²⁶ Niko lotu yiham rifinyneft, niko tuko Kristenko naki yindhorhato tir nhekfot.

²⁷ Nungothet Jisasrhu yufatpno kfi-wanko, ndar gontwat Jisasr hiket tuhan yindari bugampno ritim nuhaskfot.

²⁸ Be injirpa mrokfom. Nmoh Nungothet Jisas Kraisr ayak marnya bomarnyatlarko.

Tesalonaika thofroh husyuk gontwat

**Porr dwandfakhato htafmot
Barkof kfo nuhas mrokfom**

Taun Tesalonaikathu sioshu bok met yindarim fak mmotamom Jisas Kraisrhu nia yibon yihar rhuyuk nefm. Wommn kfo memoum, “Nungothet Jisasrhu yihar bi niamotr asor bi nd yiarn bi tohwonom.” Tesalonaika sios inji duka mmomoum. Ndnett Por Sailas Timotirom ndar kfo nuhas gontwat wandfakhato htafmomt.

Porr kfo memor, “Nd yihar tor yuhre riyorhwor, tafi mfnahrmor. Nd yihar brbo rhu hanyrahr htirahkomm tuhan yindarim nhai tu yifo nefm naruhatm. Yimam mumiwa kanjo tamoh nefm be nafura bofurarahm. Htirahko buha wom yimar tohruharn nhai yima mrokfom wanyruhatr. Lokfot yak tuhafruhartn Kraisrhu yufat nhai rorhu yimbhindangm wanykfot, be tu hti dbnot thurahrr.”

Porr kfomorm Bro Nkifrarhu yikitohhato krhopa titaneft. Rorhu dukeft duka memor, tu Porrom niwa kanjo Tesalonaika Kristenm inji nakfot. Turoh tire hingrnahato tamohm yakkfot. Nhai rhu hhrekkfot. Yo womroh hingrnefm hti dukahato hingrna nhokfot.

Bro Nungothethru yihar tor yuhre riyorhwor

(Sapta 1-2)

¹ Nom Por, Sailas, Timotironomn ndar gontwat wandfewunomko niko taun Tesalonaika sioshu tuhan yindariko. Niko nmoh Bro Yifemri Nungothet Jisas Kraisrpno frtkafwa tuhan yindariyeko, nikompno ndar gontwat htefiwunomt.

² Nmoh Bro Yifemri Nungothet Jisas Kraisr ayak marnya bomarnya-kahtfko, nikmoh yima yuhum mirhurahmko.

Tesalonaika thofm nhai krhopam hti yakrmihato Kraisr myafphonirmomr

³ O, yinouroko, niko Kraisr yikitohwa nmbuhat dukahato yiha yiha nom Bro Nkifrar kfo bruttna yindhorkfot. Niko Kraisr bi mhik trpakni twanhiwukomr. Mhik trpakni-hato tuko nayakitohhato tuko nayak marnya nayak marnyewa nmbuhat bi hifa miyakito-haknitkomt. Ndnett nom Bro Nkifrar kfo bruttna yindhore-neft nhai mrokfot. Ndt dbo-rioh neft newunom. ⁴ Niko Kraisr hikhato tohwohat, nhai be rpahtet krhopam yimam hikahmko. Wonk wonk krho-pam yahukatmko yima yuhum nur finy suhnitmko. To niko nhai krhopam hti yakrmihato Kraisr myafphonikah-komr. Nhai. Bi riyakitohakmohat, to be kakitoh twanho hanitkomr. Ndnetnomn nom wom kongrigesnm-pno yishoft, niko kfo tndh yindhore htaswonomko. Kfo kangnomm, “Tesalonaika thofm nhai krhopam hti yakrmehato Kraisr myafphonikahmr. Nhai. Kakitoh kihwomr.”

Tamoh tamoh nefm Bro Nkifrar bi hti hasiwurm

⁵ Niko yekwa krhopam nhai be sfno nd krhopam yakkahkomm. Nhai. Niko Bro Nkifrapno rim tohnita nmbuhatpno yimam hti namburhato krhopam yahukatmko gumuha muh thunitko. Tamoh tamoh nefm Bro Nkifrar bi hti hasiwurm. Niko rorpno rim tohnita nmbuhatpno krhopam yekwohat, nhai mrokfom. Kto Bro Nkifrar king yufat yakhato ndar bbinyssofti met yindarim yikitoh thombat, rorn yikitohrahrko. ⁶ Nd niko krhopam hi hasiwa yimam tawo Bro Nkifrarn hirahrm krhopam. Ndhtet nayet yimam Bro Nkifrar tu hti nhta marnyahato tawo krhopam henyeft, ndt tu dbo-rioh neft narahr. ⁷ To nd niko hatoh hasiwa krho nmbuhat yak thurahrt. Yak thuhato nhai wom krho yima yuhum rhuruhatm. Be rhu mmorahko. Nikomi nom inji na bugarahrnom. Bro Nungothet Jisasri rorhu tu bbuka nanyjaret mounmotm moun yuhat kah funeftpno yawiheruha yiha, tot nd yiha Bro Nkifrar nd neft narahrt. ⁸ Yo nd yiarn fitoh fitoh yimam Bro Nkifrar riyak htafhato nhai nmoh Nungothet Jisasrhu gutnius mrokfom hikkahmm, nd yihar Bro Nkifrar afo htiwonrahrm. ⁹ Be nd yiha Bro Nkifrar yak

tndochhato yak tuhaf thoft, to be inji nndo krhopa yakyuk tkit bebtn toh nkifranirahm. Nhai Bro Nungothet Jisasrpno brbo rorhu bro nuka nanyjareftpno tohruhatm. Be inji nndo toh nkifranirahm. ¹⁰ Nd Bro Nkifrarhu bro yiharn Jisasr niahato nd ror hiket yimam kfo yindhohrato bro yufat hirahmr. Niko to inji buga yindhohr nhorahkomm. Bro Nkifrar nompno hingrnamo hingrneft, nom nikmoha yi pthamohat, wufak marnya-mokomt. Ndnettyn yindhornnhorahkomm.

Tesalonaika thofroh toh bmta nmbuhat dukahato Bro Nkifrapno kfo bruttnamom

¹¹ Nom nd Jisasr bro yufat yakruha yiha dukahato nmoh Bro Nkifrar yiha yiha kfo bruttnewunomr. Kfo bruttna kangnom, “O Bro Nkifraye, nd Tesalonaika thofm ni nakuyakmotnm hikwomn. Ndnettyn rroh yima yuhum wathu bmtakahtnm ninhu dukefrn hikrahm. Nd Tesalonaika Kristenm kangm, ‘Be ninrpa ahikkahnomn be dborioh nefrpam anom.’ Ndnettyn kangnom, wathu bmtakahtnm be dborioh nefrpam naruhann hti yindhorrannahm.” ¹² Nom inji inji kfo bruttnewunomko Bro Nkifrapno. Nikmoh yufam kfo bruttnetmn nmoh Bro Nkifrarri Nungothet Jisas Kraisr yak marnyarahfko. Yak marnyaruhatfko niko inji htihato Jisasrhu yufat yuta hagrha yindhorrakkomt, tawo ror inji htiruharko yuta hagrha yindhorrahrko.

2

Nkifra boririfhu mrokfot hamuhtfa nngrajohruha yimar mfnahrahr

¹ Bar yinouroko, nmoh Nungothet Jisas Kraisrhu niahato nmoh yak nhafohhato mnahtiruha nmbuhat kfo ptha nuhasruhanko. ² Ka wom yimam kfo memomko, “Nmoh Nungothet Jisasrhu yihar bi asor niamotr bi nd yiharn bi tohwonom.” Ndhet mrokfom wanuknom, niko bi mirahko ariwany fohtasakkahnomn bok dukefm ayaknom. Wom yimar kfo kangr, “Porr Bro Nkifrarhu Yafothat mthu nawohmotr nd mrokfot kfo pthamotrt wanymo-nomt.” O wom yimar kfo kangr, “Bro Nkifrarhu mrokfom kfo ptha hanyhato kfo pthamort.” O wom yimar kfo kangr, “Nom htafyuk gontwattn nd mrokfot rhumot.” Na kfiwanko ndhtet ndhtet mrokfom warhtaftwakomm. Mirahko awiyaknomm. ³ Mirahko ndhtet ndhtet yimaroh mrokfom awany yakionomm. Wawanyko, nd yihar mfnah thombat nhai be mfnah furaruhatr. Nhai. Tafi Bro Nkifrarhu mrokfot riyakhtafhato rorhu boririfhu mrokforoh hanyjbor nungrajoheft bi mfnahrrrott htirronomt. Afo nd neft kmi kmi rhuraht. Nd neft rhuni, ee tfit Bro Nkifrarhu mrokfom hamuhtfa nngrajohruha yimar mfnahrahr. Hel yihato mitaprhohuhr, ndr afo mfnahrahr. ⁴ Nd yimar nia thombat, htirah-komr tamoh tamohm yimam tth kaugohato kfo tatiwam nhai htiruhatr yimam ndmn kfo tatoneft. Rorpar brorahr. Rorpar brohato Bro Nkifrarhu temperr, Jerusalemr yorhwar, ror rim fknenihato rorn rim rhuruharn kfo mirahr, “Na asoya Bro Nkifraya.”

⁵ Na nikompno tohhato nd kfomo mrokfome ka nhai duka hanykahkomm? ⁶ Bi wanymoko, nd yimarhu fnahna yuhat afo wom yimarn toh rafiwurt. Bro Nkifrar bi kfo htamort nd yimarhu fnahna yihar. Nd yiharne fnahnerahr. ⁷ Nd nom kfiwa yimar, tor be afo yukr yukr rorhu hingrneft hingrnewurt. Nd Bro Nkifrarhu boririfhuthu hanyjbornaneft to frohmn yifemwamt? To nd yimar. Afo ndar yiham be afo yukr yukr rorhu hingrneft hingrna hanitrt. Kto nd rorhu nia yuhat toh rafiwya yimar Bro Nkifrar riyak htafrahrr ee fnahnerahr. ⁸ Fnahne thombat, rorhu hingrneft tafont hingrnarahrt. To tfit kto to tor bi Nungothet Jisasr. Ror tfit fnahnerahr. Rorhu nuka nanyjareft rpat hnerahrt. Nd nuka nanyjareftpno nieruharn nd yimarhu bbukeft nd yiha yohniraht. Rorhu tng yahsha wunaruhatr mibatinirahr. ⁹ Nd yimar nia thombat, Satanrhu bbukeftpno nierahr. Satanrhu bbukeftpno nieruharn yimam yuwi frnheh bonhehrahrm. Yuwi wonk wonk mirakerm hingrna nheh hakuruhatrm yimam hti haku-ruhamn mirahm, ka tu Bro Nkifrarhu bbukeftpno hingrnewurm. ¹⁰ To nd hel yita yihotat bi tohet yimamn inji yuwi frnheh bonheh hakurahrm. Nd yimam nhai Bro Nkifrarhu yafothet mrokfot hikhato yakrmom. Nhai. Bro Nkifrarhu yafothet mrokfot kurmomt. Ndnetmn hel yihota yuhat

tohrahm. ¹¹ Mirahm ka tfit yima yuhum sinyahato Bro Nkifrar hikrahnom. Nhai. Bro Nkifrar rroh yima yuhum hta krhoruhatrm nd yima yuhum nhai sinyaruhatm. Tfit ndwom yimarhu frnhehyuk mrokforoh dukeftn yima yuhum mwofnnirahm. ¹² Ndnettnd yimam nhai Bro Nkifrarhu yafothet mrokfot hikrfomt, be nd fasoh fasoh nefroh yindhoreftn ftohm, bro kotkfot tonihato yak batirahrm.

Bro Nkifrarhu yakyukkomm bi tur kfo htamorko

¹³ To bar yinouroko, Nungothe Jisasr tu hti yindhor mifworko. Bingot nd nikmoh nrfa htiyakneft Bro Nkifrar bi duka htangotmort. Bi duka hta memor, "Tukanhu Yafothaye thu hmbrihato bi nanhu yufatn rhurahm. Yo nanhu mrokfot bi yakruhamtn hikrahmt." Nd nmbuhatpno nom niko dukahato Bro Nkifrar kfo yindhorkfot. ¹⁴ Nd gutnius mrokfot nom hany pthamot, nd yuhatn fakmorko. Bro Nkifrarhu dukeft memor, yakrhoyanmn nanpno tohhato nmoh Nungothe Jisas Kraisr bro yufat yakhato kfo yindhor thombat, niko rpat nd bro yufat yakrahko. ¹⁵ Ndnett yinouroko toh bmtakfot. Nd Bro Nkifrarhu kfo yirmoh mrokfom nom nikompno yi kfo pthamom yo kfo hta mrokfom gontwaye htamom yak hikkfot.

¹⁶⁻¹⁷ Nom kfo bruttna kangnom nmoh Nungothe Jisas Kraisri Bro Nkifrar, nmoh Bro Yifemr, dukefm ahekahrko athu bmtarko. Inji ana-kahtro tamoh nefm naneft hifa hifa narahkomm yo mrokfo pthaneft ptha marnyarahko. Yo nom tohwa toheft htitartn hti yindhorwornom. Yo hti yuhuwafwornom. Yuhuwafhato nmoh yima yuhum yiha yiha thu bmte-wurnom. Ndnetnomn Jisasr toh gari kangnom, yagniruharnom be rorpno mtih nkifranirahnom.

Hhreket yimam mrokfom hekfot

3

(*Sapta 3*)

Wakfo bruttnatwakmnom

¹ Yinouroko, wuroh mrokfom tfit kforuhanko. Wakfo bruttna-twakmnom. Wakfo bruttnakahtko ndar Nungothe Jisasrhu mrokfot kmi kmi thu yufur dimandinirahtt. Kmi kmi thu yufurniruhatt kmi kmiroh tuhan yindars wanyhato hikrahmt niko wanyhato hikmo kanjo. ² Yo womt nom ndar mrokfot hatonitanom wakfo bruttnatwakmnom. Bok yimam nhai Jisas Kraisrhu mrokfot hikkahmt. Wakfo bruttnakahtkmnom nd fasoh fasoh yimam finji naneft Bro Nkifrar toh raforahrnom.

³ To Nungothe Jisasr, ror nhai yafhokahrko. Ror yiha yiha kakitoh kihworko. Rorn tpim habokknaruuharko yo toh raforahrko Satanr tamoh nefm naneft. ⁴ Nd nom kfo hayuk mrokfom wany yakiohato hikwatkomm nom inji htihato kangnom, "Awi nd nom kfo hemo mrokfom hikmomm yo tfit gontwat htewa kfo tebos mrokfom hikrahmm." Nom niko htihato dukewa dukefr Nungothe Jisasrn nd dukefr kahukrnom.

⁵ Nom kangnom, Bro Nungothe yima yuhum ahikahtro wahti hiktawkomt Bro Nkifrarhu yima yuhur nikompno yorhwa yuhati yo Kraisr krhopam titahemo yuhat.

Hingrnaneftu mrokfot

⁶ Yinouroko, nmoh Nungothe Jisas Kraisrhu yufatpno kfo pthiwanko. Ndar Jisasrhu mrokfot hikwa nmoh womm nhai nom yahuka kfo hta mrokfom hikkahmm. Be hwes rhut nahasiwum yonmari yiham. Mirahko nd yimampno brbo ainyom. ⁷ Nom nikompno tohmohat, nmoh toh ruheft bi htimokomt. Nd yuhatn niko hikkfot. Nom nikompno tohmohat, nom nhai hwes rhut narmoanom. ⁸ Nom nhai marimonom, "Wom yimarhu yesht be brio rimak furahato yerahnomt." Nhai. Marufat rim htahato yeshrim fakmounomm. Yo tunom nhai rhu furarmoanom. Yifung mar, yifung mar tunmoh rhu nmbuhat dukahato hingrnamounom. ⁹ Nom Bro Nkifrarhu hingrna yimanomn, nom nikmoh tirmn rhurmonom tamoh yeshriyenm o tamohm. To nhai. Nom nhai inji narmonom. Nom memonom, "Tunmoh tire hingrnahato yeshrim yak yerooha-nomn rom inji htiruharn rom nd yuhat hingrna hikrahm."

¹⁰ Nom nikompno tohmohat mro-kfom hemonomko. Kfo memonomko, “Yimar nhai hingrnakahr, nd yimar mirahm yimam yeshrim tamohm ahe-nomr.” ¹¹ Bi wom mrokfom wanyak-momon, kfo memom, nikmoha tom wom yimam rhu fura bofirewum. Nhai wom hingrnefem hingrnawonkahm. Be rhu fura bofura hasohato womroh mrokforoh yihom hiayak mhiayak nefrat buriwum. ¹² Ndhtet neft niwa yimam Jisas Kraisru yufatpno bi kfiwa, nd yimam warhu digrhato turoh rhu nmbuhat dukahato hingrnakfot.

¹³ Bar yinouroko, mirahko dborior nefm na hanyhato tfit buha mhhrekhato amyafhinnomm. ¹⁴ Fitoh yimar nhai hikkahrm ndar gontwat htewa mrokfom, hti hikak marnyahato nd yimarpno rhu nafiny juha. Turpar rhu mmbra-finyruharn dukarah. ¹⁵ To tfit kfi-wanko, ndhtet nayet yimar mirahko wom nndoh yima furam kanjo ahtikahnomr, fasoh nefm ananomr o tng bebm akfonomr. Nom nhai be kfo mekahnomko, “Inji wanatwako.” Nhai. Nd yimar niko tuko rpat Jisasr hikwa yimayeko. Be kfo kangnomko, “Ndhtet net yimar mrokfom hekfot.”

Wuroh mrokfom

¹⁶ Bro Nungothet harhuworr tu noh hmbre yima yuhur. Tamohtet tamohtet nefm yo tamohtet tamohtet yihar rorn nd nohmbre yima yuhur ahitwarko Nungothet Jisasr atoh natwih bugatwarko.

¹⁷ Na Pora niko dukahato nanhu kfo yindhorkfot htefiwant. Nd kfo yindhorkfot na tukanhu tire htewant. Kmi kmimpno yitwa gontwam yo be yimaro yufampno yitwa gontwam na be ndhtet mrokfo nmbuharpam nanhu tire wandfaf hakutwanm.

¹⁸ Nmoh Nungothet Jisas Kraisr ayak marnya bomarnyatwarko.

**Timotirhu barkof gontwat
Porr dwandfakhato htafmot
Barkof kfo nuhas mrokfom**

Timotir damiagenrn Jisasr rihikakmor. Timotir Galesia profinsko yorhwa taun Listra thofer. Rorhu yifemr Grik thofr. Mmemtne Juda efkott. Timotir tohmohat Porr yaknimoarr misin hingrneft hiyau nuhas htifasmourr. (Nd mrokfot htifam Aposer 16.1-3). Timotir toh hanyhato ka kto taun Efesushu Kristenroh bro tohak yimar htamomr. Nd hingrneft tohethn Porr ndar gontwat wandfamorr.

Barkof mrokfom afo kars kfo tebos mrokfom hemorrh. Kfo memor, “Yo ni, ni hatohwa Kristen met yindarim wayukatoh marnyaf hanywanm. Wom yimam nieruhamn mfrnheh bonhehruhatmm rroh mrokfo yuhamn mitohnirahm. Nd yimam ndar bbinysofthu tamoh tamoh tti thombat kfo kangm fasohem. Yo wom mrokfot kfo kangm wom wom mur yemrot ye juha. Yo tuhan yak duha.”

Ndm inji kfonomormn tfit sios hingrnefroh toh yukatohhato yak hta bohta yuhamn kfo pthamor. Yo sios hingrnefroh hingrnayuk yimaroh yak hta yuham kfo pthamor.

Wuroh mrokfome Timotirhu toh yuham kfomor. Kfo memor, “Ni Timotin Jisasrhu hingrna yima tohneft, tu dboriorh hingrna yima tohkfot.”

**Ni Timotinhu nefm yo sioshu tuhan yindariroh nefm duka
marnyahato tamoh tamoh nefenm nakfot.**

(Sapta 1-6)

¹ Na Pora, na Krais Jisasrhu aposera. Nann ndar gontwat wandfiwann ni Timoti. Bi fasoh yimarhu tirm ruhetnom yakmo Nkifrar yo nom rhu yukatoh darwon hasiwa yima Jisas Kraisr, rofhu tngtpno na aposer hingrneft yakhato hingrnewant.

² Timotiye, ni Bro Nkifrarhu mro-kfot hikwa yuhatn nanhu yon mife. Nmoh Yifem Bro Nkifrar yo nmoh Nungothet Krais Jisasr yuhuwafhato ninhu rhu nmbuham yak marnya bomarnyahaekahfn yima yuhur mirhurahrn.

Kfo fura bofura mrokfom mong trohkfot

³ Na Masedoniako yibon hanyneft-pno kfohemu mrokfotn kanga nd mrokfot tfit ak-fohiyann. Nanhu dukeft kanga, ni mirahn Efesus ahtanyant. Nd taun Efesushu Kristenm bi yimam yitamn mkfo yuhur nheh bonhehwatmm kanga afo Efesus watohkahnn nd yimam wakfo rafotwanm. Mirahm tfit wom nndoh nndoh dukefm nd taunthu Kristenm ahanyomm. ⁴ Mirahm nd nkifram harhu hawihnamo nkifra tndhm, yo nkifram niayuk frikef yuham tfit akfo tndh hik bohik hatohnomm. Nd nmbuhampno Kristenm tum tfit nakfo hamuh nakfo hamuhwom. Bro Nkifrar nhai hik marnyakahmr. Kraisrn rroh yima yuhum htahato ee Bro Nkifrarhu dukefr hikrahm. ⁵ Na kanga rpat nayak marnyahato rpat watohko. Mirahko nd yimaroh dukef yuhamn ahiknom. Kraisru mrokfom yakitoh kihhato yima yuhum wutham rhurahm. Inji rhurahko, tuko Kristenko nayak marnyahato rpat tohrahko. ⁶ Wom yimam nd kfiwa mrokfom myafho-nitamm tfit nd yafotha duha mro-kfomn hikwom. ⁷ Kangm, “Nd Bro Nkifrarhu boririfhut nomn kakitoh marnyewunom. Womm nomn kfo nuhasrahnomm.” Ndt kfo furewumt. Nhai rom Nkifra boririfhut hik marnyakahmt. Kangm, be wommn akfo nuhaskahtnom romn ahikmt.

⁸ Bro Nkifrarhu boririfhut rot dboriohet. Be tu Bro Nkifrar kfomo yuhatn nd boririfhut hikneft, rot nhai mrokfom. ⁹ Boririfhut nhai toh marnyet yimaroh yak hta bohtayukt Bro Nkifrar htarmort. Nhai. Mrokfet yimarparoh yak duka tungunayukt htamort. Yimam boririfhut mhanyjbor-nanihatoh hammo bohamumiwaroh yak duka tungunayuket. Yo yimam Bro Nkifrar mong trohnihato fasoh fasoh nefm niwa yimaroh yak duka tungunayuket. Yo Bro Nkifrarhu nefm hti hhreknihato ndar bbinysofthu

nefm tfit hti yuhurwaroh yak duka tungunayuket. Yo yifammam waswa yimam yo mrokfo duha yimam frdbofna fura yo krjbowur firewaroh yak duka tungunayuket. ¹⁰ Yo ijoh tonita yimaroh yak duka tungunayuket. Yo Sodomthu yimam namo nefm kanjo nayet yimaroh yak duka tungunayuket. Yo yimam wom yimam yak rikohnihato tfit rroh slefm yak htewa yimaroh yak duka tungunayuket. Yo kfo fura bofurayet yimam yo yimam wom fasoh nefm nahato tfit namhi bror htahato Bro Nkifrarhu yufat yuta fura bofuriwa yimaroh yak duka tungunayuket. Yo sios kfo yirmohwa mrokfom rhu hanitm tfit womm rom wom nndoh neft tfit rihraruhany ndhtet ndhtet net yimaroh yak duka tungunayuket. ¹¹ Nd sios kfo yirmohwa mrokfom gutnius kak hikwot. Nd gutniuskfot Bro Nkifrar nanhu tirtn htamotrt nann kfo ptha htfaswant. Nd gutniuskfot nd bruwohmr katiwa kanjo funa nanyjarwa Nkifrar yo yimam kfo yuta hagrhiwa Nkifrar, rorpno nd gutniuskfot niidot.

Bro Nkifrar yuhuwafmotrr Porr, Porr kfo yindhormorr Bro Nkifrar

¹² Nmoh Nungothet Krais Jisasr hingrna bbukefr hemotra kfo yindhawar. Nd tur hemo hingrna bbukefr htihato dukamor nann nd rorhu hingrneneft. Nd natpno na kfo yindhawar. ¹³ Na tafi rorhu hingrneft yarim fnahne duha na nda ror kfo garib bogarib hnamoahat, yo tamoh tamoh nefm na namoampno rorhu yima yuhenr muh wohne thunimoahat, yo fasoh fasoh kfo rindho borindho thumoahat, ror nhai nd na nayuk neft mhtiyakrmor. Nhai. Yuhuwafmora. Na namoa nefm ror htihomat duka memor, “Ndr niwa nefm tafi na hti duka tunguna duha ndnetrn ndhtet nefm newurm.” Rorhu htiyeft inji htihat hifa yima yuhur niidotrr nhai yak tutfarmora. ¹⁴ Nmoh Nungothet Krais Jisasr tu mfro yuhuwaf mifhato nanhu yima yuhur kasinya-morr rorhu mrokfom hikhato wom yimampno nayak marnyahato rpat tohneft.

¹⁵ Krais Jisasr ndar bbinyssoft fawihnamor nom fasoh fasoh nefm nayet yimanmoh yakneft. Nd mrokfot tu kfo mif mif kfoy. Yimam nd mrokfot wany yakiokfot. Na ndar yimayann fasoh fasoh nefm mfro nahato yiro fknemoya. ¹⁶ To na ndhtet fasoh nefm mfro hatohet yimaya, tamohmpno wayuhuwafmora? Memor, “Ror inji hti yuhuwafhato ayakkahita, yima bugam htirahmt na hifa yima yuhurpno fasoh nefm nayet yimam yuhuwafhato yekwa yuhat.” Rom inji htiruhann rorhu mrokfom wany yakioruhann toh nkifranirahm. ¹⁷ Ror toh nkifraniruha kinger. Nhai nohkahr. Yimanom nhai htikahnomr. Rorrpar Bro Nkifra mifer. Nd nettn yiha yiha rorhu yufarpat bro yufat htakfot. Rorn nyngako htakfot. To be inji.

Fasoh nefm Timotir yukatoh duha

¹⁸ Nanhu yon Timotiye, wom kfo duka mrokfom kahukwann. Bi bingot ninhu nmbuhat bi profetm pthamomt. Na kfiwann nd profetm pthamo mrokfom ndm wayakitohtwanm yahrt tohyuk kfra inyarut kanjo. Giaman tisam niehato finji kfiumn nd ni yakinohyuk kfra inyarum yakhato tawo tukfot. Nd kfra inyarut yakinohhato giaman tisampno yahrt watohtwant. ¹⁹ Mirahn Jisasr afrtrohanr. Jisasr yakinoh kihhato tu dborioh yima dukefrpno nd yahrt watohtwant. Yima yuhur mwofnnitwor tamoh nefroh naneft o fitoko yinyeft, ee btn sinyakfot. Yima yuhur kurhiwur, sinya duha. Tamoh tamoh nefm be sinya fura bofuraknihato na fura bofuraknirahnm to be tunn yoh raforahnt tunhu yiyuk yihotat. ²⁰ Himeneus Aleksanderof to inji namotf Satanrpno rifak htamoyanf. Yimam inji yak gnngtatetmn nhai tfit Bro Nkifrar kfo garib bogaribruhatmr.

Rhu rifinyhato kfo bruttnaneft

¹ Rifinyhato kfo bruttnaneft, barkoft afo tuhan yindarim dukahato rroh rhu nmbuham kfo bruttnakfot. Tuhan yindarim tamoh dukefetem o tamoh krhopetem ndm afo kfo bruttnakfot. Kto tfit tamoh tamohm kfo bruttna yindhorkfot. ² Ndm inji kfo bruttnanihato tfit gafmanm, kingm kfo bruttnakfot. Bro Nkifrar pno kfo bruttnayetmn nom rhu mmohato Bro Nkifrar hti yindhawar nefrpam yakinohhato hikrahnom. ³ Fitohtet

fitohtet yimam yuta bugahato kfo bruttnefm, nom fasoh tkit bebt yakmo Bro Nkifrar hifa wany yindhor-wor. ⁴ Bro Nkifrar hifa yindhorwor yimaroh yufam kfo bruttnahato nd yimam Kraisru mrokfom wanyhato yakneft. ⁵ Rpa Nkifrarpar korhr. Rpa yimarpas buha tohhato yima mifm yekwarm Bro Nkifrarpno brbo kak htewurm. Nd yimar Krais Jisaser. ⁶ Kraisru tu Bro Nkifrarhu dukef yuhatn hikhato nmoh fasoh fasoh nefm rorn suh nanyormorm. Rorn suh nanyor-motrm be nd Bro Nkifrarpno yiyuk yihoat yihotett rhumot. Bro Nkifrar nom tfit yak yibon bugetrn yihoat inji hingrnarmort. ⁷ Na to nd ror suh nanyormo yuhathu mrokfothu kfo ptha nuhas htfasneftn nd apaser hingrneft fak htamora. Memor, rorn rirhu arhuyuk yima tangim kfohi hanyrahram. Yima tangim wanyhato Jisaser hikruhamn tu yafothet mrokfot yakinohrahram. Na kfiwa mrokfom tu mrokfom kfiwanko.

⁸ Lotu yiham kmi kmim kfo bruttna-neft, na kanga, yindarim Bro Nkifrar-pno brbo frtkafhato tirm yura hta hanyhato kfo bruttnakfot. Nd yimam nhai wommpno nakfo hutt nakfo nna inji nakfot.

Dborioh nefroh naneftn tot tu metroh wondht

⁹ Metroh wondh yuhat kfo ptharuha. Metm wondhneft mirahm be mfro tamoh tamoht yakhato awondhnom. Tmarim mirahm be mfro mrfau yukehato tmahrut tamoht yakhato hembonginahato tmarim awondh najugnamm. Yo mirahm gort o tamoht yakhato yimanyofm awondh htanomm. Mirahm be mfro maru kfet hmbresham wiknahato awondh hta bohtanom. Nhai. ¹⁰ Metm kangm Bro Nkifrar ahiknom, dborioh nefm yakinohkfot. Metm nayuk dborioh nefmn tom tu metroh dborioh wondht. ¹¹ Metm hifa yima yuhurpno nhowi rhuhato Bro Nkifrarhu mrokfom kfo ptha nuhas yimahru yinhitn rhuhato mrokfom yakkfot. ¹² Nhai metmn yindarim yak hhrifnihato tfit romn tohhato yindarim Bro Nkifrarhu mrokfom kfo hta bohta-kfot. Ndt na nhai wofnkaha. Rom be nhowi rhuhato be wany yakinohkforpat. ¹³ Wawanyko, Adamr hingrnanihato lft hingrnarmor. ¹⁴ Nkifra tndht inji kfiwit, nhai Adamrpno tndhr mfnahhato mnhehrmor. Nhai. Metppno mfnahmotr rotn nd Bro Nkifrar kfo yuks kfo rafo mrokfot riak htafnihato fasoh neft namot. ¹⁵ Metm rom be tumn yon hiyau hanyhato yiha yiha Kraisru mrokfom hikmm, yo rroh toh nmbuham rorhu tirtn htahato Bro Nkifrar kanjo ftohm, yo nd yima yak marnyanef fakitohtmt, yo dborioh nefm fak hikmm, Bro Nkifrar tfit yakinohrahram.

3

Sioskfot toh yukatohyuk yimam tu dborioh nefm yakinohkfot

¹ Na kfo mifwa, yimar kangr, sioshu toh yukatoh yimaya atoha, hifa. Ndt tu dborioh hingrnet. ² Nd sios toh yukatohyukruhu yau nmbuham, toh nmbuham be yak teh marnyakfot. Nhai rorhu wom fasoh nmbuhat yimam wahti nkriyafokfot. Nd yimar be rpa metrpatpno tohkfot. Nd yimarhu yima yuhur yak hta bohtahato rorhu wiyauyau nmbuhat dukefmpno yaukfot. Womm yakhato hifa rika bukr yak htakfot. Rorn Bro Nkifrarhu mrokfom womm kfo nuhas bonuhasetr rhukfot. ³ Nhai nd yimar bupa bebim yehato kfo mmo bammokfot. Nhai nd yimar tamoh nefenm bmbri kah rifur mfnahhato tir tuyaknikfot o finji nakni-kfot. Nhai wommpno nakfo befenm rhukfot. Hifa yima yuhurn tamohm nakfo ptha marnyakfot. Ror nhai be mfro maru dukefrn rhukfot. ⁴ Nd yimarhu yon tuhanm hifa hifa yak hta bohtahato rom rhu marnyakfot. Yonm be yifemrhu yinhitn rhu digr marnya-kfot. ⁵ Yimar nhai turhu yon tuhanm hti yukatohaf hany marnyakahrm, nd yimar nhai Bro Nkifrarhu sioskfot toh yukatohruhatrt. ⁶ Nd hingrnet tohyuk yimar nhai nfri Kristen yimarn nd hingrnet tohkfot. Nhai. Bi Kristen tohngotet yimarn nd hingrnet yak-hato htakfot. Nfri yimar nd hingrnet yakrahrt, to be turhu yufathu yura htaneftpno Bro Nkifrar tfit wahtarahr Satanr wahtamo kanjo. ⁷ Mrokfo hatoh hna duha yimar nd hingrnet yakneft, nhai mrokfom. Ndhtet yimar yakettn to be nhai Satanru rugitn fkniruhatr riruh aruhyuk yimam mrokfo bebim turuhatmm.

Sioshu hingrnanhoyuk yimam dborioh nefm yakitohkfot

⁸ Sioshu hingrnephm hingrnanhoyuk yimam Kristenmpno tu dborioh nefm yakitohkfot. Nhai rom hus tngetm rhukfot. Nhai rom wain bupam yehato kfo mmo bammokfot. Nhai maruham hmarsiyakt yakkfot. ⁹ Wutha yima yuhumpno nd tafont yak nriyafmo tu yafothet mrokfot, nd yimam yakitoh-kfot. ¹⁰ Kangko sioshu hingrnanhoyuk yimam ayaknom, afo yakhato htikfot rroh hingrnephm. Tu hifa hingrna marnyewume ee btn nd hingneft yak htakfot. ¹¹ Rroh metm nhaf tu dborioh nefm yakitohkfot. Mirahm tihtrewonom akekutnom. Rorhu yima yuhur yak hta bohtatahato rorhu wiayau nmbuhat dukefmpno yaufkfot. Rroh rhu nmbuham be rhu marnya bomar-nyakfot. ¹² Sioshu hingrnanhoyuk yimar rpa metrpatpno rhukfot. Rorhu yon tuhanm yak hta bohta marnyakfot. ¹³ Yimam sios hingneft tohhato hifa hingrna marnyem, nd yimam tu dborioh yufat yakrahm. Nhai yakrmi hanyruhatm rom Jisasr hikwa yuhat wommpno kfo pthaneft.

Bro Nkifrarhu kafrohet mrokfot tafont htamort

¹⁴ Ninpno nianeft bi yibon hanita, ndar gontwat be wandfiwant. ¹⁵ Kanga na nia duha yinyeft o awi knga hatohneft, ndar gontwatin bi mrokfom yakrahnem nom Bro Nkifrar hiket yimanmoh toh yuham. Nom Bro Nkifrar hikwa tuhan yindarinom, nom toh nkifraniruha Bro Nkifrarhu yon kunyenom. Nomn dany rahur kanjo nd Bro Nkifrarhu yafothet mrokfot hatohwonomt. ¹⁶ Rpa yima yuhuri rpa tngr nom rpatis tohhato kfo pthafkfot Bro Nkifrar nom yak nuhasmo tu yafothet mrokfothu mnat. Nd mro-kfothu mnat inji kroht:

Tu yima mif that yaknehato,

mifak dborhamot,
tuhant yindars htimomr.

Ror tu mndohmb yima mifr tohmor.

Nhai wom tamoh nefenr rhurmorr.

Ndm Bro Nkifrarhu Yafothatn yak nuhasyukem.

Mounmotm hti bugamomr.

Rorhu mrokfom yimam yaknimomm,

kmi kmi kfo ptha habrimomm.

Ndar bbinysoftu yimam wany yakiomomr.

Bro Nkifrar yura hamuhmorrn,

bro yufat hemorrh.

4

Giaman tisaroh mrokfom

¹ Bro Nkifrarhu Yafothat mrokfom kfo hik twanho mifwotm. Bi wuroh yihar brboh hniwar, yimam Bro Nkifrar kfoyuk mrokfo yuham myak htanitmm. Myak htanihato tfit nd yafotham yimam tuhagrhhahato kfo ptha nhehwa yafotharoh mrokfomn o kmi yarhm kfoyuk mrokfo yuhamn hikwom. ² Ndhtet mrokfom giaman tisamn hnewumm. Ndhtet yimaro yima dukefr, tamoh nefm yak nhtiwar, bi nohmorio. Rom nayuk fasoh nefm nhai wom duka mekahm art fasoh nefet. ³ Ndhtet yimam kfo ptha kangm tuhan yakneft ndt fasohet, yo mur yeshrte fura bofuraneft ndt fasohet. To nd yemrote be tum dborha furamom? Na kanga nmoh yeyukmn Bro Nkifrar hingrna htamorm. Yimam bi Bro Nkifrar hikhato rorhu tu yafothet mrokfot yakitohetm kfo bruttnahato yanyeft nhai mrokfom. ⁴ Tamoh tamoh, Bro Nkifrar ndar bbinysoft htamot, dborioh dborioh shrkarpar htamor, nom nhai kfo kurkfot. Bro Nkifrar kfo bruttna yindhornihato yak yakfot. ⁵ Bro Nkifrar bi kfo memor, “Nd nd yeshrim wayetwako.” To nhai nom kfo kurkfot. Nom nd yeshrim kfo bruttnahato yenyeft, nhai mrokfom.

Timotir Kraisrhu dborioh hingrna yimar tohkfot

⁶ Ndar mrokfom yaknihato wom Kristenm kfo nuhas bonuhasrahnm, to be Kraisruh dborioh hingrna yima tohrahn. Yo nd ni hikwa gutnius mrokfoti sios yahuka kfo yirmoh mrokfomn tpim habokknarahmn. ⁷ Mirahn nd bro yimam harhuwa nkifra tndh furam ayaka. Bro Nkifrar tohwa toheft watoh hik hanywontwa. ⁸ Yimam wumtt yinyeft nhai be bmbri wumtt yi yaknikahm. Afo tum wumtt-hato baruhat hatone nhombrahato tum nahti nhombra nahti nhombra tamoh tamoh wumtefm bi tu hifa hifa fekmm, ee btn wumtt kitm. Kangn Bro Nkifrarhu toheft atoha, to nd wumteft kanjo afo tu toh nhombrafot. Afo tu toh nhombra bonhombra hanyhato bi tu hifa hifa tu Bro Nkifrarhu toheft kanjo tohwo, ee ni bi nhai mrokfom. Nd hifa hifa rhu yuham bi hikwonm. Kto hifa hifa rhu nkifra-nirahn. ⁹ Ndar mrokfot tu kfo mif kfoyet. Yimam wany yakiohato hikkfot. ¹⁰ Yimam bi fasoh tkitm tohetm, toh nkifraniyet Nkifrar kekworm. Nhai frohm yakkahr. To nd rorhu mrokfom wany yakiowamn kekwor. Ndnetnom nom rorhu mrokfomn wany yakio-wanomn nmoh dukefm rorn kitwom, kangnom rorn yak marnyarahrnom. Yiha yiham to be kangnom, Bro Nkifrar tohwa toheft atoh hiknom.

¹¹ Ndar mrokfot wakfo nuhas-nikahnm yo tfit wakfo hik nuhas bonuhastwanm ndar mrokfothu hik yuham. ¹² Ni damiag yimaye. To mirahm ni damiag yimann wahtinomn yonenm kanjo. Ni tu yimam kanjo tohhato wom Kristenm ni htiyak hanyruhamn hikrahm. Ni pthayuk mrokfom, ninhu yau nmbuham, yo ninhu yima yak marnyaneft, yo Bro Nkifrarhu yakitoh kihneft, yo ninhu toheft, watoh hikkahnn wom Kristenm inji htiruhamn hikrahm ninhu toheftn. ¹³ Na nhai bmbri niakahane, afo ninn bro yima rifinyr ritimyuk mrokfom ritimtwanm. Ritimhato wakfo nuhas bonuhastwanm. Yo kfo hta bohta mrokfom wahitwanm. ¹⁴ Mirahn ariwohsisaka Bro Nkifrarhu mrokforoh pthaneft. Eldam tir hta hanyhato kfo ptha hanymoa mrokfo yafothar to bi ninn muhmor. ¹⁵ Ninhu dukefr nd na kfo hta bohtayuk mrokfomn dukefr htahato hingrnakfot. Hingrnefr hingrna marnyaruhatnr wom Kristenm htiruhamn kfo mirahm, awi hifa hingrna marnyewur. ¹⁶ Ni tunhu toh nmbuhat htiyafo hany yo wom Kristenm yak hta bohtiwa yuham htiyafo hany inji nakfot. Inji na hanyrahn, nini ninhu mrokfom wanyuk yimam Bro Nkifrar toh raforahrko bro kotkfot tohruba yihart.

5

Wom Kristenmpno tohnefthu kfo nuhas mrokfot

¹ Mirahn wom yima bebpar be mfro akfo huttanr. Tamohm kfo ptharuhanr tunhu yifem mifr kanjo inji kfo ptha yima boyima marnyakfot. Damiag yimam nhaf inji. Rom tunhu garbn nmemrom kanjo yak marnyakfot. ² Yo met bebpas yo met tmaht nhaf rpahtet neft nakfot. Met bebpas tunhu hiyau mmemt kanjo yak marnyakfot. Yo met tmaht tu hifa dborioh wutha yima yuhurpno tunhu mndarem mif mift kanjo yakitoh marnyakfot.

Yindarim noh htaniyet metroh mrokfom

³ Wom mett ramemr noh troh htanitrt turpat rhu kutenwot, ni hti marsisa duha. Tamoh tamohm hti dukakfot. ⁴ Nd met dhirt yonetet o inyenem yonetet, ninn yihato kfo mekfot, "Niko mirahko nd met dhirt ahti marsisanomt. Wahtiyaf hany-swakomt tamoh tamohm." Nd mmemt nd yonrhu inyangur bebt harhumohat tawo rot finji rhu bebwot nd yonr hti dukakfot. Bro Nkifra inji nayet yonm hifa hti yindhorworm.

⁵ Ramemr noh htaniyet mett nhai womm hti dukakahmt, nd metthu yima yuhur Bro Nkifrarn naku kfifut. Yiha yiha yifung marm Bro Nkifrar naku kfo hasiwatt rorn kukatohwort rothu rhu nmbuhat. ⁶ Wom mett ramemr noh trohniyett be tutu thatipthu tuhagrha yima yuhur korhrt, nd mett be bi sfnoh thatip furayet. Nhah wom Bro Nkifrar rhukahrt. Bi hel yita yihotatn kauwot. ⁷ Ndnett yindarim noh htaniyet metm nd mrokfom wahikahtnm Bro Nkifrar akfo brutnakahmn be hifa yima yuhurpar yauruhamn nhai riruh arhuyukm faso kfo bebruhatmm. ⁸ To afo wom mrokfot wawanykomt. Wom Kristen yimar nhai turhu froh frohm o turhu yon tuhamm o turhu

darbn najomrom o nmemrom o mndaremrom hti dukakahrm, nd yimar bi Bro Nkifrar mong trohwor. Bro Nkifrar hik duha yimam niwa nefm nhai be ror niwa kanjo be inji mfro nakahm. Ror be tu faso yi mifwor.

⁹ Yindarim noh htaniyet metroh yufam yorhwa gonborngt kangn wom met dhirroh yufam ahtakahtanm, siosn nd metm hti dukarahtm rroh rhu nmbuham, to mirahn be nd met dhir bugaroh yufam ahtayanm. Hti hanykfot fitoh mett rpa yimarpas fak dhir htanirtn nd mett 60 gunyjimetet, ¹⁰ yo nd mett dborioh yufetet, tuthu yonm hifa hifa fakitoh marnya hnamotm, yo wom kmim fak marnya hnamotm, yo Kristenroh bdr wuram fuk kifsa hnamotm, yo krhopet yimam krhopam titanho hnamotm, yo wom dborioh dborioh nefm na hnamotm, tot ndhtet metthu yufatn nd gonborngt htakfot.

¹¹⁻¹² Yo mirahn tmah dhirroh yufam bi ayakkahanm dhir metroh yufam yorhwa gonborngtn bi ahtayanm. Nd dhirm nd gonborngt yufa htaneft afo bro mrokfot kak dbkafwom. Kfo kangm, "Nom nhai tfit wom nfri ramr yakruhatnom. Nom be inji toh furahato sioshu hingrnefmn yakinohnhorah-nom." Mrokfot inji kak dbkafwont. To nom bi htietenom metm yuhre tmahmn yindarim noh htanineft, yima yuhum tfit sinyewatmm wom nfri ramr yekwamn nd barkof yak dbkafyuk mrokfot yi firewut. Nfri ramr yakinamt sios hingrneft htanywomt. ¹³ Yo rom niwa wom neft, rhu hhrek hasohato kuny kuny yi htfasneft. Yo nhai be hhrek nmbuharpaptno kuny kuny yi htfaskahm. Nhai. Kuny kuny kuny rhu htfas thoft to be nd womroh mrokforoh hatone htfashato rhu ptha htfassn inji rhu htfaswom. Womm rom turoh mrokfom rom tumn pthayukm, to nhai, nd metm be turoh mrokfom kanjo romn tfit nndo mando faso faso harhu htfaswomm wom yimam. ¹⁴ Ndnett nahu dukeft duka kanga fitoh metm yuhre tmahmn yindarim noh htanimm, nd metm afo tfit nfri yindarir yakkfot. Nfri yindarir yakhato afo nd yon mtitofr afo yakinoh hanyhato tu bro yon kunyet metroh hingrneft afo yakkfot. Inji naruhamn nd nom hti dbnotwa yimam nhai yarim tohnehato wom tng bebm turuhatmt. ¹⁵ Wom met dhirm to bi tfit mkekutakhato Satanr tfit hikwom. ¹⁶ Fitoh mett Bro Nkifrar hikwath rothu frohemtn dhirt tohwot, rothu mmemet o najomet o nmemet o wimar-somet o yimboremet o tamohemet, to mirahnt nd mett be nyngarpaye ayukatoh marsisakahtanm sios kforpatn ayakitohtm. Nhai. Rotn nd tuthu yimatm yakinohkphot. Fitoh met dhirm nhai yimat duhatem, nd metrpam sioskfot yukatohrahtm.

Dborioh hingrnefm hingrnayet eldam yakinoh marnyakfot

¹⁷ Eldam tu bro hingrneft kakitoh-wom. Romn tohhato Bro Nkifrarhu mrokfot kfo pthiwatmt tuhant yindars wanukmt yo romn yimampno rhuhato kfo hta bohta mrokfom kahukwomm. Ndhtet yimamn tu yura wuhtahato bro yufati marufat hekfot. ¹⁸ Bro Nkifrarhu rfa borngt kfo kangt, "Bulmakaur wit yukham kahot krhe-wurm, mirahn tngt akitasikahtanr ror yi yak hany juha." Yo "Hingrnefm hingrnayuk yimam marufam yakkfot." Ndnett eldam hingrnaneft rom marufam yakkfot. ¹⁹ Wom yimar eldarpnwo wom kfo wok mrokfom kfiwurm, ni bi mirahn rorhu mrokfom awanyanr. Hus o husfirpa yimam rpahtet mrokfot nia kfo pthewum ee wanykphot. ²⁰ Wom eldar wom fasoh nefm ner, nd eldar yima nyngi riharpro kfo nyngi fnahkfot. Wom eldam inji htiruhann yakrmirahm rom fasoh nefm nanef.

Timotir duka marnyahato tamoh tamoh nefm nakfot

²¹ Bro Nkifrar Jisas Kraisr ee Bro Nkifrar yak htamo mounmotm, yukatoh hanitatma na kfo mifwann, na kfo nuhasyuk hingrnefm yima dukefrpno wahingrnatwanm. Tamoh tamoh nefm niwa, mirahn bro yufet yimarpami tunhu yimatrampampno dborioh nefm ayak nuhasa. Nhai. Yima bugam rpahtet neft yak nuhaskfot. ²² Bi mirahn Bro Nkifrarhu hingrneft yakinohyuk yimam tafi hti hik marnya duha bi tir hta dimandi-yakniyanm. Hti hik marnya duha tir htanihato kto nd yimarhu nefm tafont rhurahm, tfit ninn mrokfot thutitarahm. Ninhu yufat mrokfo duhatt rhukfot.

²³ Nd ninhu yatiyefr yejborhewohate mirahn be buparpam ayeya. Wain bupenmpno hta hmbrihato wayekahnn yatiyefr thu jubtwarahrn.

²⁴ Womroh fasoh fasoh nefm tafont nriyafwatm htitwonom. Htihato kfo kangnom nd yimar mrokfetr rhurahr. Womroh nefm be rhu kafroh marnye-wum, kto nriyafruhattm htirahnom. ²⁵ To be nd yuhatn wom dborioh nefm tafontn htitwonom. Wom dborioh nefm nhai tafontn htikahm kto nriyafruhattm htirahm.

6

Slefm be dborioh nefrpam nakfot

¹ Kristen yimar wom yimarpno slef tohwor, nd Kristen slefr be turhu tohak yimarhu yinhitn tohhato bro yufat htakfot. Nd Kristen slefr inji na marnyaruhattr be rirhu arhuyuk yimam nhai Bro Nkifrarhu yufat faso kfo beb bobebruhatmt. Yo nom Kristennom hikwa yirmoht nhai faso kforuhatmt.

² Fitoh Kristen slefrhu tohak yimar Kristen yimayer, to be nd Kristen slefr mirahr fasoh tuhagrha dukefr yak-kahann akfo amiya, “Nhai mrokfom, nanhu tohak yimar Kristen yimayer. Na finji naneft nhai kforuhatr.” Mirahr inji adukaya. Be yiro yima yuhurio riyindhor mekfot, “Nanhu tohak yimar hifa Kristen yimar.” Ndhtet yindhorr yima yuhur rirhuhato turhu tohak yimarhu tamohtet hingr-nefm yakitohhirahrr be hingrnefm yi marnyarahrm.

Giaman tisaroh fasoh fasoh nefm

Nd na bi kfo hta bohte mrokfomn Kristenm wakfo nnhutwanm nd mrokforoh hikneft. ³ Fitoh yimar mkfoyuk kfo yirmoh mrokfom nhai niko sios wanuka kfo yirmoh mrokfom kanjo hikkahm, yo nhai nmoh Nungothet Jisas Kraisru mrokfom kanjo hikkahm, ⁴ nd yimarhu yima yuhur bro yufathu yakneftn yima yuhur buriwurr. Nd yimar dukef duhater. Sfnoh mfra nyisofer, nhai yima dukefr rhukahrr. Nd tefi shrkenroh mrokfompno rinahtakhato nakfo hamuh nakfo hamuhneftn buriwutr. Ndt fasoh neft kakitohwor. Nd neftn hnewutm womroh wuskar o tamohr htihato yima yuhu sinyaneft, nakfo yiritineft, nungurha mrokfo nahanyeft, hifa nyinga nahti duha, ⁵ kfo babobaneft, ndhtet nefm yakitohet yimar nhai tu wom dborioh yima yuhur rhukahrr. Yima yuhur tu faso rhu beb misworr. Bro Nkifrarhu yafothet mrokfot nhai ndhtet yimar wom rhukahtr. Inji newa yimam duka kangm, “Bro Nkifrarhu yirmoh mrokfot kfiwa yuhat toh hikruhanomn marut, wuss, yo tamoh tamohet niayuk yihotat yak didbhatakraht burifhut kanjo.”

⁶ Be Bro Nkifrarhu kfo yirmoh mrokfom hikhato nhai be mfro dukakahnom bok maruti wusshu harhuneft, nmoh rhu nmbuhath rhu marnyarfonomt. Nhai tamoh tamohr yak kkopenrfotnom. ⁷ Nom nurmohat nhai wom tamohr yakitohakhato niarmonom. Tfit nom ndar bbinyssoft htanyhato yi shoft nhai tfit wom tamohr yakitohakniruhatnom. ⁸ Dfik yeshriyenm korhmnom o dfik hmbresham harhuwon, to be ndrpampno rhukfot. Hti tmany juha. ⁹ Yimam mfro maruti wusshu yak dukefr mfro rhuneft, bok dukefm kekwomm. Bok wuskaroh yak dukefr yekwatrm be tumn fasoh tkitt htewum. ¹⁰ Mfro maru dukefr yakitohneft, tot ndharn boknambok dukefm mfnah-rahm. Tot tu fasoh nefm sinyewa mnakort. Yimam nd maru dukefr yekwatrm fnahnitamn boknambok krhopam kekwom. Krhopam yekwamn yima yuhum nhai hwe marnyakahmm.

Porr wom mrokfom hemorr Timotir

¹¹ To ni, ni bi Bro Nkifrapno rim tohniyet yimaye. Tamoh fasoh fasoh nefm ni brbo yi juha. Dborioh toh nmbuhathu toh yuhatn watoh nhombra won hanyswa, yo Bro Nkifrar yakitoh kih hanyhato ror tohwa toheft toh hikkfot, yo wommpno nayak marnyahato rpat tohneftu yima yuhur yaki-tohkfot, yo noh hmbre yima yuhurhu rhu dukefrn tohkfot. ¹² Bro Nkifrar hikneft resis kanjo watohwonkahnn nd toh nkifraniyuk tkitt wayakwon-twant. Nd tkitthu yakneftn Bro Nkifrar nakumorn. Bro Nkifrar nakumotrn bok yima rifiny buhar tohhato Jisatr yakmo yuhat kfo srh nuhasmonm.

¹³ Ndar bbinyssofti mount yorhwa shrkar htamo Nkifrari Pontius Pailatr-pno kfo srh nuhasmo yima Jisas Kraisr, na rof yukatoh hanitwotfa na kfo mif mifwann, ¹⁴ mrokfom kfo-yukm yakitoh marnyahato hikkfot. Nd kfoyuk mrokfom yakitoh hasetnn Nungothet Jisas Kraisr yawihnerahr. ¹⁵ Rorhu mounthu yarim yak dborha-hato yawihna yihar, tu Bro Nkifrar bi duka htewa yiharn kforuhatr yawih-nerahr. To nd Bro Nkifrarhu tngtpno tamoh tamohr korhwor yo rorhu tngtpno tamoh tamohr rhu hik hanitwor. Rorrpar kingroh tu Kinger, yo rorrpar nungothetroh tu Nungotheter. ¹⁶ Nd rorrpar nhai nohkfot. Yiro bro funa nanyjareftn frhabrimottr yiro riyorhwor. Nhai yimam brbo yikfot. Nhai wom yimar htiwonrmorr, yo nhai wom yimar htikfot. Ndnettn yiha yiha nom be rorrpar bro yufat hekfot. Rorhu bbuka nanyjareft be inji rhu nkifraniraht. To be inji.

Maru kunyet Kristenroh wom kfo duka mrokfom

¹⁷ Ndar bbinysofthu maruti wuss mfro haruhet Kristenm wakfo ptha-twanm, mirahm turoh maruti wuss htihato akfo yindhor hagrhanom. Mirahm nd mibatinita shrkarn rroh dukefm ahtanomm. Bro Nkifrarn rroh dukefm htakfot. Nd Nkifrarn kahuk-wornom tu bro yindhorefthu rhuyuk wonk wonk shrkar. ¹⁸ Wakfotwanm, mirahm turoh maruti wuss htihato akfo amanyom, asot be tu dborioh rhu nmbuhat rhuyukt. Nhai. Mirahm inji adukanom. Tu rhu nmbuhathu yakneft, dborioh nefm yakitohhato womm tamohm kkopenwom, htihato yak hekfot. ¹⁹ Inji narahm, turoh rhuyuk tkitthu tu dborioh wuskarn bi thu yibmon hanitm. Kto tu rhu nkifra-niyuk rhu nmbuhat yakrahm.

Porrhu wuroh mrokfom Timotirpno nd yimom

²⁰ Timoti, nd hingrneft Bro Nkifrar ninhu tirt htamot, yonm kanjo waya-kitoh marnyatwant. Tamoh tamoh mrokfom nhai tu Bro Nkifrarhu dukef yuhatn yimam kfo pthakahmm, ni mirahn nd yimampno brbo aiya. Rroh mrokfom be yuwi Bro Nkifrarhu gutniuskfotn kangm, ayoh mrk wuna bowunanom. Rom duka kangm, ka rroh mrokfom tu yafothet mrokfom kfo pthewum, to nhai. Nndo yafotha duha mrokfom kfo ptha furewum. ²¹ Wom yimam to ndhtet yafotha duha mrokfom yakitohmomn Bro Nkifrarhu mrokfot mfafhonimomt.

To be injirpa nanhu mrokfom. Bro Nkifrar atoh natwihtwarko.

**Timotirhu husyuk gontwat
Porr dwandfakhato htafmot
Barkof kfo nuhas mrokfom**

Timotir Porr hingrna nhomoa yimayer. Ndnett Porr ndar gontwat wandfakmorn Timotirhu yufatpno htafmort. Timotirhu dborior nefrparoh yakitoh yuharoh kfo nuhas mrokfomn ndar gontwat htafmort. Mrokfom kfo memor, Timotir Bro Nkifrar hikwa yihotat nhai be wumtnano hikkfot, yo nhai Jisas Kraisruh gutniuskfothu kfo pthaneft myak htanikfot, yo Timotir Bro Nkifrarhu mrokfot hik marnyakfot. Nd gutnius hingrneft tohhato yimam krhopam kahukmr, ror nd krhopam rihtiyakhato nd Bro Nkifrar hayuk hingrneft myafhoni duha.

Yimam hnayuk mrokfom nhai tu gutnius kfiwa yuhatn kfo hikkahmt, Timotir nd yimampno brbo yi juha. Ndhtet yimam kfo pthayuk mrokfom toh wany yakitohneft toh nmbuham nhai yi marnyakahm. Timotir Porrhu tohefm dukak hanyhato rorhu tohefm toh hikkfot. Bro Nkifrarhu hikneft, yo noh hmbre yima yuhurpno rhuhato wommpno nayak marnyahato rpat tohneft, yo tamoh krhopam yimam hayukm tohhato nd krhopam titanef, tom Porr tohmo tohefm. Nd nefmn Timotir yak hikkfot.

**Timotir tu mfro hingrna bbuka hanyhato tu Bro Nkifrarhu
hingrna yima mifr tohkfot**

(Sapta 1-4)

¹ Na Pora, na Krais Jisasrhu aposer hingrneft yakitohwa yimaya. Tu Bro Nkifrarhu dukef yuhatn nd aposer hingrneft tohwoyantr Kraisrpno frtkafet yimam yekwa rhu nmbuhat tu Bro Nkifrar kfo htamot, nann kfo nuhas htfaswanm.

² Timoti, ni tu nanhu yon mifnn ndar gontwat wandfiwann. Bro Nkifrar, nmoh Yifemr yo Krais Jisasr, nmoh Nungothetr, ayuhuwaftwarn yo ninhu rhu nmbuhat ayak marnya bomarnya-kahtrt yima yuhur mirhurahrn.

Gutniuskfothu kfo pthaneft yimtna hany juha

³ Nanhu nkifram Bro Nkifrarhu hingrneft yakitohmoahat, tu wutha yima yuhumpno Bro Nkifrarhu hingr-neft fakitohmoumt. Na ndar aposer hingrneft yakitohwohat na tuka yima yuhur kak nhtewanr na nhai wom tamoh nefm o yima yuhu bebm rhukahma na ndar hingrneft yakitoh-wohat. Yiha yiha yifung marm na kfo bruttnaneft na nhai yak trohnkahann ninhu yufat yutanef Bro Nkifrar kfo yindhorwanr. ⁴ Ninhu nur nytingar yohnemor yuhre duka hanitanr. Kanga ni tohwa kmit aniekahann tuno nahtikahnnon nanhu yima yuhur yindhorrahra. ⁵ Na tuka htitann ni Bro Nkifrarhu mrokfom hikwa hikeft to bi tunhu bapem Loisi tunhu mmem Yunis Bro Nkifrar yakitohhato hikmoa kanjo bi inji Bro Nkifrar yakitohhato hikwonr. ⁶ Bro Nkifrar inji yakitoh-hato hikwatnr na wom mrokfot kfiwann. Nd na tir htamo yiha Bro Nkifrar hemo mrokfo rifhur ayuwa muhtwar, mirahr nd mrokfo rifhur amitoh witanir. ⁷ Nd Yafothat Bro Nkifrar yahukat nhai wom tamoh nefm mhtihato tfit mongthur mongthur hanykahtnom. Nhai. Nd Yafothatn tpi hiyaf hanittnom. Nd Yafothatn yima yuhum kahuktnom wommpno nayak marnyahato rpat tohneft. Yo nd Yafothatn nmoh toh nmbuham kak hta marnyaf hanittm.

⁸ Ndnett ni mirahn ayimtna hanya Bro Nungothetrhu mrokfothu kfo pthaneft. Na rorhu hingrna yimaya kalabus tohwohat, ni mirahn nann amhtiyakkahann ayimtnak hanya. Nhai. To ni inji yimtnaruhann to nane frohmn tohhato nd gutniuskfothu krhopam titanhorhoma? Ninhu tpim Bro Nkifrar thu habokknamohat to nd krhoparoh titaneftn tpim thu habokknamorn. ⁹ Bro Nkifrar buha mitoh rafohato nom tfit yakhato rorhu yufatn tfit fak htamornom. Bro Nkifrar nom tfit yakhato rorhu yufatn tfit yak htamohat, to mirahko ka nom nayuk dborior nmbuham htihato inji namor. Nhai. Ror be turhu hti yuhuwaf nmbuhatn inji yakmornom tfit turpno rim fak htamornom. Ndar

bbinysoft tafi trha duha nd nmoh yakyuk yihotat bi Krais Jisasrpno fak dbkafmort. Memor rorn yihotat yak nukakhirahrm. ¹⁰ Nd mrokfot bi ruhettn nom hel yita yihotako bi tohetnom rorn yihato tfit yakkornom tfit toh nkifraniyuk kmiko yita yihotako hta bugamornom. Nd hel yita yihotat fak thumort. Nd gutnius mrokfom kfiwam, to nd Jisass nohhato hel yita yihotar yak thuhato toh yifahtaniyuk yihotako hta bugamo yuhathu kfo nuhas mrokfoym.

¹¹ Bro Nkifrar nann aposer hingrneft fak htamor. Nann nd aposer hingrneft tohhato gutnius mrokfot kfo hta nuhas bonuhas htfaswanm. ¹² Na inji namota fakmoma. Yakhato kalabus htamoma. Afo yuhre kalabus tohwa. To na nhai yimtna inji nakaha na kalabus tohwohat. Nhai. Jisarsru nefm bi htietann to be na Jisass riyakito hkmohat to be inji yakitoh hanyruhanr. Na be rorhu tirmn rhuhany rhuhanye ror yawihnerahr.

¹³ Kfo yirmoh mrokforoh kfo nuhas yuham bi kfo hta nuhasmoyann. Nd yuhatt wahiktwa. Ninhu toheft Kraisrpno frtkafhato tohkfot. Ninhu toheft inji tohhato tuhan yindarim yak marnya bomarnyahato rpat tohkfot. ¹⁴ Nd gutnius hingrneft ninhu tirt htamot tu dborioh hingrneft. Wayakito marnyatwant. Nom hatohwa Bro Nkifrarhu Yafothatt hti yukatohaf hanyrahtt nd ni yakitohwa hingrneft.

¹⁵ Bi wanyakmo, Asia profinskorhof yimam bi mong trohmoma. Figelus Hermogenes yima husf bi rpat mong trohmoma.

¹⁶ Onesiforus riphar Bro Nkifarpno kfo bruttnewanm. Kanga Bro Nkifrar akfo bruttnakohtanr hti yuhuwafrahrm. Nd yima Onesiforusrn yiha yiha hifa yima yuhur hnamourr na kalabus tohmohat. Ror kfo pthamo mrokfom wanymoahat yima yuhur thu jubtwa marnyamoura. Na sene dbkaf htateta rhumoahat nhai yau yimtna hnarmoar nanpno nia pthaneft. ¹⁷ Ror Romr mfnahmohat, rorhu dukeft nanpno ruhettn be nann ttwon hambrakna twanhomor. Hambrohna hambrohna, mhtimora. ¹⁸ O, Bro Nkifraye, Onesiforus wayuhuwaftwanr bro kotkfot tohruha yihar. Ni Timoti bi htiette Onesiforus na Efesus tohhato ror na yak marnyamoa nmbuhat. Ror inji yak marnyamoatra ndnetann inji kfo bruttnewanr Bro Nkifarpno.

2

Timotir Kraisrpno rim tohni bugahato rorhu mrokforpam hikkfot

¹ Nanhу yon Timotiye, ninhu toh nmbuhat tohruhant, be Kraisrpno rim tohni bugahato rorpno frtkafhato tohkfot. Mirahn ginyetm kanjo ayesisa. Kraisr Jisasrpno frtkafhato tohkahtn Bro Nkifrar toh natwihrahn. ² Bok tuhan yindariroh nyina riarpno kfo yirmoh mrokfom kfo yirmoh nuhas bonuhasmoyann. Nd kfo yirmoh mrokfom wakfo nuhashitwanm Bro Nkifrarhu mrokfom yakitoh kihet yimam. Rom wakfo nuhaskahtnm tfit romn myaknihato womm kfo nuhas hi hanyrahmm.

³ Ni tu Krais Jisarsru ami watoh-kahnn ndar hingrneftu krhopam na titiwam watohkahnn watitanhotwona. ⁴ Yimam soldia tohneft nhai rom tfit yima furaroh nefm rom tfit fknehato tohnkokfot. Nhai. Kangm nd tu soldia-roh bro yimar ahti yindhorronom, nd soldia hingrnefrpat kakitohwom. ⁵ Yimar kangr tone resishato praiskfot ayaka, nd yimar nd tone resisyuk kfo hayuk kfo hta mrokfom wanyhato yak hikkfot. Nhai hikkahrm, be nhai winhato praiskfot yakruhatr. ⁶ Fitoh yimar msbir htaneft yikiat hatohwor, tor nd yimarn barkof yakyuk yewurit kekwort. ⁷ Nd na kfo hne mrokfom wamduka hik marnyak hanyswanm. Myak mumekwonme, nmoh Nungothet Kraisr yima yuhum hiruhatr mro-kforoh mna yuham yakrahnm.

⁸ Duka hanykfot Jisass Kraisr. Nd na kfo pthiwa gutniuskfot kfo kangt, nd yima Jisarsru nia yuhat, Defit frikef yuhatt niamor. Yopt bi ruhetr tfit Bro Nkifrarh kasinyamorr.

⁹ Nd yimarhu gutnius mrokfom kfo ptha htfasmoata, yihotam yau htfaswa yima bebm kanjo htihato fakmoma. Yakhato kalabusn htamoma. To yimayann yakmoma kalabus htamoma. Bro Nkifrarhu mrokfot rot nhai yimam kalabusintakfot. ¹⁰ Nanhу bro dukeft nd Bro Nkifrarhu yufatpno bi ruhet yimam dukahato ndnetann nd yonmar yonmar krhopam na yekwam nhai wohsiskahanm. Nanhу dukeft duka kanga nd Bro Nkifrar ayak

bugarm. Yak bugahato bi hifa tkitt bi fekm, be nhai mrokfom, be nd hifa tkittn be rhu nkifranirahm. Ndnetann rroh duka nmbuhattn krhopam kekwa.

¹¹ Nom bi Kraisrpono anohkahnomn,
to be tfit rorpno tohrahnom.

¹² Krhopam yakhato tohrahnom,
to be ror king toh thoft nom king hingrneft yakitohnho-rahnomr.

Nom mong trohrahnomr,
to be ror tu mong trohrhrnom.

¹³ Nom kfoyuk tng yuhat nhai hikrfonomt,
ror nhai inji naruhatr. Ror tur kfoyuk tng yuhatn hikrahr.

Nom mikfota mkfotarfonom.

Ror nhai mikfota mkfotakfot.

Nd mrokfot tu kfo mif mif mrokfoyet.

Bro Nkifrar hti yindhorwa hingrneneft Timotir hingrnakfot

¹⁴ Yiha yiha Kristenm nd mrokfom wahe juka hanywanm. Mirahn ahti marsisayanm. Mrokfom he juka hanyetmn duka hanyrahmm. Mrokfom hanyeft kfo mekfot, “Na Bro Nkifrar kukatohwora. Na rorhu nyngampno kfiwanko. Mirahko nd nkifra kfo yirmoh mrokfefenmpnon o nkifra yufa yuampno nakfo hamuh nakfo hamuhnom. Ndhtet tefi mrokfefenm-pno nakfo hamuh nakfo hamuhnefm womm nhai hifa yima yuhum yakkahm. Womm tfit manysifm kanjo mkkitm.”

¹⁵ Tu hingrna yimam kanjo hingrneft hingrnahato Bro Nkifrar hti yindhor-rahrn. Hingrnneft hingrna marnyaruhatn be nhai yimtnaruhatn rorhu nyngam-pno ¹⁶ Tamoh tamoh mrokfom yimam kfo pthayukm afo wany nhtakfot. Nhai tu Bro Nkifrarhu dukef yuhatn mrokfom kfo ptha hikkahmm, ni mirahn ndhtet yimampno brbo aiya. Rroh mrokfom mwany wofnnirahn to be tfit fasoh nefm fknirahn. ¹⁷ Rroh mrokfom hunt kfe rhot hik hanita kanjo inji kitm. Himeneus Filetusrof, tof nd yimaf ndhtet mrokfom kfo pthewaf. ¹⁸ Nd yimaf Bro Nkifrarhu tu yafothet mrokfot bi fahonimoft. Yimam kfo kangfm, noheh yimaroh sinya yihar bi yimor. Arihat nohyuk yimam nhai tfit sinyaruhatm. Inji kfiwatfm nd Krais Jisasrhu hik yima yuhur, nhai mfro bi sinyakahmm. Womm bi tfit kashoni hanitmr.

¹⁹ To sioskfothu hatohyuk dany rahur Bro Nkifrar bi kasinyamorr. Nd dany rahur nhai ninor ba inji nakahr. Kangm ka be tuha ftohr. Nd rahurn wandfamo mrokfom inji kfiwum. “Bro Nungothetr bi hti nhtewurm rorhu yufatpno rhuyuk yimam.” Yo, “Fitoh yimam kfo kangm, nom rorhu yufatn korhnom, nd yimaroh tamoh tamoh nefenm mong trohkfot.”

²⁰ Wom bro kunyrrn korhm roh bikm. Wom rohm gorkfoti silvakfoye hingrnayetem. Womm be mi nmbuha furaye yo dif kranyjipaye hingrnayetem. Nd yak marnya bo-marnyayet rohm, rom bro yiharpami bro yufet yimarpam-pno yakhato hta mskayukem. Ndwom roh furam rom be yiha yiha hta mskayukem. ²¹ Bro Nkifrar Kristenm yak nhtiwa yuhat to inji kitt. Fitoh yimam, fasoh nefm mong trohhato Bro Nkifrar hikwam, nd yimam afo kak htefiwurm. Turhu yufat rhuhato turhu hingrnefroh hingrna hayukem.

²² Ndnett ni Timotin, ni damiag yimam hatohwa yima yuhu sinyaneft, yo womroh tamohroh hti yuhur hanyeft, nd nd nefm yakitoh duha. Yafho thuhato afo tfit dborioroh toh nmbuham, yo Bro Nkifrarhu yakitoh kihneft, yo wommpno rpat tohhato nayak marnyanefm, afo tfit nd nd nefmn tfit yakitohwontwa. Nini yo Bro Nkifrar hti wuthahato ror lotuta yimam, niko buga afo nd na kfiwa nefm yakitoh bugawontwakomm. ²³ Mirahn fipa duha fipa duha mrokfom atohkahann awany yakitohanm. Ndhtet mrokfom yima dukef duha yimamn hatone htfaswomm. Ndhtet mrokfom yimam toh wanyneft yima yuhum tfit kahm kanjo wakur sinya-hato nakfo wok nakfo wokhato nahuttwom. ²⁴ Ni tu dukaf hanykfot. Ni mirahn wom yimampno nnakfo hamuh nnakfo hamuhnom. Ni dborioroh yima yuhur yak nuhaskfot. Ninn Bro Nkifrarhu mrokfom miyaknihato kfo nuhas

bonuhaskfot. Bro Nkifrarhu mrokfom kfo nuhas hi hanyhato womm hanyjbornewumm, o hamuh tfa thuwomm to ni mirahn anambura. ²⁵ Ninn tfit nd mrokfo hanyjbornet yimam yakhato kfo yima boyima marnyakfot. Ni inji narahnm, ka Bro Nkifrar rroh yima yuhum yak kekut-rahrm. Yima yuhum yak kekutruhamn Bro Nkifrarhu tu yafothet mrokfot nd yiha hti dukarahmt. ²⁶ Afo Satanr yakmormn rorn uhatone ahato-nemoatrm nd dborioh duka yima yuhur afo frfnahnimor. Yima yuhum yak kekuthato ee ndnatn nyingam yoh dborharuhatmm Bro Nkifrarhu mrokfot hti hikruhamtn tfit dborioh yima yuhum nierahmm.

3

Wuroh yihar, fasoh fasoh nefm mfrfnah bugarahm

¹ Ni Timoti, wuroh yiha rhuruha fasoh fasoh nefm bi wawany htatanm. Wuroh yihar brbo rhu hanyrahr htirahn, ² yimam turpatm htitahato yemrot, wuss, o tamoh tamoht yakrahmt. Nhai wom frohm hti dukaruhatmm. Maruti wusshu yak dukefr mfro tohrahrm. Nd dukefm mfro tohruhatmm, maruti wuss hmarsi yakt hmarsi yakt yakrahmt. Yimam kmi danym yihom het grhak mhet grhakhato womm faso faso kfo rindho borindho thurahmm. Yonm nhai tfit wom yifammaroh dohr wom kmbri-ruhatm. Mrokfo hanyjbornanefr brorahtm yonm. Nhai kfo yindhore hakuruhatmm. Bro Nkifrarhu dborioh nefm hti kur tanyhato tfit ndar bbiny-softhu nefm tfit hikrahm. ³ Najohfi mndarehfi toht, nhai tum niyak marnya-hato rpat toh hakuruhatm. Wommpno nnakfonefm o finji nanefm, nhai tfit yi rhuhato nd hutteft o tamoh neft nnakfo dbruf nuhas inji naruhatmm. Nhai. Womroh mrokfom tfit wommn rroh mrokfom kanjo myakni haku-ruhamm rom kuny kuny rim harhuta mharhuta hakurahmm. Tamoh tamoh mrokfompno yima yuhum be kahm kanjo bmbri wakur sinyak hakurahmm. Womm baryutham nhombra hakurahm. Dborioh nefm nayet yimam womm be hti srthu hakurahmm. ⁴ Tum yima-tehfim nahndhna nahndhna hakurahm. Tamoh tamoh nefm nhai wom toh dukaruhatm. Mirahm tamoh nefm ananom, be nafurakni hakurahmm. Yufa yura htaneft, turoh yufam be yura yura hta hakurahmm. Bro Nkifrar htirahmr nnarihat kanjo. Tfit ndar bbinysofthu nefmn mwofnni hakurahm. ⁵ Ndar nom hikwa Bro Nkifrarhu mro-kfot, tngrpaye frnheh hakurahmt. Yima yuhum rom nndo rhu hakurahmm. Ndhtet ndhtet nefm nayet yimam ni Timoti htitanm, ni mirahn brbo yihato kfo hta mrokfom ahiyanm.

⁶ Wom metm turoh kunym rhuhato tum nayuk fasoh nefroh krho yima rifhumpno rhuhato tafi dborioh yima yuhu yak duha rhu hasetm, rom vitamn rroh mrokfom rim kfo brur bobrur nhehwatmm, to be rroh dohrn mikmbre twanhonitm. ⁷ Ndhtet metm be womroh nfri nfri mrokfom mhik furaknitam, be nhai yakkfot Bro Nkifrarhu tu yafothet mrokfot. ⁸ Bingot Janes Jambresrof to inji namofm Mosesr kfoyuk mrokfom. Rof buha mtuhhato tfit rofn kfo wok bawokmofm. Nd giaman tisam to inji newumt Bro Nkifrarhu tu yafothet mrokfot. Nd yimam nhai tu dborioh yima yuhur rhukahrm. Fasoh yima yuhu bebrpno yorhwamn nhai Bro Nkifrarhu tu yafothet mrokfot yakitohkahmt.* ⁹ Yimam afo mhikaknirahmm nd giaman tisam. Kto nd rroh mmo nmbuhat mhti dukaruhamtn myafho-nirahmm. Janes Jambresrof mhti dukahato myafhonimo kanjo inji mhti dukahato yafhorahmm.

Timotir Bro Nkifrarhu mrokfot yakitoh kikhfot

¹⁰⁻¹¹ To ni Timotin, ni bi nanopno toh hnehatu na kfo hta nuhas yuk mrokfom bi fakmonm. Nanhu yau nmbuham, yo nanhu riduka aduka yima yuhur bi fakmonr. Yo Bro Nkifrar hikhato rorpno frtkafhato wom Kristenmpno rpat tohhato nayak marnyamoahat, ndm hti bugamonm. Na Antiok, Aikoniam, Listra nd nd kmim toh hnehatu yimam yak beb-moahat htimona. Yo nd na titamo yonmari yonmari krhopam

* 3:8: Nd Janes Jambresrof, Judam kfo tndh memoum, Mosesr tohmo yiha to nd hus yimafn Ijifthu kingru kiret nyinget yimaf tohmf. For bi sngm to rofn harhumoufm.

ni hti buga bobugamonm. To finji htimona? Yakrmehato hingrneft mfak htani-moyant? Nhai. Na tohhato mrokfot kfo pthamoant. Nd yimam hemoa krhopam, tu Bro Nkifrar toh rafohato fak thumourm. ¹² Yimam Jisasrpno frtkafhato Bro Nkifrarhu nefm hikneft, yak bebyuk yimam nierahm. Ndt tu kfo mif kfoyet. ¹³ Barkofpam nd yima bebmi giaman tisam afo Satanrn frnhehefiwatrm fasoh yuhat kitm. Tfit rom nd fasoh yihotat tohtahato womm riteh nhirekwomm.

¹⁴ To ni Timotin, ni nd Bro Nkifra-rhu yafothet mrokfot kfo hta nuhas bonuhasmo yimanom bi htimonnom. Nom tamohtet yimanomn o metnomn kfo hta mrokfom hemonom, bi htimonnom. Nd nom kfo hta nuhasmo mrokfo yuhatn watoh hiktwa. ¹⁵ Ni bi wanurtanihato bi yau tone fnahetnn kfo yirmoh mrokfom bi rihiyakmomn. Nd kfo yirmoh mrokfom dukefm hiyaf hanyruhatmn Krais Jisasr hikrahnr. Krais Jisasr hikruhann Bro Nkifrar yakrahrn. ¹⁶ Nd Bro Nkifrarhu mrokfot tu Bro Nkifrarhu Yafothat kfomot, nd mrokfot mfnahmot. Nd mfnahmo mrokfot nhai be mfnah furarmot. Nhai. Nd mrokfom Bro Nkifrarhu hik yuharoh kfo hta nuhasaf hanyuk mrokfoym, yo wiyauyau nmbuham faso faso rine wunyeneft, nd mrokfotn tfit yak hta marnyarahtnom. Yo dborioroh toh yuham nd mro-kfotn yak nuhasrahtnom. ¹⁷ Ndnett nom, Bro Nkifrapno tohwa yimanom, nd mrokfotn toh marnya yuham yak nuhaswattnom toh marnyewanomn Bro Nkifrar hti yindhorwa nefm kakitoh marnyewunomm.

4

Timotir kfo pthakfot Bro Nkifrarhu mrokfot

¹ Krais Jisasr yawihneruharn king tohhato ndar bbinys of thofm yakitohrahram. Nd nettn Bro Nkifrari noheh yimami yima nfri nyinget yimaroh kotkfat yakitohruha yima Krais Jisasr, nd hus yimafhu nyngam-pno na kfo mifwann. ² Bro Nkifrarhu mrokfot wakfo ptha hanywant. Dborioroh yihar o yiha bebr, mrokfot kfo pthakfot. Yimam tamoh nefm newum kfo nyina fnahnihato tfit hifa yima yuhurpno tfit kfo yirmoh mrokfom hekfot. ³ Kto, nd Kristenroh toh yuharoh kfo yirmoh mrokfom nhai wom tfit wanyruhatmm. Myafhonirahmm. Rroh yimbhindangm tfit tohetohrahmm mrokfo fura bofuraro wany yikitoh-neftn. Nd mrokforoh wanyneftpno, ndhtet mrokfom haruhet tisam yak bugarahmt. Yak bugahato rom pthayuk mrokfom rroh yimbhindangm tohetohrahmm mrokfo wanyneft. ⁴ Nd Bro Nkifrarhu tu yafothet mrokfot myafhonirahmt. Myafhonihato tfit nd rom wanyuk nkifra tndh mrokfo yuhamm hikrahm. ⁵ To ni Timotin, tu dborioroh duka yima yuhurpno tohhato ninhu toh nmbuham yak hta bohta marnyahato tohkfat. Tamoh tamoh krhopam niewum ni tohhato titakfot. Hingrneft yafho thu duha. Hingrna yikitoh hanykfot. Ni tu Bro Nkifrarhu hingrna yima mifn tohhato nd Bro Nkifrarhu gutniuskfot kfo pthakfot.

Porr wuroh noh yibonneftpno dkfomo mrokfom

⁶ Nane nhai wom tohrhota. Na bi noh yibonwa. Nanhu kkut yohniraht Bro Nkifrar wain bupam ofakfot yahuka kanjo. Asot bi nanhu tfkhathu htanyhato yinyeft. ⁷ Nd na tonemo resiskfot bi tone hnamoyantn bi makkfot myakmoyantn bi nanhu rim rhu wita yihayer. Bro Nkifrarhu duka yima yuhurpar toh hnayo. Nhai marimoya finji naruha. ⁸ Nanhu yima rifhur nhai wom wusswenetr htikahrr Bro Nkifrar. Be hti wuthewurr. Be praiskfothu yaknefrpayet bi. Yimam resishato praiskfot yekwa kanjo nmoh Nungothet Jisasr nd praiskfot hirahra. Turn kot yikitohruha yiha nd praiskfot hirahra. To nhaf nhai be nanrpaya nd praiskfot yakrhota. Nhai. Jisarsru nia yihar rhu garihato rhu duka darwon hasiwa yimampno rpat nd praiskfot yak hanyrahnom.

Porr kfo hta mrokfom hemorr Timotir

⁹ Wom fitoh yihotamn afo bmbri nanpno wanietwa. ¹⁰ Demasr bi frtrohmora. Nd bbinys of thofm dukefr yakmotrr taun Tesalonaikako bi yimor. Kresensr, ror bi Galesia profinsko bi yimor. Taitusr, ror nhaf Dalmesia distrikko bi yimor. ¹¹ Lukrpar asha

nanpno tohwor. Ndnettn ni nianeft, Makr wayaknetwa. Nanhu hingrnefm rorn kakitohnho hakutra. ¹² Tikikusr ror bi kfo tkrurafmotanr Efesusko yimor.

¹³ Yo ni niewane, taun Troasn nanhu yuke sakethat Karpusrhu kunysn htanymoyant. Htikahnt wayaknahitwona. Yo bukm rpat wayaknetwanm. Nd sifsif thaye hingrnet bukm mirahn ammo mifa yaknaneft. Nd bukmn bro dukeft arhutwat.

¹⁴ Brase hingrnewa wuskam hingrnewa yima Aleksander, wom fasoh neft namotra nanhu yima yuhur nhai marnyakahra. Nhai mrokfom. Ror namo neft kto Nungothet Jisasr htirahrr. ¹⁵ Timoti, ni mirahn nd yimar ka wonfoher. Nom pthiwa mrokfom to fitoh fitoh yimann kfo wok bawokwamm? To nd yima yimam.

¹⁶ Na tohwonmo barkof kotkfot nhai wom fitoh yimar nanhu kotkfot tohnormora. Fakrme troh bugamoma. Bro Nkifrar kanga mirahr nd yimam finji anayanm. ¹⁷ Jisas Kraisrn toh tkafmora na nd kotkfot tohmohat. Rorn bbuka rifhur hnamourr. Nd bbuka rifhur hiyaf hanymoatra na tohhato Bro Nkifrarhu mrokfot kfo pthamoyant. Kfo pthamotant nd Romr tohyuk yima tangim wanymomt. Ka Jisas Kraisr atoh tkaf duha yira, ka bi laionroh yatimn yihom kfe bdgrmoya. ¹⁸ Jisasr Kraisr na inji toh tkafmo kanjo na tamoh krhopam yakneft, na toh raforahra. Na be rorhu tirmn rhu hanyhato be tfit ror tohukatohwa kmi hefenr rihawitarahra. Ndnetnomn nom be rorhu yufarpat yiha yiha kfo yuta yindhor nohnifikfot. To be inji.

¹⁹ Nanhu kfo yindhorkfot Prisila Akwila sawohfi yo Onesiforusrh yon tuhanm, rompno wakfohitwona. ²⁰ Erastusr yuhre taun Korinko afo tohwor. Trofimusre dbohnetrn taun Miletus htanymoyanr. ²¹ Bmbri wom fitoh yuhamn bi wanietwa bi ndar yihamn. Awi knga hatohrahn to finji nieruhanm bro gonng wormrpno sinyayuk wifor bum? Yubulusr, Pundensr, Linusr, Klodiat, yo asha tohwa wom Kristenm niko dukahato kfo yindhorkfot htefiwumt nikompno.

²² Bro Nkifrar atoh natwihtwart ninhu yafothat yo rorhu yuhuwaeft be ninn arhu hanyswat.

**Taitusrhu gontwat
Porr dwandfakhato htafmot
Barkof kfo nuhas mrokfom**

Taitusr mirahko ka tu Judayer. Nhai. Ror nndo wom yima tangi shof furar Jisasr rihikakhato rorn Porrhu aposer hingrneft kakitohnhomourr. Porrpno aposer hingrneft rpat hingrna hanymofn marombt yorhwa wom kmi yumbt, kutewumt Krit, ka ndha htanimotrr ndha toh hasomor. Taitusr ndha toh hasohato ndharhof sios hingrneft rorn fakitoh hasomort.

Ndar gontwathu barkof mrokfom Porr dwandfamom, ndharhof sioshu tohak yimaroh nefm kfo nuhasmorr Taitusr. Kfo memor, Kritroh nefm mirahn ka be dboriohem. Ndnettun ndharhof yimam sioshu tohak yimam yak htaneft, afo yukatoh marnyahato, bi tu dborioh nefmn bi kakitoh trpaknitwome ee btn sioshu tohak yimam htakfot. Nd tohak yimaroh nefm inji kfo pthanimorn ee tfit tabou bugayet metm yindarim yo damiag yimam yo slefm, ndhtet ndhtet yimaroh mrokfom kfo nuhasmorr.

Wuroh mrokfomne tuhan yindariroh toh yuham kfomorr. Kfo memor, tuhan yindarim mrokfom hekfot. Tum nayak marnyahato rpat toh marnyakfot. Mirahm tum nakfo hutt nakfo nna inji ananom. Ndm wuroh mrokfom Porr ndar gontwat htamorm.

**Krit tohwa Kristenm Taitusr tohhato kfo bmta mrokfom hekfot
yo rroh nefm yak susnakfot**

(Sapta 1-3)

¹ Na Pora, nann ndar gontwat wandfiwann ni Taitusn. Na Bro Nkifrar kfo htamo hingrna yimaya. Nann hingrnahukanr Jisas Kraisrhu aposer hingrneft. Bro Nkifrar nann yakhato kfo tkrurafmor tur bi yak htamo yimampno yihato kfo nuhas marnya bomarnyakfot tu Jisas Kraisrhu mrokfothu hik yuhat. ² Rom wany hik marnyahato Bro Nkifrar yakinoh kihruhamn, toh gari yukatoh hasorahm Bro Nkifrar hiruha dborioh rhu nmbuhathu yak yihar. Bingot Bro Nkifrar tafi ndar bbinysoft hingrna duha, nd dborioh rhu nmbuhathu yakneft bi kfo htamort. Bro Nkifrar nhai kfo furakahr. Nd mrokfot kfo mifmort. ³ Nd mrokfot rhumoat, kto tur duka htayuk yiharn nd mrokfot mfrpskenamot. Wom yimam kasinya-motrm romn nd mrokfot kfo ptha ntremotmt kmi kmi wanymomt. Bro Nkifrar, nom nrfa hhakyuk yimar kfo tkrurafmor, rorn na yakhato rorhu mrofket nanhu tirtn htamort. Nann kfo ptha htfaswant.

⁴ Taituse, Bro Nkifrarhu mrokfot no hikwa yuhatni nanhu yone. Bro Nkifrar, nmoh Yifemr, yo Jisas Kraisr, nom nrfa hhakmo yimar, rofn ninhu rhu nmbuhat ayak marnyahikahtfn ninhu yima yuhur mirhurahrn.

Elda hingrneft yakinoh yimam

⁵ Ni Krit na toh troh tanymohat, memoya, "Ninn afo ndha tohhato, ndharhof sios hingrneft yak hta bohta marnyarahnm. Ndharhof hingrneft nhai yi marnyakahm. Ninn yak hta marnyakahnm, ee eldam wahta hanywanm sioskfat ruhet taunm." Na kfomo mrokfo yuhat wahiktwa. ⁶ Wom yimar elda hingrneft yak htaruhanre, mrokfo hatoh hna duha yimar yo rpa tuhanet yimar yo rorhu yonm Bro Nkifrar hikhato nhai yifammaroh mrokfom mhanyjbornani-hato turoh fijo yau htfaskahm, tor nd yimarn nd hingrneft yak htakfot. ⁷ Yimar, elda hingrneft yakyukr, nhai wom mrokfom ror hatohkfat. Yo nhai be rorrparn, yimam wanyhato hikkfot. Yo nhai kahm kanjo tamoh mrokfom be wata tngarakkfot. Yo nhai nd yimar bupam ye mmokfot, o nambur fura bofurakfot o be mfro maru dukefr rhuhato marut hmarsi yakt yakkfot. ⁸ Nd yimar tu dborioh yimar tohkfat. Yo nd yimar wommpno ptha wifor bowiforkfot yo yima he wifor bowiforkfot. Nd yimar dborioh duka tungunefmpno wiayaukfat yo hifa rhu marnyakfot. Yo Bro Nkifrarhu ruheft kanjo nd yimar rhukfot ⁹ Nd yimar ndar nom

pthiwa Jisas Kraisrhu yafothet mrokfot ror yakitoh kihkfot. Ror nd mrokfot yakitohhato sioshu kfo yirmoh mrokfom rorn womm kfo ptha nuhaskfot. Yimam sioshu kfo yirmoh mrokfom yak wuna bowuna-neft, rorn tohhato kfo ptha yibnarkfot.

Krithu Kristenroh toheft

¹⁰ Tu dboriorh yimamn Krithu siosroh elda hingrnefm yak hanykfot. Ndt nhai be sfno inji kfokaha. Na htitan wom Kristenm nhai tu Bro Nkifrarhu mrokfot kfiwa yuhat hikkahm. Rom tfit kfo kekuthato rroh yafotha duha yafotha duha mrokfom kfo pthiwatmm Krit thofm tfit rroh yuhatn hikwom. To nhai wom frohmn ndhtet nefm nakahm. To nd tuha Krit tohwa Juda Kristenm, tu nkifra tha pukeft yakitohwa kmim, romn nd nefm newum. ¹¹ Ndnett nini, yo nd yak hta hanyuk nfri eldam, niko rpatorhhato nd Juda Kristenm kfo rafokfot. Rom nhai mrokfom tfit uhiyau hiyaukfot. Romn Krithu Kristenm fasoh fipa duha fipa duha mrokfom yahukatmm Bro Nkifrarhu mrokfot nhai mhikakni marnyakahmt. Rom nd neft niwohat be yuwi maruha dukefrn yuwi kangm, "Inji ahingrnakahtnom maruham hirahnm." ¹² Bingot tuha Krit tohyuk profetr kfo ptha memor, "Krit thofm tu mfro kfo fura bofura hanyetem. Nunga bndhorm kanjo nambur fura bofurayetem. Yemrot mfro mfro yewamn yonmari marm hwe fura bofura hasiwum." ¹³ Ndt tu kfo mif kfoyet. Ndnett ni mirahn nyngarpaye ayukatohanm. Tohhato wakfokahtnm nd Judam yakitohwa tndh furam ayafhotwamm. Yafho-kahmm tfit tu Bro Nkifrarhu mrokfot kfiwa yuhat hikrahm. ¹⁴ Kristenm mirahm nd Judaroh tndh fura bofura ahiknom, yo Bro Nkifrar mong trohet yimaroh kfo yirmoh mrokfom ahik-nom. Ayafho miftwamm.

¹⁵ Yimam Bro Nkifrapno bi rim tohniyetm, rroh yima yuhum bi wutham tamoh tamoh hnaru yeshrim be ke fura bofurewumm. Yimam fasoh fasoh nefm tohhato tafi Bro Nkifrapno rim tohnihato Kraisr rroh yima yuhum yak wus bowus duham, nd yimam kakrmitm tamoh tamoh yeshrim ye fura bofuraneft. Yo tamoh tamoh nefm nhai mhtiyak hany mikahm art fasoh nefet o art dboriorh nefet. Nhai inji mhtiyak hanykahm. Tamoh tamoh nefm rom be na fura bofurewum. Nhai yimtna hanykahm. ¹⁶ Ndhtet yimam tngrpam kfiwum Bro Nkifrarhu hikneft. To tfit rom niwa fasoh fasoh nefm Bro Nkifrar hik duha yimaroh nefm newum. Ndt tu be fasoh neft newum. Rom inji newohat Bro Nkifrar nhai hti yindhorkahrm. Ndm tu be mfro hanyjbornayet yimayem. Ndnett ndhtet yimam nhai wom dboriorh nefm nakahm.

2

Bi tabou bugayet yimam, Bro Nkifrarhu yima yuhur hikkfot

¹ To ni, ni met yindarim sioshu tu kfo yirmoh mrokfom wahi-twanm. Tamoh tamoh nefm naneft, tu Bro Nkifrarhu mrokfot kfiwa mrokfo yuhatn tamoh nefm nakfot. ² Yo bro tabou bugayet yimam mrokfom wahitwanm. Rroh yima yuhumi rroh wiyaoyau nmbuham tu duka hik marnyahato dboriorh dukefmpno wiyauyaufot. Rom Bro Nkifrarhu tu yafothet mrokfot yakitohhato tohkfot. Yo wommpno nayak marnyahato rpatorhhato. Yo rom toh bmtahato krhopam titakfot.

³ Bro tabou bugayet metm rom nhaf mrokfom wahitwanm. Rroh rhu nmbuham nhaf Bro Nkifrarhu dukef yuhatn rhu hikkfot. Mirahm tihtrwom akekutnom. Mirahm yihof href wain bupam yehato akfo mmo hasonom. Rom rhu marnyahato Bro Nkifrar hiket met tmahm yakhato kfo yirmoh mrokfom hekfot. ⁴ Kfo yirmoh mro-kfom bi hayetmn kto rametm rhuhato yonetm rhuneft, ramemrom yuhur-hato yak marnyarahmm yo yonm inji buga. ⁵ Yo rroh rhu nmbuham dukefmpno rhu hik marnyaruhamn, rroh yima yuhum wutham rhurahmm. Wutha yima yuhumpno rhuhato rroh kuny kmifaroh hingrnefm yakitoh marnyarahmm. Tamoh tamoh mrokfom rroh ramemrom kfoykm, rom be wany yakiohato hikrahmm. Inji inji narahm, nhai wom yimam Bro Nkifrarhu mrokfot kfo bebruhatmt.

Tatusrn dboriorh dboriorh nefm nahato wom yima damiagm hikrahm

⁶ Damiag Kristenm nhaf inji. Kfo yirmoh mrokfom hihat rroh toh nmbuham dukefmpo toh hikrahm. ⁷ Ni, ni tu dborioh nefm nakfot. Wom damiag yimam ninhu toheft htiruharn toh hikrahm. Wom kfo yirmoh mro-kfom damiag Kristenm hiruhanme, tu hifa dborioh yima yuhumpno mro-kfom kfo hekfot. Mrokfom kfo ptha mmbrafiny duha. Mrokfom kfo ptha yembindtkfot. ⁸ Sios yakitohwa kfo yirmoh mrokfom kfo nuhas marnya bomarnyakfot. Inji kfo nuhas marnya bomarnyarahnm, be nhai mrokfom wany bebhato wom tng bebm turuhatm. Mirahm wom tng bebm atunom, tfit tum yimtnarahm.

Slefm hik marnyakfot turoh tohak yimaroh mrokfom

⁹ Kristen slefm mrokfom wahitwanm. Wom yimampno slefm tohwom, to be turoh tohak yimaroh yinhimn hingrna hafknikfot. Tohak yimaroh mrokfom kfo wok duha. Be hingrna hik marnyahato tohak yimam hifa hti yindhorrahmm. ¹⁰ Tamoh tamohm tohak yimam htewumm, yak rikohe duha. Tamoh tamohm rom htineft, tfit romn yak hta kars marnyahekfot. Rom inji hti yindhor-hato kto tamoh tamohm rroh tirmn htaneft, nhai duka hanyruhatm. Kristen slefm inji toh marnyanef, riruh aruhukm inji htiruharn kfo mirahm, nd nom tfit yakmiyakmo Nkifrarhu yirmoh mrokfot tu fipet mrokfoyt.

Bro Nkifrar kangr, tuhan yindarim ayakkahanm tukanpno yarim toh bugam

¹¹ Ndar bbinysoft tohyuk yimaroh tfit Bro Nkifrarpno niayuk yihotat tu Bro Nkifrarn tfit fak nukakmort. Tu Bro Nkifrarhu yuhuwaf nmbuhatn nd yihotat inji fak nukakmort. ¹² Bro Nkifrar yuhuwafhato tur hti bebwu nefroh myafho thuni yuham, yo ndar bbinysoftu fasoh riduka aduka yima yuhuroh yafho thu yuham kfo nuhas bonuhas-mornom. Nom ndar bbinysoft tohneft nom dukefmpno tohkfot. Tu Bro Nkifrar tohwa toheft toh hikkfot. ¹³ Nmoh rhu nmbuharn inji yak hta bohta marnya htatahato rhu yukatoh hasorahn, Jisas Kraisr tafont bro nuka nanyjareftpno yura moun yuhat hatoh hawihna thombat. Jisas Kraisr nom toh hbha rafomo bro hta nngrajohet Nkifrayer. ¹⁴ Bi Kraisrn nmoh fasoh fasoh nefm suh nanyor-morm. Bi rorn suh nanyormotr yima yuhum wuthanimom. Be bi tu Bro Nkifrarhu yon bugayenom. To be ariham be dborioh nefrpam nakfot.

¹⁵ Yiha yiha ni ndar mrokfot yakhato kfo pthahekfot. Wakfo ptha kasinyaakahtnm hikrahmt. Nd mrokfo hanyjbornet yimam kfo ptha nnhukahtnm yafho thurahmm rom yakitohwa nefm. Rihanyakrahnm, yahot dbohtarahmn.

3

Kritt tohyuk Kristenm dborioh dborioh nmbuham nakfot

¹⁻² Wakfotwanm Krit tohwa Kristenm. Bro tohak gafman yimam, gafman hingrnefm yakitohwam, Krit tohyuk Kristenm nd gafman yimaroh yinhimn tohhato rom kfoyuk mrokfom wany yakiohato hikkfot. Yo womt wakfotwanm. Kristenm mirahm womm faso faso akfo rindho borindho-nomm. Yo mirahm wommpno nakfo hutt nakfo nna inji ananom. Nyinga-tikm yifatoh marnyahato wommpno ptha wifor bowiforhato dborioh dborioh nefm nakfot.

³ Ni bi tunn bi htiyete. Nom tafi dborioh dukefm yak duha toh hnamo-hat, ndhet toheft toh hnamonomt. Satanr buha riyak nhirtamotrnom nhai tu Bro Nkifrarhu dukef yuhatn toh hikrmonom. Nhai. Nd tunmoh tamoh tamoh nefroh yima yuhu sinya fura bofuranefti yo womroh wuskar o tamohr hti yuhurhato duka marinyeft, nd nefmn brotamomnom. Wom yimampno nhai nayak nanymahato rpat tohrmoanom. Nhai. Tawo tawo nahti sr nahti srmounom.

⁴ Nom nrfa hbhakyuk yimar kfo tkrurafmo Bro Nkifrar, nmoh fasoh fasoh nefm hti hasohato nd yuhuwafeft tfit niamotr. Nd yuhuwafeft niamotr, ⁵ to be nd yuhuwafeftpno nom Bro Nkifrarpno tfit yihotetnom rhumonom. Nhai nom nayuk dborioh nefm htihato nd yihotat yak nukakrmort. Nhai. Ndt rot be turhu hti yuhuwaf nmbuhatn nd yihotat fak nukakmort. Nd nom hatoh hasoyuk fasoh nefm yonm asomif wanurtahato

yukwa kanjo, inji fuk marnya bomarnya-mornom. Inji yuk marnyanihato turhu Yafothat yakhato rithu hmbremor-nom. Nd Yafothat yiro yimanomn riyorhwatn nfri yima rifhur mfnah-newur. ⁶ Bro Nkifrar kfo tkurrafmo yima Jisas Kraisr, nom nrfa hbhakmo yimar, rorn kfomotr nd Yafothat yawihnehato mithu nawoh hany-motnom. ⁷ Bro Nkifrar be turhu hti yuhuwaf nmbuhatn Yafothat rithu hmbrehato nmoh yima yuhum fak wus bowusmornom. Yak wus bowushato wuthamom. Yima yuhum wuthamotm nd rhu nkifraniruha dborioh rhu nmbuhat, nom rhu gari hasiwat, yakrahnomt. ⁸ Nda mrokfom, kfo mifwanm. Nd mrokfomna kanga wakfo ptha brotwanm. Wakfo ptha brokahtnm, Bro Nkifrar yikitohet yimam wanyruhamn dborioh dborioh nefm hikhato rroh ruheft rhu marnya-rahm. ⁹ Wom yimam tum rhuhato nkifram toh hawihnamo yuharoh mrokfompno mrokfom nateh natehhato nakfo yiriti nakfo yiriti inji newum, o Mosesrhu boririfhutpno nakfo hamuh nakfo hamuhwom, ni mirahn rim tohhato awany yikitohanm. Yimam ndhtet mrokfom rhuhato wany yikitohneft nhai dborioh dukefm yakhato dborioh yima yuhum yuwa muhkahm. Nhai.

¹⁰ Yimam mrokfom inji nateh natehhato sioskfat kak nanyorwomt, hus kfo rafot mrokfot hekfot. Hus yiha kfotihato nhai yima mrokfo wanykahm, to be mrokfo kfo duha nd yimam miyafphonikfat. ¹¹ Yimam hti hikkfat, mrokfom nateh natehhato sioskfat kak nanyorwomt, nd yimam, fasoh fasoh nefm yorhwatmm, rroh nefm tafont korhm.

Porr dkfo pthamo wuroh kfo nuhas mrokfom

¹² Bro gongng wormr tohruha yihame nane ka Nikopolis yihato ndha tohruha. Ndha tohetann wamhiyiayfowona. Ninhu tkitt myak hasoyuk yimare kane Artemasrn o Tikikusr nierahr. Bi frohrn niahato tkitt myak hasiwurte, ni wom fitoh yihotam htita nd yuhamn wanietwa. ¹³ Apolosri thfa mntwat yikitohet yima Senasr kitwofe, yihotat yi hanyuk yeshriyenm o tamohm wahiyaf hanyswanf.*

¹⁴ Nmoh Kristenm Krit tohyukm, Kristenroh nefm womm yak nuhas-kfat. Rom yimaroh htihato wuska hanyeft, rom nd nefm bi riyakitohak-kfat. Nd yima he wiforneft bi yikitohetmn, tfit nd wuska duha yimam htineft nhai hti marsisaruhatmm. Wuskam tamohm be yakhato he fura bofurarahmm.

¹⁵ Nanhu mrokfom to be injirpa. Wurohme ndar nanopno nia tohwa yimam niko dukahato kfo yindhor mrokfom htefiwumm. Yo Jisasr hikhato nom dukewa yimamn nmoh wom kfo yindhor mrokfom wakfohitwako. Bro Nkifrar atohnhotwarko.

* ^{3:13:} Nd yima Senasr kotkfom yikitohmoa loya hingneft tohmour.

**Filemonrhu gontwat
Porr dwandfakhato htafmot
Barkof kfo nuhas mrokfom**

Ndar gontwat Filemonrhu yufatpno yimo gontwayet. Filemonr Kolosithu Kristen yimayer. Filemonr tohmohat wom slefr kakitohmour. Nd yimarhu yufat, Onesimus. Wom yiha nd yima Onesimus, turhu tohak yimarpno wom nefm na tanyhato Romko fakrmenimor. Romko yakrmanyihato ndko tohmor.

Wom yiha Porr ndha Romtn kalabus tohetrn rorpno mfnahmor. Rorpno mfnahhato kfo ptha dbrufmorm ror na tanyuk nefm. Porr wanyhato Bro Nkifrapno kfo bruttnamotrr be nd duka krho hasomo yima yuhur wuthanimorr. Porr Onesimusrhu rhu nmbuhat yak marnyanimorrn, tfit dukamour kfo tkrurafhato turhu tohak yimarpno tfit yinyeft. Onesimus fanho hanymour tfit turhu tohak yima Filemonrpno yinyeft. Rroh neft inji namoum: wom yimar womrhu slef hingrna yimar tohhato wom nefm na tanyhato yakrmanyihato tfit bi fekmr, nd slef yimar nhai rhurmoar. Wasmoumr.

Nd dukefm Onesimus rhumoatmr, Porr kalabus tohetrn be gontwarpat wandfahato kfo nuhas bonuhasmorr Onesimus rorpno yimo nmbuhat. Yo kfo nuhas memor, "Na Porann kfo tkrurefiwotanr niewur. Ni tamoh krhopam nd yimarpno korhwomn, mirahn rorn nd krhopam ahtayanm. Nann rorhu krhopam wahtotwa. Nann titaruhanm." Yo kfo memor, "Nd yimar afo be slef hingrna yimar kanjo hingrnamor. Arihat htirahnr ninhu hingrnefm rorn yaknho hakurahrn." Nd nd mrokfom gontwatk hta buganimormn, nd gontwat tu Onesimus hemotr turn hanyhato Filemonr mhemo.

**Filemonrhu slefr wom nefm na tanyhato yakrmanyihato Romko
nd ror nayuk neft myak marnyakhato Porr kfo tkrurafmotrr tu
tohak yimarpno tfit yimor.**

¹ Na Pora, nann ndar gontwat wandfakhato htefiwant. Krais Jisasrhu gutnius mrokfothu pthaneftpno kalabus htamoma. Nomppno rpat Jisasr hikwa yima Timotir rpat rhuhato ndar gontwat wandfakhato htefiwunont ni Filemonnhu yufatpno. Ni tu nmoh yimate yo nom hingrnewa hingrneft tohnuhiwa yimaye. ² Yo nhai mmokahnont nnoh mndarem Apiat yo Arkipusr. Arkipusrn soldiam kanjo tohhato yahrt tohnuhiwurnom. Yo ni Filemonnhu kunys rifiny hakuta Kristenm duka bugewunonm. Kfo bugewunonko.

³ Nmoh Bro Yifemri Nungothet Jisas Kraisr ayuhuwafkahfko, yima yuhum ayak marnya bomarnyafko.

Porr kfo yindhormorm Filemonrhu dborioh nefm

⁴⁻⁵ Wanyakmoya ni Nungothet Jisasrhu dukefrpar rhuhato Bro Nkifrar hiket yimam yakitohwa yuhat. Na inji wanyakhato Bro Nkifrar kfo bruttna yindhorwanr. ⁶ Kfo bruttna kanga, Kraisr yakitoh hanykahnn rpat tohrahnom. Nomppno nia rpat tohhato Kraisrpno frtkafet yimanom Kraisr yak marnyiwa yuhat tunn hti hikrahn. ⁷ O, yinowe, Bro Nkifrar hiket met yindarim ninn yikitohwatnm, rroh yima yuhenm myindhornitmm. Nanhu yima yuhur ndnatpno yindhorhato miyorhwor.

Filemonrhu tfit Onesimus yakmiyakkfot

⁸ Na ndar yimaya, na Jisasrhu hingrna yimaya. Na to kforfoyann tamoh tamohroh finji naneft. To nhai. Na nhai tamohm kforhotann. ⁹ Htitann Bro Nkifrar hiket yimam ninn kaki-tohwomn. Na inji hitwoyann na nhai wom tamohm kfo tkrurhottann. Nhai. Na be kfo ttiwonkfot kfo ttiwon-ruhann. Na Pora, na bi bro yima kasha, nann Jisas Kraisrhu mrokfot hatone htfaswant. Na kalabus toh-wohat to nd nmbuhatpno kalabus htamoma. Nann be wom kfo ttiwon mrokfot kfo ttiwonwann. ¹⁰ Nanhu yon Onesimusrhu yakmiyak nmbuhat be kfo ttiwonwann. Na kalabus toh hasetann Onesimus mfnahmor. Nanpno

mfnahhato nd yiharn Jisasrhu tirmn htamoyanr. Bi nanhu yoner. ¹¹ Ror ninpno tohmohat nhai tu hingrnano marnyarmorn. Nhai. Hingrna hhrekmor. Tfit arihat awi, ni hingrnano yo na hingrnano inji narahr.

¹² Bi kfo tkrurefiwotanr bi tor bi niewur bi tfit tunpno. Nanhu yima yuhur rorn korhr. ¹³ Nd gutnius mrokfothu pthaneftpno kalabus htamoma. Na kalabus tohwohat afo rorn ninhu tkitt yakhato rorn niahato mhti duka tany hanyrfoura. ¹⁴ To nhai. Nhai be nanhu fijo ror yakitoh-kfot. Ni tu nd yimar yakitohwa tikat yimanhu kfo yakio mrokfot awanyant, ee btn yakitohrfoyanr. Kto be tunn kangn, ania tohnhora, na nhai mro-kfom. ¹⁵ Nd Onesimusr yakrmemohat rot fakrmenamor. Yakrmanyehato dfik yiham frtrophmorn. Ndt rot ka Bro Nkifrar Onesimusr tfit kfo tkrurafhato ninpno toh nkifranineftn, nd neft inji rhumot.

¹⁶ Arihat mirahn ka be slef yimar ninpno tohrahr. Nhai. Mkuko slef yimar tohrahr. Mkuko htirahnr najoh toht tohwa kanjo tohrahfn. Na tuka htitanr rpa yimarhuno kanjo. Ndnetann na hti yindhorwanr. Ni, to inji hti yindhorrahnr. Ror nayuk nefm htirahnm tu slef yimam kanjo. Yo tfit Kraisrhu yuhat htirahnr tu najoh toht tohwa kanjo. Inji htihato nhai yafhoruhatnr.

¹⁷ Ndnettn na ninhu hingrna tamnou yimaya kanjo, no rpat kakitohwonont Kraisrhu hingrneft, nd yimar tfit wayakmiyaktwanr ni na yakmiyakrfo kanjo. ¹⁸ Ror ninpno wom tamohm yak he thombat, rorhu yufat wayak thukahnt tfit nanhu yufatn wahtatwa. Nann nd ror nayuk nefm marufa htaruhanm. ¹⁹ Na pthiwa mrokfot asot bi tukanhu tire yikt yakitohhato wandfa kanga. Na Porann Onesimusrhu nefm marufa htaruhanm. Ni to wadukaf hanyswa, ni Bro Nkifrar hikwa yuhat frohmn nd yuhat fak nuhasafmom? Ni nd mrokfot tawo kahukann. ²⁰ Yinowe, wawanyn. Jisasrhu yufatpno kfo kangann nanhu yima yuhur wuyaktwanr. No buga Kraisr hikwono. Ndnettn nanhu yima yuhurn wamikmbrekahtn nanhu yima yuhur be yindhorhato marnyarahr.

²¹ Awi htita, na kfiwa mrokfom hikrahn. Ndnatn ndar gontwat wandfiwann. Yo htita, ni Onesimusr-pno naruha nefm, tu dborioh nefm narahnr. ²² Wom mrokfo nmbuhent be kfiwant. Na nda kalabus tohwohat, nanhu bro yima yuhur duka kangr nikmoh kfo bruttna nmbuhat na kfo bruttna hasiwohat Bro Nkifrar wany-ruharn yak hfhanaforahra. Yak hfhanafohato tfit nikompno hnerahra. Ndnetann kanga wom hweyuk tkitt bi wayak hta hanyswakomt.

Porrhu hingrnano yimaro kfo yindhor mrokfom

²³ Epafrasr kfo yindhor kfot htefiwurt. Ror to Krais Jisasrhu gutnius mrokfothu hanyeftpno kalabus hta-momr. ²⁴ Yo Mak, Aristakus, Demas, Luk, nd nd yimandount, nanpno hingrnewam, rom wom kfo yindhor mrokfot htefiwumt. ²⁵ Nungothet Jisas Kraisrhu yuhuwaeft athu kasi bugatwatko.

Hibrumpno yimo gontwat Barkof kfo nuhas mrokfom

Ndar gontwat Hibru Kristenmpno yimo gontwayet. Hibru Kristenm bok krhopam yak hatohhato memom, "Jisasr ayafphoninomr." Ndnettn ndar gontwat rroh kfo bmtayuk mrokfom wandfakhato htafmomm. Bro Nkifrar Jisasr yakhato hingrnamo hingrneft Kraisrn Bro Nkifrarhu hingrneft kfo nuhas bonuhasmorm.

Husfirpa bro mrokfom ndar gontwat kfomom. 1) Jisasr tu Bro Nkifrarhu yon mif mifer. Jisasr ndar bbinysoft tohmohat, boknambok krhopam fakmor. Bro Nkifrar inji htihato to be rorn htamor yimaroh tamoh tamoh nefroh htihato yak marnyayuk yimar (2.10). Ror inji namotr ndnetrn profetm, mounmotm, yo Mosesr nd ndm hingrnamo hingrneft be inji hingrnamomm. Jisasr hingrnamo hingrneftn tu tpiyet hingrneft hingrnamor. 2) Jisasr pris hingrneft fak htamorr. Ror be nd hingrneftn toh nkiffranirahr. 3) Judam yakitohmoa nkifra pris hingrneftu hingrna yuhat rot be inji, Jisasr hingrnamo pris hingrneftn tu tpiyet hingrneft hingrnamor. Judaroh fasoh fasoh nefm yemro tariorh mthahato kur mtha hikmoa nkifra neft ndt be yafotha hingrneft hingrnamoum. Jisasrn tu tpiyet hingrneft hingrnamor. Tot tu yima rifhuroh yak wus bowusyuk hingrneft.

Ndar gontwat met yindariroh kfo bmta mrokfom korhmt. Ndnettn bingot tohmo Isreroh met yindariroh kfo bmta mrokfom korhm Septa 11. Nda gontwathu mrokfom inji kfiwum tamoh tamoh nefm o krhopam kekwoko, bmbri riyoh dbhurak duha. Jisasr yakitoh bmta kihhato tohhany tohhany wuroh nohneftpno be myafphonikfot. Jisasr krhopam titahato tohmor. Ndnettn niko nd yuhat hikkfot.

Mounmotm Jisasrhu yinhitn tohwom.

(Septa 1-2)

Bro Nkifrarhu mrokfot Jisasr dhemot

¹ Bingot Bro Nkifrar nmoh nkifram mrokfom hemoahat profetmpno pthamoatrm tfit romn kfo nuhasmoumm met yindarim. Mrokfom hemoahat bok yiham bok yuhann pthamourm. ² Tfit ndar yiham turhu yon Jisasrn mrokfom yakhato kfo ptha nuhas hanitrnom. Jisasr tu Bro Nkifrarhu yonrn, ndnettn tamoh tamoh hingrneft tamoh tamoh wuskam rorhu tirtn htamorm. Bro Nkifrarn kfomotrr Jisasr ee Jisasr wanyhato ndar bbinysoft yorhwa tamoh tamohm hingrnamorm. ³ Bro Nkifrar yorhwa ruheft nd yonrn fak nhombramort. Jisasr htineft to mirahko ka Jisasr htitwon, nhai, Bro Nkifrarhu ruheft htitko. Bro Nkifrarhu ruheft to bi Jisasrn fak nhombramort. Ror tu bro ptha nanyjaretrn ndar bbinysoft ror kfiwatr rorhu tng yuhatn bbinysoft rhu hik hanitwot. Ror nda bbinysoftu yimaroh fasoh nefroh yak thu yuham yak hta bohta marnya tanyhato yimor. Yihato mrhumor tu yura myorhekwa nanyjaret Bro Nkifrarhu tirmifko. Tu bro yufa yakyuk tirko mrhumor.

Bro Nkifrarhu yonrn buriwurm mounmotm

⁴ Tirmifko mrhuhato rorn bromorm mounmotm. Yo nhaft rorn tu Bro Nkifrarhu yonr rhumor. Mounmotmn tfit rorhu hingrna yimam rhumom. Tamohmpno Jisasr nd bro yufat yakmor? ⁵ Yimbu yuhat inji korht. Bingot toh hnamo mounmotm nhai Bro Nkifrar womr kfo marimorr,
"Ni nanhu yone."

Hrek na bi ninhu yifema."
Yo nhaft Bro Nkifrar nhai wom mounmotr kfo marimorr,
"Ni nanhu yonn rhurahn.
Nann yifemruhann."

Sng 2.7

2 Sml 7.14

Nhai.⁶ Bro Nkifrarhu nkati yonrpar kfo tkrurafhato ndar bbinysoft yawihna thombat mounmotm kfo mirahrm, “Nd yonrn kfo yuta hagrakfot.”⁷ Bro Nkifrarhu yonrhu mrokfot kfonihato tfit mounmotroht riyakhato kfo memor,
“Mounmotm rom be hingrna yimayem.

Wiforti kaht kanjo hingrnewum.

Hingrneft afo hingrnaknitamt buha tfit mnoh hmbritm.

Hingrnakni tfit buha mnoh hmbritm.

Inji hingrnewumt rroh hingrneft.”

Sng 104.4

⁸ To tawo turhu yonrn kfo memor,

“O Bro Nkifraye, ninn kingn toh nkifranirahn.

Ni tohukatohruha kmim tu hifa dboriorh nefrpam yak hta bohtarahnm.

⁹ Ninhu toh nmbuhat fasoh fasoh nefm faso hti bebwonm.

Tu hifa dboriorh nefrpam hti yindhorwom.

Ndnatn tunhu yifem Bro Nkifrar hti yindhorhato kfo memorn,

‘Ninn kingn tohrahnn.

Kingn tohhato ndar bbiny-softhu wuskam ninn hti yukatohaf hanyruhann
yima yuhur yindhorrahrn.

Nhai wom yimam ni yakmo rhu nmbuhat o yufat kanjo yakrmom.”

Sng 45.6-7

¹⁰ Inji kfonihato tfit wom mrokfot kfo memor,

“Bingot ni Bro Najomnn kfomotn bbinysoft trhamot.

Ni tunhu tire hingrnamat mount.

¹¹ Nd mounti bbinysoft rof mibatini-ruhatf
yimanom hti hambrafrahnomp.

Ni nhai. Ni nhai hti hambraf-ruhatnomn
ni be tahi nrwin kekutrahnn.

¹² Ndar bbinysoftu wuskam tamoh tamohm hwe nmbia manym kanjo
hwi hwi hanyhato mskta-hato yakrirak rihtefiwa kanjo
inji narahnf mounti bbinysoft.

Yatk wuskam riyak htefiwa kanjo inji riyak htafruhanf
tfit nfrim yakhato wondhwa kanjo inji tfit wondh hmbrirahnf nfri wuskaye.

Ninhu ruheft nhai wom yihar rhu kriyohnihato

tfit wom yihar rhu marnya inji nakahn. Nhai.

Ninhu ruheft to be inji rpahtet ruheft korhn.”

Sng 102.25-27

¹³ Bro Nkifrar nhai wom mounmotr kfo won marimorr,

“Nanh tirmifko warhukahnn nd ni tone dbombhiwa yimam nann afo htiruhanm.

Afo htitwa. Nd yimam mirahm,

‘Finji ananomn,’ tfit nann yahrhoyanmn

ninhu yinhitn yak htaruhanm.

Tfit ninn brohato tohukatoh-rahnm.”

Sng 110.1

¹⁴ Mounmotm mirahko, “Tamohem?” Rom Bro Nkifrapno rhuhato rorhu hingrneft hingr-niwayem. Fitoh yimam Bro Nkifrar kangr, “Hifa rhu nmbuhat ahiyanm,” nd yimam mounmotm yitamn thu bmtewumm.

Broru nrfa htiyak yuhat

¹ Bro Nkifrarhu Yonr be tu bro yufa mift faktmor. Ndnettn nd Yonr kfoyuk mrokfot yakitoh kihkfot. Yakitoh hrufrehrahkomt to be yak frikatiyahrahkomt. ² Bingot nkifrapno mounmotm Mosesrpro yimomn kfo borsisha nuhasmomr. Nd borsisha mrokfom Mosesr yakkom tu bro borsisha mrokfom yakhato kfo nuhas-mourm. Yimam nd borsisha mrokfot hanyjbornamoahat tu Bro Nkifrar kfomo yuhatt kak tutfamourm.

³ Tfit ndar yihat nfri dfa tik yuharhu mrokfot Jisasr kfo nuhaswat yimam hik duha yinyeft, to be finji kafrohruham? Nd Bror yimam nrfa htiyekwa nmbuhat bi turn

kfomotr womm wanyhato kfo nuhasmomnom. Ndnettn to mirahko ka kfo furakfoyet. ⁴ Tu Bro Nkifrarn thu nawohmoatrm wonk wonk nefm na bugamoumm. Bro Nkifrar yimamn mthu nawohhato pthamoahat duka memour, “Inji yak nuhaskahtannm yimam htiruhann mirahm, ‘Mrokfom tu fipet mrokfot wanuknom.’” Tu Bro Nkifrarhu Yafothatn rpa rpa nefm kak htamourm rpa rpa yimam.

Jisasru yufat tohekwt

- ⁵ Bro Nkifrar king toh thombat mounmotm nhai tfit hingrnefm yikitohnhokfot. Nhai.
⁶ Bro Nkifrarhu rfa borngtn wom yimar kfo memor,
 “Yimanom tamohtetnomni Bro Nkifraye be mfro dukewannom?
 Nom yima furayenom. Tamohm-pno yamuka, ‘Adukayanm?’
⁷ Nom yimanom ninn hingrna-monnom.
 Be dfik yiham mounmotroh yufamn afo mfrfnahnimom.
 Tfit kto nomn bro yufat hemonnom.
⁸ Nmoh yinhitn hta bugamohat wuskam, nhai wom tamoht rim tohtarmot.” *Sng 8.4-6*

Tamoh tamoh shrenm nmoh yinhitn hta bugamorm. Nmoh yinhit htamohat arihat tafi nmoh yinhitn wuskam rhukahtm htikahnomm. Nhai. ⁹ Tot wom yimarhu yufat riyorhwot. Nd yimar bbinysoft tohmohat afo mounmotroh yufatpno rorhu yufat ritohtamout. Tfit arihat nohnihato rorhu yufat mfrfnahnihato tohekwt. Nd yimar Jisaser. Nd mounmotroh yufam mfrfnahnimohat duka memor, “Afo bbinysoftu yimaroh tkitt nann yakrhoyantn nohruha. Rroh nohyuk tkitt nann yakrhotant Bro Nkifrar ndt htihato yuhuafhato yakrahram.” Ndnetrn Jisasr be tu bro krhopam yakhato nohmor. Nd krhopam ror yakhato nohmom, Bro Nkifrarn thu bmtamotrr ror toh bmtahato nohmor. Kto Bro Nkifrar tfit kasinyamorr. Kasinyafhato bro yufat hemorr.

¹⁰ Bro Nkifrar tor tu ndar bbinysoft yikitohwa yimar. Tur kangr, “Finji finji ayak hta bohtayant, nhai mro-kfom.” Ndnetrn duka memor, “Bbiny-softhu yimam newa fasoh fasoh nefm Jisasrn yiruharn rorn nd bbinysoftu yimaroh tkitt yakhato nohrahr. Nohruhatr yimam ndt htiruhann tfit nann hikrahm.” Jisasr nd krhopam yakmohat nhai nd krhopam hta kasuhrmomr. Nhai. Nd krhopam frdbruf thuhato tohmor. Nd krhopam yakhato dfa tik yuhar htakmorr. Nd dfa tik yuhar yauwa yimam turn nyingako tohekwt. ¹¹ Froh frohm Jisasr bi fak wus bowusrm, nd yimami Jisasr bi rpa yifemetem. Jisasr kangr, ayutayanm nmemrom, nhai mrokfom. Bi rpa yifemetmn hti yindhorworm. ¹² Kfo memor,

“Bro Nkifraye, ni hingrnamo hingrneft nanhu nmemrom kfo ptha srh nuhasruhanm.
 Bro rifiny swirmn yufat yutahato kfo ptha yindhorruhant.” *Aisaia 8.17*

¹³ Tfit kfo memor,
 “Nanhu bro dukeft kanga nd Bro Nkifrar kfoyuk mrokfot amhikakniya.
 Na afo asoya tohwa Bro Nkifrar hemo yonmpno.” *Aisaia 8.18*

Nom tamoh nefm yakneft Jisasr toh nuhaknerahrnom

¹⁴ Nd Jisasr kfo memo, nanhu nmemroyem, ndm ndar bbinysoft tohwa yima mifhet met yindarim kfomor. Jisasru toh nmbuhat rom kanjo toh nhombramor. Memor, “Rom kanjo toh nhombrakahann kto nohhato nd Satanr yikitohwa noh yafothat yak thuruhan. ¹⁵ Rorn kfo yakrmitatrm yimam kakrmitwom nohneft. Noheft yakrmitatrm Satanru fasoh dukeftn kak hikwom. Nann noh nuhasrhotannm nhai wom yakrmiruhatm nohneft.”

¹⁶ Jisasr nd krhopam yakhato nohmohat nhai mounmotm dukahato nohrmor. Nhai. Abrahamr tohmo kanjo tohet yimam dukahato nd krhopam yakhato nohmor. ¹⁷ Bro Nkifrar kfo memor, “Bbinysoftu yimam kangan hifa tkitt ayak htayanm, btn ndhtet neft afo rompno yihato rom tohwa tkitt watohnhokahnrom krhopam yakneft ni htiruhann hti yuhuafrahn. Ninhu yuhuaf nmbuhat rom hti dukaruhann rom tamoh krhopam rhunefm ni prisoh bro tohak prisn kanjo rroh krhopam mhiruhatmn tfit ninn yakhato nann yuwa hirahn. Ni be buha tohhato rroh fasoh nefm yak tuhafhikahtnm nanpno

nierahm.” ¹⁸ Jisasr yimanom kanjo tohhato wom yiham memour, “Bro Nkifrarhu dukeft ahika,” to nhai, mduka nhitamour. Turn wabbuka sinyahato memour, “Nd Bro Nkifrarhu dukeft ahika,” krhopam fakmour. Ndhtet nefm ror bi mhtiayafetrn btn nom tamoh nefm yakneft bmbri toh nuhaknerahrnom.

Mosesrhu bro yufat Jisasrhu bro yufathu yinhitn korht.

3

(Sapta 3.1-4.13)

Jisasr yakmo yufatn be tu bro yufat fakmor, Mosesr nhai ndhtet bro yufat yakrmor

¹ Niko froh frohko Bro Nkifrar rpat yak hikwanom, waduka hanywako. Jisasr nmoh bro prisroh bro tohak priser. Bro Nkifrar nom dukahato kfo tkrurafmorr. Nd yima Jisasrn kfiwonom yak hikneft. Rorn dukefm htakfot. ² Bingot Mosesr Bro Nkifrarhu yon kunyr kasinyamo kanjo ror nd hingrneft yakhato Bro Nkifrarhu yon kunyr kasinyamorr. Bro Nkifrarhu kfo tkrur mrokfot yak hikhato nd yon kunyr kasinyamorr. ³ Yimar yon kunyr kasinya thoft nhai kunyr bro kfo yindhor nmbuhat yikaht. Nhai. Nd yon kunyr kasinyayuk yimpar kfo yindhorwom. Mosesr hingrnamo hingrnefti Jisasr hingrnamo hingrnefti to inji rhumof. Jisasr kasinyamo yon kunysn Mosesr be rim fkniyakmor. ⁴ Ndar kasinya hanita yon kunym rpa rpa yimam kasinyewumm. Nd rpa rpa yon kunym tu Bro Nkifrar kfiwatr kasinyewumm. ⁵ Mosesr Bro Nkifrarhu yon kunyrhu yonmpno hifa hifa tohhato rorhu hingrneft kakitohmourn. Tamoh tamoh nefm kto rhuyukm, Bro Nkifrar rorn mthu nawohmoarn pthamourn. Ror nd hingrneftn be hingrna yima furar tohmour. ⁶ Jisasr nhai. Ror tu Bro Nkifrarhu yon mifer. Rorhu hingrneft inji korht. Fitoh yimar Bro Nkifrarhu yon kunyr mfkniyekwor, nd yimar Bro Nkifrarhu yonr rhuhato Jisasr tohukatohworr. Nom be Bro Nkifrarhu mrokfefm yakitoh kihhato nmoh yima yuhumio yindhorhato kangnom, “Bro Nkifrar ayak marnyarnom.” Inji dukarahnom be Bro Nkifrarhu yonnrom rhurahnom.

Hanyjbornet yimam nhai hifa rhu nmbuhat yakruhatm

⁷ Nom Bro Nkifrarhu yon kunyet. Ndnett rorhu Yafothat niahato inji kfiwut,
⁸ “Arihat mirahko nkifram hanyjbornamo kanjo
 inji ahanyjbornanomt nd Bro Nkifrarhu nia kfoyuk tngt.
 Nikmoh nkifram wesan tik furat yau soh hanymohat to inji namom.
 Hanyjbornahato memom, ‘Afo htirahnom Bro Nkifrar finji naruhar.’
 Tfit niko rom namo kanjo na duha.

Bro Nkifrarhu Yafothat nia pthiwutn hanyjborna duha.

⁹ Na nikmoh nkiframpno foti gunyimm rompno tohhato
 fak nuhasmouanm wonk wonk nefm.

Nhai nd nefm htihato nanrpaya dukarmoam. Nhai.

Na yakmoama mongko yiho htamouma.

Mongko yiho htahato turoh duka fijo yimoum.

¹⁰ Ndnatn na namburhato kfo memoya,

‘Ndar yimam nhai na kfiwa yima yuhur yakkahmr. Nhai.

Na kfiwa yuhat mong trohhato tfit turoh dukefmn kauwom.’

¹¹ Nd nmbuhatn na namburhato kfo memoyanm,

‘Na tu be kfo mif mifwa, be nhai nanhu rhu wita tkitt nieruhatko.’”

Sng 95.7-11

¹² Yo niko mirahko nikmoh womr fasoh yima yuhu bebr ayakkahann yafothet Bro Nkifrar among trohanr. ¹³ Yihof href yihof href tuko nnakfo hi hanykfot nd mrokfot. Nna kfo nuhas hi hany duha rhurahko, be nda bbinysofthu nefmn rhu nhehakruhatmko, Bro Nkifrarhu mrokfom mong trohnirahkomm. ¹⁴ Bi Bro Nkifrarhu mrokfot rifakitoheknomt, to be nd mrokforpat yakitoh kih hanykfot. Yakitoh kihhany be noh nefrpatsno myafhothunikfot. Bro Nkifrarhu mrokfot inji yakitohrahkomm be Jisasrhu yon kunys rhurahko. ¹⁵ Kfo duka mrokfot duka hanykfot.

“Arihat mirahko nkifram hanybornamo kanjo

inji hanyjbornanomt Bro Nkifrarhu Yafothat nia kfoyuk tngt.”

Sng 95.7-8

¹⁶ Fitoh yimamn Bro Nkifrarhu mrokfom hanyjbornamomm? To nd Mosesr Ijift yakni-hato hanymo yimamn ndhtet neft namom. Romn Bro Nkifrarhu tngt hanyjbornamomt.

¹⁷ Yo frohmne foti gunyjimm nam-burmorm? To nd fasoh net yimam namburmorm. Namburhato yuhre yima toh duha tkitt tohetmn be inji noh witamom yukuteh yiram noh dborhewa kanjo. Rroh thatipm be nd wesan tik furatn mikfe bdgnimom. ¹⁸ Bro Nkifrar frohmn kfo memor, “Kfo mif mifwa be tu nhai mif nanhu rhu wita tkitt nieruhatm?” To nd yimam rorhu mrokfom hanyjbornamom, romn inji kfomor. ¹⁹ Tumn nhai Bro Nkifrarhu mrokfot yak hikrmomt. Ndnetn nhai yirmom Bro Nkifrarhu rhu wita tkitt.

4

Bro Nkifrar hikwa yimam rhu wita nmbuhat yakrahm

¹ Bro Nkifrar bi kfomornom rorhu rhu wita nmbuhathu yakneft. Ndnetttn nom duka yanohefr-pno rhukfot. Nom wofnkahnom rhu wita tkitt yihato nmoh womr Bro Nkifrar hti hambrakneft. ² Nom Bro Nkifrarhu mrokfot wanymonomt bingot Isrerm wanymo kindo. Rom nd Isrerm Bro Nkifrarhu mrokfot wanymohat nhai wuthu kmbriyak-rmoamt. Be wanhato nhai yak nhata inji narmoamt nd mrokfot. Yimam inji be wany marsisatanef Bro Nkifrarhu mrokfot ka hifa yima yuhum kekwom? Ka nhai. Bro Nkifrarhu mrokfot wuthu kmbriyakmt, awi nd mrokfot hifa rhu nmbuhat yakrfom.

³ Nom fitoh fitoh met yindarinom Bro Nkifrarhu mrokfeft wany yakiowanom, nd rhu wita nmbuhat bi Bro Nkifrar arihatn kahukrnom. Bingot Bro Nkifrar nd nmbuhat dukahato kfo memor,

“Nd hanyjbornamo nmbuhatn na namburhato kfo memoyam,

‘Na tu be kfo mif mifwa niko be nhai nanhu rhu wita nmbuhat yakruhatko.’” *Sng 95.11*

Bro Nkifrar kfomor rhu wita nmbuhathu hanyeft. Inji kfomohat nhai be marimor, “Romrpam hiruha nd rhu wita nmbuhat.” Nhai. Nom arihat tohwa yima buganom rpat dukahato inji kfomor. Bingot Bro Nkifrar bbinysoft hingrnahat kfo memor, “Kto bbinysoftu met yindarim rhu wita nmbuhat hiruhanm.” ⁴ Bro Nkifrarhu rfa borngtn korht 7-yuk yiharhu mrokfot. Nd mrokfot inji kfiwut,

“Bro Nkifrar mounti bbiny-softhu wuskam hingrna bugahato

7-yuk yiharn hingrna tmbhomorn rhu witamor.”

Stt 2.2

⁵ To tfit Bro Nkifrar kfo memor, “Nhai tfit womm na kfoyuk rhu wita tkitt nieruhatm.”

⁶ To rom tom wom yimam nd kfoyuk rhu wita tkitt yiruham. To nd bi barkof gutnius wanymo yimam nhai yirmomt nd Bro Nkifrar kfomo rhu wita tkitt. Turoh hanyjborna nmbuhatn nhai yirmomt nd tkitt. ⁷ Ndnetttn nd yimaroh rhu wita tkitthu nia nmbuhat dukahato Bro Nkifrar tfit wom yihar tfit dukamor rroh niayukr. Ndnetrn Defitrn mthu nawohhato kfo memor,

“Arihat mirahko nkifram hanyjbornamo kanjo

tfit inji ahanyjbornanom Bro Nkifrarhu Yafothat nia kfoyuk tngt.”

Sng 95.7-8

To nd Defitr kfomo tngt htihato duka kangnom Bro Nkifrar yimaroh rhu nmbuhat dukahato nd yiha tfit yihotat fak nukamort.

⁸ Nd Bro Nkifrar kfomo rhu wita tkitt bi Josuarpno ayakmt to nhai tfit Bro Nkifrar wom yiham Defitrpno kformor. ⁹ Nd mrokfom mhti dukahato duka kangnom Bro Nkifrar hikwa yimaroh rhu marnya yihar afo tor riyorhwor. ¹⁰ Bro Nkifrar hingrnahany hingrna hanyhato wuroh 7-yuk yihar rhu witamo kanjo inji rhu witarahm ror hikwa yimam.

¹¹ Ndnetttn nom ndar yiham nd rhu wita tkitthu yi dukefrn dukahato toh nnfakfot. Tamoh tamoh dukefm o nefm mong trohkfot. Isrerm namo kanjo nd dukefr myafhoni duha.

¹² Bro Nkifrarhu mrokfot tu yafothayet mrokfoyet. Nd mrokfothu nambur bim nhai yimam yak bsiskfot. Mrokfot yi shoft kfram kanjo yitatn thatipt tasu fnahnitatt tu yiro

yima mrokfo yafotha rifhur yorhwa tkitt rim kwitt. Nd mrokfotn rim was-wattnom yimanmoh yima yuhum ee ndnatn hti nhta kangnom o nd neft fasoh nefet, nd neft dborioh nefet. Inji nd mrokfot htihato kak nhtewunomm nom niwa nefm.¹³ Nhai wom tamoh tu Bro Nkiffrarn yak htayukt tfit turpno kafrohkphot. Nhai. Tamoh tamohm be tafont yorhwatm htitworm. Tamoh tamoh nefenm nom niwam tu Bro Nkifrarparn yak nhtarahrm. Yak nhtahato nmoh tamoh nefm htihato finji kfoneft, nom finji tfit kfo wokruhanomr?

Jisasr yura hefenrn tohwor nfri hingrnethu bro tohak pris yima kanjo.

(*Sapta 4.14-10.39*)

Jisasr nmoh bro tohak priser

¹⁴ Tor nmoh nyingako tohekwa bro prisr tu yura hefenr yihato Bro Nkifrarhu yorhwa tkitt yimor. Nd yimar Bro Nkifrarhu yon Jisaser. Ndnettn nmoh yima yuhum be rorpary htahato rorhu mrokfot yikitoh kihkfot.¹⁵ Nom krhopam yekwa yakeft hti duka tungunewurt. Nom yekwa krhopam ror fakmuomr. Ror nd krhopam yakmoahat nhai wohsishato suhrmor. Nhai. Ror toh bmtamor.¹⁶ Ndnettn nom to inji buga, yakrme duha Bro Nkifrarpno brbo yikfot. Ror yima yuhuwafeter. Nom rorpno brbo yinyeft be hti yuhuwafahrnom. Tamoh krho nmbuham yakneft rorpno yakrmeni-hato be nd rorhu yuhuwafeftn thu kasirahtnom.

5

Fitharhof yimar bro tohak pris hingrnemoart?

¹ Bro tohak prisr hingrnelt tohwa yimar ndar tu bbinyssoftu yimarn Bro Nkifrar yekwarr nd hingrnelt kak htewur. Rorn Bro Nkifrarpno brbo yitwarn yeshrim mhtahukrr, womm be tariorh skurn mthewurm. Yimam turoh yindhor nmbuhatn Bro Nkifrar tariorh mtha yibon thoft nhai tum yihato mtarioh mthakahmr. Nhai. Nd bro tohak prisrpno mhtiawatmm rorn Bro Nkifrarpno yihato mtarioh mthewurm. Womnam yimam fasoh nefm newohat nhaf inji buga. Rorpno yemrom mhtiawatmm tfit rorn nd yemrom yaknitwarm Bro Nkifrar mtarioh mthewatr, nd yimaro fasoh nefm mong trohworm, nhai tfit yukatohekahrm nd fasoh nefm.² Ndar bbinyssoft tohwa yimam Bro Nkifrar nhai hik tungunakahmr. Nhai. Womnam toh marnyewum. Womnam suhwom. Nd bro tohak pris hingrnelt tohwa yimar to ndar bbinyssoftu yimarn Bro Nkifrar kak htewur. Ndnetrn wom yimam Bro Nkifrar hik hanyhato msuhwohat nhai bmbri kfo nyingo fnahaknikahrm. Be hifa yima yuhurn kfo hta bohta marnyewurm.³ Ror ndar bbinyssoft tohyuk yimar nd hingrnelt tohetrn, yimaro fasoh nefm tariorh mthahukohat barkopam afo turhu fasoh nefm dukahato tariorh mthefiwur, tur yak marnyani ee tfit mongkorn womroh fasoh nefm tariorh mthewur.

⁴ Nhai wom yimar bro tohak prisrhu bro hingrnelt be turhu fijo tokahrt. Nhai. Bro Nkifrar Aronr bro tohak pris hingrnelt yak htamo kanjo inji kak htewurm bro tohak pris hingrnelt tohyuk yimam.

⁵ Jisasr nd bro tohak pris kanjohot hingrnelt yakmohat nd yuhatn hikmor. Nhaf nhai turhu fijo bro yufat yakneft yihato nd bro tohak pris hingrnelt yakrmort. Nhai. Tu Bro Nkiffrarn nd hingrnelt fak htamorr. Kfo memor,

“Ni nanhu yone.

Hrekrpa mifr na tukann yonr yekanrn

yimaro buha mhurn myak htatahato kfo famuyanm,
‘Ndar yonr bi nanhu yoner.

Nanhu tamoh tamohm rorn yikitohnhorahra.’ ”

Sng 2.7

⁶ Tfite wom yiha wom mrokfot kfo memor,

“Ni nd bro tohak pris hingrnelt toh thombat

be nd bro tohak pris hingrnelt toh nkifranirahn Melkisedekr kanjo.”

Sng 110.4

⁷ Jisasr ndar bbinysoft tohmohat Bro Nkifrar kfo naku nurmohat nhai be tngpatn ptha fura bofurarmorm mrokfom. Nhai. Tu yima rifhurpno masat masat kfo naku nurmorr. Memor, “Bro Nkifraye, na yahr kmim nia wasaknaneft thu taburkrfona. To nhai. Nd nanhu noh nmbuhat bi tunn kfomo nanhu nohneft. Ndnatn nhai tfit kfo kurneft nanhu nohneft.” Be Jisasr inji kfo bruttnamotr ror nd krhopam yakmohat Bro Nkifrarh thu bmtamorr. ⁸ Jisasr Bro Nkifrarhu yoner. To nhai kfo marimor, “Na Bro Nkifrarhu yona, tamohmpno nd krho mis nann titarhoyant.” Ror nhai inji kformor. Nhai. Nd krho mis rorn titamort. Nd krho mis titahato kto tfit htimo Bro Nkifrar yihato thu bmtamorr. ⁹ Bro Nkifrar Jisasrpno kfo hta nuhasmo mrokfom Jisasr hik bugamormn wuroht mnohmor. Mnohhato be nd rorhu hingrneft ndha mhingrna tmbhomortne be. Ror yimorn Bro Nkifrarpno mrhumor. Yihotat rorn yak nukamotrt yimam Bro Nkifrar hikneft be rorpno mtob nkifranirahm. ¹⁰ To be Jisasr Bro Nkifrarpno mrhumohat Melkisedekr hingrnamoa kanjo bro tohak pris hingrneft be rorn hemor.

Mirahko yon mumenm kanjo awany mmonom

¹¹ Jisasr yihato nd Melkisedekr hingrnamo bro tohak pris hingrneft yakmo yuhat kanga akfo nuhasanko, to nhai. Htitwanko yuhre yon mumenm kanjo wany mumiwuko mrokfo psha yuharoh yakneft. Ndnatn to mrokfom pthaneft finji finji yakruhakomm mna mrokfom? ¹² Niko nhai be ar nohof Bro Nkifrarhu mrokfot riwanyakhato rihikakrmokomt. Nhai. Niko bi bingot riwanyakhato rihika-kmokomt. Nikomm arihat wom yimam tfit kfo nuhas hi hanyrfokomm. To nhai, niko tfit muhra kmim kanjo wom yimamn niahato frhik bohik nuhaswomko Jisasrh barkof rihikak-hato hik hanyneft. Yonenm kanjo yuhre mmemthu mingapam kawuko. Tafi tat yeshrim yekahko. ¹³ Yuhre mingapam yewakomn mumiwuko. Nhai hti dukahato mekahko ndart fasoh nefet. Ndartne Bro Nkifrarhu dborioh nefet. Nhai. Be yon mumenm kanjo nammo bomumiwuko. ¹⁴ Bro yimam tat yeshrim yewa kanjo Bro Nkifrarhu tamoh tamoh nefm hti duka tungunanomm. Bro yimam rom bi tamoh tamoh nefm bi mhti fnahetmn tamoh tamoh nefm hti nhtewumm. Fasoh nefm htineft kangm ndt fasoh nefet. Dborioh nefm kangm ndm dborioh nefem.

6

Niko toh bmtaruhakomm Bro Nkifrar tawo yak marnyarahko

¹ Jisasrh mrokfom pthaneft mirahko yon mumenm ptha mumiwa kanjo be rpa mrokforpat waptha thu waptha thu hasonom. Inji narahko to be yimam kuny rahurpam tuhato rahurpam tohnita kanjo inji narahko. Tu kuny hingrnaneft rahum tunihato kunyr kasinyahato kuny nyisofr hingrna hanyhato hingrna pskitwor. Nom inji nakfot. Nhai kuny rahum wakasinya thu wakasinya thuwa kanjo kasinya thu hatohkfot. Ndar mrokfomwe inji korhwom yimam rahurpam wakasinya thu hatohwa kanjo. Mirahko nd nom yak bebwa fasoh nefroh mong troh yuhathu mrokfom yo Jisasrh mrokforoh wany yakio yuhathu mrokfom ² yo baftais-hato tir hta yuhathu mrokfom yo nohhato sinya yuhathu mrokfom yo nd wuroh bro kotkfothu mrokforpam waptha thu waptha thu hasonom. ³ Wom nfri nfri mrokfom yakhato ndmn rim pthata mphata hanykfot. Nd bi barkof yimaroh riwanyuk mro-kforoh pthaneft rot nhai mrokfom. Bro Nkifrar kangr tfit, “Wom nfri nfri mrokfom ahiyanko. Hehato ayak hta bohtayanko nd nfri mrokfothu pthaneft.”

⁴⁻⁶ Niko bi Jisasr nohhato fakmorko. Yakhato Bro Nkifrar fak marnya bomarnyamorko. Bro Nkifrarhu Yafothat bi yimako thu nawoh nhombramottko Bro Nkifrarhu mrokfot niko wanymohat nhai kfo marimoko, “Yuwi furent.” Nhai. Niko wanymohat kfo memoko, “Tu fipet mrokfoyet.” Bro Nkifrarhu bbukapam bi htimo-komm. Kto Jisasrh yawihna yihar tfit nd rorhu bbukeft htirahkomt. Nd nd nefm niko bi hti hnamokomm. Tfite nikmoh womr kfo smina tanyhato mong trohrahrm, nd yimarhu Bro Nkifrarpno iyuk yihotat rinnfakraht. Nd yimar inji naneft Jisasr bgre mis kisinyamo yimaroh

dukefm kangr ayaka. Jisasr kisinyamo yimam inji namom. Tafontn kisinyamotmr yimam yihom kuninfarni mkuninfarnamoumr. Nd yimam namo yuhatn kangr inji anaya.

⁷ Tamohmpno nd yimar Bro Nkifrarhu nayuk nefm kfo smina tanyhato nnndo frfnahniyuk yimar nhai tfit nieruhatr brbo Bro Nkifrapno? Afo wom mrokfot akfokahtant afo wawanywako. Nd ar bbinysoft buriohr wih frifrewatrt yewurit nuhta neft sinya marnyewut. Yimam htihato kfo kangm, “Bro Nkifrar thu warhiwatrm sinyewum.” ⁸ Yo mim gondhatahato yapkott sinyewut kangnom, “Nd bbinysoft bi fasohet.” Inji htihato nhai mswir htakaht nd tkitt. Be hta wus furefiwut.

⁹ Nd mrokfot be tu bro krho mrokfot fahuyanko. To mirahko ka nd mrokfot kfiwa yuhat kanjo ka be mibatinirah-nom. Awi nhai. Bro Nkifrar tor. Rorn tfit toh raforahrko.

¹⁰ Niko Bro Nkifrar hik htfaswa yimam hti yuhuwahfato hifa kak marnya hnewukomm. Nd dborioh nefm niko na hnewam Bro Nkifrar nhai duka mmoruhatrm. Bro Nkifrar nhai wom yimam kanjo duka mmokahrm. Rorhu hik htfasyuk yimam kak marnyewukomm tawo yak marnyarahrko. Nd niko hikwa yimam yak marnyewa nmbuhat Bro Nkifrar htitwartin hti yindhorworko. ¹¹ Nd dukeft wayakitohkahkomm nd niko newa nefm wana yakitoh hany-wakomm. Inji na hany inji na hanyrahko nd Bro Nkifrar kfo memohat Jisasr nikmoh bro tohak prisr rhurahr, to mirahko ka yuwi furewur. Nhai. Kfo mifmor, arihat bi nikmoh bro tohak prisr tohwor. ¹² Nd dukeftpno yima yuhum atohetohtwamko. Mirahko ahrekahnomn kaht kanjo nd dborioh nefm aminoh hmbrenim. Bro Nkifrar hik hnomo nkifram kanjo toh bmtakfot. Rom to inji namom. Bro Nkifrar kfomorm dborioh rhu nmbuhathu hanyeft. Be nd ror kfoyuk mrokfot nhai mongko htarmomt. Nhai. Be nd dukefrparpno toh hany toh hanymomn kto htimom nd Bro Nkifrar kfomo mrokfot nhai kfo furarmorm. Tu fipet mrokfot kfomor.

Bro Nkifrar bi finji kfir to be tur kfoyuk tng yuhatn hikwor

¹³⁻¹⁴ Dukakfot Abrahamrhu tndht. Bro Nkifrar kfo memor, “Kfo mifwann, nini ninhu frikeft be yak marnya-ruhank. Yak marnyarhotanko ninhu frikeft rifinysaraht.” Bro Nkifrar dukeft duka memor, “Abrahamr mirahr ka kfo furewura.” Inji dukahato kfo memor, “Mirahna ka be kfo furewura. Nd na kfo yamuhat nini ninhu frikeft yak marnyarhotanko nd ninhu frikeft rifinysaraht, nd mrokfot kfo mif mifann yak marnya mifruhank. Kangn na ka yima furaya. Nhai. Na Bro Nkifraya. Na kfiwa tngt kto htirahnt fipet rhuraht.” ¹⁵ Abrahamr nd Bro Nkifrar kfoyuk tngt wanyhato nhai marimor, “Duka mmoruhant.” Nhai. Be yima yuhurn rhumout nd Bro Nkifrar kfoyuk tngt. Memor, “Afo hti hanyruha nd kfoyuk mrokfot fipett rhurahte. Nhai.” Abrahamr duka haso ee kto htimor nd Bro Nkifrar kfoyuk mrokfot fipett rhumot.

¹⁶ Yimam nakfo hanyjorna thoft to inji newum. Womr sinyahato womr kfo famurr, “Nd yiha nd shrt hiruhann.” Tfifit womr kfo famurr, “Na miruha kfo mifwona. Yuwi furarahna.” Inji kfitr womr kfo famurr, “Bare! Na yon mumena kfiwann? Na nhai kfo furakaha. Na kfo furaneft Bro Nkifrar yak tutfarahra.” Be bi inji kfiwire, be womr kangr, “Awi kfo mifwora.” ¹⁷ Bro Nkifrar bi kfir tamohroh naneft nhai tfit kto kfo kekutkahr. Nhai. Bi kfir tamohroh naneft to be tur kfoyuk tng yuhat kak hikwor. Abrahamr kfo memohat Abraham frikeft yak marnyaruhann, nom to nd frikeft, nmoh dukefm duka kangm yak marnya twanhohahrnom. ¹⁸ Mrokfotn rpat napthahato yak tkafneft ndt htitwonon Bro Nkifrar yimampno bi fak tkaftrt wom mrokfot nhai tfit mtoh kekuthato kfo mikahr, “Nhai inji narhota.” Nhai. Bi finji kfir to be tur kfoyuk tng yuhatn hikwor. Nd rorhu nefm htitwanomn nmoh yima yuhum bmtewumnom. Ndnett nmoh fasoh nefm thu dbruf thumonommn Bro Nkifrar kaktoh kihwonon. Ndnett nmoh dukefm nhai wom krhokahnom. Duka kangnom nmoh rhu nmbuham be Bro Nkifrar yak marnyarahr. ¹⁹ Nd dukeft yorhwattnom nmoh yima yuhum be nd Bro Nkifrar kfoyuk yima yuhurn yak dbkaf kihhato be nd dukefrparpno korhnom. Nhai tfit wom dukefm rhukahnmom. Be nd dukefrn nmoh yima yuhum thu bmtewatrnom Bro Nkifrarhu mrokfot kaktoh kihwonon. ²⁰ Jisasr bi nyina yuhatn bi tohak hanymorn Bro Nkifrapno yiyuk yihotohat fak nukak hanymort. Bro tohak prisr Bro Nkifrar

rumoa rumt yimoa kanjo inji yimor hefenr. Rorn nd bro tohak pris hingrneft be toh nkifranirahrt Melkisedekr kanjo.

7

Melkisedekr tu bro yufet yimayer

¹ Nd Melkisedekrhu hingrna toh nmbuhat kfo nuhasruhanko. Nd Melkisedekr Salemt tohmour. Rorhu hingrnefm hus hingrneff kakitohmour, king hingrnefti yo yura myorhekwa Bro Nkifrarhu pris hingrneft. Nd hus hingrneff kakitohmour nd bro kmi Salemt tohmoahat. Wom yiha Abrahamrhu wom yinem Lotr yahr kmim yaknimotmr nmbrtom Abrahamr mongko tone hikhato memor, “Ayihom nrfa kitohanr.” Yimorn yihom nrfa htiyakhato memor tfit kmiko aiya, buha yihotatn Melkisedekrpno mnafurmos. Mnafurhato Melkisedekr sinyahato Abrahamr yak wus hanyhato kfo memor, “O Bro Nkifraye, Abrahamr wayak marnya bomarnyakahtnr atoh marnyatwar.” ² Inji kfonimorr be wom Abrahamr yahrt yihato yakmo wuskam tirhus rmonm htamorm. Wom rmonett yakmorth Melkisedekr hemor. Nd Melkisedekr yufathu yimbu yuhat, “dborioh nefm nayet kingr.” Ror kingmo kmithu yufat, “Salemt.” Salem yufathu yimbu yuhat, “hifa nayak marnyet kmit.” Ror king tohmohat nd kmi Salem thofm kfomoatrm nafak marnyamoum. ³ Nd Melkisedekrhu toh yuhat nhai Bro Nkifrarhu rfa borngt kfo mekaht, “Yifammetr o nkifretr rhumor.” O nhai kfo mekaht, “Nd yiha mmemt hiyaumotrn nd yiha nohmor.” O rfa borngt nhai kfo mekaht, “Pris hingrneft tohmohat nd yiha hingrna tmbhomor.” Nhai nd kfo nuhas mrokfom rhukahm. Nd mrokfom htitihato duka kangnom, “Ka Bro Nkifrarhu yonr kanjo tohmor nd Melkisedekr.”

⁴ Melkisedekr yakitohmo yuhat wadukako. Abrahamr ar Bro Nkifrar hikmoa yimanmoh nkifra nngrajohr. Abrahamr tohhato Melkisedekr htimohat Abrahamrhu dukeft duka memor, “Na nhai ndar yimarhu toheft kanjo tohkaha. Nhai. Ror tu bro yufet yimayer. Ror Bro Nkifrarhu pris hingrneft kakitohwor.” Nd natn nd ror yihato yakmo wuskam tirhus rmonetm htahato wom rmonett Melkisedekr hemor. ⁵ Lifai frikefthu womm pris hingrneft kakitohwomt. Rroh thfa mntwat kfiwit, “Isrerm yakitohyuk tamoh tamoh wuskam o tamohm tirhus rmonm htahato Bro Nkifrarhu yufathu hayuk wom rmonett prism hekfot.” Nd prismi Isrerm nhai nndo nndo rroh toh nmbuhat. Rroh nkifrar rpa Abrahamrpar. Nd rpa nkifrarhu yon kunyshu tamoh tamoh wuskam tirhus rmonm htahato wom rmonett prism kahukwom. Nhai be sfno inji hekahm. Nhai. Rroh dukefm duka kangm, “Prism Bro Nkifrarhu hingrniwa yimayem.” ⁶ Nd yima Melkisedekr nhai Lifai frika yuhat niarmor. Ror nndo wom yima furarn nd Abrahamr htamo tirhus rmonroh wom rmonett Abrahamr yakhato hemorr. Bingot Bro Nkifrar Abrahamrpar kfo memor, “Abrahame, ni yak marnyarhotann wom yimam ndt htiruhamn kfo mirahma, ‘Bro Nkifraye, Abrahamr yak marnyewa kanjo nom inji wayak marnyannom.’” Abrahamrpar inji kfomorr. Nhai Melkisedekr inji kformorr. Nhai. To nhai, Melkisedekr tohhato tfit Bro Nkifrar kfo memor, “Bro Nkifraye, Abrahamr wayak marnyatwanr.” ⁷ To wom mrokfot wawanykomt. Womr sinyahato Bro Nkifrar kfo naku kangr, “Bro Nkifraye ndar yimar wayak marnyanr,” nd Bro Nkifrar nakuyuk yimar bro yufetrn Bro Nkifrar nakutrr wom yimarhu yak marnyaneft. Nd nettn duka kangnom, “Melkisedekr tu bro yufet yimarn Bro Nkifrar nakumorr Abrahamrhu yak marnyaneft.” Ndt inji korht.

⁸ Tfit wom yuhat inji. Lifai frika yuhathu yimam pris tohhato Isrer thofroh tamoh tamoh tirhus rmonm yak htatahato wom rmonett yekwa prism nhai toh yifaftakahm. Nhai. Noh frekiwum. ⁹ To Melkisedekr Lifai kanjo pris hingrneft hingrnamohat nhai Lifaim noh frekomo kanjo nohrmor o hingrna hanyhato mhingrna tmbho-rmor. Nhai. Bro Nkifrarhu rfa borngt nhai htikahnom kfo mekaht, “Melkisedekr fnohr o hingrna tmbhir.” Nhai. Ndt htitihato duka kangnom, “Nd ror yakitohmo hingrneft yuhre kakitoh hanitrt.” ¹⁰ Abrahamr ror Lifairoh nkifrar. Nd nettn duka kangnom, Abrahamr yakmo wuskam yak nhtahato wom rmonett Melkisedekr hemohat nhai be sfno inji

narmor. Melkisedekrhu yinhitn Abrahamr tohmor. Ndnetrn wom wuskam yak nhtahato hemorrh. Lifai frikefthu nkifrayer Abrahamr. Melkisedekr bromohat Abrahamr to tfit rorhu mongko tohyuk Lifai frikeft to be nhai womm brokfot, Melkise-dekrpar bromorm.

Ariharhof Jisasr nfri bro tohak prisrhu hingrneftn tu tpiyet hingrneft hingrnewur

¹¹ Bingot Bro Nkifrar Mosesrpno niahato tarioh skurn mtha yuhathu hingrneft boririfhu nuhasmorr. Tfit Mosesrn Isrerm kfo nuhas memorm, “Bro Nkifrarhu tarioh skurn mthanefthu hingrneft inji korht.” Nd hingrneft Aronrhu frikeftn nd hingrneft hingrna yuhat romn yakinohhato kfo hta bohtamoumm Isrerm. Aronr Lifai frikeft niamor. To nd tarioh mtha yuhathu hingrneft rom hingrnamoat nhai tu tpiyet hingrneft hingrnarmoam. Nhai. Yimaroh fasoh nefm nhai yak thu marnyarmoatm. Be kak wunatamoutm yimaroh fasoh nefm. Yimam mi yohwa kanjo be inji yura foh wokmoumt. Nhai tu yimbonett tou yifkasakrmoamt. ¹² Ndnetrn Bro Nkifrar duka memor, “Tfit Melkisedek kanjohot wom nfri prisr yak htaruha. Rorn yimaroh fasoh nefm tou yifkasak marnyarahrm. Nd yatk hingrneft yak tuhaforuhart tfit rorhu nfri hingrneft yuhath yimam hikrahm.” ¹³ Nd Bro Nkifrar yak htamo nfri prisr nndo wom tangishof furar nd pris hingrneft fak htamor. Rorhu frikeft nhai womr pris hingrneft tohhato yimaroh yak tarioh mthayuk yeshrim tarioh mtha wonakrmor. Nhai. ¹⁴ Nmoh Brorhu trha yuhat bi wany bugamokomt. Rorhu trha yuhat nhai nd Lifai frikef yuhat niarmor. Nhai. Ror nndo Juda frikef yuhat niamor. Bingot Mosesr nd pris hingrneft Lifai frikeftn yak htamohat nhai tfit marimor, “Judam yakinohnhotwamm nd pris hingrneft,” tu be nhai. Lifai frikefrpat kfomor nd hingrneftu yakinohnneft.

¹⁵ Bro Nkifrar tfit prisroh yak htayuk wom nfri yuhat hingrnarmoam. Melkisedekr kanjo tohhato hingrnayuk prisr tfit fak htamor. Rorn tu tpiyet hingrneft hingrnarmoam.

¹⁶ Lifai frikefthu yimam nd pris hingrneft yakinoh hawihnamohat nhai be sfno nd hingrneft yakinohrmomt. Bi nd tangimm nd hingrneft rifakitoahkmomt. Thfa mntwat bi romn kfomot nd hingrneftu yakinohnneft. Ndnettnd pris hingrneft romrpam fakito hawihnamomt. Tfit Jisas Kraisr nd hingrneft myakakni-mohat nhai be Lifai tangishofrn nd hingrneft ror myakaknirmort. Nhai. Ror wom tangishofr. Ror nd hingrneft yakmo nmbuhat nhai be sfno, rorhu toh nmbuhat ror nhai nohkfot. Toh yifahtarahr. Yo nhaft rorn yimaroh fasoh nefm yak thu marnyarahrm. Nhai be yak wuna hasoruhatr. Ndnetrn rorn nd hingrneft fakmort. ¹⁷ Yakhato rorn yimam brbo Bro Nkifrapn hany hakurahrm. Nhai be sfno inji kfokahnom. Nhai. Bi Bro Nkifrarhu rfa borngtn Bro Nkifrar kfo memor,

“Ni nd bro tohak pris hingrneft toh thombat

be nd bro tohak pris hingrneftn toh nkifrarahn Melkisedekr kanjo.” *Sng 110.4*

¹⁸⁻¹⁹ Tamohmpno nfri pris yakmonom? Ndt nhai be sfno. Wawanyko. Barkof prisroh hingrneft Bro Nkifrar Mosesrpno kfo nuhashato Lifai frikeft yakinohmot, nhai tu fipet hingrneft hingrnarmoam. Yimam fasoh nefm nahato Bro Nkifrar tarioh mthamoahat nhai yak thu hermoarm. Nhai. Be kak wunatamourm. Ndnettnd Bro Nkifrar tfit wom nfri yuhat fak nuhasmornom. Nd nfri yuhat yirahnom, be Bro Nkifrapn brbo yirahnom. Ndnettnd Jisasrn tohhato nd nfri yihotohathu riwita yuhat kak nuhasaf hanitnom.

²⁰⁻²¹ Bro Nkifrar pris hingrneft Jisasrpno yak htamohat bro mrokfot kfo memor,

“Na kfo mif mifwann, ni nd pris hingrneft yak thoft

be ninn toh nkifranirahnt.

Na bi kfiwohat nhai tfit kfo kekutrhta.” *Sng 110.4*

Ndhtet tngt Bro Nkifrar Jisasrpno kfomot nhai ndhtet kfo nnhu mrokfot wom prisrpno kformor. Nhai. Jisasrparn nd tngt kfomort. ²² Nd nfri yihotat Jisasr hta tehakmot, tot tu dborioh yihotat. Bro Nkifrar kfo hnomo yihotat Jisasrn hta tehakmornom.

²³ Bingot tohmo prism bokm tohmomt nd hingrneft. Womr tohhany toh hanymoarn bi fnohnir tfit wom nfri yimar kakkourt tkitt. Ror tohhany toh hany bi fnohnir yo tfit wom nfri yimar kakkourt tkitt. Be inji nahnatn bokm toh hnamomt nd hingrneft. ²⁴ Tfit Jisasr nd tkitt yakmohat nhai wom yimar myak tuhafhato rorhu tkitt myakruhatrt. Tu be

nhai mif. Be rorrpar tohwohat rorrpar toh nkifra-nirahr. ²⁵ Bro Nkifrapno brbo tohwor. Bro Nkifrapno brbo tohwarn yimam Bro Nkifrapno yinyeft Jisasrpno fasoh nefm wuska yohm rimak yifhonita kanjo inji rimak yifhonitwatmm tfit Jisasrn Bro Nkifrapno yihato kfo dbruf nuhaswatrr yimam Bro Nkifrapno brbo kitwom.

²⁶ Yima Jisasr nmoh bro tohak pris tohneft hifa. Rorn nmoh tamoh nefm yak htarahrm. Rorhu toh nmbuham tu dboriorh mifm, tu Bro Nkifrarhu toheft toh hikwor. Nhai ror wom fasoh nmbuham. Rorhu rhu toh nmbuham tu hifa toheft toh hikwor, nhai wom fasoh nefm. Ndar bbinysoft ror tohhato nd Bro Nkifrarhu thfa mntwathu mrokfom hanyjbornayet yimampno tohmohat, nhai ror marimor, “Rroh yuhat mitohniruha,” nhai. Ror nndo ror turpar. Rorhu nefm ror turpar. Nd fasoh nefm nayetm rom tum inji. Ndnetrn Bro Nkifrar tu yura hefenr fak htamorr. Tu yura myorhekwa tkitt fak htamorr, tu Bro Nkifrar yorhwa tkittn. ²⁷ Prisroh hingrnefti rorhu hingrneft nndo nndo. Nhai rpahtett. Prism tariorh mthewohat yiha yiha nd hingrneft hingrnewumt. Nd hingrneft nhai yihom tohaf hanykaht. Nhai. Barkofm afo turoh nefm Bro Nkifrar tariorh mthanitamr rroh fasoh nefm mong trohworm. Turohm inji nanihato ee womroh tariorh mthewatmr mong trohahukrm. Ndhtet ndhtet bok hingrnewumt. To Jisasr nhai inji wahingrna thu wahingrna thu hatohrmor. Nhai. Rorpar rpa nohrpat nohmohat to be yima bugaroh fasoh nefm rorpar noh wikna buga-morm. Nhai yimam tfit Bro Nkifrarhu tariorh mthayuk yemrom hatone hatohkfot. Rorpar bi nd hingrneft hingrna buga hemornom. ²⁸ Tfite nd prisroh mrokfot akfoya. Pris hingrneft tohwa yimam Mosesrhu boririfhut hikhato nd tu bbinysoft tohyuk yima frikeftn nd pris hingrneft kak htewum. Ndnettnd yimam pris hingrneft yakitohneft kangm, “Bro Nkifrar ahiknom,” to nhai, womnam myak nhiyekwom hikneft. Bro Nkifrar turhu yinemr kfo memor, “Na kfo mifwann, ninn tfit nd tu nyngako mtohekwa prisroh hingrneft yakitohrahnt. Ni nd hingrneft yakni thoft nhai tfit womr yakruhatrt ninhu tkitt. Tu be nhai mif. Na bi inji kfiohahat nhai tfit buha kfo kekutrhot.” Bro Nkifrar htimorr Jisasr tu Bro Nkifrarhu dukeft kak hikmour. Nhai wom fasoh nefm narmoar. Ndnetrn Bro Nkifrar nd mrokfot kfomorr.

8

Jisasr hefenrhu bro tohak priser

¹ Nd Bro Nkifrar htamo nfri prisrhu hingrneftu hingrneft kanga afrhikkahant wawanswakomt. Nd prisrhu hingrneft na kfo hnamot tu kfo mif kfofyt. Jisasr bi tu yura myorhekwa Nkifrapnonko bro mtohakm yekwa gajis, ror bi nd gajis yakhato korhvor. ² Bi yura hefenrn Bro Nkifrarhu rmontn pris hingrneft hingrnewur. Ndt tu Bro Nkifrarhu kunyet nhai yima mifmn kasinyarmomt. Tu Brornko kasinyamort.

³ Nd asha bbinysoft tohwa rmonthu hingrnayuk bro tohak prism rom nhai rhu furakahm. Rom yesrim yakhato Bro Nkifranko tariorh mthewumr. Ndnettnd ror yakinohwa rmontko nhai be sfno rhu furakfot. Nd rmonr yemror kur mthakfot. Nd rmont kur mthamo yemror nhai wom tamoh yemror yakhato kur mtharmotr yimaroh fasoh nefm mong trohrmorm. Nhai. Jisasrhu kkutn yohnemot. Nd kkut yohnemott Bro Nkifrar htimort. ⁴ Nd prism hingrnamoa yemro tariorh mthaneft, nkifra tariorh mtha yuhat afo hikmou. Jisasr yura hefenrn tohetrn nhai nd Bro Nkifrar htamo prisroh hingrneft hikrmor. Ror tur tohwa kmi hefenrhu nfri hingrneft hikmor. ⁵ Rom nd prism hingrnamoa hingrneft, ndar tuha bbinysoftu rmonthu hingrneft hingrnamoum. Nd rom hingrnamoa hingrneft yura hefenr tohyuk rmonthu toh ruhefti hingrneft hingrna nhombramoum. Bingot Mosesri Bro Nkifrar ndar bbinysoftu rmonthu kasinya yuham, rmonthu yuke rifm, bro rifm nnakfo nuhasmohat kfo memor, “You! Mirahn tunhu duka fijo ahingrnayant. Yura kmi Sainait kfo nuhasmo yuharpat wahingrna hiktwa.” Tu yura hefenrhu rmonthu ruheftu hingrna yuhat kfo nuhas bonuhasmorr hingrna hikneft. ⁶ Prism hingrnamoa hingrneft, rom be nndo bbinysoft tohwa rmonthu hingrnejf yuhat hingrna hikmoum. Jisasr ror tu hefenko yiyuk yihotathu pris hingrneft hingrnamor.

Rorn tu yafothet hingrneft hingrnamo. Bingotrhof prism hingrnamo hingrneft nhai yimaroh fasoh nefm yak thurmoamm. Nhai. Prism tarior mthamoahat Bro Nkifrar nd tarior skurn gbeft mthathato nd yimaroh fasoh nefm be kak wunafmourm. Bro Nkifrar bro mrokfot kfo memor, “Nhai mrokfom. Nikmoh fasoh nefm yak thuhirhoyanko, tu dborioh yimakomn nanpno brbo nierahko.”

Jisasr htamo nfri yihotathu hingrneft yuhat tu dboriohet

⁷ Nd yatk tarior mtha yuhat yimam tarior mthahato fasoh nefm yak wunamoahat Bro Nkifrar nhai kfo marimor, “Tarioh mthakahtko fasoh nefm yak thu hiruhanko,” nhai. Ror be kfo memor, “Fasoh nefroh yak thuyuk nfri yuhat yak hambrak hiruhanko.”
⁸ Nkifram yemroye tarior mthamohat Bro Nkifrar nhai hti yindhorrmort. Yimam tarior mthamohat nhai Bro Nkifrapno brbo yirmoam. Ndnett Bro Nkifrar htihato kfo memor, “Na Bro Nkifraya kfiwa, afo wawanyko.

Wom yihar wom nfri yihotar tfit htakruha.

Nd yihotar na tukanpno wukio-ruharn

Tfit mano Isrert rhuyuk kmifpno wakiorahr.

Mano Isrerm tohwamm yo mano Judam,

nd Isrerroh hus kmifpno wakiorahr.

⁹ Nd nfri yihotar nhai ndwom yatk yihotar kanjo rhuruhatr.

Nd yatk yihotarn Isrerm Ijift tohhato na yaknamohat

Isrerm nhai na kfoyuk tng yuhat yak hikrmom.

Nd rroh nefm htihato mong trohmoyanm.

¹⁰ Tfit kto Isrermpno kndhakruha nfri yihotarhu hingrneft tfit nndo rhuraht.

Nanh boririfhut yimaroh yima yuhum rhuraht.

Yimaroh yima yuhum rhuruhatt

nd boririfhut yak hta bohtarahtm na Bro Nkifraya hikneft.

Nhai wom tahi furam o wom tahi nasungwarm kfo tatoruhatm.

Nanpraya rroh Nkifraya rhuruha.

Tukann hti yukatoh hasoruhanm nd nanhu yon kunyshu tamoh tamoh nefm.

¹¹ Rom toh thoft nhai tfit womr sinyahato

turhu kmi thofm o turhu tangiyemrom kfo ttiwon miruhatrm,

‘Bro Nkifrar nikmoh tamo-hemer?’

Nhai womr sinyahato tfit womr inji kfo ttiwonruhatrr. Nhai.

Yufet yimami yufa duha yimam rom tum hti mirahm,

‘Bro Nkifrar nmoh Nkifraye.’ Nhai womm hti mmo-ruhatma.

¹² Rom wommpno nayuk tamoh tamoh nefm

nann yuhuwafhato yak thuhi-ruhanm.

Rom nayuk fasoh nefm nhai tfit dukarhotanm.”

Jeremaia 31.31-34

¹³ Nd Bro Nkifrar kfomo wom nfri yihotarhu htaneft, ndt duka hanyakfot. Bi nd nkifram hik hnamo yatk yihotar be yau trohaf bugarahnomr. Bufutn rinatuahakrahtr. Nhai tfit wom yihota yimbuyefett rhuruhatt.

Bro tohak prism yemro kkut yaknihato Bro Nkifrar mhtahemoa yuhat

¹ Bingot nmoh nkifram afo yatk yihotar hikhato Bro Nkifrar rhu rifinyhato kfo tato inji namoahat nhai be busafon furatn rhu rifinyhato kfo tato inji narmoam, nhai. Tu kfo hta yuhamn kak hikmoam ser thaye hingrna nhombret rmontn rhu rifinyhato kfo tatomoumr Bro Nkifrar. Rmont hingrnamoahat inji hingrnamoahat. ² Rmont kasinyamoa tkitt gna habri htfasmoumt. Gna habrinihato sertha rmonr kasinyamoumr. Kasinyahato gnanhehm gnamoumm. Biko mruhak-moa gnanhehr futamoumr Hnaru Gnar, tfit tu wuroh gurko yiho rhumoa tpurhe kutamoumr tu Nngrajoh Hnaru Gnamifr. Nd barkof mruhakyuk Hnaru Gnanhehrn htamoumm kah hta funamoa lam tndatikt, yo

Bro Nkifrar bretpa mhtahemoa tik mkut. ³ Tfit ndwom tu wuroh gurko yiho rhumoa gnanhehrn tor tu Bro Nkifrar rhumoa tu Ngrajoh Hnaru Gnamif mifr. ⁴ Nd barkof biko mruhakyuk Hnaru Gnanhehrn hifa mthet mifipam tariohmoa teborent htamoumt. Hemkuye hingrnalomtn tfit briahakorn gore tarioh trku hmbriyafmomt. Tu Ngrajoh Hnaru Gnanhehmifrn Bokis Kontrakt tohmout. Rot nhaf gore tarioh trku hmbre bugamomt. Yiro nd Bokis Kontrakkfotn rhumoum gore hingrnet mana roht, yo Aronr yaki-tohmo miswa fnahet kio muss, yo tahi mkuf, boririfhum htamo tahi mkuf. Nd nd shrm rhumomt nd Bokis Kontrakt. ⁵ Nd Bokis Kontrakthu mnbifatn hus mounmotf Bro Nkifrapno tohwaf hingrna nhombrakmomfn tnamomf mano mano. Rofhu birnam thu sfondwamomfn toh wasi hmbrimoft tu Bro Nkifrarhu Yafothat o marbir rhumoa tkitt. Nd tkitt futamoumt “Fasoh Nefm Mthu Dbrufyuk Tkitt.” Nd tkitt yemro kkut mthu nembongit-moatmt Bro Nkifrar ndm htihato tfit yuhuwaeft niamoattr yimaroh fasoh fasoh nefem kak wunafhemourm. Nhai rim kfo hikak sugarhotanm tamoh tamoh mrokfom. Be inji kfonitanm.

⁶ Nd yiro rmonthu rawoft to be inji hingrna hta bohtamomt. Inji hingrna hta bohtanihato yo prisroh hingrneft riingrnakmomt. Yiha yiha nd barkof biko mruhakyuk rumr prism rim fnahni mfnahnamoumr. Yimam Bro Nkifrar naku kfo inji narahnom o tariorh mtha inji narahnom, romn rim hafkneneft yarim htafo inji namoumm. Romn nd hingrneft hemorm. ⁷ Tu bro tohak prisrpar rim fnah-nimourt tu Ngrajoh Hnaru Gnanheht, tu Bro Nkifrar rhumoa tkitt. Nhai be yiha yiha yirmoart. Nhai. Rpa gunyjimr rpa yiharpar fknenimour. Tfit wom gunyjimr nhaf inji be rpa yiharpar. Nd gnanherr yihom fknenimoahat nhai be sfno fkne furanimoar. Nhai. Yemro kkut yaknihato ndm afo Bro Nkifrapno yihom htamoatrm tu bro tohak prisrhu toh rawofm Bro Nkifrar frwus bowusmourr. Frwusnimoarr ee kto wom yemro kkut htamoatrt met yindarim duka mmonihato namoa fasoh nefm Bro Nkifrar hta wunaf hemourm. ⁸ Nd Ngrajoh Hnaru Gnanhehr yima furam yi duha yinyeft rhumoaahat nhai be sfno. Bro Nkifrarhu Yafothat tafi yibonrmot yima furam Bro Nkifrapno brbo yinyeft. ⁹ Bro Nkifrar rhumoa tkitt hta rafomoa yuhathu yimbu yuhat inji korht. Yimam yewurit yaknihato Bro Nkifrar womm mhtahelhato yo womm tariorh mthamoaahat, nhai yak thu hermoarm rrroh fasoh nefm. Nhai. Nd tariorh mthamoa skurn gbeft mthatihato be kak wunafhemourm rrroh fasoh nefm. Ndnetmn rrroh yima yuhum mduka kurhakmoum Bro Nkifrapno brbo yinyeft. ¹⁰ Yimam brbo Bro Nkifrar yimoahat rorhu boririfhu mrokfomn hikmoum. Boririfhut hikmoa yimam inji namoum. Yemrom yakhato tariorh mthamoumr. Fitoh yeshrim nhai wofnkahr yimaroh yaneft ndm nhai yarmoamm, bupam nhaf inji, yo tamoh nefm namoahat yuk fnah inji namoum. Nd nefm be boririfhu yuhat hikmoum. Be nd briaha thatipthu hingrneft hingrnalomt. Nhai tu yiro yima rifhurio yak marnyarmoam. Bro Nkifrarhu dukeft duka memor, “Afo nd boririfhut ahik tebfi hanykahmn kto nd fasoh nefroh yak thuyuk yihotat yak nuhasruham.”

Fasoh fasoh nefm Kraisr kkutn yohnemott wuthanimom

¹¹ To tfit arihat, bi Kraisrn bi bro tohak prisr tohwor. Rorn nd Bro Nkifrar kfo hnamo hifa rhu nmbuhat fak htamornom. Ror hefenr yimorn Bro Nkifrapno brbo mrhumor. Nd ror mrhumo tkitt nhai ndar bbinysft hingrnamo rmont kanjo rhukaht. Nhai. Nd ror mrhumo tkitt tu be nnndoht rothu ruheft. Bro Nkifrar hingrnayett rothu ruheft nnndo. Jisasr nd kmit yimorn tu hifa dboriob hingrneft hingrnamor. ¹² Kraisr nd tu Ngrajoh Hnaru Tkitt yimohat nhai bro tohak prisr namoa kanjo meme kkut o bulmakau kkut yaknihato rim tariorh mthamoa kanjo inji rim tariorh mtharmor. Nhai. Ror tu yimohu kkutn nd hnaru tkitt rim hafknenimor. Nd kkut rim hafknenimot to be nd rpa yis yimohat to be nd yiharpa Bro Nkifrar htihato fakmiyakmornom. ¹³ Yimam bb kunys ruhetm yo yima tpim faktohm nhai bi Bro Nkifrarhu rmont fknihato kfo bruttnakahm. Afo prisrpno yihato rorn meme kkut, bulmakau yiramrhu kkut yo bulmakau yogroh kandhi tounpam yekwarr hisop ghaye thu yifakhato frppri wunahato kak wus bowusworm. Nd hingrneft hingrnositatrm ee Bro Nkifrarhu rmont yinyeft nhai

mrokfom. ¹⁴ Nd boririfhut, bingot Bro Nkifrar hingrnamo barkof yihotarhu boririfhut hikwom. Arihat bi Kraisrn tfit tu dborioh yihotar htakmorr. Kraisr nohhato nd nfri yihotar htakmorr. Nhai wom tamoh nefmpno nohrmor. Nhai. Mgogra yimar be noh furamor. Tu Bro Nkifrarhu Yafothatn thu bmtamottr kku bebt hatohmohat nhai marimor, "Yakrmiruha." Ror hatohmo kkut Bro Nkifrar htihato nd yimam yak bebwa fasoh nefm fak thumorm. Arihat Bro Nkifrarpno yinyeft nhai tfit wom duka kinyaki hanykfot. Be yi furakfot. Ndnatn ror kfiwa yuhatn hikkfot.

Jisashru kkut kfomot nfri yihotar Bro Nkifrarpno wukiomor

¹⁵ Bi Kraisr nyina yuhat tohak hanyhato rorhu kkut kfomot nfri yihotar Bro Nkifrarpno wukiomor. Ndnett yimam rorpno rim tohneft be yakrahm nd Bro Nkifrar kfoyuk rhu nmbuhat. Nd yimam yatk boririfhut hikmoam rom buga Kraisr nohmo nmbuhatn rom rpat noh wikna bugakmorm. Rom nhai wom mrokfom nd nfri yihotar yihato Bro Nkifrarpno brbo yinyeft.

¹⁶⁻¹⁷ Jisashru kkut kfohato nfri yihotar hingrnamo nmbuhathu mrokfot afo kfo nuhasrhantko wawany-swakomt. Nmoh nkifram nhai mkfo fnah marimom, "Womr yuhre yima nfri toh hanyetrn womr bmbri tkitt yakkfot," nhai. Afo hti hanymoum womr bi fnohnir ee womr tkitt yakhato rorn tfit yifemmourm tamoh tamohm womr noh htaniyukm. ¹⁸ Bingot nd yatk yihotar yimam yau yaknimoahat, nhai be sfno bmbri yau yaknirmoam. Nhai. Barkoft afo wom yemror washato rorhu kkutn Bro Nkifrar htimoarn ee yimam nd yihotar kfo fakiomourm yaunef. ¹⁹ Inji namoum. Barkopam afo Mosesrn boririfhu mrokfom kfo nuhas hik buganimorm met yindari bugam. You tfit nd bulmakau yogroh kkuti memeroth kkut yakhato rorhu kkutn Bro Nkifrar htimoarn ee yimam nd yihotar kfo fakiomourm yaunef. ²⁰ Thu ppri wuna hanyhato kfo memor, "Nd nfri yihotar bi yima kkupampno bi kak dbkafwanr. Tot nd yuhatn Bro Nkifrar kfomorko hikneft." ²¹ To nd yuhatn Mosesr hikhato yemro kkut yakhato Bro Nkifrar rhumoa rmont thu ppri wunanimortn ee tfit nd yiro rmont rhuyuk wuskar rpat thu ppri wuna bugamorr. ²² Mosesrhu boririfhut yakitohmohat, yemro kkut kfomout tamoh tamoh nefr wuthar rhumour. Yemro kkut nhai yohnerfot nhai met yindariroh fasoh fasoh nefm mong trohhermoarm.

Kraisrhu kkut kfomot fasoh nefm fak thumorm

²³ Nd rmont yimam ndar bbinysoft hingrnamot, Bro Nkifrar yorhwa kmi hefenrhu ruheft hingrna nhombra-moumt. Nd rmont hingrnamot duka memom, "Yemro kkut hta duha yirah-nomt be nhai Bro Nkifrar brbo nieruhatr. Ndnett thu ppri wunakah-tnomt Bro Nkifrar htiruharn brbo nia toh tkafrahrnom, nom rhu rifinyhato kfo bruttna kfo tatoneft." Nd hingrneft ndar bbinysoft hingrnamot inji hingr-namomt. Yura hefenrko nhai yemro kkut Bro Nkifrar htihato yima yuhur marnyarmorr nom rorpno yinyeft. Nhai. ²⁴ Yima Jisashru kkut kfomot, Bro Nkifrar nd kkut htihato fak miyakmornom. Jisashru nhai nohhato ndar bbinysoft hingrnamo rmontn fknenirmor. Nhai. Nd arahat Bro Nkifrarpno yorhwarn nom kfo bruttna hasi-wurnom. ²⁵ Bi nkiframpno ndar bbinysoft tohmaa rmouthu tu Ngrajoh Hnaru Gnanhehr bro tohak prism fknenihato tariorh mthamoahat nhai be sfno fkne furanirmoam. Nhai. Yemro kkut kfomout yihom fkneni-moumt nd Bro Nkifrar rhumoa rumt. Rpa gunyjimr rpa yiharpar fkneni-moumt. Nhai be yakrpak yakrpak fknenirmoamt. Nd bro tohak prisr yaknimoa kkupam nhai turhu yima kkut yaknihato yirmoar. Nhai. Yemro kkupam faknimour. Nd yemro kkutpno fknenimour. Jisashru nhai. Ror nhai yiha yiha yi hatohrmor. Nhai. Ror be rpa yiharpa yihato mnohmohat, to be.

²⁶ Nd arahat Bro Nkifrarpno yorhwarn nom kfo bruttna hasi-wurnom, nhai htirmonom Jisashru nhai minohhato tfit hefenr mtoh tany tfit yawihna minoh-hato tfit hefenr muh inji

narmor bok yiham. Nhai. Ror rpa niat niahato minohmohat, to be. Bro Nkifrarhu nia yihat bi brbohtn. Ndnatn minohhato to be nd nom kiminysaftamo mtitikt nd yiha puk dbrufakmornom. ²⁷ Ndar bbinysoft tohwa yimam nhai tahi nrwim kanjo toh nkifranikahm. Nhai. Nohwom. Nohnitamn Bro Nkifrarhu kotkfot toh garitwom. ²⁸ Krais Jisasr to be rpa yuhat inji namor. Rpa yiharpa mnohhato bok yimaroh fasoh nefm ror nohmo yiharn be Bro Nkifrar fak thumorm. Kraisr noh tany yimohat tfit wompam nierahr. Tfit nia thombat nhai tfit wompam nohruhatrnom. Nhai. Be nieruharn ror toh gari hasoyuk yimam hifa rhu nmbuhat hirahrm.

10

Bingot tarior mthamoahat fasoh nefm Bro Nkifrar nhai yak thurmoarm

¹ Tamohmpno Jisasr nohmor? Mna yuhat inji korht. Bingot Bro Nkifrar Mosesrpno yihato boririfhu nuhasmohat boririfhu nuhasmorr Bro Nkifrapno kfo bruttna inji naneft. Kfo hta nuhasmorr Judam nd mrokfo yuhat hikmoum. Nd rom boririfhu nuhasmo yuhat hikhato kfo tatomoahat memoum, “Ka tot tu hifa rhu nmbuha yakyuk yihotat.” To nhai. Tu hifa rhu nmbuhathu yakyuk yihotat tot rirhumout. Rom be inji mkndh wuna tanymoumt tu yihota yuhat. Rpa rpa gunyjimm rmont yihato Bokis Kontrakt rim frppri wunamoahat yimaroh fasoh nefm nhai yak thurmoarm. ² Nd rim frppri wunamoaa kkut Bro Nkifrar ndt htihato yimaroh fasoh nefm bi ayak thuherm, nhai tfit duka krho hanyhato wompam yi hatohrfotm. Nhai. Bi nd rpa yispno yak thuhefotrm nd tarior mtha hingrneft be myafhonirfotm. ³⁻⁴ To nhai, gunyjim gunyjimm kkupam yakhato Bokis Kontrakt thu ppri wunamoahat Bro Nkifrar nhai yak thurmoarm. Nhai. Nd fasoh nefm rhumoatm tfit waduka thu waduka thumoumm.

⁵ Ndnatn Jisasr yuhre bbinysoft nia yibon hanyetrn Jisasr sinyahato Bro Nkifrar kfo memor,
“Yeshri mhta hihato tarior mthamohat
nhai hti wofnrmonm.

Yemro skurn gbevr nhai wofnrmonr.

Inji hti hhrehkato wakfomotn bbinysoftu yimaroh thatipt kanjo fak nhombra-nimoya.

⁶ Yemrom yakhato tarior kandhi gunahato krn gbevr muhwohat
ndm nhai mthatihato yindhor-kahn.

Yemro kkut yakhato thu pprimohat

Bokis Kontrakt nhai ndm htihato yima yuhur yindhormoarn. Nhai.

⁷ Bro Nkifra, wahtina. Na asoya.

Ni tamoh dukefm korhwomn, mirahn aduka kinyakiya.

Tunhu bro rfa borngt kfomo yuhatn kanga,

‘Nann anohkahta nanhu kkut htihato

yimaroh fasoh nefm yak thuhianm, nhai mrokfom.

Na yibonwa nohneft.’”

Sng 40.6-8

⁸ Nd ror barkof wukfonamo mrokfot tfit wompam kfo memor, “Yeshri mhta hihato tarior mthewohat nhai hti wofnkahn. Yemro skurn gbevr nhai wofnkahn. Yemrom yakhato tarior kandhi gunahato krn gbevr muhmoahat ndm nhai mthatihato yindhor-moa. Yemro kkut yakhato thu pprimohat Bokis Kontrakt nhai ndm htihato yima yuhur yindhormoarn. Nhai.” (Nd nd nefm Mosesr Bro Nkifrapno yakhato yimam hikmoa nefm nhai yak thurmoamm yimam namoa fasoh nefm.) ⁹ Ndnatn Jisasr kfo memor, “Bro Nkifra, wahtina. Na asoya. Ni tamoh dukefm korhwomn, mirahn aduka kinyakiya. Tunhu bro rfa borngt kfomo yuhatn kangn, ‘Nann anohkahta nanhu kkutn htihato yimaroh fasoh nefm yak thuhianm nhai mrokfom. Na yibonwa nohneft.’” Ror inji kfomohat to nd nkifra hingrneft nkifram hingrnamoat fak thumort. Tfit turhu nfri hingrneft yuhat fak htamor. ¹⁰ Jisas Kraisr Bro Nkifrar kfomo yuhatn hikmorn nohmor. Nhai bok yiha noh hatohrmor. Nhai. Rpa noht nohmohat to be. Nd yiharpa nmoh fasoh nefm rorn yaknihato mhanohmotrm nom sfno yimanomn Bro Nkifrar htihato yindhorwor. Nhai be sfno, bi Jisasrn mhanohmorm nmoh fasoh nefm.

Kraisr nohmo yuhatn tot tu fasoh nefroh yak thu yuhat

¹¹ Prism tarioh mthaneft hwe fnah hwe fnah tarioh mthewum. Nd rom tarioh mthewa yemrom nhai wom nndohtet nndohtet yemrom yakhato tarioh mthakahm. Nhai. Be rpahtet yemrom yakhato tarioh mthewum. Rom inji newohat Bro Nkifrar nhai nd tarioh narotwa gbefr mthatihato yak thuhikahrm fasoh nefm. ¹² Prism yiha yiha tarioh mtha hatohmoum. Jisatr ror nhai inji na hatohrmor. Ror rpa noht nohmohat to be nd yiharpa yima bugaroh fasoh nef bugam yakni buga hemorm rorn mhanoh bugamorm. Mhanohhato be mrhumor Bro Nkifrarhu tu bro yufa yahuka tirmifko. ¹³ Mrhu-hato afo garitr Bro Nkifrarn, kangr, “Nd yimam na Jisasa tone dbombha hatohwa yimam afo Bro Nkifrarn nanhu yinhtin ahtarm.” ¹⁴ Dndnatn Kraisr rpa nohtpno yimaroh fasoh nefm nohmohat to be rroh yima yuhumio wutham rhumom. Nhai wom tamohm wom rhu hasormom. Bi wuthamn Bro Nkifrar frwus hasiurmio yima yuhum. Kangr turhu ruheft kanjo aruh hasom.

¹⁵ Nd Bro Nkifrar yimaroh fasoh nefm yak thumo nmbuhat, to mirahko ka turpar pthamort nd mrokfot. Nhai. Tu Bro Nkifrarhu Yafothat to be rpa yuhat kfo hikmof. Nd Bro Nkifrarhu Yafothat kfo memot, ¹⁶ “Bro Nkifrar kfo memor, ‘Tfit kto rompno kndhakruha nfri yihotarhu hingrneft tfit nndo rhuraht. Nanhu boririfhut yimaroh yima yuhum rhuraht. Yimaroh yima yuhum rhuruhatt nd boririfhutn yak hta bohtarahtm na Bro Nkifraya hikneft.’” ¹⁷ Tfit wom kfot kfo memor, “Rom wommpno nayuk tamoh tamoh nefm nann yuhuwaftato yak thuhiruhanm. Rom nayuk fasoh nefm nhai tfit duka-rhotanm.” ¹⁸ Bro Nkifrar bi mong trohefirm nd yimam nayuk fasoh nefm nhai tfit yemrom yaknihato mtarioh mthakfot. Nhai. Ror to be bi mong trohrm nhai tfit wom dukakahrm.

Bro Nkifrarhu dukefrparn rhuhato Bro Nkifrarpno brbo yikfot

¹⁹ Barenko, Bro Nkifrarpno brbo yinyeft, bi nhai wom mrokfom. Jisasrhu kkut bi yohnemotn nmoh fasoh nefm bi fak thumorm. Mirahko tfit wom aduka kinyaki hanynom Bro Nkifrar yorhwa tkitt yinyeft. ²⁰ Nd Bro Nkifrar rhumoa tu Nngrajoh Hnaru Gnar bro yikop rmonthar hir rafomourr. Nhai yimam yihom fnahnifikfot. Jisasr nohmo yiha nd rmonthar buha wuyoh tnehakmorn myoh tnehnimorn mku mku rim hir mhirmof. Nd yiha Bro Nkifrar rhumoa tkitt yihotett riruhakmot. Bingot nhai yihotett rhurmot. Jisasrn nd nfri yihotar fak nukakmorr. Tor tu Bro Nkifrarpno yita yihotar. ²¹ Jisasr nd nfri yihotar hingrnahato ror yimorn hefenrhu bro tohak prisr tohwor. Tohhato Bro Nkifrar hikwa yimam rorn tohukatohhato kukatohworm. ²² Bi Jisasrn nohhato nd nom hta rafomoa nefm bi rorhu kkutn frwus bowus thumotm. Frwus bowus thumottm bi mong troh bugamonomm. Mong trohhato baftaismonom. Ndnett n nom Bro Nkifrarpno yinyeft be rorrparn duka duka yikfot. Nom Bro Nkifrarpno yinyeft duka kinyaki hany juha. Bro Nkifrarpno brbo ainyom. ²³ Bro Nkifrar bi kfomor hifa rhu nmbuhat hanyeft. Ror kfoyuk mrokfom nhai kfo furakahrm. Kangnom hefenrko he mifahrnom nd hifa rhu nmbuhat. Ndnett n moh dukefm nd Bro Nkifrar kfoyuk mrokfotn duka duka rhu hasokfot. ²⁴ Nom Bro Nkifrar hikwanom tunom nahti duka nahti dukakfot. Womr tamoh nefeter, ni womn yihato womr hti dukakfot. Tawo womr ninhu neft htihato ror nd yuhat hikrahr. Tunom inji rinahtiyak rinahtiyak narahnom be nd nefrpas rhurahtnom. ²⁵ Wanyakmoya memom, “Rhu rifinyneft nhai rpat sinya bugahato rpat rhu rifinykahko.” Womm turoh kunymn korh hasiwum, womm nndo hutraf habriwum. Ndt nhai hifa neft nakahko. Jisas Kraisrhu nia yihar bi brbohwor. Ndnett tuko rpat rhuhato Jisasrhu mrokfom nakfo bmta nakfo bmtakfot. Nakfo bmta ruhakomm Jisasrhu mrokfot nhai yafho thuruhatkomt.

Bro Nkifrarhu Yonr mong troh duha

²⁶ Nom bi Bro Nkifrarhu fipet mrokfot wanyetnom ni womn mirahn frfnahnihato akfo amiya, “Bro Nkifrarhu mrokfot afo niko womrpako warikhaf hanykomt. Na afo wurhat rim yau-efiwa.” Ni yima inji wany sany hany-hato mong trohnirahnr, na kfiwann,

be tu yohrafo tanyrahnt tfit tunhu niayuk yihotat. To fitoh yuhat tfit nieruha? Bro Nkifrar nhai tfit wom yakmiyak-ruhatrn. ²⁷ Be bro yakrme dukefrpno Bro Nkifrarhu bro kotkfot toh gari hasorahn. Toh gari hasohato nd bro kotkfotn ni nd Bro Nkifrarhu mrokfom mong trohyuk yimani rorpno nahti dbnotwa yimam rpat yakruharko tu bro funa nanyjaret kahtn yiho turahrko. ²⁸ Afo yatk yuhat yimam tohmohat Mosesr kfo nuhasmorm Bro Nkifrarhu boririfhut. Nd boririfhut wom yimar kfo hanyjbornanihato yifirn wom neft rim netrt, husf o husfirpa yimam htihato kfo nriyafmr, nd yimar nhai yuhuwahfato rhurmoar. Nhai. Kotkfot tohnihato was hehur thumoumr. ²⁹ Nd yatk boririfhut hanyjbornamo yimam inji namoumm. To tfit arihat Jisasr htamo nfri yiho-tarhu boririfhut yimam hanyjbona-nineft ka hifa rhurahm? Na kfiwanko nd yimam be tu bro krho nmbuhuat yakrahm. Wom yimar Jisasrhu kkupamn yihotar yak nukektmr rorhu fasoh nefm Jisasrhu kkupaye yuk kifsa thunihato tfit kto mtob kekuthato Jisasrhu kkupam kfo famurm, “Nd Jisasrhu kkupam be kkupa furayem. Nhai yafotha duhatem.” Nd yimar inji kfoyukr bro krho nmbuhuat yakrahr. Yo womt, inji nd yimar kfo famur, “Nd Jisasr hingrnamo hingrneft nhai tu Bro Nkifrarhu Yafothatpno hingr-narmor. Fasoh tahi yifonroh bbukeft-pno hingrnamor.” Nd yimar Bro Nkifrar yak tutfarahrr. ³⁰ To tamohmpno yak tutfaruharr? Mrokfot Bro Nkifrar bi kfomort. Kfo memor, “Hanyjborniwa yimam na tuka htiruhanm. Nhai wommn. Na tuka.” Wom mrokfot kfo memor, “Tuha kot tohyuk tkittn tukanhu met yindarioh nefm yak nhtaruhanm.” Tot inji Bro Nkifrar kfomo tngt. ³¹ Bro Nkifrar tu bro nanyjaret Nkifrayer. Ror namburhato afrwon-tarnom, nhai toh bmtaruhatnom. Mirahm, “Nndo kkr ritmn rim wuttho yibuknewum.”

Bro Nkifrar yikitoh kihhato tohkot

³² Niko tuko wadukako niko barkof Bro Nkifrarhu mrokfot wanyhato rihiakmohat kmi thofm htihato nambur memom, “Tamohmpno nd Jisasr hikwam?” Inji namburhato memom, “Wom nefm anakahtnom tfit mkekutakrahm.” To nhai. Niko hifa nhai wohsisrmoko. Hifa toh bmtamoko. ³³ Wom yiham yima rifiny buhamn kfo sinou bosinou, kfo yimtna boyimtna, kuninfar wuna inji namoumko. Wom yiham womm bi inji newumme niko womko rpat yihato rpat womm tohnuhaknimoakomm rpat kfo nyingo fnah inji namoumko. ³⁴ Niko toh hasohato yimam niahato nikmoh womm mkitumakhato kalabus hanymoahat niko womko nhai yakrme trohrmoa-komm o be yukatohrmoakomm. Nhai. Rom finji namoumm niko womko brbo toh tkaf inji namoukomm. Krhopam rpat fakmoukomm. Yo yimam niahato nikmoh wuskam myak rhoptakni hemoahat nhai namburhato tone hik inji narmoakomm. Nhai. Niko be hifa yindhor yima yuhumpno kfo memouko, “Nhai mrokfom, ayaknimm. Nom nhai namburkoff.” Nikmoh dukefm duka memouko, “Tamohmpno nd fasoh wuskampno anamburnom? Nmoh tu dboriorh wuskam Bro Nkifrar kfomom yura hefenrn korhwom. Nd fasoh wuskam ayaknimm.” Ndhtet dukefmpno rhumouko.

³⁵ Niko hifa Jisasr fak hiknamokomr. To tfit mirahko tfit ayafhoninomr. Yakitoh kihhato toh bmta hasorahko, tur yimayer hti dukarahrko. Nd ror kfomo hifa dboriorh rhu nmbuhuat hirahrko. ³⁶ Bro Nkifrar kfoyuk yihota yuharpak yak hik hasokfot. Inji yak hik marnya hasorahkomr, be nd Bro Nkifrar kfoyuk hifa rhu nmbuhuat wuroh yiharn yakrahkomt. ³⁷ Kraisrhu yawihna yihar nkifram yikitohmo rfa borngtn kfo memot, “Nd yawihsayuk yimar bi brbohwor yawihsaneft. To mirahko ka wukuknarahr yawihsaneft. Brbo htiyekwokomr. ³⁸ Yimam nanhu yima yuhurn rhu hasiwamn ror fawihner, na yindhorhato yakkroyanm nanopno toh nkifranirahm. Yimam nanhu yima yuhur rhu hasohato tfit kto nd yima yuhur fafho thunimr, be nd yimam ror yawihsna thombat na nhai yindhorhutanm.”

³⁹ Awi nom nhai mrokfot. Mirahko aduka kinyakinom. Nom hifa. Nom nhai wom yimam newa kanjo Bro Nkifrarhu yima yuhur rhu hanyhato tfit kto yafho thukahnomr. Nhai. Nmoh yima yuhum Bro Nkifra hikwa yimaroh yima yuhum kanjo korhm. Ndnetnomn nom Bro Nkifrar yakruharnom rorpno toh nkifrarahnom.

Bro Nkifrar yakitohhato toh bmta kihkfot.

11

(Sapta 11-13)

Bro Nkifrarhu mrokforoh wany yakio yuhat

¹ Bro Nkifrar kfoyuk mrokfom wany yakioneft finji wany yakiokfot? Wawanyko. Wom mrokfot Bro Nkifrar kfo famur, “Hifa rhu nmbuhah hiruhank.” Nom nd mrokfot wanyhato nmoh dukefm be nd ror kfoyuk mrokfotn bro yima yuhum htahato duka hasinomm, tot ndhtet dukeft to tu wany yakioneft. Hus yima yuhuf rhuhato duka mirahn, “You ka?” Ndhtet mduka you ta neft, be nhai yakruhatnomt. Ndt nhai tu wany yakioneft. O Bro Nkifrar kfo famur, “Nd yiha inji naruha.” Nhaf to inji. Nom wanyhato nhai bok dukefm yakrfonom. Be nd ror kfoyuk mrokfotn yima yuhum yak tkafhato tohnom, be nd mrokfot fipett rhuraht. Tot tu wany yakioneft. ² Nmoh nkifram to inji hik hnamotmr fak marnya hnamorm. Bro Nkifrar kfoyuk mrokfom nhai bok dukefm yakrmoamm. Tamoh mrokfom kfirm be nd ror kfoyuk mrokfom wany yakiohato rroh yima yuhumn fak tkafmoum. Bro Nkifrar inji htihato rroh rhu nmbuhah fak marnyamourm. ³ Nom Bro Nkifrar kfoyuk mrokfom nmoh yima yuhum yakitoh tkafwanomn duka kangnom, “Mounti bbinyssoft nhai womm kformotm trharmof. Nhai. Bro Nkifrarn kfomotr trhamof. Ndab bbinyssoftu wuskam nom htitam nhai wom shrm yakhato hingrna nhombraf hanyhato trharmom. Nhai. Be tng pthamotr turoh fijo trha nhombra hanymom. Bingot nhai wom tamohm rhurmotm btn ndm yakhato hingrna nhombraf hanyrmorm.”

Aber Inok Noarom Bro Nkifrarhu mrokfot wany yakiomo yuhat

⁴ Aberr Bro Nkifrar kfoyuk mrokfom wany yakiomormn yemrom yakhato tarioh mthamorrko. Kenr ror nhai. Bro Nkifrar kfoyuk mrokfom nhai wany yakiormorm. Aberrpar Bro Nkifrar htihato kfo yindhormorr, memor, “Aber, ni tu dborior yimaye.” Aberr nhai wom tohkahr, bi nohngot-mor. To tfit nom arihat ror Bro Nkifrar wany yakiomo kindo nom Bro Nkifrar wany yakiokfot.

⁵ Enokr ror nhaf inji. Ror nhaf Bro Nkifrar kfoyuk mrokfom wany yakio-hato tohmour. Ndnetrn Bro Nkifrar be yima tire fakmorr. Nhai nohrmor. Bro Nkifrar yakmotrr yimam hambroti hambroti nhai htirmomr. Enokr yuhre bbinyssoft afo tohetrn Bro Nkifrar kfo memor, “Enokr na kfoyuk mrokfom wany yakiowatr na yindhorwanr.” ⁶ Yimam, Bro Nkifrar kfoyuk mrokfom nhai wany yakiakahmm, nd yimam Bro Nkifrar be nhai yindhorruhatrm. Yimam duka kangm, “Bro Nkifrar brbo yorhwarn yak marnyarahrm nmoh tamoh tamoh nefm,” nd yimam nd dukefr yorhwatr yima yuhum sinyewumm Bro Nkifrarpno brbo yi tohneft.

⁷ Noar ror nhaf Bro Nkifrar bi kfo duka hta memor, “Tu bro hnun nieraht. Nieruhahn bbinyssoft rhuyuk tamoh tamohm nd hnuntn yak batu bugaraht.” Nd Bro Nkifrar kfomo hnun bbinysof thofm nhai htirmomt ndhtet hnun. Noar nd Bro Nkifrar kfomo mrokfot wanyhato rorhu yima yuhur fanhomorr. Nd duka yanuheft-pno bro sift hingrnamat. Nd hnun niamohat rori rorhu yon kunys rom nhai hnun fune habohirhato nohrmom. Bro Nkifrarhu mrokfot nd yima Noarpar wany yakiomort. Ndnetrn rorparrn mfak htanimorr. Ndwom ndwomt nd hnutpno batu bugamom. Bro Nkifrar kfo memor, “Noarpar nanhu mrokfot wany yakiowartn rorhu toh nmbuhah toh marnyewurt.”

Abraham Sararof Bro Nkifrarhu mrokfot wany yakiomo yuhat

⁸ Abrahamrhu tndht nhaf inji. Bro Nkifrar Abrahamrpno yihato kfo memor, “Ni Abrahamn ndar tunhu kmit wahtanykahnt waiswa wuri wom kmitn. Tukann yak htaf hanyrhotann nd na dukayuk kmitn mifnahrahn. Nd ni mifnahruha tkitt be ninhu bbinyssoft rhuraht.” Abrahamr nd mrokfot wany-mohat nhai marimor, “Hanyjbornahato rhuruha.” Nhai. Ror be wany yakio-hato sinyahato yimor. Ror yimohat nhai kfo marimor, “Ndha nd kmit kita.” Nhai. Be sinya furanihato yimor. Be nd Bro Nkifrar

kfoyuk tngt wany yakiohato hikmor nd Bro Nkifrarhu tng yuhatn. ⁹ Abrahamr yimorn Bro Nkifrar wom kmitn fak htamorr. Nd kmit o bbinysoft bi yima tohet tkitt fak htamorr. Abrahamr bi yima tohet tkitt yak htamohat nhai kfo marimor, “Tamohmpno nda yima tohet tkitt Bro Nkifrar yak htamora? Tfit wom tkitm yiruha.” Nhai. Ror be nd Bro Nkifrar bi kfoyuk mrokfot wany yakiohato rorhu dukeft duka memor, “Na bi ndar tkitt fak htamora, to tfit finji wom finji yirhoya?” Be inji dukahato ser kunymn toh habrimom rorhu yon tuhtirpno. Aisak Jekofprof, rof nhaf be nd Abrahamr toh hnamo toheft be inji tohmof. Be nd Bro Nkifrar Abrahamr-pno kfomo tngt wany yakio hatohhato tohmom. ¹⁰ Abrahamrhu dukeft duka memor, “Tamohmpno ndar bbinysoftn kuny kihato kmiyeta rhurhoya. Hndhorma. Bro Nkifrarhu tire hingr-nayuk kmirpat tohruha. Nd kmit nhai mibatiniruhatt. Be inji toh nkifraniraht.”

¹¹ Yo Abrahamrhu met Sarat, rot nhaf inji. Sarat bi tabon bugahato bi bayett Bro Nkifrar niahato kfo memort, “Ni yon yindarir hiyaurahn.” Rot nd yon yindarirhu hiyau mrokfot wanymohat nhai marimot, “Duka mmoruhant.” Nd mrokfot rothu yima yuhurn hmbritamott. Rothu dukeft duka memot, “Bro Nkifrarhu mrokfom pipetm korhwom. Na kfomora yon yindarirhu hiyauneft nd mrokfot nhai yi furaruhatt.” Rot Bro Nkifrar kfoyuk mrokfot fakitohtamott ndnatn Bro Nkifrar kfomotr yon fanett rhuhato yon yindarir hiyaumot. ¹² Abrahamr bi tabon bugahato yon kasinya yimbuyef duhatr, nd yonrpno be tu yonmari yon rifhur kasinyamor. Yon rifhur Abrahamr kasinyamor memom, “Nndo guny mounri nungur tik furayer. Nhai yimam thomnakfot.”

¹³ Abraham, Aisak, Jekofrom Bro Nkifrar kfoyuk mrokfom nhai mmor-moamm. Rom be nd Bro Nkifrar kfoyuk mrokfom yakitohhato fukatoh hasomoum. Tohhany tohhany rom nohmom. Nd Bro Nkifrar kfoyuk tamohm rom nhai hti htanihatoh noh-rmom. Nhai. Yima nfrim tohmothat rroh dukeft be duka memom, “Nda bbinysoft nom tohwat be womroh bbinysoft tohekconom. Kto nd Bro Nkifrar kfoyuk shrm hirahrnom. Hifa, nhai mrokfom.” ¹⁴ Rom kfo memoahat, “Ndart nhai tummoh darbn bbinysoft tohkahnom,” ndt yuwi wom nfri kmithu yakhato toh yibonetmn inji kfomoum. ¹⁵ Nd rom barkof toh tanymo bbinysoft nhai wom dukarmoamt. Adukamt tfit tum toh tanyukko yirmom. ¹⁶ To nhai. Hefenrn tu hifa nfri tkitt yak yibonetmn nhai wom dukarmom tfit tum toh tanymoko yinyeft. Bro Nkifrar bi fak htatahemorm rorpno toh nkifrayuk kmit. Ndnetmn rom Bro Nkifrar kfo nakuhato kfo memoahat, “Bro Nkifraye ni nmoh nkifra mife,” Bro Nkifrar inji wanymoahat yima yuhur yindhormourr.

¹⁷⁻¹⁸ Bro Nkifrar yihato Abrahamr kfo memor, “Aisakrn ni Abrahamnhu frikeft kasinyarahrt.” Bro Nkifrar memor, “Afo htiruha Abrahamr nanhu mrokfom hikrahrt?” Ndnetrn memor, “Abrahame, ninhu rpa yon Aisakr wawaskahn na watarioh mthat-wona.” Abrahamr wany yakiohato nhai hanyjbornarmor. Abrahamr bi memor, “Aisakr washato Bro Nkifrar tariorh mtharuhanr.” ¹⁹ Abrahamr turhu yonr was hany sitamohat rorhu dukeft duka memor, “Nanhu yonr rpa mifer. Was thoft be Bro Nkifrarn tfit kasinyarahrr.” Nd mrokfot inji akfonomt. Aisakr bi nohyuk tkitt rhumor. Nohyuk tkitt bi ruhetrn Bro Nkifrar fakmorr. Abrahamr ndt htihato duka memor, “Nanhu yonr bi nohetr, Bro Nkifrarn tfit kasinyamorr.”

Aisak JekofJosefrom Bro Nkifrarhu mrokfom yakitoh tkafmo yuhat

²⁰ Aisakr ror nhaf inji. Ror Bro Nkifrar kfoyuk mrokfom nhai marimor, “Kfo furewurm.” Ror wanymoahat wanyhato fakitoh tkafmourm. Rorhu yon Jekof Isorof kfo tebos boteboshato kfo hta bohtamorf. Womr niamot yah marnyanimorrn kfo hta memor, “Ni kasinyaruha yon frikeft Bro Nkifrarn yak hta bohtarahrt.” Tfit womr niamor nhaf inji kfo hta memor, “Kto ninhu toh nmbuhat Bro Nkifrar inji yak htarahrt.” Inji inji kfo hta bohtamorf.

²¹ Jekofr nhaf inji. Bro Nkifrar kfomoa mrokfom yakitoh tkafhato tohmour. Wuroh noh yibonruha kio musspno rim kio bmtatahato turhu yinem Josefhrhu yon Ifrem

Manasarof nakuyakmorf. Nakuyakhato yak marnya bomarnyahato kfo memorf, "Kto Bro Nkifrar nifnhu toh nmbuham yak hta marnyarahrm." Jekofr ror inji.

²² Tawo Josef rnhaf inji. Bro Nkifrar kfoyuk mrokfom ror yakitoh tkafhato tohmour. Wuroh noh yibonruha turhu tangiyemrom nakuyak bugakmorm. Yimotm kfo nuhas bugamorm Bro Nkifrar rorpno kfo pthayuk mrokfom. Kfo ptha memorm, "Nom Isrernom nda Ijif tohwanom be wom yiha Bro Nkifrar yakniruharnom tfit Kenanko hanyrahrnom. Nhai asha tohruhatnom. Wom mrokfot kfiwanko. Asha yuhre tohhato na nohniya, nanhu tptikt mirahko arhut. Kitwonom tptikt yaknihato tu Kenantn tfit hanykfot."

Mosesr Bro Nkifrarhu mrokfom wany yakiomo yuhat

²³ Mosesrhu yifammaf nhaf inji. Bro Nkifrarhu mrokfom nhai tuhaftarmoafm. Rof nhaf wany yakiomoufm. Mosesr nurnimohat rofhu dukeft duka memof, "Nda yonr Bro Nkifrar hifa hti yindhorworr." Ndnett Ijifthu kingrhu mrokfot nhai yak hikhato marimof, "Tektn yihom tuhafrahnnonr." Nhai. Tu hifa dborioh yonrn yak rir borirakhato hta kafrohafmofr. Husfirpa yamm nhai yak nriyafrmofr.

²⁴ Mosesr nhaf inji. Bro Nkifrarhu mrokfom ror be wany yakiohato tohmour. Kingrhu yon mettn duge warhetrn yimam kfo yiritihato kfo memoahat kingrhu yon metthu yoner Mosesr, tu Mosesr inji wanymoahat kfo memorm, "Na inji akfowohkma. ²⁵ Nanh sinya tanyukkorhof yimam tu Bro Nkifrarhu yon kunyet. Rompno kanga rpat atohkahnomn rom yekwa krhopam rpat ayaknom, nhai mrokfom. Na wofnkaha kingrpno tohhato rorhu fasoh nefm hikneft. Yimam ndhtet rhu nmbuhat rhuyukm nhai ndhtet rhu nmbuhat toh nkifranikahm. Nhai." ²⁶ Mosesr duka memor, "Nom hhakruha yimar nd frikeftn trharahr. Ndnett nhai wofnkaha Ijifthu bro yimaya tohhato rorhu fasoh nefm hikneft. Na wofnwa tu Bro Nkifrarhu yon kunyspno rpat tohhato rpat krhopam yakneft. Kto Bro Nkifrar mashoft, 'Hifa rhu tkitt ahiyanm,' na rpat yak htarahrnom."

²⁷ Mosesr nd dukeftpno Ijift htanymort. Ijifthu kingr nhai hifa htirmorr Mosesr Ijift htanymohat. Mosesr ror bi turn htimort Bro Nkifrar duka htamo dukeft. Ndnett wany yakiohato nhai yakrermorr nd Ijifthu kingr. Nom yima mif nyingetnom nhai Bro Nkifrar htikfot. Mosesrpar Bro Nkifrar yima mif nyngaye htihato nhai marimor, "Wohsisruha tamoh tamoh nefm." Nhai. Toh bmtamor. ²⁸ Mosesr Bro Nkifrar Pasofa yuhathu mrokfom kfomohat wany yakiomorm. Wany yakiohato kfomorm turhu yimam sifsifru wasneft. Kfo memorm, "Sifsifr wawaskahkomrn, kkut yakkahkomt nikmoh kuny yifhatikroh yirawih mimn kkupam ki hanykfot. Ki hanykahtkomm Bro Nkifrarhu moun-motr niahato yimaroh nkati yonm yak batii hne thombat nikmoh kunym yau trohnirahrm. Nhai nohruhatm nikmoh nkati yonm."

Bok Isrerm Bro Nkifrarhu mrokfom wany yakiomomm

²⁹ Isrerm nhaf inji. Rom Bro Nkifrarhu mrokfom wany yakiomomm. Ndnett Retsit yau hayukmohat bupam mano mano yihom rhu mrhumotm sfnoh bbinysof furatn fau hayukmom. Ijifthu amim memom, "Atone hikkah-nomm arimak kitohnomm," nd bu rifhu mano mano wuyoh nafurnehato fryifafmofm.

³⁰ Isrerrpamn nhaf Bro Nkifrarhu mrokfom wany yakiohato Jerikothu yonmari tahi gnam fau habrimotmm nd tahi gnam foh nafurmom. Sikispela marm fau habrimomt nd kmi gnat. Sefenyuk marrpno nd Jerikothu tahi gnam wufoh nafurnamom.

³¹ Nd taun Jerikot tohmout wom ijoh tonayet met Rahaft. Rot nd kmit tohhato Bro Nkifrar namoa nefm wanyhato mrokfom fakitohmoutm rothu yima yuhurn. Ndnett Isrerm toneyaknihato nd Jerikothu hanybornet yimam was batiyaknimohat Ra haft nhai wasrmomt. Rahaft was duha yimo nmbuhat nhai be sfno. Jerikot hti tmbho harhuyuk yimaf Josuar tkrurafmof, rotn fak kafrohmotf Jerikothu amim was hany sitamohat. Tom inji wom womroh yufami tndhm Bro Nkifrarhu mrokfom yakitohhato tohmoam.

³² Tfit wom wom yimaroh yufam Gideon, Barak, Samson, Jefta, Defit, Samuer yo profetm, rom Bro Nkifrarhu mrokfom wany yakiolahato Bro Nkifrar tohnomoahat nhai kfo hik buga-rhotanm rroh tndhm. Be inji kfoni hanyruhanm. ³³ Rroh womm Bro Nkifrar kfoyuk mrokfom wany yakiomoatmm tohnhomourm. Tohnomoatrm wom kmithu kingrhu amikfotpno yi nnamoahat romn sinyahato yiho hathumouumm. Wom kmim tohukatohmoahat Bro Nkifrar yak htaf hanymoatrm kmim tohukatoh marnyamouumm. Rroh womm kfo bruttnamoahat Bro Nkifrar wanyhato fak marnyamourm. Yo womm laionm tohyuk muhm tumohat laionm nhai yejborfarmomm. Bro Nkifrar fak tasifmorm laionroh tngm. ³⁴ Rroh womm kaht tumohat kaht nhai tandhirmotm. Rroh womm memom, "Awasnomm." To nhai. Yakrmenihato tohmom. Womroh thatipm tatko inji namoahat Bro Nkifrar tfit thu bmtamourm. Womm yahrt yimoahat Bro Nkifrar thu hamuhmoatrm memom, "Nndo het yaum tohwom." Wom kmi thofm niahato rroh kmim-pno yuwi mtob tebfi yaknehato memoum, "Rroh tamoh tamohm ayak rikohnomm." Yudbat rpa rpa hik tubatuyafmouumm. ³⁵ Rroh womm bi nohetm tfit sinyamotm mmemrom yindhormom. Womm yahr kmimn kiminysafmouumm. Memoum, "Inji nakahtnomm Bro Nkifrar mong trohrahmr." To nhai, rroh yima yuhum Bro Nkifraparn kakitohmouumm. Nhai yafho thurmoamr. Duka memom, "Tamoh nefm atoh bmtanom kto tu dborioh rhu nmbuharpat rhu nkifrani-rahnom hefenrn." Nd dukeftpno yimam finji namoahat yak marsisatamoatm tabot nohmouumm.

³⁶ Bok yimam nhai be rpahtet krhopam yakrmom. Womm tat noh bonohtahato kfo snouhato kuninfari wunamouumm. Womm sene fohm kanjo mkiyakmoamm kalabus htamouumm. ³⁷ Womm fohm kanjo tahiye tahiye fryebhoh nohmouumm wom kmimm sinyahato. Womm mim kanjo buha soim tmbhomouumm soye. Womm gon nyisofm kanjo bainate rithuhato hanysekrmoumm. Womm be inji foh nungam kanjo be inji yifamn toh habrimoum. Sifsif meme tham nyuhmoum rmontha mim. Be inji yeshri duha tamoh wuskapa duha be inji toh mmbrafinysamoum. Nhaisi yuhatn hifa rhu nmbuhat yakrmom. Tu be nhai mif. Yima yuhenm nur finynimouumm. Yimam faso fasoh fak bebtamouumm. Nhaisi tu hifa nefm narmoamm. ³⁸ Ndnetmn be inji toh habrisamoum yima toh duha tkitmn yo womnam yura kminyosfm yimooum. Nhaisi kuny juha be inji tahi muhmn o tahi yengongmn toh habri-samoum. Womnam be inji yiro bb muhmn tohmooum kmbrum kanjo. Romn sinyahato hifa hifa nefm namouumm kmi thofm. Tawo kmi thofm nhaisi tawo hifa nefm narmoamm. Romrpamn memoum, "Ka nmoh yima yuheteme, nom hifa nefm anakah-tnomm ndt htiruhamn tawo hti dukarahnnom." To nhai, fasoh hti srthumouumm. Kmi thofm nhaisi wofnrmoam Bro Nkifrar hiket yimam-pno tohneft. Ndnetmn yauyenm kanjo tabohikmoumm.

³⁹ Nd yima yimaroh mrofkom nom bi wany hnem nd yimam Bro Nkifrar kfoyuk mrokfom wany yakiomouumm. Ndnetmn Bro Nkifrar yindhorhato rroh toh rhu wiayauw nmbuhat fak marnyamourm. Nd rom yima nfrim tohhato wany hnamoa hifa rhu nmbuhat Bro Nkifrar kfomoat, bi nohniyetmn nd hifa rhu nmbuhat yakyuk yihotat Jisasr hingrnamort. Nhaisi hti htanirmot. ⁴⁰ Ndt nhai be sfno inji rhurmot. Bro Nkifrar duka memor, "Kto nd hifa rhu nmbuhat yakyuk yihotat hingrnarhoyantn be rpa yiharpa nd bingot nkiframpno tohhato nanhu mrokfefm hikmoam yo arihathum be rpa yiharpa yak nhafo-hakrhoyanm be nanpno toh nkifra-nirahm." Bro Nkifrar inji dukamor.

12

Jisasrn nmoh nyngam be rorpar hti hti tonekfot

¹ Nd na kfohne nkifram rom bi yura hefenr yorhwamn nom kukatoh hasiwumnom Bro Nkifrar hikwohat. Ndnettun nom hhrek duha Bro Nkifrarhu hikneft. Bro Nkifrar hikhato dborioh nefm nakfot. Bro Nkifrar hikwohat yimam tone resiswa kanjo inji tonitwonomt. Nmoh nkifram kukatoh hasiwum yura wurhuhato nom Bro Nkifrar hikwohat. Ndnettun nom nd Bro Nkifrarhu resiskfot tohneft, tamoh tamoh kurhet shrm, mfhatn o tirmn o wuram o yimanysoftn korhm, yak thu bugahato yima furanom tonekfot. Ndmpno

tonirahnom be nd kurtet shrmn teh krhorahnom o womnam teh knbasakruhatmnom suhrahnom. Briyoh yima furanomn nd Bro Nkifrarhu resiskfot tonehany tone hanyhato wuroh mtone tmbho tkitt mtone fnahrahnomt. ² Nmoh nyngako tohakyuk yima Jisasrn nmoh nyngam be rorrpar hti hti tonekfot. Nhai mano mano riyukatoh ayukatoh hanykfot. Rorn kfo htak hanyruharnom tonihany toni hanyhato be Bro Nkifrar yorhwa tkitt mtone fnahrahnom. Tot mtone tmbhoyuk tkitt. Jisasr bgre misn noh-mohat, nhai marimor, "Yimtnaruha." Nhai. Rorhu dukeft kto hifa rhu nmbuhathu yakneft dukahato nhai yimtnarmor bgre mis nohmothat. Fura nd yimtna rifhur yak marsisanhato bgre mis nohmor. Ndnetrn arihat bi hifa tkittn Bro Nkifrar yimam bro yufa yahuka mkuko korhr.

Bro Nkifrar kfo hta yuham tohrahnom be toh marnyanirahnom

³ Jisarsru tndh mrokfot htiyakhato tohkfot. Ror hti srthumoa yimam fasoh nefm namoahat, nhai finji narmoar. Ror be tngt youkihhato tohmour. Be Bro Nkifrarhu dukefrparpno tohmour. Nd ror tohmo yuhat toh hikkfot. Yimam finji naknanef o krhopam henyeft toh bmtakfot. Inji naruhakomn Bro Nkifrar nhai thu trohruhatkomr. ⁴ Niko kmi thofm nayuk nefm hti hhrekhato sinya trohwohat nhai ndt hti namburnihato wasrrromko Jisasr wasmo kanjo. Nhai. ⁵ Wom kfo bmta mrokfot ka nhai yakitohkahkomt? Bro Nkifrar kangr, "Niko nanhu yoneko." Rorhu gonborngtn nd mrokfot korht. Nd mrokfot kfo kangt, "Ni nanhu yone, hamumiwatn Bror wom nefm newurn o yimbhindangm frdambong-shiwurn mirahn akfo ameya, 'Bro Nkifraye, tamohmpno inji newana? Inji newuna, be nhai ninpno brbo tohrhota.' Nhai inji kfo duha. ⁶ Bro Nkifrar htitworn turhu yonn kanjo. Ndnett ni faso fasoh hamumiwatn inji newurn, ndt htiruhann dukarahnn."

⁷ Tamoh krhopam Bro Nkifrar kahukworko mirahko ayakrme trohnomm. Finji newurko tha hekfot. Ndt htiruhakomn duka tungunarahko. Yifemrom yom kfo hta bohtiwa kanjo inji newurko Bro Nkifrar. ⁸ Bro Nkifrar turhu yonroh kfo hta yak htaneft bi rinakngitakmort. Nhai be ar nohofrpa. Yimako Bro Nkifrar nhai kfo dbohfa inji nakahrko, ka nhai rorhu yonmifko rhukahko. Wom rorhu yonko arhuko to kfo dbohfa inji narforko. Ka be inji met tmaht yihota yuhat yauhato yakmo yoneko. ⁹ Yo womt, nom damiagnom tohhato hammomoahat nmoh yifemrom kfo nyingo fnah inji namouumnom. Kfo nyingo fnahmoahat nom nhai kfo wokrmoanomm. Nhai. Nom be rom kfoyuk yuhatt hikmounom. Ndnett Bro Nkifrar finji naneft nom sinyahato Bro Nkifranko kfo wok duha. Nhai. Nom be tngm youkihhato wany yakitohkfot. Inji narahnom be yiha yiha tohnhorahrnom. ¹⁰ Nom habhi yonennom tohhato nmoh yifammam kfo dbohfa inji na thoft, rom tu yifammam kfo dbohfa mrokfom kahukmnom. Bro Nkifrar ror nhai be kfo dbohfa furakahrnom. Ror kangr tur tohwa toheft watohko ndnetrn kfo dbohfa mrokfom kahukrnom. ¹¹ Nd kfo dbohfa mrokfom hayukm afo barkopfam yima yuhum krhorahm. Tfit kto htirahn nd krho yima yuhum kekuthato tu dborioh yima yuhur nieruharn dborioh nefm hikrahm.

Bro Nkifrar hikneft hik marnyakfot

¹² Ndnett niko toh bmtahato yimam resis tonita kanjo Bro Nkifrar inji hikkfot. Mirahko noheh yimam kanjo ayaunom. Tir wuram wunoh minysafekwomnom yak marsisan hanykfot. Mirahn amkkrrmita. Bro Nkifrar kangr, wayau bmta hany-kahkomn nd ror kfomo hifa dborioh rhu nmbuhat hirahrko. ¹³ Bro Nkifrar hikneft hik marnyakfot. Nikmoh toheft hifa toh marnyakfot. Wom yimam Bro Nkifrar hik hanyhato buha msuhneft niko womko htihato rom tfit sinya tohrahm.

¹⁴ Nikmoh rhu nmbuham be masat ndar bbinysofthu rhu nmbuharoh dukefm yak duha. Yima yuhum miruhahato Bro Nkifrar yorhwa kanjo rhukfot. Yimam ndhtet rhu nmbuhat rhu duhatm be nhai htiruhatmr Bro Nkifrar. ¹⁵ Yima yuhum aduka hanyswamko. Bro Nkifrar nomn yuhuwaftato Jisasr tkrurafmotrr niamorn minohmor. Ndnett rorhu tamoh tamoh mrokfom hanyjborna duha. Womr bi Jisasr hikwor tfit

womn rorpno yihato ninhu fasoh nefm hanyhato rorpno yihato myak nuhas duha. Inji narahn be nd yimar tfit ninhu nefm rim suhnirahr. ¹⁶ Mirahko nikmoh womr metroh dukefmn be ahika. Yo mirahko Isor namo neft ahiknom. Isor nhai duka marimor, “Nann nkati yona, na tukann tohrhota Bro Nkifrar kfoyuk mrokfo yafothar muhrahra.” Nhai. Yatit dukahato nkati yon yufat nhai wom dukarmort. Inji dukahato tfit wom habhirn tkitt yakhato ror mrokfo yafothar muhmor. Najomr nhai. ¹⁷ Bro Nkifrarhu mrokfo yafothar bi wom habhirn ptha hmbriyetrn kto najomr yihato mkfo nurmor kfo hmbrineft kfo memor, “To fitha rhumo? Mrokfo yafothar bi wom habhirn muhmor. To finji tfit yakhato ninn tfit herhoya?”

Bro Nkifrarhu kmitpno brbo niamoko

¹⁸⁻²⁰ Tfit afo waduka nmoh nkifram hikmoa yihotati tfit nom arihat hikwa yihotat. Nom arihat hikwa nfri yihotat nhai wom kfo rafo mrokfot rhukaht Bro Nkifrapno brbo yinyeft. Bingot nkifram hikmoa yihotarn to finji kforuhanom? Bro Nkifrapno brbo yinyeft be tu mfro fakrmemoum. Bro Nkifrar barkof boririfhu mrokfom hemo yiha yura kminysoftnko yawihnehato mirhuhato pthamohat, nhai marimom, “Ptha finji narahnom?” Tuha kmi tpit rim tohneft kfomohat be fura yakrme rifhurpno rim tohmom. Bro Nkifrar bro kfo kars mrokfom kfo memorm, “Wom fohr kmi tpit yarim tayouti duha. Rim tayoutineft tahiye tahiye fryebhoh gukfot.” Nd mrokfot wanyhato fanhomom. Kmi tpit rim tohhato kmi mfhar wuhtimomr kahr wafuna sinyahato yura mountko toh hamuhmor kah funefr. Nd yuht kminysof bugat grib rifhut thu kasi bugamott. Mount wumirmohat yuht bbinysfett mir bugamout. Toh bu wiform wasinya-mohat be tuha ktpir ktpirt tohmom. Asha tfit wanymomko fumrrko toh-mohat. Fumrr tohnimotr tfit kto Bro Nkifrarhu tngt wanymomt. Bro Nkifrarhu tngt wanyhato be tuha mifoh rihanimom. Miyoh rihanihato Mosesr kfo memomr, “Mosese, apthawahr Bro Nkifrar nom kakrmitwonom Bro Nkifrarhu tngthu wanyneft.” ²¹ Nki-fram nd tamoh tamoh nefm Bro Nkifrar yawihnamo yiha htimohat masat fanhomom. Mosesr to inji fanho bugamom. Mosesr memor, “Na to inji yakrmitayann kangm gi nunes kekwota.”

²² Nd mrokfom bi kfim, yatk yiho-tarhu mrokfom wanuko. Tfitn nfri yihotat wadukakomt. Nd nfri yihotar niamokomn be turpno brbo niamoko turhu kmirn. Hefen-rhu kminysof Saionr mfnahmoko. Nd kmir Bro Nkifrarhu bro kmiyer. Kutewunomr hefenrhu Jerusalemr. Tu be yonmari rifuhet mounmotm grha yindhor hasiwa kmir mfnahmonom. ²³ Bi nd Bro Nkifrapno nohnita yimam rifynya kmi hefenr mfnahmoko. Rroh fasoh nefm Jisasr bi yak thuhemotrm Bro Nkifrapno tohwomko. Bro Nkifrarhu nkati yonm kanjo tohwomko bi. Rroh yufam Bro Nkifrar htamorm nd kmi hefenr tohyuk yimaro yufa htayuk gonborngtn. Bro Nkifrapno niamoko. Turparn yimam ndar bbinysfett tohwa nmbuham kak nhtewurm yimaro toh nmbuham. ²⁴ Bi Jisasrpno niamoko. Tor rorrpar nd nfri yihotar kndh hanyhato Bro Nkifrapno mkndh fnahmorr. Jisasr turhu kkupaye thu pprihato nmoh fasoh nefm yak thumo tkitt mfnahmoko. Jisasrhu kkut Bro Nkifrar htihato nom nhai kfakkfot rorpno brbo yinyeft. Ken, Aberrof namo neft rot nndo. Kenr sinyahato Aberr wasmohat Bro Nkifrar htimort Aberrhu kkutn. Bro Nkifrar htimohat duka memor, “Nd yimar Aberr wasyukr tawo yak tutfaruhanh.”

Bro Nkifrarhu mrokfom wanyeft mirahko awany ffi hasonom

²⁵ Ndnettn duka marnyakfot. Bingotrhof gnngr yakitoh hanyhato arihat Bro Nkifrarhu mrokfom wany-neft mirahko awany ffi hasonom. Bingot nmoh nkifram to inji namom. Bro Nkifrar Sainait mirhuhato kfomo mrokfom nhai wany yakiormomm. Turoh nd wany ffi haso nmbuhattn Bro Nkifrar fak tutfa wurasohmorm. Tfit arihat hefenr rhuhato pthewatrm wanukwonomm. Nd mrokfom ror pthiwam nom wany yakio duha rhuneft finji dukewako? Hifa rhurahnom? Be tu nhai mif. ²⁶ Bro Nkifrar Sainait mirhuhato pthamohat nhai wom shrt rfurmot. Tfit arihat mekaht, wompam finji anaya, waduka marnya hany-swako. Mrokfot bi kfo htatamort. Kfo memor, “Wompam

mekahta finji anaya, nhai be bbinyosfrpat finji narahota. Nhai. Mounti bbinysoft rpatis mirahm nndo nunes kekwotf.” ²⁷ Ndt nom dukaf hanykfot. Bro Nkifrar kfo yamukohat, “Wompam thu ninor-ruhanf mounti bbinysoft,” ndt duka-kfot. Mekaht finji akfoya, be nhai wom tamohm rhuruhatm. Mibatiniyuk tamoh tamohm nd yiha yak batihurahrm. Rhu hanyukrpam myak htanirahrm.

²⁸ Ndnatn nom yimanom turhu kmi hefenrhu shrkaroh tohukatohnhoynom fak htamornom. Nhai marimor, “Hta tefikahanm tfit kto yak batiruhanm.” Nhai. Bro Nkifrar yuhu-wafhato hifa kak hta marnyewurnom. Nom nd rorhu yuhuwa nmbuhat htihato kfo yindhorkfot. Nmoh yima yuhum yakrmi hanykfot rorhu mrokforoh hanyjbornaneft. Ykrme hanyhato kfo bruttnakfot. Bro Nkifrar nmoh kfo bruttnaneft wanyhato yima yuhur yindhorrashrr. ²⁹ Yimam rorhu mrokfom hanyjbornaneft, to be kahthu mikur gufuhaniyukem.

13

Bro Nkifrar hti yindhorwa nefm kanga akfo nuhasanko

¹ Niko tuko Bro Nkifrar yak hikwako tuko nayak marnya nayak marnyakfot. ² Kmi kmiroh yimam Bro Nkifrar kak hikwomr. Ndnett nwm kmithur niewur ni womnhu kmit, ni womn yakhato hifa rikabukurn yak htakfot. Bingot tohmo nkifram to inji namom. Mounmotm yima mif tham yak nhombranamoatm memooum, “Yima mifm kak marnyewu-nom.” Kto hti duka tungunahato kfo memooum, “Be merfotnom ahti marsisafonom, be Bro Nkifrarhu mounmotmn hti marsisaforfonom.” Kto inji dukamoum.

³ Niko Bro Nkifrar hikwako, nikmoh womr kalabus kak htewumr, niko womko rorhu krhopam yaknhokfot. Ni nd kalabus tohneft ni nhai wofnkahn be turpa krhopam yakneft. Wom yi tohnhoneft ni yindhorwo. Womm krhopam yakneft rpahtet neft nakfot.

⁴ Wom met yindarif bi fak tatrutmf nd sawohf yifammam heyuk mrokfo yuharpamn hikkfot. Yindarim bi metetm turoh metrpampno yikfot. Mirahko arim fnahni mfnahni-nom wom wom metmpno. Metm nhaf inji buga. Niko tukmoh yindarirpampno yikfot. Mirahko wom wom yindarim-pno arim fnahni mfnahninom. Yimam inji rine wuneyetm kto Bro Nkifrarhu kotkfotn tohrahm.

⁵ Yo mirahko be maruharoh dukefrpar arhu hasonom. Finji finji harhuwoko ndrpampno rhukfot. Mirahko masat masat marut yakkah-nomn maru wuska buharn arhunom. Finji korhwo Bro Nkifrar htitworn. Bingot yatk rfa borngtn kfo memor, “Nikmoh rhu nmbuham nhai hti marsisarhotanko. Nikmoh rhu toh nmbuham nanhu tirmn rhurahko.” Bro Nkifrar bi inji kfomor. ⁶ Ndnett nwm toh bmtahato kfo mekfot, “Na nhai ykrme hanyrhota tamoh tamoh nefm yimam finji naneft.

Yimam finji naneft Bro Nkifrar tor hti yukatohaf hany-rahra.”

Sng 118.6

Nd Jisasr hingrnamo yuhat hikneft mirahko awohsisnom

⁷ Bro Nkifrarhu yon kunys tohuka-tohmoa yimam mirahko duka mmonomm. Romn hifa tohhato Bro Nkifrarhu mrokfot kfo pthamotmt wanymokomt. Rom tohmohat be Jisasrn hikhany hik hanyhato be mnohmom. Nhai thu trohrmomr Jisasr. Niko rom Jisasr hikmo hikkeft hikkfot. ⁸ Jisasr rom toh hbhamo kindo nom toh hbhewurnom yo toh hbha hatohrahrm wom yimam. ⁹ Ndnett mirahko nd wom wom mro-kfomn wanykahnomn Bro Nkifrarhu yihotat ayau htafnomt. Mirahko nd nkifram hik hnomo kfo tebos mrokfom, nd tir kifsaneft, yuk fnahneft, mirahko nd nd yak kars hingrneft ahiknom. Be nd yeshri ye karsnefrpat hikruhakomn Bro Nkifrar nhai hik marnyahato toh bmtaruhatko. Nd yatk boririfhut mumafkfot. Bro Nkifrar nom hti yuhuwa nmbuhat nom htihato Bro Nkifrarhu yihotarn tohhato toh bmtakfot. ¹⁰ Jisasr nmoh fasoh nefm bi hanohmorm. Yimam nd yatk nkifram hikmo yihotar yaurahm be Jisasr nhai yak thuhiruhatr rrroh fasoh nefm. ¹¹ Bingot nkifram yakitohmoa yatk tarior mtha yuhat, inji namoum. Yemror wasmoumr. Nd yemrorhu kku mmbrm bro tohak prisr yaknimoarm Bro Nkifrarhu rhuyuk rumtn hanyhato thu pprimoatr Bro Nkifrar hta

wunafhemourm fasoh nefm. Kkut Bro Nkifrarhu rumt hanymoumt, yemro nyisoftne wuri hanymoamtn tarioh-moumt. Yemro nyisofm hanymoamm kmi yoh tmbhefm tariohmoumm. ¹² Ndnett Jisasr nohmohat, nhai yiro Jerusalemtn nohrmor. Kmi Jerusalem gnat hehurnihato nndo busafon furako was nohmomr. Nmoh fasoh nefm rorhu kkut fak thumotm. Yak thumottm nom ndnatn Bro Nkifrar kanjo fak htamornom. ¹³ Ndnetnomn nd nkifram hingrnamo yatk yemro tarioheft mong trohkfot. Tfit Jisasr hingrnamo nfri yihoat hikkfot. Nd Jisasr hingrnamo yuhat hikneft yimam kfo yimtnarahmnom. To mirahko awohsisnom. Yimam kmi taunthu briahako nohyukm faso haninge kfo yukioh inji namoumm. Nom Jisasr namo yuhat inji narahmnom yimam. ¹⁴ Yakrme duha. Nd asha bbinysoft nhai wom taunt rhu nkifranikaht. Nhai. Nmoh dukefm be yikfot kto rhuruha kmi hefenrn. ¹⁵ Jisasr bi nmoh fasoh nefm mhanohmorm. Ndnett nmoh bro kfo yindhor nmbuham Bro Nkifrarn kfo yindhorefm yikfot. Nhai tfit wom finji kfokfot. Nhai. Nmoh kfo yindhor nmbuham Jisasrpar yikfot. ¹⁶ Met yindarim dborioh nefm yak nuhaskfot. Wom hmbresham o tamohm kak nafwom, niko yakhato hekfot. Mirahko womroh wuska hanyeft ayafhonom. Bro Nkifrar nikmoh dborioh nefm htiruharmn yindhorrahrko.

Bro Nkifrar yak marnyarahrn

¹⁷ Nikmoh nyingako tohekwa yimam yiha yiha kukatoh marnya hasiwumko. Kto nd rom hingrnewa hingrneft Jisasr kfo nuhasrahmr. Ndnett niko rroh mrokfom yak hikrahkomm be rom ndt htiruhann rroh hingrneft yindhorhato hingrna marnyarahmt. Tfit niko mhta yuhu-wehrahrko tawo rom mhta yuhuweh-hato nhai hingrna marnyaruhatm.

¹⁸ Nmoh toh nmbuham wakfo bruttnatwakmnom. Nom tunmoh rhu nmbuham nhai wom fasoh rhu nmbuham htikahnom ndm htihato btn Bro Nkifrapno brbo yinyeft yimtnakahnom. ¹⁹ Nanhu bro dukeft dukewa nikmoh nia htineftn. Ndnatn kanga, wakfo bruttnakahtko Bro Nkifrar yihoat hingrnahirhotra, nia htiruhanko.

²⁰ Na tawo niko dukahato kfo bruttnewanko. Kanga kfo bruttna-kahtanr thu bmtarahrko. Yo yima yuhum be rhu marnyarahmko. Nhai tamoh tamoh dukefm yakruhatmko. Nd Bro Nkifrarn Jisasr yopt rhumohat tfit thu kasinyamorr. Jisasrn nohhato nd nmoh fasoh fasoh nefm mhanoh-morm. Nd ror nohmo yiharpa Bro Nkifrar yihato mtoh nkifraniyuk yihoat fak nukakmort. Nom tohukatoh thombat yimam sifsifm tohukatohwa kanjo inji tohukatohwornom. ²¹ Kfo bruttnewanka kanga, “Bro Nkifraye, wathu bmtakahtnm be ni Bro Nkifranhu yima yuhurpar hikrahm. Yo rroh toh nmbuham be ni Bro Nkifranhu dborioh nefrpam hikrahm.” Inji kfo bruttnewanko. Jisasrn yima yuhum yak hta bohtaruhatrko, wiayau marnyarahko. Wiayau marnya-ruhatko Bro Nkifrar hti yindhorrahrko. Yiha yihai rorrpar nom kfo yuta yindhorkfot. Be injirpa.

Wuroh kfo yindhor mrokfom

²² Barenko, bro mrokfot kfiwanko, na ndar gontwat htewa mrokfom hti marnyakfot. Nikmoh toh nmbuharoh kfo bmta mrokfojem. Nhai be yuke mrokfom kfokahanko. Nhai.

²³ Wom mrokfot kanga akfo nuhasanko. Timotir, nom ndar hingrneft hingrnahomoa yimar, kalabus yimohat, bi fnahnihato toh firewur. Bi yudbat nia mhtitwo-rane, rpat niahato mhtirahnonko.

²⁴ Na asha tohwahat dukahato kfo yindhor mrokfot kahukwanko niko tohak yimako yo Bro Nkifrar hikwa yima bugako. Ako kantri Italithu yimam, Bro Nkifrar hikwam, rom nhaf dukewamko kfo yindhor mrokfot kahukmko.

²⁵ Be injirpa Bro Nkifrar toh natwih bugarahrko.

**Jemsr
dwandfamo gontwat
Barkof kfo nuhas mrokfom**

Jemsr wandfamo gontwat bok dborioh dborioh kfo nuhas mrokfom wandfamorm. Jemsr duka memor, Kristenm nd kfo nuhas mrokfom htiruharn dborioh dborioh nefm hikrahm. Bok mrokfom kfo nhombra mrokfom yakhato kfo pthamorm. Memor, “Inji kfo nhombrarhota dukefm yak marnyaruhammn yak hikrahmm mrokfom.”

Jemsr kfo bro memor, “Yimar Jisasr hiketr nhai be hik fura bofurakfot. Nd yimar womm dborioh nefm yak nuhaskfot. Womm inji htiruharn duka mirahm nd yimar Jisasr hiket yimayer.”

Tamoh tamoh nefm riyoh buriyahak duha. Toh bmtahato Bro Nkifrapno tohyuk toh nmbuhat toh marnyarahnomt.

(Sapta 1.1-18)

¹ Na Jems, na Bro Nkifrari Nungothet Jisas Kraisr hikwa yimaya, nann wandfahato kfo wobu-hanko niko Isrerkmoh 12-pela frikefthu yimako rpa rpa natubatunihato ndar bbinyosfthu kantrim rpen rpen toh htfaswako.

Tamoh tamoh nefem toh bmtarahnom, be tu Kraisr tohwa toheft kanjo toh hikrahnom

² Yinouroko, be kfo nuhaswanko, tamoh tamoh krhopam kekwomko, mirahko aduka krhonom. Be yindhor yima yuhumpno rhukfot. ³⁻⁴ Tamoh tamoh krhopam kekwomko, tohhato Jisasr yikitoh kihkfot. Inji nahany inji nahanyrahko, be nhai tfit suhruhatk. Tamoh tamoh nefm toh bmtarahko. Be ndnettn nd Kristen yihotar tohneft toh trpkfot. Mtoh trpnirahko, be tu Kraisr tohwa toheft kanjo toh hik bugarahko.

Yimar wom tamoh dukefm myak kkopentewur, Bro Nkifrapno kfo bruttnakfot

⁵ Nikmoh wom yimar wom tamoh dukefm myak kkopentewur, Bro Nkifrapno kfo bruttnahato Bro Nkifrar dukefm hirahrr. Bro Nkifrapno tamohm yimam kfo ttiwonneft nhai wany marsisakahrm. Hifa yima yuhurpno he fura bofurewurm. ⁶ Mift, nd yimar kfo bruttnaneft, mirahr nd yimar hus dukeffpno akfo bruttnaya. Mirahr aduka amiya, “Ka Bro Nkifrar hirahran o nhai?” ⁷⁻⁸ Inji midukata mdukata-rahr, to mirahr ka Bro Nkifra hirahra. Nhai. Rorhu yima yuhur nhai be rpa dukefrpar yikahr. Nhai.

Yufapa duha yimami wusket yimaro mrokfom

⁹ Kristenm nhai hifa rhu nmbuhat rhukahm, rroh rhu nmbuhat faso korhmt, nd yimam o metm yindhor-kfot. Yimaro nyingampno yufapa duhatem. Bro Nkifrarhu nyingampno nd yimam yufetem. ¹⁰ To nd marut wuss mfro yikitohet yimam, mirahm be turoh marut wuss htitahato ayindhornom. Nhai. Rroh dukefm Bro Nkifrarn yindhorkfot. Maru shrkarn yindhoreft hta duha. Nd nd shrkar yikitoh yindhor tefi hasohato nohhato myak htanirahmr. Misfam kanjo wondht hatoh tefi hasohato tfit nd wondht yohnitt. ¹¹ Marr kekwort, nd dborioh wondht rom hatoh hasoyukt nhai rhu buhtakaht, tfit yohnitt. Yimam, mfro marut yikitohetm, to inji narahm. Turoh maru hingrneft toh mmo hasetmn noheft be yak fohtasrahtm.

Bro Nkifrar kak marnyewurnom, nhai fasoh nefmn hany nhehkahrnom

¹² Yimar tamoh tamoh nefm mnhombrati mnhombrati nhai suhrfor, tohhato Jisasrpar fakitorh, Jisasr toh hongmb hmbrirahrr. Nd krhopam bi mfrdburfurm, nd yimar Bro Nkifrar yimam ttha hanyshombat, yiha yiha rhu hatohruha dborioh rhu nmbuhat hirahrr. Nd rhu nmbuhat bi Bro Nkifrar kfo htangotmort. Yimam rorhu dukefr ruhet yimaro dukeftpno nd rhu nmbuhat bi kfo htamort. ¹³ Wom yimar wom fasoh dukefm sinyewumr fasoh nefroh naneft, to mirahr tfit Bro Nkifrarhu yufat yutahato akfo amiya,

“Bro Nkifrar nd dukefr fahura.” Bro Nkifrarhu yufat tfit yuta duha. Nhai wom fasoh nefm Bro Nkifrar mthu yuhurkfot. Nhai. Yo nhai Bro Nkifrar yimam fasoh fasoh nefmn hany nheh-kfot. Nhai. ¹⁴ Yima yima buganom, tunmoh yima yuhu bebmn thu yuhurekwomnom. ¹⁵ Nd fasoh fasoh nefroh nayuk yima yuhu bebm rihta tehekwtm, fasoh fasoh nefm newunom. Nd fasoh fasoh nefm nahany nahany bronitamn tfit nd fasoh nefmn got yoht kanjo yifung marm harhuhaso harhu hasiwatnome be tmbho nohefiwutnom.

¹⁶ Yo! Yinouroko, niko mirahko Bro Nkifrar niwa nefm ayak mmonomm. ¹⁷ Ror niwa nefm wawany hik marnya-komm. Ror nhai fasoh fasoh nefm thu yuhurkahrko. Hti dukewarko nikmoh rhu nmbuhat kak marnya bomarnye-wurt. Nda yura mountko tanukiwa shrkar rorn hingrna htamorr. Mar yiha tanukayukr mfnahhato tanuka hany tanuka hany rorhu yihar yohnitr. Tfit yihar kekuthato yifung tanukayuk shrkar mfnahhato romn tfit tkitt yakhato yifungr tanuka nfhewumr. Rroh hingrneft to inji kitt. To Bro Nkifrar ror nhai yiham kanjo kekut kekutkahr. Nhai. Rorhu ruheft to be inji rpahtet ruheft yiha yiha korhr. Niko hti dukiwarko dborioh dborioh nefm kak nuhasworko. ¹⁸ Turhu duka fijo yafothet gutnius mrokfom kfohihato nd mrokfomnfri mrokfo ptha yima rifhur hnamomr. Memor, “Inji anakahann romrpamn nd gutnius mrokfot yakhato tukanpno brbo mtohakrahm.”

Nmoh dukefm Bro Nkifrar hta mifrahnomm, dborioh nefm narahnom

(Sapta 1.19–5.6)

Mrokfom wany yakiohato yo hikkfot

¹⁹ Yinouroko, niko waduka hik marnyatwakomm nompno Bro Nkifrar niwa nefm. Ndnett niko mrokfo wanyneft yimbhindangm yudbat tohetohkfot. Mrokfo kfo pthaneftn mirahko be yudbat duka marnya duha mrokfom atubatuyaknninomm. Yo mirahko yudbat anamburaknninom. ²⁰ Fasoh nambur rifhut nhai Bro Nkifrarhu dborioh nmbuhat mhfnah-nekahtt. ²¹ Ndnett nd fasoh fasoh hnomha hnomha nefm niko hatoh-wam wayak thukomm. Yak thuhato dborioh yima yuhumpno Bro Nkifrarhu mrokfom nikmoh yima yuhum rihtamom hikkfot. Nd mrokfot yakitohhato hikrahkomt, Bro Nkifrar ndt htiruharn kto bro kotkfot tohruba yihart mrokfo duhatko rhurahko.

²² Ndar niko wany hniwa mrokfot mirahko be wanys wanyhato nd mrokfot kfiwa yuhat yak hikwon duha arhunomt. Be wanys wanyrah-komt, nikmoh yau nmbuhat nndo riyah. ²³ Yimar be wanys wanyhato nhai yak hikwon duha yikahr, ndr kangme binasohnt turhu nyngatikt htitar. ²⁴ Turhu nyngatikt htini-hato kto nd binasohrt rihtanyhato fnahnineftpro turhu nyngatikt mimmonitrt. ²⁵ Kraisru gutnius mrokfom, tom tu Bro Nkifrar yakitohwa boririfhu mrokfom. Nd mrokfom yimam hti hikak hanyhato hikrahmm, nd yimaroh fasoh fasoh nefm yafho-hato dborioh nefm hikrahm. Ndnett yimar nd Bro Nkifrarhu mrokfom yak nhta marnyahato hikrm, yo nd mrokfom nhai mmonirform, nd yimar Bro Nkifrar yak marnyahirahrr rorhu wiayau rhu nmbuham.

²⁶ Wom yimar kfo kangr, “Na tu dborioh Kristena, na tu Bro Nkifrar hikhato kfo bruttnewa yimaya.” To ndhtet kfet yimar tfit rorhu tngt nndo mando rine wunineft, nd yimar be tu kfo furewur. Bro Nkifrar inji htihato nhai yindhorkahrr. ²⁷ Tu Kristen mifr, fasoh fasoh nefenm yakitoh duhattr, yo rorhu toheft tu Bro Nkifrarpar hiketr, nd yimar inji nakfot: Yon kutenm yifamma duhatm yo tuhan dhirm tamoh tamoh krhopam titewum, rorn hti dukahato rroh krhopam hti dukahehato yak marnyahekfot. Yo womt turhu yau nmbuhat dukefmpno yauhato ndar bbinyosofthu nefm hik duha. Ndhtet nefm Bro Nkifrar hti yindhorm.

¹ Bar yinouroko, niko nmoh Nungothet Jisas Kraisr, bro nuka nanyjareft hatohwar hiket yimayeko. Ndnett to mirahko be yimaroh yufam o dborioh rhu nmbuham htihato romn bro nyngam o bro dukefm yihato tfit nd yufapa duha yima fura bofuram be nyngarpaye amhtini hanynom. ² Yufet yimar dborioh dborioh wuskar wondh hmbrinehato nianeft nikmoh lotu swirl, yo wom yima bebpar fasoh fasoh hmbresham hmbrinehato ror to rpat nianeft, ³ ka nd yufet yimar dborioh dborioh wuska wondhnayetrn nikmoh bro dukefm yihato rorn yakruhakomn dborioh gajir wahta hirahko. Nd yufapa duha yimar kkoret wuska hmbrinetr kfo mirah-komr, “Ndha watohn o asha bbinysoftn nmoh wurampno wamruhn.” ⁴ Yimam inji inji hti nhombrak hanyhato yak nhtarahkomm, ndt fasoh dukefmpno bi tuko tfit bi nayak nanyorwoko. Yufet yimar bi gajis fahunr, yufapa duha yimar gajis hekfot.

⁵ Bar yinouroko, wawanyko. Yufapa duha yimamn, tom nd yimamn Bro Nkifrar kfo htamor turhu yufatpno rhuneft. Nd yimam Bro Nkifrar duka-hato rorrpar fakitothommou. Ndnatn rroh rhu nmbuhat yak marnyahirahrm. Bingot Bro Nkifrar bi kfo htamo mrokfot hikruharn ror dukayet yimam yakruharm hifa rhu nmbuhat hirahrm. ⁶ Nd yufapa duha yimam ndhtet nefm newukomm, kak yimtnewukomm. Nikmoh dukefm tfit mongko aim afo. Niko frohmn faso yak bebwamko? Yo frohmn tehaknitamko kot hanitamko? To nd yufet yimam, romn ndhtet nefm newumko. ⁷ Yo womt, nd Kraisrhu dborioh yufat nikomn hmbremot to frohmn faso faso kfo rindhiwamt? To nd yufet yimam, romn ndhtet ndhtet nefm newumm.

⁸ Bro Nkifrar, nmoh kingr, Bro Nkifrarhu rfa borngtn wom bro boririfhut htamort. Nd boririfhut kfo memor, “Tunn yak marnyewa kanjo inji womm yak marnyakfot.” Nd boririfhut hikhato womm yak marnya-rahkomm, ndt tu dborioh neft narahko. ⁹ Womm hifa hifa yak marnyahato tfit womm faso faso yak bebneft, ndt nhai tu Bro Nkifrarhu boririfhut kfiwa yuhat hikkahko. Nhai. Fasoh neft newuko. ¹⁰ Akfokahta wawanyko, wom yimar boririfhu bugam hik bugewarmn, tfit wom fasoh neft rim naneft, to bibe, nd boririfhu bugam bi fak frikati bugerm. ¹¹ Nd Bro Nkifrarpars kfo memor, “Niko tuhanet yimako mirahko wom mettpno arim fnahnom. Niko ramet metko mirahko wom yindarirpno arim fnahnom.” Yo womt kfo memor, “Mirahko womm awas furanomm.” To wawanyko, nhai ijoh yuhatn mett rimakrfont, o ni metn nhai yindarir rimakrfonr, be nambur sinyahato wom yimar was furen, to bibe, nd boririfhu bugam bi fak frikati bugenm. Nhai womt hikkahnt. ¹² Kraisr tor, rorn dukefm hiyaf hanyrahrko Bro Nkifrarhu mrokforoh hikneft. Mrokfom nhai hikrfokomm, Bro Nkifrarpno mrokfetko rhurahko. Ndnett niko duka marnyahato yau marnyakfot. ¹³ Wom yimar nhai wom yimam yuhuwafwonrform, nd yimar turhu kotkfot toh thombat, Bro Nkifrar nhai yuhuwafruhatrr. Yimar womm yuhuwafworm, nd yimar awi mrokfo duhatr rhurahr.

Kraisrhu dukefr ruhet yimar, tu Kraisrhu dukefr hikhato rorhu nefm nakfot

¹⁴ Bar yinouroko, wom yimar kfo kangr, “Nanhu duka yima yuhur Kraisrn korhr.” To nd yimar nhai nd Kraisrhu mrokfom hikhato rorhu dborioh nefm womm yak nuhaskahrm, nd duka yima yuhur, Kraisrpno rhuyukr, bi nohmorr. To nd yimar Kraisrhu dukefr bi nohetr, to finji Kraisr yak yurakruharr fasoh fasoh nefmn bi yiro turna hmbriyafneft? Nhai mif. ¹⁵ Nikmoh Kristen yimatm hmbre wusken duhatmn o yeshriyen duhatmn, ¹⁶ niko htihato nhai hmbre wuskenm o yeshriyenm yak herfokomm, be tngrpamn kfo famukomm, “Warhu marnyatwako! Hmbre wuskam wayak wahmbre kkahtwako. Yo yeshrim wayak waye yingmaritwako.” To afo attiwonanko. Ndhtet tng mrokforpat kforahn, nd tng mrokfot finji womm yak marnyaruhatm? Tukomn hmbre wuskar yeshrir yak hehato kforahn, ndt hifa. Tngt kfonihato yak hirahnm, tot tu neft. ¹⁷ Kraisrhu dukeft ruhet yimam niwa nefm to inji newum. Kraisr hiket yimam nhai womm dborioh nefm yak nuhaskahmm, nd Kraisrhu dukefr rom yorhwar bi nohmor. Nhai wom Kraisrhu dukefr rhukahrm.

¹⁸ To tfit wom yimaroh htiyeft nnndo htiruhamtn kfo wok mirahm, “Womm Kraisrhu dukefrparpno rhuhato nd dukefrparpno korhrm, womm nhai. Rom be Kraisrhu

hiknefrpat hikhato Kraisru dborioh nefrpam newum. Ndt rot hifa." To tfit akfoyanko. Be Kraisru dukefrpar rhuruhakomn nhai ror kfoyuk mrokfo yuhat hikhato dborioh dborioh nefm na duha yirahkomm, tone, finji kanjo hti duka mirhoya, "Ndr Kraisru dukefr ruhet yimayer." To na, na Kraisru dborioh dborioh nefm yak nuhasrhotank, ndm htiruhakomn, duka mirahko, "Ndr Kraisru dukefr ruhet yimayer." ¹⁹ Nikmoh bro dukefr duka kangko, "Rpa Bro Nkifrarpar korhr." Nd dukefr dborioh dukefer. To yarhm, rom to ndhtet dukefetem. Ndnetmn yakrmihato korhm. ²⁰ Ar mmoharim! Nd na kfo hniwa mrokfom nhai wany duka tungunakahkomm? Yimar nhai nd Kraisru mrokfom hikhato rorhu dborioh nefm womm yak nuhaskahrm, nd duka yima yuhur, Kraisrno rhuyukr, bi nohmorr. Tfit wom nkifra tndh mrokfot mkfo tndhakrhota ndtn wanyhato dukefr yakrahko. Barkoft afo ttiwonank. ²¹ Bingot nmoh nkifra Abrahamre, finji namotr rorhu yima yuhur Bro Nkifrar hti wuthamorr? Wawanyko, Abrahamr, yon Aisakru tarior mtha yuhat Bro Nkifrar kfomohat, Abrahamr nhai be marimor, "Be wanys wanyruha." Nhai. Wany yakionihato hikmort Bro Nkifra kfoyuk mrokfot. Yonr kitumakhato yura tariohyuk tkitt htahato memor yonrn Bro Nkifrar tarior mtharuha. Nd ror namo neftn Bro Nkifrar htihato hti wuthamorr. ²² Bi htitwoko? Abrahamr Bro Nkifrar kfoyuk mrokfot wany yakiohato hikmort. Tamoh neft Bro Nkifrar kfomot hingrna hikmotrt, to be nd tkitt Bro Nkifrar htihato duka memor, "Abrahamr tu wany yakiowet yimayer." ²³ Ndnett Bro Nkifrarhu rfa borngt kfo kangt, "Abrahamr, Bro Nkifrar kfomo mrokfot wany yakiohato hikmotrt, Bro Nkifrar hti wuthamorr." Be Bro Nkifrar nd yiha rikfak memor, "Abrahamr bi nanhu yimater." ²⁴ To bi htitwoko. Yimam nhai be mrokfom wany yakiowa yuharpatn rroh yima yuhum Bro Nkifrar hti wuthakahr. Nhai. Yimam mrokfom wany yakio-hato hikneftno Bro Nkifrar hti wuthe-wurm. ²⁵ To nd ijoh tone htfasmoa met Rahafthu tndht to inji rhumot. Josuar kfo tkrurafyuk tmbho tohm, rotn dborioh neft nahato yak kafroh-tamotmn tfit wom nndoh yuhatn yaktom fak htafmotm. Ndhtet dborioh neft namott Bro Nkifrar htihato memor, "Nd metthu yima yuhur tu wuthayert." ²⁶ Thatipt yafothett yorhwatn wiyauyauwot. Yafothat thu troh tanywott, nohwot. To inji kanjo korhwom Kraisru dukefr ruhet yimam. Rorhu mrokfom wany yakiohato to nhai hikkahm, to bibe, nd Kraisru mrokforoh wany yakio dukefr bi nohmorr. Nhai wom Kraisru dukefr rhukahr.

3

Mrokfom duka marnyahato kfo pthakfot

¹ Bar yinouroko, mirahko be bok yimam tisa tohhato Jisasr hiket yimam kfo hta mrokfom ahenomm. To wadukaf hanyswako, kto tuhant yindars bro kotkfot toh thombat, nom tisanom hingrnewa hingrna nmbuhat kotett rhuraht. Bro Nkifrarhu mrokfot nom yihato yimam yak nuhas bonuhas-wohat finji finji yak nuhaswanomm? Ndm frhik marnyarahmm. Nom tisan-moh kotkfot krhoniraht. Womm rom be inji.*

² Nom yima buganom, nmoh tngm tamoh mrokfom ptha nefm o tamoh nefmpno mrokfo ptha nefm, tngm nndo yiyaknihato faso faso mrokfom tubatuyaknitnomm. Tng rine wuni duha yimar, ndr tu dborioh yimayer. Tngt yak hta bohtiwa kanjo rorhu nyigam, yimbhindangm, tir wuram, yak hta bohtakfot hosm yak hta bohtiwa kanjo. ³ Hosroh yak hta bohtayuk aim, tngmn hatohwomm. Nd aim mtitofm mano mano hirwom. Yimam nd mtitofm yaktihato kak hta bohtaf hanitmm. Kangm fitoh yuhat aim, nd yuhat kitm. ⁴ Yo womt wadukakomt doht. Doht nhai be tut yikaht. Yimar mitohhato mnange hanygaf hanitatrt doht kitwot. Yimar kangr fitoh kmit o fitoh yuhat ais, nd doht rot be mnange kak htaf hanitrt. ⁵ Yo tngt nhaf inji. Tamoh tamoh nefmpno o mrokfompno, nd tefi tngentn yura yura kfo hagrha bohagr-hewut.

* ^{3:1:} Ndare veskfot kfiwa tisar mirahko ka wandfa kunym tohwa tisar kfiwit, o boririfhut kfo nuhasmoa tisar kfiwit. Nhai. Ndare veskfot kfiwa tisar, ror nndoher. Bro Nkifrarhu hik yuham o mrokforoh hik yuham o tamoh tamoh nefenroh na yuham, rorn kfo nuhas yak nuhas inji nayuk tisayer.

To wadukako. Tefi kah banenr yakhato teng furhakrahnr, ndrn funa nanyjar sinyahato yonmar nahonm kandhi witewurm. ⁶ To tngt, to tu kah nyungorame. Kaht ndha mkur fnah-wot. Fasoh fasoh nefm to ndha rhuhato mfrfnah hasiwum. Yuhut yimanysoft bi nd fasoh nefmn thu nhombraniyettn, to be fasoh nefrpam mfrfnah hasorahm. Nd fasoh fasoh nefm to Satanru nefem. ⁷ Ndar bbinysoft yorhwa kmi tirf yemrom yo tekt yorhwa yiram tamoh, yimam yakgb bogb yo hegb bogb hnamoahat, yimampno brbo yi yo tamoh mrokfom kfoneft fak hikmoumm. Arihat to inji, yima mrokfom hikrfomm. ⁸ To tngt, nhai yima mrokfom hikkfot. Tu be nhai mif. Tngt kangt wom mrokfo bebt atuyant, tutwott. Nd mrokfot kitwot kfrat kanjo. Womr kfrat kanjo yuwtwattr rim kktr. Nhai tngt yima yak tkafkfot. Tngt fasoh nandom jumbet. ⁹ Nd tnge Bro Nungothetr, nmoh Bro Yifemr kfo yindhor inji newunomr. Yo tfit nd tngrpaye tfit womm kfo twewunomm. Nd nom kfo twewam, yimayem, to Bro Nkifrar yak nhombramo yimayem. ¹⁰ Kfo yindhor nmbuhati fasoh nmbuhat nd rpa tngrpat rpat mfnahwof. Bar yinouroko, ndt nhai tu dborior nmbuhat. Yimar Jisatr hiketr nhai ndhtet neft nakfot. ¹¹ Nhai wom tek yinhar dborior bupami fasoh binef mrdipam rpa yinhar mfrfnahkahm. Nhai. ¹² Bar yinouroko, ka olif yukhame, fik tihatn hirrfom? Nhai. Yo ka fik yukhame, ka wain toftn hirrfom? Nhai. To inji kanjo, nhai fasoh binef mrdipam mfrfnahet tek yinhar tfit dborior bupam mfrfnahrfotmr. Nhai.

Dborior dukefet yimam, rroh rhu nmbuhat be yak teh marnyewut

¹³ Wom yimar tamoh tamoh nefm afo duka hik marnya bomarnyahato newurm, nd yimarhu wiayau nmbuham wiayau marnyakfot. Womm inji htiruhamrn, duka mirahm, ndr awi, dborior yimayer. Tamoh nefm o mrokfom nhai be turhu yufat yura htahato pthakahrm. ¹⁴ To womm faso duka bebhato tukmoh yufamn yura yura htarahkomm, to mirahko akfo amanyom, “Nom duka hik marnya bomarnyahato tamoh tamoh nefm newunomm.” Mirahko inji akfo furanom. ¹⁵ Ndhtet riduka aduka yima yuhum nhai yura hefen yuhat niakahm. Ndhtet dukefm ndar bbiny-softuhem. Fasoh nefm mhatoh fnahet yimaroh nefem. Satanrn nd nefm mhfnahnewurm. ¹⁶ Wawayko. Yimam nd womm faso duka bebhato turoh yufam yuta hagrha hasiwam, nhai rhu digr marnyakahm. Fasoh fasoh nefm to romn na htfaswomm. ¹⁷ To nd yimam tu Bro Nkifrarhu duka hik marnya bomarnyayuk dukefm yaketm, htirahnm rroh rhu nmbuham, tohefm, tamoh nefm, nhai wom tamoh nefem htiruhatnm. Rroh rhu nmbuhat be yak teh marnyaraht. Tot tu bro htiyeft htirahnm. Yo womm-pno nhai nakfo ba inji naruhatm. Rpat toh marnyahato nayak marnya hakurahm. Yo htirahnm mrokfom hikhato wany yakioneft brorahtm. Yo womm hti yuhuwafhato dborior nefm na hakurahmm. Nhai yufet yimarpam yak marnyahato tfit yufa duha yimam nhai. Nhai. Yo nhai tngrpam kfo hnu bohnuruhatm dborior nefroh hikneft. Nhai. Hik mif mifrahmm. ¹⁸ Yimam tum nayak marnyahato rpat toh marnyarahm, kto tfit tum htirahmt yimam yindhoreftpno rhuhato tum yihom nakfo yindhorak mnakfo yindhorak, yihom nahiay mnahiyak inji naruhatm tum htihato mirahm, asot tu dborior rhu nmbuhat. Yimam yewuri tpim thu brurhato tfit tum thu bruryuk yewuri tpiroh dborhayuk wuritwamn yak yewa kanjo, inji tfit tum htirahmt nd dborior rhu nmbuhat.

Yimar ndar bbinysoftu wuskaroh dukefr ruhetr, Bro Nkifrar hti srthurahrr

¹ Tamoh nmbuhatpno niko tuko Jisatr hiketko rinatuhakhato nakfo hamuh nakfo hamuhhato nakfo nnewako? Tukmoh nd tamoh tamoh wuskaroh yak dukefr sinyewatrko wommpno nnakfo nnewuko. ² Nd wuska yak dukefr be mfro sinyewurko. Wom yuhat mnhombratitko yo tfit wom yuhat mnhombratitko nhai yakkahkomt, to be tfit kekutni tuko rinatuhakhato nakfo nnewakomn yima waswoko. Niko nhai Bro Nkifrapno kfo bruttnakahko tamoh dukefm rhuneft. Ndnatn nhai hikahrko. ³ Yo niko kfo bruttnahato nhai yak duha yitahat, to mirahko nko tamoh dukeft-pno nhai

hikahrnom. Bro Nkifrar htitrko nd shrm niko kfo ttiwonwam, ndar bbinysofthu dukefr rhuhato fasoh hingrneft htarahkomm. Ndnett Bro Nkifrar inji htihato nhai wany yakiohato hikahrko. ⁴ Ndar bbiny-softhu shrkarhu dukefr rhurahko, to be Bro Nkifrar be hti srthurahkomr. Ndnett ndar bbinysofthu dukefr rhurahko, Bro Nkifrar mong trohnirah-komr. Mett ramemr htanyhato yiho-tam toh htfaswa kanjo Bro Nkifrar inji mhtanirahkomr. ⁵ Bro Nkifrarhu rfa borngt yorhwa nkifra mrokfot ka nhai duka hanykahkomt? Bro Nkifrarhu rfa borngt kfo mif memot, “Nd Bro Nkifrarhu Yafothat yimanom yorhwat, be tu nhai mif wofnkaht nmoh dukefm nndo mando yikfot. Nd Yafothat be kangt, ‘Nann bro dukefr htahato nanhu dukefrparn warhuko.’ ”

⁶ To Bro Nkifrar nom be tu mfro yuhuwafwornom. Ndnett Bro Nkifrarhu rfa borngt kfo memot,

“Yimam be mfro turoh yufam kfo hagrhetm,
Bro Nkifrar nhai hifa yima yuhur hmbrikahrm.
Noh hambre yima yuhurpno ruhetm,
Bro Nkifrar hifa yima yuhur hmbrirtrm.”

Sindaun 3.34

⁷ Ndnett niko be Bro Nkifrarhu yinhit fknihato tohkfot. Satanr yak tuhafkahtkomr thu troh tanyhato yakrmanyirahr. ⁸ Bro Nkifrapno brbo waiko. Rorpnno brbo waikahtko ror inji htiruharn nikompno brbo yirahr. Nd fasoh fasoh nefm niko yakinowam be tmifko wayafhokahkomm dborioh nefm wahikko. Nd hus bok yima yuhum niko harhuwam, wayafhokahkomm rpa yima yuhur wahikko. ⁹ Nd niko niwa fasoh fasoh nefm ridukakhato yima yuhum krhokahmn wanurko. Nyingatikm yifatoh hasiwam tfit yohnihato nur yingam ayohnim. ¹⁰ Nmoh Nungothethru yingampno be nhowi rhu marnyahato be rorhu yinhitn rhukfot. Inji rhu marnyarahko, nmoh Nungothethr kfo yindhorrahrt nikmoh rhu toh nmbuhat.

Mirahko wom Kristenroh nefm o yau nmbuham htihato wom mrokfom akfonomm

¹¹ Bar yinouroko, mirahko tuko Kristenko womroh yau nmbuham htihato akfo amanyomm, “Ndm ndhtet ndhtet nefet Kristenem.” Womroh nefm o yau nmbuham frhik bolikhhe duha o frpsa bopsahe duha. Be rpat rhu marnyahato tuko Kristenko nayak marnyahato tohkfot. Wom Kristenroh nefm htihato wom mrokfom kfo ptha-rahko, ndt nhai Bro Nkifrarhu mrokfot hikkahko. Be yura kau fnahwokomt. ¹² Bro Nkifrapar nd boririfhut htamort. Rorrpar nd boririfhut htamortn wom nefm hti bebneft, rorrpar mrokfo kfo pthakfot. Yo rorpar yimam yakhato kaht turahrm. Yo womm toh raforahrm. Ndnett tamohmpno tuko wom Kristenroh nefm htihato mrokfom kfiwako?

Mirahko tamoh tamohmpno akfo grhanom

¹³ Wawanyswako, niko yimako kfo yamuka, “Href hafitn o yihof yuwonano hafitn, afo ndko nd tauntn yihato rpa gunyjimr tohhato wom hingrneft htarhoyann, marut mfro yakruha.” ¹⁴ Ndhtet kfet yima, nhai tawisafkahnt nohok rhuruha nmbuhat. Nikmoh rhu nmbuhat kangm kah hiptn mkur fnahhato tfit kto hti hambrefiwut. ¹⁵ Wom yima yuhur sinyewurn tamoh hingrnfroh hingrnaneft, mirahn nd ninhu hingrneft yihett arhut. Be kfo mekfot, “Be Bro Nungothethr htiyaf hanyruha. Kangr watohkahnn nd hingrneft wahingrnane ee btn toh-rhoyann nd hingrneft hingrnaruha.” ¹⁶ Ndhtet dukefm duka marnyayukm, to nhai. To tfit yima yuhum wasu grha sinyahato kfo grha htfas kangko “Nom nd nd hingrneft hingrnarah-nom.” Ndhtet kfo yindhor kfo grha htfasneft fasohet. ¹⁷ Wawayko, tamoh tamoh nefroh na marnya yuham yimar bi mhiyafetr, to nd dborioh nefm nhai nakahrm, nd yimar fasoh neft newur.

Marut wuss tamoh tamoht yak yakhato thu tibmonwa yimaro kfo duka mrokfot

¹ Marut wuss tamoh tamoht mfro yak yakhato thu tibmonwa yimako, wawanyswakomt na kforuha mrokfot. Niko ndhtet yimako, niko tu bro kaht yirahko.

Ndnettn niko bi wanur hifa bohifa hanyko. ² Niko tamoh tamoht yak yakhato thu tib-monwat, yoh nasoh bonasohraht, yoh tmbra botmbraraht, yoh dbotna bodbotnaraht, binef wingrt yerahtt, yo hmbre wuss dmt yerahtt. ³ Nikmoh marut yak yakhato htewat riyikia dhntahato yindengtn ki hmbrirahmt. Nd yindengtn tafontn htaruhattko Bro Nkifrar htihato bro kaht htarahrko. Wuroh yihar bi brbo rhu hanyetrn to tfit nd yonmari yonmari wuss tamoh tamoht yak yakhato hta tibmon furewukomt. ⁴ Wawany marnyako! Yimam yakkomokomn nikmoh msrirroh kiprt kfnah furahemomko. Nhai wikkarmokomm. Rroh hingrneftu maruham kfo nurwohat, tu yura myorhekwa Bro Nungothetr bi wanukr. ⁵ Niko ndar bbinyskto tohmohat, tukmoh toh nmbuharpat dukahato bi marut wuss tamoh tamoht yak-hato bi tohmokomt. Yesht bi ye warho marnyamokomn to bi nikmoh was yihayer bi. ⁶ Dborioh mgogra yimam be kotim furahato wasmo-komm. To rom nhai nikmoh nambu-rpam frdbfaknihato tawo finji nar-momko.

Nom toh bmtahato Bro Nkifrapno kfo bruttnahato Bro Nungothetr toh gari hasokfot

(Sapta 5.7-20)

Toh bmtahato krhopam titahato Bro Nungothetr toh gari hasokfot

⁷ Bar yinouroko, yimam wom tamoh nefm newumko, niko be yak marsisakfot. Yima yuhum be noh hmbrehato Bro Nungothetrhu nia yihar rhu gari hasokfot. Niko bi tawisafeteko. Yimar msrirroh htahato kangr, wuritwam tamohm ayak ayeya, afo katwinworm. Nd wuritwa ye yima yuhur afo kak tkaf kihwarr kangr, afo buriyohri marr afo yakkahfm wuri suhm afo muhrahm. Nd dukefrpno afo katwinworm. Bi yak yiboneheme kekworm. ⁸ Ndnettn niko tamoh tamoh krhopam yakneft be yima yuhum yak tkaf kihhato noh hmbre yima yuhumpno rhuhato rhu duka gari hasokfot. Bro Nungothetrhu nia yihar bi brbohwor.

⁹ Bar yinouroko, mirahko wom Kristenm kfo gungmiohhato yiro yiro harhunomm. Bro Nkifrar htiruharn mrokfetko rhurahko. Nd mrokfo yaki-tohyuk yimar bi tor bi kuny yifhatikt tohwor. ¹⁰ Bar yinouroko, wamdukkak hanyswakomm profetroh tndhm. Brorhu yufat kfo ptha htifasmoahat faso faso kak bebmoumm. To rom nhai krhopam htihato riwohsisakrmom. Nhai. Yak marsisahato nd krhopam tohhato titamoumm. Niko to nd yuhat hikkfot. ¹¹ Wawanyko. Nom kfo kangnom, yimam toh bmtahato tamoh tamoh krhopam titiwam, kfo yindhor kangnomm, ndm tu tpiyetmn tohhato krhopam titewumm. To wanymokomt Jofrhu tndht. Ror tamoh krhopam niayukm ror yak marsisahato tohmorn nd krhopam niayukm titamorm. To Jofr inji namohat, to Bror finji namorr? To kto Bror dborioh nefm namorr Jofr. To tot inji Brorhu neft. Bror tu mfro yima yuhuwafhato yima yak marnyeter.

Tamoh tamoh mrokfom nayak dbkafrahnom Bro Nkifrarhu yufat yuta duha

¹² Bar yinouroko, bro mrokfot akfo nuhasanko. Wommpno tamoh mrokfom o tamoh nefmpno mrokfom nayak dbkafneft, mirahko yura hefenn o bbinyskto to be injirpa, o bi kfo namhikfot bi kfikomt to be injirpa. Bro Nkifrar mirahko auyutakahnomn mrokfot ayak dbkafnomt. Inji narahko to be tukomn htkotrahko.

Tu dborioh yimar kfo bruttnarah, htirahnt nd kfo bruttna nmbuhat bbukefett rhuraht

¹³ Nikmoh womr tamoh krhopeter, nd yimar Bro Nkifrapno akfo bruttna-twar. O, be yindhorhato korhr, nd yimar Bro Nkifrarhu windohm yakhato windoh yindhorkfot.

¹⁴ Wom yimar dbohnetere, nd yimar sioshu tohak yimam nakuyakhato romm kahpam htanihato akfo bruttnatwamr. Akfo bruttnakahtmr marnyanirahr. ¹⁵ Bro Nkifranko bro dukefm hta mif mifhato kfo bruttnaneft, Bro Nungothetr nd yimarhu dbohneft yak marnyahato tfit yak kasinyarahrr. Yo nd yimar wom fasoh nefm rhuneft, Bro Nungothetr yak thuhirahrr rorhu fasoh nefm. ¹⁶ Ndnettn niko tuko Kristenko tuko

nakfo nriyaf nuhaskfot nikmoh tamoh tamoh nefenm. Womm wanyhiruhamko, romn kfo bruttna wuthafhiruhatmko ee tamoh dbohnefm rhuyukm thu trohrahmk. Yimar kfo bruttnayukr tu dborior yimar kfo bruttnarah, htirahnt nd kfo bruttna nmbuhat bbukefett rhuraht. ¹⁷ Iraijar, ndar nom kanjohot yimar kfo bruttnamohat buriohrhu nia duhaneft, uwa, buriohr nhai niarmor husfirpa yuhut gunyimmi wom gunyimirhu 6-pela yamm. ¹⁸ Tfif kfo bruttnamor buriohrhu tfif nianeft, ee buriohr tfif niahato mswirroh yeshrim bupam yakhato sinya marnyamom.

Bro Nkifrarhu tu yafothet mrokfot myafhoniyet yimam tfit rimakhato yarim htakfot

¹⁹ Bar yinouroko, wom Kristen yimar Bro Nkifrarhu tu yafothet mro-kfot myafhonihato bi nndoh yuhat bi yiyyetr, tfif wom Kristenr yihato rorn womr yakhato tur toh tanyuk tkitt rim hterr, nd yimar inji nayukr, dborior neft namor. Rorn ndwom yimarhu yafothat bi Maringou yuhat tohett, rorn tfif fakhemorr. ²⁰ To mrokfot waduka hanyswakomt, wom yimar fasoh fasoh nefmn tohett, to wom frohrn yihato kfo famurr, “Wurene, nd ni yita yihotat fasoh yihotat bi kitn. Wania ndar dborior yuhat ainyo.” Nd yimar inji nayukr, rorn ndwom yimarhu yafothat bi Maringou yuhat tohett, rorn tfif fakhemorr. Yakhemotrr be nd yimarhu fasoh fasoh nefm Bro Nkifrar be mong trohhirahrr. Boknambok nefm nd yimar nayukm mong trohhirahrr.

**Pitar
dwandfamo barkof gontwat
Barkof kfo nuhas mrokfom**

Kristenm bok krhopam yakmoatm ndnatn Pitar rroh kfo bmtayuk mrokfom gontwat wandfakhato htafmorm. Gontwathu mrokfom kfo memor, "Kristenm Jisas Kraisrhu gutnius mrokfomn dukefm htakfot. Jisas Kraisr nohmor. Nohhato tfit sinyamor. Sinyahato yura moun yuhat rim fnahnimor. Kto tfit yarim fnahnehato yawihnehato tafont htiyakrahmr tuhant yindars." Nd mrokfot tur kfo htanymort. Nd mrokfot yakitoh kihhato toh gari hasokfot.

Kristenm mirahko ka be rhu yindhorkfot wom kurhefen duha. Nhai. Nd krhopam Kristen yimaroh toh nmbuharo mnhombrayuk nefem. Nd Kristenr wohsisrahr o nhai. Nd nefet. Mirahko ka tamoh nefet. Ndnetn Jisasr yakitoh kihhato toh bmtakfot. Toh bmta hasetnn Jisasr niahato mhtiyaknerahrn, to be yakruharn dborioh rhu nmbuhat hirahrn.

**Nom Bro Nkifrarhu dborioh tuhannom yindarinom tohwonom.
Ndnetnomn nom be dborioh dborioh nefrpam na hasohato nd
nmoh yufampno rhuyuk wuskamn be toh gari hasokfot.**

(*Sapta 1.1-2.10*)

¹ Na Pitaya. Nann Jisas Kraisr aposer hingrneft fak htamor. Ndar gontwat nann wandfakhato htefiwant. Niko Bro Nkifrarhu yufatpno bi ruhet yimako, nikompno ndar gontwat niewut. Niko frohko rpen rpen natubatunihato Pontus tohwako, niko frohko Galesiat toh-wako, Kapadosiat tohwako, Esiat tohwako o Bitiniat, nd nd profinsm tohwako, ndar gontwathu mrokfom wahtitwakomm. Nd kmim niko toh-wam womroh kmiyem. Hefenr tor, tukmoh tohyuk kmir. ² Bingot Bro Yifemr rhuhato rorhu dukeft bi wuri wuri yimot. Bi htimort nikmoh yak htayuk yihotat. Bi hti htatahato bi rorhu yufatpno fak dbkaf htamorko. Memor, "Kto nanhu yonm rhurahm." Bi rorhu yufatpno yak dbkaf htayet-komn turhu Yafothat niahato tu Jisas Kraisr kanjo fak htamorko. Memor, "Inji yak htahato Jisas Kraisrhu mrokfom hikrahm." Kraisrhu kkupam kfomom nikmoh yima rifhum yak wus bowushato Kristenko tohmoko. Bro Nkifrar hti yuhuwaftato nikmoh yima yuhum minoh hmbrehato yak marnya bomarnyarahrm.

Hefenr tu dborioh toh nmbuhat yakrahko

³ Akfo yindhor boyindhornomr Bro Nkifrar, nmoh Nungothet Jisas Kraisrhu Yifemr. Bro Nkifrar nom yuhuwaftato Jisasr bi nohhato yopt ruhetr tfit kasinyamorr. Jisasr yima nfrir tfit tohhato nfri dborioh rhu nmbuhat he hanitrnom. He hanyhato nom htitwanomn nmoh yima yuhum sinyewum Bro Nkifrarparhu yakitohhato hikneft. ⁴ Nmoh dukeft duka kangnom, bi rorhu yon mifenom. Nmoh yufatpno rhuyuk wuskam Bro Nkifrar kakitoh-wormko hefenrn. To nhai finji na-ruhatm. Be inji rhu hanyrahm. ⁵ Bro Nkifrar tu nngrajoh Nkifrayer. Bro Nkifrar yakitohhato hikwatkomr kuka-tohafo hanitrko. Rorn toh natwiworko. Nhai wom tamohm niko finji nakfot. Be inji rorn toh natwi hanyruharko, ee Jisasr nierahr. Niahato tfit rorn miyakruharko yak marnya bomarny-raharko.

⁶⁻⁷ Jisasr niko miyakruha nmbuhat wany yindhorwakomn yima yuhum toheto-hwomko. Ndt rot hifa nmbuhat. Nd krhopenm Bro Nkifrar yahukam, to mirahko niko ndm mhtiyakhato tfit amthu youtanom. Nhai. Nd krhopenm niko Bro Nkifrar yahukohat kangr, "Afo ahtiyanm, toh bmtarahm o nhai." Kraisr yakitohhato hikwa nmbuhat gorharoh hingrneft kanjo inji kitwot. Yimar gorham yekwohat yuht nungur fukayett kekwort. Kto tfit kahe tariorh hnutr. Tariorh hnuhato nd nungur fukat yak thuwart tu fnhuyet gorha mifrpam kekwor. Bro Nkifrar hikwa yimaroh toheft to inji

korht. To mirahko Bro Nkifrar ka nd gorham wofnwor. Nhai. Ndm rom bbinysoftpno mibatiniyukem. Ror niko yakitohwa dukeft ndt hti hanitrt. Nd krhopam yakruhakomn nikmoh toheft toh bmtarahko. To hifa. Nd krhopam niko yakkmom, nhai yima yuhum krhormomko. Nhai. Jisasr yakitoh bmtahato tohmokomn yindho-refrpno tohmoko. Ndm bi hti htamormn kto Jisas Kraisr yawihnehato yimam htiyak thoft be tu bro yufat hirahrko yo bro yindhor nmbuhat htarahrko yo nikmoh yufam yura yura yutahato kfo yindhorahrko.⁸⁻⁹ Jisasrpno yima yuhum yitahat nhai yima nyngatikm htihato yima yuhum be rorhu dukefrn rhukahm. Nhai. Yo rorpno bro dukefm htewohat nhaf inji. Nhai yima nyngatikm htihato inji nakahko. Nhai. Nikmoh bro dukefm Jisasrn kitm, ndnatn Bro Nkifrar kak hanitrko. Inji newatrko bro yindhorefrparpno korhko. Nd bro yindhor rifhur nikompno yorhwar be tu bro yindhor rifhur korhrko. Nhai finji kfo hikkfot.

¹⁰ Bingot bi profetm kfo ptha htamomt ndar rhu nmbuhat niko bi yekwat. Kfo ptha nhta bonhta me-moum, "Bro Nkifrar nko fitoh yuham tfit yakmiyakruharm?"¹¹ Bro Nkifra-rhu Yafothat nd profetm mthu nawoh-moattm kfo memooum, "Kraisr krhopam yakrahr, nhai be rpahtet krhopam yakruhatr. Krhopam yakruharn kto tfit bro yufat yakrahr." Kraisrhu Yafothat inji kfo nuhasmoattm, tfit nd profetm kfo ttiwon hta memooum, "To nd yimare fitoh yiha nieruhar? Tone krhopam finji finji yakruhar?"¹² Inji ttiwonmoatm Bro Nkifrar kfo memorm, "Na hingrnaruha hingrneft nhai bi nikompno hingrnarhotant htiruha-komt. Nhai. Kto nikmoh mongko. Kto ndar bbinysoft nia tohruha yimam, romn nd neft htirahmt." Nd gutnius mrokfom, yimam hnehato kfo nuhas-wam, ndmn kfomor. Bi Bro Nkifrarhu Yafothat yawihnehato yimam thu nawoh hanitattm romn nd mrokfot miyaknihato kfo ptha nuhas hanitattmko wany hanitwokomm nd gutnius mrokfom. Mounmotm rom nhaf kangm, "Nd gutnius mrokfot afo awany hik bohiknomm."

Bro Nkifrar tur tohwa toheft kanjo tohneftn nakumornom

¹³ Bro Nkifrar duka kangr, "Athu nhirakkahanm tukanhu toheft toh hikrahm." Ndnett nikkoh yima yuhum yak hta bohtatahato nikmoh wiayau nmbuham dukefmpno yaukfot. Bok dukefm yak duha, rpa yima yuhurpam rhukfot. Rpa yima yuhum rhuhato Bro Nkifrar mekaht Jisas Kraisr yak hfhanafohato moun yuhat yawihnehato tuhant yindars tafont nyngat rihar wuhtiyak thombat, nd yiha Bro Nkifrar yakhato yak marnyarahrko. Nd dukeftn yakinohkfat.¹⁴ To be niko Bro Nkifrarhu dukeftn rhukfot. Bi Bro Nkifrarhu yoneko bi. Ndnett mirahko tfit Jisas Kraisrhu mrokfom tafi wany juha na hnamo nefm tfit nd nefm anom.¹⁵ Bi Bro Nkifrarhu yoneko. Bi turhu yufatpno fak dbkafmorko. Ndnett niko yonko be turhu toheft toh hikkfot. Nhai kspitafat rim tohkfat. Nhai. Mar tafont tohkfat.¹⁶ Nkifra rfa borngt Bro Nkifranko kfo memor, "Na Bro Nkifraya mar tafont tohwa, niko to inji mar tafont toh bugakfot."

Nmoh fasoh fasoh nefmpno Kraisr suh nanyormornom

¹⁷ Hefentr tor nmoh nkifra kmir. Bro Nkifrar tor nmoh Yifemr. Ndnett ndar bbinysoft tohneft be rorhu yinhitn toh hikkfot ndar bbinysoft tohwa yifemrom toh hikwa kanjo. Nd Yifemr nhai nom yakitohwa yufam o hingr-nefm o tamohm ndm htikahr. Nhai. Yima buganom rpahtet yukatoheft kukatohwornom. Ndt tu dborioh neft newur.¹⁸ Bi nikmoh nkifram toh hawihnamo nefm ndm fak hik hna-moko. Nd nefm bi Kraisr suh nanyormom. Nhai foehr o nunga krirn nohrmor. Nhai.¹⁹ Kraisr suhhato kkut yohnemot. Nhai rorn wom nefm nahato suhrmor. Nhai. Mgogra yimar, be nmoh nefmpno suhmor.²⁰ Nmoh fasoh fasoh nefm Kraisr tkitt yakhato nohneft, ndt Bro Nkifrar mounti bbinysoft tafi hingrna hta duha nd dukefr bi duka htamorr. Nda tu wuroh yihampno Kraisr niahato yima rifiny buharn suh nanyormor.²¹ Kraisr nohmotr tfit tu Bro Nkifrarn bi yopt ruhetr tfit kasinyamorr. Kasinyahato bro yufat hemorr. Nd mrokfom bi wanyetkomm Bro Nkifrar kakitoh-wokomr. Yakitohhato gari hasiwuko Kraisrhu nia miyakneftn. Kraisr miyakruharko hifa rhu nmbuhat yak htarahrko.

Bro Nkifrar hikwa met yindarim yak marnyakfot

²² Jisas Kraisrhu gutnius mrokfom, yafothayet mrokfomn wanyhato hikmokomm. Hikhato nd fasoh fasoh nefm fafho thumokomm. Yafho thuhato yima rifhumio wutham rhumom. Yima rifhumio wuthamn dborioh dukefmn yakhato niko tuko Jisasr hikwa tuhan yindariko najohfi yagnr tohhato tuko nayak marnyewuko. Nd neftn yakitoh hany yakitoh hanykfot. ²³ Nda Bro Nkifrarhu mrokfot rhu yakitoh hanyraht. Kto be inji rhu nkifraniraht. Nd mrokfotn nikmoh yima rifhumio rihingrnamatm toh nmbuham bi yewuri tpim kanjo frdborhamoko. Frdborhahato nfri yima yuhumpno tohwoko. Nd yewuri tpim rom mibatiniyukem. Bro Nkifra-rhu mrokfot rot be inji rhu nkifrani-raht.

²⁴ Ndar mrokfot tu fipet mro-kfoyet. Nkifra gonborngt kfo memot,

“Nda bbinys of bugathu tuhant yindars

kiprt kanjo tohwom.

Tfa htewamn tfit yudbat tfam yohnitm.

Nhai wom rhu hatohkahm.

Yimam inji nahikrahm,

wondht mhatoh tefihato yudbat yohniraht.

²⁵ Bro Nkifrarhu mrokfot nhai inji naruhatt.

Rorhu mrokfot be inji rhu nkifraniraht.”

Nd mrokfot niko wanymo gutnius mrokfoyet.

Aisaia 40.6-8

2

Kraisr toh nkifraniruha rmon dany rahuyer

¹ Bi gutnius mrokfot wanyhato nfri yima yuhumpno tohwoko. Ndnett ariham be tmifko wayafho thukomm womroh duka bebnefm, kfo nhehnefm, kfo nheh furanefm, yo womm tngrpaye frnhehafnefm yo womroh hifa hingrneft o wuskam o tamohm hti yuhurhato yaknefm, yo kfo tukiohnefm. Nd nef bugam be wayafho thutwakomm. ²⁻³ Mirahko tfit nd nefm ayakitohnomm. Bro Nkifrar niwa dborioh dborioh nmbuham bi htihateko. Ndm htihato wahikkomr. Asomif yon hamboryenm wanurtahato mingat mnnefekwa kanjo Bro Nkifrarhu mrokfot wuyakhato yakitoh dbkaftakfot. Inji rhurahko nikmoh toh nmbuham nhai be rpahtet ruheftn rhuruhatm. Nfri nfri yima yuhum nia hneruhamn toh bmtarahko.

⁴⁻⁵ Nikmoh dukefm Nungothet Jisasrpno htamoatko Bro Nkifrar inji htihato rorhu yufat rhuyuk yon kunys fak htamorko. Yak htahato rorhu rmont kanjo kasinyamorko. Womm rom nhai. Jisasr yakkomr rifak htafmomr. Tu Bro Nkifrarhu yima yuhur ror Jisasrpar htamour. Ndnatn Jisasr yak-morr rmonthu dany rahur kasinyamorr. Niko rorhu yon kunys, niko wohnfa rahu nd ndeko. Niko Bro Nkifrarhu priseko. Turhu rmonthu hingrneft hingrna yimako fak htamorko. Niko lotuhato windoh nd nd nefm newam Jisasr yekwarm Bro Nkifrar wuyahukr ofakfot yahuka kanjo. Bro Nkifrar inji htihato yindhorwor.

⁶ Buk Aisaiatn Bro Nkifrar kfo memor,
“Wawanyko! Nanhu yon kunys wom kingr
dany rahur kanjo kasinya-ruhanr.

Rorrpar titarahr.

Rroh dukefm rorparpno hta-ruhamn

nhai suhhato haninge-ruhatmm.”

Aisaia 28.16

⁷ Rorrpar dany rahur tohhato hatoh-worko. Nikmoh bro dukefm rorpar kitm. Wom womt, rom nhai dukakahmr. Nhai nd dany rahurpno yakitohhato tohkahm. Aisaiar kfo memor,

“Nd rahur, kamda yimam hti kurhato yak thumor,
be bi tfit nd rahurn bi dany rahur tohwor.”

Sng 118.22

⁸ Tfit wom mrokfot memor,
“Nd yimar Bro Nkifrar htewa tahiyer.

Nd tahirpno wuram mfregu-ghato suhwom.”

Aisaia 8.14

Jisasrhu mrokfom yekwamm riyak htefiwumm. Inji newamn suhna-suhwom. Bingot Bro Nkifrar rhuhato bi htitamort yimam myahot bani suhuha tkitt.

⁹ To niko tu Bro Nkifrar bi turhu yufatpno fak dbkafmorko, niko tur kanjo tohwa kmiyeko. Niko nd kmikomn bi fakngotmor king kanjo tohhato pris hingrneft yaki-tohneft. Nikomn ror hingrnayuk hingrnefm htihato kfo nafhur htfaskfot. Niko kspitat ruhetko ror rimakhato turhu bro nanyjaret nukafat rim htamo yuhat to tfit nikomn nd ror nayuk neft kfo ptha nafhur htfaskfot. Inji nayuk-komn fakmorko. ¹⁰ Niko nhai bi Bro Nkifrarhu kmiko rhurmoko, arihat bi Bro Nkifrarhu kmiyeko. Niko afo nhai hti yuhuwaftato yak marnya hna-rmorko, arihat bi kak marnyahne-wurko.

Wommpno tohneft nmoh yau nmbuham be yau marnyakfot

(Sapta 2.11-3.22)

Nom Bro Nkifrarhu hingrna yimanom kanjo tohkfot

¹¹ Bar yinouroko niko nndo wom kmi thofko ndar bbinysoft tohwako, hefenr tor nikmoh tu kmir. Niko kmiyakmiko bbinysoft tohwohat mirahko yima yuhum wagrha sinyekwa fasoh nefm ahiknom. Yima yuhum wagrha sinyekwa nefm yak hatohaforuhatkmo fasoh tkit bebt riyahko. ¹² Niko Bro Nkifrar hik duha yimampno tohwako, niko be yak tehhato toh marnyakfot. Nd Bro Nkifrar hik duha yimam, romrpam kfo wokwomko o faso faso kfo beb-womko, niko dborioh neft hikhato nhai tawo kfowok inji narfokomm, nd tkittn kto ndar bbinysofthu batih yihar tfit Bro Nkifrar kfo yindhor mirahmr, “Bro Nkifrar hiket yimam dborioh nefm newum, nom nhai.”

¹³ Bror mdukakhato nda bbinysoft tohwa gafman yimam htayuk lokfot hikkfot. Romr tohwa kingrhu yinhitn toh bugewum kmi kmiroh tuhant yindars. Ndnett rorhu mrokfom hik-kfot. ¹⁴ Profins tohyuk gafmanm, ndm buga rroh yinhit tohkfot. Nd yimam kingr kak htewurm. Fasoh net fasoh net yimam romn yekwamm kalabus htewumm. Dborioh dborioh nefm nayet yimam kfo yindhorwomm. ¹⁵ Bro Nkifrarhu dukefr duka kangr niko be dborioh nefrpam wanakahtko, nd niko faso faso kfo bebwa yima dukef duha yimam inji htihato nhai tfit wom ptharuhatm. ¹⁶ Nkifra boririfhut niko yak nhirtamoat bi frtmbho thumort Jisasn. Nhai nd boririfhut wom yikitohkahtko. To mirahko amanyom, “Nhai mrokfom. Nhai bi boririfhut yikitohkahtnom. Ndur nefm nanefm nhai mrokfom.” Ndm fasoh dukefem. Jisasn nd fasoh nefmn mrhumotmr suhmor. Ndnett nd fasoh nefm yafho-hato be Bro Nkifrarhu yinhit tohkfot. ¹⁷ Wom yima fura bofuram dborioh dborioh nefm yak nuhaskfot. Niko Jisasn hikhato tohwako niko tuko najohfi yagnr tohhatu nayak marnya-kfot. Bro Nkifrar duka yakrmihato rorhu yinhit tohkfot. Yo Kingroh mrokfom hikkfot.

Kraisr bi fak nuhasmornom krhoparoh yakneft

¹⁸ Niko hingrna yimako, fitoh yimar tohukatohworko to be nd tohukatohrhu yinhitn tohhatu rorhu mrokfom hikkfot. Nd tohak yimar fasoh yima kfeter niko to mirahko rorhu beb nmbuhat htihato tawo fasoh nmbuhat ayak nuhasnomr. Niko be dborioh nmbuhaarmpno tohkfot. ¹⁹ Niko tu Bro Nkifrarhu dukefr hikhato dborioh nefm newatko nikmoh tohak yimam htihato frtabotwomko, niko be tha hekfot. Inji narahko Bro Nkifrar yindhorhato kto yak marnya-rahrko. ²⁰ Tuko mmohato nd tohak yimaro tngm nhai hikrfotkomm frtabottmko, nhai toh kekutni tawo frtabotrfokomm, to ndte Bro Nkifrar finji dukaruhart nd neft? Ka duka mirahr dborioh neft neko? Na kanga ka nhai. Nd neft tukmoh mmo nmbu-hatn frtabotmko. Rote, dborioh nefm netko frtabot furetmko nhai toh kekutni tawo frtabotrfokomm, tot nd neftn Bro Nkifrar hti yindhorwor.

²¹ Dborioh yimako wom yimam tat furemkon o finji nemko, to niko finji kforuhako? Bro Nkifrar to nd neftn nakumorko. Kraisr to niko dukahato krhopam fakmorko. Nd krhoparoh yak yuham to bi turn fak nuhasafmorko. ²² Jisasn krhopam yakmohat, nhai ror wom neft mnarmotr nd krhopam yakrmor. Ror nhai wom yiha kfo furarmotr wom yimar wanyrmorr. Nhai. ²³ Kfo tfar botfar thumomr ror nhai finji kformor. Yonmar

yonmar krhopam titamorm. Rom inji namohat nhai kfo yanho mrokfot kformorm. Nhai. Nd rom nayuk nefm Bro Nkifrar-pno htamorm. Bro Nkifrar tu dborioh jaser. Ror duka marnya bomarnyahato tamoh tamoh mrokfefm kakitohworm.²⁴ Nmoh fasoh fasoh nefroh krhopam Kraisr yura bgre mis fakmorm. Bi Kraisr nmoh fasoh nefmpno bgre misn nohmotr ndnettn nd nmoh fasoh nefroh nammo bammoneft yafhohato toh marnyakfot. Ror harhumo fhu bebt kfomot nmoh fasoh nefm yoh-nemom. Yimam Jisasr frtabotmo nmbuhatn Bro Nkifrar fak marnya-morko.

²⁵ Sifsifm kanjo frfnah wurasoh-hato fau mmo bammo htfasmoko. Tfit arihatn sifsif tohukatohwa yimarpno bi tfit nia tohwoko.

3

Bi nayaket tuhan yindariroh mrokfom

¹⁻² Hingrna yimam turoh tohak yimaroh yinhim tohwa kanjo niko metko bi ram yakhato ramemrom-pno yorhwako niko be ramemroh yinhim rhukfot. Wom yimam tafi Jisasr hik duhatem niko rroh metkomn rroh yinhim rhuhato tamoh tamohm dborioh yima yuhumpno kfo ptha marnya bomarnyarahkomm, tot nd tkittn nikmoh ramemrom htiruhamn rroh yima yuhum yak kekuthato Jisasr hikrahm.³ Niko Jisasr hikwa metko, rot hifa tmarim, tirm, wuram, yimbhindangm wondhet bugam korhm yo wondhet wondhet wuskam hmbrtiko, rot hifa inji wondh hta bohtewuko. To be mirahko be nd thatiproh wondhyuk wondhrpat aha-tohnom. Nhai. Kangko awondhkahtnom tukmoh yindarim ahti yindhormnom, wawanyko.⁴ Tukmoh yindarim be dborioh yak marnya bomarnyakfot. Tamoh mrokfom napthorahnom be hifa yima yuhumpno rhuhato naptha marnya bomarnyakfot. Nhai be mfro mfro bahbahnakfot. Tom ndhtet ruhefm yima yuhum wondhkfot. Bro Nkifrar ndhtet nefmn hti yindhorwor.⁵ Bingot Juda efkotm nhai thatiproh nefrpamn wondhrmoam. Yima yuhuroh nefmn wondhmooun. Rroh dukefm Bro Nkifrarpar yimoum, nhai riduka adukarmoam. Ndhtet dukefmpno tohmoamn rroh yindarimpno rhu marnyahato tamoh tamohm dborioh dukefmpno rhuhato napthamoum.⁶ Serat rhumo rhu nmbuhat fak hik-mom. Serat tuthu ramem Abraham-rhu yinhitn be tohmout. Yufat yutamoahat futamoutr, tohukatohr. Niko Serathu nefm hikhato womm kak marnywukomm yo nhai wom tamoh tamoh nefm duka yakrmikahko to bi Serathu yon meteko.

⁷ Niko yindariko bi metetko, mirah-ko metm yakhato arituhftanomm. Nifn met yindarfni bi rpa yefn nhai wom husfn rhukahfn. Niko yimayeko yo rom yimayem ndnettn nayak marnyahato rpat tohkfot. Bro Nkifrar hiruha dborioh rhu nmbuhat nhai ni yindarirpa yakruhatnt. Nhai. Mett rot nd rhu nmbuhat yakrahtt. Yindariko metmpno toh marnyahato tamohm kfo bruttnaneft nhai wom tamohm hta raforuhatmm nikmoh kfo bruttnfeft.

Wommpno yiha yiha dborioh nefm nakfot

⁸ Wuroh mrokfot kforuhant. Niko Kristenko tir nayakitohhato rpa yima yuhur tohkfot. Womm yakyuk krhopam hti dukahekfot. Nahti marsisa duha. Yima najohfi kanjo tohhato nahti yuhuwaf nahti yuhuwafhato hifa yima yuhum nahmbrekfot. Noh hmbre yima yuhum tohhato tuko dborioh nefm nayak nuhaskfot.⁹ Wom yimam fasoh nefm newumko mirahko tfit fasoh nefm ananomm. Mirahko tawo tawo fasoh nefm annhenom. Womm inji newumko niko dborioh nefm nakfot. Bro Nkifrapno kfo bruttnahato Bro Nkifrar yak marnyarahrm. Inji narahko Bro Nkifrar yak marnyarahrm. Ndhtet dborioh nmbuhamn nakumorko.¹⁰ Bro Nkifrarhu rfa borngt kfo kangt,

“Fitoh yimar kangr toh marnya-hato hifa rhu nmbuhat kto ahtiya,
nd yimar mirahr womm faso kfo beb bobebanm yo mirahr womm akfo nhehanm.

¹¹ Nd yimar fasoh nefm mong trohhato
dborioh nefrpam hikkfot.

Wommpno nhai nnakfo baboba inji nakfot.

Be hifa dborioh yima yuhumn nayak marnya hanyhato
rpat rhu marnyakfot.

¹² Nd mrokfom nhai be sfno inji kfokahm.

Dborioh metm o yindarim Brorko toh tamnourahrm
rroh wiyauyau toh nmbuham.

To tfit nd metm o yindarim toh nmbuham faso tohwom,
ror nhai toh tamnoukahrm rroh wiyauyau
toh nmbuham. Nhai.

Hti namburworm."

Sng 34.12-16

Dborioh nefmpno krhopam yakneft hifa

¹³ Yimako dborioh dborioh nefm narhko, nhai wom yimar yak beb-ruhattrko. Nhai.
¹⁴ To dborioh nefm niwatko womm kangm finjina finjinemko ndt to nhai mrokfom.
Be yindhorkfot. Mirahko ayakrmekah-nomn bok dukfm ayaknom. ¹⁵ Kraisr nmoh
Nungotheret, rorhu mongko mitohkfot. Rorn toh raforahrko tamoh nefm. Niko dborioh
rhu nmbuhat toh gari hasiwa nmbuhat kfo ttiwonwomko, kfo nuhashekfot. ¹⁶ To
mrokfom kfo ptha nuhasheneft, mrokfom be duka marnyahato dborioh yima yuhurn kfo
nuhas marnya bomarnyakfot. Mrokfom faso faso kforahkomm, tfit tuko yima yuhum
krhorahmkko. Mrokfom hifa kforahkomm, nd yimam niko Jisasr hikwa nmbuhatpno
faso kfoyukm niko pthayuk mrokfom wanyruhamn tfit tum yimtnarahm. ¹⁷ Be tunmoh
dborioh nefmpno Bro Nkifrar kangr krhopam wayakko, a to nhai mrokfom. Bro Nkifrar
ndt yindhorrwor. Tunmoh fasoh nefm krhopa yakneft, ndt Bro Nkifrar nhai yindhorkahr.

Nmoh nrfa htiyakneftn Kraisr nohhato tfit sinyamor

¹⁸ Kraisr nohmo yuhat dukakfot. Kraisr nhai wom tofspno wasrmomr. Nhai.
Nmoh fasoh nefm rorn yakmorm mfha htamotr. Rorn mfha htamotr be nd gribt
wafakmot. Bro Nkifrar nhai bi wom mrokfom nompno. To be nd yiharpa nohmorn
to be. Nohmohat thatiprpat nohmot. Yafothat nhai nohromot. Yafothat rot rhumot.
¹⁹ Yafothat rhuhato Maringour yimot. Maringour yihato Maringour kalabus tohyuk
noheh yimaro yafotham mrokfom hemorm. ²⁰ Nd yafotham nhai be sfno ndha toh fu-
rarmom. Bingot Noar sift hingrna hanyhato Bro Nkifrarhu mrokfom kfo pthamoahat nd
yimam hanyjbornamoumm Noar pthayuk mrokfom. Nhai wany yakio-hato hikrmomm.
Hanyjbornamoahat Bro Nkifrar nhai bi finji narmorm. Noar sift hingrna hanyhato Bro
Nkifrarhu mrokfom kfo pthamoahat, 8-pela met yindarirpam nd Noar hingrnayuk sift
fknimomn nhai bro hnun fune habohirhato miptkormom. Wom womtn batu bugamom.
²¹⁻²² Nd tekt be kfo nhombra mrokfoyet. Bro Nkifrar ndar yiha hingrnewa hingr-neftu
kfo nhombra mrokfoyet. Ariha yimam baftais yekwohat, nd yiha Bro Nkifrar yekwarm
rorpno rim tohwom. Baftais yekwohat nhai yima kifthu yukthuneftn yukkanahm. Nhai.
Yimam Jisasr Kraisr hikhato rorhu dborioh nefm hiketm, baftais neftpno wom womm
kak nuhaswotm ror Jisas Kraisr hikwa yuhat. Ndt nhai be sfno nd hingrneft rhukaht nhai.
Nd baftais hingrneft mnetet. Jisas Kraisr nohhato yopt tohmohat Bro Nkifrar kasinya-
morr. Ndnnett yimam Kraisr frtkaf-hato baftais yekwohat Bro Nkifrar kasinyewarm
rorpno rim tohwom. Jisas nohmohat Bro Nkifrar kasinyak-nimorr hefenr hamuhmorr.
Hefenr hamuhhato bro yufat hemorr. Bro yufat hemotrr nd yufet mounmotm, bbuket
mounmotm rorhu yinhirpat tohwom.

Kristenm bkra kaht kanjo fknitm

Yatk yima yuhur yafhokfot

¹⁻² Nmoh fasoh fasoh nefmpno Kraisr yonmari kku bebt hatoh-mort. Niko rorhu
tat yima yuhur yakhato nd yonmari bkra kahm fknekfot. Mirahko yakrmayomm.
Tpi yakyuk tkitet. Nd bkra kaht bi ftoh-nikomt, to be nd tkittn ndar bbinysoft toh

thombat be nhai tfit nd yatk yima yuhum tfit uhatonehato suh-ruhatko. Be Bro Nkifrarhu dukefrpar hikhato tohrahko. ³ Bi nd yatk yima yuhumpno tohhato nd kspitat tohyuk yimam niwa nefm bi nahna nahnamo-kommn bi na buhtamokomm. Rom niwa nefm be tu fasoh fasoh nefm newum. Yima yuhum wasinyak thombat nhai tu dborioh nefm nakahm, drinkfot yakhato drink spak-wom. Yemrot, drinkfot hta burwewa tkitm yitamn yemrot yehany yehany nhai bmbri ye smbhonikahm, drinkfot yakhato drinakni thombat nhai bmbri mdrin tmbhonikahm. Yehany drinhany yehany drin hanyhato bro yindhoreft yekwattm yima yuhum be yura hirhato btn tum tawo tawo nayakni hanyhato nhai tu dborioh nefm nakahm. Inji newamn be ndha rhu nkifrangotefiwum. Bro Nkifrarhu kfo yirmoh mrokfom nhai hikkahmm. Turoh tahi yifonm yakhta ndmn kfo bruttnewum. ⁴ Nd rom niwa nefm be tu fohm nhombre-wum. Fohm turoh foh swo brongm yihato yuk kekut bokekutwa kanjo inji fasoh fasoh nefm newum. Niko rom niwa nefm nhai brbo yihato htikahkomm. Niko rom niwa nefm yi hti duha yitatkomm kfo ptha kangm, “Tamoh dukefmpno nom niwa nefm nhai yi htikahnmom?” Ndnatn faso faso kfo rindho borindhiwumko. ⁵ Kto tumn kot tohruhamn Jasr kfo nuhas hik bohikrahmr, rom niwa nmbuhat. Nd kot yakitohyuk yimar bi yak htateetr korhr. Rorn wanyrahrm arihat tohwa yimami noheh yimaro hoktfot. ⁶ Nd dukeftpno Jisasr Maringour yihato Maringour tohyuk noheh yimam gutniuskfot bi mikfo ptha nuhas tanymorm. Kto nd bro kotkfot yakitohruha yiha nd noheh yimam sinyaruhamn rpat nd yima nfrimpno kot rpat tohrahm. Fitoh noheh yimam Jisasr miptha tanyuk gutnius mrokfom wanyhato fakitohmm, nd yimam Bro Nkifrarppno hefenr tohrahm.

Niko rpa rpa yimako Bro Nkifrarhu Yafothat rpa rpa nefm he nhombra hanymotko

⁷ Ndar bbinysoftu bati yihar bi brbohwor. Ndnett yima yuhum duka marnyahato yak hta marnyakfot. Yak hta marnyahato kfo bruttnakfot. ⁸ Tu bro nmbuhat niko Jisasr hikwa yimako tuko nayakitohhato rpat toh marnyakfot. Inji narahko be nhai wom tamoh nefm rhuruhatmko. Tamoh tamoh nefm rhuneft nhai be krhoni-ruhatm. Yudbat yak dbhofnarahkomm. ⁹ Bro Nkifrarhu hingrneftn wom yimam newum nikmoh kunym yakkfot. Mirahko kfo mari hanyhato ayaknomm. ¹⁰ Niko rpa rpa yimako Bro Nkifrarhu Yafothat rpa rpa hingrnemf he nhombra hanymotko. Tuko Kristenko nd hingrnemf yakinoh-hato tuko nahti duka nahti dukakfot. Yafothat hayuk hingrneft mirahn be tuhaftahato arhut. Nhai. Tamoh hingrneft fahurn, hingrnakfot. ¹¹ Bro Nkifrarhu mrokforoh kfo ptha htfasyuk hingrneft fahurn, to be nd hingrneft yakinohkfot. Bro Nkifrar kfo famur, “Ndar yimann wom yimam tamoh tamohm yibonwom o finji newum ninn yihato wanyhekfot o htihekfot.” Ni frohn nd hingrneft fahurn, tu Bro Nkifrar hayuk dukefmpno nd hingrneft hingrnakfot. Inji hingrna hik marnya-rahko, riruh aruhuk yimam htihato Bro Nkifrarhu yufat yura yura yuta yindhorrahmt. Yura yura yutaruhatmt be rorhu yufatn broniruhatn be rorrpar tamoh tamohm nyingako tohruharn be tohhany, tohhany, tohhany, be inji toh nkifranirahr. Be inji rpa.

Yindhorkfot Kraisr kanjo krhopam yakneft

¹² Bar yinouroko, mirahko nd bkra kaht niko tohwat yironahato aduka amanyom, “Barenko, nome ndar kahte tamohmpno yi tohwanomt?” Inji kfo duha. ¹³ Jisasrh yufatpno yi tohwatko nd krho mis titewuko Kraisr krho mis titamo kanjo. Ndnett krho mis titewohat be yindhortpno titahato warhutwako. Kto Jisasr turhu bro nukeft mihatohhato tuhant yindars htiruha yiha, nd yiha niko be tu bro yindhoreftpno tohrahko. ¹⁴ Niko Kristenko wom yimam kfo bebwomko, nhai mrokfom. Bro Nkifrar inji htihato kak marnyewurko. Nhai be sfno yak marnyakahrko. Bro nukeft hatohet Nkifrarhu Yafothat toh natwihwotko. Ndnett niko yindhorkfot. ¹⁵ Yo! Niko Kristenko, nom mirahnom ka hifa kfoyet nikmoh womr sinyaniruharn yima wasrahr o rikohrahr o raskor hingrneft yirahr o womroh hingrnemf o tamoh yak nhta tkitm rim rhuhato yukatoh hanyrahr. Nd nefm narahko to be tukomn tfit krhopam yakrahko. ¹⁶ Niko

Kristenko be krhopam fak fureko, niko mirahko ayimtna furanom. Bro Nkifrar kfo yindhorphato nikmoh yufa wasarem Kraisru yufat yuta yindhorkfot.

¹⁷ Bro Nkifrar yakitohruha bro kotkfote, finji kforhoyant? Arihat nom Kristennmoh mrokfomn bi rhuhato kot kakitohworm. Nmoh mrokfom yakitohhato nmoh toh nmbuhat bi kak susnewurm. To Bro Nkifrarhu gutnius mrokfo hanyjbornayet yimamne finji naruham? Be nhai wom yihotam, be kaht wundiat riyahm. ¹⁸ Ndt tu kfo mif kfoyet. Buk Sindauntn mrokfot korht. “Fitoh yimam Bro Nkifrar hik-hato bkra kaht yitohtm, Bro Nkifrar fekrm, tone nd hanyjboronet yimame finji naruham? Rom be kahtn wundiat riyahm.” ¹⁹ Bro Nkifrar bi turhu nyingaye bi htihato kfo famur, “Niko, nd nd yimako mrokfetko rhurahko.” Bi inji htihato kfir, nd yimam yudbat rroh yima yuhum Bro Nkifrarpno yak kekuthato dborior nefrpam yaukfot. Tu Bro Nkifrar hingrna htamornom. Yiha yiham hti yukatohaf hanitrnom. Tamoh krhopam nianeft turn thu bmtarahrnom.

5

Niko eldako yakitoh marnyakfot Bro Nkifrarhu met yindarim

¹ Na Pitaya. Na sioshu eldaya. Nikmoh siosroh eldam hingrnewa hingrneft ndt hingrniwa. Na tukianhu nyingaye htimoynar Kraisr krhopam yakmohat. Kto Kraisr yawihnehato met yindariroh nyanga riarpno bro yufat yak thombat, nd yiha niko bro yufam yak hanyshombat na rpat nd bro yufam yakrahnom. Ndnatn niko eldako wom yima yuhum kahukanko. ² Bro Nkifrar hikwa met yindarim niko eldako yakitoh marnyakfot tukmoh yonim yakitohwa kanjo. Nd Kristen met yindarim nikmoh tirmn korhwom. Ndnett yikitoh marnyakfot. Mirahko nd elda hingrneft ahhreknomt. Yo mirahko be mfro maru hingrneft kanjo nd hingrneft ahangrnacomt. Nd hingrneft be tukmoh yibon yima yuhum hingrnakfot. ³ Mirahko tukmoh bro yufam dukahato Kristenm yihom toh mtoh yinomm. Nikomn dborior nmbuhat htahato Kristenm htihato rom hikrahm. ⁴ Kto Kraisr yawihnehato met yindarim tafont htiyakhato sifsifroh tohak yimar kanjo met yindariroh tohukatoh yimaroh tohak yimar toh thombat nd yiha niko eldako tu hifa dborior rhu nmbuhat htirahko. Yimam wumt resishato win praiskfot yekwa kanjo inji dborior rhu nmbuhat yakrahko. Nd rhu nmbuhat nhai bmbri rhu tmbhoruhatt. Nhai. Be inji rhu nkifraniraht.

Nom Bro Nkifrarhu tirtn rhukfot

⁵ Niko damiag yimako, niko eldaroh yinhim tohkfot. Mirahko yura amtoh-nomm. Tuko nahti duka nahti dukakfot.

“Yimam be mfro turoh yufam kfo hagrhetm,
Bro Nkifrar nhai hifa yima yuhur hmbrikahrm.
Noh hmbre yima yuhurpno ruhetm,
Bro Nkifrar hifa yima yuhur hmbritrm.”

Sindaun 3.34

⁶ Ndnett nikmoh yima yuhum yak karhuhato be dborior yima yuhum rhuhato Bro Nkifrarhu yinhitn rhukfot. Inji nahato wom yiha Bro Nkifrar nikmoh yufam yura htarahrm. ⁷ Bro Nkifrar hti dukewurko. Ndnatpno ni-kmoh dungunangunefm wahitwakomr.

⁸ Nikmoh wiayau yuhum yimbhindangm tohetohaf hanykfot. Nhai be sfno inji kfokaha. Satanr yau gronetr tohwar. Niko kmbruyenm kanjo gbeft yak hikaknihato kangr atadbofnayanko.

⁹ Ndnett nikmoh yima yuhum Bro Nkifrarpno htahato Bro Nkifrar yakitoh dbkafhato tohkfot. Inji nahato yima yuhum bmtaruhamko, nhai bmbri riwohsisakruhatko Satanr nia finji naknaneft. Nhai be nikomrpako ndhtet krhopam yakkahko. Wur fitoh fitoh tkitm tohyuk Kristenm be nd rpahtet krhopam kekwom. Ndnett toh bmta-hato frtf thukfot. Riyoh bruyohak duha. ¹⁰ Na kfo hta nuhaswa mrokfom hikrahko, Bro Nkifrar thu bmtarahrn nikmoh toh nmbuham. Bro Nkifrar yima yuhuwafetrn nd yuhuwaf nmbuhatn fakmorko. Memor yakhato Kraisrpno tohhato rorhu nukeftn be inji toh

nkifranirahm. Ndnettn nd niko yekwa krhopam be inji ariharpat yagniruhakomm kto nikmoh toh nmbuhart yak marnyaruhart toh marnyarahko. ¹¹ Nhai finji kfokfot. Rorrparhu bbukeft be inji rhu nkifranitt. To be inji.

Wuroh mrokfo nmbuhem

¹² Sailasrhu tire ndar gontwat yorhwa mrokfom wandfahemora. Sailasr nanpno tu brbo toh tamnouwa yimayer. Kanga akfo duka tunguna marnyayanko. Mirahko ndar gontwat yorhwa mrokfom ka fura mrokfoym. Bro Nkifrar yak marnya mifrahrko. Mrokfom yikitoh kihhato toh bmtakfot.

¹³ Asha Babilon thofm, bi tu Bro Nkifrarhu yufatpno kfo htatamom, niko dukahato kfo yindhorkfot htefiwumt. Yo na yikitohwa yon Makr ror nhaf niko dukahato wom kfo yindhorkfot htefiwurt. ¹⁴ Niko Kristen tuhan yindariko, wom Kristenmpno nakfo yindhorphato naki yindhorkfot. Tot tu Kristenm niwa neft.

Nhai mrokfefm, warhutwako. Niko Kraisrhu met yindariko Bro Nkifrar yak marnyat-warko.

**Pitar
dwandfamo husyuk gontwat
Barkof kfo nuhas mrokfom**

Ndar gontwathu bro dukeft, Kristenroh kfo dukayuk gontwayet. Kristenm Jisasr yakitoh kihhato toh bmtakfot. Tom wom tisam kau htfaswom. Nieruhamn frmmo bammoruhatmm Jisasr yafhohato rom yakitohyuk dborioh nefm yafhorahmm. Aposerm kfoyuk mrokfom yakitoh kihkfot. Yakitohhato hikrahmm be nhai Bro Nkifrarri Jisasr myafhoniruhatmf. Aposerm turoh nyngaye htimomr Jisasr kfo tebos mrokfom hemohat. Rom rpat rhuhato wany yakitohmoumm kfo tebos mrokfom Jisasr hemoahat.

Wom yimam kfo kangm Jisasr nhai yawihneruhatr. Ndar gontwat kfo miraht Jisasr nieraht. Be yudbathu nianeft nhai. Ndt nhai be sfno. Bro Nkifrarhu yima yuhur nhai wofnkahr wom rpar rim tohtaneft. Ror kangr ndar yuht bbinys of bugathu yima bugam afo yima yuhu yak kekut bugam. Ndnetrn rroh toh garineftn yiham yuke hanitm (3.9).

Nmoh toh nmbuham dborioh nefm yakitoh bmtahato tohkfot.

**Yakitoh bmtahato fasoh dukefmpno niayuk yimam yak
tuhafrahnomm.**

(Septa 1-3)

¹ Na Saimon Pitaya. Na Bro Nkifrarhu hingrneft hingrnewa yimaya. Nann Jisasr Kraisr aposer hingrneft fak htamor. Nann ndar gontwat niko Jisasr Kraisr hikwa yimakmoh yufampno htefiwant. Jisasr Kraisr nmoh Bro Nkifrar tohwor. Tohhato nrfa htiyakmornom. Nikomi nom Aposernom nmoh rhu nmbuhat Bro Nkifrar htitwort rpahtet ruheft korhnom. Nom Jisasr hikwa yihotat, ndtn kukatohwor. Nhais nom yakitohwa yufamn o maru kunymn o tamoh tamohmn htikahr. Nhais. Nom Jisasr hikwa yuhatn htitr. Nikomi nom Aposernom Jisasr hikwa yuhat hifa rpat niyak tkaf hanitf. Nhais nom Aposernom mfrfnahnihato niko yiho tohkahko. Nhais. ² Nmoh Bro Nkifrarri Jisasr, nom yak hta bohtiwar, hifa rofpno bi tohwoko. Bro Nkifrapno kfo bruttna kanga nikmoh rhu nmbuham ayak marnyakahtrm rhu marnya-ruhakomn yima yuhum be mirhurahm.

Bro Nkifrarhu yufat korhnom

³ Jisasr Kraisr Bro Nkifrayer. Ror tu bro nanyjar bbukeft hatohwor. Rorhu nd nanyjar bbukeft kfiwut nom Bro Nkifrarhu nefm hikwonom yo dborioh rhu nmbuhat korhwonom. Nd dborioh rhu nmbuhat nom yorhwat be inji rhu nkifraniraht. Nom Kraisrpno nia tohwohat dborioh rhu nmbuhat kahukrnom. Nmoh yukatoh nmbuhat htimonomr Bro Nkifrar kanjo yo bro bbuka nanyjaret yimar kanjo, ndnatn rorhu naku tngr yimohat nom wany-hato nia twanhomon. ⁴ Jisasr Bro Nkifrayer. Ndnatn nom rorpno rim tohmohat Bro Nkifrarhu dukefr hikwonom. Nmoh rhu toh nmbuham, tur kfo htamo yuhamn hifa hifa fak htamorm. Inji yak hta marnyamotrm, niko ariham Bro Nkifrarhu dukefrn kau hikwoko. Yau hikhato ndar bbinys ofthu fasoh yima yuhur mong trohwokomr. Ndnettn nhais nd fasoh yima yuhurn yak hatohaforuhatrko fasoh tkit bebt yiruhatko.

⁵ Nd bro dukefmpno nikmoh tpim habokkna marnyahato Jisasr yakitoh-kfot. Jisasr yakitohhato dborioh nefm rpat yakitohkfot. Dborioh nefm yakitohhato dborioh dukefm yakhato dborioh dukefmpno yaufkot. ⁶ Dborioh dukefmpno yauhato yima yuhum tamohm dukefm sinyewum afo yak nhtakfot. Yima yuhum yak nhtahato toh bmtakfot. Toh bmtahato Bro Nkifraparhu dukefr hikkfot. ⁷ Bro Nkifrarhu dukefr hikhato tuko Jisasr hikwako nayak marnyahato tuko nayakitohkfot. Tuko Jisasr hiketko nayak marnyiwa kanjo wom yima furam inji yak marnyakfot.

⁸ Inji tohhany tohhanyrahko to be nd nefrpam bronirahmko. Bronihato nmoh Nungothet Jisas Kraisrhu hik yuhum nhai myak mmotaruhatko. Hik marnyaknirahkom.

⁹ Wom yimar nhai nd kfiwa nefm yakitohkahrm, nd yimar nyingam kunyjwatmr nhai hti hikkahrm Bro Nkifrar hti yindhorwa nefm. Hti mmohato nhai mhtiyakkahrt Bro Nkifrar rorhu fasoh nefm yak thuhemo yuhat. ¹⁰ Niko nanhu yimatko kfiwanko, mirahko ndhet yimaro fasoh dukefm ahiknom. Nd dborioh dukefm bi kfahukam niko ndmn hik-kfot. Niko Bro Nkifrar yakmohat memor, “Nanh yon kunys rhurahm.” Ndnettnd nefmn yakitoh trpaknikfot. Yakitoh trpaknirahko be nhai suhhato mong trohruhatkomr.

¹¹ Inji nahato nom nrfa htayakmo bro yima Jisas Kraisr hti yindhorruharnom yakmi-yakrahnrom ror king tohruha kmi hefenr.

¹² Jisas Kraisrhu mrokfot rot hifa wany yindhorhato bi myakitoh bmtak-nitkomt. To na kanga tfit wompam wompam akfo duka hanykahtanko yima yuhum duka hanyrahmm na kfoyuk mrokfom. ¹³ Hifa mkfo dukak hanitank. Kfo duka hanyetkomn mrokfom bi wany hmbrita hanyhato rhurahko. Kto na nohnineft mrokfom nhai yafho thuruhatkomm. ¹⁴ Na tuka kak nhtewa nanhu nohhato ndar thatipthu thu hur sany yihar bi brboh-wor. Nmoh Nungothet Jisas Kraisr bi inji kfo nuhasmora. ¹⁵ Na tohruha yiham afo kfo duka hanyruhank. Kfo duka hanyetkomn na nohni thoft nd dukefr yakitoh hanyrahkomr. Nhai yafho thuniruhatkomr.

Aposerm htimon Bro Nkifrarhu nuka nanyjareft Kraisr hatohmort bruwohmr katiwa kanjo

¹⁶ Nom aposernom bi kfo ptha nuhasmonomko. Kfo memonomko, “Nmoh Nungothet Jisas Kraisr bro bbuka nanyjaretr tfit yawihnerahr.” Mrokfom nom pthiwam nhai be ptha furakahnomm. Nom tunmoh nyingaye htimonomr Jisasm bruwohmr kanjo katohato funefm yambo hritnamohat. Nom tunmoh nyingaye hti hikhato kfo ptha nuhaswonomko. ¹⁷ Bro Yifemr Jisasm kfo yuta hagrha hanyhato bro nuka nanyjareft hemohat nom tunom tohhato htimonomr. Hefenr tohwa tu Yura Myorhekwa Nkiframifr kfo memor, “Nda yimar nanhu yoner. Nanhu marbit rorn korht. Rorn mfro hti yindhorwa.” ¹⁸ Nd tngt yawihna-mohat nom tunom Jisaspno rpat hnaru kminyosfr toh hasetnomn nd tngt wuwanyakmonomt. ¹⁹ Tom profetm kfo pthayuk mrokfom. To mirahko ka kfo fura mrokfoym. Rom pthayuk mrokfom tu kfo mif kfoyem. Rom kfo ptha htayuk mrokfom htayak hanyhato yau hikrahkomm dborioh yihotam. Profetroh mrokfom lamrhu nukeftpno yauwa kanjo profetroh mrokfom yak htaf hanyrahmko. Rroh mrokfom yakitoh hasohato Jisasm yawihne thombat Bro Nkifrar nd yiha hti yimbu hikrahkomr. Nd yiha nikmoh yima yuhum mirahm ka dbha ksut mfnahwa gunyr kutewumr nwindmr tewur.

²⁰ Wawanyko! Niko tuko wahti dukako. Profetroh mrokfom nhai be turoh yima yuhum wapthakrmomm. Nhai. ²¹ Yo nhai wom yimamn ptharmotmm wanrymomm. Nhai. Tu Bro Nkifrarhu Yafothat kasinyamottm nd mrokfom kfo pthamomm.

2

Profet giamanroh fasoh dukefm

(Jut 4-13)

¹ Bingot Isrermpno yimam profet yufam yaknehato kfo ngeh bonhehmoumm. Arihat to niko hti marnyaf hanykfot. Wom yimam tisa yufam yaknehato kfo fura bofura mrokfem hnehat mfrnhehruhatmko mhikaknirahkomm. Kfo mirahm, “Jisasm nhai mfhah tarmorm nikmoh fasoh nefm.” Yimam inji nayukm nhai rhuruhatm. Be yudbat Bro Nkifrar yak batiyakni twanhorahrm. ² Nikmoh wom wom Kristenm nd giaman tisam niahato mfrnhehakruhatm rroh dohr mikmbrirahm. Mikmbriruhm ijom tonanyeft yak nuhasrahmm. Nd Kristenm tisa giamanroh dohr mikmbre-hato ijom tonirahm, be nd tkittin riruh aruhuk yimam inji htiruham mkkirahm manysifm kanjo. Nhai tfit sinyaruhatm Bro Nkifrarhu hikneft. ³ Nd giaman tisaroh yima yuhum be maruhannm korhm. Be tum wakfakyuk mrokfom kfo nhehaknehato maruhennm mtarhoptakni

herahmko. Nd rroh nefm Bro Nkifrar bi rihtiyak hatohakmorm. Arihat to bi dukewur yak batinefrpatn. Nhai kfo furakahr. Rorhu mrokfot fipett rhuraht.

⁴ Wawanyko! Bingot Bro Nkifrar fasoh nayet mounmotm yakhato hel tumorm. Tumotrm yuhre nd kspita nngrajohet muhr afo tohhato toh garitwom kotkfot. ⁵ Bingot Noar tohmo yiham nhaf rpahtet neft rhumot. Nd fasoh fasoh nefm namoa yimam nhai rhurmorm. Bro Nkifrar kfomotr, hnuntn miptko bati witamom. Noa ripharpas tohmom. Noar hifa toh nmbuhathu toh yuharoh mrokfom uhatone hatonemour. ⁶ Yo bingot Bro Nkifrar dukamor Sodomti Gomorathu yak batineft, nd kmif nhai rhurmof. Yuht yimayett rpat wundiatn mikur tounimom. Memour, “Inji anakahta yimam htiruhann duka yanhorahma.” ⁷ Nd kmi Sodom Gomoraf mikur tounimohat Lotrpar nhai kurrmor. Nd hus kmifhu tuhant yindars yiramtieh yiram kanjo yihom yejbohnak myebohnakmoahat Lotr nhai yindhormor inji htimoahat. Lotr Bro Nkifrar hikmoatr Bro Nkifrar rorrpar fakmorn nhai kurrmor. ⁸ Rorhu toheft fak teh marnyamot. Ror be rhuhato mano mano htimour tuhant yindars yihom yejbohnak myebohnakmoahat. Htihato rorhu yima yuhur nhai marnyarmoarr. ⁹ Nd tndhm wanyhato duka kangnom, Bro Nkifrar bi inji toh rafo hnewurm rorhu mrokfot hiket yimam. Ror hiket yimam tamoh krhopam yekwohat ror tor bi brbo toh tkafworm. Rorhu mrokfom hik duha yimam bi hti hta bohtewur finji finji narhoyanm bro kotkfot tohni thoft. Ndm bi hti htetm korhwom.

¹⁰ Nd giaman tisam bi inji hti hta bohtewur. Nhai Bro Nkifrarhu yinhit rhukahm. Rorhu mrokfom hanyjbor-newum. Turoh yima yuhum sinyewa fasoh dukefm hikwom. Hikhato mfro tuhagrha htfaswom. Ndnetmn be tu nhai yakrmekahm Bro Nkifrarhu mounmotm kfo wokneft. ¹¹ Nd giaman tisamn mounmotm kfo wokwomm. Bro nngrajohet mounmotm nhai tum Bro Nkifrar nyngahato inji nna kfo wokkahm. Nd giaman tisarpamn inji newumm.

¹² Be tu mmo mifwom. Be tu nhai yimaroh dukefm rhukahmm. Nndo yau fohroh dukefm yorhwatmm womm kfo tukioh fura hanitmm. Be tu fasoh neft hikwom. Inji nayukm Bro Nkifrar tufnah batirahrm foh nungam kanjo. ¹³ Womm faso kak bebwomm tawo Bro Nkifrar faso yak bebrahrm. Rom tafont yima nyngahato riharpno niwa nefm nhai yimtnakahm. Nhai mekahm, “Kafrohhato narahnom,” nhai. Nikom-pno yi rhuhato nuwa ye shombat be tu bro yimtneft kahukmko. ¹⁴ Nd yimam rroh dukefm nhai wom tamoh dukefm rhukahmm. Be metroh dukefrn frtkaftewarmn nhai fasoh nefm yafho thukfot. Kristenm tafi tat yima yuhum yak duham nd giaman profetm yitamn mkfo yuhur boyuhurwatmm yitamn fasoh nefm newum. Nd giaman tisam fasoh nefm bi nawonfohetmn be nd maruha dukefrparpno korhm. Ndnatn Bro Nkifrar yak batirahrm. ¹⁵ Rom nd fasoh nefm newohat nhai be sfno nakahmm. Tu dborior yihotar yafho thunimomrn be nd fasoh fasoh nefm fknihato mmo bamumiwum Beorhu yon Balamr namo kanjo. Balamr to inji namor, rorhu bro dukeft memour, “Fasoh fasoh nefm niwa yimam hikrhoyann maruham hirahma.” ¹⁶ Bro Nkifrar rorhu dukefr inji htihato yihotat toh rafomorr. Donkim yimam kanjo ptha duhatm, nd yiha donkir kfo pthamor. Balamr inji htihato be nhai hanysfanihato yirmor. Nd ror hatohmo fasoh yima yuhur ndha fafhomorr.

¹⁷ Nd giaman tisam nhai dborior yihotam yak nuhasruhatmko. Dborior dukefm bi be. Kangme, bujurn mikna domtnitr bupen duhater. Rroh mrokfom be tu fipen duhatem. Bro Nkifrar bi htitamort rom tohyuk tkitt. Rom be tu kspita nngrohpam yi toh-rahm. Nhai mar nmbritefenr htiruhatm. ¹⁸ Nd giaman tisam turoh fipa duha mrokfompno yihom kfo bruyohak mkfo bruyohakhato kfo grha fura hasiwum. Inji na hasiwamn to nhowi yitamn womm wuteh kekutwomm. Womm yuhre fasoh nefm yafho thuhato yuhre mtob tefi hanyetm yo romn tfit metroh mrokfom hanitamm mkfo yuhur boyuhurwatmm tfit yima yuhum sinyewumm. ¹⁹ Yitamn kfo kangmm, “Niko tamohmpno be inji yorhwako? Niko nhai Bro Nkifrarhu yinhit rhukahko. Waniako. Nom hikrahko be tukmoh wuratn yau fura bofurarahko.” Nd giaman tisam nhai tu dborior yima yuhumpno yau marnyakahm. Be tu fasoh nefmn kak hta bohtewumm.

Bi fasoh nefmn kuny kimomm. Nhai yafho thukfot. Ndt nhai yuwi furakfot. Nhai. Tu kfoyet. Yimar bi fasoh nefmn bi kuny kimr to be finji yafho thukfot? ²⁰ Wawanyko! Yimam bi nmoh nrfa htiakyuk yima Jisas Kraisrpno niahato ndar bbiny-softhu fasoh fasoh nefm bi yafho thunihato tfit mkekuthato tfit tum yikitohyuk nefm bi tfit fekmmn bi nd nefm bi tfit kak htewumm, be tu fasoh yima mifm tohrahm. ²¹ Nd giaman tisaroh toh nmbuhat to inji riruhakmot. Afo Jisasrpno yimomn rroh fasoh nefm mfafhonimomm. Ndt rot hifa nmbuhatnano. To tfit kto nd aposerm hayuk mrokfom mfafhonimomm. Myafhonihato arihat rroh nefm be tu fasoh mif mifem. ²² Nd giaman tisam yau foym kanjo inji newum. Yaum to inji newum, tum yifako yinayuk yem-rom, tfit kmifat yarim hta kthuwamm tfit kaumm. Fohm inji newum. Ar bi yuk marnyahato tham bi hifa fnhuyetm, to nhai miruhatm, nhai tfit bdrt yaknaruhatnom. Nhai. Tfite vitamn buburs yihato wik bowikhato bubur bebt harhuwom.

3

Tamohmpno Jisasr nhai bmbri niakahr?

¹ Bar yinouroko, ndar hus gontwaf nikmoh kfo dukayukef. Kanga, niko wanyuk mrokfom yafhonirah-komm. Mirahko ayafhonomm. Yakitoh-hato dboriorh dukefmpno tohhato nikmoh toh nmbuham yak hta bohta marnyakfot. ² Bro Nkifrarhu profetm bingot pthayuk mrokfom yikitohhato yo aposerm kfo ptha nuhasyuk boririfhum dukak hanyhato yikitoh hanykfot. Nd boririfhum nmoh nrfa htiakyuk Nungothetr hemorm.

³ Jisasrhu yawihna yihar brbo rhu hanyrahr. Yimam turoh fasoh dukefmn yorhwam, nieruhamn mhaninge yukatohhato kfo mirahmko, ⁴ “Nikmoh Nungothet Jisas Kraisr kfomohat nianefte to fitoh yiha nieruhar? Aniekahtr afo htirahnomr. Niko kang-nom ka gari firewuko, nhai nieruhatr. Bingot nkiframpmno nhai wom yimar hefenr muhhato tfit yawihnharmor. Ndar bbinysoftu ruheft to be rpahtet ruheft korh hik twanhewut. Nmoh nkifram bi inji mhti fnahmomt. Rom nohnimom arihat to be rpahtet ruheft korht.” Inji kforahmko. ⁵ Nd mrokfom rom be turoh fasoh yima yuhur o dukefm ptharahmm. Rroh dukefm nhai dukakahmm Bro Nkifrar ndar bbinysoft hingrnahato yak htamo yuhat. Bingot Bro Nkifrar be tnge kfo pthamotr mount yarim fnah furamot. Tfit bbinysoft tek bari furatn buha mfnahmot. Be buha tek bari furatn mdborhahato tek bupam mano mano frhahir habrimomt. ⁶ Tfit Bro Nkifrar kfomotr bro hnus yihato nd bbinysoft wiayau hasoyuk tamoh tamoh noh batu wita bugamom. ⁷ Arihat to inji tamoh tamohm Bro Nkifrar kfoyuk mrokfo yuhatn be inji korhm. Yorh-wamn be bro kotkfotn garitim. Nd yiha Bro Nkifrar kotim bugarahrm fasoh net fasoh net met yindarim. Kotim wurasohruhatrm bbinysofti mountpno rpat mikur batinirahm.

⁸⁻⁹ Bar yinouroko, mirahko ammo-nomt wom nmbuhat. Womm kfo kangm, Jisasrhu yawihna mrokfot nhai dimandikaht. To afo attiwonanko, nikmoh dukefti Bro Nkifrarhu dukefte ka rpat korhf? Na kanga ka nhai. Wahtiko, 1,000 gunyjimm nomn htitwonomm be tu boknabok gunyji-mem. Nmoh nyinyage hti yikitwo-nomm. Tfit Bro Nkifrarhu htiyeft htitworm nd 1,000 gunyjimm rpa yihar kanjo. Yo rpa yihar nhaf inji. Nom hti brbohwonomr, tfit rorn nd rpa yihar tfit 1,000 gunyjimm kanjo htitworr. Nmoh dukeft kangnom Jisasr bmbri aniar. Bro Nkifrarhu dukeft htitwor yimamn. Ror nhai wofnkahr wom yimar o mett kaht yinyeft. Rorhu dukeft kangr, yuht bbinysoftu met yindarim yima yuhu ayak kekut bugam afo. Rroh garineftn kot tohyuk yiham yukitm afo.

Mounti bbinysoft mibatinirahf

¹⁰ Bro Nkifrarhu wuroh yihar nhai yiha duhater be hti fohtasakrahr rikoh yimam kanjo. Nd yihar yura mountko wamir nadidat sinyahato mount rim fnahniraht. Mount yorhwa gunym tamohm kahtn kandhi ras witarahm. Ndar bbinysoft yo bbinysoft rhuyuk tamoh tamoh kahtn kandhi witarahm. ¹¹ Wahtiko, nhai wom tamohr rim tohtaruhatr. Kur wus bugarahm tamoh tamohm. Ndnettn nikmoh yau nmbu-ham tu Bro Nkifrar dukewa yima yuhurn wayau hiktwako. ¹² Bro Nkifrarhu toheft toh

hikhato nd Bro Nkifrarhu wuroh yihar toh gari haso-kfot. Yo toh marnya hasokfot. Inji narahko Bro Nkifrarhu wuroh yihar dimandinerahr. Nd yihar mount nhai rhuruhatt. Kahtn kandhi witarahtt. Kaht mfro funa nanyjarhato nd tamoh tamoh kandhi bati witarahmt. ¹³ Tot wom mrokfot Bro Nkifrar kfomot. Kfo memor, “Tfit nfri mounti bbinysoft hingrnaruha. Nd nfri mounti bbinysoft tohruha met yindarim be dborioh nefrpam yakitohhato tohrahm.” Ndnettn nmoh dukefm be nd Bro Nkifrar kfiwa dukef yuhatn hti yukatoh hasorahnom.

Dborioh nefrpam yakitohhato Brorhu wuroh yihar toh gari hasokfot

¹⁴ Bar yinouroko, yima yuhum yak hta marnyakfot. Bok dukefm yak duha. Yima yuhum be Bro Nkifrarpar yikfot. Yima yuhum inji yak htarah-komm to be Brorhu wuroh yihar kfo mirahrko, “Niko nhai wom tamohm rhukahmko. Nikmoh yima rifhum wuthayem. Nikomi na bi rpa yima yuhur korhnom.” ¹⁵ Brorhu wuroh yihar inji bmbri nia duha yitahat, rorhu dukeft kangr, ndar bbinysoftu yima bugam afo ayarim tohna bugam na tukanpno. Rroh garineftn nhai yudbat niakahr. Bro Nkifrar tu hifa dborioh dukefr hemorrh Porr, nmoh Kristen yimat. Jisasrhua nia yihar rorpno wom kfo nuhas mrokfom kfo nuhasmornom. ¹⁶ Ror nikompno gontwam wandfamoahat to be nd Jisasrhua nia yuharoh kfo nuhas mro-kfom kfo nuhasmourko. Rorhu wom mrokfom kfo pthamoam fak mmota-mounomm. Wom yimam Bro Nkifrarhu mrokfom wany ffi hasiwam yo Bro Nkifrar hik marnya duha yitam, romn faso faso kfo kekut bokekutmuomm Porrhu mrokfom yo ndwom Bro Nkifrarhu rfa borngthu mrokfom. Nd yimam be tu Bro Nkifrar htirahrm.

¹⁷ Niko nanhu Kristen yimatko, nd giaman tisaroh nefm bi hti hik bohik bug-amokomm. Rom be tu hanyjborna nngrajohwomm Bro Nkifrarhu mrokfom. Ndnettn niko dukefmpno tohkfot. Rroh fasoh yima yuhum hneruhamm faso faso kfo hta bohtaruhatmko Bro Nkifrarhu tu dborioh mrokfot niko yakitohwat myak htaniruhakomt tfit rroh dukefm hikrahko. ¹⁸ Jisas Kraiser nmoh Broyer. Nom rorn nrfa htiyakhato rhu nmbuhat yak marnyamo yimayer. Rorpno frtkafrahko be toh bmtahato Bro Nkifrarhu dborioh nefm hikrahko. Nanhu dukeft duka kanga be rorhu yufarpat abronikahtn tuhant yindars be rorhu yufarpatn ariyuta hagrak-kahmn yihof href be rorhu yufarpat yutahany yutahanye, to be inji.

**Jonr
dwandfamo barkof gontwat
Barkof kfo nuhas mrokfot**

Jonr ndar barkof gontwat wandfamohat, hus bro dukefetrn ndar gontwat wandfamort. Duka memor, “Gontwaye Kristenm bi kfo dukarhotanm Bro Nkifra nitohfpno nayakitolsruhamn rpat tohrahm.” Yo nhai wofnrnor kspitat tohyuk yimam yihato Kristenm mfrnheh bonhehakhato rom Bro Nkifrar frtrophneft.

Nd kspitat tohwa yimam kfo kangm, “Bbinysoft dborhayuk wuskar yo yimam nhai tu dboriohm rhukahm. Tu faso mif korhm. Bro Nkifrarhu yon Jisasr ndar bbinysoft adborhar nhai dboriohr rhurfotr. Yima mifm kanjo inji faso rhurfor.” Yo kfo kangm, “Bro Nkifrar nhai ndar bbinysoft nom tohhato niwa nefm htihato kfo ptha inji nakahr. Nhai. Kukatoh marsisa hasiwurnom. Ndnetnomn nom tamoh neft to frohm kforuharnom, be nafura bofurakfot. Dborior nefm o fasoh nefm be nafura bofurakfot. Bro Nkifrar nhai ptha inji nakahrm nom niwa nefm. Ndnetnomn tamoh nefm be tunmoh fijo nafura bofurakfot.”

Jonr duka memor, “Ndhtet kfet yimam Kristenm wany yakio duha.” Kfo memor, “Jisasr tu yima mif mifr tohmor. Fitoh yimaroh yima yuhum kfo kangm, Jisasr tu yima mif mifr tohmor yo Bro Nkifrar rpat kakitohwomr, nd yimam womm yak marnyakfot.”

**Mirahko yifungt ritohwa yimaroh nefm ahiknom. Bro Nkifrarhu
nukeft wiayaukphot.**

(Sapta 1.1-3.10)

Bro Nkifrarhu mrokfot yafothet

¹ Nda gontwat na wandfiwat wom mrokfot kfo nuhasruhanko. Nd mrokfot tu yafothet mrokfot kfo nuhasruhanko. Ndar bbinysoft tafi trha duha nd mrokfot bi ritohngotakmot. Nom bi riwanyakmonomt nd mrokfot. Yo tunmoh nyinyage htimonomt. Yo tunmoh tire faktiwomonmonomt.

² Nd yafothet mrokfot yarim fnahmott htimonomt. Nom nd mrokfot htihato kfo nuhaswonomko. Nd rhu nkifrayet mrokfot bingotn bi Bro Yifemrpno rhumout.

³ Nom htihato wanyuk mro-kfom kangnom akfo nuhaskahtnomko, niko wanyhato nom tohwa toh yuhat rpat tohrahnom. Rpat tohhato nom Bro Nkifrari rorhu yon Jisas Kraisrpno tohwa tohefrpat toh bugarahnom.

⁴ Nom kangnom, gontwaye akfo nuhaskahtnomko niko wanyhato be bro yindhorefr-parpno rhurahnom.

Bro Nkifrarhu nukeft wiayaukphot

⁵ Jisas Kraisr pthayuk mrokfom nom wanyhato kfo ptha nuhaswam inji kfiwum, “Bro Nkifrar nhai wom tefi kspitefenrpno rhukahr. Nhai. Ror bro mar nukefrparpno korhr.”

⁶ Wom yimar kfo kangr, “Na Bro Nkifrapno hifa hifa tohwa. Nhai na wom nefm nakaha.” Inji kfet yimar wiayau marnyakfot. To tfit rorhu wiayau nmbuhat nndo nnndo rinewunineft, nd yimar be tngrpatn kfo firewur. Nhai Bro Nkifrar hikkahr.

⁷ Nom Bro Nkifrarhu mar nukeft tohhato rorhu dborior nefrpam hikneft, tu Bro Nkifrar dborior nefm niwa kanjo nom wom Kristenmpno be rpat toh marnya-hato nhai wom beb nmbuham rhu-ruhatmnom. Rpat tohruhanomn rorhu yon Jisas Kraisrhu kkupaye nmoh fasoh fasoh nefm yak wus bowuswatrm nmoh yima yuhum wutham rhurahm.

⁸ Nom be tunmoh rhu nmbuharpam hti yukatohhato kfo mirahnom, “Nom nhai wom fasoh nefenm rhukahmnom.” Mrokfot inji kfoneft be tunmoh nefm kak wunewunom. Nhai tu kfo mifkfat kfokahnom.

⁹ Nd nom nahnayuk fasoh fasoh nefm Bro Nkifrapno yihato kfo ptha nriyafrahnomm, nhai wanyhato rhu mongruhatrnom. Tur kfomo yuhatn nd fasoh nefm yak wus bowus thurahrm. Yak wus bowus thuhato duka mumafrahym nmoh fasoh nefm.

¹⁰ To tfit nom kfo manyeft, “Nom nhai wom fasoh nefenm nakahnom.” Inji kfonefte ka Bro Nkifrar kfo furamor ror dkfo memohat, “Yima bugam fasoh nef bugayetem?” Nd mrokfot ka kfo furamot. Niko ka nhai mdukakkahnom ror bi kfoyuk mrokfom?

2

Kraisr nmoh toh tario yimayer

¹ Bar yinouroko, nann ndar gontwat wandfiwanko. Kanga akfo hta nuhasanko. Mirahko fasoh fasoh nefm anom. Be toh hanyhato wom fasoh neft mnent, tor nmoh wom toh tario yimar. Tor Bro Yifemrpno tohwor. Nd yimar Jisas Kraiser. Tu dborioh yima mifer. Nom niwa fasoh fasoh nefm tfit rorn Bro Nkifrapno rhuhato kfo kangrr, “Nd yimaroh nefm nann bi suh nanyormoyanm. Mirahn tfit adukahiyam.” Rorn nd mrokfom kak hta bohta marnyewurm.

² Rorn nmoh ufasoh nefmpno nohmor. To niko mirahko ka be nmoh nefrpamm nohmorm, nhai mif. Nda dodh bbinysof bugathu met yindari bugaroh nefm noh bugamorm.

Yimar Bro Nkifrapno brbo frtkafetr, nd yimar kak hikwort tu Bro Nkifrarhu thfa mntwathu mrokfot

³ Bro Nkifrarhu thfa mntwathu hikneftpno, Bro Nkifrar hti duka tawisafwonomr.

⁴ Wom yimar kfo kangr, “Na bi Bro Nkifrar tawisafwanr.” Tfit rorhu wiayau yau toh nmbuhat nhai Bro Nkifrarhu thfa mntwat kfiwa mrokfo yuhat hik marnyakahrt, nd yimar be tngrpatn furewur. Nhai tu kfo mif mifikahr.

⁵⁻⁶ Yimar Bro Nkifrarhu mrokfom hiketr, Bro Nkifrar rorhu yima yuhur korhr. Yimar kfo kangr, “Na Bro Nkifrarhu mrokfom kak hikwa.” Inji kfet yimar tu Jisas Kraiserhu wura tfi yuhatn yau hikkfot. Jisasherhu wura tfi yuhat yau hikhato nom htiruhanomn kfo mirahnom, awi, Bro Nkifrarhu toheft toh hikwor.

⁷ Bar yinouroko, nd yima nayak marnyanefthu mrokfot na wandfiwat, mirahko ka nfri mrokfoyet. Nhai. Nda mrokfot bi niko Kristenko riwanyakmo mrokfoyet.

⁸ To nda mrokfot tu mna yimbu yuhett, ndnatn nfri mrokfot kanjo wandfiwanko. Nda mrokfot bingot tu yafothett rhumot. Kraisr nd mrokfot hikhato bro hingrneft hingrnamor. Yo niko nd mrokfot wanyhato yifung kspitathu ufasoh nefm htany-hato Brorhu nukeftn wiayauwoko.

⁹ Wom yimar kfo kangr, “Na Bro Nkifrarhu mar nukefrn tohwa.” Inji kfet yimar tfit wom Kristenm hti srthuworm, nd yimar nhai mar nukefr tohkahr. Yuhre kspitat tohwor.

¹⁰ Yimar wom Kristen yimampno nayak marnyahato rpat tohwar, tor nd yimarn Bro Nkifrarhu mar nukeftn tohwor. Mar nukeft tohyuk yimar nhai suhkahr.

¹¹ Yimar wom Kristen yimam hti sretr, nd yimar afo yifung kspthu nefm tohwor. Yiro yifung kspit tohwarn nytinga kunyjetm kanjo tur iyuk yihotat nhai hti dbtakukahrt.

¹² O niko, nanhu yonenko, Bro Nkifranko Kraisr nohmo nmbuhat mhtiyakhato nikmoh fasoh nefm bi fak wus bowus thumorm. Ndnetann gontwatn wandfahato kfo nuhaswanko.

¹³ Niko bro yimako bi kriyany hmbreyetko, niko bi htimokomr, nd bi ritohngotakmo yimar. Ndar gontwat nikmoh yufampno rpat niewut.

Yo niko damiag yimako, Bro Nkifrarhu bbuka rishur hatohhato Satanr yahot tkaftahato toh bmtewako, niko inji buga gontwat nikmoh yufam-pno niewut.

¹⁴ Nanhu yonenko, bi Bro Yifemr-pno frtkafetko, nikompno ndar gontwat wandfiwanko.

Niko bro yimako bi kriyany hmbreyetko, niko bi htimokomr, nd bi ritohngotakmo yimar. Ndar gontwat nikmoh yufampno rpat niewut.

O damiag yimako, niko toh bmte-wakomn Bro Nkifrarhu mrokfot yikitohhato nd mrokfotn kak hta bohtewutm nikmoh wiayauyau nmbu-ham. Ror toh tkafwatrko Satanr bi fahot tkafmokomr. Ndnetann ndar gontwat wandfiwanko.

Bbinysothu fasoh nefm yima yuhum sinya duha

¹⁵ Ndnetann kfiwanko mirahko ndar bbinysofti rot haruhwa fasoh fasoh nefm ahti yuhurkahnomn nd fasoh nefmn arim tohninom. Ndard bbinysothu fasoh nefmn rim toh-nirahko, to be nhai tfit kekutakhato tfit Bro Yifemrpno nieruhatko. Nhai.

¹⁶ To mirahko ka tamoh nefm kfiwur-nom rim tohnineft. To nd nyngaye htihato tfit yima yuhu sinyewohat yo thatipm mwofnnita nefm newohat ee tamoh tamoh nefmpno o wuskampno yufam kfo hagrha bohagrhiwa nefm, nd nefm nhai Bro Yifemrpno niakahm. Nhai. Nd nefm be nda bbinysoftuhem.

¹⁷ Nda bbinysoft mibatiniraht. Yo nda bbinysoft yorhwa fasoh nefm yimam mhti wofnnihato niwam, ndm rpat mibati buganirahm. Yimam tu Bro Nkifrarhu dukef yuhatn toh hikwam, romn toh nkifranirahm.

Kraisru hti dbnotyuk yimam bi htikomm

¹⁸ Nanhu yonenko, niko wany hnamo mrokfot kfo memot, bbinysothu mibatinini yihar Kraisru hti dbnotyuk yimar, kutewumr Anti Kraiser, nierahr. Arihar bi htikko bok yimam Kraisru hti dbnotyukm bi mfnah hanitm. Ndnatn nom duka kangnom nda bbinysothu mibatinini yihar bi brbohwor.

¹⁹ Nd Kraiser hti dbnotwa yimam afo nompno rpat toh hnamounom. To tfit arihatn bi frfnah-wom. Rom nompno toh hnamohat nhai tu Kraisru yima yuhurn toh hnarmom. Tu Kraisru yima yuhurn atoh hnam, nhai inji frfnahrmotm. Bi frfnahrmotm, ndt htihato kangnom, Kraiserpno be inji toh tariowakmoum. Nhai tu yarim fnahna bugarmom.

²⁰ To nikom nhai nd Kraiser hti dbnotet yimam kanjo tohkahko. Nhai. Kraiser Bro Nkifrarhu Yafothar yak-hato yiro yima yuhum htewurko. Nd Yafotharn thu nawohwatrko dborior yima yuhur niawatr Bro Nkifrarhu tu mrokfom duka dbtak hik bohikwo-komm.

²¹ Ndard gontwat nikompno wandfiwa nmbuhat mirahko ka Bro Nkifrarhu mrokfot yak mumiwatkomt na wandfiwanko. Nhai. Niko Bro Nkifrarhu mrokfot bi hti hik bohikwo-komm. Hti hikhato kfo kangko, “Nd Bro Nkifrarhu mrokfot tu kfo mif kfoyet.” Nd nmbuhatpno na wandfiwanko.

²² Yimam kfo furayetm to frohem? To nd yimam kfo yamukam, mirahko amanyom Jisasr ka nmoh hbhakyuk yima Kraiser. Nhai. Tom inji kfet yimamn Bro Yifemri rorhu Yonr mong trohhato hti dbnotwomf.

²³ Yimar Yinemr frtrohwor, to be Yifemrn frtrohwor. Yimar Yinemr frtkafwor, to be Yifemrn frtkafwor.

Kraisru tu kfo mif mrokfom Bro Nkifrarhu Yafothar kak nuhas bonuhaswornom

²⁴ Nd bingot niko Kristenko ritohak-hato riwayakmo mrokfot, ndtn wayakitoh kih hanyswako. Yakitoh hanyrahkomt, be Bro Yifem nitohfpno rpat frtkafhato tohrahko.

²⁵ Bingot Kraiser bi kfo hta memornom, “Dborior rhu nmbuhat hiruhanko. Hirhotanko be nd dborior rhu nmbuhatn rhu nkifranirahko.”

²⁶ Yimam yi mfrnhehwatmk, ndnetann nda kfo duka mrokfot wandfiwanko.

²⁷ To tfit wom dukefr duka kanga, bi Kraiser Bro Nkifrarhu Yafothat thu hmbremotrm bi nd Yafothatn rroh toh nmbuham kak hta bohtaf hanittm. Ndnett nhai wom yimam yihato mfrnhehruhatmk. Bro Nkifrarhu Yafotharpatn kak nuhas bonuhas marnyewutko tamoh tamohm. Nd Yafothat kfoyuk mrokfom tu kfo mif mrokfom kfiwutko. Niko mirahko ka kfo fura kfoyem. Ndnett niko nd Bro Nkifrarhu Yafothat kfoyuk tng yuham yak hikhato Kraiserpno brbo frtkafkfat.

Arihat bi Bro Nkifrarhu yonenom

²⁸ Yo nanhu yonenko, nikom Kraiserpno brbo mfrtkafkfat. Inji naneft rorhu fnahnayuk yihar nom nhai yimtnakhato tpikr yihom nahmbri-ruhatnom. Nhai. Nom be bro

yindho-rpampno tafont tohhato htiyakrahnomr. Nhai yimtnayefmpno toh htiyakruhatnomr.

²⁹ Nikom htiyeteko Kraisr tu dborioh yima mifer. Ndnatn nikom htikfot fitoh yimar dborioh nefm newurm, nd yimar Bro Nkifrarhu yoner.

3

¹ Dajohnn, Bro Yifemr nom be tu mondtn hta mifhato kutewur-nom rorhu yonnomb. Rorhu yonnomb yorhwatno tfit nd Bro Nkifrar hik duha yimam hti mumiwumnom.

² Barenko, nom bi Bro Nkifrarhu yonnomb korhnom. To kto Kraisr tafont yarim fnahna thombat nom ka finji frdborha rmonruhanom? Ror yarim fnahna thombat nom tunmoh nyingaye htiyakrahnomr. Ndnettн nom turhu ruheft kanjo frdborha rmon bugarahnom.

³ Yimam Kraisr yukatoh darwon hasiwam, nd yimaroh yima yuhum yak marnya bomarnyahato wutham korhm tu Kraisr kanjo.

⁴ Yimar fasoh nefm nayetr, ndr Bro Nkifrarhu boririfhut hanyjbornet yimayer. Fasoh nefm naneft to Bro Nkifrarhu mrokfothu hanyjbornanefet.

⁵ Bi wany hnamokomt Kraisr yawih-nehato nohmo yuhat. Ror yawihnehato nohmo-hat to nmoh fasoh nefm minoh nhehafomor. Ror tur nhai wom fasoh nefm nahato nohrmor. Be mgogra yimar noh furamor.

⁶ Yimar Kraisrpno brbo mfrtkafwar, nd yimar mong troh bugewurm fasoh nefm. Yimar fasoh nefm rim tohak rim tohak na hanitar, nd yimar nhai Kraisrhu yihotar hti dbtakukahrr.

⁷ Yo! Nanhu yonenko, ndnettн niko duka marnyakfot. Wom yimam nieruhann mfrnhehakhato fasoh yihota bebr hanyrahmkо. Yimar dborioh yihotar yauwar, nd yimar Kraisr kanjo yauwarn rorhu yima yuhur wuthar korhrr.

⁸ Bingotn nda bbinysoft trhamo yiarpno Satanr fasoh nefm rinakhato na hnamorm. Ndnettн fasoh nefm na hnamo yimam to be Satanrhu yinhitn toh hnamom. Bro Nkifrarhu yon Jisas Kraisr inji hti tanyhato yawihnamorn nd Satanrhu fasoh hingrneft fak dbhurakmort.

⁹ Fitoh yimam bi Bro Nkifrarhu yonm korhm, nd yimam nhai wom fasoh nefm wanathu wanathunakahmm. Bro Nkifrarhu toheft romn fakmomt. Ndnettн nhai Satanrhu nefm yakitoh hanykahm.

¹⁰ Finji hti nhtahato kfo miruhanom, ndr Bro Nkifrarhu yoner, ndrne Satanrhu yoner? Wanukko. Inji htikfot, fitoh yimar nhai dborioh nefm nakahr yo Bro Nkifrar hikwa yimam nhai yak marnyakahrm, tor nd yimarn nhai Bro Nkifrarhu yonr rhukahr.

Rpa rpa yimanom wommpno nayak marnyakfot

(Sapta 3.11-5.21)

Jisasr fak nuhasmornom wommpno nayak marnyanefet

¹¹ Bingot riruhakmo mrokfot wany hnamokomt, inji kfomot: Nom wom Kristen yimatmpno tohneft, nom be nayak marnyahato rpa yima yuhur rhukfot.

¹² Nom Kenr namo nmbuhat yak duha. Ror Satanrhu yimarn turhu nmем Aberr frdbofna furamorr. To tamohmpno inji frdbofnamorr? Kenr nhai wom dborioh neft narmoar. Tfit htimour wom nmemrhu nefm hifa hifa nmbuham namour, ndnetrn frdbofna furamorr.

¹³ Niko, nmoh Kristen yimatko, nda bbinysof thofm hti srwomko. Mirahko ndte ka arnhofrhof nefet.

¹⁴ Nom wom Kristen yimatmpno nayak marnyahato rpat tohwohat, nom nd hel yita yihotar yau htafhato tfit nd toh yifahtaniruha kmiko yita yihotar tohwanomn nd nefm newu-nomm. Afo nd hel yita yihotar yuhre atohnom nhai ndhtet nefm narfotnomm.

¹⁵ Mirahko nikmoh yimatm be ahti srthunomm. Womm inji rihti srtuhak-hato wom bro shrm miyakniruhakomn yak nadborrahkomm. Yimar yima wasetr nhai toh yifahtakahr.

¹⁶ Jisas Kraisr nom dukahato nohmor. To nom womm dukahato nohneft to bi Jisas Kraisr fak nuhasmornom. Nom to nd yuhatn hikhato wom Kristen yimatm dukahato nohneft, hifa.

¹⁷ Bro Nkifrar yima hti yuhuwafeter. Ndnettun wom yimar bok wuskam harhuhato nhai wom wuskapa duha Kristen yimatm hti dukakahrm, nd yimar nhai Bro Nkifrarhu yima hti yuhuwafeft yakitohkahrt.

¹⁸ Arenko, mirahko wom Kristen yimatmpno be tngrpaye akfo yindhore boyindhor furanomm. Ndt nhai dborior neft. Tamohm yakhihato kfo yindhorneft, hifa.

Bro Nkifrarhu nyingahato toh bmtakfot

¹⁹⁻²⁰ Tamoh neft naruhanom tu nom hti duka miruhanom, Bro Nkifrarhu tu mrokfo mift hikwonomt? Tuko wahtiwako. Womm hti yuhu-wafhato tamohm fahukomm o hingr-nanuhikomm o tamoh tamohm finji nanuhikomm, nd nefmn htihato wamitwako, “Awi, Bro Nkifrarhu mrokfo mift hikwonomt.” Bro Nkifrar hik hanyhato wom yima yuhur kfo kangrn, “Ni Bro Nkifrar nhai hik marnyakahnr.” Nd dukefr mfnahwor, mirahko nd dukefr ahtinom. Bro Nkifrarhu dukefr nhai yima mifnmohr kanjo rhukahr. Nom yorhwa ruheft Bro Nkifrar hti bugewurt. Ror tu yima yuhuwafeter. Be nhowi rhuhato rorrpar yukatohaf hanykfot.

²¹ Barenko, yima yuhum duka kangm, nom hifa Bro Nkifrarhu mrokfom hikwonomm. Yima yuhum inji kfiwumnom, to be hifa. Tamohm Bro Nkifrapno kfo ttiwonneft nhai duka kinyaki hany-ruhatnom.

²² Yima yuhum inji rhuhato Bro Nkifrar tamohm kfo ttiwonwonomr, awi, kahukrnom. Rorhu mrokfom hikhato ror hti yindhore nefm hikwatnom, ndnetrn nom tamohm kfo ttiwonneft kahukrnom.

²³ Bro Nkifrar kfo kangr, “Nanhu yon Jisas Kraisrn yakitohhato wom Kristen yimatmpno nayak marnyahato rpat toh marnya-kfot.”

²⁴ Wom yimar Bro Nkifrarhu mrokfom yakitohhato hikworm, Bro Nkifrapno frtkafwor, tfit Bro Nkifrar tawo rorpno frtkafwor. Bro Nkifrar turhu Yafothat yahuka nmbuhat htihato kfo kangnom, “Bro Nkifrar nompno brbo frtkafwor.”

4

Yimam yafotham fknihato kfo pthiwa mrokfom afo wany nhtakfot. Fitoh yafothar fknitatrr pthiwar?

¹ Barenko, bok giman profetm nda bbinysoft wuyauyauwom. Ndnatn yimam niahato kfo kangmko, “Bro Nkifrarhu Yafothar mrokfom yahukatrnom kfo ptha nuhaswonomko.” Inji mkfoyuk yimam niko bi mirahko rroh mrokfom awany yakio-wakninomm. Nhai. Afo rhuhato wany nhtakfot. Fitoh yafothar fknihato mrokfom kfo pthiwarm? Bro Nkifrarhu Yafothar fknitrr pthewurr o nhai?

² Yimam Bro Nkifrarhu Yafothar fknihato kfo ptha thoft wanyrahnm kfo mirahm, “Jisas Kraisr nda bbinysoft niahato yima mifm kanjo tohmor.” Tom ndhtet kfet yimamn tu Bro Nkifrarhu Yafothar fknitatrm kfo pthewum.

³ Yimam nhai inji kfo pthakahm, nd yimam wom fasoh yafotham fknitatmm pthewum. Nd yafotham Kraisrpno nahti dbnotwa yafothayem. Bi nd niko wanyaf memo yafotha bebm nierahm, to nd yafothamn bi niewum.

⁴ Nanhu yonenko, niko Bro Nkifrarhu Yafothat hatohwoko. Nd Yafothat niko hatohwat tu bro bbuke-fetet. Nd Yafothat kahot tkafwotr Satanr. Nd Yafothathu bbuka rifhurpno kahot tkafwokomm nd giaman profetm.

⁵ Nd yimam ndar bbinysoftuhem. Ndnatn rom pthewa mrokfom be nda bbinysofthu mrokfom kfo pthewum. Yimam nda bbinysofthu ufasoh nefm hikwam romn nd yimaro mrokfom wany yakiowahukmm.

⁶ Yimar tu Bro Nkifrapno frtkafetr, nd yimar womm pthayuk mrokfom wany nhtewurm. Mrokfom wany nhtahato kfo kangr, “Ndm tu yafothet mrokfom, ndm yafotha duhatem.” Nom bi Bro Nkifra-ruhenom. Yimam Bro Nkifrapno frtkafetm nom

pthayuk mrokfom yudbat kekwomm. Bro Nkifrapno frtkaf duha yimam nhai yudbat yakkahmm.

Yimar Bro Nkifrarhu dukefrpno tohwor, wommpno nayak marnyahato tohkfat

⁷ Arenko, nom wom Kristen yimatmpno nayak marnyahato rpat tohkfat. Nd wommpno nayak marnya-hato rpat tohneft, ndt Bro Nkifrarnko rihtakmort. Fitoh yimar womm kak marnya bomarnyewurm, nd yimar Bro Nkifrarhu yon mifer. Bro Nkifrar rorn kukatohwor.

⁸ Nd wom Kristen yimatmpno nayak marnyahato rpat tohneft, ndt Bro Nkifrar mhatoh fnahmo nefet. Nd yuhatt fitoh yimar womm nhai yak marnyahato hifa yima yuhur hmbrekahrm, nd yimar nhai Bro Nkifrar hti tawisafkahrr.

⁹ Bro Nkifrarhu dukefr nomn rhumor. Nd dukefetrn nd ror hatohmo rpa yon mifr tkrurafmotrr nda bbinysoft fawihnamor. Nmoh fasoh nefm rorn suh nanyormorm. Suh nanyormotrm to be nmoh tohefti Bro Nkifrarhu toheft bi nhai wom mrokfom rhukahm-nom. To be rorpno toh nkifranirah-nom.

¹⁰ Wommpno nahti dukahato nayak marnyaneft, ndt Bro Nkifrarhu nefet. To mirahko ka nomn hti duka gngomonnomr Bro Nkifrar. Nhai. Bro Nkifrarn hti duka gngonmornom. Nd dukefetrn turhu yonr kfo tkrurafmotrr nda bbinysoft niahato nmoh fasoh nefm rorn suh nanyormorm.

¹¹ Barenko, Bro Nkifrar turhu yonr hemo nmbuhat, ndt rorhu bro dukeft nompno rhumo yuhatt fak nuhasmor-nom. Ndnettn nom Bro Nkifrarhu hikneft womm htihato yak marnya-kfot.

¹² Nhai wom yimar htiwonkahrr Bro Nkifrar. Be nd yimam htihato yak marnyaneftn, ee nd tkittn Bro Nkifrar nompno tohwor. Nompno tohhato nd wommpno nayak marnyahato rpat tohneft rhu yikitoh hanyrahtnom.

¹³ Bro Nkifrarhu Yafothat nompno yorhwatt, nom ndt htihato kfo kang-nom, “Bro Nkifrar nompno tohwor yo nom Bro Nkifrapno tohwonom.”

¹⁴ Nd Yonr bbinysof thofroh nrfa htiyakyukr Bro Yifemr kfo tkrurafmor. Nom tunmoh nyinyage hti hikhato kfiwunomko.

¹⁵ Fitoh yimar kfo kamukr, Jisassr Bro Nkifrarhu yoner, nd yimar Bro Nkifrapno brbo frtkafwör yo nd yimarpno Bro Nkifrar brbo frtkafwör.

¹⁶ Bro Nkifrarhu yuhuwafeft nompno yorhwat htita-nomn duka kangnom Bro Nkifrarhu bro dukefr nompno korhr. Ndnetnomn nom nhai Bro Nkifrar yafhokahnomr.

Bro Nkifrar tu bro yima yuhuwafeft. Fitoh yimam yima yuhuwafeft korhtm, nd yimam Bro Nkifrapno frtkafwom yo nd yimampno Bro Nkifrar frtkafwör.

¹⁷ Bro Nkifrapno inji nafrtkafhato tohrahnom, to be nd wom Kristenmpno nayak-itohhato rpat tohneft myakitoh bmtaknirahnomt. Inji narahnom, Bro Nkifrarhu bro mrokfo yikitoh yihar nhai duka yanho hanyruhatnom. Nom nda bbinysoft tohwohat Kraisr kanjo tohwonom. Ndnettn nd yihar nhai duka yanho furaruhatnom.

¹⁸ Yimar wom Kristenmpno nayak marnyahato rpat tohwom, nd yimar nhai Bro Nkifrar yakrmi hanykahrr. To wom yimar nhai wom Kristenmpno nayak marnyahato rpat tohkahm, nd yimar Bro Nkifrapno mrokfeter. Nd yimar kakrmi hanitrr Bro Nkifrar.

¹⁹ Bro Nkifrarn riyak marnyakmotr-nom nom be nd yuhat hikhato womm kak marnyewunomm.

²⁰ Fitoh yimar kfo kangr, “Bro Nkifrar be nanhu yuhuwaf marbitn korhr,” ndhtet kfet yimar mirahr be tngrpat afurat Be tngrpatn furahato womm nhai yak marnyakahrm, tone finji dukaruharr nd ror hti duha yita Nkifrar? Nhai. Nd yimar kfo furayeter.

²¹ Kraisr kfoyuk mrokfot kfo memor, “Fitoh yimar Bro Nkifrar rorhu yuhuwaf marbitn korhr, wom Kristenm yak marnyakfot.”

¹ Fitoh fitoh yimam Jisasr htihato duka kangm, “Jisasr tor nd yimar Bro Nkifrar kfo tkrurafmor. Rorn yimam hbhakrahrm.” Inji dukayet yimam, Bro Nkifrarhu yonm korhm. Fitoh yimam Bro Yifemr hti yindhorwomr, rorhu wom yonm inji hti yindhorwomm.

² Bro Nkifrar nmoh yima yuhum htahato rorhu kfoyuk mrokfom hikrahnomb, to be nom rorhu yonm htineft nmoh yima yuhum htarahnomm.

³⁻⁴ Nom Bro Nkifrar hti dukarahnom, rorhu kfoyuk mrokfom hikrahnomb. Fitoh yimam Bro Nkifrarhu yonm tohwam, nda bbinysoftu ufasoh nefroh bbukeft kahot nohwomt. Nom Bro Nkifrarhu mrokfom yakitohhato hikwanomn nda bbinysoftu nefm yuwa muh thombat kahot nohwonomm. To be nd yuhatn Bro Nkifrar kfoyuk mrokfot nhai mduka nhiyakkahnomt hikneft.

Bro Nkifrar turhu yinemrhu mrokfot kfo ptha hikmort

⁵ Frohmn nda bbinysoftu ufasoh nefm yahot nohwamm? Yimam duka yamukam, Jisasr Bro Nkifrarhu yoner, tom nd yimamn nd ufasoh nefroh bbukeft kahot nohwomt.

⁶ Jisasr htimonomr tu Bro Nkifrarhu yoner. Jonrpno baftais yakmohat htimonomt Bro Nkifrarhu Yafothat nunga momkrs kanjo yohninehato Jisasr mifikmot. Yo yura bgre mis nohmohat kkut yohnemot. Nd neff htihato duka kang-nom, tu Bro Nkifrarhu yon mifer. Nd Bro Nkifrarhu Yon mifrhu rhu yuhat tfit tu Bro Nkifrarhu Yafothatn kak nuhas bugewutnom. Bro Nkifrarhu Yafothat tu kfo yimbu mifwot.

⁷ Jisasr Bro Nkifrarhu yonrhu ruheft, husfirpa yihotam htitanomn duka kangnom, tu Bro Nkifrarhu yoner.

⁸ Bro Nkifrarhu Yafothat yak nuhasmohat, yo Jisasr baftasmohat, yo kku bebt harhumohat, nd husfirpa nefm htihato kfo kangnom Jisasr tu Bro Nkifrarhu yoner.

⁹ Yima mifm pthayuk mrokfom wany nhtahato wom mrokfom kang-nom, kfo mif mrokfoym. Womm kangnom kfo fura kfoyem. Rom yima mifmn pthiawatm ndhtet dukefm kekwonom. To Bro Nkifrar kfoyuk mrokfom nhai ndhtet dukefm yakkfot. Ror kfo memohat Jisasr rorhu yoner, ndt kfo mifmort.

¹⁰ Yimar Bro Nkifrarhu yonr yak hikwar, nd yimarn nd Bro Nkifrar kfoyuk mrokfom korhmr rorhu yima yuhur. Yimar nd Bro Nkifrar kfoyuk mrokfom nhai yakitohhato hikkahrm, ndhtet yimar nhai wany yakiokahrm. Kangr, “Bro Nkifrar kfo furewurnom. Jisasr nhai turhu yon mifr rhukahr.”

¹¹ Yimaroh toh nkifraniyuk yihotar Bro Nkifrar bi fak hta bohtamorr. Turhu yonrn yura bgre mis nohhato nd yimam toh nkifraniyuk yihotat fak marnyakmort. Bro Nkifrarn yihotar inji fak hta nuhasmornom.

¹² Yimam nd Bro Nkifrarhu yonrpno frtkafwam, nd yimamn toh nkifraniyuk yafothar kekwomr. Yimam nhai Bro Nkifrarhu yonrpno frtkafkahm, nd yimam nhai toh nkifraniyuk yafothar yakkahm.

Toh nkifraniyahnom

¹³ Niko Bro Nkifrarhu yonr hikwa tuhan yindariko mirahko bok dukefm yakhato kfo amanyom, “Nd toh nki-franiyuk yafothat ka bi hatohwonomt o ka nhai?” Mirahko ndhtet bok dukefm ayaknom. Nd toh nkifraniyuk yafothat bi fakmokomt. Ndar gontwat to ndthu kfo dukayuk gontwatn kahukanko.

¹⁴ Bro Nkifrarhu dukefrn toh hikhato tamohm kfo bruttnarah-nomr, wanukrnom. Ndnetnomn nhai mduka kinyakiyak hanykahnom rorhu kfo ttiwonneft.

¹⁵ Nom tamohm kfo bruttna thombat wanyhato kahukrnom. Ndnetnomn tamohm kfo bruttnaneft kangnom, he mifrahrnom. Nhai wany marsisaruhatrnom.

¹⁶ Wom Kristenm wom fasoh nef bebm mfsuhm, yo be niko womko rhuhato nd yimam Bro Nkifrapno kfo bruttnakfot. Kfo bruttnahato Bro Nkifrar tfit yafothat thu hmbrirahrm. Maringou yuhat yak hatohafoyuk nefm mnem, na kfiwa mirahko akfo bruttnanomm.

¹⁷ Fasoh fasoh nefm, fasoh tkit bebm htewumko. Wom nefmn, hel yak hato-haforahmko. Wom nefm, nhai.

¹⁸ Rot htitwonom, yimam, Bro Nkifrarhu yom yorhwam, nhai fasoh nefm na hanykahm. Nhai. Bro Nkifrarhu yonr tabohifat hmbritatrm Satanr nhai brbo yikahr.

¹⁹ Nmoh toh nmbuhat rot htitwonom Bro Nkifrapno frtkafwonom. To nda bbinyosf bugat rot nndo Satanrhu yinhitn korht. Rorhu bbukeftn kakitohwott.

²⁰ Bro Nkifrarhu yonr, ror bi niamor. Rorn dukefm kahukrnom. Dukefm yahukatrnom hti yimbu hikwonomr tu Bro Nkifrar. Bro Nkifrari rorhu yon Jisas Kraisrpno frtkafwonom. Jisas Kraisr tu Bro Nkifrayer. Rorn nd toh nkifraniyuk yafothat thu hmbritrnom.

²¹ Bar yonenko, mirahko tahi yifonmpno brbo ainyom.

Jonr
dwandfamo husyuk gontwat
Barkof kfo nuhas mrokfom

Ndar husyuk gontwat sioshu bro yima Jonr wandfamort. Ndar gontwat yiyuk yimaroh yufam nhai htarmorm. Bok yimam duka memom, ka wom sioshu tuhan yindariroh yufampno htafmort. Sios futamort, mett. Sioshu Kristenm futamorm, “rothu yonm.” Ndar gontwat to rroh nayak marnyahato toh marnya yuhami yo giaman tisam, yimam frnheh htfaswa yuharoh kfo dukayuk mrokfomn wandfamorm.

**Bro Nkifrarhu tu yafothet mrokfot bi yakitohetnom, yakitoh
bmta kihkfot. Nndo mrokfom hik duha.**

¹ Na sioshu bro tohak yimaya. Ni metni* rothu yonm† dukiwoyann ndar gontwat wandfiwanko. To mirahko ka be nanrpaya dukiwanko. Nhai. Bro Nkifrarhu mrokfo mifmift yakitohet yimam rompno rpat duke-wunomko. ² Bro Nkifrarhu tu yafothet mrokfo mifmift nom yakitohwanomn nd nikmoh duka yima yuhur niewur-nom. Nd Bro Nkifrarhu mrokfo mifmift be yakitoh nkifranirahnomt. ³ Bro Yifemri rorhu yon Jisas Kraisr yuhuwafhato yak marnyaruhatfm nmoh toh nmbuham, yima yuhum be mirhuruhamn nmoh dukefm be rofhu dukefrpno rhuhato Bro Nkifrarhu mrokfo mifmifrpattn yakitoh hanyrah-nom.

Wommpno nayak marnyahato rpat tohkfat

⁴ Ninhu wom yonm Bro Nkifrarhu mrokfo mifmift yakitohhato hikwatmt na yindhorwa. Bro Nkifrar to ndhtet toh yuhamn kfiwurnom tohneft. ⁵ To bar mete, wom mrokfot kforuhant. Nmoh toh nmbuhat nom tunom nayak marnyahato rpat tohkfat. Ndt nhai be nfri mrokfot kanjo kfo ptha-kahant. Nhai. Nom Bro Nkifrarhu mrokfot riwanyakhato ryakitohak-mohat, bi nd yiha nd mrokfot bi riwanyakmonomt. ⁶ Nd nayak marnyahato rpat tohneft, Bro Nkifrarhu kfo-yuk mrokfoyet. Ndt bi riwanyakmonomt. Nom Bro Nkifrapno nayak marnyahato rpat tohrahnom be rorhu kfoyuk mrokfom hikrahnom.

Kraisru mrokfot yakitoh dbkaf kihkfot

⁷ Wawanyko, giaman tisam ndar bbinysoft bi thu yufurniromt. Nd yimam kfo yamukam Jisas Kraisr nhai yima mifm kanjo ndar bbinysoft tohrmor. To ndhtet kfet yimamn yi htfaswann yimam kfo ngeh bonheh htfaswomm. Jisar be hti dbnot thuwomr. ⁸ To niko wadukaf hanywako. Yihotar bi nia niamonomrn bi kmir myak fnah yibonwonom. To mirahko bi brbohartn tfit manoh yuhat ariwitanom. Toh bmtahato kmir rpat myak fnahrahnomr. Kmirek myak fnahhato hti hanyrahkomm niko yak hanyuk shrkar. ⁹ Wom yimar Kraisr kfo htayuk mrokfo yuham myak htanihato turhu dukefrn hikneft, nd yimar nhai wom dukakahrr Bro Nkifrar. Be mong trohnitrr. Yimar Kraisr kfo htayuk mrokfo yuham hikwar, Bro Yifem nitohfpno brbo frtkafwor. ¹⁰ Niko bi kfo htewanko. Wom yimar nndo mrokfot hnewurt, wany nhtakfot afo. Nhai ndar niko wanuka mrokfot kanjo rorhu mrokfot kfokahrt, mirahko nd yimar akfo yindhorkahnomr ayakni kunyko ahanynomr. ¹¹ Ndhtet yimar kfo yindhorphato yagnirahkomr, to be rorhu hingrgef bebt fknirahko.

Wuroh kfo yindhorr mrokfom

¹² Nikompno bok mrokfeta. Gon-twatin mrokfom htaneft nhai wofnkaha. Kto wom yihamn nierhoyann yima tnge nakfo tndh nuhasrahnom. Tnge nakfo ptharuhanomn yima yuhum yindhorrähm. ¹³ Nikmoh mndaremt‡ Bro Nkifrarhu yufat yorhwat, rothu yonm§ niko dukahato kfo yindhorr mrokfot htefiwumko.

* 1:1: † 1:1: Sioshu Kristenm futamorm, “rothu yonm”. ‡ 1:13: § 1:13: Sioshu Kristenm futamorm, “rothu yonm”

**Jonr
dwandfamo husfirpehyuk gontwat
Barkof kfo nuhas mrokfom**

Jonr ndar gontwat wandfakmortn wom sioshu bro tohak yimar hemor. Nd tohak yimarhu yufat Gaiusr. Gaiusrhu nefm tu dborioh nefm namour. Kristenm nhai yukatoh marsisarmoarm. Nhai. Kakitohmourm. Ndnettn Jonr ndar kfo yindhor gontwat hemorr. Wom kfo duka mrokfot kfo memor, “Diotrefesr nhai nmoh dukef yuhatn hikkahr, ndhtet yimam htiyaf hanykfot.”

**Bro Nkifrarhu hingrneft hingrnewa yimam nom Kristennom hti
dukakfot**

¹ Na sioshu bro tohak yimaya. Ndar gontwat ni Gaiusnhu yufatpno niewut. O, Gaiusene, nanhu bro dukefr ninn korhr. ² Yinowe, Bro Nkifrar yiro yima yuhur yak marnyewa kanjo ninhu rhu nmbuhat, hingrneft, tamoh tamohr ayak marnya bomarnya-hitwarn. ³ Bi ndwom yihamn wom yimam niahato ninhu nefm kfo yindhor-momm. Kfo memom, “Gaiusr tu Bro Nkifrarhu mrokfo mifmift kakitoh hanitwor.” Inji kfo hanymotm nanhu yima yuhur yindhormor. ⁴ Nanhu yonm tu Bro Nkifrarhu mrokfo hikneftn wanyshoft nanhu yima yuhur yindhor-wora.

Gaiusrhu dborioh hingrneft

⁵ Yinowe, Bro Nkifrarhu tu mrokfo mifmift ni kak hik mifwont. Ndnettn yi htfaswa Kristen tisam ninhu kuny kmifam hti duham mfnahwom, nhai yukatoh marsisakahnm nhai. Kekwonm. ⁶ Nd yimampno ni niwa dborioh nefm, asha niewamn tfit sioshu met yindarim kfo tndhwomm. Ndhtet yimam niewum dborioh nefm yak nuhas hanykfot. Turoh yihota yi hanyuk yeshrim yakhato hiyaf hanykfot. Inji narahnem tfit Bro Nkifrarn bro yufat hirahm. ⁷ Kraisrhu mrokfothu kfo ptha htfasneftn inji fau htfasmom. Rom inji yau htfaswohat nhai Kraisr hik duha yimampno yihato wom tamohm kfo tndaukahm. Nhai. ⁸ Ndhtet yimam nom Kristennom hti dukakfot. Inji narahnem Bro Nkifrarhu tu yafothet mrokfot kfo ptha htfasneft yakitoh bmtahato hingrneft yak tirrahnomt.

Diotrefesru fasoh neft

⁹ Sioshu tuhan yindarimpno wom gontwat htarfmoant. To nd sios tohekwa yima Diotrefesr nhai nd gontwat kfoyuk mrokfom hikkahr. Kangr, “Tukianhu duka fijo sioshu met yindarim tohukatohruhanm.” ¹⁰ Kto tukann wom yiham niewane, nd yiha nd ror kfo pthiwa nungurha nungurha mrokfom yo yimam kfo ngeh bonheh htfaswa mrokfom tafontn hta bugaruhanm. To mirahn ka nd nef-rpam newur, wom Kristen tisam yi htfasneft ror nhai yakwonkahrm rorhu kunys. Hti marsisewatrm tfit wom Kristenm inji htihato kangm ayaknomm tfit kfo rafo mrokfot kfiwurt. Kristenm nd yiyuk Kristenm yakneft to be kak tuhefiwurm. Nhai rorhu sioskfot wom yikfot.

Demitriusrhu dborioh nefm

¹¹ Bar yinowe, mirahn fasoh nefm ahika. Dborioh nefrpam hikkfot. Dborioh nefm niwa yimam Bro Nkifrar-pno frtkafwa yimayem. Nd fasoh nefm niwa yimam nhai Bro Nkifrarpno frtkafkahm. ¹² Demitriusr niwa dborioh nefm yima yimat kfo tndh htfaswomt. Yimamn kfo tndhwomm yo nd Bro Nkifrarhu tu mrokfot ror yakitohwat, rotn mhfnahnewutm rorhu dborioh nefm. Na kfo mifwanko. Nhai kfo furakahanko. Ndnettn wayaktwa-komr.

Wuroh kfo yindhor mrokfom

¹³ Bok mrokfeta ninpno. To nanhu yima yuhur nhai wofnkahr be gon-twaye mrokfom pthaneft. ¹⁴ Nhai mrokfom. Nanhu nia yihar to bi brbohwor. Tuka nierhoyann yima

tngē naptharahno. ¹⁵ Nanhu mrokfom to be injirpa. Bro Nkifrar atoh natwih-twarn. Ninhū yimatm dukewamn kfo yindhōr mrokfot htefiwumt yo wom womm nd nanhu kfo yindhōr mrokfot wakfo hihanywanm.

**Jutr
dwandfamo gontwat
Barkof kfo nuhas mrokfom**

Ndar gontwat yorhwa wom mrokfom Pitar wandfamo husuk gontwat (2 Pita) yorhwa mrokfom kanjo htirahkomm. Bok giaman profetm Bro Nkifrarhu mrokfom kfo kekutmoatmm ndnatn Jutr inji htihato Kristenroh kfo dukayuk gontwat wandfamort. Kfo memor, “Nom Kristennom bi tu Bro Nkifrarn kfo hta nuhas bonuhasmornom rorhu mrokforoh hik yuhat. Tur kfo nuhasmo yuhat nom bi hikwonom. Nhai wom yimar niahato tfit rorn wom nfri yuhat tfit kfo htaruhatrnom. Nhai” (ves 3).

Bro Nkifrar yakitoh bmtahato giaman tisaroh mrofkom riwanyak duha

¹ Na Juta, na Jemsrhu nmemena. Na Jisas Kraisrhu hingrna yimaya. Froh frohko Bro Nkifrarhu naku tngt wany sanyhato yimoko, niko nd yimakompno ndar gontwat niewut. Niko nd yimako Bro Yifemr be marbitn htewurko. Jisas Kraisrhu yufathukomm Kraisr kukatohaf hanitrko. ² Bro Nkifrar hti yuhuwafhato hifa hifa ayak marnya bomarnyakahtko nikmoh yima yuhum mirhurahmko.

*Gutnius yak wunayuk giaman tisam
(1 Pita 2.1-18)*

³ Nanh Kristen yimatko, barkofpam afo duka memoya, “Gontwat wandfa thombat, Jisasr yimam nrfa htiyakmo yuhathu kfo nuhas mrokfom wandfa nuhasruhanm.” To nhai, ndt rhuraht. Tfit wom mrokfot kfo nuhasruhanko. Nd mrokfot wawanykomt. Bro Nkifrar gutnius mrokfot nom Kristen yimanompno htafmotrt nom yakhato nom ndt bi hikwonom. Ndnatn na kfiwa, nd gutnius mrokfot wayakitoh kihtwakomt. Mirahko wom yimar ahti marsisakahtnomr nd gutnius mrokfot ayoh mrk wunart. ⁴ Bi htitwa tom bi wom yimam niko Kristenkompo nia toh tebfi botebfinuhiwumko. Niko nhai yakkahkomm rroh yima yuhum. Nd yimam nhai Bro Nkifrarhu tng yuhatn rroh mrokfom hikkahm. Nhai. Rom tfit nndo kfo kekutwomt Bro Nkifrarhu mrokfot. Rroh wom mrokfot kfo kangm, “Nmoh fasoh fasoh nefm bi Bro Nkifrar fak thumorm. Kangnom tfit fasoh fasoh nefm ananom, nhai mrokfom. Bro Nkifrar nhai finji kforuhatr.” Inji kfet yimam be kangm, turoh yima yuhum wagrha sinyakyuk yima yuhum ahiknom. Nmoh Najom Jisas Kraisr wahti tanykahmr, mong troh bugewumr. Nd yimam mrokfot tohhato kaht riyahm. Bro Nkifrarhu mrokfot bi inji kfongotmott.

⁵ Bi hti wany hnayeteko hanybornet yimam, mfro tuhagrhet yimam Bro Nkifrar yak tutfa hnamom o yahr kmimpno yak hatohafohato was batimoahat. Ndm bi wany hnayeteko. Be kanga wom nefm Bro Nkifrar namom kfo srhrhota wanyhato yima yuhum dukarahmko. Ka wanyeteko Isrerroh tndht rom Ijift tohhato Bro Nkifrar minrfa htiyakmohat. Barkofpam afo Bro Nkifrarhu bbuka rifhurpno Isrerm tanrfakmorm Ijifroh tirmn bi ruhem. Tanrfaknehato hna marnyamorm. Tfit buhanano Isrerm mhata yuhuwehhato Bro Nkifrar frtrohmotmr, Bro Nkifrar namburhato buha bati witamom Isrerm. ⁶ Bingot wom mounmotm to inji namom. Bro Nkifrar hayuk dborioh hingrneft yafhonihato turoh dukeft hikmom. Ndnatn Bro Nkifrar yakmorm yiro kspita nngrajohet muhr tohwom. Sent yakhato sene dbkaf hmbretamorm be tohwom. Kto kot tohnihato rom namo nefthu pekfot yakrahmt. ⁷ Taun Sodomti Gomorate wom taunm nd hus kmifpno rhuyukm to inji tuha grha nngrajohmoum. Nhai warhurmoam. Metm, yindarim yiramtieh yiram kanjo yihom yejbonak myejbohnakmoum. Yindarim tum yindarim myakni hanymoum, metm rom tum metm myakni hanymoum. Nd kmiroh yimam nhai tu yimaroh nefm narmoam. Bro Nkifrar inji hti namburhato kfomotr kaht wuyohninehato nd kmimi tuhant yindars be kaht kur gufha thunimom. Ndhtet nayet

yimam Bro Nkifrar yak hatohaforuhatr mrofom tndh kaht riyahm. Ndnett niko duka hik marnyakfot.

⁸ Nd yimam Bro Nkifrarhu mrokfom kfo kekut bokekutwam, to nd yuhat hikwom. Hwe tweh hanyhato tamoh tamoh nefm twenano hti hanitam, ndmn tfit yima yuhum thu yuhurwatmm fasoh nefm newum. Fasoh nefm nahato fut kanjo kasi hmbritbm. Yo yima mrokfom kfoyukm hanyjbornahato Bro Nkifrarhu mounmotm be tu faso faso kfo rindho borindhewumm. ⁹ Tawo mounmotm nhai inji nakahm. Bingot bro tohak mounmot Maikerri Satanr Mosesrhu thatipthu yak yuhatpno nakfo hamuh nakfo hamuhmohat, Maikerr nhai sinyahato Satanr yiro wahtarmorr. Nhai. Maikerr be kfo memor, “Tu Brornko ni kfoyuk tngt kfo wokrahrn.” ¹⁰ Nd yimam wom mrokfom mwany mmota thombat tfit turoh mrokfom riyakhato koh wuna bowunefiwumt. Yima dukef duha be inji foh yaum kanjo kau htfaswom. Inji nayet yimam mibatinirahm. ¹¹ Kenrhu hammo bohammoyeft romn fakmomt. Maruha yak yima yuhurpno rom niwa nefm, Balamr namo yuhatn hikwom. Mrokfo hanyjbornaneft, ndt Korar hanyjbornamo kanjo inji Bro Nkifrarhu mrokfom hanyjbornewum. Nd yuhat hikwom to be Korar yohnemo kanjo inji yohnirahm.

¹² Tuko Kristenko rpat nayak nhafohhato komunion kanjo yak hta mskewa yeshrt, nd giaman tisam nhai hti duka mekahm, “Turparoh yeyuk yeshrt htem. Nom nhai yihato yenyhoruhatnomm.” Nhais ndhtet dukefm yakkahm. Rom be buha mruhaknihato ke fura bofuraknitm. Nikompno yi rhuhato nuwa ye shombat be tu bro yimtneft kahukmko. Nd yimam tu tisam arhum to romn Kristenm yak hta bohtarfomm. To nhai, rroh hingrneft be tu fipa duhatet. Rroh mrokfom tohr kanjo nyungu furahato nhai hnus niakaht. Rroh nefm nnar tiham kanjo tfa hta furahato nhai yukha hirkahm. Nhais rom pthayuk mrokfom o nayuk nefm wom yima yuhum yakruhatko, be tu nhai mif. ¹³ Rroh fasoh fasoh nefm nhai hti mmoruhatkomm. Be tafont htiyafo hanyrahkomm. Rroh nefm nhai yimtnahato hamongkfot. Tekt wuhnu fnah hnu brukhatoh thombat, inji tafont rroh nefm htirahkomm. Inji na hasiwanm kto mirahm nndo gunyrn wafuna sinyahato tfit yifungpampno mikur nohnita kanjo mikur nohnirahm. Bro Nkifrar be tu bro kspita nngrajohet tkitt bi fak htatahemorm. Be nd tkittn toh nkifranirahm.

¹⁴ Adamrpno wutohak toh hawihamo nkifram bokm toh hawihamom. Namba sefenyuk yimar tohmor, Inokr. Bro Nkifrarhu mrofot nndo nndo kfo kekutwa yimam, Inokr kfo memor, “Bro Nkifrar turhu 1,000 mounmot rifhurpno yawihnerahr.

¹⁵ Yawihnehato inji niwa yimam kot tohrahm. Kot tohhato Bro Nkifrar mong hihato fasoh fasoh mrokfom yahukam nd yiha yak gnngtatrughatr afo yironarahm.” ¹⁶ Tamoh tamoh nefm nhai rom dukewa yuhat rhu hikkahm, nhai rhu kkof rhu kkof ptharuhatr. Rom turoh nndoh dukefr hikwom. Turoh yufam yura yura htahato yihom hetak mhetekwom. Yimaroh fsoshot marufenm rom yitam mfrnheh bonhehhato mtarhoptakni yahukmm.

Kristenroh toh nmbuham

¹⁷ Nanhu Kristen yimatko, nmoh Nungothet Jisas Kraisrhu aposerm kfo pthayuk mrokfom duka hanykfot. ¹⁸ Kfo memomko, “Jisassru nia yihar brbo rhu hanyrahr, niko Bro Nkifrar hikwa yimako wom yimam niahato haninge yuktfarahmko. Haninge yuktahato rom nhai Bro Nkifrarhu dukefr hikruhatm. Nhais. Rom turoh fasoh dukefr hikrahm.” ¹⁹ Nd yimam Bro Nkifrarhu sios yak nhtiwamt womm bi myakni hanitmm. Rroh dukefm be nd bbinysoftu dukefmn, wuskamn, tamohmn korhmm. Be tu nhai Bro Nkifrarhu Yafothat rhukahtm.

²⁰ To niko, nikmoh yima yuhum Bro Nkifrarparpno htahato kfo bruttnakahtko nikmoh rhu wiayaua nmbuham o tamoh tamoh nefm finjinanefm, rorhu Yafothatn yak hta bohtarahtm. ²¹ Waduka hanyswakomm Bro Nkifrar nikompno niwa dboriorh dboriorh nefm. Yiha yiha kukatoh hasiurko. Nhais mong trohkahrko. Ror niwa dboriorh nefroh dukefrparpno watoh hanykahtko nmoh Nungothet Jisassr Kraisr hti yuhuwafrahrko. Hti yuhuwafrhato yakruharko turpno brbo yak htahato rorpno toh marnya

hatohrahko. ²² Bok yimam Bro Nkifrarhu tu mrokfo yimbu yuhat tafi hti hik bohik marnyakahmt. Ahti hik marnyamt, to nhai inji mong trohrfotmt. Ndnett fitoh yimam inji mmohato Bro Nkifrarhu tu mrokfot nhai hikkahmt, nd yimam hti yuhuwafhato kfo hta nuhas bonuhas marnyakfot. ²³ Wom yimam nd giaman tisam mfrnhehakmotmm rroh nefm hikhato yiro bkra kaht kanjo tohwom. Niko womko wayuhuwaftomm. Wayuhuwaftakkomm wanrfa htiyakkomm. Niko nrfa htiyakrahkomme, niko duka marnyakfot. Rom niwa nefm rim suhrahmk. Ndhtet nefm kangme, kkoret hmbre-shayet. Rom niwa nefm mirahko brbo ai ahtinomm.

Bro Nkifrarhu kfo yindhor nmbuhat

²⁴ Bro Nkifrar nhai tuhaftaruhatrko. Rorhu tir wafitn rhurahko. Nhai tamoh nefm yak kasuhruhutmko. Rorhu dborior kmirn hany htarahrko. Nd kmir nhai wom tamoh nefm htiruhatk. Be yindhor yima yuhurparpno tohrahko. ²⁵ Na kfiwanko nd Bro Nkifrarp tohwor, nd Nkifrarn nmoh Nungothet Jisas Kraisr hingrnamo hingrneft htihato tfit fakmiyakmornom. Rorn nmoh nyngako mtohakyuk Kingr tohkfot. Ror tu bro bbuka nanyareter. Rorn tamoh tamohm nyngako yak htakfot. Rorhu ruheft toheft bi riruhakmot, to be inji rhu hany swanhiwut. Kto to be inji rpahtet ruheft rhu hany swanhohahr. To be inji.

**Revelesen
Jisasr tafont yak nriyafmo mrokfot
Barkof kfo nuhas mrokfom**

Ndar Revelesen gonborngt wandfamohat, Kristenm htimoumr Jisasr Kraisr turoh Bro Nungothetr kanjo. Inji htihato rorhu mrokfom hikmoatmm wom yimam inji mhti namburnihato faso faso kak bebmoumm. Ndnettn Jonr nda Revelesen gonborngt Kristenroh kfo bmta mrokfom htamorm. Memor, nda mrokfom htiruhamn nhai krhopam yak kasuhhato Jisasr frtrohruhatmr.

Ndar gonborngt bok kfo nhombra mrokfom htamorm. Ka nd yiha tohmoa Kristenm nd htamo kfo nhombra mrokforoh yimbu yuham hifa fakmomm. Ndwomm Jisasrhu mrokfom hik duham nhai yakrmomm nd kfo nhombra mrokforoh yimbu yuham. Nd htamo kfo nhombra mrokforoh yimbu yuham kfo memom Jisasr Kraisr Bro Nungotheter, to be rorhu tirtpno Bro Nkifrar mrhuniruharn yahr kmim yiho hathurahrn rpat Satanrnpo. Jisasr hingrna hanyhato rorhu hingrneft mhingrna tmbho thombat, Bro Nkifrar ttha hanyrahram yimam toh bmtahato Jisasr yafho duhatm. Bro Nkifrar Kristenm tfit nfri hefenri nfri bbinysoft htaruhatr be rorpno toh nkifranihato nhai wom krhopam yakruhatm.

Jisas Kraisr 7-pela siosroh met yindarimpno htafmo mrokfot

(Sapta 1-3)

¹ Ndar bbinysoft rhuyuk nefroh mrokfot nhai bi tafont yak nriyaf-hato rhurmott yimam wanyrmomt. Nhai. Jisas Kraisrn yawihnehato rorn tafont yak nriyafhato htamort. Ndar bbinysoft rhuyuk nefm bi brbo brbo rhuhnetmn Bro Nkifrar memor, “Jisasrpnayayaknuhaskahtanrtfit rorn Bro Nkifrar hiket yimam kfo nuhasrahram.” To be Jisasr turhu mounmotr kfo tkrurafmotr tfit moun-motr na rorhu hingrna yima Jonan-pno nd mrokfot hnamort. Memor, “Rorn tfit Bro Nkifrar hiket yimam kfo nuhasrahram.”

² To na Jona, na bi tuka hti hik bohik bugamoyanm Bro Nkifrapnayayaknuhaskahtanrtfit rorn Bro Nkifrar hiket yimam kfo srh nuhasmoyanm. ³ Yihar bi brboh brboh hnewatr kfo kanganko yimar ndar na wandfayuk profet mrokfot Bro Nkifrar hiket yimampno kfo pthewurt, nd yimar yindhorrahr. Yo yimar nd kfo pthayuk profet mrokfot wanyhato kak hikwort, nd yimar yindhorrahr.

7-pela siosmpno Jonr dwandfamo gontwam

⁴ Na Jona, nann ndar gontwat wandfiwanko niko Esia profins yorhwa 7-pela siosm. Nd Bro Nkifrar ariha tohwar, yo bingot ritohngotak-mor, yo kto nieruhar, nd Bro Nkifrar ayak marnya bomarnyakahtko yima yuhum amirhumko. Yo 7-pela yafot-ham Bro Nkifrarhu sia kingthu nyin-gako toh hnkokn hmbrihato Bro Nkifrarhu hingrneft hingrniwam, rom rpat tohhato nikmoh yima yuhum ayak marnya bomarnyakahtmk yima yuhum amirhumko.

⁵ Yo Bro Nkifrarhu mrokfom tu kfo hik mifwa yima Jisas Kraisr, ror nhaf ayak marnya bomarnyakahtko yima yuhum amirhumko. Kraisr tor tu barkof yimar bi nohetr tfit sinyamor. Rorn ndar bbinysoft tohwa kingm mtohekworm.

Ror marbit htewurnom. Rorhu kkut kfomot, nom fasoh fasoh nefm ki-hmbremohat frfnahmonom. ⁶ Frfnahni-hato tfit yakmornom turhu Bro Nkifrarhu yufatpno fak dbkafmornom, nom tur kanjo tohwa kmiyenom. Nom nd kminomn king kanjo tohhato pris hingrneft kakitohwon. Pris hingr-neft yakitohhato Jisasrhu Yifemrhu hingrneft hingrnewunom. To be Jisasrn bro yufat htahato rorhu bbukefthu yinhitn tohhany tohhany toh nkifrani-rahnom. To be inji.

⁷ Nyingam yurakko yukatoh haso-kfot. Bi tor bi kawihna yibonwor. Gribpamn hawih-neruhatmr nyingaro nyingaro htiyakrahmr. Nd kfraye was hanyukm rpat htiyakrahmr.

Ndar bbinysofthu yimam ror htiyakruhamn tfit rorpno nefm tfit dukakhato nur tau hifa bohifarahm. To be inji.

⁸ Tu Hta Nngrajohet Bro Nkifrar kfo kangr, “Na kfomoya nda niko htita tamoh tamoh dborhamot. Na tfit kforuha nd tamoh tamoh tfit mhingrna tmbhoraht. Na ariha tohwa, yo bingot ritohngotakmoya, yo kto nieruha.”

Jonr Kraisr htimo yuhat

⁹ Na Jona, nani nikom nom rpat Jisasr hikwonom. Nd yuhatn nom najohfiyenom. Niko Jisasr hikhato yekwa krhopam na to niko yekwa kanjo inji kekwa. Nd Jisasrhу kingdomkphot na rpat tohnuhiwoyann, krhopam niewam nom rpat rpat toh bmtahato krhopam kekwonomm. Bro Nkifrar-pno niayuk mrokfom, yo Jisasr yak nuhasyuk nefm kfo pthamota fakmoma. Yakhato ailan Patmos htamoma.* ¹⁰ Kristenm rifinyhato Bro Nungothet Jisasr lotuta yiha Sandekfotn Bro Nkifrarhu Yafothat toh hongmbakna-mota. Tfit mongko wom tngt wany-moyant mfro fumrr kanjo kfo ptha rra memot, ¹¹ “Ni tamoh tamohm htitn, buktn wahta bugatwanm. Buktn wahta bugakahnm tfit nd bukt wahtafkahtnt aiswat 7-pela taunm yorhwa siosmpno. Nd 7-pela siosm yorhwa taunroh yufam: Efesus, Smerna, Pergamum, Taiataira, Sardis, Filadelfiat ee Laodisiat.”

¹² Na rhu kekutni memoya ahtianr nd na kfoyuk yimar, htimo 7-pela gor ginym hatohet lamm. ¹³ Nd lamm tohmo tkitmpno yimar brbo tohmor. Nd yimar htimoyanr yima mifr kanjo. Yuke hmbreshar hmbremor. Nd hmbreshar yahot yaumpno mitohmor. Yo mond nmbuhat kasiyukt, ndt gor mtine waset hmbresham dbkafmomr. ¹⁴ Tmars memom nndo tnimb wur mfhayet. Wafnhumohat memom nndo gajomt fnhutt. Nyingam memom nndo kah banem. ¹⁵ Wuram wafnhumohat memom nndo brasn kaht kandhihato bngo bijham kanjo wuram fhutwomr. Tngt memom nndo bhur mir ntatiwur. ¹⁶ Tirmif tirkorn fakitohmorm 7-pela gunym. Yo mano mano hanku namburet bainat tng yuhat yarim fnahmot. Nyingatikt memom nndo marrn masat funa rrewor.

¹⁷ Na inji htihato tuha nd yimarhu wurampno be guya suhmoya. Tfit tirmif tire yimayann tirt hta hanyhato kfo ptha hany memor, “Mirahn aduka yakrmeya. Na kfomoya nda ni htita tamoh tamoh dborhamot. Na tfit kforuha nd tamoh tamoh tfit mhingrna tmbhoraht. ¹⁸ Nanhu toheft to be asoya tohwa. Bi nohmoyann, to be asoya be inji toh nkifraniruha. Asoya nann noh yifhatikthu kit kakitohwant yo nann Maringourhu yiyuk kit kaki-tohwant. ¹⁹ Ndnettn ni tamoh tamohm htitn buktn wahtatwanm. Nd tamoh tamohm ariha rhurahm tfit kto tfit mfrfnahrahm. ²⁰ Htitnm nda 7-pela gunymi 7-pela gor ginym hatohet lamm. Nd 7-pela gunym ndm 7-pela siosroh mounmotem, yo nd 7-pela gor ginym hatohet lamm nd 7-pela siosem.”

2

Taun Efesusko rhuyuk siospno yimo gontwathu mrokfom

¹ Tfit nd mrokfo kfo pthamo yima Jisasr kfo memora, “Wom mrokfom wawand-fakahnm taun Efesusko rhuyuk sioshu mounmotrpno wahtaftwanm.* Mrokfom inji wahta-twannm: Na 7-pela gunym tirmif tire yakitohhato 7-pela gor ginym hatohet lamroh buha kau nanyor hakuta. Nann nda mrokfot kfiwann. ² Na htitant niko Kristenko toh hikwa toheft, yo niko hingrna hikwa hingrnafat. Yo htitanko tamoh tamoh nefm toh bmtahato fasoh fasoh nefm nayet yimam nhai hti yindhorkahkomm. Nd yimam kfo memomko aposerem. Ndt kfo furakfoyet. Ndm nhai tu aposer mifm rhukahm. Nd rroh kfo nheh nmbuhat bi tukomn hti hikmokomt rom pthayuk mrokfomn. Nd tkittn mhtiyakhato kfo memoko arm kfo fura nhehetem. ³ Yimam htitwomko na yakitohwatko

* 1:9: Ailan Patmos yimam kalabus htamo ailaner. Roman gafmanr hti hhrekmoa nefm yimam mniamoum, to be yakmoamm nd ailanrn kalabus htamoumm. * 2:1: Nd mrokfot kfo yamuka, “Efesusko rhuyuk sioshu mounmotr”, ndt nhai tu mounmot mifrn nd mrokfot kformot. Nhai. Efesusko rhuyuk sioshu yimam namoa nefmn nd mrokfot kfomot.

krhopam kahukwomko. To niko nhai nd krhopam mhtiyakhato myafphonikahkma. Nhai. Toh bmtahato kakitoh kihwokma.

⁴ Tmift tot wom nmbuhat na nikom-pno yorhwat. Niko nfri yuktt na rihikakmohat na be tu marbit hta-mokma, tfit arihat nhai inji htikaha. ⁵ Afо dboriorh dboriorh nmbuham nah-namouko, tfit nd nefm bi mfafphoniro-komm. Ndnettn nd bingot nahnamoa dboriorh nefm mdukakhato tfit yima yuhum yak kekuthato tfit bingot nahnamoa nefm tfit hikkfot. Be nhai nd nefm nakahkomm, to be nie-ruhoyann nd lamt yak hutfakruhanko.

⁶ Tmift tot wom dboriorh nmbuhat newuko. Nikolasrom nayuk nefm hti hhrekwokomm. Na to inji buga na hti hhrekwanm.

⁷ Yimbhindangeteko, wany hik marnyakfot nd sioskfom yiyuk mrokfom Bro Nkifrarhu Yafothat kfo pthewam. Yimar nda bbinysothu ufasoh nefroh bbukeft kahot nohwort, nd yimar Bro Nkifrarhu mswirt[†] tohwa mishu yukham yerahr. Nd mishu yukham yimam yak yanyeft toh nkifrewum.”

Taun Smernako rhuyuk siospno yimo gontwathu mrokfom

⁸ Tfit Jisasr wompam wom mrokfot kfo memor, “Yo tfit wom mrokfom wawand-fakahnm taun Smernako rhuyuk sioshu mounmotrpno wahtaf-twanm. Mrokfom inji wahtatwanm: Na kfomoya nda ni htita tamoh tamoh dborhamot. Na tfit kforuha nd tamoh tamoh tfit mhingrna tmbhorah. Bingot na bi nohmoyann tfit sinyamo-yann tohwa. ⁹ Bi htitanm niko yekwa krhopam, yo htitankо ndar bbinysothu toh nmbuhatt faso rhu bebwoko. Yafotharoh rhu nmbuhat nhai inji rhu bekkahko. Nhai. Bro Nkifrarhu tirtn korhko. Na wanukwa, wom Judam faso faso kfo rindho borindhiwumko. Nd yimam nhai tu Juda mifmn inji kfokahmko, nndo Satanrhumn inji kfiwumko. ¹⁰ Niko yakyuk krhopam bi tom bi rhuhnewum. To mirahko ariyakrmiyaknom. Wawanyko, Tmb Nyingetrn yimam hatoniruharn yakruhamko kalabus 10-pela marm htahato htirahm finji naruhako. Kalabus htahato bi nohyuk tkitt tohwoko, mirahko ariwohsisaknom, Bro Nkifrar yakitoh kihkfat. Yakitoh kihhato tohrahko Bro Nkifrar kforahr, toh hatohrahan.

¹¹ Yimbhindangeteko, nd sioskfom yiyuk mrokfom Bro Nkifrarhu Yafo-that kfo pthiwam wany hik marnya-kfot. Yimar nda bbinysothu ufasoh nefroh bbukeft kahot nohwort, nd yimar nhai mif nohruhatr tu wuroh noheft nia thombat.”‡

Taun Pergamumko rhuyuk siospno yimo gontwathu mrokfom

¹² Tfit Jisasr wompam wom mrokfot kfo memor, “Yo tfit wom mrokfom wawand-fakahnm taun Pergamumko rhuyuk sioshu mounmotrpno wahtaf-twanm. Mrokfom inji wahtatwanm: Na mano mano hanku namburet yuke bainat hatohwa. ¹³ Nd niko tohwa kmit na tawisafwant. Satanruh rhuyuk sia kingt tot nd kmitn tuhtikmort. To tfit htita niko nhai yafhokahkomt nanhu yufat. Nanhu yufat yakitohhato nanhu mrokfom hikwokomm. Yo bingot wom yimar nanhu mrokfot hikhato nanhu mrokfot kfo ptha htfasmoa yima Antipasr ndha tohhato wasmohat, niko nhai wohsishato nanhu mrokfot yafhormokomt.

¹⁴ To tfit wom mrokfot kfiwanko. Nikmoh sios tom wom yimam Balamrhu nefm hikwom. Balamr to bingot inji namor: yimorn Moabroh king Balakr kfo nuhas bonuhasmorr Isrerroh frnhehakhato suhneft. Ndnetrn Balakr wom Isrerm kfo tkrur nhehmotrm Moabroh nkifra tahi rmonm htamo yeshrim fak famom yo met yindarim turoh neft namom. ¹⁵ To be ndnettn wom yimam nikompno tohyukm Nikolasroh mrokfо yuham hikwom. ¹⁶ Ndnettn nd Nikolasr kfoyuk mrokfom niko yafhohato mong trohkfat. Nhai yafhokahkomm be nhai kuknarhota niahato niko nd Nikolasruh mrokfom yakitohet yimakompno nia nnaneft. Nd nanhu tng yuhat mfnahyuk bainat afo htirahtko.

¹⁷ Yimbhindangeteko, wany marnyakfot siosmpno yiyuk mrokfom Bro Nkifrarhu Yafothat kfo pthiwam. Yimar nda bbinysothu ufasoh nefroh bbukeft kahot nohwort,

† 2:7: paradais ‡ 2:11: Nd wuroh noheftu kfo nuhasuk mrokfot korhwot: Rev 20.14-15; 21.8

to be nd yimar kafrohet manapam yakhato hiruhanr.[§] Nd manapam yak hiruhanr yo fnhuyet tahi gepahat hiruhanr. Nd tahi gephatn nfri yufat wandfahi-ruhanr. Nd htaruha yufat nhai wom yimar tawisafruhatrt. Nhai. Nd tu tahi gephat yakitohyuk yimarpas tawi-safrahrt.”

Taun Taiatairako rhuyuk siospno yimo gontwathu mrokfom

¹⁸ Tfit Jisasm wompam wom mrokfot kfo memor, “Yo tfit wom mrokfom wawand-fakahnm taun Taiatairako rhuyuk sioshu mounmotrpno wahtaf-twanm. Mrokfom inji wahtatwanm: Na Bro Nkifrarhu Yona, nanhu nyingam kangme kah banem, yo wuram kangme brasn kaht kandhihato bngo bijham kanjo wuram fnhutwom. Nann nd mrokfom kfefiwant. ¹⁹ Na bi hti hik bohikwanm niko niwa nefm. Htitwanko wom met yindarim be marbit htewukomm, yo tamoh tamoh nefm wom met yindarim niwam niko tir kahukkomm. Yo tamoh krhopam niko yakneft toh bmtahato kakitoh kihwokma. Na tawisafwanm niko bingot namoa nefm, tu dborioh nefm namokomm tfit ariham nikmoh nefm tu hifa mfrfnah marnyewum.

²⁰ To tfit wom mrokfot kfiwanko. Na nhai wofnkaha niko yakitohwa met Jesebert.** Rot kfo kangt, ‘Na profeta.’ Ndt kfo furakfot kfiwit. To frohm kfiwa mrokfom yimam wany-hato nkifra tahi rmonm htayuk yemrom yewamm, yo met yindarim rine wunitam? To nd mett. ²¹ Kanga nd rothu nefm ayafhotm, ndnetann afo tombn marsisewant. To nhai. Nhai mekaht ayafhoyant rothu rine wune neft. ²² Nd nmbuhatpno to be nd mett bro dbohnfeft hirhotant nd dbohnfeft-pno hwe kkor hasoraht yo nd rotpno ijom yitam nhai yafhorfomm rotpno niwa nefm, rom nhaf dbohnefm hir-hotanm afo yironarahm. ²³ Nanrpa-yann yimaro yiro yima yuhum yo yima yuhum dukewa dukefm htitanm. Rothu yonm hifa wus rmonrhota, ndt siosroh yima bugam htiruhamn duka mirahm, ‘Dajohmn, ndr yiro rhu kafrohwa fasoh nefm htitwarmn kak gnngtatwurm yimanom niwa nef bebm.’

²⁴ To niko wom womko Taiatairat tohyukko nhai rot kfo srh nuhasuk mrokfo yuhat hikrmoko, yo nhai yakr-mokomt rom kfo yamuka, ‘Satanrhu kfo kafroh mrokfom.’ Na kfo mifwanko, na nhai tfit wom krhopam thu hutar-hotanko. ²⁵ Tmift kfiwanko, nd niko yakitohwa mrokfom ndm afo yakitoh kih hasokahkomm afo na nieruha.

²⁶ Yimar nda bbinysothu ufasoh nefroh bbukeft kahot nohwort, yo be nanhu dukefrn tohhany tohhany wuroh yihar nier, nd yimar tuhan yindariroh toh yukatohyuk bro yufat hiruhanr. ²⁷ To nd yimar yufat yakni-hato yufet yimar toh thombat na tukanhu Yifemr yufat hehato toh yukatohwa kanjo inji nd yimar toh yukatohrahr. Nd yimar ain nmbuhat yakitohhato roh tambonm frdbtohewa kanjohot yimar toh yukatohrahr. Nhai yimam niahato yak bisskfot. ²⁸ Yo nda dbha ksut mfnahwa kanjohot gunyr hiruhanr. ²⁹ Yimbhindange-teko, wany marnyakfot siosmpno yiyuk mrokfom Bro Nkifrarhu Yafothat kfo pthiwam.”

3

Taun Sardisko rhuyuk siospno yimo gontwathu mrokfom

¹ Tfit Jisasm wompam wom mrokfot kfo memor, “Yo tfit wom mrokfom wawand-fakahnm taun Sardisko rhuyuk sioshu mounmotrpno wahtaftwanm. Mrokfom inji wahta-twanm: Na Bro Nkifrarhu hingrneft hingrnaruha 7-pela yafothami 7-pela gunym kakitohwa. Nikmoh mrokfomna htefiwa. Na bi htihnewanm niko nahniwa nefm. Kfo kangm, ‘Nd sioskfot Jisasm hik marnyewut.’ To nhai, bi minohni hanitwot. ² Ndnett rhu mmo haso duha. Tuko warhukah-komn wahtiko niko na hikwa nmbuhat. Na hik

§ 2:17: Nd manapam Isrerm tkit furat yaumohat Bro Nkifrar nd manapam hemotrm famom. Manaparoh mrokfot htikfot Kisim Bek 16 yo Song 78.24. ** 2:20: Nd met Jesebert bingot Isrerkw tohmot. Nd mett be tu fasoh met beb mift tohmot. Rothu tndht htikfot 1 King 18.4 yo 19.1-2 yo 21.1-26; yo 2 King 9.22 yo 9.30-37. Nd Nikolasru hingrneft hikmoa yimaro wom mett, ka Jesebert namoa nefm hikmoatt Taiatairakorhof wom Kristenm yakmoatm rothu nefm kak nuhasmoutm, nd Jeseberthu nefm hikmoatt ndnett Jonr nd Jeseber yufat hmbremort.

hanyhato fitoha nd na hik dukefr bi minohni hanitr to be mirahko tfit finji anyom. To be nd tkittn miyakitoh kasinyakfot yudbat. To tfit mirahko wompam anyom, to be nd nanhu hik dukefr minoh buganirahr. Nhai be sfno inji kfokaha. Na htita nanhu Nkifrar nhai hti yindhorkahrm niko niwa nefm. Ndnettnd mrokfom kfiwanko. ³ Nd gutnius niko bingot wanyhato yakmot, tfit dukak hanykfot. Nd gutnius mrokfom hik marnyahato fasoh fasoh nefm yafhokfot. Na Jisasa hik you boyourahkoma, be yudbat hti fohtasakrahkma rikoh yima htiyekwa kanjo.

⁴ To tmift tom nikmoh wom yimam Sardis tohwom. Nd yimam tafi rroh hmbresham kift yaknarmomm. Nd yimaroh nefm awi dboriohem. Ndnettnd ndhtet yimam ganyom hmbresham hmbrehato nanopno rpap wiyauyaaurah-nom.

⁵ Yimar nda bbinysothu ufasoh nefroh bbukeft kahot nohwort, nd yimar ndhtet ganyom hmbresham wondhrahr, yo rorhu yufat nhai yak thurhotant toh nkifraniyuk yimaroh yufam yorhwa gonborngt. Nhai. Rorhu yufat nanhu Yifemri rorhu mounmotm-pno yutahato kfo miruhanm nd yimar nanopno tohwor. ⁶ Yimbhindangeteko, wany marnyahato siosmpno yiyuk mrokfom Bro Nkifrarhu Yafothat kfo pthiwam.”

Taun Filadelfiako rhuyuk siospno yimo gontwathu mrokfom

⁷ Tfit nd yima Kraisr wompam wom mrokfot kfo memor, “Yo tfit wom mrokfom wawandfakahnm taun Filadelfiako rhuyuk sioshu mounmotr-pno wahtaftwanm. Mrokfom inji wahtatwanm: Na Bro Nkifrar tohwa kanjo inji tohwa, na nhai wom kfo nhehefenr yakitohkaha, na kfoyuk mrokfom tu kfo mif mif mrokforpam kfiwa. Nann king Defitrhu kit kakitoh-want, nann bi tfanyant nhai tfit wom yimar frkihkfot. Yo nann bi frkihant nhai tfit wom yimar tfanykfot. Nann ndar mrokfom kfefiwanko. ⁸ Na bi tawisafwanm niko niwa nefm. Tawisaf-wanko bi wuroh bbukefenrpar rhu-motrk nanhu mrokfom hikmokomm nhai nanhu yufat yafhormokomt. Nikmoh yauyuk yihotar bi tukann fak wuthahemoyanko. Nhai wom tamohm hta rafokahmr. ⁹ Niko bi tawisafeteko Satanrpno tohet yimaroh tngm, rom niahato kfo mirahm nom Judayenom. Ndm be yuwi frnheh mrokfoym, nhai tu Bro Nkifrarhu kmi Juda mifm rhukahm. To tfit afo wahtitwako. Na kforuha nd yimam tfit nikompno niahato nikmoh wurampno bangu myuknarahm. Tum tfit inji naruhann tfit dukefr niahato duka mirahm, ‘Arm ka Jisasrh marbit korhm.’ ¹⁰ Niko nanhu mrokfom yak hikhato toh bmta bugamokomm niayuk krho nmbuham. Ndnettnd nanhu tirmn rhurahko. Nanhu tirmn rhuruhakomm tfit ndar bbinysothu tuhan yindariroh mfrnhombrayuk krhopam mekahtm aniekahnomm amfrnhombranomm, toh raforuhanko. ¹¹ Bi brbohwa nikompno nianeft. Nd niko na Jisasa hikwa hik dukefr yakitoh kihkfot. Wom yimam nieruhann nd dukefr yak thurahmr, nhai nd winyuk praiskfot yakruhatko.

¹² Yimar nda bbinysothu ufasoh nefroh bbukeft kahot nohwort, be nd yimar nanhu Bro Nkifrarhu temperrhu thu habokknayuk rahur toruharn nhai tfit frfnahruhatr. Be inji toh hatohruharn nanhu Bro Nkifrarhu yufat htaruhanr yo kmi Jerusalemrh yufat htaruhanr, nd nfri bro taunr Bro Nkifrar wahta-ruhar, yo nanhu nfri yufat ndt nhaf htaruhanr. ¹³ Yimbhindangeteko, wany marnyahato siosmpno yiyuk mrokfom Bro Nkifrarhu Yafothat kfo pthiwam.”

Taun Laodisiako rhuyuk siospno yimo gontwathu mrokfom

¹⁴ Tfit nd yima Kraisr wompam wom mrokfot kfo memor, “Yo tfit wom mrokfom wawandfakahnm taun Laodisiako rhuyuk sioshu mounmotr-pno wahtaftwanm. Mrokfom inji wahtatwanm: Bro Nkifrar kfoyuk mrokfom yo kfo tahi mrokfom na kfo yakiohato wuyekwanm. Na Bro Nkifrarhu mrokfom tu kfo hik mifwanm. Na nhai wom kfo nhehefenr yakitoh-kaha, na kfoyuk mrokfom tu kfo mif mif mrokforpam kfiwa. Nanhu tngtpno Bro Nkifrar nd tamoh tamoht hingrna htamort. Nann ndar mrokfot htefiwant nikompno. ¹⁵ Htitant niko yorhwa rhu nmbuhat. Nhai gonnktani hanykahko yo nhai kkahkahko. Amigonngtaniko, ee btn kkah rifhur herfiyanko. Be akkahko, nhai mrokfom. Nhai wom dukefm htarfotanko. ¹⁶ To nhai, tor be kkahefenrpar korhrko. Nhai

be mfro kkahkahko yo nhai be mfro gonngtakahko. Be inji buha yorhwatko hhrekhato kanga ayak tuhanko. ¹⁷ Niko kfo mihakutko, ‘Nom bok maruti wussn yura korhnom. Nhai rhu bebkahnom.’ Nd niko kfiwa mrokfot kfo furakfoyet. Niko tu fasoh rhu beb nmbuhat korhko. Ndhtet ruheft niko yorhwat yimam be tu bro yuhuwafeft htakfot. Niko tu faso yorhwakomn nyngam kunyjhato brioh hmbresha duha sfnoh bmbombrohko korhko. To ndhtet rhu beb nmbuhat tuko yorhwat nhai mhtiyak-kahkomt.* ¹⁸ Ndnettann kanga akfoyann. Nanhu gorkfot bi kahe kahe kandhi hnuhato bi nd binef wingrt bdrt gorkfotpno rhuyukt kur hnuhato fak dbofta wusmomn bi gorkforpayet. Ndtn kanga wawiknakahkomn be yura marutn rhurahko. Yo kanga ganyom hmbresham wawiknakahkomn ndm wahmbreko. Nd ganyom hmbresham yak hmbrehato be nhai yimam hti nyumuktaruhatmko sfno hmbresha duhatko rhuneft. Yo nyngaroh yak wuthayuk shrm wiknahato nyngam htakahtkomn nyngam wutharahmko. ¹⁹ Na hti wofnwa yimam kfonitayanmn mrokfom kahukanm. Ndnett yima yuhum sinyahato niko niwa fasoh nefm mong trohhato yafhokfot.

²⁰ Wawanyko! Na toya kuny yifhatikko tohhato krohna hasiwa. Yimar wanyhato yak tfanyakrahra na nd yimarhu kunys fknenihato nuwa yemskanhoruhanr, yo ror nuwa yems-kanhorahra. ²¹ Yimar nda bbinysoftu ufasoh nefroh bbukeft kahot nohwort, nd yimar yakrhoyanr na rhuyuk sia kingkfot rhunhorahra, na ufasoh nefroh bbukeft yahot nohnihato nanhu Yifemrhu sia kingkfot rhunuhiwa kanjo. ²² Yimbhindangeteko, wany marnyakfot siosmpno iyuk mrokfom Bro Nkifrarhu Yafothat kfo pthiwam.

**Sifsif Yonr hefenrhu skrorkfot yak nyusakmotrt nd fasoh fasoh
shrm mfnahhato nda bbinysoftu met yindarim thu kasi
hmbremomm.”**

4

(Sapta 4-11)

Bro Nkifrar yura hefenrn lotu hanymomr

¹ Nd nanhu mongko mtohhato pthamo yimar kfoyuk mrokfom wanyni hanyhato tfit yura hefenr hti hanymoyanr hefenrhu yifhatiktfanyett hti hanymoyant. Nd na barkof ptha hanymo yimar tfit yura hefenko mtoh hanyhato fumret yimam fumrwa kanjo inji wany hanymoyanr. Kfo hany memora, “Asha yuwa muhn. Yuwa muhkahtn yak nuhas bonuhas bugaruhan kto rhuruha nefm.” ² Be inji htini hanyhato yudbat tfit Bro Nkifrarhu Yafothat toh hongmbakna-motta nyngam frrekuthato hefenr hti hanymoyanr. Nyngam frkekutni-hato hefenr htimoat htimoant kingm yorhwa gajis. Nd gajis htimoa tor wom Yimar korhrt nd gajis.* ³ Nd Yimar gunyinyimik fnhutwor kangme tahi jaspathu fnhuyeftn fnhutwor yo tahi konirianthu fnhuyeftn fnhutwor. Nd ror yorhwa gajis kkujift frhtfasmott. Nd kkujift htimoant kangme tahi emerartn fnhutwot. ⁴ Nd kingm yorhwa gajis 24 gajim hta htifasmomt, nd gajim 24 bro nungothetm korhmm. Nd gajim yorhwa nungothetm ganyom hmbresharpam wondh hmbrihato korh hasiwum, yo kingm hmbrita gor kraunkfot mfham hatohwomm. ⁵ Nd gajis yorhwa tkittn wuhtiyakmoanm toh fnhum wuyohninehato famboh-ritnamoum. Tohr wuyohninamoahat nyungefm thuwok fnahmoum. Yo nd gajis yukatohwako 7-pela kshm funa hasiwum. Nd 7-pela kshm ndm Bro Nkifrarhu hingrneft hingrnaruha 7-pela

* 3:17: Tu Laodisiaroh htiyeft hti memoum, “Nom tunom tamohm wom dukaruanom nom yura maruti wussn be yura korhnom.” Ndt yimaroh htiyeftn inji htimoant. To tfit Bro Nkifrarhu htiyeft faso htimoant. Yimam faso mif rhumoum. Revelesen 2.9 htikfot wom mrokfom. * 4:2: Nd gajis rhumo yimar Jonr dhtimor, ndr htimor Bro Nkifrarn. To ndashart nhai be yufat yuta marimor Bro Nkifrar korhrt nd gajis. Nhai. Kto sapta 7 ves 10 kfotn htirahn mrokfot kfo miraht, “Bro Nkifrar kingm yorhwa gajisn korh hasiwur.” Ndha mrokfot kfo ntremomt. To Jonr Bro Nkifrar htimoat nhai kfo marimor rorhu ruheft yima mifm kanjo korhr. Nhai. Be kfo nhombramor ror hatohmo funeft yo ror hatohmo wonk wonk nmboret fnhuyeft. Ndrpam kfomr.

yafothayem. ⁶ Yo nd sia kingt yukatohwako kangme tek baritn glase hingrnetmt, aiskfot kanjo fnhutwot.

Yo husfihus foh nunga kanjo ruhet shrm mano mano toh htfasmom. Nd shrm nyingatikko wom nyingam tohwom yo mongko wom nyingam tohwom. ⁷ Nd husfihus shrm barkofr laion mfheter. Womr bulmakau yiram mfheter. Yo womrne yima nyingatikter. Wurohr dobi mfheter. Kangme dobirn yafuna hanyhato mfhate thu yuwof hanitr. ⁸ Nd husfihus shrm birnet bugayetem. Rpa rpa shrm 6-pela birna bugayetem. Yo nyisofm nyingam rhu htfas bugewumm. Yiro birna yuhamio nyinget bugayetem. Yifung marm be Bro Nkifrar windoh tukna hasiwum. Windoh hanyhato kfo hany kangm,

“Tu Yura Myorhekwa Bro Nungothete,
Tu Hta Nngrajohet Bro Nkifra mife,
ni bingot ritohngotakmo arihato tohwo yo kto nierahn.”

⁹ Nd foh nunga kanjo ruhet shrm rom yindhorwomr nd Yimar turhu sia kingt rhuhato be inji toh nkifranitar. Yo rorhu yufat yuta hagrhhahato kfo yindhorwomr. Nd neft nd tohwa husfihus shrm be inji nahasiwum. ¹⁰ Tfifit nd 24 nungothetm rom nd sia kingt rhuyuk Yimarhu nyingatikko bangum myuknahato lotu hasiwumr. Nd Yimar be inji toh nkifranirahr. Nd rroh mfhame hatohyuk gor kraunkfot yak tutakhato nd Yimar yorhwa sia kingtpno watuhato kfo yindhor brutt-newumr. ¹¹ Kfo kangm,

“Nmoh Bro Nkifraye ninrpa tu yura myorhekwo.

Ninn nda nom htita tamoh tamoh hingrna hta buga-motnm korhm.

Ndnettn yimam be ninrpan kfo yindhorkfot

yo yufat yuta hagrhhahato ninrpanhu yinhitn rhukfot.”

5

Bro Nkifrarhu mrokfom yorhwa skrorkfot Jonr htimort bi yakrirhato psifkort bi silimett

¹ Tfifit htimoja nd sia kingt rhumo Yimarhu tirmiftn fakitomort skrorkfot.* Nd skrorkfot mano mano mrokfom wandfamomm. Wandfa-momn tfifit yakrirhato 7-pela nmbuharoh psifkorm silimmomm.† ² Nd skror-kfot inji htini hanymoyann tfifit htimoja wom nngrajohet mounmotr nnuhuhato kfo ptha ttiwon memor, “Tone fitoh yima tungunar nieruharn nd silkfom yakta hanyruhatrm nd skrorkfot rhuyuk mrokfom htiruham?” ³ Na nd mounmotrhu mrokfot inji wanyhato duka memoya nhai wom hefenr tohyuk frohrn o bbinysoft tohyuk frohrn o yiro Maringour tohyuk frohrn nd skrorkfot yak nyusakuhato yiro mrokfom htikfot. ⁴ Hti hambriwa nd skrorkfothu yak nyusakuyuk yimar. Dukafotihato bro nureft fakmota. ⁵ Tfifit nd sia kingt rhu htfasmo nungothetroh womr kfo memora, “Anurwahn! Wawanyn! Tor Juda tangiroh Laionr, tu King Defit frikef yuhathu tu tannefentr, ror tohmo yahrt nhai finjinarmor. Yahr nungothat bi fakmort. Rorn nd 7-pela silkfom yak thu hanyrahrm.”

Jonr Sifsif Yonr htimo yuhat

⁶ Nd nungothetr inji wanyni hany-hato tfifit Sifsif Yonr htimoanr brbo sia kingtpno mtohm. Htimoya nd sia kingt husfihus foh nunga kanjo ruhet shrm mano mano toh htfasmom, tfifit romppnonio 24 nungothetm toh htfasmomm. Nd Sifsif Yonr htimoanr yimaro was fnhum hatohwor. Rorhu mfhate htimoanr 7-pela komm toh-womr yo 7-pela nyingam korhmr. Nd nyingam Bro Nkifrar kfo hta bohtayuk yafothayem. Nd yafothamn ndar yuht bbinysoft kukatohwomt. ⁷ Tfifit hti-moyanr nd Sifsif Yonr nd sia kingt rhuyuk Yimarhu tirmifko yakinohmo skrorkfot rim fakmort. ⁸ Tfifit htiyaf o hanymoya nd husfihus foh nunga kanjo ruhet shrm 24 nungothetm nd Sifsif Yonrhu

* 5:1: Nd skrorkfot bi nkifram yakinohmoa buket. Nd yiham buk mifm kakitohwonem bingot nkifram skrorm mrokfom rhumoatm nd skrorm yak nyusaku fnahhato mrokfom hti fnahmouumm. † 5:1: Nd skrorkfothu 7-pela nmbuharoh psifm yak natt tkimn kenderm kandhi hnuhato tarioh trkuyaf hanymoa tkimn piksa kftot bi hingrna hta nhombretm yakmoamn tatanyaf hanymouumm. Nd tatanyaf hanyuk tkimn nhai wom yima furam nd kandhi hnuhato tatanyaf hanyet tkim yak ppokfot. Tu be nhai mif. Nd tu piksa tikatrpas yak ppokfot.

nyingatikko bangu myukna hanymom. Nungothetm rpa rpa fakitoh nhombra bugamom musik wumtyuk gita kanjohot shrm yo dborioh mthet shrm kur mtha hanyet dis gorkfot. Nd dborioh mthet shrm, ndm Kristenm Bro Nkifrarpmo kfo bruttnewa nmbuhat fak nuhasmom. ⁹ Yo wany-moyanm wom nfri windohr fakmom. Nd windohr inji kfo hanymomr:

“Ni bi wasmotmn nohmo.

Nd ninhu kku futn bi fak nhafoh-motm

wonk wonk kmim, wonk wonk yarmumat kfet kmi kmim,

wonk wonk thetm, wonk wonk ruheft ruhetm.

Be bi Bro Nkifrarhu yufat korhm.

Ndnettn nd skror htayuk silkfom yak thurfom.

¹⁰ Nd yimam bi Bro Nkifrarhu kingdomfot fak htamotnm

be bi nmoh Bro Nkifrarhu pris hingrneft bi tohwom.

Be kingm tohruhamn

bbinysoftu met yindarim romn yakinohrahmm.”

Sifsif Yonrhu yufat yuta hagrhamo yuhat

¹¹ Ndt inji htini hanyhato tfit memoya ayukatohafoya, wanymoya mounmot rifhur yura wutohhato wanakumom. Nhai kuken mounmot rifhur htirmoya, be tu tausen tausen milion milion mounmotm htimoya. Nd mounmotm niamomn toh dbu hm-bremomm nd sia kingt rhuyuk Yimar yo husfihus foh nunga kanjo ruhet shrm yo 24 nungothetm. ¹² Nd mounmotroh tng rihar mfro wanakuyafo memom,

“Nd Sifsif Yonr yimam bi was-ngotmor, tu yufeter,

rorn tu bro bbukefeter yo dborioh dukefeter,

rorn tu dborioh rhu nmbuhat kakitohwort,

yo rorrparn yimam kfo yuta hagrhhato

yimam kfo yindhorkfot.”

¹³ Nd mounmotroh tngm wanyi hanyhato tfit Bro Nkifrar hefenri bbinysoft hingrna htamo yimam nd foh nungat nd tamoh tamoh wany-moyanm kfo yindhor memom,

“Nd Yimar sia kingt yorhwari Sifsif Yonr

rof kfo yindhор tngm rpat ayak bugafm,

yuta nawohyuk tngm kfo yindhор nmbuham,

bbukefm rofrpafn yiha yiha arhu nkifranitwam.”

¹⁴ Nd 4-pela shrm kfo fakio memom, “To be inji.” Be nd nungothetm bangu tabokmehato lotumom.

6

Sifsif Yonr silkfom yak thumo yuhat

¹ Tfit htimoyanr nd Sifsif Yonr yakinohmo skrorkfothu barkof silkfot fak thumort. Fak thu hanymort nd husfihus foh nunga kanjo ruhet shrioh womr wanymoyanr tngt tohr kanjo. Kfo hany memor, “Aniar!” ² Inji nakumotr memoya ayukatoha htimoya wom ganyom hosr. Nd hosr hatoneyuk yimar tembt fakitohmor. Yahr kmim yiho hathu hnamotrm yahr nungothat hemomr. Nd yahr nungothatpno yahr kmim yak bissrahrm.

³ Ndt inji htini hany tfit htimoya Sifsif Yonr husyuk silkfot fak thumort. Fak thu hanymort tfit nd foh nunga kanjo ruhet shrioh womr tfit kfo naku memor, “Aniar!”

⁴ Inji nakumotr memoya ayukatoha htimoya wom kuupa kanjo fnhuyet hosr mfnah hanymor. Nd hosr hatoneyuk yimar ndar bbinysoftu hnayuk yahrt hnehato yimam naye mhriruha bro bbukeft hemomr. Yo nd hingrnethu hingrnayuk bainat kimt bi rpat hemomr.

⁵ Yo tfit Sifsif Yonr tfit husfirpeh-yuk silkfot fak thumort. Fak thu hanymort nhaf tfit wanymoya nd foh nunga kanjo ruhet shrioh womr nhaf sinyahato kfo naku memor, “Aniar!” Nakumotr memoya ayukatoha htimoya krta hosr. Nhaf nd hosr hatoneyuk yimar skerkfot tirt fakitohmor. ⁶ Nd husfihus foh nunga kanjo ruhet shrm

tohmo tkittipno yima tngt kanjo wany hanymoyanr kfo hanymorr nd hosr rhuyuk yimar. Kfo hany memor, "Ninhu hingrneft wai wahingrnakahtnt yatinoh wormr tohrahrt. Nd wormrhu toh yihar yimam witpam 40 kinakfet wan kilo wit sospenenrpar skerimhekphot. Yo baripam 40 kinakfet husfirpa bari sospenenm skerimhekphot. Ndrpam wahi hanyswanm. Yo olif suhmi wain shurpam mirahn ayak batianm."

⁷ Yo tfit Sifsif Yonr husfishusyuk silkfot fak thumort. Fak thu hanymort tfit wanymoyanr nd foh nunga kanjo ruhet shrioh womr kfo memor, "Aniar!" ⁸ Nakumotr memoya ayukatoha, htimoja wom hosr. Nd hosr gondhata bugamor. Nd hosr hatoneyuk yimarhu yufat Nohyukr. Tfit rorhu mongko tohmor wom hosr. Nd mongko tohmo hosr rhumo yimarhu yufat Maringour. Tuhan yindariroh yak batiyuk kfo yakio mrokfot rofpno htamomt. Rofn nd kfo yakio mrokfot fakmof wonk wonk yuhann rof yihato yimam yak batit witakfot. Rof yahrtn bainate bainate tmbho witakfot o yatinoh wormr tohhato yimam yeshri duha noh witakfot o dbohna wormr tohhato yimam ridbohnakhany, ridbohnak-hany, noh witakfot o bbinysoft wutoni atonita namburet foh nungann yimam ye jborfa witakfot.*

⁹ Tfit Sifsif Yonr 5-yuk silkfot fak thumort. Ndt fak thu hanymor tfit hti hanymoyanm nd yimam Bro Nkifrarhu mrokfot yikitoh kikhato yo mrokfot kfo ptha htfashato dwas hanymo yimaroh yafotham. Htimoyanm nd yafotham Bro Nkifrar tariorh mthayuk altat tohmo tkittin rhu htfasmom. ¹⁰ Nd noheh yimaroh yafotham wany hanymoyanm mfro mfro kfo naku nur hany memoum, "Bro Nkifraye, ni king tohwann nd tamoh tamoh kakitohwont. Ni nhai wom kfo nhehefenr rhukahrn. Ni tu dborioh nefrpam yak hikhato nhai yimaroh fasoh fasoh nefm hti marsisakahnm. Nome bi gari hatoh-wonom. Fitoh yiha ni kot yikitohhato nd nom was furamo yimam tawo tofiyehm yakruhanm?"

¹¹ Inji kfomotm tfit hti hanymoyanm nd yafotham ganyom hmbresham hmbre buga hanymomm. Hmbrenimomm kfo memomm, "Niko bi akfo dimandi-wahko. Niko afo be inji warhu wita hanyko afo. Niko hingrnamo kanjohtet hingrnewa yimam tafi was bugahato Bro Nkifrar kfoyuk thomnafat yakrrott. Was hany, was hanyruhamm bi Bro Nkifrar duka htayuk thomnafat bi fektt, ee tawo tu Bro Nkifrarn tofiyehm wasrahrm."

¹² Yo tfit htimoyanr nd Sifsif Yonr 6-yuk silkfot fak thumort. Ndt fak thu hanymotr memoya ahtiyafoya htimoyant bbinysoft bro nunes tonemot. Marr htimoyanr krta hmbremor yimam bbtangurhato hmbrita krta hmbreshat kanjo. Yamt rot kkupata hmbre bugamot. ¹³ Guny mounr ror yohrof bugamorn bbinysoft minajbuu bugamor fik suham wifort frrashato minajbuuwa kanjo. ¹⁴ Yo mount htimoyant memome yitwatn fak rirefim. Nd kminysofm yo kmi yubm htimoyanm nhai tum tohyuk tkitmn tohrmom. Tum tohyuk tkitm thu trohhato nndo wom tkitmn tfit toh hany bugamom.

¹⁵ Yo nd bbiny-softhu kingm, yufet yimam, soldiaroh keptenm, maru kunyet yimam, nanyjaret nanyjaret yimam, slefm yo toh furayuk yimam, nd nd yima boyimat nhai watoh hasormom. Nndo yakrme tubatumimomm yiro kminy-sofmn yo kminysofroh tahi bakunymn yi kafrohmm. ¹⁶ Ndko kafrohhato kminysofm yo tahim kfo naku memoumm, "Ndar kminysofko, ndar tahiko, wathu kasikmnom. Wathu kasikahtkmnom nd sia kingt rhuyuk yimar nhai htiruhatrnom yo Sifsif Yonrhu namburpam nhai yakruhatm-nom.

¹⁷ Nd nom rofhu mrokfom hanybornahato fasoh fasoh nefm nahnamohat to bi tof bi nambur fnahwof. Ndnett nhai wom fitoh yimar o mett tohhato rofhu nambur-pam frtfakruhatmf."

Isrerroh 144,000 met yindars Bro Nkifrarhu makkfot htamomm

¹ Ndm inji htini hanymoyanm tfit hti hanymoyanm husfishus mounmotm. Ndar bbinysoftthu manoh manoh krayefm toh nhombramomm. Manoh manoh krayefm tohhato mano mano niayuk wiforefm fak tkafmomm. Nhai wifort wiforhato bbinysoft

* ^{6:8:} Nd rof yak batit witamo tuhan yindarim nhai be bbinysoftthu tuhan yindari bugam yak batit witarmofm. Nhai. Be % nd bbinysof rhuyuk tuhan yindarirpam fak batit witamofm.

wifort yakrmott o marombt o mim wifort yakrmotm. Nd hingrnefetmn manoh manoh krayefm tohmomm. ² Yo tfit hti hanymoyanr wom moun-motr manoh marr yuwa muhwako toh tanyhato yi hanymor. Nd mounmotr htimoyanr Bro Nkifrarhu makkfot fakitohakmor. Nd mounmotr mtohhato mfro kfo nnhu hanymorm ndwom husfihus mounmotm. Nd mounmotm bi ndar bbinysofti marombthu yak batiyukm Bro Nkifrar kfo htamom. ³ Nd mounmotr kfo memorm, “Bi mirahko bi ndar bbinysofti marombt yo misuhm bi ayak batinomm. Afo nom yiruhanomn Bro Nkifrar hikwa met yindariroh nyimbikm Bro Nkifrarhu makkfot htarahnomm. Bi makkfot htaniname ee btn wayak batitwakomm nd tamoh tamoh.” ⁴ Nd Bro Nkifrarhu makkfot htamo met yindariroh tho-mnafat, 144,000 met yindariroh nyimbikm makkfot htamomm. To nd met yindarim, Isrerroh 12-pela frikeftthu 144,000 met yindarim makkfot htamomm. ⁵ Rpa rpa frikeft 12,000 12,000 met yindarim makkfot hta hanymomm:

Juda frikeft 12,000,
 Ruben frikeft 12,000,
 Gat frikeft 12,000,
⁶ Aser frikeft 12,000,
 Naftali frikeft 12,000,
 Manase frikeft 12,000,
⁷ Simeon frikeft 12,000,
 Lifai frikeft 12,000,
 Isakar frikeft 12,000,
⁸ Sebulun frikeft 12,000,
 Josef frikeft 12,000 ee
 Benjamin frikeft 12,000.

Tu bro yima rifhur Bro Nkifrar lotu hanymo yuhat

⁹ Tfit hti hanymoya wom yonmari yima rifhur. Nndo ndar kipr shu furam, nhai yimam thomnakfot. Nd yimam hti hanymoyanm nndoh nndoh mrokfot kfetm, nndoh nndoh thetm, nndoh nndoh kmirohm yi hanymom. Nd yimam mtoh hanymom sia kingti Sifsif Yonrhu nyingakorn. Yo nd yimam bi ganyom hmbresham wondh hmbrehato yomkpo kanjo ruhet pamkfothu twam fakitoh bugamom. ¹⁰ Nd yimam mfro mfro wanakuyak memom, “Sia kingt rhuyuk nmoh Bro Nkifrar yo Sifsif Yonr, rofn nrfa htiyakmofnom.”

¹¹ Nd sia kingt toh htfasmo moun-motm yo 24 nungothetm yo husfihus foh nunga kanjo ruhet shrm tuha suhhato nyingatikm bbinysofko yohnehato kfo hany memom,

¹² “Nom tunmoh Bro Nkifrarpno tu bro yindhoreft yorhwatn

rorhu yufat kuta yindhoreft yorhwatn.

Ror tu dborioh dukefetrn rorn kfo yindhoreft yorhwatn.

rorhu yufat yura yura htakfot.

Tu bro bbukefeter. Uwa, ndt nhai fura kfot.

Tu bro bbukeft rorrparpno korht.

Nd kfo yindhoreft yorhwatn.

kfo yindhoreft yorhwatn.

Ganyom hmbresha hmbreyetreh ruheft

¹³ Tfit wom nungothetm kfo ttiwon memora, “Nd ganyom hmbresha hmbreyet met yindarime frohem, yo fitoko niham?” ¹⁴ Tfit kfo memoyanr, “Bro yimaye, ni tunn tawisafwonn.” Tfit rorn kfo memora, “Nd met yindarim bro krhopam tohmom. Mis kfrat rroh ruheht rhumot. Sifsif Yonrhu kkupaye nd rroh hmbresham kifa-motmm hmbresham ganyomtewumm. ¹⁵ Ndnetmn Bro Nkifrarhu temperr yorhwa sia kingthu nyingatikko toh-hato yifung marm lotu hasiwum. Nd sia kingt rhuyuk yimarn hti yukatoh hasiwurm. ¹⁶ Nhai tfit wom yatinoh-ruhatm yo nhai tfit wom bupa knaru-hatm. Nhai tfit marrn o tamohmn tagunaruhatmm. ¹⁷ Tu nd sia kingthu buha rhuyuk Sifsif Yonrhu yukatohaf hanyrahrm. Turn bu yinham yorhwa tkitm hany hakuruuharm tum tas yeruhamn toh hatoh hakurahrm. Yo nd harhuwa nur nyingam, Bro Nkifrarn yak trkthurahrm.”

Sifsif Yonr 7-yuk silkfot fak thumort

¹ Tfit hti hanymoyanr Sifsif Yonr tfit 7-yuk silkfot fak thumort. Nd 7-yuk silkfot yak thumohat hefen bugar be buskukrat rhumor, nhai wom tamoh nmbarefenz o nyungefenz wanyrmoya. Haf aua be buskukra furat rhumor. ² Buskukrat rhunimorn ee tfit kto htiyak hanymoya Bro Nkifrarhu nyngako mtohyuk 7-pela mounmotm 7-pela fumrm hi hanymomm.

³ Yo tfit wom mounmotr htiyak hanymoyanr dborioh mthet paurakfot htahato tarior mthayuk gore hingrnayet pengt yakitohakhato altakfotpno mtih hanymor. Mtohmotr nd yonmari dborioh mthet paurat hemomr. Nd paurat Bro Nkifrar hiket yimaroh kfo bruttnaneft nd paurakfot rpat Bro Nkifrarhu nyngatikko rhuyuk altakfot-pno mhtahato rpat tarior mthafoyukmn nd paurat hemomr. ⁴ Yo htimoyanr nd ror yakmo paurat tarior mthafmotrt nd dborioh hip gbefri Bro Nkifrar hiket yimaroh kfo bruttnayuk mrokfom nd Bro Nkifrarhu nyngatikko tohyuk mounmotrhu pengt htanyhato rpat muhmom. ⁵ Nd mounmotr nd hingr-neft hingrnani bugamorth, tfit nd altathu kah bantikr tawokakmorr nd dborioh mthet paurakfot htahato tarior mthayuk pengt yakmorn nd kah bantikr htamorrn, tfit yarim hatohnehato thu trufafmotrr bbiny-sofkor fawihnamor. Inji namotr tohr wathu rbighato nyungu mirefetr yimor. Yo toh fnhur wufohninamor. Yo nunes tonemot.

Husfihus mounmotm fumrm fumrmo yuhat

⁶ Tfit nd 7-pela mounmotm 7-pela fumrm yakitohmom rom bi toh yibonmom rroh fumrroh fumrneft.

⁷ Barkof mounmotrhu fumrr hatoh-hato fumrmorr. Fumrmotrr ren aiset kaht ee kkut rpat yakkomm wom bbinysof nmbuhattu yak tipakhato watumomm. Nd bbinysof nmbuhattu watumotmm nd bbinysof nmbuhatti nd bbinysoft tohyuk bro mi suhm yo mifan suhm, kipr suhm, gutn suhm, nd ndm kur witamom.*

⁸⁻⁹ Yo tfit husyuk mounmotrhu fumrr fumrmorr. Rorhu fumrrpno be tu yonmari kaht nda yuht kminysoft kur funewa kanjohot bro kaht yak-momt wom maromb nmbuhattu watu-momt. Watumotmt nhaf nd maromb nmbuhattu bupam kkupata bugamomn nd maromb nmbuhattu hirhato yewussoh htfasmo yirat nd yiro marombt hutraf-mo tamoh tamoht noh witamot yo nd yura marombt wutone atonemo sifm ndm htimoyanm rpat bafinat yimom.†

¹⁰ Tfit husfirpehyuk mounmotrhu fumrr fumrmorr. Fumrmotrr nd bro gunyr kshm kanjo funarriwar wuyoh-ninehato misuhmorm wom tkit nmbu-haroh bupa tasyuk tkitmi yo wom tkit nmuham yorhwa tek yinham. ¹¹ (Nd gunyrhu yufat Kurjbnehet.) Nd tekmi tek yinham nd gunyr misuhmotrm nd bupa tasyuk tekmi tek yinharoh bupam kurjbnehmom. Yimam nd tekmi yinharoh kurjbnehet bupam tas yamomn noh wurasoh bugamom.‡

¹² Tfit husfihusyuk mounmotrhu fumrr fumrmorr. Fumrmotrr mar yiha tayuk marrhu wom nukeft kur spohmot yo yifung tayuk yamti gunyroh wom nukefm kur spohmomm. Ndnettun wom yihar marr nhai mta fnahhato ta krifaf bugarmor. Nhai. Buha wom yiha nmbuhattu marr afo mta nohnimor. Yifungt nhaf inji. Nhai yamti gunym yifungr ta nfha bugarmomr. Nhai. Buha wom yifung nmbuhattu mta nohnimom.§

* 8:7: Nd bbinysof nmbuhattu krhopam yakmot nhai be yuht bbinysof bugat kur witamot. Nhai. Be 1/3 bbinysof nmbuhattu yo nd bbinysof nmbuhattu rhuyuk shrm kur witamom. † 8:8-9: Nd maromb nmbuhatti nd maromb nmbuhattu rhuyuk tamoh tamohm krhopa yakmom ndm nhaf be marombthu 1/3 kforpat krhopam fakmot. ‡ 8:11: Nd tekmi yinharoh bupam kurjbnehmom nmbuhattu nhaf nhai be ndar bbinysoftu tekmi yinharoh bugam kurjbnehmom nhai, be 1/3 tekmi yinharoh bupam kurjbnehmom. § 8:12: Nd marri yifungt krhopam yakmohat nhaf 1/3 yiharpar buha marr mta nohmor afo. Nhai be yuht yiha bugar marr mnohrmor. Yifungt nhaf yifungthu nukeft hayuk yam gunyim 1/3 yifungpar nhai tarmom yam gunyim.

¹³ Yo tfit yura mountn gribfanano hti hanymoya wom dobir hta htfa-s-mour. Nd dobir hta htfa-smoarn yima tngt yakhato tu mfro mfro kfo hany memour, “Wayeye! Wayeye! Wayeye! Wuroh husfirpa mounmotroh husfirpa fumrroh krhopam be tu bro krhopa mifm bbinysoft tohyuk yimam yakrahm!”

9

5-yuk mounmotrhu fumrr fumrmo yuhat

¹ Yo tfit htimoya 5-yuk moun-motrhu fumrr fumrmorr. Fumr-motrr htimoya wom gunyr wuyohnine-hato bbinysoft misuhmor. Misuhmotr ndar bbinysoft kfe gdbofmo muhrhu rim fnahni yuhathu kit hemomr. Nd muhr nhai brbo watohrmor. Yiro yingotmorn kutndou duhater. ² Nd kiye gunyr nd muhr frkihnimo yifhatikt tfanymort. Tfanyaafmohat hip rifhur bbofnahmor. Memom nndo gru kahtn hta funefitm kah hip rifhur mtagdf fnahwor. Nd hip rifhur muhhato tfit thusimorn mounti marr hta rafomotmt mounti marr rim nohnimofn yifungt rhumot. ³ Nd muhmo gru rifhurn yakum dborhamomn bbinysofko tfit fawihnamom. Yawihnamomn tfit pkoroh tiknayuk nambur bim fakmom. ⁴ Nd yakum kfo hta mrokfot fakmom. Nhai rom yihato bbinysoft tohyuk kiprt o mim o wom tamohmn sinya-hato yanyohkfot. Rom Bro Nkifrarhu makkfot nyimbikm rhu duha yimarpam tiknahato trwakfot. ⁵ Tirfa yamm nd krhopam ayaktwam. Be tiknahato trwaneftn yimam trwakfot, tmift trwa hanyhato nohneft nhai. Be nd yakum inji wanyhato yimomn yimam tikna htfa-smoumm. Yimam tiknahato trwamoahat memoum nndo pkomn tiknetmm trwewum. ⁶ Nd tirfa yamm yakuroh tikna hasoneft hhrekhato mirahm, “Finji anakahnomn anohnom,” nhai nohruhatm.

⁷ Htimoyanm nd yakum memom ka hosmn mfhampas kasinyemn bi tagbiowom yahrt yinyeftn. Mfhampas memome gor kraunkfotn hmbrim, yo yingatikm memome yima yingatikem. ⁸ Rroh tmari yukem memom ka nndo metroh tmar yukayem. Bisom memom nndo laionroh bisoyem. ⁹ Htimoyanm memome yahrt yiyuk siot kapakfotn hmbrim yo rroh twam yafunahato mir nadidarmohat memome hosm yahrt yihato karism hatonitamn nadidar hanitm. ¹⁰ Nd yaku fndm tfit pkoroh fndm kanjo rhu hanymomn nd yima tiknayuk bim fndkorn rhumom. Ndnetmn nd yima tiknayuk bim fndko rhumomn nd tirfa yamm tikna haso-moumm. ¹¹ Nd yakum kingetem. Nd kingrn tohukatohworm. Nd kingrn ndar bbinysoft kfe gdbofmo muhrhu mounmoter. Hibru yarmumat nd mounmotrhu yufat kutewumr Abadon. Grik yarmumat Apolian. (Tfit nmoh yuteft nd yufathu yimbu yuhat inji afkonom Shrka Kafringetr.)

¹² Nd dobir yura hta hanyhato kfomo barkof kfo wayeye mrokfo nmbuhathu barkof krhopam inji niathomt htimoyanm. To wawanyko, mirahko ka be inji rpa. Nhai. Tof wom krho nmbuhaf natajofetf niahnewuf. Wom husyuk mrokfothu krhopam bi tom bi brbo.

6-yuk mounmotrhu fumrr fumrmo yuhat

¹³ Tfit htimoyanr 6-yuk mounmotr yikitohmo fumrr fumrmorr. Nd fumrrpno wanymoyanr wom yimarhu tngt. Nd tngt wanyakmoyant Bro Nkifrarhu yingatikko tohwa gore hingrnayet altathu husfishus konakfot tohyuk husfishus komroh buha nd tngt wanyakmoyant. ¹⁴ Nd tngt 6-yuk fumrr yikitohyuk mounmotr kfomot. Kfo memot, “Nd bro tek Yufretis yak tkaftamo husfishus mounmotm wayak hfhanakahtnm afnahm.”

¹⁵ Nd Yufretis tohyuk mounmotm rom be gari haso-moum tu Bro Nkifrar kfo htayuk tu yiha mifmifrn. Nd yihar niathomr nd 6-yuk mounmotr yimorn nd husfishus mounmotm yak hfhanafomotm rom fnahnihato hifa wus rmonmomr wom yima rifiny buhar.* ¹⁶ Yo soldiam hosm rhuhato tonemoroh thomnafat wanymoyant 200 milion soldiam hosm rhuhato tonemom. Nd thomnafat yutamotmt wanymoyant. ¹⁷ Nd hosm mrhuhato tonemo yimam htimoyanm fnhu nmboret fnhu nmboretet mondroh siot kapakfot

* ^{9:15:} Nd yimam hifa wusmom nhai be yuht bbinys of bugathu yima bugam hifa wusrmom. Nhai. Be 1/3 yimarpam hifa wus rmonmom.

hambre bugamom. Womm tu retpela fnhu kkoret siot kapakfot hmbremom, womm blupelakfot fnhu kkoretm yo womm yeropela fnhu kkoretm. Hosroh mfham laionroh mfham kanjo hti hanymoyanm. Yo nd hosroh tng yuharn hti hanymoyanm kahm mkur fnah hanymom yo kah hip rifhum fnah hanymom yo sarfakfot kuret kahm mkur fnah hanymom. ¹⁸ Nd hosroh tngm yahshafoyuk kahm, yo hip rifhum yo sarfakfot kuret kahm nd ndmn fak batimomm wom yima rifiny nmbuhar.[†] ¹⁹ Yimaroh yak batiyuk bbukeft hosm dhatonemot tng yuharn mfnahmot yo kinyoftn rhumot. Kinyofm nandomm kanjo nandom mfhettm rhumom. Yimam nd nandom mfhett kinyofe wasmoatmm trwa nohmoum.

²⁰ Yo tfit ndwom ndwomt nd hosm yak bati duha yimom, inji htihomah rom nhai hti yakrmihato yafhormomm turoh tire hingrnayet yifonm. Nhai yafhormomt nd yarhroh nakuneft yo nd gore, silvaye, brase, tahiye, miye hingrnayet yifonm o tamoh tamohm. Nd yima tire hingrnayet shrkar, yima tng duha shrkar, nyinga duha shrkar yo wiayau duha shrkar, tfit naku hany yo nuwa rika htahe inji namoumm. ²¹ Yo nd yimam nhai yafhormomt yima was furaneft, yima tipnefti for bisingm, yo met yindariroh nayak kafroh htfasneft, yo rikohneft. Nd nd nefm nhai yafhormomm.

10

Jonr yamo skrorthu mrokfot

¹ Tfit htiyakmoya wom nngrajohet mounmotr yura hefen yuharn fawihnamor. Gribt yak-hato ndt hmbrenamor hmbresham kanjo, yo mfha nmbuhakortko kkujift mfhett frhtfasmott, yo nyingatikt fnhumotr marr kanjo, yo wuraf hatoh-mo kaht memom nndo bngo bijhayef. ² Nd mounmotr tefi skorent bi yak nyimbusakafett tirt fakitothmor. Yo wuraf wom tirmif wurat marombt htamort, wom kindont yura bbinysoft htamort. ³ Wuraf inji htatahato mfro wafattormor laionm yattorwa kanjo. Nd mounmotrhu yattoreftpno 7-pela tohm yohnemom rroh mrokfo nmbu-hampno. Tohm nyungumoum mrokfom wanyakmoanm. ⁴ Nd 7-pela tohmpno niamo mrokfom memoya ka wandfaruhanm, tfit yura hefenko wom tngt kfo hany memota, “Nd tohrpno yakyuk mrokfom ni mirahn awandfakahtanm yima yima ahtimm. Nd mrokfom be tunhu yima yuhurpar arhutwam.”

⁵⁻⁶ Be nd mounmotr na htihom wura husf mano tektn wom wurat htamor yo mano bbinysoftn wom wura htamor, nd mounmotr tir mift yura hefenko wuhta hanyhato nd toh nkifret Nkifrar, mounti nd mount rhuyuk shrkar hingrnayet yo nda bbinysofti ndar bbinysoft yorhwa shrkar yo marombt yorhwa shrkar hingrna htamor, nd Nkifrarhu yufat yuta hanyhato nd mounmotr kfo memor, “Bi nda bbinysofti mounthu bnka yihayer. Bro Nkifrar nhai wom kukna hatoahuhatr. ⁷ Nd 7-yuk mounmotrhu fumrrpno to be Bro Nkifrar turhu hingrna yima profetmpno kfo tndh hik buga duha yimo mrokfot nd yiha mfrwutha buganeraht.”*

⁸ Nd hefen yuharn niayuk tngt tfit kfo memota, “Nd tekti bbinysoft wura htewa mountrhu tirt yorhwa yak nyimbusaket skrort warimaknt.” ⁹ Be na inji wanyhato yimoyann kfo ttiwon memoyanr, “Wahina nd skorent.” Tfit ror kfo memora, “Wayakkahnt wayant. Afo tngt wuhtahato ye shombat mirahm nndo winepam kaum. Tfit yiro yatit nhai yakmiyakruhatt, yatit tfit yiho finy sinyaah.” ¹⁰ Inji kfomotra nd skorent yakmoyantn fiyaknimoyant. Afo tngt wuhtamohat hifa famot wine bupam kanjo. Yiyafmoyantn tfit kto yironamoya yatit yiho finy bofinymota.

[†] ^{9:18:} Nhai be ndar yuht bbinysoft tohyuk yima bugam yak batirmomm. Nhai. Be 1/3 kforpatn nd husfirpa shrmn fak batimomm. * ^{10:7:} Nda veskothu wom kfo nuhas mrokfom. Bingot Bro Nkifrar kfo tndh nuhasmorm profetm ndar bbinysofti mount rhuruha nefm. Bro Nkifrar nhai kfo tndh hik buga nuhasmorm. Be inji kfonni hanymourm. Profetm nd Bro Nkifrar kfo tndhni hanymo mrokfom wanymohat rom duka memoum, “To nda Bro Nkifrar kfiwa mrokfom to finji kanjo mfrfnahruhatm htiruhanomm?” Bok dukefmpno rhumom. Ndnettnd 7-yuk mounmotrhu fumrrpno nd Bro Nkifrar kfo tndh furatamo tndhthu tndh mrokfot nd yiha mfrfnah bugarahm.

¹¹ Tfit kfo memoma, “Tfit wom nfri profet mrokfom wawandfatwa. Bro Nkifrar ndar bbinysoft yorhwa kantrimi yo nd kantrim tohwa met yindarim yo kfo pthiwa wonk wonk yarmumammi yo nd yarmumam kfiwa kmiroh kingm yak htaruha yuham, nd ndroh profet mrokfom wawandfatwa.”

11

Hus profetf pthamo mrokfom

¹ Yo nd yimam yak hafotyuk yak hafot mis hemoma. Nd yak hafott hehato kfo memoma, “Nd yak hafot mis wayaknikahnn wahta hafottwanr Bro Nkifrarhu temperri altar. Yo nd temperr lotu hakuta met yindarim wathomnatwanm. ² Mirahn nd briahako temper rim fnahnit yorhwa kmi kmi rhu rifinywa rifiny swirl rpata ayak hafotanm. Nd tkitr yak trohnikfot. Nd tkit nmbuhar yima tangim kakitohwomr. Kto nd yima tangimn 42 yamm Jerusalemr yihom yahot myahotrahm. Ndnettnd tkitr yak trohnikfot.* ³ Nd wan tausen tu handret sikisti (1,260) yiham yima tangim Jerusalemr yakitohruha yihamn, nanhu mrokfo pthayuk hus yimaf kfo tkrurafrhotanf nur dagu nmbiyam hmbrenihato nanhu tu yafothet mrokfot yi kfo ptharahf.”

⁴ Ndar bbinysoft yakinohwa Bro Nungothetrhu nyngatikko tohwa hus olif tihami hus lam ginyt hatohet lamfto ndef nd hus yimaf. Rofn tohwoft nd tkitt.† ⁵ Yimam sinyahato mirahm nd yima husf finji anomof, nd yimam be turoh nohyuk tkitt yirahm. Rofhu tng yuhat mfunu fnahyuk kahtn rim yahot-akrahm. ⁶ Rof wonk wonk hingrnefroh hingrnayuk bbukefr kakitohwof. Kangf buriohr yak yembindtafhato Bro Nkifrarhu mrokfom afo akfo ptha htfasno, inji narfot. O kangf tek yinham ayak kekutkahtnonm akkupatam o kangf finji finji anakahnonn wonk wonk krhopam bbinysoftu met yindarim ayakm, rof inji narfot.

⁷ Rof mrokfom kfo ptha htfas hany-ruhafn bi nd hingrneft mhingrna tmbhift, ee bt tor nd kfe rawofmo muhr tohyuk tndhr fnahhato nd yima husfpno nnaknihato tndhr sinyaruharn yejborfarahrf nd hus yimaf. ⁸ Yejborfa htaniruhatr tufhu Bror washato kihegirmo taunthu bro yihota nafif yuhatn rofhu thatipm htarahmf. Nd taunthu yimam niwa nefm Sodomthu yimam namoa nefm kanjo yimam niwatm kuta nhombra kangmt Sodomet yo Ijifthu yimam mrokfo hanyjborna-hato tat yima yuhum yakmoa kanjo nd taunthu yimam niwatm kuta kangmt Ijifet. Inji kuta nhombrewumt nd taunt. ⁹ Nd hus yimafhu thatipm bro yihota nafif yuhat rhuruhatm husfirpa yihami hafkfst wonk wonk kantrim, yo rpa mrokfoti rpa nkifra tndh mrokfot yakinohet kmim yo wonk wonk yarmumat kfetm yo wonk wonk thetm yihom htini mhtinirahmm. Yo nhai kfo yakioruhatm yimam nd hus yimafhu thatipm yaknihato yopneft. ¹⁰ Nd hus yimaf inji nohruhatf bbiny-softhu met yindarim inji hti yindhor-ruhamn kfo mirahm, “O hifa nd yimaf bi was hehurmomf. Rof tohmofn bbinysoftu met yindarim faso faso fak bebhnamofm.” Nd yindhorpampno yemro burwat htahato ye yindhor-ruhamn wuskam tawo tawo yihom nahiayak mnahiyakrahm.

¹¹ Nd husfirpa yihami hafkfst tohnihato Bro Nkifrar tfit ssfoneft tfit hemotrf tfit mfenywomofn sinya tohmof. Tuhant yindars inji htimomn tuha yafotha duhatm tohmom. ¹² Nd hus yimaf tohmofn wanymof wom tngt yura hefenko nakumof. Nd tngt mfro naku memotf, “Asha yuwa muhfn.” Be nakumoff gribpam fknemofn gribpam hamuhmomf. Nd rof hti dbnotmoa yimam, rom tohhato htiyaf hanymomf rof gribpam hamuh-mohat. ¹³ Tu nd rof muh hanymo fijo bro nunes tonehato taunthu wom kuny rmonm teh tutmottm kunym wuyoh-nafurnyehato 7,000 met yindarim frtasf hmbremotmm nohmom. Ndwom teh fnah hanyukm rom inji hti yakrmi-hato hefenr rhuyuk Bro Nkifrar kfo yuta grha yindhormomr.‡

* ^{11:2:} Yammn 42 yamm kfomom. Rpa rpa yiharoh thomnafat 1,260 yiham. Tfit gunyjimm husfirpa yuht gunyjimmi hafkfst. Nd mrokfot htikfot Danier 7.25 yo 9.27 yo 12.7. † ^{11:4:} Ndar veskfothu wom yak tkaf mrokfom htikfot Sekaraia 4.1-5 yo 4.10-14 ee Revelesen 1.12. ‡ ^{11:13:} Nd taunt tohyuk kunym nunes teh tutmom, 1/10 kfot teh tutmot.

¹⁴ Nd dobir yura mount hta hany-hato kfomo wom kfo wayeye mrokfo nmbuhathu wom krhopam inji rhuni-motm htimoanm. To wawanyko, mirahko ka be bi tot wuroht. Nhai. Tot tu wuroh kfo wayeye mrokfothu krhopam bi brbohwom.

7-yuk mounmotrhu fumrr fumrmo yuhat

¹⁵ Nd 7-yuk mounmotrhu fumrr fumrmotrr, ee tfit hefenko wurhuyuk mounmotm mfro kfo ptha rrafo memom, “Ndar bbinysof bugat be bi tfit nmoh Brori yimam nrfa htiyakyuk yimar nmoh Bror yak htamor, be bi rofn ndar yuht bbinysof bugat kakitohwoft bi. Be rorn King toh nkifranirahr.” ¹⁶ Yo nd 24 nungothetm sia kingthu nyngatikko rhu htifasmom, bangu myukna rmonmomn bbinysoftn mfha wasi bugahato Bro Nkifrar yuta yur boyurhato, ¹⁷ kfo bruttna memoum,

“Broye, bro bbuka nanyjaret Bro Nkifraye,
ariha tohwo yo bingot ritoh-ngotakmo.

Ni bi bro bbukeft yaknimontn bi kinge.
Ndnett n nom kfo yindhoro-wonomn.

¹⁸ Ninh namburparoh mfnah yihar bi niarotr,
Bro Nkifrarhu mrokfot hik duha yima tangim
inji wanyhato namburwomr.

Arihart bi noheh yimaroh kothu toh yihayer.

Yo arihart bi ninhu hingrna yima profetroh ttha yihayer,
yo nd yufetmi yufapa duha met yindarim
ni duka yakrmihato ninhu yinhit tohwam.

Arihart bi nda bbinysoft yak bebmo yimaroh yak beb yihayer.”

¹⁹ Nd sia kingthu nyngatikko wasi rmonhato kfo bruttnamo yimam kfo bruttna buganimotm ee tfit htimoa hefenrhu temperr tfanyetr rhumor. Bro Nkifrarhu bokis kontrakkfot be tafontn hmbrohnat rhumot. Yo hti-moanr toh fnhur mano yohne mano yohnemour. Tohr yohnemoahat yuht nyungu mirefetr yimour, yo nunes tonemot yo buriohr rpat aiskfotpno rpa fawihnamour.

Satanri rorpno hingrnayuk yimam be inji rpat mibatinimo yuhat

12

(*Sapta 12-20*)

Jonr metti yarh mugrr htimo yuhat

¹ Yura mounko wuhti hany-moya wom work nef mift mfnahmot. Tu yima mfha danyr frtnehyuk neft mfnahmot. Hti hany-moya wom mett marr hmbre hanymot hmbresham kanjo. Yo yura yamt wuraf wahtamotf. Yamt nhombramot wura wahtayuk gajis. Yo 12-pela gunyim kraunkfot kanjo mfhat hmbremotm. ² Nd mett bi yonfanett hti hanymoyant. Nd yonfant bi fak yirona hanymott. Yon yak rphamohat nhai tau ttifarmot. ³ Ndt inji htini-hany yo tfit wom wonk nef mift mfnahmot. Yura mounkorppa tfit wom kkupa fnhuyet yonmari yarh mugrr hti hanymoya. Nd yarh mugrr htimoanr 7-pela mfhetr, yo 7-pela kraunkfot hmbremor, yo 10-pela inyaru bim mfhat toh htifasmomr.

⁴ Tfit htimoa nd yarh mugrr kinyoft yiho sinyahato mounthu guny moun nmbuhart kinyofe frrasafmotrr bbinysofko yohnemor. Nhai be yuht guny mounr frrasrmorr. Nhai. Be 1/3 kfot frrasmotr bbinysoft yohnemor. Yo htimoanr nd yarh mugrr nd yon yak rphamoa mettpno brbo tohhato hajoh hasomour. Nd mett hiayuk yonrhu yanyeftn toh hajoh hasomour. ⁵ Nd metthu yonfant yon yindarir hiyaumot. Nd yonrn Bro Nkifrar kfomor kingr tohhato kingm yakinohwa miyef kanjoht ain nmbuhart yakinohhato kmi kmim rorhu yinhitn rhukfot. Nd yonr nurnimohat nd yarh mugrr memor ka korhwor yeruhanr, to nhai, Bro Nkifrar tuhafunanimorr hanymorr tu Bro Nkifrar rhuhato bbinysoftu met yindarim yukatohwako. ⁶ Nd yonrhu hiyau mmemt rot nhaf

fakrmenimot. Yakrmanyihato yimot tu yima toh duha tkitt. Ndko fak htatahemort rothu yi tohyuk tkitt. Nd tkitt yi toh-mott 1,260 yiham rorhu tirtn rhumot.

⁷ Ee bt tot tfit htimoya hefenr bro yahrt tohmot. Maikerri rorhu moun-motm sinyamomn nd yarh mugrrhu mounmotmpno mnatuhaknimom. ⁸⁻⁹ Nnahany nnahany-momn nd yarh mugrri rorhu mounmotm nhai toh bmtarmom. Nnahanysi nnhanysihato be wom yarh mugrri rorhu mounmotm mfrna rmonmom. Mfrna rmonmotm Bro Nkifrarhu mounmotm sinyahato nd yarh mugrr yakmomr watumomr. Nd yarh mugrr to tor nd bingot ritoh-ngotakmo tndh Satanr. To rorn ndar bbinysoft tohwa mett yindars frnheh bonhehwatrm fasoh fasoh nefm newum. Bbinysoft watumohat rpat turhu mounmotmpno rpat watumomm.

¹⁰ Nd Satanr watushafnimotmr tfit yura hefenko wom tngt wanymoyant kfo hany memot, “Nmoh Nkifrar bi nrfa hbbakmornom. Nd rorhu bbukeft bi tafontn htimonomt. Bi rorn king tohwor. Yo yimam nrfa htiyakyuk yimar Bro Nkifrar yak htamor, bi rorn kakitohwort ndar bbinysoft. Nd Satanr Kristen met yindarim nayuk tamoh nefenm yudbat yaknihato Bro Nkifrapno mkfo nuhashemoar be bi yak tumakhato watumorr. Nhai tfit yihof href Bro Nkifrapno toniyakhato Kristenm nayuk nefm rorn yudbat yaknihato Bro Nkifrapno hanyakni-ruhatrm. Bibe. ¹¹ Nmoh Kristen bratam nhai turoh bbinysoftthu neft dukarmom. Nhai. Rroh dukeft duka memom, ‘Tamohm tfit wom duka yakrmeruhanom? Nmoh fasoh nefm bi Jisasr nohhato rorhu kkupamn nmoh fasoh nefm fuk kifsa thumorm.’ Inji dukahato gutnius mrokfot rom tohhato kfo pthamomt, nhai yakrmer-mom nohneft. Inji namomn nd yima Satanrhu kfra inyarut fak nohmomt. ¹² Ndnetnn ni hefenn yo niko froh frohko yura hefenr tohyukko, niko yindhorkfot. Yo to ni bbinysofn yo ni marombn nifn dukefmpno warhutwafn! Satanr bi tor bi nifnpno mitohwor. Rorhu yak thuyuk yiham bi brbo-hhnewatm bro namburpampno bi korhr.”

¹³ Nd yarh mugrr bbinysoft watu-motmr tur inji mhti namburnihato nd yon yindarir hiyaumo mett rim hambrak mhambrakmort. ¹⁴ To nhai. Rot bro munngu wondhmborhu birnam hiyafmotmt nd birnam yak-nihato fafunanimot yima toh duha tkitko. Ndko fak htatahemomt rothu yi tohyuk tkitt. Tri yia sikis mun rroh tirmn rhumot. Ndnettn nd yarh mugrr nhai finji narmort. ¹⁵ Nd yarh mugrr wom yuhat nhombrathato yakrmanyimott tfit nd yarh mugrr hnu bu rifhut tng yuhat takeyafmotrt nd bu rifhut tone hikmott nd mett. Memor hnun yiruhatn tarhotnirahtt nd mett. ¹⁶ To nhai. Bbinysoft metthu mkuko tohhato bbinysoftthu tngt nhnamottt nd burifhut rotn fut knafmott. ¹⁷ Be nd yarh mugrr nambur kih bugahato tfit yimorn nd mett hiyaumo wom yonmpno memor annayur tinga. Nd yonm to Bro Nkifrarhu boririfhu mrokfom hikkhato Jisasrhu gutnius mrokfom kfo pthahato hikwa yonem. To nd yonmpno memor yihato annayur tinga. ¹⁸ Be nd yarh mugrr nhom-brathato tuha maromb thmbthu nungurn toh hasomor.

13

Hus kmi yarh yemrof htimoyuh

¹ Yo tfit htimoya wom kmi yarh yemror nndo mikrnysik furat yiro tek yuhat mfnah hanymor. Nd kmi yarh yemror htimoyanr 7-pela mfhetr yo 10-pela inyaru bim toh htfasmomr yo 10-pela kraunkfom hmbremor. Nd kraunkfom Bro Nkifrarhu yufat faso faso riyuta ayuta rindho borindho hanyet yufam hta hanymomm. ² Nd na hti hanymo kmi yarh yemror, lepat kanjo ruhet yemror hti hanymoya. Nd lepatrhu wuram bearhu wuram kanjo rhumomr, tngtne laionrhu tngt kanjo rhumotr. Yo ndwom barkof htimoyarh mugrr, ror yi yaknimorn nd ror yakitohyuk king hingrnefthu hingrnayuk hingrna bbukeft, wom kmi yarh yemrorn hi hanymor. ³ Ka nd kmi yarh yemrorhu wom mfhat ka frtekrmotmt nd mfhat nohmot. Nohmotn ka tfit thu nany-jhomotmt mfenyjwomot. Thu nany-jhomo tkitthu fhu gifarpat rhumot. Nd ar bbinysof bugathu yima bugam nd kmi yarh yemrorpno rhumo neft htahato mrokfo duhatm rhuhato rroh dukefmrorrparn htahato rorn hikmom. ⁴ Wom yarh mugrr yakitoh-moa king hingrnefthu hingrna bbukeft wom kmi yarh yemror hemo yuhat bbinysof thof bugam htihato nd

yagh mugrr to be rroh lotuyuk nkifrar nhombramor. Rorn rihikakhato rilotu-yakmom. Yo ndwom kmi yagh yemror, ror to inji buga yagh mugrr kanjo inji rilotuyakhato kfo memom, “Frohm ndar kmi yagh yemror kanjo yorhwam? Frohr rorpno nnarfor?”

⁵ Nd kmi yagh yemror yakmo king hingrnayuk hingrna bbukeft, Bro Nkifrar afo yiham hemorr. Yiham hemotrr nd kmi yagh yemror kfo grha sinyahato Bro Nkifrar kfo tfar botfar thumorr. Bro Nkifrar nhai yak tongnrmor. Be tombn marsisa-motrr 42 yamm hemotrr rorhu nefm namor. ⁶ Bro Nkifrar kfo tfar botfar-morr, yo Bro Nkifrarhu yufat, yo rorhu kmit, yo rorpno hefenr tohwa yimam faso faso kfo rindho borindho-morm. ⁷ Bro Nkifrar kfo yakiomotrr nd Bro Nkifrarhu met yindarimpno nnamohat rorrpar sinyahato yiho hathumorm. Yiho hathuhato rorn king tohhato rorhu yinhitn toh bugamom ndar bbinysof bugathu kantri bugam yo wonk wonk mrokfot kfet kmiya-kmim, yo wonk wonk thet kmiyakmim. ⁸ Ndar bbinysof bugathu yimam nd kmi yagh yemrorn loturahm. To fitoh fitoh yimaroh yufam korhm nd toh nkifraniyuk yimaroh yufam yorhwra rfa borngtn, nd yimarpam nhai nd kmi yagh yemrorn loturuhatm. Bro Nkifrar mounti bbinysoft tafi hingrna hta duha nd yimaroh yufam bi rhumom nd rfa borngtn. Nd yimaroh yufam yorhwra rfa borngt, to nd wasmo Sifsif Yonrhu rfa borngt.

⁹ Yimbhindangeteko, ndar na kforuha mrokfot wawanywako: ¹⁰ Bro Nkifrar bi kfir wom Kristen yimar kalabus yinyeft, nd yimar kalabus kitr. O wom Kristen yimar Bro Nkifrar bi kfir bainate tmbhoneft, nd yimar bainate tmbhiwumr. Ndnettn Bro Nkifrapno tohyuk met yindarim bi ndhtet nefm mfnahwatom htitwomm, nd met yindarim toh bmtahato Bro Nkifrar yakitoh kihkfot.

¹¹ Yo tfit wom inyaru bi hatohet kmi yagh yemror hti yak hanymoyanr yiro bbinysof yuhat mtabbo frnah hanymor. Sifsif yonroh bim kanjo hus bif tohmofr mfhat. Tng ptheftne yagh mugrrhu tngt fakmor. ¹² Nd bbinysof yuhat mfnahyuk yagh yemror to be ndwom maromb yuhat mfnahyuk yagh yemrorpno mtohaknimor. Womr inji htihato to be nd ror hingrna hasoyuk hingrnayuk hingrna bbukeft nafak nhtamoff. Nayak nhtahato ndar bbinysofti bbinysoft tohyuk met yindarim kfo tkrurmorm ndwom tek yuhat mfnahyuk yagh yemrorhu lotu-neft. To rorn mfhat frtekrhato nohmotr tfit yak nanyjhoayfmotmr tfit sinyamor. Yak nanyjhomo tkithu fhu gifarpat rhu hanittr. ¹³ Nd bbinysof yuhat mfnahyuk yagh yemror wonk wonk mirakerm hingrnamourm. Met yindarim toh fukatoh hanymom wom bro mira-kerkfot hingrnamort. Yura hefenko wukfomot kaht yura hefen yuhat wuyohninehato bbinysoft misuhmot. ¹⁴ Bro Nkifrar kfo yakiomotrr wom barkof mfnahyuk yagh yemrorhu nyingampno nd wonk wonk miraker-kfot hingrnamourt. Bbinysothu met yindarim yuwi nd mirakerm hingrna ngeh bonhehmourm. Met yindarim kfo memorm, “Nd bainate mfhat frtekrafhato minohafmo yemror watth nhombrakahkomn ndr wakfo yindhor grhatwako.” ¹⁵ Nd yemror tth nho-mbranimotmr tfit Bro Nkifrar kfo yakiomotrr nd bbinysof yuhat mfnah-yuk yagh yemror sinyamorn nd tthmo yemror ssfoneft hemotrr tngetr rhuhato pthamour. Yimam lotu duha yimoumr, wasmourm.

¹⁶ Nd bbinysof yuhat mfnahyuk yagh yemror kfomotr tirmifkorhof tir gramtipmn makm hta hanymomm o womnam nyimbikmn hta hanymomm. Nd yima fura bofuram o yufetm, maru wuss yura ruhetm o yima furapam, slefm o toh furet yimam makm hta buga hanymomm. Nhai womr rim tohtarmor o womt rim tohtarmot. ¹⁷ Yimar o mett nhai ndhtet yagh yemrorhu yufat o rorhu yufathu nam-bakfot htarfomr o htarfomt be nhai nd yimar o mett wuska wiknakfot o wuskam rorpno o rotpho yimam yihato wuska wiknanef. ¹⁸ Nd nambakfotu yimbu yuhat be nhai wom yima furar yakruhatrt. Nhai. Nd nambakfot wom yimarhu nambakfoyet ndnettn yimar tu yima duka tunguneter, nd nambak-fotu yimbu yuhat hti nhtahato yak-kfot. Nd yimarhu yufathu nambakfot 666

nambakfoyet.*

14

Sifsif Yonrpno tohmo met yindarim

¹ Tfit wufukatohmoyanko, wuhtimoya Sifsif Yonr yura Saionrn wutohmor. Rorpno 144,000 met yindarim wutohomm. Nd met yindarim bi nd Sifsif Yonrhu yufati nd Sifsif Yonrhu Yifemrhu yufat bi rroh nyimbikm rihtamomm. ² Yo tfit yura hefenko wom mir nadidarefm wanyak-moyanm rim mirta mmirtamoum. Womnam bhur mir nadidarwa kanjo inji wany mirmoa, yo tfit womnam tohr nyungu mirwa kanjo inji wany mirmoa, yo tfit womnam yimam gitampno win-dohwa kanjo inji wany mirmoa. Inji inji wany mir bomirmoa. ³ Nd yimam windohmmom, Bro Nkifrarhu sia king-kfothu nyingatikko yo husfihus foh nunga kanjo ruhet shriroh nyingako yo nungothet yimaroh nyingako mtob hanyhato nfri windohr fakmomr. Nd windohr nhai wom yima furam tawi-safrmomr. Nd tu 144,000 met yinda-rim bi Jisasrhu kku futn yak nhafo-hetm, romrpam nd windohr tawisaf-momr. ⁴ Nd yimam nhai bi metmpno hwihamo bi metm tahifatrmomm. Nhai. Tu dborior yimam fakmor.* Fitoh tkit tkitm Sifsif Yonr yinyeft, nd yimam wuhik ahikwomr. Nd yimam ndar bbinysoftu yimampno toh hasetmn Sifsif Yonrhu kku futn yak nhafohmottm be bi tom tufhu wurampno brbo toh tkafyuk met yindarim. ⁵ Rom nhai wom yiha kfo nheh o kfo furawonrmom. Nhai. Rom be tu nhai wom mrokfen duhatem.

Husfirpa moummotm kfo pthamo mrokfom

⁶ Yo tfit wom moummotr htiyaf hanymoyanr buha mountfafuna hanymor. Wom tu yafothet mrokforoh kfo pthaneftn yafuna hanyhato mrokfom kfo ptha nuhas hanymorm ndar bbinysoft tohyuk yimam, wonk wonk kantrim, wonk wonk kmiya-kmim, wonk wonk themt mrokfo mrokfom kfo nuhas fnahmorm. ⁷ Kfo hany memor, “Nd kfohna kfohnamo yihar be bi niaror, be bi Bro Nkifrarhu kot yakinohhato yimaroh kot toh yihayer. Ndnetkomn niko Bro Nkifrar duka yakrmi hanyhato rorhu yufat kfo yindhor grhakfot. Bro Nkifrarn niko lotukfot. Rorn hingrnarmorm hefenr, bbinysoft, marombt, ee nd rhu htfaswa bu yinham.”

⁸ Tfit htiyaf hanymoyanr wom moummotr womr fafuna hik hanymor. Nd moummotr womr yafuna hik hanyhato kfo hany memor, “Bro taun Babilont be bi wuyoh nafuryakhato wahtamot! Be bi wahtamot! Nd taun Babilonthu nas hohodeft tuhant yindars mhti wofnnihato yimam me-mome yukuteh yiramn brnewum.”†

⁹ Yo tfit wom moummotr fafuna hikmorf wom husf. Rorn yafuna hany-hato kfo hany memor, “Fitoh yimar nd yarh yemror yo nd yarh yemror thh nhombra htayet yifonr, ndrn lotuhato makkfot nyimbiktn o tir gramtiptn htemr, ¹⁰ nd yimar Bro Nkifrar yak tkrurruhatr wainpam yerahr. Nd wain bupam to Bro Nkifrarhu bro krho namburpayem. Nd yarh yemror lotuyet yimam tengit wunaruha nambur bupayem. Nd yimam be tu yiro sarfa tahim yukrwa bro kah rifhut yirahm. Bro Nkifrarhu moummotmi Sifsif Yonr yukatoh hasorahmm nd bro krhopam yimam yak thoft. ¹¹ Yo nd yimam krhopam

* 13:18: Bingot Hibru mrokfoti Grik mrokfot wandfamohat nhai nambakfot htarmoam. Nhai. Nd rpa rpa letakfom ndm htamoum nambakfot. Reta ‘a’ kfot ndt rroh namba 1 kfoyet. Reta ‘b’ kfot namba 2 kfoyet. Inji hingrna hikmoum. Barkof letakfot ritimaknikfot barkof nambakfotpno. Nd namba 666 kfot bok bro duka tungunet yimam bok dukefm kfomotnd namba 666 kfothu yimbu yuhat. Bok duka tungunet yimam yak nhtamohat kfo memom, Jonr ka Sisar Neror kfomor. Rorn Romroh kingr tohhato Kristenm rorn fak beb bobebmorm. * 14:4: Grik mrokfotn kfomot nd metmpno yihato metmn tahifatneft. Tfit bro duka tungunefet yimam duka memom nd kfo nhombra mrokfoyet. Yimam Bro Nkifrarhu nefm hik marnyahato nhai fasoh nefm na duhakahm, tom nd yimamn nd mrokfot kfomt.

† 14:8: Jonr ndar gonborngt wandfamohat bro taun Babilont bi yohne buga-niyettndar gonborngt wandfamort. Ndnettbn bok duka tungunet yimam kfo memom nd Babilonthu mrokfot nhai tu Babilon mift kformor Jonr. Be nd Babilont tohmo yimam namoa fasoh fasoh nefm, ndm yakhato wom kantrim fasoh nefm nahato Bro Nkifrar hti namburwa nmbuhathn kfo rhtimor. Womm kfo memom ka kantri Romr kfomor (htikfot 1Pita 5.13 yorhwa mrokfot). Yo womm duka memom nd Babilon yufat kfo rhtimort Kraisri rorhu sioskfot yimam hti namburwa yuhatn.

hiruha kah hip rifhur, be inji nd kah hip rifhur yiha yiha toh haso-rahr. Nd yimam nd yarh yemrorhu makkfot yaketm yo rorhu ruheft tth nhombramo yifonr lotuyetm rroh krhopam nhai yihom tohaf hanyruhatm. Be inji yihof href yifung marm krho-pamn toh hasorahm.”

¹² Ndnettn ndhtet yihar Bro Nkifrarpmo bi rim tohnihato Bro Nkifrarhu boririfhut hikhato Jisasrhu mrokfom hiket met yindarim, Jisasrpno frtkaf kihhato toh bmtakfot.

¹³ Tfit wom tnkt yura hefen yuhat wanyakmoyant kfo hany memot, “Wom mrokfot wawandfa wamitwa, ‘Ariha tohwa yimam yo kto tohruha yimam Bro Jisasrpno frtkaf kihhato mfnohm ayindhortwam.’ Yo tfit Bro Nkifrarhu Yafothat nd mrokfot kfo yakio memot, ‘Uwa, ndt tu kfoyet. Ayindhortwam. Nd yonmari yonmari hingrnfom rom hingrna minysaf hasiwami krhopam toh hasiwam myak htanihato mrhu witarahm. Rom kot mtob thoft nd tum nahnayuk dborioh nefm tohnhorahmm.’ ”

Bi bbinysoftu yewuri yak yibon yihayer

¹⁴ Yo tfit fukatohmoya, htimoya ganyom gribpam. Nd gribpamn yima mif thet yimar nd gribpamn rhumor.[‡] Gor kraunkfot mfhahn tohwot. Hanku namburet karoht tirtn tohwot. ¹⁵ Yo tfit htiyak hanymoyanr wom moun-motr hefenr yorhwa temper yuhahn yarim fnahnamor. Yarim fnahnehato nd gribpam rhuyuk yimar mfro kfo tkrur hany memor, “Bi yewuri tmbho yibon yihayer. Yewuri tmbhoyuk karoht wayakkahnn yewurim watmb-haktwanm.” ¹⁶ Be nd gribpam rhuyuk yimar yewuri tmbhoyuk karoht yak-hato bbinysoftu yewurit tmbhak-nimort.

¹⁷ Yo tfit nd hefenr yorhwa temperr rhuyuk wom mounmotr yewuri tmbhoyuk wom namburet karoht yaknehato fnahnamor. ¹⁸ Yo tfit wom mounmotr yura hefenrh altatpno toh tanyhato yarim fnahnamor. Nd altathu kaht to rorn kukatoh hasomourt. Ror sinyahato ndwom namburet karoht yakinhet mounmotr mfro kfo memor, “Bbinysoftu wain suhm bi huktewamn bi yak yibon yihayer. Ndnettn nd ninhu namburet karoht wamyak-nikahnn nd wain huk dmm watmbho rmon hanynm wom tkittn.”

¹⁹ Be nd mounmotr wain dmm hok tekrak hanyuk karoht myaknihato yohnemorn nd wain suhroh wain dmm hok tmbho hok tmbho hok tmbho rmon buga-mormn tfit wain yukha yahot tkbotk-yuk tahiye hingrnayet tenktn kmbre rmon bugamorm. Nd wain yukha yahot tkbotkyuk bro tahiye hingrnayet tenkt Bro Nkifrarhu namburpayem.

²⁰ Nd wain yukham yahot tkbotkyuk tahi tenkt nhai yiro tauntn hingrna htarmomt. Nhai. Briyaha kmi gna thmbefkorn hingrnamatmt btn nd wain yukharoh kku bus tone yakinoh-mohat wom tkitt frkamt bugamott. Nd kamtmo tkithu yuke rifm 300 kilomita. Yo yima toh nhombraneft yengongfatpno mtohkfot.[§]

15

7-pela mounmotm yakinohmo 7-pela bro krho nmbuham

¹ Yo tfit wom bro neft yura hefenko wuhtimoyant. Na nd neft wuhtimohat yafotha duhata rhumoya. Htimoya 7-pela mounmotm tuhan yindarioh hayuk 7-pela krhopam fakitohmom. Tom tu wuroh krhopam tuhan yindarim yakruham. Nd krhopamn Bro Nkifrar met yindarim he tingniruharn rorhu krho yima yuhur mirhurahrr. To nhai tfit wom krhopam tfit wom htaruhatrm.

² Yo tfit htimoyant wom bro shrt, memome glaskfoti kahtpno hingr-nayet marombet. Yo nd met yindarim nd yarh yemrorhu yufat nyimbikm hta duhatm yo rorhu ruheft tth nhombramo yifonr lotu duhatm htimoyamn nd glaskfoti kahtpno hingrnamo maromb

[‡] 14:14: Danier 7.13 yorhwa mrokfot htikfot. [§] 14:20: Bok yimam ndar Bro Nkifrarhu rfa borngruh mrokfom hti hik bohikwa yimam hti hikhato duka memom nd kfomo taunr, Jerusalemr kfomot. Yo nd kkut tonemo kilomitakfot, Grik mrokfot htamom 1,600 stadia. Tfit nmoh yuteftn 300 kilomitakfot. Ndt be inji kfiwunom, nhai tu tawisaf marnyakahnom nd Jonr kfomo 1,600 nambakfot ka 300 kilomitakfot kfomor o nd 1,600 nambakfot wom dukeftn nd nambakfot htamort.

thmbtn Bro Nkifrar hemo gitam yakitohhato tohmom.*³ Yo Bro Nkifrarhu hingrna yima Mosesr, yo Sifsif Yonr wandfa-hato windohmo windohr ndr fakmom. Nd windohr inji yimor:

“Broye, ni tu hta nngrajohet Bro Nkifraye.
Ni tu wonk bbuket hingrnefm hingrnewun.
Nom inji hti thoft mfham danyr frtnehwom.
Kmiyakmiroh kinge.

Ni nhai wom nefenr rim hta mhtakahnr o kfo furakahnr. Nhai.

⁴ Broye, ninrpa tahi toht tohwo.

Ndnettn tuhan yindari bugat ninrpa yakrmihato,
 ninrpanhu yufat yutahato kfo grha yindhorkfot.
Ninhu dborioh dborioh nefm tafont yorhwatm kmi kmim htihato,
 ndnetmn ninrpanpno yihato loturahm.”

⁵ Ndm inji htiyafoni hany tfit hefenrhu ser kuny rmonthu tu Nngrajoh Hnaru Gnanhehr bi tfanyetr hti hanymoyanr. ⁶ Nd 7-pela moun-motm met yindarim yak bebyuk 7-pela krhopam yakitohetm nd rmonthu tu Nngrajoh Hnaru Gnanhehr yuhat toh tanyhato fnahnamom. Nd mounmotm tu banuhah ganyom fnhu ganyomet rmontham tabuhtanehato yarim toh-mom. Yo gore hingrnayet let bando tham mondum nyuh dbkafnamom. ⁷ Nd foh nunga kanjo ruhet husfihuhs shriroh womr, 7-pela dis gorm yak-mormn nd 7-pela mounmotmn hemor. Nd dis gorm nd toh nkifraniyet Bro Nkifrarhu krho namburpam furkih-momm. ⁸ Nd 7-pela namburpam ruhet dis gorm 7-pela mounmotm hemotr nd tu Nngrajoh Hnaru Gnanhehr Bro Nkifrarhu nuka bbukeft thu dbothat-motr hipeft kanjo. Nd bro nuka bbukeft tu Nngrajoh Hnaru Gnanhehr yakmohat nhai bi yimam fknenikfot. Afo nd 7-pela mounmotm yakitohyuk 7-pela namburpam ruhet dis gorroh hingrneft bi hingrna buganimte ee btn yimam fknenikfot.

16

Bro Nkifrarhu namburpam ruhet 7-pela dism yak nengotafmo yuhat

¹ Nd 7-pela namburpam rhumo dism mounmotm yakitohhato tohmotm tfit tu Nngrajoh Hnaru Gnanhehrpno wom tngt wanymoyant kfo hany memotm, “Nd niko yakitohwa 7-pela namburpam ruhet dism bbinyosfkorn wayak nengotafkomm.”

² Be nd mounmotm inji wanyhato barkof mounmotrhu krhopam ruhet dis fak tengotafmotrt bbinyosfko fawihnamot. Nd krhopam yak tengo-tafmotrm bt nd yarh yemrorhu mak-kfot htayet yimam yo rorhu ruheft th nhombramo yifonr lotuyet yimam wonk wonk hunt, kutt, nhai kuken-hato yakmotm.

³ Yo tfit husyuk mounmotrhu krhopam ruhet dis yura bro marombtn fak nengotafmort. Marombtn yak nengotafmotrt, nd yuht marombt noheh yimaroх kkut kanjo fnhu bugamot. Be nd marombt rhuyuk tamoh tamoht noh dborha witamot.

⁴ Yo tfit husfirpehyuk mounmotr yakitohyuk namburet dis bro bro tekman yo bro tek yinhamn fak tengotafmor. Be nd bro bro tek, bro tek yinham kkupata bugamom. ⁵ Yo tfit nd tek toh yukatohwa mounmotr wanymo-yanr kfo hany memor, “Bro Nkifraye, ariha tohwo yo bingot tohmo. Ni tahi toht tohwo. Ni niwa nefm tu be kak hik marnyewunm, yo tu dborioh dborioh mife. Nd yimam ni bi tunn rhuhato hti yimbu hik bohikhato ni kfiwohat rroh krhoparoh yakneft nhai faso kfo bebbahn. Nhai. ⁶ Nd yimamn ninhu profetm yo ninpno tohyuk met yindarim wasmomm. Ndnettn tawo kkupam bi yahukatnm bi tum futwomm. Bt asom afo agnngtatm.” ⁷ Tfit altat-pno wom tngt mfnah hanyhato kfo hany memot, “Broye, ni tu hta nngrajohet Nkifraye. Ni tuhan yindarim yak gnngtatwohat rroh nefm hti nhta-hato hifa kak gnngtat twanhiwunm.”

* 15:2: Bok mrokfom ndar saptakfot yorhwam htirahnm Mosesrhu tndh mrokfom kanjo. Mosesr Isrerm Ijift yaknihato Bro Nkifrar kfouk kmiko hanymohat, Ijif thofm bok krhopam yakhato Isrerm fafuhafmom. Yo Isrerm bro marombt rim rhu mrhuhato buha yau hayuknimohat, mano tek thmbko rim tohhato Mosesri Isrerm wom windohr yakhato Bror windoh yindhormomr. Nd tndh mrokfot htikfot Kisim Bek 15.

⁸ Yo tfit husfihuysuk mounmotr yakitohmo dis, marrn tengot wuna-motr, marrhu nukeft Bro Nkifrar mfro hip rifhur hemotrr marr kahm kanjo tagunahato yimam kandhi guna wurasohmorm. ⁹ Nd marr nukeft mfro tagunahato yimam kandhi guna wurasohmotrm Nkifrarhu yufat faso faso riyuta ayutamomt. Nd Nkifrar, ror tu bro bbuketrn rorn kakitohworm nd yimampno yorhwa krhopam. To rom nd nefm htimohat to nhai tfit yima yuhum yak kekuthato Bro Nkifrarhu bro yufat tfit kfo yindhor grharmom.

¹⁰ Tfit namba 5-yuk mounmotr yakitohmo dis rhumo krhopam yarh yemrorhu sia kingkfotn fak tengot wunamor. Be nd yarh yemrorhu kingdomfot yifungt rhumom. Nd yifungt yo nd yimam bi yakmo krhopam yo hunti kutt htihato kusmm ridbfa hatohmom. ¹¹ Nd rom yakmo krhopami fhum htihato Bro Nkifrarhu yufat faso faso riyuta ayutamomt. To rom nd krhopam htimohat to nhai yima yuhum yak kekutrmomm.

¹² Yo tfit namba 6-yuk mounmotr yakitohmo krhopet dis bro tek Yufretis fak tengotafmort. Yak tengotafmotrt marr yuwa muhwako tohyuk kingroh niayuk yuhat dukahato nd tek Yufretis mikna domtnimot. ¹³ Yo tfit hti hanymoyamn husfirpa yafotha bebm kukam kanjo fnah hanymom yarh mugrrhu tng yuhat yo maromb yuhat mfnahyuk yarh yemrorhu tng yuhat yo giaman profetrhu tng yuhatn.* ¹⁴ Nd husfirpa yafotha bebm rom mirakerkform hingrnahato ndar bbinyssoft yorhwa kantriroh kingmpno yi htfas bugewumm. Kangm yi htfas-hato kantri kantriroh kingroh amikfot yak nhafohhato romn hasinyarahmt bro nnayureft tuhan yindariroh kotkfot tu hta nngrajohet Nkifrar yakitoh thombat.

¹⁵⁻¹⁶ Be nd yafotha bebm nd kingm yaknimomm hanymomm wom tkittn, Hibru yarmumat nd tkitt kutewumt Armagedon.† Tfit Jisasr kfo memor, “Wawanyko. Na be yudbat rikoh yima kanjo hti fohtasakrahkma. Ndnetn yimam duka tungunefmpno rroh wuskam fak hta kebirs marnyahato tu yimampno rhu tkafmm, be nhai tuhan yindariroh nyingampno sfno bumbom-brohm rhuhato yimtnaruhatm. Nhai. Bro yindhortpno rhurahm.”

¹⁷ Tfit namba 7-yuk mounmotr yakitohmo krhopam ruhet dis yura mountn tengot-mort. Ndtpno tu Nngrajoh Hnaru Gnanhehr rhuyuk sia kingtpno wom tngt mfro kfo hany memot, “Be bibe. Bi asom wuroh namburpam.” ¹⁸ Yura mountko toh fnhum mano mano fambohritnamom, tohr wuyohnina wuyohnina wathu rbigmor, yo bro nunes rot mirefett tonemot. Nd nunes tu yonmari nunes tonemot, nhai ndhtet wom yiha bi tonewonrmot. ¹⁹ Nd yonmari taun Babilonr buha buha yoh bohrhato husfirpa nmbuham rhumom. Kmi kmiroh kantriroh taunn nunes teh tutt hanymottm yohne hanymom. Bro Nkifrar dukakmorm bro kmi Babilonrh fasoh fasoh nefm. Dukakhato nd Bro Nkifrarhu krho namburpet wain kaft yakhato hemotrr fiyakmor. ²⁰ Marombt buha hir hanyuk kmi yumbm yoh-nemotm hti hambrafmomm, yo nhai wom kminysofm wom rhurmom. ²¹ Yo yonmari ren ais fawihnamot. Nd yawihnamoa ais tpim nhai krho tefirmom. Nd ais tpiroh krhopam 50 kilogrem kurhet ais tpim fawihnamoum. Bt nd ais tpim wuyohnina wuyohnina yimam mirbigmoahat nhai yimam hamuhrmoam. Yimam be mir hawohne twanhomoum. Ndnetmn Bro Nkifrar faso fasoh kfo rindho borindhomomr.

17

Ijoh tonayet metroh mmemt

* 16:13: Nd giaman profetr to nd bbinysof yuhat mfnahyuk yarh yemroyer. Rorn wom maromb yuhat mfnahyuk yarh yemrorhu profetr tohhato tuhan yindarim kfomorm nd maromb yuhat mfnahyuk yarh yemrorhu piksa yifonru lotunef. Wom mrokfo nmbuham htikfot Revelesen 13.11-16. † 16:15-16: Nd Armagedon yufat to “Megidothu bro kminysofet.” Bingot yahr kmim nnat yihato to brbo taun Megidotpno king Josaiar wasmomr. Nd Josaiarhu tnnd mrokfot htikfot 2 King 23.29-30 yo 2 Stori 35.20-24. Tfit Bro Nkifrarhu rfa borngthu mrokfom hti hik bohiket yimam kangm nd Armagedon yufat nhai tu be Megido yufa mift kfokaht. Nhai. Kangm nd yufat be yura mrokfoyet. Ndt kfo kangm nd yufat nnaruha tkitthu yufayet. Nd kmitn nna hanyhato amim be bafinat wundiat yirahm.

¹ Nd 7-pela mounmotm 7-pela krhopam ruhet dism yakitohmoroh womr nanopno nia-hato mkfo memora, "Wania. Waniekahnn wahtitwant nd tekmpno yorhwa ijom tonayet metroh mmemt. Waniekahnn wahtitwa nd mett finji finji naruhoyant. ² Bbinysofroh kingm yima yuhum tohakmoahat to be nd mettpno yimoum.* Yo ndar bbinysothu yima bugam yima yuhum tohakneft to be nd mettpno yimoum. Nd mettpno yimoamn rothu pam ye hmbremomn rothu mumeft fak hikmom."

³ Bro Nkifrarhu Yafothat tuhafuna-nimota hanymota yima toh duha tkittn. Nd yima toh duha tkittn wom mett htimoyant yura kkupa kanjo fnhuyet yarh yemrorn yura mrhumot. Nd yarh yemrorhu that wonk wonk yufam wandfamomr. Nd yufam Bro Nkifrar kfo thir yo kfo rindho kanjohot yufam wandfamom. Nd yarh yemror 7-pela mfhami 10-pela komm tohwomr. ⁴ Nd mett kwinm hmbrita hmbresha kanjo fnhuyet hmbresham hmbremot. Nd hmbresham wonk wonk gort, yo mfro fnhuyet biskfot yo dborioh tahiye wondh marnyet wondht hembonginamomm nd rot hmbremo hmbresham. Yo gore hingrnayet kaftn tirt fakitohmot. Nd rot yakitohmo kaft wonk wonk yafotha duha yafotha duha hnomha nefm yo fasoh fasoh ijom tonayet nefm furkihmomt. ⁵ Nd metthu nyimbiktn wom mrokfot inji htamomt, "Bro taun Babilont be tu ijom tonayet metroh mmemet, yo ndar bbinysoft yorhwa hnomha nefroh mmemet." ⁶ Yo htimoyant nd Jisasr hiket met yindarim wasmo mett tfit rroh kkut yakhato yamotn spak yimam kanjo mrokfom hus bok yimotm. Nd mett namo neft na htihato tuha mrokfo duhata rhumoya.

⁷ Tfit mounmotr tohhato kfo ttiwon memora, "To ni tamohmpno mrokfo kfo duha yorhwa? Afo wawanywa nann kfo wutha nuhasruhann nd metthu ruheft yo nd rot hatonita 7-pela mfhami 10-pela inyaru krinysiket yarh yemrorhu ruheft. ⁸ Wawanyn. Nd ni bi htitawo yarh yemror afo tohmour. Tfit ariha nd yarh yemror nhai wom tohkahr. To tfit nd yarh yemror nd kfe rawofet bro muhr htany-hato fnahnerahr. Be nd yiharne tot wuroh htite be wundiat hti hambrafrahr. To nd yarh yemror tfit wompam mfnah tany shombat, to nd yimaroh yufam toh nkifraniyuk yimaroh yufam yorhwa rfa borngt rhu duha yita yimam tfit nd yarh yemror wompam tfit hti thombat tfit bok dukefm yakrahm. Nd yimam Bro Nkifrar mounti bbinysoft tafi hingrna hta duha nd yimaroh yufam nhai rhurmom nd rfa borngtn. Rroh dukefm duka mirahm, to ndar bi nohniyet yarh yemror tone fitoh yuhatn yak dborha-naror? Bok dukefm inji yakrahm.

⁹ Duka tunguna marnyetr ndar kfiwa mrokfom yima yuhum yakrahm. Nd yarh yemror hatohmo 7-pela mfham ndm 7-pela kmi yorgm nhombrewum. Yo mett nd kmi yorgmpno yura korhwot.[†] ¹⁰ Yo nd 7-pela mfharepam ndm to nhaf 7-pela kingmn toh nhombrewum. Nd 7-pela kingm wom 5-pelakfot bi king yufat tohmomt, yo 6-yukr bi tohwort, wuroh 7-yukr tafi. Nd wuroh 7-yukr king yufat yakhato toh thombat be nd hingrneft nhai bok yiham tohruatrt. ¹¹ To nd yarh yemror bingot tohhato tfit ariha toh duha yitar, ndr to tor nd 7-pela kingroh wom kingr. Nd king yufat yaketroh thomnafat rorn 8-yuk kingr tohrahr. Ror king yufat yaknihatone be wundiat hti hambrafrahr.

¹² Yo tfit ndwom 10-pela komm rorhu mfhat hatohwom, ndm to nhaf 10-pela kingm toh nhombrewum. Ndm afo tafi king yufat yakhato tohr-mom. Kto rom to king yufat yakhato tohrahr. King yufathu tohyuk kfo yakio mrokfot hiruhatmm nd yarh yemrorpno be wan auakforpat king hingrnethu yufat yakitoh tefirahmt. ¹³ Nd kingm rpa yima yuhurpar rhuruhamn nd rroh bbukefmi yufam nd yarh yemrorparr trohhirahm. ¹⁴ Be nd kingmi yarh yemror rpat nathu hmbrihato Sifsif Yonrpno nnarahm. Nna hanyruhamn Sifsif Yonri yimam ror bi nakuyakhato rorhu yufat htahato

* 17:2: Kingm yima yuhum tohakhato nd mettpno yimoahat nhai tu ijom tone mif neft kfokaht ndar mrokfot. Nhai Yimar Bro Nkifrar mhikakni yo tfit yafhonihato tfit wom nkifrar mhikakni injina fnahwohat yo wonk wonk nefm nafnahwohat, ndt Bro Nkifrarhu nyngam htitwort ijom tonitwa kanjo. Yimar wom mett yakni tfit ndt htanyhato tfit wom metmpno hwe htfaswa kanjo inji Bro Nkifrar htitwort. † 17:9: Bro kmi Romr 7-pela kmi yorgmpno hingrnamomr.

rorpno tohwam, rom rpat sinyaruhamn yiho hathurahmm nd kingmi yarh yemror. Sifsif Yonr, rorrpar nungothetroh tu Nungotheter, yo rorrpar kingroh tu Kinger.”

¹⁵ Yo tfit wompam mounmotr kfo memora, “Nd ijoh tonayet mettpno yorhwa bro bro tekem to wonk wonk kmiyem yo wonk wonk thet kmiyem yo wonk wonk mrokfot kfet kmiyem. ¹⁶ Yo nd ni htimo 10-pela komm, nd kommi yo yarh yemror rpat nathu hmbriruhann nd ijoh tonayet mett hti dbnotrahmt. Gobenm kanjo htirahmt. Nhai hifa nyngar htaruhatmt. Rothu wuskam yak rhoptakhato faso faso yak beb hakurahmt. Rot hatohyuk hmbresham yak taborhoh tuhruhamt brio sfnoht tohraht. Nd mett ye nyimbofiohakruhamt yuhut yimat kandhi tountuhrahmt. ¹⁷ Bro Nkifrar yima yuhum hiruhatrm nd 10-pela kingm, nd kfiwa nefm narahmm. Nd nefm rom naruham to bingot bi Bro Nkifrar kfo htatamo nefm narahm. Nd kingm rpa yima yuhur tohhato nd rom yakitohyuk king yufat yarh yemrорар hiruhatm rorn nd king hingrneft yakitoh hanyruhartn bi nd Bro Nkifrar kfo htatayuk mrokfot bi mfrfnahnet, ee btn Sifsif Yonr yiho hathurahrr. ¹⁸ Nd mett ni htimot to ndar bbinysofthu kmi kmiroh kingm toh yukatohwa bro taunet.”

18

Yonmari kmi Babilont yohnemo yuhat

¹ Yo tfit wom mounmotr yura hefenko wutoh tanymorn fawihnamor. Nd mounmotr tu bro bbukeft yakitohhato rorhu wondhthu fnhuyeft bbinysoft yakmohat yuht bbinysoft fnhu bugamot. ² Nd moun-motr yawihnehato kfo ptha bro memor, “Nd yonmari nanyjar hasomo kmi Babilont be bi finyk brom kanjo wuyoh nafuryakhato wahtamot! Be bi wahtamot! Nd kmit be bi yima duhattn nd kmit bi tfit yafotha bebm tohhato ye wussohwa kmiyet. Nd yafotha bebm, hnaru nungam, yo nd fasoh nunga pira bebobebt ndha rhu hasiwum. ³ Nhai be sfno nd yonmari kmit yohnermot. Tutn yima yima he htfasmot. Rothu thatipt wain buroh-roht kanjo yima yima thu hannamotm. Ndar bbinysofthu kingm yima yuhum tohakmoahat to be nd mettpno toniyak-moum. Yo ndar bbinysofthu bisnis-manm, Babilont kfomot yonmar yon-mari bisnismann tohmom. Babilontpno rroh bisnis hingrnefm hingrnamoahat maru yihotam hifa yi marnyamoamn bro bro marut yakhato bro maru kunyetm rhumomn hifa rhu nmbuhat fakmom.”

⁴ Yo tfit wom nndoh tngt yura hefen yuhat wanyakmoyant. Nd tngt kfo hany memot, “Niko nanhu met yindariko nd kmit wahtanykahkomt wafnahnak. Mirahko rot niwa fasoh fasoh nefm tha ahtanomm. Rot niwa nefm niko tha htarahko, to be rot yakyuk krhopam niko yaknhorahkomt. ⁵ Rot nahniwa nefm bi kangm kminy-sofem. To nd rothu rpa rpa nefm bi Bro Nkifrar kakitohworm. Rot niwa nefroh krhopam yak nhombra bugarahtm. ⁶ Nd mett finji finji namotko, tawo Bro Nkifrar inji inji narahrt. Rpa krho nmbuhat hemotko, tawo Bro Nkifrar hus krho nmbuhaf hirahrt. Hus krho nmbuhaf namotko, tawo Bro Nkifrar tthak tthak tu krhohato bro krhopam hirahrt. ⁷ Nd mett hifa hifa dborioh rhu nmbuhat rhuhato tuthu yufat be yura yura htamott. Ndnett tu krhohato Bro Nkifrar krhopam hiruhatrt nurniruhatn gnngtatraht. Tuthu dborioh rhu nmbuhat htihato kfo kangt, ‘Na mirahko ka met furaya. Na, na kwina. Kwinann kwinroh gajis korhwa. Na, na nhai yindariyetann btn yindarir nohruhattr narrhoya. Nhai.’ ⁸ Nd Babilont tuthu yufat yura htaruhatt ndnett be rpa yiharpa wonk wonk krhopam mano mano, mano mano yakaknerahmt. Mano dbohneft nieraht, ndtpno mano yimam noh hanyrahm. Miraht ka be ndrpayet, tfit yatinoh wormr tohaknerahr. Ee tfit kaht wuyohninehato yuht kmi Babilont kandhi witarahtt. Nd Babilont nayuk nefm nd hta nngrajohet Bro Nungothet Bro Nkifrar bi htihato bi kfomor nd kmithu yak batineft.

⁹ Nd rothu yindari yima yuhur yak nohmoa kingm, nd taunt kandhiruha kahthu kah hip rifhur mtagdfruhatr rom htiruhann bro nurm nurhato yima yuhum nhai hifa marnyaruhatmm. ¹⁰ Nd rot yakruha krhopam rom yaktmerahm rotpno brbo tohhato rpat krhopam yakneft, ndnetmn rom be inji nndo tohhato kfo yuhuwaf mirahm, ‘O,

wayeye Babilone! Yonmari bro yufati bro bbuket kmiye! Tunhu fasoh fasoh neftpno be yudbat mif rpa auakfotn fak bat i twanhirn!

¹¹ Bbinysoftu kmiyakmiroh bisnismanm hingrnayuk shrkaroh wikkayuk kmi Babilont mibatini thoft, bisnismanm bro nur dungunangu yima yuhumpno rhurahm. To fitoh kmimn rroh hingrnayuk work wonk shrkar maruhampno yak tuknaruhamr? Nhai wom fitoh kmim. ¹² Nd maruhampno yak tuknayuk gorkfot, silvakfot, dboriorh dboriorh fnhuyet tahim, dboriorh dboriorh fnhuyet biskfot, yo wonk wonk rmontham, nd dboriorh kku kkorpa fnhuyet rmontham, srika rmontham, yo dboriorh dboriorh gb mtha yarfonet mim, yo bro bro marufa kfet dboriorh dboriorh miye hingrnayet shrkar, yo elefan fohroh bim, braskfot, ainkfot, nd fnhu nmboretet gepha tahim, nd nde hingrnayet shrkar. ¹³ Yo maruhampno yak tuknayuk yeshrimpno htayuk mthet sinamonkfot, yo wajipam, yo tariorh mtha hipyük paurakfot, yo dboriorh dboriorh gb mtha yarfonet griskfot, sandakfot, yo wainkfot, olif welpam, plauapami witkfot. Yo rom hatohyuk bulmakaum, sifsifm, yo hosmi hosm hatoneyuk karism, yo slefm kanjo maruhampno yak tuknayuk yimam. Nd yutahne tamoh tamohr, harhu dukarahmr. To fitoh kmimn tfit wikkna hiruhamm? Nhai wom kmim. ¹⁴ Bisnis hingrnfm hingrnayuk yimam Babilont kfo mirahmt, ‘Nd dboriorh dboriorh shrkar ni yakneft duka hasomoar, be bi fita yiror? Nd bro bro marufa kfet dboriorh dboriorh shrkar yo ninhu dboriorh dboriorh wondh wuskar be bi rim fnahniror. Nhai wom fita hti ham-brakruhatnr.’

¹⁵ Yimam nd tauntn nd yutahne shrkam maruhampno yak tuknahato maru kunteym rhuyukm, nd taunt yakyuk krhopam hti yakrmehato be inji nnndo tohhato hti yuhuwaftahato nur dungunangurahm. ¹⁶ Kfo yuhuwaf mirahm, ‘O, wayeye, yonmari bro yufet Babilont! Bingot dboriorh dboriorh ganyom hmbresham hmbre wondhmout yo kku kkorpa kanjo fnhuyet rmontham hmbre wondhmout. Yo gorkfot yo dboriorh dboriorh fnhuyet tahim, yo dboriorh dboriorh fnhu nmboretet biskfot wondh hmbrehato rhumout. ¹⁷ Tu rpa aua miftn nd maruti wondht bat i bugamot.’ Ndhtet kfo yuhuwaf mrokfot kforahmt.

Bro marombt hatone htfasyuk sifroh keptenm, yo sifm wikkani yiyuk pasindiam yo boskrum, yo marombt bisnis hingrnfm uhatone hatoneyuk yimam wuri tohrahm. ¹⁸ Nndo toh-hato nd taunt kandhiyuk kah hipefr htiruhamn kfo ptha srh mirahm, ‘Nhai Babilon kanjohot bro taunm rhukahm!’ ¹⁹ Nd taunthu dukefrpno bb tangur-hato nurrahm. Naku kfo yuhuwaf mirahm, ‘O, wayeye, bro kmi Babilone! Yimam sifetm nd kmit kfomot rom tu maru kunyet yimam korhm. To be rpa auakfotn nd kmit rhuyuk tamoh tamoh hti hambrefit.

²⁰ Ni hefenn yo niko Bro Nkifrarhu tuhan yindariko, yo niko aposerko yo niko profetko, niko buga yindhorkfot ndar rotpno yorhwa kurheft. Rot nikompno nahnamo nefm bi Bro Nkifrar htihnamormn be bi fak gnngtat twanhirt.’

²¹ Nd mrokfom inji kfon hanyhato wom nngrajohet mounmotr wom wit hta tkbotkwa kanjohot bro tahis yak-mort marombt watumort. Watunihato kfo memor, “Na nd tahis yituyefi kanjo taun Babilont yak tuyafuruhatmt nhai wom htiruhatmt. ²² Ndnett, Babilone, ninhu gitroh gur nyungefm, mayi nmbuharo windohefm, trampetroh windohefm nhai wom wanyruhat-nomm nom wanymoa kanjo. Nhai ninhu wom wonk wonk hingrnfm hingrnayuk hingrna yimam wom htiruhatnom. Ninhu witroh hta tkbotkyuk tahiroh nyungefm nhai wom wanyruhatnom. ²³ Nhai tfit ninhu kunyroh lam nukefm wom htiruhatnom, yo nhai tfit nfri tuhan yindariroh nayak tatrut yiha kfo yindhoryuk kfo yindhor tngm wom wanyruhatnom. Ninhu bisnismanm afo bro yufat yakitohmomn rroh yufarpam bronimom. Yo fasoh for bi singtpno hingrnamonnn kmi kmiroh yimam forakhato fasoh yihota yuhat fak nuhasmonnn.”

²⁴ Nd kmi Babilontn profetroh kkupami Bro Nkifrar hiket yimam wasmo yimaroh kku-pam rhumotm Bro Nkifrar htihato Babilont fak batimort. Yo ndwom womt washnayukt to Babilonrpattn krhopam fak bugamotm.

19

Babilonthu bati nmbuhatpno hefenrhu tuhan yindari rishur kfo yindhormo kfo yindhormo mrokfom

¹ Nd bro bbuket mounmotruh mrokfot kfo pthanimot, ee tfit hefenko wanyakmoya bro ptha kimrefm. Memome hefenrn tuhan yindari rishur ptha kimrwom. Nd met yindarim kfo ptha kimr yindhor memom, “Aleluya tunga Bro Nkifraye! Ninrpa nrfa hbbakmonnom. Ninrpa bro yufat yakitohhato ninrpa bro bbukete. ² Bro Nkifrar tuhan yindarim yak gnngtatwohat rrroh nefm hti nhta-hato hifa kak gnngtat twanhiwurm. Nd ijoh tonayet bro mett, be tutn katirnamot. Ndar bbinyosothu kmiyakmiroh yima boyimat rotn riyak nuhasakmottm be rottno ritoniyak-hato be nd neft bronimotm. Yo Bro Nkifrar hiket met yindarim wasmottm ndnettn Bro Nkifrar tawo krhopam hemort.”

³ Yo tfit kfo kimr yindhor memom, “O, aleluya tunga Bro Nkifraye! Nd bro taunt kandhi witewa kah hipefr yiha yiha be inji kur hip hasiwur.” ⁴ Yo nd 24 nungothetm yo husfishus foh nunga kanjo ruhet shrm sia kingtpno rhuyuk Bro Nkifrarparpno mbangu yukna rmonmomn kfo memom, “Aleluya! To be inji.” ⁵ Yo tfit Bro Nkifrar rhumo sia kingtpno wom tngt kfo ptha memot, “Niko yufapa duha yimako yo yufet yimako, niko Bro Nkifrarpar duka yakrmihato rorhu yinhirpat rhuhato rorhu hingrneft hingrnahuka yimako, Bro Nkifrar wakfo yindhor wameko, ‘Bro Nkifraye, nom ninrpa bro yufat htewunom.’”

Sifsif Yonrhu tuhan yak yiharhu yemro burwat

⁶ Yo tfit wanymoya memome yimam rifynhato kfo ptha mir nadidarwom. Tek bhur mir nadidarwa kanjon o tohr nyunguhato mir nadidarefetr yita kanjo inji wanymoya. Nd yimam kfo memom, “Aleluya tunga Nkifraye! Nmoh hta nngrajohet Bro Nkifrarn, bi kingr tohwor! ⁷ Be bi Sifsif Yonrhu tuhan yak yihayer, rorhu yakyuk mett be bi rhu garittr. Ndnettn arinha nmoh yima yuhum mirhuhato yindhor yima yuhumpno rorhu yufat kfo yuta yindhorkfot.* ⁸ Bro Nkifrar tu dborior ganyom hmbreshat nd mett hemotrt hmbremot. Nd hmbreshar tu ganyom tha yuht hemort. Nd dborior ganyom hmbreshar ndr tu Bro Nkifrarhu met yindarim niwa dborior dborior nefroh kfo nhombra mrokfoyet.”

⁹ Tfit mounmotrn kfo memora, “Mrokfot inji wawandfatwant, ‘Nd Sifsif Yonrhu tuhan yak yiha htayuk yemro burwathu yanyhoyuk yimam Bro Nkifrar nakumom, ayindhortwam.’” Yo womt kfo memora, “Nda mrokfom tu Bro Nkifrarhu tu kfo mif mrokfoym.” ¹⁰ Na inji wanyhato memoya rorhu wurampno amsuhkahann alotuyanr, tfit fak thfa memora, “Nann lotu duha. Bro Nkifrarpar lotukfot! Na to nini ninpno hingrnauhiwa yimampno hingrnauhiwa hingrnauhiwa yimaya. Niko Jisasrhu gutnius mrokfom kfo pthahato hikwako, na to nikompno rpat hingrnauhiwa hingrnauhiwa yimaya. Nom to bi htihato wanyetenom, profetm Jisasrhu gutnius mrokfot pthayuk yafothar muhwartrm profet mrokfom kfo pthewumm.”

Ganyom hosrn hatonemo yimar

¹¹ Yo tfit htimoja hefenrhu yifhatikt tfanymotmt ganyom hosr htimojanr. Nd hosr hatonayuk yimarhu yufat, “Tu yafothet mrokforpam yakitoh hik marnyet yimar,” yo “Tu yafothet nefrpam nahiket yimar.” Ror yimam nayuk nefm ror kotkfotn yakitohhato frhikneft, yo yahrt ror yinyeft nhai riyohne ayohnekahr. Yima duka tungunefmpno yak hik marnyahato nefm newurm. ¹² Rorhu nytingam memom nndo kaht funewut, hat kraunm nhai rpehm hatohkahr, tu boknabok mifm. Yima nyisoftn wom yufat htamomr. Nd yufat nhai wom yimam tawisafkahmt, turpa mifr tawisafwort nd yufat. ¹³ Yima gobroh kkut tuh ppri wunayet kku hmbreshar hmbremor. Rorhu yufat “Bro Nkifrarhu

* 19:7: Nd tuhan yakruha Sifsif Yonr, ndr Kraiser. Nd ror yakruha mett, ndt tu Kraiserhu sioskfoyet. Kraiser yawihehato turhu sioskfot miyak thoft ndt tuhan yindarif nayak tatrutnihato yindarirhu kunyko yita kanjo inji Kraiser niahato turhu siokfotno nayaknihato rorhu dborior kmir hamuhrahram. Hamuhhato rorpono toh nkifranirahm.

mrokfot.” ¹⁴ Hefenrhu amim rom turoh ganyom hosmn mrhuhato tone hikmomr. Hmbresham tu dborioh ganyom tha yuhtm hmbremom. ¹⁵ Tohakyuk yimar ror hanku namburet bainat tng yuhat mfnahmotr. Nd bainate kmi kmim tmbho witarahrm. Kingm yakitohwa ain nmbuhat yakinhhato met yindarim rorhu yinhitn tohrahm. Yo wain yukham hta tkbotkrahrm nd bro tahi tenktn. Nd wain yukha hta tkyuk tahi tenkt ndt tu hta nngrajohet Bro Nkifrarhu krho namburpayem. ¹⁶ Ror hmbreyuk yuke hmbresharn yo wura bohtn inji wandfamomt, “Kingroh tu Kingr yo nungothetroh tu Bro Nungothetr.”

¹⁷ Yo mounmotr htimoanr yura marrn mtohmor. Yura marr tohhato buha mount yafuna htfasmo nungam mfro kfo nakuyaf memorm, “Niko yemro yayet nungako niko bi wania wanhafoh hanyswako. Bro Nkifrar bro yemro burwat htahiruhatrko yerahko. ¹⁸ Yimapam ndm yerahko. Kingroh yimapam, soldiaroh keptenroh yima-pam, soldiaroh yimapam, yo hospam yo hosm hatonayuk yimapam, yo nd yima bugaroh yimapam, slefrohm o toh fura yimarohm yo yufetroh yimapam yo yufa duharoh yimapam, nd nd yimaroh yimapam yerahko.”

¹⁹ Yo htimoanr nd kmi yarh yemror yo bbinysoftu kingmi rroh amim bi nia rifiny bugamom. Memom nd hosr hatoneyuk yimari rorhu amikfotpno nnarahnom. ²⁰ To nhai, nd hosr rhuyuk yimar sinyahato nd kmi yarh yemror fak tkaftamorr rpat rorhu giaman profetrpno. To nd giaman profetrn yarhr yemrorhu nyngampno mirakerkfot hingrnarmort. Inji nahato yimam bi nd yarh yemrorhu makkfot yaketm yo rorhu ruheft tth nhombramo yifonr lotuyetm frnhehmorm. Nd kmi yarh yemrori giaman profetr yakmomf be nfri miff sarfa tahim wakur sinyewa tahiroh bro muhrn watumomfwe. ²¹ Nd hosr rhuyuk yimar sinyamorn nd rorhu tng yuhat mfnahyuk bainate tmbho witamorm rroh amim. Tmbho witamotrm nungam yihato nd yimaroh yimapam yeylehato miyuk yohm mihir bugamom.

20

Satanr 1,000 gunyjimm kalabus tohmor

¹ Yo wuhtiyakmoyanr moun-motr yura hefenko wutoh tanyhato fawihnamor. Ror niamohat, bro kfe rawofmo muhrhu kiti yo bro sent fakitothakmor. ²⁻³ Yawihnehato nd yarh mugrr fak tkaftamorr. Nd yarh mugrr to nd tndh marr, rom kfiwa Satanr. Mounmotr yakmorr nd ror yaknamo sene kijbkafakhato watumorr nd kfe rawofmo bro muhrn. Watuyaftato muh yifhatikt frkihhato lokimmort. Memor inji anakahann Satanr nhai tfit fnahnehato yima toh ngeh htfasruhatrm. Bi nd 1,000 gunyjimm ftohnirme ee tfit tfanyak-hato fnahna tefirahr.

⁴ Yo htimoanm sia kingm. Nd sia kingm htimoanm Kristen yimarpam rhu bugamomm. Kotkfothu yakitoh-yukmn Bro Nkifrar nd gajim fak htamorm. To nd gajim rhumo yimam tom wom Kristen yimaroh yafotham htimoanm. Nd Kristen yimam yima nfrim tohmohat, nhai nd yarh yemrori rorhu ruheft tth nhombrayuk yifonr loturmomm, yo nhai rorhu makkfot nyimbikmn o tir gramtipmn htar-momm. Nhai. Rom Bro Nkifrarhu mrokfomi Jisasr ptha nuhasuk mrokfom hikhato wom wom ptha nuhas htfasmomm. Nd yuhatn mfha tmbho hanyomm. To nd nd yimaroh yafothayem tfit myak dborhahato nd kingroh gajim mrhuhato Kraisrpno king hingrneft 1,000 gunyjimm rpat tohmom. ⁵ Ndm Kristen yimarpam inji htimoaya. Tfif ndwom ndwomt be turoh nefmpno noh hanyukm, nd yihart nhai bi myak dborha bugar-motm htirmoyanm. Rom afo nd 1,000 gunyjimroh batu yihar afo garimom. Nd barkof sinyahato sia kingm rhumom, ndm Kristenrpam sinya gungonmom. To romn tu barkof yimam sinyamom. ⁶ To nd barkof sinya hanyuk yimam yindhorkfot. Nd yimam bi tu Bro Nkifrar kfo hbhayetmn tfit wom wuroh noheft nianeft nhai rom finjinakfot. Rom to bi Bro Nkifrari Kraisrhu prism tohrahm nd 1,000 gunyjimm. Yo nd yihar rom Kraisrhu king hingrneft rpat king tohrahm.

Satanrhu wuroh yak bati buga yihar

⁷ Bi nd 1,000 gunyjimm bi bnkanim ee Satanr tfanyakrahmr. ⁸ Fnahniruharn ndar bbinysoftu manoh manoh krayefm toh htfaswa kmi kmim toh ngeh htfasrahrm. Nd kmim kutewumm Gogmi Magogm. Nd Gogmi Magogm Satanr bi yak htatarahrm bro yahrthu tohneftn. Nd Gogmi Magogroh amim nhai yimam thomnakfot, nndo ndar kipr suh furam. ⁹ Nd Gogmi Magogroh amim ndar yuht bbinysoft gonnng rpr thuhato Bro Nkifrarhu met yindarim tohyuk kmit wifor hmbrirahmt. Nd kmit Bro Nkifrar tu marbit htamourt. Nd kmit toh hmbriruha amim mirahm ka hifa kfoyet, to nhai, kaht yura hefen yuhat yawaheruhattu kandhi bati witarahmt nd amim. ¹⁰ Yo nd tndhr yimam toh ngeh htfasmoar yakhato waturahmr nd sarfa tahim wakur sinyewa tahirot bro muhrn. Nd kmi yarh yemrori giaman profetr watumo kahtn waturahmr. Nd rom husfirpat nd kahtn tohhatu yifung mar, yifung mar nhai hifa rhu nmbuhat yakruhatm. Yiha yiha be inji tau kur hasorahm.

Wuroh bro kotkfot

¹¹ Yo tfit bro ganyom sia kingt htimo. Nd sia kingt rhuyuk yimar mrhu hanymor nd bbinysofti mount yudbat rim fnahnimof. Nhais wom rhurmof. ¹² Ee tom tfit htiyak hany-moya nd bi noh hanymo yufet yufet yimam yo yufa duha yufa duha yimam myak dborhahato nd sia kingthu nyngatikko mtoh hanymom. Mtoh hanymotm ee nd met yindarim nahanyuk nefroh kfo nuhas mrokfom yorhwa gonborngm mounmotm fakmomm. Yo tfit toh yifahtayuk yimaroh yufam yorhwa wom bro gonborngt fakmomp. Yak htatahato nd gonborngm rhuyuk kfo nuhas mrokfomn sia kingt rhuyuk yimar htiyak hanyhato fak hta bohtamorm yimam. ¹³ Bro marombtn miptko hanyhato rhuyuk yimam tfit tuh takeyafmottm kot tohmom. Noheft yakyukm yo Maringour tohyukm rofhum nhaf hemotfm kot tohmom. Nd sia kingt rhuyuk yimar nd gonborngt rhuyuk rpa rpa yima yimaroh nefm htiyak hanyhato kotim hanymorm. ¹⁴ Kto nd Nohefti Maringour yakmorf bro muhr mkur fnahwa kahrn watu-morf. Nd yiro muhr mkur fnahwa kaht ndt wuroh noheft. ¹⁵ Yo nd yimam toh nkifraniyuk yimaroh yufam rhu duha yimom, yakmomm watu-momm nd bro muhr mkur fnahwa bro kahtn.

Bro Nkifrar hingrnayuk nfri hingrneft

21

(Sapta 21-22)

Nfri mounti nfri bbinysoftu mrokfot

¹ Nd wuroh bro kotkfot toh-yuk yimam htinimoyanmn ee tfit nfri mounti nfri bbinysoft yarim fnahmof. Ndwom barkof rhumo mounti bbinysoft rofbi rim fnahnimof. Yo marombt rot rpat rim fnahnimom. ² Yo Bro Nkifrarhu nfri taun Jerusalemr wuhiyakmoyanr Bro Nkifrarpmo yura kmi hefenr wutoh tanyhato fawihna-mor. Nd kmir rorhu wondhtpno yahihnamohat memom nndo mettn wondh marnya bomarnyett bi niewut ram kunysn. ³ Yo sia kingtpno wom bro tngt wanyakmoyant kfo nakuya fmemot, “Wawanyko! Bro Nkifrar be bi yahihnehato yimampno tohwar. Rompno tohruharn rorhu yufat hta-rahrm. Rorhu yufat htaruhatr yimam rorn yima yuhum htahato rorn lotu hakurahm. ⁴ Rroh nur nyngam rorn yak thurahrm. Yimam be nhai wom nohruhatm o nhai wom nurhato yima noh bb kunys rhuruhatm o nhai wom penkfot yakruhatm. Nd bingot rhumo ruheft nhai wom tfit rhuruhatt.”

⁵ Yo nd sia kingtpno rhuyuk yimar tfit kfo memor, “Wawanyko. Nd barkof rhumo tamoh tamohr be bi yak thuhato bi tfit nfri shrkarpar bi htewa.” Yo tfit kfo memora, “Nd mrokfot tu kfo mif kfoyet. Yimam wany yakiorahm. Ndnettndar mrokfot inji wawan-dfatwa.” ⁶ Yo kfo memora, “Nd tamoh tamohr be bi hingrna kafkomoyanr. Nanrpaya barkofa yo nanrpaya wuroha, na kfomoya shrkar yarim fnahmor yo tfit na kforuha shrkar tfit rim fnah-nirahr. Yimam bupa knewur, yima toh nkifraniyuk bu yinharhu bupam he furarhotanr ye furarahrm. Nd bu yinharhu bupam yimam yanyeft

toh nkifrewum. ⁷ Fitoh yimar nda bbiny-softhu ufasoh nefroh bbukeft kahot nohwort, nd yimar nd na kfiwa shrkam hirhotanr yakrahrm. Yaknihato nd yimar to be nann rorhu Bro Nkifraya rhuruha yo ror nanhu yonr rhurahr.

⁸ To ndwom ndwomt ginyetm kanjo yesisetm o Bro Nkifrarhu mrokfot wany yakio duham o fasoh hnomha nefm yakinohetm o yima was furetm o yaum kanjo ijoh tone htfaletm o yima tipetm o yima grwasetm o forkat haruhetm o yima wasyuk wajim haruhetm o yima htakyuk wajim haruhetm o tahi rmonm o nkifra tahim lotuyetm o yima kfo fura nhehetm, ndhtet ndhtet metm o yindarim, rroh tohyuk kmit bi kfohtetet. Nd bro muhr sarfa tahim kur nanyjar hasiwa kahrn yohnirahm. Be nhai tfit niakfot. Ndt nd wuroh nohefet.”

Jonr nfri Jerusalemr htimo yuhat

⁹ Yo tfit wom mounmotr niamor. Nd nanopno niamo mounmotr to nd Bro Nikifrarhu 7-pela namburet dism yakitohmao wom mounmotr niamor. Nd mounmotr niamorn mikfo memora, “Wania. Waniakahtn yak nuhasruhann nd Sifsif Yonrpno kfo yibon hanita mett.” ¹⁰ Bro Nkifrarhu Yafothat mthu nawohhato tuhafunamota. Tuhafunani-hato hanymota tu yura bro kmi birn. Kmi bir hanyhato fak nuhasmota nd Bro Nkifrarhu nfri kmi Jerusalemr. Nd kmir tu Bro Nkifrapno yura kmi hefenr wuhtanyhato fawih-namor. ¹¹ Nd kmir tu Bro Nkifrarhu bro nukeft yakhato kmir wayifatoh-mohat memom ka nndo tahi jaspattn fruhuhato funefm kambohritnewum. ¹² Nd kmi gnar gna habriyetrn gnam nhai brbo ritoh hanrymom. Tu yurak-ngot wafakmom. Nd kmir 12-pela yifhatikm htamomr. Nd 12-pela yifhatikm 12-pela mounmotm toh nhombramomm. Nd 12-pela yifhatikm yufet bugam rhumom. Isreroh 12-pela nkifraroh yufam htamomm. ¹³ Nd kmirhu husfihu konam husfirpa husfirpa yifhatikm hta hanymomm. Marr yuwa muhwa isko husfirpa yifhatikm htamom. Yo tfit notko wom husfirpat htamom. Yo sautko wom husfirpat htamom. Yo tfit marr yohnita wesko wom husfirpat htamom. ¹⁴ Nd taunt gna habrimo gnat, 12-pela bro yuke tahim hatohmomt gnat. Nd gnat hatohmo 12-pela tahim, Sifsif Yonrhu 12-pela aposerroh yufam htamomm.

¹⁵ Nd mounmotr nanopno kfo pthamor, gore hingrnayet yak hafot mis fakitohmor. Nd kmiti kmi gnat yo kmi yifhatikrh yak hafotyuk yak hafot mis fakitohmor. ¹⁶ Nd kmirhu 4-pela konakfom yak hafotmohat rpa hafott tohmom. Tu mounmotrhu yak hafot miye yak hafotmohat, biyef, guref, yo manoh manoh kimbohnefm, yo yurak mingiahuko wayakmo hafott to be nd rpa 2,200 kilomita hafotrpak fakmorm.* ¹⁷ Kmi gnat bbinysoftpno wagnak gna hamuhmohat, 144 mita wafakmot gnat. Nd kmi gnat mounmotr yak hafotmohat yima mifm yak hafote fak hafotmort.

¹⁸ Gnat hingrnamohat, Bro Nkifrar jaspa tahirpaye hingrnamort. Yiro kmi rawothu tamoh tamohm be goripaye hingrnamorm. Nd kmir memom nndo binasohtn kak dbratwor. ¹⁹ Gnat wahtakmo tahim, Bro Nkifrar wonk wonk fnhu nmboretet tahim yakhato nde hta nmboret htfas marnyamort gnat. Barkof wahtakmo tahis, jaspa tahis htamor, yo tfit namba 2 tahis blupela sapia tahis htamor yo tfit namba 3 tahis aget tahis htamor, yo tfit namba 4 tahis grinpela emerar tahis htamor. ²⁰ Yo tfit namba 5 tahis sadonikis tahis htamor, nd sadonikis tahis wonk wonk fnhu nmboretwot, kkupa kanjo fnhu yo ganyom fnhu, inji fnhutt. Yo tfit namba 6 tahis, kkupa kanjo fnhuyet koniran tahis htamor. Yo namba 7 tahis, yelopela fnhuyet krisopres tahis htamor. Namba 8 tahis, ndt womhtet grinpela berir tahis htamor. Namba 9 tahis, ndt nhaf womhtet yelo fnhuyet topas tahis htamor. Namba 10 tahis, krisopres tahis htamor. Namba 11 tahis, haiasin tahis htamor. Namba 12 tahisne womhtet kkupa kanjo fnhuyet ametis tahis htamor. ²¹ Yo 12-pela yifhatikm rom dborior biskfot kutewumm perm. Nde hingrnamorm yifhatikm. Rpa rpa yifhatikm rpa rpa bro perkfot yakhato hingrnamorm. Yihotam rom goripaye hingrnamorm. Memom nndo binasohtn kak dbratwor.

* ^{21:16:} Grik yarmumat nd nom kfiwa 2,200 kilomitakfot rom futamomt “12,000 stadia.” Ndt nom nhai tawisaf marnyakahnom, Jonr kfomohat ka tu 2,200 kilomitakfot kfo mifmor o nd Grikkfot htamo 12,000 stadiakfot wom nndoh shrm kfomor.

²² Nhai wom temperr nd taunt htirmoya. Nhai. To nd hta nngrajohet Bro Nungothet Nkifrari yo Sifsif Yonr to fitha tohetfn nd kmir tfit temperetr rhurmor? Nhai. Tuha tohetfn tuha lotumoumr. ²³ Yo nd taunt nhai marr tarmor o yamt tarmot. Nhai. Tu Bro Nkifrarhu nukefrpat fakmott. Yo Sifsif Yonrn taunthu lamr rhumor. ²⁴ Kmi-yakmiroh met yindarim be nd taunthu nukefrpatn tohhato yaurahm o tamoh tamoh nefm narahmm. Yo bbinysofthu kingm rroh dboriorh dboriorh shrkar nhaf be nd taunrpatt hnerahmm. ²⁵ Nd taunt nhai yifungt tohruhatt, be nd Bro Nkifrar hayuk nukefrpatn kmit rhu hasoraht. Ndnett nhai taunthu yifhatikm frkihruhatmm. Yifhatikm be inji tfanyetm rhu hasorahm. ²⁶ Yima yimaroh wondht, marut, nd taunrpatt hafknirahmt. ²⁷ Tmift nd fasoh fasoh shrkar, yo nd fasoh fasoh nefm nayet yimam yo nd kfo fura bofura hanyet yimam, nhai nd taunt yiruhatm. Be tu nhai mif. Yimam bi rroh yufam bi nd Sisif Yonruh toh nkifraniyuk gonborngtn htetm, romrpam nd taunt fknirahm.

22

Toh yifahtayuk miyukhami bupam yima yanyeft yimam toh yifahtakfot

¹ Mounmotr nd nfri Jerusalemr yak nuhasnimora, ee tfit nd kmitpno tonita tekt fak nuhasmora. Nd tekthu bupam yimam yak yanyeft toh yifahtewum. Nd tekt memom nndo binasohtn kak dbratwot. Nd tek buktt myakmo tkitt, Bro Nkifrari Sifsif Yonr, rofhu sia kingtpno myakmotn, ² tu buha bro yihota danyuha yuhatn tone nanyormot. Nd tekthu mano mano tek thmbeffn mim tohmom. Womm mano mkuko womm manoh mkuko. Nd miroh yukham yima yanyeft yimam toh yifahtakfot. Nd mim, rpa gunyjimr 12-pela taim hirwom. Rpa rpa yamm rpa yiha hirwom. Nd miroh twam kmi kmiroh dbohnet yimam o thatip yayet yimaroh susfayuk miswayem.

³ Bro Nkifrar bi fitoh shrkam o fitoh yimam bi kfir yak thuneft, to be yak thurahrm. Nhai nd nfri kmir rhuruhatm. Bro Nkifrari Sifsif Yonr, rofhu sia kingrn nd kmir rhuruhatr Bro Nkifrar hikwa yimam nd sia kingrn yi loturahm. ⁴ Lotuhato rorhu nyingatikt htiruhamtn rorhu yufat rroh nyimbikmn rhuraht. ⁵ Nhai wom yifungt rhuruhat. Yo nhai wom lamm htaruhatm o marr wom taruhatr. Bro Nkifrarn met yindarim nukeft hiruhatrm king hingrneftn hingrna nkifranirahm.

Jisasr yudbat nierahr

⁶ Nd mounmotr kfo memora, “Nda mrokfot tu kfo mifkfoyet. Yimam nda mrokfot wany yakiokfot. Bro Nun-gothetr, profetroh yima yuhum thu kasinyewa Bro Nkifrar, rorn moun-motr kfo tkrurafmorr. Mounmotr niahato Bro Nkifrarhu hingrna yimam kfo nuhas bonuhasmorm bi nd brbo rhuhnewa nefm.”

⁷ Jisasr kfo memor, “Wawanyko! Na bi brbohwa nianeft. Nda gonborngt yorhwa profet mrokfom wany yakiowa yimam ayindhortwam.”

⁸ Na Jona, nann nd mrokfom wany-moya yo nd rhumo nefm htimoyanm. Nd mrokfo kfo tngm yo nayuk nefm na htihato nd yak nuhasyuk moun-motrhu wurampno msuhhato memoya alotuyanr, ⁹ tfit nd mounmotr kfo memora, “Ni nann mlotu duha! Na to nini ni ninpno hingrniwa profetmpno hingrnanuhwi hingrnanho yimaya. Yo na, na nda gonborngthu mrokfom hikwa yimaroh hingrnanhoyuk hingr-nanho yimaya. Ndnett nann lotu duha. Bro Nkifrarpar lotukfot!” ¹⁰ Yo tfit wom kfot kfo memora, “Yihar bi brbohhnewur, ndnett mirahn nda mrokfot be inji kon kafrohett arhut. ¹¹ Fitoh met yindarim fasoh fasoh nefm nahasiwum, rom to be nd fasoh fasoh nefm nahasokfot. Fitoh met yindarim nd fasoh fasoh hnomha hnomha nefm kakitohwom, rom to be nd fasoh fasoh hnomha nefm nahaso-kfot. Fitoh met yindarim dboriorh dboriorh nefm nahasiwum, rom to be nd dboriorh nefmn nahasokfot. Fitoh met yindarim Bro Nkifrar kanjo toh-wom, rom to be Bro Nkifrar kanjo toh hasokfot. Yihar bi brbohhnewatr nhai wom finji wom finji nakfot. Fitohtet toheft yimam tohwom, to be nd toheft tohkfot.”

¹² Jisasr kfo memor, “Wawanyko! Bi brbohwa nianeft. Yimam nahnayuk nefm htiyak hanyhato ttha nhombra hanyruhanm. ¹³ Nanrpaya barkofa yo nanrpaya wuroha. Na kfomoya shrkar yarim fnahmor yo tfit na kforuha shrkar tfit rim fnahnirahr.

¹⁴ Yimam bi wuskam kifsa rmon htayetm, rom be yindhorkfot. Rom nd toh nkifraniyuk miroh yukham yak yanyeft rom nhai wom mrokfo duhatem. Yo rom nhai wom mrokfo duhatem taun yifhatikthu rim fnahnineft. ¹⁵ To nd yima tipetm o yima grwasetm o forkat haruhetm o yima wasyuk wajim haruhetm o yima htakyuk wajim haruhetm o yaum kanjo ijom tone htfasetm o yima was furetm o tahi rmonm o nkifra tahim lotuyetm o yima kfo fura nhehetm, ndhtet ndhtet metm o yindarim nhai taun yifhatik rim fnahniruhatm. Be inji briaako tohrahrr.

¹⁶ Na Jisasann mounmotr kfo tkrurafmotanr niko siosroh met yinda-riko mrokfom kfo ptha nuhasmorko. Na King Defit frikefthu trhanayuk tu tannefena. Na dbha ksut mfro tarrewa gunya.”

¹⁷ Bro Nkifrarhu Yafothati Sifsif Yonrhu yakyuk mett kfo naku kangf, “Jisase, wania.” To tfit nd gonborngthu mrokfot wanyuk yimako tawo kfo mekfot, “Jisase, wania.” Frohr bupa knewur, nd yimar niakfot. Yimar kangr bupa ayeya, nd yimar niahato nd toh nkifraniyet bupam yehato toh nkifra-rahr. Bro Nkifrar be he furarahrr.

Jonr bro kfo duka mrokfom kfomo yuhat

¹⁸ Na Jona bro kfo duka mrokfot kahukanm nda gonborngt yorhwa profet mrokfom wanuka met yindarim. Fitoh yimar nda profetm pthayuk mrokfom htihato tfit turoh dukefmn wom nfri mrokfo nmbuham rihtekrm, nd yimar, Bro Nkifrar nda gonborngt kfoyuk krhopam nd yima yak thombat, wom nfri krhopam htahutarahrr. ¹⁹ O wom yimar gonborngt rhuyuk wom profet mrokfom fak thurm, nhai Bro Nkifrarhu nfri kmir fkniruhatr. Yo nd toh nkifrayuk mishu yukham yimam yehato toh nkifrewam, nd mishu yuk-ham nhai ror yehato toh nkifraruhatr.

²⁰ Nd rhuruha nefm kfo ptha srhwa yimar kfo kangr, “Na yudbat nia mifruha.” To be inji. Bro Nungothet Jisase, wania. ²¹ Bro Jisasrhu yuhuwaeft atuh kasi bugatwatm met yindari bugam.

Read the New Testament daily

January

date	Scripture
1	Mt 1.1-2.12
2	Mt 2.13-3.6
3	Mt 3.7-4.11
4	Mt 4.12-25
5	Mt 5.1-26
6	Mt 5.27-48
7	Mt 6.1-24
8	Mt 6.25-7.14
9	Mt 7.15-29
10	Mt 8.1-17
11	Mt 8.18-34
12	Mt 9.1-17
13	Mt 9.18-38
14	Mt 10.1-23
15	Mt 10.24-11.6
16	Mt 11.7-30
17	Mt 12.1-21
18	Mt 12.22-45
19	Mt 12.46-13.23
20	Mt 13.24-46
21	Mt 13.47-14.12
22	Mt 14.13-36
23	Mt 15.1-28
24	Mt 15.29-16.12
25	Mt 16.13-17.9
26	Mt 17.10-27
27	Mt 18.1-22
28	Mt 18.23-19.12
29	Mt 19.13-30
30	Mt 20.1-28
31	Mt 20.29-21.22

February

date	Scripture
1	Mt 21.23-46
2	Mt 22.1-33
3	Mt 22.34-23.12
4	Mt 23.13-39
5	Mt 24.1-28
6	Mt 24.29-51
7	Mt 25.1-30
8	Mt 25.31-26.13
9	Mt 26.14-46
10	Mt 26.47-68
11	Mt 26.69-27.14
12	Mt 27.15-31
13	Mt 27.32-66
14	Mt 28.1-20
15	Mk 1.1-28
16	Mk 1.29-2.12
17	Mk 2.13-3.6
18	Mk 3.7-30
19	Mk 3.31-4.25
20	Mk 4.26-5.20
21	Mk 5.21-43
22	Mk 6.1-29
23	Mk 6.30-56
24	Mk 7.1-23
25	Mk 7.24-8.10
26	Mk 8.11-9.1
27	Mk 9.2-29
28	Mk 9.30-10.12

date	Scripture
1	Mk 10.13-31
2	Mk 10.32-52
3	Mk 11.1-26
4	Mk 11.27-12.17
5	Mk 12.18-37
6	Mk 12.38-13.13
7	Mk 13.14-37
8	Mk 14.1-21
9	Mk 14.22-52
10	Mk 14.53-72
11	Mk 15.1-47
12	Mk 16.1-20
13	Lu 1.1-25
14	Lu 1.26-56
15	Lu 1.57-80
16	Lu 2.1-35
17	Lu 2.36-52
18	Lu 3.1-22
19	Lu 3.23-38
20	Lu 4.1-30
21	Lu 4.31-5.11
22	Lu 5.12-28
23	Lu 5.29-6.11
24	Lu 6.12-38
25	Lu 6.39-7.10
26	Lu 7.11-35
27	Lu 7.36-8.3
28	Lu 8.4-21
29	Lu 8.22-39
30	Lu 8.40-9.6
31	Lu 9.7-27

date	Scripture
1	Lu 9.28-50
2	Lu 9.51-10.12
3	Lu 10.13-37
4	Lu 10.38-11.13
5	Lu 11.14-36
6	Lu 11.37-12.7
7	Lu 12.8-34
8	Lu 12.35-59
9	Lu 13.1-21
10	Lu 13.22-14.6
11	Lu 14.7-35
12	Lu 15.1-32
13	Lu 16.1-18
14	Lu 16.19-17.10
15	Lu 17.11-37
16	Lu 18.1-17
17	Lu 18.18-43
18	Lu 19.1-27
19	Lu 19.28-48
20	Lu 20.1-26
21	Lu 20.27-47
22	Lu 21.1-28
23	Lu 21.29-22.13
24	Lu 22.14-34
25	Lu 22.35-53
26	Lu 22.54-23.12
27	Lu 23.13-43
28	Lu 23.44-24.12
29	Lu 24.13-53
30	Jo 1.1-28

date	Scripture
1	Jo 1.29-51
2	Jo 2.1-25
3	Jo 3.1-21
4	Jo 3.22-4.3
5	Jo 4.4-42
6	Jo 4.43-54
7	Jo 5.1-23
8	Jo 5.24-47
9	Jo 6.1-21
10	Jo 6.22-40
11	Jo 6.41-71
12	Jo 7.1-29
13	Jo 7.30-52
14	Jo 7.53-8.20
15	Jo 8.21-30
16	Jo 8.31-59
17	Jo 9.1-41
18	Jo 10.1-21
19	Jo 10.22-42
20	Jo 11.1-53
21	Jo 11.54-12.19
22	Jo 12.20-50
23	Jo 13.1-30
24	Jo 13.31-14.14
25	Jo 14.15-31
26	Jo 15.1-27
27	Jo 16.1-33
28	Jo 17.1-26
29	Jo 18.1-24
30	Jo 18.25-19.22
31	Jo 19.23-42

date	Scripture
1	Jo 20.1-31
2	Jo 21.1-25
3	Ap 1.1-26
4	Ap 2.1-47
5	Ap 3.1-26
6	Ap 4.1-37
7	Ap 5.1-42
8	Ap 6.1-15
9	Ap 7.1-29
10	Ap 7.30-50
11	Ap 7.51-8.13
12	Ap 8.14-40
13	Ap 9.1-25
14	Ap 9.26-43
15	Ap 10.1-33
16	Ap 10.34-48
17	Ap 11.1-30
18	Ap 12.1-23
19	Ap 12.24-13.12
20	Ap 13.13-41
21	Ap 13.42-14.7
22	Ap 14.8-28
23	Ap 15.1-35
24	Ap 15.36-16.15
25	Ap 16.16-40
26	Ap 17.1-34
27	Ap 18.1-21
28	Ap 18.22-19.12
29	Ap 19.13-41
30	Ap 20.1-38

date	Scripture
1	Ap 21.1-16
2	Ap 21.17-36
3	Ap 21.37-22.16
4	Ap 22.17-23.10
5	Ap 23.11-35
6	Ap 24.1-27
7	Ap 25.1-27
8	Ap 26.1-32
9	Ap 27.1-20
10	Ap 27.21-44
11	Ap 28.1-31
12	Ro 1.1-17
13	Ro 1.18-32
14	Ro 2.1-24
15	Ro 2.25-3.8
16	Ro 3.9-31
17	Ro 4.1-12
18	Ro 4.13-5.5
19	Ro 5.6-21
20	Ro 6.1-23
21	Ro 7.1-14
22	Ro 7.15-8.6
23	Ro 8.7-21
24	Ro 8.22-39
25	Ro 9.1-21
26	Ro 9.22-10.13
27	Ro 10.14-11.12
28	Ro 11.13-36
29	Ro 12.1-21
30	Ro 13.1-14
31	Ro 14.1-23

date	Scripture
1	Ro 15.1-21
2	Ro 15.22-16.7
3	Ro 16.8-27
4	1Ko 1.1-17
5	1Ko 1.18-2.5
6	1Ko 2.6-3.4
7	1Ko 3.5-23
8	1Ko 4.1-21
9	1Ko 5.1-13
10	1Ko 6.1-20
11	1Ko 7.1-24
12	1Ko 7.25-40
13	1Ko 8.1-13
14	1Ko 9.1-18
15	1Ko 9.19-10.13
16	1Ko 10.14-11.1
17	1Ko 11.2-16
18	1Ko 11.17-34
19	1Ko 12.1-26
20	1Ko 12.27-13.13
21	1Ko 14.1-17
22	1Ko 14.18-40
23	1Ko 15.1-28
24	1Ko 15.29-58
25	1Ko 16.1-24
26	2Ko 1.1-11
27	2Ko 1.12-2.11
28	2Ko 2.12-17
29	2Ko 3.1-18
30	2Ko 4.1-12
31	2Ko 4.13-5.10

date	Scripture
1	2Ko 5.11-21
2	2Ko 6.1-13
3	2Ko 6.14-7.7
4	2Ko 7.8-16
5	2Ko 8.1-15
6	2Ko 8.16-24
7	2Ko 9.1-15
8	2Ko 10.1-18
9	2Ko 11.1-15
10	2Ko 11.16-33
11	2Ko 12.1-10
12	2Ko 12.11-21
13	2Ko 13.1-14
14	Ga 1.1-24
15	Ga 2.1-16
16	Ga 2.17-3.9
17	Ga 3.10-22
18	Ga 3.23-4.20
19	Ga 4.21-5.12
20	Ga 5.13-26
21	Ga 6.1-18
22	Ef 1.1-23
23	Ef 2.1-22
24	Ef 3.1-21
25	Ef 4.1-16
26	Ef 4.17-5.2
27	Ef 5.3-33
28	Ef 6.1-24
29	Fl 1.1-26
30	Fl 1.27-2.18

date	Scripture
1	Fl 2.19–3.6
2	Fl 3.7–4.1
3	Fl 4.2–23
4	Kl 1.1–20
5	Kl 1.21–2.7
6	Kl 2.8–23
7	Kl 3.1–17
8	Kl 3.18–4.18
9	1Te 1.1–2.9
10	1Te 2.10–3.13
11	1Te 4.1–5.3
12	1Te 5.4–28
13	2Te 1.1–12
14	2Te 2.1–17
15	2Te 3.1–18
16	1Ti 1.1–20
17	1Ti 2.1–15
18	1Ti 3.1–16
19	1Ti 4.1–16
20	1Ti 5.1–25
21	1Ti 6.1–21
22	2Ti 1.1–18
23	2Ti 2.1–21
24	2Ti 2.22–3.17
25	2Ti 4.1–22
26	Ta 1.1–16
27	Ta 2.1–14
28	Ta 2.15–3.15
29	Fm 1.1–25
30	Hi 1.1–14
31	Hi 2.1–18

date	Scripture
1	Hi 3.1-19
2	Hi 4.1-13
3	Hi 4.14-5.14
4	Hi 6.1-20
5	Hi 7.1-19
6	Hi 7.20-28
7	Hi 8.1-13
8	Hi 9.1-10
9	Hi 9.11-28
10	Hi 10.1-18
11	Hi 10.19-39
12	Hi 11.1-16
13	Hi 11.17-31
14	Hi 11.32-12.13
15	Hi 12.14-29
16	Hi 13.1-25
17	Je 1.1-18
18	Je 1.19-2.17
19	Je 2.18-3.18
20	Je 4.1-17
21	Je 5.1-20
22	1Pi 1.1-12
23	1Pi 1.13-2.10
24	1Pi 2.11-3.7
25	1Pi 3.8-4.6
26	1Pi 4.7-5.14
27	2Pi 1.1-21
28	2Pi 2.1-22
29	2Pi 3.1-18
30	1Jo 1.1-10

date	Scripture
1	1Jo 2.1-17
2	1Jo 2.18-3.2
3	1Jo 3.3-24
4	1Jo 4.1-21
5	1Jo 5.1-21
6	2Jo 1.1-13
7	3Jo 1.1-14
8	Ju 1.1-25
9	Re 1.1-20
10	Re 2.1-17
11	Re 2.18-3.6
12	Re 3.7-22
13	Re 4.1-11
14	Re 5.1-14
15	Re 6.1-17
16	Re 7.1-17
17	Re 8.1-13
18	Re 9.1-21
19	Re 10.1-11
20	Re 11.1-19
21	Re 12.1-18
22	Re 13.1-18
23	Re 14.1-20
24	Re 15.1-8
25	Re 16.1-21
26	Re 17.1-18
27	Re 18.1-24
28	Re 19.1-21
29	Re 20.1-15
30	Re 21.1-27
31	Re 22.1-21